


# Tomunga Hel Heueu Ngana



Genesis and the New Testament in the Lote Language of Papua

New Guinea

**Tomunga Hel Heueu Ngana**  
**Genesis and the New Testament in the Lote Language of Papua New Guinea**  
**Buk Stat na Nupela Testamen long tokples Lote long Niugini**

copyright © 2009, 2019 Wycliffe Bible Translators, Inc.

Language: Lote

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-11-09

---

PDF generated using Haiola and XeLaTeX on 11 Nov 2022 from source files dated 9 Nov 2022  
89f57add-4ab2-5e6d-af7e-7ec7955d8f95

## Contents

Talun Ngana . . . . .	1
Mateus . . . . .	74
Mak . . . . .	133
Lukas . . . . .	165
Ioanes . . . . .	224
Ume . . . . .	266
Rom . . . . .	325
1 Korin . . . . .	354
2 Korin . . . . .	379
Kalasia . . . . .	396
Epeses . . . . .	405
Pilipai . . . . .	414
Kolosi . . . . .	420
1 Tesalonika . . . . .	426
2 Tesalonika . . . . .	432
1 Timoti . . . . .	435
2 Timoti . . . . .	443
Titus . . . . .	449
Pilemon . . . . .	453
Hipru . . . . .	455
Ieims . . . . .	476
1 Petrus . . . . .	483
2 Petrus . . . . .	491
1 Ioanes . . . . .	496
2 Ioanes . . . . .	502
3 Ioanes . . . . .	503
Iut . . . . .	504
Hemallaha . . . . .	507

## Talun Ngana

### *Nga Talun Ngana Toto*

<sup>1</sup> Nga talun ngana toto NeHalang ala hote tapa pe ich pe ure lochloch ngana. <sup>2</sup> Pe ich hot ke nek ero kura pe ute tuia ero ke pomanga heueu ana nei. Kileng au ala mana nga ech sana lomona. Pe NeHalang opene pomalaka nga tuttula palaungana nge song ke lala pe atat nga ona.

<sup>3</sup> Pe NeHalang hele, “Kileng mesehe ngana lohot.” Pe la kileng mesehe ngana lohot. <sup>4</sup> Pe NeHalang naue ke pomau pe letena urana ia. Pe helasia kileng mesehe ngana nga kileng au ngana. <sup>5</sup> NeHalang hetue kileng mesehe ngana ke “etue,” pe kileng au ngana ke “miliko.” Iok miliko sio pe uach mule nga etue elle ngana.

<sup>6</sup> Pe NeHalang hele, “Ech chach nga tunangana pe kileng koana ngana heke iri ke te la nga hele pe hele.” <sup>7</sup> Ke NeHalang poi hote kileng koana ngana ke ma hele ech nenge tu nga lut pe ech nenge tu nge sio, pe la lohot ke pomau. <sup>8</sup> NeHalang hetue kileng koana neu ke “tapa.” Iok miliko sio pe uach mule nga etue nai ngana.

<sup>9</sup> Pe NeHalang hele, “Ech nenge tu nga kileng koana nenge sio lake hekirau ke munna elle pe kileng hal ngana hota.” Pe la lohot ke pomau. <sup>10</sup> NeHalang hetue kileng hal ngana ke “ich.” Pe ech nenge heuirau ke munna elle neu hetue ke “ruach.” Pe NeHalang esia ke pomau pe letena urana ia.

<sup>11</sup> Ol pe NeHalang hele, “Heilil pe ae mur te haka nga ich. Heilil mur nenge te heiei pe te hei hot mulmule tuturia mur pe ae kuenkuena ngana mur nga ich nenge te hei

pe tuturia mur te tu teu mule nga iri siporia ngana ngaria mur.” Pe la ure nemur te lohot ke pomau. <sup>12</sup> Ke heilil kuenkuena ngana mur nga ich, te hei hot mulmule tuturia mur pe ae kuenkuena ngana mur pule tehei pe tuturia mur tetu teu mulmule nga ngana ngaria mur. Pe NeHalang esia pe letena urana ia. <sup>13</sup> Iok miliko sio pe uach mule nga etue mol ngana.

<sup>14</sup> Pe NeHalang hele, “Lemenge lohot nga tapa sana ke ma tote etue nga miliko pe heilang ia etue mur pe hesinga mur pe etue papalaungana mur. <sup>15</sup> Pe te lohot ke iri lemenga nenga tapa sana ke te tualeme hatal ia ich.” Pe la ure nemur te lohot ke pomau. <sup>16</sup> Pe NeHalang ume ke lemenga papalauna nai. Umeia chaia nenge tualeme ke palaungana toto nga sinanga pe teio nenge tualeme mana nga miliko. Pe umeia itoch mur pule. <sup>17</sup> NeHalang talue iri nga tapa sana ke te tualeme hatalia ich, <sup>18</sup> ke e tualeme nga sinanga pe e nga miliko ke ma tote kileng mesehe ngana nga kileng au ngana. Pe NeHalang esia ure neu nge lohot ke pomau pe letena urana ia. <sup>19</sup> Iok miliko sio pe uach mule nga etue henel ngana.

<sup>20</sup> Pe NeHalang hele, “Ruach muta ia ruo kuenkuena ngana mur ure lochloch ngana nenge ruach letena ana ia. Pe ngie mur lochloch te kangkanga haka ich ana pe lehe tele rara nga kileng koana nenga tapa sana.”

<sup>21</sup> Ke NeHalang ala hote huros papalau ngana mur ke te muta teu nga ruach, luluch nga ure maulul ngana kuenkuena ngana mur nenge te i rarara nga aria mata mur nga ruach letena. Pe ngie kuenkuena ngana mur nenge saharia (pe te lehe rarara) nga aria mata mur (nga tapa sana.) Pe NeHalang naue ke pomau pe letena urana ia. <sup>22</sup> Pe

NeHalang pete iri pe hele, “A hala lele ke imo halang toto pe a ronge ruach pe ech lochloch ngana. Pe imo ngie mur, a hala lele pule pe a lohot ke imo halang toto nga ich.” <sup>23</sup> Iok miliko sio pe uach mule nga etue lime ngana.

<sup>24</sup> Pe NeHalang hele, “Ure maulul ngana mur te lohot nga ich nga aria mata kuenkuena ngana mur. Pe huros marana ngana mur pe ure nemur nenge te sere olole nga ich pe huros inolo ngana mur te lohot pule nga aria mata mur.” Pe la ure nemur te lohot ke pomau. <sup>25</sup> Ke NeHalang ume hote huros marana ngana mur nga aria mata kuenkuena ngana mur pe ume hote huros inolo ngana mur nga aria mata kuenkuena ngana mur pe ume hote ure nemur nenge te sere olole nga ich nga aria mata kuenkuena ngana mur. Pe NeHalang naue ke pomau pe letena urana ia.

<sup>26</sup> Pe NeHalang hele, “Lape ta ume hote iri nenge iri non pe nakuria pomange ita toto ke te nauele ruo mur nga ruach letena pe ngie mur nga tapa sana pe huros marana ngana mur pe huros inolo ngana mur lochloch pe ure lochloch ngana nenge te sere olole nga ich.”

<sup>27</sup> Ke pomalam NeHalang ume hote ita non ngana ke nakura pomange I.

Ke NeHalang ume hote ita ke nakura pomange I toto; pe ume hote ita ke hehei pe hana.

<sup>28</sup> Pe NeHalang pete iri pe hele lange iri ke teke, “Lape a hoho pe a hala lele ke imo halang toto ke a hemute ich pe anau ele. Pe anau ele ruo mur nga ruach pe ngie mur nga tapa sana pe ure lochloch ngana nenge te sere olole nga ich nei.”

<sup>29</sup> Pe NeHalang hele ke teke, “A longo at! Heilil nemur nenge nganangana lohot nga ich letena pe ae mur nenge tutuna mur te tu

teu nga ngana ngaria mur; e tunge lange imo ke amo ngaunga ia. <sup>30</sup> Pe e tunge ure nemur ke amo ngaunga ia pule; Huros mur lochloch nga ich ngie mur lochloch nga tapa sana pe ure lochloch nenge te sere olole nga ich pe ure lochloch nenge eingaria tu teu nge iri. Pe E tunge eleding lochloch ke amo ngaunga ia pule.” Pe la ure nemur te lohot ke pomau.

<sup>31</sup> NeHalang nau la nga ure lochloch ngana nge umeia pe esia nge urana toto. Iok miliko sio pe uach mule nga etue ratele elle ngana.

## 2

<sup>1</sup> Ke NeHalang ala hote tapa pe ich pe ure lochloch ngana nenge te tu heueu nei ke pomalam mana.

<sup>2</sup> NeHalang heulo hote nena ume lochloch ngana nenge popoia ke het pe nga etue rahtele nai ngana tah eingana pe tu mana ol. <sup>3</sup> Ke nga etue rahtele nai ngana NeHalang ume ero ol. Tu mana pe pete etue neu pe poia ke i etue nenge heo ngana.

### *Antam Pe Eua*

<sup>4</sup> Ke tapa pe ich ana nananga pomalam mana. NeHalang ume hote ume nenge Eten nga etue nenge ala hote tapa pe ich.

<sup>5</sup> NeHalang ala hote tapa pe ich pe heilil pe ae mur te haka ero iange pitte ero pe none nge tutua ngaunga nga ich ero. <sup>6</sup> I manmanna ke pitte ero pe mo sio nga ich lochloch pe pach haka ke pomanga ech matana ke lome ich sana lochloch. <sup>7</sup> Ol pe Non Soke NeHalang eu hiraua ich unne ke pip hot non ia. Pe iu teua eingana nenge maulinga ana langa non neu ina ponna pe non neu sechsech haka sapele.

<sup>8</sup> Non Soke NeHalang tue ume e nga chaia haka ngana nge Eten pe here non nenge alahote nem ke tu

ia. <sup>9</sup> Pe Non Soke NeHalang poia ae nenge urana pe ngaunga ia ke te haka nga ich nenge ala hote. Pe ae nenge maulinga ana mes nga ume tunangana pe ae nenge lete matana ngana ana nga utar nenge urana pe utar nenge poreke mes pule.

<sup>10</sup> Pe ech tana e lele hot nge Paratiso ke tunge ech langa ume nem. Pe ana ech poke hot ke ech tana iri henel.

<sup>11</sup> Pe ech tana nenge lele nga ich sana nenge um chalemlem ngana tuia nge Hauila, ene ech Pison. <sup>12</sup> Pe um chalemlem ngana pe ae nenge inangaria heech tetu nga ich neu pule.

<sup>13</sup> Ech nenge Kion i ech tana nei ngana ia nenge lele nga ich lochloch nge Kus. <sup>14</sup> Pe ech tana molngana ene Taikiris pe lele nga ich lochloch nge Asiria nga chaia haka ngana. Pe ech tana henel ngana ene Uprates.

<sup>15</sup> Iok Non Soke NeHalang talue non neu ke umume pe nauelele ume neu. <sup>16</sup> Non Soke NeHalang hele lange non neu ke teke, “O ngau nga ae lochloch ngana nenga ume <sup>17</sup> pe ae nenge lete matana ngana nga poinga nge urana pe poinga nge poreke o ngaua ero. Iange nenge teke o ngaua o mete sapele.”

<sup>18</sup> Iok Non Soke NeHalang hele, “Non nei i toro mana tu pe poreke i. Pomalam lape e ume hote neingana e nge pomange i ke halaulaua i.”

<sup>19</sup> Non Soke NeHalang ume hote ur inolo mur pe ngie mur nga tapa sana pe ure nemur nenge te amamo nga ich ke het pe laia iri nge Antam ke hetue iri nga eria mur. <sup>20</sup> Pe Antam tunge kolok mur eria pe ngie mur nga tapa sana pe ure inolo mur nga eria.

Pe Antam pekngana pele nge halaua i ero. <sup>21</sup> Pe Non Soke NeHalang poia Antam ke mamani hun toto. Antam mamani hun toto pe NeHalang siu hote kina e nga alisina pe poi hele mule nga ulina. <sup>22</sup> Non Soke NeHalang ume hote heie nga Antam kina nenge siu hote nga alisina ke het pe tunge i lange Antam.

<sup>23</sup> Pe Antam hele, “Ute nem nakuna mange iau iam.

Pe lape e hetue i ke ‘hei’ iange i lohote  
nga kik pe nga mirak.”

<sup>24</sup> Ke pomalam none ile temene pe tana pe la ke tu luluch nge nehei pe iri nai te lohote ke iri elle.

<sup>25</sup> Antam iri nai Eua singiria lachlach mana pe tetu ke elle pe te meia iri ero.

### 3

#### *Antam Pe Eua Te Longo-ole*

<sup>1</sup> Non Soke NeHalang ume hote ur inolo mur lochloch ke urana pe ilimo mana nge letena matana toto nge iri lochloch pe hele lange hei neu ke teke, “NeHalang hele ke teke, ‘A ngaua ae e nganagana nga ume nei ero, ae?’”

<sup>2</sup> Pe hei neu hele langa ilimo ke teke, “Mo ngaua ae lochloch ngana ngaria <sup>3</sup> pe ae nenge mes nga ume tuna ngana NeHalang hele ke teke mo ngaua nganagana ero iange lape mo mete.”

<sup>4</sup> Pe ilimo neu hele lange hei neu ke teke, “Ah! A mete ero paiam!”

<sup>5</sup> “Tange NeHalang eteia ke letemo matana toto pe a pomange i pe a eteia utar nenge urana pe poreke.”

<sup>6</sup> Hei neu naulele ae neu nganagana nge nakuna urana toto nge ngaunga ia pe letematana ngana ana ia, pomalam mene ke ngaua pe tunge lange ene ke ngau pule. <sup>7</sup> Ol pe iri nai leteria matana pe te eteia ke te lachlach. Pomalam te aonia ae pik ina ke te male hite nge iri.

<sup>8</sup> Pe nga kileng makuk ngana Antam pe nehei te amneia Non Soke NeHalang meena ngana nge i olole nga ume, pe iri nai te talkome ana nga ume letena. <sup>9</sup> Pe Non Soke NeHalang iua Antam ke teke, “Antam ou! Iong ngai?”

<sup>10</sup> Pe Antam tuacholia ke teke, “Iau koi e amneia meena ngam nga ume letena pe e talkome iange e lachlach mana?”

<sup>11</sup> Pe NeHalang hele, “Ia itei nenge hele lange iong ke teke o lachlach? Nakuna nenge o ngaua ae ngana

ngana nenge e hele lange iong ke e teke o ngaua ero iam! Ae?"

<sup>12</sup> Pe non neu hele, "Hei nenge o ume hote pe o tunge at nge iau koi nenge tunge ae ngana ngana nei at nge iau ke e ngaua."

<sup>13</sup> Pe Non Soke NeHalang onteia hei neu ke teke, "Pomerei toto nenge o poia poinga poreke ngana nei?"

Pe hei neu hele lange NeHalang ke teke, "Ilimo laka channanga ia iau ke e ngaua ae ngana ngana nem."

<sup>14</sup> Pomalam Non Soke NeHalang hele lange ilimo neu ke teke, "Iong toro mana lape o mene melmelenga palaungana pe huros mur ero.

Nga etue lochloch ngana nenge o tu nga ich,

lape o amo mana nga sam pe o ngau manmana maruchrue iange o channanga ia hei nei.

Pe lape o amnea melmelenga palaungana.

<sup>15</sup> Pe lape e poia iong ke lem ngarang hei nei pe i nena ngarang iong.

Pe tum lape nena ngarang hei nei tuna.

Ke nge he hei nei tuna lape hepapar hite palpalum

pe iong lape o tele apena."

<sup>16</sup> Pe NeHalang hele lange hei neu ke teke,

"Lape o amnea melmelenga palaungana nga etue nenge sam

pe pule nga etue nenge o hoho ia.

Pe mutem tau tote em pe o nanas mene em nena helenga."

<sup>17</sup> Pe NeHalang hele lange Antam, "Iong o longo taua lem hei ke o ngaua ae nganangana nenge e hetoro sue lange iong ke e teke o ngaua ero.

"Ke lape o amnea melmelenga palaungana nga

o tu ngam nga ich nei iange lape e poia ich nei ke poreke pe am ngaunga haka ke urana ero

pe lape o puo teu tote iong nga ume laka o ngau.

<sup>18</sup> Pe kiki nenge matantana pe eilil mur lape te au hite ich,

pe lape o ngaua ure nemur nenge te lohaka nga ich.

<sup>19</sup> Pe o ume ke kerkereng toto ke hines sio ia iong, pomalam lape o ngau.

Pe o pur manmana ume ke pomalam mana ke la het nga etue nenge o la mule

nga ich, iange o lohohot nga ich."

<sup>20</sup> Antam hetue ne hei ke ene, "Eua" iange i hulua lochloch ngana nenge tetu ke te maulul nga ich nei reette palaungana ia.

<sup>21</sup> Non Soke NeHalang umeia Antam pe nehei aria malenga nga huros ulina ke te mele.

<sup>22</sup> Pe Non Soke NeHalang hele, "Non nei lohohot ke pomange ita ke eteia utar nenge urana pe poreke ke pomalam ta nauele ke ngaua ae nenge tunge maulinga ke koko nem nganangana e ero, iange lape tu ke maulul ke koko."

<sup>23</sup> Ke pomalam Non Soke NeHalang heo ele iri nai nga ume nenge Paratiso, pe te ume mana nga ich nenge Non Soke ala hote iri ia. <sup>24</sup> Iok NeHalang lope hote iri pe talue angkelo solaki ngana e ke nauele ume ilina hele nenga chaia haka ngana. Pe mese chalemlem ngana e nge matana kaliu ala hetaliliu elele ana ae.

## 4

### *Kaen Pe Apel*

<sup>1</sup> Antam ma luluch nge nehei Eua ke sana pe hoe tuna Kaen. Pe Eua hele, "Nga Non Soke nena halaunga e hoe tuk nei." <sup>2</sup> Iok nga hoena Eua hoho mule Kaen tina e pe hetue ke ene Apel.

Pe Apel lohohot ke i non nenge nauelele sipsip pe kolok mur pe Kaen i non nenge umume nga ume. <sup>3</sup> Mala pol pe Kaen lule nena ngaunga hel nga ume ke poi nena tunginga ia lange Non Soke. <sup>4</sup> Pe Apel mene nena sipsip tengene ana mur hel nge urana toto ke poi tunginga ia pule. Pe Non Soke mutena taua Apel nena tunginga. <sup>5</sup> Pe Kaen nena tunginga



Non Soke mutena taua ero. Pomalam Kaen letena inin pe iech ero toto.

<sup>6</sup> Pe Non Soke onteia Kaen ke teke, “Iong mam letem inin pe o iech ero ia utar?” <sup>7</sup> Nenge teke o poia poinga nge pengpeng lape e longele lem tunginga. Pe nenge teke o poia poinga nge pengpeng ero, lape poinga poreke ngana heporeke tote iong. Ke poinga poreke ngana mutena tau tote iong pe iong o mes ke kerkereng ke o hekousue.

<sup>8</sup> Iok nga hoena Kaen hele lange tina Apel ke teke, “Ita nai tala ke ta i rara nga ich nenge ana heilil mana!” Iok iri nai tela ke te i rara nga lamau pe Kaen ngira taua tina Apel pe hune i ke mete.

<sup>9</sup> Pe Non Soke onteia Kaen ke teke, “Kaen! Tim Apel ngai?”

Pe Kaen hele, “E eteia i ero. Ia iau mam ak ume ma nenge e nauelele i mam?”

<sup>10</sup> Pe Non Soke NeHalang hele, “Pomere nenge o poia poinga poreke ngana nem mam?” O longo la, tim eina kou lele nga ich pe tang atat nge Iau. <sup>11</sup> Pe ich kou hanna pangpanga ke tontone tim eina nenge perim poia. Ke heueu nei, lape lek keke iong ke o i rara mana nga ich. <sup>12</sup> Pe nga etue nenge o umume am nga ich, ute pele nge lape haka ke nek ero. Pe lape mulim e nge o tu ia ero. Lape o i rara manmana nga ich.

<sup>13</sup> Pe Kaen hele lange Non Soke ke teke, “Melmelenga nenge o tunge at nge iau nem, palaungana toto pe lape heporeke tote iau iam. <sup>14</sup> O nau at, heueu nei o lope hote iau lamai pe lape e la ke e talkome toto nga matam ol. Lape e i rara mana nga ich iange mulik e nge e tuia ero. Pe nenge teke mele saolia iau lape hune iau ke e mete.”

<sup>15</sup> Pe Non Soke hele lange i ke teke, “O matau ero! Nenge teke mele hune iong, mele nem lape ameia ana melmelenga nge palaungna toto.” Ol pe Non Soke tal heke lala e lange i ke mele nenge saolia i hune i ero. <sup>16</sup> Iok Kaen ua hot nga Non Soke matana

pe la ke tu nga ich nenge ene “Irrara.” Ana ich tu nga kilenge ilina hele nenga lut nga ume nenge Paratiso.

<sup>17</sup> Iok Kaen maluluch nge nehei ke sana pe hoe tuna tamane ngana e pe hetue ke ene Enok. Pe Kaen talun ke hemes heke tuele tana e pe heto heke nge tuna Enok. <sup>18</sup> Pe Enok tuna laka Irat pe Irat tuna laka Mehusael pe Mehusael tuna laka Metusael pe Metusael tuna laka Lamek.

<sup>19</sup> Lamek lei ke hehei nai. Elle ene Atah pe e ene Sila. <sup>20</sup> Pe Ata sana ke hoe tuna tamane ngana e nge ene Iapal. Pe iri nenge te mama nga pelpele pe te nauele reria sipsip mur pe kolok mur reette laka Iapal. <sup>21</sup> Pe Iapal tina laka Iupal. Pe iri lochloch nenge te palpal hario pe milollo pe te iuiua iu reette laka Iupal. <sup>22</sup> Pe Lamek nehei Sila hoe tuna tamane ngana e nge ene Tupal-Kaen, pe liuna ene laka Nama. Tupal-Kaen i non nenge ume hotot urelu kuenkuena ngana mur nga ure nenge ene bras pe aen.

<sup>23</sup> Pe nga etuene Lamek hele lange nehei mur ke teke,

“He Ata pe he Sila a longo at nge iau;  
Ne Lamek nehei mur, a longo at  
nga lek helenga.

Non e pal poreke tote iau pe e hune  
i ke mete,  
pe non lomele ngana e nosia iau  
pe e hune i ke mete.

<sup>24</sup> Ke nenge teke mele hune Kaen  
lape takisia melmelenga nge  
palaungana toto.  
Pe nenge teke mele hune iau lape  
takisia ana melmelenga nge  
palaungana toto ol.”

<sup>25</sup> Pe Antam maluluch mule nge nehei pe hoho mule tuna tamane ngana e pe hetue ene ke Set pe nehei hele, “Ne Halang tung mule tuk nei ke mene Apel munna nenge Kaen hune.” <sup>26</sup> Pe Set hoe tuna tamane ngana e pe hetue ke ene Enos. Nga etue neu hehei pe hana te talun ke te heto heke Non Soke ene ke te teke, “Ta heto heke NeHalang.”



## 5

### *Antam Pe Na Tete Mur*

<sup>1</sup> Alalaha nei te hasia ke te nana urume Antam pe nena tete mur.

Nga etue nenge Ne Halang alahote hehei pe hana, umeia iri ke nakuria poma nge I sipona. <sup>2</sup> Ne Halang ume hot ke none pe heie. Pe pete iri pe hetue iri ke hehei pe hana. Ke non nenge lohote tala nena tete mur koi nei.

<sup>3</sup> Antam ana hesinga iri ana non kina lime pa ana non kina elle pe analoch (130) pe hoe tuna tamane e nge nakuna pomange i pengpeng pe hetue ke ene Set. <sup>4</sup> Ke het pe Antam tu mule ke ana hesinga iri ana non kina iri ana non kina nai (800) pe hoho mule tutuna mur tatamanna pe heheina hel pule. <sup>5</sup> Ke Antam tu nga ich ke ana hesinga iri ana non kina iri ana non kina nai pe ana non kina lime pe ana non kina elle pe analoch (930) pe mete.

<sup>6</sup> Pe Set tu ke ana hesinga iri ana non kina lime pe lime (105) pe hoe tuna e pe hetue ke ene Enos. <sup>7</sup> Ke het pe Set tu mule ke hesinga iri ana non kina iri ana non kina nai pe rahtele nai (807) pe hoho mule tutuna mur tatamanna pe heheina hel pule. <sup>8</sup> Ke Set tu nga ich ke ana hesinga iri ana non kina iri ana non kina nai pe ana non kina lime pe analoch pe nai (912) pe mete.

<sup>9</sup> Pe Enos tu ke ana hesinga iri ana non kina iri henel pe analoch (90) pe hoe tuna Kanan. <sup>10</sup> Ke het pe Enos tu mule ke hesinga iri ana non kina iri ana non kina nai pe analoch pe lime (815) pe hoho mule tutuna mur tatamanna pe heheina hel pule. <sup>11</sup> Ke Enos tu nga ich ke ana hesinga iri ana non kina iri ana non kina nai pe ana non kina lime pe lime (905) pe mete.

<sup>12</sup> Pe Kenan tu ke ana hesinga iri ana non kina iri mol pe analoch (70) pe hoe tuna Mahalalel. <sup>13</sup> Ke het pe Kenan tu mule ke ana hesinga iri ana non kina iri ana non kina nai pe ana non kina nai (840) pe hoho mule

tutuna mur tatamanna pe heheina hel pule. <sup>14</sup> Ke Kenan tu nga ich ke ana hesinga iri ana non kina iri ana non kina nai pe ana non kina lime pe analoch (910) pe mete.

<sup>15</sup> Pe Mahalalel tu ke ana hesinga iri ana non kina iri mol pe lime (65) pe hoe tuna Iaret. <sup>16</sup> Ke het pe Mahalalel tuke ana hesinga iri ana non kina iri ana non kina nai pe ana non kina elle pe analoch (830) pe hoho mule tutuna mur tatamanna pe heheina hel pule. <sup>17</sup> Ke Mahalalel tu nga ich ke ana hesinga iri ana non kina iri ana non kina nai pe ana non kina henel pe analoch pe lime (895) pe mete.

<sup>18</sup> Pe Iaret tu ke ana hesinga iri ana non kina lime pe ana non kina mol pe nai (162) pe hoe tuna Enok. <sup>19</sup> Ke het pe Iaret tu mule ke ana hesinga iri ana non kina iri ana non kina nai (800) pe hoho mule tutuna mur tatamanna pe heheina hel pule. <sup>20</sup> Ke Iaret tu nga ich ke ana hesinga iri ana non kina iri ana non kina nai pe ana non kina lime pe ana non kina mol pe nai (962) pe mete.

<sup>21</sup> Pe Enok tu ke ana hesinga iri ana non kina mol pe lime (65) pe hoe tuna Metusela. <sup>22</sup> Ke het pe Inok tu mule ke ana hesinga iri ana non kina iri analoch pe ana non kina lime (300) pe hoho mule tutuna mur tatamanna pe heheina hel pule. <sup>23</sup> Ke Enok tu nga ich ke ana hesinga iri ana non kina iri analoch pe ana non kina lime pe ana non kina mol pe lime (365). <sup>24</sup> Enok i Ne Halang neingana toto ia pe erue sio mana iange NeHalang mene tote i.

<sup>25</sup> Pe Metusela tu ke ana hesinga iri ana non kina lime pe ana non kina henel pe rahtele nai (187) pe hoe tuna Lamek. <sup>26</sup> Ke het pe Metusela tu mule ke ana hesinga iri ana non kina iri ana non kina elle pe ana non kina analoch pe ana non kina lime pe ana non kina henel pe nai (782) pe hoho mule tutuna mur tatamanna pe heheina hel pule. <sup>27</sup> Ke Metusela tu nga ich ke ana hesinga iri ana non

kina iri ana non kina nai pe ana non kina lime pe ana non kina mol pe rahtele henel (969) pe mete.

<sup>28</sup> Pe Lamek tu ke ana hesinga iri ana non kina iri lime pe ana non kina henel pe nai (182) pe hoe tuna tamane ngana e <sup>29</sup> pe hetue ke ene Noah. Pe Lamek hele ke teke, “Non Soke na keke ich ke ta ume pe ta ameia melmelenga nga rera ume mur. Pe Noa lape poia ita ke ta tah eingara pol nga ara melmelenga mur.” <sup>30</sup> Ke het pe Lamek tu mule nga ich ke ana hesinga iri ana non kina iri ana non kina elle pe ana non kina lime pe ana non kina henel pe analoch pe lime (595) pe hoe tutuna mur tatamanna pe heheina hel pule. <sup>31</sup> Ke Lamek tu nga ich ke ana hesinga iri ana non kina iri ana non kina elle pe ana non kina iri analoch pe ana non kina lime pe ana non kina mol pe analoch pe rahtele nai (777) pe mete.

<sup>32</sup> Pe Noah tu ke ana hesinga iri ana non kina iri ana non kina elle pe ana non kina lime (500) pe hoe tutuna mur, Sem pe Ham pe Iapet.

## 6

### *Hehei Pe Hana Te Poia Poinga Poreke Ngana*

<sup>1</sup> Nga etue nenge hehei pe hana iri hulua toto pe te talun ke tetu purpure ich lochloch, te hoe tuturia heheina mur. <sup>2</sup> Pe NeHalang tutuna mur te esia hehei pe hana nga ich tuturia heheina mur nge nakuria urana mana. Pomalam muteria taua iri pe tesio at ke te mene hote hel nge iri ke te leia iri. <sup>3</sup> Pe Non Soke hele, “Opek nenge e tunge lange hehei pe hana ke te maulul lape tu ke koko ero iange iri lape te mete. Talun heueu nei pe la, lape e tung ke hesinga iri ananon kina lime pe ananon kina elle (120) nga mele tungana nga ich nei.”

<sup>4</sup> Nepilim mur pule tetu nga ich nga etue neu pe nga hoena pule (nga ech tau ngana ia kileng rumena). Nga etue nenge NeHalang tutuna mur tema luluch nge hehei nga ich ke

te hoe tuturia mur, te lohote ke iri hana kerkereng ngana mur nenge pingaria songong nge nike.

<sup>5</sup> Non Soke naue ke hehei pe hana nga ich te poia poinga poreke ngana mur nge elela toto pe leteria tuanin ngana mur nga reria inga mur lohote nga poinga poreke ngana ke kokoes mana. <sup>6</sup> Non Soke ala hote hehei pe hana nga ich pe naue ke mau pe letena toto ia iri. <sup>7</sup> Ke pomalam Non Soke hele, “Iau e ala hote hehei pe hana nga ich pe heueu nei lape e hemelue iri ke mele e nge tu nga ich ero ol. Hehei pe hana pe ur inolo mur pe ngie mur nga tapa sana pe ure nemur nenge te amamo pule. E poia iri ke pomau pe letek meena iange e ala hote iri.” <sup>8</sup> Pe Noa i non nenge urana nga Non Soke matana.

### *NeHalang Halaua Noa Pe Nehei Pe Tutuna Mur*

<sup>9</sup> Nananga nenge Noa tutuna mur pe na tete mur koi nei:

Nga etue neu hehei pe hana te popoi poinga poreke ngana. Pe Noa i non nge pengpeng iange poia poinga poreke ngana e ero. Pe NeHalang iech toto nga Noa letena tuanin ngana mur pe nena poinga mur. <sup>10</sup> Noa tutuna mur iri mol, Sem pe Ham pe Iapet.

<sup>11</sup> Pe NeHalang naue ke hehei pe hana lochloch nga ich te heul teua iri nga poinga poreke ngana ke het toto pe te hun helel nge iri. <sup>12</sup> NeHalang naue ich pe poreke toto nga matana iange hulua lochloch te tu teu toto nga poinga poreke ngana. <sup>13</sup> Pe NeHalang hele lange Noa ke teke, “Iau letek haka ke e teke e hemete hulua lochloch iange te heloko teu tote iri nga salaunga ana poinga pe te hun helel nge iri. Oe! Lape e heporeke tote iri luluch nga ich. <sup>14</sup> Pe iong o mene ae urana ngana mur hel ke o ume lem mono ia pe o tal totote ana tokola mur nga letena. Pe o taulue ure pilpile ngana nenge pomanga pulos letena pe nge hot ke meris ero. <sup>15</sup> Pe o umeia mono nem ke mai koi:

Sase ngana o lope ke ana lome iri 300 mita pe pongponga ngana ana lome iri 50 mita pe ona ana lome iri 30 mita. <sup>16</sup> Pe o umeia ona ke pomanga pele pe opoia nenga tunan-gana ke ele haka pol ke luana elle (1 mita). Pe o umeia mono nem ana piunga nga ilina pe otal ke ana lung iri mol iange mono nem lape ana manga toto iri mol. <sup>17</sup> Iange Iau lape e poi hote ech ke hot ke taua kileng lochloch ngana nga ich ke hemete hulua lochloch pe ure lochloch ngana nenge eingaria pe te maulul pe tetu nge sio nga tapa ene. Ke ure lochloch ngana nenge tetu nga ich lape te mete lochloch. <sup>18</sup> Pe Iau lape e poia lek tomunga hele ana helenga luluch nge iong. Pe iong lape oteu nga lem mono luluch nge lem hei pe tutum mur pe reria hehei mur pule. <sup>19</sup> Pe o mene huros maulul ngana mur iri nachnai nga huros kuenkuena ngana mur lochloch ke teteu langa mono pule. E nge hei pe e nge tamane pe o nauele iri ke te maulul luluch nge iong. <sup>20</sup> Nachnai nga ngie kuenkuena ngana mur pe huros kuenkuena nga mur pe ure lochloch ngana nenge te amamo nga ich kuenkuena ngana mur, lape te lange iong ke o nauele iri ke te maulul. <sup>21</sup> Pe pule o lolochia ngaunga kuenkuena ngana mur ke o tatach teua langa mono ke iong pe lem hei pe tutum mur pe reria hehei mur pe huros nemur amo ngaunga ia.” <sup>22</sup> Ke Noa umeia ure lochloch ngana ke pomanga NeHalang hele ngana ia lange i.

## 7

### *Ech Taua Kileng*

<sup>1</sup> Ol pe NeHalang hele lange Noa ke teke, “Iong pe lem hei pe tutum mur pe reria hehei mur ateu langa mono iange iong toro mana o nana-sia poinga nge pengpeng nga ich nei pe hulua lochloch ngana ero. <sup>2</sup> O mene huros kuenkuena urana ngana mur - rahteale nai nge tatamanna pe rahteale nai nge heheina ke tela luluch nge iong. Nenge urana nge tuninga

ana ia pule. Pe huros nenge urana ero o mene ke tamane ngana elle pe heina elle. <sup>3</sup> Pe pule o mene ngie kuenkuena ngana mur - rahteale nai nge tatamanna pe rahteale nai nge heheina. Pomalam lape ngie ana mata elle pe elle tetu ke te maulul nga kileng lochloch ngana nga ich. <sup>4</sup> Etue iri rahteale nai koi tu ol pe lape e hekule pitte ke sio nga ich. Pe pitte nem lape molmol ke etue iri ana non kina nai (40) pe miliko iri ana non kina nai (40). Pe lape e hemete ure maulul ngana lochloch ngana nenge e alahote iri ke tetu nga ich.”

<sup>5</sup> Pe Noa poia ure lochloch ngana nenge Non Soke heleia lange i.

<sup>6</sup> Ke ech taua kileng lochloch ngana nga ich nga etue nenge Noa ana hesinga iri ana non kina iri ana non kina elle pe ana non kina iri analoch (600). <sup>7</sup> Pe Noa pe nehei pe tutuna mur nenge iri tatamanna pe reria hehei mur te tamu nga mono neu ke te eleis maul ngaria nga ech taungana ia kileng. <sup>8</sup> Pe huros tamane nga e pe heina e nga nenge te lemlem nga NeHalang matana pe nenge te lemlem ero pe tamane nga e pe heina e nga ngie kuenkuena ngana mur pe ure lochloch ngana nenge te amamo nga ich, <sup>9</sup> nachnai nge iri lochloch te teu la pule nga mono ke pomanga NeHalang hele ngana ia lange Noa. <sup>10</sup> Pe etue iri rahteale nai nga hoena ech talhun ke tau sapele kileng.

<sup>11</sup> Ich hanna ulala pe ech pach haka pe tapa sana ulala pe ech pasiling sio. Ure nei lohote nga etue analoch pe rahteale nai ngana nga teio nai ngana nga etue nenge Noa ana hesinga lohote ke iri ana non kina iri ana non kina elle pe ana non kina analoch (600). <sup>12</sup> Pe pitte sisio nga ich ke etue iri ananon kina nai pe miliko iri ananon kina nai.

<sup>13</sup> Nga etue nem pengpeng nenge pitte hesio Noa pe nehei pe tutuna mur, Shem pe Ham pe Iapet pe reria hehei mol neu te teu langa mono letena lo. <sup>14</sup> Luluch nga huros

kuenkuena ngana mur nenge hinolo pe marana pe ure kuenkuena ngana mur nenge te amamo nga ich pe ngie kuenkuena ngana mur. Ngana laka ure kuenkuena ngana mur nenge saharia. <sup>15</sup> Ure lochloch ngana nenge te maulul iri nachnai teteu langa mono nge Noa. <sup>16</sup> Ke tamane ngana e pe heina e te teu la ke pomanga NeHalang helengana ia lange i. Te teu la ke ulo pe NeHalang piu hele sapele iri.

<sup>17</sup> Pe pitte sio pe ech taua kileng ke etue iri ana non kina elle pe uch toto ero mana. Pe ech hot pe kon haka ke inhaka hote mono nga ich. <sup>18</sup> Pe ech tuain pe songia kikina ngana pe kon haka ke taua kileng lochloch ngana nga ich pe mono neu mana rara manmana nga ech ona ol. <sup>19</sup> Pe ech tuainin kura ke salala hite kileng lochloch ngana nga ich pe kon haka ke ristote hengene papalaungana mur nga kileng lochloch nenge tetu nga tapa ene. <sup>20</sup> Kon hite hengene nemur ke ana malang nenge haka langa ech ona lohote ke 6.5 mita. <sup>21</sup> Pe ure lochloch ngana nenge tetu ke te maulul nga ich te mete lochloch. Ure nenge pomanga ngie mur pe kolok mur pe huros inolo ngana mur pe ure nenge te amamo nga ich pe hehei pe hana lochloch. <sup>22</sup> Ke ure lochloch ngana nenge te tu ke eingaria tatah nga ich, iri lochloch ngana te mete. <sup>23</sup> Ke Non Soke hemete ure lochloch ngana nenge te maulul nga ich ke te het lochloch. Hehei pe hana pe huros nenge marana pe inolo pe ngie mur. Pe Noa i toro mana tu ol luluch nge iri nenge tetu luluch nge i nga mono.

<sup>24</sup> Iange ech tautaua kileng ke etue iri ana non kina rahteale nai pe analoch (150).

## 8

### *Ech Hakarung*

<sup>1</sup> Pe NeHalang letena metene Noa pe huros mur lochloch nenge marana pe inolo nenge tetu luluch nge i nga mono. Pomalam kulosia tuttula ke hiurus ia ich pe ech

hakarung sio sapele. <sup>2</sup> Ech nga ich letena pach haka ero ol pe pitte uch iange tapa sana ulala ero ol. <sup>3</sup> Pe ech hakarung hatalia ich ke nek mana. Ke etue ana non kina rahteale nai pe analoch (150) nem het ngana ech hakarung sio toto lo. <sup>4</sup> Ke nga etue analoch pe rahteale nai (17) nga teio paele nge muka ech soso hatalia mono nga hengene e nge Ararat. <sup>5</sup> Ech hakarung sisio ke lala pe nga etue elle ngana (1) nga metmete ana talinga lou hengene mokonkona mur te hota sapele.

<sup>6</sup> Pe etue iri ana non kina nai het pe Noa lohe piunga sune nge umeia nga mono, <sup>7</sup> pe kulos hote ngie chochoang. Pe ngie neu lehe rara ke lala pe atat ke la ech soso hatalia ich. <sup>8</sup> Ol pe kulos hote ngie chaulum ke la nau tote kileng. Ech soso hatalia ich lo ma ero kura. <sup>9</sup> Pe chaulum neu la pe tango rara munna nge are iange ech salala hite ich kura pomalam la mule nge Noa nga mono. Pe Noa tul hote penna ke mene chaulum neu ke teu la mule nga mono. <sup>10</sup> Pe Noa kulala ke etue iri rahteale nai mule het pe kulos hot mule ngie chaulum neu nga mono. <sup>11</sup> Pe chaulum neu at mule nge i nga ulei pe koke ae Oliua ina nga hanna pe Noa hetei sapele ke ech soso hatalia ich lo. <sup>12</sup> Iok kulala ke etue iri rahteale nai het pe kulos hot mule chaulum neu. Pe neu ol ngie neu at mule nge i ero ol.

<sup>13</sup> Noa ana hesinga lohote ke iri ana non kina iri ana non kina pe analoch pe elle (601) pe nga etue elle ngana nga hesinga neu ech soso tototo lo. Pe Noa al hatalia mono ona ke nau hot pe esia ich nge ona haka ke halal. <sup>14</sup> Pe nga etue iri ana non kina elle pe rahteale nai (27) ngana nga teio nai ngana, ich hal toto sapele. <sup>15</sup> Pe NeHalang hele lange Noa, <sup>16</sup> "Iok laol, iong pe lem hei pe tutum mur pe lem tete mur a lohote nga mono ol. <sup>17</sup> Pe o mene ure maulul ngana lochloch ngana nenge te tu luluch nge iong ke te hot tah. Ngie mur pe huros mur pe ure lochloch ngana nenge te amamo



nga ich ke te hala lele ke iri halang toto nga ich.”

<sup>18</sup> Ke pomalam Noa i hot luluch nge nehei pe tutuna mur pe reria hehei mur. <sup>19</sup> Pe huros mur pe ure maulul ngana mur nenge te amamo nga ich tei hot ke te nanas tau hel ia aria mata mur.

### *Noa Poi Tunginga Lange NeHalang*

<sup>20</sup> Iok laol Noa lung heke tunginga ana hatanga ke poi tunginga mur ia lange Non Soke. Pe mene huros lemlem ngana mur pe ngie lemlem ngana mur ke mak heke ke poi tunginga ia. <sup>21</sup> Pe Non Soke seke tunginga nemur inangaria pe hele, “Hehei pe hana te poia poinga poreke ngana pe e poia poinga nei ke tuacholia reria poinga poreke ngana mur. Pe lape e heporeke mule nge hehei pe hana nga ich ero ol. Nga etue nenge iri lolomele leteria tu mana nga poinga poreke ngana pe e tunge aria melenga lo. Pe nei ol lape e heporeke ure lochloch ngana nenge te maulul ero ol.

<sup>22</sup> “Nga etue nenge ich nei tu, ure nemur lape te lohotot; ngaunga tua ngana pe ngaunga lulu ngana, kileng lololo ngana pe kileng milang ngana, chaia ana etue pe pitte ana etue, kileng mesehe ngana pe kileng au ngana.”

## 9

### *NeHalang Poia Tomunga Hel Ana Helenga Luluch Nge Noa*

<sup>1</sup> NeHalang hele lange Noa pe tutuna mur ke poimai: “Lek petanga nenge lange iong pomai koi. Lape a hoho ke tutumo mur iri halang toto pomalam lape a tu ke a purpure kileng lochloch ngana nga ich. <sup>2</sup> Huros mur nga ich pe ngie mur pe ruo mur lape te mataua imo pe a nauele iri. Ure nemur e tunge lange imo ke amo ngaunga ia. Huros mur pe ngie mur pe ruo mur nga ruach pe ure lochloch ngana nenge

te amo rarara nga ich. <sup>3</sup> Ke ure lochloch ngana nenge te maulul lape amo ngaunga ia. Ke pomanga e tunge eleling mur lange imo. Pomalam mana e tunge ure lochloch ngana nei ke amo ngaunga ia.

<sup>4</sup> “Pe huros mirana nenge eina tu hite kura a ngaua ero iange maulinga lohohot laka nga toho. <sup>5</sup> Pe nenge teke huros e ma none hune mele lape e tuacholia lange i. Ke nenge teke huros e hune mele huros nem lape mete pule. Pe nenge teke none hune mele non nem lape mete pule.

<sup>6</sup> “None nenge hune mele ke mete, hana lape te hune i ke mete pule. iange Iau NeHalang pe e umeia hehei pe hana ke nakuria mange iau.

<sup>7</sup> Ke pomalam e teke iong pe lem tete mur a hala lele ke imo halang toto pe a tu ke a purpure kileng lochloch ngana nga ich.”

<sup>8</sup> Pe NeHalang hele lange Noa pe tutuna mur ke mai; <sup>9</sup> “Heueu nei e poia lek tomunga hel ana helenga luluch nge imo pe nge lemo tete mur nenge lape te lohohot nge he. <sup>10</sup> Pe e poia la pule nge ngie mur pe huros mur nenge marana pe inolo pe ure maulul ngana mur lochloch nga ich nenge tei hot luluch nge imo nga mono nem. <sup>11</sup> E poia lek tomunga hel ana helenga nei lange imo ke mai: Ech hot ke taua kileng ke ulolo pe ure lochloch ngana nenge te maulul nga ich te mete lochloch. Pe lape e poi mule poinga e nge pomai nga hoena ero ol.”

<sup>12-13</sup> Pe NeHalang hele, “E tal hote pitte usina nga tapa sana ke heilangia tomunga hel ana helenga nenge e poia lange iong pe ure lochloch ngana nenge te maulul nga ich. Ure nem lape helete metene iong nga nenge lape e tal hite helenga manmanna ngana nem ke koko. <sup>14</sup> Nga etue nenge e tal hote ulu ke ma hite ich pe pitte usina ma hot nga tapa sana, <sup>15</sup> Lape letek metene lek helenga kerkereng ngana nenge e poia lange iong pe nge ure maulul ngana

mur lochloch. Ech e lohot ke taua kileng ero ol luluch nga ure maulul ngana mur lochloch. <sup>16</sup> Nga etue nenge e naue pitte usina nga tapa sana, lape letek metene tomungahel ana helenga nenge e poia lange ure maulul ngana kuenkuena ngana mur lochloch nga ich.

<sup>17</sup> “Ke pitte usina nem heinglangia tomunga hel ana helenga nem.”

### *Noa Tutuna Mur*

<sup>18</sup> Noa tutuna mur nenge iri ul tetu nga mono koi nemur; Sem pe Ham pe Iapet. (Ham i Kenan temene.)

<sup>19</sup> Ke hana mol nei Noa tutuna mur ia iri. Pe hulua lochloch ngana nenge tetu ke te ronggo heke kileng lochloch ngana nga ich nei reria tete mur kou iri.

<sup>20</sup> Noa i non nenge umume nga ume pe i tala toto nge tue uain ana ume. <sup>21</sup> Nga etuene inia uain eina ol pe matana liuliu pe ma ke lachlach mana nga nena pelpele letena.

<sup>22</sup> Pe Kenan temene Ham i teu la pe esia temene nge lachlach pe la heleia lange titina mur nai nge hot. <sup>23</sup> Ol pe Sem iri nai Iapet te mene malenga pe te rahit heke langa ekeria pe tehul rumeria pe te ruka teu langa pelpele letena. Pe te nau kel mana pe te askou hite temeria nge lachlach.

<sup>24</sup> Iok laol Noa letena matana pe lo haka longe utar nenge tuna lomele ngana poia lange i. <sup>25</sup> Pe hele ke teke, “Ure meena lape lohot nge Ham tuna Kanan!

Lape lohot ke i hekuleileinga ana non nenge pingana iuiu ero pe umume manmana nge titina mur.”

<sup>26</sup> Pe Noa hele pule ke teke, “Ta heto heke NeHalang Sem ana Non Soke pe poia Kenan ke Sem nena hekuleileinga ana non.

<sup>27</sup> Pe e hetalaulau ke NeHalang poia Iapet tutuna mur ke iri halang toto pe poia iri ke te kila ke nek luluch nge Sem, pe poia Kenan ke Iapet nena hekuleileinga ana non ia.”

<sup>28</sup> Ech taua kileng ke het pe Noa tu ke ana hesinga iri ana non kina iri analoch pe ana non kina lime pe ana non kina nai pe analoch (350) mule. <sup>29</sup> Pe mete nga etue nenge ana hesinga ke iri ana non kina iri ana non kina nai pe ana non kina lime pe ana non kina nai pe analoch (950).

## 10

### *Noa Na Tete Mur*

<sup>1</sup> Ech tau kileng ke het pe Noa tutuna nemur; Sem pe Ham pe Iapet te hoe tuturia mur ol.

### *Iapet Tutuna Mur*

<sup>2</sup> Ipet tutuna mur laka:

Koma pe Makok pe Matai Iauan pe Tubal pe Mesek pe Tiras.

<sup>3</sup> Pe Koma tutuna mur laka:

Askenas pe Ripat pe Tokarma.

<sup>4</sup> Pe Iauan tutuna mur laka:

Elisa pe Tarsis pe Saiprus mur pe Totan mur. <sup>5</sup> Ke nge hana nemur hehei pe hana te kila ole nga ruach ilina pe nga mimio mur. Pe te are ke te nananasia aria mata mur pe reria helenga pekngana mur.

### *Hana Nenge Telohot Nge Ham*

<sup>6</sup> Ham tutuna mur laka:

Kus pe Isip pe Put pe Kanan.

<sup>7</sup> Pe Kus tutuna mur laka:

Sepa pe Hauila pe Sapta pe Rama pe Sapteka.

Pe Rama tutuna mur laka:  
Sepa pe Tetan.

<sup>8</sup> Ne Kus i Nimrot temene pe i tala toto nga ich nge nena kerkerenga halang ke hekou sisio hana. <sup>9</sup> Pe i non nenge Non Soke poia i ke letena matana toto nga huros hun ngana. Ana helenga nenge te heleia ke te teke, “Non nei hunun huros ke mange Nimrot nge Non Soke halaulaua i.” <sup>10</sup> Kileng nemur nenge Nimrot nauele tele iri laka, kileng nenge Papel, pe Erek pe Akat pe Kalne. Kileng nemur tetu nga ich nenge Sina. <sup>11</sup> Iok Nimrot lo haka nga lamau pe lange Asiria pe maheke tuele tana nenge Niniue hemes

haka ngana pe tuele tana nenge Rehopotir pe tuele tana nenge Kala <sup>12</sup> pe Resen. Tuele tana nenge Resen i tuele tana nenge palaungana toto pe tu nga kileng nenge Niniue pe Kala tunangaria. <sup>13</sup> Iok Isip tutuna mur laka hana nenge Lut pe hana nenge Anam pe hana nenge Leahap pe hana nenge Naptu, <sup>14</sup> pe Patrus pe Kaslu pe Kaptor. Ke Palestaen mur te lohot lake nge hana nenge Kaslu.

<sup>15</sup> Iok Kenan tuna nenge tengene ana laka Saiton nenge hana nenge Saiton reette ia pe tuna e pule ene Hitae, <sup>16</sup> pe Iepus pe Amor pe Kirkas <sup>17</sup> pe Hip pe Ak pe Sin <sup>18</sup> pe Aruat pe Semar pe Hamat.

Nga hoena mata nemur nenge Kenan te es keke hot rara, <sup>19</sup> ke te are nga ich nenge talun nge Saiton ke lange Kerar pe Kasa pe mene tote ke lange Sotom pe Komora pe Atma pe Sepoim nga kilenge nenge Lasa.

<sup>20</sup> Iok nenge nei Ham tutuna mur nga aria mata mur pe reria helenga mur pe reria ich mur pe tuele kina mur.

### *Hana Nenge Sem*

<sup>21</sup> Sem tina nenge soke laka Iapet pe i hana nenge Eper reette ia.

<sup>22</sup> Pe Sem tutuna mur laka: Elam pe Ashur pe Arpakat pe Lut pe Aram.

<sup>23</sup> Pe Aram tutuna mur laka: Us pe Hul pe Keta pe Mas. <sup>24</sup> Pe Arpakset tuna Sela pe Sela tuna Eper.

<sup>25</sup> Pe Eper tutuna mur iri nai: Elle ene Pelek luna laka "Chachia" iange nga etue nenge i tu hehei pe hana nga ich te chach hel ke tetu teu nga reria kaleu ramana mur. Pe ana non tina ene laka Ioktan.

<sup>26</sup> Iok Ioktan tuna laka Almotat pe Selepe pe Hasarmauet pe Iera <sup>27</sup> pe Hatoram pe Usal pe Tikla <sup>28</sup> pe Opal pe Apimael pe Sepa <sup>29</sup> pe Opir pe Hauila

pe Iopap. Iri nemur Ioktan tutuna mur ia iri.

<sup>30</sup> Tuele kina nenge iri nemur tetu ia talun nge Mesa ke lange Sephar nga hengene mur nga chaia haka ngana.

<sup>31</sup> Iok nenge nei Sem tutuna mur nga aria mata mur pe reria helenga mur pe reria ich mur pe tuele kina mur.

<sup>32</sup> Ech taua kileng ke het lo pe mata ana tuluk nemur te lohot nge Noa tutuna mur. Pe mata elle pe elle aria nananga nga te lohot ngaria. Pe te tu ke altoto nga reria kaleu ramana mur.

## 11

### *Tuele Tana Nenge Papel*

<sup>1</sup> Nga telengana toto hehei pe hana nga kileng lochloch nga ich te heleia helenga elle mana. <sup>2</sup> Te lohaka nga chaia haka ngana pe te i ke la te are nga mos nge Papilon.

<sup>3</sup> Pe nga hoena te hele tele hel nge iri ke te teke, "A iat, ta mene melete pe maha ke perra ule pe ta hemilangia iri ke te lohot ke iri um nenge ene prik" Pe te mene ure nenge pilpile ke manga pulos nenge te hepile tele um nemur ia. <sup>4</sup> Pe te ngai haka hel ke te teke, "A iat ta lele heke ita sipora rera tuele tana nenge mokona la ke tottole teu nga tapa sana. Pomalam lape pingara song pe ta loloun rara ke tala nga ich lochloch ero ol."

<sup>5</sup> Pe ero. Non Soke sio at ke naue tuele tana neu pe ana pele ona haka ngana nenge ana malang sase haka toto nenge hana nemur te umume ia. <sup>6</sup> Pe Non Soke letena tuanin ke teke, "Hana nemur iri elle pe te heleia helenga nge elle mana. Te ume ia tuele tana palaungana nem lo pe nga hoena lape te ume ia ure hel pule nga lemeria ngaria. <sup>7</sup> A iat, ta sio la ke ta hepiriu ele reria helenga ke te longo hel nge iri ero ol."

<sup>8</sup> Ke Non Soke sisparaia iri ke te tu purpure kileng lochloch ngana nga ich pe te ume mule tuele tana neu ero ol. <sup>9</sup> Ke pomalam te hetue tuele tana



neu ke Papel iange Non Soke hepiriu hele reria helenga pe te sisparai ke tetu purpure kileng lochloch ngana nga ich.

### *Sem Nena Tete Mur*

<sup>10</sup> Nananga nenge Sem nena tete mur.

Ech taua kileng mur ke hesinga nai la lo, pe Sem ana hesinga iri ana non kina iri lime pe hoe tuna Arpakset. <sup>11</sup> Ke het pe Sem tu mule ke ana hesinga iri ana non kina iri ana non kina elle pe ana non kina lime (500) pe hoho mule tutuna mur tatamanna pe heheina hel pule.

<sup>12</sup> Pe Arpakset ana hesinga iri ana non kina elle pe analoch pe lime (35) pe hoe tuna tamane ngana e pe hetue ke ene Sila. <sup>13</sup> Ke het pe Arpakset tu mule ke ana hesinga iri ana non kina iri ana non kina elle pe mol (403) pe hoho mule tutuna mur tatamanna pe heheina hel pule.

<sup>14</sup> Pe Sela ana hesinga iri ana non kina elle pe analoch (30) pe hoe tuna tamane ngana e pe hetue ke ene Eper. <sup>15</sup> Ke het pe Sela tu mule ke ana hesinga iri ana non kina iri ana non kina elle pe mol (403) pe hoho mule tutuna mur tatamanna pe heheina hel pule.

<sup>16</sup> Pe Eper ana hesinga iri ana non kina elle pe analoch pe henel (34) pe hoe tuna tamane ngana e pe hetue ke ene Pelek. <sup>17</sup> Ke het pe Eper tu mule ke ana hesinga iri ana non kina iri ana non kina elle pe ana non kina elle pe analoch (430) pe hoho mule tutuna mur tatamanna pe heheina hel pule.

<sup>18</sup> Pe Pelek ana hesinga iri ana non kina elle pe analoch pe hoe tuna tamane ngana e pe hetue ke ene Reu. <sup>19</sup> Ke het pe Pelek tu mule ke ana hesinga iri ana non kina iri analoch pe rahteale henel (209) pe hoho mule tutuna mur tatamanna pe heheina hel pule.

<sup>20</sup> Pe Reu ana hesinga iri ana non kina elle pe analoch pe nai (32) pe hoe tuna tamane ngana e pe hetue ke ene

Seruk. <sup>21</sup> Ke het pe Reu tu mule ke ana hesinga iri ana non kina analoch pe rahteale nai (207) pe hoho mule tutuna mur tatamanna pe heheina hel pule.

<sup>22</sup> Pe Seruk ana hesinga iri ana non kina elle pe analoch (30) pe hoe tuna tamane ngana e pe hetue ke ene Nahor. <sup>23</sup> Ke het pe tu mule ke ana hesinga iri ana non kina analoch (200) pe hoho mule tutuna mur tatamanna pe heheina hel pule.

<sup>24</sup> Pe Nahor ana hesinga iri ana non kina elle pe ratele henel (29) pe hoe tuna tamane ngana e pe hetue ke ene Tera. <sup>25</sup> Ke het pe tu mule ke ana hesinga iri ana non kina lime pe analoch pe rahteale henel (119) pe hoho mule tutuna tatamanna pe heheina mur hel pule.

<sup>26</sup> Pe Tera ana hesinga iri ana non kina mol pe analoch (70) pe hoe tutuna nemur: Apram pe Nahor pe Haran.

### *Tera Nena Tete Mur*

<sup>27</sup> Nananga Nenge Tera Nena Tete Mur.

Tera tutuna mur laka Apram pe Nahor pe Haran, pe Haran tuna laka Lot. <sup>28</sup> Pe Haran mete nga nena kileng huna nge Ur nge Kaltia, nga ich nenge tana hoe i ia. Nga etue nenge mete, temene tu ke maullul kura. <sup>29</sup> Pe Apram pe Nahor te lei. Ke Apram nehei laka Sarai pe Nahor nehei laka Milka nenge Haran tuna pe liuna laka Iska. <sup>30</sup> Sarai hoho ero. Mes tamane mana.

<sup>31</sup> Iok, Tera mene tuna Apram pe nette Sarai nenge Apram nehei pe nette Lot nenge Haran tuna, pe iri lochloch te hile reria kileng huna nge Ur nge Kaltia pe te i ke te lange Kenan. Pe nga etue nenge te lohote nge Haran, te la ero ol. Te tu mana lamau ol.

<sup>32</sup> Pe Tera tu nga ich ke ana hesinga iri ana non kina iri analoch pe lime (205) pe mete nge Haran.

## 12

### *NeHalang Iua Apram*

<sup>1</sup> Iok Non Soke hele lange Apram ke teke, “O hile lem kileng pe lem hana mur pe iri lochloch ngana nenge te tu luluch nge temem pe o la nga ich nenge lape e henonou iong ia.

<sup>2</sup> “Pe lape e pete iong pe e poia lem tete mur ke te lohot ke iri halang toto; pe lape e poia pingam ke song pe hulua te naue ke e pete tote iong.

<sup>3</sup> Pe e poi ke urana lange iri nenge te poi ke urana lange iong pe iri nenge te poi poreke iong lape e poi poreke iri.

Pe lape e poi ke urana lange hulua lochloch nga ich

iangen nge huna nge iong mana.”

<sup>4</sup> Ke Apram lohaka nge Harran pe la sapele ke pomanga Non Soke hele ngana ia lange i pe Lot la luluch nge i. Nga etue neu Apram ana hesinga iri ana non kina mol pe analoch pe lime (75). <sup>5</sup> Apram mene ne hei Sarai pe tina tuna Lot pe nena hekuleileinga ana hana mur pe reria urelu mur nenge te mene nge Haran pe tei ke tela te lohot nga ich nenge Kenan.

<sup>6</sup> Pe te i nga ich neu ke la te lohot nge Sekem. Pe ae tapuna ngana e mes nga kileng neu. Ana ae ene laka ae ok nenge More. Nga etue neu Kenan mur te tutu nga ich neu kura.

<sup>7</sup> Pe Non Soke lohot nge Apram pe hele lange i ke teke, “Lape e tungge ich nei lange lem tete mur.” Pomalam Apram lung heke hatanga e lange Non Soke nenge lohot nge i.

<sup>8</sup> Ke het pe nga hoena Apram loloun la nga chaia haka ngana nga sasana nge Petel. Pe hemesia nena pelpele nga kileng Petel pe kileng Ai tunangaria, pe lung heke hatanga e lange Non Soke pe heto heke Non Soke ene.

<sup>9</sup> Ke het pe Apram loloun ke ramana lange Nekep.

#### *Apram La Ke Tu Nge Ekipto*

<sup>10</sup> Iok nga hoena uringa palaungana lohot nga ich nenge te tuia pe Apram sio ke la tu pol nge Ekipto

iangen uringa neu poreke toto. <sup>11</sup> Pe nga etue nenge te la rochroi nge Ekipto Apram hele lange ne hei Sarai ke teke, “Iau e eteia ke iong nakum urana toto. <sup>12</sup> Pe nga etue nenge Ekipto mur te naue iong lape te hele ke te teke, ‘Non nei nehei koi.’ Pe lape te hune iau pe iong o tu ke o maulul. <sup>13</sup> Urana nge o hele lange iri ke o teke lium koi iau. Pomalam lape te poi ke urana at nge iau. Ke nge iong mana lape e tu ke e maulul.”

<sup>14</sup> Iok la ol nga etue nenge Apram la ke lohot nge Ekipto, Ekipto mur te naue Sarai nge nakuna urana toto.

<sup>15</sup> Pe ne Parao nena hana papalauna mur te esia ana hei nge nakuna urana pe te mene teua i lange ne Parao nga nena pele palaungana. <sup>16</sup> Ne Parao mene hei neu pe poi ke nek lange Apram ke tungge nena sipsip tatamanna mur pe heheina mur pe pulumakau tatamanna mur pe heheina mur pe tongki tatamanna mur pe heheina mur pe hekuleileinga ana hehei pe hana pe meme mur.

<sup>17</sup> Pe Non Soke poia haleles poreke ngana ke lohot nge ne Parao pe nge iri nenge te tu nga nena pele, iangen huna nge Parao nge mene Apram nehei Sarai. <sup>18</sup> Pomalam ne Parao hekulo Apram ana pe onteia i ke teke, “Pomerei nenge o poia iau ke pomai? Heungana nge o hele pengpeng at nge iau ke o teke, ‘Hei nei lek hei ia.’

<sup>19</sup> Pe pomere nenge o hele ke o teke, ‘Liuk laka.’ Eh ngana koi! O mene lem hei pe a la ol.” <sup>20</sup> Iok la ol ne Parao hele lange nena hana mur ke te kulos hote Apram. Pomalam te kulosia Apram pe nehei ke te la, pe te la luluch nga reria ure mur lochloch.

## 13

### *Apram Pe Lot Te Chachel*

<sup>1</sup> Ke Apram pe nehei pe reria ure mur lochloch te i hot nge Ekipto pe te lo haka lange Nekep pe Lot la luluch nge iri. <sup>2</sup> Apram lohot ke i non nenge nena ure halang nga huros marana

ngana mur pe nena ure sachanchana sinaha ngana mur.

<sup>3</sup> Ana non tu nge Nekep pe loloun rara ke la nga kileng hel pule pe la lohot mule nga kileng nenge are tala ia, nga kileng nenge Petel pe Ai tunangaria. <sup>4</sup> Ana non lung heke tele hatanga e nga lamau lo pe la heto heke mule Non Soke ene ia.

<sup>5</sup> Pe Lot loloun rara luluch nge Apram pe nena sipsip mur pe meme pe mur pe kolok mur pe nena hehei pe hana mur pule. <sup>6</sup> Ke Apram pe Lot reria urelu mur halang pe ich palaungana ero mana nge iri nai ape ke te are ia. <sup>7</sup> Ol pe hunelinga lohaka. Apram pe Lot reria hana mur te hun hel. Nga etue neu Kenan mur pe Perisae mur te tu nga ich neu kura.

<sup>8</sup> Pomalam Apram hele lange Lot ke teke, “Rera hana mur te hunel pe ita nai ita elle mana pe lempera ero nge ta hunel mule nge ita. <sup>9</sup> Ke pomalam ta chach hel. O nau la ich palaungana kou tumana paneu. Nenge teke o la nga pen hoihoi iau e la nga pen tamalmal pe nenge teke o la nga pen tamalmal iau e la nga pen hoihoi.”

<sup>10</sup> Iok la ol, Lot nau rara pe esia kileng mos ngana nge Iortan ke lange Soa. Kileng neu ana ech halang ke pomanga Non soke ana ume pe pomanga ich nenge Ekipto. (Nei nga etue nenge Non Soke heporeke tuele tana nenge Sotom pe Komora ero kura). <sup>11</sup> Ke Lot hesilei hote kileng mos ngana lochloch nge Iortan pe lohaka sapele ke la nga chaia haka ngana. Ke hana nai neu te chach hel sapele. <sup>12</sup> Ke Apram are nga ich nge Kenan pe Lot are luluch nga tuele tana papalauna mur nga mos pe lele nena pelpele rochroi lange Sotom. <sup>13</sup> Pe hehei pe hana nenge Sotom te poreke toto. Te popoia poinga nenge poreke toto nga Non Soke matana.

<sup>14</sup> Iok Lot lohaka ke la lo pe Non Soke hele lange Apram ke teke, “O mes lamam pe o nau ole la nga kileng lochloch. O nau haka langa kileng ilina hele nenga lut ana pe o nau ole la nga nenge sio pe o nau ole la nga

chaia haka ngana pe o nau ole la nga chaia sio ngana.

### *Apram Lange Hebron*

<sup>15</sup> “Ich lochloch ngana nenge o naue nem lape e tunge lange iong pe lem tete mur ke lemo ia ol. <sup>16</sup> Pe lape e poia lem tete mur ke te lohot ke iri halang toto ke pomanga maruchrue nenga ich pe mele pele nakuna ero toto nge sisele iri. <sup>17</sup> Iok o lohaka pe o i kela onau nga ich nemur nenge lape e tung lochloche lange iong.”

<sup>18</sup> Pomalam Apram lohaka pe la ke are rochroi la nga ae papalau ngana nge Mamre nga kileng nenge Hebron pe lele heke nena pelpele mur. Pe lung heke tunginga ana hatanga e lange Nok Soke nga lamau.

## 14

### *Apram Halaua Lot*

<sup>1</sup> Hana nemur iri naunga-ala ana hana mur; Ne Amrapel nauele kileng Papilon pe ne Ariocho nauele kileng Elasa pe ne Ketolama nauele kileng Elam pe ne Tital nauele kileng Koim.

<sup>2</sup> Naunga-ala ana hana nemur tela ke te palhel luluch nge naunga-ala ana hana hel pule. Eria mur koi nei; Ne Pera nenge nauele kileng Sotom pe ne Pirsae nenge nauele kileng Komora pe ne Sinap nenge nauele kileng Atma pe ne Semepa nenge nauele kileng Sepoim pe naunga-ala ana non nenge Pela (nenge heueu nei te hetue ke Soa). <sup>3</sup> Naunga-ala ana hana lime nei te mene reria palinga hel ana hana mur pe tela ke te mes ke muria elle nga tottolo nenge Sitim (nga ruach mesmes ngana ana mos).

<sup>4</sup> Lange ne Ketolama nauele iri ke hesinga iri analoch pe nai (12) pe nga hesinga analoch pe rahte mol ngana (13) leteria inin pe te hunel.

<sup>5</sup> Ke nga hesinga iri analoch pe rahetele henel ngana (14) ne Ketolama pe pekngana naungaala ana hana mol, te la ke te hekousue hana nenge Repaim nga kileng nenge Asterot Karnaim. Pe te hekou sue Sus mur nga tuele tana nenge Ham

pe te hekou sue Em mur nga tuele tana nenge Saue Kirataim. <sup>6</sup> Pe te hekou sue Hor mur nga sasana ana kileng nge Seir ke ramana ole lange El Paran, rochroi la nga ich sana lomona. <sup>7</sup> Ke het pe te mule ke te lange En Mispat (nge Kates) pe te hekou sue tuele kina mur nenge Amelek pe Amor nenge te tutu nge Haseson Tamar.

<sup>8</sup> Pe naunga-ala ana non nenge Sotom pe nenge Komora pe nenge Atma pe nenge Sepoim pe nenge Pela (nenge te hetue ke Soa) te lohot ke te has ele reria hunelinga munna nga mos nenge Sitim. <sup>9</sup> Ke naunga-ala ana hana henel te pal hel luluch nge naunga-ala ana hana lime. Te pal hel luluch nge ne Ketolama nenge i naunga-ala ana non nge Elam pe ne Tital nenge i naunga-ala ana non nenge Koim pe ne Amrapel nenge i naunga-ala ana non nenge Sina pe ne Arioch nenge i naunga-ala ana non nenge Elasar. <sup>10</sup> Pe mos nenge Sitim muta ia polo mur nenge te menmene ich muna ngana ia. Ich muna ngana nem ene laka kolta. Pe nga etue nenge naunga-ala ana non nenge Sotom pe Komora teua, reria hana mur hel te losio teu nga polo nemur. Pe naunga-ala ana hana mol pe reria hana mur te ua ke te la nga sasana mur. <sup>11</sup> Naunga-ala ana hana henel neu te kerkereng toto pe te lolochia ure lochloch ngana pe ngaunga mur nge Sotom pe Komora ke te laia iri. <sup>12</sup> Pe te mene Apram tina tuna Lot pe nena ure lochloch ngana pule iange i tutu nge Sotom.

<sup>13</sup> Pe non Hipru e ua nga hunelinga neu pe la ke hele toto nge Apram nga ure nenge lohot. Pe Apram kou tula rochroi toto nga ae papalau nge Mamre. Mamre i none nga mata nenge Amor pe titina mur laka Eskol pe Aner. Hana nemur pekn-garia toto laka Apram. <sup>14</sup> Nga etue nenge Apram longe nge te laua tina tuna, heukiraua nena hana kerkereng ngana mur nge iri ana non kina analoch pe ana non kina lime pe

analoch pe rahtele mol (318). Hana nemur iri ul ke te tutu nike. Te la pe te hekumia naunga-ala ana hana nemur ke la het nga tuele tana nenge Tan. <sup>15</sup> Pe nga miliko Apram chachia nena hana mur ke te pal hel pe te hekou sue naunga-ala nemur reria hana mur pe te lope iri ke ramaria lange Hopa nga kileng Tamaskus ilina hele nenga lut. <sup>16</sup> Pe Apram mene mule ure lochloch ngana pe mene mule tina tuna Lot pe nena ure mur lochloch. Pe mene mule hehei mur pe hana hel pule.

<sup>17</sup> Iok Apram hekou sue ne Ketolama pe pekngana naunga-ala ana hana nemur ke het pe la mule sapele. Pe nga mule ngana, naunga-ala ana non nenge Sotom lohot ke saolia i nga mos nge Saue (Saue luna laka; Naunga-ala ana non nena mos). <sup>18</sup> Pe Melkisetek i naunga-ala ana non nga kileng nenge Salem. Ana non mene hote beret pe uain. Pe i NeHalang Nenga Lut Toto nena tunginga ana non ia. <sup>19</sup> Pe pete Apram pe hele ke teke,

“NeHalang Nenga Lut Toto lape poi ke urana toto lange iong.

I ala hote tapa pe ich.

<sup>20</sup> Ta heto heke NeHalang Nenga Lut Toto

I laka tung heke lem ngarang mur la nga perim.”

Ol pe Apram tunge ure huna elle lange i. Ure huna elle nem lohot nge ure loloch ngana nenge Apram lolochia nga hunelinga pe hekou sue hana nemur pe takiraua ke huna iri analoch. Pe huna elle laka nenge tunge lange Melkisetek nem.

<sup>21</sup> Pe naunga-ala ana non nenge Sotom hele lange Apram ke teke, “O tunge lek hehei pe hana ke nenge o mene mule iri nem, ke te at mule nge iau pe o mene ure lochloch ngana nem ke lem ia.” <sup>22</sup> Pe Apram hele lange naunga-ala ana non nenge Sotom ke teke, “Iau e poia helenga kerkereng ngana e lange NeHalang Nenga Lut Toto nenge ala hote tapa pe ich ke e teke, <sup>23</sup> Iau lape e mene lem ute pele



ero toto. Ke ute e nge sachana tuna mana ke manga malus ulina nenge o tautau tako ia pe apem ulina ana rur, nem lape e mene ero pule. Iange lape o hele ke o teke, 'Iau iam e poia Apram ke nena urelu halang.' <sup>24</sup> Ke pomalam lemek ero toto nge e mene ute. Pe utar nenge lek hana mur te ngaua ke ulolo, nem mana lape e mene. Pe lape e mene neingak mur nenge te at luluch nge iau reria pule. Ngana laka ne Aner pe ne Eskol pe ne Mamre."

## 15

### *Non Soke Poia Tomunga Hel Ana Helenga Luluch Nge Apram.*

<sup>1</sup> Iok nga hoena Non Soke lohote nge Apram nga maopene ngana pe hele lange i ke teke, "Apram o matau ero.

Lem kaleu koi Iau  
pe lape e poia iong ke pingam  
iuu toto."

<sup>2</sup> Pe Apram tuacholia ke teke, "Non Soke NeHalang lape o tunge utar nge iau? Iau tuk e ero koi nenge lape mene lek urelu mur. Pe mele nenge lape mene ngana kou Eliese nenge Tamaskus." <sup>3</sup> Pe Apram hele, "Iong o tunge tuk e ero ke pomalam hekuleileinga ana non e nenge te umume nge iau lape mene lek urelu mur."

<sup>4</sup> Pe Non Soke hele lange i, "Non nem lape mene lem urelu mur ero. Tum tamane ngana e nge lohote nga iong sipom eim lape mene lem urelu mur." <sup>5</sup> Pe Non Soke mene hote i lange hot pe hele, "O nau haka la nga tapa sana pe o sisele itoch mur - nakum nge o sisele iri kau?" Pe Non Soke hele mule, "Lem tete mur lape iri hulua ke pomalaka nga itoch nemur."

<sup>6</sup> Ol pe Apram letena manmanna nge Non Soke pomalam Non Soke hetue i ke i non nge pengpeng.

<sup>7</sup> Pe Non Soke hele pule ke teke, "Iau Non Soke nenge mene hote iong nga lem kileng huna nge Ur nge Kaltia pe e tunge ich nei lange iong ke lem ia ol."

<sup>8</sup> Pe Apram hele ke teke, "Non Soke NeHalang lape e eteia ke lek ich nei ke pomerei?"

<sup>9</sup> Pe Non Soke hele lange i ke teke, "O mene pulumakau hei ngana e pe meme hei ngana e pe sipsip tamane ngana e nge aria hesinga iri mol pe o at ia iri nge Iau. Pe o mene ngie chaulum nai pule."

<sup>10</sup> Iok Apram mene huros nemur lange NeHalang pe tote iri nga tunangaria pe sachana mur tema ke elle pe tote ngie mur ero. <sup>11</sup> Ol pe ngie papalaungana mur te lehe sio taua huros nemur pe Apram lope hele iri.

<sup>12</sup> Iok chaia matana sisio lo pe Apram mamani hun toto pe kileng au ngana palaungana toto lohote nge i pe matau toto. <sup>13</sup> Ol pe Non Soke hele lange i ke teke, "Lem tete mur lape la tetu nga tuele kina e nenge reria ia ero. Pe lape te poi poreke iri pe te ume manmana nge hana hel. <sup>14</sup> Pe lape e heporeke tuele kina nenge te umume nge iri nem. Pe iri lape te lolochia ure halang toto nga etue nenge tei hot nga kileng nem. <sup>15</sup> Pe iong lape o nanasia lem tete mur nenge te mete ke ulolo. Ke lape te alo hite iong nga etue nenge o tuauna toto ol. <sup>16</sup> Pe lem tete mur lape te at mule nga ich nei ero mukam. Te amala ke hesinga iri ana non kina iri ana non kina elle (400) het mukam. Pe nem purpure hana henel tetu ngaria nga ich nei. Ke het ol laka lem tete mur te at mule nga ich nei ol. Nem nga etue nenge e heneue Amor mur pe e lope hote iri nga ich nei nga reria poinga poreke ngana mur. Pe heueu nei reria poinga poreke ngana muta haka ke nek ero kura."

<sup>17</sup> Iok chaia matana sio lo pe kileng au pe oan ana tuninga e nge pululu pe rir remen ngana te lohote pe te i teu nga huros sachanchana nemur tunangaria. <sup>18</sup> Ke nga etue neu Non Soke poia tomunga hel ana helenga luluch nge Apram ke teke, "Lape e tunge ich nei lange lem tete mur. Talun nge Ekipto pe mene ke la nga ech tana palaungana nenge Uprates.

<sup>19</sup> Ke iri lape te mene ich nenge Kin mur pe Kenas mur pe Katmon mur, <sup>20</sup> pe Hit mur pe Peres mur pe Repaim mur, <sup>21</sup> pe Amor mur pe Kenan mur pe Kekas mur pe Iepus mur.”

## 16

### *Heka pe Ismael*

<sup>1</sup> Iok Apram nehei Sarai mes tamane mana pe hoe tuna e ero. Pe nena hekuleileinga ana hei e nena nge Ekipto nge ene Heka. <sup>2</sup> Pe Sarai hele lange Apram, “Non Soke poi ele iau ke e hoe tuk e ero. Pomalam o la ke o ma luluch nge lek hekuleileinga ana hei; lape tutuk mur te ha lakou nge i.”

Pe Apram ngata nga Sarai nena helenga. <sup>3</sup> Apram tu nge Kenan ke ana hesinga iri analoch (10) lalo pe Sarai tunge Heka lange i ke nehei naingana ia. Heka nena nge Ekipto pe i Sarai nena hekuleileinga ana hei ia. <sup>4</sup> Iok laol Apram maluluch nge Heka ke la sana.

Nga eteue nenge Heka eteia ke sana lo, talun ke heto heke i pe ngai lele hei palau Sarai. <sup>5</sup> Ol pe Sarai hele lange Apram ke teke, “Iau e amneia melmelenga nga poinga nenge o poia nei. I manmanna ke e tunge lek hekuleileinga ana hei lange iong. Pe heueu nei hele poreke iau iange eteia ke sana lo. Pe e teke Non Soke milteu at nge imem nai nga poinga nei. Itei toto la ke pengpeng?”

<sup>6</sup> Pe Apram hele ke teke, “O nau at, hei nem lem hekuleileinga ana hei ia. O teke o poia i ke merechrei, o poia nga lemengam mana.” Pomalam Sarai poi poreke Heka ke ua sapele.

<sup>7</sup> Hei neu ua pe nanasia kue nenge lange Sur ke la nga ich sana lomona. Pe Non Soke nena hekulkulonga e saolia i nga ech matana e nga lamau. <sup>8</sup> Pe hele lange i ke teke, “Heka, e Sarai nena hekuleileinga ana hei laka iong. O i at nga langai? Pe o la ke merechrei?”

Pe Heka tuacholia ke teke, “E ua hei palau Sarai ana.”

<sup>9</sup> Pe Non Soke nena hekulkulonga hele, “O la mule nge hei soke nem pe o nanas mene nena helenga.” <sup>10</sup> Pe hekulkulonga neu hele mule ke teke, “Lape e poia lem tete mur ke te lohot ke iri halang toto pe mele pele nakuna nge sisele iri ero.”

<sup>11</sup> Pe Non Soke nena hekulkulonga neu hele lange i pule ke teke, “Tong sam lo

pe lape o hoe tum tamane ngana e.

Pe o hetue ke ene Ismael. Ismael-Luna laka: NeHalang longe.

Iange Non Soke longe lem tanginga lo.

<sup>12</sup> Pe Ismael lape poi ke malaka nga kie inolo

pe nena ngarang mur laka hana lochloch

pe hana lochloch reria ngarang laka i.

Pe kila ita ke nek ero

pe kila ke nek luluch nge alona mur ero pule.”

<sup>13</sup> E Heka hetue Non Soke nenge hele luluch nge i neu ke ene, “Tong NeHalang nenge o naue iau.” Iange i hele ke teke, “E naue NeHalang nenge naue iau ke ulolo?” <sup>14</sup> Ke ngana laka te hetue ech matana neu ke ene, “Pia Lahai Roi” Luna laka ech matana nenge NeHalang nenge tu ke maulul naue iau. Ana ech matana kou tu heueu nei kura pe tu nga kileng nenge Kates pe Pet tuna ngaria.

<sup>15</sup> Ke Heka hoe Apram tuna tamane ngana e pe Apram hetue ke ene Ismael. <sup>16</sup> Nga etue nenge Heka

hoe Apram tuna Ismael, Apram ana hesinga lohot ke iri ana non kina henel pe ratele elle (86).

## 17

### *NeHalang Hetaua Apram Ene*

<sup>1</sup> Nga etue nenge Apram ana hesinga iri ana non kina henel pe analoch pe rahtele henel (99) Non Soke lohot nge i pe hele ke teke, “Iau NeHalang Nenge Kerkereng Toto. O nanas mene poinga nge pengpeng pe o poia poinga poreke ngana e nga

matak ero toto. <sup>2</sup> Pomalam lape e poia lek tomunga hel ana helenga luluch nge iong pe e poia lem tete mur ke iri halang toto.”

<sup>3</sup> Ol pe Apram losio pe ma ke nausio pe NeHalang hele lange i ke teke, <sup>4</sup> “Ke lek tomunga hel ana helenga nenge lange iong ngana koi nei: Iong lape o lohohot ke tuele kina mur nge halang toto reette iong. <sup>5</sup> Lape te hetue iong ke Apram ero ol. Em laka Apraham ol iange lape e poia iong ke o lohohot ke tuele kina mur halang reette iong. <sup>6</sup> Lape e poia lem tete mur ke iri halang pe hel nge iri lape te lohohot ke iri naungaala ana hana mur. <sup>7</sup> Lape e poia lek tomunga hel ana helenga luluch nge iong nenge lape tu ke koko. Pe lape E poia lange lem tete mur pule nenge lape te lohohot nge he. Iau NeHalang am Soke pe Iau NeHalang nenge lem tete mur nga hoena aria Soke pule. <sup>8</sup> Ich nenge Kenan nenge o are ia nem hana hel reria ich pe lape e tung lochloche lange iong pe lem tete mur nenge te lohohot nga hoena ke lemo ia ol. Pe iri aria Non Soke NeHalang, ngana koi Iau.”

<sup>9</sup> Pe NeHalang hele lange Apraham, “Iong pe lem tete mur nge he, a rahit tote lek tomunga hel ana helenga nei. <sup>10</sup> Tomunga hel ana helenga nenge e poia nei, e poia lange iong pe lange lem tete mur nge he pule. Pe a rahite ke kerkereng: Iri lochloch ngana nenge iri tatamanna te rir us. <sup>11</sup> Imo lochloch ngana a teu langa us rir ngana. Ke nem heilangia tomunga hel ana helenga nenge e poi luluche nge iong. <sup>12</sup> Nge iri lochloch ngana nenge te lohohot nga hoena nenge aria etue iri rahtele mol lo a riria iri, luluch nge iri nenge tetu luluch nge iong nga lem pele pe te hoe iri. Pe iri nenge lem tete mur ia iri ero pe te olia iri nga umtutuna nge hana taungana hel arir ia iri pule. <sup>13</sup> Ke iri nenge tetu luluch nge iong nga lem pele pe te hoe iri pe iri nenge teolia iri nga umtutuna ariria iri pule. Lek tomunga hel ana helenga nenge e poia lange iong lape tu ke koko nga singimo. <sup>14</sup> Mele

nenge te riria singina ero heporeke lek tomunga hel ana helenga nem, pe lape te lope hote i ke tuteu luluch nge nena hana mur ero ol.”

<sup>15</sup> NeHalang hele la pule nge Apraham ke teke, “Pe iong lem hei Sarai, lape te hetue i ke Sarai ero ol. Lape te hetue i ke ene laka Sara ol. <sup>16</sup> Lape E pete i pe E poia i ke hoe tum tamane ngana e. Pe lape E pete i ke tuele kina mur lochloch taria ia, pe naungaala ana hana mur nenge te nauuele hehei pe hana lape te lohohot nge ana hei tutuna mur.”

<sup>17</sup> Apraham losio ke ma ke sana sio pe melmel pe helele nge isipona ke teke, “Non e nge ana hesinga iri ananon kina lime (100) mai nakuna nge hoe tuna tamane ngana e kura kai? He Sara ana hesinga iri ana non kina henel pe analoch (90) pe lape hoho kura kau?” <sup>18</sup> Pe Apraham hele lange NeHalang ke teke, “Iok teke pomam, O pete Ismael pe o nauuele i ke nek!”

<sup>19</sup> Pe NeHalang hele ke teke, “Oe pe lem hei Sara lape hoe tum tamane ngana e pule pe o hetue i ke ene Isak. Lape E poia lek tomunga hel ana helenga luluch nge i pe nena tete mur nenge lape te lohohot nga hoena. Pe tomunga hel ana helenga nem lape tu ke koko. <sup>20</sup> Lape E poi ke urana lange Ismael ke pomanga o hele ngam. Lape e pete i ke manmanna pe lape e poia i ke tutuna mur halang pule. I lape lohohot ke hana nenge iri mukmuka nge hehei pe hana temeria ia. Hana nemur iri analoch pe nai pe lape te lohohot ke hana kerkereng ngana mur ia iri. <sup>21</sup> Pe lek tomunga hel ana helenga nenge e poia nge Isak, he Sara lape hoe i nga etue nei nga hesinga nenge atat.” <sup>22</sup> NeHalang hele luluch nge Apraham ke het pe lohaka ke la sapele.

<sup>23</sup> Ke nga etue neu pengpeng Apraham nanasia NeHalang nena helenga ke mene tuna Ismael pe aina tatamanna mur lochloch nga nena pele pe iri nenge tetu nga nena pele pe te hoe iri pe iri nenge teolia iri



nga umtutuna ke te rir us. <sup>24</sup> Pe Apraham ana hesinga iri ana non kina henel pe analoch pe rahtele henel (99) pe te riria singina, <sup>25</sup> pe tuna Ismael ana hesinga iri analoch pe mol (13) pe teriria singina. <sup>26</sup> Ke Apraham pe tuna Ismael te riria singiria nga etue neu pengpeng. <sup>27</sup> Pe iri tatamanna lochloch ngana nenga Apraham nena pele pe iri nenge tetu nga nena pele pe te hoe iri pe iri nenge te olia iri nge hana hel te rir us ke elle luluch nge Apraham.

## 18

### *Non Soke Lohot Nge Apraham*

<sup>1</sup> Apraham tu rochroi la nga ae papalau nge Mamre pe Non Soke lohot nge i. Iok kileng chaia matana milang toto lo pe Apraham kilila nga nena pelpele matana <sup>2</sup> pe teke nau haka pe esia hana mol nge te mes. Esia iri pe song hot nga nena pelpele matana ke lange iri pe tualou sio pe tuatuch sio la nga ich. <sup>3</sup> Pe hele, “Hana, iau Non Soke nena non pe lemek ero nge a i toto mana nga lek pelpele ke ala. Lemek ke e teke a iat nga lek pelpele. <sup>4</sup> A i at pe te mene ech ke te lomo sue apemo pe a kila lakoi nga ae nei ene. <sup>5</sup> Pe e la ke e mene ngaunga unne ke a ngau ke kikimo mukam. Ol laka ai mule ia lemo inga ke ala ol. Iange imo a lohot nge iau lo ke pomalam e teke e halaua imo.” Pe hana neu tuacholia ke te teke, “Urana toto, o poia ke pomanga o hele ngam.”

<sup>6</sup> Iok laol Apraham teu la nga nena pelpele ke ueiuei mana pe hele lange Sara ke teke, “O ueiuei! O mene mioka nenge urana toto pe o tune.”

<sup>7</sup> Ke het pe song ke la nga pulumakau mur pe mene lau heke asis ngana e nge lum toto pe tunge lange nena hekuleileinga e ke tune. <sup>8</sup> Ke het pe Apraham mene pulumakau mirana nenge kalum pe siuna eina pe mesmes pe talue nga hatanga nga hana nemur mataria. Hana nemur te ngaungau pe Apraham mes rochroi lange iri nga ae e pule ene.

<sup>9</sup> Ol pe te onteia i ke te teke, “Lem hei Sara ngai?”

Pe Apraham hele ke teke, “I kou nga pelpele letena.”

<sup>10</sup> Ol pe elle nge iri nenge hul ru-mena la nga pelpele, hele ke teke, “Nga hesinga nenge atat neu pe nga teio nei lape e at mule nge iong pe Sara lape hoe tuna tamane ngana e.”

Pe Sara mes teu nga piunga nga pelpele pe longe helenga neu. <sup>11</sup> Apraham iri nai Sara te tuauna toto lo pe Sara hile ana etue mur nga hohonga ke het lo. <sup>12</sup> Ol pe Sara melmel pe helele nge isipona ke teke, “Iau e tuauna toto pe ak non soke tuauna toto pule. Pe lape singik iech nge e ma luluch mule i kura kai?”

<sup>13</sup> Ol pe Non Soke hele lange Apraham ke teke, “Pomerei nenge Sara melmel pe hele ke teke, ‘Iau e tuauna toto lo i pe lape e hoe tuk e ke man-manna kai?’ <sup>14</sup> Apraham e hele lange iong. Non Soke nakuna nge poia ure lochloch. Iau lape e at mule nge iong nga teio nei nga hesinga nenge atat nem pe Sara lape hoe tuna tamane ngana e lo.”

<sup>15</sup> Ol pe Sara matau pe channanga pe hele ke teke, “E melmel ero i.”

Pe non neu hele ke teke, “O melmel laka.”

### *Apraham Hele Ala Kileng Sotom Ana*

<sup>16</sup> Iok hana nemur te lohaka ke te i pe ramaria lange Sotom pe Apraham koko ke puotaua iri. <sup>17</sup> Pe Non Soke letena tuanin nge isipona ke teke, “Urana nge e hele hote utar nenge e teke e popoia lange Apraham. <sup>18</sup> I na tete mur lape te lohot ke iri halang pe iri tuele kina kerkereng ngana mur. Pe nge i mana, lape E poi ke urana lange tuele kina mur lochloch ngana nga ich. <sup>19</sup> Iange Iau Non Soke pe e hesilei hote i ke al-masia tutuna mur pe nena tete mur nenge te lohot nge he, ke te nanasia lek helenga pe te poia poinga nge pengpeng pe urana. Pomalam lape E poi ure lochloch ngana ke lohot nge

i ke pomanga lek tomunga hel ana helenga nenge E poia lange i.”

<sup>20</sup> Ol pe Non Soke hele, “Helenga halang lohohot nga poinga poreke ngana nenge te poreke toto nge te lohohot nge Sotom pe Komora, <sup>21</sup> pe e teke E etei ke nek. Pomalam lape E sio la ke enau nga poinga nenge te popoia, lape poreke toto ke pomanga E longo ngak ma ero?”

<sup>22</sup> Iok, hana nai neu te i ke ramaria sio lange Sotom pe Apraham mes pe NeHalang mes nga matana.

<sup>23</sup> Pe Apraham i lange I pe hele, “Hana urana ngana hel tetu nga kileng neu pule pe lape o heporeke iri luluch nge hana porekreke ngana mur?”

<sup>24</sup> Nenge teke hana urana ngana mur iri ana non kina nai pe analoch (50) tetu nga tuele tana neu, lape o heporeke iri ke te lasus lochloch? Ma lape letemia iri pe o heporeke tuele tana neu ero? <sup>25</sup> Poinga nenge o teke o poia lange hana poreke ngana mur ke o hune iri, o poia lange hana urana ngana mur ero. Nem nakuna urana ero. Milteunga nenge lala nge hehei pe hana nga ich lochloch song ke nanasia poinga nge pengpeng.”

<sup>26</sup> Ol pe Non Soke hele ke teke, “Nenge teke e naue ke hana urana ngana mur iri ana non kina nai pe analoch (50) tetu nge Sotom, lape e heporeke kileng neu ero.”

<sup>27</sup> Ol pe Apraham hele mule ke teke, “Non Soke iau e pomalaka nga maruchrue pe apou. E ontei sakilil mana koi pe letem inin taua iau ero. <sup>28</sup> Nenge teke hana urana ngana mur aria sisalanga hele sio ke lime iri ero, lape o heporeke kileng neu pule?”

Pe Non Soke hele ke teke, “Nenge teke e naue ke hana urana ngana mur iri ana non kina nai pe lime mana, lape e heporeke kileng nem ero pule.”

<sup>29</sup> Pe Apraham ontei mule I ke teke, “Pe nenge teke o hottau ke hana iri ana non kina nai te urana, lape o heporeke kileng neu pule?”

Pe Non Soke hele, “Lape letek ia iri ke e heporeke kileng neu ero.”

<sup>30</sup> Pe Apraham hele, “Non Soke letem inin taua iau ero pe e ontei mule. Pe nenge teke hana iri ana non kina elle pe analoch mana nge te urana lape pomerei?”

Pe Non Soke hele, “Nenge teke e hottau ke hana iri ana non kina elle pe analoch mana nge te urana, lape e heporeke kileng nem ero pule.”

<sup>31</sup> Pe Apraham hele, “Non Soke e ontei sakilil pe letem inin taua iau ero. Nenge teke hana nenge te urana iri ana non kina elle mana tetu lamau?”

Pe Non Soke hele, “Lape letekia iri ke e heporeke kileng neu ero.”

<sup>32</sup> Pe Apraham hele, “Non Soke letem inin taua iau ero pe e ontei elle mule. Nenge teke hana nenge urana iri analoch mana tetu lamau?”

Pe Non Soke tuacholia, “Lape letek ia iri pe e heporeke kileng neu ero pule.”

<sup>33</sup> Iok Non Soke hele luluch nge Apraham ke het pe hile i pe la sapele. Pe Apraham la mule nga nena kileng.

## 19

### *NeHalang Hengaululue Kileng Sotom Pe Komora*

<sup>1</sup> Angkelo nai nenge te hilesue NeHalang iri nai Apraham, tela ke te sauhot nge Sotom nga ulei. Te sauhot pe Lot kilikila nga tuele tana neu ana kue matana. Nga etue nenge Lot naue iri lohaka ke la taua iri pe tualou sio pe tatuch sio la nga ich. <sup>2</sup> Pe hele ke teke, “Hana papalau nai nem a i at nga lek pele ke a lomo sue apemo pe nga miliko a ma mukam. Pe nga uach a lohaka pe a i mule ol.”

Pe iri te tuacholia ke te teke, “Ero mo ma la i loi nga kileng unne nenge hana te heukiraurau ia.”

<sup>3</sup> Pe ero, Lot mes ke kerkereng nga nena helenga kura pomalam te nanasia Lot ke te la nga nena pele. Pe Lot tatalo hele aria ngaunga ke umeia peret nenge ana is ero ke te ngaua.

<sup>4</sup> Iok te mamani ero kura pe hana lochloch ngana nga tuele tana nenge Sotom te at ke te heliliu hite pele. Iri nenge lolomele pe nenge te tuauna

lo te at pule. <sup>5</sup> Pe te iu lange Lot ke pomai, “Hana nai nenge te at ke tema nga lem pele ngai? O mene iri at nge imem ke mo heporeke iri lakoi nge hot.”

<sup>6</sup> Ol pe Lot i hot pe piuele mule piunga pe lange iri <sup>7</sup> pe hele ke teke, “A poi ke mam ero! Iau pekngak mur laka imo pe a poia poinga poreke ngana nei ero. <sup>8</sup> Anau at, iau tutuk mur heheina nai nge tema luluch nge hana ero kura. Lape e mene hote iri at nge imo pe a poi lange iri nga lememo ngamo. Pe a poia ute lange hana nai nei ero iange te teu at nga lek pele ke e nauele iri.”

<sup>9</sup> Pe Sotom mur te tuacholia ke te teke, “Ah! O poi hele imem ero. Iong ngie koke iong ke o at pe lem nga lamai ero. Pomerei nenge o mil teu at nga lememo poinga mur? Heueu lape mo heporeke tote iong nge iri.” Te echia Lot pe te puo teua iri la nga piunga ke te teke te palchach sue.

<sup>10</sup> Pe ero. Hana nai nenge teu te tak teua Lot la nga pele letetena pe te piuele piunga. <sup>11</sup> Pe hana lolomele ngana mur pe tuauna ngana mur te mes nga pele neu ana piunga nge hot. Pe hana nai neu te poia iri ke mataria puluala pe te rere mene piunga ol.

<sup>12</sup> Pe hana nai neu te onteia Lot ke te teke, “Lem hana hel kai tetu nga tuele tana nei pule mai? O mene tutum mur nenge tatamanna pe heheina pe uem mur pe itei hel pule nenge lem hana mur ia iri pe a ua hot nga lamai, <sup>13</sup> iange lape mo hengau lulu heke kileng nei. Helenga halang toto lohohot nga poinga poreke ngana nenge poreke toto nge te lohohot nga kileng nei, pomalam Non Soke kulosia imem at ke mo hengau lulu heke.”

<sup>14</sup> Iok la ol, Lot la ke hele lange uene mur. Hana nai neu te teke te lechleia Lot tutuna heheina mur. Pe hele lange iri ke teke, “Ueiuei mana pe a ua hot nga lamai iange Non Soke lape hengau lulu heke tuele tana nei!” Pe uene nemur te teke ma songlelele re-ria.

<sup>15</sup> Iok uach sio lo pe angkelo nemur te heueiuei ia Lot ke te teke, “Ueiuei mana! O mene lem hei pe tutum mur heheina nai nei pe a ua hot nga kileng nei iange lape a mete luluch nge hehei pe hana nga kileng ngaulala ngana heueu.”

<sup>16</sup> Pe Lot poi hulul mana iange letena tuanin rara ke halang. Ol pe hana nai neu te rahite Lot pe nehei pe tutuna heheina nai neu nga peria pe te mene hot kelkel ia iri nga tuele tana neu, iange Non Soke letena porekeia iri. <sup>17</sup> Te mene hote iri lange hot ke ulo pe elle nge iri hele, “A song ke a eleis maul ngamo pe a ralele mule ero! Pe a mes ke a tah eingamo nga kileng unne nga mos nei ero! A song ke a la toto nga hengene mur iange lape a mete heueu!” <sup>18</sup> Pe Lot hele, “Hana papalauna, nakuna nenge lape e nanasia lemo helenga ero pai! <sup>19</sup> Imo letemo poreke ia lemo non ke a teke a halaua iau ke e maulul. Pe nakuk ero nge e song langa hengene nemur iange te tu ke kangkanga hali, pe oan ngaulala ngana nem lape saol mene iau nga lamai pe e mete. <sup>20</sup> A nau la tuele tana sune kou tu neu. Tuele tana neu tuna mana pe tu rochroi pol. Ke nenge teke a longele iau, toinge e song ke e eleis maul ngak ke ela la kou.”

<sup>21</sup> Pe angkelo neu hele lange i ke teke, “Iok urana, e ngata nga lem helenga nem, pe lape e heporeke tuele tana sune nem nenge o heleia nem ero. <sup>22</sup> Pe o song la lamau ke ueiei mana. Iau lape e poia ute e ke lohohot ero mukam pe nga etue nenge o la ke o lohohot lamau lape e poia ke lohohot ol.” (Tuele tana neu tuna mana ke ngana laka nenge te hetue ene Soa.)

<sup>23</sup> Nga etue nenge Lot sauhote i nge Soa, chaia matana haka ke tue kileng sapele. <sup>24</sup> Ol pe Non Soke poi hot sapele um milanglang ngana mur pe oan nga tapa sana, pe te losio ke pomanga pitte nenge sio nge Sotom pe Komora. <sup>25</sup> Ke tuele tana nai neu Non Soke heporeke iri ke te het luluch nge hehei pe hana pe ae pe ure lochloch

ngana nenge te haka nga mos neu. <sup>26</sup> Iok Lot nehei teke ralele la mule, pe NeHalang hulia i la nga mesmes pe kerkereng ke pomanga um tana e ke mes mana ol.

<sup>27</sup> Pe nga uach uruna toto Apraham memete hot pe la mule nga kileng unne nenge mesia nga Non Soke matana. <sup>28</sup> Pe nausio lange Sotom pe Komora pe nauole langa ich lochloch ngana nenga mos pe esia oan pulungana. Oan pulungana neu nakuna pomanga lohohot nga oan e nge palaungana toto.

<sup>29</sup> Lot tunga mos nga kileng neu pe nga etue nenge NeHalang heporeke tuele tana nai neu letena metene Apraham. Pomalam mene hote Lot ke eleis maulngana nga oan palaungana neu.

#### *Lot Pe Tutuna Heheina Mur*

<sup>30</sup> Ke Lot pe tutuna heheina nai neu te tu nge Soa. Pe ana non matau, ol pe te loloun haka ke la te tu nga rika nga hengene mur. <sup>31</sup> Ol pe nga etuene e tuna nenge tengene ana hele lange tina nenge kino ke teke, "Poinga nenga ich lochloch hehei pe hana te hohoe tuturia mur. Pe ita lape ta hoe tutura mur hel ero iange hana ero nga kileng nei pe temere tu-auna lo. <sup>32</sup> Pomalam ta heinia temere nga uain ke mamani pe ta ma luluch nge i, ke tutura mur pe rera tete mur lape te lohohot, urume poinga nenge tapoia lange temere."

<sup>33</sup> Ke nga miliko neu te poia temeria ke inia uain pe tuna nenge soke teu ke la maluluch nge i. Ana hei maluluch nge temene ke het pe lohaka ke la pe Lot eteia ute e ero toto.

<sup>34</sup> Iok pomange rou tuna nenge soke hele lange tina nenge kino ke teke, "Nge lona nga miliko e ma luluch nge temek. Pe heueu nga miliko ta hein mule i nga uain pe o teu ke la o ma luluch nge i. Ke tutura mur pe rera tete mur lape te lohohot urume poinga nenge tapoia lange temere."

<sup>35</sup> Ke nga miliko neu te poia temeria ke in mule uain pe tuna nenge kino teu ke la ma luluch nge i. Ana hei ma

luluch nge temene ke het pe lohaka ke la pe Lot eteia ute e ero toto pule.

<sup>36</sup> Ke Lot tutuna mur heheina nai neu, saria mule nge temeria. <sup>37</sup> Tuna nenge tengene ana hoe tuna tamane ngana e pe hetue ke ene Moap. Ke Moap nemur nenge tetu heueu nei reette laka i. <sup>38</sup> Pe tuna nenge kino pule hoe tuna tamane ngana e pe hetue ke ene Ben-ami. Ke Amon nemur nenge tetu heueu nei reette laka i.

## 20

### *Apraham Channanga Ia Apimelek*

<sup>1</sup> Iok Apraham lohaka nge Mamre pe loloun langa tuele kina nenge Nekep pe lake are nga kileng Kates pe Sur tunangaria. Ke Apraham tu nge Kerar ke mala pol. <sup>2</sup> Ol pe hele urume nehei Sara ke teke, "Hei nei iau liuk ia." Pomalam Apimelek hekulo Sara ana pe te mene lange i.

<sup>3</sup> Pe ero NeHalang lohohot nge Apimelek nga ma opene ngana pe hele lange i ke teke, "Iong lape o mete iange hei nenge o mene nem, lei lo laka."

<sup>4</sup> Pe Apimelek hele ke teke, "Non Soke nenge teke none poia poinga poreke ngana e ero, lape o hun suo mene i luluch nge nena hana mur ma?" Apimelek hele ke pomau iange poia poinga poreke ngana e lange Sara ero kura. <sup>5</sup> Pe Apimelek hele mule lange NeHalang ke teke, "Apraham hele at nge iau ke teke, 'Hei nei iau liuk ia.' Pe Sara hele ke teke, 'Non nei iau tik ia.' Nga etue nenge e mene hei nei letek ke e teke e poia poinga urana ngana mana lange i pe e poia poinga poreke ngana e lange i ero."

<sup>6</sup> Pe Nehalang hele lange i nga ma opene ngana neu ke teke, "Oe, E eteia ke iong letem ke o teke o poia poinga urana ngana mana. Pe lemek ero nge o poia poinga poreke ngana e nga matak. Ke ngana laka nenge e poi hele iong ke o ma luluch nge hei nem ero. <sup>7</sup> Heueu nei o tung mule hei nem lange ene iange ene i hetatalonga ia. Pe hei nem ene lape hetalaulau am



ke o tu ke o maulul. Pe nenge teke o la muleia hei nem nge ene ero, o etei mellehe mene ke iong pe lem hana mur lochloch lape a mete.”

<sup>8</sup> Nga uach uruna toto Apimelek iua nena hana papalauna mur pe heleia ure lochloch ngana nenge NeHalang heleia lange i nga ma opene ngana, pe hana nemur te matau toto.

<sup>9</sup> Iok, Apimelek iu teua Apraham pe hele, “Pomerei nenge o poia imem ke pomai? Iau mai e poia poinga poreke ngana e lange iong ke merei toto, nenge o poia iau pe lek naunga-ala ana kileng ke mo tu teu nga poinga poreke ngana nei? Poinga nemur nenge toinge o poia at nge iau ero, ngana koi o poia at nge iau nei.” <sup>10</sup> Pe Apimelek onteia Apraham ke teke, “Lem huna nga utar toto nenge o poia poinga nei?”

<sup>11</sup> Pe Apraham tuachol ia ke teke, “E poi ke mai iange nga letek e teke, ‘Mele nga kileng nei mataua NeHalang ero toto pe lape te hune iau pe te mene lek hei.’” <sup>12</sup> Pe i manmanna ke, iau liuk toto ia, iange imem nai temem elle pe tamem altoto pe iau lek hei laka i. <sup>13</sup> Pe nga etue nenge NeHalang hele at nge iau ke e hile temek na pele pe e loloun rara langa kileng mur, e hele lange ana hei ke e teke, ‘O henonou hote mutemngam at nge iau ke mai koi: Nga kileng lochloch ngana nenge ta la ia o hele ke o teke, “Non nei iau tik ia.”’ ”

<sup>14</sup> Ol pe Apimelek tung mule Sara lange Apraham pe mene sipsip tata-manna pe heheina pe pulumakau tatamanna pe heheina pe hehei pe hana nenge te ume manmana pe tunge iri lange i pule. <sup>15</sup> Pe Apimelek hele lange Apraham ke teke, “O naula lek ich kou lochloch ngana neu; ol la pe o are nga lemengam.”

<sup>16</sup> Pe Apimelek hele lange Sara ke teke, “E tung ke um tutuna iri halang (K1000.00) lange tim Apraham. E tung mata hue ngana ana ia, nenge lange iri lochloch ngana nenge te tu luluch nge iong ke te eteia ke iong o poia poinga poreke e ero.”

<sup>17</sup> Ol pe Apraham hetalaulau lange NeHalang ke hemas mule Apimelek pe ne hei pe nena hekuleileinga ana hehei mur ke te hoho mule. <sup>18</sup> Non Soke poi hele hehei lochloch ngana nenga Apimelek nena pele ke te hoho ero, iange nga poinga nenge lohoh nge Sara.

## 21

### *Sara Hoe Isak*

<sup>1</sup> Non Soke poi ke urana lange Sara ke pomanga nena helenga kerk-ereng ngana nenge poia ke ulolo.

<sup>2</sup> Ke Sara sana pe hoe tuna tamane ngana e nge Apraham nga etue nenge Apraham tuauna toto lo. Pe pule nga etue nenge NeHalang hele talue lange Apraham. <sup>3</sup> Pe Apraham hetue tuna nenge Sara hoe ke ene Isak. <sup>4</sup> Pe nga etue nenge Isak ana etue iri rahtele mol Apraham rir ia singina ke pomanga NeHalang hele ngana ia lange i. <sup>5</sup> Apraham ana hesinga iri ana non kina lime (100) nga etue nenge Sara hoe tuna tamane ngana neu nge i.

<sup>6</sup> Pe Sara hele, “NeHalang poi ke urana at nge iau ke e iech pe e melmel pe iri lochloch ngana nenge te longe iau nge e poi ke pomai lape te iech pe te melmel pule.” <sup>7</sup> Pe Sara hele pule ke teke, “Itei toto nenge lape hele lange Apraham ke teke, lem hei Sara lape hoe tuna pe nakuna nge hesiua kau? Pe ero, Apraham tuauna lo pe e hoe tuna tamane e.”

### *Heka Pe Ismael*

<sup>8</sup> Pe kol sune neu i soke pe hile siu, pe nga etue nenge hile siu Apraham poia ana ngaunga matana palaungana. <sup>9</sup> Pe Heka nenge nena nge Ekipto hoe tuna tamane ngana e nge Apraham. Pe nga etuene e, Sara naue Heka tuna Ismael nge hesalang lululuch nge Isak. <sup>10</sup> Ol pe hele lange Apraham ke teke, “O kulosia lek hekuleileinga ana hei nei pe tuna pele pa neu ke te la toto nga kileng unne. Iange lemek ero nge hei nem tuna mene lem ute e. Tuk Isak i toro mana lape mene lem ure lochloch.”

<sup>11</sup> Pe Apraham letena meena toto iange letena ia tuna Ismael. <sup>12</sup> Pe NeHalang hele lange i ke teke, “Letem meena sakililia kol nem pe lem hekuleileinga ana hei nem ero; o longo la mana nga utar nenge Sara heleia lange iong. Iange lem tete mur lape te lohok laka nge Isak. <sup>13</sup> Pe hekuleileinga ana hei nem tuna, lape e poia na tete mur ke te lohok ke iri halang pule iange iong tum ia.”

<sup>14</sup> Iok nga uach uruna toto Apraham memete pe mene ngaunga pe ech kina nenge te ume hote nga huros ulina pe tunge lange Heka. Pe tal heke nga hei neu palpanna pe kulosia iri nai tuna ke te la. Te i ke tela pe te i rara pulut mana nga ich sana lomona nge Pesepa.

<sup>15</sup> Nga etue nenge aria ech soso nga kina talsio mene tuna nga ae sune ene ol, <sup>16</sup> pe i la ke are kangkanga toto nge tuna iange letena ke teke, “Lemek ero toto nge e esia tuk nge mete nga matak.” Ke ana hei are pe tangtang ol.

<sup>17</sup> Pe NeHalang longe kol neu nge tangtang pe nena angkelo tu nga tapa pe iu lange Heka ke teke, “Heka, pomerei? O matau ero; kol neu ma lamau ke tangtang pe NeHalang longe ke ulolo. <sup>18</sup> O in heke kol nem pe o rahite i nga penna iange lape e poia i ke na tete mur iri halang toto.”

<sup>19</sup> Ol pe NeHalang ulele hei neu matana pe naue ech matana e nge te selia. Pomalam la ke hemuta mule ech kina neu pe tunge lange Ismael ke in.

<sup>20</sup> Nga etue nenge kol neu puo ke hakaka NeHalang nau elele i. Pe ana non tutu nga ich sana lomona pe etei toto nga io tua ngana. <sup>21</sup> Nga etue nenge tetu nga ich sana lomona nge Paran, tana mene nehei e nge Ekipto.

### *Apraham Pe Apimelek Te Poia Tomunga Hel Ana Helenga*

<sup>22</sup> Iok ne Pikol i non nenge nauelele Apimelek nena palinga hel ana hana mur. Pe nga etue neu iri nai te hele lange Apraham ke te teke, “NeHalang tu luluch nge iong nga ure lochloch

ngana nenge o popoia. <sup>23</sup> Iok o hele ke manmanna toto at nge iau nga NeHalang matana ke o pallaka mule iau ero ol pe o pallaka ia tutuk mur pe lek tete mur ero pule. Iau e poia poinga urana ngana lange iong. Ke pomalam o poi ke urana at nge iau pe o poi ke urana langa kileng nenge iong non lomona ngana pe heueu nei o iat ke o are ia.”

<sup>24</sup> Pe Apraham hele, “Oe E hele ke manmanna toto.”

<sup>25</sup> Pe Apraham toto hita mule lange Apimelek nga nena ech matana e nge nena hana mur te mene mule. <sup>26</sup> Pe Apimelek hele ke teke, “E eteia mele nenge poia poinga nem ero. Heueu mana nei i e longe ol iange iong o hele toto at nge iau ero nike.”

<sup>27</sup> Iok la ol Apraham mene sipsip mur hel pe pulumakau hel ke tunge lange Apimelek pe iri nai te poia tomunga hel ana helenga neu. <sup>28</sup> Pe Apraham mene hote sipsip heheina iri rahtele nai nga nena sipsip mur ke talue iri ke altoto, <sup>29</sup> pe Apimelek onteia Apraham ke teke, “Iong o mene ke sipsip heheina iri rahtele nai pe o tal hote iri ke altoto. Nei luna ma ke merei?”

<sup>30</sup> Pe Apraham tuacholia ke teke, “O longala ke o mene sipsip rahtele nai nei nge iau pe o hele hote ke iau koi nenge e selia ech matana nei.”

<sup>31</sup> Ke pomalam te hetue kileng neu ke ene Pesepa iange hana nai neu te poia reria tomunga hel ana helenga lamau.

<sup>32</sup> Iok te poia tomunga hel ana helenga nge Pesepa ke het pe Apimelek iri nai Pikol te la mule nga ich nenge Palestaen mur. Ne Pikol i non nenge nauelele Apimelek nena palinga hel ana hana mur. <sup>33</sup> Pe Apraham tue ae tamaris nge Pesepa pe heto heke Non Soke NeHalang Nenge Tu Ke Koko ene nga lamau. <sup>34</sup> Pe Apraham tu nga ich nenge Palestaen mur ke mala toto.

## 22

### *NeHalang Olleke Apraham*

<sup>1</sup> Pe nga etue hel nga hoena NeHalang olleke Apraham pe hele, "Apraham ou!"

Pe Apraham tuacholia, "Iau koi."

<sup>2</sup> Pe NeHalang hele ke teke, "O mene tum tamane ngana elle nem nenge mutem tau tote - Isak pe o la nga kileng nenge Morea. Pe o makia ilamau ke pomanga lem tunginga, nga hengene e nenge lape e henonoua lange iong."

<sup>3</sup> Iok laol nga uach uruna toto Apraham lohaka ke rechia ae nenge lape mak tunginga ia pe tatach heke nga nena tongki. Pe mene tuna Isak luluch nge nena hekuleileinga nai pe te la sapele nga hengene nenge NeHalang heleia lange i. <sup>4</sup> Pe nga etue mol ngana Apraham nau toto la pe esia hengene neu. <sup>5</sup> Pe hele lange nena hekuleileinga ana hana mur ke teke, "Imo nai a tu luluch nga tongki la koloi pe imem nai kol nei mo langa lamau ke mo heto heke Non Soke. Ke het pe mo at mule nge imo."

<sup>6</sup> Iok la ol Apraham inheke ae putana nenge lape mak tunginga ia pe tal heke lange tuna Isak ke takisia. Pe isipona mene oan pe kakop ke iri nai te i luluch ke tela. <sup>7</sup> Pe Isak hele haka pe onteia temene Apraham ke teke, "Temek!"

Pe Apraham tuacholia, "Oe, kolek o hele."

Pe Isak hele ke teke, "Ae mur pe oan koloi - pe sipsip nenge ta mak ke tunginga ia, ngana ngai?"

<sup>8</sup> Pe Apraham tuacholia ke teke, "Kolek, NeHalang isipona lape tunge sipsip nenge lape ta mak ke tunginga ana ia." Pe iri nai te i luluch ke tela.

<sup>9</sup> Iok tela te sauhot lamau nga kileng nenge NeHalang heleia lange i pe Apraham lung heke sapele hatanga pe tatach heke ae mur nga ona. Ke het pe kale hite tuna Isak pe tal heke i la nga ae ona nga hatanga neu. <sup>10</sup> Ke het pe Apraham mene heke kakop ke teke hune tuna. <sup>11</sup> Pe Non Soke nena angkelo nga lut nga tapa alngana sio lange i ke teke, "Apraham, Apraham!"

Pe Apraham tuacholia ke teke, "Iau koi."

<sup>12</sup> Pe angkelo neu hele, "O hune tum ero. Pe o poia ute e lange i ero. Heueu nei e eteia ol ke iong o longotau tote NeHalang. Iange o hunele tum elle nenge mutem tautote nem nge iau ero."

<sup>13</sup> Iok Apraham teke naula pe esia sipsip tamane ngana e nge ana sangkar chauchau teu nga tapulpul unne. Ol pe la ke laua ke mene Isak munna ke mak heke ke poi tunginga ia. <sup>14</sup> Ke Apraham hetue kileng neu ene ke Non Soke tunge. Ke nga etue neu ke at heueu nei te hetue ke, "Nga hengene nenge Non Soke tunge."

<sup>15</sup> Pe Non Soke nena angkelo nga tapa alngana henai ngana lange Apraham <sup>16</sup> ke teke, "Non Soke isipona hele hot ke teke, 'Iong tum elle mana pe mutem tau tote pe o hunele i ero. <sup>17</sup> Pomalam lape e pete iong pe e poia lem tete mur ke iri halang toto ke pomanga itoch mur nga tapa sana pe peipei nga ruach ilina. Pe lape te mene tuele kina mur pe reria ngarang mur ke reria ia. <sup>18</sup> Iong o longo tau tote Iau ke nge lem tete mur mana lape e pete hulua lochloch ngana nga ich.' "

<sup>19</sup> Iok la ol Apraham pe Isak te i sio la mule nge nena hekuleileinga ana hana mur pe iri lochloch tela mule nge Pesepa nga Apraham tu nganngana.

### *Nahor Nena Tete Mur*

<sup>20</sup> Iok etue hel nga hoena Apraham longe nge te teke, "Tim Nahor pe ne hei Milkah te hoe tuturia mur rahtele mol nge iri tatamanna. <sup>21</sup> Ke tuna tengene ana ene laka Us pe tina e ene Pus. Pe tiria e pule ene Kemuel (nenge Aram temene). <sup>22</sup> Pe tiria e pule ene Keset pe e ene Haso pe e ene Piltas pe e ene Sitlap pe e ene Petuel." <sup>23</sup> Pe Petuel lohok ke Repeka temene ia. Ke Milka hoe tutuna mur ratele mol nge Apraham tina Nahor. <sup>24</sup> Pe Nahor nehei e pule ene Reuma pe tutuna mur henel: Tapa pe Kaham pe Tahas pe Maaka.



## 23

### *Sara Mete Ngana*

<sup>1</sup> Sara tu ke ana hesinga iri ana non kina rahtele elle pe rahtele nai (127), <sup>2</sup> pe mete nge Kiriat Arpa (nenge ene e pule Hepron) nga ich nenge Kanan. Pe Apraham la ke tangia Sara pe are ia ana lete.

<sup>3</sup> Ol pe lohaka pe hele lange ne Hitae tutuna mur pe na tete mur ke teke, <sup>4</sup> “Tau ngie koke iau ke at e tu luluch nge imo. A tung hote ich unne ke e alo hite lek hei pe e olia lange imo.”

<sup>5</sup> Pe ne Hitae tutuna mur pe nena tete mur te tuacholia lange i ke teke, <sup>6</sup> “Kole o longo at nge imem. Nga lamai mo naue iong ke iong non kerkereng ngana. Iong sipom o nau pe o hesilei hote ich unne ke o alo hite lem hei. Mele pele lape unhele ich nge iong ero.”

<sup>7</sup> Ol pe Apraham lohaka pe tualou suo lange iri ich tokoninga Hitae mur. <sup>8</sup> Pe hele lange iri ke teke, “Nenge teke a longele iau ke e alohite lek hei, iok a longo at nge iau. A mene lek helenga pe ala ke a hele lange Epron nenge ne Soar tuna <sup>9</sup> ke tunge nena ich unne nge Makpela at nge iau. Ana ich tu nga ich nei het ala ngana. A onteia i ke tunge at nge iau pe e olia uruna lochloch ke meena lange i, ke lek metenga ana kileng ia ol.”

<sup>10</sup> Iri te are nga tuele tana neu ana kue matana ke te helele pe Epron kou kila luluch nge iri. Pe ana non tuacholia Apraham <sup>11</sup> ke teke, “Ero, non soke o longo at nge iau, nga lek hana mur mataria lape etung mene ich nem pe polo nenge tu nga ich nem lange iong ke o alohit lem hei ia.”

<sup>12</sup> Pe Apraham tualou sio mule lange ich tokoninga mur nga mataria. <sup>13</sup> Apraham longe Epron nge hele ke mau pe hele, “Nenge teke lememe lape e olia ich nem lange iong. O ngata ke o mene ich uruna nge iau pe e alohite lek hei lamau.”

<sup>14</sup> Pe Epron tuacholia lange Apraham ke teke, <sup>15</sup> “Non soke o longo at

nge iau, ich nem uruna laka umtutuna iri ana non kina iri ana non kina elle (400). Pe letemia nem ero. Nge ita nai ute pele nga nem ero, o la ke o alo hite lem hei nga ich nem.”

<sup>16</sup> Apraham ngata nga Epron nena helenga pe sisala hot ke umtutuna iri ana non kina iri ana non kina elle (400) ke pomanga Epron heto ngana pe tunge lange i. Umtutuna ana hana mur te olol ich nga umtutuna nenge pomau pule.

<sup>17</sup> Ke Apraham olia Epron nena ich nge Makpela luluch nga metenga ana kileng pe ae lochloch ngana nenge temes nga ich neu. Kileng Makpela tu rochroi lange Mamre. <sup>18</sup> Ke hana lochloch ngana nenge te heukirau nga tuele tana neu ana kue matana te eteia ke ich neu, Apraham nena ia ol. <sup>19</sup> Apraham olia ich neu ke het pe alohit sapele nehei Sara nga polo nga ich nenge Makpela. Kileng neu tu rochroi nge Mamre (nenge ene e pule Hepron) nga ich nenge Kenan. <sup>20</sup> Ke Hitae mur reria ich neu te tunge lange Apraham pe nena hana mur ke reria metenga ana kileng ia ol.

## 24

### *Isak Pe Repeka*

<sup>1</sup> Iok Apraham tuauna toto lo pe Non Soke pete i nga ure lochloch.

<sup>2</sup> Pe Apraham hele lange nena hekuleileinga mur aria soke nga nena pele, nenge nau elele nena ure mur ke teke, “O talue perim nga haek ene. <sup>3</sup> Pe o hele ke kerkereng toto nga Non Soke NeHalang nenga tapa pe nga ich matana. O hele ke o teke, o heleia tuk nge heie nge Kenan ero, nga kileng nenge e tutuia nei. <sup>4</sup> Pe o la mule nga lek kileng huna nga tuele tana nenge e at ia, nge alok mur pe o mene tuk Isak nehei e nga lamau.”

<sup>5</sup> Pe hekuleileinga ana non neu ontei ke teke, “Pe nenge teke hei neu lemene ero nge at luluch nge iau? Lape e mene tum ke lamule nga tuele tana nenge o at ia?”

<sup>6</sup> Pe Apraham hele ke teke, “Lemek ero nge o mene mule tuk la lamau.

<sup>7</sup> Non Soke NeHalang nga tapa mene hote iau nge iri lochloch ngana nenge tetu ke elle luluch nge temek pe nga lek ich. Pe I hele ke kerkereng toto at nge iau ke teke, 'Lape E tunge ich nei lange lem tete mur.' Ana non lape kulosia nena angkelo ke i muka nge iong pe halaua iong ke o mene tuk nehei e nga lamau. <sup>8</sup> Pe nenge teke hei nem lemene ero nge at luluch nge iong, helenga kerkereng ngana nenge e hele lange iong ke poia nem lape poia ure meena ngana e lange iong ero. Pe o mene mule tuk la lamau ero toto." <sup>9</sup> Ke pomalam hekuleileinga ana non neu talue penna nga ana soke Apraham haena ene pe poia helenga kerkereng ngana nem.

<sup>10</sup> Iok la ol hekuleileinga ana non neu mene ke kamel iri analoch nge ana soke Apraham pe lolochia ure urana ngana mur nge i pe i sapele ke ramana lange Aram Naharaim. Nga kileng ilina hele nenga lut nge Mesopotamia pe i ke langa tuele tana nenge Nahor. <sup>11</sup> Pe poia kamel mur ke te tualou sio rochroi langa ech matana e nge tu nge hot nga tuele tana neu. Kileng lala ke ulechlei lo pe hehei aria etue nenge te hot ke la te e ech.

<sup>12</sup> Pe ana non hetalaulau ke teke, "Ak soke Apraham ana Non Soke NeHalang, letem metene lem tomunga hel ana helenga nenge o poia lange ak soke Apraham, pe heueu o halaua iau ke e hottaua hei nem. <sup>13</sup> O nau at, iau koi e mesmes nga ech matana nei ilina pe hehei pe hana nga tuele tana neu, tuturia mur kou te hot atat ke te eulul ech. <sup>14</sup> E teke o poia ke nga etue nenge e hele lange hei malolong ngana e ke e teke, 'Kole o talsue am ech kina ke e in mukam.' Pe nenge teke hei nem isipona nenge o henonou hote ke Isak nehei ia, lape hele ke teke, 'O in, pe e heinia lem kamel mur pule.' Nem lape e eteia ke o poi ke nek toto lange ak soke Apraham."

<sup>15</sup> Non neu hetalaulau ke het ero kura pe esia Repeka nge takisia ana ech kina nga ekena. Repeka temene

laka ne Petuel pe Petuel tana laka Milka pe Milka ene laka Nahor pe Nahor tina laka Apraham. <sup>16</sup> Hei neu nakuna urana toto pe none maluluch nge i ero kura. Ana hei sio la nga ech matana ke ea ana ech kina pe lo haka at mule.

<sup>17</sup> Pe hekuleileinga ana non neu, ueiuei mana pe la saholia pe hele, "Kole o tunge ak ech unne nga am ech kina."

<sup>18</sup> Pe hei neu hele, "Non soke, o in." Pe ueiuei mana hekena het sue ech kina langa penna pe tunge lange non neu ke in.

<sup>19</sup> Hei neu tunge ech lange non neu ke in ke het pe hele, "Lape e eulia ech pe e tunge lange lem kamel mur pule ke te in ke saria una toto." <sup>20</sup> Ke ana hei eusiling sue ech nga ana ech kina ke sio langa kaliu pe song la mule nga ech matana ke ea ech hel pule. Pe eulia ke halang toto ke purpure kamel mur. <sup>21</sup> Pe non neu reng mana pe nau mana lala nga hei neu poi nganngana. Pe letena tuanin ke teke, "Lape hei nem mam lom? Nenge teke isipona eh! Non Soke poia lek inga nei nganngana ke lohoh lo."

<sup>22</sup> Iok kamel mur te in ech ke het pe non neu mene hote paspas nai nge te ume hote nga um chalemlem ngana nge meena pol pe tunge lange hei neu ke pue iri nga penna. Pe mene hote hei neu ina ana uto ke puo teua nga ina. <sup>23</sup> Ke het pe onteia hei neu ke teke, "Itei tuna iong? O hele at nge iau ke nek, iau pe lek hana mur mo tango rara pele nge mo maia. Pomere mo at ke motu nga temem na pele?"

<sup>24</sup> Pe ana hei tuacholia ke teke, "Iau temek laka ne Petuel pe temek tana laka he Milka pe temene laka ne Nahor. <sup>25</sup> Imem lemem huros mur aria ngaunga halang pe muria halang nge te maia pe lememe pele letena halang pule nge a maia nga miliko."

<sup>26</sup> Ol pe non neu tualou sio pe heto heke Non Soke <sup>27</sup> ke teke, "Ta heto heke ak soke Apraham ana Non Soke NeHalang. I rahite nena helenga kerkereng ngana nenge poia lange ak soke pe sau sue ero. Pe nga lek

inga nei Non soke poia iau ke e la pengpeng nge ak soke alona mur.”

<sup>28</sup> Non neu hetalaulau ke mau pe hei malolong neu song sapele ke la heleia ure nemur lange tana pe iri lochloch ngana nenge tetu luluch nge i. <sup>29</sup> Pe Rebeka liuna e nge ene Lapan. Ana non song hot lange non neu nga ech matana. <sup>30</sup> Lapan song hot la iange naue uto nga liuna ina pe enre chelemlem ngana mur nga penna hele pe hele. Pe longe liuna nge heleia ure nenge non neu heleia lange i. Pomalam lohohot ke la pe saholia non neu nge mes luluch nge kamel mur nga ech matana. <sup>31</sup> Pe hele lange non neu ke teke, “Iong Non Soke pete iong nga ure urana ngana mur, o iat luluch nge iau. O mes mana nge hot lamai ke? E tatalo hele pele e lo pe lem kamel mur muria pule.”

<sup>32</sup> Iok non neu i teu ke langa pele pe Lapan nena hana mur te unhote ure mur nge kamel mur patangaria pe te tunge aria ngaunga pe te talue iri nga muria nenge lape ta maia. Pe te mene ech ke non neu pe nena hana mur te lome aperia. <sup>33</sup> Ke het pe Lapan loloch ngaunga ke talsue nga non neu pe nena hana mur mataria. Pe non neu hele ke teke, “Lape e hele tele ure nenge e teke e heleia lange iong mukam, ke het pe mo ngau ol.”

Pe Lapan hele, “Iok o heleia at nge imem ol.”

<sup>34</sup> Iok la ol, ana non hele sapele ke teke, “Iau Apraham nena hekuleileinga ana non koi iau. <sup>35</sup> Pe Non Soke pete tote ak soke ke nena urelu halang toto. Ke tunge nena sipsip mur pe nena pulumakau mur pe nena um chalemlem ngana mur pe nena um kokoi ngana mur pe nena hehei pe hana nenge te umume nge i pe nena kamel mur pe nena tongki mur. <sup>36</sup> Pe ak soke nehei, ene laka Sara. Pe Sara hoe tuna tamane ngana e nge ak soke nga etue nenge tuauna toto lo. Pe ak soke tunge nena urelu lochloch ngana lange tuna neu ke nena ia. <sup>37</sup> Pe ak soke poia iau ke e poia helenga kerkereng ngana e ke

mai koi, ‘O helei ia tuk nge hei e nge Kenan ero, nga kilenge nenge e tutuia nei. <sup>38</sup> O la mule nga tuele tana nenge e atia nge temek alona mur, nga mata nenge iau ke o mene tuk Isak nehei e nga lamau.’

<sup>39</sup> “Ol pe e onteia ak soke ke e teke, ‘Pe nenge teke hei neu lemene ero nge at luluch nge iau?’

<sup>40</sup> “Pe i hele ke teke, ‘Non Soke nenge e nanas tau tote lemene ngana nge nike ke at heueu nei, lape hekule nena angkelo ke la luluch nge iong pe poia lem inga nem nganangana ke lohohot, ke o mene tuk nehei e nge temek alona mur nga mata nenge iau. <sup>41</sup> Pe ure meena ngana e lape lohohot nge iong ero nga helenga kerkereng ngana nenge e hele lange iong ke o poia. Ke nenge teke o la nga mata nenge iau pe lemeria ero nge te tunge hei nem lange iong, nga kue nem mana lape ute pele lohohot nge iong ero.’

<sup>42</sup> “Nga etue nenge e mes nga ech matana heueu nei e hele ke e teke, ‘Ak soke Apraham ana Non Soke Nehalang, nenge teke lememe o poia lek inga nenge e atia nei nganangana ke lohohot. <sup>43</sup> O nau at, iau koi e mesmes nga ech matana nei ilina. Pe nenge teke hei malolong ngana e i hot at ke eul ech, iau lape e hele lange i ke e teke, “Kole o longele iau ke e in hot ech unne nga am ech kina.” <sup>44</sup> Pe nenge teke hele at nge iau ke teke, “Iok, o in pe e einia lem kamel mur pule.” Nem lape e eteia ke isipona laka nenge Non Soke henonou hote ke ak soke tuna nehei ia.’

<sup>45</sup> “E hetalaulau manmana nga letek kura pe Repeka ure ana ech kina pe i hot at pe sio langa ech matana ke eul ech. Pe e hele lange i ke e teke, ‘E nem, o tunge ech ke e in.’

<sup>46</sup> “Pe ueiuei mana ekena het sue ana ech kina la nga penna pe hele ke teke, ‘O in, pe e einia lem kamel mur pule.’ Ke e in pe i la ke einia lek kamel mur pule.

<sup>47</sup> “Pe e onteia i ke e teke, ‘Itei tuna iong?’

“Pe i tuacholia ke teke, ‘Iau temek laka ne Petuel pe temek tana laka he Milka pe temene laka ne Nahor.’

“Ol pe e tunge enre mur lange i ke pue nga penna hele pe hele pe puoteua uto ina. <sup>48</sup> Ke het pe e tualou sio pe e heto heke Non Soke ke e teke, ‘E heto heke ak soke Apraham ana Non Soke NeHalang, iange poia iau ke e la pengpeng nge ak soke tina ke e mene tuna nehei nge i.’

<sup>49</sup> “Iok la ol, letem ma ke merei nga ak soke nena helenga? Nenge teke letem urana pe o teke o poi ke nek lange i, o hele at nge iau. Pe nenge teke ero, o hele at nge iau ke e la nga kileng e pule.”

<sup>50</sup> Pe Lapan iri nai Petuel te tuacholia ke te teke, “Ure lochloch ngana nenge o hele ia nem at nge Non Soke pe lape mo hele ke merei? <sup>51</sup> Imem nai mo ngata ke o mene Rebeka pe imo ul ke ala, ke la lei nge am soke tuna ke pomanga Non Soke letena tuanin hot ngana ia.”

<sup>52</sup> Pe Apraham nena hekuleileinga ana non neu longe ke mau pe tualou sio langa ich pe heto heke Non Soke. <sup>53</sup> Ol pe lochloch hote ure chalemlem ngana mur pe um chalemlem ngana nenge koikoi pe hengeron mur pe tunge iri lange Rebeka. Pe pule tunge tunginga mur nenge ururia haka toto lange liuna Lapan pe nge tana. <sup>54</sup> Ke het pe i pe hana nenge te at luluch nge i te ngau pe te in pe te mamani nga miliko lamau.

Pe nga uach uruna toto te lo haka pe ana non hele, “A longele iau ke e la mule nge ak soke ol.”

<sup>55</sup> Pe Repeka liuna pe tana te hele ke te teke, “A longala ke atu pol mukam ke he nem tu luluch nge imem ke etue iri analoch ke het pe ala ol.”

<sup>56</sup> Pe ana non hele lange iri ke teke, “A poi hulul ia iau ero, Non soke poia lek inga nganangana ke lohoh lo. A longele iau ke ela mule nge ak soke ol.”

<sup>57</sup> Pe iri te hele ke te teke, “Iok ta iu hote hei malolong ngana nem pe ta onteia lemene ngana.” <sup>58</sup> Iok te iu hote Repeka pe te onteia i ke te teke, “Non nei teke i mulmule lokoi. Pomerei o teke o la lululuch nge i loma?”

Pe ana hei tuacholia ke teke, “Oe! E lala lo i.”

<sup>59</sup> Pomalam te longele liuria Repeka ke la luluch nge Apraham nena hekuleileinga ana non neu pe nena hana mur. Pe hei nenge nauuelele Repeka nga i kino ngana, la luluch nge iri pule. <sup>60</sup> Pe te pete Repeka ke te teke,

“Opoi! Liumem Repeka la tau. Non Soke pete iong ke o hoho pe tutum mur lape iri halang nge halang toto;

pe lape lem tete mur te mene tote reria ngarang mur reria tuele tatana mur.”

<sup>61</sup> Ke het pe Relpaka pe nena hekuleileinga ana hehei hel pule te lohaka nga kamel nemur pe te la mule luluch nge non neu. Ke hekuleileinga ana non neu mene i pe te la sapele.

<sup>62</sup> Te i ke te la mulmule nge Kenan pe Isak lohaka nga ech matana nenge Pia Lahai Roi ke la tu nge Nekep. <sup>63</sup> Pe nga ulei e ana non la ke i rara nge hot nga ich nenge te tua ngaunga ia. Pe teke ule matana la pe esia kemel mur nge te atat. <sup>64</sup> Pe Repeka pule teke ule matana la pe esia Isak pe sio sapele nga nena kamel patangana. <sup>65</sup> Pe onteia hekuleileinga ana non neu ke teke, “Non tei nenge i nga ich nenge te tua ngaunga ia ke atat nge ita neu mau?”

Pe hekuleileinga ana non neu hele ke teke, “Ak soke Isak laka lom.” Ol pe Repeka mene palpanna ana ruchinga hit pe askou hite palpanna.

<sup>66</sup> Ol pe hekuleileinga ana non neu hele ia ure lochloch ngana nenge poia lange Isak. <sup>67</sup> Ke het pe Isak mene teua Repeka la nga tana Sara nena pelpele pe iri nai te lei hel sapele. Ke Repeka lohoh ke Isak nehei ia pe Isak mutena taua i. Pe Isak



tana mete ngana ana lete memee sio sapele nge i.

## 25

### *Apraham Mete Ngana*

<sup>1</sup> Sara mete ke het pe Apraham lei haka mule heie nge ene Ketura.

<sup>2</sup> Pe Ketura hoe Simran pe Ioksan pe Metan pe Mitian pe Ispak pe Sua nge Apraham. <sup>3</sup> Pe Ioksan tuna laka Sepa iri nai Tetan. Pe Tetan nena tete mur laka Ashur mur pe Letus mur pe Leum mur. <sup>4</sup> Pe Mitian tutuna mur laka Epa pe Eper pe Hanok pe Apita pe Elta. Iri nemur Ketura na tete mur ia iri.

<sup>5</sup> Nga hoena Apraham lape mete pe Isak lape mene nena urelu mur lochloch. <sup>6</sup> Pe nga etue nenge Apraham tu ke maulul kura, tunge tutuna nemur nenge nehei neingana neu reria tunginga mur, pe kulosia iri ke tetu kangkanga nge Isak nga ich nenga chaia haka ngana.

<sup>7</sup> Pe Apraham tu nga ich ke ana hesinga iri ana non kina iri rahtelee mol pe analoch pe lime (175). <sup>8</sup> Pe tuauna toto ol iange tu nga ich ke hesinginga halang toto pe tah heule eingana pe mete sapele. Mete pe te alohite i luluch nge alona mur nenge te mete tala nge i. <sup>9</sup> Pe tuna Isak pe Ismael te alohite i nga polo e nge Makpela. Ana kileng tu rochroi nge Mamre nga ich nenge Epron. Epron i ne Soha tuna pe reette ne Hitae. <sup>10</sup> Ich neu Apraham olia lange Hitae mur. Pe te alohite Arapraham luluch nge nehei Sara nga ich nem. <sup>11</sup> Apraham mete ke la pe Isak la mule ke la tu rochroi nga ech matana nenge Pia Lahai Roi pe NeHalang poi ke urana toto lange i.

### *Ismael Tutuna Mur*

<sup>12</sup> Ismael tutuna mur pe na tete mur te hot lohote ke mai koi. Ismael temene laka Apraham pe tana laka Heka nenge nena nge Ekipto. Heka i Sara nena hekuleileinga ana hei ia.

<sup>13</sup> Ismael tutuna mur eria koi nemur pe ma ke nanasia teha ngaria:

Nepaiot i Ismael tuna tengene ana ke het pe Ketar ke het pe Atpil ke het pe Mipsam ke het pe <sup>14</sup> Misma ke het pe Tuma ke het pe Massa ke het pe <sup>15</sup> Hatat ke het pe Tema ke het pe Ietur ke het pe Napis ke het pe Ketema. <sup>16</sup> Ke Ismael tutuna mur nenge eria nei, iri mukmuka nga reria kaleu ramana mur nenge iri analoch pe nai (12). Pe te tunge eria mur ke nanasia reria kileng mur pe te kila ngaria mur. <sup>17</sup> Ismael tu nga ich ke ana hesinga iri ana non kina iri rahtelee elle pe analoch pe rahtelee nai (137) pe eingana tah heulo pe mete sapele. Mete pe te alohite i la luluch nge alona mur nenge te mete tala nge lo. <sup>18</sup> Pe nena tete mur te kila nga kileng ana manga ala nenge song nge Hauila ke lange Sur. Ana kileng tu rochroi lange Ekipto nga kue nenge song ke lange Asiria. Pe te kila ke nek ero iange te palhel ke kokoes mana.

### *Iakop Pe Esau*

<sup>19</sup> Isak nenge Apraham tuna, na tete mur te lohote ke mai koi.

Isak temene laka Apraham, <sup>20</sup> pe Isak ana hesinga iri ana non kina nai lo (40) pe leia Rebeka nenge tina Lapan pe temeria ne Petuel. Pe iri reria nge Aram nge Patan Aram. Ana kileng tu nga hele nga lut nge Mesopotamia.

<sup>21</sup> Isak nehei hoho ero pomalam Isak hetalaulau lange Non Soke ke halaua i. Pe Non Soke longe Isak nena hetalaulaunga pe nehei sana sapele. <sup>22</sup> Pe mamau nai te sechsech rara nga taria letena. Pe taria hele, "Pomerei nenge ure nei lohote nge iau ke pomai mai?" Pomalam ana hei la ke hetalaulau lange Non Soke.

<sup>23</sup> Pe Non Soke hele lange hei neu ke teke,

"Hehei pe hana nga tuele tana nai, reria tete mur laka tetu nga letem.

Tutum mur nai nenga letem nem, lape te chach hel nga etue nenge iri papalaungana; Elle lape kerkereng toto nge e,

pe nenge soke lape ume mule nge nenge kino.”

<sup>24</sup> Iok, nga etue nenge Repeka hoho, manmanna ke hoe mamau tatamanna nge iri nai. <sup>25</sup> Nenge lohot tala singina remenmen pe pulpunna ronge singina lochloch. Ke pomalam te hetue i ke ene Esau. <sup>26</sup> Pe nenge lohot nanas rahite tina Esau apena ke pomalam te hetue i ke ene Iakop. Isak ana hesinga iri ana non kina mol lo (60) nga etue nenge Repeka hoe tuturia nemur.

<sup>27</sup> Iok aina nai neu iri papalauna lo pe Esau lohot ke i non nenge rururum pe hunun huros. Pe Iakop i non nenge reng manmana pe tu manmana nga pele. <sup>28</sup> Pe Isak mutena taua Esau iange ngaungau huros nge i pe Repeka mutena taua Iakop.

<sup>29</sup> Nga eteue e Iakop tuntun ngaunga luluch nga eina. Pe Esau rurum ke lohot pe makuk leilei iange mete ana toto. <sup>30</sup> Pe hele lange Iakop ke teke, “Ueiuei, o tunge ngaunga remenmen ngana unne at ke e ngaua! E makuk toto lo i.” Ke ngana laka nenge te hetue i ke ene Etom.

<sup>31</sup> Pe Iakop tuacholia ke teke, “Iong teepe iange te are heke iong nga palngen. Pe e teke e mene mulim ke iau teepe, laka e tung am ngaunga ol.”

<sup>32</sup> Pe Esau hele, “Hei! O nau at e metmete loi. Teepe nem mam lape tunge utar nge urana at nge iau?”

<sup>33</sup> Pe Iakop hele, “O hele ke manmanna at nge iau mukam.” Pomalam Esau heleia helenga kerkereng ngana e, ke poia Iakop ke lohot ke i teepe.

<sup>34</sup> Ol pe Iakop tunge beret pe ngaunga eina lange Esau ke ngau pe in ke het pe lohaka ke la sapele.

Teepe nenge Esau ure nem i ure palaungana ia pe Esau naue ke pomanga ute e nge kino mana.

## 26

### *Isak Pe Apimelek*

<sup>1</sup> Iok, uringa lohot nga ich nenge Kenan. Pe uringa nem lohot ke pomanga nenge lohot nge Apraham nge nike. Pe Isak lake esia Apimelek. Apimelek i naunga-ala ana non nga kileng nenge Pilistia nge Kerar. <sup>2</sup> Pe Non Soke lohot nge Isak pe hele lange i ke teke, “O sio lange Ekipto ero. O tu mana nga ich nenge E heleia lange iong ke o tuia. <sup>3</sup> O tu nga ich nei mukam pe Iau lape etu luluch nge iong pe lape e pete iong. Iange lape e tunge ich lochloch ngana nei lange iong pe lem tete mur. Ke nem pete tote lek tomunga hel ana helenga nenge e poia lange temem Apraham. <sup>4</sup> Pe lape e poia lem tete mur ke iri hulua toto ke pomanga itoch mur nga tapa sana. Pe lape e tunge ich lochloch ngana nei lange iri. Pe lape e pete hulua lochloch ngana nga ich iange nge lem tete mur mana. <sup>5</sup> Iange Apraham longo tau tote Iau pe poia ure lochloch ngana nenge e heleia lange i ke e teke poia. Pe poia utar nenge e hele urume pe nanasia utar nenge e hetoro i ia.” <sup>6</sup> Ke Isak tunge Kerar.

<sup>7</sup> Pe Isak nehei nakuna urana toto. Pe hana nga lamau te onteia ana hei lange Isak. Pe Isak hele ke teke, “Iau liuk iam.” Ana non matau nge hele lange iri ke teke nehei. Iange teke lape te hune i pe te leia nehei.

<sup>8</sup> Isak tuke mala nga lamau lo pe Apimelek non nenge nauele kileng Pilistia. Ana non nau sio la pe esia Isak nge ala kukukumia nehei Repeka. <sup>9</sup> Ol pe Apimelek iua Isak pe hele lange i ke teke, “Iong lem hei koi hei nei. Pe pomerei nenge o hele le o teke lium ia?” Pe Isak tuacholia ke teke, “E matau iange nenge teke e hele ke e teke lek hei ia, lape a hune iau pe a leia i.”

<sup>10</sup> Pe Apimelek hele, “O poia poinga utar nemam? Nenge teke non e nge imem ma luluch nge lem hei, lape imem mo amneia ke poreke iange mo poia poinga poreke ngana.”

<sup>11</sup> Iok, Apimelek hele ke kerkereng lange hulua lochloch ke teke, “Amo e

nenge poi poreke lange Isak ma nge nehei, lek hana mur lape te hune i ke mete.”

### *Isak Nena Urelu Halang*

<sup>12</sup> Nga hesinga neu Isak poia ume pe tue ngaunga tutuna halang nga ich neu. Pe Non Soke pete tote i ke lule ngaunga nge halang toto nga nenge tue. <sup>13</sup> Isak lolochia urelu halang pe nena ure nemur te puo keke. Pomalam lohote ke i non nenge nena ure halang toto. <sup>14</sup> Pe nena hekuleileinga ana hana mur pe nena sipsip mur pe nena pulumakau iri halang toto pule. Pe iri nenge Pilistia saria keke i <sup>15</sup> pe te halohite ech matana mur nga ich. Ech matana nemur Isak temene Apraham nena hana mur te selia iri nga ana non maulul ngana nika. <sup>16</sup> Pe Apimelek hele lange Isak ke teke, “O lohaka nga lememe kileng pe ola ol iange o kerkereng toto nge imem.”

<sup>17</sup> Pomalam Isak lohaka nga kileng neu pe hemes heke reria pelpele mur nga mos nge ene Kerar ke tetu lamau. <sup>18</sup> Nge nika nga Apraham tu ngana, selia ech matana mur halang nga kileng neu. Pe nga etue nenge Apraham mete, Pilistaen mur te alohit mule nga ich. Pe Isak selhot mule ech matana nemur pe heto mule eria mur ke pomanga temene heto nganaia iri nge nika. <sup>19</sup> Iok, Isak nena hekuleileinga ana hana mur te sel sio nga mos neu pe te sel hote ech matana e nge lelele. <sup>20</sup> Pe hana nenge te nau elele sipsip mur nge Kerar, te at pe te hele inin taua hana nenge te nau elele Isak nena sipsip mur ke te teke, “Imem laka emem ech matana nem.” Ol pe Isak hetue ech neu ke ene Esek (iange te echachala hel ia). <sup>21</sup> Iok, Isak nena hana mur te sel hote ech matana e mule pe te echachala helia pule. Ol pe Isak hetue ech matana neu ene Sitna (iange te ngata helia ero). <sup>22</sup> Iok, Isak loloun nga lamau pe la ke sel hote ech matana e mule. Neu ol, mele hele i ia ero ol. Pomalam hetue ke ene Rehopot iange hele ke teke, “Heueu nei ol Non Soke

tunge murra nge halang pe poia ita ke ta are ke nek nga ich nei ol.”

<sup>23</sup> Pe nga hoena Isak hile kileng neu pe loloun ke la tu nge Persepa. <sup>24</sup> Pe nga miliko Non Soke lohote nge i pe hele ke teke, “O matau ero, temem Apraham ana Soke Iau. Pe lape E tu luluch nge iong pe E pete iong. Pe lape E poia lem tete mur ke iri halang toto iange mutek tau tote lek non Apraham.” <sup>25</sup> Ol pe Isak lung heke hatanga e nga lamau ke heto heke Non Soke. Pe hemes heke nena pelpele nga kileng neu pe nena hana mur te sel hote ech matana pule.

### *Isak Iri Nai Apimelek Te Poia Tomunga Hel Ana Helenga*

<sup>26</sup> Ol pe Apimelek lohaka nge Kerar kela esia Isak. Pe koke non e nge ene ne Ahusat pe e ene ne Pikol. Ne Ahusat i non nenge tutunge letematana urana ngana lala nge Apimelek. Pe ne Pikol i non nenge i mukmuka ia Apimelek nena palinga hel ana hana mur. <sup>27</sup> Pe Isak onteia iri ke teke, “Nga tele ngana lememe ero ia iau pe a lope hote iau nga lemo ich. Pe pomerei nenge a iat mule nge iau?”

<sup>28</sup> Pe iri te tuacholia ke te teke, “Mo nau mellehe mene ke Non Soke tu luluch nge iong. Pe mo teke ita ul ke ta talue helenga kerkereng ngana e. Pe ta poia tomunga hel ana helenga e nenge hele ke teke, <sup>29</sup> lape o poia ure meena ngana ke lohote nge imem ero. Pe imem pule lape mo poia ure meena ngana ke lohote nge iong ero. Mo poi ke urana lange iong pe mo kulos hote iong pe oi hot ke nek mana. Pe heueu nei Non Soke pete tote iong.”

<sup>30</sup> Ol pe Isak poia aria ngaunga matana e ke te ngau pe tein. <sup>31</sup> Iok, nga uach urana toto te lohaka pe te poia helenga kerkereng ngana nga reria kilanga nge urana. Ke het pe Isak kulosia iri ke tela mule pe te lohaka luluch nga leteria urana ngana ke te la.

<sup>32</sup> Nga etue neu pule Isak nena hana mur te lange i pe te heleia ech



matana e nge te selia ke te teke, “Mo sel hote ech matana e lo!” <sup>33</sup> Ol pe Isak hetue ech matana neu ke ene Sipa. Pe tuele tana neu te hetue ke ene Per-sipa. Ke heueu nei te hetetue tuele tana neu nga ene nei kura.

### *Esau Nehei Mur Eria Koi*

<sup>34</sup> Esau ana hesinga iri ana non kina nai (40) pe leia hehei nai nga mata nenge Hitae mur. Elle ene Iutit nenge temene Peri pe e ene Pasmata nenge temene Elon. <sup>35</sup> Pe hehei nai nem te poia Isak iri nai Repeka ke leteria inin toto.

## 27

### *Iakop Mene Esau Nena Petanga*

<sup>1</sup> Iok, Isak matana hit pe naue ute e ero ol iange tuauna toto lo. Pe nga etue ene hekulo tuna Esau ana. Esau i tuna nenge tengene ana. Pe hele lange i ke teke, “Tuk.” Pe Esau tuacholia ke teke, “Ou! Iau koi.” <sup>2</sup> Pe Isak hele, “Iau e tuauna lo pe e eteia etue nenge e mete ia ero. <sup>3</sup> Ke o mene lem io pe rorumunga ana mur pe o la ke o rorum pe o hune ak huros inolo ngana e at. <sup>4</sup> Pe o tune ak ngaunga nenge inangana heech nenge mutek tau totote pe o mene at nge iau ke e ngaua. Ke het pe e pete iong pe e hele urume ure lochloch ngana lange iong - ke het pe e kulala mana ak metenga ol.”

<sup>5</sup> Pe Repeka longo tote Isak nge hele lala nge tuna Esau. Pe nga etue nenge Esau la ke rorum, <sup>6</sup> ana hei hele lange tuna Iakop ke teke, “E longe temem nge hele lange tim Esau ke teke, <sup>7</sup> ‘O hune huros e pe o tune ak ngaunga nenge inangana heech nenge mutek tau totote ke e ngaua, pe e pete iong nga petanga nenge Non Soke teke tunge lange iong. Ke het pe kulala mana ak metenga ol.’ <sup>8</sup> Ke tuk, o longo at nge iau ke nek toto pe o poia utar nenge e heleia lange iong. <sup>9</sup> O la nga rera meme mur te tu ngaria pe o mene ais ngana nai nge te lum toto at nge iau. Pe iau sipok e tune ngaunga inangana heech ngana nenge temem mutena tau totote. <sup>10</sup> Ke het pe o

mene lange i ke ngaua pe pete iong. Pete iong ke het pe kulala mana ana metenga ol.”

<sup>11</sup> Pe Iakop hele lange tana Rebeka ke teke, “Ero iam! Iange tik Esau singina pulpulna halang pe iau ero. <sup>12</sup> Ke nenge teke temek rah nga singik, etei mellehe mene ke iau pe pete iau ero. I lape teke e hesalanglang ia i pe lape poia ure meena ngana e ke lohot nge iau.”

<sup>13</sup> Pe tana hele lange i ke teke, “O nanas mene utar nenge e heleia lange iong ke ulolo. O la ke o mene meme nemur at nge iau. Iau lape e mes hele ure meena ngana nem.”

<sup>14</sup> Iok la ol, Iakop lake mene meme nemur pe laia nge tana ke tune ngaunga inangana heech ngana nenge temene mutena tau totote. <sup>15</sup> Pe Repeka mene hote tuna nenge soke Esau, nena hengeron urana ngana mur nenge tattalue nga pele pe heron heke nge tuna nenge kino nenge ene Iakop. <sup>16</sup> Pe mene meme pulpulna pe kale heke nga Iakop penna pe nga kanna nenge pulpulna ero. <sup>17</sup> Ke het pe tunge ngaunga inangana heech ngana neu pe beret nenge makia lange tuna Iakop.

<sup>18</sup> Pe Iakop laia nge temene pe hele, “Temek.”

Pe temene hele, “Kolek, Utar. Iong itei malam?”

<sup>19</sup> Pe Iakop hele lange temene ke teke, “Iau Esau i, tum nenge tengene ana. E poia ure nenge o heleia at nge iau ke het lo. O kila haka ke o ngaua huros nenge e rorumia, ke het pe o pete Iau.”

<sup>20</sup> Pe Isak onteia tuna ke teke, “Kolek, pomerei nenge o hune huros nem ke ueiuei mana mam?” Pe Iakop tuacholia ke teke, “Am Soke NeHalang laka halaua iau ke e hune.”

<sup>21</sup> Ol pe Isak hele lange Iakop ke teke, “Kolek, o hele teu at ke e ra nga singim. Lape iong Esau ke manmanna lo ma?”

<sup>22</sup> Iok, Iakop hele teu la rochroi nge temene Isak. Pe temene rahaka nga singina pe hele ke teke, “O hele ngam

pomange Iakop pe perim pomange Esau.”<sup>23</sup> Pe i manmanna ke i Iakop pe Isak eteia ero iange penna pulpulna halang ke pomange Esau. Ke pomalam Isak pete sapele i.<sup>24</sup> Pe Isak ontei mule ke teke, “Kolek, Iong Esau ke manmanna lokai?”

Pe Iakop tuacholia ke teke, “Oe, iau iloi.”

<sup>25</sup> Ke het pe Isak hele, “Kolek, o mene huros nenge o hune at ke e ngaua pe e pete iong.”

Iok, Iakop mene la i ngaua pe mene uaen hel lange i ke inia.<sup>26</sup> Ke het pe temene Isak hele lange i ke teke, “Kolek, o iat ke o lau hite iau.”

<sup>27</sup> pomalam Iakop la ke lauhite i. Pe Isak seke hengeron nenge Iakop heronia inangana pe pete i pe hele ke teke,

“Aiom! Kolek inangana pomanga ume nenge Non Soke pete pe poia ke urana toto.

<sup>28</sup> E hetalaulau ke NeHalang poia mo nga tapa sana ke lome am ume mur nga ich pe poia am uit pe uain mur ke halang toto.

<sup>29</sup> Pe poia hehei pe hana nga kileng hel ke te ume nge iong pe te tualou sio lange iong.

Pe poia iong ke iong soke nge titim mur pe titim mur te tualou sio lange iong.

Pe poia ure poreke ngana ke lohot nge iri nenge te poia ure poreke ngana lange iong.

Pe poi ke urana lange iri nenge te poi ke urana lange iong.”

### *Esau Ontei Heke Nena Petanga Nge Isak*

<sup>30</sup> Isak pete Iakop pe hele urume ure lochloch ngana lange i ke het pe hile temene pe lohaka ke la. Lohaka ke lala pe Esau mule rurumunga ana ke at puris.<sup>31</sup> I pule tune ngaunga hel nge poia ke inangana heech pe mene at nge temene. Pe hele lange temene ke teke, “Temek o are haka ke o ngaua am huros nenge e hune, ke het pe o pete iau ol.”

<sup>32</sup> Pe temene onteia i ke teke, “Ia iong itei nemam?”

Pe i tuacholia ke teke, “Iau Esau, tum nenge tengene ana.”<sup>33</sup> Ol pe Isak ngana lohot pe loiloi pe hele ke teke, “Pe itei nenge rurumia huros pe mene at nge iau ke e ngaua mai? E ngaua ke het pe e pete i pe iong o at ke o puris. Pe petanga nenge e tunge lange i nem lape tu luluch nge i ke koko!”

<sup>34</sup> Nga etue nenge Esau longe temene nge hele ke mau, tul heke tanginga pe tang ke soke toto. Pe hele lange temene ke teke, “Temek o pete iau pe o hele ia lem petanga ana helenga mur at nge iau pule!”

<sup>35</sup> Pe temene hele ke teke, “Tim at pe channanga ia iau ke lem petanga pau kou e tunge lange i pam lo.”

<sup>36</sup> Ol pe Esau hele lange temene ke teke, “Kol nem ene nenge Iakop nem pete tote i iange pallaka hali. I pallaka ia iau ke henai ngana koi. Nga tele ngnana mene mullik ke teke i palaungana pe heueu nei mene tote lek petanga!” Pe Esau onteia temene ke teke, “Temek pomere? Lek petanga e kau kura nge lape o tunge at nge iau?”

<sup>37</sup> Pe Isak tuacholia ke teke, “Ero ol iange e poia i ke i soke nge iong lo. Pe e poia alona mur lochloch ke te ume mule nge i. Pe e hele ke e teke i lape ana uit pe uaen halang toto. Ke kolek, lape e poia iong ke mere mam ol? Ute e nge lape e tung lange iong ero ol i.”

<sup>38</sup> Pe Esau hele lange temene ke teke, “Temek, nenge teke lem petanga elle tu kura o pete iau pule!” Pe Esau tang ke soke toto mule.

<sup>39</sup> Ol pe temene hele lange i ke teke, “Iong lape o tu teu

la nga ich urana ngana ero pe mo nenge sio at nga tapa nga miliko sio nge iong ero pule. Lape otu ke kangkanga toto nga ure nemur.

<sup>40</sup> Pe lape o kila ke nek ero. O kila ne ke nek pe o ngau mana nga ure nemur nenge a hunel pe o lolochia iri.

Pe lape o ume manmana nge tim. Pe nenge teke o amnea ke o teke oua, lape o sau sue ure meena ngana nem pe i lape nauele mule iong ero ol.”

<sup>41</sup> Iok la ol, Esau letena inin tau tote Iakop iange mene tote nena petanga nge temeria Isak. Pe helele nge isipona ke teke, “Musuna pol mana pe lape temek mete pe lape mo are ia ana lete. Pe nga hoena lape e hune Iakop ke mete.”

<sup>42</sup> Iok la ol, nga etue nenge helenga neu sasa ke la lohote nge Repeka, ana hei hekulo tuna Iakop ana pe hele lange i ke teke, “O longo at, tim Esau letena inin taua iong ke teke hune iong nga poinga nenge o poia nem.

<sup>43</sup> Ke pomlam e hele pe o nanas mene lek helenga. Heueu mana nei o ua ke la otu luluch nge tik ne Lapan. I kou tu nga kileng nenge Haran. <sup>44</sup> O la pe o tu luluch nge i ke mala pol ke tim Esau letena maluch sio mukam. <sup>45</sup> Pe nga etue nenge letena maluch sio pe letena heke mule poinga nenge o poia lange i nem ero ol, lape e hekulo am ke o at mule nga lamai. Iange lemek ero nge a hunel imo nai ape ke a mete nga etue elle.”

### *Iakop Ua Ke La Nga Kileng Nenge Haran*

<sup>46</sup> Ol pe Repeka hele lange Isak ke teke, “Lemek ero toto hehei Hitae mur. Nenge teke Iakop leia hei Hitae e nge mange hehei nai nei nga ich nei, iau e teke e mete mana ol, iange lemek ero toto hehei Hitae mur.”

## 28

<sup>1</sup> Iok Isak iua Iakop ke pete i pe hele lange i ke teke, “O leia heie nga kileng nenge Kenan ero toto. <sup>2</sup> Heueu mana nei o lohaka pe o lange lem te ne Petuel. Tam temene la ka ne Petuel pe i kou tu nga kileng nenge Patan-Aram nga ich nenge Mesopotamia nga kileng ilinha hele nenga lut. Pe lem achung Lapan tutuna heheina mur halang. O naue e pe o mene i ke lem hei ia. <sup>3</sup> Pe e hetalaulau ke NeHalang Nenge Na Kerkerenga Palaungana Toto poi ke urana lange

iong pe poia tutum mur ke iri hulua toto. Pe lape o lohote ke hulua nga ich temeria iong. <sup>4</sup> Pe I lape pete iong pe lem tete mur nga petanga nenge tunge lange Apraham. Pomalam lape o mene ich nenge o tutu ia heueu nem ke pomanga iong non lomona ngana e. Pe ich nem NeHalang tunge lange Apraham nge nike lo.” <sup>5</sup> Iok la ol, Isak kulosia Iakop ke la tu luluch nge Lapan nga kilenge nenge Patan-Aram. Lapan liuna laka Repeka pe temeria laka ne Petuel nena nge Aram. Pe Repeka tutuna mur laka Iakop iri nai Esau.

<sup>6</sup> Esau eteia ke temene Isak pete Iakop pe hele lange i ke leia heie nge Kenan ero. Pe pule eteia ke temene kulosia Iakop la ke tangue ne hei e nge Patan Aram. <sup>7</sup> Pomalam Iakop longo taua temene pe tana ke lange Patan Aram. <sup>8</sup> Pe Esau etei tote ol ke temene lemene ero toto ia hehei mur nenge Kenan. <sup>9</sup> Pomalam Esau lohaka ke lange iri mata nenge Ismael pe leia Ismael tuna heingana e nge ene Mahalat pe Mahalat tina laka Nepaiot. Pe Ismael i Apraham tuna ia.

### *Iakop Maopene Nge Petel*

<sup>10</sup> Nga etue nenge Iakop lohaka nga kileng nenge Persepa i ke la sapele nga kileng nenge Haran. <sup>11</sup> Ana non ii ke la lohote nga kileng urana ngana e nenge lape maia nga miliko iange chaia matana sio lo. Ol pe mene ume e ke poi ana ulunga ia pe masio ke mamani. <sup>12</sup> Ol pe ma opene ia hakanga e nge mes nga ich pe mokona tua teu nga tapa. Pe hekulkulonga mur te i hakaka pe tei sisio ia. <sup>13</sup> Pe Non Soke mes nga Iakop ilina pe hele ke teke, “Iau Non Soke pe Iau NeHalang nenge Apraham pe Isak te heto hekeke. Ich nenge o maia nem lape e tunge lange iong pe lem tete mur ke lemo ia ol. <sup>14</sup> Pe lem tete mur lape te lohote ke pomanga maruchrue pe te kila ole nga kileng ilina hele nenga lut pe nenge sio pe nenga chaia haka ngana pe nga chaia sio ngana. Ke nge iong pe lem tete mur mana lape e pete hulua lochloch

ngana nga ich. <sup>15</sup> Nga kileng lochloch ngana nenge o laia Iau lape E tu luluch nge iong pe E nau ele iong. Pe lape e mene mule iong at nge ich nei. Pe lape e hile iong ero toto iange e teke E poi hote ure lochloch ngana nenge e heleia lange iong.”

<sup>16</sup> Ol pe Iakop rura haka pe hele, “Iau nge e teke Non Soke tu lamai ero i, pe I kai tu mai.” <sup>17</sup> Ol pe Iakop matau toto pe hele, “Kileng nei poia iau ke e loiloi i. NeHalang nena pele pe kue matana nenge la nga tapa, ngana koi te tu nei.”

<sup>18</sup> Iok nga uach uruna toto Iakop memete pe mene um tana nenge poi ulunga ia pe hemes heke ke heilang ia ure nenge lohoh nge i. Pe eusiling heke ae oliua eina nga um neu ona iange um neu NeHalang nena um ia. <sup>19</sup> Pe hetue kileng neu ke ene kileng nenge Petel. Pe tuele tana nenge tu nge nike nga lamau, te hetue ke ene tuele tana nenge Lus.

<sup>20</sup> Ol pe Iakop poia helenga kerkere ngana e ke teke, “Nenge teke NeHalang tu luluch nge iau, lape nauele iau nga lek inga nei pe tunge ak ngaunga ke e ngaua pe lek hengeron ke e heronia. <sup>21</sup> Pe nenge teke o mene mule iau lange temek pe nena hana mur, iong lape ak Soke Iong. <sup>22</sup> Um nenge e hemesia nei heilangia ke lem pele koi tu lamai. Pe ure lochloch ngana nenge o tunge nge iau lape e takiraua ke huna iri analoch. Pe huna elle lape e tung mule lange Iong.”

## 29

### *Iakop La Ke Lohoh Nge Patan Aram*

<sup>1</sup> Iok Iakop i kela lohoh nga hehei pe hana nenge te tu nge chaia haka ngana reria kileng. <sup>2</sup> Pe teke naula pe esia ech matana e pe sipsip mur aria tuluk iri mol nge tema ke te eliliu hite ech matana neu. Iange sipsip nemur nga lamau te inin ech nga ech matana neu pule. Pe te piu ele ech matana neu nga um palaungana e. <sup>3</sup> Nga etue nenge sipsip mur tela ke

te heukirau nga lamau, sipsip aria naunga ala mur te hesere kelia um nenge ma hele ech matana neu pe te einia sipsip mur. Ke het pe te tal hele mule ech matana anna um neu.

<sup>4</sup> Ol pe Iakop onteia sipsip ana naunga ala nemur ke teke, “Sinanga hana! Lemo nge ngai malam?”

Pe iri te tuacholia ke te teke, “Lemem nge Haran.”

<sup>5</sup> Pe Iakop onteia iri ke teke, “Iok, a eteia none nge ene Lapan pule? Lapan nenge Nahor.”

Pe iri te tuacholia ke te teke, “Oe, mo eteia i la.”

<sup>6</sup> Pe Iakop ontei mule ke teke, “A nau lange i, tu ke urana kau?”

Pe iri te tuacholia, “Oe, tu ke urana mana iau. Pe o naula, tuna Retsel kou mene nena sipsip mur ke te atat neu.”

<sup>7</sup> Pe Iakop hele lange iri ke teke, “Chaia matana i mes nga lut kura. A heinia sipsip nemur pe a mene iri ke la te ngau mule heilil nga mukam.”

<sup>8</sup> Pe iri te tuacholia ke te teke, “Ero iam, Mo hein tangai ia sipsip mur ero. Mo kulele iri lochloch ngana ke te at ke mataria purpur mukam. Ke het pe mo hesasaul kelkelia um nga ech matana pe mo heinia iri ol.”

<sup>9</sup> Nga etue nenge Iakop hele luluch nge hana nemur, Retsel at luluch nga temene nena sipsip mur iange i nauelele iri. <sup>10</sup> Ke Iakop na achung laka Lapan pe Lanpan tuna laka Retsel. Pe nga etue nenge Iakop esia na Retsel nge mene temene nena sipsip mur at, la ke hesere kelia um nenge ma hele ech matana pe hein sapele na achung nena sipsip mur. <sup>11</sup> Ke het pe lau hite Retsel pe tang ke soke toto. <sup>12</sup> Pe Iakop hele lange Retsel ke teke, “Iau alok laka temem pe e tak laka e Repeka.” Ol pe Retsel song sapele ke heleia lange temene.

<sup>13</sup> Iok, nga etue nenge Lapan longe na achung Iakop pingana, song hot lange i pe lau haka nge i pe mene teua i la nga nena pele. Pe Iakop nene ure lochloch ngana nenge lohoh nge i lange Lapan. <sup>14</sup> Ol pe Lapan hele lange Iakop ke teke, “Lek achung toto



laka iong. Ita nai rette elle.” Pe Iakop tu luluch nge Lapan ke teio elle.

### *Iakop Ume Nge Lapan*

<sup>15</sup> Iok, Lapan hele lange Iakop ke teke, “Iau alok toto laka iong. O ume nge iau pe o ume sio mana ero. O teke e olia iong ke pomere?”

<sup>16</sup> Nga etue neu Lapan tutuna mur heheina iri nai. Nenge soke ene Lia pe nenge kino ene Retsel. <sup>17</sup> Lia nakuna urana pe nakuna unun manmana pe Retsel nakuna urana toto nge Lia pe singinga urana toto pule. <sup>18</sup> Pe Iakop mutena tau tote Retsel, pomalam hele ke teke, “Iau lape e ume nge iong ke hesinga iri ratele nai (7) ke het pe o tunge Retsel at nge iau ke e leia.”

<sup>19</sup> Pe Lapan tuacholia ke teke, “O tu la koloi. Hei nei e tunge lange none ero pe urana nge e tunge I lange iong ke pomalam o tu luluch nge iau.” <sup>20</sup> Iok la ol Iakop ume ke ana hesinga iri ratele nai iange teke leia Retsel. Pe hesinga nemur, Iakop amneia ke choro mana ke pomanga etue hel mana iange i mutena tau tote Retsel.

<sup>21</sup> Ol pe Iakop hele lange Lapan ke teke, “E heulo hot hesinga rahteale nai nem ke het lo. O tunge lek hei at ke e leia i ol.”

<sup>22</sup> Ol pe Lapan poia ngaunga matana palaungana e pe hepalam nge heihei pe hana mur ke at te ngau. <sup>23</sup> Pe nga miliko Lapan mene tuna Lia la nga Iakop na pele ke ma luluch nge i. <sup>24</sup> Pe pule Lapan tunge Lia nena hekuleileinga ana heie nge ene Silpa ke la luluch. <sup>25</sup> Pe nga uach Iakop eteia ke ma luluch nge Lia. Ol pe hele lange Lapan ke teke, “Pomerei nenge o poia poinga nei at nge iau? Iau e ume nge iong iange e teke e leia Retsel. Pomerei nenge o channanga ia iau ke pomai mai?”

<sup>26</sup> Pe Lapan tuacholia ke teke, “Nga kileng nei mo nanasia poinga nenge tutumem heheina tengene ana mur te lei tatala. Pe nenge kinkino te lei nga hoena ol. <sup>27</sup> Iok o kulala ke wik elle het mukam pe ngaunga nenga

leinga nei ana etue het mukam. Ke het pe mo tunge Retsel lange iong ol. Pe lape o ume ke hesinge iri rahteale nai mule.”

<sup>28</sup> Iok la ol Iakop nanas mene te hele ngaria ke tu luluch nge Lia. Pe nga etue nenge ngaunga neu ana etue het Lapan tunge tuna Retsel lange i ke nehei ia. <sup>29</sup> Pe pule Lapan tunge hekuleileinga ana hei e nge ene Pila lange Retsel ke halaulaua i. <sup>30</sup> Ke Iakop ma luluch nge Retsel pe mutena taua tote i nge Liah. Pe ume mule nge Lapan ke hesinga iri ratele nai.

### *Iakop Pe Tutuna Mur*

<sup>31</sup> Non Soke eteia ke Iakop mutena tau tote Retsel nge Liah. Pomalam poia Liah ke ho-o pe Retsel ho-o ero.

<sup>32</sup> Iok, Liah sana pe hoe tuna tamane ngana e pe hetue ke ene Rupen. Pe hele ke teke, “Non Soke esia letek meena ngana ke pomalam poinga iau ke iau e hoho ke ek mutena taua iau pule Retsel.”

<sup>33</sup> Iok Liah sana pe ho-o mule tuna tamane ngana e pe hetue ke ene Simion. Pe hele ke teke, “Non Soke longe nge ek mutena taua iau ero pomalam tung mule tuk nei.”

<sup>34</sup> Iok Liah sana pe ho-o mule tuna tamane ngana e pe hetue ke ene Liuai. Pe hele ke teke, “Nei ol ek lape at ke tu hite iau ol iange e ho-o ke tutuna mur mol lo.”

<sup>35</sup> Iok, Liah sana mule pe hele ke teke, “Nei ol e heto heke Non Soke.” Pomalam hoe tuna tamane ngana neu pe hetue ke ene Iuta pe ho-o ero sapele.

## 30

### *Retsel Letena Inin Taua Liah*

<sup>1</sup> Retsel hoe tuna e nge Iakop ero, pomalam letena inin taua Liah. Pe hele lange Iakop ke teke, “O poia iau ke sak ke e hoe tutuk mur hel nge iong. Nenge teke ero lape e mete!”

<sup>2</sup> Pe Iakop letena inin taua Retsel pe hele lange ke teke, “O heleia iau



ke mam ia, iau NeHalang kai? NeHalang laka poi hele iong ke o ho-o ero nem.”

<sup>3</sup> Ol pe Retsel hele lange Iakop ke teke, “Lape e tunge lek hekuleileinga ana hei nenge ene Pila, lange iong ke o ma luluch nge i ke hoe tutuk mur hel.”

<sup>4</sup> Iok la ol Retsel tunge nena hekuleileinga ana hei neu lange Iakop ke pomanga ne hei ia. Pe Iakop ma luluch nge i <sup>5</sup> ke sana pe hoe Iakop tuna tamane ngana e. <sup>6</sup> Ol pe Retsel hele ke teke, “NeHalang milteu at nge iau nga poinga nenge e poia nei pe longala ke tunge tuk tamane ngana e.” Pomalam Retsel hetue tuna neu ke ene laka Tan.

<sup>7</sup> Iok e Pila sana henai ngana pe hoe Iakop tuna tamane ngana e mule.

<sup>8</sup> Ol pe Retsel hele ke teke, “E ume ke kerkereng toto luluch nge tik ke ho-o lo.” Pomalam Retsel hetue kol neu ke ene Naptali.

<sup>9</sup> Iok Lia nau pe ho-o ero ol mene nena hekuleileinga ana hei nenge ene Silpa ke tunge lange Iakop ke pomanga ne hei ia. <sup>10</sup> Ol pe Silpa hoe Iakop tuna tamane ngana e. <sup>11</sup> Pe hetue ke ene Kat. Pe Lia hele ke teke, “Iau nge lape e iech toto pai.”

<sup>12</sup> Iok Silpa hoho mule Iakop tuna nai ngana e nge i tamane pule. <sup>13</sup> Pe hetue kol neu ke ene Asa. Pe Liah hele, “Heueu nei e iech toto ol! Pe lape hehei lochloch ngana te hetue iau ke hei nenge iech manmana.”

<sup>14</sup> Iok nga etue nenge uit mera, lungana ana etue at sapele. Pe Rupen la nga ume pe hottaua ae e nge ene menrek pe mene hel lange tana Lia. Ol pe Retsel hele lange Lia ke teke, “Kole, o tunge ae menrek nem hel at nge iau, nenge tum mene iri nem.”

<sup>15</sup> Pe Liah hele lange i ke teke, “Ah! O leia ek ke ulolo pe heueu nei o teke o mene tuk nena ae menrek pullo?”

Pe Retsel tuacholia ke teke, “Nenge teke o tunge tum nena ae menrek hel at nge iau, lape o maluluch nge Iakop nga miliko.”

<sup>16</sup> Iok nga ulei Iakop hot ume ana pe Liah la ke i ele i pe hele lange i ke

teke, “Heueu nga miliko lape o ma luluch nge iau iange e olia iong nga tuk nena ae menrek lo.” Pomalam Iakop ma luluch nge ana hei nga miliko neu.

<sup>17</sup> Iok, NeHalang longe Lia nena hetalaulaunga ke Lia sana mule pe hoe Iakop tuna lime ngana e nge i tamane. <sup>18</sup> Pe Lia hele, “Iau e tunge lek hekuleileinga ana hei lange ek pe NeHalang tunge uruk nei.” Ke Liah hetue tuna ke ene laka Isaka.

<sup>19</sup> Iok Lia sana mule pe hoe Iakop tuna ratele elle ngana nge i tamane.

<sup>20</sup> Pe hele ke teke, “NeHalang tunge lek tunginga nge urana toto. Ke heueu nei ek lape tal heke tote iau iange e hoe tutuna mur tatamanna nge iri ratele elle.” Pomalam hetue tuna neu ke ene Sepulun.

<sup>21</sup> Iok nga hoena Lia hoe tuna heingana e pe hetue ke ene Taina.

<sup>22</sup> Pe NeHalang letena ia Retsel pe longe nena hetalaulaunga pe poia i ke ho-o mule. <sup>23</sup> Retsel sana pe hoe tuna tamane ngana e pe hele ke teke, “NeHalang halaua iau ke e meia iau ero ol.” <sup>24</sup> Pe hetue tuna neu ke ene Iosep. Pe hele mule ke teke, “Nga letek toto e teke Non Soke tung mule tuk tamane ngana e pule.”

### *Iakop Nena Huros Halang*

<sup>25</sup> Nga etue nenge Retsel hoe Iosep ke het, Iakop hele lange Lapan ke teke, “O kulosia iau ke e la mule nga lek kileng una ol. <sup>26</sup> Pe o tunge lek hehei mur pe tutuk mur at nge iau pe mo la ol. Iong o eteia ke e umeia lem ume mur ke nek toto iange e teke e mene laka iri.”

<sup>27</sup> Pe Lapan hele lange Iakop ke teke, “O longo at, e heteia ke Non Soke pete iau ke lek ure halang toto iange o tu luluch nge iau. Ke nenge teke e poi ke urana lange iong lo, iok o tu mukam.” <sup>28</sup> Pe Lapan hele pule ke teke, “O heleia urum ia at nge iau pe e olia lange iong.” <sup>29</sup> Pe Iakop tuacholia lange i ke teke, “Iong sipom o eteia ke iau e ume sakilil nge iong lo pe e nau ele lem sipsip mur ke iri halang toto.

<sup>30</sup> Nga tele ngana lem sipsip mur iri

unne sune mana mukam pe heueu nei iri halang toto ol. Iange Non Soke halalaulaua iau pe pete iong nga lek ume lochloch ngana nenge e popoia. Pe heueu nei e teke e ume ke e nauele lek hehei mur pe tutuk mur pe iri nenge tetu luluch nge iau.”

<sup>31</sup> Pe Lapan onteia i ke teke, “Ke lape e tunge lem utar?”

Pe Iakop tuacholia ke teke, “Lemek ero nge o tunge ute at nge iau. E teke o longele iau ke e nauele mule lem sipsip mur mukam: <sup>32</sup> Ke heueu lape e la ke e nau ke nek toto nga lem sipsip mur pe meme mur. Pe lape e hesilei hote sisip muna ngana mur pe nenge singiria tuatuntun luluch nga meme mur nenge singiria lihoho ke lek ia. Ke uruk laka lom ure nemur lo. <sup>33</sup> E teke e poia poinga nge manmanna iange poinga nem lape hele hot ak nga hoena kura. Ke nge he, nenge teke o esia sipsip hel nge singiria muna ero pe meme hel nge singiria lihoho ero nge te tu luluch nga lek, lape o etei mellehe mene ke e kemeia iri.”

<sup>34</sup> Pe Lapan tuacholia ke teke, “Iok, urana! Lape ta laia ke pomalaka nga o hele ngam.” <sup>35</sup> Pe nga etue neu Lapan mene sipsip mur lochloch ngana nenge singiria muna pe meme tatamanna pe heheina mur nenge singiria lihoho pe hele lange tutuna mur nenge tatamanna ke te nauele iri. <sup>36</sup> Iok Lapan pe tutuna mur te heii ia sipsip pe meme nemur ke etue mol la lo pe te tu kangkanga toto nge Iakop. Pe Iakop nauelele Lapan nena sipsip mur hel pule.

<sup>37</sup> Ol pe Iakop chatoa ae pumpu perperna mur pe sochia uliria pe poia chorochoi ia ke utona hussu ngana nenge teu hota hot. <sup>38</sup> Ol pe hemes teua iri nga ech ana kaliu mur. Pe nga etue nenge sipsip pe meme mur singiria milang, te at ke te in ech pe ure neu nge mes nga mataria pengpeng. <sup>39</sup> Pe te ep hel nga ae nemur te mes ngaria pe te hoe tuturia mur nenge singiria lihoho. <sup>40</sup> Iakop poia Lapan nena sipsip tatamanna

mur ke te epia sipsip heheina mur nga meme nemur nenge singiria lihoho mataria. Ke nga poinga nei Iakop mene hot kelia nena sipsip mur pe meme mur nga Lapan nena sipsip pe meme mur. <sup>41</sup> Pe nga etue nenge sipsip lum ngana mur te teke te ep, Iakop tal teua chorochoi nemur nga kaliu, rochroi la nga te ep ngaria. <sup>42</sup> Pe huros nemur nenge te makuk leilei Iakop talue iri la nga lamau ero. Ke huros nemur nenge te makuk leilei te lala nge Lapan pe nenge te kerkereng te lala nge Iakop. <sup>43</sup> Ke pomalam Iakop nena urelu mur te lohot ke iri halang toto. Nena sipsip pe meme mur pe kamel mur pe tongki mur pe nena hekuleileinga ana hehei pe hana iri halang toto pule.

## 31

### *Iakop Ua Lapan Ana*

<sup>1</sup> Nga etue ene Iakop longe Lapan tutuna mur nge te helele ke te teke, “Iakop lolochia temere nena ure lochloch pe lohot ke i non nenge nena urelu mur halang nga poinga nei.”

<sup>2</sup> Nga tele ngana Lapan poi ke nek lala nge Iakop pe nei ol Iakop esia ke Lapan nau ke nek lange i ero ol.

<sup>3</sup> Ol pe Non Soke hele lange Iakop ke teke, “O la mule nga temem pe alom mur reria ich pe Iau lape e tu luluch nge iong pe e poi ke nek lala nge iong.”

<sup>4</sup> Pomalam Iakop hekulo Retsel pe Liah aria ke te lange i nga kileng nenge nau elele nena sipsip mur ia.

<sup>5</sup> Pe hele lange iri ke teke, “E naue ke nge nike tememo poi ke nek atat nge iau pe nei ero ol. Pe temek ana Soke NeHalang tu luluch nge iau. <sup>6</sup> Imo a eteia ke e ume ke kerkereng toto nge tememo, <sup>7</sup> pe i channanga ia iau hemule es mana ke hetautaua uruk. Pe NeHalang poi hele i ke heporeke iau ero mana. <sup>8</sup> Nga tele ngana Lapan hele ke teke, ‘Urum laka meme nenge singiria tuatuntun.’ Pe meme nemur te hoe tuturia mur nenge singiria tuatuntun lochloch. Pe nga hoena

hele ke teke, 'Urum laka meme nemur nenge singiria lihoho.' Pe meme nemur te hoe tuturia mur nenge singiria lihio lochloch. <sup>9</sup> Ke pomalam NeHalang mene hote tememo nena huros mur pe tunge iri at nge iau.

<sup>10</sup> "Nga etue nenge meme tata-manna mur te haka tautaua meme heheina mur, e maopek ke e esia meme tatamanna mur nenge singiria tuatuntun nge te haka tautaua meme heheina mur. <sup>11</sup> Pe NeHalang nena hekulkulonga hele at nge iau nga opek ke teke, 'Iakop.' Pe iau e tuacholia ke e teke, 'Iau koi.' <sup>12</sup> Pe hekulkulonga neu hele ke teke, 'O nau at. Meme tatamanna nenge te haka tautaua meme heiheina nemur singiria tuatuntun pe lihoho. Iau sipok e poia ke lohot ke pomam iange e esia ure lochloch ngana nenge Lapan poia lala nge iong ke ulolo. <sup>13</sup> Iau NeHalang nenge e lohot nge iong nge Petel nge nike. Pe o eusiling heke ae oliua eina nga um nenge hengeilang ana pe o poia helenga kerkereng ngana e at nge iau. Heueu nei o lohaka nga ich nei pe o la mule nga lem ich pengpeng.'"

<sup>14</sup> Pe Retsel iri nai Liah te tuacholia pe elle nge iri hele ke te teke, "Ke imem nai lape mo mene tememem nena ure hel ero ol <sup>15</sup> iange i naue imem ke pomanga hehei lomonmona ngana mur lo. Tunge imem lange iong pe hesil sio mene urumem nenge o nges imem ia ke het. <sup>16</sup> Pe ure lochloch ngana nenge NeHalang mene hote nge i pe tunge lange iong nem, imem pe tutumem mur laka lemem ia ol. Ke pomalam o nanas mene NeHalang nena helenga ol."

<sup>17</sup> Ol pe Iakop tal heke nehei mur pe tutuna mur nga nena kamel mur <sup>18</sup> pe kulosia iri ke iri muka luluch nga sipsip mur pe meme mur pe huros hel pule nenge mene iri nge Mesopotamia. Pe te lohaka nga kileng neu pe te i ke tela nge temene Isak nga ich nenge Kanan.

<sup>19</sup> Nga etue nenge Lapan la ke utute nena nena sipsip mur singiria pulpulna,

Retsel la ke keme hote temene nena ae tapuna mur nga nena pele letena.

<sup>20</sup> Pe pule, Iakop lohaka ke ii lo pe hele toto nge Lapan ero. <sup>21</sup> Ol pe lohaka kome mana luluch nga nena ure mur lochloch. I ke la lotele nga ech tana nenge Uprates pe i ke ramana la nga hengene mur nga kileng nenge Kileat.

### *Lapan Nanas Mule Iakop*

<sup>22</sup> Iok, etue nai la lo pe nga etue mol ngana, Lapan longe nge te teke Iakop paukou ua ke la lo. <sup>23</sup> Ol pe Lapan mene alona mur ke te nanasia Iakop pe te ii ke etue iri ratele nai pe la te lohot nge Iakop nga hengene nge Kileat. <sup>24</sup> Pe nga miliko Lapan ma opene ia NeHalang nge lohot nge i pe hele lange i ke teke, "O poia ute e lange Iakop ero toto."

<sup>25</sup> Iakop lele nena pelpele nga hengene nenge Kileat pe Lapan saolia i. Pe Lapan iri ul alona mur te leleria pelpele nga lamau pule. <sup>26</sup> Ol pe Lapan lange Iakop pe hele lange i ke teke, "Pomerei nenge o channanga ia iau pe o heuaia tutuk mur heihei nei nem? O poia iri ke pomalaka nga heihei nenge te ua totoia iri nga hunelinga. <sup>27</sup> Pomerei nenge o channanga ia iau pe o lel kome mana ak? Toinge o hele toto at nge iau lape e poia lem kilanga unne pe lek hana mur ke te ole hote kema pe hario ke te peu ele iong mukam. Ke het pe e kolosia iong ke ola ol. <sup>28</sup> O poia iau ke e lauhit polia lek tete mur pe tutuk mur heiheina nai nem ero pe e eea iri ero mana. Poinga nenge o poia nei poreke toto i. <sup>29</sup> Iau lek kerkerenga palaungana nge e poia ure poreke ngana ke lohot nge iong. Pe nga miliko temem ana Soke NeHalang hele at nge iau ke teke, 'Nenge teke letem ke o poi ke urana ma poreke lange Iakop o poia ero. O poia ute e lange Iakop ero toto.' <sup>30</sup> Pe iau e eteia ke iong lemem toto nge o la mule nga temem na kileng. Pe pomerei toto nenge o kemeia lek ae tapuna mur nga lek pele letena?"

<sup>31</sup> Pe Iakop tuacholia Lapan ke teke, “Iau e matau iange letek ke e teke lape o ech hote tutum mur heheina nai nem pe o mene mule iri nge iau. <sup>32</sup> Pe nenge teke o hottaua mele nenge mene lem ae tapuna mur o hune i ke mete sapele. Pe nga alora mur mataria, iong sipom o iat ke o nau rere lem ure mur. Nenge teke mo mene lem ute, iok o mene mule.” Pe i manmanna ke Retsel kemeia ae tapuna nemur pe Iakop eteia ero.

<sup>33</sup> Iok Lapan i teu la nga Iakop nena pelpele pe i teu la nga Liah nena pe i teu la nga hekuleileinga ana hehei mur nai reria pe hottaua ute e ero. Lapan i hot nge Liah nena pelpele pe i teu la nga Retsel nena pelpele. <sup>34</sup> Pe Retsel mene aetapuna nemur pe tal teua iri nga kamel ana arenga pe kila hite iri ol. Pe Lapan tango rara nga ure lochloch pe hottaua ute e ero toto.

<sup>35</sup> Pe Retsel hele lange temene ke teke, “Temek, letem inin taua iau ero. Iau lape e mes haka ero iange e poi imem hehei.” Ke Lapan tango rara pe hottaua ae tapuna nemur ero.

<sup>36</sup> Ol pe Iakop letena inin taua Lapan pe heleia i ke teke, “Iau mai e poia poinga poreke ngana e kai? E poi poreke iong ke merei nenge o hekumia iau at ne mai? <sup>37</sup> O tango rere lem pele ana ure mur pe o at ke o chanrere nga lek urelu mur lochloch ke het ta lo. Pe o hottaua lo? Iok o talue lakoi ita lochloch matara ke alom mur pe alok mur te milteu at nge ita nai.

<sup>38</sup> “Iau e tu luluch nge iong ke hesinga iri ana non kina elle (20) lo. Pe lem sipsip pe meme mur te hoho ke urana mana pe e mete ero. Pe pule e hune lem sipsip tamane ngana e nga lem huros mur ke e ngaua ero toto. <sup>39</sup> Pe lem sipsip pe meme mur nenge ure inolo ngana mur te tune iri, e mene ke la e heteia lange iong ero. Iau sipok e tuacholia utar nenge erue. Pe utar nenge erue nga sinanga pe nga miliko, o long haka uruna atat nge iau. <sup>40</sup> Kokoes e umume nga sinanga pe chaia sina kolkole iau

pe nga miliko e mamani ke nek ero iange singik houou manmana. <sup>41</sup> E tu luluch nge iong pe e ume manmanna nge iong ke hesinga iri ana non kina elle. (20) E ume ke hesinga iri analoch pe henel iange e teke e mene tutum mur heheina nai nem. Pe hesinga iri rahtele elle e ume ke e nauele lem sipsip pe mene mur. Pe o channanga ia iau hemule es mana ke o hetautaua uruk. <sup>42</sup> Iau lek te Apraham ana Soke NeHalang nenge temek Isak heto heke totote, pe I tu luluch nge iau. Pe nenge teke tu luluch nge iau ero, iong lape o kulosia iau ke e patpata mana ke e la. Pe NeHalang esia letek meena ngana pe ume palaungana nenge e poia ke ulolo. Ke ngana laka nenge hele salia iong nga miliko.”

#### *Iakop Pe Lapan Tetal Helenga Ke Tetu Ke Nek Ol*

<sup>43</sup> Ol pe Lapan tuacholia Iakop ke teke, “Iau tutuk mur koi hehei nai nei pe tuturia mur iau lek tete mur ia iri. Pe iau koi nenge lek sipsip mur pe meme nemur. Ke ure lochloch ngana nei iau toro mana lekia iri. Pe lape e poia tutuk mur heheina nemur pe lek tete nemur ke mere mai ol? <sup>44</sup> O i at ke ita nai ta poia helenga kerkereng ngana e mukam. Pe ta poia ute ke helete metene ita nai nga rera helenga kerkereng ngana nem.”

<sup>45</sup> Pomalam Iakop hemes heke um tana e ke heilangia iri nai reria helenga kerkereng ngana neu. <sup>46</sup> Pe hele lange alona mur ke teke, “A lolochia um hel pe a takiraua.” Pomalam te lochloch ia um mur pe te takiraua um huna e. Pe Iakop pe Lapan pe reria hana mur te are sio ke te ngau nga um huna neu ilina. <sup>47</sup> Pe Lapan hetue um huna neu nga helenga Aram ke ene laka Iekasahatuta. Pe Iakop hetue nga helenga Hipru ke ene laka Kalit. (pe helenga nai neu luria elle mana. Luria laka, “hengeilang ana um”).

<sup>48</sup> Pe Lapan hele lange Iakop ke teke, “Helenga kerkereng ngana nenge ita nai ta poia nem ana



hengeilang koi um huna nei.” Ke ngana laka nenge te hetue ke ene Kalit. <sup>49</sup> Pe ene e pule, te hetue ke ene um tana nenge Mispa. Iange Lapan hele ke teke, “Ita nai lape ta tu ke ta kangkanga hel pe Non Soke lape nachnau nge ita nai nga rera helenga kerkereng ngana nem. Lape ta nanasia ma ero. <sup>50</sup> Letem metene ke NeHalang nachnau nga ita nai rera poinga mur. Nenge teke o poi poreke tutuk mur ma o lei haka mulmule nge hehei hel, NeHalang eteia ke ulolo.” <sup>51</sup> Pe Lapan hele lange Iakop pule ke teke, “O nau at nga um tana nenge e hemes heke pe um huna nenge e lung heke nga ita nai tunangara. <sup>52</sup> Um tana nenge mes nei pe um huna nei te helete metene ita ke, iau lape e lotele ke la e pal nge iong ero. Pe iong pule o lotele ke at o pal nge iau ero. <sup>53</sup> Iau lek te Nahor pe iong lemte Apraham pe reria tete mur te heto hekeke NeHalang i toro. Pe I mana milteu atat nge ita nai nga rera poinga mur.”

Pomalam Iakop poia helenga kerkereng ngana e nga NeHalang ene. NeHalang nenge temene Isak heto hekeke. <sup>54</sup> Pe hune huros e ke poi tunginga ia nga hengene neu, pe hepall nge alona mur ke te ngau luluch nge i. Te ngau ke het pe te tuia miliko neu nga lamau.

<sup>55</sup> Iok, nga uach Lapan lau hite na tete mur pe tutuna heheina nai neu pe pete iri. Ke het pe lohaka ke lamule nga na kileng.

## 32

### *Iakop Sahol Mule Tina Esau*

<sup>1</sup> Pe Iakop pule iri ul nena hana mur te lohaka pe te i ke tela. Te i ke tela pe NeHalang nena hekulkulonga hel te lohot nge i nga kue. <sup>2</sup> Nga etue nenge esia iri lohaka pe hele ke teke, “NeHalang nena asa pai koi tu nga kileng panei.” Pomalam Iakop hetue kileng neu ke ene: Kileng nenge Mahanaim.

<sup>3</sup> Ol pe Iakop kulosia nena hana hel ke la te hele toto nge tina Esau

nge tu nga tuele kina nenge Itom nga ich nenge Seir. <sup>4</sup> Iakop hele lange iri ke teke, “A la pe a hele lange ak soke Esau ke mai koi: ‘Non soke lem hekuleileinga ana non Iakop hele ke mai koi, Iau e tu luluch nge ra achung Lapan nga halang nike ke at heueu nei. <sup>5</sup> Pe lek pulumakau mur pe tongki mur pe sipsip mur pe meme mur iri halang. Pe lek hekuleileinga ana hehei pe hana iri halang pule. Ak soke, e hekule helenga nei lange iong ke e teke letem urana nge iau.’”

<sup>6</sup> Iok nga etue nenge hana nemur te at mule, te hele lange Iakop ke te teke, “Mo laia lem helenga nge tim Esau lo. Pe i kou teke at ke saholia iong nga kue pe hana iri ananon kina iri ananon kina elle (400) lape te at luluch nge i.”

<sup>7</sup> Iakop longe helenga neu pe matau toto pe letena tuanin rara. Ol pe lasia nena hana mur nenge te tu luluch nge i neu ke aria tuluk iri nai. Pe sipsip mur pe meme mur pe pulumakau mur pe kamel mur ke pomalam pule. <sup>8</sup> Iange Iakop letena tuanin ke teke, “Nenge teke Esau at pe te talune palinga hel nge iri nenga tuluk nenga muka, iri nenga tuluk nenga hoena lape te ua.”

<sup>9</sup> Ol pe Iakop hetalaulau ke teke, “O NeHalang, lek te Apraham pe temek Isak te heto hekeke Iong. Iong Non Soke nenge O hele at nge iau ke O teke, ‘O la mule nga lem kileng nge alom mur pe lape e tu luluch nge iong pe e poi ke nek lala nge iong,’

<sup>10</sup> Non Soke, iau lem hekuleileinga ana non pe e urana ero pe Iong letem poreke ia iau pe O poi ke nek toto at nge iau. Nga etue nenge e hile lek kileng e lotele nga ech nge Iortan pe e rahat mene lek kula. Lek ute e ero ol. Pe heueu e la mule luluch nge lek hehei pe hana mur pe lek huros mur nge aria tuluk iri nai. <sup>11</sup> Non Soke, e hetalaulau ke O nauele iau ke nek nge tik Esau. E matau iange lape te at pe te hun lapue imem luluch nge lek hehei mur pe tutuk mur pule. <sup>12</sup> Nge nike o hele at nge iau lo ke o teke,



‘Lape e pete iong pe e poia lem tete mur ke iri halang toto ke pomanga pepei nga ruach ilina pe mele pele nakuna ero toto nge sis ele iri.’ ”

<sup>13</sup> Iok, Iakop tuia miliko neu nga lamau pe hesilei hote huros hel ke poi tunginga ia lange tina Esau: <sup>14</sup> Hesilei hot ke meme heheina iri ana non kina iri analoch (200) pe tatamanna iri ana non kina elle (20). Pe sipsip heheina iri ananon kina iri analoch (200) pe tatamanna iri ana non kina elle (20). <sup>15</sup> Pe kamel heheina iri ana non kina elle pe analoch (30) luluch nga tuturia mur pe pulumakau iri ana non kina nai (40) pe kolok iri analoch (10). Pe tongki heheina iri ana non elle (20) pe tatamanna iri analoch (10). <sup>16</sup> Iakop talue nena hekuleileinga ana hana mur ke te nauele huros ana lala nemur pe hele lange iri ke teke, “Imo muka nge iau pe a talue kileng koana ngana unne nga huros ana lala elle pe elle.”

<sup>17</sup> Pe Iakop hele lange hekuleileinga ana non nenge nauele huros ana tuluk nenga muka ke teke, “Tik Esau lape sahol tele iong pe lape onteia iong ke teke, ‘Non tei nena non iong pe ramam la ke merechrei? Pe itei nenge nena huros nemur nenge iri mukmuka nge iong?’ ” <sup>18</sup> Pe iong o tuacholia ke o teke, ‘Lem hekuleileinga ana non Iakop laka nena huros nemur. Pe i tunge ure nemur ke pomanga tunginga nenge lange iong ak non soke Esau. Pe i kou nanasia imem ke atat kura.’ ”

<sup>19</sup> Pe Iakop hele pule lange hekuleileinga ana non nenge nauele huros mur aria tuluk neinga pe nenge naulele tuluk mol ngana pe iri lochloch ngana nenge te nanasia huros mur ke teke, “Imo lochloch ngana nem pule, nga etue nenge a saholia Esau a heleia helenga elle mana nenge pomau lange i. ” <sup>20</sup> Pe a hele toto lange i ke nek ke a teke, ‘Lem hekuleileing ana non Iakop kou nanasia imem ke atat kura.’ ” Iange Iakop letena tuanin ke teke, “Lape e hemaluche Esau letena nga tunginga

nemur nenge iri muka nge iau nei. Pe nga hoena e saholia i pe lape letena urana mule nge iau.” <sup>21</sup> Ke pomalam Iakop kulosia nena hana mur ke iri muka ia nena tunginga mur nenge lange tina pe i tu muleia miliko neu nga nena asa.

### *Iakop Iri Nai NeHalang Te Palhel*

<sup>22</sup> Iok nga miliko neu Iakop lohaka pe mene ne hei mur nai neu pe nena hekuleileinga ana hehei mur nai pe tutuna mur nge iri analoch pe elle pe te i ke te lohtele nga ech tana e nge ene Iapok. <sup>23</sup> Te lotele ke tela nga hele ke het pe Iakop lotele la mule ke kulos tele nena ume ana hana mur nga nena ure mur pule. <sup>24</sup> Pe Iakop i toro mana tu ol pe non e lohohot taua i pe iri nai te pal hel. Te pal helel nga miliko neu ke la kileng matale sio. <sup>25</sup> Pe non neu amneia ke i lape alker taua Iakop. Pomalam hehelse Iakop nga ipuna tuatom ngana ke mesohe. <sup>26</sup> Te pal helel pe non neu hele lala nge Iakop ke teke, “O hal taua iau ol iange kileng uach sio lo.”

Pe Iakop tuacholia ke teke, “O pete iau mukam laka e hal taua iong ke o la.”

<sup>27</sup> Ol pe non neu onteia Iakop ke teke, “Iong mam em merei?”

Pe Iakop tuacholia ke teke, “Ek laka Iakop.”

<sup>28</sup> Ol pe ana non hele ke teke, “Tong o palhel luluch nge NeHalang pe nge non ngana mur pe o hekou susue iri. Pomalam em nenge Iakop lape ero ol. Lape te hetue iong ke Israel ol.”

<sup>29</sup> Pe Iakop hele lange i ke teke, “Pe iong em merei? O hetue em at nge iau.”

Pe ana non tuacholia ke teke, “Pomerei nenge o onteia iau nga ek?” Ol pe non neu pete sapele Iakop.

<sup>30</sup> Pe Iakop hele ke teke, “Eh! Iau nge e naue NeHalang ramana loi. Pe ngana i e mete ero mai.” Pomalam hetue kileng neu ke ene Peniel. (Peniel luna laka NeHalang ramana).

<sup>31</sup> Iok chaia matana haka lo pe Iakop lohaka nge Peniel pe i hetata mana iange ipuna mesohe. <sup>32</sup> Te

hehel sose Iakop aepona nenga ipuna tuatom ngana mesohe hot. Pomalam atat ke heueu nei kura, Israel mur te ngaua huros mirana nenga ipuna tuatom ngana ero.

### 33

#### *Iakop Saholia Tina Esau*

<sup>1</sup> Nga etue nenge Iakop tei ke te lala, teke naula pe esia Esau nge atat. Pe nena hana mur nge iri ana non kina iri ana non kina elle (400) te at luluch nge i. Ol pe Iakop lasia tutuna mur ke hel te lange Liah pe hel te lange Retsel pe hel te lange hekuleileinga ana hehei nai neu. <sup>2</sup> Pe talue hekuleileinga ana hehei nemur pe tuturia mur ke te i nga muka pe Lia pe tutuna mur te nanas pe Retsel pe Iosep iri nga hoena. <sup>3</sup> Pe Iakop i muka ia iri ke lange tina. I ke lala nge tina pe tualou sisio pe puo susue palpanna lala nga ich ke ratele henai.

<sup>4</sup> Ol pe Esau song la ke saolia Iakop pe lau hite i pe iri nai te tang sapele. <sup>5</sup> Pe Esau nau la pe esia hehei nemur pe aina kinkino ngana nemur pe ontei ke teke, "Itei hel nenge te koko nge iong nemai?"

Pe Iakop tuacholia ke teke, "NeHalang poi ke urana toto at nge iau lem hekuleileinga ana non. Pomalam tunge aina kinkino ngana nemur at nge iau."

<sup>6</sup> Iok hekuleileinga ana hei nai neu pe tuturia mur te at pe te tualou sio pe te puosue palparia la nga Esau matana. <sup>7</sup> Ke het pe Lia pe tutuna mur. Ke het pe Retsel pe Iosep. Iri lochloch te at pe te tualou sio pe te puo sue palparia la nga Esau matana.

<sup>8</sup> Pe Esau ontei ke teke, "E i at pe e saholia hana mur nge te heii ia huros mur ke te lala. Pomere nenge o teke o tunge ure nemur at nge iau?"

Pe Iakop tuacholia ke teke, "E teke e poia iong ke letem urana mule nge iau."

<sup>9</sup> Pe Esau hele ke teke, "Kole tik, e teke o rahat mule ure nemur ke lemia iri iange iau lek halang lo."

<sup>10</sup> Pe Iakop tuacholia ke teke, "Ero kole tik! Iong letem urana mule nge iau lo, pomalam o longele tunginga nemur nenge e tunge lala nge iong nei. E naue ramam pe letem urana pe o poi ke nek at nge iau ke pomalaka nga e naue NeHalang ramana. <sup>11</sup> Ke kole tik, lemek toto ke e teke longele tunginga nemur nenge e tunge lala nge iong nei. Iange NeHalang poi ke urana toto at nge iau ke tunge lek urelu mur nge halang toto." Ol pe Esau longala ke mene tunginga nemur iange Iakop ech tote i.

<sup>12</sup> Ke het pe Esau hele ke teke, "Iok ta la ol; Iau lape e koko nge imo."

<sup>13</sup> Pe Iakop hele lange Esau ke teke, "Ak soke, iong o eteia ke aina kinkino ngana nei te rahtoto ero kura. Pe pule sipsip heheina mur pe pulumakau heheina te hesiusiua tuturia mur kura. Pe nenge teke ta hetarunge iri ke te i ke ueiuei mana nga etue elle, huros lochloch ngana nemur lape te mete. <sup>14</sup> Ke ak soke, iong lem hekuleileinga ana non koi iau. Pe o i ke iong muka pe iau e hei ia huros mur pe aina kinkino ngana ke neknek nga hoena. Pe ak soke, lape la e sahol mule iong nga ich nenge Seir."

<sup>15</sup> Ol pe Esau hele teke, "Pomalam, lape e henonou hote lek hana hel te tu luluch nge imo pe imo ul ke a at nga hoena ol."

Pe Iakop tuacholia ke teke, "Urana, pe lemek ero poinga nem. Iange e teke e etei tote ke ak soke letena urana mule nge iau lo."

<sup>16</sup> Ke nga etue neu Esau i ke la mule nge Seir. <sup>17</sup> Pe Iakop pe nena hana mur te i ke ramaria la nga kileng nenge ene Sukot. Pe nga lamau Iakop lele nena pele pe lele nena huros mur reria pele pule. Pomalam te hetue kileng neu ke ene kileng nenge Sukot.

<sup>18</sup> Pe nga etue nenge Iakop te lohaka nga kileng nenge Patan Aram, te i ke la te lohote ke urana mana nga tuele tana nenge Sekem nga ich nenge Kenan. Pe te tele reria pelpele mur nga tuele tana neu ilina nge hot. <sup>19</sup> Pe ich unne nenge Iakop

hemes haka pele ia neu, Iakop ol hote lange iri mata nenge Hamor nga umtutuna iri ana non kina lime (K100.00). Hamor i Sekem temene ia. <sup>20</sup> Pe Iakop lung heke hatanga e nga lamau pe hetue ke ene laka El-Elohe-Israel. (Luna mai koi; Israel mur aria Soke NeHalang nenge kikina toto).

### 34

#### *Sekem Lau Sue Taina*

<sup>1</sup> Taina temene laka Iakop pe tana laka he Lia. Ana hei i hot ke teke la ke nau tote hehei mur nga kileng neu. <sup>2</sup> Pe non Hiuaet e nge nau ele ich neu, ene laka Hamor pe tuna ene laka Sekem. Sekem esia Taina pe mene i ke lau sue i. <sup>3</sup> Sekem mutena tau tote Taina pe poia helenga urana ngana mur ke teke Taina mutena taua i pule. <sup>4</sup> Pe Sekem hele lange temene Hamor ke teke, “O mene he nei at ke lek hei ia.”

<sup>5</sup> Nga etue nenge Iakop longe Sekem nge poi poreke tuna Taina, poia helenga e ero. Kulele tutuna tatamanna mur ke te at mule nga pele mukam. Iri kou te nau elele reria ume nenge te nau elele reria huros mur kura.

<sup>6</sup> Ol pe Sekem temene Hamor la ke la hele luluch nge Iakop. <sup>7</sup> Iri nai te helele pe Iakop tutuna mur te lohot ume ana ke te at. Pe nga etue nenge te longe poinga nenge lohot nge liuria, te rura pe leteria inin toto. Lange poinga nenge Sekem poia neu, poreke toto nga Israel mur te nau ngaria pe te heoele tote poinga neu nge lohot nge iri.

<sup>8</sup> Pe Hamor hele lange Iakop pe tutuna mur ke teke, “Iau tuk Sekem mutene tau tote tumo pe liumo nem. Pe e teke a tunge lange i ke nehei ia. <sup>9</sup> Ta ngata hel ke imem mo leia lemo heheina mur pe imo a leia lemem heheina mur. <sup>10</sup> Pomalam lape a tu luluch nge imem nga ich nei. Pe a tu pe a ol hot lemo ich pe a umeia lemo umtutuna ana ume mur nga lememo ngamo.”

<sup>11</sup> Ol pe Sekem hele lange Taina temene pe liliuna mur ke teke, “E

teke letemo urana mule nge iau pe nenge teke a onteia iau nga utar, lape e tunge lange imo. <sup>12</sup> A heto hote ure urana ngana mur nenge a teke e tunge lange imo pe a talue uru nga hei nei ana ngesinga. Umtutuna ia nenge talue, iau lape te tunge lange imo pe a tunge hei nem at ke lek hei ia.”

<sup>13</sup> Pe Iakop tutuna mur leteria la mule nga poinga nenge Sekem poia lange liuria, pomalam te channangaia Sekem iri nai temene Hamor. <sup>14</sup> Pe te hele lange iri ke teke, “Iong te riria singim ero pomalam mo longele liumem ke lei nge iong ero. Nenge teke mo longele i ke lei nge iong, meinga palaungana lape mene imem. <sup>15</sup> Pe nenge teke a riria lemo hana mur lochloch singiria ke pomange imem, lape mo ngata nga lem helenga nem. <sup>16</sup> Pe lape a leia lemem heiheina mur pe imem mo leia lemo heheina mur. Pe lape mo tu luluch nge imo pe ta lohot ke ita elle mana. <sup>17</sup> Pe nenge teke lememo ero nge a riria singimo lape mo mene liumem pe mo i ke mo la.”

<sup>18</sup> Hamor iri nai tuna Sekem te longe helenga neu pe leteria urana ia. <sup>19</sup> Pomalam Sekem kulala ero ol. La ke ueiuei mana ke te riria singinga iange i mutena tau tote Iakop tuna hei ngana neu. Pe iri lochloch ngana nenge aria mata elle te tal heke i iange aria soke ia pule. <sup>20</sup> Pomalam Hamor iri nai tuna Sekem te la nga tuele tana neu ana kue matana pe te hele lange hana mur nga tuele tana neu ke te teke, <sup>21</sup> “Hana nemur, hana urana ngana mur ia iri koi.” Pe te hele lange iri ke te teke, “Anau at, ita rera ich palaungana pe ta long teua iri ke te are nga rera ich pe te i pe te umeia reria ume mur nga lemeria ngaria. Pe ita lape ta leia tuturia mur nenge heheina pe iri lape te leia tutura mur nenge heheina pule. <sup>22</sup> Pe iri te longala ke ta tu ke ita hana elle mana nga nenge te teke; ta riria rera hana mur lochloch singiria ke pomange iri. <sup>23</sup> Nenge teke ta longotau ke ta

nanasia reria helenga, iri lape te tu luluch nge ita pe reria sipsip mur pe pulumakau mur, ita rera ia pule.”

<sup>24</sup> Ol pe hana lochloch ngana nga tuele kina neu te ngata nga Hamor iri nai tuna Sekem reria helenga. Pomalam te riria hana lochloch ngana nga tuele kina neu singiria.

<sup>25</sup> Iok etue mol nga hoena, hana lochloch ngana te maia aria melmelenga kura. Pe Iakop tutuna mur, Simion pe Liuai te mene reria kakop sasase ngana mur pe te lelkome teu mana nga tuele tana neu pe te hune hana lochloch. Hana nai Taina liliuna mur ia iri. <sup>26</sup> Pe te hune Hamor pe tuna Sekem pule nga reria kakop sasase ngana pe te mene hote Taina nga Sekem nena pele pe te ua ke te la mule nga reria te tu ngaria. <sup>27</sup> Iok Iakop tutuna mur hel pule te sahot pe te naue hana koluria nge tema parai. Ol pe te kemeia ure urana ngana mur lochloch nga tuele tana neu ke liuria ia uruna pe aria meinga ana ia. <sup>28</sup> Pe te laua sipsip mur pe pulumakau mur pe tongki mur. Pe te mene ure lochloch ngana nenge tu teu nga tuele tana neu pe nenge te tu nge hot pule. <sup>29</sup> Pe te lolochia urelu mur nenge ururia haka toto pe te meme hehei mur pe tuturia mur pe te eu hote ure lochloch ngana nga reria pele letena mur.

<sup>30</sup> Ol pe Iakop hele lange Simion pe Liuai ke teke, “Imo nai a poia pingak ke song ke Kenan mur pe Peres mur nenge te tutu nga ich nei te longe pe te teke iau non poreke ngana. Ita halang ero mana koi, pe nenge teke hana mata nemur te heuel ke te pal luluch nge ita, lape te hun lapue ita ke ta het.”

<sup>31</sup> Pe iri nai te tuacholia ke te teke, “Iri te teke te poia liumem ke pomanga hei salaunga kina e. Pe imem lememe ero toto nge mo nausio mene i ke lohot ke i hei nenge pomam.”

## 35

### *Iakop La Ke Tu Nge Petel*

<sup>1</sup> Iok nga hoena NeHalang hele lange Iakop ke teke, “O lohaka lamai ke la otu lakou nge Petel. Pe o lung heke hatanga e ke o heto heke NeHalang nenge lohot nge iong nga etue nenge o ua tim Esau ana.”

<sup>2</sup> Ol pe Iakop hele lange alona mur pe iri lochloch ngana nenge tetu luluch nge i ke teke, “A saua lemo aeta-puna mur ke te lasus toto iange iri te at nga kileng e. Pe a nun sue imo ke a lemlem mule nga NeHalang matana pe a hetaua lemo hengeron mur. <sup>3</sup> Ke het pe ta lohaka nga kileng nei ke ta lange Petel. Pe lape e lung heke tunginga ana hatanga e nga lamau ke e heto heke NeHalang. I NeHalang nenge halaulaua iau nga ure meena ngana mur nenge te lohotot nge iau. Pe I NeHalang nenge tu luluch nge iau nga kileng lochloch ngana nenge laia iri.” <sup>4</sup> Pomalam te tunge reria ae tapuna mur pe talngaria ana uto mur lochloch lange Iakop. Pe Iakop alohite iri nga ae ouk ene rochroi langa kileng nenge Sekem. <sup>5</sup> Ke het pe te lohaka pe te i te tela. Pe NeHalang poia mataunga palaungana ke lohot nge hehei pe hana nga tuele tana nemur nenge te tu rochroi nge Sekem ke te matau tote Iakop tutuna mur pe te kumia Iakop pe tutuna mur ero.

<sup>6</sup> Iok, Iakop pe hana pe hehei nenge te i luluch nge i neu, te i ke la te lohot nga tuele tana nenge Lus nga ich nenge Kanan. (Tuele tana nenge Lus, heueu nei te hetue ke ene laka tuele tana nenge Petel). <sup>7</sup> Pe Iakop lung heke hatanga e nga lamau pe hetue kileng neu ke ene laka El Petel. (Luna laka NeHalang nenge Petel). Iange NeHalang lohot nge i nga kileng neu nga etue nenge ua tina ana.

<sup>8</sup> Pe Tipora nenge nauelele Repeka nga i kino ngana, mete nga lamau pe te alohite i nga ae ouk e ene rochroi langa kileng nenge Petel. Ana ae mes nga kileng Petel ilina hele nenge sio. Pe te hetetue ae neu ke ene Alon-Pakut. Luna laka; ae Ouk nenge tanginga ana.



### *NeHalang Hetaua Iakop Ene Ke Israel*

<sup>9</sup> Nga etue nenge Iakop lohaka nga kileng nenge Patan-Aram ke mule nga ich nenge Kenan, NeHalang lohote mule nge i pe pete i pe hekerkereng ia i. <sup>10</sup> Ol pe NeHalang hele lange i ke teke, "Heueu nei em laka Iakop pe nga hoena, hehei pe hana lape te hetue em nenge Iakop ero ol. Em heueu ngana nenge lape te heto iongia, ngana laka Israel." Ke pomalam NeHalang hetue i ke ene Israel.

<sup>11</sup> Pe NeHalang hele lange i ke teke, "Iau NeHalang Nenge Lek Kerkerenga Palaungana Toto. Lape e poia lemtete mur ke te lohote ke iri halang toto pe te are nga tuele kina lochloch. Pe lem tete nemur hel lape te lohote ke iri naunga-ala ana hana mur. <sup>12</sup> Pe ich nenge E tunge lange Apraham pe Isak nge nike, pe lape e tunge lange iongia pe lem tete mur pule nge he." <sup>13</sup> NeHalang hele luluch nge i ke het pe lohaka ke la sapele.

<sup>14</sup> Ke Iakop hele luluch nge NeHalang pe heilangia kileng unne neu nga um sase ngana e nge hemes heke. Pe eusiling heke uain ke poi tungingia ia lange NeHalang. Pe eusiling heke ae oliua eina la nga um neu pule. <sup>15</sup> Pe hetue kileng neu ke ene laka kileng nenge Petel.

### *Retsel Hoho Pe Mete*

<sup>16</sup> Iok, Iakop pe nena hana mur te lohaka nga kileng nenge Petel pe te i ke ramaria la nga kileng e nge ene Eprata. Te i ke te lala kura pe Retsel ana etue at sapele nenge lape hoho. <sup>17</sup> Ol pe melmelenga nenga hohonga lohote ke palaungana toto nge i pe hoho sapele. Pe hei nenge halaua i ke hoho neu hele lange i ke teke, "O matau ero, tum i tamane pullo." <sup>18</sup> Nga etue nenge Retsel hoho eingana sio hakaka iange metmete lo. Ol pe eingana tah heulo pe hetue tuna tamane ngana neu ke ene laka Pen-Oni. Pe ero, temene Iakop hetue ke ene Pensamin.

<sup>19</sup> Ke Retsel mete pe te alohite i nga kue ilina. Nga kue nenge song ke

lange Eprata (pe heueu nei te hetue ke ene laka Petlehem). <sup>20</sup> Pe Iakop hemes heke um sase ngana e ke heilangia Retsel mangana. Ke heueu nei, um neu kou mes kura.

<sup>21</sup> Ke het pe Iakop nenge ene e pule Israel loloun mule ke loparia naunga toto ana hesinga haka nge Miktal Eter ke la pol pe hemes sue nena pelpele. <sup>22</sup> Nga etue nenge Israel tunga kileng neu, longe nge te teke Rupen teu ke la maluluch nge temene nehei e pule nenge ene Pilah.

Iakop tutuna mur iri analoch pe nai (12):

<sup>23</sup> Liah tutuna mur:

Pe tuna tengene ana nge Iakop laka Rupen.

Ke het pe Simion pe Liuai pe Iuta pe Isakar pe Sepulon.

<sup>24</sup> Pe Retsel tutuna mur laka: Iosep pe Pensamin.

<sup>25</sup> Pe Retsel nena hekuleileinga ana hei nenge ene Pilah tutuna mur laka: Tan pe Naptali.

<sup>26</sup> Pe Liah nena hekuleileinga ana hei nenge ene Silpa tutuna mur laka: Kat pe Asha.

Ke Iakop tutuna nemur, hoe iri nga etue nenge te tu nge Patan-Aram.

<sup>27</sup> Iok, Iakop la mule nge temene Isak nge Mamre. Kileng Mamre tu rochroi nge Kiriati-Arpa. (Kiriati Arpa, heueu nei te hetue ke ene laka kileng nenge Hepron). Kileng neu Apraham tu tala ia nge nike ke het pe Isak. <sup>28</sup> Pe Isak tu nga ich ke ana hesinga iri ana non kina lime pe ana non kina henel (180). <sup>29</sup> Ke ana non tu ke tuahuna toto pe mete sapele. Pe tutuna mur, Esau pe Iakop te alohite i ke ma luluch nge nena tete mur.

## 36

### *Esau Nena Tete Mur*

<sup>1</sup> (Esau ene e pule laka Itom.) Pe na tete mur te lohote ngaria aria nananga koi nei.



<sup>2</sup> Esau lei ke hehei nai nge Kenan pe leia Ata nenge Elon tuna. Elon lohot nga mata nenge Hitae mur. Pe leia Olipama nenge Ana tuna. Ana i Sipeon nette ia pe Sipeon lohot nga mata nenge Hiuae mur. <sup>3</sup> Pe pule Esau leia Pasemat nenge Ismael tuna pe Pasemat liuna laka Nepaiot.

<sup>4</sup> Iok, Esau nehei Ata hoe Elipas pe Pasemat hoe Reuel, <sup>5</sup> pe Olipama hoe Ieus pe Ialam pe Kora. Ke Esau tutuna nemur, tataria mur te hoe iri nga te tu ngaria nge Kanan.

<sup>6</sup> Iok, Esau mene nehei mur pe tutuna mur nenge tatamanna pe heheina pe hehei pe hana lochloch nenge tetu luluch nge i pe nena sipsip mur pe pulumakau mur pe nena huros mur hel pule pe nena ure lochloch ngana nenge mene iri nge Kanan pe loloun ke la tu ke kangkanga nge tina Iakop nga ich e pule. <sup>7</sup> Esau loloun iange ich nenge iri nai tina Iakop te are ia neu, palaungana ero mana. Pe pule iri nai reria sipsip mur pe pulumakau mur halang sakilil pe muria ero. <sup>8</sup> Ke pomalam Esau la ke tu nga kileng nenge ana sasana halang, nga kileng nenge Seir. (Esau ene e pule laka Itom).

<sup>9</sup> Iok, Itom mur reette palaungana laka Esau pe iri te are nga kileng nenge ana sasana halang, nga kileng nenge Seir. Pe nananga nenga te lohot ngaria ngana koi nei.

<sup>10</sup> Esau tutuna nemur nenge tatamanna eria mur koi nei:  
Esau nehei nenge ene Ata tuna laka Elipas pe nehei nenge ene Pasemat tuna laka Reuel.

<sup>11</sup> Pe Elipas tutuna nemur nenge tatamanna eria mur koi nei:  
Teman pe Omar pe Sepo pe Katam pe Kanas.

<sup>12</sup> Pe Esau tuna Elipas, nehei e pule ene laka Timna. Ana hei hoe tuna e nge ene Amalek. Ke Esau nehei nenge ene Ata, nena tete mur koi nei.

<sup>13</sup> Iok, Reuel tutuna nemur nenge tatamanna eria mur koi nei:  
Nahat pe Sera pe Sama pe Misa.  
Ke Esau nehei nenge ene Pasemat nena tete mur ia iri.

<sup>14</sup> Pe Esau nehei nenge ene Olipama tana laka Ana pe nette laka Sipeon. Ana hei tutuna mur laka:  
Ieus pe Ialam pe Kora.

<sup>15</sup> Iok, Esau nena tete mur hel te lohot ke iri hana papalauna mur ia iri:

Ke Esau tuna tengene ana i tamane pe ene Elipas. Anon tutuna mur laka:

Teman pe Omar pe Sepo pe Kanas <sup>16</sup> pe Kora pe Katam pe Amalek. Hana papalauna nemur te lohot nge Elipas pe te nauelele reria hana mur nga tuele kina nenge Itom. Pe Esau nehei nge ene Ata nena tete mur ia iri.

<sup>17</sup> Pe nga hoena Esau tuna tamane ngana nenge ene Reuel tutuna nemur nenge tatamanna te lohot ke iri hana papalunga. Ke eria mur koi nei:

Nahat pe Sera pe Sama pe Misa.  
Hana papalauna nemur te lohot nge Reuel pe te nauelele reria hana mur nga tuele kina nenge Itom. Pe Esau nehei nenge ene Pasemat nena tete mur ia iri.

<sup>18</sup> Pe Esau nehei nenge ene Olipama tutuna nemur nenge tatamanna te lohot ke iri hana papalauna mur ai iri pule. Pe eria mur koi nei:

Ieus pe Ialam pe Kora. Hana papalauna nemur, Esau nehei nenge ene Olipama nena tete mur ia iri. Pe ana hei tana laka Ana.

<sup>19</sup> Ke mata nemur nge Itom aria papalauna mur koi nei pe iri te lohot nge Esau (nenge ene e pule Itom).

<sup>20</sup> Iok non nenge ene Seir nena nge Hor pe Hor mur tetu tala ia kileng

palaungana nenge Itom. Pe Seir tutuna nemur nenge tatamanna eria mur koi nei:

- Lotan pe Sopal pe Sipeon pe Anah, <sup>21</sup> pe Tison pe Esa pe Tishan. Ke hana nemur Seir tutuna mur nenge tatamanna pe iri hana papalauna ke te nauele reria hana pe hehei mur nenge Hor. Pe iri laka nenge tetu tala nga ich palaungana nenge Itom.
- <sup>22</sup> Pe Lotan tutuna nemur nenge tatamanna eria mur koi nei: Hori pe Homam. Pe Lotan liuna laka he Timna.
- <sup>23</sup> Pe Sopal tutuna nemur nenge tatamanna eria mur koi nei: Aluan pe Manahat pe Epal pe Sepo pe Onam.
- <sup>24</sup> Pe Sipeon tutuna nemur nenge tatamanna eria mur koi nei: Aiah pe Anah. Pe Anah i non nenge hottaua ech milanglang ngana pach haka ngana mur nga ich sana lomona, nga etue nenge nauelele temene ne Sipeon nena tongki mur.
- <sup>25</sup> Pe Anah tutuna mur laka: Tison pe tuna hei ngana nenge ene Olipama.
- <sup>26</sup> Pe Tison tutuna nemur nenge tatamanna eria mur koi nei: Hemtan pe Espan pe Itran pe Keran.
- <sup>27</sup> Pe Eser tutuna nemur nenge tatamanna eria mur koi nei: Pilan pe Sauan pe Akan.
- <sup>28</sup> Pe Tisan tutuna nemur nenge tatamanna eria mur koi nei: Us pe Aran.
- <sup>29</sup> Hana papalauna nenge te nauele reria hana pe hehei nge Hor, eria mur koi nei: Lotan pe Sopal pe Sipeon pe Anah <sup>30</sup> pe Tison pe Eser pe Tisan. Hana nemur te mes haka ke te nauele mata elle pe elle nge hana pe hehei nenge Hor, nga kileng palaungana nenge Seir.

*Naunga-ala Ana Hana Mur Nenge Te Nauele Kileng Nenge Itom Eria Mur Koi Nei*

<sup>31</sup> Nga etue nenge naunga-ala ana non e mes haka ke nauele kileng nenge Israel ero kura, naunga-ala ana hana nemur te nauele hehei pe hana nga ich nenge Itom:

- <sup>32</sup> Ke Pela nenge Beor tuna lohote ke i naunga-ala ana non nenge nauele kileng nenge Itom. Pe nena kileng ene laka Tinapa.
- <sup>33</sup> Pe nga etue nenge Pela mete, Iopap nenge Serah tuna nga kileng nenge Posra, mene munna ke i naunga-ala ana non.
- <sup>34</sup> Pe nga etue nenge Iopap mete, Husam nenga ich nenge Teman mene munna ke i naunga-ala ana non.
- <sup>35</sup> Pe nga etue nenge Husham mete, Atat nenge Petat tuna mene munna ke i naunga-ala ana non. Pe Atat nena nge Auit. Ana non iri ul Mitian mur te palhel pe hekou sue iri nga tuele kina palaungana nenge Moap.
- <sup>36</sup> Pe nga etue nenge Atat mete, Samla nenge nena nge Masreka, mene munna ke i naunga-ala ana non.
- <sup>37</sup> Pe nga etue nenge Samla mete, Saul nenge nena nge Reopot mene munna ke i naunga-ala ana non. Kileng Reopot tu rochroi nga ech tana palaungana nenge Uprates.
- <sup>38</sup> Pe nga etue nenge Saul mete, Pal-Hanan nenge Akpor tuna mene munna ke i naunga-ala ana non.
- <sup>39</sup> Pe nga etue nenge Pal-Hanan nenge Akpor tuna mete, Atar nenge nena nge Pau mene munna ke i naunga-ala ana non. Pe nehei ene laka Mehetapel. Mehetapel i he Matret tuna hei ngana ia pe he Matret i he Mesahap tuna hei ngana ia.

<sup>40</sup> Iok, hana papalauna nemur te lohote nge Esau pe te mes ke te nauele aria mata mur nga iri siporia reria ich mur. Hana nemur eria mur koi nei:

Timna pe Alua pe Ietet <sup>41</sup> pe Olipama pe Ela pe Pinon <sup>42</sup> pe Ke-

nas pe Teman pe Mipsar <sup>43</sup> pe Maktiel pe Iram. Hana palauna nemur te nauele aria mata mur nga iri siporia reria ich mur pe reria kileng mur nga kileng nenge Itom.

Ke Itom mur re-ette palaungana laka Esau pe aria nananga koi nei.

### 37

#### *Iosep Maopene Ngana Mur*

<sup>1</sup> Iok, Isak mete ke la pe Iakop tu mule nge Kenan nga ich nenge temene tu tala ia nge nike. Pe tu nga lamau ke pomanga i non lomona ngana e.

<sup>2</sup> Pe nananga nenge Iakop tutuna mur nenge tatamanna ngana koi nei.

Iakop nehei Pila pe Silpa, tuturia tatamanna mur te nauelele reria sipsip pe meme mur. Pe Iosep halaulaua titina nemur nga etue nenge ana hesinga iri analoch pe rahtele nai (17). Ol pe Iosep hele hote titina nemur lange temeria Iakop nga reria matana e.

<sup>3</sup> Israel mutena tau tote Iosep nge titina nemur iange tana hoe i nga etue nenge tuauna toto lo. Pomalam Iakop umeia Iosep nena hengeron sase ngana e nge rerere toto pe tunge lange i. <sup>4</sup> Pe Iosep titina mur te naue ke temeria nge mutena tau tote i pe iri ero. Pomalam leteria inin pe te heleia helenga e nge urana lange i ero.

<sup>5</sup> Pe nga etuene e Iosep maopene. Ol pe la ke heleia maopene ngana neu lange titina mur nenge te ha tala nge i. Nenge neu poia iri ke lemeria ero toto ia i ol. <sup>6</sup> Pe Iosep nana lange iri ke teke, "A longo at nga e maopek ngak nei: <sup>7</sup> Ita lochloch ta kalkale uit putatana mur nga ume pe lek mes haka pengpeng pe imo lemo, te heliliu hite lek pe te matul sio lange i."

<sup>8</sup> Pe titina mur te hele lange i ke te teke, "Iong o teke iong palaungana nge imem ke o nauele imem iam, ae? Ke nakum nge o nauele imem

pama?" Te longe Iosep maopene ngana neu pe lemeria ero toto ia i ol.

<sup>9</sup> Iok nga etuene pule Iosep manani pe maopene mule pe heleia lange titina mur ke teke, "A longo at e maopek mule ke chaia pe teio pe itoch mur nge iri analoch pe elle (11), te tualou sio atat nge iau."

<sup>10</sup> Iosep nene maopene ngana nei lange temene pe titina mur pule pe temene hele salia i ke teke, "O maopem ngam nem ma ke nek nga letek ero iam. O teke lape iau pe tam pe titim mur, mo tualou sio lange iong nga matam ma?" <sup>11</sup> Iosep titina mur leteria chercher tau tote i pe temene letena tuanin rara ia ke halang.

#### *Hana Hel Teol Hote Iosep Nge Titina Mur*

<sup>12</sup> Mala ero mana pe Iosep titina mur te lange Sekem ke te nauelele reria sipsip mur, <sup>13</sup> pe Israel hele lange Iosep ke teke, "Titim mur pau kou te nauelele sipsip mur nge Sekem. O iat, lape e kulosia iong ke o lange iri."

Pe Iosep hele, "Iok."

<sup>14</sup> Pe temene hele lange i ke teke, "O la ke o nau tote titim mur pe sipsip mur. Nenge teke te tu ke urana mana, o iat ke o hele toto mule nge iau." Nga etue neu Iakop pe nena hana mur tetu nga mos nge Hebron. Pe Iosep lohaka nga lamau pe i ke la.

Iosep la ke lohote nge Sekem, <sup>15</sup> pe non e saholia i nge i rara pulut manmana nga ich neu pe onteia i ke teke, "O tango rerere utar?"

<sup>16</sup> Pe I tuacholia ke teke, "E tango rerere titik mur nge te naulelele lemem sipsip pe meme mur nga lamai. O naue iri pule?"

<sup>17</sup> Pe non neu hele ke teke, "Oe e naue iri pe e longe iri nge te hele ke te teke, 'Ta lange Totan.' "

Pomalam Iosep nanasia titina mur pe la apenia iri nge Totan. <sup>18</sup> Pe titina mur te naue i la nga tau kura pe te etei-il mene i nga nena hengeron. Ol pe tetal helenga ke te teke te hune i.

<sup>19</sup> Pe te hele tele hel nge iri ke te teke, "I pa nenge maopenpene iam

atat pa nem. <sup>20</sup> A iat, ta hune i pe ta sau teua i la nga ech matana ana polo e pe ta hele lange temere ke ta teke ur inolo e hune. Ke ta nau iam nga maopene ngana panem.”

<sup>21</sup> Pe tiria nenge soke ene Rupen. Ana non longe ke mau pe teke poi ala ana pe hele lange iri ke teke, “Ah! ta hune i ero. <sup>22</sup> Ta in toho ero. Ta sau teu mene i langa ech matana ana polo e nga ich sana lomona nei.” Rupen hele ke pomau iange teke mene hot kome i pe mene i ke la mule ia nge temene.

<sup>23</sup> Ke nga etue nenge Iosep apen teu nge titina mur, te laua i pe te haka hote nena hengeron sase ngana nenge heron ia, <sup>24</sup> pe te mene i ke la te sau teua i nga ech matana ana polo e. Ech matana ana polo neu polpolo mana iange ech soso hatalia lo.

<sup>25</sup> Iok, te are sio ke te teke te ngaungau pe te naula pe te esia hana nenge te lohohot nga mata nenge Ismael, nge te lohohaka nga kileng nenge Kiliat ke te atat. Hana nemur te i ia reria lulu pe reria kamel mur te takisia ure nemur nenge ururia haka toto pe ae eina inangana he-ech ngana mur nenge ene Pam pe nenge ene Mir ke ramaria sio lala nge Ekipto.

<sup>26</sup> Pe Iuta hele lange titina mur ke teke, “Ita mai, nenge teke ta hune tira pe ta channanga mana ia ute eina ke ta teke i eina ia, lape ta mene ururatar? <sup>27</sup> A nau at, ta hune i ero iange i tira ia pe eira ia. Ta laia i nge hana Ismael nemur ke te olia i at nge ita.”

Pe titina mur te hele, “Iok lape tapoi ke pomalaka nga o hele ngam.”

<sup>28</sup> Iok, hana nenge te hekulkulo ure neu reria nge Mitien. Iri te i ke te at pe Iosep titina mur te tak haka hote i nga ech matana ana polo, pe te tunge Iosep lange hana Ismael nemur. Pe hana nemur te olia Iosep nga umtutuna iri ana non kina elle pe te mene i ke te lange Ekipto.

<sup>29</sup> Iok, Rupen la mule nga ech matana ana polo pe nau pe Iosep i ero. Ol pe ta chachia nena hengeron. <sup>30</sup> Pe la mule nge titina mur pe hele,

“Kol nei i-i ero nga polo mai! Lape e poi ke mere mai?”

<sup>31</sup> Ol pe te hune meme e pe te mene Iosep nena hengeron sase ngana neu pe te panun teua la nga meme neu eina. <sup>32</sup> Pe te mene hengeron sase ngana neu la mule nge temeria pe te hele ke te teke, “O nau at, mo hottaua ure nei koi. O nau urume ke nek lape tum kai nena mai?”

<sup>33</sup> Pe temeria nau urume pe hele, “Oe, Kolek nena hengeron laka! I kou lape ur hinolo pele hel te hune pe te lis ule lo.”

<sup>34</sup> Ol pe Iakop tachach hule nena hengeron pe heron heke hengeron nenge tanginga ana ia pe tangia tuna pe kila ia ana lete ke etue halang. <sup>35</sup> Pe tutuna nemur nenge tatamanna pe heheina te teke te la ke te he maluche letena pe lemene ero. Pe hele, “A he maluche letek ero. Lape e tangtang ia tuk ke la het nga etue nenge e nanasia i langa polo. Ke pomalam temene tang manmana ia i.”

<sup>36</sup> Nga etue neu Mitien mur te lohohot nge Ekipto pe Potipa olia Iosep lange iri. Potipa i Parao nena non soke ia pe i non nenge nauele hana nenge te nauelele ne Parao nena pele.

## 38

### *Ne Iuta Pe He Tamar*

<sup>1</sup> Nga etue neu Iuta hile titina mur pe sio la nga kileng nenge Atulam ke la tu luluch nge non e nge ene Hira.

<sup>2</sup> Pe non e nga lamau pule ene laka ne Sua. Ana non nena nge Kanan. Iuta esia ne Sua tuna hei ngana pe mutena taua i ke leia pe ma luluch nge i; <sup>3</sup> Iok ana hei sana ke hoe tuna tamane ngana e pe hetue ke ene Er. <sup>4</sup> Iok sana mule ke hoe tuna tamane ngana e pe hetue ke ene Onan. <sup>5</sup> Iok hoe tuna tamane ngana e pule pe hetue ke ene Sela. Ana hei hoe tuna Sela nga kileng nenge Kesip.

<sup>6</sup> Iuta tuna tengene ana laka Er. Pe nga hoena Iuta heleia i lange hei e nge ene Tamar. <sup>7</sup> Pe Er nena poinga poreke toto nga Non Soke matana, pomalam Non Soke hemete i.

<sup>8</sup> Ol pe Iuta hele lange Onan ke teke, “Tim nenge soke mete lo pe tuna ero. Pomalam ta nanasia rera hotonga ke o maluluch nge tim nena metenga hatal, ke hoe tim tutuna mur hel nge iong.” <sup>9</sup> Pe Onan lemene ero nge poia hei neu ke sana iange eteia ke hei neu tutuna mur, i tutuna mur ia ero. Ke nga etue nenge ma luluch nge hei neu, poia ana ech ke pararai sio mana nge hot ke poi hote tina nenge mete tutuna mur ero. <sup>10</sup> Pe poinga nenge poia neu pengpeng nga Non Soke matana ero, pomalam Non Soke hemete i ke mete pule.

<sup>11</sup> Ol pe Iuta hele lange nette Tamar ke teke, “Iong em mete lo pe tuk Sela i palaungana ero kura. I palaungana ol laka leia iong ol. Pe o la mule ke o tu nga temem na pele mukam.” Iuta hele ke mau iange letena tuanin ke teke, “Heueu, Sela lape mete pule ke mange titina mur.” Pomalam Tamar la ke tu mule nga temene na pele.

<sup>12</sup> Iok hesinga halang la lo pe Iuta nehei mete. Iuta nehei i ne Shua tuna heingana ia. Pe Iuta letena ia nehei ke kila ia ana lete. Ke het pe i pe neingana Hira nenge nena nge Atulam, te lohaka ke te lange Timna ke la nau tote hana nenge te ut susue nena sipsip mur pulpulria.

<sup>13</sup> Ol pe mele la ke hele lange Tamar ke teke, “Lemte pau kou lala nge Timna ke ut susue nena sipsip mur pulpulria.” <sup>14</sup> Ol pe Tamar poi sue pakar mur reria hengeron pe ruch hele palpanna nga malenga sachana e pe la ke are nga kue matana nenge lange Enaim. Ana kileng tu nga kue nenge lala nge Timna. Iange Tamar eteia ke Sela i palaungana lo pe te hepengia aria leinga ero kura.

<sup>15</sup> Pe nga etue nenge Iuta i ole ke la, esia ana hei nge ruch hele ramana ana malenga sachana pe teke ma hei salaunga kina e. <sup>16</sup> Ol pe i lange i nga kue ilina pe hele lange i ke teke, “O i at ke e ma luluch nge iong.” Pe Iuta eteia ero nge hei neu i nette ia.

Pe ana hei hele, “E ma luluch nge iong pe lape o tunge lek utar?”

<sup>17</sup> Pe Iuta hele, “Iau lek meme mur halang pe lape e tunge lem lomele ngana e.”

Pe ana hei hele, “Iok o tunge lem ute at nge iau ke e rahite ke heilang ia helenga kerkereng ngana nem. Pe nga etue nenge o tunge lek meme lomele ngana nem at, lape e tung mule lem ure nem lange iong.”

<sup>18</sup> Pe Iuta hele, “Ke lape e tunge utar lange iong ke heilang ia helenga kerkereng ngana nei?”

Pe ana hei hele, “O tunge tele lem tongtong pe am nananga nenge em ma haka ia luluch nga ana rur at mukam.” Iok Iuta tunge ure nemur lange hei neu pe ma luluch nge i pe poia i ke sana. <sup>19</sup> Ke het pe Tamar la mule pe poi sue malenga sachana nenge ruch ele ramana ia pe heron heke mule pakar mur reria hengeron.

<sup>20</sup> Pe nga hoena Iuta tunge meme lomele ngana lange nei ngana non Atulam neu, ke laia nge hei neu pe mene mule Iuta ana nananga pe nena kula. Pe ero, non la pe hei neu i ero. <sup>21</sup> Ol pe non neu onteia hana nenge te tutu nga lamau ke teke, “A nau hei salaunga kina nenge arare nga kule ilina nge Enaim, la ke merei?”

Pe hana nemur te hele ke te teke, “Hei salaunga kina e tu nga lamai ero.”

<sup>22</sup> Ol pe non neu la mule nge Iuta pe hele ke teke, “E la pe hei nei i ero i. Pe hana nemur nga lamau te hele ke te teke, ‘Hei salaunga kina e tunga lamai ero.’ ”

<sup>23</sup> Ol pe Iuta hele, “Ta hele ero ol. La rahite ure pa nemur lo la. Pe ta tango rere mule i ero ol iange lape hehei pe hana te melmel lilia ita. Iau e nanasia lek helenga kerkereng ngana ke e hekule meme lomele ngana lange i pe o la pe i ero.”

<sup>24</sup> Iok teio mol la ke ulo pe mele hele lange Iuta ke teke, “Lemte Tamar tu teu nga salaunga ana poinga ke heueu nei sana lo.”



Pe Iuta hele ke kerkereng toto ke teke, “A mene hote i lange hot pe a mak heke i nga oan ke mete.”

<sup>25</sup> Iok te mene hote i ke lala kura pe kulosia mele ke laia ure nemur nenge nette Iuta tunge lange i pe na helenga nenge hele ke teke, “Iau sak nge non nenge nena ure nemur.” Pe hele pule ke teke, “O nau urume ke nek. Itei nenge ene ma haka nga nananga nei pe nena tongtong nei mai?”

<sup>26</sup> Pe Iuta nau urume ke i nena ure mur ia pe hele, “Hei nei poia poinga poreke ngana e ero. Iau sipok e poia poinga poreke ngana iange e heleia i lange tuk Sela ero.” Pe Iuta ma luluch mule nge hei neu ero ol.

<sup>27</sup> Iok nga etue nenge Tamar ana etue at nenge hoho ia, mamau tata-manna nai te ma nga letena. <sup>28</sup> Pe nga etue nenge hoho, tuna e penna lohot tala pe hei nenge halaua i kale ana malenga sachana sune nge remenmen pe hele ke teke, “Nenge nei lohot tala.” <sup>29</sup> Pe nga etue nenge mamau neu tak teu mule penna la, tina hemuka hot. Pe hei neu hele, “Iong mam o tale chach hot ke merei mam?” Pomalam te hetue i ke ene Peres. <sup>30</sup> Ke het pe tina nenge te kale penna ana malenga sachana sune nge remenmen lohot pe te hetue ke ene Sera.

## 39

### *Iosep Ume Nga Potipa Nena Pele*

<sup>1</sup> Iok Ismael mur te mene Iosep ke te sio lange Ekipto pe Potipa ol hote Iosep lange iri. Ne Potipa nena nge Ekipto pe i ne Parao nena non soke ia pe nauele hana nenge te nauelele ne Parao.

<sup>2</sup> Iosep ana soke laka ne Potipa nenge nena nge Ekipto pe tu luluch nge i nga nena pele. Pe nena ume lochloch ngana nenge umeia nga pele neu lohot ke urana toto iange Non Soke halaulaua i. <sup>3</sup> Pe ana soke naue ure lochloch ngana nge urana, eteia ke Non Soke tu luluch nge Iosep pomalam ure lochloch ngana nenge poia lohot ke urana mana.

<sup>4</sup> Nenge neu poia Potipa ke iech toto nge Iosep pomalam talue i ke nauele hana nenge te umume nga nena pele pe nauele nena ure lochloch ngana hel pule. <sup>5</sup> Nga etue nenge Potipa talue Iosep ke nauele hana nenge te umume pe nena urelu mur, Non Soke poi ke urana toto lange Potipa. Ke ure lochloch ngana nga nena pele song ke nek pe ana ngaunga nga ume pe nena huros mur te lohot ke iri halang toto. <sup>6</sup> Ke pomalam Potipa hile ume lochloch la nga Iosep penna ke nauele ure lochloch pe letena ia ute e ero ol. Letena tu mana laka nga ngaunga nenge ngaua.

Pe Iosep singina lohot ke kerkereng pe nakuna urana toto. <sup>7</sup> Pe mala ero mana pe Potipa nehei memeleia i pe hele lange i ke teke, “O iat ke o ma luluch nge iau!”

<sup>8</sup> Pe Iosep lemene ero pe hele lange ana non soke nehei ke teke, “O nau at! Ak soke letena here iau pe tunge ure lochloch ngana nga pele nei at nge iau ke e nauele. Pe i letena ia ute e ero ol iange letena here iau. <sup>9</sup> Nga pele nei letetena mele e nge i palaungana nge iau ero. Iau pe ak soke emem lala elle mana pe heo hele ute e nge iau ero. Pe I hele ia poinga nenge pomam at nge iau ero iange nehei laka iong. Poinga nem poreke toto iam pe lemek ero nge e poia iange lape e poia poinga poreke ngana nga NeHalang matana.” <sup>10</sup> Nga etue lochloch hei neu ollekleke Iosep pe Iosep lemene ero toto nge ma luluch nge i pe lemene ero toto nge tu luluch mana nge i pule.

<sup>11</sup> Nga etuene e Iosep teu langa pele neu letena ke popoia ana ume pe hekuleileinga ana non e nge tu ero. <sup>12</sup> Ol pe hei neu rahite i nga nena hengeron sase ngana pe hele, “O iat ke ita nai ta ma!” Pe ero. Iosep hakarung hot nga nena hengeron sase ngana neu pe song hot nga pele neu.

<sup>13</sup> Iok laol, Iosep ua hot nga pele neu ke la lo pe hei neu rahat mene nena hengeron ol. <sup>14</sup> Ol pe iua nena

hekuleileinga ana hana mur nenge te umume nga pele neu pe hele lange iri ke teke, “A iat ke a nau nga ure nei! Ek mene teua non Hipru tana nei at nge ita ke hemeia ita! Ana non teu at lamai ke teke ma luluch nge iau pe e alangak hot ke soke toto. <sup>15</sup> Pe nga etue nenge longe iau nge e alngak haka ke soke toto, hile sue nena hengeron nga ilik pe song hot nga pele.”

<sup>16</sup> Pe hei neu talue Iosep nena hengeron nga ilina ke la ene at ke lohohot nga pele. <sup>17</sup> Ol pe nana hote lange ene ke teke, “Hekuleileinga ana non Hipru tana nenge o mene teua i at nga rera pele nei, at nge iau ke teke hemeia iau. <sup>18</sup> Pe ero. Nga etue nenge e alngak haka ke soke toto, hile sue nena hengeron sase ngana nga ilik pe song hot nga pele.”

<sup>19</sup> Iosep ana soke letena inin toto nga etue nenge longe nehei nge nana lange i ke teke, “Ke lem hekuleileinga ana non nem poia iau ke pomai koi.” <sup>20</sup> Ol pe Iosep ana soke hele lange palinga hel ana hana mur te mene Iosep pe te tal teua i nga tuele au ngana. Tuele au ngana neu naungala ana non nena hana mur te ma teueu ia.

Pe nga etue nenge Iosep tu nga tuele au ngana, <sup>21</sup> Non Soke tu luluch nge I pe poi ke nek lange i. Ke pomalam poia non nenge nauelele tuele au ngana neu ke mutena taua Iosep <sup>22</sup> pe poia Iosep ke nauele hana lochloch nenge te tu nga tuele au ngana. Pe pule talue i ke nauele ume lochloch ngana nenge te popoia nga lamau. <sup>23</sup> Pe Non Soke tu luluch nge Iosep pe poia nena ume mur ke te lohohot ke urana mana. Pomalam non nenge nauelele tuele au ngana neu letena ia ute e ero ol, iange letena here Iosep nga nena ume nemur nenge popoia.

## 40

### *Iosep Hemallaha Hote Hana Nai Te Maoperia Ngaria*

<sup>1</sup> Iok mala pol lo pe non nenge nauelele naunga-ala ana non ana

uain pe nenge makmak ana peret te poia poinga e nge aria soke naungala nenge Ekipto neu lemene ero toto ia. <sup>2</sup> Ke Parao letena inin taua nena hana papalauna nai nei; Non soke nenge nauelele ana uain pe non soke nenge nauelele hana nenge te makmak peret. <sup>3</sup> Ol pe tal teua iri la nga tuele au ngana, nga pele nenge palinga hel ana hana mur aria soke. Pe Iosep tu teu nga tuele au ngana neu pule. <sup>4</sup> Iri nai tetu ke mala pol nga tuele au ngana.

Pe palinga hel ana hana mur aria soke neu hele lange Iosep ke nauele iri. <sup>5</sup> Pe nga miliko e iri nai ape ke te maoperia nga etue nenge tetu nga tuele au ngana. E maopene ngana luna altoto nga e maopene ngana.

<sup>6</sup> Pe nga uach Iosep lange iri pe naue iri nai nge nakuria unun mana. <sup>7</sup> Ol pe onteia Parao nena hana papalaungana nai nenge te tu luluch nge i nga ana soke nena pele ke teke, “Pomerei toto nenge nakumo unun mana mam?”

<sup>8</sup> Pe iri nai te tuacholia ke te teke, “Imem nai ape mo maopemem pe mele e nge hemallaha hote luria at nge imem ero.”

Ol pe Iosep hele lange iri ke teke, “NeHalang i toro mana hemallaha hotote ta maopera ngara mur luria. A heleia a maopemo ngamo nemur at nge iau.”

<sup>9</sup> Ke non soke nenge nauelele uain nene maopene ngana lange Iosep pe nana ke teke, “Iau e maopek ke e naue uain tana e nge mes nga matak, <sup>10</sup> pe uain tana neu penna iri mol. Nga etue nenge ina mur te lohohot te rora pe te hei ke nganangana mera sapele. <sup>11</sup> Pe ne Parao ana eulinga koi nga perik pe e mene uain ngangana nemur pe e pip teua eina la nga Parao ana eulinga pe e tunge lange i.”

<sup>12</sup> Pe Iosep hele lange i ke teke, O maopem ngam nem luna mai koi, “Uain penna mol nem heilangia etue iri mol. <sup>13</sup> Etue mol het pe ne Parao lape mene hote iong pe tal teu mule iong nga mulim. Pe lape o tunge

uain ana eulinga lala nge Parao ke pomanga o popoia nga tele ngana. Lange i nena non iong nike nenge o nauelele ana uain. <sup>14</sup> Pe nenge teke ure lochloch ngana te urana mana nge iong, letem metene iau. Letem poreke ia iau pe o hele lange ne Parao ke mene hote iau nga tuele au ngana nei. <sup>15</sup> Iau hana te kemeia iau pe te ech hote iau nga Hipru mur reria ich pe te mene iau at lamai. Pe e poia poinga poreke ngana e ero pe te tal teu mene iau nga tuele au ngana nei.”

<sup>16</sup> Iok Iosep henin hote non nenge nauelele uain maopene ngana luna pe non soke nenge nauelele peret mak ngana, longe nge urana mana. Ol pe hele lange Iosep ke teke, “Iau pule e maopek ke mai koi: Peret ana chasang iri mol ma haka nga palpaluk. <sup>17</sup> Chasang nenga lut mutaia Parao ana ngaunga makinga kuena ngana mur nenge mutena tautaua. Pe ngie mur te at ke te ngau ngau ngaunga nemur.”

<sup>18</sup> Ol pe Iosep hele, “O maopem ngam nem luna mai koi. Chasang mol nem heilangia etue iri mol. <sup>19</sup> Etue iri mol het pe lape Parao nena palingahel ana hana mur te chotoa kalim pe te heon heke singim nga ae tana e. Pe ngie mur lape te at ke te ngau taua miram ke het.”

<sup>20</sup> Iok nga etue mol ngana Parao poia ngaunga matana e ke letena metene etue nenge tana hoe i ia. Pe iua nena hana papalauna mur at ke te ngau. Pe mene non soke nenge nauelele uain pe non soke nenge nauelele peret mak ngana pe hemesia iri nga nena hana papalauna nemur mataria: <sup>21</sup> Pe tal teu mule non soke nenge nauelele uain nga munna ke tung mulmule uain ana eulinga lala nge I. <sup>22</sup> Pe hele lange palinghel ana hana mur ke te heon heke non nenge nauelele peret ana makinga koluna nga ae tana e, ke pomanga Iosep hele ngana ia nenge henin hote maopene ngana luna lala nge i.

<sup>23</sup> Pe non soke nenge nauelele ne Parao ana uain neu, letena metene

Iosep ero ol; letena lilil ele tote i.

## 41

### *Ne Parao Maopene Ngana*

<sup>1</sup> Iok, hesinga nai la ke ulo pe Parao maopene ke: Mesmes nga ech ilina nge Nael <sup>2</sup> pe kolok iri rahteale nai nge te lum toto pe nakuria urana toto, te lohaka nga ech neu ke la te ngaungau heilil nga ech ilina. <sup>3</sup> Ke het pe kolok rahteale nai mule nge kiria he mana pe nakuria poreke toto, te lohaka nga ech neu pe la temes luluch nga nenge te lohota tala nga ech ilina. <sup>4</sup> Ol pe kolok nenge kiria he pe nakuria poreke neu, te ton rorolia kolok rahteale nai nenge te lum pe nakuria urana neu. Ol pe Parao memete haka sapele.

<sup>5</sup> Iok mamani mule pe maopene henai ngana ke mai: Uit nganangana iri rahteale nai nge te lum toto pe nakuria urana, te heon nga uit tana elle. <sup>6</sup> Ke het pe uit nganangana rahteale nai te heon hot pule. Nakuria pomanga tuttula milang ngana nenga ich sana lomona hue iri ke te lum ero pe nakuria poreke mana. <sup>7</sup> Pe uit nganangana nenge te lum ero neu, te ton taua rahteale nai nenge te lum pe nakuria urana neu ke te het. Ol pe Parao memete haka pe eteia ke, “Iau nge e maopek kai?”

<sup>8</sup> Uach sio ol pe Parao letena meena toto. Ol pe hekulo hana nenge te popoi ure paluna pe nenge leteria matana toto nge Ekipto aria ke te lange i, pe heleia maopene ngana neu lange iri. Pe e nge iri henin hote luna lange i ero.

<sup>9</sup> Ol pe non soke nenge nauelele Parao ana uain hele lange Parao ke teke, “Ak soke, ure nei helete metene iau nga lek poinga e nge pengpeng ero. <sup>10</sup> Nga etue nenge letem inin taua imem hekuleileinga ana hana mur, o tal teua non soke nenga peret mak ngana pe iau nga tuele au ngana - nga non soke nenge i mukmukia palingahel ana hana mur nena pele. <sup>11</sup> Pe nga miliko e imem nai ape ke mo

maopemem. Iau e maopek ngak luna altoto nga i maopene ngana. <sup>12</sup> Pe kol Hipru lomele ngana e tu lamau pule. Ana non umume nge non nenge i mukmuka ia palinga hel ana hana mur. Mo nene mo maopemem ngamem lange i pe hele hot pengpeng ia luna mur atat nge imem. <sup>13</sup> Pe ure mur te lohote ke pengpeng toto ke pomanga hele nganaia at nge imem: Ke iau e mene mule mulik nga lek ume pe non neu te heon heke i.”

<sup>14</sup> Ol pe Parao hekulo Iosep ana pe te mene hote i ke ueiuei mana nga tuele au ngana ke lak sue i pe hetaua nena hengeron. Ke het pe la ke mes nga ne Parao matana.

<sup>15</sup> Pe Parao hele lange Iosep ke teke, “Iau e maopek pe mele e nge henin hote luna at nge iau ero. Pe e longe nge te heleia iong. Nga etue nenge mele nene maopene ngana lange iong, o hele hote luna lange i.”

<sup>16</sup> Pe Iosep hele lange Parao ke teke, “Non soke, iong lememe toto ke o teke o eteia o maopem ngam luna mur. Pe NeHalang isipona lape hemallaha hote lange iong. Iau nakuk nge e poia ume nem ero.”

<sup>17</sup> Ol pe Parao nene maopene ngana lange Iosep ke teke, “Iau e mesmes nga ech ilina nge Nael, <sup>18</sup> pe kolok iri rahtele nai nge te lum toto pe nakuria urana toto, te lohaka nga ech neu ke la te ngaungau heilil nga ech ilina. <sup>19</sup> Ke het pe kolok rahtele nai mule nge kiria he mana pe nakuria poreke toto, te lohaka pule. Iau e kokol toto kolok hel nge pomau nga ich lochloch ngana nge Ekipto. <sup>20</sup> Ol pe kolok nenge kiria he pe nakuria poreke neu, te ton rorolia kolok rahtele nai nenge te lum pe nakuria urana - nenge te lohote tala. <sup>21</sup> Iok te ngau taua iri ke het pe nakuria pomalaka nga te ngaua ute e ero. Nakuria poreke ulu ngana neu, ngana kou tu mana kura. Ol pe e memete haka sapele.

<sup>22</sup> “Iok, e mamani mule pe e maopek ke e naue uit nganangana iri rahtele nai nge te lum toto pe

nakuria urana nge te heon nga uit tana elle. <sup>23</sup> Ke het pe uit nganangana rahtele nai nge te lum ero pe nakuria poreke, te heon hot pule pe nakuria pomalaka nga tuttula milang ngana nenga ich sana lomona hue iri. <sup>24</sup> Pe uit nganangana nenge te lum ero neu, te ton taua rahtele nai nenge te lum pe nakuria urana neu ke te het. E nene e maopek ngak nei lange hana nenge te popoi ure paluna pe e nge iri henin hote luna at nge iau ero.”

<sup>25</sup> Ol pe Iosep hele lange Parao ke teke, “Non soke, o maopem ngam iri nai pe luria elle mana. NeHalang teke hemallaha hote utar nenge teke popoia lange iong. <sup>26</sup> Kolok rahtele nai nenge nakuria urana nem, luria laka hesinga iri rahtele nai. Pe uit nganangana nenge nakuria urana nem, luria laka hesinga iri rahtele nai. O maopem ngam nem luria elle mana. <sup>27</sup> Pe kolok rahtele nai nenge kiria he pe nakuria poreke nenge te lohote nge hoena nem, luria laka hesinga iri rahtele nai. Pe uit nganangana rahtele nai nenge te lum ero pe nakuria poreke pe te lohote nga hoena nem, nakuria pomanga tuttula milang ngana nenga ich sana lomona hue iri. Pe luria laka uringa nge lape lohote pe lape tu ke hesinga iri rahtele nai.

<sup>28</sup> “Non soke, pomanga e hele ngak ia lange iong lo: NeHalang teke hemallaha hote utar nenge teke popoia ke lohote lange iong. <sup>29</sup> Hesinga iri rahtele nai lape ngaunga kila parai nga ich lochloch ngana nge Ekipto. <sup>30</sup> Pe iuringa ana hesinga iri rahtele nai lape te nanas. Pe ngaunga kila parai ngana nge Ekipto lape het pe uringa song ke purpure ich lochloch. <sup>31</sup> Hehei pe hana lape leteria metene hesinga nemur nenge ngaunga kila parai ia ero ol, iange uringa nenge lape lohote nem poreke toto. <sup>32</sup> Ke NeHalang I sipona tunge o maopem ngam nem lange iong. Pe tunge ke ana lala iri nai iange teke poia ure nem ke lohote ke manmanna.



<sup>33</sup> “Ke pomalam non soke, heueu nei o henonou hote non e nge letena matana toto pe letena tuanin ngana urana toto ke nauele tuele kina nenge Ekipto. <sup>34</sup> Nga hesinga rahteale nai nenge ngaunga halang, hehei pe hana lape te lulu pe te takirau ke ngaunga huna iri lime. Pe o henonou hote hana papalauna hel pule ke te mene ngaunga huna ellechle nge hehei pe hana lochloch. <sup>35</sup> Iri lape te longo la mana nge iong ke te loloch ia ngaunga mur, nga hesinga urana ngana mur nenge atat pe te takirau teua nga ngaunga ana pele mur, nga tuele tana mur pe te nauele iri. <sup>36</sup> Iange naunga nem lape nauele hehei pe hana lochloch nga tuele kina nenge Ekipto, ke te uri ero nga uringa ana etue, nenge lape tu ke hesinga iri rahteale nai.”

#### *Parao Talue Iosep Ke Nauele Kileng Nenge Ekipto*

<sup>37</sup> Ne Parao pe nena hana papalauna mur te longe Iosep nena helenga pe leteria urana ia. <sup>38</sup> Ol pe Parao hele lange iri ke teke, “NeHalang opene tu luluch nge Iosep pe lape ta mene itei ol ke nauele ume nei?”

<sup>39</sup> Ol pe hele lange Iosep ke teke, “Mele pele nge letetena matana ngana pe etei ngana nga ure nemur pomange iong ero. Iange NeHalang isipona henonoua ure nemur lange iong ke iong toro mana o etei tote. <sup>40</sup> Pomalam lape e talue iong ke iong muka nge hana papalauna mur nga lek pele pe hehei pe hana lochloch lape te longo la mana nge iong. Iau naunga-ala ana non pe iau toro mana iau palaungana nge iong.”

<sup>41</sup> Iok laol, ne Parao hele lange Iosep ke teke, “Lape e talue iong ke o nauele tuele kina mur lochloch nge Ekipto.” <sup>42</sup> Ol pe Parao poi hote naunga-ala ana hana mur reria uto nga penna kukana pe poi teua nga Iosep penna kukana. Pe heronia Iosep nga hengeron urana ngana

mur pe heon heke nananga chalemlem ngana nga kanna. <sup>43</sup> Pe tunge nena kares nei ngana nenge oriong mur te tak rungrunge ke Iosep song rara ia ke pomanga i naunga-ala ana non nei ngana ia. Pe hana nenge te umume nge Parao te song ke iri muka pe te alngaria ke te teke, “A allele nga kue, non soke koi atat.” Nga poinga nei Parao poia Iosep ke i palaungana toto pe nauele tuele kina lochloch ngana nge Ekipto.

<sup>44</sup> Ol pe Parao hele lange Iosep ke teke, “Iau Parao pe lek helenga koi. Mele pele nga tuele kina nenge Ekipto poi pulut mene ute nga lemene ngana ero. Te longo mana lange iong.” <sup>45</sup> Pe Parao tunge Iosep ene nenge Sapenat-Panea pe tunge heie pule lange Iosep. Hei neu ene laka Asenat pe temene ene laka Potipera. Potipera i tunginga ana non ia nga tuele tana nenge Heliopolis. Iok laol, Iosep i ke nau rara nga kileng lochloch nga tuele kina mur nge Ekipto.

<sup>46</sup> Parao i naunga-ala ana non nge Ekipto. Pe Iosep ana hesinga iri ana non kina pe analoch nga etue nenge teu ke talune ume nenge Parao tunge lange i. Iok Parao tu nga nena pele pe Iosep song ke la nau toto nga kileng lochloch ngana nge Ekipto. <sup>47</sup> Pe nga Hesinga iri rahteale nai, ngaunga te haka nge Ekipto ke urana mana pe nganagaria halang toto. <sup>48</sup> Ke nga hesinga nemur, Iosep hele lange ume ana hana mur ke te takiraua ngaunga nge halang toto nga ume mur, nga tuele tana elle pe elle nge Ekipto pe te tal teua iri la nga ngaunga ana pele mur nga tuele tana nemur. <sup>49</sup> Pe Iosep lemene ero ol nge sis ele ngaunga nemur nenge te takirau teua iri neu, iange te lohote ke iri halang nge halang toto ke pomanga peipei nga ruach ilina.

<sup>50</sup> Iok hesinga nemur nenge uringa ana te lohote ero kura pe Iosep nehei Asenat hoho ke tutuna mur nai nge iri tatamanna. Asenat i Potipera tuna ia pe Potipera i tunginga ana non ia



nga tuele tana nenge Heliopolis. <sup>51</sup> Pe Iosep hele, “NeHalang poia iau ke letek lilil ele alok mur pe ak melmelenga mur.” Pomalam hetue tuna tengene ana ke ene Manase. <sup>52</sup> Pe Iosep hele pule ke teke, “NeHalang poia iau ke e hoe tutuk mur nga kileng nenge e takisia ak melmelenga ia.” Pomalam hetue tuna neingana ke ene Ephraim.

<sup>53</sup> Iok laol hesinga rahtele nai nenge ngaunga halang ia het, <sup>54</sup> pe hesinga rahtele nai nenge uringa ana lohohot sapele ke pomanga Iosep hele ngana. Uringa lohohot nga tuele tana mur hel pe nga kileng lochloch ngana nge Ekipto ngaunga halang kura. <sup>55</sup> Pe nga etue nenge uringa lohohot nga kileng lochloch ngana nge Ekipto, hehei pe hana te tang lange ne Parao nga ngaunga. Pe Parao hele lange hehei pe hana lochloch ngana nge Ekipto ke teke, “A la ke a naue Iosep pe a nanas mene nena helenga.”

<sup>56</sup> Iok, nga etue nenge uringa lohohot ke poreke toto nga kileng lochloch ngana nge Ekipto, Iosep loe pele mur nenge te talteu ngaunga ia pe hehei pe hana nenge Ekipto te at ke te ol ngaunga. <sup>57</sup> Pe hehei pe hana hel pule nga ich lochloch te lange Ekipto ke la te ol ngaunga nge Iosep, iange uringa neu lohohot ke poreke toto nga kileng lochloch ngana nga ich.

## 42

### *Iosep Titina Mur Tela Nge Ekipto*

<sup>1</sup> Iok, Iakop longe nge te teke ngaunga halang kou nge Ekipto. Ol pe hele lange tutuna mur ke teke, “Pomere nenge a are manmana pe a nau tele hel manmana nge imo ke pomam?” <sup>2</sup> E longe nge te teke ngaunga halang kou nge Ekipto. A sio la ke aol ara. Ta uri ke ta mete mana heueu i.

<sup>3</sup> Ol pe Iosep titina mur nge iri analoch te sio ke la te ol aria ngaunga nge Ekipto. <sup>4</sup> Pe Pensamin i Iosep tina toto pe Iakop kulosia i ke la luluch nge titina mur ero iange matau nge lape ute lohohot nge i. <sup>5</sup> Pe uringa lohohot nga

ich nenge Kenan pule. Ke nga etue nenge hana tela ke teol ngaunga nge Ekipto, Iakop tutuna mur tela luluch nge iri.

<sup>6</sup> Nga etue neu Iosep lohohot ke i non soke nenge nauele ich nenge Ekipto pe i non nenge hehei pe hana teolol ngaunga nge i. Pe nga etue nenge Iosep titina mur te sauhohot te tualou sio pe te au sio tote iri la nga ich. <sup>7</sup> Pe nga etue nenge Iosep naue titina mur, es urume iri pe hele salia iri ke pomanga eteia iri ero pe hele ke teke, “A at la ngai?”

Pe iri te hele, “Mo at nga ich nenge Kenan ke mo ol ngaunga.”

<sup>8</sup> Iosep nau urume titina mur pe titina mur te nau urume i ero. <sup>9</sup> Ol pe letena metene maopene ngana mur nenge esia titina mur nge te tualou sio lange i pe hele ke teke, “A pallaka iam! Lape a i at ke a nauling nga lememe kileng ke a nau urume makuk ngana mur iam.”

<sup>10</sup> Pe iri te hele, “Ero non soke. Iong lem ume ana hana mur imem. Mo at ke mo ol mana ngaunga. <sup>11</sup> Imem mo hele ke manmana pe mo pallaka ero. Non elle mana hoe imem pe mo at ke mo nauling nga kileng nei ero koi.”

<sup>12</sup> Pe Iosep hele, “Ero! Imo a at ke a nauling ia lememe kileng ke a nau urume makuk ngana iam.”

<sup>13</sup> Pe iri te hele, “Non soke, imem analoch pe nai pe titimem mur hel iange non elle mana hoe imem. Ana non kou tu nga ich nenge Kenan pe timem nenge lomele toto ngana kou tu luluch nge i. Pe timem e kou erue lo.”

<sup>14</sup> Pe Iosep hele lange iri ke teke, “E hele lange imo ke ulolo: Imo toloinga ana hana mur laka! <sup>15</sup> Pe nenge teke a hele ke manmana lape e totoi ia imo ke pomai koi. E hele ke kerkere ng toto nga Parao ene ke, nenge teke a mene timo nenge kino at lamai ero, lape ala mule nga lemo kileng ero. <sup>16</sup> A kulosia timo e ke la taua timo nenge kino ke at pe imo lochloch ngana nemur ama teu nga tuele au

ngana mukam. Pe ta nauala lape lemo helenga nem manmanna ma ero. Nenge teke lemo helenga nem manmanna ero, e hele ke kerkereng toto nga Parao ene ke imo toloinga ana hana mur!" <sup>17</sup> Ol pe Iosep tal teua iri nga tuele au ngana pe te tu ke etue mol.

<sup>18</sup> Iok nga etue mol ngana Iosep hekulo titina mur aria pe hele lange iri ke teke, "Iau non nenge e tal haka totote NeHalang pe e nanas tau tote lemene ngana: Nenge teke a nanasia lek helenga lape atu ke a maulul. <sup>19</sup> Pe nenge teke imo hana nenge a hele ke manmanna, a longala hote timo e ke tu nga tuele au ngana mukam pe imo lochloch a takisia ngaunga nenge a olia pe ala mule ia nge lemo kileng ngana mur. Iri kou te uri mana. <sup>20</sup> Pe timo nenge kino nem a mene i at nge iau laka e eteia ke imo a hele ke manmanna, pe lape te hune imo ero." Pe iri leteria urana mana nga Iosep na helenga neu.

<sup>21</sup> Ol pe te hele, "Manmanna toto. Ure meena ngana nei lohot nge ita iange ta poi poreke tira. Ta esia i nge tang atat nge ita ke teke ta halaua i pe ero. Ta longo lange i ero."

<sup>22</sup> Pe Rupen hele, "Ia iau mai e hele ke mere lange imo? E hele ke e teke a poia poinga nem lange kol nem ero. Pe imo a longo taua iau ero. Ke heueu lape ta takisia ara melmelenga ke ta tuacholia eina." <sup>23</sup> Iri te helele nga helenga Hipru pe te teke ma Iosep eteia ero. Iange Iosep hele lala nge iri nga Ekipto mur reria helenga pe non e hulua lala nge iri.

<sup>24</sup> Iosep longe iri nge te hele ke mau pe i hot kel aria pe tang. Ke het pe la mule ke hele luluch nge iri. Pe hele ke na hana mur ke te kele Simeon penna nga titina mur mataria.

<sup>25</sup> Pe Iosep hele ke na hana mur te hemute titina mur reria kole mur nga ngaunga pe te tal teu mule reria umtutuna mur nga iri elle pe elle reria kole mur pe te tunge aria ngaunga nenge kue ana pule. Ke het pe <sup>26</sup> Iosep

titina mur te tal heke reria kole mur nga reria tongki mur pe te i sapele.

<sup>27</sup> Tela pe miliko taua iri nga kileng e pe tema. Pe elle nge iri teke mene hote tongki ana ngaunga pe esia nena umtutuna nge ma nga nena kole hanna. <sup>28</sup> Pe hele lange titina mur ke teke, "Lek umtutuna pai koi at mule. Ngana i ma teu nga lek kole mai."

Te longe ke mau pe te rura toto pe te nau tele hel mana nge iri pe te hele, "NeHalang mai poia ita ke mere mai?"

<sup>29</sup> Nga etue nenge tela ke te lohot mule nge temeria Iakop nga ich nenge Kenan, te heleia ure lochloch ngana nenge lohot nge iri lange i. Pe te hele ke te teke, <sup>30</sup> "Non soke nenge ume nge Parao ke nauale kileng neu, hele salia imem pe poia imem ke pomalaka nga imem toloinga ana hana mur. <sup>31</sup> Pe mo hele lange i ke mo teke, 'Imem mo hele ke manmanna ke imem toloinga ana hana mur ero koi. <sup>32</sup> Imem analoch pe nai pe titimem mur hel iange non elle mana hoe imem. Ana non kou tu nga ich nenge Kenan pe timem nenge lomele toto ngana kou tu luluch nge i. Pe timem e kou erue.'

<sup>33</sup> "Ol pe non soke nenge ume nge ne Parao ke nauale kileng neu hele at nge imem ke teke, 'Nenge teke a hele ke manmanna lape e totoia imo ke pomai koi: A longele timo e ke tu luluch nge iau pe a lochloch ia lemo kileng ngana mur aria ngaunga pe ala. Ngaria kou te uri mana. <sup>34</sup> Pe a mene timo lomele ngana nem at nge iau. Pomalam e eteia ke a hele ke manmanna pe imo toloinga ana hana mur ero. Pe lape e tung mule timo lange imo pe a i rara ke a poia lemo ume mur pe a poi tetele mana nga ich nei ol.'"

<sup>35</sup> Iok te eu hot mulmule ngaunga mur nga reria kole mur pe iri elle pe elle te nau mule reria umtutuna mur nge te mateu mule nga reria kole mur! Pe iri ul temeria te esia ke mau pe te matau toto. <sup>36</sup> Pe temeria Iakop hele lange iri ke teke, "Imo a poia

iau ke tutuk mur iri ero hatalia iau. Iosep kou erue ke la lo pe Simeon koi i ero pullo pe ngana iam a teke a mene Pensamin lala pullo. Pomere nenge ure meena ngana tu hit mene iau mai?”

<sup>37</sup> Ol pe Rupen hele lange temene ke teke, “Letem here iau ke e nauele i pe lape e mene mule i at nge iong. Pe nenge teke e mene Pensamin ke at mule nge iong ero, o hune tutuk mur tatamanna nai nem.”

<sup>38</sup> Pe Iakop hele, “Tuk nei lape sio la luluch nge imo ero; tina kou mete lo pe i toro mana koi tu ol. Iau e tuauna lo pe nenge teke ute hune i nga lemo inga nem, lape a poia letek ke kolkol toto pe e mete sapele.”

## 43

### *Pensamin Koko Nge Titina Mur Ke Te Lange Ekipto*

<sup>1</sup> Pe uringa nenge lohoh nga ich nenge Kenan la ke poreke toto ol. <sup>2</sup> Pe ngaunga nenge te mene nge Ekipto kou te ngau tautaua lo. Pomalam temeria hele lange iri ke teke, “Ala mule nge Ekipto ke a ol mule ara ngaunga hel pule.”

<sup>3</sup> Pe Iuta hele lange temeria ke teke, “Non neu hele at nge imem pengpeng ke teke, ‘Nenge teke a mene timo at ero, lemek ero toto nge e naue nakumo nga lamai.’ <sup>4</sup> Ke pomalam o longala hote timem ke koko nge imem ke mo la ke mo ol ara ngaunga. <sup>5</sup> Pe nenge teke o longele i ero lape mo la ero. Iange non neu hele at nge imem ke ulolo ke teke, ‘Nenge teke a mene timo at ero, lemek ero toto nge e naue nakumo nga lamai.’ ”

<sup>6</sup> Pe Israel hele ke teke, “Heueu nei a poia iau ke letek meena toto. Pomere nenge a hele hote timo lange non nem?”

<sup>7</sup> Pe iri te tuacholia ke te teke, “Iange non neu ontei nich hote imem ke nek toto nge tememem pe titimem mur ke teke, ‘Tememo kau tutu kura mau? Pe timo e pule kau tutu mau?’ Pe imem mo tuachol pengpeng mene nena onteinga mur. Pe mo heteia

letena tuanin ngana ero nga nenge teke, ‘A mene timo ke sio at lamai.’ ”

<sup>8</sup> Ol pe Iuta hele lange temene Israel ke teke, “O longele kol nei ke at luluch nge iau ke imem ul ke mo sio la. Pomalam lape iong pe imem pe tutumem mur pe lemem hehei mur lape ta mete hot nga uringa ana etue nei ero. <sup>9</sup> Iau sipok lape e nauele i; pe letem here iau nge e nauele i ke nek. Pe nenge teke e mene mule i at nge iong ero, lape e kulala mana ak helenga nge iong ol; nge lape o hele menmene iau nga etue lochloch ngana nenge e tu nga ich nei. <sup>10</sup> O nau at, nenge teke o longele kol nei ke mola nike, toinge imem kou mola pe mo at ke he nai lo.”

<sup>11</sup> Ol pe temeria Israel hele lange iri ke teke, “Nenge teke pomam, iok a poi ke pomai koi: A mene ure urana ngana mur hel nenge ta ume hote iri nga ich nenge ta tuia nei, pe a tal teua iri nga lemo kole mur pe a mene la ke pomanga lemo tunginga nenge lange non nem. A mene misou eina pe ure inangana heech ngana nenge te ume hote nga ae eina pe ure nenge ene almon pe ae nganangana nenge ene pistako. <sup>12</sup> Pe a mene ke um tutuna halang pol nga nenge a mene nga tele ngana, pe ala mule ia umtutuna nenge te tal teu leke nga lemo kole mur. <sup>13</sup> Pe a mene timo pule ke imo ul ala ke ueiuei mana nge non nem. <sup>14</sup> Pe lape e hetalaulau ke NeHalang Nenge Kerkereng Toto poia non nem ke letena urana nge imo. Pe poia timo Pensamin ke at luluch mule nge imo. Pe nenge teke ala pe e nau mule imo ero ol, lape tuk pele ero ol. Nem tu mana nga NeHalang penna.”

<sup>15</sup> Iok hana nemur temene reria tunginga mur pe reria umtutuna nge halang pol pe iri ul Pensamin te sio la ke ueiuei mana nge Ekipto pe la te lohoh nge Iosep. <sup>16</sup> Pe nga etue nenge Iosep naue Pensamin nge iri ul, hele lange non nenge nau elele nena pele ke teke, “O mene hana nei la nga lek pele pe o hune huros e ke o makia;

iange lape te ngau luluch nge iau nga sinanga.”

<sup>17</sup> Iok la ol, non neu mene hana nemur ke te la sapele nga Iosep nena pele ke pomanga hele ngana. <sup>18</sup> Te mene iri ke te la nga pele pe te matau iange leteria tuanin ke te teke, “Te mene ita at lamai pe lape te hele ia ita pe te rahite ita pe te poia ita ke ta ume nge non nei. Pe lape te ua toto ia rera tongki mur iange ngana laka nga umtutuna nenge ma teu mule nga rera kole mur, nga tele ngana nenge ta at nem.”

<sup>19</sup> Iok te la ke te mes sio nge Iosep nena non neu nga pele matana pe te hele lange i ke te teke, <sup>20</sup> “Kole, non soke o longo at nge imem mukam. Nga lia mo at ke mo ol ngaunga nga lamai. <sup>21</sup> Pe nga mo la mule ngamem, miliko taua imem pe mo ma lou. Pe mo une lememe kole mur pe mo nau mule lememe umtutuna mur nge te mateu mule nga imem elle pe elle lememe kole mur. Pe umtutuna nemur koi mo mene mule iri at nei. <sup>22</sup> Luluch nga lememe umtutuna hel pule nenge mo ol mule ngaunga ia. Pe mo etei ero, itei toto nenge tal teu mule umtutuna nemur nga lememe kole mur mai?”

<sup>23</sup> Ol pe non neu hele, “Ute pele ero pe a matau ero. Tememo ana Non Soke NeHalang laka tal teu mule umtutuna nemur nga lemo kole mur. Pe umtutuna nenge a ol ngaunga ia e mene iri lo.” Non neu hele ke mau ke het pe la ke mene hote Simion lange iri.

<sup>24</sup> Pe mene teua hana nemur ke te teu la nga Iosep nena pele pe tunge ech ke te lome aperia. Ke het pe la ke hengaua reria tongki mur. <sup>25</sup> Pe hana nemur te longe nge Iosep lape at ke ngau luluch nge iri nga lamau nga sinanga, pomalam te tatalo ele nena tunginga mur.

<sup>26</sup> Iok la ol, Iosep la nga nena pele pe hana nemur te tunge nena tunginga mur, nenge te mene teua la nga pele letena lange i, pe te tualou sio pe te au sio tote iri la nga ich. <sup>27</sup> Pe Iosep onteia iri ke teke, “A urana

mana? Pe tememo nenge a heleia i at nge iau? I kau tutu kura mau?”

<sup>28</sup> Pe iri te tuacholia ke te teke, “Non soke tememem kou maulul kura pe tu ke urana mana.” Pe te tualou sio mumule lala nge i.

<sup>29</sup> Pe Iosep nau rara pe esia tina Pensamin nenge iri nai taria elle pengpeng pe ontei ke teke, “Pe timo nenge kino nenge a heleia i at nge iau kai?” Pe Iosep hele lange Pensamin ke teke, “Kol nem NeHalang letena poreke ia iong.” <sup>30</sup> Iosep letena poreke toto ia tina sune neu pe teke tang. Pomalam ua titina mur aria ke ueiuei mana pe teu la nga nena pele ana tokola e pule ke tang.

<sup>31</sup> Ke het pe lome matana pe i hot la mule nge iri pe hele, “A ich ia ngaunga ol.”

<sup>32</sup> Pe te ich ia ke Iosep ana altoto nga hatanga e pe iri aria altoto nga hatanga e pe Ekipto mur nenge te ngau luluch nge i, aria altoto nga hatanga e. Iange heungana toto nge Ekipto mur te ngau luluch nge Hipru mur. <sup>33</sup> Pe te heta kile Iosep titina mur ke te are nga hatanga ke te nana-sia aria hesinga mur. Talun nge tiria nenge soke ke la nga nenge kino. Pe Iosep titina mur te esia iri ke te kila ke pomau pe te rura pe nau tele hel mana nge iri. <sup>34</sup> Iok, te ichia aria ngaunga nga hatanga nenge Iosep ke purpur mene iri pe te ichia Pensamin ana ke halang toto ke purpure hana lime nge te ngaua. Iok la ol te ngau pe te in pe te iech mana luluch nge Iosep.

## 44

### *Iosep Ana Eulinga Sinaha Ngana Erue*

<sup>1</sup> Iok, Iosep hele lange nena non nenge umume nga nena pele ke teke, “O hemuta heke hana nemur reria kole mur nga ngaunga ke muta. Pe o tal teu mule iri elle pe elle reria umtutuna mur nga reria kole hanna. <sup>2</sup> Pe o tal teua ak heulinga sinaha ngana nga kol lomele neu nena kole hanna luluch nga nena umtutuna nenge ol



ngaunga ia.” Pe non neu poia ke pomanga Iosep hele ngana.

<sup>3</sup> Iok, nga uach uruna Iosep nena hana mur te kulosia titina mur ke tela luluch nga reria tongki mur. <sup>4</sup> Iok te hile tuele tana ke la nga tau ero kura pe Iosep kulosia nena non nenge nau elele nena pele ke teke, “O nana-sia hana nemur ke ueiuei mana. O la ke o apen teu nge iri pe o hele lange iri ke pomai, ‘Pomerei nenge mo poi ke urana lange imo pe a poia poinga poreke ngana nei at nge imem?’ <sup>5</sup> Ak soke ana eulinga nenge inin ech ia laka a mene nem. Pe pule eulinga nem hemallaha hotote ure talkomkome ngana mur lala nge i. Lemo poinga nem poreke toto.’ ”

<sup>6</sup> Nga etue nenge Iosep nena non neu saol teu nge iri, henanas mule helenga neu lange iri. <sup>7</sup> Pe iri te hele ke te teke, “Non soke pomerei nenge o poia helenga nenge pomam at nge imem? Imem mo matau toto nge mo poia poinga nem iam! <sup>8</sup> O nau at! Nga lia mo at ke mo ol ngaunga pe nga etue nenge mo la mule nge Kenan mo hottaua umtutuna mur nge te mateu nga lememe kole mur. Pe umtutuna nemur mo mene mule iri at lo. Pe pomere nenge o teke mo kemeia ure chalemlem pe koikoi ngana nenge pomanga lauta nga am soke nena pele mam? <sup>9</sup> Non soke nenge teke emem e nge imem mene, lape a hune i ke mete pe imem lochloch lape mo ume mana nge iong ol.”

<sup>10</sup> Pe non neu hele, “Urana nga lem helenga nem. Pe itei nenge e hottaua nge mene eulinga nem, i mana lape lohot ke lek hekuleileinga ana non ia pe imo lochloch ngana ero.”

<sup>11</sup> Ueiuei mana pe iri elle pe elle te tal sue reria kole mur nga ich pe te ulele iri. <sup>12</sup> Pe Iosep nena non neu chanrara nga kole lochloch. Talune nge tiria nenge soke ke la nga nenge kino. Pe hottaua eulinga neu nga Pensamin nena kole. <sup>13</sup> Pe Pensamin titina mur te esia ke mau pe te chach ule reria hengeron mur iange leteria poreke ia tiria. Pe te tal heke mule

reria ure mur nga tongki pe te la mule nge Ekipto.

<sup>14</sup> Te la mule ke te lohot pe Iosep tu nga pele kura. Pe Iuta pe titina mur te teu la pe te tamal sue iri la nga ich nga Iosep matana. <sup>15</sup> Pe Iosep hele lange iri ke teke, “Pomerei nenge a poi ke pomai? Iau nakuk nge e hele hote ure nemur nenge te talkome. A eteia ero kai?”

<sup>16</sup> Pe Iuta hele ke teke, “Non soke lape mo tuacholia lem helenga ke merei? Mo hele ala emem ero ol iange NeHalang hemallaha hote lememe poinga poreke ngana ke ulolo. Pe mele nenge mene am heulinga nem, i toro mana ume nge iong ero. Imem lochloch nei pule.”

<sup>17</sup> Pe Iosep hele, “Iau lape e poi ke pomam ero toto! Mele nenge mene ak heulinga, i toro mana lape tu ke ume nge iau. Pe imo lochloch ngana letemo elle mana pe ala mule nge tememo.”

#### *Iuta Teke Mene Pensamin Munna.*

<sup>18</sup> Ol pe Iuta i lange Iosep pe hele ke teke, “Non soke iong o purpur toto ke mange ne Parao. Letem inin taua iau ero pe o longo at nge iau mukam. <sup>19</sup> Non soke nga lia nenge mo at lamai o onteia imem ke o teke, ‘Tememo kau tutu kura mau? Pe timo e pule kau tutu mau?’ <sup>20</sup> Pe imem mo tuacholia ke mo teke, ‘Oe, tememem kou tutu kura pe i tuauna toto lo. Pe timem loina ngana kou tu pule. Tamem neu hoe iri ke iri nai mana pe tina kou mete lo. Pe tememem mutena tau tote i iange ha nga eteue nenge tuauna toto lo.’

<sup>21</sup> “Ke het pe non soke, o hele at nge imem ke o teke, ‘A mene timo at nge iau ke e nau nge i.’ <sup>22</sup> Pe non soke, mo hele lange iong ke mo teke, ‘Kol neu hile temene ero toto. Nenge teke ua temene ana, temene lape mete sapele.’ <sup>23</sup> Pe non soke, o hele pule ke o teke, ‘Nenge teke a mene timo lomele ngana nem at ero, a at ke a lohot nga matak ero toto.’ <sup>24</sup> Ke non soke, nga etue nenge mo la mule nge tememem, mo heleia lem helenga lochloch lange i.



<sup>25</sup> “Ol pe hele at nge imem ke teke, ‘Ala ke aol mule ara ngaunga.’ <sup>26</sup> Pe imem mo hele lange i ke mo teke, ‘Nenge teke timem nenge kino koko nge imem ero, mo sio la ero. Iange non neu lemene ero toto nge nau mule imem nga lamau. Pe nenge teke koko nge imem, nem lape mo sio la.’

<sup>27</sup> “Pe non soke, temek hele at nge imem ke mai koi, ‘Imo a eteia ke lek hei hoe tutuk mur tatamanna nge nai. <sup>28</sup> Elle erue, pe iau e hele, “Ngana kou huros inolo e hune i ke mete lo.” Pe e nau mule i ero ol ke at heueu nei. <sup>29</sup> Pe nenge teke amene hote nei nge iau pe ute hune i, lape a poia iau ke letek kokol toto pe e mete sapele.’

<sup>30</sup> “Ke o naue lo, kol nei ana mute nge temek palaungana toto. Pe nenge teke koko nge imem ke mola mule ero, <sup>31</sup> pe temek naue nakuna ero, i lape eingana uch pe mete sapele. <sup>32</sup> Pe pule iau laka nenge e nauele i. Pe e hele lange temek ke e teke, ‘Nenge teke e mene mule i at nge iong ero, lape e kulala mana ak helenga nge iong ol; nge lape o hele menmene iau nga etue lochloch ngana nenge e tu nga ich nei!’

<sup>33</sup> “Ke pomalam non soke, e teke o longele kol nei ke la luluch nge titina mur pe iau e mene munna ke e tu lamai pe ume nge iong. <sup>34</sup> Nenge teke kol nei la mule nge temek ero iau lape e la mule ero pule. Iange lemek ero toto nge e esia ure meena ngana nenge lape lohot nge temek.”

## 45

### *Iosep Hemallaha Hote I Lange Titina Mur*

<sup>1</sup> Iosep longe ke mau pe teke tang ia titina mur pe alngana lange nena ume ana hana mur ke teke, “Imo lochloch ala nge hot mukam!” Te lange hot pe Iosep iri ul titina mur mana tetu ol. Ol pe Iosep hemallaha hot sapele i lange titina mur. <sup>2</sup> Pe Iosep tang hot ke soke toto pe Ekipto mur te longe pe tela ke te heleia lange iri lochloch ngana nenge te tu nga ne Parao nena pele.

<sup>3</sup> Pe hele lange titina mur ke teke, “Iau Iosep koi! Pe temek kau maulul kura mau?” Pe titina mur te tuacholia nena helenga ero iange te matau toto nge te mes nga Iosep matana.

<sup>4</sup> Ol pe Iosep hele lange titina mur ke teke, “A hele rochroi at nge iau.” Iok, te la rochroi nge i pe hele, “Iau timo Iosep koi, nenge a hekule iau pe hana te olia iau pe te mene iau at nge Ekipto! <sup>5</sup> Pe heueu nei letemo inin tau hel ero ol nga poinga nenge a hekule iau at lamai. Iange NeHalang isipona kulosia iau ke iau muka at lamai ke e halaua imo pe hehei pe hana lochloch ke a maulul. <sup>6</sup> Uringa palaungana lohot nga ich nei pe tu ke ana hesinga nai la ke ulolo. Pe hesinga iri lime te maloch kura. Pe hehei pe hana lape te tua ngaunga ero pe te lulu ngaunga ero pule. <sup>7</sup> NeHalang kulosia iau ke iau muka nge imo ke e halaua imo ke a mete hot ero, iange teke mene mule imo ke atu ke a maulul nga kue urana ngana nei.

<sup>8</sup> “Ke pomalam imo a kulosia iau at lamai ero, NeHalang isipona kulosia iau at lamai. Pe poia iau ke e lohot ke iau non soke nenge e nauele hehei pe hana lochloch nga ne Parao nena pele, pe e nau ele kileng lochloch ngana nge Ekipto. Pe ne Parao nau haka mule temene nge iau. <sup>9</sup> Iok ol, ala mule ke ueiuei mana nge temek pe a hele lange i ke a teke, ‘Tum Iosep hele ke teke: NeHalang poia iau ke iau non soke nenge e nauele kileng lochloch ngana nge Ekipto. Ke pomalam o sio at nge iau ke ueiuei mana pe o poi ulul ero. <sup>10</sup> Lape o tu ke rochroi mana nge iau ol nga tuele kina nenge Kosen. Iong pe tutum mur pe lem tete mur pe lemo sipsip pe pulumakau mur pe lemo urelu lochloch. <sup>11</sup> O at ke o tu pe iau lape e nauele iong nga ngaunga, iange uringa ana hesinga iri lime kou maloch kura. Pe lemek ero nge iong pe tutum mur pe lem tete mur pe lem huros mur, a uri.’”

<sup>12</sup> Pe Iosep hele lange titina mur ke teke, “E teke imo lochloch a eteia ke

iau Iosep koi e hele lala nge imo nei. Pe Pensamin iong, o eteia iau ke nek iange tik toto laka iong. <sup>13</sup> Ala mule pe a hele lange temek ke a teke heueu nei, e lohote ke iau non soke nga kileng nenge Ekipto. Pe a hele lange i pule nga ure nemur nenge a naue iri ke ulolo. Pe a mene temek ke sio at ke ueiuei.”

<sup>14</sup> Ol pe Iosep lau hite tina Pensamin pe tang pe Pensamin pule lau hite i pe tang. <sup>15</sup> Pe lau haka nge titina mur lochloch pe tangia iri. Nga etue neu ol Iosep titina mur te amneia ke singiria urana nge te hele luluch nge i.

<sup>16</sup> Iok naunga-ala ana non nenge Ekipto pe nena hana papalaunga mur te iech mana nga etue nenge helenga song ke te teke Iosep titina mur kou te at ke tetu luluch nge i.

<sup>17</sup> Ol pe ne Paraoh hele lange Iosep ke teke, “O hele lange titim mur ke o teke, ‘A tatach heke lemo ure mur nga lemo tongki mur pe ala mule nga ich nenge Kenan.’” <sup>18</sup> Pe te mene temereia pe reria hehei mur pe tuturia mur pe te iat mule nge iau. Pe lape e tunge hote ich e nge Ekipto lange iri ke te kilia. Ich nenge urana toto pe ngaunga haka ia ke halang ke te ngau ia.

<sup>19</sup> “Pe o hele lange iri pule ke o teke, ‘A mene ure ana tangakis hel nge Ekipto ke ala taua tutumo mur pe lemo hehei mur pe tememo ke imo ul ke a at mule. <sup>20</sup> Letemo una ia urelu nemur nenge a hile sue nga ich nenge Kenan ero, iange urelu urana ngana mur nga kileng nenge Ekipto lape a mene iri ke lemo ia.’”

<sup>21</sup> Iok, Iakop tutuna mur te nanas mene ne Parao nena helenga pe Iosep tunge ure ana tangakis hel lange iri ke pomanga Parao hele ngana pe tunge aria ngaunga nenge kue ana pule. <sup>22</sup> Pe tunge iri elle pe elle reria hengeron mur. Pe Iosep tung ke Pensamin nena hengeron iri lime pe umtutuna iri ana non kina iri analoch pe lime (300). <sup>23</sup> Pe hekule ure urana ngana mur nge Ekipto lange temene pe tal heke iri nga tongki tatamanna

mur nge iri analoch. Pe pule hekule uit pe ngaunga mur hel pule nenge aria kue ana pe tal heke nga tongki heheina mur nge iri analoch (10). <sup>24</sup> Ke het pe kulosia titina mur ke te la pe hele lange iri ke teke, “A la pe a hele inin tau hel nga kue ero!”

<sup>25</sup> Iok te lohaka nge Ekipto pe la te lohote nge temeria Iakop nga ich nenge Kenan. <sup>26</sup> Pe te hele lange temeria ke te teke, “Iosep mete ero! I kou tu ke maulul kura. Pe heueu nei nauele kileng lochloch ngana nga tuele tana nenge Ekipto.” Iakop longe helenga neu pe letena umum ala pe letena manmanna ia ero. <sup>27</sup> Ol pe te heleia ure lochloch ngana nenge Iosep heleia lange iri. Pe esia ure ana tangakis mur nenge Iosep hekule at takisia i ke lange Ekipto pe letena urana mule. <sup>28</sup> Ol pe Iakop hele, “E manmanna lo! Heueu nei e eteia ke kolek Iosep kou tu ke maulul kura. Ke e lohaka pe e sio ke la e nau toto i mukam ke het laka pe e mete ol.”

## 46

### *Iakop Pe Tutuna Mur Pe Na Tete Mur Tela Nge Ekipto*

<sup>1</sup> Iok Iakop heukiraua nena urelu mur pe i pe tutuna mur pe na tete mur te lohaka ke te lange Ekipto. Te la ke te lohote nge Pesepa pe Iakop poia tunginga lange NeHalang nenge temene Isak ana Soke ia.

<sup>2</sup> Pe nga miliko NeHalang lohote nge Israel nga opene ke teke, “Iakop! Iakop!”

Pe Iakop tuacholia ke teke, “Iau koi.”

<sup>3</sup> Pe NeHalang hele, “Iau NeHalang nenge temem ana Soke ia. O lange Ekipto pe o matau ero. Lape E poia lem tete mur ke te lohote ke iri hulua toto nga lamau. <sup>4</sup> Iau lape e la luluch nge iong nge Ekipto pe lape e mene mule iong at lamai. Pe nga etue nenge o mete, Iosep isipona lape alohite iong.”

<sup>5</sup> Iok Iakop lohaka nge Pesepa pe tutuna mur te songia i pe nena tete

mur pe reria hehei mur nga ure ana takisinga mur nenge ne Parao hekule ke teke te takis iri ia. <sup>6</sup> Ke Iakop pe nena tete mur te lange Ekipto luluch nga reria pulumakau mur pe reria urelu mur lochloch nenge te mene iri nge Kenan. <sup>7</sup> Iakop mene tutuna mur nenge tatamanna pe heheina luluch nge nena tete mur nenge tatamanna pe heheina ke iri lochloch tela nge Ekipto.

<sup>8</sup> Iri lochloch ngana nenge te la luluch nge Iakop nge Ekipto, eria mur koi nei:

Iakop tuna tengene ana nenge ene Rupen.

<sup>9</sup> Rupen tutuna mur laka:  
Hanok pe Pallu pe Esron pe Karmi.

<sup>10</sup> Pe Simion tutuna mur laka:  
Iemuel pe Iamin pe Ohat pe Iakin pe Soar pe Saul. Saul tana nena nge Kenan.

<sup>11</sup> Pe Leui pe tutuna mur laka:  
Kerson pe Koat pe Merari.

<sup>12</sup> Pe Iuta tutuna mur laka:  
Er pe Onan pe Sela pe Peres pe Sera (pe Er pe Onan te mete lo nga te tu ngaria nge Kenan).

Pe Peres tutuna mur laka:  
Esron pe Hamul.

<sup>13</sup> Pe Isakar tutuna mur laka:  
Tola pe Pua pe Iop pe Simron.

<sup>14</sup> Pe Sepulon pe tutuna mur laka:  
Seret pe Elon pe Ialil.

<sup>15</sup> Ke Rupen pe Simion pe Liuai pe Iuta pe Isakar pe Sepulon, Iakop tutuna tatamanna mur nenge te ha nge Lea nga tetu ngaria nge Mesopotamia. Pe te hoe turia hei ngana e pule nge ene Taina. Ke Iakop tutuna nemur, te lohot ke iri ana non kina elle pe analoch pe mol (33).

<sup>16</sup> Iok Kat tutuna mur laka:  
Sepon pe Haki pe Suni pe Espon pe Eri pe Aroti pe Areli.

<sup>17</sup> Pe Aser tutuna mur laka:  
Imna pe Isaua pe Isui pe Peria.  
Pe liuria laka Sera.

Pe Peria tutuna mur laka:  
Heper pe Malkiel.

<sup>18</sup> Ke hehei pe hana nemur iri analoch pe ratele elle (16). Pe iri Iakop pe Silpa tuturia mur pe reria tete mur ia iri. Silpa i hei nenge Lapan longala hote ke umume nge tuna Lea.

<sup>19</sup> Iok Iakop iri nai nehei Resel tuturia mur laka:

Iosep pe Pensamin. <sup>20</sup> Pe nga etue nenge Iosep tu nge Ekipto, leia Asenat nenge ne Potipera tuna. Potipera i tunginga ana non ia nga kileng nenge Heliopolis. Pe Asenat hoe tutuna mur tatamanna nai. Eria laka: Manase pe Epraem.

<sup>21</sup> Pe Pensamin tutuna mur laka:  
Pela pe Peker pe Aspel pe Kera pe Naman pe Ehi pe Ros pe Mupim pe Upim pe At.

<sup>22</sup> Ke hana analoch pe henel nei (14), Iakop pe Resel tuturia mur pe reria tete mur ia iri.

<sup>23</sup> Pe Ten tuna elle mana:  
ngana laka Hasim.

<sup>24</sup> Pe Naptali tutuna mur laka:  
Iasiel pe Kuni pe Ieser pe Silem.

<sup>25</sup> Ke hana rahteale nai nei (7), Iakop pe Pila tuturia mur pe reria tete mur ia iri. Pila i hei nenge Lapan longala hote lange tuna Resel ke umume nge i.

<sup>26</sup> Iri nenge iri ul Iakop ke te lange Ekipto, iri Iakop tutuna mur pengpeng luluch nge tuturia mur. Pe te lohot ke iri ana non kina mol pe rahteale elle (66). Pe Iakop tutuna mur reria hehei mur, te sisala luluche iri ero. <sup>27</sup> Pe Iosep tutuna mur nai nenge te ha nge i nge Ekipto, te sisala luluch teua iri pule. Ke Iakop matana alona mur pengpeng nenge tela ke te tu nge Ekipto, te lohot ke iri ana non kina mol pe analoch (70).

*Iakop Pe Tutuna Mur Pe Na Tete Mur Tetu Nge Ekipto*

<sup>28</sup> Iok Iakop kulosia Iuta ke i muka ke la taua Iosep ke lange i nge Kosen. Ke nga etue nenge Iakop te lohot nga

tuele kina nge Kosen, <sup>29</sup> Iosep hele lange nena hana mur ke te tak hote ure ana tangakis hel ke la ke saholia temene nge Kosen. Nga etue nenge Iosep esia temene, lau hite i pe tang ke mala toto.

<sup>30</sup> Ol pe Iakop hele lange Iosep ke teke, “Kolek, e naue nakum lo pe e eteia ke o maulul kura. Pe nenge teke e mete ute pele ero ol.”

<sup>31</sup> Ke het pe Iosep hele lange titina mur pe iri lochloch ngana nenge te koko nge temene ke teke, “Lape e la ke e hele toto nge naunga-ala ana non ke pomai, ‘Titik mur pe iri lochloch ngana nenge te tu luluch nge temek nga ich nenge Kenan, te sauhot lamai lo. <sup>32</sup> Iri hana nenge te nauuelele sipsip mur. Pe te mene reria pulumakau mur pe meme mur pe kolok mur pe reria ure lochloch ngana ke te at.’

<sup>33</sup> Pe nenge teke naunga-ala ana non nem iua imo ke onteia imo ke teke, ‘A umume ia ume utar mur?’ <sup>34</sup> Imo a tuacholia i ke a teke, ‘Non soke, imem hana nenge mo nauuelele sipsip mur pe pulumakau mur. Mo popoia ume nei nga imem kinkino ngamem nike ke at heueu nei, ke mange lememe tete mur nge nike.’ A hele lange i ke pomai, laka longele imo ke a are nga tuele kina nenge Kosen. Iange Ekipto mur lemeria ero toto hana nenge te nauuelele sipsip mur.”

## 47

### *Iakop Are Nge Kosen*

<sup>1</sup> Iok laol, Iosep la pe hele lange ne Parao ke teke, “Temek pe titik mur te lohaka nga ich nenge Kenan ke te at lo. Iri kou te are nga tuele kina nenge Kosen. Pe te lochloch reria sipsip mur pe pulumakau mur pe reria urelu mur lochloch.” <sup>2</sup> Pe Iosep mene ke titina mur nge iri lime ke heteia iri lange ne Parao.

<sup>3</sup> Ol pe Parao onteia Iosep titina mur ke teke, “A umumeia ume utar mur?”

Pe iri te tuacholia ke te teke, “Non soke, imem sipsip ana naunga-ala mur ke pomange lememe tete mur nge

nike.” <sup>4</sup> Pe te hele lange i pule ke te teke, “Non soke mo at ke mo tu pol nga lamai mukam, iange uringa palaungana nei lohote ke poreke toto nga ich nenge Kenan. Pe lememe sipsip mur aria ngaunga ero iange heilil ero. Ke pomalam non soke, o longele imem ke mo are nga tuele kina nenge Kosen mukam.”

<sup>5</sup> Ol pe Parao hele lange Iosep te teke, “Temem pe titik mur te at laka nge iong. <sup>6</sup> Ke pomalam o naue ich e nge urana toto nge Ekipto pe o tunge lange iri ke te are ia. Teke mere pe te are nge Kosen lo la. Pe nenge teke o eteia hel nge te etei tote ume nenge te nauuelele pulumakau mur, o talue iri ke te nauuele lek pulumakau mur pule.”

<sup>7</sup> Iok, Iosep hei ia temene Iakop ke heteia i lange ne Parao. Pe Iakop hele sinanga toto lange ne Parao. <sup>8</sup> Pe ne Parao onteia i ke teke, “Am hesinga ia lo?”

<sup>9</sup> Pe Iakop tuacholia ke teke, “E tu nga ich nei ke sase ero mana. E tu ke ak hesinga iri ana non kina iri rahtele elle pe analoch (130) pe ure meena ngana halang te lohote nge iau. Pe lek tete mur te tu ke sase toto nga ich nei ke aria hesinga halang toto.” <sup>10</sup> Iok, Iakop hele sinanga toto mule lange ne Parao pe la sapele.

<sup>11</sup> Pe Iosep nanasia ne Parao hele ngana ke here temene pe titina mur nge Ekipto. Pe tunge reria ich e nge urana toto ke te are ia. Ana ich tu nga tuele kina nenge Remesis. <sup>12</sup> Pe Iosep nauuele temene pe titina mur pe iri lochloch ngana nenge te at luluch nge temene pe tuturia mur nga ngaunga.

### *Uringa Palaungana Lohote Nge Ekipto*

<sup>13</sup> Uringa palaungana nem lohote ke poreke toto nga ich lochloch ngana pe heporeke tote ich nenge Ekipto pe ich nenge Kenan pule. <sup>14</sup> Pe hulua lochloch ngana nge Ekipto pe Kenan reria umtutuna het mana ia ngaunga ol ngana. Pe Iosep loloch ia umtutuna nemur pe laia iri nga ne Parao nena pele. <sup>15</sup> Iok, nga etue nenge



Ekipto mur pe Kenan mur reria umtutuna het lochloch, Ekipto mur tela nge Iosep pe te hele ke te teke, “O tung mana emem ngaunga oliange lememe umtutuna het tah lo. Eh pomere, lape mo mete sio mana nga matam ol?”

<sup>16</sup> Pe Iosep hele lange iri ke teke, “Nenge teke lemo umtutuna ero ol, iok a mene lemo huros mur at nge iau ke amo ngaunga uruna ia.”

<sup>17</sup> Pomalam te mene reria sipsip pe meme mur pe pulumakau mur lange Iosep pe Iosep tungtunge aria ngaunga. Pe te poi manmana ke mau kela hesinga neu het.

<sup>18</sup> Iok hesinga neu het ke la pe hesinga e pule at. Pe te la mule nge Iosep pe te hele ke te teke, “Non soke mo talkome ele ute e nge iong ero. Lemem umtutuna het lochloch lo pe o loloch taua lememe sipsip mur pe meme mur pe pulumakau mur ke het tah lo. Pe lememe ute hel nge lape mo tunge lange iong ero ol. Imem mana pe lememe ich mur mana koi mo tu ol. <sup>19</sup> Lape mo mete pe mo hile sio mene lememe ich mur heueu i. O olia imem pe lememe ich mur pule nga ngaunga mana. Urana nge mo lohot ke ne Paraoh nena hekuleileinga ana hana mur imem pe mene lememe ich mur pule. Pe o tung emem ngaunga ke mo maul pe mo mete sio mana ero. Iange lape mo hile sio mene lememe ich mur ke tetu loulou mana heueu.”

<sup>20</sup> Ke uringa palaungana nem poia hehei pe hana lochloch nge Ekipto ke te hekule reria ich ke Iosep olia iri. Ke pomalam ne Paraoh mene ich lochloch ngana nge Ekipto ke nena ia.

<sup>21</sup> Ol pe Iosep poia hehei pe hana nga kileng lochloch ngana nge Ekipto ke la te tu nga tuele tana mur. Talune nga kileng ana oro hele ke la nga hele.

<sup>22</sup> Pe Iosep olia tunginga ana hana mur reria ich ero iange ne Paraololia iri. Pe iri siporia te lolol aria ngaunga nga reria umtutuna mur.

<sup>23</sup> Ol pe Iosep hele lange hehei pe hana ke teke, “A longo at! Heueu nei e olia imo pe e ol hote lemo ich mur pule ke ne Paraoh nena ia ol.

Pe ngaunga tutuna alona mur koi, amene ke la a tue nga amo ume mur.

<sup>24</sup> Pe nga etue nenge ngaunga mera a lasia ke huna iri lime. Pe huna elle a tunge lange ne Paraoh pe henel a rahite. Pe a talue hel ke alona ke a tua mulmule iri. Pe nenge teke hel te mama kura, imoul lemo hehei mur pe tutumo mur amo ke a ngaua.”

<sup>25</sup> Ol pe hehei pe hana te hele ke te teke, “Non soke o hemaual tote imem lo. Pomalam lape mo tu ke nek pe mo ume manmana nge ne Paraoh ol.”

<sup>26</sup> Iok la ol Iosep talue hotonga e nge Ekipto ke teke, nga etue nenge ngaunga te mera nga ume, hehei pe hana te lasia ke huna iri lime. Pe huna elle te tunge lange ne Paraoh. (Ke heueu nei te nanasia hotonga neu kura). Pe ich nenge tunginga ana hana mur mana, ne Paraoh mene ke nena ia ero.

### *Iakop Nena Onteinga*

<sup>27</sup> Iok Israel mur te tu nge Ekipto nga tuele kina nenge Kosen pe te mene ich mur nga lamau. Pe te hoho lele le tuturia mur iri halang toto.

<sup>28</sup> Iok, Iakop tu nge Ekipto ke ana hesinga iri analoch pe rahtele nai (17). Pe ana hesinga lochloch lohot ke ana non kina iri rahtele nai pe rahtele nai (147). <sup>29</sup> Iok Iakop amnei urume i ke ana etue nenge mete ia at ke rochroi lo. Pomalam hekulo tuna Iosep ana ke at pe hele lange i ke teke, “Nenge teke mutem tau tote iau, iok o talue perim nga haek ene pe o poia helenga kerkereng ngana ke o poi ke urana at nge iau, ke o alohite iau nge Ekipto ero. <sup>30</sup> Ke nga etue nenge e mete ke e lange lek tete mur, o alohite iau nge Ekipto ero. O takisia iau langa lek tete mur te ma ngaria pe o alohit luluche iau nge iri.”

Pe Iosep hele, “Lape e poia ke pomanga o hele ngam.”

<sup>31</sup> Pe Iakop hele mule ke teke, “O hele ke manmanna toto at nge iau.” Pe Iosep hele ke manmanna toto lange i. Pe Iakop iech pe puo sue palpanna la nga nena hete palpanna.



## 48

### *Iakop Pete Epraem Pe Manase*

<sup>1</sup> Iok mala pol nga hoena te hele lange Iosep ke te teke, “Temem kou singina haleles.” Pomalam Iosep mene tutuna mur nai neu, Epraim pe Manase kela te nau tote temene. <sup>2</sup> Te la ol pe mele hele lange Iakop ke teke, “Tum Iosep pai koi puris lo. Teke at ke nau tote iong.” Ol pe Iakop mene kikina ngana unne ke are haka nga nena hete.

<sup>3</sup> Pe hele lange Iosep ke teke, “NeHalang Nenge Nena Kerkerenga Palaungana Toto lohote nge iau nga tuele tana nge Lus nga ich nenge Kenan. Pe hele ke teke lape poi ke nek toto at nge iau, <sup>4</sup> ke teke ke, “Lape E poia tutum mur ke iri halang toto. Pe iong lape o lohote ke hulua nga ich temeria iong. Pe lape e tunge ich nei lange lem tete mur ke reria ia ol.”

<sup>5</sup> Pe Iakop rahaka mule pe hele, “E at ke e lohote nge iong nge Ekipto ero kura pe tutum mur tatamanna nai lo. Ke Epraem pe Manase, iau tutuk mur ia iri ke pomange Rupen iri nai Simion. <sup>6</sup> Pe tutum mur nenge te ha nga rume nge iri nai, iong tutum mur ia iri ol. Pe lape te mene reria ich nga nenge tiria Epraim pe Manase te nauele. <sup>7</sup> E hele ke mai iange letak ia tam e Resel. Nga etue nenge mo i nge Mesopotamia ke mo la mulmule nga ich nenge Kenan, mo naue kileng Eprata ke la nga tau kura pe tam mete. Ol pe e alohite i nga kue ilina, nga kue nenge song ke lala nge Eprata.” (heueu nei te hetue ke ene Petlehem.)

<sup>8</sup> Iok, nga etue nenge Iakop naue Iosep tutuna mur, ontei ke teke, “Itei hel nemai?”

<sup>9</sup> Pe Iosep hele lange temene ke teke, “Nga etue nenge e at ke e tu nge Ekipto NeHalang tunge tutuk mur tatamanna nai. Ke iri nai laka.”

Ol pe Iakop hele, “O mene iri at nge iau ke e pete iri.”

<sup>10</sup> Iakop matana pulu ala pe nau ke nek ero ol iange tuauna toto lo. Pomalam Iosep mene tutuna mur ke

te la rochroi toto nge temene ke lau hite iri.

<sup>11</sup> Pe Iakop hele lange Iosep ke teke, “Iau e teke ma lape e nau mule iong ero ol. Pe ero. Heueu panei NeHalang poia iau ke e nau mule iong pe tutum mur pule.”

<sup>12</sup> Ol pe Iosep mene hot kelia tutuna mur nga Iakop apena pe tualou sio la nga ich nga temene matana. <sup>13</sup> Pe Iosep rahite tutuna mur nai neu ke te la rochroi nge Iakop. Rahite Epraim nga penna tamalmal ke la nga Iakop penna hoioi pe rahite Manase nga penna hoihoi ke la nga Iakop penna tamalmal. <sup>14</sup> Iange Epraem i kino pe Manase i soke. Pe ero. Iakop lopakua penna ke tal heke penna tamalmal nga Epraem palpanna pe talheke penna hoioi nga Manase palpanna.

<sup>15</sup> Ol pe Iakop onteia NeHalang ke poi ke urana lange Iosep pe nena hana mur pe hele ke teke,

“NeHalang; lek tete

Apraham pe temek Isak te nanas tau tote lemengam,

pe iong Nehalang nenge o nauele iau nga e ha ngak nike ke at heueu nei.

<sup>16</sup> Pe o poi ke manga angkelo nenge mene mule iau nga ure poreke ngana mur.

Heueu e ontei iong ke o poi ke urana lange aina tatamanna nai nei.

Nge iri mana lape hehei pe hana te hetue ek

pe te hetue lek te Apraham pe temek Isak eria pule.

Pe o poia tuturia mur ke te lohote ke iri halang toto nga ich.”

<sup>17</sup> Pe Iosep iech ero iange nau pe temene tal heke penna tamalmal nga Epraem palpanna. Ol pe rahite temene pena tamalmal nga Epraem palpanna ke teke tal heke la nga Manase palpalna. <sup>18</sup> Pe Iosep hele lange i, “Temek! Kol nei nge ha tala koi. O tal heke perim tamalmal la nga palpalna.”

19 Pe temene ulo ele i pe hele ke teke, “Kolek, e eteia la. I pule tutuna mur pe nena tete mur lape te lohote ke iri halang toto pule. Pe tina nenge kino, tutuna mur pe na tete mur lape iri halang toto pe te hele haka toto nge iri ke pomange hehei pe hana nga tuele kina mur nge halang toto.”

20 Iok Iakop pete iri nga etue neu pe hele ke teke,

“Nga etue nenge Israel mur te teke te onteia NeHalang ke poi ke nek lange mele hel, lape te hetue tutum mur nai nem eria. Pe lape te hele ke te teke,

‘NeHalang lape poi ke nek toto lange imo ke pomange Epraem iri nai Manase.’”

Ke nga kue nei mana Iakop talue Epraem ke i muka nge Manase.

21 Ol pe Iakop hele lange Iosep ke teke, “O nau at, iau e metmete lokoi. Pe NeHalang lape tu luluch nge imo pe lape mene mule imo ke ala mule nga lemo tete mur reria ich nge Kennan. 22 Pe ich unne nge urana toto kou tu nga tuele tana nge Sekem, pe lape e tunge lange titim mur ero. Lape e tunge lange iong mana. Nge nike mo hunel luluch nge Amor mur pe e mene mule ich nem nga lek kaleu pe pakpaka nge e riringia nga kileng nem.”

## 49

### *Iakop Pete Tutuna Mur*

1 Iok Iakop pete Epraem iri nai Manase ke het pe iua tutuna mur ke te lange i pe hele lange iri ke teke, “A i at ke e heleia ure nemur nenge lape te lohote nge imo nge he.

2 “Imo Iakop tutuna mur, a mes ke nek pe a longo;  
a longo ke nek nga tememo Israel nena helenga.

3 “Rupen, iong tuk nenge tengene ana.

E hoe iong nga iau lomele ngak nike.  
Lape o lohote ke iong non  
palaungana pe o kerkereng toto nge titim mur.

4 Pe lape iong palaungana nenge titim mur ero ol  
iange o poi ke malaka nga kie nge tele upa.

O la ke o ma luluch nge lek hei e pule. Pe o hemei tote iau nga lem poinga nem.

5 “Simion pe Liuai titiria mur hel.

Iri nai te heporeke totote hehei pe hana

nga reria palinga hel ana ure mur.

6 Iau lape e longo la nga iri nai leteria tuanin ngana mur ero,  
pe lemek ero nge e tal teua iau la nga ure nenge te teke te popoia.

iange leteria inin pe te hunun hana

pe te iech mana nge te pal hoa pulumakau mur aperia.

7 Iri nai leteria inin ngana heporeke mule iri

iange leteria inin sakilil,

pe te oala ngaria heporeke iri

iange reria susun tana hali.

Pe lape e hekengkenge iri ke te ua rara

pe e poia iri ke tu lilis rara

luluch nga mata hel nge Israel.

8 “Pe Iuta iong titim mur lape te tal heke tote iong.

Iange o hekou sue lem ngarang mur

pe titim mur lape te tualou sio pe te heto heke iong.

9 Iong o poi ke manga ur inolo kerkereng ngana nenge Iuta nge hune ana huros ke ngaua

ke het pe la ke ma mule nga munna nenge mama ia.

Pe mele pele nakuna ero toto nge hetakinia i.

10 Pe o rahite naunga-ala ana non nena tongtong ke o nauele hehei pe hana.

Pe mele pele lape mene hote nge iong ero,

- pe nge matam alona mur ero  
pule,  
ke la het nga etue nenge tongtong  
tokoninga at ia  
ke nauele hehei pe hana  
lochloch.
- 11 Pe hechau hite nena tongki la  
nga uain tana  
nenge urana toto  
pe lome nena hengeron nga uain  
eina,  
pe nena hengeron sase ngana  
lomo teua  
nga uain eina nenge remen-  
men.
- 12 Pe matana remenmen ia uain  
in ngana  
pe ngingina hussu toto ia siu eina  
in ngana.
- 13 “Pe Sepulon iong lape o tu nga ru-  
ach ilina  
nga kolkolu palaungana nenge  
imot mur te mana teueu ia.  
Pe lem ich maole kela het nga  
tuele tana nge Saiton.
- 14 “Pe Isakar iong o pomalaka nga  
tongki kerkereng ngana e  
nge kikina ero nge mes haka  
ia oroko meena ngana mur  
nenge te kale heke nge i.
- 15 Pe nga etue nenge naue nena ich  
nge urana  
nge tuia pe tah eingana ia,  
pur kikina toto ke teke ume.  
Pe nga hoena o lohote ke iong  
hekuleileinga ana non pe te  
puoloko teu tote iong nga ume.
- 16 “Pe Tan iong, lape o nauele lem  
hana pe hehei ke nek.  
Elle mana ke pomanga kaleu ra-  
mana mur hel pule nge Israel.
- 17 Pe lape o poi ke pomanga ilimo  
nenge ma nga kue tana ilina  
pe ilimo nenge hunun nenge ma  
nga kue kinkino ngana ilina  
pe alatote oriong mur aperia  
pe te ule hana nenge te songsong  
ia iri ke te losio.
- 18 “Non Soke, e kulele iong ke o mene  
mule iau!
- 19 “Pe Kat iong, kemenga kina mur  
lape te palhel luluch nge iong  
pe o lope parai ia iri.
- 20 “Pe Asa iong, ngaunga nge halang  
toto lape te haka nga lem ich.  
Pe naunga-ala ana hana mur,  
materia tau tote ngaunga  
urana ngana mur nenge o  
tuntune.
- 21 “Pe Neptali iong, o pomalaka nga  
meme inolo ngana e nenge  
i rara pulut mana nga lemene  
ngana,  
pe hoe tutuna mur nge nakuria  
urana manmana.
- 22 “Pe Iosep iong, o pomalaka nga  
uain tana e nge mes nga ech  
matana pach haka ngana,  
nge nganngana halang toto  
pe perperna mur te au tele nga  
mapuo.
- 23 Lem ngarang mur te ngira taua  
iong ke te teke te tue iong nga  
reria raling  
pe te poi poreke iong.
- 24 Pe iong o rahit heke lem raling pe o  
mes ke kerkereng toto  
iang NeHalang nenge Iakop  
heto hekeke,  
tunge kerkerenga lange iong.  
I NeHalang nenge nauelele hehei  
pe hana nenge Israel.
- 25 Ke NeHalang Nenge Kerkereng  
Toto pe halaulaua iong nem,  
I temem ana soke ia. Pe pete iong  
pe poi ke urana toto lange iong.  
Pe lem petenga mur lape sio nga tapa  
sana ke pomanga pitte pe  
pomanga ech nge pach haka nga  
ich.  
Pe poia lem huros mur ke teha  
lele pe poia lem tete mur ke iri  
halang toto.
- 26 Iau temem iau pe e hele talue ure  
urana ngana mur nenge lape  
te lohote nge iong.  
Ure urana ngana nemur iri ha-  
lang toto ke salala hite hen-  
gene papalaungana mur  
pe te hele haka toto nga nenge  
lek tete mur te mene nge nike.

Ke Iosep, ure lochloch ngana nei lape te lohot nge iong.

Iong non nenge o lohot ke iong soke toto nge titim mur.

<sup>27</sup> “Pe Pensamin, poi ke malaka nga kaone inolo palaungana e.

Nga uach ngaungaua huros mur nenge hunune iri.

pe nga ulei heronge aluana lala nge pekngana mur.”

<sup>28</sup> Ke nenge nei kaleu ramana iri analoch pe nai (12) nenge Israel. Temeria ee ia iri pe hele hot peng-peng ia ure nemur nenge lape te lohot nge iri elle pe elle nge he.

### *Iakop Mete Ngana*

<sup>29</sup> Ke het pe Iakop hele lange iri ke teke: “Ak etue at rochroi toto lo nenge lape e la ke e ma luluch nge lek tete mur nga polo. Ke nga etue nenge e mete, a alohite iau nga metenga ana kileng nenge lek tete mur te maia nga Hitae mur reria ich nge Epron. <sup>30</sup> Nga polo nenge tu nga ich nenge Makpela nenge tu rochroi lange Mamre nga kileng nenge Kanan. Ich nenge Epron, i ich nenge Apraham ol hote nge Hitae mur ke teke metenga ana kileng ia. <sup>31</sup> Ke Apraham pe nehei Sera pe Isak pe nehei Repeka, ngaria laka te alohite iri nga lamalam. Pe iau e alohite e Lea nga lamau pule. <sup>32</sup> Ke ich nem pe polo mur nga ich nem Apraham ol hote nge Hitae mur lo.”

<sup>33</sup> Iok, Iakop hetoro sue helenga neu lange tutuna mur ke het pe ma haka mule nga nena hete pe mete sapele. Pe te alohite i luluch nge nena tefe mur.

## 50

<sup>1</sup> Iok, nga etue nenge Iosep esia temene nge mete, lau hite i pe tang ia i. <sup>2</sup> Ol pe hele lange nena haleles ana hana mur ke te hamam ia ure inangana hehech ngana mur pe te un hite nga temene koluna ke inangana namnamo ero. Pe tepoia ke pomanga Iosep hele ngana. <sup>3</sup> Ke aleles ana hana mur te popoia ume nem ke etue

iri ananon kina nai (40) iange ume nem ana etue pomau nike. Pe hehei pe hana te tang hite Iakop ke etue iri ana non kina mol pe analoch (70).

<sup>4</sup> Iok tanginga ana etue het pe Iosep hele lange Paraoh nena hana papalauna mur ke pomai, “Nenge teke letemo poreke ia iau, a la pe a heleia lek helenga lange ne Paraoh ke mai koi, <sup>5</sup> ‘Nga etue nenge temek teke metmete lo, hele ke kerkereng toto at nge iau ke e poia helenga kerkereng ngana e lange i, ke e takisia koluna ke la e alohite nga polo e nge isipona selia nga ich nenge Kenan.’

“Ke pomalam o longele iau ke ela ke e alohite temek mukam, ke het pe e at mule.”

<sup>6</sup> Pe Paraoh hele, “O nanasia lem helenga kerkereng ngana nenge o poia lange temem. Ke o mene koluna ke la o alohite mukam, ke pomanga hele nganaia lange iong.”

<sup>7</sup> Ke pomalam Iosep la ke alohite temene pe Paraoh nena hana papalaungana mur nge Ekipto tela luluch nge i. <sup>8</sup> Pe iri lochloch ngana nenge te tu luluch nge Iosep pe Iosep titina mur lochloch pe iri lochloch ngana nenge tetu luluch nge temene te chola lochloch ke tela. Pe aina kinkino ngana pe sipsip mur pe meme mur pe pulumakau mur mana tetu nge Kosen ol. <sup>9</sup> Pe hana nenge te songsong ia ure ana tangakis mur lochloch pe hana nenge te songsong ia oriong mur, iri lochloch ke te la pule. Ke pomalam iri nenge te haka la nga metenga neu iri hulua toto.

<sup>10</sup> Iok te la ke te lohot nga kileng nenge Atat. Ana kileng tu nga chaia haka ngana nga ech nge Iortan. Pe Atat mur te poi hotote uit nganangana mur nga paena nga lamau. Pe Iosep pe hulua nemur te la ke te lohot nga ana kileng pe iri lochloch te tang ke soke toto. Pe Iosep are ia temene ana lete ke etue iri rahtele nai (7). <sup>11</sup> Pe Kenan mur nenge te tutu lamau te esia hehei pe hana nge te tang ke soke toto nga lamau pe te hele, “Ekipto mur te tangia non

nenge mete nei ke mau kou.” Ke pomalam te hetue kileng unne neu ke ene, Apel-Misraim. Ana kileng tu rochroi lange Iortan.

<sup>12</sup> Pe Iakop tutuna mur te nanasia temeria nena helenga nenge heleia lange iri: <sup>13</sup> Ke te takisia i la nga ich nenge Kenan ke te alohite i nga polo nga ich nenge Makpela. Kileng Makpela tu rochroi nga kileng nenge Mamre, pe Apraham ol hote ich neu lange Epron, pe Epron i none nga mata nenge Hitae mur. <sup>14</sup> Iok te alohite Iakop ke het pe Iosep pe titina mur pe hulua lochloch ngana nenge te koko ke te alohite temene neu, tela mule nge Ekipto.

#### *Iosep Hemaluche Titina Mur*

<sup>15</sup> Iok, Iosep titina mur te naue ke temeria mete lo ol pe te hele, “Lape ta poi ke mere mai ol? Iosep lape letena inin taua ita pe lape tuacholia rera poinga poreke ngana nge ta poia lange i nge nike.” <sup>16</sup> Ke pomalam te hekule helenga lange Iosep ke te teke, “Temere mete ero kura pe tung sue helenga nei at nge imem: <sup>17</sup> Hele at nge imem ke teke mo hele lange iong ke mai koi, ‘E onteia iong ke letemia titim mur nga reria poinga poreke ngana nenge te poia lange iong.’ Pe heueu nei mo onteia iong ke letemia imem iange imem, NeHalang nenge temere heto hekeke, nena hekuleileinga ana hana mur koi imem.” Nga etue nenge reria helenga la ke sasa hot, Iosep longe pe tang.

<sup>18</sup> Ke het pe titina mur te la ke te esia i pe te tualou sio nga matana pe te puosue palparia la nga ich pe te hele ke te teke, “Lem hekuleileinga ana hana mur koi imem ol.”

<sup>19</sup> Pe Iosep hele lange iri ke teke, “A matau ero. Imo mam a teke iau NeHalang ma? <sup>20</sup> Pe i manmanna ke a mil toto ak ke a poia poinga poreke ngana nem at nge iau, iange NeHalang letena tuanin hote ke pomam nike. Pe hulua ke lohot ke urana nga nenge e halaua hehei pe hana ke te tu ke te mau. <sup>21</sup> Ke pomalam a matau ero. Iau lape e nauele imo pe tutumo

mur nga ngaunga.” Iosep hele ke urana mana lange titina mur pe hekerkereng mule leteria ke ma ke nek mule.

#### *Iosep Mete*

<sup>22</sup> Iok, Iosep pe titina mur pe reria hehei mur pe tuturia mur te tu nge Ekipto. Pe Iosep tu ke ana hesinga iri ana non kina lime pe analoch (110) pe mete. <sup>23</sup> Ke Iosep tu ke naue nena tete mur nenge te lohot nge Epraim pe nena tete nemur tuturia mur. Pe tu ke naue nena tete mur nenge te lohot nge Manase tuna nenge ene Makir pule. Pe Iosep teke tutuna mur laka Makir tutuna nemur iange te mene iri lange i pe rahite iri pe tal heke iri nga apena.

<sup>24</sup> Ol pe Iosep hele lange titina mur ke teke, “Tau e metmete lokoi. Pe nge he NeHalang lape halaua imo ke mene hote imo nga kileng nei ke a la nga ich nenge hele talue lange Apraham pe Isak pe Iakop.” <sup>25</sup> Ke het pe Iosep hele, “A hele ke kerkereng toto ke a poi ke mai: Nga etue nenge NeHalang at ke halaua imo, a loloch heke kik mur pe a hile kileng nei pe ala.”

<sup>26</sup> Ke Iosep tu ke ana hesinga iri ana non kina lime pe analoch (110) pe mete. Pe te un hite singina ana ure inangana heech ngana mur ke inangana ero pe te tal teua i nga metenga ana hohou nge Ekipto.



## Helenga Urana Toto Ngana Nenge Mateus

### *Iesus Na Tete Mur (Luk 3:23-38)*

<sup>1</sup> Nananga nenge te nana urume Iesus Kristus na tete mur iange Iesus ha nga mata nenge Teuit pe Teuit nette Apraham.

<sup>2</sup> Iok, Isak temene Apraham pe Iakop temene Isak. Pe Iuta iri ul titina mur temeria Iakop.

<sup>3</sup> Iok, Peres iri nai tina Sara temeria Iuta pe taria he Tamar. Pe Hesron temene Peres pe Rem temene Hesron.

<sup>4</sup> Iok, Aminatap temene Rem pe Nason temene Aminatap. Pe Salmon temene Nason.

<sup>5</sup> Pe Poas temene Salmon pe tana he Rahap.

Iok, Opet temene Poas pe tana he Rut. Pe Iese temene Opet.

<sup>6</sup> Pe Naungaala ana non soke ne Teuit temene Iese.

Iok, Solomon temene laka ne Teuit pe tana laka ne Uraia nehei.

<sup>7</sup> Pe Rehopoam temene laka non palau Solomon

pe Apisa temene laka Rehopoam. Iok, Asa temene laka Apisa.

<sup>8</sup> Pe Iehosapat temene ne Asa pe Iehoram temene ne Iehosapat.

Pe Usae temene ne Iehoram.

<sup>9</sup> Iok, Iotam temene ne Usae pe Ahas temene ne Iotam.

Pe Hesakie temene ne Ahas.

<sup>10</sup> Pe Manase temene ne Hesakie pe Amon temene ne Manase.

<sup>11</sup> Iok, Ekonia pe titina mur temeria ne Iosae nga etue nenge Papiilon mur te hekou sue Israel mur pe te ua ia iri langa kileng nge Papiilon.

<sup>12</sup> Iok, tetu nga ich Papiilon nem lo

pe Siltiel temene Ekonia pe Serupapel temene Siltiel.

<sup>13</sup> Iok laol, Apiut temene ne Serupapel

pe Eliakim temene ne Apiut.

Pe Asor temene ne Eliakim.

<sup>14</sup> pe Satok temene ne Asor

pe Akim temene ne Satok

pe Eliut temene ne Akim.

<sup>15</sup> Iok, Eliesa temene ne Eliut

pe Matan temene ne Eliesa

pe Iakop temene ne Matan.

<sup>16</sup> Iok ol, Iosep temene ne Iakop pe nehei he Maria. Pe he Maria hoe Iesus. Iesus nenge te hetue I ke Kristus.

<sup>17</sup> Ke Iesus na tete mur ana lala iri analoch pe henel talun nge Apraham ke lange Teuit. Iok, analoch pe henel mule talun nge Teuit ke langa etue nenge tela nga ich lomona ngana nenge Papiilon. Iok, analoch pe henel mule nga etue neu ke langa etue nenge Iesus tana hoe i ia.

### *Te Hoe Iesus Kristus (Luk 2:1-7)*

<sup>18</sup> Iesus Kristus tana hoho ngana ia lohot ke pomai koi. Tana he Maria te teke lape lei nge ne Iosep. Pe iri nai te lei hel ero kura pe hei neu sana nga Opepengpeng lo. <sup>19</sup> Pe Iosep letena tuanin ke teke lape hile mule hei neu pe teke poia ke nek mana iange i non urana ngana ia pe lemene ero nge hemeia he Maria nga hulua mataria.

<sup>20</sup> Iok laol, letena tuanin hote ke het pe Non Soke na angkelo e la pe hele lange i nga opene ke teke, "Iosep! Iong lemte palaungana laka ne Teuit. O matau ero. O mene he Maria ke langa lem pele ke lem hei ia iange hei nem sana nga Opepengpeng. <sup>21</sup> I lape hoe tuna tamane ngana e pe o hetue kol suna nem ke ene Iesus. Iange i lape mene mule nena hana mur nga reria poinga poreke ngana mur."

<sup>22</sup> Ure lochloch ngana nei lohot ke pete tote ure nemur nenge Non Soke hele hote nga hetatalonga hanna lo

nenge hele ke teke, <sup>23</sup> “Hei malolong e nge maluluch nge non e ero kura lape sana. Pe lape hoe tuna tamane ngana e pe lape te hetue i ke ene Imanuel.” Pe ene nem luna pomai, “NeHalang tu luluch nge ita.”

<sup>24</sup> Iok laol, Iosep memete haka pe poia ure nenge NeHalang nena angkelo heleia lange i. Pomalam mene he Maria langa na pele ke nehei ia. <sup>25</sup> Pe iri nai tema luluch hel ero ke la he Maria hoe tuna tamane ngana neu. Pe Iosep heto sapele ke ene Iesus.

## 2

### *Hana Papalauna Hel Tela Ke Te Heto Heke Iesus*

<sup>1</sup> Iok, Iesus ha nge Petlehem nga kileng nenge Iutea nga etue nenge ne Herot i naungaala ana non soke nga kileng neu. Iesus ha ke ulo pe hana papalauna hel te lohaka nga kileng ilina hele nenga chaia haka ngana pe tela nge Ierusalem. <sup>2</sup> Pe te ontei ke te teke, “Mo teke mo nau nge kol sune nenge tana hoe i pe te teke Iuta mur aria naungaala ana non soke ia. Ana non ngai? Motu nga lemeng kileng pe mo esia ana itoch nge tualeme nga chaia haka ngana. Ke ngana koi moat ke mo teke mo heto heke i.”

<sup>3</sup> Pe naungaala ana non soke Herot pe hulua lochloch ngana nge Ierusalem te longe ure nei pe leteria tuanin rara ia ke halang. <sup>4</sup> Ol pe ne Herot iu sapele tunginga ana hana mur aria papalauna mur pe hotonga ana hetoronga mur pe ontei hote iri ke teke, “Kristus nem lape tana hoe i langai?” Pe iri te tuacholia, <sup>5</sup> “Nge Petlehem nga kileng nenge Iutea. Iange hetatalonga e has ngana hele ke teke,

<sup>6</sup> “ ‘Petlehem iong otu nga ich nenge Iutea.  
Pe pingam iuiu ol  
iange Naungaala ana Non e lape lohot nge iong  
ke nauele lek hana mur nge Israel.’ ”

<sup>7</sup> Ol pe ne Herot iu kome hana papalauna nemur pe ontei hote iri nga etue tei toto nenge itoch neu lohota ia. <sup>8</sup> Ke het pe kulosia iri ke tela nge Petlehem pe hele lange iri ke teke, “Ala pe a tango rara hote kol sune nem ke nek toto. A tango rere i ke a hottaua i pe a hele at nge iau. Ke iau pule ela ke e heto heke i.”

<sup>9</sup> Te longe Herot na helenga ke het pe te i sapele. Pe te i ke te nanas mene itoch nenge te esia neu. Te nanasia lala ke la itoch neu mes pengpeng nga kileng unne nenge mamau neu maia. <sup>10</sup> Te esia itoch neu pe te iech toto. <sup>11</sup> Iok, te i teu langa pele neu letena pe te esia kol sune nem iri nai tana he Maria. Pe te tualou sio toto nga matana pe te heto heke i. Ke het pe te mene hote reria tunginga mur nenge ururia haka toto pe te tunge lange i. Tunginga mur nenge pomanga (machmach) um chalemlem ngana nenge uruna haka toto pe ure inangana ehech ngana pe ure pais ngana nenge inangana ehech. <sup>12</sup> Pe operia ke Non Soke teke tela mule nge Herot ero pomalam te i nga kue e nge altoto ke tela mule nga reria kileng.

### *Te Ua Ke Tela Nge Ekipto*

<sup>13</sup> Iok, hana papalauna nemur tela ol pe Iosep ma opene ia Non Soke na angkelo e nge hele lange i ke teke, “O lohaka nga kileng nei pe o mene kol sune nem iri nai tana pe a ua ke a lange Ekipto. Ala ke atu nga lamau pe o longo ala mana nge e hele la mule nge iong. Iange Herot lape tango rere kol sune nem ke teke hunune.”

<sup>14</sup> Ol pe Iosep lohaka pe mene mamau neu iri nai tana pe te ua sapele nga miliko ke tela nge Ekipto. <sup>15</sup> Tetu nge Ekipto ke la ne Herot mete. Pe nem pule pete tote Non Soke na helenga nenge heleia lange hetatalonga mur nenge hele ke teke, “E iu hote tuk nga kileng nenge Ekipto.”

### *Herot Hun Lapue Aina Kinkino Ngana Nenge Iri Tatamanna*

<sup>16</sup> Pe ne Herot letena inin toto iange eteia ke hana papalauna mol nem te channangaia i lo. Pomalam tung hote helenga kerkereng ngana ke teke te hune aina tatamanna kinkino ngana lochloch nge Petlehem pe nga kileng mur nenge tetu rochroi nge Petlehem pule. Pe teke te hune iri nenge aria hesinga nai ke langa penpene ngana mur lochloch. Pe poia poinga neu iange ontei hote hana papalauna mol neu pe te hele lange i lo nga etue nenge te esia itoch neu. <sup>17</sup> Pe poinga nei lohohot ke pete tote ure nenge hetatalonga Ieremaia heleia lo. Nenge hele ke teke:

<sup>18</sup> “Te longe tanginga pe utunga lolo nge Rama.  
Mele kou hepehoihoi. He Resel laka tangtang ia tutuna mur.  
Iange tutuna mur kou hana te hune iri ke ulolo.  
Pe lemene ero nge te hemaluche i.”

### *Tela Mule Nge Nasaret*

<sup>19</sup> Iok, ne Herot mete ke ulo pe Non Soke na angkelo lohohot mule nge Iosep nga ma opene ngana nge Ekipto. Pe hele lange i <sup>20</sup> ke teke, “O lohaka pe o mene kol sune nem iri nai tana pe a la mule nga ich nenge Israel iange iri nenge te teke te hunune kol sune nem ngaria kou te mete lochloch lo.” <sup>21</sup> Pomalam Iosep lohaka pe mene kol sune nem iri nai tana pe tela mule nge Israel.

<sup>22</sup> Pe Iosep matau nena nge la mule iange longe nge te teke ne Akelos mene mule temene munna ke i non palau pe nauele mule kileng nenge Iutea. Ol pe ma opene mule pe te hele lange i ke lange Kalelea <sup>23</sup> pe la tetu nga kileng nenge Nasaret. Pomalam NeHalang na helenga nenge hetatalonga mur te hele hote lohohot ke manmanna. Nenge hele ke teke, “Lape te hetue I ke nena nge Nasaret.”

## 3

### *Ioanes Nenge Henunun Nena Hengetoro*

(Mak 1:1-8; Luk 3:1-18; Ioa 1:19-28)

<sup>1</sup> Iok, nga etue nemur Ioanes nenge henunun la ke haliuliu nga ich sana lomona nenge Iutea <sup>2</sup> ke teke, “A hulua letemo nga lemo poinga mur iange NeHalang nena nualanga pe nekinga heroi lo.” <sup>3</sup> Ioanes nenge henunun laka nenge hetatalonga Isaias heleia ke teke,

“Non e kou haliuliu nga ich sana lomona ke teke,  
‘A tatalo ele Non Soke na kue pe a poia ke pengpeng toto.’”

<sup>4</sup> Pe Ioanes na hengeron te ume ia nga kamel pulpulna pe ana tal nenga luana te ume hote nga huros mur uliria. Pe ana ngaunga laka sis pe misou eina. <sup>5</sup> Pe hulua lochloch ngana nge Ierusalem pe nge Iutea pe nga kileng lochloch ngana nga ech Iortan te longe i pe te eukirau ke tela lochloch nge i. <sup>6</sup> Pe te hulua leteria pe te hele hote reia poinga poreke ngana mur pe Ioanes henun sapele iri nga ech nge Iortan.

<sup>7</sup> Pe Paresio mur pe Satusi mur tela pule nga kileng nenge Ioanes henunun hehei pe hana ia. Ol pe Ioanes esia iri pe hele lange iri ke teke, “Ilimo alete nemur itei toto nenge hemataua imo ke a ua nga NeHalang letena inin ngana nenge atat mam? <sup>8</sup> A poia ute hel ke henonou hote imo nge a hulua letemo lo. <sup>9</sup> Eh! Imo a teke Apraham na tete mur imo ke lape NeHalang renge imo ae? Ero toto laka! E hele lange imo pengpeng NeHalang nakuna nge mene um nemur pe poia iri ke te lohohot ke Apraham na tete mur ia iri! <sup>10</sup> Pe e hele lange imo pengpeng, ila kou ma nga ae huna lo pe lape te ris heke ae mur nga ularia.

**2:18:** Gen 35:19; Jer 31:15    **2:23:** Isa 11:1; 53:2; Luk 2:39; Ioa 1:45    **3:2:** Mat 4:17; Mak 1:15  
**3:3:** Isa 40:3    **3:4:** 2Ki 1:8    **3:7:** Mat 12:34; 23:33    **3:9:** Ioa 8:33, 39; Rom 4:12    **3:10:** Mat 7:19; Luk 13:6-9    **3:11:** Ioa 1:26-27, 33; Ume 1:5

Ae nemur nenge te hei pe nganangaria urana ero lape te tele sue iri pe tesau heke iri langa oan.

<sup>11</sup> “Tau e henun mene imo nga ech. Pe poinga nem henonou hote ke ahul mule letemo nga lemo poinga poreke ngana mur lo. Pe I nenge nanasia iau lape henune imo nga Opepengpeng pe nga oan. Ana Non I palaungana toto nge iau. Pe iau e urana ero pule nge e mene apena ana ae ulina. <sup>12</sup> Pe I rahite nena sulinga lo nenge lape sulhote uit nganngana mur nga kina. Pe uit nganngana nemur lape takiraua iri ke nek nga ana pele. Pe uit kina nemur lape chacharuch heke iri langa oan nenge remen ngana tu ke kokoes mana.”

*Ioanes Henune Iesus  
(Mak 1:9-11; Luk 3:21-22)*

<sup>13</sup> Iok, Iesus lange Kalelea pe i ke langa ech nenge Iortan ke teke I pule mene henuninga nge Ioanes. <sup>14</sup> Pe Ioanes teke hulia Iesus letena pomalam hele ke teke, “Tau toinge e mene henuninga laka nge iong. Pe ngana iam o teke e henun mule iong mam! Pomerei mai?”

<sup>15</sup> Pe Iesus hele, “O henune iau ol. I urana nge e mene henuninga nge iong pomalam lape ure lochloch ngana nenge NeHalang heleia lohote ke pengpeng.” Ol pe Ioanes longala ke henun sapele Iesus.

<sup>16</sup> Iok, Iesus mene henuninga ke het pe lohaka sapele. Pe nga etue neu pengpeng tapa sana ulala pe Iesus esia NeHalang opene nge nakuna manga ngie chaulum nge sio at ke to haka mana nge I. <sup>17</sup> Pe helenga e nge sio at nga tapa hele ke teke, “Nenge nei Iau tuk toto nenge lemek tau tote pe e iech toto nge i.”

## 4

*Non Poreke Ngana Olleke Iesus  
(Mak 1:12-13; Luk 4:1-13)*

<sup>1</sup> Ke het Opepengpeng poia Iesus ke i sapele ke langa ich sana lomona e

ke la non poreke ngana olleke i. <sup>2</sup> Pe Iesus mete ana toto lo iange ngau ero ke sinanga koana iri ana non kina nai (40) pe miliko iri ana non kina nai (40) lo. <sup>3</sup> Pe non poreke ngana la pe olleke i ke teke, “Nenge teke iong NeHalang tuna o hele langa um nemur ke tehul ke iri ngaunga.” <sup>4</sup> Pe Iesus tuacholia pe hele, “NeHalang nena helenga nenge tehas sue ke ulolo, hele ke teke, ‘Non e tu ke maulul nga ngaunga mana ero. Nenge teke mele rahit lochloche helenga mur nenge lohote nga NeHalang hanna pengpeng mele nem lape tu ke maulul.’ ”

<sup>5</sup> Ol pe non poreke ngana neu mene sapele Iesus ke langa tuele tana palaungana nge Ierusalem. Pe mene heke i langa NeHalang na pele palaungana ona nga lut toto. <sup>6</sup> Ol pe hele lange Iesus ke teke, “Nenge teke iong NeHalang tuna toto o tamu hot nga lamai ke osio langa ich. Lange NeHalang nena helenga nenge tehas sue ke ulolo, hele ke teke, “ ‘NeHalang lape heleia iong lange nena angkelo mur ke te rahit heke mene iong nga peria.

Pe lape otut hule apem nga um ero.’ ”

<sup>7</sup> Ol pe Iesus tuachol mule lange i ke teke, “NeHalang nena helenga mur nenge tehas sue ke ulolo, hele pule ke pomai, ‘O olleke am Soke NeHalang ero toto.’ ”

<sup>8</sup> Ol pe non poreke ngana neu mene heke Iesus langa hengene e nge haka langa lut toto pe henonoua I langa kileng lochloch ngana nga ich pe reia kerkerenga mur. <sup>9</sup> Pe hele lange Iesus ke teke, “Nenge teke o tualou sio pe o heto heke iau lape e tunge ure lochloch ngana nemur lange iong.”

<sup>10</sup> Pe Iesus tuacholia lange i ke teke, “Iong Satan! O ua toto nge iau. NeHalang nena helenga mur nenge tehas sue ke ulolo, hele ke teke, ‘O heto heke am Soke NeHalang pe o ume mana nge i.’ ”

<sup>11</sup> Ol pe non poreke ngana neu ua ke la ol pe angkelo mur teat ke te halaua Iesus.

*Iesus Talune Ana Ume Nge Kalelea  
(Mak 1:14-15; Luk 4:14-15)*

<sup>12</sup> Iok, nga etue nenge Iesus longe Ioanes pingana nge tu nga tuele au ngana, lohaka pe la sapele nge Kalelea. <sup>13</sup> Iesus hile kileng nge Nasaret pe la ke tu nge Kapernam. Pe kileng nem tunga ech hetaliliu ngana palaungana nenge Kalelea ilina. Nga ich nenga mata nenge Sepulun iri nai Naptali. <sup>14</sup> Pe Iesus poingana nem lohote ke pete tote ure nenge hetatalonga Isaias heleia lo. Ke hetatalonga Isaias hele ke teke,

<sup>15</sup> “Ich Sepulun pe Ich Naptali nga kue tana nenge langa ech hetaliuliu ngana palaungana nenge Kalelea pe nga ech Iortan ilina hele kileng Kalelea nenge hana lomonmona ngana mur te tuia.

<sup>16</sup> Nga lamau hehei pe hana nenge tetu nga kileng au ngana lape te esia lemenga palaungana. Pe iri nenge metenga ana mulil ma hite iri lemenga nem tualeme hatalia iri pule.”

<sup>17</sup> Iesus talun ke hetoro nga etue neu pengpeng pe haliu ke teke, “A hulia lemo poinga poreke ngana muriange NeHalang nena naualanga pe nekinga heroi lo.”

*Iesus Talun Ke Iua Nena Hana Mur  
(Mak 1:16-20; Luk 5:1-11)*

<sup>18</sup> Iok, Iesus i olole nga ech ilina nge Kalelea pe esia hana nai. Hana nai neu titiria hel. Ngana laka Simon nenge te hetue ke Petrus iri nai tina Antreas. Iri nai te hesisio hoat nga ruach sana iange iri hana nenge te holole ruo. <sup>19</sup> Pe hele lange iri nai, “A i at ke a nanasia iau pe e poia imo ke aole hana pule!” <sup>20</sup> Ueieui mana

iri nai te hile sue aria hoat pe tela ke te nanasia Iesus. <sup>21</sup> Iok, tei ole nga lamau ke telala pe Iesus esia hana nai pule. Iri nai titiria hel pule. Elle ene Ieims pe elle ene Ioanes. Pe iri ne Sepeti tutuna mur ia iri. Iri nai te manmana nga aka e pule luluch nge temeria Sepeti ke te palalala aria hoat. Iesus iua iri nai <sup>22</sup> pe ueieui mana te hile sue temeria luluch nga aria hoat pe tela ke te nanasia Iesus.

*Iesus Hetottoro Pe Hemasmas  
(Luk 6:17-19)*

<sup>23</sup> Iok, Iesus i ke langa kileng lochloch ngana nge Kalelea ke hetottoro nga pele heteronga mur. Pe haliu hote helenga urana ngana nga NeHalang nena naualanga pe nekinga. Pe pule hemasmasia hehei pe hana nga aria haleles mur. <sup>24</sup> Ol pe Iesus pingana song ke te longe nga kileng lochloch ngana nge Siria. Pomalam te mene iri nenge aria haleles kuenkuena ke te laia iri nge I. Iri nenge te amneia inin palaungana pe iri nenge uneinei tetu nge iri pe iri nenge singiria loiloilo pe iri nenge singiria metmete pe te laia iri nge Iesus ke hemas mule iri. <sup>25</sup> Ol pe hulua lochloch ngana nga kileng nenge Kalelea pe Tekapolis pe Ierusalem pe Iutea pe nga kileng nenge tu nga ech Iortan ilina hele te nanasia Iesus.

## 5

*Iesus Hetore Hehei Pe Hana*

<sup>1</sup> Iok, Iesus esia hulua nemur pe i haka ke la are nga sasana ilina. Ol pe nena hana mur tela nge I <sup>2</sup> pe talun ke hetoro sapele iri. Pe hele,

*Iechinga Nenge Manmanna  
(Luk 6:20-23)*

<sup>3</sup> “Iri nenge te eteia ke reria ute e ero toto nga NeHalang matana te iech toto iange lape tetu teu langa NeHalang nena naualanga pe nekinga.



- 4 Iri nenge te tangtang heueu nei te iech toto ol iange lape NeHalang hemaluch mule leteria.
- 5 Pe iri nenge tetal sio totote iri te iech toto ol iange lape NeHalang tunge ich lochloch lange iri.
- 6 Iri nenge muteria tau tote NeHalang lemene ngana ke pomanga muteria taua ngaunga pe ech te iech toto ol. Iange NeHalang lape poia iri ke saria huna.
- 7 Pe iri nenge leteria porekreke ia pekngaria mur te iech toto ol iange lape NeHalang letena porekeia iri pule.
- 8 Pe iri nenge leteria lemlem te iech toto pule iange lape te esia NeHalang.
- 9 Pe pule iri nenge te hemetmete palinga hel pe hunelinga te iech toto iange lape te hetue iri ke NeHalang tutuna mur ia iri.
- 10 Pe iri nenge te nanas ia poinga nge pengpeng pe mele hel te poi poreke iri te iech toto iange lape teteu la pule nga NeHalang nena naualanga pe nekinga.
- 11 “Pe imo nge a nanas ia iau pe te hele poreke imo pe te tunge amo melmelenga pe te channanga ia hehei pe hana nga helenga poreke ngana mur ke te heporeke imo  
12 letemo sio pe a iech toto iange urumo palaungana kou kulele imo nga lut nga tapa. Pe poinga nenge te poia lange imo nem te poi tele lange hetatalonga mur nenge tetu tala nge imo.”

*Mesmes Pe Lemenge  
(Mak 9:50; Luk 14:34-35)*

13 “Imo a pomanga mesmes nge hehei pe hana nga ich nei. Pe nenge teke mesmes nem lemene ngana het

lape ta poia ke mesmes mule ke pomere? Lape ana ume ero ol. Pomalam lape ta sau pe ta hepapar hite ke lasus.

14 “Pe imo a pomanga lemene nenge tualeme hatalia ich nei. Nenge teke te ume heke tuele tana palaungana e nga sasana, kileng nem talkome ero toto. 15 Mele pele tonge lemene pe hekom ite nga kaliu e ero. I lape heon heke nga ana heoninga ke tualeme hatal ia iri lochloch ngana nenga pele letena. 16 Ke pomalam mana imo a tualeme pule ke hehei pe hana te esia imo. Pe lape te esia lemo poinga urana ngana mur pe te heto heke Tememo nga lut nga Tapa.

*Hemallaha Nga Nenga Hotonga*

17 “E at ngak nei e at ke e sisparai ia Moses nena hotonga mur pe hetatalonga mur te hetoro ngaria mur ero. E at ngak pete tote iri. 18 E hele pengpeng lange imo! Tapa pe ich nei lape te het. Pe hasinga elle munna kinkino ngana nemur unne lape erue ero toto. Hotonga nemur lape tetu ke te rorol lochloch ke la het nga etue nenge helenga nemur nganangana lohote ke manmanna. 19 Nenge teke mele longo ole taua helenga nenge hotonga sune e hele ia pe hetore mele hel pule ke te longo ole, mele nem pingana lape iuiu ero toto nga NeHalang nena naualanga pe nekinga nenga tapa. Pe mele nenge nanas tau tote hotonga nemur pe hetottore lala nge mele hel, mele nem lape ene song ke palaungana toto nga naualanga pe nekinga nenga tapa. 20 E hele lange imo, nenge teke a nanas tau pengpeng ia NeHalang lemene ngana ero pe lemo poinga urana ngana ris-tote poinga urana ngana nenge Pare-sio mur pe hotonga ana hengetoro mur ero lape ateu langa naualanga pe nekinga nenga tapa ero toto.

*Hetorong Nenge Leteinin Ana*

21 “A longe lo nge nike te hele lange hehei pe hana ke te teke, ‘O hune mele ero toto. Pe nenge teke mele hune mele lape tenau teu langa poinga nenge mele nem poia ke nek toto.’ 22 Pe e hele pengpeng lange imo. Mele nenge letena inin tau mule tina e, mele nem lape tenau teu lange i ke nek toto pule. Pe nenge teke o hele poreke tim e, lape hana papalauna tenau teu lange iong pule nga lem poinga nem. Pe nenge teke o hele ia mele ke ana hauaua, o nekia iong iange lape osio langa oan ngingina ngana.

23 “Pomalam nenge teke o lala ia lem tunginga nenge lala nga NeHalang nena hatanga pe letem metene tim e nge poia poinga e lange iong 24 otal sue lem tunginga mur nga hatanga ilina mukam. Pe ola nge neingam nem ke imo nai a sisa perimo mukam. Ke het pe oat mule ke o tunge lem tunginga lange NeHalang ol.

25 “Pe nenge teke lem ngarang e mene iong ke la ames nga hana nenge te longlongo helenga mataria, a i olole nga kue kura pe a hepeng hote nike. Ke a sisa perimo pe a nauel mule ke nek. Pe nenge teke ero lape lem ngarang nem tunge iong langa hana nemur peria pe hana nemur lape te tunge iong lange non papal hussu e ke tamal teua iong langa tuele au ngana. 26 Pe e hele ke manmanna toto lange iong lape o lohot ero toto ke la het nga etue nenge o saua umtutuna lochloch nenge te teke o saua.

### *Salaunga Ana Poinga*

27 “Iok a longo, nge nike te teke, ‘Oma luluch nge none nehei ero.’ 28 E hele lange imo, mele nenge esia heie pe memelei ia pe letena tuanin mana ke teke ma luluch nge i nga letena nge teu, poia poinga poreke ngana nem ke het lo. 29 Ke nenge teke matam

nenga pen tamalmal poia iong ke o losio nga poinga poreke ngana o sulhote ke lasus. Pomalam singim unne elle mana lape lasus ol. Pe nenge teke ero lape te sausue iong pe singim lochloch ke langa oan ngingina ngana. 30 Iok, nenge teke perim nenga pen tamalmal poia iong ke o losio nga poinga poreke ngana o chato hote pe o saua ke lasus. Urana toto nge o hile hote singim unne ke lasus. Pe nenge teke ero lape tesau sue singim lochloch ke langa oan ngingina ngana.

### *Hilenga Hel Nga Leinga*

(*Mat 19:9; Mak 10:11-12; Luk 16:18*)

31 “Iok, te heleia pule ke te teke, ‘Nenge teke none lemene ke hile nehei non nem tung tele helenga toto e nga alalaha ke lange nehei. Iange alalaha nem hele tote iri nai aria leinga nge lape het.’ 32 Pe e hele lange imo pengpeng mele nenge hile nehei lape poia hei nem ke la pingana hota mule nge none. Pe hei neu poi ke mau iange ure huna nge iong non nenge o hile i nem. Ke iong non nem o eteia ke iong sipom o heporeke amo leinga. Ure huna nenge o teke o hile lem hei ngana koi nei; Nenge teke lem hei ma luluch nge none ke pingaria hota o hile sapele i. Pe non nenge lei heke mule hei nem lape amneia ke poreke toto iange nanas ia hotonga nenga leinga ero.

### *Ta Hekerkereng Ia Helenga E Nga NeHalang Ene Ero*

33 “Iok, pule a longe lo nga helenga nenge te heleia lange ratete mur nge nike. Te teke, ‘Nenge teke o hele ke manmanna lange NeHalang ke o poia ute e, o poia ure nem ke lohot ke pomanga o hele ngam pe o pallaka ero iange Non Soke esia iong ke ulolo.’ 34 Pe e hele lange imo pengpeng, o teke o hele, o hetue kileng nga lut nga tapa ke hekerkereng ia lem helenga

ero iange NeHalang na arenga nge heo ngana toto tu nga lut nga Tapa. <sup>35</sup> Pe pule o hele pe o hetue ich ke hekerkereng ia lem helenga ero iange ich nei NeHalang nena ure nge ala hote ke apena ma haka ia. Pe pule o hele pe o hetue kileng nge Ierusalem ke hekerkereng ia lem helenga ero iange Non Soke nenge i naungaala ana non soke toto laka na kileng nem. <sup>36</sup> Pe pule o hele ke manmanna toto nga palpalum ero iange o purpur ero toto nge o hulua palpalum ina elle ke hussu pe muna. <sup>37</sup> O hele ke pengpeng mana. O hele ke 'Oe' ma o hele ke 'Ero'. Iange helenga nemur nenge otal teu luluche langa lem helenga nenge 'oe' pe 'ero' nem non poreke ngana laka tunge lange iong ol.

*O Tuachol Mule Lange Mele Ero  
(Luk 6:29-30)*

<sup>38</sup> "Pe pule a longe lo nenge te teke, 'Nenge teke mele pal ele matam iong o pal ele matana pule. Pe nenge teke mele pal hoa ngingim iong o pal hoa ngingina pule.' <sup>39</sup> Pe e hele lange iong pengpeng o tuachol mule lange mele nenge poi poreke iong ero. Nenge teke mele tepele sose iong o hulua iong ke tepele iong nga ele pule. <sup>40</sup> Pe nenge teke mele hemes teua iong langa tuele nenge te longlongo helenga ia pe teke mene lem hengeron nenge teu ana o tunge lem hengeron nenge ot ana lange i pule. <sup>41</sup> Pe nenge teke mele echia iong ke o puotaua i ke sase pol o puotaua i ke sase toto. <sup>42</sup> Pe nenge teke mele onteia iong nga ute o tunge lange i. Pe pule nenge teke mele lemene ke hanok ia ute nge iong, o tunge ure nem lange i pule.

*Lememo Taua Iri Nenge Tepoi Poreke Imo  
(Luk 6:27-28, 32-36)*

<sup>43</sup> "Pe pule a longe lo nenge te teke, 'Lememo tau mene neingamo mur pe apoi poreke lemo ngarang

mur.' <sup>44</sup> Pe heueu nei e hele pengpeng lange iong. Lemem taua lem ngarang mur. Pe iri nenge te tunge amo melmelenga o hetalaulau aria nge NeHalang ke halaua iri. <sup>45</sup> Nenge teke apoi ke mai Tememo nga lut nga tapa tutuna mur toto imo. I sipona poia chaia matana ke haka ke tua hatal ia hana uranrana ngana mur pe nge hana porekreke ngana mur pule. Pe poia pitte ke sio nge hana nenge te nanas ia poinga nge pengpeng pe nge hana nenge te popoi poinga porekreke ngana mur pule. <sup>46</sup> Nenge teke lemem taua mele nenge lemene taua iong lape o mene urum unne ero toto. Hana nenge te lololoch umtutuna te popoi ke pomalam pule. <sup>47</sup> Pe nenge teke o apala hot mene neingam mur utar nge urana toto nge o poia? Hana nenge te eteia NeHalang ero iri te poi ke urana toto lala nge pekngaria mur. <sup>48</sup> Ke imo lochloch a hepengpeng ia imo pe a poia ure ke lohote ke pengpeng ke pomange Tememo nga lut nga tapa I non nge pengpeng toto.

## 6

*Poinga Nenge Ta Halaulaua Iri Nenge Reria Ure Ero*

<sup>1</sup> "Iok, letemo matana ke nek toto. Nenge teke a poia poinga urana ngana mur a poia pe a hemallaha hote ke hulua te esia ero. Iange nenge teke o hemallaha hote lape o mene urum unne nge Temem nga lut nga tapa ero.

<sup>2</sup> "Ke nenge teke o tung ure lange mele hel nenge reria ero o iua ana ngalum paena ero. Iange hana nenge aria hengetau nachnai te popoi ke pomalam. Te popoia poinga nem nga pele heteronga mur pe nga kue matana mur ke te teke hehei pe hana te heto hekeke iri. Pe e hele lange imo pengpeng iri te mene ururia mur ke het lo. <sup>3</sup> Ke nenge teke a tung lange mele hel nenge reria

ure ero <sup>4</sup> apoi kome tote ke perimo nenge hoihoi eteia ure nenge perimo nenge tamalmal popoia ero. Pomalam lape a mene urumo nge Tememo. Iange I esia ure lochloch ngana nenge talkomkome.

*Iesus Hetore Ita Nga Hetalaulaunga*

*(Luk 11:2-4)*

<sup>5</sup> “Iok, nenge teke a hetalaulau apoi ke mange hana nenge aria hengetau nachnai ero. Iri lemeria toto nge temes ke te hetalaulau nga hetorongana ana pele letena pe nga kue ilinlina mur ke te teke hehei pe hana te esesia iri. Pe e hele lange imo pengpeng iri te mene ururia lochloch ke het lo. <sup>6</sup> Pe imo nenge teke a hetalaulau ateu langa lemo pele nga mulimo nenge a mamaia pe a hetalaulau lange Tememo nenge ta esia I ero. Pe Tememo esia ure nenge apoi kome pe nga hoena lape tunge urumo ol. <sup>7</sup> Iok, hana hel leteria manmanna nge NeHalang ero. Pe nenge teke a hetalaulau apoi ke ma nge iri ero. Iange iri te hetalaulau pe te heleleia helenga mur halang nenge luna ero pe te olole ke sasase toto. Pe te teke lape aria non soke longe iri nga reria helenga lochloch ngana nemur. <sup>8</sup> A poi ke mange iri ero toto. Iange a onteia Tememo ero kura pe I etei ia ure nemur lo nenge lape a onteia.

<sup>9</sup> “Ke nenge teke a hetalaulau, a hetalaulau ke mai koi; “Tememem nga lut nga tapa em pengpeng toto.

<sup>10</sup> Lem naualanga pe nekinga at ke mo longo taua iong lakoi nga ich ke pomanga te longo taua iong nga lut.

<sup>11</sup> O tunge emem ngaunga nga lapa pe nge he pe.

<sup>12</sup> O tuacholia nge imem ero ke pomanga mo tuacholia ero nge iri nenge te poi poreke imem.

<sup>13</sup> O poi ele imem nga olenga

pe o hu hele ure poreke ngana mur nge imem.’

<sup>14</sup> Iange nenge teke letem ia mele nenge poi poreke iong lape Temem nga lut nga tapa lape letena ia iong pule. <sup>15</sup> Pe nenge teke letem ia iri nenge te poi poreke iong ero Temem lape letena porekeia iong nga lem poinga poreke ngana mur ero pule.”

*Poinga Nenge Aheo Nga Ngaunga*

<sup>16</sup> “Nenge teke oheo nga ngaunga o henonou hote nakum usus ngana ero. Iange hana nenge te channanga hali te popoi ke pomalam. Nenge teke teheo nga ngaunga te hemalaha hot tote lange hehei pe hana ke nakuria usus toto. Pomalam te eteia ke hana nemur teheo nga ngaunga. Pe E hele lange imo. Hana nemur te mene ururia mur lochloch ke het lo. <sup>17</sup> Nenge teke oheo nga ngaunga o lome matam pe o helelem heke singim <sup>18</sup> ke hehei pe hana te eteia ero nge oheo nga ngaunga. Pe Temem nenge ta kolkolia lape tunge urum nga hoena ol. Iange I toro mana nge esia ure lochloch ngana nenge talkome.

*NeHalang I Urana Toto Nga Umtutuna*

*(Luk 12:33-34)*

<sup>19</sup> “Pe a takiraua lemo ure urana ngana mur nga ich nei ero. Iange lape kankan te ngau hule pe lape tema sakilil pe singiria karkare hulu. Pe pule lape kemenge kina mur te tamu teu ke te kemeia iri. <sup>20</sup> Nenge teke a takirau lemo ure urana ngana mur a takiraua lakou nga lut nga tapa. Iange kankan lape ngaua ero pe ure hel te heporeke ero. Pe pule kemenge kina mur lape te kemeia ero. <sup>21</sup> Pomalam lape letem tu hit mene kileng nenge lem ure urana ngana mur te maia.

*Lemenge Nenga Singira*

*(Luk 11:34-36)*

<sup>22</sup> “Matara i lemenga nenga singira. Nenge teke matam te urana mana singim lochloch lape tualeme. <sup>23</sup> Pe nenge teke matam te poreke singim lochloch lape tu ke au mana. Ke nenge teke lemenga e ero nga singim pe singim au mana lape au nem puo ke palaungana pe au hit sapele iong.

*NeHalang pe Rera Ure Mur  
(Luk 16:13; 12:22-31)*

<sup>24</sup> “Mele pele ume nge hana nai ero. Iange lape lemene ero ia e pe lemene taua e. Nem pe la ke nanas mene e pe nau sio mene e. Mele nenge lemene tau tote umtutuna nakuna ero nge ume nge NeHalang.

<sup>25</sup> “Ke pomalam e hele lange imo letemo meena sakilil nga atu ngamo nga ich nei ero. Nga utar nenge lape a ngaua pe a inia pe nga utar nenge lape a heron hite nga singimo. A maul ngamo i ure nenge palaungana toto nga ngaunga pe singimo i ure nenge palaungana toto nga hengeron mur. <sup>26</sup> A nau haka langa ngie mur nga lut. Iri tetua ngaunga ero pe te lulu erochro. Pe pule te takirau teueu ngaunga nga ana pele ero. Pe Tememo nga lut nga tapa hengaungaua iri kura. Pe ngie nemur iri ure nenge palaungana nga NeHalang matana ero. Ngana laka imo lo. <sup>27</sup> Iok, nenge teke letemo meena sakilil amo tei nge imo purpur nge tom ia ana etue nenge meteia ke elela polpol? <sup>28</sup> Pe pomere nenge letemo meena sakilil ia hengeron mur? A nau langa ae rorana mur nga ume. Iri te poia ume palaungana e ero pe iri siporia te sime ariatal nenge te hemale hite nge iri ero. <sup>29</sup> Pe e hele lange imo pengpeng Ne Solomon heron heke nena hengeron urana ngana mur pe i nakuna urana ero iange ae rorana nemur nakuria urana toto nge i. <sup>30</sup> Pe NeHalang Isipona hemele heilil lochloch ngana

nenge tetu nga uraurau. Pe heilil nemur tetu ke te maulul heueu pe nge rou tesau heke iri nga oan. Ke pomalam imo nenge letemo manmanna ngana unne sune mana a etei tote ol ke NeHalang lape hemele imo pule! <sup>31</sup> Letemo meena ero pe a hele ke pomachmai ero: ‘Lape ta ngaua ara utar mai ol? Pe lape ta in langai mai? Pe lape ta heron ia utar?’ <sup>32</sup> Melehel nenge te eteia NeHalang ero toto lape te song ke te tango rere ure nemur. Pe Tememo nga lut nga tapa eteia lo ure nemur nenge purpur ero nge imo. <sup>33</sup> Ure nenge toi nge lememo tau tele ngana laka NeHalang nena naualanga pe nekinga pe pule nena poinga nenge pengpeng toto. Ol pe NeHalang lape tunge ure lochloch ngana nemur lange imo. <sup>34</sup> Pomalam letemo tuanin rara sakilil nga utar nenge lape lohote nge rou ero. Etue nenge rou nem i sipona letena tuaninin nge i sipona. Ke ure meena ngana mur te lohote ke te purpure etue elle pe elle.

## 7

*A Henonou Perimo Lange Mele Ero  
(Luk 6:37-38, 41-42)*

<sup>1</sup> “A henonou perimo lange mele hel ero toto. Mele nenge henonou penna lange mele NeHalang lape henonou penna lange i. <sup>2</sup> Kue nenge a henonou perimo lange mele hel kue nem mana NeHalang lape poia lange imo pule.

<sup>3</sup> “Pomere nenge o esia ae mumuna unne sune nge ma ele neingam matana pe o kolkolia ae chonna palaungana nenge ma ele iong sipom matam? <sup>4</sup> Pomere nenge ae chonna palaungana ma ele matam pe o hele lange neingam e neu ke o teke o poi hote ae mumuna unne nenge ma ele matana? <sup>5</sup> Iong am hengetau nai iam teke poi pe o mene hot tele ae chonna palaungana nenge ma ele matam mukam. Ke het o nau ke nek pe o poi



hote ae mumuna unne sune nenge ma ele neingam e nem matana ol.

<sup>6</sup> “Lemo ure urana ngana mur nenge heo ngana a tunge lange kaone mur ero. Pe lemo holonga mur a tamal sue lange kie mur ero. Iange lape te hepapar hulu hit mene pe te ringha taua imo pe te lata hule imo.

*Ta Onteia NeHalang*  
(Luk 11:9-13)

<sup>7</sup> “O ontei pe lape NeHalang tunge lange iong. O tango rara pe lape o hottaua. O ischong nga piunga pe piunga nem lohe lange iong. <sup>8</sup> Ke iri nenge te onteitei te menmene pe iri nenge te tango rarara te hottautau pe iri nenge te ischongchong nga piunga lape piunga olha lala nge iri.

<sup>9</sup> “Amo tei nge imo nenge teke tuna tamane ngana e ontei loi lange i pe tunge um lange tuna? <sup>10</sup> Nem pe tuna ontei ruo pe tunge ilimo lange i? <sup>11</sup> Imo hana poreke ngana nemur a eteia utar nenge urana nge lape a tunge lange tutumo mur. Ke pomalam a etei tote ol ke Tememo nenga lut nga tapa lape tunge ure urana ngana mur lange iri nenge te onteitei lala nge I.

<sup>12</sup> “Pe nga ure lochloch poinga urana ngana mur nenge lememo ke mele hel te poia lange imo a poia lange iri pule. Moses nena hotonga mur pe hengetoro nenge hetatalonga mur luna toto koi nei.

*Piunga Matana Nenge Kino Pe Nenge Soke*  
(Luk 13:24)

<sup>13</sup> “Iok, imo a i teu laka nga piunga matana nenge kino. Iange piunga nenge soke pe ana kue mallaha pe song ke langa oan ngingina ngana. Pe hulua halang toto te i teueu nga piunga nem. <sup>14</sup> Pe piunga nenge kino ana kue tuna mana pe mallaha ero. Pe kue nem song ke langa maulinga

ke koko ana kileng. Pe iri hel mana te saolia kue nem pe te nanasia.

*Hana Nenge Te Pallaka Ke Te Teke Iri Hetatalonga*  
(Luk 6:43-44)

<sup>15</sup> “Iok, a nauala amo ke nek nge hana nenge te channangnanga ke te teke iri hetatalonga mur. Iri lape teat nge imo pe te maluch ole mene imo ke pomanga sipsip mur. Pe i nge ero la. Nga leteria nge teu te poreke toto ke pomalaka nga kaone hinolo mur. <sup>16</sup> Lape a etei tote iri ke nek laka nga reria poinga mur ol. A nau at, uain nganangana te sohe hote nga kiki tana ero. Pe ae Popi nganangana te sohe hote nga heilil nenge memesanga ngana halang ero. <sup>17</sup> Ke pomalam mana ae nenge urana lape nganangana mur te urana mana pe ae nenge poreke lape nganangana mur te poreke. <sup>18</sup> Ke ae nenge urana nakuna ero nge nganangana poreke. Pe ae nenge poreke nakuna ero nge nganangana urana pule. <sup>19</sup> Pe ae nemur nenge nganangaria te poreke lape te tele sue iri pe tesau heke iri langa oan. <sup>20</sup> Ke pomalam mana lape a eteia hana nemur nga ure nemur nenge te popoia.

*Lape Non Soke Eteia Imo Ma Ero?*  
(Luk 13:25-27)

<sup>21</sup> “Hulua lape te hetue iau ke ‘Non Soke Non Soke’ pe iri lochloch lape teteu la ero toto nga naualanga pe nekinga nga lut nga tapa. Iri nenge te nanas taua Temek nenge tu nga lut lemene ngana iri mana lape teteu langa naualanga pe nekinga nenga tapa. <sup>22</sup> Pe hulua lape te hele at nge iau nga NeHalang nena haliunga ana etue nem ke mai, ‘Non Soke, Non Soke, imem mo haliu hote iong pe mo helope hote uneinei mur pe mo poia urelu mur ke te lohohot nga iong em pule i.’ <sup>23</sup> Pe lape e hele ke mallaha toto lange iri ke e teke, ‘Imo nemur,

**7:7:** Mak 11:24; Ioa 14:13; 15:7; 16:23-24    **7:8:** 1Io 3:22; 5:14-15    **7:11:** Iei 1:17    **7:12:** Mat 22:39-40; Luk 6:31; Rom 13:8-10    **7:15:** Mat 24:24; Ume 20:29; 2Pi 2:1    **7:16:** Kal 5:19-22; Iei 3:12  
**7:19:** Mat 3:10; Luk 3:9; Ioa 15:6    **7:20:** Mat 12:33    **7:21:** Luk 6:46; Iei 1:25    **7:23:** Psa 6:8; 2Ti 2:19

e eteia imo ero toto. A ua toto nga matak. Imo hana porekreke ngana mur iam.’

*Hana Nai Te Hemes Pele*  
(Luk 6:47-49)

<sup>24</sup> “Ke pomalam iri nenge te longe lek helenga mur pe te nanas taua te poi ke pomanga non nenge letena matana ke hemes heke na pele nga um. <sup>25</sup> Pe nga etue nenge pitte molmol pe ech hotot pe tuttula at ke tah teu nga pele neu pe pele nem losio ero. Iange ana pele mes haka nga um ke kerkereng toto. <sup>26</sup> Pe iri nenge te longe lek helenga pe te nanas taua ero te poi ke pomalaka nge non nenge letena matana ero pe hemes sio mene na pele nga peipei. <sup>27</sup> Pe nga etue nenge pitte molmol pe ech hotot pe tuttula at ke tah teu nga pele neu pe pele nem hutu sio ke chach hulu.”

<sup>28</sup> Iok, Iesus hele ia ure nemur ke het pe hulua nemur leteria tuanin ke halang nga Iesus hetoro ngana. <sup>29</sup> Iange i hetoro ke pomanga hontonga ana hetoronga mur ero. Hetoro ngana pomalaka nga none nge na kerkerenga palaungana toto.

## 8

*Iesus Hemasia Non Sususun Kina E*  
(Mak 1:40-45; Luk 5:12-16)

<sup>1</sup> Iok laol, Iesus i sio mule nga sasana neu pe hulua halang toto te nanasia i. <sup>2</sup> Ol pe none nge haleles poreke ngana mene i lange Iesus. Non neu lake tualou sio nga Iesus matana pe hele, “Non Soke, nenge teke lememe o hemas mule iau ke singik lemlem mule.”

<sup>3</sup> Ol pe Iesus tul hot sapele penna pe la tal heke nge non neu pe hele, “Oe iau lemek. Singim lemlem mule ol.” Ueiuei mana pe haleles poreke ngana neu het sio sapele nga non neu singina. Haleles poreke ngana neu ngau hohoa singira. <sup>4</sup> Pe Iesus hele lange i ke teke, “Heueu o hele hote ure nei lange mele e ero toto. Ola ke o eteia iong lange tunginga ana none

ke poia tunginga nenge Moses hele ia nga hana nenge te urana mule. Ke nem lape henonou hote utar nenge e poia lange hehei pe hana.”

*None Letena Manmanna Ngana Nge Palaungana Toto*  
(Luk 7:1-10)

<sup>5</sup> Iok, Iesus la ke i teu nga kileng palaungana nenge Kapernam pe palinga hel ana hana mur aria soke e lake esia i pe hele lange Iesus ke halaua i. <sup>6</sup> Ke non soke neu hele lange Iesus ke teke, “Non Soke, lek non nenge umume nge iau kou ma mana nga pele. Singina inin hulu pe sachul rara ero toto.” <sup>7</sup> Pe Iesus hele, “Lape e la ke e hemasmasia i.”

<sup>8</sup> Pe palinga hel ana hana mur aria soke neu hele, “Non Soke, iau e urana ero toto nge o teu at nga lek pele. O hele mana pe lek non neu urana mule. <sup>9</sup> Iange iau pule hana hel tenau ele iau. Pe iau enau ele lek hana mur hel pule. Nenge teke e hele lange iri ke, ‘Ola,’ pe ana non la. Pe e hele lange i neu ke, ‘O iat,’ pe ana non i at. Pe e hele lange lek non ke, ‘O poia ure nei,’ pe i poia.”

<sup>10</sup> Iesus longe non neu nge hele ke mau pe letena tuanin ke halang. Ol pe hele lange iri nenge te nanasia i, “E hele ke manmanna toto lange imo, e hottaua none nge Israel nge poi ke mange non nei ero kura. Non nei letena manmanna ngana palaungana toto. <sup>11</sup> Hulua halang teat nga kileng hele nenga chaia haka ngana, pe nga chaia sio ngana pe la te kila ke te ngau luluch nge Apraham pe Isak pe Iakop, nga naualanga pe nekinga nenga tapa. <sup>12</sup> Pe hana nenge reria kileng neu toto, lape NeHalang lope hote iri ke la tetu nga kileng au ngana. Nga kileng nenge te tangtang pe ngingiria chatrekreke ia.”

<sup>13</sup> Ol pe Iesus hele lange palinga hel ana hana mur aria soke neu, “O laol, Ure nem lape lohote ke pomanga letem manmanna ngana nenge o teke lape lohote ke pomam. Ol pe

nena non nenge singina haleles neu, singina urana mule nga etue neu pengpeng.”

*Iesus Hemasia Hulua Hel Pule  
(Mak 1:29-34; Luk 4:38-41)*

<sup>14</sup> Iok, Iesus la ke i teu nga Petrus nena pele pe esia Petrus uene nge singina haleles ke ma nga hete. Ana hei singina milanglang. <sup>15</sup> Ol pe Iesus penna la ke rahite hei neu pe ana haleles het sio sapele. Pe hei neu lo haka pe tun sapele ngaunga pe hengaua Iesus. <sup>16</sup> Iok, nga ulei te laua iri nenge uneinei tu teu nge iri ke te laia iri nge Iesus. Pe Iesus hele pe helope hote uneinei nemur pe hemas mule iri lochloch ngana nenge singiria haleles. <sup>17</sup> Pe poinga nenge Iesus poia nem, poia ke pete tote NeHalang nena helenga e nge hetatalonga Isaias hele hote nge nike lo nenge hele ia ke teke, “Isipona amneia ara melmelenga pe takisia ara haleles mur.”

*Te Teke Te Nanasia Iesus  
(Luk 9:57-62)*

<sup>18</sup> Iok, Iesus esia hulua nge te heliliu hite I ke tom, pe hele lange nena hana mur ke teke te lotele langa kolkolu palaungana neu ilina hele. <sup>19</sup> Ol pe hotonga ana hetorong e la pe hele lange Iesus ke teke, “Hetorong, nenge teke o la ke merei, iau lape e nanas mene iong.”

<sup>20</sup> Pe Iesus hele lange i ke teke, “Kaone hinolo mur reria polo tu nga ich, polo nenge te mamaia. Pe ngie mur pule reria kiniu, pe Non Tuna munna e nge mama ia ero.” <sup>21</sup> Pe Iesus nena none hele ke teke, “Non Soke, e la ke e alo hite temek mukam, ke ulo pe e at ke e nanasia iong ol.” <sup>22</sup> Pe Iesus hele lange non neu ke teke, “Hana nenge te metmete pekngaria mur te alo hit mulmule iri. Pe iong o iat ke o nanasia iau.”

*Iesus Hemete Ruach Pe Tuttula Palaungana  
(Mak 4:35-41; Luk 8:22-25)*

<sup>23</sup> Iok, Iesus haka nga sulang e pe nena hana mur tela luluch nge I. <sup>24</sup> Te la ol pe kileng eingana haka sapele. Pe kileng eingana neu palaungana pe poia ruach ke poreke toto. Pe ruach ana mee teke hepuluch sue iri. Pe Iesus mamani. <sup>25</sup> Ol pe nena hana mur te hengo heke I pe te hele ke te teke, “Non Soke, o halaua ita ero kai? Ta metmete lo i!” <sup>26</sup> Pe Iesus hele, “Imo letemo manmanna ngana unne sune mana iam. A matau sakilil ia utar?” Ol pe Iesus lo haka pe hele ke kerkereng toto langa tuttula palaungana neu pe ruach poreke ngana neu. Ol pe tuttula palaungana neu het pe ruach poreke ngana neu ma ke mello mule.

<sup>27</sup> Ol pe hana nemur te esia pe leteria tuanin ke halang pe te hele, “Non nei mai i utar toto? Tuttula pe ruach te longo tau mene I.”

*Iesus Hemasia Hana Nai Nge Uneinei Tuteu Nge Iri  
(Mak 5:1-20; Luk 8:26-39)*

<sup>28</sup> Iok, Iesus lo tele la sapele nga kolkolu palaungana neu ilina hele nga Katara mur reria ich. Pe hana nai nge uneinei tu teu nge iri. Te lohot nga rika mur nenge hana koluria mur tema teu ia pe la te saolia Iesus. Pe hehei pe hana te matau tote hana nai neu ke te i rara nga lamau ero toto. Iange iri nai nakuria sisiling toto. <sup>29</sup> Iok laol, hana nai neu te alngaria sapele, “NeHalang Tuna, o teke oat ke o potaria ia imem? Emem etue nenge mo takisia emem melmelenga at ero kura.” <sup>30</sup> Pe kie ana tuangarung e te sesel ke sase ero mana nga iri te mes ngaria. <sup>31</sup> Ol pe uneinei nemur te echia Iesus, “Nenge teke o lope hote imem heueu, o kulosia imem ke mo teu heke kou kie ana tuangarung neu.”

<sup>32</sup> Ol pe Iesus hele lange iri, “Iok, a laol!” Ol pe uneinei nemur te lohot nge hana nai neu pe la ke teteu heke kie nemur. Pe kie ana tuangarung neu te song hot sapele langa

sasana neu ilina, pe te losio teu nga kolkolu neu pe te pulachlach ke te mete sapele. <sup>33</sup> Pe iri nenge tenau elele kie nemur te song sapele ke tela nga tuele tana pe te hele ia ure nenge lohohot nga kie nemur, pe pule nge hana nai nenge uneinei tu teu nge iri neu. <sup>34</sup> Ol pe hulua lochloch ngana nga tuele tana palaungana neu, te i ke la te lohohot nge Iesus. Te la te esia I pe te hele ke kerkereng toto lange I ke te teke, ua nga reria kileng unne neu pe la toto nga kileng unne.

## 9

### *Iesus Hemas Mule None Nge Singina Mete*

*(Mak 2:1-12; Luk 5:17-26)*

<sup>1</sup> Iok laol, Iesus lo haka mule nga sulang pe mana tele mule ke lange Kapernam, nga i sipona nena kileng huna. <sup>2</sup> Ol pe hana hel te takis ia none nge singina lochloch mete pe mamana nga tako. Pe Iesus esia hana nemur leteria manmanna ngana pe hele lange non nenge singina mete neu, "Letem huna sakilil ero ol. E saua lem poinga poreke ngana mur ke te lasus toto lo."

<sup>3</sup> Pe hotonga ana hetoronga mur hel, te hele chunuch mana nge iri ke pomai, "Non nei hele ngana pomalaka nga I NeHalang toto i. Poia helenga nei, heporeke tote NeHalang ene."

<sup>4</sup> Pe Iesus eteia leteria tuanin ngana mur ke ulolo. Ol pe hele ke teke, "Pomere nenge letemo inin ngana nem tu teu mana nge imo ke pomam?" <sup>5</sup> Helenga tei nge semel nge lape te heleia? 'E saua lem poinga poreke ngana,' ma nenge e teke, 'O mes haka pe o i.?' <sup>6</sup> Iau e teke e poia ke mam ke a eteia, ke Non Tuna na kerkerenga palaungana nga ich, nge saua hehei pe hana reria poinga poreke ngana mur ke lasus toto." Ol pe Iesus hele lange non nenge singina mete neu, "O mes haka pe o mene lem manga pe o i ke o la nga lem pele."

<sup>7</sup> Non neu mes haka pe i ke la sapele nga na pele. <sup>8</sup> Pe hulua lochloch ngana te esia ke pomau pe leteria huna pe leteria tuanin ke halang. Pe te heto heke tote NeHalang ene iange tunge kerkerenga palaungana nei at nge ita non.

### *Iesus Iua Mateus* *(Mak 2:13-17; Luk 5:27-32)*

<sup>9</sup> Iok, Iesus lo haka nga lamau pe i ole ke la pe esia none nge ene Mateus, nge arare nga hana nenge te lololoch umtutuna reria pele sune. Ol pe Iesus hele lange i ke teke, "O i at ke o nana-sia iau." Mateus lo haka pe nanas sapele Iesus.

<sup>10</sup> Iok, Iesus pe na hana mur teare ke te ngaungau nga Mateus na pele pe hana nenge te lololoch umtutuna pe hana porekreke ngana mur teate ke te ngau luluch nge iri. <sup>11</sup> Pe Paresio mur te esia ke mau pe te onteia Iesus nena hana mur ke te teke, "Pomere nenge amo hetoronga ngau luluch nge hana porekreke ngana pe hana nenge te lololoch umtutuna mai?"

<sup>12</sup> Pe Iesus longe pe hele, "Haleles kina mur mana tela nge non nenge hemasmas ia haleles kina mur, pe iri nenge singiria urana tela nge non nem ero. <sup>13</sup> Ala pe letemo tuanin hote helenga nei luna ke nek. 'Lemek ero ia lemo tunginga pa nemur nenge a makmak huros. Lemek ke letemo ia hehei pe hana.' Iange e at ke e iua hana porekreke ngana mur mana, pe hana nenge te urana e iua iri ero."

### *Onteinga Nga Hengeo Nga Ngaunga*

*(Mak 2:18-22; Luk 5:33-39)*

<sup>14</sup> Iok, Ioanes na hana mur teate pe te onteia Iesus ke te teke, "Pomerei nenge imem pe Paresio mur moheo nga ngaunga pe lem hana mur teheo ero?"

<sup>15</sup> Pe Iesus tuacholia ke teke, "Nenge teke none nge lei heueu ngana at ke kila luluch nge nena hana mur, hana nemur lape te iech ke elela. Pe nga etue nenge non



halangina nem i ero hatalia iri, hana nemur lape teheo nga ngaunga sapele.

16 “Mele pele mene malenga heueu ngana sachana, pe sima hite hengeron nike ngana chach ngana ero. Nenge teke poia ke pomam, lape malenga sachana heueu ngana nem ta chach mule. Pe ure chach ngana nem palaungana toto sapele. 17 Nenge mele ling teua uain heueu ngana ke langa meme ulina ke kina ia, ling teua langa meme ulina nenge nike ngana ero, iange meme ulina nike ngana nem sosolos lo, pe uain heueu ngana nem lape una haka ke hemute meme ulina sosolos ngana nem ke chach. Pe uain nem lape pasiling hot pe kina pule poreke ke lasus. Nenge urana laka, ling teua uain heueu ngana ke langa kina meme ulina nenge heueu ngana. Pomalam iri nai tetu ke urana.”

*Mele Hei Ngana Sune Nge Mete, Pe Heie Nge Haleles Poreke Ngana Poia I (Mak 5:21-43; Luk 8:40-56)*

18 Iok, Iesus helele kura pe non nenge nauelele pele heteronga neu, at ke tualou sio nga Iesus matana pe hele, “Tuk nenge hei pau kou mete heueu mana nei. Pe e teke o i at ke la otal heke perim nge i ke maul mule.” 19 Iok laol, Iesus pe nena hana mur te lo haka pe tela luluch nge non neu sapele.

20-21 Pe heie pule toho mala lohote nge i ke hesinga iri analoch pe nai lo. Pe ana hei helele nge i sipona ke teke, “Nenge teke e ra haka mana nga Iesus na hengeron, haleles nei lape het nge iau sapele.” Pomalam hei neu langa Iesus rumena pe rahaka nga Iesus nena hengeron ana horo.

22 Ol pe Iesus ralele pe esia i pe hele, “Hatong, letem huna ero ol. Letem manmanna ngana laka nenge hemaulia iong nga haleles nem.” Pe nga etue unne neu pengpeng haleles neu het sapele nge hei neu.

23 Iok laol, Iesus la ke i teu nga non nenge nauelele heteronga ana pele nena pele pe esia hana nge te iuiua iu pe hulua nge te chauchai rara ke halang. 24 Ol pe Iesus hele, “Imo lochloch ngana nem a ua! He nem mete ero iam, mamani mana laka.” Pe hulua nemur te melmel lil ia Iesus. 25 Iok, hulua nemur tela ke tetu nge hot pe Iesus teu la ke ra hite he neu nga penna. Ol pe he neu opene teu mule nge i pe lo haka sapele. 26 Pe ure nenge Iesus poia neu ana helenga song ke kileng lochloch ngana nenga lamau te longe.

*Iesus Hemasia Hana Nai Nge Mataria Hit*

27 Iok, Iesus lohote nga lamau ke teke lalalo pe hana mata hit nai te nanas pe alngaria hot lange I ke te teke, “Ne Teuit tuna, letem poreke ia imem!”

28 Ol pe Iesus la ke i teu nga pele e pe mata hit nai neu tela nge i. Pe Iesus onteia iri ke teke, “Imo mam letemo manmanna toto ke lape e hemas mule imo ma?”

Pe iri nai te hele, “Oe Non Soke, letemem manmanna toto i.”

29 Iok laol, Iesus ra haka nga iri nai mataria pe hele, “Lape e poia ure nem ke lohote nge imo nai ke pomanga letemo manmanna ngamo.”

30 Ol pe iri nai tenau mule sapele. Pe Iesus hele ke kerkereng toto lange iri nai ke teke, “A hele hote ure nei lange mele ero toto.” 31 Pe ero. Hana nai neu tela ol pe te hesongia ana helenga nga kileng lochloch ngana.

*Iesus Hemasia None Ke Hele Mule*

32 Iok, nga etue nenge hana nai nem te i ke tela, hana hel te takisia none pule lange Iesus. Non nem hele poreke iange uneinei tu teu nge i. 33 Iesus helope hote uneinei nem ke ua hot nge non nem. Iok laol non nenge hele poreke nem hele mule sapele. Ol pe hulua ngaria lohote pe te hele, “Imem mo kolkol ute e nge pomai nge lohote nge nike nge Israel.”



<sup>34</sup> Pe Paresio mur te hele, “Uneinei mur aria soke laka hekerkereng ia i ke helope hotote uneinei mur.”

### *Ume Ana Hana Mur Iri Halang Ero*

<sup>35</sup> Iesus i ke rongo heke tuele tatana mur pe kileng kinkino ngana mur, ke hetottoro nga heteronga ana pele mur. Iok, pe haliu hote helenga urana toto ngana nenga NeHalang nena naualanga pe nekinga pe pule hemasia hehei pe hana nga aria haleles mur. <sup>36</sup> Pe Iesus esia hulua nemur pe letena ia iri iange leteria meena pe tetu poreke, pe mele nge nauele iri ero ke pomanga sipsip mur nge aria naunga ala ero. <sup>37</sup> Ol pe hele lange nena hana mur ke pomai, “Ngaunga halang te mera tach lo. Pe lulunga ana hana mur iri unne sune mana. <sup>38</sup> A hetalaulau lange ume tokoninga ke kulosia lulunga ana hana mur hel pule ke te halau ke te lulu.”

## 10

### *Iesus Iua Nena Hana Mur Nge Iri Analoch Pe Nai* (Mak 3:13-19; Luk 6:12-16)

<sup>1</sup> Iok laol, Iesus iua nena hana mur nge iri analoch pe nai ke te eukirau pe tunge kerkerenga palaungana lange iri. Te mene kerkerenga palaungana nem ke lape te helope hotote uneinei mur, pe te hemasmas ia hehei pe hana nga aria haleles mur.

<sup>2-4</sup> Pe Iesus nena hana mur analoch pe nai eria koi nemur:

Simon (nenge ene e pule Petrus)  
Antreas (Simon tina)  
Ieims (ne Sepeti tuna)  
Ioanes (Ieims tina)  
Pilip  
Patolomius  
Tomas  
Mateus (nenge lololoch umtutuna.)  
Ieims (nenge Alpeus tuna)  
Tateus  
Simon (non nenge teke Israel mur iri siporia tenau ele iri)

Iutas Iskariot (nenge tunge Iesus langa hana porekreke ngana mur peria)

<sup>5</sup> Hana iri analoch pe nai nei, Iesus kulos hote iri pe hetoro tote iri ke mai, “Ala pe atu luluch nge hana lomonmona ngana mur ero. Pe pule ala nge iri nemur nge Samaria ero.

<sup>6</sup> Ala manmana nge hehei pe hana nenge Israel iange iri te pomalaka nga sipsip mur nenge te erue toto lo. <sup>7</sup> Ala pe a haliu hote koi helenga nei, ‘NeHalang nena naualanga pe nekinga nenga tapa, ngana koi heroi lo.’

<sup>8</sup> Pe a hemasmas ia haleles kina mur, a hemaual heke mule iri nenge te metmete. Pe a helemlem mule iri nenge haleles poreke ngana ngau lala ke ngau hoa singiria pe a helope hotote uneinei mur. Kerkerenga nenge e tunge lange imo nei, a olia at nge iau ero. Pomalam, a la pe a poia lange iri pe a chepeia uruna ero pule.

<sup>9</sup> Pe pule a in teua umtutuna unne e pe machmach unne e pe hake unne e nga amo melo matana ero toto.

<sup>10</sup> Ai ia inga nei pe a takis kole ero pule. Pe a mene ke lemo hengeron nachnai ero pe apemo ana kalenga haka nachnai ero pule. Pe pule a ra hit heko ero. Lange ure nemur, non nenge umume uruna ia.

<sup>11</sup> “Nenge teke ateu langa kileng palaungana e, nem pe nga tuele kina sune, anau rara none nge na poinga urana pe pengpeng pe a la ke atu luluch nge i nga nena pele. Pe atu luluch nge i ke la het nga etue nenge a lo haka mule. <sup>12</sup> Ke nenge teke a i teu nga pele e, a hele ke a teke NeHalang pete imo. <sup>13</sup> Pe nenge teke iri nenga pele nem te iech ia lemo helenga, lemo helenga urana ngana nem lape tu luluch nge iri. Pe nenge teke ero, lemo petenga nem haka mule nge imo. <sup>14</sup> Pe nenge teke none longo lange imo ero pe mene imo langa nena pele ero, a pasis sue maruchrue

**9:35:** Mat 4:23; Mak 1:39    **9:36:** Num 27:17; 1Ki 22:17; Zec 10:2; Mat 14:14; Mak 6:34    **9:37:** Luk 10:2    **10:1:** Mak 6:7; Luk 9:1    **10:6:** Jer 50:6    **10:7:** Mat 3:2; 4:17; Luk 10:9, 11    **10:9:** Luk 10:4    **10:10:** Luk 10:7; 1Ko 9:14    **10:12:** Luk 10:5-6    **10:14:** Luk 10:10-12; Ume 13:51    **10:15:** Mat 11:24; Iut 7

nga apemo pe ai hot nga kileng nem.  
<sup>15</sup> E hele ke manmanna toto lange imo. Nga NeHalang nena haliunga ana etue kileng nem lape mene tuangachol nge poreke toto nga nenge Sotom pe Komora.”

*Iesus Heleia Ure Meena Ngana Mur Nge Lape Lohot*  
*(Mak 13:9-13; Luk 21:12-17)*

<sup>16</sup> “Iok, a longo at nge iau ke nek toto. E kulosia imo ke pomalaka nga mele nenge kulosia sipsip mur ke tela ke tetu teu luluch nge kaone hinolo mur. Pomalam letemo matana ke nek toto ke manga hilimo pe a nanas tau tote ngie chaulum nena poinga nenge tu ke neknek. <sup>17</sup> Pe anau ala amo ke nek toto nge hana mur. Iange lape te laua imo kela ames nga hana papalauna mataria pe pule lape te taklala teua imo langa hetoronga ana pele pe tepal hulu hite imo. <sup>18</sup> Pe te poia imo ke pomam iange lek hana mur imo. Ke lape te mene imo lange almasinga ana hana mur pe naunga ala mur. Pe lape a hele hote helenga urana toto ngana lange iri pe nge hana lomonmona ngana mur pule. <sup>19</sup> Pe nenge teke te laua imo, letemo song rara sakilil ero. Iange a hele ngamo nga ure nenge a heleleia lape ma ke mallaha hot mana nga letemo nga etue nem pengpeng. <sup>20</sup> Pe imo sipomo a hele ero, iange Tememo NeHalang opene lape hele hot nga halimo ol.

<sup>21</sup> “Non e lape tua hita mule tina ana pe te hune i ke mete. Pe none lape poia poinga nem lange tuna pule ke tua hita mule ana. Pe aina lape te pal hel luluch mule nge tetemeria mur pe tataria mur pe te hune iri ke te mete. <sup>22</sup> Hana lochloch lape lemeria ero ia imo iange Iau lek hana mur imo. Pe mele nenge mes ke kerkereng toto nga letena manmanna ngana, lape mene maulinga ke koko. <sup>23</sup> Nenge teke te poi poreke

imo nga kileng e, a ua ke a langa kileng e pule. E hele ke manmanna toto lange imo koi. Imo lape a heulo hote amo ume nga kileng lochloch ngana nge Israel ero kura, pe Non Tuna lape at.

<sup>24</sup> “Mele nenge lala nga hengetoro kura, i muka mule nge ana hetoronga ero. I nanas tau mene ana hetoronga. Pe mele nenge umume nge none, i pule tamu tote ana ae huna ero. I longo la manmana nge ana ae huna. <sup>25</sup> Pe mele nenge lala nga hetoronga nem purpur pule nge lohohot ke pomange ana hetoronga. Pe pule mele nenge umume nge nem, purpur pule nge lohohot ke pomange ana ae huna nem. Ke nenge teke te hetue non poreke ngana ene Pelsipul lange non soke e, lape te poia poinga nem ke palaungana toto lange non nem nena hana mur.”

*A Matau Mene NeHalang I Toro Mana*  
*(Luk 12:2-7)*

<sup>26</sup> “Pe a mataua iri ero. Ure lochloch ngana nenge talkomkome lape lohohot nga mallaha. Pe ure lochloch ngana nenge te hele komkome lape lohohot ke hulua te eteia pule. <sup>27</sup> Utar nenge e heleleia lange iong nga kileng au ngana, o hele hote nga sinanga. Pe utar nenge e mangun ia langa talngam, o mes haka ia nga pele ona pe o haliu hote. <sup>28</sup> A matau heke mene hana nenge te hunun ero. Iri te hun mene singira pe te hune opere ero. A matau mene laka I nenge lape chacharuch heke singira pe opere nga oan nge henge lemlem. <sup>29</sup> Ngie kinkino ngana nai ururia haka toto ero. Pe te olia iri nga umtutuna elle mana. Pe nenge teke elle nge iri mete, Tememo eteia ke het lo. <sup>30</sup> Pe pule NeHalang amele palpalumo ina pe eteia iri ke het ta lo. <sup>31</sup> Ke a matau ero, iange imo a ele haka toto nga ngie nemur.”

**10:16:** Luk 10:3; Rom 16:19    **10:17:** Mak 13:9-11; Luk 12:11-12; 21:12-15    **10:20:** Ioa 14:26  
**10:21:** Mic 7:6; Mat 10:35; Mak 13:12; Luk 21:16    **10:24:** Luk 6:40; Ioa 13:16; 15:20    **10:25:** Mat 9:34; 12:24; Mak 3:22; Luk 11:15    **10:26:** Mak 4:22; Luk 8:17    **10:28:** Rom 8:31; Iei 4:12    **10:31:** Mat 6:26

*A Hele Hote Letemo Manamanna  
Ngana Lange Hehei Pe Hana  
(Luk 12:8-9)*

<sup>32</sup> “Mele nenge mes haka nga hulua mataria pe hele hote letena manmanna ngana nge Iau, mele nem lohot ke lek non ia toto. Pe lape e heleia i lange Temek nga lut nga tapa. <sup>33</sup> Pe mele nenge hele ke teke eteia Iau ero nga hulua mataria, Iau lape e hele lange Temek nga lut nga tapa, ke e teke e eteia mele nem ero pule.

<sup>34</sup> “Imo a teke e at ke e hesue kilanga nge urana nga ich nei, ae? Ero nike. E at ia kakop nge matana kaliu ala i. Pe lape e heporeke lemo kilanga mur. <sup>35</sup> Lape e poia kol mele ke iri nai temene te hunel, pe he mele ke iri nai tana te hunel, pe heie ke iri nai na mele te hunel.

<sup>36</sup> “Lemo ngarang mur laka lemo hehei mur pe tutumo pe alomo mur pengpeng.

<sup>37</sup> “Imo nenge lememo tau tote tememo pe tamo ke te ele haka nge iau, imo lek hana mur ia imo ero. Pe imo nenge lememo tau tote tutumo mur ke te ele haka nge iau, imo lek hana mur ia imo ero. <sup>38</sup> Pe mele nenge lemene ero nge takis ia ana melmelenga pe nanas ia iau, lape e hile hote i ke pomalam pule. <sup>39</sup> Pe mele nenge teke tu ke maulul mana, lape mete pe lasus sapele. Pe mele nenge poia ak ume pe te hune i ke mete, lape maul haka mule pe tu ke maulul mana ol.

*Lape Ta Mene Urura  
(Mak 9:41)*

<sup>40</sup> “Mele nenge long ia iong, long ia Iau pule. Pe mele nenge long ia Iau, long ia I nenge kulosia Iau ke e at nei. <sup>41</sup> Mele nenge eteia nge none i hetatalonga pe long ia i, lape mene uruna nenge manga hetatalonga nem. Pe mele nenge eteia nge none i non nge pengpeng pe long ia i lape mene uruna nenge manga non nenge pengpeng toto.

<sup>42</sup> “Pe nenge teke mele eulia ech lololo ngana ke tunge lange hatong e nge umume nge iau, manmanna toto ke mele nem lape mene uruna.”

## 11

*Ioanes Kulosia Nena Hana Mur  
Hel Lange Iesus  
(Luk 7:18-35)*

<sup>1</sup> Iok, Iesus hetoro hite nena hana analoch pe nai neu ke het, pe lohaka sapele ke langa kileng nemur nge Kalelea. Pe nga lamau Iesus hetottore hehei pe hana pe haliu hote Helenga Urana Toto Ngana.

<sup>2</sup> Pe Ioanes tu nga tuele au ngana pe longe Iesus pingana nge popoia ume nemur. Ol pe kulosia nena hana mur ke tela nge Iesus. <sup>3</sup> Pe te onteia I ke mai, “Iong nenge te heleleia nge o atat laka lom? Ma, lape mo kulele mele kau atat kura mau?”

<sup>4</sup> Pe Iesus tuacholia lange iri ke teke, “Ala mule pe a hele lange Ioanes nga ure lochloch ngana nenge a longe pe a esia nga matamo ke ulolo. <sup>5</sup> Iri nenge mataria hit tenau mule lo pe iri nenge aperia mete te i mulmule lo. Pe iri nenge haleles poreke ngana tu nga singiria, singiria urana mule lo. Pe iri nenge talngaria hit te longo mulmule lo pe iri nenge te mete te maul haka mule lo. Pe iri nenge reria ure halang ero, te longlonge NeHalangna Helenga Urana Toto Ngana. <sup>6</sup> Hana nenge te longe lek helenga pe leteria manmanna ngana losio ero, lape te iech toto!”

<sup>7</sup> Iok laol, Ioanes nena hana mur te i ke te lala pe Iesus talun ke heleia Ioanes lange hulua nenge te eukirau neu ke teke, “Nga etue nenge ai ke a la nga ich sana lomona, utar toto nenge a teke a la ke a esia? A teke a la ke a esia heilil ina e nge tuttula iua ke malau sio? <sup>8</sup> Eh, a teke a la ke a esia utar? Non e nge heronia heroninga urana ngana mur? Ero toto. Hana nenge te heronia heroninga urana ngana mur, te

tutu nga hana papalauna nenge iri Soksoke reria pele. <sup>9</sup> Ol pe a la lamau ke a teke a esia utar? A teke a la ke a esia hetatalonga e ae? Oe, non nem i hetatalonga pe i ele haka toto nge hetatalonga mur. <sup>10</sup> Iange nge non nei mana, NeHalang nena helenga nenge tehas sue ke ulolo, hele ke teke, “Lape e hekule lek none ke i muka nge iong

pe i lape hepengpeng ia lem kue.’

<sup>11</sup> “E hele ia helenga nei man-manna. Nge hulua lochloch ngana nenge te hoe iri ke te lohot nga ich, Ioanes nenge henunun i palaungana toto nge iri. Pe mele nenge i kino toto nga NeHalang nena naualanga pe nekinga, lape i palaungana toto nge Ioanes. <sup>12</sup> Talun nga Ioanes nenge henunun ana etue ke at heueu nei, NeHalang nena naualanga pe nekinga song ke pur kikina toto. Pe hana solaki ngana mur te ech taua ke te mene. <sup>13</sup> Iange hetatalonga mur pe NeHalang nena hotonga mur te haliu hotot nike ke at nga etue nenge Ioanes lohot ia. <sup>14</sup> Ke nenge teke letemo manmanna nga helenga nemur, Ioanes i Elaisa nenge te teke lape at. <sup>15</sup> Imo nenge a longlonge iau, a longo ke neknek.

<sup>16</sup> “Lape e heilangia hehei pe hana nga etue nei ke pomere? Iri te poma-laka nge aina kinkino ngana nemur nenge te killkila nga ingala matana pe te alngaria lala nge pekngaria mur ke te teke,

<sup>17</sup> “ ‘Mo iuiua emem iu pe imo mam a hes ero ia?

Pe mo utute utunga lolo pe a tang ero ia?’

<sup>18</sup> “Ioanes at pe ngau ero pe in ech ero. Pe te hele ke te teke, ‘Non nei, uneinei ia i.’ <sup>19</sup> Pe Non Tuna, at pe ngaungau pe inin ech. Pe te heleia i ke te teke, ‘A nau la pam, non neu ngau ngana pe in ngana kou kura. Pe pekngana mur toto laka hana nenge te lololoch umtutuna pe

hana porekreke ngana mur.’ Pe ure nemur nenge te lohotot nem, te lohot urume mene NeHalang letena matana ngana.”

### *Kileng Nemur Nenge Te Hulua Leteria Ero*

*(Luk 10:13-15)*

<sup>20</sup> Iok, nga kileng hel, Iesus poi hote ure nenge hele pe lohot manmana ke halang, pe hulua te hulua leteria ero. Pomalam Iesus hele ke kerkereeng toto lange iri ke teke, <sup>21</sup> “Imo nenge Korasin pe Petsaita a neknek ia imo. Iange e poi hote ure nemur ke a esia nga lamai pe a hulua letemo ero toto. Pe toinge e poi hote ure nemur nga kileng nenge Tir pe Saiton, hehei pe hana nga lamau lape te hulua leteria ke het lo. Pe toinge ngana kou te heron heke hengeron muna hulu ngana, pe te hepore heke kasu nge iri pe teare nga oan ina lo. Ke poinga nem henonou hote iri nge te hulua reria poinga mur lo. <sup>22</sup> E hele lange imo Korasin pe Petsaita, nga NeHalang nena haliunga ana etue, imo lape a mene tuacholinga nge poreke toto nge Tir pe Saiton mur. <sup>23</sup> Pe imo nenge Kapernam lape ala ke merei? A haka langa lut nga tapa? E hele lange imo, lape ateu sio la pengpeng nga oan nge henge lemlem. Toinge e poia ure nemur ke te lohot nga kileng nenge Sotom nike, hehei pe hana lape te hulua leteria ke ueiuei mana. Pe kileng nem lape tu ke urana kura ke at nga etue nenge nei. <sup>24</sup> Pe e hele lange imo Kapernam, nga NeHalang nena haliunga ana etue, imo lape a mene tuangachol e nge poreke toto nge nenge Sotom.”

### *A At Nge Iau Ke A Tah Eingamo*

*(Luk 10:21-22)*

<sup>25</sup> Ke het pe Iesus hele sapele ke teke, “Temek! E heto heke tote Iong. Iong Non nge Iong Soke toto nga lut nga tapa pe nga ich. Iange o hekome tote ure nei lange hana nenge te etei



ngaria palaungana toto pe o etei hot mene lange hana nenge te etei sakilil ero ke mange aina kinkino ngana. <sup>26</sup> Oe Temek, Iong o iech nge lohot ke pomam nike.

<sup>27</sup> “Temek tung sue ure lochloch ngana at nga perik ke e nauele iri. Pe mele pele eteia Tuna ero. Temene I toro mana eteia Tuna. Pe mele pele eteia Temene ero. Tuna i toro mana eteia Temene. Pe iri nenge Tuna het-ore iri lange Temene, iri toro mana te eteia Temene.

<sup>28</sup> “Imo nenge a takisia ure meena ngana pe kikimo ero ol, ai at nge iau pe a amneia ure meena ngana e ero ol. <sup>29</sup> A longo taua iau pe a mene hengetoro nge iau iange e poi ke nek toto pe e tal sio tote Iau. Ke nenge teke a longo taua iau lape atah eingamo. <sup>30</sup> Iange hengetoro nenge e tunge lala nge imo nem polpolenga mana.”

## 12

### *Onteinga Nga Sapat Ana Etue* (Mak 2:23-28; Luk 6:1-5)

<sup>1</sup> Iok laol, nga Sapat ana etue, Iesus pe nena hana mur te i teu nga ume e letena. Ume neu tetue ana uit mur mana. Ol pe Iesus nena hana mur te mete aria pe te sohe uit nganangana hel ke te ngaua. <sup>2</sup> Ol pe Paresio mur te esia pe te hele lange Iesus ke te teke, “O nau langa lem hana mur te poi ngaria pam! Pomere nenge te nanasia hotonga nenga Israel mur aria etue nenge te hetalaulau ia ero?”

<sup>3</sup> Pe Iesus tuacholia ke teke, “Nananga e nge nike hele ia non soke Teuit pe pekngana mur nge te mete aria. Pe imo mam a sisia nananga nei ero mana kura kai? <sup>4</sup> Ana non i teu langa NeHalang nena pele pe mene ngaunga nenge heo ngana ke pekngana mur te ngaua. Pe ngaunga nem heo ngana toto nge non pulut ngana e mana ngaua. Iange hotonga hele ke teke tunginga ana hana mur, iri toro mana te ngaua ngaunga nem.

<sup>5</sup> Pe pule hotonga e nge Moses hasia hele ke teke, tunginga ana hana mur te umume nga NeHalang na pele nga Sapat ana etue. Te longo ole taua hotonga pe mele pele hele ia iri ero.

<sup>6</sup> Pe e hele lange imo, mele nenge mes heueu nei, i palaungana toto nga NeHalang na pele palaungana nem. <sup>7</sup> NeHalang nena helenga nenge tehas sue ke ulolo, hele ke teke, ‘Lemek ero ia lemo tunginga pa nemur nenge a makmak huros. Lemek ke letemo ia hehei pe hana.’ Toinge a eteia helenga nem luna ke nek, toi ngana koi a henonou perimo lange iri nenge te poia ute ke poreke ero. <sup>8</sup> Iange Non Tuna, I non Soke toto nga Sapat ana etue.”

### *Iesus Hemasia None Nge Penna Mete* (Mak 3:1-6; Luk 6:6-11)

<sup>9</sup> Iok, Iesus i nga lamau pe la ke i teu nga hengetoro ana pele. <sup>10</sup> Pe none nge penna mete tu nga lamau pule. Pe mele hel te tango rara kue nenge te teke te laulaua Iesus. Pomalam te poi haka pulut mana ure huhuna mur pe te onteia I ke te teke, “Hotonga mai hele ke teke iri nenge singiria haleles, lape te hemas mule iri nga Sapat ana etue pule kai? Ae?”

<sup>11</sup> Pe Iesus hele lange iri ke teke, “Nenge teke amo e na sipsip losio teu nga polo nga Israel mur aria etue nenge te hetalaulau ia, mele nem lape poia ke mere? E hele lange imo, heueu mana nei mele nem in haka hot mule nena sipsip nem. <sup>12</sup> Iok, anau langa ure nai nei, sipsip mur pe ita non. Tei nge iri nai nge NeHalang esia ke ure palaungana toto nga matana? Ure nenge palaugnana toto nga NeHalang matana, ngana koi ita non. Ke pomalam, i pengpeng nge ta halaua mele nga Sapat ana etue.”

<sup>13</sup> Ol pe Iesus hele sapele lange non neu, “O tul hote perim.” Iok, non neu tul hote penna pe penna urana mule



sapele ke pomanga penna nenga hele. <sup>14</sup> Pe ero, Paresio mur tehot lange hot pe tetal helenga ke te teke te hune Iesus.

*Iesus I NeHalang Nena Non Toto*

<sup>15</sup> Pe Iesus eteia lo. Ke pomalam lohaka nga kileng neu pe hulua te kumnana nge i ke hemasmasia haleles kina mur lochloch nga aria haleles mur. <sup>16</sup> Pe heo ele tote iri nge te hele hot rere lange mele hel. <sup>17</sup> Pe ure nei lohote ke pete tote NeHalang nena helenga nenge hetatalonga Isaias hele hote nge nike nenge teke,

<sup>18</sup> “Nenge nei, Iau lek non toto nge E henonou hote.

Iau lemek tau tote I pe E iech toto nge I.

Pe lape etal heke opek nge I, ke lape haliu hote

lek poinga nenge e hemasmas lange mata mur nga kileng lochloch ngana.

<sup>19</sup> Pe I lape hele ia letena inin ngana ero pe alngana rara ero.

Pe lape te longe I nge haliu rara nga kue tana ero pule.

<sup>20</sup> Pe lape hekerkereng mule iri nenge leteria manmanna ngana

unne sune mana ol, ke te kerkereng mule.

Pe lemenga nenge ngau ke unne sune mana, i hemete sapele ero.

Teke poia poinga urana ngana nei, ke ris tote poinga lochloch pe mes hot ke mallaha toto.

<sup>21</sup> Pe mata lochloch ngana nenga kileng lochloch

lape leteria kerkereng mana nge lape

te mene maulinga nga I toro mana ene.”

*Iesus Na Kerkerenga At Nge NeHalang*  
(Mak 3:20-30; Luk 11:14-23)

<sup>22</sup> Ol pe hana hel, teat ia none nge matana hit pe hele erochro iange uneinei tu nge i. Te laia i ke Iesus hemas mule i. Ke het pe ana non matana charchara ke nau mule ke nek pe hele mule sapele. <sup>23</sup> Ol pe hulua te esia pe leteria tuanin ke halang pe te hele, “Non nei nge lape ne Teuit tuna i.”

<sup>24</sup> Pe Paresio mur te longe pe te hele, “Ero iam! Uneinei mur aria soke Pelsipul laka hekerkereng ia non nem ke helope hotote uneinei mur.”

<sup>25</sup> Pe Iesus eteia leteria tuanin ngana mur lo, pomalam hele lange iri ke teke, “Nenge teke hana mur nga tuele kina e te chach hel pe hunelinga lohote, kileng nem lape het sio sapele. Ke nenge teke hana nemur nga kileng nem te chach hel pe te ua rara, reria kileng nem lape tu ero ol. Pomalam mana nge none pe nehei pe tutuna mur. Nenge teke te chach hel pe te ua rara lape tetu ke muria elle mule ero ol. <sup>26</sup> Pe nenge teke non poreke ngana helope hot mule i sipona, ta etei mellehe mene ke non poreke ngana nena hana mur, te het sio sapele iange huria ero ol.

<sup>27</sup> “Imo a teke e helope hotote uneinei mur nga Pelsipul ene, pe lemo hana mur te popoia ume nem pule. Pe te popoia nga itei toto ene? Ke imo anau, lemo hana mur pengpeng lape te hele hot mule amo. <sup>28</sup> Nenge teke NeHalang opene hekerkereng ia iau, ke e helope hotote uneinei nemur, NeHalang nena nualanga pe nekinga at nge imo lo.

<sup>29</sup> “Amo non tei nakuna toto nge tale chachia non solaki ngana e na pele ke loloch hote nena ure mur? Nenge teke o poi ke pomam o nanasia koi kue nei. O kale hit tele non nem. Ke het pe o teu nga nena pele ke o loloch hote nena ure mur.

<sup>30</sup> “Mele nenge ma at nge iau ero, lek ngarang toto laka i. Pe mele nenge ume luluch nge iau ero, lape sisparai ia lek ume. <sup>31</sup> Pe e hele lange

imo, NeHalang lape letena ia imo nga lemo poinga poreke ngana mur, pe lemo helenga porekreke ngana mur lochloch. Pe mele nenge hele poreke Opepengpeng, mele nem lape mene poreke tote. <sup>32</sup> Pe mele nenge hele poreke Non Tuna, lape NeHalang letena ia i. Pe mele nenge hele poreke Opepengpeng, mele nem lape NeHalang letena ia i ero toto, nga etue nei pe nga hoena pule.

*Ae Pe Nganangana Mur  
(Luk 6:43-45)*

<sup>33</sup> “Nenge teke o poia ae e ke urana, nganangana lape hot ke urana. Pe nenge teke o poi poreke ae e, nganangana lape hot ke poreke. Iange tanau urume ae elle pe elle nga nganangana mur. <sup>34</sup> Ilimo alete nemur! Imo hana porekreke ngana mur pa ne mam. Ol pe a teke a heleia ure nge urana ke mere? Iange lape halimo hele hot mene laka ure poreke ngana nemur nenge tu teu nga letemo nem lo. <sup>35</sup> Hana nenge leteria urana, te hele hotote ure urana ngana mur nenge tu teu nga leteria. Pe hana porekreke ngana mur, ure poreke ngana halang tu teu nga leteria, pomalam lape te hele hot menmene ure poreke ngana mur. <sup>36</sup> Pe e hele lange imo, NeHalang nena haliunga ana etue nem lape at, pe lape mele elle pe elle na poinga mur lape hele hot mule ana. <sup>37</sup> Lem helenga mur lape te hele hote iong. Nenge teke te urana, lape o urana nga NeHalang matana. Pe nenge lem helenga mur te poreke, lape o poreke nga NeHalang matana.”

*Paresio Mur Te Onteia Iesus Ke Poi Hote Ute Ke Tenau  
(Mak 8:11-12; Luk 11:29-32)*

<sup>38</sup> Ol pe Paresio mur hel pe hotonga ana hetoronganga mur te hele lange Iesus ke te teke, “Hetoronganga, o hele pe ute lohota mana ke mo nau mukam.”

<sup>39</sup> Pe Iesus tuacholia ke teke, “Imo hehei pe hana nga etue nei, a muta

nga poinga poreke ngana mur pe letemo manmanna ngana tu hite NeHalang ero toto. Ol pe a ontei ke a teke a esia utar? Lape e poi hote ute pele ke a esia ero toto. Lape e hemallaha hot mene laka hengeilang nenge hetatalonga Iona lange imo. <sup>40</sup> Nge nike toto, ruo palaungana tone Iona. Pe Iona ma ke ana etue iri mol nga ruo nem letena. Ke pomalam mana, Non Tuna lape ma ke ana etue iri mol nga ich letena pule. <sup>41</sup> Pe lape etue palaungana nem at pe iri nenge Niniue lape te hele ia imo hehei pe hana nenga etue nei. Iange iri te hulua reria poinga mur nga etue nenge Iona haliu hot. Pe mele nenge i palaungana toto nge Iona, ngana koi helele heueu nei, pe pomere a hulua letemo ero? <sup>42</sup> Nga NeHalang ana etue nem pule, lape Hei Soke nem nenge nauela kileng Sipa lape heleia imo. Iange i lo haka nga na kileng pe la ke longo nga Non Solomon Palau nena helenga urana ngana mur. Pe mele nenge I palaungana toto nge ne Solomon, ngana koi helele heueu nei. Pe pomere a longo langa nena helenga mur ero?”

*Uneinei Lohot Ke La Pe At Mule Ngana  
(Luk 11:24-26)*

<sup>43</sup> “Nenge teke uneinei e lohota nge none, song sapele ke langa kileng nenge ana ech ero pe tango rara munna nge tuia. Pe lape hottaua munna e nge tuia ero. <sup>44</sup> Pe lape helele nge i sipona ke teke, ‘E ua hot nga lamau ke e at pe mullik ero nga lamai i. Lape e la mule nga lek pele iam.’ Iok laol, uneinei nem at mule pe esia na pele nge tu ke polpolo mana. Pe pele neu letena te sachalue ke lemlem, pe ure mur nga letena te talue ke tema ke nek toto. <sup>45</sup> Ol pe ana ure la mule pe la mene ke uneinei iri rahtele nai ke iri ul teat ke la tetu nga pele neu. Pe uneinei nemur nenge iri rahtele nai neu, te poreke toto nga

**12:33:** Mat 7:16-20

**12:34:** Mat 3:7; 15:18; Luk 3:7; 6:45

**12:38:** Mat 16:1; Luk 11:16; Ioa 6:30

**12:39:** Mat 16:4; Mak 8:12

**12:40:** Jon 1:17

**12:41:** Jon 3:5

**12:42:** 1Ki 10:1-10

**12:45:**

2Pi 2:20

uneinei elle nenge mene iri at. Pe non neu, tu ngana nga tele ngana urana pol, pe nei ol, tu ngana poreke toto ol. Ke hehei pe hana poreke ngana mur nga etue nei, tetu ngaria lape pomalam mana.”

*Iesus Tana Pe Titina Mur  
(Mak 3:31-35; Luk 8:19-21)*

<sup>46</sup> Iok, Iesus hele lala nge hehei pe hana kura, pe tana pe titina mur teat ke te mes nge hot. Iri te teke te hele luluch nge Iesus. <sup>47</sup> Ol pe mele hele lange Iesus ke teke, “Tam pe titim mur kou te mes nge hot, pe te teke te hele luluch nge iong.”

<sup>48</sup> Pe Iesus hele, “Iau mai hetak itei pe titik mur itei hel?” <sup>49</sup> Ol pe Iesus henonoua nena hana mur pe hele, “Hetak pe titik mur koi nemur. <sup>50</sup> Temek tu nga lut nga tapa, pe mele hel nenge te poia ume ke nanasia Temek lemene ngana, ke lohohot nga ich nei, iau titik mur pe liliuk mur pe hatak mur ia iri.”

### 13

*Helenga Opene Nga Ngaunga Alona  
(Mak 4:1-9; Luk 8:4-8)*

<sup>1</sup> Iok, Iesus iuch hot nga pele nga etue neu pe la ke are nga kolkolu palaungana nenge Kalelea ilina. <sup>2</sup> Pe hulua tela ke te maimai ite i. Pomalam, lo haka ke are nga aka e pe mana hita nge hot. Pe hulua nemur te mes nga peipei ilina. <sup>3</sup> Ol pe Iesus nenene ure halang lala nge iri nga helenga opene mur. Iesus nanana ke teke, “A longo at, none lake sausaua ngaunga alona nga ana ume. <sup>4</sup> Sausaua iri pe hel te losio hot langa alingele pe ngie mur teat ke te tuais haka taua ke het. <sup>5</sup> Pe hel te losio teu langa um letentena nenge ana ich halang ero pe te haka ke ueiuei mana iange ich unne sune mana. <sup>6</sup> Iok, chaia matana haka ke sine iri pe te melu sapele iange ularia teu sio ero mana. <sup>7</sup> Pe ngaunga alona hel te losio teu nga kiki letentena. Pe kiki nem haka ke

au hite pe makia iri ke te mete. <sup>8</sup> Pe ngaunga alona hel te losio haka nga ich nenge urana pe te haka ke nek pe te hei pe nganangaria sapele. Hel nganangaria mur iri ana non kina iri lime (100) pe hel nganangaria iri ana non kina mol (60) pe hel nganangaria iri ana non elle pe analoch (30). <sup>9</sup> Imo nenge a longo atat nge Iau, a longo ke neknek.”

*Pomere Nenge Iesus Nana Nga Helenga Opene  
(Mak 4:10-12; Luk 8:9-10)*

<sup>10</sup> Iok, Iesus nena hana mur tela nge i pe te ontei hote ke te teke, “Pomere nenge o hetore hehei pe hana nga helenga opene mur?”

<sup>11</sup> Pe Iesus tuacholia lange iri ke teke, “Heteinga nga ure talkomkome ngana mur nga NeHalang nena naualanga pe nekinga nga tapa, imo a mene lo. Pe iri ero kura. <sup>12</sup> Mele hel nenge te etei lo lape te etei ke halang toto mule. Pe mele hel nenge te etei ke nek ero kura, te etei ngaria unne sune nem lape te ua toto mule ia nge iri. <sup>13</sup> Ke ngana laka nenge e nana manmana nga helenga opene lala nge iri:

“Mataria charchara ke te nachnau pe te esia ute e ero.

Pe talngaria longlongo pe te longe ute e ero pe te eteia ute e ero pule.”

<sup>14</sup> Pe hehei pe hana te poi ngaria nei, pete tote helenga e nge hetatalonga Isaias hele hote nge nike ke teke,

“Imo lape a longlongo pe a eteia luna e ero toto.

Pe a nachnau pe a esia ute e ero toto.

<sup>15</sup> Iange iri leteria hit toto lo, pe anali pule nge te longe ute e nga talngaria ol.

Pe pule te poi hele mataria ke hit lo.

Pe toinge ero, heueu nei te nachnau nga mataria

pe te longlongo nga talngaria.

Pe leteria matana ke te hulua re-ria poinga mur,

pe teat ke e hemas mule iri. Pe nei ero.'

16 Pe imo nenge a esia ure nga matamo pe a longe helenga nga talngamo a iech toto. 17 E hele ke manmanna toto lange imo, hetatalonga mur pe NeHalang nena hana mur muteria toto ke te teke tenau nga ure nenge imo a esia nem. Pe ero, iri te kolkol toto. Pe pule te teke te longo nga ure nenge imo a longe nem. Pe ero, iri te longe ero toto.

18 "Iok, a longo ke nek toto ol nga helenga opene nenge ngaunga alona nem luna. 19 Ngaunga alona nenge losio hot langa alingele nem, pomalaka nga mele nenge longe Helenga Urana Toto Ngana nga NeHalang nena naualanga pe nekinga pe eteia luna ke nek ero. Pe non poreke ngana at ke ua toto mule ia helenga nem nenge tu nga mele nem letena. Ke ngaunga alona nenge losio hot nga kue nem luna la nem. 20 Pe nenge te losio teu nga um letentena, ngana laka mele nenge mene sapele NeHalang nena helenga pe iech ele tote. 21 Pe mene helenga nem ke langa letena nge teu toto ero. Pe ra hite ke choro mana iange helenga nem ulana au ero. Pe nenge teke helenga nem lohote ia totoinga pe ure meena ngana, mele nem letena manmanna ngana losio ke ueiuei mana. 22 Pe ngaunga alona nenge te losio teu nga kiki letentena, pomalaka nga mele nenge longe Helenga Urana Toto Ngana lo, pe letena tu ke kerkereng toto nga ure lochloch ngana nenga ich. Nga nenge teke na umtutuna halang toto pe ure. Pe Helenga Urana Toto Ngana nem, haka pe nganangana ero iange ure nemur te poi hele mene. 23 Pe ngaunga alona nenge te losio haka nga ich nge urana, pomalaka nga mele nenge longe Helenga Urana Toto Ngana nem, pe eteia luna ke nek toto. Ke nganangana mur iri ana non kina iri lime (100), pe hel ana non kina mol (60) pe hel ana non kina elle pe

analoch (30)."

### *Helenga Opene E Pule Nga Heilil Poreke Ngana Nenge Haka Nga Ume*

24 Iok, Iesus heleia helenga opene e pule lange iri ke teke, "NeHalang nena naualanga pe nekinga nga tapa, pomalaka nga none nge tue ngaunga alona urana ngana mur nga ana ume. 25 Pe nga miliko hulua lochloch ngana te mamani, pe non nem na ngarang mur teat ke te tua teua heilil poreke ngana alona mur nga ume neu. Te tue iri ke het pe te ua sapele. 26 Iok, ngaunga alona nemur te talun ke te hei pe heilil poreke ngana nemur te haka pule.

27 "Iok laol, non neu nena hana mur nenge te umume nge i, tela nge i pe te onteia i ke teke, 'Non soke, ngaunga urana ngana alona mur mana kai nenge otue iri nga ume mai? Pe heilil poreke ngana nemur mai teat ke merei?'

28 "Pe non neu tuacholia ke teke, 'Lape lek ngarang e laka tua teua heilil poreke ngana nemur.'

"Pe nena hana mur te ontei mule i, 'Ke pomere? Lemem ke o teke mo la ke mo lalau hote iri?'

29 "Pe non neu hele, 'Ero, iange ngaunga alona mur te haka lo. Lape a tak haka leke iri heueu. 30 Tetu ke te haka luluch mana mukam, ke la het nga etue nenge ngaunga te mera. Nga etue nem pengpeng lape e hele lange lulunga ana hana mur ke te lalau tele heilil poreke ngana nemur pe te kale pute iri pe la te chacharuch heke nga oan. Ke het pe te lule ngaunga mur pe te tatach teua iri langa ngaunga ana pele.' "

### *Helenga Opene Nga Ae Haka Ngana*

*(Mak 4:30-32; Luk 13:18-19)*

31 Iok, Iesus heleia helenga opene e pule lange iri ke teke, "NeHalang nena naualanga pe nekinga nga tapa, nakuna pomalaka nga ae nganangana e nge tuna mana. Pe ae nganangana nem, none mene ke tue nga ana ume.

32 I nganangana tuna mana pe haka



ngana, ris tote ae mur lochloch pe tana palaungana toto. Pomalam ngie mur nga lut tela ke te ole teu nge i, ke tetal kiniu pe te arare nga perperna mur.”

<sup>33</sup> Pe Iesus hele hote helenga opene e pule ke teke, “NeHalang nena naualanga pe nekinga nakuna pomai pule. Pomalaka nga ure tutuna nenge heie mene pe poi teu luluche nga beret itach ngana. Pe ure nem poia beret ke una haka.”

<sup>34</sup> Iesus heleia ure lochloch ngana lange hehei pe hana nga helenga opene mur mana. Utar nenge heleia, heleia nga helenga opene mana. <sup>35</sup> Pe poinga nenge poia nem, pete tote utar nenge hetatalonga e hele hote nge nike lo, nenge hele ke teke,

“Lape e hele mana nga helenga opene mur mana.

Pe lape e hele hote ure nemur nenge tetu ke te talkome,

nga NeHalang ala hot ngana ia tapa pe ich ke at heueu nei.”

### *Iesus Hele Hote Helenga Opene Luna Nga Heilil Poreke Ngana*

<sup>36</sup> Iok, Iesus hele ke het pe la sapele ke i teu nga pele e. Ol pe nena hana mur tela nge i pe te hele, “O hele hote helenga opene nei luna at nge imem. Helenga opene nenga heilil poreke ngana nenge te haka nga ume.”

<sup>37</sup> Ol pe Iesus hele, “Non Tuna laka nenge I mele nenge tue ngaunga alona urana ngana mur nga ume nem. <sup>38</sup> Pe ich nei, i ume nem. Pe ngaunga alona urana ngana nemur laka NeHalang tutuna mur, nenge tetu teu nga nena naualanga pe nekinga. Pe heilil poreke ngana mur laka, non poreke ngana nena hana mur. <sup>39</sup> Pe ngarang nenge tua sue heilil poreke ngana nemur, ngana laka Satan i sipona lo. Pe ngaunga mera ngana pe lulunga ana etue laka, etue nenga ich nei hetala toto ngana. Pe lulunga ana non mur laka NeHalang nena angkelo mur.

<sup>40</sup> “Ke nga ich nei hetala toto ngana, lape poi ke pomalaka nga te leke heilil nemur pe tesau heke iri langa oan. <sup>41</sup> Ke pomalam mana, nga NeHalang nena naualanga pe nekinga. Non Tuna lape kulos hote nena angkelo mur ke tesau hote iri lochloch ngana nenge te heporekreke hehei pe hana leteria manmanna ngana mur. Pe iri lochloch ngana nenge te popoia poinga poreke ngana mur, lape tesau hot luluche iri pule. <sup>42</sup> Ke lape tesau heke iri ke la te tangtang pe ngingiria chatrekreke la kou nga oan sapel lala ngana. <sup>43</sup> Pe NeHalang nena hana mur, lape singiria tua ke pomanga chaia matana nga Temeria nena naualanga pe nekinga. Imo nenge a longo atat nge Iau, a pal talngamo pe a longo ke nek!

Pe nena angkelo mur ke tesau hote iri lochloch ngana nenge te heporekreke hehei pe hana leteria manmanna ngana mur. Pe iri lochloch ngana nenge te popoia poinga poreke ngana mur, lape tesau hot luluche iri pule. <sup>42</sup> Ke lape tesau heke iri ke la te tangtang pe ngingiria chatrekreke la kou nga oan sapel lala ngana. <sup>43</sup> Pe NeHalang nena hana mur, lape singiria tua ke pomanga chaia matana nga Temeria nena naualanga pe nekinga. Imo nenge a longo atat nge Iau, a pal talngamo pe a longo ke nek!

Pe nena angkelo mur ke tesau hote iri lochloch ngana nenge te heporekreke hehei pe hana leteria manmanna ngana mur. Pe iri lochloch ngana nenge te popoia poinga poreke ngana mur, lape tesau hot luluche iri pule. <sup>42</sup> Ke lape tesau heke iri ke la te tangtang pe ngingiria chatrekreke la kou nga oan sapel lala ngana. <sup>43</sup> Pe NeHalang nena hana mur, lape singiria tua ke pomanga chaia matana nga Temeria nena naualanga pe nekinga. Imo nenge a longo atat nge Iau, a pal talngamo pe a longo ke nek!

Pe nena angkelo mur ke tesau hote iri lochloch ngana nenge te heporekreke hehei pe hana leteria manmanna ngana mur. Pe iri lochloch ngana nenge te popoia poinga poreke ngana mur, lape tesau hot luluche iri pule. <sup>42</sup> Ke lape tesau heke iri ke la te tangtang pe ngingiria chatrekreke la kou nga oan sapel lala ngana. <sup>43</sup> Pe NeHalang nena hana mur, lape singiria tua ke pomanga chaia matana nga Temeria nena naualanga pe nekinga. Imo nenge a longo atat nge Iau, a pal talngamo pe a longo ke nek!

### *Helenga Opene Nga None Nge Hottaua Umtutuna Nge Te Talkome*

<sup>44</sup> “Iok, NeHalang nena naualanga pe nekinga pomai koi pule. Pomalaka nga umtutuna putana e nge mele alo hit kome nga ich unne. Pe none hottaua pe iech ala toto i ia. Ol pe alo hit kome mule ke nek. Non neu letena iech toto pe la ke mene nena ure mur lochloch, pe la ia ke hehei pe hana te olia iri. Ke het, mene umtutuna neu, pe la ke ol hot mule ich unne nenge alo hit kome umtutuna putana neu ia, ke nena ich neu ol.

### *Holonga Nenge Uruna Haka Toto*

<sup>45</sup> “Pe pule NeHalang nena naualanga pe nekinga pomalaka nga none nge tango rerere holonga nenge uruna haka toto. <sup>46</sup> Iok laol, ana non hottaua pe la sapele ke mene nena ure mur lochloch, pe la ia ke hehei pe hana te olia. Ke het pe mene umtutuna neu pe la ke ol hote holonga neu.

### *Helenga Opene Nga Hoat*

<sup>47</sup> “Pe pule NeHalang nena naualanga pe nekinga pomalaka nga hoat nenge te hesue nga kolkolu

**13:35:** Psa 78:2

**13:40:** Ioa 15:6

**13:41:**

**13:43:** Dan 12:3

Mat 24:31; 25:31; Mak 13:27

**13:42:** Mat 8:12



palaungana pe ruo lochloch nenga mata pe mata te haia. <sup>48</sup> Hoat nem muta pe iri nenge te olole ruo nem, tetak heke sapele langa peipei, pe te kila sio sapele ia ruo eu hot ngana. Pe te loloch mene ruo urana ngana mur mana. Pe nenge te poreke tesaua iri ke te lasus. <sup>49</sup> Ke poinga nei lape lohote nga etue nenga ich nei hetala toto ngana. Angkelo mur lape teat ke te eukiraua hehei pe hana nenge te urana ke te mes ke kuena, pe porekreke ngana mur te mes ke kueria. <sup>50</sup> Pe lape tesau heke porekreke ngana nemur ke la te tangtang pe ngingiria chatrekreke nga oan sapel lala ngana.”

<sup>51</sup> Pe Iesus onteia iri, “A eteia helenga nemur luria lo?”

Pe iri te hele, “Oe mo eteia lo.”

<sup>52</sup> Ol pe Iesus hele mule lange iri, “Pomalam mana hotonga ana hetoronga mur nenge e hetore nga Ne-Halang nena naualanga pe nekinga, te pomalaka nga tokoninga nenga pele palaungana e. Ana non teu langa pele nenge tattalue ure urana ngana mur ia, pe mene hote ure heueu ngana pe nike ngana mur ke hot lochloch.”

*Iesus Na Kileng Nganngana Mur Lemeria Ero Ia I*  
(Mak 6:1-6; Luk 4:16-30)

<sup>53</sup> Iok, Iesus hele hote helenga opene nemur ke het pe lo haka sapele nga kileng neu. <sup>54</sup> Pe i ke la mule nga nena kileng huna. La pe hetottore hehei pe hana nga reria hengetoro ana pele. Pe hehei pe hana leteria au ala pe leteria tuanin ke halang. Pe te ontei ke te teke, “Non nei mai mene letena matana ngana nei langai toto? Pe na kerkerenga nenge hele pe urelu te lohote manmana mai mene langai pule? <sup>55</sup> Non nei, non nenge hemesmes pele tuna koi. Pe tana ene laka he Maria. Pe titina mur laka Ieims pe Iosep pe Simon pe Iutas. <sup>56</sup> Pe liliuna mur pai, ita ul ke ta tutu panei. Pe I mai mene ure nemur

langai toto?” <sup>57</sup> Ol pe saria keke Iesus sapele.

Pe Iesus hele lange iri ke teke, “Het-atalonga e pingana iuiu nga kileng pe kileng. Pe nga nena kileng huna pe nga na pele pengpeng, pingana unne hota ero toto.” <sup>58</sup> Hehei pe hana nga kileng neu leteria manmanna ero. Pomalam Iesus poi hote ure halang ero.

## 14

*Ioanes Nenge Henunun Mete*  
(Mak 6:14-29; Luk 9:7-9)

<sup>1</sup> Nga etue neu ne Herot nauele kileng nenge Kalelea. Ana non longe Iesus pingana, <sup>2</sup> pe hele lange hana nenge te umume nge i ke teke, “Ioanes nenge henunun laka nenge pingana sasasa nem. Ana non mete ke ulolo pe maul haka mule. Ke ngana laka nenge hele pe urelu te lohote manmana.”

<sup>3</sup> Ne Herot hele ke mau iange nga tele ngana, laua Ioanes pe hele ke te kale penna pe tetal teua i langa tuele au ngana. Ne Herot poia poinga nei lange i iange Ioanes heleia i nge tak tote tina ne Pilipus nehei Herotias. <sup>4</sup> Ke Ioanes heleia ne Herot ke teke, “O nanasia hotonga tei toto nenge o poia poinga nem lange tim nehei?” <sup>5</sup> Ke nga helenga neu mana, ana non teke hune Ioanes. Pe ne Herot matau nena pule iange hulua te teke Ioanes i hetatalonga.

<sup>6</sup> Pe nga etue nenge te eukirau ke te iech ia etue nenge ne Herot tana hoho ngana ia I, Herotias tuna heingana heses ke ne Herot pe nena lang mur te nachnau. Pe ne Herot esia he neu nge heses pe iech toto. <sup>7</sup> Pomalam ne Herot hele ke manmanna pe hele ke kerkereng toto ke teke, nenge teke he neu lemene taua ute e nge i, lape tung hot mene ke lange he neu. <sup>8</sup> Ol pe Herotias hele la sapele nge tuna heingana neu nga utar nenge lape onteia lange ne Herot. Ol pe he neu hele, “E teke otal heke Ioanes nenge

henunun palpalna nga kaliu nei pe o mene at nge iau.”<sup>9</sup> Ne Herot longe helenga neu pe singina matau toto. Ol pe lape hele ke merei ol? Ngana paiau tamal hote helenga kerkereng ngana ke nena lang mur te longe mau lou.<sup>10</sup> Ol pe ne Herot hele sapele ke te chat hoa Ioanes kanna nga tuele au ngana<sup>11</sup> pe tetal heke palpalna nga kaliu pe te mene lange he neu. Pe he neu mene pe laia nge tana.<sup>12</sup> Pe Ioanes nena hana mur tela ke te mene koluna ke la te alo hite. Ke het pe tela sapele ke la te hele toto Iesus nena.

### *Iesus Hengaua Hulua*

*(Mak 6:30-44; Luk 9:10-17; Ioa 6:1-14)*

<sup>13</sup> Iok, Iesus longo hatal nena nga ure nenge lohote nge Ioanes ke ulolo. Ol pe lohaka kun mana nga sulang e ke la tu ke I toro mana nga kileng e nge tuloulou mana. Pe hulua te longo rusia pe te lohaka nga reria kileng mur pe te i nga ich ke te nanasia I ke tela.<sup>14</sup> Pe Iesus mana sio langa peipei pe esia hulua nge te eukirau, pe letena ia iri. Pomalam hemasia iri nenge singiria haleles.<sup>15</sup> Pe kileng lala ke ulei sisio lo, ol pe Iesus nena hana mur tela nge I pe te hele, “Teke poi pe o kulosia hulua nei ke tela nga tuele tana nemur ke te ol aria ngaunga mukam. Iange mele hel tetu nga lamai ero koi. Kileng unne nei, tu loulou mana pe kileng ulei sisio lokoi.”

<sup>16</sup> Ol pe Iesus tuacholia lange nena hana mur ke teke, “Iri lape tetu lakoloi, pe imo a tango ngaunga ke a hengaua iri.”<sup>17</sup> Pe iri te hele, “Ero! Iange mioka iri lime pe ruo nai mana i tema mai.”<sup>18</sup> Pe Iesus hele, “Iok, a mene iri at nge Iau.”<sup>19</sup> Pe pule Iesus hele lange hehei pe hana ke te kila sio nga heilil. Ol pe Iesus mene mioka nemur pe ruo nai neu pe nau haka langa lut nga tapa, pe hele urana toto pe reke iri. Ke het pe tunge lange nena hana mur. Pe nena hana mur te heronge nge hehei pe hana.<sup>20</sup> Iri

lochloch te ngau pe te ngau ke saria una toto. Pe Iesus nena hana mur te takirau mule ngaunga aluanuana mur. Pe chasang iri analoch pe nai, te muta mule ia ngaunga aluanuana nemur.<sup>21</sup> Iri nenge te ngaua ngaunga neu, te am ele iri pe te lohote ke hana iri 5000. Pe tesis hele hehei pe aina kinkino ngana ero.

### *Iesus I Mana Nga Ruach Ona*

*(Mak 6:45-52; Ioa 6:15-21)*

<sup>22</sup> Iok, Iesus poia nena hana mur ke te lohaka nga sulang ke iri muka tele langa hele. Ke het pe kulos sapele hulua nemur ke tela ol.<sup>23</sup> Ke het pe I toro mana i haka langa hengene ilina ke hetalaulau, pe tutu ke la ulei sio.<sup>24</sup> Pe sulang nenge nena hana mur te haka ia kou manmana nga leme tunangana unne lo. Pe ruach tamal ia iri ke sio pe haka iange kileng eingana heke.

<sup>25</sup> Pe nga uachuach Iesus i ke nanas hote iri, pe i haka mana nga ruach ona.<sup>26</sup> Pe nena hana mur te esia i pe te matau toto pe te u haka iange te teke ma moiuk.<sup>27</sup> Pe ueiuei mana Iesus hele ele iri ke teke, “Samo loiloi pe a matau ero. Iau paiam.”

<sup>28</sup> Pe Petrus hele, “Iok, o hele at nge iau ke e i mana nga ruach ona ke ela nge iong. Laka e eteia ke iong toto.”

<sup>29</sup> Pe Iesus hele, “Iok, o i at.”

Ol pe Petrus iuch hot nga sulang neu pe i sapele nga ruach ona ke lange Iesus.<sup>30</sup> Pe Petrus esia tutula palaungana neu pe sana rora mule. Pomalam talun ke hekorong teu mule nga ruach. Ol pe alngana hot ke teke, “Non Soke! O halaua iau.”

<sup>31</sup> Pe Iesus sie i nga penna ke ueiuei mana pe hele, “Iong letem manmanna ngana unne sune mana kura. Pomerei nenge o ra hite letem manmanna ngana ke kerkereng ero?”<sup>32</sup> Ke het pe iri nai te iuch teu la mule nga sulang neu, pe tutula palaungana neu mete sio sapele.

<sup>33</sup> Pe Iesus nena hana mur nenge teare nga sulang neu te heto heke i

pe te hele, “Manmanna toto ke iong NeHalang Tuna.”

<sup>34</sup> Iok, te lotele ke tela nga hele pe la te sio nga kileng nenge Kene-saret. <sup>35</sup> Pe hana nemur nga kileng neu tenau urume Iesus, pe te hesese pingana ke ueiuei mana ke song rara nga kileng mur nenga lamau. Ol pe hulua teat sapele ia haleles kina mur nge Iesus ke hemasia iri. <sup>36</sup> Pe haleles kina nemur te hele lange Iesus ke te teke, te ra haka mana nga nena hengeron ana horo ke aria haleles het. Ke iri nenge te ra haka nge Iesus, aria haleles het lochloch.

## 15

### *Ta Nanasia Hengetoro Nenge NeHalang* (Mak 7:1-13)

<sup>1</sup> Pe Paresio mur pe hotonga ana hetorongana mur hel, te lohaka nge Ierusalem pe tei ke tela nge Iesus pe te onteia I, <sup>2</sup> “Pomere nge lem hana mur? Te nanas ia hotonga mur nenge rera tete mur te hesio tele at nge ita ero. Hotonga nemur teke, ta lomo tele pera pe ta ngau ol. Pe lem hana mur te lome peria ero, te ngau pulut mana. Pomere mai?”

<sup>3</sup> Pe Iesus hele, “Oe! Pe imo pomere nenge a nanas taua NeHalang na hotonga mur ero, pe a nanas mene lemo hotonga mur? <sup>4</sup> NeHalang hele ke teke, ‘O heto heke tam pe temem pe o longo tau mene iri. Pe mele nenge hele poreke temene pe tana, lape te hune i ke mete.’ <sup>5</sup> Pe imo a teke poinga nei urana. Nenge a teke none hele lange temene pe tana ke, ‘E teke e halaua imo ke nek toto, pe ero. Iange lek halaunga nenge e teke e tungge lange imo, ngana kou e tung mule lange NeHalang lo. Ke nem, pomanga lek tunginga nenge lange I.’ <sup>6</sup> Mele nem poi ke urana lange NeHalang pe nge temene pe tana ero. Ke nga lemo poinga nem mana a tal sio tote NeHalang nena hotonga mur pe a teke a nanas tau mene imo

sipomo lemo. <sup>7</sup> Imo hana nenge a pallaka hali! Hetatalonga Isaias hele hot pengpeng ia imo lo nenge hele ke teke

<sup>8</sup> “‘Hana nemur te heto heke Iau nga haria ulina mana nge hot, pe nga leteria nge teu tetu ke kangkanga toto nge Iau.

<sup>9</sup> Te hetore hehei pe hana nga NeHalang na hotonga mur ero.

Iange te hetoro mene iri nga iri siporia reria hotonga mur. Pe te channangnanga ke te heto hekeke Iau.’ ”

### *Iesus Heleia Ure Nenge Poia Ita Ke Letera Muna* (Mak 7:14-23)

<sup>10</sup> Ol pe Iesus iua hulua nemur ke tela nge i pe hele, “A longo ke nek nga helenga nemur nenge e heleleia nei luna mur. <sup>11</sup> Ngaunga nenge o mene ke otal teua langa halim, heporeke iong ke letem muna ero. Pe utar nenge lohohot nga halim, ure nem poia iong ke letem muna.”

<sup>12</sup> Pe Iesus nena hana mur tela nge I pe te hele, “Non Soke, o eteia pule? Paresio nemur te longge lem helenga nem nge o tung hote lange iri pe saria menin hulu toto ia.”

<sup>13</sup> Pe Iesus hele ke teke, “Temek nga lut nga tapa eteia utar mur nenge tue iri nga ana ume. Pe ure lochloch ngana nenge tue iri ero, lape lalau heke iri luluch nga ularia mur. <sup>14</sup> A reng mana lange iri. Mataria hit kura iam. Pe mele nenge matana hit pe teke henonoua mele e pule nge matana hit nga kue, lape iri nai ape ke te hekorong teu nga polo.”

<sup>15</sup> Pe Petrus hele, “Iok, o hele urume helenga opene nem at nge imem.”

<sup>16</sup> Pe Iesus hele, “Ia imo nge a etei ero kurkura kai? <sup>17</sup> Ure nenge a tal teua nga halimo, la sapele kela manga letemo. Ke het pe lohohot mule nga letemo ke lasus. <sup>18</sup> Pe ure nenge lohohot nga halimo, lohohot at nga letemo nge teu toto. Pe ure nem lape poia

mele nem ke letena muna hulu toto. <sup>19</sup> Ke ure nemur nenge poia mele nem ke letena muna hulu toto laka; letena tuanin rara ngana nga ure poreke ngana mur pe hune mele ke mete pe maluluch nge none nehei pe lau sisio hehei pe kemkeme, pe chananga halali pe ngunngunu halali pe poinga nenge taolo heke mene helenga chanangnanga ke ta heporeke mele ene. <sup>20</sup> Ke ure nemur, poia mele nem ke letena muna hulu toto. Pe nenge teke mele nem lome penna ero pe ngau mana, nem poia mele nem ke letena muna hulu ero.”

### *Hei Kanan E Letena Manmanna Ngana*

*(Mak 7:24-30)*

<sup>21</sup> Iok, Iesus hile kileng neu pe langa kileng nenge Tir pe Saiton. Pe hei e nge nena nge Kanan tutu nga kileng neu. <sup>22</sup> Ana hei esia Iesus pe tang hot lange I ke teke, “Non Soke! Iong ne Teuit tuna laka iong. Letem poreke ia iau pe o halaua iau! Tuk heingana e, uneinei te poi poreke tote. Pomerei pe o iat ke o halaua i, iange tu ngana poreke toto lo.”

<sup>23</sup> Pe Iesus tuacholia hei neu nena helenga ero. Ol pe nena hana mur tela nge I pe te totohita ke te teke, “O kulosia hei nei ke la ol. Ngana koi nenge nananas pe pur leme ero mana ia iunga atat nge ita.”

<sup>24</sup> Pe Iesus hele, “NeHalang kulosia iau at nge Israel mur mana. Iri te pomanga sipsip mur nenge te erue.”

<sup>25</sup> Ol pe hei neu at ke tualou sio palana nga Iesus matana pe hele, “Non Soke! O halaua iau.”

<sup>26</sup> Pe Iesus hele, “Nenge teke ta mene aina kinkino ngana aria ngaunga pe ta sau sue langa kaone mur, poinga nem poreke toto.”

<sup>27</sup> Pe hei neu hele, “Oe Non Soke, nem manmanna. Pe hana hel te ngaungau nga aria hatanga pe ngaunga mumuna losisio. Pe reria kaone mur te ngau hekeke ngaunga mumuna nemur.”

<sup>28</sup> Pe Iesus hele, “Hei nem, iong letem manmanna ngana palaungana toto. Pe utar nenge lememe taua nge iau lape lohote ke manmanna.” Pe nga etue unne neu pengpeng hei neu tuna heingana urana mule sapele.

<sup>29</sup> Iok, Iesus hile kileng unne neu pe langa ech hetaliliu ngana nge Kalelea pe i ke henanas ole ruach nem ilina. Ol pe i haka langa hengene ilina pe kila sio. <sup>30</sup> Pe hulua te nanasia I pe tela ke te mene iri nenge aria haleles ke la tetal sue iri nga Iesus apena huna ke hemasia iri. Ngana laka iri nenge singiria metmete, pe nenge mataria hit, pe nenge aperia metmete pe nenge te hele erochro pe haleles tana huna hel pule. <sup>31</sup> Pe hulua nemur ngaria lohote, iange tenau pe iri nenge te hele erochro neu, te hele mulmule, pe nenge aperia mete tei mulmule, pe nenge singiria mete te urana mule, pe iri nenge mataria hit tenau mulmule. Ol pe te heto haka tote Israel mur aria Soke NeHalang.

### *Iesus Hengaua Iri 4000*

*(Mak 8:1-10)*

<sup>32</sup> Pe Iesus iua nena hana mur pe hele lange iri ke teke, “Letek poreke ia hulua lochloch ngana nei i. Iange iri te nananasia iau ke etue iri mol lo, pe te tam teua ute e ero toto. Pe atong mur te mete aria lo. Pe pule lemek ero nge e poi kulosinga ia iri. Iange heueu lape hel mataria liuliu pe te losio ke tema mana nga kue.”

<sup>33</sup> Ol pe Iesus nena hana mur te hele, “Pe ita mai lape ta mene ngaunga langai ke ta hengaua hulua nenge pomai mai? Kileng e nge tu rochroi nga lamai ero i.”

<sup>34</sup> Pe Iesus onteia iri, “Mioka hia nenge a ronronia mau?”

Pe iri te hele, “Mioka iri rahtele nai pe ruo kinkino ngana hel i, mo ronronia.”

<sup>35</sup> Ol pe Iesus hele lange hulua nemur ke te kila sio nga ich. <sup>36</sup> Pe mene hot sapele ngaunga nemur pe ruo neu. Pe hele urana toto lange



NeHalang. Ke het pe reke ngaunga nemur pe tunge lange nena hana mur ke te heronge nge hehei pe hana. <sup>37</sup> Iri lochloch te ngau ke saria una toto. Pe Iesus nena hana mur te takiraua ngaunga aluanuana mur. Pe ngaunga aluana, te takiraua ke ana kaliu iri rahtelee nai. <sup>38</sup> Iri nenge te ngaua ngaunga neu iri 4,000 pe tesis ele hehei pe aina kinkino ngana ero. <sup>39</sup> Iok, Iesus kulosia hulua nemur ke tela ol, pe I tamu haka nga sulang e pe mana tele langa kileng nenge Makatan.

## 16

### *Paresio Mur Te Ollaka Hote Iesus (Mak 8:11-13; Luk 12:54-56)*

<sup>1</sup> Iok, Paresio mur iri ul Satiusi mur tela nge Iesus pe te ollaka hote I, ke te teke hele pe ute e lohot mana ke tenau.

<sup>2</sup> Pe Iesus hele, “Imo lape a esia tapa sana nge remenmen nga ulei pe a hele pengpeng ke a teke, ‘Ochou kileng chaia pam lo, iange ririua pau kou ma hot nga tapa sana.’ <sup>3</sup> Pe nga uach a hele ke a teke, ‘Heueu lape pitte mol, iange muchmua halang kou ma hele tapa sana.’ Imo anau urume tapa sana pe a hele hot pengpeng ia ure nenge lape lohot. Pe pomere nge anau urume ure nenge lohotot nga etue nei pe ramamo chach ia ero toto? <sup>4</sup> Imo hana porekreke ngana mur nga etue nei, a teke e poi hote ute hel ke anau? Iau lape e poi hote ute pele ero toto. Pe ure nenge lohot nge Iona nge nike, lape e tunge lange imo.” Pe Iesus hulua rumena lange iri pe i ke la sapele.

### *Anau Ala Amo Kenek Nge Paresio Mur Pe Satiusi Mur (Mak 8:14-21)*

<sup>5</sup> Iok, Iesus pe na hana mur te lotele langa kolkolu palaungana neu ilina hele lo, pe Iesus nena hana mur leteria lilil nge te mene ngaunga. <sup>6</sup> Pe Iesus hele lange iri ke pomai, “Anau ala amo ke nek toto nge Paresio mur

pe Satiusi mur. Iange hana nemur, te poi ke pomalaka nga ure nenge tetal teua langa beret itach ngana pe poia beret nem ke una haka.(is)”

<sup>7</sup> Ol pe Iesus nena hana mur te hele tele hel mana nge iri ke te teke, “Pomere toto nenge Iesus tamal hote helenga nei mai? Lape ta mene ngaunga ero ke ngana kai?”

<sup>8</sup> Pe Iesus eteia ure nenge te heleleia neu lo, pe hele lange iri ke teke, “Imo letemo manmanna ngana unne sune mana iam. Pomere nenge a heleleia ngaunga nge ero? <sup>9</sup> Letemo mallaha ero kura kai? Letemo la mule nga mioka lime nenge hana iri 5000 te ngaua pe saria una hatal ia. Pe kaliu iri hia nenge te muta ia aria ngaunga aluanuana mur? <sup>10</sup> Iok, letemo metene hulua nenge iri 4000 nem. Aria mioka iri rahtelee nai mana, pe hehei pe hana lochloch ngana nem te ngau ke saria una. Pe kaliu iri hia te muta ia ngaunga aluanuana mur? <sup>11</sup> Pomere nge letemo alchach ero kura? Iau e hele lala nge imo nga ngaunga ero. E teke anau ala amo ke nek toto nga is nenge Paresio mur pe Satiusi mur.” <sup>12</sup> Ol pe Iesus nena hana mur leteria matana sapele nga ure nenge Iesus helele ia. Ke Iesus teke tenau ala aria nga is nenga beret ero. Iesus teke tenau ala aria laka nga hengetoro nenge Paresio mur pe Satiusi mur.

### *Petrus Hemallaha Hote Iesus (Mak 8:27-30; Luk 9:18-21)*

<sup>13</sup> Iok laol, Iesus i ole ke langa tuele tana pengpeng ngana nenge Kaesarea Pilipai. Pe onteia nena hana mur ke teke, “Hana pe hehei te heleleia Non Tuna ke te teke I itei toto?”

<sup>14</sup> Pe nena hana mur te hele, “Hehei pe hana hel te heleleia Non Tuna ke te teke, I Ioanes nenge henunun; pe hel te teke I Elaisa; pe hel te teke Ieremias; nem pe te teke non hetatalonga e mana.”



15 Pe Iesus ontei mule iri ke teke, “Pe imo a teke Iau itei toto?”

16 Pe Simon Petrus tuacholia ke teke, “Iong Kristus. NeHalang nenge tu ke koko tuna iong.”

17 Pe Iesus hele, “Simon, iong ne Iona tuna iong. NeHalang pete iong. Ke ngana laka nenge o hele hote helenga nem. Pe mele nga ich nei hele ia helenga nem lange iong ero. Temek nenge tu nga lut nga tapa henonou iong ia helenga nem. 18 Pe e hele lange iong, iong Petrus nenge em luna laka, ‘um’, pe nga um nei lape e hemes heke lek hana mur nenge leteria manmanna nge iau. Pe kerkerenga nenga metenga lape hekou sue iri ero toto. 19 Pe lape e tunge lohenga mur nenga NeHalang nena nualanga pe nekinga nga tapa lange iong. Pe utar nenge o hu hele nga ich nei, lape NeHalang hu hele nga lut pule. Pe utar nenge o longele nga ich nei, lape NeHalang longele nga lut pule.” 20 Iesus i Kristus ke manmanna. Pe toto hita toto lange nena hana mur ke te hele rere helenga nem ero toto.

### *Iesus Hele Talue Ana Metenga Nge Lape Lohot*

*(Mak 8:31—9:1; Luk 9:22-27)*

21 Iok, talun nga etue neu ke la ol, Iesus hele lala nge nena hana mur ke teke lange Ierusalem. Pe hele urume tote lange iri, ke teke lape amneia melmelenga halang nenge lape hana nemur te poia lange I. Ngana laka hana papalauna mur pe tunginga ana hana mur aria soksoke ngana mur pe hotonga ana hetoronga mur. Pe lape te hune I ke mete pe maul haka mule nga etue mol ngana.

22 Pe Petrus longe Iesus nge hele ke mau pe mene lele hote Iesus pe keres taua I ke teke, “Non Soke! O poi ke pomam ero. Lemek ero nge ure nem lohohot nge iong.”

23 Pe Iesus ul mule ramana lange Petrus pe hele lange i ke teke, “Iong non poreke ngana iam, o la nga rumek! O poi ke malaka nga ure nenge teke poi hele lek kue pe hesingo ia Iau ke e losio mule. Iong letem tu mana nga ure nemur nga ich nei. Letem tu nge NeHalang ero toto.”

24 Ol pe Iesus hele lange nena hana mur ke teke, “Nenge teke mele koko nge Iau heueu, hilesue lemene ngana mur lochloch pe takisia ana melmelenga, pomalam nanasia iau ol. 25 Iange mele nenge ramana tuhit mene maulul ngana nga ich, lape maulul nga hoena ero ol. Pe mele nenge nanas tote iau kela i sipona mete, ana non lape mene mule maulul ngana nenge tu ke koko. 26 Nenge teke mele mutena tau tote ure lochloch ngana nga ich nei, lape mene mauling ke koko ero. Iange lape ure nemur te halaua i nga hoena ke merei? Nem pe lape ol mule mauling ke koko nga utar? 27 Non Tuna lape at luluch nga Temene na hemalmalinga. Pe at luluch nge nena angkelo mur. Pe lape tunge iechinga lange hehei pe hana ke nanas tau pengpengia reria poinga mur nga ich nei. 28 E hele lange imo pengpeng, amo hel nge imo nenge te mes heueu nei, lape metenga mene iri ero kura pe te esia Non Tuna nge at luluch nga nena nualanga pe nekinga.”

## 17

### *Iesus Singina Lohot Ke Altoto* *(Mak 9:2-13; Luk 9:28-36)*

1 Iok, etue iri rahte ele lalo pe Iesus mene Petrus pe Ieims pe tina Ioanes ke iri ul te haka langa hengene ke iri toro mana. 2 Pe nga lamau te esia Iesus nge singina lohohot ke altoto. Iesus ramana sina ele mataria ke pomanga chaia matana. Pe na hengeron tua huita toto ke pomanga

lemenge e nge tualeme ngana sina ala toto. <sup>3</sup> Ol pe tenau mana pe te esia Iesus nge hele lululuch nge Moses iri nai Elaisa.

<sup>4</sup> Pe Petrus hele lange Iesus, “Non Soke, imem nei motu lamai ke urana lo. Pe nenge teke lememe, e hemes haka ke pelpele iri mol, ke iong lem e pe Moses na e pe Elaisa na e.”

<sup>5</sup> Petrus helele kura pe ulu lohote ke poi hite iri. Ulu neu hussu toto pe helenga e lohote nga ulu neu ke teke, “Tuk toto koi nei, nenge mutek tau tote pe e iech toto nge I. A longo taua I!”

<sup>6</sup> Iesus nena hana mur te longe ke mau pe te matau toto pe te losio mana. Pe tema ke tenau sio mana nga ich. <sup>7</sup> Ol pe Iesus la ke ra lange iri pe hele, “A lohaka ol. A matau ero.” <sup>8</sup> Te teke tenau haka pe tenau mene Iesus i toro mana ol. Pe hana nai neu iri ero lo.

<sup>9</sup> Iok, tei sio nga hengene neu ke tela mulmule pe Iesus toto hita toto lange iri ke teke, “A esia ure nenge lohote nei, a hele ia lange mele ero toto kela het nga etue nenge Non Tuna maul haka mule nga ana metenga.”

<sup>10</sup> Pe nena hana mur te onteia I ke te teke, “Pe pomere nenge hotonga ana hetoronga mur te hele ke te teke, Elaisa lape at tala mai?”

<sup>11</sup> Pe Iesus hele ke teke, “Nem manmanna, Elaisa lape at tala ke hepen-gia ure lochloch. <sup>12</sup> Pe e hele lange imo, Elaisa at lo pe hana nemur te eteia i ero. Te poia i ke nek ero pe te poi pulut mana lange i nga lemeria ngana. Pe poinga nem lape te poia lange Non Tuna pule ke amneia ana melmelenga palaungana.” <sup>13</sup> Ol pe Iesus nena hana mur te etei sapele ke I heleleia Ioanes nenge Henunun.

### *Iesus Hemasia Kol Mele Sune Nge Uneinei Poia*

*(Mak 9:14-29; Luk 9:37-43a)*

<sup>14</sup> Iok, tela mule nge hulua nemur pe none lange Iesus pe tualou sio

nga matana pe hele, <sup>15</sup> “Non Soke, letem poreke ia tuk. Heueu nei tungana poreke toto iange ute poia ramana ke ana hauaua toto. Teke la ke mak hakaka nga oan pe mana puluch teueu nga ech. <sup>16</sup> E mene i lange lem hana mur nenge te nananasia iong, pe nakuria ero taua nge te hemasia i.”

<sup>17</sup> Ol pe Iesus hele ke teke, “Imo hana nem, letemo manmanna ero, pe ai ke a tuamasia lemo inga mur ero toto. Etu luluch nge imo ke mala lo. Pe nge ngingie ol pe a etei tote ume nei? A mene kol nem at nge Iau.” <sup>18</sup> Ol pe Iesus keres taua uneinei nenge tu nge kol neu, pe uneinei neu lohote sapele. Pe kol sune neu urana mule nga etue neu pengpeng.

<sup>19</sup> Pe Iesus nena hana mur tela pe te ontei kome mene I ke teke, “Pomerei toto nenge mo helope hote uneinei nem pe longo taua imem ero mai?”

<sup>20</sup> Pe Iesus tuacholia ke teke, “Tange imo letemo manmanna ngana unne sune mana. E hele ke manmanna toto lange imo. Nenge teke letemo manmanna ngana purpure hohos nganngana, a hele langa hengene neu pe hengene nem lape longo taua imo. Ke a teke, ‘Hengene nem, o lohaka nga lamai pe o loloun la lamau.’ Pe anau, hengene nem lo haka pe loloun ke la. Pe ute pele nge anali nge imo ero ol. [<sup>21</sup> Pe nenge teke a teke a helope hote uneinei nenge pomai, apoi mana nga poinga nenge a hetaulaulau ke kokoes pe a hile ngaunga.]”

<sup>22</sup> Iok, Iesus iri ul nena hana mur tela ke te eukirau mule nge Kalelea pe Iesus hele la mule nge iri ke teke, “Lape te tung heke Non Tuna langa hana hel peria. <sup>23</sup> Pe te hune I ke mete pe nga etue mol ngana lape maul haka mule nga ana metenga.” Iesus hele ke mau pe nena hana mur leteria poreke toto ia I.

### *Iesus Hele Nga Umtutuna Nenge Te Sausaua*

**17:5:** Deu 18:15; Psa 2:7; Isa 42:1; Mat 3:17; Mak 1:11; Luk 3:22 **17:10:** Mal 4:5 **17:12:** Mat 11:14 **17:13:** Luk 1:17 **17:19:** Mat 10:1 **17:20:** Mat 21:21; Mak 11:23; Luk 17:6; 1Ko 13:2 **17:22:** Mat 16:21 **17:24:** Exo 30:13; 38:26

<sup>24</sup> Iok, Iesus iri ul nena hana mur tela te lohot nge Kapernam pe hana nenge te lololoch umtutuna tela nge Petrus pe te onteia i ke te teke, “Amo hetoronga nem mam sausau umtutuna pule ma? Umtutuna nenge lala nga NeHalang na pele palaungana?”

<sup>25</sup> Pe Petrus hele ke teke, “Oe, Ana non sausau umtutuna pule la.”

Ol pe Petrus i teu la sapele nga pele. Pe Iesus ontei tele i ke mai, “Simon, iong letem tuanin ngana ma ke mere? Hana papalauna nemur nga ich nei te nananasia poinga nenge te lololoch umtutuna. Pe te menmene nge itei? Te menmene nge tuturia mur pengpeng ma te menmene nge hana lomomona ngana mur?”

<sup>26</sup> Pe Petrus tuacholia ke mai, “Te menmene nge hana lomomona ngana mur mana.”

Pe Iesus hele lange i ke teke, “Nem manmanna. Te loloch umtutuna nge tuturia mur pengpeng ero. <sup>27</sup> Pe lemere ero nge ta poia hana nemur ke saria menin hulu. Pomalam o la nga kolkolu palaungana nem pe o kona. Pe ruo elle nenge o kona heke tele, o poia hana ke pangpanga pe lape o hottaua um tuna e nge mateu. Pe ita nai rera umtuna nenge ta sau lalom. O mene pe o laia nge hana nemur.”

## 18

### *Itei Nenge I Soke Toto*

*(Mak 9:33-37; Luk 9:46-48)*

<sup>1</sup> Iok, nga etue neu Iesus nena hana mur tela nge i pe te onteia i ke te teke, “Itei toto nenge lape i soke nga NeHalang nena naualanga pe nekinga?”

<sup>2</sup> Ol pe Iesus iua mele sune lange i pe hemes ia i nga mataria. <sup>3</sup> Pe hele, “E hele ke manmanna toto lange imo, nenge teke a hulia lemo poinga mur ero pe a tal sue imo ke mange aina kinkino ngana ero, lape ateu langa NeHalang nena naualanga pe nekinga ero toto. <sup>4</sup> Ke mele nenge talsio tote i ke mange mele sune

nei, lape i soke nga NeHalang nena naualanga pe nekinga.

<sup>5</sup> “Pe mele nenge letena metene Iau pe poi ke urana lange mele sune e nge pomai, poi ke urana at nge Iau pule. <sup>6</sup> Aina kinkino ngana nge mai leteria manmanna nge Iau. Pe nenge teke mele heporeke elle nge iri letena manmanna ngana ke losio, urana nge te heon hite um palaungana nga mele nem kanna pe tesau sue langa leme chapopo ngana pe mana puluch ke lasus.

<sup>7</sup> “Hulua nga kileng lochloch lape te amneia melmelenga palaungana. Iange ute hel poia iri ke te losio nga poinga poreke ngana mur. Pe ure nemur lape te lohot ke manmanna. Pe non nem nenge poia iri ke te losio lape amneia melmelenga ke poreke toto! <sup>8</sup> Nenge teke perim ma apem, te poia iong ke o losio nga poinga poreke ngana, o chato hote iri pe o sau ke te lasus. Urana nge singim unne lasus nike. Pomalam lape o mene maulinga ke koko. Iange nenge teke apem nai pe perim nai ape ke tetu, lape tesau heke iong langa oan sapel lala ngana nenge tu ke kokoes mana. <sup>9</sup> Nenge teke matam poia iong ke o losio nga poinga poreke ngana, o sul hote pe o sau ke lasus. Urana nge matam elle ke o mene maulinga ke koko. Pe nenge teke matam iri nai ke tetu kura lape tesau heke iong langa oan nge Imperno.”

### *Helenga Opene Nga Sipsip Nenge Erue*

*(Luk 15:3-7)*

<sup>10</sup> “Anau ala ke nek! A poi poreke aina kinkino ngana nenge mai ero. Iange reria angkelo mur kou tetu luluch nge Temek nga lut nga tapa. Pe kokoes te esesia Temek nakuna. [<sup>11</sup> Pe Non Tuna at ke mene mule iri nenge te erue.]

<sup>12</sup> “Imo letemo ma ke mere? Nga nenge teke none nena sipsip mur iri ana non kina iri lime (100) pe elle erue. Lape la ke tango rere ma ero? E

18:1: Luk 22:24

18:3: Mat 19:14; Mak 10:15; Luk 18:17

18:5: Mat 10:40; Luk 10:16; Ioa 13:20

18:8: Mat 5:29-30

18:10: Hip 1:14

18:11: Luk 19:10

hele lange imo, non nem lape hile sue nena sipsip mur pe langa hengene ke tango rere elle nenge erue nem. <sup>13</sup> Pe nenge teke hottaua mai loi, non nem lape iech ele tote. Pe sipsip nem pekngana nemur, non nem iech ele iri ero. <sup>14</sup> Ke pomalam mana, Tememo nga lut nga tapa lemene ero nge e nge iri kinkino ngana nemur erue.

### *O Hepengia Tim E Nenge Poia Poinga Poreke Ngana Lange Iong*

<sup>15</sup> “Pe nenge teke tim e poia poinga poreke ngana e lange iong, ola ke nek mana nge i ke imo nai mana, pe o hele hote ure nenge poia ke poreke. Pe nenge teke longo lange iong ke nek, iong lape o halau mule i ke imo nai timo hel mule. <sup>16</sup> Pe nenge teke longo lange iong ke nek ero, ola ke o mene mele elle pule. Nem pe o mene ke aina nai pule. Iange nenge teke aina nai ma mol te hele, lape reria helenga mene hote ure nem ke lohot ke mallaha. <sup>17</sup> Pe nenge teke mele nem lemene ero nge longo lange iri nai ma mol nem, a heleia lange NeHalang nena hana mur. Pe nenge teke lemene ero nge longo lange NeHalang nena hana mur, anau mene i ke pomanga none nge eteia NeHalang ero. Nem pe a naue i ke pomanga non nenge lololoch umtutuna.

<sup>18</sup> “E hele ke manmanna toto lange imo, utar nenge o hu hele nga ich, lape NeHalang hu hele nga lut pule. Pe utar nenge o long hele nga ich nei, lape NeHalang long hele nga lut pule.

<sup>19</sup> “Lape e hele lange imo ke mai pule, Nenge teke amo nai te ngata hel ke te hetalaulau nga ute, Temek nga lut nga tapa lape poia ke lohot ke manmanna. <sup>20</sup> Nei manmanna, iange nenge teke amo nai ma mol a eukirau nga Iau ek, Iau la etu luluch nge iri.”

### *Chau Nananga Nenge Letera Porekeia Mele*

<sup>21</sup> Ol pe Petrus lange Iesus pe hele ke teke, “Non Soke, nenge teke tik e poia poinga poreke ngana at nge

iau, pe lape letek porekeia i ke e hia? Ratele nai toto?”

<sup>22</sup> Pe Iesus hele, “E hele ke e teke rahtele nai mana ero. E teke rahtele nai pe rahtele nai mule pe rahtele nai mule a poia ke koko tele mana kela pe a sis ele ero.

<sup>23</sup> “Iange NeHalang nena nualanga pe nekinga pomalaka nge non soke ngana e nge iua nena hana mur ke te tuacholcholia reria hanganok mur. <sup>24</sup> Pe talune nge nena non nenge mene ke umtutuna iri halang toto (1-milion kina). <sup>25</sup> Pe non nem na umtutuna halang ero nge tuacholia ana soke nem nena umtutuna mur. Pomalam non soke neu hele ke lape mele hel te olia non neu pe nehei pe tutuna mur pe reria ure mur lochloch. Pe umtutuna lange non soke neu ke hemete non neu nena hanganok mur.

<sup>26</sup> “Ol pe non neu longe pe la ke tua mermero sio nga ana soke apena huna pe hele ke teke, ‘Non soke, letem ia iau mukam, pe lape e tuachol mule lem ure mur lochloch.’ <sup>27</sup> Ol pe non soke neu letena ia non neu pe hele ke teke hanganok neu lasus ol. Pe kulosia non neu kela sapele.

<sup>28</sup> “Iok, non neu i hot kela pe saolia neingana e nge hanok ke umtutuna ana non kina iri lime (100 kina) nge i. Pe sihe i pe teke inroke non neu nga kanna pe hele inin taua i ke teke, ‘Tong nem, heueu mana nei o tuacholia lem hanganok nenge o poia nge iau.’

<sup>29</sup> “Pe neingana neu tuamermero sio nga matana pe hele, ‘Kole, letem poreke ia iau pe o kulala pol mana, pe lape e tuachol ia hanganok nem.’

<sup>30</sup> “Pe non pa neu lemene ero nge kulala. Ol pe poia neingana neu kela mateu nga tuele au ngana kela het nga etue nenge tuachol taua nena hanganok mur. <sup>31</sup> Pe iri nai reria ume pekngana mur te esia poinga neu pe ma ke nek nga leteria ero. Pomalam tela nge aria soke neu pe te nene lange i.



<sup>32</sup> “Tok laol, non soke neu iu teua non neu la pe hele ke teke, ‘Iong nem, lem poinga poreke toto! Hanganok nenge o poia nge iau nem, e hele lange iong ke e teke lasus lo. Iange iong sipom o hele ke o teke letek poreke ia iong. <sup>33</sup> Pe pomere nenge letem poreke ia neingam neu ero?’ <sup>34</sup> Non soke neu letena inin pe heteu mule non neu langa tuele au ngana. Pe te poia i ke amneia ana melmelenga kela het nga etue nenge tuachol taua nena hanganok mur.

<sup>35</sup> “Pe Temek nga lut nga tapa lape poia imo elle pe elle ke pomalam pule. Pe nenge teke letemo ia neingamo mur, letemo ia iri nga letemo nge teu toto.”

## 19

### *Iesus Hetoro Nga Hilenga Hel Nga Leinga*

*(Mak 10:1-12)*

<sup>1</sup> Iesus hele ke het pe lohaka sapele nge Kalelea pe i ke langa kileng nenge Iutea, nga ech ilina hele nenge Iortan. <sup>2</sup> Pe hulua te nanasia I pe hemasia iri nga aria haleles mur.

<sup>3</sup> Pe Paresio mur hel tela nge Iesus ke te tuamirik hote i pe te onteia i, “Rera hotonga mai hele ke teke, lape none hile nehei nga lemene ngana pule kai?”

<sup>4</sup> Pe Iesus tuachol ia ke teke, “Imo nge lape a sisis nga NeHalang nena helenga ero iam. Alalaha nem hele ke teke, ‘Nga talun ngana toto, NeHalang ume hote iri ke none pe heie.’ <sup>5</sup> Pe pule alalaha nem hele ke teke, ‘Pomalam, none lape hile temene pe tana pe la ke tululuch nge nehei pe iri nai singiria lohok ke elle mana.’ <sup>6</sup> Ke iri nai te lohok ke iri elle pengpeng pe nai mule ero ol. Pe ure nai nenge NeHalang puotom tele, a chatoa ero toto.”

<sup>7</sup> Pe hana nemur te hele, “Pe pomere nenge Moses hele ke teke, nenge teke none lemene ke hile

nehei, non nem as hote alalaha e? Pe alalaha nem hele tote aria leinga nge lape het. Ke het pe tunge lange nehei pe kulosia i ke la mule nge temene pe tana. Pomere nge Moses hele ke pomam?”

<sup>8</sup> Pe Iesus hele, “Moses longele imo ke a hile lemo hehei mur iange a nanasia NeHalang nena hengetoro mur ero. Pe nga tele ngana toto ute pele nge pomam ero. <sup>9</sup> Pe e hele lange imo pengpeng, mele nenge hile nehei pe lei heke mule hei e, poia poinga poreke ngana nga NeHalang matana ke het lo. Kue nenge o teke o hile lem hei, ngana laka nga nenge teke hei nem pingana hota hot nge none.”

<sup>10</sup> Ol pe Iesus nena hana mur nenge te nananasia I, tela nge Iesus pe te hele, “Eh, ke nenge teke leinga kina mur te popoi ke machmai, urana ngana ta lei ero nike.”

<sup>11</sup> Pe Iesus hele, “Hulua lochloch ngana te nanasia hengetoro nei ero. Pe NeHalang poia mele hel mana ke te nanasia. <sup>12</sup> Mele hel te lei ero iange te hoe iri pe te poi ke pomau nike. Pe hel, te lei ero iange none penna poia iri. Pe hel, te lei ero iange te teke te tung tote iri ke te poia NeHalang nena naualanga pe nekinga nenga tapa ana ume. Mele nenge lemene taua hengetoro nei, mene ke tal talue nga letena pe nanasia.”

### *Iesus Lemene Taua Aina Kinkino Ngana*

*(Mak 10:13-16; Luk 18:15-17)*

<sup>13</sup> Iok, te mene aina kinkino ngana hel lange Iesus ke te teke Iesus tal heke penna nge iri pe hetalaulau hite iri. Ol pe Iesus nena hana mur te hele inin taua iri nenge te lala ia aina kinkino ngana nemur.

<sup>14</sup> Pe Iesus heleia nena hana mur ke teke, “Aina kinkino ngana nemur te teke teat nge Iau. Pe imo, apoi hele iri ero. Iange naualanga pe nekinga nenga tapa, nganangana mur laka iri



nenge pomam.” <sup>15</sup> Iok, Iesus tal heke penna nge iri ke het pe i kela sapele.

*Non Kulpo E Nge Nena Ure Halang  
(Mak 10:17-31; Luk 18:18-30)*

<sup>16</sup> Ol pe none lange Iesus pe ontei ke teke, “Heteronga, lape e poia utar nge urana ke e mene maulinga ke koko?”

<sup>17</sup> Pe Iesus tuachol ia ke teke, “Pomere nenge o onteia Iau nga ure nenge urana? Mele elle mana nge urana toto. Pe nenge teke lememe ke o mene maulinga ke koko, o longo tau mene hotonga mur.”

<sup>18</sup> Pe non neu ontei, “Hotonga tei hel?”

Pe Iesus tuacholia ke teke, “O hune mele ero. O tomtom hehei ero. O keme ero. O pallaklaka ia mele ero. <sup>19</sup> O heto heke temem pe tam. Pe lememe taua neingam ke pomanga lememe taua iong sipom.’ ”

<sup>20</sup> Pe non neu hele, “Hotonga nemur e nanas tau tote iri lo. Pe utar pule nge lape e poia?”

<sup>21</sup> Pe Iesus hele, “O teke o lohote iong non nge pengpeng toto, o laia lem ure mur lochloch nge hana hel ke te olia, pe o tunge ana umtutuna mur lange iri nenge reria ute e ero toto. Ke nenge teke o poi ke pomai, lape lem ure halang tema ke te kulele iong nga lut nga tapa. O poia ume nem ke het pe o iat ke o nanasia Iau.”

<sup>22</sup> Non neu longe ke mau pe nakuna poreke pe ua sapele, iange nena ure halang sakilil.

<sup>23</sup> Ol pe Iesus hele lange nena hana mur ke teke, “E hele ke manmanna toto lange imo. None nenge na ure halang sakilil, anali toto nge teu langa naualanga pe nekinga nenga tapa. <sup>24</sup> Pe pule e hele lange imo, nenge teke kamel e i teu langa pakeka sune polona, nem semel toto. Pe non nenge na ure halang, anali toto nge teu langa NeHalang nena naualanga pe nekinga.”

<sup>25</sup> Iesus nena hana mur te longe ke mau pe te rura toto pe te ontei, “Ol pe

itei toto ol nenge lape mene maulinga ke koko?”

<sup>26</sup> Pe Iesus nau lange iri pe hele, “Hana nakuria ero toto nge te poia ure nem. Pe nge NeHalang, i nakuna nge poia ure lochloch ngana.”

<sup>27</sup> Pe Petrus hele, “O esia imem nei, mo hile sue lememe ure mur lochloch pe moat ke mo nananasia iong. Pe lape mo mene urumeme utar?”

<sup>28</sup> Pe Iesus hele lange iri ke teke, “E hele ke manmanna toto lange imo nenge a nanasia iau. Nga etue palaungana nenge lape ure lochloch ngana te heueu ngana mule, Non Tuna lape are nga nena arenga nenge te hemalmalia ke I Non Soke toto ngana ia. Pe nga etue palaungana nem, imo lape a kila nga arenga mur pule. Lape a kila nga arenga mur nge iri analoch pe nai ke a nauela mata iri analoch pe nai nenge Israel.

<sup>29</sup> Pe iri lochloch ngana nenge leteria tu mana nge Iau pe te hile sue reria pele mur pe titiria mur pe liliuria mur pe tetemeria mur pe tataria mur pe tuturia mur pe reria ich mur, iri lape te mene mule ure nemur ke ele haka toto pe lape te mene maulinga ke koko pule. <sup>30</sup> Pe hulua nenge iri muka lape iri hoena mule, pe hulua nenge iri hoena lape iri muka mule.”

## 20

*Chau Nananga Nenge Hana Hel Te  
Umume Nga Uain Ana Late*

<sup>1</sup> Pe Iesus hele “E hele ke pomam iange naualanga pe nekinga nenga lut nga tapa, i pomanga none nge tue uain mur nga nena ich unne. Pe ana non hoala hot nga uach uruna ke tango rara hana kela te ume nga uain ana late nem. <sup>2</sup> Hottaua hana hel pe hele lange iri ke teke, ‘Imo a ume nge iau heueu pe urumo laka umtutuna tolona elle.’ Pe iri te ngata helia uru nem. Hele lange iri ke het pe kulos sapele iri ke tela nga ume.

<sup>3</sup> “Tok, chaia matana mes haka pol lo pe lake tango rara hana hel mule. Esia hel nge te mes rara manmana nga ingala matana <sup>4</sup> pe hele lange iri, ‘Imo nemur ai at. Ala ke a ume nga lek uain ana late. Pe lape e olia imo ke nanas urume mene a ume ngamo.’ <sup>5</sup> Hana nemur te lohaka pe tela sapele.

“Tok, chaia matana heurunga (12 kilok) pe ana non la ke tango rara hana hel pule. Pe chaia matana pal-lele (3 kilok) pe la ke tango rara hana hel pule. <sup>6</sup> Pe nga ulei, nga chaia matana sisio lo (5 kilok), pe la ke tango rara hana hel pule. La pe esia hel nge te mes rara manmana pe hele lange iri, ‘Etue nei i lala lo, pe pomere nenge a mes rara manmana nga lamam mam?’

<sup>7</sup> “Pe hana nemur te hele, ‘Motu rara mana iange none hekuleilei ia imem ke mo ume ana ero.’

“Ol pe non neu hele lange iri, ‘Tok, imo pule a la ke a ume nga lek uain ana late.’

<sup>8</sup> “Tok, ulei sio nga chaia matana lala ke teu sisio lo (6 kilok), ume tokoninga neu hele lange nena non nenge nauelele hana mur nga ume ke teke, ‘O iua hana nenge te ume nem pe o tunge reria umtutuna. Pe o talun tala nge iri nemur nenge teat nga rume toto pe ramam ole lange iri nenge te talun tala ume.’

<sup>9</sup> “Ke iri nenge teat rume toto neu te olia iri elle pe elle nga umtutuna tolona elle. <sup>10</sup> Pe iri nenge te mene tele iri ke te ume neu, te teke ma lape te mene ke haka pol nge iri nemur, pe ero. Iri elle pe elle te mene ke umtutuna tolona elle pule. <sup>11</sup> Te esia ke mau pe te ngunngunu ia ume tokoninga neu. Pe te hele lange i ke te teke, <sup>12</sup> ‘Iong, toinge o olia imem nenge moat tala ke urumem haka nge iri nemur nenge teat rume mana nei ol. Iange imem, mo talun tele ume nei nga chaia milang ngana nike. Pe iri nemur teat rume mana te ume ke

etue choro mana. Pe pomere o tunge urumem ke elle mana ke mange iri?’

<sup>13</sup> “Pe ume tokoninga neu tuachol ia pe hele lange elle nge iri ke pomai, ‘Kole, e poia poinga poreke ngana e lange iong ero i. Iange iong o ngata at nge iau lo nga nenge o teke, o ume pe o mene urum nenge pomam. <sup>14</sup> Ke o mene pe o la ol. Nga iau lemek ngak mana e tunge non nenge at rume mana nem uruna ke elle mana ke mange iong. <sup>15</sup> Umtutuna nei iau sipok lek ia, pomalam e poia nga lemek ngak. Pe pule e poia nga poinga urana ngana. Pe iong letem ma ke mere?’ ”

<sup>16</sup> Pe Iesus hele, “Iri nemur nenge iri muka, lape tela ke iri hoena mule pe iri nenge iri hoena, lape tela ke iri muka ke pomalam mana.”

### *Iesus Hele Hemol Ngana Nga Ana Metenga*

*(Mak 10:32-34; Luk 18:31-34)*

<sup>17</sup> Iok, Iesus ramana haka lala nge Ierusalem lo, pe iu hot kelkel ia nena hana mur pe hele lange iri ke teke, <sup>18</sup> “A longo ke nek. Tai haka lala nge Ierusalem lokoi, pe lape te tung heke Non Tuna lange tunginga ana hana mur aria soksoke ngana mur, pe hotonga ana hetoronga mur. Pe lape te tuahit ana ke te teke mete. <sup>19</sup> Pe lape te tunge I lange hana lomona ngana mur ke te songlele ule, pe te heon heke I nga manga toto ke mete. Pe nga etue mol ngana lape maul haka mule!”

### *Heie Onteia Iesus*

*(Mak 10:35-45)*

<sup>20</sup> Ol pe ne Sepeti nehei pe tutuna mur nai tela nge Iesus. Pe hei neu tualou sio nga Iesus matana pe onteia Iesus ke teke Iesus poia ute lange i.

<sup>21</sup> Pe Iesus onteia hei neu ke teke, “Lemem taua utar nge Iau?”

Pe hei neu hele, “Nga etue nenge ta tutu nga lem naualanga pe nekinga, o talue tutuk mur nai nei ke elle kila nga ilim hele nenga pen tamal-mal, pe e nga ilim hele nenga pen hoihoi.”

<sup>22</sup> Ol pe Iesus hele, “Imo a eteia ute e ero. A ontei pulut rara mana iam. Nakumo nge a inia ure ehech ngana nga eulinga nenge lape e ininia nei kai?”

Pe iri nai te hele, “Oe! Nakumem nge mo inia la.”

<sup>23</sup> Pe Iesus hele lange iri ke teke, “Iok, urana pe nenge amo e at ke kila nga ilik hele nenga pen tamalmal pe amo e nga hoihoi, nem Iau lek nge e hele teu ia la ero. Temek i sipona lape hele teu langa nem. Iange iri nenge Temek hesilei hote iri lo, iri laka reria arenga nemur.”

<sup>24</sup> Iesus nena hana analoch neu te longe pekngaria nai neu nge te poi ke mau pe leteria inin tau tote iri. <sup>25</sup> Ol pe Iesus eukiraua iri pe hele lange iri ke teke, “Imo a eteia lo ke hana lomomona ngana aria soksoke ngana mur, lemeria toto ke te eteita reria kerkerenga lala nge hehei pe hana. <sup>26</sup> Pe imo, apoi ke pomam ero. Pe nenge teke amo e nge imo teke lohote ke i palaungana, talsio tote i pe ume nge imo mukam. <sup>27</sup> Pe mele nenge teke i muka toto nge imo, talsue i ke ume mana nge imo mukam. <sup>28</sup> Ke pomalam mana nge Non Tuna. I, at nga ich nei ke hehei pe hana te ume nge I ero. At pe ume ke halaua hehei pe hana. Pe pule takisia melmelenga ke mete ke hemasia hulua halang nga reria poinga poreke ngana mur.”

*Iesus Hemasia Hana Nai Nge Mataria Hit*  
(Mak 10:46-52; Luk 18:35-43)

<sup>29</sup> Iok, Iesus iri ul nena hana mur te lohaka nge Ieriko pe hulua halang te nanasia I. <sup>30</sup> Pe hana nai nge mataria hit te arare nga kue ilina. Te arare pe te longe nge te teke Iesus kou lopar toto aria ke lala neu lo. Ol pe te alngaria haka ke te teke, “Non Soke! Ne Teuit tuna, letem poreke ia imem!”

<sup>31</sup> Pe hulua nemur te keres taua iri ke te teke te reng. Pe ero, iri nai alngaria haka ke soke toto ol, “Non

Soke, ne Teuit tuna, letem poreke ia imem!”

<sup>32</sup> Ol pe Iesus mes sapele pe onteia iri nai, “Imo nai lememo taua utar nge Iau?”

<sup>33</sup> Pe iri nai te hele, “Mo teke o hemasia imem ke mo nau mule.”

<sup>34</sup> Iesus letena ia iri pe tal heke penna langa iri nai mataria. Pe ueiuei mana iri nai mataria charchara pe tenau mule sapele. Ke het pe te nanasia Iesus ke tela.

## 21

*Iechinga Palaungana Lohot Nge Ierusalem*

(Mak 11:1-11; Luk 19:28-40; Ioa 12:12-19)

<sup>1</sup> Iok, tei ke ramaria lange Ierusalem pe la te lohote nga hengene nenge Oliua nga kileng nenge Petpage. Ol pe Iesus kulosia nena hana mur nai <sup>2</sup> pe hele lange iri ke teke, “Imo a muka langa kileng nenge ta naue lala neu pe a esia tongki e nge te kale hite ke iri nai tuna te mes. Pe a une rur nge iri pe a mene iri at nge Iau. <sup>3</sup> Pe nenge teke none poi helenga lange imo, a hele lange i ke a teke, ‘Non Soke lemene taua iri ke poi ana ume ia mukam.’ Pomalam, non nem lape tung sapele tongki nai nem lange imo.”

<sup>4</sup> Ure nei lohote ke pete tote hetat-alonga e nena helenga nge poia nge nike toto ke teke:

<sup>5</sup> “A hele hote helenga nei lange hehei pe hana nge Saion,

‘A esia lo, amo Non Soke kou are haka nga tongki, nga tongki lomele ngana ke atat neu.

Pe ngana tano mana ke manga none nge pingana iuiu ero.’ ”

<sup>6</sup> Iok laol, hana nai neu tela pe te poia ure lochloch ngana ke manga Iesus heleia lange iri. <sup>7</sup> Pe te mene tongki hei ngana neu luluch nge tuna. Pe te poi hote reria hengeron nenge hot ana pe te pallou heke nga tongki nemur patangaria ke Iesus are haka ia. <sup>8</sup> Pe hulua halang toto te lung

ole reria hengeron mur nga kue. Pe hel te ringa ke te paria ae perperna luluche ina mur ke tetal sio ole nga kue pule. <sup>9</sup> Pe hulua nenge iri mukmuka nge Iesus pe hulua nenge iri hoena, iri lochloch te makul haka pe te hele,

“Ta iech pe ta heto haka tote ne Teuit Tuna!

NeHalang pete tote i,  
iange at nga Non Soke ene!

Ta iech pe ta heto haka tote NeHalang nga lut nga tapa,  
iange mene mule ita lo!”

<sup>10</sup> Iesus i teu nga kileng nenge Ierusalem pe iechinga palaungana lohot. Pe te ontei rara ke te teke, “Non tei toto nenge nei mai?”

<sup>11</sup> Pe hulua te tuacholia ke te teke, “Ne Iesus nenge I hetatalonga! Ana non at nge Kalelea nga kileng nenge Nasaret.”

*Iesus Langa NeHalang Nena Pele Palaungana*

(Mak 11:15-19; Luk 19:45-48; Ioa 2:13-22)

<sup>12</sup> Ke ulo pe Iesus iteu la sapele nga NeHalang nena pele palaungana pe lope hote hehei pe hana nenge tei alala nga pele neu letena. Pe hekale hul sue hatanga nenge te hetata umtutuna ia. Pe lange iri nenge te laia ngie chaulum mur pe hesochare sue reria arenga mur. <sup>13</sup> Pe hele lange iri ke teke, “Helenga nenge tehas sue nga NeHalang na alalaha hele ke teke, ‘Lape te hetue lek pele ke hetalaulauna ana pele.’ Pe imo a poia ke manga kemenge kina mur reria pele toto.”

<sup>14</sup> Ol pe iri nenge mataria hit pe nenge aperia lul, tela nge Iesus nga NeHalang na pele palaungana neu letena pe Iesus hemasmasia iri.

<sup>15</sup> Iesus poia ure urana ngana nemur pe aina kinkino ngana te makul hakaka ke te teke, “Ta iech pe ta heto haka tote ne Teuit Tuna.” Pe ure nemur poia tunginga ana hana mur aria soksoke ngana mur pe hotonga

ana hetoronga mur ke leteria inin toto.

<sup>16</sup> Ol pe te onteia Iesus, “Aina kinkino ngana nemur mau te hele ke merechre mau? O longe pule?”

Pe Iesus hele, “Oe e longe pule la. Pe nga NeHalang na helenga nenge tehas sue ke ulolo, hele ke teke,

“‘Tong sipom o hetore aina kinkino ngana pe mamau mur ke te heto heke iong.’”

Ol pe Iesus ontei mule iri, “Imo nge a sisia nei ero kura kai?”

<sup>17</sup> Ke het pe Iesus lohaka pe i hot sapele nga kileng neu ke lange Petani pe tu ke ana miliko elle.

*Iesus Ulo Heke Letena Inin Ngana Langa Ae Popi*

(Mak 11:12-14, 20-24)

<sup>18</sup> Pe nga uach uruna toto, Iesus i ke la mulmule nge Ierusalem pe mete ana. <sup>19</sup> Pe esia popi tana e nge mes nga kue ilina. Ol pe teke la ke nau pe popi tana neu nganangana ero. Mes mana ia ina. Pomalam heleia popi tana neu ke teke, “Lape o rora mule ero ol!” Ueiuei mana pe popi tana neu kalum sapele.

<sup>20</sup> Pe Iesus nena hana mur te esia ke mau pe ngaria lohot toto, pe te onteia Iesus ke pomai, “Pomere nenge popi tana nei kalum ke ueiuei mana mai?”

<sup>21</sup> Pe Iesus tuacholia ke teke, “E hele ke manmanna toto lange imo, nenge teke letemo manmanna pe letemo nachnai ero, poinga nenge e poia langa popi nem, imo nakumo nge a poia pule. Nem pe a hele langa hengene neu ke a teke, ‘O lohaka nga lamam pe ola ke o losio teu nga ruach.’ Pe imo anau, ure nem lohot la. <sup>22</sup> Nenge teke letemo manmanna pe a hetalaulau, ure nemur nenge a hetalaulau ia lape te lohot ke manmanna.”

*Onteinga Nga Iesus Nena Hekerkerenga*

(Mak 11:27-33; Luk 20:1-8)



<sup>23</sup> Iok, Iesus i teu langa NeHalang na pele palaungana letena pe hetot-toro. Pe tunginga ana hana mur aria soksoke ngana mur pe hana nenge iri mukmuka nge hehei pe hana, tela nge I pe te onteia I ke pomai, “Iong mam o mene lem kerkerenga langai toto nenge o popoia ure nemur? Pe itei toto nenge tunge kerkerenga nem lange Iong?” <sup>24</sup> Pe Iesus hele lange iri ke teke, “Iau pule lape e onteia imo nga onteinga e pule. Pe nenge teke a tuacholia, lape e tuacholia lemo pule. Pe e hele hote kerkerenga nenge e poi hohote ure nemur. <sup>25</sup> Iok, a hele at nge Iau. Ioanes nenge henunun henune hehei pe hana. Pe henuninga nem at langai? At nga lut nga tapa ma at nge none mana nga ich nei?” Pe hana nemur te hele tele helia nge iri ke te teke, “Nenge teke ta hele ke ta teke, ‘Ure nem at nga lut nga tapa.’ I lape ontei mule ita ke mai, ‘Iok, pe pomere letemo manmanna nge i ero?’ <sup>26</sup> Pe nenge teke ta hele ke ta teke, ‘Ure nem at nge none mana,’ ta matau ala ara nge hehei pe hana pule. Iange iri lochloch leteria kerkereng toto lo nge Ioanes i hetatalonga.”

<sup>27</sup> Pomalam te tuacholia Iesus na helenga ke te teke, “Mo eteia ero i.”

Ol pe Iesus hele, “Ke pomalam Iau pule lape e hele hote lek kerkerenga nei lange imo ero.”

### *Helekenga Ala Nga None Nge Tutuna Mur Nai*

<sup>28</sup> “Iok, imo letemo ma ke merei nga nei? None tutuna mur iri nai. Ana non lange tuna nenge soke pe hele, ‘Kolek, teke poi pe ola ke o ume nga uain ana late heueu.’

<sup>29</sup> “Pe tuna neu hele, ‘Ah! Lemek ero i!’ Pe nga hoena letena hul mule pe i ke langa ume.

<sup>30</sup> “Iok, non neu lange tuna nenge kino pe hele, ‘Kolek, teke poi pe ola ke o ume nga uain ana late.’ Pe kon neu hele, ‘Oe temek, ela ke e ume heueu

kura.’ Pe ero. I hele mana pe la ke ume ero.

<sup>31</sup> “Itei nge iri nai nanas taua temeria lemene ngana?”

Pe hana nemur te hele, “Ngana laka tuna nenge soke.”

Ol pe Iesus hele lange iri ke teke, “E hele lange imo pengpeng, iri nenge te lololoch umtutuna pe salaunga kina mur, lape iri muka nge imo ke teteu tala langa NeHalang nena naualanga pe nekinga. <sup>32</sup> Iange Ioanes at ke hetore imo nga kue nenge pengpeng toto ke a nanasia. Pe imo letemo manmanna nge i ero. Pe iri nenge te lololoch umtutuna pe salaulaunga kina mur leteria manmanna nge i. Pe imo, a esia iri nge te poi ke pomau pe a hulua letemo ero pe letemo manmanna ero pule.”

### *Helekenga Ala Nga Hana Nenge Tenau Ele Ume* (Mak 12:1-12; Luk 20:9-19)

<sup>33</sup> Iok, Iesus hele lange hana papalauna nemur ke teke, “A longo at nga lek helekinga ala nei pule. Nga etuene none tue uain nga nena ich unne. Ke het pe haua ana mapuo ke liuliu tom. Pe nga ume neu letena, non neu selia polo e ke uain nganangana ana nenge te pip hotote eina. Pe pule umeia pele sase ngana e ke iri nenge tenau elele ume neu te tutuia. Ke het tunge ume neu ke langa hana hel peria ke tenau ele, pe i lohaka ke langa kileng tau ngana e. <sup>34</sup> Iok, nga etue nenge uain nganangana te mera, non neu kulosia nena hana mur lange hana nenge tenau elele ume neu, ke te mene nena uain nganangana mur pe te takisia lange i.

<sup>35</sup> “Pe ero. Tela pe hana nemur te sihe iri. Elle te pal hulu hite. Pe elle, te tamalia ana um. Pe elle, te hune ke mete. <sup>36</sup> Ol pe ume tokoninga neu kulosia nena hana mur hel ke tela pule. Neu ol, iri halang te lohaka ke tela. Tela pe hana nemur te poia iri ke pomau mana pule. <sup>37</sup> Ol pe nga hoena ume tokoninga neu kulosia i sipona

tuna ke la ol. Pe hele, 'Hana nemur, lape te poi nek lange i ol.'

<sup>38</sup> "Pe ero. Hana nemur te esia ume tokoninga tuna nge atat pe te hele, 'Ume tokoninga tuna la atat nem. Pe i nge lape mene temene nena ure mur lochloch laka. Ta hune i ke mete nike. Pomalam lape ta mene ure lochloch ngana nemur ke rera ia ol.' <sup>39</sup> Iok laol, te laua i pe tesau hote i langa mapuo rumena, pe te hune i ke mete.

<sup>40</sup> "Iok, ume tokoninga neu i sipona la ol. Pe lape poia hana nemur ke merei?"

<sup>41</sup> Pe hana nemur te hele, "Non nem lape at pe heporeke tote hana porekreke ngana nemur. Pe lape tunge ume nem lange mele hel nge altoto ke tenau ele pule. Pe nga etue nenge ume nem mera sio, hana nemur te lule pe te tunge lange ume tokoninga neu."

<sup>42</sup> Pe Iesus hele lange iri, "Imo nge a sisis nga NeHalang na helenga ero kai? Nenge hele ke teke;

" 'Hana nenge te hemesmes pele te teke um e poreke pe tesau hote. Pe heueu nei, um nem lohote ke i um kerkereng ngana nenge ratua hele pele.

Ure nei Non Soke i sipona poia ke lohote pe i urana toto nga matara.'

<sup>43</sup> "Ke pomalam e hele lange imo. NeHalang lape piu hele nena naualanga pe nekinga ana kileng nge imo. Pe iri nenge te hulua leteria pe te longo taua nena helenga mur mana, lape teteu langa kileng neu.

<sup>44</sup> Pe mele nenge losio haka nga um nem lape singina uch hulu ke het. Pe nenge teke um nem losio haka nge mele, mele nem menret sapele."

<sup>45</sup> Pe Paresio mur pe hana palauna nemur te longe Iesus nena helenga mur pe te etei mellehe mene ke te teke Iesus helele ia iri. <sup>46</sup> Pomalam te tango rara kue e nge te teke te sihe I. Pe ero, iange te mataua hulua nemur. Iange hulua nemur leteria manmanna toto ke te teke Iesus I hetatalonga.

## 22

*Puongata Nga Leinga Ana Ngaunga*  
(Luk 14:15-24)

<sup>1</sup> Pe Iesus nana mule nga helenga opene e pule ke mai, <sup>2</sup> "NeHalang nena naualanga pe nekinga nga lut nga tapa, pomalaka nge nauangaala ana none nge popoia ngaunga unne nge tuna nenge lei heueu ngana. <sup>3</sup> Pe non palau nem hekulo mele hel aria lo ke tela nga ngaunga matana nem. Iok, kulosia hana nenge te umume nge i ke tela taua iri ke la te ngau, pe hana nemur lemeria ero.

<sup>4</sup> "Ol pe ana non kulosia nena hana mur hel pule pe hele lange iri ke teke, 'Ala pe a hele lange iri nenge e hekulo aria nem ke e teke teat nga ngaunga nei ol, iange ngaunga kalum lo. A hele ke a teke palngen hel koi e ruruke iri lo, pe ure lochloch ngana e tatalo ele ke het lo. Pe teat ke te ngau mana ol!'

<sup>5</sup> "Pe ero. Hana nemur te longo tau ero nge tela nga ngaunga matana neu. Tei ke tela nga lemeria ngana mana. Hel te takis selempo pe kakop ke teii, pe hel te lala nga aria ume mur nenge te menmene umtutuna ia.

<sup>6</sup> Pe hel te laua non palau neu nena hana nemur pe te pal hulu hite iri pe te hune iri. <sup>7</sup> Ol pe non palau neu letena inin pe kulosia nena palinga hel ana hana mur ke te hun lapue hana nenge te hun neu, pe te tonoi heke reria pele mur pe kileng tana neu ngau lala ke het.

<sup>8</sup> "Pe hele lange nena hana mur nenge tetu neu ol ke teke, 'Ngaunga matana nenga puongatau nei, e tatalo ele ke het lo. Pe iri nenge e hekulo aria teat ero iange te urana ero. <sup>9</sup> Pomalam ala ke a mes ele kue matana mur lochloch pe anau rara mele hel pe a hele lange iri ke teat nga ngaunga matana nei.' <sup>10</sup> Iok laol, hana nemur tela pe te iua hana nge halang toto. Pe te mene hana nenge te urana pe nenge te poreke ke teat

pule. Pe pele nenge te poi ngaunga matana neu ia, muta toto ia lang mur.

<sup>11</sup> “Iok laol, non palau neu i teu at sapele. At pe esia none nge heronia hengeron nenge ngaunga matana ana ia ero. <sup>12</sup> Ol pe hele, ‘Kole, o teu at lamai ke mere, nenge o heronia lem hengeron nenge ngaunga matana ana ero?’ Pe non neu na helenga ero pe reng mana.

<sup>13</sup> “Ol pe non palau neu hele lange nena hana mur, ‘A kale hite non nei penna pe apena pe a sau hote i langa kileng au ngana nge hot. Nga kileng nenge te amneia melmelenga pe te tangtang pe ngingiria chatrekreke ia.’

<sup>14</sup> “Ke ngana laka nenge e hele ke e teke, ‘NeHalang iua hulua halang, pe hesilei hote hel mana ke teteu la.’”

*Hana Hel Te Tuamirik Hote Iesus  
(Mak 12:13-17; Luk 20:20-26)*

<sup>15</sup> Iok laol, Paresio mur aria papalauna mur tetal helenga ke te teke te tuamirik hote Iesus, ke heleia helenga poreke ngana e. <sup>16</sup> Pomalam te kulosia reria hana hel pe ne Herot nena hana hel pule ke tela nge Iesus pe te hele, “Hetoronga, imem mo eteia ke Iong o pallaklaka erochro. O hetottore ure nge manmanna nga NeHalang na poinga lala nge hehei pe hana. Pe lem poinga elle mana ke lange hulua lochloch. Nge iri nenge pingaria iuiu pe iri nenge pingaria iuiu ero pule. <sup>17</sup> Iok, o hele hote letem at nge imem. I mai urana nge ta sau umtutuna lange ne Kaesa pule kai? Ma ero?”

<sup>18</sup> Pe Iesus eteia ke hana nemur leteria tuanin ngana mur te poreke lochloch. Pe hele, “Imo mam, a pallaklaka manmana iam! Pomerei nenge a teke a tuamirik hote Iau? <sup>19</sup> A hetei hote lemo umtutuna nenge a sausaua ke enau.” Ol pe te mene hote umtuna elle pe te heteia lange Iesus. <sup>20</sup> Pe Iesus ontei mule iri, “Itei toto opene pe ene nenge ma haka nga umtutuna nei mai?”

<sup>21</sup> Pe iri te hele, “Ne Kaesa.”

Pe Iesus hele, “Ure nemur nenge ne Kaesa nena, a tung mule iri lange ne Kaesa. Pe ure nemur nenge NeHalang nena, a tung mule iri lange NeHalang.”

<sup>22</sup> Hana nemur te longe Iesus na helenga pe ngaria lohohot. Pomalam te lohaka mana pe tei ke tela.

*Onteinga Nga Ta Maul Haka Mule Ngara*

*(Mak 12:18-27; Luk 20:27-40)*

<sup>23</sup> Iok, Satusi mur leteria manmanna ero nga nenge ta metmete pe ta maul haka mulmule nga metenga. Pomalam nga etue nem mana tela nge Iesus pe te onteia I ke te teke,

<sup>24</sup> “Hetoronga, ne Moses has sue nga alalaha ke teke, nenge teke none lei pe tutuna mur ero pe mete hatalia nehei, non nenge mete nem tina e lape lei haka mule metenga hatal nem. Pe iri nai tuturia mur, lape te heleia ke te teke, non nenge mete nem tutuna mur ia iri. <sup>25</sup> Nga etuene e, hana iri rahteale nai nge titiria mur hel. Tiria nenge soke lei pe tutuna mur ero kura pe mete mule. <sup>26</sup> Pe tiria neingana lei heke mule metenga hatal neu pe mete pule. Iok, tiria mol ngana pule poi ke pomalam ke la het nge tiria rahteale nai ngana. <sup>27</sup> Pe nga hoena ol, hei neu mete. <sup>28</sup> Iok, o hele at nge imem. Hana nemur iri lochloch ke te leia hei neu pe te mete. Pe hei neu pule mete. Pe nga etue nenge te maul haka mule nga metenga, itei toto lape nehei mule ia ol?”

<sup>29</sup> Pe Iesus hele, “Nakuna nenge imo a eteia NeHalang nena helenga mur ero, pe a eteia na kerkerenga ero toto pule. Ke ngana laka nenge a tung hot pulut mene helenga nem.

<sup>30</sup> Nga etue nenge hehei pe hana te maul haka mule nga metenga, lape tetu mana ke pomange angkelo mur nga lut nga tapa, pe te lei hel mule ero ol. <sup>31</sup> Pe nenga maulinga haka mule nga metenga nem, NeHalang hele lange imo lo. Pe imo mai, lape

a sisia ero kura kai? NeHalang hele lange imo ke teke, <sup>32</sup> ‘Tau NeHalang, ne Apraham pe ne Isak pe ne Iakop aria Soke Iau.’ ”

Pe Iesus heloloune na helenga pe hele, “Iri nenge aria Soke NeHalang, ngana laka, iri nenge te maulul. Pe iri nenge te maulul ero, aria Soke NeHalang ero.”

<sup>33</sup> Hengetoro nenge Iesus poia neu, hehei pe hana te longe pe ngaria lohotia.

### *NeHalang Na Hotonga Nenge Palaungana Toto*

(Mak 12:28-34; Luk 10:25-28)

<sup>34</sup> Iok, Paresio mur te longe nge te teke Iesus pal mete tote Satusi mur rea oan ke reria helenga ero. Pomalam te eu hel ke muria elle. <sup>35</sup> Pe elle nge iri etei teu la toto nga hotonga nenge Moses. Ana non teke tuamirik hote Iesus pe poia onteinga nenge teke, <sup>36</sup> “Hetorong, o amnei teu nga NeHalang nena hotonga nemur. Hotonga tei toto nge palaungana nge iri lochloch?”

<sup>37</sup> Pe Iesus hele, “ ‘Mutemo taua NeHalang ara Soke nga kakahomo mur lochloch, pe mutemo taua I nga opemo mur lochloch, pe mutemo taua I nga letemo tuanin ngana mur lochloch.’ ” <sup>38</sup> Ke hotonga nenge palaungana toto nga hotonga mur lochloch koi nei. <sup>39</sup> Pe neingana nenge palaungana toto pule, ngana laka nenge: ‘Mutem taua neingam e nenge tu rochroi nge iong, ke pomanga mutem tau mule iong sipom.’ ”

<sup>40</sup> Hotonga nemur nenge Moses pe alalaha nemur nenge hetatalonga mur tehas ia, kiria toto koi hotonga nai nei.”

### *Iesus Onteia Paresio Mur*

(Mak 12:35-37; Luk 20:41-44)

<sup>41</sup> Iok, Paresio mur te mes ke muria elle kura pe Iesus onteia iri ke teke, <sup>42</sup> “Letemo tuanin ngana ma ke merei nge I nenge ene Kristus? Pe non tei tuna toto?”

Pe iri te hele, “Ne Teuit Tuna laka nenge ene Kristus.”

<sup>43</sup> Ol pe Iesus hele lange iri ke teke, “Tok, pe pomere nenge Opepengpeng poia ne Teuit ke hetue Non nem ke I Non Soke? Nenge ne Teuit hele ke teke,

<sup>44</sup> “NeHalang hele lange ak Non Soke ke pomai,

‘O are lakoi nga perik hele nenga pen tamalmal,

pe e mene lem ngarang mur ke etal sue iri pe apem hepapar hitite iri.’ ”

<sup>45</sup> A esia lo, Non nem, ne Teuit hetue I ke ana Soke ia. Pe pomere nenge Non nem lohok ke I ne Teuit tuna mule?”

<sup>46</sup> Iesus onteia Paresio nemur ke mau pe te tuacholia I ero toto. Ke talun nga etue neu pengpeng, te matau nge te poi onteinga la mule nge Iesus ol.

## 23

### *Iesus Tunge Helenga Kerkereng Ngana Lange Hana Papalauna Mur*

(Mak 12:38-39; Luk 11:43, 46; 20:45-46)

<sup>1</sup> Ol pe Iesus hele lange hulua nemur pe nena hana mur ke teke,

<sup>2</sup> “Paresio mur pe hotonga ana hetorong mur te mene Moses munna ke te hetottoro pe te hele ururume NeHalang nena hotonga mur. <sup>3</sup> Ke nenge teke te hele lange imo nga utar, a longo tau mana pe a poia. Pe reria poinga mur mana, a nanasia ero toto. Iange te hetottoro pe iri siporia te nanasia te hetoro ngaria ero toto. <sup>4</sup> Pe te poia hehei pe hana ke te amneia melmelenga halang, nga hotonga hel nenge iri siporia tetal hote. Pe iri te halau polia hehei pe hana ero toto nga melmelenga nemur.

<sup>5</sup> “Ure lochloch ngana nenge te popoia, te teke te poi heteinga ana mana ia. Ke te kale heke NeHalang nena helenga chorchora mur nga ramaria pe nga peria pe te hemallaha



hot tote ure nemur. Pe pule te kale rur sasase ngana nga reria hengeron mur. <sup>6</sup> Pe te kau toto elele arenga mur nga ngaunga matana. Pe nga pele hetoronga letena, te teke te kila manmana nga muka ke kokoes. <sup>7</sup> Pe muteria tau tote poinga nenge hehei pe hana te apala lange iri ke nek toto nga ingala matana. Pe te teke hehei pe hana te hetue iri ke iri hetoronga ana hana mur.

<sup>8</sup> “Pe imo, a teke te hetue imo ke poumau ero. Iange imo amo hetoronga elle mana. Pe imo lochloch titimo mur hel. <sup>9</sup> Pe a hetue mele nga ich nei ke tememo ia ero. Iange imo tememo elle mana. Ngana kou tu nga lut nga tapa. <sup>10</sup> Pe a poia hana pe hehei ke te hetue imo ke ‘Hedoronga’ ero iange imo amo Hedoronga laka Kristus I toro. <sup>11</sup> Ke mele nenge umume nge imo lape lohote ke i non palaungana. <sup>12</sup> Iange mele nenge tal hekeke i lape tetal sue i, pe mele nenge talsio menemene i lape tetal heke tote i.

<sup>13</sup> “Pe imo Paresio mur pe imo hotonga ana hetoronga nemur, a neknek ia imo iange amo hengetau nachnai hali. A hetoro kokoua hehei pe hana pe a piu hele piunga nge iri, nga NeHalang nena naualanga pe nekinga nga tapa. Atong mur te teke teteu la toto nga kileng nem. Pe imo apoi helele iri. Pe lape ateu la ero toto ol.

[<sup>14</sup> “Pe imo Paresio mur pe imo hotonga ana hetoronga nemur, a neknek ia imo iange amo hengetau nachnai hali. A chananga ia hehei pakar mur ke a lolochia reria pele mur. Pe pule a hetalaulau ke sase toto nga hulua mataria. Pomalam, lape amo tuangachol poreke toto ol!]

<sup>15</sup> “Pe imo Paresio mur pe imo hotonga ana hetoronga nemur, a neknek ia imo iange amo hengetau nachnai hali. Iange ai ke ala nga ich hel pe a mana nga ruach ke ala nga kileng hel ke a tango rara hana. Pe lape a mene none pe a poia i ke nanas

tau pengpeng ia lemo poinga mur. Pe lape na poinga poreke ngana, ristoto mule imo lemo poinga poreke ngana mur pe la ke poreke toto ol.

<sup>16</sup> “Pe a neknek ia imo pule. Iange matamo hit pe a teke a henonoua hehei pe hana nga kue. A hetotore hehei pe hana ke a teke, nenge teke mele hekerkereng tote na helenga pe hele ke kerkereng toto nga NeHalang na pele, imo a heit kou sio mene pe a teke ute pele ero nga helenga nem. Pe nenge teke mele hekerkereng tote na helenga pe hele ke kerkereng toto nga um chalemlem ngana (gol) nenge ma teu nga NeHalang nena pele letena, nem a teke poia nena helenga ke kerkereng toto. <sup>17</sup> Imo letemo mallaha ero pe a etei teu langa NeHalang nena poinga mur ero toto. Ure tei nge palaungana toto? Ngana kau um chalemlem ngana nenge uruna haka neu mau? Iau e teke NeHalang na pele, iange pele nem poia ure nem ke heo ngana toto. <sup>18</sup> Pe imo a hele pule ke a teke, ‘Nenge teke mele teke hekerkereng tote na helenga pe hele ke kerkereng toto nga hatanga, nem a teke ute pele ero pule. Pe nenge teke mele heleia tunginga mur nenge tema haka nga hatanga nem, a teke ana ure toto olla. Pe a teke letena matana hite nena helenga kerkereng ngana nem ke nek.’ <sup>19</sup> Imo nge matamo hit toto lo iam. Ure tei nge palaungana toto? Ngana kau tunginga neu mau? Iau e teke hatanga nem, iange hatanga nem poia tunginga nem ke heo ngana toto. <sup>20</sup> Mele nenge poia helenga kerkereng ngana nga hatanga nem, poia langa ure lochloch ngana nenge tema haka nga hatanga ona pule. <sup>21</sup> Pe mele nenge poia helenga kerkereng toto ngana nga NeHalang na pele, poia lange mele nenge tu teu nga pele nem pule. <sup>22</sup> Pe mele nenge poia helenga kerkereng ngana e langa tapa, poia langa NeHalang nena arenga

nenge heo ngana toto. Pe pule poia lange I nenge kila nga arenga nem.

<sup>23</sup> “Ke imo Paresio mur pe hotonga ana hetoronga mur; a neknek ia imo pule iange amo hengetau nach nai. Nga ure lochloch ngana nenge a menmene iri pe ngaunga kinkino ngana mur nga ume, a tunge ke huna elle nge iri analoch lala nge NeHalang. Pe pomerei lememo ero nge a nana-sia hengetoro palaungana nenga hotonga nenge helele ia; poinga nge pengpeng, pe poinga nenge letem poreke ia mele, pe poinga nenga letem manmanna ngana? Ure nemur nenge toinge apoi tettele iri koi nemur, pomalam lape a la nga kinkino ngana pe a nana-sia ke nek pule. <sup>24</sup> Imo nge letemo mallaha ero mana iam. A poi ke malaka nga none nge sul hote lango e nge mateu nga ana ech kina ke lasus pe in teua kamel palaungana e.

<sup>25</sup> “Pe a neknek ia imo pule. Imo Paresio mur pe hotonga ana hetoronga mur. Iange amo hengetau nach nai hali. A teke a helelem heke mene singimo nge hot. Pe letemo nge teu muta ia poinga poreke ngana mur lochloch. <sup>26</sup> Imo Paresio nemur matamo hit toto. Toinge a lomo hot tele kou letemo nge teu, laka singimo nge hot lape lemlem pule.

<sup>27</sup> “Pe a neknek ia imo pule. Iange apoi ke pomalaka nga polo e nge te alohit pum ia. Pe te hepore nge hot ke hussu pe nakuna urana mana. Pe nge teu mele nenge mete neu kina pe ure nemur nenge inangaria has, te maia. <sup>28</sup> Pe imo apoi ke pomalam toto. Nga singimo nge hot, nakumo pomanga hana nemur nenge te pengpeng toto. Pe letemo nge teu muta ia poinga poreke ngana mur, pe a channanga ele menmene imo.

<sup>29</sup> “Pe a nauala amo ke nek pule. Iange a ume heke polo mur pe a hemalmalia hetatalonga mur pe hana nenge te pengpeng toto aria

polo. Pe hana nemur, lemo tete mur te hune iri nge nike. <sup>30</sup> Pe a hele ke a teke, ‘Toinge tatu nga rera tete mur aria etue nike, lape ta koko nge iri ero nike ke ta hune hetatalonga nemur.’

<sup>31</sup> Pe nga poinga nem, a henonou hot pengpeng ia ke imo alomo mur pengpeng laka te hune hana nemur. <sup>32</sup> Pomalam, a heulo hot tote ol! A heulo hot tote poinga poreke ngana nemur nenge lemo tete mur te talune nge nike lo!

<sup>33</sup> “Nakumo manga ilimo! Ilimo nenge hunun tutuna mur laka imo! Pe NeHalang lape sau sue imo ke ala nga oan ngingina ngana. Pe lape a ua ke merei? <sup>34</sup> Pe lape e kulosia hetatalonga mur pe hana nenge te etei tote ure mur pe pule hetoronga mur nga hotonga nenge Moses ke tela nge imo. Pe hel nge iri lape a hune iri pe a heon heke iri nga manga toto. Pe hel lape a palia iri nga hengetoro ana pele pe lape a lope iri ke tela nga kileng pe kileng. <sup>35</sup> Ke pomalam, lape a etei tote nge imo sipomo a poia poinga poreke ngana nemur. Nenge a hune hana nenge te pengpeng toto nga ich nei. A talune nge Abel ke lange ne Perekia tuna Sakarias, nenge a hune nga NeHalang na pele pe hatanga tunangana. Ke imo lape singimo meena mana ia poinga nenge a poia nei. <sup>36</sup> Pe e hele lange imo pengpeng, poinga poreke ngana nemur ana tuangachol lape lohohot nge imo hehei pe hana nenga etue nei.

*Jesus Letena Poreke Totoia Kileng Nenge Ierusalem (Luk 13:34-35)*

<sup>37</sup> “Auoh! Kileng nge Ierusalem o! Lem hana mur te hun lapue hetatalonga mur pe te tamal hune iri nenge NeHalang kulosia iri lange iong. Kokoeses e teke e eukirauraua tutum mur ke manga pareo hei ngana nenge eukirau teua tutuna mur nga sahana ene. Pe iong lemlem

ero. <sup>38</sup> Ol pe lape lem pele ngana ngana ero ol. Lape tu mana ol. <sup>39</sup> Pe e hele lange iong pengpeng, lape o nau mule Iau ero ol ke la het nga etue nenge o hele ke o teke, 'NeHalang poi ke urana toto lange I nenge at nga Non Soke ene.' "

## 24

### *Iesus Heleia NeHalang Na Tuele Palaungana Nge Lape Te Heporeke (Mak 13:1-2; Luk 21:5-6)*

<sup>1</sup> Iok laol, Iesus i hot nga NeHalang na tuele ke teke lala lo, pe nena hana mur tela nge I ke te teke te henonou mule I langa pele mur. Pe te hele, "O nau la mule nga pele pane mur, nakuria urana mana." <sup>2</sup> Pe Iesus hele, "Oe, pe pele nenge a esesia iri nem lape te heporeke iri. Pe um nemur nenge te lung heke iri nem lape te sisparai sio hulu."

### *Iesus Heleia Ure Poreke Ngana Nge Lape Lohot (Mak 13:3-13; Luk 21:7-19)*

<sup>3</sup> Iok, Iesus arare nga hengene nge Oliua pe nena hana mur tela kome mana nge I pe te ontei hote I ke pomai, "O hele hot lemlem. Ure nem lape lohot nge ngingie? Pe utar nge lape lohot tala ke mo nau hilia oat mule ngam pe ich nei hetala toto ngana mai?"

<sup>4</sup> Pe Iesus hele, "Imo a nauala amo ke nek, iange lape mele hel te channanga rere mene imo. <sup>5</sup> Iri halang lape tela nge imo pe te hetue ek, pe te channanga rere mene hehei pe hana ke te teke, 'Iau Kristus koloi, Non nenge NeHalang kulosia at ke mene mule hehei pe hana.' <sup>6</sup> Pe imo lape a longe nananga mur nga hunelinga palaungana, pe a longe pingana nge sasa ke at. Pe a matau ero. Ure nemur nenge pomam te lohot tattala pe ich nei hetala toto ngana, ngana kou atat kura. <sup>7</sup> Kileng papalauna nai aria mata i helel. Pe tuele kina e teia polong ke tela nga tuele kina e pule. Pe

lape uringa lohohot pe mangila rurur nga kileng mur lochloch. <sup>8</sup> Pe ure nemur te lohohot ke pomanga hei nenge amneia ana inin nga talun ngana toto nenge tuna sechia i.

<sup>9</sup> "Iau lek hana mur imo. Pe hulua nga kileng lochloch lape lemeria ero ia imo. Pe lape te laua imo pe a amneia melmelenga palaungana pe te hune imo ke a mete. <sup>10</sup> Pe nga etue nem, hana halang nenge leteria manmanna nge Iau, lape te hile leteria manmanna ngana nem pe lape te poi poreke hel mule nge iri. Pe lape te tung heke mule hel nge iri langa reria ngarang mur peria. <sup>11</sup> Pe hana halang lape te lohohot pe te channanga ke te teke iri hetatalonga mur pe te pallaklaka ia hulua halang. <sup>12</sup> Poinga poreke ngana lape salala hite kileng pe poinga urana ngana lape het sio. <sup>13</sup> Pe mele hel nenge te mes ke kerkere ngela het nga kileng nei hetala toto ngana, lape NeHalang mene iri. <sup>14</sup> Pe helenga urana toto ngana nga NeHalang nena naualanga pe nekinga, lape te hele hote nga kileng lochloch ngana nga ich, ke hehei pe hana lochloch te longe. Ke het pe ich nei hetala toto ngana lohohot sapele."

### *Ure Nenge Poreke Toto Lape Lohot (Mak 13:14-23; Luk 21:20-24)*

<sup>15</sup> Pe Iesus hele pule ke teke, "Imo lape a naue ure poreke ngana nenge hetatalonga Taniel hele ia nge nike toto lo ke teke, 'Ure poreke ngana nem mes nga NeHalang na tuele.' Mele nenge sisia helenga nei letena tuanin hote luna ke nek. <sup>16</sup> Ke nga etue nem, iri nenge tetu nge lutea te ua ke tela nga hengene mur. <sup>17</sup> Nenge teke otu nga pele ona, otu lola. Pe o teu la mule nga pele letena ke o mene mule ute ero ol. <sup>18</sup> Pe nenge teke otu nga ume, otu lola. Ola mule nga lem pele ke o mene lem hengeron sase ngana ero ol. <sup>19</sup> Nga etue nem, hehei nenge saria pe nenge te lololo peo lape te amneia ke meena toto nge

24:2: Luk 19:44    24:5: Mat 24:23-24; 1Ito 2:18

24:13: Mat 10:22

24:14: Mat 28:19

24:15:

24:9: Mat 10:22

24:11: Mat 24:5, 24; 1Ito 4:1

Dan 9:27; 11:31; 12:11

24:17: Luk 17:31

iri. <sup>20</sup> Pomalam a hetalaulau lange NeHalang ke ure nem lohot nga etue lololo ngana ero, pe lohot nga Sapat ana etue ero. <sup>21</sup> Iange melmelenga pe ure meena ngana nenge palaungana toto lape lohot nga etue nem. Pe ure e nge pomam lohot nge nike ero toto, nga ich nei talun ngana nike. Pe nga hoena pule ure palaungana e nge pomai lape lohot ero. <sup>22</sup> Nenge teke NeHalang tom chore etue poreke ngana nem ero, hulua lochloch lape te het. Pe I letena ia nena hana mur nenge hesilei hote iri lo, pomalam tomia etue nem ke choro mana. <sup>23</sup> Nga etue nem, nenge teke mele hele lange imo ke teke, ‘A nau at! Kristus koi! Eh, ero! Ngana pau kou!’ A nau pe poinga nei lohot, letemo manmanna ia ero. <sup>24</sup> Iange hana nenge te channanga ke te teke iri Kristus pe te channanga ke te teke iri hetatalonga mur, lape te lohot ke te poia ure mur nenge te lohot manmana ke halang. Pe lape te teke te channanga ia NeHalang nena hana mur pule. Lape nakuria nge te poia ma ero. <sup>25</sup> A longo ke nek! Ure nemur te lohot ero kura pe e hele tele lange imo nike.

<sup>26</sup> “Ke nenge teke mele hele ke teke, ‘Ana non pau kou tunga ich sana lomona,’ a longe helenga nem pe a la ero toto. Nem pe mele hele ke teke, ‘Ana non pai koi talkomkome nga pele pa nei letena.’ Helenga nemur, letemo manmanna ia iri ero. <sup>27</sup> Iange Non Tuna at ngana, pomalaka nga kileng chalem ngana nenge chalem nga chaia matana haka ngana pe tualeme ke la lochloch nga chaia matana puluch sio ngana. <sup>28</sup> Ngie pisou mur te euirau mana nga kileng unne nenge mele nge mete koluna maia.”

*Non Tuna At Mule Ngana*  
(Mak 13:24-27; Luk 21:25-28)

<sup>29</sup> Iok, Iesus hele pule ke teke, “Nga etue nenge ure meena ngana nemur te lohot ke het, ure meena ngana hel pul lape lohot nenge:

“ ‘Chaia matana au ala mana pe teio tua ero.

Itoch mur lape te losio hot nga tapa sana,  
pe ure kerkereng ngana mur nga tapa sana lape te rur rara pule.’

<sup>30</sup> “Pe ute lape lohot nga tapa sana nenge henonoua Non Tuna nge lape lohot. Pe mata lochloch ngana nga ich nei lape tenau heke Non Tuna langa ulu nga tapa sana pe te tang. Iange I at luluch nga nena kerkerenga pe hemalmalinga palaungana. <sup>31</sup> Pe lape ngalum paena alngana ke palaungana toto pe Non Tuna kulosia nena angkelo mur ke tela nga kileng lochloch ngana nga ich, ke te mene nena hana mur nenge i sipona hesilei hote iri lo.”

*Hengetoro Nga Ae Popi Tana*  
(Mak 13:28-31; Luk 21:29-33)

<sup>32</sup> “Iok, lemek ke e teke a mene hengetoro lakoi nga ae popi tana. Ae nem, nga etue nenge ta esia nge ina hou hot mumule nga perperna mur, ta eteia ke chaia ana etue heroi lo. <sup>33</sup> Pe imo pule apoi ke pomalam. Ke a esia ure nemur nenge te lohotot nei, pe a eteia ke etue nem at rochroi toto lo. <sup>34</sup> Pe e hele ke manmanna toto lange imo. Hehei pe hana nemur nga etue nei lape te mete ero kura pe ure nemur te lohot lochloch lo. <sup>35</sup> Tapa pe ich nei lape te het pe lek helenga hetala ngana ero toto.”

*Mele Eteia Etue Nem Lohot Ngana Ero*  
(Mak 13:32-37; Luk 17:26-30, 34-36)

<sup>36</sup> “Mele pele eteia ero toto, nga etue nem lohot ngana pe nga etue koana tei toto nenge ure nem lape lohotia. Hekulkulonga mur nga lut nga tapa te eteia ero pe Non Tuna



eteia ero pule. Temene I toro mana eteia. <sup>37</sup> Pe etue nenge Non Tuna at muleia, pomalaka nga ure nemur nenge te lohot nga etue nenge Noa. <sup>38</sup> Iange nga etue nemur nenge ech taua kileng ero kura, hehei pe hana te ngaungau pe te inin pe te helei helei kela het nga etue nenge Noa iuch teu nga nena imot. <sup>39</sup> Pe iri tetu pulut mana pe te eteia ure nenge lape lohot ero. Ol pe te rura mana pe ech kon haka pe taua iri lochloch ke te het. Ke poinga nem lape lohot mule nga etue nenge Non Tuna at mule ia. <sup>40</sup> Hana nai lape te tutu nga ume, pe lape te ua toto ia elle pe elle mana tu ol. <sup>41</sup> Pe hehei nai te ululo pas, pe lape te ua toto ia elle pe elle mana tu ol.

<sup>42</sup> “Ke pomalam a tatalo elele imo ke neknek nike. Iange a eteia etue nenge amo Non Soke lape at ia ero. <sup>43</sup> Pe letemo tuanin ia nei ke nek; Teke pele tokoninga e eteia etue nenge non kemenga kina e lape at nga miliko, manmanna toto ke i lape mamani ero pe mese ke nauala ke poi ele non kemenga nem nge at ke palchach teua nena pele. <sup>44</sup> Pe imo apoi ke pomalam pule. Anau ala mana iange a eteia Non Tuna at mule ngana ero.”

*Non Nenge Urana Pe Non Nenge Poreke*  
(Luk 12:41-48)

<sup>45</sup> “Itei nge imo hana nenge a umume, nge ramana song ke urana pe poia ume ke nek? I laka nenge ana non soke letena here nge nauele pele, pe tunge nena hekuleileinga mur aria ngaunga nga ngaunga ana etue pengpeng. <sup>46</sup> Nenge teke mele nem ana soke at pe hottaua i nge popoia ana ume ke nek ke pomam, mele nem iech toto. <sup>47</sup> E hele ke manmanna toto lange imo, non soke nem lape talue mele nem ke nauele nena urelu mur lochloch. <sup>48</sup> Pe nenge teke mele nem i non nge poreke, lape letena tuanin nge i sipona ke teke, ‘Ah! Non soke panem at mule ke ueiuei ero paiam.’ <sup>49</sup> Pe talun ke nos lapue pekngana

mur pe popoi ngaunga matana pe in lululuch nge hana porekreke ngana mur. <sup>50</sup> Pe non soke nem lape at mule nga etue nenge non neu kulele i ia ero. <sup>51</sup> At pe lape chatulu hite pe sau hote i kela tululuch nge hana nenge aria hengetau nachnai hali, nga kileng nenge te tangtang pe ngingiria chatrekreke ia.”

## 25

*Hehei Malolong Nge Iri Analoch*

<sup>1</sup> “Pe nga etue nem NeHalang nena naualanga pe nekinga nga tapa, pomalaka nge hehei malolong mur nge iri analoch. None nge lei heueu ngana teke atat, pe hehei malolong nemur te mene reria lemenga mur pe tela ke tei ele i ke te mene i at. <sup>2</sup> Pe hehei lime nge iri, leteria matana ke nek nga utar nenge lape te poia, pe lime te poi ke pomanga hauaua mur. <sup>3</sup> Ke iri lime nenge te poi ke manga hauaua neu, te mene reria lemenga mur pe te mene rir ana lochngasio ke halang ero. <sup>4</sup> Pe lime nenge leteria matana ke nek, te mene reria rir ana lochngasio ke halang. Iok, tela <sup>5</sup> pe non halangina nem at ke ueiuei ero. Ol pe iri lochloch ke mataria nongnongo pe te mamani sio.

<sup>6</sup> “Pe nga miliko tuna, mele halngana hot ke teke, ‘Non halangina nei koloi! A hot at nge i ol!’ <sup>7</sup> Ol pe hehei malolong nemur te rura haka pe te kik taua reria lemenga mur ke te tongo mule iri.

<sup>8</sup> “Pe hehei lime nenge te poi ke manga hauaua neu, te hele lange pekngaria nemur ke te teke, ‘Lemem lemenga mur i te chanuch sisio lo. A tung lemem rir ana lochngasio hel.’

<sup>9</sup> “Pe iri te hele, ‘Ero, iange mo mene ke purpure ita lochloch ero. Pomalam ala ke a long rara lemo nge mele hel.’

<sup>10</sup> “Iok, hehei nemur tela sapele kela te tango rara. Tei ke te lala kura pe non halangina neu puris. Pe hehei nenge tetu ke te kulele i neu, tela

luluch nge i sapele. Pe te piu ele sapele iri pe te ngau luluch nge i nga ngaunga matana nenga leinga heueu ngana.

<sup>11</sup> “Pe nga hoena malolong nemur pekngaria mur teat mule. Ol pe te hele ke te teke, ‘Non halangina nem, imem koloi moat lo. O lohe piunga nge imem ol!’

<sup>12</sup> “Pe non neu hele, ‘E hele ke manmanna toto lange imo, e eteia imo ero toto i.’

<sup>13</sup> “Ke pomalam mana a tatalo ele imo pe atu ke a nauala mana, iange a eteia etue nenge Non Soke at mule ia ero.”

### *Nananga Nge Hana Mol (Luk 19:11-27)*

<sup>14</sup> “NeHalang nena naualanga pe nekinga pomai pule. Pomanga none nge iua nena hana mur, pe hele lange iri ke tenau ele nena ure mur, pe i lohaka ke langa kileng tau ngana e. <sup>15</sup> Pe non palau neu eteia nena hana mur te ume ngaria, pomalam heronge umtutuna nge iri. Pe tunge ke umtutuna ana kole iri lime lange e pe umtutuna ana kole nai tunge lange e pule pe umtutuna ana kole elle lange mol ngaria. Ke het pe lohaka pe la sapele.

<sup>16</sup> “Pe non nenge mene ke umtutuna ana kole iri lime neu, mene umtutuna neu pe poi ume ia nenge mene umtutuna hel pule. Pe umtutuna nenge ume hote lohote ke ana kole iri lime mule. <sup>17</sup> Pe non nenge mene ke umtutuna ana kole iri nai poi ke mau pule. Pe la mene ke umtutuna ana kole nai mule. <sup>18</sup> Pe non nenge mene umtutuna ana kole elle neu, mene pe la ke alohite nga ich.

<sup>19</sup> “Iok, kileng mala lo pe non palau neu at mule sapele. Pe iua hana nemur pe onteia iri nga umtutuna nemur. <sup>20</sup> Pe non nenge mene ke kole iri lime takis teua nena la, luluch nga kole iri lime nenge i sipona ume hote pule pe hele, ‘Non soke, iong o tung ke

umtutuna ana kole iri lime at nge iau. Pe e ume ia umtutuna nem pe e mene ke ana kole iri lime mule.’

<sup>21</sup> “Ol pe non palau neu hele, ‘Urana toto. Lek non iong nge urana. O poia ume unne sune nem ke urana mana. Pe lape e talue iong ke o nauele ume hel pule. O iat ke o iech luluch nge iau.’

<sup>22</sup> “Iok, non nenge mene ke umtutuna ana kole iri nai, i teu la pe hele, ‘Non soke, iong o tung ke umtutuna ana kole iri nai at nge iau. Pe e ume hot mule ke ana kole iri nai ke ngana koi.’

<sup>23</sup> “Pe non palau neu hele, ‘Urana toto. Lek non iong nge urana. O poia ume unne sune nem ke urana mana. Pe lape e talue iong ke o nauele ume hel pule. O iat ke o iech luluch nge iau.’

<sup>24</sup> “Ke het pe non nenge mene umtutuna ana kole elle neu i teu la ol. La pe hele, ‘Non soke, e eteia ke iong non nge letem inin hali. Iange o lulu heke mene hana kelkel ngana hel aria ume nge tetue. Pe o takirau heke mene hana hel aria ngaunga tutuna mur nge te sochia iri lo. <sup>25</sup> Nem poia iau ke e matau lek nge iong. Pomalam e mene lem umtutuna pe ealo hite nga ich. Ke lem umtutuna mur koi.’

<sup>26</sup> “Pe non palau neu hele, ‘Iong non poreke ngana nenge lem melei tana hulu. O eteia iau nge e poi ke machmam lo. <sup>27</sup> Pe toinge o mene lek umtutuna pe o laia nge hana hel ke te poi aria ume ia mukam. Pe e at mule pe e mene mule nge iri. Pe lape e mene ke ele haka pol nga nenge o tunge lange iri nem.’

<sup>28</sup> “Ol pe non palau neu hele lange nena hana mur hel pule ke teke, ‘A mene umtutuna nem nge i pe a tunge lange non nenge nena umtutuna ana kole iri analoch. <sup>29</sup> Iri nenge reria ure halang lape te heluluch tau mule ke halang toto ol. Pe iri nenge reria ure halang ero lape NeHalang mene mule ure nemur nge iri. <sup>30</sup> Pe a sau

hote non poreke ngana nem ke lange hot nga kileng au ngana. Nga kileng nenge te tangtang pe ngingiria chatrekreke ia.’ ”

### *Ich Nei Hetala Toto Ngana*

<sup>31</sup> “Nga etue nenge Non Tuna at, lape at luluch nga nena hemalminga palaungana pe hekulkulonga mur teat luluch nge I. Pe lape kila haka nga nena arenga palaungana nenge te hemalmalia nga lut nga tapa. <sup>32</sup> Pe hulua nga kileng lochloch ngana nga ich, lape tela ke te eukirau nga matana. Pe lape hesilei hotote nena hana mur elle pe elle nga hulua leteria. Ke pomanga non nenge nauelele huros mur nge hesilei hohote sipsip mur nga meme mur leteria. <sup>33</sup> Pe talue sipsip mur nga ilina hele nenga pen tamalmal pe meme mur nga ilina hele nenga pen hoihoi.

<sup>34</sup> “Ol pe Non Soke nem lape hele lange iri nenga pen tamalmal ke teke, ‘Imo nemur a i at. Temek na petanga tu nge imo lochloch, pe lape ateu langa naualanga pe nekinga nenge NeHalang. I ala hote ich nei ero kura pe tatalo ele tele kileng nem ke teke lemo ia. <sup>35</sup> Iange nga etue nenge e uri, a hengaua iau. E mete ak ech pe a heinia iau. E la nga kileng tau ngana pe a nek teua iau langa lemo pele. <sup>36</sup> Lek hengeron chachulu pe a hemele iau ke nek. Singik haleles pe a nauele iau ke nek. E ma teu nga tuele au ngana, pe anau totote iau.’

<sup>37</sup> “Pe iri nenge te pengpeng toto te tuacholia ke te teke, ‘Non Soke, imem mo kolkol iong nge o uri pe mo tung am ngaunga. Pe o mete am ech pe mo tung am ech. <sup>38</sup> Pe nga etue tei mo esia iong ke pomanga none nge at nga kileng tau ngana pe mo nek teua iong langa lememe pele? Pe lem hengeron chachulu pe mo hemele iong ke nek? <sup>39</sup> Pe nga etue tei pule mo esia iong nge singim haleles pe mo poia iong ke nek pe otu teu nga tuele au ngana pe mo nau tote iong?’

<sup>40</sup> “Pe Non Palaungana neu lape tuacholia ke teke, ‘E hele ke manmanna toto lange imo, utar nenge a poia lange tik e nge ene sio manmana, a poia at nge Iau pule.’

<sup>41</sup> “Pe lape hele lange iri nemur nga pen hoihoi ke teke, ‘Imo nemur a ua toto nga matak. NeHalang letena inin tau tote imo. Ke lape ala nga oan ngingina ngana nenge non poreke ngana pe nena hana mur te tutu ia. Pe oan nem ngau lala pe mete erochro! <sup>42</sup> Iange e mete ak pe a naue iau nga ngaunga unne ero. <sup>43</sup> Pe ei ke ela nga kileng tau ngana pe a mene teua iau langa lemo pele ero. Lek hengeron chachulu pe a tung lek ero. Singik haleles ke e ma pe a at ke a naue iau ero. Pe e mateu nga tuele au ngana pe a at ke a naue iau ero pule.’

<sup>44</sup> “Pe hana nemur te tuacholia ke pomai, ‘Non Soke imem mo kolkol iong nge o ururi pe o metmete am ech pe oii nga kue tau ngana pe lem hengeron chachululu pe haleles menmene iong pe oma teueu nga tuele au ngana i. Toinge mo esia iong, mo halaua iong la.’

<sup>45</sup> “Pe Non Palaungana nem lape hele ke teke, ‘E hele ke manmanna toto lange imo, nenge teke a poia ute lange tik e nge ene sio mana ero, a poia at nge iau ero pule.’

<sup>46</sup> “Ke iri lochloch ngana nemur lape te sio langa oan ngingina ngana. Pe iri nemur nenge te pengpeng nga NeHalang matana, lape te mene maulinga ke koko.”

## 26

*Tetal Helenga Ke Teteke Tehune Iesus*  
(Mak 14:1-2; Luk 22:1-2; Ioa 11:45-53)

<sup>1</sup> Iesus hele ia ure lochloch ngana nemur ke het pe hele lange nena hana mur ke teke, <sup>2</sup> “Imo a eteia lo? Etue nai ma ol, pe ngaunga matana palaungana nenga Inगतoto nem lape lohot. Pe lape te tung heke Non Tuna

langa hana porekreke ngana mur peria, ke te hero heke I nga manga toto.”

<sup>3</sup> Ol pe hana nenge te popoi tunginga aria soksoke ngana mur, pe luta mur aria papalauna mur, te eukirau nga ne Kaiapas na pele. Ne Kaiapas i tunginga ana hana mur aria ae huna nenge soke toto. <sup>4</sup> Pe tetal helenga ke te teke te lau kome Iesus pe te hune I ke mete. <sup>5</sup> Pe te hele, “Ta poia nga etue palaungana nei ero, iange lape hehei pe hana te esia pe palinga hel palaungana lohaka.”

<sup>6</sup> Pe Iesus tu nge Petani nga ne Simon nena pele. Nge nike, non nem singina poreke toto ia haleles e. <sup>7</sup> Iesus are ke ngaungau nga hatanga, pe heie mene ure nenge inangana ehech pe uruna ele aka toto, pe la ke pasiling heke nga Iesus palpalna. (Ure nem mateu nga kina nge te umeia nga um e nge ene alampasta.)

<sup>8</sup> Pe Iesus nena hana mur te esia pe leteria inin toto pe te hele, “Ure nei uruna haka toto i, pe pomere nenge hei pa nei at ke hesil sio mene nga lamai mai? <sup>9</sup> Toinge ure nei ta laia ke mele hel te olia pe ana umtutuna ta laia nge pakarkar una mur.”

<sup>10</sup> Pe Iesus eteia leteria tuanin ngana mur ke het lo. Ol pe hele lange iri ke teke, “Pomere toto nenge a ulo heke mene letemo inin ngana lange hei nei? Poinga nenge hei nei poia nei, poia nga urana ngana. <sup>11</sup> Iau lape etu luluch nge imo ke mala ero. Pe atong nemur nenge reria ure halang ero lape tetu luluch nge imo ke kokoes. <sup>12</sup> Hei nem ling heke ure inangana ehech ngana nem nga singik, iange ak metenga heroi lo. <sup>13</sup> E hele ke manmanna toto lange imo, lape te haliu hote Helenga Urana Toto Ngana nga kileng lochloch ngana nga ich nei, pe lape te hele hote poinga nenge hei nei poia pule, ke hulua lochloch ngana te hele ia pe leteria metene i.”

*Iutas Ngata Lange Hana Papalauna*

(Mak 14:1-2; Luk 22:1-2; Ioa 11:45-53)

<sup>14</sup> Iok, Iesus nena hana mur iri analoch pe nai. Pe elle nge iri ene Iutas Iskariot. Ana non, lange tunginga ana hana mur aria soksoke ngana mur, <sup>15</sup> pe onteia iri ke pomai, “Nenge teke e tung heke Iesus langa perimo, pe uruk? Lape a tunge lek utar?” Ol pe hana nemur tesis ala ke umtutuna iri ana non kina elle pe analoch (30) pe te tunge lange i. <sup>16</sup> Ol pe talun sapele ke tango rara kue nenge lape tung heke Iesus langa hana nemur peria.

*Iesus Ngau Luluch Nge Nena Hana Mur*

(Mak 14:12-21; Luk 22:7-13, 21-23; Ioa 13:21-30)

<sup>17</sup> Iok, ngaunga matana nenga Beret Menini Ngana lohote, pe Iesus nena hana mur tela nge I pe te onteia I ke pomai, “Lemem ke o teke mo tatalo ele ngaunga nenga Inगतoto ana ure mur langai?”

<sup>18</sup> Pe Iesus hele, “A iteu ke ala nga kileng palaungana neu pe a esia none pe a hele lange i ke a teke, ‘Hetoronga hele ke teke: Ak etue at rochroi lo, pe e teke Iau pe lek hana mur mo ngau ngaunga matana nenga Inगतoto nga lem pele.’ ” <sup>19</sup> Ke Iesus na hana mur tela pe te poi mana ke pomanga hele ngana pe te tatalo ele sapele ure mur nga lamau.

<sup>20</sup> Iok laol, nga miliko Iesus iri ul nena hana analoch pe nai neu teare ke te ngaungau nga hatanga. <sup>21</sup> Te ngaungau pe Iesus ra haka pe hele, “E hele ke manmanna toto lange imo, amo e nge imo lape tung heke iau langa hana porekreke ngana mur peria.”

<sup>22</sup> Ol pe Iesus nena hana mur leteria poreke toto, pe elle pe elle te onteitei ia Iesus ke te teke, “Non Soke, lape o heleleia kai iau mai?”



<sup>23</sup> Pe Iesus hele, “Mele nenge heteu luluche penna nge Iau nga kaliu nga ta ngaungau ngara, i lape tung heke Iau lange hana porekreke ngana mur. <sup>24</sup> Non Tuna lape mete ke pomanga NeHalang Nena Alalaha hele talue nge nike lo. Pe non nenge poi poreke Non Tuna nem lape tungana poreke toto. Urana toto ngana, toinge non nem tana hoe i ero nike.”

<sup>25</sup> Pe non nenge lape tung heke Iesus lange hana porekreke ngana mur, ngana laka Iutas. Pe Iutas hele, “Heteronga, lape ngana kai iau mai?”

Pe Iesus hele, “Oe, ngana laka iong.”

<sup>26</sup> Iok, te ngaungau ol pe Iesus mene beret nem pe hele urana toto lange NeHalang pe reke pe tunge lange nena hana mur pe hele, “A mene ke a ngaua. Mirak koi nei.”

<sup>27</sup> Ke het pe mene heke uain nga eu-linga pe hele urana toto lange NeHalang. Pe tunge lange nena hana mur pe hele, “Imo lochloch a mene nei ke a inia. <sup>28</sup> Eik koi, nenge lape pasiling hot ke hekerkereng ia Tomunga hel ana Helenga nem. Iange eik i sipona lomo sue hulua lochloch reria poinga poreke ngana mur. <sup>29</sup> Pe e hele lange imo, lape e inia uain nei ero ol kela het nga etue nenge ita ul ta in mule uain heueu ngana nga Temek nena naualanga pe nekinga.”

<sup>30</sup> Iok, te peua aria peunga e ke het pe te lohaka nga kileng neu pe tei ke tela sapele nga hengene nge Oliua.

### *Iesus Hele Hote Petrus Channanga Ngana Mur*

(Mak 14:27-31; Luk 22:31-34; Ioa 13:36-38)

<sup>31</sup> Tela te lohote pe Iesus hele lange nena hana mur ke teke, “Heueu nga miliko lape letemo manmanna ngana losio pe a ua ak. Iange NeHalang nena helenga nenge tehas sue ke ulolo, hele ke teke,

“ ‘Lape e hun sue Non nenge nauuelele sipsip mur  
pe nena sipsip mur lape te ua parai.’

<sup>32</sup> E mete pe nga etue nenge e maul haka mule, lape Iau muka nge imo ke ela nge Kalelea.”

<sup>33</sup> Pe Petrus lohaka pe hele, “Nenge teke iri lochloch ngana te ua, iau lape e ua am ero toto.”

<sup>34</sup> Pe Iesus hele, “E hele ke manmanna toto lange iong. Heueu nga miliko, pareo tang ke hemol ero kura pe o channanga hemol ke o teke o eteia Iau ero.”

<sup>35</sup> Pe Petrus hele ke kerkereng toto ke teke, “Iau lape e pallaka ke pomam ero toto! Nenge teke e mete luluch nge iong, helenga nenge e eteia iong ero lape e heleia ero toto!” Pe Iesus nena hana nemur lochloch te hele ke pomau pule.

### *Iesus Hetalaulau Nga Ume Nge Ketsemani*

(Mak 14:32-42; Luk 22:39-46)

<sup>36</sup> Iok laol, Iesus la luluch nge nena hana mur ke tela nga kileng nenge te hetue ke ene Ketsemani. Ol pe hele lange nena hana mur ke pomai, “A are lakoloi pe ela lamau ke e hetalaulau mukam.” <sup>37</sup> Pe Iesus mene ke Petrus pe ne Sepeti tutuna mur nai ke tela luluch nge i. Pe talun ke amnei poreke tote letena meena ngana sapele. <sup>38</sup> Ol pe Iesus rahaka pe hele lange iri ke teke, “Letek meena ngana nei, palaugana sakilil pe eingak teke pulo toto ia. Atu lakoi pe ta mese ala mana.”

<sup>39</sup> Iok, Iesus ila pol pe losio pe ma ke nau sio langa ich pe hetalaulau ke teke, “Nenge teke lememe, opoi ele ure meena ngana nenge teke lohote nge Iau nei. Pe o nanasia lememe ngak ero. O nanas mene iong sipom lememe ngam.”

<sup>40</sup> Iok, Iesus ila mule nge nena hana mol neu. La pe nau pe te manmani lo. Ol pe hele lange Petrus, “Pomere nenge a mese pe a nauala

luluch nge iau ero? <sup>41</sup> Anau ala pe a hetalaulau lange NeHalang, ma lape poinga poreke ngana lohot nge imo pe a losio. Imo lememo toto ke a poia poinga urana ngana nemur pe ero iange singimo makuk leilei mana nge a poia.”

<sup>42</sup> Iesus hile iri pe la mule ke hetalaulau, “Temek, nenge teke kue e ero ol lape e takis mene ure meena ngana nei. Pomalam lape lemam ngam lohot ke manmanna.”

<sup>43</sup> Iok, Iesus la mule nge nena hana mol neu pe te mamani mule lo iange mataria meena toto. <sup>44</sup> Hile sue iri pe la mule ke hetalaulau ke pomanga tele ngana.

<sup>45</sup> Ke het pe la mule nge iri pe hele, “A mamani kolo manmana lemo kura ma?! A nau, etue koana nei i at lo, nenge lape te tung heke Non Tuna langa hana porekreke ngana mur peria. <sup>46</sup> A lohaka pe tala. Non nenge tung heke Iau langa hana nemur peria, ngana koloi.”

*Te Laua Iesus*  
(Mak 14:43-50; Luk 22:47-53; Ioa 18:3-12)

<sup>47</sup> Iesus helele kura pe Iutas i hot sapele. Iutas i none nga Iesus nena hana analoch pe nai nem. Pe i laka nenge lape tung heke Iesus langa hana porekreke ngana mur peria. Pe hana nenge te popoi tunginga aria soksoke ngana mur pe hana papalauna mur te kulos ia hulua ke tela luluch nge Iutas. Pe te loloch ia reria tukmaul pe mese mur. <sup>48</sup> Pe Iutas hele la tala nge hulua nemur lo ke teke, “A nau pe e lau haka nge none, ana non lalom. Alau sapele i.” <sup>49</sup> Iok, Iutas la sapele nge Iesus pe hele, “Miliiko hetoronga.” Pe lau haka sapele nge I.

<sup>50</sup> Pe Iesus hele, “Neingak, o poia lem ume ol.” Ol pe hana nemur tei hot ke te heliliu hite Iesus pe te lau sapele I. <sup>51</sup> Ol pe Iesus nena none kik taua na mese pe teke likia tunginga ana hana mur aria soke nena none.

Pe ero, mese neu mene hot mene non neu talngana. <sup>52</sup> Ol pe Iesus hele, “O tal teu mule lem mese langa munna. Mele nenge pal pe menmene mese lape te hune i nga mese. <sup>53</sup> Imo a eteia ero kura kai? Nenge lemek, e hele lange Temek pe heueu nei kulos sue angkelo mur nge iri halang toto ke te at ke te halaua Iau. <sup>54</sup> Pe nem lape ero iange ure nenge lohot nei, lohot ke pete tote NeHalang nena helenga mur nenge tehas sue ke ulolo.”

<sup>55</sup> Ol pe Iesus hele lange hulua nemur ke teke, “Iau mai, Iau non poreke toto ngana e nge e hunun kai, nenge ai ia hulua ke aat taua Iau mai? Kokoeses e are ke e hetottoro nga NeHalang nena pele letena. Pe pomere a laua iau ero? <sup>56</sup> Pe ure nenge lohot heueu nei, lohot ke pete tote hetatalonga mur tehas ngaria.” Ol pe Iesus nena hana mur te lohaka pe te ua ana sapele.

*Iesus Mes Nga Hana Papalauna Mataria*

(Mak 14:53-65; Luk 22:54-55, 63-71; Ioa 18:13-14, 19-24)

<sup>57</sup> Iri nenge te laua Iesus te mene I lange ne Kaiapas. Nga etue neu hotonga ana hetoronga mur pe hana papalauna mur, tela ke te eukirau nga ne Kaiapas na pele lo. Ne Kaiapas i non soke nenge nauele tunginga ana hana mur. <sup>58</sup> Pe Petrus i ke nanas ke la toto nga ne Kaiapas na pele ana kileng koana nge hot pe i ke kangkanga manmana. Ol pe i teu kela kila luluch nge palinga hel ana hana mur ke teke nau nga te poi ngaria ia Iesus.

<sup>59</sup> Pe hana papalauna nenge te hemurung neu te teke te hune Iesus ke mete. Pomalam te tango rarara Iesus ana metenga huhuna mur nga helenga pallaklaka ngana hel ke te hune i. <sup>60</sup> Hulua halang te lohot ia reria helenga pallaklaka ngana mur pe te hottaua ero.

Pe nga hoena ol hana nai tei hot <sup>61</sup> pe te hele, “Non nem hele ke pomai,

'Iau nakuk toto nge e toto sue NeHalang na pele palaungana, pe e hemes heke mule nga etue iri mol mana.' ”

<sup>62</sup> Ol pe ne Kaiapas mes haka pe hele lange Iesus, “O longo langa hana nemur te hele ngarngaria? Lape o tuachol ia ke mere?”

<sup>63</sup> Pe Iesus mes ke reng mana.

Ol pe ne Kaiapas hele mule ke teke, “NeHalang tu ke maulul pe iong o hele ke manmanna nga matana. E teke e onteia iong. Iong nge iong Kristus kaloi? Pe iong nge NeHalang tuna ma? O hele hote nem at nge imem ke mo longo.”

<sup>64</sup> Pe Iesus tuacholia, “Oe, ngana laka iong sipom o hele hote nem lo. Pe e hele lange imo lochloch ngana nem: NeHalang i non Solaki ngana ia. Pe nge he kura lape a esia Non Tuna nge are nga NeHalang ilina ele nenga pen tamalmal. Pe pule lape anau heke I nge sio at nga ulu nga lut nga tapa.”

<sup>65</sup> Ol pe ne Kaiapas tachach sue nena hengeron pe hele, “Non nei hele poreke tote NeHalang ene! A tango rere helenga utar ol? Alonge helenga poreke ngana nem ke het lo! <sup>66</sup> Pe letemo ma ke mere?”

Pe hana nemur te tuachol ia, “Urana nge ta hune I ke mete.”

<sup>67</sup> Ol pe te ulut lolele matana pe te amruche peria pe te palia. Pe hel, te tepelehe i pe te songlele ia i pe te hele, <sup>68</sup> “Kristus, iong hetatalonga ma? O hele at nge imem. Itei toto nenge palia Iong?”

*Petrus Channanga Ke Eteia Iesus Ero*

(Mak 14:66-72; Luk 22:56-62; Ioa 18:15-18, 25-27)

<sup>69</sup> Pe Petrus pau kou arare nge hot kura nga pele neu ana kileng koana. Pe heie nge umume nge ne Kaiapas i lange i pe hele, “Iong nem, Iesus nenge Kalelea nena non iong pule.”

<sup>70</sup> Pe Petrus channanga nga iri lochloch ngana mataria ke teke, “Iau

e eteia ure nenge o helele ia nem ero iam.”

<sup>71</sup> Ol pe i hot sapele ke langa kileng koana nem ana kue teu ngana. Pe heie pule esia pe hele lange iri nemur nga lamau, “Iesus nenge Nasaret nem, nena none koi nei pule.”

<sup>72</sup> Pe Petrus hele ke kerkereng toto ke teke, “Iau e eteia non nem ero toto iam!”

<sup>73</sup> Mala pol lo pe iri nemur nenge te mesmes nga lamau tela nge Petrus pe te hele, “Manmanna toto ke iong pekngam mur laka iri. Iange o hele ngam pomange Kalelea mur.”

<sup>74</sup> Pe Petrus hele, “E hele ke manmanna toto lange imo. Iau e eteia non nem ero toto. Nenge teke e channanga, NeHalang lape tuacholia ke poreke toto at nge iau.”

Petrus hele ke mau ke het pe pareo tang sapele. <sup>75</sup> Ol pe letena metene sapele Iesus nena helenga nenge heleia. “Lape pareo tang ero kura pe o channanga hemol ke o teke o eteia iau ero.” Ol pe Petrus ua hot ke lange hot pe tang ke palaungana toto.

## 27

*Iutas Rua  
(Ume 1:18-19)*

<sup>1</sup> Pe nga uach uruna toto hana nenge te popoi tuninga aria soksoke ngana mur pe hana papalauna mur tetal helenga ke te teke te hune Iesus.

<sup>2</sup> Pomalam te kale I pe te mene I ke lange ne Pilatus. Ne Pilatus i non nenge mene ne Kaesa munna ke nauele Iuta mur.

<sup>3</sup> Pe Iutas, i non nenge tung heke Iesus langa hana nemur peria. Ana non esia Iesus nge hana nemur te teke te hunune pe letena la mule nga poinga poreke ngana nenge poia ke ulolo. Pomalam lohaka pe mene umutuna nenge iri ana non kina elle pe analoch nem pe la mule ia nge hana papalauna nemur. <sup>4</sup> Pe hele, “Iau, e poia poinga poreke toto ngana nenge e tung heke mene non nei lange imo.

**26:63:** Isa 53:7; Mat 27:12

**26:64:** Psa 110:1; Dan 7:13; Mat 24:30

**26:65:** Mat 9:3; Ioa 10:33

**26:66:** Lev 24:16; Ioa 19:7

**26:67:** Isa 50:6; 53:5

**26:75:** Mat 26:34

Pe non nei poia ute ke poreke ero toto.”

Pe hana nemur te hele, “Iong sipom lem ure ia. Nge imem, mo teke ute pele ero.”

<sup>5</sup> Ol pe Iutas sau teua umtutuna neu langa NeHalang na pele palaungana letena pe ua sapele kela rua.

<sup>6</sup> Pe hana nenge te popoi tunginga aria papalauna mur te mene heke umtutuna neu pe te hele, “Umtutuna nei ta tal teu luluche langa NeHalang na pele ana umtutuna mur ero, iange te ol none eina ia ke ulolo.”

<sup>7</sup> Pomalam te hele hel ia nge iri pe te teke te ol hote ich e nga umtutuna nem. Ich nem non nenge ume hotot tuninga mur nga ich nena ich ia. Pe kileng unne nem te poia ke hana lomonmona ngana mur koluria ana kileng. <sup>8</sup> Pomalam te hetue ich nem ke None Eina. Pe nga etue nei te hetetue ke pomau kura. <sup>9-10</sup> Pe hetalonga Ieremaia nena helenga lohote ke manmanna sapele nenge hele ke teke,

“Te mene ke umtutuna iri ana non kina elle pe analoch (30) pe te ol hote Pota nena ich nem ke pomanga Non Soke hele ngana ia at nge iau. Pe umtutuna nem, Israel mur hel te talue ke te teke non nem uruna.”

### *Te Mene Iesus Lange Ne Pilatus*

<sup>11</sup> Iok laol, te mene Iesus ke lange ne Pilatus. Ne Pilatus i non nenge mene ne Kaesa munna ke nauele Iuta mur. Pe ne Pilatus onteia Iesus ke teke, “Iuta mur aria soke ma iong mam?”

Pe Iesus hele, “Oe, iong sipom o hele hote lo.”

<sup>12</sup> Hana papalauna nemur te tua hite helenga lange Iesus. Pe Iesus tuacholia helenga e ero toto. <sup>13</sup> Ol pe ne Pilatus onteia Iesus, “Iong mam o longo lala nga hana nemur rera helenga pule?” <sup>14</sup> Pe Iesus tuachol ia helenga unne e ero toto. Nem poia ne Pilatus ke letena tuanin rara toto.

<sup>15</sup> Kokoeses nga ngaunga matana palaungana nenga Inगतoto ana etue,

ne Pilatus nananas ia poinga nenge lohe hotote none nga tuele au ngana, nga hulua lemeria ngana. <sup>16</sup> Nga etue neu none nge pingana songong nga poinga poreke ngana tunga tuele au ngana. Ene laka Parapas. <sup>17</sup> Ke ne Pilatus onteia hulua nenge te eukirau neu ke pomai, “Lememo taua non tei nge hana nai nei, ke e tung mule i lange imo? Ngana kai ne Parapas mai? Eh, Ngana kai Iesus nenge te hetue I ke Kristus mai?” <sup>18</sup> Ne Pilatus hele ke mau iange eteia ke hana papalauna nemur saria keke Iesus kou nenge te mene lange i neu.

<sup>19</sup> Nga etue nenge ne Pilatus are nga arenga palaungana nenge te hepengpeng ure meena ngana mur ia, nehei hekule helenga nei lange i ke teke, “O poia ute ke lohote nge non nem ero toto. Non nem I non urana ngana nge pengpeng toto. E hele ke mai iange e ma opek poreke toto ia I. Ke heueu nei singik meena mana.”

<sup>20</sup> Pe ero. Hana papalauna nemur teteu nga hulua nemur leteria ke te long hote ne Parapas pe te teke te hune Iesus ke mete.

<sup>21</sup> Ol pe ne Pilatus ontei mule iri ke teke, “Lememo taua non tei nge hana nai nei ke e tung mule lange imo?”

Pe hana nemur te tuacholia, “Lememem taua ne Parapas!”

<sup>22</sup> Pe ne Pilatus ontei mule, “Pe Iesus nenge te hetue I ke Kristus, lape e poia I ke mere mai ol?”

Pe iri lochloch ngana te tuachol ia ke te teke, “O heon heke I nga manga toto!”

<sup>23</sup> Pe ne Pilatus hele, “Ia, i mai poia utar ke poreke?”

Pe iri lochloch ngana te haliu hot ke te teke, “O heon heke I nga manga toto!”

<sup>24</sup> Ne Pilatus esia lo ke teke ute pele nge urana lape lohote ero. Pe pule nau urume lo ke chauchainga palaungana lape lohaka nge hulua nemur. Pomalam, mene ech pe lomo sue penna nga hulua mataria pe hele, “Iau lek ute pele ero langa non nei



ana metenga. Imo sipomo a mene I ke a heon heke I nga manga toto.”

<sup>25</sup> Pe hulua lochloch ngana nemur te hele, “O tunge I at. Pe mete ngana nem ana helenga, hakaka nge imem pe tutumem mur ol!”

<sup>26</sup> Pomalam ne Pilatus tung mule Parapas ke lange iri, pe tunge Iesus lange palinga hel ana hana mur ke te pal hulu hite pe te heon heke nga manga toto.

### *Palinga Hel Ana Hana Mur Tepoi Hesalanginga Ia Iesus*

*(Mak 15:16-20; Ioa 19:2-3)*

<sup>27</sup> Ol pe ne Pilatus nena palinga hel ana hana mur te mene teua Iesus langa na pele pe iri lochoch te eukirau pe te heliliu hite Iesus. <sup>28</sup> Ke het pe te haka hote nena hengeron pe te heron heke hengeron remenmen ngana e lange I. <sup>29</sup> Pe te mene rur e nge matantana pe te helule, pe tetal heke langa palpalna. Pe pule te tunge kula e lange I ke rahite nga penna tamalmal ke nakuna manga naungaala ana non soke e. Pe te tualou palaria nge I pe te songlele hule I pe alngaria ke pomai, “Masin! Iuta mur aria non soke!” <sup>30</sup> Pe te ulut lolole I pe te mene kula nem pe te hechongia nga palpalna. <sup>31</sup> Te songlele hulu hite I ke het pe te haka hot mule hengeron neu nge I, pe te heron teu mule i sipona nena lange I. Ke het pe te mene I kela te heon heke I nga manga toto.

### *Te Heon Heke Iesus Nga Manga Toto*

*(Mak 15:21-32; Luk 23:26-43; Ioa 19:17-27)*

<sup>32</sup> Iok, teii ke te lala kura pe te apenia Simon nenge nena nge Sirini. Pe te ech hote i ke halaua Iesus ke takis ia manga toto neu pule. <sup>33</sup> Pe tei kela te lohota nga kileng nenge ene Kolkota (Luna pomai, “Kittol Munna.”) <sup>34</sup> Pe nga lamau te tunge uain nenge te poi luluche nga ute e nge ehech. Pe in hot mene ke het pe lemene ero nge in

mule ol. <sup>35</sup> Te hero hite I nga manga toto ke het pe te saua oio paena ke te teke tenau, itei toto nenge lape mene na hengeron. <sup>36</sup> Pe teare ke tenau ele Iesus nge heon. <sup>37</sup> Pe te hero heke asinga langa manga toto neu pule nenge hele ke teke, “IESUS NENGE IUTA MUR ARIA NAUNGA ALA ANA NON KOI NEI.” Iange helenga nem hele urume huna nga nenge te laua Iesus. <sup>38</sup> Pe hana kemenge kina nai, te heon heke iri pule. Elle heon nga Iesus hilina hele nenga pen tamalmal pe e nga pen hoihoi. <sup>39</sup> Ke iri nemur nenge tei tototo lamau, te esia pe te rurur palpalria pe te helele ke te teke, <sup>40</sup> “Iong utar pa nenge o teke o toto sue NeHalang na pele, pe o hemes heke mule nga etue iri mol mana? Nenge teke iong NeHalang tuna, O halaua Iong sipom ke osio nga manga toto nem!”

<sup>41</sup> Pe hana nenge te popoi tuninga aria soksoke ngana mur pe hana papalauna mur pe hotonga ana hetoronga mur, te song lele hule Iesus ke pomalam pule. <sup>42</sup> Pe te hele, “Non nei Israel mur aria naungaala ana non. Pe I halaua hulua halang lo. Pe pomere nenge halaua i sipona ke sio nga manga toto nei ero mai?! Nenge teke halaua i sipona lape letera manmanna nge I. <sup>43</sup> Non nei hele ke teke I NeHalang tuna. Pe pule hele ke teke letena manmanna nge NeHalang. Nenge teke NeHalang mutena taua I, ta nauele nge halaua I.” <sup>44</sup> Pe hana porekreke ngana nai nenge te heon luluche iri nge Iesus neu, tesau hote helenga hel pule lange Iesus.

### *Iesus Mete*

*(Mak 15:33-41; Luk 23:44-49; Ioa 19:28-30)*

<sup>45</sup> Pe nga chaia matana eurunga pengpeng, kileng lochloch ngana au. Pe tu mana ke pomau ke la ulei. <sup>46</sup> Iok, chaia pallele ke lala lo, (nga 3 kilok) pe Iesus hepehoihoihoi ke soke toto ke teke, “*Eloi, Eloi, Lama*

**27:25:** Ume 5:28    **27:28:** Luk 23:11    **27:30:** Isa 50:6    **27:34:** Psa 69:21    **27:35:** Psa 22:18    **27:38:** Isa 53:12    **27:39:** Psa 22:7; 109:25    **27:40:** Mat 26:61; Ioa 2:19    **27:43:** Psa 22:8    **27:46:** Psa 22:1

*Sapachtani?*” Pe helenga nem luna pomai, “Ak Soke, Ak Soke, pomere nenge o hile hot mene iau ke pomai?”

<sup>47</sup> Pe iri nenge te mes rochroi, te longe pe te hele, “Non nei iuiua Elaisa i!” <sup>48</sup> Pomalam elle nge iri song sapele ke mene ute nge manga lum-lum pe kale hite nga io e mokona. Ke het pe panun teua nga uain nenge ehech pe tul heke lange Iesus ke inia.

<sup>49</sup> Pe pekngana mur te hele, “O mes mukam pe ta nauala. Lape Elaisa at ke halaua i ma ero!”

<sup>50</sup> Iesus alngana hot ke soke toto mule pe opene iuch hot kela, pe mete sapele.

<sup>51</sup> Nga etue unne neu pengpeng hunga ala palaungana nenge heon sio nga NeHalang na pele letena, chach nga tunangana ke sachana nai. Pe talun ke chach nga lut ke ramana sio. Pe ich rurur pe um te chach hululu. <sup>52</sup> Pe hana nemur nenge te mete lo, aria polo mur te pangpanga mana ol. Pe iri halang nenge te pengpeng toto nga NeHalang matana pe te mete lo, koluria mur te maul haka mule nga metenga. <sup>53</sup> Pe tei hot mule nga reia polo mur. Pe nga etue nenge Iesus lohaka mule nga metenga, hulua lochloch ngana te esia hana nemur nge teteu langa kileng nenge Ierusalem.

<sup>54</sup> Pe palinga hel ana hana mur iri ul aria soke, te mes ke tenau ele Iesus. Ol pe te amneia mangila pe te esia ure lochloch ngana neu nge lohote pe te matau toto. Pe te hele, “Manmanna toto ke Non nei, NeHalang Tuna koi.”

<sup>55</sup> Pe hehei halang tela pule pe te mes nga tau mana, pe tenau la manmana nga ure nemur nge te lohote. Iri, te koko nge Iesus nge Kalelea nike ke te halaulaua I nga kue. <sup>56</sup> Pe hei mol nge iri eria koi: Maria Mantalena pe Maria nenge Ieims iri nai Iosep taria pe Sepeti nehei.

*Tealo Hite Iesus Koluna*  
(*Mak 15:42-47; Luk 23:50-56; Ioa 19:38-42*)

<sup>57</sup> Iok nga ulei, Iesus nena none nge nena ure halang at ke puris. Ana non nena nge Arimatea pe ene laka Iosep. <sup>58</sup> Iosep at pe lange ne Pilatus pe onteia ne Pilatus nga Iesus koluna. Pomalam ne Pilatus hele ke te tunge Iesus koluna lange Iosep. <sup>59</sup> Iok, Iosep mene Iesus koluna pe ruch hit sapele nga ruchinga hit heueu ngana e, <sup>60</sup> pe tal teua langa isipona nena um polona nenge rech teua ke heueu ngana mana kura. Ke het pe hesasaul ia um palaungana e ke ma ele polo neu matana pe i ke laol. <sup>61</sup> Pe Maria Mantalena iri nai Maria e pule teare ke tenau alala nga polo neu ol.

*Palinga Hel Ana Hana Mur Tenau Ele Iesus Ana Polo*

<sup>62</sup> Iok, Israel mur aria etue nenge te hetalaulauia lape lohote ke pomange rou. Pe hana nenge te popoi tunginga aria papalauna mur pe Paresio mur, tela ke te esia ne Pilatus. <sup>63</sup> Tela pe te hele, “Non soke, letemem metene non nenge channanga hali nem nena helenga e nge tamal hote. Nga etue nenge tu ke maulul kura helele ke teke, ‘Etue mol het pe lape e maul haka mule.’” <sup>64</sup> Pomalam o hele ke kerkereng ke tenau ele polo nem ke nek toto ke ana etue mol. Lange lape nena hana mur teate ke te keme hote koluna. Pe lape te channanga ia hehei pe hana ke te teke non nem, maul haka mule nga metenga lo. Pe chau ngana ero ngana nem, lape tang ngana meena toto nga nenge Isipona poia nga tele ngana.”

<sup>65</sup> Ol pe ne Pilatus hele lange iri ke mai, “Heueu a mene palinga hel ana hana mur ke te mes pe tenau ele polo nem ke nek toto.” <sup>66</sup> Iok laol, hana nemur tela pe te hepule heke ute nga um nenge ma hele polo neu, pe te hemes sue palinga hel ana hana mur ke te mes pe tenau ala sapele.

## 28

### *Iesus Maul Haka Mule Nga Metenga*

(Mak 16:1-10; Luk 24:1-12; Ioa 20:1-10)

<sup>1</sup> Iok, Sapat ana etue het lo pe miliko sio sapele. Pe nga uachuach Maria Mantalena pe Maria e pule te teke tela ke tenau toto nga polo nenge Iesus koluna ma ia.

<sup>2</sup> Ol pe mangila palaungana rur pe Non Soke na angkelo e sio at nga tapa, pe i langa polo nenge Iesus koluna ma ia. I la pe hesasa hul kelkelia um nenge te poi ele nga polo hanna pe kila haka ia. <sup>3</sup> Ana non lohote ke pomanga kileng chalem ngana pe na hengeron hussu pe sina ala toto. <sup>4</sup> Pe palinga hel ana hana nemur te esia angkelo neu pe te matau pe te loiloito. Pe ngaria lohote pe te unalou sio mene iri nga ich pe tema ke manga hana hel nge te mete.

<sup>5</sup> Pe angkelo neu hele lange hehei nai neu ke teke, "Imo nai a matau ero. E eteia lo nge a teke anau toto Iesus nenge te heone nga manga toto. <sup>6</sup> Pe ana non, i ero nga lamai lo. Imo a iat ke anau nga munna nenge maia. Ngana kou maul haka mule ke lalo ke pomanga hele ngana. <sup>7</sup> Ala mule ke ueiuei mana pe a hele ia lange nena hana mur: 'Iesus maul haka mule nga metenga lo. Pe ngana kou i muka ke lala nge Kalelea lo. Ala pe a esia I nga lamau.' Ke e at ngak nei, e at ia laka helenga nem."

<sup>8</sup> Hehei nai neu ueiuei mana pe te ua nga kileng unne neu. Pe te matau pe te iech pe te song kela te hele nge Iesus nena hana mur. <sup>9</sup> Ol pe Iesus herura hot mene iri pe hele, "Uach toto nge imo nai." Ol pe iri nai tela nge Iesus ke te rahit nga apena pe te heto heke I. <sup>10</sup> Ke het pe Iesus hele lange iri, "A matau ero. Ala pe a hele nge titik mur ke tela nge Kalelea, kela te esia Iau nga lamau."

### *Palinga Hel Ana Hana Mur Reria Helenga*

<sup>11</sup> Iok, hehei ne mur te song ke te lala pe palinga hel ana hana mur hel, teteu lala nga kileng palaungana neu. Pe te hele ia ure lochloch ngana nenge lohote neu lange tunginga ana hana mur aria papalauna mur. <sup>12</sup> Ol pe iri nemur tela ke te hele luluch nge Israel mur aria soksoke ngana mur ke leteria tuanin hote utar nenge lape te poia. Pomalam te palpahite palinga hel ana hana mur haria nga umtutuna palaungana pe <sup>13</sup> te hele lange iri ke pomai, "Heueu a hele ke mai koi. A teke, 'Non nem, nena hana mur teat nga miliko ke te takis hot kome koluna. Pe imem paikoi mo mamani.' <sup>14</sup> Nenge teke ne Pilatus talngana pairia helenga nei, imem lape mo hemaluche letena ke poia ute pele lange imo ero." <sup>15</sup> Ke palinga hel ana hana nemur te mene umtutuna neu pe te poia ure lochloch ngana ke pomanga hana nemur te hele ngaria. Pe helenga nenge te teke te kemeia Iesus koluna, ana nananga song ke halang nge iri Iuta mur. Pe nga etue nei te nenene nananga nem kura.

### *Iesus Tunge Na Ume Lange Nena Hana Mur*

(Mak 16:14-18; Luk 24:36-49; Ioa 20:19-23; Ume 1:6-8)

<sup>16</sup> Iok laol, Iesus nena hana iri analoch pe elle nem, tei ke tela nge Kalelea nga hengene nenge hele ia lange iri ke telaia. <sup>17</sup> Te la pe te esia Iesus pe te heto heke I, pe hel nge iri leteria manmanna ero. <sup>18</sup> Ol pe Iesus i lange iri pe hele, "NeHalang hekerkereng tote iau ke enau ele tapa pe ich lochloch. <sup>19</sup> Ke pomalam e hele lange imo, ai ke ala nge hehei pe hana nga kileng lochloch ngana nga ich. Ala pe a poia iri ke lek hana mur ia iri. A poia ume nem pe a henune iri nga Temene ene pe Tuna pe Opepengpeng. <sup>20</sup> Pe a hetottore iri ke te longo taua ure lochloch ngana nenge e hetoro sue lange imo nem lo.

28:6: Mat 12:40; 16:21

28:10: Mat 26:32

28:16: Mat 26:32

28:18: Ioa 13:3; Epe 1:20-22

28:19: Mak 16:15-16; Ume 1:8

Pe kokoeses, Iau lape etu luluch nge imo kela het nga etue nei hetala toto ngana.”



## Helenga Urana Toto Ngana Nenge MAK

*Ioanes Nenge Henunun Na Helenga*

(Mat 3:1-12; Luk 3:1-18; Ioa 1:19-28)

<sup>1</sup> Helenga urana toto ngana nge Iesus Kristus nenge NeHalang tuna.

<sup>2</sup> Helenga urana toto ngana nem talun ke pomanga hetatalonga Isaias has sue nga halang nike lo.

“O longo, lape e kulosia lek hekulukulonga ke i muka nge iong.

kela hepengia lem kue.

<sup>3</sup> Hekulkulonga nem lape haliu nga kileng nenge ich sana lomona ke pomai,

‘A hepeng mule imo ke a urana iange Non Soke lape at.

Pe a hepengia kue nenge i atia.’ ”

<sup>4</sup> Ol pe Ioanes lohot nga ich sana lomona nem, henune hulua pe haliu ia na helenga pe hele ke teke, “A hul rumemo ia poinga poreke ngana pe a at ke e henune imo, laka NeHalang sau lemo poinga poreke ngana mur ke te lasus toto.” <sup>5</sup> Iok laol, iri halang toto nga tuele kina nenge Iuta pe nga kileng nenge Ierusalem te lohot ke te longe Ioanes na helenga. Pe te hele hote ria poinga poreke ngana mur pe Ioanes henune iri nga ech Iortan.

<sup>6</sup> Ana non heronia hengeron nenge te taua nga kamel pulpunna pe kale hite ana tal nga luana pe ana ngaunga sis pe nina laka misou eina.

<sup>7</sup> Ke Ioanes haliu hot lange hehei pe hana ke teke, “Non e koi nanasia iau ke atat pe i palaungana toto nge iau. Iau e urana ero pe e purpur ero nga e tuatuch sio nge epoi hote nena ae ulina nga apena. <sup>8</sup> E henune imo nga ech mana pe i lape henune imo nga Opepengpeng.”

<sup>9</sup> Mala pol mana pe Iesus at nge Nasaret nga tuele kina e nge Kalelea pe Ioanes henune i nga ech nge Iortan. <sup>10</sup> Henune Iesus ke het pe Iesus lohot nga ech pe nau sapele tapaira nge alchach pe Opepengpeng sio at nge i ke pomanga ngie chaulum nge lehe sio. <sup>11</sup> Pe helenga e sio at nga tapa ke teke, “Tuk toto laka iong nenge mutek tau tote. Pe e iech toto nge iong.”

<sup>12</sup> Iok, Opepengpeng kulosia i kela nga kileng nenge ich sana lomona mana. <sup>13</sup> Tu nga ana kileng ke teio elle pe hakekena (etue iri ana non kina nai) pe la Non Poreke ngana totoi ke helosio ia i. Pe ure mur nenge iri hinolo tetu pule. Mala pol pe NeHalang nena angkelo mur teat ke te halaua i.

*Iesus Iua Na Hana Mur*

(Mat 4:12-22; Luk 4:14-15; 5:1-11)

<sup>14</sup> Te laua Ioanes ke mala pol lo pe Iesus lange Kalelea ke hele hote NeHalang nena helenga. <sup>15</sup> Ke Ioanes hele, “Etue toto ngana at lo. Pe etue rochroi mana nge NeHalang lape at ke lohot nge imo! A hulua lemo poinga mur pe letemo manmanna nga nena helenga urana toto ngana!”

<sup>16</sup> Iesus ii nga ech hetaliliu ngana nge Kalelea ilina, pe naue hana nai nge te olole ruo nga hoat. Iri nai aria ume nike, elle ene Simon pe elle ene Antrias pe iri nai titiria hel. <sup>17</sup> Iesus hele lange iri, “Ai luluch nge iau ke e hetore imo ke a mene hehei pe hana ke pomanga ruo nenge aole nga hoat.” <sup>18</sup> Te longe Iesus na helenga pe ueiuei mana te hile sue reria ume nga hoat pe te nanasia i.

<sup>19</sup> Iesus i la pol pe esia Sepeti tuna mur Iakop pe Ioanes. Iri nai te tutua hoat chach ngana nga himot tuna letena. <sup>20</sup> Iesus esia iri nai pe iua iri. Iua iri pe te ua hatalia temeria pe reria hana mur pe te nanasia Iesus.

**1:2:** Mal 3:1    **1:3:** Isa 40:3    **1:4:** Ume 13:24; 19:4    **1:6:** 2Ki 1:8; Mat 11:8    **1:7:** Ume 13:25

**1:11:** Psa 2:7; Isa 42:1; Mat 12:18; Mak 9:7    **1:13:** Psa 91:11-13    **1:14:** Mak 6:17    **1:15:** Mat

3:2

*Iesus Keresia Uneinei Ke Uahot Nge None*

*(Luk 4:31-37)*

<sup>21</sup> Iesus pe na hana mur te lohote nga kileng nenge Kapernam. Pe tela nga hetorongana ana pela nga etue nenge te hatalaulau ia. Pe Iesus hetoro sapele hehei pe hana nga NeHalang nena helenga. <sup>22</sup> Hehei pe hana te longe pe te ruraia Iesus na helenga nge malaha toto nge iri. I mallaha toto nge hana papalau ngana nemur nenge te hetotoro nga NeHalang nena hontonga.

<sup>23</sup> Ol pe none nge uneinei tu nge i, tu nga hetorongana ana pele nem pe alngana haka lange Iesus ke teke, <sup>24</sup> “Iesus nge Nasaret, Imem uneinei mur mo eteia iong lo la! Iong NeHalang nena hekulkulonga nge pengpeng. O teke oat ke o potaria imem? O teke oat ke o heporeke imem?”

<sup>25</sup> Iesus keresia uneinei, “O reng, pe o lohote nge non nem.”

<sup>26</sup> Uneinei rure non nem ke palaungana, pe alngana haka ke soke pe uahote nge ana non. <sup>27</sup> Hehei pe hana te rura toto pe te ontei hel mule nge iri, “Ee! Utar nei mai? Hetorongana heueu ngana kai? Non nge nena helenga milang ke hele lange uneinei mur ke te ua pe te longo taua i.”

<sup>28</sup> Ol pe Iesus pingana song ke ueiuei mana nga kileng lochloch ngana nga ich nge Kalelea.

*Iesus Hemas Ia Hana Halang*  
*(Mat 8:14-17; Luk 4:38-41)*

<sup>29</sup> Te lohaka nga hetorongana ana pele nem pe tei pengpeng langa Simon pe tina Antrias ria pele pe leims pe Ioanes te koko luluch nge iri. <sup>30</sup> Simon uene nenge hei singina haleles ke ma nga hete pe Iesus lohote pe te heleia lange i. <sup>31</sup> Iesus lange ana hei, rahite penna pe halaua i ke are aka. Singina milang ngana makuk sio pe hengaua iri.

<sup>32</sup> Miliko sio, pe hana te takisia iri nenge singiria haleles pe hel nenge

uneinei mene iri ke tela nge Iesus. <sup>33</sup> Iri halang nga kileng nenge Kapernam te heuirau nga pele matana. <sup>34</sup> Iesus hemas ia iri halang nenge aria haleles altototo pe poia iri nenge uneinei mene iri ke te urana mule. Iesus poi ele uneinei mur ke te hele ero ol iange te eteia nge i NeHalang.

*Iesus Hetoro Nge Kalelea*  
*(Luk 4:42-44)*

<sup>35</sup> Nga uach uruna toto Iesus lohaka ke ua hatalia pele nem. Pe langa kileng e nge ngana ero, ke hele luluch nge Temene. <sup>36</sup> Ol pe Simon iri ul pekngana mur tela ke te tango rere i. <sup>37</sup> Te hot taua i pe te hele lange i ke te teke, “Hana lochloch ngaria kou te tango rerere iong.”

<sup>38</sup> Pe Iesus hele, “Ita lape tai hot langa kileng hel pule nge rochroi. Iau e teke e hele toto lange iri pule iange Temek kulosia iau ke e heleia nena helenga lange hana lochloch.”

<sup>39</sup> Ke ngana iam nenge, Iesus i langa kileng lochloch nge Kalelea, ke helele nga hetorongana ana pele mur leteria pe helope hotote uneinei mur.

*Iesus Hemas Ia None nge Singina Poreke*  
*(Mat 8:1-4; Luk 5:12-16)*

<sup>40</sup> Non e nge singina poreke at nge Iesus, tualou palana pe hele lange Iesus ke halaua i pe hele ke teke, “Teke lememe, o poia singik ke urana mule.”

<sup>41</sup> Iesus letena ia i ke ra haka nge i pe hele, “Nga lememe ngak o urana mule!” <sup>42</sup> Ueiuei mana pe haleles poreke ngana het sapele nge i pe singina urana mule. <sup>43</sup> Iesus kulosia i pe toto hita lange i, <sup>44</sup> “O longo ke nek! Ola pe o hele hote lange mele e ero. Ola pengpeng nge tunginga ana non pe o hele lange i ke nau urume singim. Singim urana nga NeHalang matana lo pe o tunge lem tunginga ke manga Moses hele ngana, ke malaha lange hana lochloch ke te eteia singim nge urana mule lo.”

<sup>45</sup> Ol pe non nem talkome helenga ero. Hele hote lange hana lochloch ngana. Ana non hele hot rara sak-  
ililia ke poia Iesus ke tu luluch nge  
hulua pe langa kileng palaungana  
ero ol. Ol pe tu mana nga kileng  
nge ngana ero pe hana nga kileng  
lochloch ngana te mana taua i.

## 2

<sup>1</sup> Etue hel nga hoena Iesus la mule  
nge Kapernam ke tu nga pele e pe  
pingana song. <sup>2</sup> Hulua teat lochloch  
pe muria ero nge teu pe nga pele  
matana pule. Iesus hetottore helenga  
lange iri, <sup>3</sup> pe hana henel nge te pur-  
pur ke te teke te takisia none nge  
apena mete at nge i. <sup>4</sup> Pe te raker  
nge te takisia non neu lange Iesus  
iange hulua halang sakilil. Ol pe te  
haka langa pele ona nga Iesus alan-  
gana haka pengpeng pe te alchachia  
pele pulpunna pe te hesue ana non  
luluch nga na hete lange i. <sup>5</sup> Iesus  
eteia leteria manmanna ngana pe  
hele lange non nenge apena mete  
ke teke, “Atong neingak, e saua lem  
poinga poreke ngana mur ke te lasus  
toto ol.”

<sup>6</sup> Hana papalau ngana mur nenge  
te hetottoro, teare pe leteria tuanin  
nge iri siporia. <sup>7</sup> “Pomere nenge i hele  
ke pomai? I hele poreke NeHalang  
iam. NeHalang i toro mana nge saua  
poinga poreke ngana mur ke te la-  
sus toto.” <sup>8</sup> Ueiuvei mana Iesus eteia  
leteria tuanin ngana pe hele lange  
iri, “Pomere nenge letemo tuanin ke  
pomai? <sup>9</sup> Semel nge ta hele lange non  
nenge apena mete ke mai, ‘E saua lem  
poinga poreke ngana ke te lasus toto.’  
Pe semel ero nge ta hele, ‘O lohaka,  
olou heke lem tako pe oi.’ <sup>10</sup> Lape epoi  
hote ke mallaha lange imo ke a eteia  
Non Tuna na kerkerenga nga ich nge  
sua poinga poreke ngana mur ke te  
lasus toto.” Hele sapele lange non  
nenge apena mete, <sup>11</sup> “E hele lange  
iong, o lohaka, olou heke lem tako pe  
ola nga lem pele.”

2:16: Mat 11:19

<sup>12</sup> Iri lochloch te nechnei kurkura  
pe ana non lohaka, pe lou heke na  
tako pe i hot. Pe hehei pe hana te  
esia pe te rura mana kela te heto heke  
NeHalang pe te hele, “Nge nike ta  
neue ure nge lohote ke pomai ero i!”

### *Iesus Iua Liuai* (Mat 9:9-13; Luk 5:27-32)

<sup>13</sup> Iesus la mule nga ech hetaliliu  
ngana nge Kalelea. Hulua teat nge i  
pe talun ke tunge hengetoro. <sup>14</sup> Iesus  
i atat pe esia Alpeus tuna Liuai. Liuai  
i non nenge lololoch umtutuna. Ana  
non are teu nga nena ume ana pele  
sune pe Iesus hele lange i, “O nanasia  
iau.” pe Liuai lohaka ke nanasia i  
sapele.

<sup>15</sup> Nga hoena Iesus la ke ngau  
nga Liuai na pele. Hana nenge  
te lololoch umtutuna iri ul hana  
porekreke ngana mur te nanasia  
Iesus. Pe iri halang nge teare luluch  
nge i pe nena hana mur ke te ngau.  
<sup>16</sup> Hana Paresio hel nge te hetottoro  
tenaue Iesus nge ngau luluch nge  
hana porekreke ngana mur, pe hana  
nge te menmene umtutuna pe tela  
ke te onteia Iesus nena hana mur,  
“Pomere nenge Iesus ngau luluch nge  
hana nenge pomai?”

<sup>17</sup> Iesus longe iri pe tuacholia re-  
ria helenga, “Hana nenge te urana  
lemeria ero masmasinga pe iri nenge  
singiria haleles mana. Eat ke e iua  
hana urana ngana mur ero. Eat ke e  
iua hana porekreke ngana mur.”

### *Onteinga Nga Heonga* (Mat 9:14-17; Luk 5:33-39)

<sup>18</sup> Nga etue e Ioanes nena hana mur  
pe Paresio mur teheo nga ngaunga.  
Hana hel teat nge Iesus pe te on-  
teia i, “Pomere nenge Ioanes nena  
hana mur pe Paresio mur teheo nga  
ngaunga pe lem hana mur ero?”

<sup>19</sup> Iesus tuacholia lange iri ke teke,  
“Iri nenge tela nga ngesinga lape  
teheo nga ngaunga pule ma? Nenge  
teke ngesinga ana non tu luluch nge  
iri kura lape te poia poinga nem ero.

<sup>20</sup> Ngesinga ana non la ol, laka teheo ol.

<sup>21</sup> “Mele pele sime malenga sachana nge heueu ngana ke tal ele nga nike ngana polona ero. Iange lape heueu ngana nem luluchou pe chach hot nga nike ngana pe poia chach ngana ke palaungana toto ol.

<sup>22</sup> Mele pele ling teua uain heueu ngana nga kina nenge nike ngana ero. Iange lape kina sosolos pe chach pelape iri nai te poreke. Urana ngana te ling teua uain heueu ngana nga kina nge heueu ngana pule.”

*Onteinga Nga Sapat Ana Etue  
(Mat 12:1-8; Luk 6:1-5)*

<sup>23</sup> Nga Sapat ana etue Iesus pe nena hana mur teteu langa ume e. Tei la pe na hana mur te sohe uit nganangana ke te ngaua. <sup>24</sup> Pomalam Paresio mur te hele lange Iesus, “O longo, lem hana mur tepoi ke mere nei mai? Pomere nge te nanasia lemehotonga mur nga Sapat ana etue ero?”

<sup>25</sup> Iesus tuacholia reria onteinga ke teke, “Ia!? O sisia poponing nga non soke Teuit poi ngana nge nike ero? I pe na hana mur te mete aria <sup>26</sup> pe la ke i teu nga NeHalang nena pele pe mene tunginga ke te ngaua. Te poia nga etue nenge Apiatar i tunginga ana non nenge palaungana. Ngaunga nem tunginga ana hana mur aria mana pe non soke Teuit ngaua pe hengau nena hana mur ia.”

<sup>27</sup> Ol pe Iesus hele lange iri, “NeHalang talue Sapat ana etue ke halaua hana mur nenge te nanasia i. NeHalang ume hote hana mur ke Sapat ana etue ana ia ero. <sup>28</sup> Pomalam, Iau Non Tuna pe iau palaungana toto nga Sapat ana etue.”

### 3

<sup>1</sup> Iok Iesus la mule nga heteronga ana pele, pe nga pele nem none nge penna mete tu pule. <sup>2</sup> Pe Paresio mur te tango rere Iesus nena poinga huna ke te hele poreke i ia. Paresio mur

te nechnei it tote Iesus nge hemasia non nem penna nga Sapat ana etue.

<sup>3</sup> Iesus hele lange non nem, “O iat la koi nga mataria.” <sup>4</sup> Iok pe Iesus onteia hana mur, “Hotonga tei nge urana nge ta nanasia nga Sapat ana etue? Ta halaua mele ke tu ke maulul ma singira sisia i pe ta hune i?” Pe iri lochloch te reng mana.

<sup>5</sup> Ol pe Iesus letena inin taua iri. Nau rara nge iri pe letena sisipu iange iri singiria sisis pe te hemaserochro. Pe Iesus hele lange non nem, “O hepeng hote perim.” Iok, non nem hepeng hote penna pe urana sapele. <sup>6</sup> La ol Paresio mur te lohot nga heteronga ana pele pe iri ul ne Herot nena hana mur te heuirau ke tetal reria helenga ke te teke te hune Iesus.

*Hulua Te Nanasia Iesus*

<sup>7</sup> Iesus pe na hana mur tei hot nga ech hetaliliu ngana nenge Kalelea. Pe hulua halang nga kileng rochroi ngana mur Kalelea te nanasia i. <sup>8</sup> Pe halang nge Iutea, pe Ierusalem pule pe nga ele nga chaia haka ngana nge Iortan pe nge Tir pe Siton. Hana lochloch nga kileng nem mur te longe Iesus nge popoia ure mur pe teat nge I. <sup>9</sup> Iesus hele lange na hana mur ke te mene sulang ke ma ke kulkul ala, iange hulua halang te hemurung hite i. <sup>10</sup> I hemasia hana halang lo pe haleles mur halang te ech teua iri ke te teke tera nge Iesus. <sup>11</sup> Iri hana nenge uneinei poia iri te esia Iesus pe te tualou sio nga matana pe te hele haka lange i, “Tong NeHalang Tuna!” <sup>12</sup> Iesus keresia uneinei ke te hele hote i ero nge i NeHalang.

*Iesus Hesilei Hote Nena Hana Mur Nge Iri Analoch Pe Nai  
(Mat 10:1-4; Luk 6:12-16)*

<sup>13</sup> Iok Iesus i haka langa chou-chou ngana pe iua hana mur nenge lemene taua iri. Pe teat sapele nge i. <sup>14</sup> Pe Iesus hesilei hote nena hana iri analoch pe nai. Pe hetue eria ke



Hekulkulonga mur. Iesus hele lange iri. "Iau e hesilei hote imo ke ai luluch nge iau. Pe lape e kulosia imo ke a haliu hote lek helenga. <sup>15</sup> Pe imo lape a mene lemo kerkerenga nenge a hele pe a helope hote uneinei mur."

<sup>16-19</sup> Hana iri analoch pe nai nenge Iesus hesilei hote iri koi:

Simon, (pe Iesus haua ke ene Petrus),

Ieims pe tina Ioanes (nenge Sepeti tutuna mur pe Iesus haua eria ke Poanerkes. Luna laka, "kileng kurung ngana" iange leteria inin ngana manga kileng kurung ngana)

Antreas

Pilip

Partolomius

Mateus

Tomas

Ieims (nenge Alpeus tuna)

Tateus

Simon (non nenge teke Israel mur iri siporia tenau ele iri)

Iutas Iskariot, (non nge tunge Iesus langa hana porekreke ngana peria).

### *Iesus Pe Pelsipul*

(*Mat 12:22-32; Luk 11:14-23; 12:10*)

<sup>20</sup> Iesus iri ul nena hana mur tela mule nga pele pe hulua nge halang toto teat nge i. Ol pe i pe nena hana mur te ngau ero ol. <sup>21</sup> Iesus alona mur te longe pe tela ke te mene i iange hehei pe hana te teke ana hauaua. <sup>22</sup> Hotonga ana hetoronga hel nge teat nge Ierusalem, te teke Pelsipul tu nge i. Te teke uneinei mur aria soke tunge nena kerkerenga lange i ke helope hote uneinei mur.

<sup>23</sup> Ke pomalam Iesus iua iri pe hele lange iri nga helenga opene hel ke teke, "Lape Satan lope hot mule Satan nge hehei pe hana ke pomere?"

<sup>24</sup> Nenge teke none las hule tuele kina e ke kinkino pe tepal hel mule nge iri, lape tuele kina nem tu ke elle ero ol.

<sup>25</sup> Nenge teke mel hel tepal hel luluch mule nge aloria mur lape tetu ke elle

ero ol. <sup>26</sup> Pe nenge teke Satan nena kileng nenge nauele telas hulu hel ke kinkino lape tu ke mala ero, het sio sapele.

<sup>27</sup> "Mele pele teu pulut mana nga non kerkereng ngana e nena pele ero. Teke poi ke pomam, kale hite non nem mukam, laka teu ke kemeia non nem nena ure mur ol.

<sup>28</sup> "E hele ke manmanna lange imo, poinga poreke ngana mur lochloch nenge ta popoia pe ta heleleia, NeHalang lape letena ia pe sau ke lasus. <sup>29</sup> Pe poinga poreke ngana nenge ta hele poreke Opepengpeng, NeHalang lape letena poreke ia ero iange poinga poreke nem lohot nga letera toto pe lape tu ke koko." <sup>30</sup> Iesus heleleia helenga nei iange mele hel te hele ke teke, "Uneinei tu nge i."

### *Iesus Tana Pe Titina Mur*

(*Mat 12:46-50; Luk 8:19-21*)

<sup>31</sup> Iesus tana pe titina mur te puris pe temes nge hot nga pele pe te hekulo teua reria helenga lange i ke lohot at. <sup>32</sup> Hulua nenge teare liliu ele Iesus te hele lange i ke te teke, "Ola ke o nau tam pe titim mur pe lilium mur ngaria kou nge hot, te teke te esia iong."

<sup>33</sup> Pe Iesus tuacholia, "Itei hel nenge etak pe titik mur ia iri?"

<sup>34</sup> Iesus nachneia hehei pe hana nenge teare liliu ele i pe hele, "A nau at, etak pe titik mur pe liliuk mur laka <sup>35</sup> mele hel nenge te longo taua NeHalang ke te poia ume nenge lemene taua."

## 4

### *Helenga Opene Nga Kon*

(*Mat 13:1-9; Luk 8:4-8*)

<sup>1</sup> Iesus talun ke hetoro mule nga ech hetaliliu ngana nenge Kalelea ilina hele. Pe hulua nge halang toto teare liliu ele i. Ol pe are nga sulang ke ote hot ke mana nga ech sana. Pe hulua temes nga ech ilina. <sup>2</sup> Iesus hele lange iri nga helenga opene ke hetore iri nga ure halang pe hele,



<sup>3</sup> “A longo at! Etue e none la ke tua ngaunga alona. <sup>4</sup> Tue iri nga ume pe hel te losio nga kue pe ngie mur teat ke te tuais haka taua. <sup>5</sup> Hel te losio nga ich nenge ana um halang. Etue sase ero mana pe mataria hot mule iange ich une sune mana. <sup>6</sup> La ol pe chaia haka pe sine ngaunga alona nemur ke te mete iange ularia sio langa ich letena nge sio ero. <sup>7</sup> Ngaunga alona hel te losio teu nga kiki letena pe kiki haka pe takue aria ngaunga ke hei ero. <sup>8</sup> Pe ngaunga alona tutuna nemur nenge non neu tue iri nga ich nge urana, pe mataria hot pe te haka ke nek pe ngana ngaria. Hel ngana ngaria iri ana non kina elle pe analoch (30), hel ana non kina mol (60) pe hel ana non kina iri lime (100).”

<sup>9</sup> Ke het pe Iesus hele, “A pal talngamo pe a longo ke neknek!”

<sup>10</sup> Iesus tu ke i toro mana pe na hana mur pe iri nenge te longe i teat ke te onteia i ke hemallaha hote helenga opene nemur. <sup>11</sup> Pe hele lange iri, “Imo a mene helenga talkomkome ngana nga NeHalang nena naualanga pe nekinga ke malaha. Pe iri hel, e nana lange iri nga helenga opene mana. <sup>12</sup> Ke ngana laka nenge,

“Tenau pe tenau pe leteria lilil,  
te longo pe te longo pe te eteia luna ero;  
pomalam te hulua leteria ero,  
pe NeHalang letena ia iri nga re-  
ria  
poinga poreke ngana mur ero.’”

*Iesus Hemallaha Hote Helenga Opene Nga Ngaunga Alona*  
(Mat 13:18-23; Luk 8:11-15)

<sup>13</sup> Ol pe Iesus hele lange iri, “A eteia helenga opene nei ero kura kai? Pe lape a eteia helenga opene lochloch luna ke mere? <sup>14</sup> Non nge tutua ngaunga alona poi ke malaka nge non nenge hele hotote NeHalang nena helenga. <sup>15</sup> Pe ngaunga alona

nenge te losio nga kue, pomalaka nge hehei pe hana nenge te longe NeHalang nena helenga pe nga etue nem mana non poreke ngana at pe uaia totoia helenga nenge NeHalang tue nga leteria. <sup>16</sup> Pe hehei pe hana hel te poi ke pomalaka nga ngaunga alona nenge te losio nga ich nenge ana um halang. Te longe helenga nem pe te mene ke ueiuei mana pe te iech ia. <sup>17</sup> Pe ularia ero. Tetu ke etue choro mana pe nga etue nenge ure meena ngana lohote pe mele hel te teke te hekou sue NeHalang na helenga, hehei pe hana nemur leteria manmanna ngana het sio ke ueiuei mana. <sup>18</sup> Iri hel te poi ke pomalaka nga ngaunga alona nenge te losio teu nga kiki letena. Te longe helenga <sup>19</sup> pe leteria tuhit mene ure nemur nga ich pe muteria tau tote umtutuna pe ure eltit ngana mur. La ol pe leteria lilil ele NeHalang na helenga pe te ume hote ute e nge urana nga tetu ngaria ero. <sup>20</sup> Pe hehei pe hana hel te poi ke pomalaka nga ngaunga alona nenge tetue nga ich nge urana. Te longe helenga nem pe muteria taua ke hel ngana ngaria halang pe hel halang pol pe hel halang toto.”

*Helenga Opene Nga Lemenga*  
(Luk 8:16-18)

<sup>21</sup> Pe Iesus onteia iri, “Pomere, mele tonge lemenga pe tal teua nga chasang ma nga hete ene ke talkome? Lape ero! Lemenga nem lape te neue ero. Lemenga nem tetal heke nga lut ke tualeme nga kileng lochloch pe tenau ke mallaha ia. <sup>22</sup> Ke pomalam helenga lochloch nenge talkome heueu nei lape NeHalang hemallaha hote. <sup>23</sup> Apal talngamo pe a longo ke neknek!

<sup>24</sup> “Pe letemo tuanin ke nek toto nga ure nenge a longe iange NeHalang lape poia imo ke a etei ke purpur, urume ure nenge letemo tuanin ia. Pe NeHalang lape poia imo ke a etei tote. <sup>25</sup> Mele nenge nena unne ma lo,

lape NeHalang tung ke nena halang toto. Pe mele nenge nena ero, lape NeHalang mene toto mule unne sune nenge tutu nge i.”

### *Helenga Opene Nga Kon Aka Ngana*

<sup>26</sup> Iesus hele, “NeHalang nena naualanga pe nekinga pomalaka nga non nenge tutua kon nga ana ume. <sup>27</sup> Pe kon tutuna nemur mataria hot pe te haka nga etue nenge non nem mamamani nga miliko ma mesmese nga uach. Pe i eteia ure nemur te haka ngaria ero. <sup>28</sup> Ich isipona poia kon nemur ke te haka pe nganangaria. Nga tele ngana iria lohot, ke het pe te rora ke het pe nganangaria lohot sapele. <sup>29</sup> Pe nga etue nenge kon mera, ume tokoninga at ke sohe iri.”

<sup>30</sup> Iesus ontei, “Lape e hele urume NeHalang nena naualanga pe nekinga ke pomere? Helenga opene tei nenge lape e heleia ke e hemallaha hote? <sup>31</sup> NeHalang nena naualanga pe nekinga, pomalaka nga ae paele tutuna. Tutuna kinkino mana nga ae halang tuturia <sup>32</sup> pe haka ke soke toto ke i ae palaungana nge perperna halang pe ngie mur te umeia reria kiniu pe tema ia.”

<sup>33</sup> Iesus hetore nena helenga lange hehei pe hana nga helenga opene hel ke pomai ke teke poia iri ke te etei tote. <sup>34</sup> Iesus hetottore hehei pe hana nga helenga opene mana, pe nga etue nenge i toro tu luluch nge nena hana mur, hemallaha hote luna lange iri.

<sup>35</sup> Nga ulei nga etue neu, Iesus hele lange na hana mur, “Ta lotele langa ech hetaliliu ngana ilina hele.” <sup>36</sup> Pe te hile sue hulua, pe te haka nga sulang nenge Iesus are haka ia lo. Pe te ote tele luluch nge i. Pe aka hel pule te ote tele luluch pule. <sup>37</sup> Ol pe tuttula palaungana heingana haka sapele pe ruach talun ke poi teu sapele nga sulang letena ke liu muta ke teke puluchluch lo. <sup>38</sup> Pe Iesus iam tal heke palpalna nga ulunga ke mamani nga

sulang hoena. Na hekulkulonga mur te hengo heke i pe te hele, “Non soke, letemia ita nge lape ta puluch ero kai?”

<sup>39</sup> Iesus mes haka pe hele langa tuttula, “Heingam ero!” Pe hele langa ruach, “O mana ke nek!” Tut-tula nem mete sio pe ruach ma ke mello. <sup>40</sup> Iesus onteia nena hana mur, “Pomere nenge a matau? Letemo manmanna nge iau ero kura kai?”

<sup>41</sup> Pe te rura toto pe te hele tele hel nge iri, “Non tei nei mai, nenge tuttula pe ruach te longo taua i?”

## 5

### *Iesus Lope Hote Uneinei Mur Nge None*

*(Mat 8:28-34; Luk 8:26-39)*

<sup>1</sup> Iesus pe na hana mur te lohot nga ech hetaliliu ngana ilina nge Kalelea nga tuele tana nge Kerasa. <sup>2</sup> Iesus iuch sio nga sulang pe saol sapele none nge uneinei tu nge i. <sup>3</sup> Ana non nem tutu nga rika mur nenge te tattal hana koluria ia. Pe mele pele kikina halang ero nge kale hite i ol. Chaunga nenge kerkereng toto malam pe ero la. <sup>4</sup> Kokoes, te kale apena pe penna nga rur nenge kerk-ereng toto. Pe kokoes mana takhoa nga penna pe nga apena tutkolkole. Mele pele nakuna ero toto nge laua i iange kikina toto. <sup>5</sup> Kokoes nga sinanga pe miliko i rara nga rika hanna pe hengene, pe uu pe ririria singina nga um.

<sup>6</sup> I tu ke kangkanga pol pe esia Iesus pe song sapele lange i ke tualou sio nga matana pe kanna tuakolo tala lange i. <sup>7</sup> Pe alngana haka ke soke toto ke teke, “Iesus, NeHalang nenga lut toto tuna iong! Oat ke o potar nge iau?” Pe hemaluche Iesus nga NeHalang ene ke teke, “Iesus o heporeke iau ero!” <sup>8</sup> Non neu hele ke pomai iange Iesus hele lange i ke teke, “Uneinei o lohot nge non nem.”

<sup>9</sup> Ol pe Iesus onteia i, “Em mere?” Pe non neu hele, “Ek laka ‘Hulua’ iange imem halang.” <sup>10</sup> Pe helaulau

lange Iesus ke lope hote uneinei mur nga kileng nem ero.

<sup>11</sup> Kie halang te tutua nga hengene ilina <sup>12</sup> pe uneinei mur te helaulau lange Iesus ke te teke, “O kulosia imem kela mo teu heke kie mur.” <sup>13</sup> Ke Iesus longele iri ke tela. Pe uneinei mur te ua hot nge non nem pe teteu heke kie mur. Kie nemur lochloch iri 2000, pe tepoi koukou pe te sasaul sio nga liling kela te pach-pach nga ech.

<sup>14</sup> Ol pe hana nenge tenau elele kie nemur te ua kela te hesongia pingana nga tuele tana pe nga kileng kinkino ngana mur. Ke hehei pe hana tela kela tenau nga ure nenge lohohot. <sup>15</sup> Iok, te song lange Iesus pe te esia non nenge uneinei ua hot nge i, pe iri te ruraia nge are ke nek mana pe heronia nena hengeron pe ramana mallaha mule lo. <sup>16</sup> Iri hel nenge te esia lo te nana lange hehei pe hana nga ure nenge lohohot nge non neu pe nge kie nemur. <sup>17</sup> Ol pe hehei pe hana te kulosia Iesus ke teke lohohot nga reria kileng. <sup>18</sup> Iesus lohaka nga sulang nem pe non nenge uneinei tu nge i ech ke teke, “Ita ul!” <sup>19</sup> Pe Iesus longele i ero. Ol pe Iesus hele lange i, “Ola mule nga lem kileng pe o heleia lange alom mur pe lem misili mur nga nenge Non Soke letena toto ia iong ke halaua iong.” <sup>20</sup> Ol pe ana non la ke i rara nga tuele kina nenge Tekapolis, pe heleia Iesus nge halaua tote i pe iri nenge te longe te ruraia.

*Iairus Tuna Pe Hei E Nge Rahite Iesus Nena Hengeron*  
(Mat 9:18-26; Luk 8:40-56)

<sup>21</sup> Iesus pe na hana mur tela mule nga ech hetaliliu ngana ilina hele pe hulua teat ke te hemurung hite i. <sup>22</sup> Pe none nge i soke nga Israel mur reria hetorongana ana pele, ene Iairos. Ana non at ke esia Iesus pe tualou palana pe ma sio nga Iesus matana. <sup>23</sup> Pe hetalaulau toto lange i ke teke, “Tuk hei ngana nenge kino kou teke metmete

lo. Auo! Atong, oi at ke ora haka nge i pe o hemasia ke maul mule!”

<sup>24</sup> Iok, Iesus la luluch nge i pe hulua te nanas pe te maimai hite i ke liliu tom.

<sup>25</sup> Pe hei e pule nge toho malasioia i ke ana hesinga iri analoch pe nai. <sup>26</sup> Hana nenge te hemasmas te tototi ke te halaua i pe ero. Hei nem esilia nena umtutuna lochloch ngana nge iri pe haleles nem het ero toto mana. <sup>27-28</sup> I longo tote Iesus pe isipona letena tuanin ke teke, “Ela, e raua nena hengeron pe lape e urana.” La ol, echrir teua i nga hulua leteria kela lohohot nga Iesus rumena ke raua na hengeron.

<sup>29</sup> Raua pe haleles nem het sapele pe namneia pe eteia nge haleles nem het toto nge i lo. <sup>30</sup> Pe Iesus amnei sapele nena kerkerenga nge lohohot nge i. Iok, ralele pe ontei, “Itei rahite lek hengeron?”

<sup>31</sup> Pe na hana mur te hele, “O nau nga hulua nenge te maimai hite iong nei. Pomere nge o ontei ke, ‘Itei raua iau?’ ” <sup>32</sup> Pe Iesus nau rara nga itei toto nge raua i. <sup>33</sup> Ana hei eteia nge utar lohohot nge i ke sana loiloi pe isipona lange Iesus ke tualousio nge i pe hele hot pengpeng lange i. <sup>34</sup> Iesus hele lange i, “Atong liuk, o urana nga letem manmanna ngam. Ola otu ke nek pe haleles nem tu nge iong ero ol.”

<sup>35</sup> Iesus heleleia ure nei pe hana hel nga Iairos nena pele te song at ke te hele nge i, “Tum kou mete lo, pomere nge o hemakuk rere mene Non Soke ne mam?”

<sup>36</sup> Iesus ma langa reria helenga ero pe hele lange Iairos, “O matau ero, letem manmanna mana.”

<sup>37</sup> Pomalam, Iesus poi ele hulua ke tela luluch nge i ero. Petrus pe Ieims pe tina Ioanes iri toro mana te koko nge Iesus. <sup>38</sup> Tela ke te lohohot nga Iairos na pele pe Iesus esia hulua nge te tangtang pe te hele loulou rarara. <sup>39</sup> Iesus i teu pe hele lange iri, “Pomere nenge a chauchai rara

pe a tangtang mam? He nei mete ero i. Mamani mana pai!”

<sup>40</sup> Ol pe te songlele ia Iesus pe Iesus kulos hote iri pe mene he nem alona mur pe nena hana mol ke tei teu langa pele letena nenge he nem maia. <sup>41</sup> Iesus rahite he neu nga penna pe hele lange i, “*Talitha koum.*” helenga nei luna laka, “He sune nem e hele lange iong, o lohaka.”

<sup>42</sup> He nem lohaka sapele pe talun ke i rara. (Pe he nem ana hesinga iri analoch pe nai) Pomalam ure nei lohoh pe iri lochoch te rura toto. <sup>43</sup> Pe Iesus hele ele iri ke teke te hele hote lange mele hel ero. Pe hele, “A tunge ngaunga lange i ke ngau.”

## 6

### *Iesus Na Kileng Nganangana Mur Lemeria Ero Ia I* (Mat 13:53-58; Luk 4:16-30)

<sup>1</sup> Iesus lohaka nga kileng nem pe la mule nga isipona na kileng huna luluch nge nena hana mur. <sup>2</sup> Pe Iesus talun ke hetoro nga hetoronga ana pele nga Sapat ana etue. Pe iri halang nge te longe i pe te rura, pe te ontei hel, “Pomere ramana urana ngana kau tu nge i mau? Non nei mene letena matana urana ngana nemur langai mai? Pe itei tunge lange i ke umeia ure papalau ngana mur mai? <sup>3</sup> I pele ana lelenga iam! Pe i Maria tuna pe titina mur laka Iakop pe Iosep, Iutas pe Simon. Pe liliuna mur pai itaul ke ta tutu panei mai!” Ol pe lemeria ero ia i.

<sup>4</sup> Pe Iesus hele lange iri, “Hetalonga e te longo taua i nga kileng lochloch ngana. Pe nga nena kileng huna pengpeng, alona mur pe titina mur pe na kileng ngana ngana mur te longo taua i ero.”

<sup>5-6</sup> Iesus rura iange hana leteria manmanna ero. Ke pomalam poi hote merakulo mur nga lamau ero. Tal heke penna nge hana ellechle

mana nge singiria haleles ke hemasia iri.

Pe Iesus i rara pe hetoro nga kileng pe kileng. <sup>7</sup> Iua nena hana iri analoch pe nai pe tunge kerkerenga nge iri ke te helope hote uneinei mur pe kulos hote iri ke nachnai ke tela nga kileng mur. <sup>8</sup> Pe hele lange iri ke pomai, “A i pe a mene ute kela luluch nga lemo inga ero. A rahit mene lemo eko. Pe a takis kole ero pe a mene ngaunga ero pe umtutuna ero. <sup>9</sup> A heronia ae ulina pe lemo hengeron la ellechle nenge tu hite imo nem lo pe e ero ol. <sup>10</sup> Nenge teke ateu nga pele e, atu mana nga lamam kela het nga etue nenge a lohaka nga kileng nem. <sup>11</sup> Pe nenge teke ala nga kileng hel pe hehei pe hana lemeria ero ia imo pe te longo taua imo ero, a pasis sue ich nga apemo nga etue nenge a lohaka. Ke nem heneue iri nga NeHalang letena inin ngana.”

<sup>12</sup> Iok, tei hot la pe te haliu hot lange hehei pe hana ke te hulua iri nga reria poinga porekreke ngana mur. <sup>13</sup> Pe te helope hote uneinei mur halang, pe te taune ae oliua eina nge iri nenge singiria haleles pe te hemasia iri ke te urana mule.

<sup>14</sup> Naungaala ana non Herot longe nei iange Iesus pingana song ke hulua te eteia. Hana hel te teke, “Ioanes nenge henunun lohaka mule nga metenga. Pomalam nena kerkerenga tu nge i ke poi hote ure merakulo nemur.”

<sup>15</sup> Pe hel te hele, “I Elaisa” pe hel pule te teke i hetalonga e pule nenge pomange hetalonga hel nge nike.

<sup>16</sup> Ne Herot longe pe hele, “Ioanes nenge e hele ke te chatoa kanna laka, lohaka mule nga metenga nem.”

<sup>17</sup> Ne Herot isipona tunge helenga ke te laua Ioanes pe te kale hite pe tetal teua nga tuele au ngana. Ne Herot poi ke pomam iange lei heke tina Pilip nehei Herotias, <sup>18</sup> pe Ioanes hele lala nge ne Herot ke teke “Iong



o leia tim nehei pe nem ma ke peng-peng nga rera hotonga ero.”

<sup>19</sup> Pe Herotias hul haka ae lapusa ngana nge Ioanes ke teke une i. Pe ero. <sup>20</sup> Iange ne Herot matau ele Ioanes nge i non nge na poinga peng-peng pe nanas mene NeHalang. Ke pomalam Herot poi ele mene i nga tuele au ngana. Herot longlonge Ioanes pe letena tuanin rara halang pe lemene nge longo manmana nge i.

<sup>21</sup> Iok laol, Herotias nena kue semel ngana nenge hune Ioanes lohohol. Ngana laka nga etue nenge te poia ngaunga matana nenge leteria metene etue nenge Herot tana hoe i ia. Pe Herot iua ana lang mur. Hana papalauna mur nenge te nauele kileng mur pe iri nenge te mukmuka nge palinga hel ana hana mur pe hana papalau ngana mur nge Kalelea. <sup>22</sup> Nga etue nenge Herotias tuna teu at ke hes, poia ne Herot pe ana lang mur ke te iech toto. Pe non soke nem hele lange he malolong nem ke teke, “O hele at nge iau nga utar nenge lememe tau tote pe e tunge lange iong.” <sup>23</sup> Pe hele lange i ke kerkereng toto ke teke, “O teke o longia utar? Lememe ngam mana! Nenge teke lememe ke o mene ure lochloch ngana nenge enau ele, lape e chachia nga tuna ngana ke lem hele pe lek hele.”

<sup>24</sup> Ol pe he nem i hot la, pe onteia tana, “Lape e longia utar mai?”

Pe tana tuacholia, “Ola pe o longia Ioanes nenge henunun palpalna.”

<sup>25</sup> Pe ueiuei mana he nem la mule nge naungala ana non neu pe hele, “Lemek ke o tunge Ioanes nge henunun palpalna ana kaliu at nge iau heueu mana nei.”

<sup>26</sup> Ol pe naungaala ana non neu letena poreke toto, pe meia i nge teke lape channanga mana nga ana lang mur mataria. <sup>27</sup> Ol pe kulos sapele nena non nge hunun hana kela mene Ioanes palpalna. Non nem la pe cha-toa Ioanes kanna nga tuele au ngana.

<sup>28</sup> Pe mene palpalna nga kaliu ke at mule pe tunge lange he nem pe he nem tunge lange tana. <sup>29</sup> Ioanes na hana mur te longe nei pe teat ke te mene koluna kela tealo hite nga rika letena.

### *Jesus Hengaua Hana Iri 5000*

*(Mat 14:13-21; Luk 9:10-17; Ioa 6:1-14)*

<sup>30</sup> Iesus nena hana mur teat mule nga reria inga mur pe te nana luluch nge i. Pe te nene ure nenge te poia nenge te heleia lange hehei pe hana.

<sup>31</sup> Hehei pe hana halang te atat pe te lala ke te poia Iesus pe nena hana mur ke te ngau ero. Ol pe Iesus hele lange na hana mur ke teke, “Ita ol, tala nga kileng unne ke ita toro ke a tah eingamo mukam.” <sup>32</sup> Ol pe te mene sulang pe teote langa kileng e nge mele tuia ero toto.

<sup>33</sup> Pe hulua te neue iri nge tela pe te eteia lo. Pomalam te hile kileng lochloch pe te song nga ich ke iri muka langa kileng nenge lape Iesus pe nena hana mur tesio ia. <sup>34</sup> Iesus iuch hot nga sulang pe esia hulua pe letena poreke toto ia iri iange tepoi ke manga sipsip nenge aria naualanga ero. Pe talun ke hetore iri nga ure nge halang toto.

<sup>35</sup> Chaia matana puluch sisio lo pe nena hana mur teat nge i pe te hele, “Kileng nei, ich sana lomona mana pe ngaunga ero pe chaia matana i sisio mai loi. <sup>36</sup> O kulosia iri ke tela nga kileng mur nenge tetu rochroi ke teol aria ngaunga ke te ngau.”

<sup>37</sup> Pe Iesus hele, “Imo sipomo a tunge aria ngaunga.”

Pe te hele, “Mo hengaua iri ke mere mai? O teke mo olia aria ngaunga? Nem lape umtutuna halang toto pa-iam!”

<sup>38</sup> Pe Iesus onteia iri, “Beret hia nge ma mau? Ala ke anau toto.”

Te tango rara ke het pe te hele, “Beret iri lime iau pe ruo nai pule.”

<sup>39</sup> Ol pe Iesus hele lange na hana mur ke te poia hulua ke teare sio nga

heilil. <sup>40</sup> Pe teare nga tuluk mur ke te nanas tau hel. Tuluk hel iri ana non kina lime (100) pe hel iri ana non kina nai pe analoch (50). <sup>41</sup> Ol pe Iesus mene beret lime neu pe ruo nai neu. Pe nau haka langa tapa pe hele urana lange NeHalang. Reke beret nemur pe tunge lange nena hekulkulonga mur ke te heronge nge hehei pe hana. Pe heronge ruo nai neu nge iri lochloch pule. <sup>42</sup> Iri lochloch te ngau pe saria una toto. <sup>43</sup> Pe Iesus na hana mur te heua beret pe ruo aluana mur ke muta toto nga chasang nge iri analoch pe nai. <sup>44</sup> Hana nenge te ngau, iri 5,000.

*Iesus I Nga Ech Ona*  
(Mat 14:22-33; Ioa 6:15-21)

<sup>45</sup> Pe ueiuei mana Iesus hele lange na hana mur ke te haka nga sulang ke te muka lange Petsaita. Pe i tu pol mukam ke kulos mulmule hulua ke tela mule nga reria kileng. <sup>46</sup> Kulosia iri ke tela pe i haka langa hengene ke hetalaulau. <sup>47</sup> Kileng miliko sio pe nena hana mur te manmana nga ech hetaliliu ngana tunangana lo pe i toro tu nga ich. <sup>48</sup> Pe esia nena hekulkulonga mur nge te pur kikiria toto ia sulang ote ngana iange tuttula eingana tua ele iri. Pe nga uachuach Iesus i nga ech ona ke lange iri. Teke ris tote iri <sup>49</sup> pe te esia i nge ii nga ech ona pe te teke ma moiuk iam pe alngaria haka. <sup>50</sup> Iange iri lochloch tenaue i pe te matau. Ueiuei mana pe hele lange iri ke teke, "A matau ero! A kerkereng, Iau pa i!" <sup>51</sup> Iuch haka lange iri nga sulang pe tuttula nem mete sio. Pe te rura pe leteria una ala, <sup>52</sup> iange leteria mallaha ero toto nga beret nenge Iesus heronge nem luna.

<sup>53</sup> Te ote tele nga ech hetaliliu ngana ke tela nga ich nge Kenesaret pe te hele heke reria sulang. <sup>54</sup> Te hile sue reria sulang pe ueiuei mana hehei pe hana tenau urume Iesus. <sup>55</sup> Ol pe te song langa kileng lochloch ngana nga kileng palaungana nem. Pe te takisia iri nenge singiria haleles

nga hete ke te lala nga kileng nemur nenge Iesus tutu ia. <sup>56</sup> Pe nga kileng lochloch ngana nenge Iesus laia, te mene reria haleles kina mur lala nga ingaala munna mur. Pe te hele kerkereng lange Iesus ke te teke iri nenge singiria haleles te raua nena hengeron ilina. Pe iri nenge te raua te urana mule.

## 7

*Hana Reria Poinga Mur Nge Nike*  
(Mat 15:1-9)

<sup>1</sup> Paresio mur pe iri hel nenge te hetottore hotonga, teat nge Ierusalem pe te hemurung hite Iesus ke liliu tom. <sup>2</sup> Pe te neue Iesus nena hana mur hel nge te ngau hit mene peria muna ngana nga NeHalang matana pe te lome tele peria ero. <sup>3</sup> Iange Paresio mur pe Israel mur hel pule te ngau tangai mana ero. Te nanasia iri siporia reria poinga nenge te mene nge reria tete mur, ke te lomo sio tele peria ke nek mukam ke het pe te ngau ol. <sup>4</sup> Pe pule, nenge teke te mule nga ingala, te ngau tangai ero. Tenun tala mukam. Pe te nanasia poinga halang pule, manga nenge te lome aria ure lochloch nenge te inin ia pe te tuntun ia. Te teke te nanasia poinga nemur ke te urana nga NeHalang matana.

<sup>5</sup> Pe Paresio mur pe iri nenge te hetottore hotonga, te onteia Iesus, "Lem hana mur te ngau luluch nga peria muna ngana. Pomere nge te nanasia poinga nemur nenge ratete mur te hesue ero?"

<sup>6</sup> Iesus tuacholia ke teke, "Hetatalonga Isaias hele ke manmanna nga nenge has pe hele urume imo hana nenge amo hengetau nachnai ke teke:

"Hana nei te heto heke iau nga haria ulina mana pe nga leteria tetu kelkel toto nge iau.

<sup>7</sup> Te heto heke iau pe leteria manmanna ero nga ure nenge te heleia.

Tepoi ke pomau iange te hile Non  
Soke nena hotonga  
pe te hetoro manmana nga hana  
mana reria poinga.’ ”

<sup>8</sup> Pe Iesus hele, “Imo a hile hote NeHalang nena hotonga pe a nanas mene hengetoro nenge hana mur. <sup>9</sup> Oe, a etei tote poinga nenge a sausaua NeHalang nena hotonga pe a nanas mene imo sipomo lemo poinga. <sup>10</sup> A poia ke pomam nga hotonga nenge Moses tunge lange imo. Iange Moses nena hotonga hele ke teke, ‘O longo taua temem pe tam.’ Pe pule hele ke teke, ‘Itei nge hele poreke tana pe temene, lape te hune i.’ Imo a sauahotonga nem pe a hetoro hel mana ia a pallaklaka ngamo. <sup>11</sup> Iange mele teke longo taua tana pe temene pe teke tunge tunginga lange iri, pe imo a hele ele i ke mene mule tunginga nem ke NeHalang nena ia. <sup>12</sup> Ke lemo poinga nenge a pallaklaka poia mele nem ke longo taua tana pe temene ero pe halaua iri nga tunginga ero ol. <sup>13</sup> Ke nga poinga nem a hetaua NeHalang nena hotonga nga lemo poinga. Pe a poia lange hana hel pule ke poinga nenge pomai lohot ke halang toto.”

<sup>14</sup> Ol pe Iesus iu mule hulua nemur pe hele lange iri, “Imo lochloch a longo at nge iau pe letemo malaha nga ure nenge e heleleia nei. <sup>15</sup> Ure nenge tu nge hot pe teu langa none letena, poia letena ke muna ulu nga NeHalang matana ero. Ure nenge tu nge teu pe lohot at, poia non nem ke muna ulu nga NeHalang matana. <sup>16</sup> Apal talngamo pe a longo ke neknek!”

<sup>17</sup> Iesus hile sue hulua pe teu langa pele pe nena hana mur te onteia i nga helenga opene nei. <sup>18</sup> Pe Iesus hele lange iri, “Amo hauaua toto kura kai? Ure nenge tu nge hot ke teu langa mele letena poia i ke poreke nga NeHalang matana ero. <sup>19</sup> Iange teu langa kakaona ero. Teu la mana nga makanna pe lohot mule nga singina.”

(Iesus nena helenga nei luna, teke ngaunga lochloch ngana te urana nge te ngaua.)

<sup>20</sup> Pe Iesus helolo une na helenga ke teke, “Utar nenge tu teu nga none letena pe lohot at, poia non nem ke poreke nga NeHalang matana. <sup>21</sup> Iange ure poreke ngana nemur te lohot at nga non nem letena. Ngana laka; letena tuanin ngana poreke ngana mur, pe salaulau pe keme pe hunun hana pe poi poreke lala nge leinga kina mur, <sup>22</sup> poinga nenge naulele ure mur pe na polo tantana pe channanga pe meia iri ero pe sana kekeke pe channanga ke heporeke mele ene pe longo olole, letena matana ero pe poi pulut mana pe ure poreke ngana hel pule. <sup>23</sup> Ure poreke ngana nemur tetu nga none letena nike pe te lohot at nge hot pe te poia i ke poreke nga NeHalang matana.”

<sup>24</sup> Iesus hile sue kileng neu pe langa kileng mur nenge rochroi nga kileng nenge Tir. Teu nga pele e pe lemene ero nge mele e eteia i nge tu lamau. Pe tu ke talkome ero. <sup>25</sup> Hei e nge uneinei tu nge tuna heingana. Ana hei longe Iesus pe lange i ke ueiuei mana. La pe ma sio nga Iesus apena ke teke Iesus heurana ia tuna. <sup>26</sup> Ana heingana nena nge Israel ero. Te hoe i nge Poenisia nge Siria. Hele lange Iesus ke helope hote uneinei nge tuna heingana nem. <sup>27</sup> Pe Iesus hele, “Poinga nenge ta mene aina kinkino ngana aria ngaunga pe ta sauahot lange kaone mur pengpeng ero. Ta hengau tele aina kinkino ngana nenge Israel muka.”

<sup>28</sup> Pe hei neu tuacholia ke teke, “Oe Non Soke, pe kaone mur te ngaua aina kinkino ngana aria ngaunga mumuna nga hatanga ene!”

<sup>29</sup> Ol pe Iesus hele lange i, “Uneinei uahot nge tum lo nga tuacholinga nem. Ola nga lem pele ol.”

<sup>30</sup> Ana hei la mule nga na pele pe naue tuna nge ma nga hete. Pe uneinei ua hot nge i lo.

<sup>31</sup> Iesus hile kileng Tir pe i haka lange Siton pe i sio langa ech hetaliliu ngana nge Kalelea nga tuele kina nenge ene Tekapolis. <sup>32</sup> Hana hel te takisia none lange Iesus. Non neu talngana hit pe ana hengetau meena. Pe te hele lange Iesus ke tal heke penna nge i. <sup>33</sup> Pe Iesus mene kelkel ia non neu nge hulua pe puo teua penna kukana langa ana non talngana. Ulut pe raua non neu ana hengetau. <sup>34</sup> Ol pe Iesus nau haka langa tapa, eingana tah pe hele, “*Epata!*” Luna, “O longo mule!”

<sup>35</sup> Ueiuei mana non nem longo ke nek pe ana hengetau polpolenga pe hele ke mallaha mule. <sup>36</sup> Pe Iesus hele lange hehei pe hana nemur ke teke te heleia lange mele e ero ol. Hele lala nge iri ke te hele ero pe iri te tamia ana helenga ke halang tototo ol. <sup>37</sup> Pe iri lochloch nenge te longe te rura toto nge Iesus pe te hele, “I umeia ure lochloch ke urana mana. Pe poia iri nenge te longo ero ke te longo mule pe iri nenge te hele ero ke te hele mule.”

## 8

### *Iesus Hengaua Hana Iri 4000* (Mat 15:32-39)

<sup>1</sup> Nga etue nem hulua teat ke te eukirau pe aria ute ero nge te ngaua ol. Pe Iesus iua na hana mur lange i pe hele, <sup>2</sup> “Letek poreke ia hulua nemur iange tetu luluch nge iau ke etue mol pe ute nge ta tunge nge iri ke te ngaua ero. <sup>3</sup> Nenge teke e hengaua iri ero pe e kulosia iri langa ria kileng, lape te makuk leilei pe te mete par nga kue iange iri hel nge teat nga kileng nga tau.”

<sup>4</sup> Pe nena hana mur te hele, “Kileng nei tu loulou mana pe mele hel tetu nga lamai ero, pe itei nakuna nge tango ke ngaunga halang pe hengaua hulua nei?”

<sup>5</sup> Pe Iesus onteia iri, “Amo beret hia mau?”

Pe te hele, “Rahtele nai.”

<sup>6</sup> Ol pe Iesus hele lange hulua ke teare sio nga ich. Pe mene beret rahtele nai neu pe hele urana nge Ne-Halang. Reke iri pe tunge lange nena hana mur ke te heronge lange hulua nemur. Ol pe nena hana mur te mene ke te herongo sapele. <sup>7</sup> Iri aria ruo tutuna hel pule. Pe Iesus hele urana lange temene nga ruo nemur pe hele lange nena hana mur ke te heronge pule. <sup>8-9</sup> Hulua lochloch te ngaua ke saria una. Hulua nemur iri 4,000. Pe na hana mur te mene ke chasang iri rahtele nai nge te muta nga ngaunga aluana mur. Te ngau ke het pe Iesus kulosia iri ke tela sapele. <sup>10</sup> Pe i lohaka sapele nga sulang luluch nge na hana mur pe tela nga kileng nenge Talmanuta.

### *Paresio Mur Te Onteia Iesus Nga Ure Palaungana E* (Mat 16:1-4)

<sup>11</sup> Paresio hel teat nge Iesus pe te talun ke te heleia i. Te teke te hekoukou ele i pe te onteia i ke ume hote ure palaungana e ke te eteia nge i Non Palau tuna. <sup>12</sup> Iesus letena poreke nge leteria manmanna nge i ero pe eingana chup pe hele, “Pomere nga imo hana heueu ana nei a ontei nga ure papalau ngana nenge a rura ia? E hele ke manmanna lange imo, lape e umeia ure palaungana nem ke a neuero.” <sup>13</sup> Iesus hile sue iri pe haka mule nga sulang pe te lotele langa ech hetaliliu ngana ilina ele.

### *Paresio Pe Herot Leteria Tuanin Ngana* (Mat 16:5-12)

<sup>14</sup> Iesus na hana mur leteria lilil nge te mene ngaunga ke halang. Pe aria beret elle mana ma nga sulang letena. <sup>15</sup> Pe Iesus hetoro hite iri, “Anau ala amo ke nek nga Paresio mur pe Herot leteria tuanin ngana, iange leteria tuanin ngana poma laka nga ure tutuna nenge tetal teua langa beret pe poia ke una haka(is).”

<sup>16</sup> Pe nena hana mur te hele tele hel nge iri siporia, “Ee! Iesus hele ke



pomai iange ara beret ero.” <sup>17</sup> Iesus eteia utar nenge te heleleia pe onteia iri, “Pomere nenge a heleleia nga beret nge ero? Letemo matana ero kura kai? <sup>18</sup> Imo matamo pe a kolkol kai? Pe talngamo pe a longo ero kai? <sup>19</sup> E reke beret lime ke hana iri 5,000 te ngaua. Letemo metene ero kai? Pe chasang hia nenge te muta ia ngaunga aluana mur?”

Pe te tuacholia ke te teke, “Iri analoch pe nai.”

<sup>20</sup> Pe Iesus ontei mule iri, “Pe nenge e reke beret iri rahtele nai lange hana iri 4,000, a mene chasang hia nenge te muta ia ngaunga aluana mur?”

Pe te tuacholia ke te teke, “Iri rahtele nai.”

<sup>21</sup> Pe Iesus onteia iri, “Letemo malaha ero toto kura kai?”

### *Iesus Hemasia None Nge Matana Hit*

<sup>22</sup> Iesus pe na hana mur tela ke te lohot nga kileng nenge Petsaita pe hana hel te mene none nenge matana hit at nge Iesus pe te hele ke kerkere ng lange i ke rahaka nge non neu.

<sup>23</sup> Iesus rahite non nem nga penna pe he i ia i ke tei hot nga kileng neu ke tetu ke iri toro mana. Ol pe Iesus ulut haka nga non neu matana pe tal heke penna nge i pe onteia i, “O amnei langa matam? O esia ute kau?”

<sup>24</sup> Non neu nau haka pe hele, “E neue hana pe te pomanga ae mur nge tei rara.”

<sup>25</sup> Iesus tal heke mule penna nga non neu matana pe nau ke urana sapele pe esia ure lochloch ngana ke mallaha ol. <sup>26</sup> Pe Iesus kulosia i langa na kileng pe hele lange i ke teke, “Ola pe oteu la mule nge Petsaita ero.”

<sup>27</sup> Pe Iesus pe na hana mur tei ke tela nga kileng nemur nge Kaesarea Pilipai. Teii nga kue pe Iesus onteia iri, “Hehei pe hana te teke iau itei?”

<sup>28</sup> Pe te tuacholia ke te teke, “Hel te teke iong Ioanes nenge Henunun. Hel te teke iong Elaisa pe hel te teke iong hetatalonga e.”

<sup>29</sup> Iesus onteia iri, “Pe imo? A teke iau itei?”

Pe Petrus hele, “Iong Mesias, nenge NeHalang hele tala ia ke teke kulosia at.”

<sup>30</sup> Iesus toto hita lange iri ke teke, “A hele hote iau lange mele e ero.”

### *Iesus Heleia Ana Melmelenga Pe Ana Metenga*

(*Mat 16:21-28; Luk 9:22-27*)

<sup>31</sup> Ol pe Iesus talun ke hetore nena hana mur, “Non Tuna lape takisia melmelenga palaungana. Pe hana papalauna pe tunginga ana hana mur aria papalauna mur pe hana nenge te hetottore hotonga mur, lape lemeria ero ia i pe te hune i ke mete. Pe nga etue mol ngana, lape maul haka mule.” <sup>32</sup> Iesus hemallaha hot tote nei lange iri. Ol pe Petrus mene hot kelkel ia i pe talun ke hele salia i. <sup>33</sup> Pe Iesus hulua i ke nau la mule nge na hana mur pe heleia Petrus ke teke, “Satan, oua nge iau. Letem tuanin ngana mur song ke nanasia NeHalang letena tuanin ngana ero iam. O nanas mene hana leteria tuanin ngana pa iam.”

<sup>34</sup> Ol pe Iesus iua na hana mur pe hulua nemur ke teat nge i pe hele lange iri ke teke, “Mele nenge teke at luluch nge iau, hile hote i pe takisia ana manga toto ke nanasia iau. <sup>35</sup> Iange mele nge teke eleis maulngana nga ich, lape alparia maulngana toto ngana. Pe mele nge teke alparia maulngana nge iau, nga helenga urana toto ngana lape mene mule maulngana toto.

<sup>36</sup> Pomere, urana nge none mene ure lochloch nga ich ke poia i ke alparia maulngana toto ngana? Nem lape ero! <sup>37</sup> Ute e ero toto nge tunge mele maulngana toto ngana.

<sup>38</sup> Hehei pe hana nga etue poreke ngana nei, leteria manmanna nge NeHalang ero. Nenge teke mele meia i at nge iau pe nga lek hengetoro mur, Non Tuna lape meia i lange mele nem pule nga etue nenge sio at

luluch nga Temene nena hemalminga luluch nge angkelo mur nenge te pengpeng.”

## 9

<sup>1</sup> Iesus mene une nena helenga ke la pe hele ke teke, “E hele lange imo ke manmanna. Hel nge imo nenge ames nga lamai heueu nei, lape a maulul kura ke a esia NeHalang nena naualanga pe nekinga nge at luluch nga kikina ngana toto.”

### *Iesus Singina Lohot Ke Altoto (Mat 17:1-13; Luk 9:28-36)*

<sup>2</sup> Etue rahtele elle nga hoena Iesus mene Petrus pe Ieims pe Ioanes ke iri ul te haka langa hengene nga lut toto ke tetu ke iri toro mana. Tenau la pe Iesus singina pe na hengeron lohot ke altoto. <sup>3</sup> Na hengeron hussu pe sinaha toto. Mele nga ich nei purpur ero nge poia ke hussu ke pomau. <sup>4</sup> Ol pe iri mol te naue Elaisa pe Moses nge te hele lululuch nge Iesus.

<sup>5</sup> Pe Petrus hele haka lange Iesus, “Non Soke, imem koi motu nei lo pe urana nge mo hemes ke pelpele iri mol ke lem e pe Moses na e pe Elaisa na e.” <sup>6</sup> Petrus pe pekngana mur te matau toto lo iau pe letena lilil nga utar nenge lape heleia.

<sup>7</sup> Ol pe ulu lohot pe ana mulil ma hite iri pe te longe helenga e nge sio at nga ulu ke teke, “Tuk nge mutek tau tote koi. A longo taua i!” <sup>8</sup> Tenau rara ke ueiuei mana pe te neue mele ero ol. Tenau mene Iesus nge tu luluch nge iri.

<sup>9</sup> Nga tesio mule ngaria nga hengene Iesus hele lange iri, “A hele lange mele ero nga utar nge a naue kela het nga Non Tuna maul haka mule ngana nga metenga.”

<sup>10</sup> Te longo taua na helenga pe iri siporia te ontei hel mule nge iri, “Maulinga nga metenga luna ma ke mere?”

<sup>11</sup> Ol pe te onteia Iesus, “Pomere nenge iri nenge te hetottoro nga hotonga te teke Elaisa at tala?”

<sup>12</sup> Pe Iesus tuacholia ke mai, “Manmanna ke Elaisa at tala ke he pengpengia ure lochloch. Pe pomere nenge NeHalang na helenga nenge tehas sue ke ulolo, hele ke teke Non Tuna lape takisia melmelenga palaungana pe lemeria ero ia i? <sup>13</sup> E hele lange imo, Elaisa at lo pe hehei pe hana tepoi poreke i nga lemeria ngaria ke pomanga NeHalang na helenga nenge tehas sue nge nike hele ngana.”

### *Iesus Helope Hote Uneinei Nge Kol Mele Sune*

*(Mat 17:14-21; Luk 9:37-43a)*

<sup>14</sup> Tesio at mule nga hengene pe te esia hulua nge temes liliu ele Iesus nena hana mur pe hana nenge te hetottoro nga hotonga, tetak ulu helelia helenga luluch nge iri. <sup>15</sup> Hulua te esia Iesus pe te rura pe te iech pe te song lange i. <sup>16</sup> Pe Iesus onteia na hana mur, “A tak ulu heleleia helenga nga utar?”

<sup>17</sup> Pe None nga hulua leteria tuacholia, “Non Soke, e mene tuk at nge iongiange uneinei tuteu nge i pe poia i ke hele ero. <sup>18</sup> Etue hel uneinei teu heke i pe tamal sue langa ich pe melona tua nga hanna, pe tele hite ngingina pe ma ke tak ton. Pe e onteia lem hana mur ke te helope hote pe te alker taua.”

<sup>19</sup> Iesus hele lange iri, “Etu luluch nge imo ke mala toto lo. Pomere nenge letemo manmanna ero mana mam? Etu luluch nge imo ke mere ol? Pe e halaua imo ke mere ol? A mene kol nem at nge iau!” <sup>20</sup> Te mene i lange Iesus.

Mala ero pe uneinei esia Iesus pe tamal sue kol nem langa ich. Poia i ke loiloi pe sechul rara pe melona tua nga hanna. Ol pe Iesus onteia temene, <sup>21</sup> “Ure nem tu nge i ke etue hia lo?”

Pe kol neu temene hele, “Nga i kino ngana nike. <sup>22</sup> Kokoeses uneinei tamal heke i nga oan ngingina ngana ke teke une i. Pe tamal teua i nga

ech. Pomere, nakum toto nge letem poreke ia imem pe o halaua imem kau?”

<sup>23</sup> Pe Iesus hele, “Oe, iong o hele ke o teke, ‘Nakum toto?’ Pe iong nakum pule la! Mele nenge letena manmanna, nakuna toto nge poia ure lochloch ngana.”

<sup>24</sup> Ueieui mana kol neu temene hele, “Iau letek manmanna ngana koi tu, pe kerkereng ero. O halaua iau ke letek manmanna ngana tu ke kerkereng!”

<sup>25</sup> Iesus esia hulua nge lape ueieui mana pe te emurung taua iri, tunge helenga kerkereng ngana langa uneinei ke teke, “Iong uneinei nenge o poia kol nem ke talngana hit pe hanna hit, o lohoh nge i pe otu teu mule nge i ero ol!”

<sup>26</sup> Uneinei neu alngana haka pe heloiloi ia i pe iuch hot sapele. Pe kol neu nakuna pomanga mete. Kela iri lochloch te heleia, “Kol nem mete iam!” <sup>27</sup> La ol pe Iesus rahite i nga penna pe isipona mes haka.

<sup>28</sup> Iesus pe na hana mur teteu langa pele ke iri toro mana, pe na hana mur te ontei hote i, “Pomere nenge mo alker taua uneinei nemai?”

<sup>29</sup> Iesus hele, “Hetalaunga mana helope hote ure nenge pomai. Ute e ero ol.”

*Iesus Hele Muleia Ana Metenga  
(Mat 17:22-23; Luk 9:43b-45)*

<sup>30</sup> Iesus pe na hana mur te lohaka nga kileng neu pe tei tele kileng nenge Kalelea. Iesus lemene ero nge mele eteia tu ngana, <sup>31</sup> iange hetotore nena hana mur pe hele lange iri, “Lape mele tung heke Non Tuna langa hana peria ke te hune i. Pe nga etue mol ngana lape maul haka mule nga metenga.”

<sup>32</sup> Iri te eteia hengetoro nei luna ero pe te matau pule nge te onteia i.

*Itei I Palaungana Toto  
(Mat 18:1-5; Luk 9:46-48)*

<sup>33</sup> Te lohoh nge Kapernam pe teteu nga pele letena pe Iesus onteia na hana mur, “A hele hele ia utar nga kue?”

<sup>34</sup> Pe te tuacholia i ero iange nga kue te hele hele ia itei nge iri nge i palaungana toto. <sup>35</sup> Iesus kila sio pe iua nena hana analoch pe nai nem pe hele lange iri, “Itei nenge lemene ke teke i muka, au sue i ke i hoena pe ume mule nge iri lochloch.”

<sup>36</sup> Iesus hele ke het pe mene mele sune pe hemesia i nga mataria. Lolo heke i pe hele lange iri, <sup>37</sup> “Itei nenge longo taua iau ke poi ke urana lange mele sune nge mai, poi ke urana at nge iau pule. Pe itei nenge poi ke urana at nge iau, poia at nge iau toro ero. Poia la pule nge i nenge kulos sue iau at.”

*Mele Nenge Hele Poreke Ita Ero, I  
Pekngara Ia  
(Luk 9:49, 50)*

<sup>38</sup> Ioanes hele lange Iesus, “Non soke, mo esia none nge helope hotot uneinei nga lem kerkerenga, pe mo hele lange i ke poia ero iange pekngara ia i ero.”

<sup>39</sup> Iesus hele lange iri, “Apoi ele i ero, iange mele nenge poi hotote merakulo nga lek kerkerenga lape hele poreke iau ke ueieui mana ero. <sup>40</sup> Iange mele nenge hele poreke ita ero, i pekngara ia. <sup>41</sup> E hele ke manmanna lange imo, mele nenge eteia ke lek hana mur imo pe tunge ech lange imo ke halaua imo, NeHalang lape tuacholia ke tunge ure urana ngana lange i.”

*Ta Heporeke Hana Leteria Manmanna Ngana Ero  
(Mat 18:6-9; Luk 17:1, 2)*

<sup>42</sup> “Nenge teke mele poia elle nge aina kinkino ngana nemur nenge leteria manmanna nge iau ke poia poinga poreke ngana, tuacholinga nga poinga nei poreke toto nga te heon hite um palaungana nga

mele nem kanna pe tesau hote i nga leme. <sup>43-44</sup> Pomalam, nenge teke perim poia iong ke o losio nga poinga poreke ngana, o chatoa ke lasus! Urana toto nge perim ero pe o mene maulinga nge Iesus. Pe poreke ngana, perim nai tetu pe osio langa oan nge henge lelem. <sup>45-46</sup> Pe nenge teke apem poia iong ke o losio nga poinga poreke ngana, o chatoa ke lasus! Urana toto nge apem ero pe o mene maulinga nge Iesus. Pe poreke ngana, apem nai tetu pe osio lange oan nge henge lelem. <sup>47</sup> Pe nenge teke matam poia iong ke o losio nga poinga poreke ngana, osul hote ke lasus! Urana toto nge matam ero pe o mene maulinga nge Iesus. Pe poreke ngana, matam nai tetu pe osio langa oan nge henge lelem. <sup>48</sup> Nga kileng nenge matmata lape tole iri, pe ana oan mete erochro.

<sup>49</sup> “Lape oan helem ia iri lochloch.

<sup>50</sup> “Mesmes urana. Pe nenge teke mesmes ngana het, lape mesmes mule ke mere ol? A poia atu ngamo ke manga mesmes pe a nauale imo ke nek.”

## 10

### *Iesus Hetero Nga Hilenga Hel Nga Leinga*

*(Mat 19:1-12; Luk 16:18)*

<sup>1</sup> Iok, Iesus lohaka nga kileng nem pe i ke lange Iutea, pe lotele nga ech nge Iortan. Hulua teole taua i pe hetero mule iri ke manga popoia ke kokoeses.

<sup>2</sup> Pe Paresio hel tela nge Iesus pe te ollaka hote i. Te onteia i, “O hele at nge imem. Hotonga hele ke teke urana nge none hile nehei pule?”

<sup>3</sup> Iesus tuacholia pe ontei, “Moses tungge hotonga tei lange imo?”

<sup>4</sup> Pe iri te tuacholia. “Moses tungge hotonga lange Israel mur pe hele ke

teke, ‘Mele nenge lemene ke hile nehei, isipona asia alalaha ke hele tote i nge hile nehei lo.’ ”

<sup>5</sup> Pe Iesus hele lange iri, “Moses tungge hotonga nem iange te hetore imo pe anali toto nge a longo tau. <sup>6</sup> Pe nga talun ngana nga ure lochloch te lohoh ngaria, ‘NeHalang ala hote none pe hei e ke pomanga NeHalang nena alalaha hele ngana.’ <sup>7</sup> ‘Ke pomalam non nem hile temene pe tana pe tu luluch nge nehei <sup>8</sup> pe te lohoh ke iri elle mana nga singiria.’ <sup>9</sup> Ke NeHalang puo tomia imo pe mele pele las mule imo ero ol.”

<sup>10</sup> Iok Iesus pe na hana mur teteu la mule nga pele letena pe na hana mur te onteia i nga ure nemur. <sup>11</sup> Pe hele lange iri ke teke, “None nenge hile nehei pe lei haka mule, poia poinga nge poreke lange nehei. <sup>12</sup> Pomalam pule, hei e nenge hile ene pe lei haka mule, poia poinga nge poreke lange ene.”

### *Iesus Pete Aina Kinkino Ngana*

*(Mat 19:13-15; Luk 18:15-17)*

<sup>13</sup> Hehei pe hana nga kileng nem, te laia tuturia mur nge Iesus ke rahaka nge iri pe Iesus na hana mur tepoi ele iri. <sup>14</sup> Iesus esia poinga nei pe letena inin pe hele lange na hana mur, “Apoi ele iri ero, teat nge iau. Iange NeHalang nena mutenga tu nge iri nenge pomai. <sup>15</sup> E hele ke manmanna lange imo, mele nenge mene NeHalang nena naualanga pe nekinga ke pomange mele sune ero, lape teu laia ero.” <sup>16</sup> Iok laol, Iesus lole aina kinkino ngana pe tal heke penna nge iri ke pete iri.

### *Non Nenge Na Ure Halang*

*(Mat 19:16-30; Luk 18:18-30)*

<sup>17</sup> Iesus lohaka ke i mulmule lo pe none song la pe tualou nga matana pe onteia i, “Non Soke urana ngana ellem, lape epoi ke mere ke e mene maulinga ke koko?”

**9:47:** Mat 5:29

**9:48:** Isa 66:24

**9:50:** Mat 5:13; Luk 14:34

**10:4:** Deu 24:1-4; Mat 5:31

**10:6:** Gen 1:27; 5:2

**10:7:** Gen 2:24; Epe 5:31-33

**10:11:** Mat 5:32

**10:15:** Mat 18:3

**10:19:**

Exo 20:12-17; Deu 5:16-20



<sup>18</sup> Iesus onteia i, “Pomere nenge o hetue iau ke urana? Mele e ero nge urana. NeHalang i toro mana. <sup>19</sup> O eteia hotonga nenge NeHalang tunge lange Moses. ‘O hune mele ero. O tak tote mele nehei ero. O keme ero. O hele poreke mele ero. O topala hite lem kemenge ero. O longo taua temem pe tam.’”

<sup>20</sup> Pe non neu hele, “Non Soke, e longo taua hotonga lochloch ngana nemur nga iau lolomele ngak nike.”

<sup>21</sup> Iesus mutena taua non neu pe nau pengpeng lange i pe hele, “Ute elle mana o poia ero kura. O mene lem urelu mur pe o laia nga ingala matana ke te olia pe o tunge ana umtutuna lange pakar mur. Pomalam otu ke nek nga lut nga tapa. Iok, o nanasia iau ol.” <sup>22</sup> Non neu longe pe nakuna poreke pe ua iange letena ia nena ure nge halang.

<sup>23</sup> Iesus nau lange na hana mur pe hele lange iri, “Anali toto nge iri nenge reria urelu halang pe teteu langa NeHalang naualanga pe nekinga!”

<sup>24</sup> Iesus na hana mur te ruraia helenga nei pe Iesus hele sapele, “Pekngak mur, anali toto nge ateu langa NeHalang nena naualanga pe nekinga. <sup>25</sup> Semel ngana nge kamel palaungana iteu nga pakeka polona sune. Pe anali toto ngana nge mele nenge na ure halang pe iteu langa NeHalang nena naualanga pe nekinga.”

<sup>26</sup> Iesus na hana mur leteria lilil toto nga helenga nei, pe te ontei hel mule nge iri, “Itei nenge lape NeHalang mene mule i mai ol?”

<sup>27</sup> Iesus nau la mule nge iri pe tuacholia, “Imo sipomo nakumo ero toto nge a halau mule imo pe nge NeHalang semel mana. NeHalang nakuna nge poia ure lochloch ngana.”

<sup>28</sup> Mala ero pe Petrus lohaka pe hele, “Onau, imem mo hile sue lemlem urelu lochloch ngana pe mo nanasia iong.”

<sup>29</sup> Iesus hele lange iri, “Oe, e hele lange imo ke manmanna, itei nenge

hile sue na kileng pe titina mur pe liliuna mur pe temene pe tana pe aina kinkino ngana pe ich ke nanasia iau pe haliu hote lek helenga urana ngana, <sup>30</sup> i lape mene mule ke halang toto nga etue nei. Lape mene mule ke ana non kina lime; nga pele mur pe titina mur pe liliuna mur pe tatana mur pe aina kinkino ngana pe ich. Pe pule lape hana hel tepoi poreke i pe nga hoena lape tu luluch nge iau ke kokoes. <sup>31</sup> Pe hulua nenge te heto heke iri ke iri nga muka, lape iri hoena. Pe hulua nenge te au sue iri ke iri hoena, lape iri muka.”

### *Iesus Hele Hemol Ngana Ia Ana Metenga*

*(Mat 20:17-19; Luk 18:31-34)*

<sup>32</sup> Iesus pe na hana mur tei nga kue ke te haka lange Ierusalem pe Iesus i muka ia iri. Pe na hana mur leteria tuanin rara ke halang pe iri nenge te nanasia iri te matau. Ol pe Iesus mene hot mule na hana analoch pe nai nem pe hele mule ia ure nemur nenge lape lohot nge i. <sup>33</sup> Iesus hele lange iri, “A longo at. Ta haka lala nge Ierusalem koi pe Non Tuna lape te tung heke i lange tunginga ana hana mur aria papalauna mur pe iri nenge te hetottoro hotonga. Iri lape te talue helenga ke te teke mete. Ke het pe lape te tunge i lange hana lomona ngana mur. <sup>34</sup> Pe lape te hele poreke i pe te ulut lolele i pe te palia i pe te hune i. Pe nga etue mol ngana nga hoena lape maul haka mule.”

### *Ieims Pe Ioanes Reria Oteinga*

*(Mat 20:20-28)*

<sup>35</sup> Sepeti tutuna mur Ieims pe Ioanes, tela nge Iesus pe te hele, “Non Soke, mutemem ke mo teke o poia ute nge imem.”

<sup>36</sup> Pe Iesus onteia iri, “Lememo taua utar nge iau?”

<sup>37</sup> Pe iri te tuacholia, “Nga etue nenge ola nga temem na kileng nenge ririua tuia pe oare nga lem kilanga palaungana nenge te hemal-mal heke iong ia, o hetakile emem e

nga ilim hele nenge hoihoi pe e nga ilim hele nenge tamalmal ke imem soke luluch nge iong.”

<sup>38</sup> Iesus hele lange iri, “A eteia utar nemam? A eteia ute ero iam! Iau lape e takisia melmelenga palaungana. Pe nakumo nge a takisia pule? Ure poreke ngana lape lohohot nge iau ke e mete. Pe nakumo nge a mete ke pomau pule?”

<sup>39</sup> Pe te tuacholia, “Oe, nakumem la.”

Iesus hele lange iri, “Manmanna ke lape a takisia melmelenga palaungana ke pomange iau. Pe ure poreke ngana lohohot nge imo ke a mete ke pomange iau. <sup>40</sup> Pe iau ak ume nenge e hesilei hote imo ke a are nga ilik hele pe hele ero. Mele hel nenge muria nem lape iri soke luluch nge iau pe NeHalang hesilei hote iri ke het lo.”

<sup>41</sup> Iesus nena hana iri analoch nem te longe leims pe Ioanes reria helenga pe leteria inin taua iri. <sup>42</sup> Iesus eukirau mule iri lochloch pe hele, “Imo a eteia hana lomona ngana mur reria poinga lo. Aria soksoke ngana mur tetal hekeke iri ke te teke iri mukmuka nga ure lochloch. Pe te teke te mene kerkerenga palaungana pe tenau ele ure lochloch. <sup>43</sup> A nanas taua poinga nenge mai ero. Mele lemene ke teke lohohot ke i palaungana, talsue i pe ume mule nge imo lochloch. <sup>44</sup> Pe mele lemene ke i lohohot ke i muka, iok, talsue i pe ume ke pomanga lemo hengekuleilei ana non ia. <sup>45</sup> Iange Non Tuna pule at pe tal heke i ero. Sio at pe talsio mene i pe takisia melmelenga palaungana nenge hemas mule hulua halang.”

*Iesus Hemasia Patimias Nenge Matana Hit*

(Mat 20:29-34; Luk 18:35-43)

<sup>46</sup> Iesus pe na hana mur tela nge Ieriko. Te lohohot nge Ieriko pe tei mule pe hulua te nanasia iri. Pe ne Timias tuna Patimias matana hit pe arare nga kue ilina ke longlong umtutuna. <sup>47</sup> Ana non longe nge manga

Iesus nge Nasaret kou atat pe alngana haka, “Iesus, Teuit tuna! Letemia iau ke o halaua iau!”

<sup>48</sup> Pe iri halang tepoi hele pe te hele lange i ke reng. Pe ero. Non neu alngana ke soke toto ol, “Teuit tuna, letemia iau ke o halaua iau!”

<sup>49</sup> Ol pe Iesus mes sapele pe hele, “A iua i ke at.”

Te iu sapele non neu pe te hele, “Atong o lohohot pe o iech, iange i kou iuiua iong.”

<sup>50</sup> Non neu sau sue nena hengeron nenge lololo ana pe tamu haka pe lange Iesus.

<sup>51</sup> Iesus onteia i, “Lemem taua utar nge iau?”

Pe non neu tuacholia, “Non Soke, e teke matak charchara mule.”

<sup>52</sup> Pe Iesus hele, “Ola ol. Letem manmanna ngana poia iong ke o urana lo.”

Non neu matana charchara sapele pe nanasia Iesus nga kue.

## 11

*Iesus Iteu Nge Ierusalem Ke Manga Naungaala Ana Non*

(Mat 21:1-11; Luk 19:28-40; Ioa 12:12-19)

<sup>1</sup> Tei ke heroi lange Ierusalem pe tei haka nga hengene nenge Oliua. Pe te lohohot nga tuele tana nenge Petpage pe Petani. Iesus kulosia nena hana nai <sup>2</sup> pe hetoro hite iri, “Imo nai ai langa tuele tana nenge a naue la neu. Ai ke ala pe a esia tongki nge te kale hite pe mele songia ero kura. Aun hote pe a mene at. <sup>3</sup> Pe nenge teke mele onteia imo, ‘A potatar ia ure nemam?’ Pe a hele lange i ke a teke, ‘Non Soke mutena taua ke teke la, pe at muleia kura.’”

<sup>4</sup> Tei ke tela pe te hottaua tongki nge kalenga hit ke mes nga kue nga pele matana pe te un hote. <sup>5</sup> Hana hel nge temes luluch te ontomoia iri, “A un hote tongki nem ke a potaria?”

<sup>6</sup> Pe te tuacholia ke pomanga Iesus hele ngana lange iri pe te renge iri ke tela. <sup>7</sup> Te mene tongki lange Iesus

pe tesau heke reria hengeron langa ana ure ke Iesus are haka ia. <sup>8</sup> Hehei pe hana tesau parai ia reria hengeron nga kue tana. Pe hel tela nga ume ke te chatoa hakau ina mur pe te tatach hote nga kue. <sup>9</sup> Iri nenge tei nga muka nge Iesus pe iri nenga hoena, singiria kikele NeHalang pe te makul haka, “Ta heto heke NeHalang! Nena petanga tu nge i nenge kulos sue at nga Non Soke ene! <sup>10</sup> NeHalang pete etue nenge atat ke pomanga pete etue nenge temere Teuit esele Israel mur nge nike. Ta heto heke NeHalang nga lut toto!”

<sup>11</sup> Iesus iteu lange Ierusalem, pe iteu langa temene na pele. Pe nau rara nga ure lochloch. Nau rara ke het pe iri ul na hana analoch pe nai nem, tei sereng mana nga ulei ke tela nge Petani.

*Iesus Heleia Ae Nge Ngana Ngana Ero*  
(Mat 21:18-19)

<sup>12</sup> Pomange rou, te lohaka nge Petani ke tela mulmule nge Ierusalem pe Iesus mete ana. <sup>13</sup> Esia ae popi nge ina halang pe mes nga tau pe ila ke teke nau. Lape nganangana ma ero? La ke es pe ina mana pe nganangana ero iange ana etue nenge hei ero. <sup>14</sup> Iesus hele taua ae popi nem ke teke, “Nganangam ero ol!” Pe na hana mur te longe.

*Iesus Langa Temene Na Pele*  
(Mat 21:12-17; Luk 19:45-48; Ioa 2:13-22)

<sup>15</sup> Tela ke tesau hot nge Ierusalem pe Iesus i teu langa temene na pele. Pe talun ke lope hote iri nenge tei alala nga temene na pele. Pe hekale hulia hatanga nenge te hetata umtutuna ia pe arenga nenge iri nenge tei alala ia ngie. <sup>16</sup> Pe heo ele iri nenge te loloch urelu pe te tamo tele rara nga temene na pele letena. <sup>17</sup> Pe lohaka pe hetore hehei pe hana ke pomai, “NeHalang nena alalaha nenge tehas sue ke ulolo, hele ke teke,

“ ‘Lape te hetue lek pele ke hehei pe hana  
nga kileng pe kileng reria heta-  
laulaunga ana pele.’

Pe imo a poia ke nakuna pomanga kemenge kina mur reria pele nenge te talkomkome ia.”

<sup>18</sup> Tunginga ana hana mur aria papalauna mur pe hana nenge te hetotto hotonga te longe ke pomau pe te tango rara kue nenge lape te hune Iesus. Pe te mataua i iange hulua lochloch te rura ia non ngana na helenga.

<sup>19</sup> Nga ulei Iesus pe nena hana mur te lohaka mule nga tuele tana neu.

*Nananga Nenga Ae Popi*  
(Mat 21:20-22)

<sup>20</sup> Pomange rou nga uach te nana-sia kue nem pe te naue ae popi neu nge kalum ke sio langa ulanlana mur.

<sup>21</sup> Petrus letena metene utar nenge lohote pe onteia Iesus, “Non Soke, onau la! Ae popi nenge lem helenga makia kou mete!”

<sup>22-23</sup> Pe Iesus hele lange iri ke teke, “E hele ke manmana toto lange imo. Nenge teke letemo manmanna nge NeHalang, amo e hele langa hengene nei, ‘O lohaka pe ola ke osau teua iong nga ruach letena!’ Nenge teke letem nachnai ero pe letem kerkere ng mana nga utar nenge o heleia, NeHalang lape poia ke lohote iong.

<sup>24</sup> Ke pomalam e hele lange imo: Nga etue nenge a hetalaulau pe a ontei nga ute, letemo manmanna toto ke a mene ure nem, pe lape a mene ure e nenge a ontomoi iau ia. <sup>25</sup> Pe nenge teke omes ke o hetalaulau pe letem metene poinga poreke ngana nge mele poia lange iong, letem poreke ia mele nem mukam. Ke pomalam temere nga lut lape letena ia iong nga lem poinga poreke ngana mur pule. <sup>26</sup> Pe nenge teke letem poreke ia hehei pe hana nga reria poinga poreke ngana mur ero, temem nga

lut lape letena ia iong nga lem poinga poreke ngana mur ero pule.”

*Onteinga Nga Iesus Nena Kerkerenga*

*(Mat 21:23-27; Luk 20:1-8)*

<sup>27</sup> Iesus pe na hana mur teat mule nge Ierusalem pe Iesus i teu nga NeHalang na pele palaungana. Pe tunginga ana hana mur aria papalauna mur pe hotonga ana hetoronga mur pe almasinga ana hana mur teat nge i. <sup>28</sup> Pe te onteia i, “O kerkereng ngam mere nge o poia ure nemur? Itei he kerkereng ia iong ke o poia iri?”

<sup>29</sup> Iesus tuacholia iri, “Lape e onteia imo mukam. Pe nenge teke a tuacholia at nge iau, iok iau lape e tuacholia lemo onteinga. <sup>30</sup> A hele at nge iau, Ioanes nena kerkerenga nenge henunun nem at langai? At nge NeHalang ma at nge mele nga ich?”

<sup>31</sup> Te hele hel mule nge iri, “Lape ta hele ke mere mai? Nenge teke ta tuacholia ke ta teke, ‘At nge NeHalang.’ I lape ontei mule ita ke, ‘Pe pomere nenge letemo manmanna nge i ero?’ <sup>32</sup> Pe nenge teke ta teke, ‘At nge mele mana nga ich’ hulua nei lape te lope ita.” (Iri te matau iange hulua ramaria kerkereng toto nge Ioanes i hetatalonga.) <sup>33</sup> Ol pe te hele lange Iesus ke te teke, “Mo eteia ero i.”

Pe Iesus hele lange iri, “Iok, iau pule lape e tuacholia lemo onteinga ero nga kerkerenga nenge e popoia urelu nemur.”

## 12

*Helenga Opene Nga Iri Nenge Te Nau Ele Uain Ana Ume*

*(Mat 21:33-46; Luk 20:9-19)*

<sup>1</sup> Ol pe Iesus hele lange iri nga helenga opene, “Nga etuene e none tue uain ana late pe haua ana mapuo ke liliu tom. Pe selia polo nenge lape poi hote uain nganangana eina ia. Pe hemesia naungaala ana pele

ke ona langa lut ke tenau ele. Pe tung sue late nem lange hana hel ke tenau ele pe i kela ol. <sup>2</sup> Pe nga lungana ana etue, ume tokoninga nem kulosia nena none ke la mene nena uain nganangana hele. <sup>3</sup> Pe iri nenge tenau elele ume nem, te laua ume tokoninga nena non pe tepal poreke i pe te kulosia i ke patpata mana la ol. <sup>4</sup> Ol pe ume tokoninga kulosia nena none pule ke lange iri. Pe iri nenge tenau elele ume nem tepal chachia palpalna pe tepoi poreke tote i. <sup>5</sup> Pe kulosia nena none pule pe te hune i. Pe kulosia nena hana mur hel pule pe hana nemur te palia iri pe te hune hel ke te mete. <sup>6</sup> Pe elle mana nge tu ol, ana non tuna nge mutena tau tote. Nga hoena toto ol kulosia tuna pe hele, ‘Lape te renga tuk pamla.’ <sup>7</sup> Hana nemur teare pe te neue ana non tuna nge i ke atat pe te hele tele hel nge iri, ‘Non nem tuna lape mene lochloche ure nemur. Ta hune i pe ta mene nena ure nemur ke rera ia.’ <sup>8</sup> Ol pe telaua i pe te hune ke mete pe tesau hote i nga ume.”

<sup>9</sup> Pe Iesus ontei, “Ol pe ume tokoninga nem poia utar ol? I lape at pe hune hana nemur pe tunge ume nem lange hana hel pule ke tenau ele. <sup>10</sup> A sisia NeHalang nena alalaha ero kai?”

‘Iri nenge te hemesmes pele, te esia um e pe te teke ma um nem poreke.

Pe um nei urana toto nga um lochloch ngana

nge hekerkereng ia pele nem.

<sup>11</sup> Ure nei NeHalang poia.

Ta naue pe nakuna urana mana nga matara!’ ”

<sup>12</sup> Iuta mur aria papalauna nemur te teke te laua Iesus iange te eteia ke Iesus heleleia iri nga helenga opene nem. Pe ero iange te mataua hulua. Ol pe te hile sue i pe tela.

*Onteinga Nga Umtutuna Sau Ngana*

*(Mat 22:15-22; Luk 20:20-26)*



<sup>13</sup> Pe nga hoena te kulosia Paresio mur hel pe ne Herot nena hana mur hel ke tela nge Iesus ke te ollaka hote i nga onteinga mur. <sup>14</sup> Tela nge i pe te hele, “Non Soke, imem mo eteia nge o hele ke pengpeng pe manmanna toto lala nge hehei pe hana lochloch. Pe letem una ero nge hana nenge reria ure halang ma une sune mana. Pe o hetoro ngam ia NeHalang na poinga urana mana. Iok, o hele at nge imem. Pomere nga rera hotonga mur, lape ta saua umtutuna ke lange non soke nenge Rom, ma ero?”

<sup>15</sup> Pe Iesus eteia reria ollakanga pe hele lange iri, “Pomere nenge a teke a ollaka hote iau mam? A mene umtutuna elle at ke enau.”

<sup>16</sup> Te mene umtutuna elle lange i pe ontei ia iri, “Itei ramana pe ene mai?”

Pe te hele, “Non Soke nenge Rom ramana pe ene laka.”

<sup>17</sup> Ol pe Iesus hele, “Oe, ure nenge ne Kaesa nena, a tunge lange i pe ure nenge NeHalang nena, a tunge lange NeHalang.” Pe hana nemur te rura nga Iesus na helenga pe leteria tuanin raria.

### *Onteinga Nga Metenga Pe Maulinga*

*(Mat 22:23-33; Luk 20:27-40)*

<sup>18</sup> Satusi mur te teke hehei pe hana nenge te mete lape te maul haka mule ero ol. Pe hel nge iri tela ke tehot nge Iesus pe te hele ke te teke, <sup>19</sup> “Non Soke, Moses hasia hotonga e at nge ita ke pomai, ‘Nenge teke none mete hatalia nehei pe tuna ero. Non nem tina lape lei heke hei pakar nem. Pe nenge teke turia, lape te hetue ke non nenge mete nem tuna.’ <sup>20</sup> Nga etuene e, aina iri rahtele nai titiria mur hel. Nenge tengene ana lei pe turia ero pe mete. <sup>21</sup> Pe tina nei ngana lei heke hei neu pe turia ero pe mete. Pe tina mol ngana poi ke pomau pule. <sup>22</sup> La ol pe titina mur lochloch te leia hei nem pe tuturia mur ero pe te mete ke pomalam pule. Pe nga hoena toto ol, hei nem mete. <sup>23</sup> Iok, iri lochloch

te leia hei nem lo pe nga etue nenge te maul haka mule, itei lape nehei ia ol?”

<sup>24</sup> Pe Iesus tuacholia ke teke, “Ramamo mallaha nga NeHalang nena helenga pe na kerkerenga ero. Ke ngana laka nenge letemo matana ngana song ke pengpeng ero. <sup>25</sup> Iange nga etue nenge NeHalang hemaui heke hehei pe hana nga metenga, tepoi ke pomange angkelo mur nga lut ke telei ero. <sup>26</sup> NeHalang heleia maulinga haka mule nga metenga ana helenga lange Moses nga oan nge ngaulala pe Moses has sue ke ulolo. Pe imo mam a sisia ero ma? NeHalang hele lange Moses ke teke, ‘Iau NeHalang pe Iau Apraham ana soke, Isak ana soke, pe Iakop ana soke.’ <sup>27</sup> Ke pomalam, NeHalang i hana nenge te maululul aria soke ia. Hana nenge te mete aria soke ia ero. Pe imo letemo matana ngana song ke pengpeng ero toto!”

### *NeHalang Nena Hotonga Nenge Palaungana Toto*

*(Mat 22:34-40; Luk 10:25-28)*

<sup>28</sup> Non e nge hetottoro hotonga at pe longe reria helenga. Pe longe Iesus nge tuacholia Satusi mur reria onteinga ke urana pe onteia i, “Hotonga tei nge i palaungana toto nge iri lochloch?”

<sup>29</sup> Pe Iesus hele, “Hotonga nenge palaungana toto koi nei: ‘Israel mur, a longo. Non Soke NeHalang i toro mana ara Non Soke ia. <sup>30</sup> Mutemo tau tote amo Non Soke NeHalang nga kakahomo pe nga opemo pe nga letemo tuanin ngana pe nga kikimo ngamo.’ <sup>31</sup> Pe NeHalang nena hotonga nai ngana nenge palaungana toto ngana koi nei: ‘Mutem taua nei ngam ke pomanga mutemo taua iong sipom.’ Ke hotonga e nge palaungana toto nga hotonga nai nei ero.”

<sup>32</sup> Pe Non nenge hetottoro hotonga hele lange Iesus, “Oe, urana Non Soke. Manmanna toto pomanga

o hele ngam, nenge Non Soke NeHalang i toro mana pe mele nge i NeHalang ero ol. Ngana laka lom i toro mana lo. <sup>33</sup> Pe urana nge tapoi ke nek ke mutera tau tote Non Soke NeHalang nga kakahora pe nga letera matana ngana pe nga kikirana ngara. Pe pule mutem taua neingam ke pomanga mutem taua iong sipom. Urana nge o longo taua hotonga papalau ngana nai nei. Lange hotonga nai nei iri papalau ngana toto nga tunginga nemur nenge te chacharuche nga oan pe nga tunginga mur lochloch.”

<sup>34</sup> Iesus longe non neu nge tuacholia helenga ke urana mana pe hele lange i, “Iong otu ke rochroi toto langa NeHalang nena naualanga pe nekinga.”

Ol pe nga hoena te matau pe te onteia Iesus ero ol.

*Onteinga Nga Kristus*  
(Mat 22:41-46; Luk 20:41-44)

<sup>35</sup> Iesus hetottoro nga NeHalang nena pele palaungana pe ontei, “Pomere nenge hana nenge te hetottoro hotonga te teke Kristus i ne Teuit nette ia? <sup>36</sup> Opepengpeng hepengia ne Teuit ke hele ke teke, “Non Soke NeHalang hele lange ak Non Soke:  
“Oare la koi nga ilik hele nga tamalmal  
kela het nga etue nenge e hekou sue lem ngarang mur ke etal sue iri nga apem huna.” ’

<sup>37</sup> Ne Teuit isipona hetue I ke ana Non Soke. Pe pomere nenge Kristus lohote mule ke ne Teuit nette ia?”

<sup>38</sup> Iesus hetore iri ke lala pe hele, “A nauale imo ke nek nge hana nenge te hetottoro hotonga iange muteria tau tote poinga nenge te heronia hengeron sasase ngana pe tela nga ingala matana ke te teke hehei pe hana te apala ele iri. <sup>39</sup> Te teke te keke ele kilanga nemur nga muka toto nge hehei pe hana nga hetorongana ana pele pe nga ngaunga matana mur.

<sup>40</sup> Te pallaka ia pakar mur pe te meneria pele pe urelu mur. Pe te hetaulaulau ke sase toto ke te teke te poia iri ke te urana nga hulua mataria. Hana nenge pomai aria tuangachol nga hoena lape poreke toto.”

*Hei Pakar E Nena Tunginga*  
(Luk 21:1-4)

<sup>41</sup> Iesus are rochroi nga umtutuna ana kaliu nga Non Soke nena pele pe esesia hehei pe hana nge tetal teueu reria umtutuna. Pe hana nenge reria urelu halang tetal teu ke reria umtutuna halang toto. <sup>42</sup> Pe hei pakar e at pe tal teua umtutuna nai nge elio ero mana. <sup>43</sup> Pe Iesus iua nena hana mur ke teat nge i pe hele, “E hele lange imo ke manmanna, tunginga nenge hei pakar tal teua nei, halang toto nga hehei pe hana lochloch reria nenge tetal teu nga umtutuna ana kaliu. <sup>44</sup> Iri hel reria umtutuna halang ma pe te mene unne mana ke at tetal teua pe hei pakar nena umtutuna unne nenge ma elele i ngana koi hile hote nei.”

## 13

*Iesus Heleia Temene Nena Pele Palaungana Nge Lape Te Toto Sue*  
(Mat 24:1-2; Luk 21:5-6)

<sup>1</sup> Iesus lohaka hatalia temene nena pele palaungana ke teke lala lo pe nena none hele, “Non Soke, onau la. Um pe pele nemur nakuria urana toto!”

<sup>2</sup> Pe Iesus hele, “O esia pele papalau ngana nemur? Lape tetu ke mau ero ol. Te toto sue pe lape ute nge tunga muria ero ol.”

*Iesus Heleia Ure Poreke Ngana Mur Nge Lape Lohote*  
(Mat 24:3-14; Luk 21:7-19)

<sup>3</sup> Iesus arare nga hengene nge Oliua pe nau tele langa temene na pele palaungana, pe Petrus pe Ieims pe Ioanes pe Antreas, iri toro mana teura hot tau i. <sup>4</sup> Pe te onteia i ke te teke, “Ure nei lape lohote nge ngingie? Pe utar nge lape lohote tala ke mo esia

pe mo eteia ke etue nenge ure nei lohokia heroi lo?”

<sup>5</sup> Iesus hele lange iri, “Anau ala ke nek ma lape hana hel te channanga ia imo. <sup>6</sup> Hana halang lape teat pe te hele nga iau ek ke te teke, ‘Iau koloi! Iau non nenge e hemasmas!’ Pe lape te channanga ia hehei pe hana halang. <sup>7</sup> Lape a longe palinga hel nge lohok ke rochroi mana nge imo pe a longe palinga hel pingana nge at nga tau. Pe a matau ero. Ure nemur lape te lohok tala pe imo a teke ma etue hetala ngana iam lom, pe i ero la. <sup>8</sup> Kileng mur tepal hehel. Hana nga ich hel tepal hel luluch nge iri nenga ich hel. Mangila lape rur nga kileng lochoch. Hana halang lape aria ngaunga ero ke te metete. Ure nemur pomanga melmelenga tala ngana nenga hohonga.

<sup>9</sup> “Anau ala amo ke nek. Ma lape te laua imo pe te laia imo nga haliunga pe te palia imo nga reria heteronga ana pele mur. Imo lape ames nga haliunga nga hana papalau ngana mur mataria iange a nanasia iau, pe a hele hote helenga urana toto ngana lange iri. <sup>10</sup> Nga kileng lochloch ngana te haliu hote helenga urana toto ngana lange hehei pe hana, ke het pe etue hetala ngana at sapele. <sup>11</sup> Nga etue nenge te laua imo ke la te ontei hotote imo, samo loiloi nga utar nenge lape a heleia ero. Etue nem at pe letemo metene utar pe a heleia, iange helenga nem lemo helenga ia ero. Opepengpeng tunge lange imo. <sup>12</sup> Iri nenge titiria hel te tung mule titiria mur ke la te hune iri. Pe hana te tunge tuturia mur kela te hune iri. Pe tuturia mur te hunel luluch nge tetemeria mur pe te tunge iri ke la te hune iri. <sup>13</sup> Hulua lape lemeria ero ia imo iange a nanasia iau. Itei nenge rahite letena manmanna ngana kela het nga etue hetala ngana, lape e mene i.”

### *Aetapuna Nenge Poreke Toto Nga*

**13:9:** Mat 10:17-20

**13:11:** Luk 12:11-12

**13:12:** Mat 10:21

**13:13:** Mat 10:22; Ioa 15:21

**13:14:** Dan 9:27; 11:31; 12:11

**13:15:** Luk 17:31

**13:17:** Luk 23:29

**13:19:** Dan 12:1; Hem

7:14

**13:22:** Hem 13:13

### *NeHalang Naungana*

*(Mat 24:15-28; Luk 21:20-24)*

<sup>14</sup> Pe Iesus hele pule ke teke, “Imo lape a naue aetapuna nge mes nga NeHalang nena pele nenge heo ngana toto letena. Pe ure nem poreke toto nga NeHalang nau ngana. (Imo nenge asisis, letemo tuanin hote helenga nei luna ke nek!). Ol pe iri nenge Iutea te esia ure poreke ngana nem pe te ua kela te talkome nga hengene mur. <sup>15</sup> Non nenge tu nga pele ona, sio mule ero, nem pe teu ke la mene mule ute nga pele letena ero, ua mana ke la ol. <sup>16</sup> Pe non nenge tutu nga ume, la mule nga nena pele ke mene nena hengeron mur ero, ua mana pule. <sup>17</sup> Hehei nemur nenge saria pe nenge te lololo peo mur, atong mur lape te amneia ke meena toto nge iri! <sup>18</sup> A hetalaulau lange NeHalang ke etue nem lohok nga lukunna ana etue ero <sup>19</sup> iange melmelenga palau ngana nei poreke nenge poreke toto. Nga etue nenge NeHalang ala hote tapa pe ich ke at heueu nei, melmelenga palau ngana pele nge pomai lohok ero. Pe lohok ngana nei, lape lohok mule ero ol. <sup>20</sup> Pe NeHalang lape tom choro ia etue nemur. Pe toinge ero, hulua lochloch ngana lape te mete. NeHalang hesilei hote hehei pe hana nenge i nena, pomalam tom choro mene etue nemur.

<sup>21</sup> “Nga etue nem, mele hel lape te hele lange imo ke mai, ‘O nau at, non nenge hemasmas koi! O nau la e pule kou!’ Nenge teke a longe helenga nem mur, a longo taua iri ero. <sup>22</sup> Iange hana hel lape te pallaka ke te teke iri Kristus nenge hemasmas pe hel te teke iri hetatalonga. Pe lape te poia ure hel nge hehei pe hana nenge NeHalang hesilei hote iri ke te ruraia. Lape te poia ure nemur ke te teke te channanga ia iri. Pe ero, nakuria ero toto nge te channanga ia iri. <sup>23</sup> E hele tala ia ure lochloch lala nge imo nike

pe a nauala amo ke neknek!”

*Non Tuna At Ngana*  
(Mat 24:29-31; Luk 21:25-28)

<sup>24</sup> “Ure poreke ngana mur te lohot ke het pe nga hoena chaia matana lape tua ero pe teio lape tua ero pule. <sup>25</sup> Pe itoch mur lape tei ke te nanasia muria ero ol, te song parai pulut mana pe kerkerenga hel pule nga tapa sana lape telot sio. <sup>26</sup> Nga etue nem Non Tuna lape lohot nga ulu pe lohot luluch nga kikina ngana palaungana pe nena hemalmalinga. <sup>27</sup> Pe lape kulos sue nena angkelo mur ke tesio at nga ich, ke te eukiraua nena hana mur nenge hesilei hote iri nga kileng mur lochloch ngana nga ich.

*Hengetoro Nga Ae Keng*  
(Mat 24:32-35; Luk 21:29-33)

<sup>28</sup> “Anau langa ae keng, i lape het-ore imo. Nga etue nenge perperna mur te rora mule, nakuna urana. Nem, letera metene ke chaia ana etue heroi lo. <sup>29</sup> Pomalam pule ta esia urelu nenge te lohotot pe letera metene ke Non Tuna at mule ngana ana etue talunun lo. <sup>30</sup> E hele ke manmanna toto lange imo. Hulua lochloch nga etue nei lape te maulul kura pe ure nemur te lohot. <sup>31</sup> Tapa pe ich lape tehet pe lek helenga mur tehet ero.

*Mele Etei Nekia Etue Nem Hot Ngana Ero*  
(Mat 24:36-44)

<sup>32</sup> “Pe mele etei nekia etue nem lohot ngana ero. Angkelo mur te etei ero pe NeHalang Tuna etei ero. Temene i toro mana eteia. <sup>33</sup> Ke a nauala ke nek, iange a eteia ana etue lohot ngana ero. <sup>34</sup> I nakuna nenge pomanga none nge lohaka hatalia nena pele pe tung sue ume mur lange nena hana mur pe langa kileng nga kileng tau ngana. Iri ellechle tenau ele aria ume mur pe hele lange elle ke naualala nga pele matana. <sup>35</sup> Ke pomalam a nauala ke nek ol, iange

a eteia pele tokoninga at mule ngana ero. I lape at mule nga ulei ma miliko tuna ngana. Nga ngie chou tangtang ma nga uach ol. <sup>36</sup> A mamani ero, iange lape at mule pe hottaua imo nge a mamani. <sup>37</sup> Utar nenge e heleia lange imo, e heleia lange iri lochloch: Anau ala ke nek!”

## 14

*Te Mil Iesus Ana*  
(Mat 26:1-5; Luk 22:1-2; Ioa 11:45-53)

<sup>1</sup> Etue nem lohot nenge Israel mur te ngaua ngaunga matana palau ngana nenga Inगतoto pe Ngaunga Menini Ngana. Iok laol, etue nai tu kura pe ngaunga matana palaungana nem lape lohot. Pe tunginga ana hana mur aria papalauna mur pe hana nenge te hetottoro hotonga te tango rara kue e nenge talkome ke te laua Iesus pe te hune i. <sup>2</sup> Pe lemeria ero nge te poia nga ngaunga matana ana etue iange lape hulua te esia pe tepal paria ia iri.

*Hei E Henonou Hote Iesus Ana Metenga Opene*  
(Mat 26:6-13; Ioa 12:1-8)

<sup>3</sup> Iesus kila teu nga Simon Lepra nena pele nge Petani. Are ke ngaungau pe hei e i teu at pe mene um e nge nakuna pomanga ech kina pe mutaia ure inangana ehech ngana nenge singira ana ia. Ure neu uruna haka toto iange te ume hote nga ae e nge inangana ehech toto. Ana hei palhote matana pe pasiling heke nga Iesus palpalna. <sup>4</sup> Hana hel te esia pe leteria inin pe te hele tele hel nge iri, “Pomere pa nenge hei paneu hesil sio mene ure paneu mau? <sup>5</sup> Nenge teke te laia nga ingala matana, lape te olia nga umtutuna ana non kina analoch pe lime pe uruna te mene pe te laia nge pakarkar una mur!” Te heleia i nga matana pe te hemeia i.

<sup>6</sup> Pe Iesus hele, “A hemeia i ero! A hele poreke i ke? <sup>7</sup> Pakar mur tetu luluch nge imo ke kokoes pe nenge



teke lememo, a halaua iri pule. Iau etu luluch nge imo ke kokoes ero. <sup>8</sup> Hei nem poi une la. Atong poi heke tele nga singik iange nga hoena lape e mete pe te poia ure nem nga singik pule. <sup>9</sup> Letemo metene ke nek! NeHalang na helenga lape te heleia nga kileng lochloch ngana nga ich. Pe utar nenge hei nei poia at nge iau, lape te hele hote pule ke hehei pe hana leteria metene heke mule.”

*Iutas Hele Luluch Nge Hana Hel Ke Tunge Iesus Lange Iri*  
(Mat 26:14-16; Luk 22:3-6)

<sup>10</sup> Iok laol, Iesus nena hana iri analoch pe nai, pe elle ene Iutas Iskariot. Iutas tuahita Iesus ana nge tunginga ana hana mur aria papalauna mur ke teke tung heke Iesus lange iri. <sup>11</sup> Hana nemur te longe pe te iech pe te hele lange i ke lape teol hite i. Iutas tango rara sapele kue nenge lape mene Iesus pe tung heke lange iri.

*Iesus Ngau Luluch Nge Nena Hana Mur Nga Ngaunga Matana Nenga In-gatoto*

(Mat 26:17-25; Luk 22:7-14, 21-23; Ioa 13:21-30)

<sup>12</sup> Iok, Ngaunga Menini Ngana ana etue talun pe te hune Sipsip Tuna ke te ngaua, ke leteria metene etue nenge In-gatoto ana. Iesus nena hana mur te onteia i, “O teke ta ngaua ngaunga nem langai?”

<sup>13</sup> Iesus hele lange nena hana nai, “Ai teu langa tuele tana neu pe none nge takisia ech kina lape tapang ia imo. A nanasia i <sup>14</sup> kela nga pele nenge i teuia pe a hele lange pele tokoninga ke a teke, ‘Non Soke teke o henonoua imem nga pele letena unne nem, nenge lape i pe nena hana mur te ngaua ngaunga matana nenge letera metene etue nenga In-gatoto.’ <sup>15</sup> I lape henonoua imo nga pele letena unne nge palaungana pol nga lut, nenge ngaunga ana hatanga pe arenga mur te maia lo. Pe a tatalo ele ara ngaunga mur nga lamam.”

<sup>16</sup> Iesus nena hana mur tei teu langa tuele tana nem pe ure lochloch ngana lohote ke manga hele ngana ia lange iri ke ulolo. Ol pe te tatalo ele ure lochloch sapele.

<sup>17</sup> Nga miliko Iesus iri hul nena hana analoch pe nai nem, teat sapele.

<sup>18</sup> Te are ke te ngaungau pe Iesus hele, “E hele ke manmanna lange imo, amo elle nge imo nenge ita ul ta ngaungau nei, lape tung heke iau nga hana peria.”

<sup>19</sup> Na hana mur leteria meena sapele pe iri ellechle te onteia i, “Lape ngana kai iau mai?”

<sup>20</sup> Iesus tuacholia, “Ngana laka e nge imo analoch pe nai nem, nenge puo teua ana ngaunga nga ngaunga eina luluch nge iau. <sup>21</sup> Non Tuna lape mete ke pomanga NeHalang na helenga hele talaia lo. Pe tuacholinga poreke toto ngana, lape lohote nge i nenge tung heke Non Tuna langa hana poreke ngana mur peria, ke te hune! Nenge teke non nem tana hoe i ero nike, toinge urana nge i iam!”

*Ngaunga Nenge Non Soke*

(Mat 26:26-30; Luk 22:14-20; 1 Kor 11:23-25)

<sup>22</sup> Etue nenge te ngaungau, Iesus mene ngaunga nem pe hele urana lange Temene, reke pe heronge nge nena hana mur pe hele, “A mene. Iau mirak koi.” <sup>23</sup> Ke het mene eulinga, hele urana lange Temene pe tunge lange iri lochloch ke tein. <sup>24</sup> Iesus hele, “Iau eik koi. Iau lape e mete pe eik lele ke heneue imo lochloch nga Helenga Tomunga Hel nenge NeHalang hele talaia ke teke poia. <sup>25</sup> E hele ke manmanna lange imo, Iau lape einia uain e ero ol ke la ein mule uain heueu ngana nga etue nenge hulua lochloch tenau haka lange NeHalang pe te heto heke i ke aria soke ia.”

<sup>26</sup> Iok laol, te peua aria peunga elle ke te heto heke NeHalang ke het pe tei hot sapele ke tela nga hengene nge Oliua.

*Iesus Hele Lange Petrus, Ke Teke Lape Channanga*

(Mat 26:31-35; Luk 22:31-34; Ioa 13:36-38)

<sup>27</sup> Iesus hele lange iri, “Imo lochloch ngana lape a ua ak pe a hile sue iau, ke pomanga NeHalang na helenga heleia lo, ‘Non palau ngana lape hune naualanga nenga sipsip mur pe sipsip nemur lape te ua parai.’

<sup>28</sup> Pe nga hoena lape e maul haka mule nga ak metenga pe iau muka nge imo ke ela nge Kalelea.”

<sup>29</sup> Petrus tuacholia, “Nenge teke iri lochloch te teke te ua am, iau lape e ua am ero!”

<sup>30</sup> Iesus tuacholia, “E hele ke man-manna lange iong. Pareo tang ke henai ero kura nga miliko nei, pe o hele he mol ke o eteia iau ero.”

<sup>31</sup> Petrus tuacholia ke kerkereng toto, “Iau lape e hele ke pomam ero toto. Nenge teke tehun luluche iau nge iong, e ua am ero pule!”

Iesus nena hana mur lochloch te hele ke pomau pule.

*Iesus Hele Luluch Nge Temene Nge Ketsemani*

(Mat 26:36-46; Luk 22:39-46)

<sup>32</sup> Tela nga kileng nenge Ketsemani pe Iesus hele lange nena hana mur, “A are la koloi pe ela e hele luluch nge Temek.” <sup>33</sup> Iok, mene Petrus pe Ieims pe Ioanes ke te koko nge i. Pe Iesus letena meena toto sapele <sup>34</sup> pe hele lange iri, “Letek meena ngana nei, teke hemete tote iau. Atu la mai pe a nauala.”

<sup>35</sup> I la pol mana pe tamal sue i lange ich pe hele lange Temene ke teke, “Auoo! Temek! Teke nakum, o poia etue nenge melmelenga palaungana nei ana ke lohote nge iau ero.” <sup>36</sup> Iesus hele, “Temek, iong nakum nge o poia ure lochloch ngana. O poi ele melmelenga palaungana nei nge iau. Pe o poia nga lemek ngak ero, opoi mene nga iong sipom lemengam.”

<sup>37</sup> Iesus at mule pe nena hana mol neu te mamani lo. Ol pe hele lange Simon Petrus, “O mamani ke? Onau ala pol ero?” <sup>38</sup> Pe hele lange iri, “Anau ala pol pe a onteia Temere nga lut ke halaua imo ke a losio nga totoinga poreke ngana ero. Lape lememo toto nge a poia ure nge urana, pe singimo kerkereng ero iange imo hana mana nga ich.”

<sup>39</sup> Iesus la mule pe hele lange temene ke pomau mana, “Auoo! Temek! Iong nakum nge o poia ure lochloch ngana. O poi ele melmelenga palaungana nei nge iau. Pe o poia nga lemek ngak ero. O poi mene nga iong sipom lemengam.”

<sup>40</sup> Iesus at mule pe na hana mur te mamani pullo, iange mataria nong nongo toto. Haria meena pule nge te tuacholia na helenga iange te eteia utar nenge lape te heleia ero.

<sup>41</sup> At mule hemol ngana pe hele lange iri, “A mamamani kura ma? A memete ol! Iange etue nei at lo! Te tunge Non Tuna langa hana porekreke ngana mur peria lo. <sup>42</sup> A lohaka pe tala ol. Anau la non nenge tung heke iau kou!”

*Te Laua Iesus*

(Mat 26:47-56; Luk 22:47-53; Ioa 18:3-12)

<sup>43</sup> Iesus helele kura pe Iutas he hot. Iutas i Iesus nena none nga nena hana analoch pe nai nem. Hana papalauna pe tunginga ana hana mur aria papalauna mur pe hana nenge te hetottoro hotonga, te kulosia hulua ke te mene palinga hel ana mese pe pakpaka pe te nanasia Iutas. <sup>44</sup> Iutas hele hatal reria ke teke, “Anau pe e rahite elle nge iri penna, ana non la lom. Alau sapele.”

<sup>45</sup> Iok laol, Iutas ila sapele nge Iesus. Rahite penna pe hele, “Non Soke!” <sup>46</sup> Pe tela sapele pe te laua Iesus. <sup>47</sup> Elle nge iri mene kakop pe ule lange tunginga ana hana mur aria non palau nena none pe chato

hote talngana. <sup>48</sup> Iesus hele lange hana nemur, “A lolochia kakop pe pakpaka ke a laua iau ia? Iau non nge e palpal kai? <sup>49</sup> Kokoes etu luluch nge imo pe e hetottoro nga Temek na pele. Pe pomere a laua iau ero? Ure nei lohohot ke pomanga NeHalang na helenga nenge hele tala ia.”

<sup>50</sup> Ol pe Iesus nena hana mur lochloch te ua ana sapele.

<sup>51</sup> Kol mele e nge na hengeron menini mana nananasia Iesus. Pe hana nemur te teke te laua i pe <sup>52</sup> te rahat mene nena hengeron pe i ua ia lachlach ngana.

*Hana Papalau Ngana Nge Israel Te Poia Haliunga Palaungana Nge Iesus (Mat 26:57-68; Luk 22:54-55, 63-71; Ioa 18:13-14, 19-24)*

<sup>53</sup> Te mene heke Iesus langa tunginga ana hana mur aria non palau nena pele. Pe tunginga ana hana mur pe hana nenge te hetottoro hotonga pe hana papalaunga hel pule, iri lochloch te eukirau nga pele neu. <sup>54</sup> Pe Petrus nanas kome pe la ke i teu nga pele nem ana aeteme matana. Ol pe kila sio luluch nge palpal hussu mur ke alelel oan. <sup>55</sup> Pe tunginga ana hana mur aria papalauna mur, pe pekngaria mur hel pule nenge iri muka ia haliunga palaungana nem, te ontei rara mele hel ke te hele hote Iesus na poinga poreke ngana huuna mur, ke te hune i. Te ontei rara pe te hottaua mele e ero. <sup>56</sup> Hana halang te nana hot pe reria helenga ma ke pengpeng ero, iange te channanga mana.

<sup>57</sup> Hana hel temes haka pe te channanga ke te teke: <sup>58</sup> “Mo longe Iesus nge hele ke pomai, ‘Iau lape e toto sue NeHalang na pele palaungana nenge hana te umeia pe etue mol nga hoena lape e hemes heke mule e nge pomanga hana te ume ia nga peria ero.’” <sup>59</sup> Hana nemur reia helenga ma ke pengpeng ero pule.

<sup>60</sup> Tunginga ana hana mur aria palau, mes haka nga iri lochloch

ngana mataria pe ontei sapele Iesus, “O longe hana nemur nge te hele poreke iong ero ma, nenge o tuacholia iri ero mam?” <sup>61</sup> Iesus reng mana pe heleia helenga e ero.

Non soke nem ontei mule i, “Tong Kristus ma? NeHalang nenge i soke toto, tuna ma iong mam?”

<sup>62</sup> Iesus tuacholia, “Oe iau i loi. Pe imo lochloch ngana lape a esia Non Tuna nge are nga Non Soke NeHalang nenge kikina toto ilina hele nga pen tamal. Pe lape a naue iau nge e sio at luluch nga ulu nga tapa.”

<sup>63</sup> Tunginga ana hana mur aria soke neu letena inin pe ta chachia isipona nena hengeron pe hele, “Ta onteia mele hel ke te nana mule nga Iesus nena poinga mur ero ol, <sup>64</sup> iange a longe na helenga poreke toto ngana nem lo! Tal heke tote i ke teke i pupure NeHalang. Lape ta tuacholia lange i ke pomere nga nena helenga poreke ngana nei?”

Iri lochloch te talue helenga ke te teke te hune i.

<sup>65</sup> Hana hel nge iri te lohaka pe te ulut lolele i. Pe te kale ele matana pe tepal sapele i. Te songlele ia i pe te hele lange i ke te teke, “O hele hote mele nenge palia iong.” Palpal hussu mur te mene i pe te tapala ule i.

*Petrus Hele Ke Teke Eteia Iesus Ero (Mat 26:69-75; Luk 22:56-62; Ioa 18:15-18, 25-27)*

<sup>66</sup> Pe Petrus pau kou tutu nga non soke neu nena pele matana ana aeteme kura. Ol pe hei e nge umume nge non soke neu i at <sup>67</sup> pe esia Petrus nge alelel oan. Nach nei hite i pe hele, “Tong pule o koko luluch nge Iesus nenge Nasaret ae?”

<sup>68</sup> Pe Petrus hele, “Iau e eteia non nem ero i! E eteia utar nenge o heleleia nem ero iam.” Ana non ua hot kela nga kue matana pe pareo tang sapele.

<sup>69</sup> Hei nem es mule i nge hot pe hele la mule nge iri nenge temes rochroi ke teke, “Iesus nena hana mur, elle

iam nem!” <sup>70</sup> Pe Petrus hele, “Itei, iau? Iau elle nge iri ero i!”

Mala ero pe iri nenge temes rochroi te hele lange Petrus, “Manmanna toto ke iong pule o koko nge Iesus, iange iong lem nge Kalelea.”

<sup>71</sup> Petrus echach ala ke teke, “E hele ke manmanna lange imo pe nenge teke e pallaka, NeHalang tuachol mule at nge iau! E eteia non nenge a heleleia nem ero!”

<sup>72</sup> Petrus hele ke het pe pareo tang he nai ngana sapele. Pe Petrus letena metene mule Iesus nena helenga nenge hele tala ia lange i, “Pareo tang ke henai ero kura pe o hele he mol ke o teke o eteia iau ero.” Ana non maluluna sio pe tang sapele.

## 15

### *Pilatus Onteia Iesus*

(*Mat 27:1-2, 11-14; Luk 23:1-5; Ioa 18:28-38*)

<sup>1</sup> Nga uach uruna tunginga ana hana mur aria papalauna mur pe hana soksoke ngana nenge Israel pe hana nenge te hetottoro hotonga pe iri lochloch nga haliunga palaungana nem te eukirau pe te hele hel ia utar nenge lape te poia lange Iesus. Ol pe te kale Iesus ke het pe te mene i ke lange Pilatus. <sup>2</sup> Pe Pilatus onteia Iesus, “O teke Israel mur aria naungaala ana non ma iong mam?”

Iesus tuacholia, “Oe, pomanga o hele ngam.”

<sup>3</sup> Tunginga ana hana mur aria papalauna mur tetue helenga lange Iesus nga ure halang. <sup>4</sup> Pomalam ne Pilatus ontei mule i, “O longo langa helenga lochloch ngana nenge tetue lange iong neu. Pomere nge o tuacholia ero?” Pe Iesus tuacholia ero toto. <sup>5</sup> Pe ne Pilatus rura iange Iesus tuacholia helenga e ero.

### *Ne Pilatus Longala Ke Te Hune Iesus*

(*Mat 27:15-26; Luk 23:13-25; Ioa 18:39-19:16*)

<sup>6</sup> Nga ngaunga matana lochloch ngana nga Inगतoto ne Pilatus mene

hote mele elle nga tuele au ngana nga hana lemeria ngaria. <sup>7</sup> Nga etue nem none nge ene Parapas tu nga tuele au ngana luluch nge pekngana mur iange tepal hel luluch nge Rom mur pe te hune none. <sup>8</sup> Hulua te eukirau pe te lohaka ke te onteia ne Pilatus ke mene hote none nga tuele au ngana ke pomanga popoia nge nike. <sup>9</sup> Pe ne Pilatus onteia iri, “Lememo ke e mene hote itei? Lape e mene hote Israel mur aria naungaala ana non nei?” <sup>10</sup> Ne Pilatus ontei iange i eteia nge tunginga ana hana mur aria papalauna mur saria keke Iesus ke te mene Iesus at nge i.

<sup>11</sup> Pe tunginga ana hana mur aria papalauna nemur, te tunge helenga lange hulua mur ke te teke Parapas lohota nga tuele au ngana. <sup>12</sup> Pilatus ontei mule hulua nem, “Pe non nenge a hetue ke Israel mur aria naungaala ana non nei, lape e poia ke pomere?”

<sup>13</sup> Pe Iri lochloch te hele aka ke te teke, “A hune i nga manga toto!”

<sup>14</sup> Pe ne Pilatus onteia iri, “Ia i mai poia poinga poreke ngana nge mere nenge a teke ta hune i?”

Pe te hele haka ke palaungana toto, “A hune i nga manga toto!”

<sup>15</sup> Pilatus he maluche hulua nemur ke poia Parapas ke lohota nga tuele au ngana. Pe tunge Iesus lange palinga hel ana hana mur ke te pal ule i pe te hune i nga manga toto.

### *Palinga Ana Hana Mur Te Hele Poreke Iesus*

(*Mat 27:27-31; Ioa 19:2, 3*)

<sup>16</sup> Te mene teua Iesus langa non soke e nga gavaman na pele pe te iua pekngaria mur ke te eukirau.

<sup>17</sup> Te songlele ule Iesus pe te heronia hengeron popopo ngana ke pomanga i naungaala ana non. Pe te mania rur nge matantana pe te here nga Iesus palpalna. <sup>18</sup> Pe te songlele ia i pe te hele. “Iong Israel mur aria naungaala ana non nenge soke lape tu ke sase toto ol.” <sup>19</sup> Tepal chongia palpalna nga ae pe te ulut haka nge i pe



te tualou palaria nge i pe te songlele ke te heto heke i. <sup>20</sup> Te esalang ule i ke het pe tepoi hote hengeron popopo ngana nem nge i pe te heron teu mule nena hengeron la mule nge i. Pe te ape hote i lange hot ke te hune i nga manga toto.

*Palinga Ana Hana Mur Nenge Rom Te Heon Heke Iesus Nga Manga Toto (Mat 27:32-44; Luk 23:26-43; Ioa 19:17-27)*

<sup>21</sup> Tela nga kue pe te saolia none nge ene Simon nge mule nga ume ke la mulmule nge Ierusalem. Pe palinga ana hana mur te echia i ke takis halaua Iesus nga ana manga toto. (Simon nena nge Sirini pe tutuna mur laka Aleksantria pe Rupas) <sup>22</sup> Te mene Iesus kela nga kileng nenge te hetue ene ke Kolkota. Helenga nem luna, “Kittol ana Kileng.” <sup>23</sup> Pe te mene uain pe tepoi luluche nga ute ke hemete ana inin nga singina pe Iesus lemene ero ia. <sup>24</sup> Te heon heke Iesus nga manga toto ke het pe te mene nena hengeron mur pe te poia esalanginga e ke tenau nge itei nenge lape mene nena hengeron mur.

<sup>25</sup> Chaia matana nakuna nenge lala ke eurunga, pe te heon heke Iesus. <sup>26</sup> Pe tehas heke helenga toto ke henonoua hulua nga Iesus nena poinga una nenge te hune i ia. Tehas ia ke pomai; “IUTA MUR ARIA NAUNGA ALA ANA NON.” <sup>27</sup> Te heon heke hana nai pule luluch nge Iesus. Elle nga ilina hele nenga pen tamalmal pe elle nga ilina hele nenga pen hoihoi. <sup>28</sup> Ure nemur te lohot ke pete tote NeHalang nena helenga nenge hele ke teke, “Iesus mete ke pomanga i non poreke ngana e.”

<sup>29</sup> Hehei pe hana tei toto nga matana pe te rure palpalria pe te rochroch. Pe te hele poreke i, “Tom malaka! O teke iong pam nge o toto sue NeHalang na pele pe o hemes heke mule nga etue mol ngana? <sup>30</sup> Iok, heueu nei, o halau mule iong

sipom ke osio at nga manga toto nem.”

<sup>31</sup> Pe tunginga ana hana mur aria papalauna mur pe nenge te hetottore hotonga, te hele poreke Iesus pule pe te hele tele hel nge iri, “Pomere nenge halaua mele hel pe halau mule isipona ero? <sup>32</sup> Iok, tanau nga Mesaia pe Israel mur aria naungaala ana non nem. Nenge teke isipona sio nga manga toto nem heueu, lape letera manmanna nge i.” Pe hana nai nge te heon luluch nge Iesus, iri pule te hele poreke Iesus.

*Iesus Mete Ngana*

*(Mat 27:45-56; Luk 23:44-49; Ioa 19:28-30)*

<sup>33</sup> Chaia matana heurunga peng-peng pe kileng au lochloch ke la het nga sinanga matana mol ngana nga ulei. <sup>34</sup> Ol pe Iesus alngana hot ke soke toto nga isipona na helenga, “Eloi, Eloi, lama sabachtani?” Helenga nei luna pomai koi, “Temek Ou! NeHalang, pomere nge oua hatalia iau?”

<sup>35</sup> Hana hel temes pe te longe Iesus nge hele pe te hele, “A reng pe ta longo. Ngana kou iuiua Elaisa!” <sup>36</sup> E nge iri song kela mene lumlum pe kale hite nga kula mokona. Panun teua nga uain poreke ngana pe teke tul heke ke langa Iesus hanna. Pe hele, “Tames mukam pe ta nauala. Lape Elaisa at pe mene sue i nga manga toto ma ero?”

<sup>37</sup> Pe Iesus alngana ke palaungana toto pe mete sapele.

<sup>38</sup> Pe huunga palaungana nenge heon teu nga NeHalang na pele palaungana chach nga lut ke la het nge sio ke sachana nai. <sup>39</sup> Pe palinga hel ana hana mur aria soke mes rochroi nge Iesus pe longe Iesus nena tanginga pe esia mete ngana pe hele, “Manmanna toto, non nem i NeHalang tuna toto.”

<sup>40</sup> Hehei hel temes nga tau pol pe tenau lala nge i. Elle nge iri, ene Maria Maktala pe e ene Salome pe

Maria e pule nenge tutuna mur laka Ieims kol ene nenge kino pe Iosep. <sup>41</sup> Nga etue nenge Iesus tu nge Kalelea, hehei nemur te nanasia i pe te halaua i. Pe hehei halang pule nenge te koko nge Iesus ke tela nge Ierusalem. Iri temes pe tenau lala nge i.

*Tealo Hite Iesus*  
(*Mat 27:57-61; Luk 23:50-56; Ioa 19:38-42*)

<sup>42-43</sup> Nga ulei Iosep nenge Arimatea lohot. Iosep i non soke e nge Israel pe i non urana ngana nga hehei pe hana tenau ngaria. I pule kulelele etue nenge hehei pe hana tenau haka lange NeHalang ke aria soke ia. Iok, Sapat ana etue lohot ke pomange rou, pe heueu i etue nenge te tatalo ele ure mur lochloch nike. Pomalam atong Iosep matau ero toto pe langa ne Pilatus matana pe onteia i nga Iesus koluna. <sup>44</sup> Ne Pilatus longe nge Iesus mete lo pe rura. Pe iua palinga hel ana hana mur aria soke at pe onteia i, “Iesus mete ke mala lo?” <sup>45</sup> Pilatus longe non nem na helenga pe hele lange Iosep, “O mene Iesus koluna.” <sup>46</sup> Pomalam Iosep olia ruchinga hit hussu ngana pe mene sue Iesus koluna ke sio at pe ruch hite pe te teuia langa polo letena. Polo neu pomanga rika nenge hana te selia. Te hemara sue Iesus koluna ke het pe Iosep hesasa hulua um kela ma totele polo hanna. <sup>47</sup> Maria Maktala pe Maria nenge tuna Iosep tenau alala pe tenau urume kileng unne nenge tetal teua Iesus koluna ia.

## 16

*Iesus Maul Haka Mule Nga Metenga*

(*Mat 28:1-8; Luk 24:1-12; Ioa 20:1-10*)

<sup>1</sup> Etue nenge heo ngana het lo pe Maria Maktala pe Maria nenge tuna Ieims pe Salome te olia ure mur nenge inangana ehech. Te teke tela ke teun hite nga Iesus koluna. <sup>2</sup> Nga Sande nga uach uruna tela nga kileng

nenge tealo hit Iesus ia. <sup>3</sup> Tei pe te onteia helei nge iri ke te teke, “Itei nenge lape halaua ita ke ta hesasa hulua um palaungana nem nga polo hanna?” <sup>4</sup> Ol pe tenau haka pe um nem ma nga polo ilina ke ulolo. <sup>5</sup> Tela ke tei teu nga polo letena pe te esia non lomele ngana e nge nena hengeron hussu pe are nga iliria hele nga pen tamalmal. Pe te matau toto.

<sup>6</sup> Pe non nem hele lange iri, “A matau ero! E eteia nge ai at ke anau rere Iesus nenge Nasaret nenge te heon heke nga manga toto. I ero nga lamai! I kou lohaka mule lo. Anau la, munna nenge ma ia kou! <sup>7</sup> Ala ke a hele toto nge Petrus pe Iesus na hana mur ke pomai, ‘Ngana kou i muka lange Kalelea lo. Lape a naue i nga kileng nem ke pomanga hele ngana ia lange imo lo.’”

<sup>8</sup> Saria loilo pe te lohot nga polo hanna pe te song sapele. Pe te hele lange mele ero iange te matau toto.

*Maria Maktala Nau Tele Iesus*  
(*Mat 28:9-10; Ioa 20:11-18*)

<sup>9</sup> Iesus maul haka mule nga uach uruna nga Sande pe lohot tala nge Maria Maktala. Nge nika, Iesus poi hote uneinei iri rahtele nai nge hei nem. <sup>10</sup> Ana heila pe hele lange pekngana mur, iri nenge leteria milang ia Iesus pe te tangtang ia i. <sup>11</sup> Te longe Maria nge hele, “Iesus kou maul haka mule pe e neue i lo!” Te longe helenga nem pe leteria manmanna nge ana hei ero.

*Iesus Lohot Nge Nena Hana Mur Nai*

(*Luk 24:13-35*)

<sup>12</sup> Nga hoena Iesus nena hana nai, tei ke te lala nga kileng e. Pe Iesus lohot taua iri pe nakuna nenge i ero ol. <sup>13</sup> Teat mule pe tenene ure nenge lohot nge iri nga kue lange pekngaria mur. Pe pekngaria mur leteria manmanna nge iri nai ero.

*Iesus Lohot Nge Na Hana Mur Nge Iri Analoch Pe Elle*

(*Mat 28:16-20; Luk 24:36-49; Ioa 20:19-23; Ume 1:6-8*)

<sup>14</sup> Nga hoena Iesus nena hana mur nge iri analoch pe elle teare kirau ke te ngaungau pe Iesus lohot taua iri. Pe hele inin taua iri iange ramaria kerkereng pe leteria manmanna ero nge hehei pe hana nenge te teke te esia Iesus nge maul haka mule lo. <sup>15</sup> Iesus hele lange iri, “Ala nga kileng pe kileng nga ich pe a haliu hote helenga urana toto ngana nei lange hulua lochloch. <sup>16</sup> Non e nenge letena manmanna pe mene henuninga, lape maulul ke koko. Pe none nenge letena manmanna ero lape NeHalang tunge ana melmelenga. <sup>17</sup> NeHalang lape tunge kerkerenga lange iri nenge leteria manmanna ke tepoi ke pomai; Lape te helope hote uneinei mur nga Iesus ene pe te hele nga helenga hel nge altoto pule. <sup>18</sup> Pe te mene heke hilimo mur nga peria; pe te in heke ech poreke ngana nenge he metmete hana pe te mete ero. Tetal heke peria nge haleles kina mur pe haleles pe singiria urana mule.”

*Iesus Langa Tapa*

(*Luk 24:50-53; Ume 1:9-11*)

<sup>19</sup> Iesus hele lange iri ke het pe lohaka la sapele nga lut nga tapa pe are nga temene ilina hele nga pen tamalmal. <sup>20</sup> Ol pe Iesus nena hana mur tei hot pe te talun sapele ke te haliu hote NeHalang nena helenga nga kileng mur lochloch. Pe Iesus ume luluch pe hekerkereng ia iri ke te hele pe urelu te lohot manmana ke hehei pe hana te esia pe leteria manmanna nga helenga nem.

## Helenga Urana Toto Ngana Nenge Lukas

<sup>1-3</sup> Oe Teopilos mur; Iri nenge te esia Iesus pe te haliu hote na helenga iri te hetoro sue ure lochloch ngana nemur at nge ita. Pomalam hana halang muteria toto ke tehas nanasia. Pe pule iau sipok e etei teu la toto nga ure nemur nenge lohohot nga tunangara. Ke ngana koi nenge e teke urana toto nge iau sipok ehas urume ke nek toto lange imo. (Ure nemur ehas sue iri nenge Iesus poia nga talun ngana toto ke la het nga mete ngana pe maul haka mule ngana nga polo.) <sup>4</sup> Pomalam lape a eteia ure manmanna toto ngana nga ure lochloch nenge te hetoro imo ia ke ulolo.

### *Helenga Tal Nga Ioanes Tana Hoho Ngana Ia*

<sup>5</sup> Nga etue nenge Herot i naungaala ana non nga kileng nenge Iutea, none iri nai nehei te tutu. Pe non nem ene laka Sakarias. Pe i tu teu nga mata nenge te umume nga NeHalang nena pele. Ana mata ene laka Apisa. Pe nehei ene Elisapet. Pe Elisapet tuteu nga mata nenge Aron.

<sup>6</sup> Pe iri nai tetu toto nga NeHalang matana pe te nanas pengpeng ia NeHalang nena hotonga mur. <sup>7</sup> Pe iri tuturia mur ero iange Elisapet hoho erochro pe iri nai te tuauna lo.

<sup>8</sup> Iok, nga etuene e Sakarias alona mur aria etue lohohot. Aria etue nenge te umume nga NeHalang nena pele letena. <sup>9</sup> Pe iri te nanasia poinga nenge te sau oio paena pe ana maelepa lohohot ke henonou hote none nenge lape teu langa Non Soke tu ngana nenge heo ngana toto. Pe nga etue nem te henonou hote Sakarias ke teu la. <sup>10</sup> Ana non teu la pe rau hekheke ure nenge inangana ehech

nga ana hatanga. Pe hulua lochloch te hetalaulau mana nge hot.

<sup>11</sup> Ol pe NeHalang nena angkelo lohohot nge i pe mes pengpeng nga hatanga nem ilina ele nenga pen tamalmal. <sup>12</sup> Pe Sakarias esia pe rura pe matau toto. <sup>13</sup> Pe angkelo neu hele lange i, "Sakarias o matau ero! NeHalang longe o hetalaulau ngam lo. Pomalam lem hei Elisapet lape hoe tum tamane ngana e. Pe o hetue tum nem ke ene Ioanes. <sup>14</sup> Pe lape o iech toto pe hulua lochloch ngana nemur lape te iech toto pule nga etue nenge lem hei hoe tum tamane ngana nem. <sup>15</sup> Te iech nge i iange i lape lohohot ke NeHalang nena non ia. Pe i heo ngana toto nge inia uain pe ech kerkereng ngana mur. Iange nga etue nenge tana hoe i, Opepengpeng lape hemuta sapele i. <sup>16</sup> Pe i lape mene mule hulua halang nge Israel ke tela mule nge aria Soke NeHalang. <sup>17</sup> Pe pule lape i muka ia Non Soke pingana. Pe na kerkerenga palaungana toto ke mange hetatalonga Elaisa. Pe hemakuke tetemeria mur leteria ke tuturia mur te kila mule ke muria elle. Pe pule poia iri nenge te longo olole ke ramaria la mule nga poinga nenge pengpeng toto pe nga etue nenge Non Soke at te nanas mene i ol."

<sup>18</sup> Sakarias onteia angkelo neu. "Lape e eteia ke mere nge lape ure nei lohohot ke manmanna? Iau e tuauna lo i! Pe lek hei pule ke pomalam."

<sup>19</sup> Pe angkelo neu hele, "Iau Kapriel. Pe etu toto nga NeHalang matana pe i sipona kulosa iau ke teke e at ke e hele ia helenga urana toto ngana nei lange iong. <sup>20</sup> Pe iong letem manmanna nga helenga nei ero nge lape lohohot ke manmanna toto nga ana etue pengpeng. Pomalam lape NeHalang poi ele halim ke o hele ero. Lape o reng mana ke la het nga etue nenge lek helenga manmanna ngana nei lohohot. Iange iong letem manmanna nga helenga nei ero."



<sup>21</sup> Nga etue nenge angkelo neu lohot nge Sakaraia hulua te kulele i pe leteria tuanin ke halang iange tu ke mala toto nga NeHalang nena pele letena. <sup>22</sup> Iok laol, Sakarias i hot at pe teke hele pe te longe na helenga ero ol. Pe poi urume na helenga mur nga penna. Pe hulua te eteia ke ute lohot nge i nga NeHalang nena pele palaungana letena.

<sup>23</sup> La Sakarias ana etue nenge umume nga NeHalang na pele het pe la mule nga nena pele. <sup>24</sup> Pe nga hoena nehei Elisapet sana pe tuteu mana nga pele letena ke teio iri lime. <sup>25</sup> Pe Elisapet hele, “Nga etue nemur ol e iech toto nge NeHalang halaua iau ke sak! Pe e meia iau nga hulua mataria ero ol!”

### *Angkelo Kapriel Lohot Nge Iesus Tana*

<sup>26</sup> Elisapet mes ke ana teio iri rahtele elle (6) pe NeHalang kulosia angkelo Kapriel ke langa kileng e nge Kalelea nge ene Nasaret. <sup>27</sup> Pe angkelo neu laia helenga nge hei malolong ngana e nge te hele hite ke te teke lei nge none nge ene Iosep. Iosep i ne Teuit alona. Pe he neu ene Maria. <sup>28</sup> Hekulkulonga lake lohot nge i pe hele, “Atong otu ke nek pe Non Palaungana tu luluch nge iong pe pete tote iong.”

<sup>29</sup> Maria longe angkelo nem pe rura toto pe letena tuanin rara nga na helenga luna. <sup>30</sup> Pe angkelo neu hele lange i, “He Maria o matau ero. NeHalang iech toto nge iong pe teke pete tote iong. <sup>31</sup> Ke lape sam pe ohoe tum tamane ngana e pe o hetue i ke ene Iesus. <sup>32</sup> Pe i nge lape lohot ke NeHalang nena non kerkereng ngana ia. Pe pingana song pe te hetue i ke NeHalang Nge I Soke Nga Lut Toto Tuna. <sup>33</sup> NeHalang lape poia i ke i Israel mur aria naungaala ana non ke pomange nette Teuit. Pe i lape nauele iri nga etue lochloch sapele.”

<sup>34</sup> Pe Maria hele lange angkelo, “Iau etu luluch nge none ero kura i. Pe ure nei lape lohot ke pomere?”

<sup>35</sup> Pe angkelo neu tuacholia, “Opepengpeng lape sio at nge iong pe NeHalang Nge I Soke Nga Lut Toto nena hekerkerenga lape tu hite iong. Pomalam lape te hetue tum nem ke i NeHalang Tuna nge pengpeng toto. <sup>36</sup> Onau lange alom Elisapet. Te teke i hoho erochro pe nga etue nei tuauna lo pe mes mule ke nena teio iri rahtele elle. <sup>37</sup> Ure lochloch ngana nenge anali toto nge hana te poia NeHalang nakuna nge poia.”

<sup>38</sup> Ol pe Maria hele, “Iau i loi. Iau Non Soke na hekuleileinga. E nanas mene NeHalang lemene ngana nenge o heleia lo.” Pe angkelo neu hile i pe la sapele.

### *Maria Lake Nau Toto Elisapet*

<sup>39</sup> Mala ero mana pe Maria lohaka ke langa kileng e nga lut nge Iutea. <sup>40</sup> La pe i teu nga Sakarias na pele pe hele “Uach toto.” lange Elisapet. <sup>41</sup> Pe Elisapet longe Maria na helenga pe amneia tuna nge sechsech nga letena pe Opengpeng hemute i <sup>42</sup> pe hele haka sapele, “NeHalang pete tote iong nge hehei lochloch pe pete tote tum nenge lape o hoe nem. <sup>43</sup> Pomere toto nge ak Non Soke tana at ke nau tote iau? <sup>44</sup> Iange e longe iong nge o hele uach at nge iau pe tuk iech toto pe sechsech nga letek. <sup>45</sup> Non Soke pete iong lo iange letem manmanna ia na helenga nge lape lohot ke manmanna toto.”

### *Maria Ana Utunga*

<sup>46</sup> Maria hele,  
“Nga letek lochloch e heto heke Non Soke.  
<sup>47</sup> Iau e iech toto nge NeHalang nge mene mule iau!  
<sup>48</sup> Iange iau heie mana nga ich pe i letena metene iau.  
Hulua nenge tetu nga etue nei pe nga etue lochloch nga hoena

lape te hetue iau ke hei nge NeHalang heiech ia.

<sup>49</sup> Iange NeHalang na kerkerenga halang poia ure papalau ngana ke lohohot nge iau.

Ia I na poinga pengpeng toto.

<sup>50</sup> NeHalang letena poreke ia iri lochloch nenge te mataua I.

Iri nenge te tu nga etue nei pe nga hoena pule

<sup>51</sup> Hana nenge tetal heke iri nga leteria toto

NeHalang tul hote penna pe na kerkerenga sisparai sue iri.

<sup>52</sup> Naungaala nemur nenge tetal heke iri ke kokoes

NeHalang tal sio tote iri.

Pe iri nenge teau sio tote iri nga NeHalang matana,

NeHalang tal haka tote iri langa lut.

<sup>53</sup> NeHalang tungue ure urana ngana mur

lange iri nenge reria ute hel ero.

Pe iri nenge reria ure halang

NeHalang kulosia iri pe te patapata mana ke tela ol.

<sup>54-55</sup> NeHalang halaua Israel mur pe letena ia Apraham pe na tete mur

nga etue lochloch.

Iange letena metene helenga utona nem

nenge heleia lange rera tete mur nge nike.”

<sup>56</sup> Iok laol, Maria tu luluch nge Elisapet ke teio mol het pe la mule nga na kileng.

### *Elisapet Hoe Ioanes*

<sup>57</sup> Elisapet ana etue nenge hoho ia lohohot pe hoe tuna tamane ngana e.

<sup>58</sup> Elisapet na kileng ngana mur pe alona mur te longe nge Non Soke poi ke urana toto lange i pe iri lochloch te iech luluch nge i.

<sup>59</sup> Pe kol nem ana etue iri rahtele mol (8) pe te riria i pe te teke te hetue i ke ene Sakarias. <sup>60</sup> Pe tana hele ele iri, “Ero! Ene laka Ioanes.”

<sup>61</sup> Pe alona mur te hele, “Iong alom mur eria pomam ero!”

<sup>62</sup> Ke het pe tepoi urume reria onteinga nga peria lange Sakarias pe te onteia i, “Kol nei lape ene pomere?”

<sup>63</sup> Pe Sakarias ontei rara alalaha sachana ke has haka ia. Pe la has sue ke ene Ioanes. Ol pe iri lochloch te esia pe te rura. <sup>64</sup> Pe nga etue neu pengpeng Sakarias hanna olha ke hele mule pe heto heke NeHalang.

<sup>65</sup> Pe na kileng ngana mur te rura toto pe singiria matau nga urene nge lohohot. Pe te hesongia helenga ke ronge kileng mur nga lut nge Iutea. <sup>66</sup> Iri lochloch ngana nenge te longe leteria tuanin raraia pe te ontei, “Kol nem mam lape lohohot ke i utar?” Pe te eteia nge Non Soke na kerkerenga tu hit mene i.

### *Sakarias Hetatalo Ngana*

<sup>67</sup> Opepengpeng hemuta heke Ioanes temene Sakarias pe haliu hot sapele NeHalang na helenga:

<sup>68</sup> “Ta heto haka tote NeHalang Israel mur aria Non Soke!

Iange i sio at ke halaua nena hana mur

pe mene mule iri nga reria

poinga poreke ngana mur.

<sup>69</sup> Pe tung sue hemasinga e nge na kerkerenga halang

ke hemas mule ita lochloch.

Pe i nenge hemasmas nem at nga mata nenge Teuit

(NeHalang nena hekuleileinga).

<sup>70</sup> Hetatalonga mur nge nike te hele hote

na helenga kerkereng ngana mur.

<sup>71</sup> Ke te teke NeHalang mene mule ita nga rera ngarang mur peria

pe nge iri nenge muteria taua ita ero.

<sup>72</sup> Pe NeHalang hele ke teke

lape letena ia rera tete mur

pe letena metene helenga tomunga hel

nenge pengpeng toto.

<sup>73</sup> Nena helenga utona nenge heleia lange Apraham ma ke mai:

<sup>74</sup> NeHalang lape mene mule ita nga rera ngarang mur peria ke ta ume mana nge i pe ta mataua rera ngarang mur ero ol.

<sup>75</sup> Pomalam laka poinga poreke ngana e tu nge ita ero pe ta pengpeng toto nga NeHalang matana

nga etue lochloch nenge tatu nga ich.”

<sup>76</sup> Sakarias hele lange tuna, “Iau tuk iong pe lape te hetue iong NeHalang nenge I Soke nga Lut Toto nena hetatalonga. Iong lape iong muka nge Non Soke ke o hepengia nena kue. <sup>77</sup> Pe o hele lange hana lochloch ke NeHalang lape hemas mule iri ke pomai: lape saua reria poinga poreke ngana mur ke te lasus toto. <sup>78</sup> NeHalang letena poreke hali ia ita nga rera poinga poreke ngana mur pe tangtang ia tutuna mur ita ke poi ke manga chaia matana nenge haka <sup>79</sup> pe tualeme sio at nga tapa pe tua hatalia ita nenge ta tuteu nga metenga ana mulil. Pe henonoua ita nga kue nenge langa tunga nge nek.”

<sup>80</sup> Iok, Ioanes lumngana pupuo pe opene pupuo ke soksoke pe kerkereeng. Pe tu manmana nga ich sana lomona e ke la het nga etue nenge i sipona hetei hote i langa hulua mataria nge Israel.

## 2

### *Maria Hoe Iesus (Mat 1:18-25)*

<sup>1</sup> Nga etue nemur non soke nenge Rom ene Agastus tunge helenga kerkerengana nga sisalanga nge hehei pe hana ke lape hot nga kileng lochloch nenge Rom nauele iri. <sup>2</sup> Pe sisalanga nem talun nga etue nenge Kirinius nauele kileng Siria. <sup>3</sup> Pe hulua lochloch tela mule nga reria kileng una mur ke tehas sue eria mur. <sup>4</sup> Ol pe Iosep lohaka nge Nasaret nge Kalelea ke la mule nga na kileng una

nge Petlehem nge Iutea. Iange kileng nem non soke Teuit na kileng huna. Pe Teuit i Iosep nette pengpeng. Pomalam Iosep la mule nga kileng neu. <sup>5</sup> Iosep iri nai Maria tela iange tetal helenga ke telei hel. Tela pe Maria sana lo. <sup>6</sup> Pe nga etue nenge tetu nge Petlehem Maria hoho. <sup>7</sup> Hoe tuna tamane ngana e pe ruchite i nga ruchinga hit sachanchana mur. Ruchite pe hemara sue i nga pulumakau mur aria ngaunga ana manga. Iange pele nenge lang mur te muta lochloch lo.

### *Sipsip Ana Naungaala Mur Pe Hekulkulonga Mur*

<sup>8</sup> Sipsip ana naungaala mur hel te umume nga miliko neu pe tetu ke kangkanga pol nga kileng nenge Petlehem. <sup>9</sup> Ol pe Non Soke na angkelo e lohote nge iri pe kerkereenga palau ngana nenge NeHalang tualeme sio lange iri. Te esia pe te matau toto. <sup>10</sup> Pe angkelo nem hele, “A matau ero! Iau eat ia helenga urana toto ngana nge imo, pe lape poia hulua lochloch ke te iech toto pule. <sup>11</sup> Nga etue nei pengpeng nga Teuit na kileng huna te hoe non nenge hemasmas. Pe i Kristus, ara Non Soke nenge NeHalang hele tala ia ke teke kulosia at. <sup>12</sup> Poinga nenge hemallaha hote ke helenga nei manmanna lape lohote ke pomai koi; ala pe a naue i nge te ruchite i nga ruchinga hit sachanchana mur pe te hemara sue i nga pulumakau mur aria ngaunga ana manga.”

<sup>13</sup> Angkelo nem hele ke het pe ueiuei mana angkelo mur hel pule nge iri halang toto temes luluch nge i pe te heto heke NeHalang ene ke pomai: <sup>14</sup> “Ta heto heke NeHalang nge i Non Soke nga lut nga tapa. Pe tunga nge nek lape tu hite iri nenge NeHalang iech ia iri!”

<sup>15</sup> La ol pe angkelo nemur te hile iri pe te haka la mule nga lut nga tapa. Pe sipsip ana naungaala nemur te hele tele hel nge iri, “Ita ol! Tala nge

Petlehem ke tanau urume ure nenge Non Soke hele at nge ita lo!”

<sup>16</sup> Iok laol, te song ke ueiuei mana ke tela pe te lohot nge Maria pe Iosep pe turia nge masio mana nga pulumakau mur aria ngaunga ana manga. <sup>17</sup> Te esia ke ulo pe te hesong sapele helenga nenge angkelo heleia lange iri. <sup>18</sup> Pe iri lochloch nenge te longe helenga nem te rura ia pe leteria tuanin rara ia. <sup>19</sup> Pe Maria letena metene ke nek toto pe talhit tote nga letena nge teu. <sup>20</sup> La sipsip ana naungaala nemur tela mule pe te heto heke tote NeHalang, nga ure nenge te longe pe te esia lo. Iange ure nemur te lohot ke pengpeng toto ke pete tote utar nenge angkelo nem hele tala ia ke ulolo.

### *Te Riria Iesus Singina*

<sup>21</sup> Kol sune nei ana etue iri rahtele mol pe te riria singina. Pe te hetue ke ene Iesus. Ene nenge Iesus, angkelo nem tung tele nika nga tana sanaia i ero kura.

### *Simion Esia Iesus*

<sup>22</sup> Nga etue nem Maria iri nai Iosep te nanas tau pengpeng ia hotonga nenge Moses. Ke Maria helemlem mule i nga hohonga. Ke het pe te mene turia Iesus ke iri ul tela nge Ierusalem ke te tunge i langa NeHalang matana ke pomanga tehas ia nga nena hotonga. <sup>23</sup> Pe hotonga nem hele ke teke, “Aina tatamanna nenge tengene ana lape te tung tote iri lange NeHalang ke tutuna mur ia iri.” <sup>24</sup> Pe pule te nanasia NeHalang na hotonga ke te makia reria tunginga nenge ngie chaulum nai.

<sup>25</sup> Nga etue neu none nge ene Simion tu nge Ierusalem pule. Pe i non urana nge longo tau totote NeHalang pe kulele NeHalang nge mene mule hana nenge Israel. Pe Opepeng-peng tu luluch nge i. <sup>26</sup> Pe Opepeng-peng hele toto lange i lo ke teke, “Lape o esia Kristus nenge Non Soke kulosia at, ke het pe o mete ol.”

<sup>27</sup> Iok laol, Opepeng-peng poi heke letena pe ana non ii ke la iteu nga NeHalang na pele palaungana. Nga etue nenge Maria iri ul Iosep te mene teua Iesus langa NeHalang na pele palaungana nem <sup>28</sup> Simion lake lolo heke Iesus pe heto heke NeHalang pe hele;

<sup>29</sup> “Non Soke lem hekuleileinga ana non koi iau.

O longala ke e mete sio ke nek mana ol.

Iange lem helenga pete tote

<sup>30</sup> ke enau tote lem hemasinga ana non nga matak pengpeng.

<sup>31</sup> Pe iong sipom otal hote i

ke hulua lochloch te esia nga mataria pule

<sup>32</sup> ke pomanga lemenga palaungana nge tualeme hatalia kue nge hana lomona mur

ke iong o mene mule iri.

Pe lape hulua te esia i pe te heto heke lem hana mur nge Israel.”

<sup>33</sup> Iosep iri nai Maria te longe non nem na helenga pe te rura totoia.

<sup>34</sup> Simion pete iri pe hele lange Maria, “Tum sune nem lape helosio ia hulua halang nge Israel pe pule lape hemaui heke mule hulua halang pule nge Israel. NeHalang henonou hote tum sune nem ke hemallaha hote NeHalang lemene ngana nga ich pe hulua lape lemeria ero ia pe te hele poreke i. <sup>35</sup> Pe i lape hemallaha hote hana leteria tuanin ngana mur nenge te talkome nga leteria toto. Pe iong lape o amneia melmelenga palaungana nga letem kolkol ngana mur pe lem tanginga mur ke pomanga io nge mes teu nga singim.”

<sup>36-37</sup> Hei pakar e i hetatalonga pule. Ene laka Ana. Pe he neu temene ene laka Panuel. Pe i tu teu nga mata nenge Asa. Hei neu lei mukam ke iri nai ene tetu ke aria hesinga iri rahtele nai ol pe ene mete. La ke la hei pakar neu tu ke i toro kela tuauna toto ke ana hesinga iri ana non kina henel pe henel (84). Pe



kokoes mana la ke umume nga NeHalang na pele pe heto hekeke NeHalang. Heo nga ngaunga pe hetaulaulau manmana. <sup>38</sup> Pe nga etue neu saolia Iosep iri nai Maria nge te laia Iesus nga NeHalang na pele. Saolia iri pe heto heke NeHalang sapele pe heleia kol sune neu lange iri nenge te kulele mene etue nenge lape NeHalang mene mule Israel mur.

### *Tela Mule Nge Nasaret*

<sup>39</sup> Iosep pe Maria te nanas taua Non Soke nena hotonga ke het pe tela mule sapele nga reria kileng nge Nasaret nge Kalelea. <sup>40</sup> Pe turia Iesus pupuo ke soke pe letena matana ngana urana toto pe NeHalang pete tote i.

### *Iesus Langa Temene Nena Pele Palaungana*

<sup>41</sup> Nga hesinga lochloch Iosep iri nai Maria telala nge Ierusalem nga ngaunga matana nenga Inगतoto. <sup>42</sup> Iesus ana hesinga iri analoch pe nai pe iri ul ke tela ke pomanga reria poinga nike. <sup>43-44</sup> Iok, etue palaungana neu het pe Iosep iri nai Maria tela mulmule nga reria kileng pe iri nai te teke ma Iesus koi iri ul ke teii. Teii ke sase toto lo, ol pe te rara sapele Iesus pe la te ontei rere i nge aloria mur pe pekngaria mur. <sup>45</sup> Pe te hottaua i ero toto. Ol pe tela te tango rara mule i nge Ierusalem. <sup>46</sup> Pe nga etue mol ngana te hottaua i nge are luluch nge heteronga ana hana mur nga NeHalang na pele palaungana letena. Pe i kila ke longo lala nge hana nemur pe onteiteia iri pule. <sup>47</sup> Iri lochloch nenge te longe Kol sune nem na helenga mur te rura toto iange hele ke manga none nge letena matana toto. <sup>48</sup> Temene pe tana te esia i pe leteria lilil toto lange i. Pe tana hele lange i, "Tuk, o poia imem ke pomere? Iau pe temem letemem toto ia iong ke moat mo tango rere iong i!"

<sup>49</sup> Pe Iesus tuacholia iri, "A tango rere iau ke? Iau etu manmana nga temek nena pele pe imo a eteia ero kai?" <sup>50</sup> Pe temene pe tana iri nai te eteia na helenga luna ero.

<sup>51</sup> La Iesus lohaka luluch nge temene pe tana ke tela mule nge Nasaret. Pe nge Nasaret Iesus longo tau totote iri. Ure lochloch ngana nemur Maria talhit tote nga letena nge teu. <sup>52</sup> Iesus puo haka luluche singina pe letena matana ngana nge lohohot ke nek toto. Pe NeHalang pe hulua lochloch leteria urana mana nge i.

## 3

### *Ioanes Nenge Henunun Nena Haliunga*

(Mat 3:1-12; Mak 1:1-8; Ioa 1:19-28)

<sup>1-2</sup> Nga etuene e NeHalang na helenga lohohot nge Sakarias tuna Ioanes nga ich sana lomona e. Pe nga etue neu Pontius Pilatus nauele kileng nenge Iutea. Pe Herot nauele kileng nenge Kalelea pe tina Pili-pus nauele kileng nenge Iturea pe kileng Trakonitis pule. Pe Lisanas nauele kileng nenge Apilene. Pe Teperius i non soke toto nge Rom nge nauele iri lochloch. Pe Anas iri nai Kaiapas iri tungina ana hana mur aria papalauna mur. Nga etue neu pengpeng NeHalang nena helenga lohohot nge Ioanes.

<sup>3</sup> La ol, i ke langa ech nge Iortan pe haliu hote NeHalang na helenga pe hele, "A hile lemo poinga pulut ngana mur pe e henune imo. Poma-lam lape NeHalang sau lemo poinga poreke ngana mur ke te lasus toto."

<sup>4</sup> Haliunga nei nanas taua hetatalonga Isaias na helenga nenge has sue nga na alalaha ke teke, "None kou haliuliu nga ich sana lomona. Haliu ke teke, 'A hepengia Non Soke na kue ke kulele i."

A hepengia na kue ke pengpeng toto iange lape at pe i ia.

<sup>5</sup> Kileng talloko sio ngana mur lape te hemuta heke mule iri pe sasana pe hengene mur lape tesel sue iri.

Pe kue chachau ngana nemur lape te umeia iri ke pengpeng mule.

Pe kue poreke ngana mur lape telau hit mule iri pe te hepeng mule.

<sup>6</sup> Hulua lochloch ngana nga ich lape te esia NeHalang penna nge mene mule iri lochloch.’ ”

<sup>7</sup> Iok laol, hulua lochloch ngana tela nge Ioanes ke henune iri. Pe hele inin taua iri, “Ilimo alete nemur! A teke NeHalang eteia letemo tuanin ngana ero ma? Imo a sere at ke a menmene henuninga pe imo a teke ma ech nem poi ele NeHalang letena inin ngana nga lemo poinga poreke ngana mur. Ero toto la! A hul tote letemo! <sup>8</sup> Pe a poia lemo poinga urana ngana mur ke mo eteia ke ahul mule nga lemo poinga poreke ngana mur lo. Imo nenge a teke Apraham na tete mur imo a pengpeng ero kura la. NeHalang nakuna nge ume hote Apraham nena tete mur nga um mur pe imo a teke Apraham na tete mur imo. Ute pele ero! <sup>9</sup> Selemo koi te rahite nga ae mur huria lo ke te tele sue iri. Pe ae lochloch ngana nenge nganangaria lohote ke urana ero lape te tele sue iri pe tesau heke nga oan.”

<sup>10</sup> Pe hana nemur te onteia i, “Lape mopoi ke pomere ol?”

<sup>11</sup> Pe Ioanes hele, “Itei nenge nena hengeron nai tunge elle lange mele nenge na ero pe itei nenge ana ngaunga lo reke lange mele nenge ana ngaunga ero pe mete ana.”

<sup>12</sup> Hana hel nenge te lololoch umtutuna teat nga henuninga pule pe te onteia Ioanes, “Hetorongia imem lape mopoi ke pomere pule?”

<sup>13</sup> Pe Ioanes hele, “Te talue umtutuna hia nenge lape a mene, a mene pengpengia pe aele heke ero.”

<sup>14</sup> Pe palinga hel ana hana mur te onteia i pule, “Pe imem? Lape mopoi ke pomere ol?”

Pe Ioanes hele lange iri, “A palia mele hel pe a loloch mene reria umtutuna ero. Pe a pallaka ia mele hel pe a keme mana nge iri ero. A iech mana nga urumo nenge a mene.”

<sup>15</sup> Te longe Ioanes na helenga mur pe leteria haka pe nga ramaria te teke lape i Kristus nenge NeHalang hele tala ia nike ke lape kulosia at. <sup>16</sup> Pomalam ol pe Ioanes hele lange iri lochloch, “Iau lape e henun mene imo nga ech mana pe mele nge palaungana toto nge iau lape nananas. Pe iau e urana ero pule nge e poi hote apena ana ae ulina. Pe mele nem lape henune imo nga Opepengpeng pe nga oan. <sup>17</sup> Pe i lape mene mule nena hana mur ke pomai; lape mene kakop pe sochote mioka ulina mur pe nganngana mur takiraua iri ke muria elle. Ke het pe sau heke ulina mur nga oan sapel lala ngana nenge tu ke koko.” <sup>18</sup> Pe nga poinga hel pule Ioanes haliu ia NeHalang na helenga urana toto ngana lange hehei pe hana ke te hile reria poinga pulut ngana mur.

<sup>19</sup> Non soke Herot nauele kileng nenge Kalelea pe lei mule ene tana Herotias. Pe pule poia poinga hel nge poreke toto. Pe Ioanes na helenga nei tua tau pengpeng ia Herot. <sup>20</sup> Pomalam Herot poia poinga poreke toto ngana nenge tal teua Ioanes nga tuele au ngana.

### *Ioanes Henune Iesus (Mat 3:13-17; Mak 1:9-11)*

<sup>21</sup> Iok, Ioanes henune hehei pe hana lochloch ke het pe henune Iesus ol. Iesus hetalaulau pe ulu alchach hatalia tapa. <sup>22</sup> Pe Opepengpeng sio at pe nakuna pomanga ngie chaulum. Pe helenga e sio at nga tapa, “Iong mana tuk toto nge e mete pe e iech toto nge iong.”

*Iesus Nena Tete Mur  
(Mat 1:1-17)*

<sup>23</sup> Iesus ana hesinga teke lala ke iri ana non kina elle pe analoch (30) pe talun sapele ana ume. Pe hulua te teke Iesus temene Iosep pe Iosep temene Heli.

<sup>24</sup> Pe Heli temene Matat. Pe Matat temene Liuai. Pe Liuai temene Melki. Pe Melki temene Ianai. Pe Ianai temene Iosep.

<sup>25</sup> La Iosep temene Matatias pe Matatias temene Amos. Amos temene Nahum pe Nahum temene Esli. Esli temene Nakai pe Nakai temene Mat.

<sup>26</sup> Mat temene Matatias pe Matatias temene Semein. Semein temene Iosech pe Iosech temene Iota.

<sup>27</sup> Iota temene Ioanan pe Ioanan temene Resa. Resa temene Serupapel pe Serupapel temene Sealtil. Sealtil temene Neri pe Neri temene Melki.

<sup>28</sup> Melki temene Atti pe Atti temene Kosam. Kosam temene Elmatam pe Elmatam temene Er.

<sup>29</sup> Er temene Iosua pe Iosua temene Elieser. Elieser temene Iorim pe Iorim temene Mattat. Mattat temene Liuai pe Liuai temene Simeon.

<sup>30</sup> Simeon temene Iuta pe Iuta temene Iosep. Iosep temene Ionam pe Ionam temene Eliakim.

<sup>31</sup> Eliakim temene Melea pe Melea temene Menna. Menna temene Mattata pe Mattata temene Natan. Natan temene Teuit pe Teuit temene Iesi.

<sup>32</sup> Iesi temene Opet pe Opet temene Poas. Poas temene Salmon pe Salmon temene Nason.

<sup>33</sup> Nason temene Aminatap pe Aminatap temene Atmin. Atmin temene Ani pe Ani temene Hesron. Hesron temene Peres pe Peres temene Iuta.

<sup>34</sup> La Iuta temene Iakop pe Iakop temene Isak. Isak temene Apraham pe Apraham temene Tera. Tera temene Nahor pe Nahor temene Seruk.

<sup>35</sup> Seruk temene Reu pe Reu temene Pelek. Pelek temene Eper pe Eper temene Sela.

<sup>36</sup> Sela temene Kainan pe Kainan temene Arpaksat. Arpaksat temene Sem pe Sem temene Noa. Noa temene Lamek pe Lamek temene Metusela.

<sup>37</sup> Metusela temene Enok pe Enok temene Iaret. Iaret temene Mahalalel pe Mahalalel temene Kenan.

<sup>38</sup> Kenan temene Enos pe Enos temene Set. Set temene Antam pe Antam temene NeHalang.

## 4

*Non Poreke Ngana Totoia Iesus  
(Mat 4:1-11; Mak 1:12-13)*

<sup>1</sup> Ioanes henune Iesus nge Iortan ke het pe Opepengpeng hemute i pe mene i ke langa ich sana lomona.

<sup>2</sup> Pe nga lamau Iesus tuke ana etue iri ana non kina nai (40) pe non poreke ngana toto i ke helosio ia i. Nga etue lochloch ngana nemur Iesus ngaua ngaunga e ero pe nga hoena mete ana toto ol.

<sup>3</sup> Iok laol, Non Poreke ngana neu hele lange i, “Teke iong NeHalang tuna toto o tunge helenga kerkereng ngana langa um nei ke hul ke am ngaunga ia.”

<sup>4</sup> Pe Iesus tuacholia, “NeHalang nena hotonga hele ke teke, ‘Hana pe hehei te mene maulinga ke koko nga ngaunga mana ero.’”

<sup>5</sup> Pe Non Poreke ngana mene heke i langa kileng e nga hengene palaungana. Pe mala ero mana pe hononoua i langa kileng lochloch ngana nga ich. <sup>6</sup> Pe hele lange i, “Lape e tunge lem kerkerenga palaungana nenge o nauele kileng lochloch ngana nemur. Pe ure lochloch ngana nga kileng nemur iong lem ia ol. O esia ure lochloch ngana nemur te tung lochloche at nge iau lo. Pe lape e tung pulut mene lange mele pele mana nga iau lemek ngak. <sup>7</sup> Nenge teke o heto heke iau lape e tunge ure lochloch ngana nei ke lem ol.”

<sup>8</sup> Pe Iesus tuacholia, “NeHalang nena hotonga hele ke teke, ‘O heto

heke NeHalang am Soke pe oume mana nge i! ”

<sup>9</sup> Ol pe non poreke ngana neu mene Iesus lange Ierusalem pe hetakila heke i nga NeHalang na pele palaungana ona nga lut toto pe hele lange i, “Nenge teke iong NeHalang tuna toto, o tamu hot lamai ke o losio langa ich.

<sup>10</sup> Iange NeHalang nena hotonga hele ke teke,

“ NeHalang lape kulosia na angkelo mur ke tenau ele iong.

<sup>11</sup> Lape tera hit heke mene iong nga peria pe lape um riria apem ero toto.’ ”

<sup>12</sup> Pe Iesus tuacholia, “NeHalang na hotonga hele ke teke, ‘O totoi ia am Non Soke NeHalang ero. Pe oech ia i ke nanasia lemam ngam mana ero toto.’ ”

<sup>13</sup> Non Poreke ngana neu totoi ke helosio ia Iesus nga poinga lochloch. Ke het pe ua ana iange nga hoena lape at tau mule i.

*Iesus Talune Ana Ume Nge Kalelea (Mat 4:12-17; Mak 1:14-15)*

<sup>14</sup> La ol pe Iesus la mule nge Kalelea pe Opepengpeng na hekerkerenga tu luchluch nge i. Pe pingana song nga kileng lochloch ngana nga lamau.

<sup>15</sup> Iesus hetoro nga heteronga ana pele mur pe hulua lochloch ngana te heto heke i.

*Iesus Na Kileng Nganangana Mur Lemeria Ero Ia I (Mat 13:53-58; Mak 6:1-6)*

<sup>16</sup> La Iesus la mule nge Nasaret nga kileng nenge i soke ia. Pe nga Sapat ana etue Iesus la mule nga heteronga ana pele ke pomanga popoia lo. Mes haka ke sisia NeHalang nena hotonga mur <sup>17</sup> pe te tunge alalaha nenge hetatalonga Isaias lange i. Iesus ulele alalaha neu langa helenga nenge tehas ia ke pomai,

<sup>18</sup> “Non Soke opene koi tu luluch nge iau iange i sipona hesilei hote iau

ke e haliu hotote nena helenga urana toto ngana.

Helenga urana toto ngana nei e haliu hote lala nge

hehei pe hana nenge eria haka ero pe reria ure ero toto nga ich nei.

Pe kulosia iau ke e haliu hot ke pomai:

Iri nenge tetu teu nga kileng au ngana te lohotos.

Pe iri nenge mataria hit te nachnau.

<sup>19</sup> Pe e haliu ke e teke, etue nem at lo nenge lape Non Soke mene mule na hana mur lochloch.”

<sup>20</sup> Iesus lulit mule hetatalonga Isaias nena alalaha tunge lange mele nenge atia pe are sio. Pe hulua lochloch ngana nenga heteronga ana pele letena neu mataria tuit mene i.

<sup>21</sup> Ol pe hele lange iri, “Helenga chonna nenga NeHalang nena hotonga nei lohotos ke manmanna heueu nei, ngana laka e sisia ke a longe ke ulolo.”

<sup>22</sup> Pe iri lochloch leteria urana toto pe te rura iange ana non hele ngana ia helenga nemur ma ke urana toto. Pe te hele, “I mai Iosep tuna kai!?”

<sup>23</sup> Pe Iesus hele lange iri, “Imo lape a hele at nge iau ke pomai, ‘Iong o hemaui mule iong. Iange iong non nenge o nauelele haleles kina mur. Ure nemur nenge o poia nge Kapernam o poia nga lem kileng pengpeng.’

<sup>24</sup> “E hele ke manmanna toto lange imo. Hetatalonga e nena kileng nganangana mur pengpeng lemeria ero ia i. <sup>25</sup> Nge nike pakarkar una mur halang toto nge Israel nga etue nenge Elaisa. Pe nga etue nem pitte mol ero ke hesinga iri mol pe hakekena. Pe uringa palaungana toto lohotos nga ich lochloch. <sup>26</sup> A longo at nge iau. Manmanna toto ke NeHalang kulosia Elaisa ke lange pakarkar una mur nge Israel ero. Kulos mene i ke lange pakar e nge tutu nge Sarepat nga kileng nenge Saiton.



27 “Pe nge Israel nga etue nenge Elisa, hulua halang temene haleles poreke toto ngana nenge ngaungaua singiria. Pe elle nge iri Elisa hemas mule i nga haleles nem ero toto. Pe Elisa hemas mene ne Naman nge na nge Siria.”

28 Iok laol, hulua lochloch ngana nenga hetoronga ana pele te longe helenga nei pe leteria inin toto. 29 Te lohaka pe te onrung hote Iesus nga kileng neu pe temene i langa hengenene. Pe te teke tesau hot tote i ke losio ke mete. 30 Pe ero, ana non iteu mana nga hulua nemur tunangaria pe la sapele.

*Iesus Keres Taua Uneinei  
(Mak 1:21-28)*

31 Ol pe Iesus i sio lange Kapernam nga kileng nge Kalelea. Pe nga Sapat ana etue Iesus hetore hehei pe hana. 32 Hehei pe hana te rura totoia Iesus na helenga iange meena pe tua tote leteria.

33 Nga hetoronga ana pele neu letena none nge uneinei tuteu nge i alngana hot ke palaungana toto. 34 “Ah! Iesus nenge Nasaret o teke oat ke o potaria imem? O teke oat ke opoi poreke imem? E eteia iong ke ulolo. Iong pengpeng toto nge NeHalang kulosia iong ke oat.”

35 Pe Iesus keres taua uneinei neu pe hele, “O reng ol pe oua hot nge non nem!” Pe uneinei neu tamal sue non neu langa ich pe ua hot sapele nge i pe non neu singina urana mana.

36 Pe hehei pe hana te esia ure nei pe te rura toto pe te hele el nge iri, “Helenga utar nemai? Helenga nei kerkereng toto i nenge keresia uneinei mur pe te ua hot.” 37 Pe Iesus pingana song ke ronggo heke kileng lochloch ngana nga kileng neu.

*Iesus Hemasia Hulua Halang  
(Mat 8:14-17; Mak 1:29-34)*

38 La Iesus i hot nga hetoronga ana pele neu pe langa Simon na pele. Pe Simon uene, haleles poia ke singina milanglang toto pe te hele urume i

lange Iesus. 39 Ol pe Iesus la ke mes nga ana hei na hete ilina pe hele ke kerkereng toto langa haleles neu. Iesus hele pe haleles neu het sapele nge hei neu. Haleles het pe hei neu loaka pe tun sapele aria.

40 Sinanga matana puluch lo pe hulua halang te atia aria haleles mur nge Iesus. Pe Iesus tal heke penna nge iri pe iri lochloch aria haleles het. 41 Pe uneinei mur te ua hot nge hana halang pe te alngaria ke mai, “Iong NeHalang tuna!” Pe Iesus hele ke kerkereng toto lange uneinei nemur, pe poia iri ke te hele ero iange te eteia ke Iesus i Kristus nem.

42 Uach sio lo pe Iesus i ke langa kileng e nge mele tuaia ero. Pe hulua te tango rere i pe te hottaua i pe te hele ele i ke lohaka hatalia iri ero. 43 Pe ero. Iesus hele lange iri, “Iau lape ela nga kileng hel pule ke e haliu hote Temek nena helenga urana toto ngana lange hehei pe hana. E haliu nga etue nenge hehei pe hana tenau haka lange NeHalang aria Soke. Pe NeHalang nauele iri lochloch ngana ke nek. Ela nga ume palaungana nem iange NeHalang kulos sue iau ke e poia.” 44 Ol pe Iesus la ke haliu nga hetoronga ana pele mur nge Iutea.

## 5

*Iesus Talun Ke Iua Nena Hana Mur  
(Mat 4:18-22; Mak 1:16-20)*

1 Iok, nga etuene e Iesus mesmes nga ech hetaliliu ngana palaungana ililna nge Kenesaret. Ol pe hulua halang te emurung hite i pe hel te teke te longo toto nga NeHalang na helenga. Pomalam te pururum teu nga peknangaria mur koaria ke tela rochroi toto. 2 Pe Iesus esia aka nai nge te ele heke nga pepei. Pe hana nenge te olole ruo nga sulang nemur ngaria kou te lomlomo hoat. 3 Ol pe Iesus lake kila teu nga Simon nena sulang pe hele lange i ke ele hote sulang neu ke mana hot la pol nge hot. Ke Iesus are

teu nga sulang neu pe hetore hulua nemur.

<sup>4</sup> Iesus hetore hulua nemur ke het pe hele lange Simon, “O hepu hote lem sulang ke lange ech leme ngana pe imo ul pekngam mur a hemes sue hoat ke a hole ruo.”

<sup>5</sup> Pe Simon tuacholia, “Non Soke, imem pum toto ia hoat nei hesio ngana nga miliko lo i! Pe emem ero toto. Pe lape e hesio mule hoat nei ke pomanga o hele ngam.”

<sup>6</sup> Iok laol, te hesue hoat nemur pe te hole ruo nge halang toto nge poia hoat nemur ke te teke te uch ulu. <sup>7</sup> Pe te iua pekngaria mur nga aka e pule ke teat ke te halaua iri. Teat ke te hemuta heke sulang nai neu nga ruo ke te puluch par.

<sup>8</sup> Pe Simon Petrus esia ure nenge lohote pe tualou sio nga Iesus matana pe hele lange i, “Non Soke oua toto ak iange iau lek poinga poreke!”

<sup>9</sup> Petrus poi ke pomau iange iri ul pekngana mur te rura toto nga ruo lochloch ngana nenge teole. <sup>10</sup> Pe Petrus pekngana nai pule Ieims pe Ioanes Sepeti tutuna mur te rura pule.

Ol pe Iesus hele lange Simon, “O matau ero. Heueu pe laol lape o menmene hana ke pomanga ruo nge o hole nga hoat.” <sup>11</sup> Iok, te ele heke sulang mur nga peipei pe te hile sue ure lochloch pe te hile sue aria ume mur nenge te holole hoat pe te nana-sia Iesus.

*Iesus Hemas Mule None*  
(Mat 8:1-4; Mak 1:40-45)

<sup>12</sup> Iok, Iesus langa kileng e pe nga kileng neu none tu. Pe non nem tu poreke toto ia haleles poreke toto ngana nenge ngau hohoa singira. Pe nga etue nenge esia Iesus talsio tote i pe hele ke teke, “Non Soke, nenge teke lememe toto o hemasia iau!”

<sup>13</sup> Pe Iesus tal heke penna nge non neu pe hele, “Oe lemek toto. Singim lemlem mule!” Pe haleles neu het sapele nge non neu.

<sup>14</sup> Pe Iesus hele ke kerkereng toto lange i, “O hele pulut rara lange mele ero toto. Ola ke o heteia singim lange tunginga ana non. Pe o makia lem tunginga hel ke o nanasia hotonga nenge NeHalang tunge lange Moses. Pomalam hulua lochloch te eteia ke singim urana mule lo.”

<sup>15</sup> Pe Iesus pingana song ke langa tau toto pe hulua halang te atat ke te longo nge i pe te teke Iesus hemaulia iri nga aria haleles mur. <sup>16</sup> Pe kokoes Iesus ua kome ke hetalaulau nga kileng nenge nganangana ero.

*Iesus Hemasia None Nge Apena Mete*

(Mat 9:1-8; Mak 2:1-12)

<sup>17</sup> Nga etuene e Iesus hetottoro pe Paresio mur pe hotonga ana hetoronga mur teat nga kileng nemur nge Kalelea pe Iutea pe Ierusalem. Hana nemur teare lamau pule. Pe Non Soke tunge na hekerkerenga palaungana lange Iesus ke hemas mule haleles mur. <sup>18</sup> Hana hel te takisia none nge apena mete luluch nga na hete pe te teke te teuia langa pele letena ke tetal sue i nga Iesus matana. <sup>19</sup> Hulua halang ol pe te tango rara kue e nge te mene teua non neu lange teu. Ol pe te takis heke i langa pele ona teal hatalia pele pulpulna pe te heon sue pe te hesue i luluch nga nena hete ke langa hulua tunangaria nga Iesus matana pengpeng.

<sup>20</sup> Iesus esia leteria manmanna ngana pe hele lange non neu, “Nein-gak, e sau lem poinga poreke ngana mur ke te lasus toto lo.”

<sup>21</sup> Pe hotonga ana hetoronga mur pe Paresio mur te hele te hele hel nge iri, “Itei pane mai? Mele nei hele poreke tote NeHalang i! Teke i utar toto pamai? NeHalang i toro mana nge sau rera poinga poreke ngana mur ke te lasus!”

<sup>22</sup> Iesus eteia leteria tuanin ngana mur pe hele lange iri, “Pomere nenge letemo tuanin rara ke pomam ia ure nemur? <sup>23</sup> Semel ngana nge e hele ke e teke, ‘E sau lem poinga poreke

ngana mur ke te lasus toto lo.’ Pe anali toto nge e hele ke e teke ‘O loaka pe oi.’<sup>24</sup> Heueu lape aes tote nga matamo nge Non Tuna na kerkere nga palaungana nga ich nge saua poinga poreke ngana mur.” Iok, hele lange non nenge apena mete neu, “E hele lange iong, o lohaka pe o mene lem tako pe ola nga lem pele!”<sup>25</sup> Ueiuei mana pe non neu lohaka nga iri lochloch mataria mene heke nena manga pe langa nena pele pe heto hekeke NeHalang.<sup>26</sup> Pe hulua lochloch ngana nemur te rura toto pe te matau pe haria kangkanga mana nga ure nenge lohote pe te heto heke NeHalang pe te hele, “Heueu mana nei ta naue ure nemur nenge ta esia iri erochro nge nike.”

*Iesus Iua Liuai*  
(*Mat 9:9-13; Mak 2:13-17*)

<sup>27</sup> Iok, Iesus hile kileng neu pe i ke la pe esia Liuai nge arare nga nena ume ana pele nenge lololoch umtutuna ia. Pe Iesus hele lange i, “O nana sia iau.”<sup>28</sup> Pe Liuai lohaka pe hile sue ure mur lochloch ngana pe nana sia Iesus.

<sup>29</sup> Ol pe Liuai poia Iesus ana ngaunga palaungana pe hana halang toto nge iri nenge te lololoch umtutuna pe hana hel pule tela ke te ngau luluch nge Iesus.<sup>30</sup> Paresio mur iri ul aria hotonga ana heteronga mur te ngunngunu pe te hele lange Iesus na hana mur. Pe te ontei, “Pomere pa nenge o ngau pe oin luluch nge hana nenge te lololoch umtutuna pe nge hana porekreke ngana nemur pamam?”

<sup>31</sup> Pe Iesus tuacholia reria helenga, “Iri nenge singiria haleles mana tela nge non nenge umume nga haleles ana pele pe iri nenge singiria haleles ero tela ero nike.<sup>32</sup> Iau eat mana nge iri nenge muteria toto ke te hulua reria poinga poreke ngana mur pe te nanas mule iau. Pe iri nenge te teke iri siporia te pengpeng lo eat nge iri ero.”

*Onteinga Nga Heonga*  
(*Mat 9:14-17; Mak 2:18-22*)

<sup>33</sup> Hana hel te onteia Iesus, “Pomere nenge Ioanes nena hana mur pe Paresio mur reria hana mur teheo nga ngaunga pe te hetalaulau ke kokoes pe lem hana mur ero?”

<sup>34</sup> Iesus tuacholia, “Nenge teke none ngesia nehei, lape heo ele hulua nga ngaunga pule? Ero toto la!<sup>35</sup> Pe non nenge ngesnges ana etue nenge lohaka hatalia iri lape at. Nga etue nem hulua lochloch ngana nem lape teheo nga ngaunga ol.”

<sup>36</sup> Iok, Iesus heleia helenga opene e pule, “Mele chach ia nena hengeron heueu ngana pe sima hite langa hengeron nike ngana ero. Nenge teke poia ke pomam lape poi poreke hengeron heueu ngana nem nge tachach ia. Pe lape poia hengeron nike ngana nem ke nakuna poreke pule.<sup>37</sup> Pe pule mele ling teua uain heueu ngana langa kina nenge nike ngana ero iange sosolos. Nenge teke poia ke pomam lape poia kina nike ngana nem ke chach pe pasiling hot, pe kina nem poreke sapele.<sup>38</sup> Ke lape a ling teua uain heueu ngana langa kina nenge heueu ngana pe makuk.<sup>39</sup> Pe mele lemene taua uain heueu ngana ero ol nenge teke inia nike ngana lo. Pe mele neu hele, ‘Nike ngana nem urana.’”

## 6

*Iesus Hetore Ita Nga Poinga Nenge Ta Poia Nga Sapat Ana Etue*  
(*Mat 12:1-8; Mak 2:23-28*)

<sup>1</sup> Nga Sapat ana etue Iesus iri ul nena hana mur tei teu langa ume e. Pe Iesus nena hana mur te sohe uit nganangana pe te soch hote paena pe te ngaua.<sup>2</sup> Pomalam Paresio mur te onteia Iesus, “Rera hotonga hele ke teke tapoi ke pomam nga Sapat ana etue ero. Pe pomere nenge lem hana mur tepoi ke pomam?”

<sup>3</sup> Pe Iesus tuacholia iri, “Imo mam a sisia non soke Teuit poi ngana nge

nike ero? Nga etue nenge iri ul nena hana mur te mete aria? <sup>4</sup> Te mete aria toto pe ana non i teu langa NeHalang nena pele pe mene ngaunga nenge heo ngana ke te ngaua. Pe rera hotonga hele ke teke ngaunga nem tunginga ana hana mur mana aria.” <sup>5</sup> Pe Iesus hele pule ke mai, “Sapat ana etue nem tokoninga koi iau Non Tuna.”

<sup>6</sup> Nga Sapat ana etue e pule Iesus hetottoro nga heteronga ana pele. Hetottoro pe none nge penna tamal-mal mete tu pule. <sup>7</sup> Paresio mur pe hotonga ana heteronga mur hel te tango rara kue nenge te ollaka hote Iesus ke poia poinga poreke ngana e. Pe te teke tenau ala tote i pe te nachnei hit tote i nge hemas ia non neu nga Sapat ana etue. <sup>8</sup> Pe Iesus eteia iri lochloch ramaria ke het lo pe hele lange non nenge penna mete neu, “Omes haka pe oi hot at lakoi nga muka.” Non neu mes haka pe la sapele nga muka.

<sup>9</sup> La ke mes pe Iesus hele lange iri, “E onteia imo lochloch. Hotonga nenge ita hele ke teke ta poia ume utar mur nga Sapat ana etue? Ta halau hel mule nge ita ma ta hunel mule nge ita? Nenge teke mele nge ana haleles palaungana tu tahun sapele i ma ta hemas mule i?”

<sup>10</sup> Iesus nau rara nge iri lochloch pe hele lange non nenge penna mete neu, “Otul hote perim mete ngana nem ke pengpeng.” Pe non neu teke tul hote penna mete ngana neu ke mai pe penna urana mule sapele. <sup>11</sup> Pe hana nemur te esia ke mau pe leteria inin toto pe te hele tele hel nge iri nga utar nge lape te poia lange Iesus.

*Iesus Hesilei Hote Nena Hana Mur Iri Analoch Pe Nai*  
(Mat 10:1-4; Mak 3:13-19)

<sup>12</sup> Nga etuene e Iesus i haka langa kileng chouchou ngana e ke hetalaulau. Pe hetalaulau nga kileng neu ke la uach sio. <sup>13</sup> Ol pe iua nena hana mur lochloch pe hesilei

hot ke analoch pe nai pe hetue iri ke nena hekulkulonga mur. <sup>14</sup> Eria koi nemur: Simon (nenge Iesus hetue ke ene Petrus) pe tina Antreas pe Ieims pe Ioanes pe Pilipus pe Patolomius <sup>15</sup> pe Mateus pe Tomas pe Ieims (nenge Alpeus tuna) pe Simon (nenge te hetue i ke Emo Kina) <sup>16</sup> pe Iutas (nenge Ieims tuna) pe Iutas Iskariot (nenge Iesus nena non ia pe poi poreke mule lange Iesus).

*Iesus Hetottoro Pe Hemasmas*  
(Mat 4:23-25)

<sup>17</sup> Iesus hile kileng chouchou ngana neu pe iri ul nena hana nemur tei sio. Tei sio pe la temes nga kileng mosngana luluch nge na hana mur hel pule nge halang toto. Pe hulua halang teat nge Iutea pe nge Ierusalem pe nga ruach ilina pule nge Tir pe Siton. <sup>18</sup> Iri lochloch te teke teat ke te longo Iesus nge hetottoro pe te teke hemas mule iri nga aria haleles mur. Iri nenge uneinei tuteu nge iri teat pule pe Iesus hemas mule iri. <sup>19</sup> Pe hulua lochloch ngana te teke tera nge i iange kerkerenga nem lohohot manmana nge i pe hemasia iri lochloch.

*Tunga Urana Ngana Pe Poreke Ngana*  
(Mat 5:1-12)

<sup>20</sup> Ol pe Iesus naula nge na hana mur pe hele,  
“Imo nenge lemo ure halang ero, a iech toto  
iange atu teu nga NeHalang nena naualanga lo!

<sup>21</sup> Imo nenge a meteamo nga ich heueu nei, a iech pule  
iange lape samo una nga hoena.  
Imo nenge a tangtang pe letemo meena toto heueu nei,  
a iech iange nga hoena lape a melmel mule.

<sup>22</sup> “Imo nenge a nanas tote Non Tuna pe hana muteria taua imo ero toto pe te tanga selet amo, a iech!  
<sup>23</sup> Nenge teke ure nei lohohot nge imo, a iech toto pe ahes haka iange urumo



palaungana kou kulele imo nga lut nga tapa.

<sup>24</sup> “Pe imo nenge lemo ure halang heueu nei, a iech ero ol iange atu ngamo nenge urana toto a mene ke ulolo!

<sup>25</sup> Pe imo nenge samo huna heueu nei, a iech ero ol iange nga hoena lape a meteamo toto!

Imo nenge a melmelmel heueu nei, a iech ero ol iange nga hoena lape a tang manmana ol!

<sup>26</sup> Pe imo nenge hulua te heto hekeke imo, a iech ero ol iange nge nike hulua nemur reria tete mur te heto hekeke hana nemur nenge te pallak-laka ke iri hetatalonga.”

*Mutemo Taua Lemo Ngarang Mur (Mat 5:38-48; 7:12a)*

<sup>27</sup> Pe Iesus hele mule, “E hele lange imo nenge a longo atat nge iau. Letemo la mule pe lememo tau mule lemo ngarang mur pe apoi ke urana mule lange iri nenge lemeria ero ia imo pe te tanga seles amo. <sup>28</sup> A pete iri nenge te hele tautaua imo pe a hetalaulau iri nenge tepoi porekreke imo aria. <sup>29</sup> Nenge teke mele te pele iong o hulua hengen ele lange i ke te pele pule. Pe nenge teke mele achatote lem hengeron nenge hot ana, o ngata mana ke mene lem hengeron nenge teu ana pule. <sup>30</sup> Nenge teke mele hel te onteia iong nga ute hel, o tung mene lange iri pe nenge teke mele mene lem ute o ontei haka mule i ero ol. <sup>31</sup> Poinga urana ngana nenge lememe ke mele hel te poia lange iong o poia lange iri.

<sup>32</sup> “Nenge teke lememo tau mene hana nenge muteria taua imo lape a mene urumo utar? Anau lange hana porekreke ngana mur. Iri kau lemeria tautaua hana nenge muteria tautaua iri pule mau pe te mene ururia e ero. <sup>33</sup> Teke apoi ke urana lange iri nenge tepoi ke urana lange imo pe apoi ke pomam lange iri

toro mana, pomere toto nenge lape a mene urumo? Pe hana nenge te poreke kau tepoi ke mau pule mau!

<sup>34</sup> Pe nenge teke a tunge ute lange mele pe a teke tuachol mule pomere toto nenge a teke a mene urumo? Pe hana porekreke ngana mur kau te tung helel reria urelu mau pe te teke te mene pengpeng mule reria ure nenge te tunge la!

<sup>35</sup> A poia poinga nemur ero! Letemo la mule pe lememo tau mule lemo ngarang mur. Pe a tung ure lange mele hel pe lememo tau mule ero ol. Pomalam lape urumo palaungana toto pe NeHalang Nge I Soke Nga Lut Toto tutuna mur imo. Iange I poi ke nek toto lange iri nenge te poreke manmana pe iri nenge te hele urana erochro.

<sup>36</sup> Letemo porekeia pekngamo mur lochloch ke pomange tememo nge letena porekeia imo lochloch ngana nga ich.”

*Tanek Hel Mana (Mat 7:1-5)*

<sup>37</sup> “O henonou perim lange hehei pe hana nga reria poinga mur ero. Pomalam lape NeHalang henonou penna lange iong nga lem poinga poreke ngana mur ero pule. Pe o hele hote hehei pe hana reria poinga poreke ngana mur ero. Pomalam lape NeHalang hele hote lem poinga poreke ngana mur ero pule. Letem poreke ia hehei pa hana nga reria poinga poreke ngana mur. Pomalam NeHalang lape letena ia iong nga lem poinga poreke ngana mur. <sup>38</sup> Lem poinga nenge o tungtung o poia lange mele hel. Pomalam lape NeHalang poia lange iong pule. Pe i manmanna toto lape tuacholia lange iong ke pomai: nenge teke o tunge chasang elle NeHalang tuacholia nga chasang elle nge rure pe pip hite pe hemuta heke mule ke pararai pe tunge lange iong. Lem halaunga meena ngana nenge o poia lange mele hel lape NeHalang tuachol mule lange iong.”

<sup>39</sup> Pe Iesus heleia helenga opene nei lange iri, “Nenge teke none nge matana hit koke neingana e nge matana hit pule lape iri nai te losio teu nga polo. <sup>40</sup> Pe kol mele nge lala nga hengetoro i palaungana nge ana hetoronga ero. Pe teke heulo hote ana hesinga nemur nga hengetoro lape poi ke mange ana hetoronga ol.

<sup>41</sup> “Pomere nenge o esia ae mumuna unne nge mateu nga tim e matana pe o kolkol taua ae chonna palaungana nge maele matam?

<sup>42</sup> Pomalam lape o hele lange tim e neu ke pomai, ‘Kole tik, o iat ke e sulhote ae mumuna unne langa matam.’ Iong o hele ke mau pe iong sipom o kolkol taua ae chonna palaungana nem nenge maele matam. Iong opoi ke manga mamulou ero! Opoi hot tele ae chonna palaungana nenge maele matam. Ke het laka onau ke nek toto pe o sulhote ae mumuna nenge maele tim matana.”

*Ae E Luluch Nga Nganangana Mur*  
(Mat 7:16-20; 12:33-35)

<sup>43</sup> “Ae nenge haka pe nganngana lohote ke urana i ae poreke ngana ia ero. Pe ae nenge haka pe nganangana lohote ke poreke i ae urana ngana ia ero.

<sup>44</sup> Ta eteia ae elle pe elle nga nganngana mur ke pomalam, o teke o sohe kon ola nga raka tana ero. Pe o teke o sohe here, ola nga kore tana ero. <sup>45</sup> Pe non nenge urana lape ta esia poinga urana ngana nge lohote nge i iange poinga nem at nga letena toto. Pe non nenge poreke lape ta esia poinga poreke ngana nge lohote nge i iange poinga nem at nga letena toto. Iange harra hele hote utar nenge muta nge ita nga letera toto.”

*Hana Nai Te Hemes Ke Pele Nai*  
(Mat 7:24-27)

<sup>46</sup> “Pomere nenge o hetue iau ke am Soke iau pe opoi ke pomanga e hele ngak ero? <sup>47</sup> Mele nenge at nge iau pe longe lek helenga pe longo taua iri lape e henonou hote i ke i non nge pomai: <sup>48</sup> I pomanga non nenge

hemesia na pele pe selsio tote na pele huna munna pe ume heke nga um. Pe nga lukunna ech ngau reke kileng pe teke tak hote pele pe pele nem mes ke kerkereng toto iange te umeia ke nek toto nike. <sup>49</sup> Pe mele nenge longe lek helenga pe nanas taua ero lape poi ke pomanga mele nenge hemes mene na pele nga lut mana pe sel sue munna ero. Pe nga lukunna ech ngau reke ke at pe tak hote pele nem pe losio sapele. Pe pele nem uchulu ke poreke toto.”

## 7

*Non Soke Nem Letena Manmanna Ngana*

(Mat 8:5-13)

<sup>1</sup> Iok laol, Iesus heleia ure lochloch ngana nei lange hehei pe hana ke het pe i ke lange Kapernam. <sup>2</sup> Pe nga lamau non nenge i mukmuka nga palinga hel ana hana mur tu. Pe nena non nenge umume nge i singina haleles toto pe teke metmete lo. Pe ana non ana soke mutena tau tote i. <sup>3</sup> Ana soke longe Iesus pingana, ol pe kulosia hana papalaungana hel nge Israel ke tela taua Iesus ke hemas mule non soke neu nena non. <sup>4</sup> Tela ke te lohote nge Iesus pe te ech tote i pe te hele, “Lememem toto ke ola ke o hemas mule non soke neu nena non. Iange i poia ume palaungana toto at nge imem Israel mur. <sup>5</sup> Pe i mutena tau tote imem Israel mur pe lele lemem hetoronga ana pele.” <sup>6</sup> La ol pe Iesus koko sapele nge iri.

Tela rochroi nga pele lo pe non soke neu kulosia pekngana hel ke la te heleia i sipona na helenga lange Iesus, “Non Soke, lemek ero nge e hekuleileia iong. Iau e urana ero toto nge oteu at nga lek pele. <sup>7</sup> Pe pule e urana ero toto nge iau sipok ela ke e esia iong. Lemek ke e teke o hele mana pe lek non nenge umume nge iau urana mule. <sup>8</sup> Iau pule eume pe e longo tau menmene ak ae huna mur pe pule iau sipok enau ele palinga hel ana hana mur. E hele lange elle ke e

teke, ‘Ola!’ pe ila. Pe e hele lange e pule ke e teke, ‘O i at!’ pe i at. Pe e hele lange lek non nenge umume nge iau ke e teke, ‘O poia ume nei!’ Pe i ume ia.”

<sup>9</sup> Iesus rura toto nga Non Soke neu nena helenga nei. Longe ke het pe ralele taua hulua nenge te nananas ia i pe hele lange iri, “E hele lange imo pengpeng, e hottaua none nge letena manmanna ngana pomai ero kura. Pe nge Israel pule e hottaua e ero!” <sup>10</sup> Hana nenge te atia non soke neu na helenga tela mule nga pele pe haleles palaungana nenge poia non soke nena non neu het mule lo.

### *Iesus Hemaui Heke Hei Pakar E Tuna*

<sup>11</sup> Pomange rou Iesus langa kilenge nge ene Naen. Pe nena hana mur pe hulua halang pule te nanasia i. <sup>12</sup> Te ii ke la te lohote nga kilenge neu ana kue matana pe tesaol haka nga hei pakar e tuna koluna nge telolo hotote ke la tealote hitite. Pe hei pakar neu tuna elle mana ke ngana kolou nenge mete neu lo. Pe hulua halang nga kilenge neu tei luluch nge i. <sup>13</sup> Ol pe Iesus esia hei pakar neu pe letena poreke toto ia i pe hele lange i, “Atong o tang ero.”

<sup>14</sup> Pe Iesus i ke la rahaka nga metenga ana hete pe hana nenge te takisia temes. Pe Iesus hele, “Kol nem! E hele lange iong. O lohaka!”

<sup>15</sup> Pe kol nenge mete neu are haka pe hele sapele. Pe Iesus tung mule i lange tana.

<sup>16</sup> Pe hulua nemur te esia pe te matau pe te heto heke NeHalang pe te teke, “Hetatalonga e nge na kerkerenga palaungana toto i! Tu luluch nge ita! NeHalang at lo ke hemaui mule nena hana mur!” <sup>17</sup> Iesus poia ure nei pe pingana song nga kilenge lohloch ngana nge Iutea pe kilenge nemur nenge tetu rochroi.

### *Ioanes Hekule Nena Hana Nai Lange Iesus* (Mat 11:2-19)

<sup>18</sup> Iok, Ioanes nena hana mur te hele lange i nga ure lohloch ngana nei. Ioanes longe pe iu ke nena hana nai <sup>19</sup> pe kulosia iri kela te onteia Iesus. Pe te teke, “Iong laka lom nenge NeHalang hele ke teke lape kulosia ke at? Eh, Mele nenge mo kulele kau lape atat kura mau?”

<sup>20</sup> La hana nai neu tela nge Iesus pe te hele, “Ioanes nenge henunung kulosia imem ke at mo onteia iong. Ioanes teke, ‘Iong laka lom nenge NeHalang hele ke teke lape kulosia ke at? Eh, Mele nenge mo kulele kau? Lape atat kura mau?’ ”

<sup>21</sup> Nga etue neu pengpeng Iesus hemaui mule hulua halang nga aria haleles mur pe helope hote uneinei mur pe poia iri nenge mataria hit ke tenau mule. <sup>22</sup> Pomalam Iesus tuacholia Ioanes nena hana mur ke teke, “Ala mule pe a hele lange Ioanes nga utar nenge a esia pe a longe lo. Iri nenge mataria hit tenau mulmule lo. Iri nenge aperia mete tei mulmule lo. Iri nenge haleles poreke ngana lohote nga singiria te urana mule lo. Iri nenge talngaria hit te longo mule lo. Iri nenge te mete te mau haka mule lo. Pe iri nenge reria ure halang ero pe tetu poreke toto nga ich te longlonge NeHalang na helenga urana toto ngana. <sup>23</sup> Hana nenge te longe lek helenga pe leteria manmanna ngana losio ero lape te iech toto!”

<sup>24</sup> Iok, Ioanes nena hana mur tela ol pe Iesus talun ke nana urume Ioanes na poinga mur lange hehei pe hana. Pe hele ke teke, “Nenge ala nge Ioanes nga ich sana lomona nem pe nga ramamo a teke a esia utar toto? A teke a esia heilil ina a nge tutula iu rusia pe pellou rara mana? <sup>25</sup> Teke ramamo tunga nem ero pe a teke ala ke a esia utar? A teke A esia none nge heronia hengeron urana ngana mur? Hana nenge te heronia hengeron nenge pomam pe te ngaungaua ngaunga urana ngana mur tetu mana nga pele palaungana nenge uruna haka toto!”

<sup>26</sup> Iok, a hele at nge iau ol. Nga ramamo a teke a esia utar toto? A teke a esia hetatalonga e? Oe i manmanna ke i hetatalonga. Pe i altoto nga hetatalonga mur lochloch. <sup>27</sup> Ioanes i sipona nenge NeHalang na helenga nenge tehas sue hele tala ia lo. Ke NeHalang hele,

“Lape e kulosia non nenge mene lek helenga ke imuka nge iong ke helue lem kue.’”

<sup>28</sup> Pe Iesus hele pule, “E hele lange imo, Ioanes i palaungana toto nge hana lochloch nenge tetu nge nike ke at heueu nei. Pe nga NeHalang nena naualanga pe nekinga nge ita, iri nenge teat nga hoena lape te ele haka toto nge Ioanes.”

<sup>29</sup> Hulua lochloch ngana nemur te longe pe iri ul hana nenge te lololoch umtutuna mana te heto heke NeHalang nge na poinga pengpeng mana. Iri te poi ke pomam iange Ioanes henune iri lo. <sup>30</sup> Pe Paresio mur iri ul hotonga ana heteronga mur ero. Iri lemeria ero toto nge te nanasia NeHalang. Iange iri tela nge Ioanes ke henune iri ero nike.

<sup>31</sup> Iesus hele mule, “Nga enau ngak nge hulua nga etue nei nakuria te teke tepoi ke pomere mai? <sup>32</sup> Tepoi ke pomalaka nga aina kinkino ngana nenge aria tuluk nai ke te arare nga ingala munna. Pe leteria inin tau helel pe hel te chusi. Iok, hel te alngaria tele lange pekngaria mur,

“Pomere nenge mo palia emem hario pe ahes ero? Pe moute pum ana utunga pe a tang ero?”

<sup>33</sup> Oe, imo nga etue nei a pomanga aina nemur iange Ioanes nenge henunun at pe heo nga ngaunga pe inia ech kerkereng ngana e ero pe a hele ke a teke, ‘Non pa nem, uneinei tu nge i iam!’ <sup>34</sup> Iok, Non Tuna at. Ngaungau pe inin pe imo a hele, ‘Anau langa non pa neu! Non nei ngau halali!

Pe in sakilil i! Pe kokoko nge hana nenge te lololoch umtutuna pe hana nenge reria poinga poreke toto!’ <sup>35</sup> Pe iri nenge te nanasia NeHalang iri te hemallaha hote ke NeHalang i pengpeng toto pe manmanna.”

### *Iesus Lake Ngau Luluch Nge Simon Nenge I Paresio*

<sup>36</sup> Non Paresio e iua Iesus kela ngau nga na pele. Iok Iesus iteu langa pele neu pe kila sio ke te ngaungau ol. <sup>37</sup> Pe nga kileng neu heie nge poinga poreke ngana muta toto nge i tu. Ana hei longe Iesus nge lake ngaungau nga non Paresio neu na pele pe mene ech kina e nge te ume hote nga um. Pe ech kina nem muta ia ure nenge inangana ehech. <sup>38</sup> Pe la ana hei mes nga Iesus rumena nga apena mangana pe tangtang ol. Tangtang pe matana eina sio ke la lome Iesus apena. Ke het pe taune Iesus apena nga palpalna ina pe saka hite Iesus apena. (poi ngana nei, manga teke talsio tote i pe heto heke tote Iesus) Pe heusiling heke ure nenge inangana ehech neu nga Iesus apena.

<sup>39</sup> Pe non Paresio neu esia pe hele mana nga letena, “Teke non nei i hetatalonga ke manmanna lape eteia hei nenge rachraua i neu. Pe pule eteia ke hei nem i hei poreke ngana toto.”

<sup>40</sup> Iok, Iesus rahaka helenga pe hele lange i, “Simon, e teke e hele ia ute lange iong.”

Pe Simon hele, “Iok, Non Soke, o hele ia at nge iau.”

<sup>41</sup> Pe Iesus talun ke hele lange i sapele, “None tunge umtutuna lange hana nai pe teke nga hoena te tuacholia ke pengpeng la mule nge i. Elle nge iri mene ke umtutuna iri ana non kina lime iri lime (500) pe neingana mene ke umtutuna iri ana non kina nai pe analoch mana. (50) <sup>42</sup> Pe iri nai ape te teke te tuachol mule pe reria umtutuna ero toto. Ol pe non nenge tunge umtutuna lange iri hele lange iri nai, ‘Hanganok nemur nenge a poia nge iau lape lasus ol.’” Iesus



hele ke het pe onteia Simon, “Non tei nge iri nai lape mutena tau tote non nenge tunge umtutuna nemur?”

<sup>43</sup> Pe Simon lohaka pe hele, “Tau e teke ngana laka nenge mene ke umtutuna halang.”

Pe Iesus hele, “Nem pengpeng.”

<sup>44</sup> Pe Iesus naula nge hei neu pe hele mule lange Simon, “O esia hei nei? E i teu at nga lem pele pe o tunge ech ke e lome apek ero. Pe hei nei lome apek nga matana heina pe taune mule nga palpalna ina. <sup>45</sup> Pe iong, eat nga lem pele pe o iech ele iau pe olau hite iau ero pe hei nei saka hitite apek nga eat ngak nike. Ngana i popoia ne kura. <sup>46</sup> Pe iong opoi heke oliua eina nga palpaluk ero pe hei nei heusiling heke ure nenge inangana ehech nga apek. <sup>47</sup> Pomalam e hele lange iong hei nei eteia nge lape letek poreke ia i nga nena poinga poreke ngana mur lochloch ngana koi nenge mutena tau tote iau. Pe mele nenge na poinga poreke ngana unne sune mana pe letek poreke ia i nga na poinga nem mutena taua iau ke unne sune mana.”

<sup>48</sup> Pe Iesus hele lange hei neu, “Atong, e sau lem poinga poreke ngana mur lochloch ke te lasus toto lo.”

<sup>49</sup> Pe hana hel pule nenge iri ul te ngaungau neu te hele tele hel nge iri, “Itei pane mai ol, nge teke sau hehei pe hana reria poinga poreke ngana mur ke te lasus toto?”

<sup>50</sup> Pe Iesus hele lange hei neu, “Letem manmanna ngana laka hemas mule iong. Ola mule pe otu ke nek ol.”

## 8

### *Hehei Nemur Nenge Te Halaua Iesus Pe Nena Hana Mur*

<sup>1</sup> Iok, nga hoena ol Iesus i ke langa kileng elle pe elle pe haliu hote NeHalang nena helenga urana toto ngana. Helenga urana toto ngana nem hemallaha hote NeHalang nena naualanga urana ngana

pe nena nekinga. Iesus i rara neu pe nena hana analoch pe nai neu tei luluch nge i. <sup>2</sup> Iok, hehei hel nge uneinei pe haleles poia iri Iesus hemas mule iri. Ke hehei nemur te koko pule. Hehei nemur eria mai koi: Maria (nenge ene e pule Mantalena) Ana hei Iesus poi hot ke uneinei iri rahtele nai nge i. <sup>3</sup> Hei e pule ene Ioana. Pe ana hei ene umume nga NeHerot na pele pe ene laka ne Kusa. Iok, hei e pule ene Susana. Ke hehei nemur pe hehei halang pule te halaua Iesus pe na hana mur nga iri siporia reria umtutuna mur.

### *Helenga Opene Nga Ngaunga Tutuna Alona*

(*Mat 13:1-9; Mak 4:1-9*)

<sup>4</sup> Hulua halang te atat nge Iesus nga kileng pe kileng. Iri halang teat te emurung ol pe Iesus hele hote helenga opene nei lange iri. <sup>5</sup> Pe hele, “None langa ume ke tata ngaunga tutuna alona. Tataua ngaunga tutuna nemur pe hel te losio hot ke tema nga alingele ke heitite iri pe ngie mur teat ke te tuais heke ke het. <sup>6</sup> Pe hel te losio teu nga um koana mur nga ich nenge ana um halang. Pe ngaunga tutuna nemur mataria hot pe te kalum mule iange ich nem poreke. <sup>7</sup> Pe ngaunga tutuna hel te losio teu nga kiki letena munna pe te haka luluch nga kiki pe kiki au hite iri ke te mete. <sup>8</sup> Pe ngaunga tutuna hel te losio haka nga ich nge urana pe te haka ke nek pe nganangaria halang toto. Ngaunga tutuna nemur nganangaria lohote ke ana non kina iri lime (100) nga tana elechle.”

Pe Iesus haliu haka, “A pal talngamo pe a longo ke neknek!”

### *Helenga Opene Mur Aria Ume*

(*Mat 13:10-17; Mak 4:10-12*)

<sup>9</sup> Iesus nena hana mur te onteia i nga helenga opene nei luna. <sup>10</sup> Pe Iesus tuacholia, “NeHalang hesilei hote imo ke a eteia ke mallaha nga helenga talkome ngana nga NeHalang nena naualanga. Pe iri hel lape te

longo mene nga helenga opene ol. Ke pomalam,

“Tenau pe tees ero.  
Pe te longe pe te eteia ero.’”

*Iesus Hemallaha Hote Helenga  
Nga Ngaunga Tutuna Alona  
(Mat 13:18-23; Mak 4:13-20)*

<sup>11</sup> “Helenga opene nem luna toto koi: Ngaunga tutuna nem pomalaka nga NeHalang nena helenga. <sup>12</sup> Pe ngaunga tutuna nenge te losio nga alingele nem te pomalaka nga iri nenge te longe NeHalang nena helenga. Ol pe Non Poreke ngana at pe ua toto ia NeHalang nena helenga nga leteria ke leteria manmanna ero ke pomalam te mene hemasinga ero. <sup>13</sup> Pe ngaunga tutuna nenge te losio haka nga ich nenge ana um halang te pomalaka nga iri nenge te longe helenga pe leteria manmanna mukam pe ure meena ngana lohote nge iri pe te losio mule ke ueiuei mana. <sup>14</sup> Pe ngaunga tutuna nenge te losio teu nga kiki letena munna te pomalaka nga iri nenge te longe helenga nem pe iri reria ure halang nga ich ke pomanga umtutuna pe ure urana ngana mur hel pule. Pomalam leteria tuit tote pe te umeia ume e nge urana ero. <sup>15</sup> Pe ngaunga tutuna nenge te losio nga ich urana ngana te pomalaka nge iri nenge leteria urana. Te longe helenga nem pe te talue ke nek toto nga leteria. Leteria manmanna ngana nem tu ke kerkereng kela aria ume nganangana mur lohote ke nek toto.”

*Helenga Opene Nga Lemenga  
(Mak 4:21-25)*

<sup>16</sup> “Mele pele tonge lemenga pe hesalakou hite ero. Nem pe tal teua langa hete ene ero pule. Mele nem tonge pe tal heke mene nga lut ke hehei pe hana te esia tualeme ngana pe teteu at nga pele. <sup>17</sup> Utar nenge tetal komkome lape te mene hote langa mallaha. Pe utar nenge te esalakou hite lape te hottaua pe te

mene hote langa mallaha. <sup>18</sup> Letemo tuanin ke nek toto nga a longo ngamo. Mele nenge nena ure hel malo lape te tunge nena hel pule. Pe mele nenge nena ure ero pe nga letena teke nena lo nem lape te ua toto ia nge i.”

*Iesus Tana Pe Titina Mur  
(Mat 12:46-50; Mak 3:31-35)*

<sup>19</sup> Iesus tana pe titina mur te teke tela ke te neue i pe hulua halang tepoi ele i. <sup>20</sup> Pe mele hele lange Iesus, “Tam pe titim mur kou te mesmes nge hot te teke teat ke te esia iong.”

<sup>21</sup> Pe Iesus hele lange iri lochloch, “Etak pe titik mur laka iri nenge te longe NeHalang na helenga pe te nanas taua.”

*Iesus Hemete Kileng Eingana  
Palaungana  
(Mat 8:23-27; Mak 4:35-41)*

<sup>22</sup> Nga etuene e Iesus iri ul nena hana mur te haka nga sulang e pe Iesus hele lange iri, “Ta lotele langa ech hetaliliu ngana nei ilina hele.” Iok laol, teote hot sapele. <sup>23</sup> Te mana ole ke te lala pe Iesus mamani sio. Ol pe kileng eingana palaungana lohaka sapele nga ech hetaliliu ngana neu. Pe ech pasiling teu nga reria sulang ke te teke te puluch.

<sup>24</sup> Ol pe Iesus na hana mur telange i pe te engo heke i. Pe te hele, “Non Soke! Non Soke! Ta puluchluch lo i!”

Iesus lohaka pe hele ke kerkereng toto langa kileng eingana palaungana nem pe ruach poreke ngana nem. Pomalam kileng eingana palau ngana nem mete sio pe ruach poreke ngana nem ma ke nek mule pe kileng urana mule. <sup>25</sup> Pe Iesus hele lange nena hana mur, “Letemo manmanna ngana tu langai?”

Pe iri te rura pe te matau toto pe te hele tele hel nge iri, “Non tei nemai? I tunge na helenga kerkereng ngana langa kileng eingana palau ngana nei pe ruach ana mee papalau ngana nemur pe te longo tau mene i!”

*Iesus Helope Hote Uneinei Mur Nge None*

*(Mat 8:28-34; Mak 5:1-20)*

<sup>26</sup> Iesus pe nena hana mur te mana nga sulang nem kela te lohote nga kileng nenge Kerasa. Kileng Kalelea tu nga ech hetaliliu ngana palaungana neu ilina ele pe ana kileng tu nga ele. <sup>27</sup> Tela tesio nga kileng neu pe Iesus i sio ke langa peipei. Pe none nga kileng neu saol haka nge i. Non neu uneinei halang tetu teu nge i. Pe uneinei te poia i ke lachlach manmana nga halang nike pe tu ke nek nga pele e ero. Tu manmana nga um polona mur nenge tetal teueua hana nenge te metmete. <sup>28</sup> Non neu esia Iesus pe halngana haka ke soke toto pe tamal sue i nga Iesus apena huna pe alngana ke teke, "Iesus! Iong NeHalang Nge I Soke Nga Lut Nga Tapa Tuna! O teke o potaria iau? O tunge melmelenga palaungana at nge iau ero!" <sup>29</sup> Non neu hele ke pomai lange Iesus iange Iesus hele lo ke teke helope hote uneinei nemur nge i. (Kokoeses hana te kele non neu penna pe apena ana rur kerkereng ngana pe tenau ala tote i. Pe uneinei nemur tera hit tote i. Pe i tak hoa rur kerkereng ngana nemur pe uneinei nemur te heua ia i ke langa ich sana lomona.)

<sup>30</sup> Iok laol, Iesus onteia i, "Em mere?"

Pe non neu tuacholia, "Ek laka, Hulua" Ene pomam iange uneinei halang tetu teu nge i. <sup>31</sup> Pe uneinei nemur te echia Iesus ke te teke kulosa iri langa polo poreke ngana ero. Iange polo nem takolkol hetala ngana pe te amneia melmelinga palaungana.

<sup>32</sup> Pe kie ana tuangarung hel te tutua nga sasana palaungana e ilina. Pe uneinei nemur te echia Iesus ke tela ke teteu langa kie nemur. Pe Iesus longele lange iri ke la teteu langa kie nemur. <sup>33</sup> Iok laol, te lohote nge non nem pe teteu heke sapele kie nemur. Teteu heke kie nemur pe iri lochloch te song kela te losio hot nga kileng tal-

loko sio ngana nem kela te pachpach nga ech.

<sup>34</sup> Pe hana nenge tenau elele kie nemur te esia ke mau pe te song ke la te hesongia ana helenga nga tuele tana pe nge iri nenge tetu kangkanga nge hot pule. <sup>35</sup> Helenga song pe iri nenge te longe tela kela tenau nga ure nenge lohote nga lamam. Tela kela te lohote nge Iesus pe te esia non nenge uneinei mur te ua hot nge i. Ana non letena urana mule lo pe heron ke nek toto pe are sio nga Iesus apena una. Iri lochloch te esia ke mau pe te matau toto. <sup>36</sup> Iri nenge tees tote Iesus nge helope hote uneinei nemur te hele urume lange pekngaria mur. <sup>37</sup> Hana lochloch ngana nga kileng neu te matau toto pe te hele lange Iesus ke ua toto aria. Pomalam Iesus lohaka sapele ke teke langa sulang.

<sup>38</sup> Pe non nenge Iesus hemas mule i neu la pe la hele ke kerkereng toto lange Iesus, "O hele ele iau ero pe ela luluch nge iong." Pe Iesus kulosa mule i pe hele, <sup>39</sup> "Ola mule nga lem kileng pe o hele hote ure palaungana nenge NeHalang poia lange iong lo." Iok laol, non neu langa tuele tana neu pe hele hote ure palaungana nenge Iesus poia lange i.

*Iairos Tuna Pe Hei Nenge Rahite Iesus Na Hengeron*

*(Mat 9:18-26; Mak 5:21-43)*

<sup>40</sup> Iok, Iesus pe nena hana mur te lotele la mule nga ech palaungana neu ilina ele pe hehei pe hana te iech ele i iange te kulele i ke mala lo.

<sup>41</sup> Ol pe none nge ene Iairos puris. I nge nauелеle hetorongana ana pele nga kileng neu. I at pe tamal sue i langa Iesus apena pe hele ke kerkereng toto lange Iesus ke teke langa na pele, <sup>42</sup> iange tuna heingana e singina haleles ke metmete lo. Pe non neu tuna elle mana ke ngana kolou neu lo. Pe tuna nem ana hesinga iri analoch pe nai.

Iesus i ole ke lala nga non neu na pele pe hulua te emurung hit tote i. <sup>43</sup> Hei e nge haleles poreke ngana mene i ii luluch nge iri pule. Hei

neu toho mala tu nge i ke hesinga iri analoch pe nai pe mele e nge nakuna ero toto nge hemasia i. <sup>44</sup> La ol pe hei neu echrir teu mene i nga hulua leteria kela raua Iesus nena hengeron ana horo nga rumena. Hei neu raua Iesus na hengeron pe haleles neu het sapele nge i.

<sup>45</sup> Pe Iesus ontei, "Itei nenge raua iau mai?"

Pe iri lochloch te hele ke te teke te raua Iesus ero. Pe Petrus lohaka pe hele, "Non Soke pomere nenge o ontei ke pomam? Onau nga hulua lochloch ngana nenge te maimai hite iong nem."

<sup>46</sup> Pe Iesus hele mule, "Ero, mele nenge raua iau nei rau pulut mene iau ero koi. Raua iau ke e hemas mule i iange e amnei urume nga lek kerkerenga nenge lohote nge iau."

<sup>47</sup> Hei neu eteia nge lape i talkome ero ol pe loiloi ele i pe la tamal sue i nga Iesus apena. Pe nga hulua mataria hei neu hele urume ke i sipona raua Iesus pe ana haleles het sapele. <sup>48</sup> Pe Iesus hele ke nek mana lange hei neu, "Atong heek, letem manmanna ngana hemas mule iong. Ola pe otu ke nek ol."

<sup>49</sup> Iesus helele kura pe te kulosia none at nga Iairus na pele pe hele lange Iairus, "Tum kou mete lo. O hemakuk mene non soke nem ero ol."

<sup>50</sup> Iesus longe reria helenga pe hele lange Iairos, "O matau ero. O rahit ele mene letem manmanna ngana ke heem maul mule."

<sup>51</sup> Iok, tei kela te lohote nga Iairus na pele pe Iesus mene Petrus pe Ioanes pe Ieims pe he sune neu temene pe tana ke teteu langa pele letena.

<sup>52</sup> Pe hehei pe hana te tangtang pe te chauchai sakililia he sune neu nge mete. Pe Iesus hele lange iri, "A tang ero ol. He sune nem mete ero iam. I mamani mana!"

<sup>53</sup> Pe iri lochloch ngana te melmel lilia Iesus iange iri te eteia ke he sune neu mete toto lo. <sup>54</sup> Ol pe Iesus rahite he sune neu nga penna pe hele haka ke soke, "Heek sune nem, o lohaka

ol!" <sup>55</sup> Pe he neu opene at mule pe lohaka sapele. Lohaka pe Iesus hele ke te tung ngaunga lange i ke ngau. <sup>56</sup> He neu tana pe temene te rura toto pe Iesus hele lange iri ke te hele rara lange mele hel ero nga ure nenge lohote nei.

## 9

### *Jesus Kulos Hote Nena Hana Analoch Pe Nai Nem*

*(Mat 10:5-15; Mak 6:7-13)*

<sup>1</sup> Iesus iua nena hana analoch pe nai nem ke tunge kerkerenga lange iri. Pe tunge na kerkerenga palaungana nenge iri siporia te poia ume ke te helope hote uneinei pe te hemasmas ia haleles mur. <sup>2</sup> Ke het pe kulos hote iri ke la te haliu hote NeHalang nena naualanga urana toto ngana pe te hemasmas haleles. <sup>3</sup> Kulosia iri pe tunge helenga nei lange iri, "A teke a lohaka a mene ute e ero toto nga lemo inga nenge ai ke a poia ume nemur. A mene heko ero, kole ero, ngaunga ero, umtutuna ero pe pule lemo hengeron naingana ero. <sup>4</sup> A lohote nga kileng e pe ama nga pele tei atu lola. Atu nga pele nem ke la het nga etue nenge a ume ke het nga kileng nem. <sup>5</sup> Pe teke ala nga kileng e pe hehei pe hana te iech ele imo ero ai hot nga kileng nem pe a pasis sue ich mumuna nga apemo. Pomalam a henonou hote NeHalang letena inin ngana lange iri." <sup>6</sup> Iesus nena hana mur te lohaka sapele pe tei ke tela nga kileng lochloch ngana ke te haliu hote NeHalang na helenga urana toto ngana pe te hemas mule hehei pe hana nga aria haleles mur.

### *Herot Letena Tuanin Raraia Iesus Nge I Itei*

*(Mat 14:1-12; Mak 6:14-29)*

<sup>7</sup> Pe Herot non soke nenge nauela kileng Kalelea longe ure nemur nge te lohote pe letena tuanin raraia ke halang iange mele hel te teke, "Ioanes nenge henunun kou maul haka mule ol!" <sup>8</sup> Pe hel te teke Elaisa lohote



ke i mallaha. Pe hel te teke hetatalonga e nge nike iam maul haka mule nem. <sup>9</sup> Pe Herot hele, "Iau e chatoa Ioanes nga kanna lo pe non tei nemai nenge e longlonge nge popoia ure peltit ngana nemur?" Pe Herot letena toto ke teke es tote Iesus.

*Iesus Hengaua Hana Iri 5000*  
(Mat 14:13-21; Mak 6:30-44; Ioa 6:1-14)

<sup>10</sup> Iok laol, Iesus nena hekukulonga (Apostel mur) teat mule nge Iesus pe te hele urume ure lochloch ngana nenge te poia nga reria inga nem lange i. Te nana lange Iesus ke het pe Iesus mene iri ke iri hul mana tela nga kileng nenge ene Pet-saita. <sup>11</sup> Pe nga hoena hulua te longo rusia ol pe te nanas sapele i. Iesus esia iri nge teat pe iech ele iri pe hetoro mule iri nga NeHalang nena naualanga urana ngana nge ita. Pe hemas mule iri nenge singiria haleles.

<sup>12</sup> Chaia matana puluch sisio lo pe Iesus nena hana mur tela nge i pe te hele, "O kulosia hehei pe hana nemur ke tela nga kileng nemur nenge tetu rochroi lamai ke te tango aria ngaunga pe muria nenge te maia. Iange kileng nei ich sana lomona mana i."

<sup>13</sup> Pe Iesus hele lange iri, "Ero, imo sipomo a hengaua iri."

Pe iri te tuacholia, "Imem motal ke mioka iri lime pe ruo nai mana. Lemem ke mola mo ol hulua nei aria ngaunga?" <sup>14</sup> (Hana nenge tetu lamau nakuna nenge iri 5000.)

Pe Iesus hele lange na hana mur, "A hele lange hana nemur ke teare pe a sisele iri ke ana non kina nai pe analoch (50) nga tuluk elle pe elle." <sup>15</sup> Iesus nena hana mur te nanasia na helenga ke te poia hana lochloch ngana neu ke teare sio. <sup>16</sup> Iesus mene mioka lime neu pe ruo nai neu pe nau haka langa tapa pe heto heke NeHalang pe hele urana toto lange i. Ke het pe reke pe tunge lange nena

hana mur ke te heronge lange hulua nemur. <sup>17</sup> Hulua lochloch ngana neu te ngau ke saria una toto pe ngaunga nem aluana ma kura. Pe Iesus nena hana mur te eukiraua ngaunga aluana mur nge muta nga chasang nge iri analoch pe nai (12).

*Petrus Hele Hot Pengpeng Ia Iesus Nge I Kristus*  
(Mat 16:13-19; Mak 8:27-29)

<sup>18</sup> Nga etuene e Iesus hetalaulau nge isipona pe nena hana mur tetu luluch nge i. Pe onteia iri, "Hulua lochloch ngana te teke iau itei?"

<sup>19</sup> Pe iri te tuacholia, "Mele hel te teke iong Ioanes nenge henunun. Pe hel te teke iong Elaisa pe hel pule te teke iong hetatalonga e nge nike nge maul haka mule."

<sup>20</sup> Pe Iesus ontei, "Pe imo? A teke iau itei?"

Pe Petrus tuacholia, "Iong Kristus non nenge NeHalang hele tala ia ke teke kulosia at."

*Iesus Hele Hote Ana Melmelenga Pe Metengana*  
(Mat 16:20-28; Mak 8:30-9:1)

<sup>21</sup> Iesus longe Petrus tuachol ngana pe hele ke kerkereng toto lange iri ke te hele rara ia lange mele hel ero toto.

<sup>22</sup> Pe Iesus hele pule, "Non Tuna lape amneia melmelenga palaungana. Pe hana papalauna pe tunginga ana hana mur aria papalauna mur pe hotonga ana hetoronga mur lape lemehia ero ia i. Pe lape te hune i ke mete pe nga etue mol ngana lape maul haka mule."

<sup>23</sup> Pe Iesus hele lange iri lochloch, "Nenge teke mele nem lemene toto ke nanasia iau poi ke pomai koi; Hile sue lemene ngana mur lochloch nga ich pe takisia ana melmelenga mur nga etue lochloch. Pomalam nanasia iau ol. <sup>24</sup> Iange itei nenge letena tu hit mene maulul ngana nga ich lape maulul ngana nem nga hoena ero ol. Pe mele nenge tung teu tote i pe hile sue lemene ngana mur lochloch nga ich lape mene mule maulul ngana

nenge tu ke koko. <sup>25</sup> Pe nenge mele lolochia ure lochloch ngana nga ich nei pe nga hoena na poinga poreke ngana mur poia i ke amneia melmelenga palaungana lape ure pa nemur te halaua i ke mere? <sup>26</sup> Nenge teke mele meia i at nge iau pe nga lek helenga mur Non Tuna lape meia i lange i pule nga etue nenge sio at luluch nga lemenga palaungana nenge i pe nge Temene pe nge angkelo mur. <sup>27</sup> E hele ke manmanna toto lange imo. Mele hel nge imo nenge te mesmes heueu nei lape tenau tele NeHalang nena naualanga urana toto ngana ke het pe te mete ol.”

*Iesus Singina Lohot Ke Altoto*  
(Mat 17:1-8; Mak 9:2-8)

<sup>28</sup> Iesus heleia ure nemur ke het pe etue iri rahtele mol (8) nga hoena mene Petrus pe Ioanes pe Ieims ke te haka langa sasana ke hetalaulau. <sup>29</sup> Iesus hetalaulau ol pe hul ke nakuna lohot ke altoto. Pe nena hengeron sinaha pe tuahu toto. <sup>30</sup> Ol pe hana nai temes hot sapele ke te hele luluch nge i. Hana nai nem laka Moses iri nai Elaia. <sup>31</sup> Iri te lohot luluch nga lemenga palaungana nga tapa pe te hele luluch nge Iesus. Te hele luluch nge Iesus nga mete ngana nge Ierusalem ke pomanga NeHalang talue lo. <sup>32</sup> Petrus pe pekngana mur te mamani un toto lo pe te lohaka pe te naue Iesus nge tu luluch nga lemenga palaungana pe hana nai neu temes luluch nge i. <sup>33</sup> Iok, hana nai neu te teke te hile susue Iesus lo pe Petrus hele lange Iesus, “Non Soke, urana toto nge imem koloi motu nei lo. Lape mo ume ke pelpele iri mol. Iong lem e pe Moses na e pe Elaia na e.” (Pe Petrus eteia utar nenge helele ia ero.)

<sup>34</sup> Petrus helele kura pe ulu lohot ke ana mulil ma hite iri pe Iesus nena hana nemur te matau toto nga ulu neu nge poi hite iri. <sup>35</sup> Pe helenga e lohot nga ulu ke teke, “Tuk toto koi nei nge e hesilei hote. A longo mana

lange i.” <sup>36</sup> Helenga neu het ol pe Iesus i toro mana tu nga lamau ol. Pe Iesus nena hana nemur te reng hit tote ure nemur. Pe nga etue neu te heleia helenga unne lange mele ero toto nga ure nenge te naue ke ulolo.

*Iesus Helope Hote Uneinei Nge Kol Mele Sune*

(Mat 17:14-18; Mak 9:14-27)

<sup>37</sup> Iok, pomange rou Iesus pe nena hana mol neu tei sio mule nga sasana neu pe la te saol haka nge hulua nge te kulelele i nge sio. <sup>38</sup> Pe none alngana hot nga hulua leteria, “Non Soke, letem ia iau pe onau lange tuk mukam. Lange tuk elle mana ke ngana i loi nenge uneinei te poia nei. <sup>39</sup> Uneinei nem teu hekeke i pe te tamal sue i ke sechul rara nga ich. Uneinei nemur te heporeke tote i ke melona tua nga hanna pe singina emurung ulu ke poreke toto ol pe tehet sio mule nge i. Ke mala ero mana pe teteu heke mulmule i. <sup>40</sup> E hele ke kerkereng toto lange lem hana mur ke te kulos hote pe te alker taua.”

<sup>41</sup> Pe Iesus hele lange iri, “Imo nemur nga etue nei letemo manmanna ngana mur te losio lo. Pe lemo poinga poreke ulu. Etu luluch nge imo ke mala lo pe pomere nenge letemo manmanna ero? Pe lape e halaua imo ke merei ol?” Pe Iesus hele lange non neu, “O mene tum at nge iau.”

<sup>42</sup> Te mene kol neu ke lala pe uneinei nemur teteu haka mule i. Te tamal sue i langa ich pe te heloiloi ia i ke sasahul rara nga ich. Pe Iesus keres taua uneinei neu ke lohot nge kol neu. Hemas mule i ke nek pe tung mule i lange temene. <sup>43</sup> Pe hulua lochloch ngana nemur te rura toto nga NeHalang nena kerkerenga palaungana nei.

*Iesus Hele Mule Ia Ana Metenga*  
(Mat 17:22-23; Mak 9:30-32)

Ure nenge Iesus poi nei, poia iri lochloch ke haria kangkanga manmana ia kura pe Iesus hele lange nena hana mur, <sup>44</sup> “A longo ke nek

toto nga ure nenge e teke e heleia lange imo pe letemo lilil ele ero! Lape te tung heke Non Tuna langa hana hel peria.” <sup>45</sup> Pe Iesus nena hana mur leteria matana hote helenga nei luna ero. Pomalaka nga ute helau ele leteria matana ngana nga helenga nei ke te heilang hote luna ero. Pe te matau pule nge te ontei hot mule nga luna.

*Itei I Palaungana Toto*  
(Mat 18:1-5; Mak 9:33-37)

<sup>46</sup> Iesus nena hana mur te hunel mule nge iri nga itei nge iri nge lape lohok ke i palaungna toto. <sup>47</sup> Pe Iesus eteia leteria tuanin ngana ke ulolo ke mene mele sune ke hemesia i nga ilina <sup>48</sup> pe hele lange iri, “Mele nenge mutena taua aina sune nge mai mutena taua iau pule. Pe mele nenge mutena taua iau mutena taua itei nenge kulosia iau ke eat. Pomalam itei nenge talsio tote i nge imo lape i palaungana toto.”

*Itei Nenge Poi Poreke Iong Ero, I Pekngam Ia*  
(Mak 9:38-40)

<sup>49</sup> Pe Ioanes hele haka, “Non Soke, mo naue none nge helope hotote uneinei mur nge hana pe i popoia nga kerkerenga nenga iong em. Pe mo hele ele ke poi ke mau ero ol iange i pekngamem ia ero.” <sup>50</sup> Pe Iesus hele lange i, “O hele ele i ero iange itei nenge lem ngarang ia ero i pekngam ia.”

*Samaria Mur Lemeria Ero Ia Iesus*

<sup>51</sup> Etue nenge Iesus haka langa lut nga tapa heroi lo. Ol pe Iesus letena haka toto ke teke lange Ierusalem. <sup>52</sup> Pe kulosia mele hel ke iri muka langa kileng e nge Samaria ke te tango rara pele e nge lape te maia. <sup>53</sup> Pe hehei pe hana nga kileng neu lemeria ero nge Iesus la ke tu nge iri iange te eteia ke i lala nge Ierusalem. <sup>54</sup> Ieims iri nai Ioanes te longe ke mau pe te hele, “Non Soke, lememe ke

o teke moiue sue oan nga tapa ke at ngaulele kileng nei?” <sup>55</sup> Pe Iesus nau lange iri pe keres ele iri <sup>56</sup> pe tei toto ke tela nga kileng e pule.

*Iri Nenge Te Teke Te Nanasia Iesus*  
(Mat 8:19-22)

<sup>57</sup> Iok, tei ole ke telala pe none hele lange Iesus, “Lape e nanas menmene iong lo koi. O teke oi ke ola nga kileng tei iau pule ela.” <sup>58</sup> Pe Iesus hele lange i, “Kaone inolo mur reria polo nge te mama ia pe ngie mur reria kiniu pe Non Tuna munna nga kileng e ero nge lake mateu ia.” <sup>59</sup> Pe Iesus hele lange none pule, “Iong nem o iat ke o nanasia iau.” Pe non neu hele, “Non Soke, o longele iau ke ela mule ke ealo hite temek mukam.” <sup>60</sup> Pe Iesus tuacholia, “Iri nenge te pomanga te mete lo, tela ke tealohite pum nem. Pe iong ola ke ohaliu hote NeHalang nena naualanga urana toto ngana.” <sup>61</sup> Iok, none pule hele, “Non Soke, lape e nanasia iong. Eh, O longele iau ke ela mule nga lek kileng ke e ee ia lek hei pe tutuk mur mukam.” <sup>62</sup> Pe Iesus hele lange i, “Mele nenge talune lamonga pe letena tu hit tote ero, lamonga nem lape het ero. Pe nenge mele letena nachnai nge nanasia iau, nena kerkerenga e ero nge teu langa NeHalang nena naualanga urana toto ngana.”

## 10

*Iesus Kulos Hot Ke Hana Iri Ana Non Kina Mol Pe Analoch Pe Nai (72)*

<sup>1</sup> Iesus henonou hot ke hana iri ana non kina mol pe analoch pe nai (72) pe kulos hote iri. Pe kulos ke nachnai ke iri muka nge i ke tela nga kileng lochloch ngana nenge lape i laia. <sup>2</sup> Pe Iesus hele lange iri, “Ume lochloch ngana nganangaria mur te mera tach lo pe lulunga ana hana mur iri unne sune mana. Ke a hetalaulau lange tokoninga nenga ume nemur ke kulos hote lulunga ana hana mur ke te lule ana ume mur. <sup>3</sup> Iok ala ol!

E kulosia imo ke a pomanga sipsip tutuna mur nenge la tetu teu luluch nge kaone inolo mur. <sup>4</sup>Ala pe a mene umtutuna ero pe a takis kole ero pe a mene lemo ae ulina e ero pule. Nenge teke a saolia mele hel nga kue ames ke a hele sakilil ero. <sup>5</sup>Nenge teke ai teu nga pele e a hele tala ke pomai, 'Non Palaungana na petanga tu luluch nge imo.' <sup>6</sup>Nenge teke none nem na poinga urana pe purpure petanga nem lape lemo helenga urana ngana nem masio nge i ke nek. Pe nenge teke ero, lemo helenga urana ngana nemur lape haka mule nge imo. <sup>7</sup>Atu mana nga pele elle nem ke a ngaungau pe a ininia utar nenge te tunge lala nge imo iange a ume lamam pe urumo laka. Pe ama lilis rara nga pele hel pule ero ol. <sup>8</sup>Ala nga kileng e pe ai teu langa pele e pe a ngaua utar nenge te tunge lala nge imo. <sup>9</sup>A hemas mule iri nenge aria haleles nga lamam pe a hele lange hehei pe hana ke a teke, 'NeHalang nena naualanga urana toto ngana heroi taua imo lo.' <sup>10</sup>Pe nenge teke a langa kileng e pe te ulo ele imo ai hot langa kue pe a heleia iri ke a teke, <sup>11</sup>'Mo pasis sue lemo kileng ana maruchrue nga apemem ke a eteia nge NeHalang lemene ero toto ia lemo poinga poreke ngana mur. Imo letemo matana ke nek, NeHalang nena naualanga urana toto ngana at rochroi toto nge imo pe lememo ero ia lo!' <sup>12</sup>E hele ke manmanna toto lange imo. Nga etue palaungana nem lape NeHalang letena porekeia kileng nenge Sotom pe lemo kileng ero!"

*Tuele Kina Nemur Nenge Te Ulo Ele Iesus*  
(Mat 11:20-24)

<sup>13</sup> "Imo nenge Korasin lape atu ngamo poreke toto! Pe imo nenge Petsaita lape a poreke toto pule! Iange NeHalang poia ure papalaungana nge imo ke a esia lo pe letemo

manmanna ia ero. Pe toinge NeHalang poia ure papalaungana nemur nge Tir pe Siton lape iri te huliera reria poinga mur nga halang nike. Iri te henonou hote iri nge te huliera reria poinga poreke ngana mur ke pomai; te heronia hengeron muna hulu ngana pe te hepore singiria ana apou! <sup>14</sup>Nga etue nenge NeHalang nau teu at nge ita elle pe elle nga rera poinga mur lape letena poreke ia iri nenge Tir pe Siton unne sune pe imo nem ero toto. <sup>15</sup>Pe imo nenge Kapernam nenge a teke ala nga lut nga tapa. Lape te tamal sue imo ke ala nge sio toto nga kileng au ngana!" <sup>16</sup>Iesus hele lange na hana mur, "Mele nenge longo taua imo longo taua iau pule pe mele nenge ulo ele imo ulo ele iau pule pe mele nenge ulo ele iau ulo ele I nenge kulosia iau at."

*Iechinga Palaungana Lohot Nge Hana Iri Ana Non Kina Mol Pe Analoch Pe Nai nem (72)*

<sup>17</sup> Hana iri ana non kina mol pe analoch pe nai (72) neu teat mule pe te iech toto. Pe te hele lange Iesus, "Non Soke, uneinei mur pule mo kulos hote iri nga iong em pe te longo tau mana!" <sup>18</sup>Pe Iesus tuacholia lange iri, "E esia non poreke ngana nge losio at nga tapa ke pomanga kileng chalem ngana. <sup>19</sup>A longo ke nek! Iau e tunge lek kerkerenga lange imo ke imo sipomo a poia ume nemur nenge pomai. Ai haka nga ilimo nenge te hunun pe a hekol kole iri. Pe ei mur nenge te hunun ita, lape apoia iri ke pomam pule. Pe a hekou sue lemo ngarang Non Poreke ngana nem nena kerkerenga. Pe ute pele nge heporeke imo ero. <sup>20</sup>Uneinei ne mur te longo taua imo pe a iech sakilil ero nge a mene kerkerenga palaungana nem. A iech toto mana nga emo nge tehas sue nga lut nga tapa."

*Iesus Iech Toto Ngana*  
(Mat 11:25-27; 13:16-17)

**10:7:** 1Ko 9:6-14; 1Ti 5:18    **10:8:** 1Ko 10:27    **10:11:** Ume 13:51; 18:6    **10:12:** Gen 19:24-25; Mat 10:15; 11:24    **10:16:** Mat 10:40; Luk 9:48; Ioa 5:23    **10:18:** Ioa 12:31; Hem 12:8-9    **10:19:** Psa 91:13; Mak 16:18    **10:20:** Pil 4:3; Hem 3:5



<sup>21</sup> Nga etue unne neu Opepengpeng hemute Iesus nga iechinga pe hele, “Temek O! Iong Non Soke nenga lut nga tapa pe nga ich! E heto heke iong pe e hele urana toto lange iong nge o talkome ure nemur nge hana nenge leteria matana pe te etei toto nga ure lochloch ngana nga ich. Pe O hemalaha hot mene lange hana nenge leteria manga aina kinkino ngana pe te etei sakilil ero. Oe Temek, o iech toto nga ure nei nge lohote ke nanas tau tote lemengam.

<sup>22</sup> “Temek tunge ure lochloch ngana at nge iau lo. Mele nga ich nei etei tote iau ero, Temek i toro mana etei tote iau. Pe mele e nga ich nei etei tote Temek ero, iau toro mana e etei tote pe pule iri nenge iau lemek ke e hetei hote iri lange Temek.” <sup>23</sup> Pe Iesus naula nga na hana mur pe hele mana lange iri, “Imo nemur a iech toto nga ure ne mur nenge aesia iri! <sup>24</sup> E hele pengpeng lange imo. Hetalonga mur pe naungaala ana hana mur nge nika eingaria chup tau tote ure nenge imo aesia pe iri te kolkolia. Pe eingaria chup tau tote ure nenge imo a longe pe iri te longe ero.”

### *Helenga Opene Nge Non Urana Ngana Nenge Samaria*

<sup>25</sup> Non hotonga ana hetoronga e iat ke teke totoia Iesus. Pe hele, “Non Soke, lape epoi ke merei ke e mene tunga nenga maulinga ke koko?”

<sup>26</sup> Pe Iesus tuacholia, “Tehas sue ke mere nga NeHalang nena hotonga mur? Pe iong o sisia pe luna ma ke mere?”

<sup>27</sup> Pe Non neu tuacholia, “Mutem taua NeHalang amo Soke nga letem toto pe nga opem pe nga kikim ngam toto pe nga letem tuanin ngana mur lochloch. Pe pule mutem taua neingam ke pomanga mutem taua iong sipom.”

<sup>28</sup> Pe Iesus hele lange i, “Lem tuacholinga nem pengpeng toto. Opoi ke

pomai pe nga hoena lape otu luluch nge NeHalang.”

<sup>29</sup> Pe non hotonga ana hetoronga neu teke hepeng mule i sipona ene pe ontei mule Iesus, “Itei hel toto nenge iau neingak mur?”

<sup>30</sup> Iok laol, Iesus tuacholia lange i ke pomai, “None lohaka nge Ierusalem pe i ke ramana sio lala nge Ieriko. Ol pe hana porekreke ngana hel te laua i pe te palia i ke mete par. Pe te haka hote nena hengeron mur pe te ua sapele. <sup>31</sup> Pe tunginga ana hana mur e nanas sio nga kue neu ke lala nge Ieriko pule pe esia non neu nge ma nga kue pe i kel nga kue ele pe la sapele. <sup>32</sup> Iok, none pule nge mata nenge Liuai nanas sue kue neu pule pe esia non neu nge ma pe kel ana pule. <sup>33</sup> Pe non Samaria e nanas sio ke la pe esia non neu nge tepal poreke ke ma pe letena poreke toto ia i. <sup>34</sup> Ol pe lake lome na chanchan mur nga oliua eina luluch nga uain. Ke het pe tal heke i nga nena tongki pe mene i ke langa pele nenge lang mur tema teueu ia pe nauale i. <sup>35</sup> Pomange rou non Samaria neu tung hot ke alak iri nai lange non nenge nauuelele pele neu pe hele lange i ke teke, ‘O nauale non nei pe teke o hesilia ure hel nge i eat mule pe e tuacholia lange iong ol.’”

<sup>36</sup> Iok, Iesus onteia hotonga ana hetoronga neu, “Nga ramam non tei nge hana mol nei nge o teke neingana toto non nenge te palia neu?”

<sup>37</sup> Pe non hotonga ana hetoronga neu hele, “Ngana laka i nenge letena porekeia non nenge hana te palia nem.”

Pe Iesus hele lange i, “Iok, Ola pe opoi ke pomalaka nge non nem.”

### *Iesus Langa Marta Nena Pele*

<sup>38</sup> Iok laol, Iesus iri ul nena hana mur teila pe Iesus iteu nga kilenge. Pe heie ene Marta mene Iesus ke langa na pele. <sup>39</sup> Pe Marta tina e ene Maria. I kila sio nga Iesus apena

huna ke longlongo Iesus nge hetot-toro. <sup>40</sup> Pe Marta letena inin taua tina Maria iange halaua i nga tuninga ero. Ol pe la ke hele lange Iesus, “Non Soke, tik pai hile sio mene iau ke iau toro e popoia ume lochloch pamai. Heongana nge at ke halaua iau kai?” <sup>41</sup> Pe Iesus tuacholia Marta pe hele, “Atong liuk, iong letem tu nga ure halang sakilil. <sup>42</sup> Pe ure elle mana nge urana toto nge letem tu hite. Pe Maria hottaua ure nem pe lape e ua ia nge i ero ol.”

## 11

### *Iesus Hetoro Nga Hetalaulaunga (Mat 6:9-13; 7:7-11)*

<sup>1</sup> Iok, nga etuene Iesus hetalaulau nga kileng unne. Hetalaulau ke het pe nena none hele lange i, “Non Soke, o hetore imem ke mo hetalaulau pule ke pomange Ioanes nge hetore nena hana mur.”

<sup>2</sup> Pe Iesus hele lange iri, “Nenge teke a hetalaulau, a hele ke mai koi: “Tememem, lememe toto ke hehei pe hana te heto heke em ke pengpeng toto.

Pe pule lememe toto ke lem naunga ala urana ngana at.

<sup>3</sup> O tunge emem ngaunga nga lapa pe nge he pe

<sup>4</sup> O sau lememe poinga poreke ngana mur ke te lasus toto

ke pomanga imem mo popoia lange hehei pe hana nga reria poinga poreke ngana mur nenge te popoia atat nge imem.

Pe o helosio ia imem nga totoinga ero.’”

<sup>5</sup> Iok, Iesus hele mule, “Teke elle nge imo langa neingana e na pele nga miliko tuna pe hele, ‘Neingak, e hanokia ngaunga unne e nge iong mukam <sup>6</sup> iange neingak e nge at nga kileng tau ngana koi at ke lohote nge iau pe lek ute nge e heole i ia ero.’

<sup>7</sup> “Pe i nenga pele letena tuacholia, ‘Ah! O hengo lala rara ia utar? Mopiu lo ke tutuk mur i imem hul ke moma

nei. E lohaka ke e tunge ute nem lange iong ero ol.’”

<sup>8</sup> Pe Iesus hele pule, “E hele lange imo pengpeng, non nem eteia ke i neingana ia pe i lemene ero toto nge lohaka ke tunge ngaunga nem lange i. Pe i lemene ero kou neingana neu nge pur mana ia onteinga lange i. Pomalam non nem lohaka ke tunge ure lochloch ngana nenge neingana nem lemene taua.

<sup>9</sup> “Ke e hele lange imo; nenge teke lememe taua ute nge NeHalang a ontei pe i tunge lange imo. Pe a tango rara ure pe lape a hottaua. Nenge teke o ischongia piunga te lohe piunga lange iong. <sup>10</sup> Ke nge iri lochloch ngana nenge te onteitei lape te menmene. Pe i nenge tango rarara hottautau pe i nenge ischongchong nga piunga te lohe piunga lala nge i.

<sup>11</sup> “Nenge teke mele sune onteia temene nga ruo pe lape tunge ilimo has ngana lange i ma? <sup>12</sup> Nem pe tuna e onteia pareo tutuna lange i pe lape tunge ei nenge hunun ita lange i? <sup>13</sup> Ke imo hana mana nga ich nei a eteia ke a tunge ure urana ngana lala nge tutumo mur. Ke pomalam mana lape Temere nga lut nga tapa tunge Opepengpeng lange iri nenge te onteia i!”

### *Iesus Pe Pelsipul*

*(Mat 12:22-30; Mak 3:20-27)*

<sup>14</sup> Iok, nga etuene e Iesus helope hote uneinei e nge tu nge none pe poia i ke hele erochro. Kela uneinei neu lohote pe non nenge hele erochro neu hele mule sapele. Pe hulua lochloch te rura pe leteria tuanin rara. <sup>15</sup> Pe hel te hele, “Non nem lope hotote uneinei nemur nga Pelsipul ene. Uneinei mur aria soke.” <sup>16</sup> Pe hel te olleke Iesus ke te onteia i ke poi hote ute ke hot nga tapa ke pomalam te eteia i ke i NeHalang tuna.

<sup>17</sup> Pe Iesus eteia leteria ke ulolo pe hele lange iri, “Kileng e nenge telas lele hel pe tepal hel mule nge iri lape tehet toto. Pe nenge teke none pe

nehei pe tuturia mur telas lele hel lape tenau hel mule ero ol. <sup>18</sup> Pe nenge teke Non Poreke ngana nena hana mur telas lele hel pe tepal hel luluch mule nge iri lape tehet toto. E hele ke mai iange imo a teke e helope hote uneinei mur nga Pelsipul Non Poreke ngana ene. <sup>19</sup> Iok, nenge teke e helope hotote uneinei mur nga Pelsipul ene pe nga itei ene toto lemo hana mur te helope hotote uneinei mur? Ke imo anau, lemo hana mur te hemallaha hot pengpeng ia. <sup>20</sup> Pe nenge teke e helope hotote uneinei mur nga NeHalang nena kerkerenga, nem hemallaha hote ke NeHalang nena naualanga urana ngana at nge imo lo.

<sup>21</sup> “Nenge teke none nge kerkereng toto pe heronia palinga hel ana hengeron pe ra hite na io pe mes ke nauele na pele nena ure mur lape tetu ke nek. <sup>22</sup> Pe teke mele e nge kerkereng toto nge i at ke iri nai tepal hel pe hekou sue i lape mele nem haka hote palinga hel ana ure nemur nenge teke i non totoia pe heronge none nem nena ure mur lange mele hel.

<sup>23</sup> “Mele nenge halaua iau ero heporeke iau.

<sup>24</sup> “Iok, uneinei e lohote nge mele pe song ke la tango rara munna nge tuia. Song ke langa kileng hal ngana mur ke tango rara munna pe hot-atau munna e ero. Pomalam hele, ‘Lape ela tau mule kou lek pele neu lo nenge etu tatala ia.’ <sup>25</sup> Iok laol, at mule pe teke nau pe pele neu te sachalue ke lemlem pe te poia ke nek toto. <sup>26</sup> Ol pe uneinei neu la mule ke la mene ke uneinei iri rahtele nai mule nenge te poreke toto nge i ke la tetu teu lamau. Ke mele neu tungana nenga tele ngana poreke pol mana pe nei ol poreke toto ol.”

### *Itei Hel Nenge Te Iech Toto*

<sup>27</sup> Iesus nenene ure nemur ke pomau pe hei e alngana hot lange Iesus nga hulua leteria pe hele, “Hei e

nenge hoe iong pe nauele iong lape mene iechinga.”

<sup>28</sup> Pe Iesus tuacholia i ke teke, “Pa nem ero, iri nenge te longe NeHalang nena helenga pe te nanas tau tote iri laka nenge lape te mene iechinga nge palaungana toto.”

### *Ure Nenge Lohote Nge Iona (Mat 12:38-42)*

<sup>29</sup> Hehei pe hana iri halang toto te emurung nge Iesus, ol pe Iesus hele, “Imo hehei pe hana nga etue nei, a poreke toto. A teke e poia ure palaungana e ke henonou hote lek hekerkerenga nenge at nge Non Palaungana. Pe lape e poia ure nem lange imo ero. Lape epoi hot mene ure palaungana nem nenge lohote nge Iona. <sup>30</sup> Ure palaungana nenge hehei pe hana nenge Niniue, ngana laka Iona. Pe ure palaungana nenge hehei pe hana nenga etue nei, ngana laka Non Tuna.

<sup>31</sup> “Etue palaungana nem lape at nenge NeHalang nau tote hehei pe hana lochloch reria poinga mur. Pe nga etue nem imo lape a meia imo. Iange nge nike hei soke nenge sio nem at nga kileng tau ngana ke longo nga Solomon na helenga urana ngana mur. Pe imo nei, none nge soke toto nge Solomon at nge imo lo pe imo a longo nge i ero. <sup>32</sup> Pe pule imo ul hana nenge Niniue lape ames haka nga etue nem pe lape a meia imo pule. Iange iri nenga etue neu Iona haliu hote NeHalang nena helenga mur pe te hulua reria poinga mur. Pe heueu nei none nge i soke toto nge Iona koi tu luluch nge imo.”

### *Lemenge Nenga Singim (Mat 5:15; 6:22-23)*

<sup>33</sup> “Mele pele tonge lemene pe talue nga kileng unne nge talkome ero. Nem pe talkome teua nga kole palaungana letena ero. Lemene nem te talkome ero. Te heon heke mene. Laka iri nenge te teu at te nau ke mallaha. <sup>34</sup> Matam i lemene

nenga singim. Teke matam te urana lochloch letem nge teu pe singim pule tualeme. Pe nenge teke matam te poreke letem nge teu pe singim pule tetu mana nga au. <sup>35</sup> Ke onau ke nek ol. Iange lape lemenga nga letem i chantom. <sup>36</sup> Ke ngana laka nenge teke singim lochloch tualeme pe unne nge chantom ero iong o tualeme lochloch sapelpele. Ke pomalaka nga lemenga palaungana nge tualeme hite iong.”

<sup>37</sup> Iesus hele ke het pe non Paresio e hele lange Iesus ke la ngau luluch nge i. Iesus iteu nga ana non na pele pela kila sio sapele nga ngaunga munna nenge te ngaungau ia. <sup>38</sup> Iesus nun ero pe la ke are sio pe ngau mana. Ol pe non Paresio neu neue nge manga Iesus lome penna ero pe rura toto nga Iesus poi ngana neu.

<sup>39</sup> Pe Iesus hele lange i, “Imo Paresio nemur, a lomo menmene amo eulinga pe amo pan mur singiria nenge hot pe nga letemo nge teu a muta toto ia poinga nenge kemenge pe sachumchum pe poinga poreke ngana hel pule. <sup>40</sup> Imo amo hauaua! I nenge umeia singira nge hot mai umeia leteria ero kai? <sup>41</sup> Pomalam a mene ngaunga pe ech nenge mateu nga pan pe eulinga nemur pe a tunge lange iri nenge aria ngaunga ero. Nenge apoi ke pomai pe ure lochloch ngana lape lemlem nge imo ol.

<sup>42</sup> “Imo Paresio nemur a neknek ia! Ure poreke ngana lape lohot nge imo iange imo a nanas tau mene hotonga kinkino ngana mur. Pe hotonga papalauna a nanas taua iri ero toto. A takiraua ngaunga kinkino ngana nge manga loi tana pe ngaunga ehech ngana ke huna iri analoch pe a tunge huna elle lange NeHalang. Pe hotonga nenge apoi ke nek lange pekngamo mur, a nanas taua ero toto. Pe hotonga nenge lememo tau tote NeHalang a nanas taua ero toto pule. Teke a nanas taua tote hotonga kinkino ngana nemur pomere nenge a nanas taua hotonga papalauna ke nek ero?”

<sup>43</sup> “Imo Paresio mur a neknek ia imo! Iange lememo tau totote arenga nemur nga muka toto nga heteronga ana pele. Pe lememo ke te hele ke urana toto lala nge imo nga ingala munna mur.

<sup>44</sup> “A neknek pule iange imo a pomalaka nga mele koluna nge tealo hite pe tetua ele ero. Pe hana nenge tei haka nga ona lape te poreke sapele iange te eteia ero.”

<sup>45</sup> Ol pe none nge etei toto nga hotonga tuacholia Iesus, “Non Soke, o hele ke mam pe o hele poreke imem pule iam.”

<sup>46</sup> Pe Iesus hele, “Imo nenge a etei toto nga hotonga mur a neknek ia pule iange imo a poia hana ke te takisia ure meena toto ngana nenge te alker taua. Pe imo sipomo a tunge perimo kukana elle ke a halaua iri ero toto.

<sup>47</sup> “A neknek ia pule iange a hemalmal heke hetatalonga mur aria metenga munna nenge lemo tete mur te hune iri nge nike. <sup>48</sup> Ke nga poinga nei imo sipomo a henonou hot pengpeng ia utar nenge lemo tete mur te poia. Iri te hune hetatalonga mur pe imo a hemalmalia aria polo. <sup>49</sup> NeHalang eteia ke ulolo ke ngana laka nenge hele ke teke, ‘Lape e kulosia hetatalonga mur pe hekulkulonga mur. Pe hel nge hana nemur lape te hune iri pe hel lape tepoi poreke iri.’ <sup>50</sup> Ke pomalam tuangachol poreke ngana nga huninga nemur lochloch lape sio pengpeng nge hana nenga etue nei. <sup>51</sup> Talun ngana nga huninga nenge Apel ke langa huninga nenge Sakarias. (Sakarias te hune i nga hatanga pe NeHalang munna nenge heo ngana toto tunangaria). E hele pengpeng lange imo nenga etue nei lape a mene melmelenga palaungana nga ure nemur lochloch.

<sup>52</sup> “Imo nenge a etei toto nga hotonga mur a neknek ia pule iange hehei pe hana muteria toto ke te eteia NeHalang pe imo a unele lohenga nge hehei pe hana ke teteu langa



eteinga nem ero. Pe imo ateu langa eteinga nenge NeHalang ero pule.”

<sup>53</sup> Iesus lohaka ke ii lo pe Paresio mur pe hotonga ana hetoronga mur te hele poreke tote i pe te tutue i nga helenga pe te onteiteia i. <sup>54</sup> Tepoi ke pomau iange te teke te ollaka hotote Iesus. Pe nenge teke Iesus tamal hote helenga e nge poreke lape te hele hot sapele i.

## 12

### *Apoi Ke Mange Paresio Mur Ero (Mat 10:26-27)*

<sup>1</sup> Iok laol, hulua halang toto teat ol nenge te heit ulu hel iange kileng muta toto. Pe Iesus talun ke hele tala lange nena hana nemur nenge hetotore iri ke teke, “Anau ala amo ke nek toto nga poinga nenge Paresio mur te popoia iange iri hana nenge te heleia ute nem pe te poia ure e nge altoto! <sup>2</sup> Ure lochloch ngana nenge a talkomkome NeHalang lape hemallaha hote. Oe, ure lochloch ngana nenge a talkomkome NeHalang lape poi hote ke mallaha. <sup>3</sup> Utar nenge a hele komkome nga miliko NeHalang lape hemallaha hote nga sinanga. Pe utar nenge a mangun tele helel ia nga lemo pele letena lape temes hot ia nga aeteme pe te haliu hote lange hulua mur.

<sup>4</sup> “E hele lange titik mur imo, a mataua iri nenge te hune singimo mana ero. Iange nga hoena ol lape te poia ute pele lange imo ero ol. <sup>5</sup> Iok, lape e henonoua mele nenge a mataua. A mataua laka i nenge nena kerkerenga palaungana nge hune ita ke het pe sau sue ita langa melmelenga ana kileng. Oe, e hele lange imo, a mataua laka i lo!

<sup>6</sup> “Ngie simsim iri lime te olia iri nga umtutuna nai mana (2 toea). Pe NeHalang letene metene iri lochloch pe hile hote e nge iri ero. <sup>7</sup> Pomalam mana palpalumo ina mur te sisala lochloche iri ke ulolo. A matau ero

iange nga NeHalang matana NeHalang lemene tau tote ita nga ngie simsim mur.

<sup>8</sup> “Ke e hele lange imo pengpeng urana toto nge mele nenge mes haka pe haliu hote iau ke teke, ‘Iesus i Non Tuna. Pe Iau letek manmanna nge i.’ Nge mele nem Iau lape e haliu hote i lange NeHalang nena angkelo mur ke e teke, ‘Non nei, iau lek non ia.’ <sup>9</sup> Pe poreke toto nge mele nenge mes haka nga hulua mataria pe hele ke teke, ‘Iau letek manmanna nge Non Tuna ero.’ Iange iau pule lape e hele lange NeHalang nena angkelo mur ke e teke, ‘Iau e eteia non nei ero i.’ <sup>10</sup> Pe iri nenge te hele poreke Non Tuna lape NeHalang letena poreke mule ia iri. Pe iri nenge te hele poreke Opepengpeng, NeHalang lape letena porekeia iri ero toto.

<sup>11</sup> “Teke te laua iong pe te mene iong langa hetoronga ana pele ke te onteia iong, omes nga hana papalauna nemur mataria pe sam loiloi ero. Pe pule letem tuanin rara nga utar nenge lape o hele ia ero. <sup>12</sup> Iange nga etue nem pengpeng lape Opepengpeng hetore iong nga utar nenge urana nge o heleia.”

### *Helenga Opene Nga None Nge Nena Ure Halang*

<sup>13</sup> Pe none nga hulua leteria hele lange Iesus, “Non Soke o hele lange tik ke tunge ure nemur nenge temek mete hatalia unne at nge iau.”

<sup>14</sup> Pe Iesus hele lange i, “Ia, itei nenge talue iau ke e poia ume nemam? Iau ak ume nem ero iam.” <sup>15</sup> Iok laol, Iesus hele lange iri, “Anau ala ke nek toto nga poinga nenge taeu lochloche ure pe ta teke ita toro mana rera. Iange mele nenge na ure halang nem, ure lochloch ngana nem tunge maulinga nge koko lange i ero.”

<sup>16</sup> Ol pe Iesus heleia helenga opene e lange iri pe hele, “Non e nge na ure halang neu ana ume mur nganangaria ke halang toto. <sup>17</sup> Pe letena tuanin nge i sipona ol, ‘Lape epoi ke

mere mai ol? Ure lochloch ngana nei muria ero ol i! Lape e tatach teua iri langai mai?’

<sup>18</sup> “Ol pe ana non lohaka pe hele, ‘Eh! lape epoi ke mai i! Lape etoto sue pele nemur pe e lele mule hel nge papalauna toto. Ke lape e tatach teua ak ume nganngana mur pe lek ure mur. <sup>19</sup> Pe lape letek tuanin ke e teke: Lek ure halang pamlo nge lape tu ke hesinga halang toto. Lape e tutu manmanna ol. Pe lape eare ke e ngau haka manmana ol pe pule lape e inin pe e iech manmana ol!’

<sup>20</sup> “Ol pe NeHalang hele lange i, ‘Iong nge am hauaua toto iam! Heueu nga miliko nei lape o mete. Pe ure lochloch ngana nenge o talue nem lape itei mene iri?’

<sup>21</sup> “Ke i pomalam mana. Mele nenge heu kinia ure mur ke teke i toro nena, lape nena ute e ero toto nga NeHalang matana.”

#### *Letemo Una Sakilil Ero (Mat 6:25-34)*

<sup>22</sup> Iok, Iesus hele lange nena hana mur nenge hetotore iri, “Ke pomalam e hele lange imo, letemo una sakilil nga atu ngamo nga ich nei ero. Letemo tuanin rara sakilil ero nga utar nenge lape a ngaua pe nga singimo pe nga utar nenge lape a mele. <sup>23</sup> A maul ngamo, i palaungana toto nga ngaunga pe singimo, i palaungana toto nga ure nenge ta heronronia iri. <sup>24</sup> Anau langa ngie mur. Tetua aria ngaunga ero. Pe te lulu aria ero. Pe te lele pele ke te tatach teu aria ngaunga ia ero. Pe NeHalang i sipona hengaua iri. Pe imo nge a ele haka toto nge ngie mur laka! <sup>25</sup> Amo tei nge imo nge letemo una sakilil? Pomere? Letemo nem poia imo ke heloloune atu ngamo nga ich nei ke sase pol? <sup>26</sup> Nenge teke nakumo ero nge a poia ure sune nei, pomere nenge letemo una sakilil nga ure lochloch?

<sup>27</sup> “Anau langa ae nemur te haka ngaria. Tehei pe roraria te palola hot

ke nakuria urana toto. Pe e hele lange imo pengpeng Ne Solomon nge nike nena ure urana ngana mur halang. Pe i heronia ure urana ngana pele nge urana toto ke pomanga ae rorana nemur ero. <sup>28</sup> Letemo metene ke nek NeHalang hemele heilil mur nenge tetu ke te maulul heueu nei pe nge rou te parsue pe tesau heke iri nga oan. NeHalang tunge malenga urana ngana langa ure nemur nenge tetu ke choro mana. Pe imo lape NeHalang tunge malenga lange imo pule? Imo nge letemo manmanna ngana unne sune mana iam! <sup>29</sup> Letemo una sakilil ero nga utar nenge lape a ngaua pe utar nenge lape a inia. Pe letemo meena ia ero. <sup>30</sup> Nenge letemo una sakilil nga ure nemur, apoi ke mange hulua nemur nenge te etia Tememo NeHalang ero toto. Leteria tu hit mene reria ure mur. Pe imo ero. Tememo nga lut eteia ke imo lememo taua ure nemur ke a mene pule la. <sup>31</sup> Urana ngana a tango rara tele ure nenge opemo ana ngaunga pe NeHalang nena naualanga urana ngana. Pomalam lape tunge ure nenge lememo tau tote lange imo pule.

<sup>32</sup> “Imo sipsip tutuna mur a matau ero iange Tememo iech toto nge mene imo ke atu teu nga nena naualanga nge urana toto. <sup>33</sup> A laia lemo ure mur nga ingaala ke te olia iri pe a tunge umtutuna lange iri nemur nenge reria ero. Ol pe imo a mene laka lemo umtutuna ana mateunga e nge poreke erochro. Pe ure nem nganangana mur laka ure urana ngana mur nenga lut nga tapa nenge tetu ke koko. A tango rere ure nemur ke a mene iri pule. Ure nemur kemenge ana hana mur tekeme ia ero toto pe kankan ngau ule ero pule. <sup>34</sup> Ke imo lape letemo tuit menmene laka kileng nemur ol nenge a talue lemo ure urana ngana mur ia.

#### *Atu Pe Anau Ala*

<sup>35</sup> “A kale masia amo tal pe a tonge lemo lemenga ke remenmen pe anau

alala nga utar nenge lape lohot. <sup>36</sup> Pe apoi ke pomanga hana hel nge te kulkulelele aria soke nge mule nga leinga heueu ngana e ana ngaunga matana. Pe teke non soke nem at ke ischong nga piunga te lohe piunga ke ueiuei mana lange i. <sup>37</sup> Ke iri nenge aria soke at pe hottaua iri nge te mesmese kura, iri nemur lape te iech toto. E hele lange imo pengpeng non soke nem lape nek hit tote imo pe lape hetakile imo pe hengaua imo. <sup>38</sup> Pe nenge teke Non Soke nem at nga miliko tuna ma nga uachuach pe hana nemur tenau alala kura, iri lape te iech toto. <sup>39</sup> Pe letemo metene nei ke nek; Nenge teke pele tokoninga eteia etue nenge kemenge ana hana mur te atat ia i lape nauala ke nek toto ke kemenge kina nemur te palchach teua nena pele ero. <sup>40</sup> Imo pule a nauala ke nek toto iange Non Tuna lape at mule nga etue nenge imo a teke i atia ero.”

<sup>41</sup> Pe Petrus ontei, “Non Soke, iong mai o heleia helenga opene nei atat nge imem mana kai? Eh? Nge hana lochloch?”

<sup>42</sup> Pe Iesus tuacholia, “Itei nge imo hana nenge a umume nge letena song ke urana pe poia ume ke nek? I laka nenge ana non soke letena here nge nauele pele pe tunge nena hekuleileinga mur aria ngaunga nga ngaunga ana etue pengpeng. <sup>43</sup> Mele nem lape iech toto nenge teke ana soke at pe hottaua i nge popoia ana ume. <sup>44</sup> E hele ke manmanna toto lange imo mele nem lape non soke talue i ke nauele nena ure mur lochloch. <sup>45</sup> Pe lape mele nem letena tuaninin nge i sipona ke teke, ‘Ah! Ak non Soke nem lape at ke ueiuei ero iam.’ Ol pe talun ke nos lapue hehei pe hana nenge te umume. Pe pule popoi ngaunga matana pe inin ech kerkereng ngana pe poi rara hulu. <sup>46</sup> Pe ana soke lape at mule nga etue nenge ana non eteia ero ke kulele i ero. Non soke nem at pe lape chatulu hite pe lope hote i kela tu luluch nge

hana nenge te longo tau erochro.

<sup>47</sup> “Tok, nenge teke none nenge umume pe eteia non soke nem lemene ngana pe na melel tana toto nge nanas taua non soke neu lemene ngana, lape tenos ulu hit tote i. <sup>48</sup> Pe mele nenge eteia non soke neu lemene ngana ero pe poia poinga nenge lape te nosia i ia lape ana nosinga meena ero. Iri nenge NeHalang tunge aria ume halang pe letena here iri nge te poia ke nek, lape NeHalang angala mana nge esia aria ume ngangana mur nge lohot ke halang toto. Pe iri nenge NeHalang tung ke aria ume halang nge halang toto lange iri pe letena here iri nge te poia aria ume ke nek, lape NeHalang angala mana nge esia aria ume nganangana mur nge lohot ke halang nge halang toto.”

#### *Jesus Lasia Ita (Mat 10:34-36)*

<sup>49</sup> “Esio at ngak nei. E atia oan ke etun hite nga ich. Pe lemek toto ke oan nem ngaulala haka ke ueiuei. <sup>50</sup> Iau lape e mene henuninga e kura ke heueu nei letek meena toto ia kura. Pe letek meena ngana nem lape tu ke la het nga etue nenge e mene henuninga nem. <sup>51</sup> Imo mam a teke eat ke epoi hote tunga nge urana nga ich kai? Ero toto! E hele pengpeng lange imo eat ke e lasia. <sup>52</sup> Talun heueu nei ke la ol nga pele elle none pe nehei pe tuturia mur telas hel. Mol lape iri altoto nga nai pe nai lape iri altoto nga mol. <sup>53</sup> Lape telas hel ke non neu i altoto nge tuna tamane ngana pe tuna tamane ngana i altoto nge temene. Pe hei neu i altoto nge tuna hei ngana pe tuna hei ngana i altoto nge tana. Non neu lape i altoto nge uene pe uene i altoto nge i.”

#### *Heteinga Nenga Etue Mur (Mat 16:2-3)*

<sup>54</sup> Iesus hele lange hulua nemur, “Nenge teke a naue ulu nge ma hot nga tapa huna pe a hele sapele ke a

teke, 'Lape pitte mol heueu.' Pe la pitte nem mol. <sup>55</sup> Pe teke a amneia tutula nge song ke ramana haka at nge sio pe a hele ke a teke, 'Lape kileng milang toto heueu.' Pe la kileng milang. <sup>56</sup> Imo apoi ke manga mamulou! Nenge teke a esia ute nge lohote nga ich nei pe nga tapa sana neu pe a etei pengpeng ia ure nem luna. Pe pomere toto nenge a esia ure mur nenge te lohote nga etue nei pe a eteia luna ero?

<sup>57</sup> "Pomere nenge imo sipomo a amnei urume poinga nenge poreke pe nga poinga nenge urana ero? <sup>58</sup> Nenge teke none hele ote iong nga ute pe mene iong ke a hepengia, iong opur kikim ke imo nai a hepeng olole nga kue nike. Teke ero lape non nem mene iong ke laia iong nge hana nenge te longlongo pe te amnei teu langa helenga mur. Pe hana nemur lape te tunge iong langa palpal hussu mur peria pe palpal hussu mur lape te tamal teua iong langa tuele au ngana. <sup>59</sup> Pe e hele pengpeng lange iong lape o lohote nga lamam ero toto ke la het nga etue nenge o tuachol taua lem hangonok mur."

## 13

### *A Hulia Letemo*

<sup>1</sup> Iok, nga etue nem hana hel te hele lange Iesus ke teke, "Mele hel nge Kalelea te makmak pulumakau ke te heto hekeke NeHalang pe Pilatus nena hana mur te hune iri. Te hune iri pe eiria maluluch nga pulumakau nemur eiria." <sup>2</sup> Pe Iesus tuacholia iri ke pomai, "Iri mam, te hune iri ia? Te poreke toto nge hana lochloch ngana nenge Kalelea ma? <sup>3</sup> Ero! Pe e hele pengpeng lange imo nenge teke a hulia lemo poinga poreke ngana mur ero lape a mete ke pomange iri. <sup>4</sup> Iok, anau lange hana analoch pe rahte mol nenge Siloam. Hana nemur, pele sase ngana e losio haka nge iri ke te mete. Iri mau te poreke toto nge hana lochloch ngana nenge

Ierusalem kau? <sup>5</sup> Ero! Pe e hele pengpeng lange imo, nenge teke a hulia lemo poinga poreke ngana mur ero lape a mete ke pomange iri."

<sup>6</sup> Iesus heleia helenga opene nei, "None ana popi tana e mes nga ana ume letena. Ana non i langa ae nem ke teke nau rara nganangana. Pe ae nem nganangana ero. <sup>7</sup> Ol pe hele lange non nenge umume nga ana ume. 'Ae nei nganangana ero ke hesinga iri mol lo i! O telesue ol! Iange hesil mene ich i.' <sup>8</sup> Ol pe non nenge umume neu hele, 'Non soke, ae nem tu mukam ke hesinga elle mule. Pe esel hote ich nga huna pe etal teua ana ngaunga. <sup>9</sup> Pe teke nganangana mule nga hesinga nem, urana. Pe teke ero e telesue ol.' "

### *Iesus Hemasmas Nga Sapat Ana Etue*

<sup>10</sup> Nga Sapat ana etue Iesus hetotoro nga hetoronga ana pele. <sup>11</sup> Pe hei e nge uneinei poia i ke kina chachau tu lamau pule. Haleles neu tu nge i ke hesinga iri analoch pe rahte mol. Pe mes haka ke pengpeng ero. <sup>12</sup> Iesus esia i pe iu lange i pe hele, "Hei nem, am haleles nem het ol." <sup>13</sup> La ol pe Iesus tal heke penna nge ana hei pe ueiuei mana mes haka ke pengpeng mule. Ol pe talun ke heto heke sapele NeHalang.

<sup>14</sup> Pe non soke nenga hetoronga ana pele neu letena inin iange Iesus hemasmas nga Sapat ana etue. Ol pe hele lange hehei pe hana, "Etue iri rahte elle ta umume ia ara ume mur. Pomalam aat nga etue nemur ke te hemasia imo. Pe nga Sapat ana etue ero."

<sup>15</sup> Ol pe Iesus tuacholia, "Imo mamulou mur! Nenge teke lemo pulumakau e ma tongki e mete ana ech nga Sapat ana etue, lape a einia ero ma? Imo lochloch lape a einia la! <sup>16</sup> Pe hei nei i Apraham tuna ia. Pe Non Poreke Ngana rahit tote i ke hesinga iri analoch pe rahte mol



(18). Ke ute pele nge poreke ero nge e hemas mule i nga Sapat ana etue.”

<sup>17</sup> Iesus hele ke mau ol pe iri lochloch ngana nenge te hele poreke i teme i tote iri. Pe iri hulua lochloch te iech toto nga ure lochloch ngana nenge Iesus poia ke urana.

*Helenga Opene Mur Nga NeHalang Nena Naulanga Pe Nekinga*

*(Mat 13:31-33; Mak 4:30-32)*

<sup>18</sup> Iok Iesus hele, “Lape e hele urume NeHalang nena naulanga pe nekinga ke mere? Pe lape e hele urume langa utar? <sup>19</sup> I pomalaka nga ae tutuna nenge kinkino toto nenge none tue nga ana ume. Iok, ae nem haka ol pe tana palaungana toto. Pe ngie mur te talue reria kiniu nga perperna mur.” <sup>20</sup> Pe Iesus ontei mule, “Lape e hele urume NeHalang nena naulanga pe nekinga ke mere? <sup>21</sup> I pomalaka nga is unne sune nenge tepoi teu luluche nga beret nge halang toto pe te hulua nga tuninga e nge palaungana toto. Pe is nem poia beret itach ngana ke una haka ke palaungana toto.”

*Pele Matana Hoholoch Ngana Sune*

*(Mat 7:13-14, 21-23)*

<sup>22</sup> Ol pe Iesus i ke lala nga kileng mur pe hetoro olole ke ramana lala nge Ierusalem. <sup>23</sup> Pe mele onteia i, “Non soke, iri nenge NeHalang lape mene mule iri lape iri unne sune mana kai?”

Pe Iesus hele lange iri, <sup>24</sup> “Apur kikimo toto ke a teu langa piunga matana hoholoch ngana sune nem. Iange hulua halang lape te teke teteu la toto. Pe e hele lange imo pengpeng hulua lape teteu la ero. <sup>25</sup> Nenge teke pele tokoninga piu hele piunga nem lo imo lape ames mana nge hot ol. A ischong teueu pe a tangtang ke a teke, ‘Kole, o lohe piunga nge imem!’

“Pe i lape tuacholia ke teke, ‘E eteia imo ero pe e eteia aat ngamo ero pule iam!’

<sup>26</sup> “Pe imo lape a teke, ‘Imem laka nenge mo ngau pe moin luluch nge iong. Pe iong laka nge o hetottoro nga lememe kileng ana kue mur.’

<sup>27</sup> “Pe lape tuacholia iri ke teke, ‘E eteia imo ero pe e eteia aat ngamo ero pule! A ua toto lamam. Imo nenge a popoi poinga poreke toto ngana laka. Lemek ero toto imo!’

<sup>28</sup> “Imo lape atu manmana nge hot pe a tangtang pe ngingimo chatrekreke pe a amneia melmelenga palaungana. Lape a esia Apraham pe Isak pe Iakop pe hetatalonga nemur nge tetu teu nga NeHalang nena naulanga pe nekinga. Pe imo sipomo lape a lasus toto. <sup>29</sup> Hulua halang lape teat nga chaia aka ngana pe chaia sio ngana pe nga kileng rumena pe nga kileng sana. Ke lape teare teu nga ngaunga matana palaungana nem nga NeHalang nena naulanga urana toto ngana. <sup>30</sup> Pe manmanna toto ke iri nenge iri hoena lape iri muka pe iri nenga muka lape iri hoena mule.”

*Iesus Lape Mete Nge Ierusalem*

*(Mat 23:37-39)*

<sup>31</sup> Iok nga etue neu Paresio mur hel teat nge Iesus pe te hele lange i ke teke, “O ua nga kileng nei ke ola nga kileng unne. Iange non soke Herot teke hunune iong.”

<sup>32</sup> Pe Iesus tuacholia iri, “Ala ke a hele lange non pallaklakanga kina nem, ‘Iau lape e helope hote uneinei mur pe e hemas mule hehei pe hana heueu pe nge rou pe nga etue mol ngana lape e heulo hote ak ume mur.’

<sup>33</sup> Pe ute nenge palaungana heueu nei mai ngana laka nenge e teke ela toto nge Ierusalem. Ke iau lape ei heueu pe nge rou pe nge pong nai ke ela toto. Iange manmanna toto ke hetatalonga e tehun sio mene nga kileng unne ero. Tehun pengpeng ia nge Ierusalem.

<sup>34</sup> “Ochou! Imo hana nenge Ierusalem! Imo ahun lapue hetatalonga mur pe a tamal hune hana

nenge NeHalang kulosia iri ke teat nge imo. Kokoës e teke e eukiraua imo ke pomanga pareo heingana nenge eü teua tutuna mur nga sahana ene. Pe imo lememo ero nge e eukiraua imo. <sup>35</sup> Ke lape NeHalang nau langa lemo pele ero toto. Pe e hele pengpeng lange imo, lape anau mule iau ero ol kela het nga etue nenge lape a hele ke a teke, ‘Petenga nge palaungana toto lange i nenge at nga Non Soke ene.’”

## 14

### *Iesus Hemasia None Nge Singina Haleles*

<sup>1</sup> Nga Sapat ana etue Iesus lake ngau nga Paresio mur aria soke nena pele. Pe hehei pe hana nga lamau tenau ala tote i. <sup>2</sup> Pe none nge ana haleles nenge singina hakokoia mes nga Iesus matana. <sup>3</sup> Ol pe Iesus onteia Paresio mur pe hana nenge te etei nga hotonga mur ke teke, “Ita mai ra hotonga e nge hele ke teke ta hemasma nga Sapat ana etue pule? Ma ero?” <sup>4</sup> Pe Paresio nemur te reng mana. Iok laol, Iesus rahite non neu pe hemasia i sapele. Hemasia i ke het pe kulosia i ke la sapele.

<sup>5</sup> Iok, Iesus hele lange iri pe onteia iri, “Nenge teke tumo e ma lemo pulumakau e losio teu nga ech ana polo nga Sapat ana etue lape a poia ke mere? Lape atak hote i ke ueiuei mana ma ero?”

<sup>6</sup> Pe iri te reng mana iange nakuria ero nge te tuachol ia Iesus.

### *Otal Heke Iong Ero*

<sup>7</sup> Iesus tu nga non soke neu na pele kura pe esia hana hel nenge ana non soke iua iri pule. Pe hana nemur tela ke te mene muria nge uranrana nga ngaunga ana manga. Ol pe Iesus heleia helenga opene nei. <sup>8</sup> “Nenge teke none hekulo am ke oat nga ngaunga matana nenga leinga heueu ngana, o mene mullim e nge urana toto ero. Iange lape mele nge

i soke toto nge iong lape te hekulo ana ke at pule. <sup>9</sup> Ke pomlam lape non nenge hekulo amo nem lape at pe hele lange iong ke pomai, ‘O ua nga non nei munna!’ Nga poinga nei lape non neu hemeia iong pe talsio tote iong ke lape ola mule nga hoena toto. <sup>10</sup> Ke nenge teke te hekulo am ke oat nga ngaunga matana nem o mene mullim e nga hoena toto nike. Pomalam lape non nenge hekulo am nem lape at pe hele lange iong ke teke, ‘Neingak, ola ke o kila nga muka toto.’ Nga poinga nei lape pekngam mur nenge imo ul atu nem te heto heke tote iong. <sup>11</sup> Iri nenge tetal heke mule iri siporia, lape Non Soke tal sio tote iri. Pe iri nenge tetal sue iri siporia mule lape Non Soke tal haka tote iri.”

<sup>12-14</sup> Iok Iesus hele mule lange tokoninga nenga ngaunga matana neu ke teke, “Nenge teke o poia ngaunga matana, o iua hana nenge reria ure halang ero. O iua laka iri nenge tetu poreke toto pe haleles poia iri ke singiria ele mete pe mataria hit. Pomalam lape Non Palaungana pete iong toto. Iange iri te tuacholia lange iong ero. Non Palaungana i sipona lape tuacholia lange iong nga etue nenge hana uranrana ngana mur te lohaka mule nga metenga. Pe nenge teke o iua pekngam mur pe titim mur pe alom mur pe lem kileng ngana mur nenge reria umtutuna halang lape iri siporia te tuachol mule lange iong ke o mene urum nge Non Palaungana ero ol.”

### *Helenga Opene Nga Ngaunga Matana Palaungana (Mat 22:1-10)*

<sup>15</sup> Non elle nge iri hana nenge te ngaungau neu, longe Iesus nena helenga pe hele lange Iesus, “NeHalang lape poia ngaunga matana palaungana nga nena naualanga pe nekinga urana ngana. Pe iri nenge teat ke

te ngau nga ngaunga matana palaungana nem lape te iech toto.”

<sup>16</sup> Pe Iesus tuacholia, “Non e teke poia ngaunga matana palaungana e. Ol pe hekulo helenga lange hulua halang ke teat nga ngaunga matana nem. <sup>17</sup> Nga ngaunga nem ana etue pengpeng non soke neu kulosia nena non nenge umume nge i ke song taua hana nenge te hekulo aria. Pe hele lange iri ke teke, ‘Aiat ol! Ngaunga kalum lo.’

<sup>18</sup> “Pe iri lochloch ngana te hele ke teke tetu mule iange te teke tetu ke te poia aria ume hel pule. Elle nge iri lohaka pe hele, ‘Iau eol hote ich unne lo koi ke ela ke enau tote mukam.’

<sup>19</sup> “Pe elle pule hele, ‘Iau heueu mana nei eol ke pulumakau iri analoch. Pomalam ela ke e totoi tote iri mukam.’

<sup>20</sup> “Pe elle pule hele, ‘Iau elei heueu mana koi ke lape ela ero.’

<sup>21</sup> “La ol pe non neu i ke la mule pe la hele lange ana non soke. Ol pe pele tokoninga nem letena inin toto pe hele mule lange non nenge umume nge i ke teke, ‘O song ke ueiuei mana ke ola nga kue tana mur pe kue kinkino ngana lochloch pe o hele lange hana nenge tetu poreke toto pe haleles poia iri ke singiria ele mete pe mataria hit. O hele nge iri ke teat lochloch.’

<sup>22</sup> “Tok laol, non nem la pe at mule pe hele lange ana non soke ke teke, ‘Ure nenge o heleia at nge iau e poia ke het lo. Pe pele neu muta ero kura.’

<sup>23</sup> “Ol pe non soke neu hele la mule nge nena non neu, ‘O song hot ke ola nga kileng kinkino ngana nemur nga tau pe o ngai heke iri ke teat lochloch ke te hemute lek pele. <sup>24</sup> E hele lange iong, none nge iri nenge e hekulo tala aria lape at ke ngau hote ngaunga unne nga lek ngaunga matana nei ero toto.’”

*Ta Nanasia Iesus Pe Letera Tuanin Kenek  
(Mat 10:37-38)*

<sup>25</sup> Hulua halang te koko nge Iesus pe Iesus naula mule nge iri pe hele,

<sup>26</sup> “Mele nenge teke nanasia iau hile tote temene pe tana pe nehei pe tutuna mur pe titina mur pe liliuna mur. Pe pule hile tote i sipona. Laka nanasia iau ol. <sup>27</sup> Mele nenge takiskis ia melmelenga luluch nge iau ero, iau lek non toto laka i ero.

<sup>28</sup> “Nenge teke none hemesia pele palaungana e, kila ke nek pe ume hote pele nem uruna pe eteia ke umtutuna purpur tote pele nem. <sup>29</sup> Pe nenge teke poia ero lape hemes heke pele nem haena pe aluana tu. Pe iri nenge te esia te songlele ia i pe te hele, <sup>30</sup> ‘Non panei hemes heke pele pe heule ero mana.’

<sup>31</sup> “Non soke e nga kileng e teke pal luluch nge non soke e pule nga kileng e. E nena palinga hel ana hana mur iri halang toto pe e unne sune mana. Pe nenge nena hana iri unne sune mana nem, kila pe letena matana ke nek toto. Pe letena tuanin ke mai, ‘Lape ta hekou sue iri ma ero? Iri halang sakilil i!’

<sup>32</sup> “Non soke nem letena tuanin ke mau pe eteia nge nakuna ero nge iri ul ke te palhel. Pomalam lape poi ke pomai; Hana nenge iri halang tetu ke sase kura pe i nenge na hana unne sune mana nem kulosia hana hel ke la te hele toto mule ke te teke palinga hel nem lasus ol.”

<sup>33</sup> Ol pe Iesus hemallaha hote helenga opene nemur ke pomai, “Pomalam letem hile ure lochloch pe o nanas mene iau ol.

<sup>34</sup> “Mesmes i urana pe nenge teke mesmes ngana het opoi mule ke mesmes ero ol. <sup>35</sup> Ke nenge teke pomam i poreke lo. Pe o takiraua ke ich ana ngaunga ia ero pule. O saua ke lasus sapele. Apal talngamo pe a long ke neknek!”

## 15

*Helenga Opene Nga Sipsip Nge Erue  
(Mat 18:12-14)*

<sup>1</sup> Nga etuene e hana nenge te loloch umtutuna pe hana porekreke ngana mur te emurung ke te teke te longo Iesus nge helele. <sup>2</sup> Pe Paresio mur iri ul hotonga ana hetoronga mur te ngunngunu ia Iesus ke te teke, “Non pane lemene taua hana porekreke ngana mur pe ngau luluch manmana nge iri.”

<sup>3</sup> Ol pe Iesus hele ia helenga opene nei lange iri. <sup>4</sup> “Nenge teke elle nge imo nena sipsip iri ana non kina iri lime (100) pe elle erue lape poia ke mere? I lape hile sue sipsip nemur nenge te erue ero. Nenge iri ana non kina iri henel pe analoch pe rahtele henel (99). Hile sue sipsip lochloch ngana nemur pe la ke tango rere elle nem nenge erue. <sup>5</sup> Pe nenge teke hottaua lape iech toto pe takisia <sup>6</sup> ke la mule ia. Ol pe la hele lange pekn-gana mur ke teke aiat ke a iech luluch nge iau. Iange e hottaua lek sipsip nenge erue lo. <sup>7</sup> Pomalam mana e hele lange imo, lape iechinga palaungana lohot nga lut nga tapa nge mele elle nge hul mule letena nga nena poinga poreke ngana mur. Iechinga nem palaungana toto nga nenge iri ana non kina riri henel pe analoch pe rahtele henel nem (99) iange te teke te urana nga NeHalang matana lo. Ke tehul mule leteria nga reria poinga poreke ngana ero.

<sup>8</sup> “Pe helenga e pule nga hei e nge nena umtutuna iri analoch. Pe nena umtutuna elle erue. (umtutuna nemur te ume nga siliua ke uruna aka) Ol pe lape poi ke mere ol? I lape tonge lemenga pe sachalue nena pele letena pe puria ana tangonga ol. <sup>9</sup> Pe teke hottaua lape lake hele nge pekn-gana mur pe na kileng ngana mur ke te emurung pe hele lange iri ke teke, ‘A iech luluch nge iau ol. Iange e hottau mule lek umtutuna lo.’ ”

<sup>10</sup> Pe Iesus hele pule ke teke, “Pomalam mana iechinga palaungana toto lohot nge NeHalang nena angkelo mur nge mele elle nenge hul mule

letena nga nena poinga poreke ngana mur.”

### *Iechinga Palaungana Lohot Nga Kol Mele Nge Ua Temene Ana Pe At Mule*

<sup>11</sup> Iok, Iesus hesapele helenga ke teke, “None tuna iri nai. <sup>12</sup> Pe tuna nenge kino hele lange temene ke teke, “Temek, o tunge lek ure mur atat nge iau nike. Ure nemur nenge lape o mete pe mo mene nge iong.’ Ol pe temene herongo sapele nena ure mur nge iri nai tina.

<sup>13</sup> “Mala ero mana nga hoena kol neu takiraua nena ure mur pe laia ke te olia ke mene umtutuna ia. Ke het pe ua sapele ke langa kileng e nga tau toto. Pe nga kileng neu ana non hesil taua nena umtutuna mur nga poinga poreke ngana pe ure poreke ngana mur. <sup>14</sup> Ol pe uringa palaungana lohot sapele. Pe ana ngaunga ero pe tu ke poreke toto sapele nga kileng neu. <sup>15</sup> Ol pe lake tu luluch nge none nga kileng neu pe non neu poia kol neu ke la nauеле nena kie mur. <sup>16</sup> Pe mete ana toto pe lemene mana nge hemute sana nga kie nemur aria ngaunga. Pe ero. Mele pele tunge ngaunga unne lange i ero toto.

<sup>17</sup> “Iok laol, ana non letena matana ke nek toto ol pe hele sapele, “Temek nena hana mur kou te ngau ke saria unna pe aria ngaunga aluana mama. Pe iau i! E meteak ke e metmete lo! <sup>18</sup> Lape ela mule nge temek pe e hele lange i, “Temek, e poia poinga poreke toto ngana lange NeHalang pe lange iong pule. <sup>19</sup> Iau e urana ero ol nge o hetue iau ke tum iau. Lemek ke o poia iau ke eume manmana nge iong ol.” ’ <sup>20</sup> Iok laol, ana non lohaka pe la sapele nge temene.

“Pe ii nga tau kura pe temene esia i pe letena poreke toto ia tuna pe song ke la lau hite i pe tangia i. <sup>21</sup> Ol pe kol neu hele lange temene, “Temek, e poia poinga poreke toto ngana lange NeHalang pe lange iong pule. Iau e urana ero ol nge o hetue iau ke tum iau.’



22 “Pe temene hele lange nena hana mur nenge te umume nge i ke teke, ‘Ueiuei mana a hemalmalia i nga hengeron e nge urana toto pe apuo teua pon nga penna kukana pe ae ulina nga apena. 23 Pe a hune pulumakau tuna elle nge lum toto pe a lele hite pe tapeu ele ke ta ngau nge i. 24 Iange tuk nei mete lokoi pe mahul haka mule! Pe pule i erue toto lo pe ngana koi e hottau mule nei!’ Ol pe te talune iechinga palaungana nem.

25 “Tepoi ke machmau pe non soke neu tuna tengene ana kou tu nga ume kura. Ol pe hot ume ana ke at rochroi nga pele pe longe iri nge te peupeu pe te heses. 26 Ol pe iua temene nena none pe onteia i ke teke, ‘Hana nemur te potatar mau?’ 27 Pe temene nena non neu tuacholia, ‘Tim pai at mule lo. Pe temem hune pulumakau e nge lum toto ke poia tim na kilanga unne iange ute heporeke tim ero. Urana mana ke at lohot mule nge temem.’

28 “Kol neu tina nenge soke letena inin pe lemene ero nge teu langa pele. Ol pe temene i hot taua i lange hot ke onteiteia pe puochenia i ke teke teu langa pele letena. 29 Pe ana non hele inin taua temene, ‘Onau at, nga hesinga lochoch ngana nei eume manmana nge iong pe e longo ole taua iong ero toto. Pe o tunge utar at nge iau? Pomere nenge o tunge meme e ero ke imem ul pekngak mur mo poia lek kilanga unne ke mo iech? 30 Pe tum poreke ngana nei hesil taua lem ure nge hehei kue tana ana mur. Pe heueu nei at mule nga ra kileng pe o hune ana pulumakau lum ngana ke ngaua.’

31 “Pe non neu hele lange tuna ke teke, ‘Iong, otu luluch nge iau ke kokoes pe lek ure lochloch ngana nemur lape e tunge lange iong ke lem. 32 Pe heueu nei tapeu pe tahes iange tim nei mete lokoi pe maul haka mule. Pe pule erue pe e hottau mule i lo.’ ”

## 16

### *Iesus Hetero Nga Umtutuna*

1 Iesus hele lange nena hana mur, “Nga etuene e, none umume nge non soke e nge nena ure halang. Pe ume ngana nauuelele laka non soke neu nena ure mur. Ol pe helenga e song ke teke non neu hesil sio mene non soke neu nena umtutuna mur. 2 Ol pe non soke neu iu sapele non neu pe onteia i, ‘Pomere nenge ohesil sio mene lek umtutuna? Lape o ume nge iau ke het koi heueu lo. Pomalam ohas sue pe o hele urume umtutuna song ngana at nge iau pe ola ol.’

3 “Ol pe non neu letena tuanin rara sapele, ‘Lape epoi ke mere mai ol? Non soke nei lemene ero iau nge eume nge i ol i! Iau lek kerkerenga ero nge e sesel ich pe e meia iau pule nge e long us rara i!’ 4 La ol pe letena matana pe hele, ‘Eh! Oe, letek metene kue e lo! Nenge teke epoi ke pomai lape hulua te tung peria at nge iau nga etue nemur nenge e ume ero ol.’

5 “Ol pe non neu la ke hele nge hana nenge reria hanganok maite non soke neu. Pe iu teua iri elechle pe onteia iri. Iok, ontei tele nenge i muka, ‘Lem hanganok hia nenge maite ak non soke?’

6 “Pe non neu tuacholia ke teke, ‘Iau, e mene ae oliua eina nge non soke nem. Pe e mene ke kina papalau ngana iri ana non kina lime (100).’

“Iok laol, non nenge umume nge non soke neu hele lange non nenge poia hanganok neu ke teke, ‘O mene hanganok nem ana alalaha at ke ueiuei pe ohas mana ke ana non kina iri nai pe analoch (50).’

7 “Iok onteia e pule, ‘Pe iong lem hanganok hia?’

“Pe non nem tuacholia, ‘Iau, e mene uit nge non soke nem. Pe uit nenge e mene nem ana kole iri ana non kina iri lime iri analoch (1000).’

“Pe non soke nena non neu hele lange non nenge poia hanganok neu ke teke, ‘O mene lem hanganok ana alalaha pe oele sue ke uit kina nem

iri ana non kina lime iri rahtele mol. (800)

<sup>8</sup> “Ol pe non soke neu heto heke nena non nenge na poinga pengpeng ero, iange letena song ke nek toto nge nauele i sipona. Hulua lochloch ngana nenge leteria tu mana nga ich nei, leteria tuanin ke nek toto nge te halau mule iri siporia. Iri te etei tote poinga nem. Pe iri nenge tetu teu nga lemenga tualeme ngana, leteria tuanin ke nek ero. Te poi ke pomange aina kinkino ngana kura. <sup>9</sup> A mene umtutuna mur nga ich nei pe a tunge lange hehei pe hana pe apoi ke nek lange iri. Pomalam nga hoena lape umtutuna nem het pe ala ke atu ke nek mana nga kileng nenge tu ke koko.

<sup>10</sup> “Itei nenge leteria here i nga ure kinkino ngana lape leteria here i pule nga ure papalaungana. Pe itei nenge pallaklaka nga ure kinkino ngana lape pallaklaka pule nga ure papalaungana. <sup>11</sup> Ke nenge teke leteria manmana nge imo ero nga umtutuna pe ure hel pule nga ich, itei lape letena manmana nge imo nga ure urana ngana mur nga lut nga tapa? <sup>12</sup> Pe nenge teke leteria manmana nge iong ero nga mele nena ure lape itei tunge iong sipom lem?

<sup>13</sup> “Non e ume nge hana soksoke ngana nai ero. Iange lape lemene tau tote e pe lemene ero totoia e. Pe mutena tau tote e pe e mutena taua ero. Ke aume mana nge NeHalang pe mutemo taua umtutuna ero.”

<sup>14</sup> Pe Paresio mur te longe Iesus na helenga pe te songlele ia i. Iange iri muteria tau tote umtutuna. <sup>15</sup> Ol pe Iesus hele lange iri, “Imo sipomo a hetei hote imo lange hulua mur iange a teke a urana nga NeHalang matana. Pe NeHalang eteia letemo nge teu ke ulolo. Utar nge palaungana toto nge hana nga ich nei poreke toto nga NeHalang matana.

### *Hetorongā Hel Pule*

**16:10:** Luk 19:17-26

**16:13:** Mat 6:24

**16:15:** Mat 23:28; Luk 18:9-14

**16:16:** Mat 11:12-13

**16:17:** Mat 5:18

<sup>16</sup> “Moses nena hotonga mur pe hetatalonga mur tehas ngaria te nanasia ke la het nga etue nenge Ioanes. Pe nga etue neu pengpeng te hele hote NeHalang nena helenga urana toto ngana nga nena naualanga pe nekinga nge ita. Pe hulua halang tepur kikiria toto ke teke teteu. <sup>17</sup> Tapa pe ich lape tehet pe NeHalang Nena Hotonga ana hasinga unne e erue ero toto.

<sup>18</sup> “Mele nenge hile nehei pe lei haka mule i laka tomtom ia none nehei. Pe mele nenge lei heke mule none nehei nge hile poia poinga poreke toto ngana pule.

### *None Nge Nena Ure Halang Pe Lasarus*

<sup>19</sup> “None nenge nena ure halang pe none nenge tu ke poreke toto. Pe non nenge nena ure halang heronia hengeron urana ngana mur pe nga etue lochloch ngau ke sana una manmana. <sup>20</sup> Pe non nenge tu poreke toto nem ene Lasarus. I singina chanchan hulu pe kokoes mana te mene i langa non soke neu nena piunga matana <sup>21</sup> ke nachnei alala ngaunga mumuna. Pe kaone mur teat ke te ramram ia nena chanchan mur.

<sup>22</sup> “Ol pe nga hoena ana non mete pe NeHalang nena angkelo mur te mene heke sapele i langa lut nga tapa ke la are nga Apraham penna tamalmal. Pe non nenge nena ure halang neu mete pule ke tealohite. <sup>23</sup> Pe i nga ana metenga hoena amneia melmelenga palaungana toto iange opene lake tu nge imperno. Pe teke nau haka la pe esia Apraham nge tu ke kangkanga toto pe Lasarus tu luluch nge i. <sup>24</sup> Ol pe iu ke teke, ‘Temek, Apraham letem poreke ia iau, pe o hele lange Lasarus ke puo teua penna kukana mokona nga ech pe at ke hesipsipia ak hengetau. Iange e amneia melmelenga palaungana toto i, nga oan nei.’

<sup>25</sup> “Pe Apraham tuacholia lange i, ‘Tuk, letem metene? Otu ngam nga

ich, o mene ure urana ngana mur lochloch. Pe Lasarus mene ute pele nge urana ero toto. Ke heueu nei tu luluch nge iau ke nek pe iong o amneia am melmelenga pallem. <sup>26</sup> Pe pule liling e nge palaungana toto koi ma tote ita. Ke mele e nge imem lape lotele lalamam ero toto. Pe mele e nge imo lape lotele at lamai ero toto pule.’

<sup>27</sup> “Pe non neu hele, ‘Tok temek, o kulosia Lasarus ke langa temek nena pele. <sup>28</sup> Iau titik mur iri lime pe e teke Lasarus la ke hele toto reria ke te hulua reria poinga mur. Pomalam lape teat nga kileng poreke ngana nei ero.’

<sup>29</sup> “Pe Apraham hele, ‘Hotonga nenge Moses pe hasinga nenge hetatalonga mur tehas ia ngana la ma lo. Pe nenge teke lemeria te longo taua.’

<sup>30</sup> “Pe non neu hele, ‘Ero iam, Temek! Te longo taua ero toto la! Nenge teke mele nenge mete lo lake lohot nge iri, laka lape te longo taua i pe te hulua reria poinga mur.’

<sup>31</sup> “Pe Apraham hele lange i, ‘Nenge teke te longo taua Moses pe hetatalonga mur ero lape mele nenge mete pe mahul haka mule lape te longo taua i ero pule.’”

## 17

### *Poinga Poreke Ngana*

(*Mat 18:6-7, 21-22; Mak 9:42*)

<sup>1</sup> Iesus hele lange nena hana mur ke pomai, “Manmanna toto ke ure nemur nenge hesingo ia hehei pe hana ke te losio nga poinga poreke ngana mur lape teat. Pe mele nenge poia singo nem nenge helosio ia hehei pe hana lape mene poreke tote. <sup>2</sup> Tuangachol nga poinga nem poreke toto. Pe teke te heon hite um palaungana nga mele nem kanna pe tesau hote langa leme i urana nga tuangachol nenge helosio ia mele sune letena manmanna ngana. <sup>3</sup> Ke pomalam a nauala amo ke nek.

“Nenge teke tim losio nga poinga poreke ngana o heleia i ke hul mule letena. Pe nenge hul mule nena poinga lo, iok, letem metene poi ngana nemur ero ol. <sup>4</sup> Pe nenge teke tim poia poinga poreke ngana e lange iong pe nga hoena hul mule letena, o saua nena poinga poreke ngana mur ke te lasus toto. Pe nenge poi emule mene nga etue choro mana, o saua nena poinga poreke ngana mur ke emule mana pule ke kokoes.”

### *Letera Manmanna Ngana*

<sup>5</sup> Pe Iesus nena hana mur nenge kulos hote iri te hele lange i, “O halaua imem ke letemem manmanna ngana lohot ke palaungana toto.”

<sup>6</sup> Pe Iesus tuacholia, “Nenge teke letemo manmanna ngana tuna mana ke pomanga heilil tutuna, nakumo nge a hele langa ae e ke pomai, ‘O laka haka pe ola ke omes teu nga ruach.’ Pe ae nem longo taua iong la.”

### *Hengekuleilei Mur Aria Ume*

<sup>7</sup> Iok, Iesus onteia iri, “Imo lemo poinga mere? Nenge teke lem hengekuleilei ana non, mule nga ume nenge nauuelele sipsip mur ke at, pe lape o hele lange i ke mere? Lape iteu at heueu mana pe o hele lange i ke are sio pe ngau sapele? <sup>8</sup> Ero toto la! Lape o hele lange i ke o teke, ‘Ola ke onun pe oat ke o poia ak ngaunga ke e ngau ol. E ngau ke het laka, iong o ngau ol.’ <sup>9</sup> Lem hekuleileinga ana non nem, poia ume nemur pe iong o heto heke i ero. Lange i popoia ana ume nenge popoia nike. <sup>10</sup> Ke pomalam nge imo pule, nenge teke apoi taua ure nemur nenge te hele lange imo ke a poia, a hele ke a teke, ‘Imem hana nenge te hekuleilei rere menmene imem. Mopoi mene ume nenge te tunge at nge imem ke mo poia.’”

### *Iesus Hemas Mule Ke Hana Iri Analoch*

<sup>11</sup> Iesus ii nga kileng nge Samaria pe Kalelea tunangaria ke lala nge

Ierusalem. <sup>12</sup> Iteu ke lala nga kileng sune pe saol haka nge hana iri analoch. Pe hana nemur haleles poreke ngana nenge ngau hooa singira poia iri. Pe iri tetu ke kangkanga toto nge hehei pe hana iange singiria poreke toto. Pomalam temes nga tau kura, <sup>13</sup> pe teiu, “Non Soke Iesus, letem ia imem.”

<sup>14</sup> Iesus esia iri pe hele lange iri, “Ala ke a esia hana nenge tunginga ana hana mur ke tenau ke nek nga singimo.”

Iok laol, tei ke te lala kura pe singiria urana sapele. <sup>15</sup> Elle nge iri analoch nem nena nge Samaria. Ana non esia i sipona singina nge urana mule pe la mule pe haliu haka nenge heto heke tote NeHalang ene. <sup>16</sup> Lamule pe tamal sue i langa Iesus apena huna pe hele urana toto lange i.

<sup>17</sup> Pe Iesus hele, “E hemas mule hana iri analoch i, pe rahtele henel nem te lake mere? <sup>18</sup> Pomere nenge non lomona nei i toro at ke heto heke NeHalang?” <sup>19</sup> Ol pe Iesus hele lange non lomona neu, “O lohaka pe ola ol. Letem manmanna ngana laka hemas mule iong.”

### *NeHalang Nena Naulanga Pe Nekinga At Ngana*

(Mat 24:23-28, 37-41)

<sup>20</sup> Iok, Paresio hel te onteia Iesus nga etue nenge NeHalang nena naualanga pe nena nekinga lape at. Pe Iesus tuacholia ke pomai, “Etue nenga NeHalang nena naualanga pe nekinga nem, lape at ke pomanga ure nenge ta esia nga matara ero. <sup>21</sup> Mele ero toto nge hele ke teke, ‘Anau at ngana i!’ Pe pule mele ero toto nge hele ke teke, ‘Eh, Ngana paukou!’ Mele nge lape hele ke pomam ero toto iange NeHalang nena naualanga pe nekinga, ngana laka tuteu nge imo lo.”

<sup>22</sup> Ol pe Iesus hele lange nena hana mur, “Etue nem lape at, pe imo lememo toto ke a teke a naue

Non Tuna nga etue nem. Pe lape a naue ero toto. <sup>23</sup> Lape iri hel pule nenge lape te hele lange imo ke te teke, ‘Anau lala mau! Eh, anau at lamai!’ Pe imo, a longo tau pulute iri ero. <sup>24</sup> Etue nenge Non Tuna at mule ia lape pomalaka nga kileng chalem ngana nenge inlem nga tapa sana pe song ke langa ele pe ele. <sup>25</sup> Pe ure nenge lohote tala nga Non Tuna ana etue ngana koi nei, lape Non Tuna amneia melmelenga palaungana pe hulua lochloch nga etue nei lemeria ero ia i mukam. Ke het pe etue nem lohote.

<sup>26</sup> “Non tuna ana etue lape lohote ke pomanga etue nenge Noa. <sup>27</sup> Nenge hulua lochloch te ngaungau pe te inin pe te lechlei kela het nga etue nenge Noa iteu langa nena imote. Pe ech hot ke taua kileng pe te mete lochloch.

<sup>28</sup> “Pe pule Non Tuna ana etue lape lohote ke pomanga etue nenge Lot. Nenge hulua lochloch te ngaungau pe te inin pe te ialala pe te umume aria pe te lelele pele. <sup>29</sup> Pe nga etue nenge Lot ua hot nge Sotom, oan remenmen ngana pe um ngingina ngana telot parai sio at nga tapa ke pomanga pitte ke te hune iri lochloch ke te mete.

<sup>30</sup> “Ke Non Tuna ana etue nenge lape at muleia pomalam mana.

<sup>31</sup> Nga etue nem pengpeng, mele nenge tutu nga one, teu langa pele letena ke lolochia nena ure mur ero ol. Pomalam mana none nenge tutu nga ume la mule nga na pele ero ol. <sup>32</sup> Letemo metene Lot nehei? <sup>33</sup> Mele nenge teke heleis maul ngana nga ich nei, lape tu ke maulul nga hoena ero ol. Pe mele nenge tungteu tote i, pe hile sue lemene ngana mur nga ich nei lape tu ke maulul mana nga hoena. <sup>34</sup> E hele lange imo pengpeng, nga miliko nem aina nai tema nga hete elle pe elle nge iri lape te ua toto ia, pe elle mana lape ma ol. <sup>35</sup> Pe hehei nai lape te olole mioka pe elle nge iri lape te ua toto ia pe elle mana



tu ol. [36 Hana nai te umume nga ume pe elle nge iri te ua toto ia pe elle mana tu ol.]”

37 Pe Iesus nena hana mur nenge hetotore iri te ontei, “Ure nemur lape te lohot langai?”

Pe Iesus tuacholia ke pomai, “Nga kileng nenge ute has ngana maia, lape a esia lango cherchera mur halang, nge te emurung.”

## 18

### *Poponing Nenge Hei Pakar E*

1 Ol pe Iesus nene poponing e lange nena hana nemur. Poponing neu, nenge hetore iri ke te hetalau ke kokoes pe leteria manmanna ke NeHalang longe te hetalaulau ngaria pe halaua iri. 2 Iok, Iesus talune nena nananga ke pomai, “Nga kileng e none nge longlono helenga tu. Pe non neu mataua NeHalang ero toto. Pe pule non neu letena porekeia hehei pe hana ero iange letena tu mana nge i sipona. 3 Pe nga kileng neu hei pakar e tu. Pe hei neu kokoes mana lala nge non nenge longlono helenga pe hele urume poinga poreke ngana nenge none poia lange i. Pe hei neu hele ke teke, ‘O amnei langa poinga poreke ngana nenge non neu poia at nge iau. Lape o halaua iau ke pomere?’

4 “Nga tele ngana non neu longo taua hei neu ero. Pe nga hoena ol hele mule ke teke, ‘Iau e mataua NeHalang ero pe letak porekeia hehei pe hana ero. 5 Pe hei nei kokoes mana at ke pur leme ero mana ia iau nga letena una ngana nei. Ke pomalam lape e halaua i ke are ke nek laka at ke hemakuk tote iau ero ol.’”

6 Iesus nene poponing nem ke het pe hele mule ke teke, “A longo langa non poreke ngana nenge longolono helenga neu hele ngana. 7 Lape NeHalang mai halaua nena hana mur ero kai? I sipona hesilei hote iri. Pe lape pomere? Nenge teke te tang lange i ke kokoes nga sinanga pe

nga miliko lochloch lape NeHalang poi hulul mana nge halaua iri? 8 E hele lange imo pengpeng lape halaua nena hana mur ke teare ke nek mule ke ueiuei mana. Pe pomere lape Non Tuna at pe hehei pe hana leteria manmanna lochloch lo?”

### *Poponing Nenge Non Paresio E Pe Non Nenge Lololoch Umtutuna*

9 Pe pule Iesus nene poponing nei lange iri hel nenge te teke iri siporia te pengpeng toto lo pe tetal heke iri siporia pe tenau sio menmene hehei pe hana. 10 Pe Iesus nana lange iri ke pomai, “Hana nai tela nga NeHalang nena pele palaungana ke te hetalaulau. Non e nge iri i Paresio pe e i non nenge lololoch umtutuna. 11 Pe Paresio neu i toro mes ke kangkanga pe hetalaulau lange NeHalang ke pomai, ‘NeHalang, e hele urana toto lange iong nge iau e pomanga hana nemur ero. Hana nenge te kemkeme pe hana nenge te pallaklaka pe hana nenge tepoi poreke lala nge hehei. Pe e hele urana toto lange iong pule nge iau e pomange non nenge lololoch umtutuna nei ero. 12 Etue nachnai nga etue koana elle eheo nga ngaunga pe letak metene iong. Pe e mene hote umtutuna unne nga uruk ke e tunge lala nge iong. Pe e poia ke pomau nga lek ure mur lochloch.’

13 “Pe non nenge lololoch umtutuna mes ke kangkanga pe nau sio mana pe palia mautuna pe hetalaulau ke pomai, ‘NeHalang, letem ia iau. Iau non poreke ngana.’”

14 Ol pe Iesus hele, “E hele lange imo pengpeng, non nenge lololoch umtutuna nem la mule nga na kileng pe i toro mana lohot ke pengpeng toto nga NeHalang matana. Pe non Paresio nem ero toto. Iange mele hel nenge tetal heke iri lape NeHalang tal sio tote iri. Pe mele hel nenge tetal susue iri lape NeHalang tal haka tote iri.”

*Iesus Mutena Tote Aina Kinkino Ngana*

(*Mat 19:13-15; Mak 10:13-16*)

<sup>15</sup> Hana hel te laia tuturia mur nge Iesus ke pete iri. Pe Iesus nena hana mur te esia pe te hele ele iri. <sup>16</sup> Pe Iesus hele lange na hana mur ke teke, “Aina kinkino ngana nem mur muteria ke te teke teat nge iau. Pe imo apoi ele iri ero. Iange hehei pe hana nenge te pomange aina kinkino ngana nemur, tetu teu nga NeHalang nena naualanga pe nekinga pule. <sup>17</sup> E hele ke manmanna lange imo, mele nenge letena ia NeHalang nena naualanga pe nekinga ke mange aina kinkino ngana ero lape teu la ero.”

*None Nenge Nena Ure Halang*

(*Mat 19:16-30; Mak 10:17-31*)

<sup>18</sup> Ol pe non nenge i mukmuka nge Iuta mur onteia Iesus, “Non soke, o urana toto. Pe iau lape epoi ke mere ke e mene maulinga ke koko?”

<sup>19</sup> Pe Iesus tuacholia, “Pomere nenge o hetue iau ke non nge urana? Mele e nge urana ero toto. NeHalang i toro mana. <sup>20</sup> O eteia NeHalang nena hotonga mur. O tomtom ia hehei ero pe o hune mele ero pe okeme ero pe o pallaka ia mele ero pe o heto heke temem pe tam.”

<sup>21</sup> Pe non neu tuacholia, “Nga iau lomele ngak nike ke at heueu nei e nanas taua hotonga nemur lochloch.”

<sup>22</sup> Iesus longe ke mau pe hele lange i, “Ute elle la o poia ero kura. O laia lem ure lochloch ke te olia pe uruna, o laia nge pakar mur. Nenge teke opoi ke pomalam lape lem ure mur halang nge tetu ke koko. Pe ure nemur lape te kulele iong nga lut nga tapa. Opoi ke mam ke het pe o nanasia iau ol.”

<sup>23</sup> Pe non neu longe helenga nei pe letena poreke toto iange i nena ure halang toto. <sup>24</sup> Pe Iesus esia i nge nakuna pomau pe hele, “Anali toto nge hana nenge reria ure halang nge teteu langa NeHalang nena

naualanga pe nekinga. <sup>25</sup> Anali toto nge iri iam. Nenge teke te puo teua ae tana palaungana e ke teu nga pakeka sune polona, nem semel pol. Pe nenge teteu langa NeHalang nena naualanga pe nekinga nem nge anali toto iam.”

<sup>26</sup> Iri nenge te longe i te ontei, “Nakuna nge mele ero toto nge lape mene maulinga ke koko. Lape mopoi ke mere ol?”

<sup>27</sup> Pe Iesus tuacholia, “Utar nenge anali toto nge none poia semel mana nge NeHalang poia.”

<sup>28</sup> Pe Petrus hele, “Onau at, imem mo hile sue lememe kileng mur pe moat ke mo nanasia iong.”

<sup>29</sup> Pe Iesus hele lange iri, “Oe, atong pe e hele pengpeng lange imo iri lochloch nenge te ume teu nga NeHalang nena naualanga pe nekinga pe te hile sue reria kileng mur pe reria hehei pe tuturia mur pe tetemeria pe tataria mur, <sup>30</sup> iri lape te mene ure urana ngana halang toto nga etue nei. Pe nga etue nenga hoena lape te mene maulinga nge koko.”

*Iesus Hele Hemol Ngana Nga Ana Metenga*

(*Mat 20:17-19; Mak 10:32-34*)

<sup>31</sup> Iok, Iesus mene hot kelkelia nena hana analoch pe nai nem pe hele lange iri ke pomai, “A longo at. Ta lohaka lala nge Ierusalem koi pe lape hetatalonga mur tehas ngaria nge Non Tuna lape lohote ke manmanna.

<sup>32</sup> Iange lape te tungge Non Tuna langa hana lomonmona mur peria. Pe lape tepoi poreke i ke te hesalang ia i pe te ulut lolele i pe lape te hune i. <sup>33</sup> Pe etue mol ngana nga hoena lape maul haka mule.”

<sup>34</sup> Iesus hele ke pomau pe nena hana nemur te eteia utar nenge helele ia ero. Iange helenga luna mallaha nge iri ero. Pomalam te eteia utar nenge Iesus helele ia ero.

*Iesus Hemas Mule None Nge Matana Hit*

(*Mat 20:29-34; Mak 10:46-52*)

**18:17:** Mat 18:3

**18:18:** Luk 10:25

**18:20:** Exo 20:12-16; Deu 5:16-20

**18:31:** Luk 24:44

**18:32:** Luk 9:22, 44

**18:34:** Mak 9:32

<sup>35</sup> Iok, Iesus i ke heroi lala nge Ieriko pe none nge matana hit are nga kue ilina pe longlong ure nge hehei pe hana nge tei olole nga kue. <sup>36</sup> Ol pe longe hulua nge teii nga kue pe ontei, "Eh! Pomere mai?" <sup>37</sup> Pe hehei pe hana nemur te tuacholia i ke pomai, "Iesus nenge Nasaret koi i olole nga kue."

<sup>38</sup> Pe non neu halngana haka, "Iesus! Teuit tuna! Letem poreke ia iau!"

<sup>39</sup> Pe hehei pe hana nenga muka te keres taua i pe te hele lange i ke teke reng. Pe ero. Non neu alngana haka ke soke toto ol, "Teuit tuna! Letem poreke ia iau!"

<sup>40</sup> La ol pe Iesus mes sapele. Pe ngai heke hehei pe hana ke te mene non neu lange i. Te mene ana non lange i pe Iesus onteia i, <sup>41</sup> "Lemem ke o teke e poia utar lange iong?"

Pe non neu tuacholia, "Non Soke, o halaua iau ke matak charchara mule."

<sup>42</sup> Pe Iesus hele lange i, "Iok, onau mule ol. Letem manmanna ngana laka poia iong ke o urana mule."

<sup>43</sup> Ueiuei mana pe non neu nau ke nek mule sapele pe nanasia Iesus pe heto heke NeHalang. Hulua nemur te esia pe iri lochloch te heto heke NeHalang pule.

## 19

### *Iesus Pe Sakius*

<sup>1</sup> Iok laol, Iesus iteu la sapele nge Ieriko pe i olole ke lala. <sup>2</sup> Pe hana nenge te lololoch umtutuna aria soke tu lama pule. Pe i ene laka Sakius pe nena ure halang toto.

<sup>3</sup> Ana non teke etei toto nga itei nenge i Iesus. Pe ero, iange hulua halang pe i choro mana, pomalam anali toto nge i. <sup>4</sup> Ol pe song ke i muka nge hulua nemur pe la haka nga ae siki mokona ke teke nau nge Iesus nge ila ke pomau. <sup>5</sup> Iok, Iesus i langa kileng unne neu pengpeng pe hele lange Sakius, "Sakius, osio at ke

ueiuei iange heueu lape etu nga lem pele." <sup>6</sup> Sakius sio ke ueiuei mana pe epele Iesus pe iech toto nge Iesus.

<sup>7</sup> Hulua lochloch ngana nemur te esia i pe te ngunngunu ke teke, "Non panei i langa non nenge na poinga poreke toto na pele!"

<sup>8</sup> Ol pe Sakius mes haka pe hele lange Iesus, "Non Soke, o longo at nge iau. Lape e tunge lek ure mur ele lochloch lange pakar mur. Pe pule nenge teke e pallaka ia iri lape e olia iri ke olinga huna henel la mule nge iri." <sup>9</sup> Pe Iesus hele lange Sakius, "Heueu mana nei NeHalang mene mule iong. Iange iong Apraham nette iong pule. <sup>10</sup> Pe Non Tuna at ngana nei at ke tango rere iri nenge te erue pe mene mule iri."

### *Nananga Nenga Umtutuna (Mat 25:14-30)*

<sup>11</sup> Iok, hehei pe hana te longlongo nga nei kura pe Iesus nana tele sapele nga poponing e. Iesus heroi toto lange Ierusalem pe hulua te teke mam pe NeHalang nena naualanga pe nekinga lape lohoh sapele.

<sup>12</sup> Ol pe Iesus hele, "Non e nenge tuteu nga mata nenge naungaala ana hana mur. Ana non soke teke i ke langa kileng tau ngana e ke tal heke i ke i aria naungaala ana non. Ke het pe lape at mule nga na kileng. <sup>13</sup> Lohaka ke la ero kura pe iua nena hana iri analoch nenge te umume nge i. Tunge reria umtutuna ellechle pe hele lange iri, 'Anau at, iau lape e lala lo koi. Pe imo a mene umtutuna nem pe a ume mule ia umtutuna hel pule. Ke la het nga etue nenge eat mule.'

<sup>14</sup> "Pe nena kileng nganangana mur lemeria ero ia i pe te kulosia hana hel langa kileng tau ngana nem pule ke te hele ke te teke, 'Imem lememe ero toto nge non nei lohoh ke i ara naungaala ana non.'

<sup>15</sup> "Ol pe ana non la ol pe te poia i ke i aria naungaala ana non pe at mule sapele nga na kileng. Pe

**19:7:** Luk 15:2  
**19:8:** Exo 22:1; Num 5:6-7  
Ioa 3:17; 1Ti 1:15

**19:9:** Luk 13:16; Ume 16:31

**19:10:** Luk 15:4;

ueiuei mana tunge helenga kerkere ngana lange nena hana nenge te umume nge i ke teat ke te neue i, pe ontei hote iri nga umtutuna hia lo nenge teume hote nga umtutuna nenge heronge lange iri. <sup>16</sup> Elle at tala pe hele, ‘Non soke, iau e mene ke umtutuna iri analoch mule nga elle nenge o tunge at nge iau.’

<sup>17</sup> “Pe non Soke neu hele, ‘Iong oume ke urana toto iam! Ke iong non nge urana. Iok, iong letek here iong nge oume ke nek toto nga ume kinkino ngana lo pomalam, lape e talue iong ke onau ala ke kileng iri analoch.’

<sup>18</sup> “Tok nena non naingana at pe hele, ‘Non soke, iau e mene mule ke umtutuna iri lime. Eume hote nga elle nenge o tunge at nge iau.’

<sup>19</sup> “Pe non soke neu hele lange i, ‘Nga nem, lape onau ala ke kileng iri lime.’

<sup>20</sup> “Tok, nena non mol ngana iteu at mule pe hele, ‘Non soke lem umtutuna nenge o tunge at nge iau koi, e ruchite pe e talkome ke ma. <sup>21</sup> E mataua iong ke ngana laka nenge e talkome mene, iange iong non nge letem inin hali pe o menmene mele hel reria ure mur pe o lulule ngaunga nenge mele hel tetue.’

<sup>22</sup> “Ol pe non soke neu hele lange i, ‘Iong hengekuleilei poreke ngana. Pe nga iong sipom lem helenga nge hot nga halim, lape o amneia melmelenga palaungana! Iong sipom o eteia lo ke iau non nge letek inin hali. E menmene mele hel reria ure mur pe e lulule ngaunga nenge mele hel tetue. <sup>23</sup> Iok, pomere toto nge o talue lek umtutuna nga umtutuna ana pele ero? Toi nge otal teua, lape eat mule pe e mene umtutuna nem pe ana manga hoho hel pule.’

<sup>24</sup> “Ke het, pe non soke neu hele lange hana hel nenge te mes rochroi nga henge kuleilei nem ke teke, ‘A mene mule umtutuna nge non nem pe at tunge lange non hengekuleilei nenge nena umtutuna iri analoch.’

<sup>25</sup> “Pe hana nemur te hele lange non soke neu ke teke, ‘Non soke, non nei nena umtutuna iri analoch lo!’

<sup>26</sup> “Pe non soke neu tuacholia, ‘E hele lange imo pengpeng, mele hel nenge reria halang toto lape te mene ke halang toto pule. Pe mele hel nenge reria unne sune mana lape te mene mule unne nem nge iri. <sup>27</sup> Pe lek ngarang nemur nenge lemeria ero ia iau a mene iri at pe a hune iri lakoi nga matak.’”

*Jesus Iteu Nge Ierusalem Ke Manga Naungaala Ana Non*

*(Mat 21:1-11; Mak 11:1-11; Ioa 12:12-19)*

<sup>28</sup> Iesus nana ke het pe i ke i mukmuka pe hulua te nanasia i ke tela nge Ierusalem. <sup>29</sup> Iok, Iesus i ke heroi nga kileng nenge Petpage pe Petani. Pe nga hengene nenge te hetue ke Ae Oliua, kulosia nena hana nai. <sup>30</sup> Pe hele lange iri ke pomai, “Imo muka ke ateu langa kileng neu pe lape a neue tongki lomele ngana e nenge mele are haka ia ero kura. Pe tongki nem, te kele ke mes. Aun hote pe a atia. <sup>31</sup> Pe nenge teke mele onteia imo, ‘Pomere nenge aun hote ure nem?’ Pe imo a hele lange i ke a teke, ‘Non soke lemene taua.’”

<sup>32</sup> Iok laol, hana nemur tela pe te hottaua ure lochloch ngana nge lohot ke pomanga Iesus heleia lange iri. <sup>33</sup> Iok, teun hotote tongki lomele ngana neu pe non nenge nena ure neu onteia iri, “Pomere nenge aun hote ure nemam?”

<sup>34</sup> Pe iri te hele, “Non soke lemene taua.”

<sup>35</sup> Iok laol, te mene la sapele nge Iesus pe te tamal heke reria hengeron nga ure neu ona pe teare heke sapele Iesus. <sup>36</sup> Iesus are haka nga tongki ke iolole pe hehei pe hana te lung susue reria hengeron mur nga kue.

<sup>37</sup> Iesus i ke langa kileng unne nenga hengene nge Oliua nenge ana kue nau sio lange Ierusalem. Pe nena hana lochloch ngana nemur nenge te nananasia i te iech toto pe te hele



urana toto lange NeHalang. Singiria kik pe te heto heke tote NeHalang nga mirakulo nemur nenge Iesus poi hote iri ke te esia ke ulolo.

<sup>38</sup> Pe te makul haka ke mai, “Petanga tunge Naunga ala ana non nenge at nga Non Soke ene!

Pe tunga nge nek nga lut nga tapa!

Ta heto heke tote NeHalang nga lut nga tapa

nge i palaungana toto pe urana toto!”

<sup>39</sup> Ol pe Paresio mur hel nge tei luluch nge iri te hele lange Iesus ke teke, “Non soke, o keres taua lem hana mur.”

<sup>40</sup> Pe Iesus tuacholia, “E hele lange imo, nenge teke lek hana mur te reng, um lochloch ngana nemur tepeu pe te heto heke NeHalang ene.”

### *Iesus Naue Kileng Ierusalem Pe Tang*

<sup>41</sup> Iesus i ke heroi toto lange Ierusalem pe esia kileng nem pe letena poreke toto ia pe tang. <sup>42</sup> Pe hele, “Heueu nei, toinge o eteia utar nenge hetakile iong. Pe pa nei ero iange te talkome nga matam. <sup>43</sup> Pe etue nem lape at nenge lape lem ngarang mur teat ke te heliliu hite iong ke tom ke otu mana nge teu. <sup>44</sup> Pe lape te heporeke tote iong pe lem hana mur, iange o etei ilia etue nenge NeHalang atia ke halau iong ia ero!”

### *Iesus Langa NeHalang Nena Pele Palaungana*

(*Mat 21:12-17; Mak 11:15-19; Ioa 2:13-22*)

<sup>45</sup> Ol pe Iesus iteu sapele langa NeHalang nena pele palaungana pe lope hote hana nge tei alala. <sup>46</sup> Lope hote iri pe hele, “NeHalang hele hote na hotonga ke tehas sue ke pomai, ‘Lek pele palaungana nei, i hetaulaunga ana pele!’ Pe ero. Imo, a poia ke pomanga kemenge kina mur rera pele nge tetal komkome ia.”

<sup>47</sup> Nga etue lochloch, Iesus hetot-toro nga NeHalang nena pele palaungana pe tunginga ana hana mur aria papalauna mur pe hotonga ana hetoronga mur, pe hana papalauna hel pule te teke te hune i. <sup>48</sup> Pe iri te teke te tango rara kue e nge te laua Iesus. Pe ero toto, iange hehei pe hana te longo lala nge i kura. Iri lemeria ero nge te hile hote Iesus nena helenga unne.

## 20

### *Onteinga Nga Iesus Nena Hekerkerenga*

(*Mat 21:23-27; Mak 11:27-33*)

<sup>1</sup> Iok, etue e pule Iesus tu teu nga NeHalang nena pele palaungana letena. Ana non hetot-toro pe haliu hote NeHalang nena helenga urana toto ngana. Ol pe tunginga ana hana mur aria papalauna mur pe hotonga ana hetoronga mur pe hana papalauna hel pule teat pe te hele lange i, <sup>2</sup> “O hele urume lem kerkerenga nem, nenge o popoia ure nemur. At langai toto? Pe itei toto nenge tunge kerkerenga nem lange iong?”

<sup>3</sup> Pe Iesus tuacholia iri, “Iok, iau pule e onteia imo nga onteinga elle pe imo a hele at nge iau. <sup>4</sup> Ioanes nenge henunun mai nena kerkerenga nem, at langai? At nge NeHalang ma at nge hana mur mana?”

<sup>5</sup> Ol pe hana nemur te hele hel nge iri, “Lape ta hele ke mere mai? Nenge teke ta hele ke ta teke, ‘Ioanes nena hekerkereng nem at nge NeHalang’, lape Iesus hele ke teke, ‘Iok, pomere nenge letemo manmanna nge i ero?’

<sup>6</sup> Pe nenge teke ta hele ke ta teke, ‘Ioanes na kerkerenga nem at nge hana mur mana’, lape hulua nemur te tamal hune ita nga um. Iange iri leteria manmanna toto ke Ioanes i hetatalonga!” <sup>7</sup> Pomalam te tuacholia ke pomai, “Imem mo eteia Ioanes na hekerkerenga nem at ngana ero.”

<sup>8</sup> Ol pe Iesus hele lange iri ke pomai, “Pomalam mana lape e tuacholia lemo helenga ero nga hekerkerenga nenge e popoia ure mur ia.”

*Poponing Nga Iri Nenge Tenau Ele Uain Ana Ume*  
(Mat 21:33-46; Mak 12:1-12)

<sup>9</sup> Iok, Iesus nene poponing e lange hehei pe hana ke pomai, “Nga etuene e, none tue uain nga ume pe tunge lange hana hel ke te ume hot umtutuna ia. Pe i ulhot ke langa kileng unne sapele. <sup>10</sup> Nga lulunga ana etue, non nem kulosia nena hengekuleilei e ke lange hana nenge te umume nga uain ana ume neu ke te tunge uain nganangana hel lange i. Pe ero. Hana nemur te lohaka pe te palia i pe te kulosia i ke patpata mana ke la mule. <sup>11</sup> Iok, kulos mule nena hengekuleileinga e ke la pule. Pe hana nemur te lohaka pe tepal mule i pule pe te hemei sio tote i. Pe te kulosia i ke patpata mana ke la mule. <sup>12</sup> Iok, non neu kulos mule nena hengekuleilei mol ngana la pe tepal poreke tote i pe tesau hote i.

<sup>13</sup> “Iok, ume tokoninga neu hele, ‘Lape epoi ke mere mai ol? Lape e kulosia tuk nenge mutek tau tote ke la, laka lape te renga i.’

<sup>14</sup> “Ol pe non neu tuna la pe hana nemur te esia pe te hele, ‘Non soke nem tuna ol koi atat. I lape mene ure lochloch ngana nei ke nena. Pe heueu ta hune i ke mete. Pomalam lape ta mene ure lochloch ngana nei ke rera ia ol.’ <sup>15</sup> La ol pe te laua non neu tuna pe tesau hote i nga ume letena pe tehun sapele i.”

Iok laol, Iesus onteia iri, “Utar ol nge lape ume tokoninga neu poia lange hana nemur? <sup>16</sup> Non nem i sipona lape at ke hun lapue hana nemur pe tunge uain ana ume nem lange mele hel nge altoto ke tenau ele.”

Pe hulua te longe helenga nei pe te hele, “Poreke toto nge ure nem lohok ke pomau!”

<sup>17</sup> Iok, Iesus nau lange hulua nemur pe hele, “Helenga nenge tehas sue nga NeHalang nena hotonga nei, luna ma ke mere? Nenge tehas sue ke,

‘Um nenge pele ana lelenga mur lemeria ero ia ke te teke tesaua, i um urana toto ngana nenge mes ke rahtua ele pele.’

<sup>18</sup> “Iri lochloch ngana nenge te losio haka nga um nem, lape um rir ule iri ke sachanchana ulu. Pe nenge teke um nem losio haka nge mele, mele nem lape menret sapele.”

<sup>19</sup> Iok, Iesus nana ke het pe hotonga ana hetoronga mur pe tunginga ana hana mur aria papalauna mur te teke telau sapele i. Te teke te laua Iesus iange iri te eteia ke Iesus nana ngana latau pengpeng ia iri. Pe iri te mataua hehei pe hana ke pomalam te laua Iesus ero.

*Onteinga Nga Umtutuna Loloch Ngana.*

<sup>20</sup> Ol pe tenau ele tote i ke nek toto, pe te tung hite ure lange hana hel pe te kulosia iri ke la te ollaka hote i nga onteinga mur. Pe hana nemur tela pe te chananga ke tepoi ke mange hana nenge leteria urana mana. Te teke te ollaka hote Iesus, pe nenge teke Iesus heleia ute nge tang ke poreke nga talngaria, lape te laua i pe tela sapele ia i nge Rom mur aria non soke. <sup>21</sup> Iok laol, hana nemur tela pe te onteia Iesus ke pomai, “Non soke, imem mo eteia ke iong o hele ke manmanna pe pengpeng toto mana. Pe iong o mataua mele ero toto ke o hetottoro ke nek toto nga NeHalang nena poinga mur. <sup>22</sup> Iok, o hele ke nek at nge imem. Ita mai urana nge tasau umtutuna lange non soke nenge Rom pule kai? Eh, ero?”

<sup>23</sup> Pe Iesus eteia ke hana nemur te chananga ia i nga onteinga nem, ol pe hele lange iri ke pomai, “A teke a ollaka hote utar nge iau? <sup>24</sup> A heteia umtutuna elle at nge iau ke enau.” Iok laol, te mene umtuna elle ke la

te heteia lange Iesus. Pe Iesus onteia iri, “Itei opene pe ene nenge tunga nga umtuna nemai?” <sup>25</sup> Pe iri te hele, “Non soke nenge Rom opene pe ene laka tu nem.”

Ol pe Iesus hele, “Oe, ke non soke nenge Rom nena ure mur a tunge lange i. Pe ure nemur nenge NeHalang nena, a tunge lange NeHalang.”

<sup>26</sup> Ol pe hana nemur, anali toto nge iri nge te laua Iesus nga hulua nemur mataria. Pe teare ke te reng toktok mana ol. Iange te rura toto nga Iesus nena helenga nenge tunge lange iri.

### *Onteinga Nga Ta Maul Haka Mule Ngara*

*(Mat 22:23-33; Mak 12:18-27)*

<sup>27</sup> Ol pe hana Satusi hel tela ke te lohote nge Iesus. Pe iri te teke, nenge teke ta mete lape ta maul haka mule ero ol. <sup>28</sup> Pe te hele, “Non soke, Moses has sue hotonga nei ke teke ta nana-sia: ‘Nenge teke none mete hatalia nehei pe i tutuna mur ero kura, non nenge mete nem, tina lape lei heke mule hei nem. Pe iri nai tuturia mur lape te heleia ke teke non nenge mete neu tutuna mur.’” <sup>29</sup> Iok, nga etuene e aina iri rahtele nai nge titiria mur hel tetu. Ol pe tiria nenge soke lei. Iok, telei ke tuturia mur ero kura pe kol neu mete. <sup>30</sup> Laol pe tina nenge nanasia i lei heke mule tina nehei. Iok la, tuturia ero kura pule, pe kol neu mete pule. <sup>31</sup> Pe tina mol ngana lei heke mule hei neu, pe i mete pule ke manga titina mur nenge iri tala nge i. La ke la iri rahtele nai neu telei mene hei elle mana. Pe te hoho ero mana pe iri lochloch ke te mete mule. <sup>32</sup> Pe hei neu mete nga hoena toto ol. <sup>33</sup> Iok, nga etue nenge ta maul haka mule, itei toto nenge lape leia hei neu ol? Iange hei neu, hana iri rahtele nai te leia i ke ulolo.”

<sup>34</sup> Pe Iesus tuacholia iri ke pomai, “Hehei pe hana nenge tetu nga ich nei te lechlei. <sup>35</sup> Pe iri nenge te urana pe te maul haka mule nga metenga, telei ero ol. <sup>36</sup> Iri, NeHalang tutuna mur iri iange te maul haka

mule nga metenga. Pe tepoi ke pomanga angkelo mur ke te mete ero ol. <sup>37</sup> Moses i sipona hemallaha hote lo. Nga nena hasinga, i has urume etue nenge oan ngau haka nga ae e pe chacharuch ero. Pe nga hasinga nem, i hetue NeHalang ke Abraham ana Non Soke pe Isak ana Non Soke pe Iakop ana Non Soke. <sup>38</sup> Ke NeHalang i hana nenge te maulul mana, aria Non Soke. Iange nge NeHalang iri lochloch te maulul”

<sup>39</sup> Ol pe hotonga ana heteronga mur hel te hele haka, “Non Soke, o tuacholia lememe onteinga ke pengpeng mana!” <sup>40</sup> Ke het pe hana nemur lemeria ero nge te ontei mule Iesus ol.

### *Pomere Nge Kristus I Teuit Tuna?*

*(Mat 22:41-46; Mak 12:35-37)*

<sup>41</sup> Iok laol, Iesus onteia hehei pe hana pe hotonga ana heteronga mur, “Pomere nenge hotonga ana heteronga mur te teke Kristus i Teuit tuna? <sup>42</sup> Iange Teuit i sipona heleia lo nga alalaha nenge Sam ke teke, “‘NeHalang hele lange ak Non Soke: “Oat ke oare lakoi nga ilik hele nenga tamalmal.

<sup>43</sup> Pe e mene lem ngarang mur at ke apem ana nge otal hekeke ia. Pe o hepapar hite iri.”

<sup>44</sup> Pe Teuit hetue i ke i ana Non Soke, ke pomere nge i Teuit tuna?”

### *Anau Ala Amo Kenek Nge Hotonga Ana Heteronga Mur.*

*(Mat 23:1-36; Mak 12:38-40)*

<sup>45</sup> Iok, hulua lochloch ngana te longlono pe Iesus hele lange nena hana mur nenge hetottore iri, <sup>46</sup> “Anau ala amo ke nek toto nge hotonga ana heteronga mur. Hana nemur, muteria toto nge te heronia hengeron sase ngana mur ke tei raraia pe lemeria toto nge hehei pe hana tepoi ke nek toto lange iri nga ingala munna mur. Pe muteria nge teare nga muka toto nga hehei pe hana mataria nga NeHalang nena pele palaungana letena. Pe pule

materia toto nge te lohohot ke iri hana papalauna nga ngaunga matana ana etue ke te ngaua ngaunga nge nek toto. <sup>47</sup> Pe iri, tenau sio mene pakar mur pe te teke te lolochia reria ure mur. Pe te hetalaulau ke mala toto ke hulua te esia iri pe te teke iri hana urana ngana mur. Iri nemur, lape NeHalang tunge tuangachol poreke ngana toto lange iri nga hoena.”

## 21

### *Pakar E Nena Tunginga (Mak 12:41-44)*

<sup>1</sup> Iok, Iesus tu nga NeHalang nena pele palaungana letena pe esia hana nenge reria ure halang toto nge tesau sisio umtutuna. Pe iri tesau sue umtutuna nemur ke pomanga reria tunginga nenge lange NeHalang. <sup>2</sup> Pe Iesus esia hei pakar una e nge la pe sau sio ke umtutuna kinkino ngana nai. <sup>3</sup> Ol pe hele, “E hele lange imo pengpeng. Hei pakar nei, sau teu ke umtutuna halang toto nge hana nemur. <sup>4</sup> Iange iri lochloch ngana tesau teu umtutuna pe reria umtutuna halang makura. Pe atong hei pakar nei, nena umtutuna unne nenge mama laka sau hot eule nem lo pe e ero ol.”

### *Iesus Heleia Temene Nena Pele Nge Lape Tetoto Sue (Mat 24:1-2; Mak 13:1-2)*

<sup>5</sup> Iok, Iesus nena hana mur hel te heleleia NeHalang nena pele palaungana neu nge te teke nakuna urana toto. Iange te hemalmalia nga um nge singina chalemlem pe nga tunginga mur nenge lange NeHalang. Pe Iesus hele lange iri, <sup>6</sup> “Ure lochloch nenge a esia nem lape tuke mau ero ol. Lape tetoto sue pe ute pele nge tunga munna ero ol.”

### *Iesus Heleia Ure Poreke Ngana Mur Nge Lape Lohohot (Mat 24:3-14; Mak 13:3-13)*

<sup>7</sup> Pe Iesus nena hana mur te ontei, “Non soke, nge ngingie ol pe lape ure nemur te lohohot? Pe lape utar lohohot

tala ke mo esia pe mo eteia ke ure nei rochroi nge lape lohohot?”

<sup>8</sup> Pe Iesus hele, “Anau ala ke nek iange lape hana hel te pallakaia imo. Hana halang lape teat pe te hele nga ek ke te teke, ‘Iau Kristus nenge a kulelele! Etue nem, ngana koi at lo.’ Te hele ke pomam pe imo a longo tau pulute iri ero! <sup>9</sup> Nenge teke a longe ure meena ngana pe palinga hel pingana nge lohohot, samo loiloilo ero pe a matau ero pule. Iange ure nemur lape te lohohot tala pe imo a teke ma etue hetala ngana. Pe i ero la.”

<sup>10</sup> Pe Iesus hele lange iri pule, “Kileng mur lape tepal hehel pe hana hel pule lape tepal hel luluch nge hana hel. <sup>11</sup> Lape mangila palaungana rurur pe uringa lohohot pe haleles poreke ngana lohohot nga kileng lochloch. Pe ure hel nenge ta kolkolkol iri nge nike lape te herura hot mene ita nga tapa sana.

<sup>12</sup> “Ure nemur lape te lohohot ero kura pe lape hana hel te laua imo pe te palia imo pe tepoi poreke tote imo. Pe lape te poia amo helenga palaungana nga hetoronga ana pele letena pe tetal teua imo nga tuele au ngana. Pe pule lape te mene imo lange naungaala ana hana mur pe hana nenge tenau elele kileng mur ke ames nga mataria. Iange imo lek hana mur imo pe a popoia ume nenge a hele hotote Helenga Urana Toto Ngana. <sup>13</sup> Ure nemur lape te lohohot pe amo etue koloi nenge a hele hote Helenga Urana Toto Ngana nem. <sup>14</sup> Pe letemo tuanin rara sakilil ero nga utar nenge lape a heleia. <sup>15</sup> Iange iau lape e hemellehe letemo tuanin ngana pe e hepeng ia halimo ke a hele ke nek. Pe lemo ngarang nemur lape te longe lemo helenga pe te reng toktok mana ol. <sup>16</sup> Tetememo mur pe tatamo mur pe titimo mur pe alomo mur pe neingamo mur, lape tehul mule nge imo pe lape te tung heke imo langa hana soksoke ngana mur peria. Pe lape te hune hel nge imo ke te mete. <sup>17</sup> Pe



hulua lochloch ngana lape lemeria ero ia imo iange lek hana mur imo. <sup>18</sup> Pe imo lochloch lape atu ke nek mana pe a mete toto ero. <sup>19</sup> Ames ke kerkereng iange letemo manmanna ngana nem lape hemas mule imo.

<sup>20</sup> “Nenge teke a esia palinga hel ana hana mur nge te heliliu hite kileng nge Ierusalem, a etei mene ke a teke lape kileng nem lape het. <sup>21</sup> Pe iri nenge tetu nge Iutea te ua ke telala nga hengene mur pe iri nenge te tunga kileng neu te ua hotot pe iri nenge tetu nge hot nga kileng hel teteu langa kileng nem ero ol. <sup>22</sup> Iange nga etue e lape NeHalang lape heneue Ierusalem mur nga letena inin ngana. Nem lohote ke pete tote nena helenga nenge tehas sue ke ulolo. <sup>23</sup> Atong hehei nemur nenge saria pe nenge te lololo peo kura, lape anali toto nge iri. Iange NeHalang letena inin taua kileng nem ke lape poia ure poreke ngana ke lohote nge iri. <sup>24</sup> Hana hel lape te hune iri nga kakop pe lape te laua hel pe te mene iri langa kileng hel. Pe hana lomona ngana mur lape te hekou susue iri nenge Ierusalem pe tehun lapue iri kela het nga etue nenge NeHalang talue ke teke het.

*Non Tuna At Ngana*  
(Mat 24:29-31; Mak 13:24-27)

<sup>25</sup> “Pe ure heueu ngana hel nge te esesia iri ero, lape te lohote nga chaia matana pe teio pe itoch mur. Pe kileng lochloch ngana nga ich lape te matau tote ruach ana mee papalauna pe aria hutu mur. <sup>26</sup> Hehei pe hana lape ngaria lohote pe te matau toto nga utar nenge lape lohote nga ich nei. Iange chaia matana pe teio pe itoch mur te nanasia muria ero ol. <sup>27</sup> Pe nga etue nem lape Non Tuna lohote nga ulu pe at luluch nga nena kerkerenga palaungana pe nena hemalmalinga. <sup>28</sup> Ure nemur nenge te lohote tala nga Non Tuna at ngana, lape te lohote. Pe nga etue nem pengpeng

ames ke anau haka mana iange NeHalang ana etue nenge at ke mene mule imo, heroi lo.”

*Hetoronga Nga Ae Keng*  
(Mat 24:32-35; Mak 13:28-31)

<sup>29</sup> Iok laol, Iesus nene poponing e lange iri, “Anau langa ae keng pe ae hel pule. <sup>30</sup> Nga etue nenge ae perperna te rora mule, ta etei mene ke chaia ana etue at rochroi lo. <sup>31</sup> Ke pomalam mana nenge teke a esia ure nemur nge te lohote, a eteia ke NeHalang nena naualanga urana ngana pe nena nekinga nge ita at rochroi lo.

<sup>32</sup> “E hele ke manmanna toto lange imo. Imo hel nga etue nei lape atu kura pe ure nemur te lohote. <sup>33</sup> Tapa pe ich pe ure lochloch ngana lape tehet pe lek helenga mur lape tetu ke koko sapele.”

*Anau Ala Amo Kenek*

<sup>34</sup> Iok laol, Iesus hele lange nena hana mur nenge hetottore iri, “Anau ala amo ke nek, nenge teke a ngau sakilil pe ain sakilil ke amo hauaua pe letemo tu mana nga atu ngamo nga ich nei, ure nemur lape te poia imo ke letemo meena toto. Pe lape etue palaungana nem at pe herura hot mene imo ke pomanga kie nenge palnga palau. <sup>35</sup> Pe etue palaungana nem lape lohote nge iri lochloch ngana nenge tetu nga kileng lochloch ngana nga ich. <sup>36</sup> Ke imo a nauala amo ke nek toto pe a hetalaulau ke kokoes. Pomalam lape ames ke kerkereng nga etue poreke ngana nenge atat. Pe lape a matau ero nga etue nenge a lohote nge iau Non Tuna.”

<sup>37</sup> Nga etue lochloch Iesus hetottoro nga NeHalang nena pele palaungana pe nga ulei kokoes, i ke la mulmule nga hengene nge Oliua iange mama lamau nga miliko. <sup>38</sup> Pe nga uach uruna hehei pe hana te hoala at mulmule ke te longlongo Iesus nge hetottoro nga NeHalang nena pele palaungana letena.

## 22

*Te Mil Iesus Ana*  
(*Mat 26:1-5; Mak 14:1-2; Ioa 11:45-53*)

<sup>1</sup> Etue palaungana nenge te ngau ngaunga menini ngana heroi lo nenge te hetue ke Inगतoto. <sup>2</sup> Pe tunginga ana hana mur aria papalauna mur pe hotonga ana hetoronga mur te teke te hune Iesus pe ero. Iange te mataua hulua nenge te koko ke te longlono nga nena helenga. Pomalam te tango rara kue e nge lape te nanasia ke te hune i.

*Iutas Halaua Iri Nenge Teteke Tehune Iesus*

(*Mat 26:14-16; Mak 14:10-11*)

<sup>3</sup> Iutas Iskariot i Iesus nena none nga nena hana analoch pe nai nem pe Satan teu heke i. <sup>4</sup> Ol pe la sapele nge tunginga ana hana mur aria papalauna mur pe palpal hussu mur nenge tenau ele NeHalang nena pele palaungana pe hele lange iri nga kue nenge lape tunge Iesus langa peria. <sup>5</sup> Pe hana nemur te iech toto pe te teke te olia i nga umtutuna. Pomalam iri lochloch ke tetal helenga sapele. <sup>6</sup> Tetal helenga ke het pe Iutas tango rara sapele kue e, nenge lape tunge Iesus langa peria nga etue nenge hehei pe hana iri ero.

*Iesus Tatalo Ele Ngaunga Nenge Inगतoto Ana*

(*Mat 26:17-25; Mak 14:12-21; Ioa 13:21-30*)

<sup>7</sup> Iok, etue nenga ngaunga matana nenga ngaunga menini ngana nem hot ke ulo pe etue nenge lape te hune Sipsip Tuna nenge Inगतoto ana at. <sup>8</sup> Pe Iesus kulosia Petrus iri nai Ioanes pe hele lange iri ke pomai, "Ala ke a tatalo ele ngaunga nenga Inगतoto ana ke ma nike ke tala pe tangau."

<sup>9</sup> Pe iri te ontei mule Iesus, "Lape mola ke mo tatalo ele ngaunga nem langai?"

<sup>10</sup> Pe Iesus tuacholia, "Ai teu ke ala nga kileng neu pe none nge takisia ech kina lape saolia imo. Pe a nanas

mene i ke a langa pele nenge i teu ia.

<sup>11</sup> Pe a hele lange pele tokoninga nem ke a teke, 'Non Soke hele ke pomai: Pele letena unne nenge lang mur teat pe te tutu ia tu langai? Iau pe lek hana mur lape moat ke mo ngau ngaunga nenge Inगतoto ana nga lamam.' <sup>12</sup> Pe i lape henonoua imo nga pele letena e nge soke pe ngaunga ana hatanga pe ure mur hel pule tema ke mataria purpur lo. Ke nga lamam a tatalo ele ngaunga mur ke tema nike."

<sup>13</sup> Iok laol, tela pe te hottaua ure lochloch ngana nge lohohot ke pete tote Iesus hele ngana pe te tatalo ele ngaunga mur sapele.

*Iesus Ngaua Ngaunga Nenge Inगतoto Ana*

(*Mat 26:26-30; Mak 14:22-26; 1 Kor 11:23-25*)

<sup>14</sup> Iok, etue nem at nenge te ngau ngaunga nem. Pe Iesus iri ul nena hekulkulonga mur tela ke teare tala sio ke te heliliu hite ngaunga ana hatanga. <sup>15</sup> Pe Iesus hele lange iri, "Iau lape e takisia melmelenga palaungana pe e mete. Pe lemek toto ke ita ul ta ngau tele ngaunga nenga Inगतoto nei. <sup>16</sup> Iange lape e ngau mule ngaunga e nge pomai ero, kela het nga etue nenge NeHalang nena naualanga pe nekinga lohohot. Pe ngaunga matana nei, luna lape lohohot ke mallaha toto nga etue nem."

<sup>17</sup> Iok laol, Iesus mene eulinga pe hele urana toto lange NeHalang pe hele lange nena hana mur, "A mene ke imo lochloch ainia. <sup>18</sup> E hele lange imo pengpeng, heueu nei pe laol, lape e in mule uain e nge pomai ero kela het nga etue nenge NeHalang nena naualanga pe nekinga lohohot."

<sup>19</sup> Iok Iesus mene mioka pe hele urana toto lange NeHalang pe reke pe tunge lange nena hana mur pe hele ke pomai, "Iau mirak koi nga ngaunga nenge e tunge ke halaua imo. A ngaua pe letemo metene iau."

<sup>20</sup> Ke pomalam mana, te ngau ke het pe Iesus mene heke eulinga pe

hele, “Eulinga nei, i NeHalang nena helenga tomunga hel nenge heueu ngana, nge eik lele ite nga e mete ngak. <sup>21</sup> Pe anau at, mele nenge lape tung heke iau langa hana porekreke ngana mur peria, ngana koloi kila luluch nge iau nga hatanga heueu nei. <sup>22</sup> Non Tuna lape mete ke pomanga NeHalang heleia lo, pe mele nenge tung heke Non Tuna lange hana porekreke ngana nemur, lape mene tuangachol nge poreke toto.” <sup>23</sup> Ol pe Iesus nena hana mur te ontei hel nge iri sapele, nga itei toto nenge lape poia poinga nei.

*Iesus Nena Hana Mur Te Hele Helia Itei Nenge Lape I Palaungana Nge Iri*

<sup>24</sup> Chaungachai palaungana lohot nge Iesus nena hana mur nga itei toto nge iri nge lape lohot ke i palaungana. <sup>25</sup> Pe Iesus hele lange iri, “Hehei pe hana nga ich aria naungaala ana hana mur reria poinga pomai koi; iri siporia tetal heke iri ke iri soksoke pe reria kerkerenga palaungana toto. Pe te teke hehei pe hana lochloch te heto pekngaria mur ia iri.

“Pe hana soksoke ngana mur, reria kerkerenga palaungana toto nge tenau ele reria hana mur. Pe hana soksoke ngana nemur hel, te heto heke iri siporia ke te teke iri reria kerkerenga palaungana toto nge tenau ele hehei pe hana! <sup>26</sup> Pe imo, a nanasia poinga nei ero. Mele nenge teke i palaungana poi ke manga aina kinkino ngana. Ke mele nenge teke i muka nge imo talsio tote i pe ume mule nge nena hana mur imo.” <sup>27</sup> Iok, Iesus onteia nena hana mur, “Itei nge i palaungana toto? Ngana kai mele nenge are mana pe kulele mene ana ngaunga mai? Eh! ngana kai mele nenge ichich ngaunga mai? Mele nenge i palaungana laka nenge are mana pe kulele mene ana ngaunga. Pe iau etu luluch nge imo ke pomanga mele

nenge ichich amo ngaunga. <sup>28</sup> Imo ames ke kerkereng luluch nge iau lo nga etue lochloch ngana nenge ure meena ngana lohot nge iau. <sup>29</sup> Pe temek tunge kerkerenga palaungana at nge iau ke enau ele nena hana mur. Pe kerkerenga nenge temek tunge at nge iau nem lape e tunge lange imo pule. <sup>30</sup> Imo lape a ngau pe ain luluch nge iau nga ak ngaunga ana hatanga, nga etue nenge NeHalang nena hana mur lochloch teat ke te eukirau nga ngaunga matana nem. Pe lape etal heke tote imo nga lut ke a nauele mata analoch pe nai nenge Israel.”

*Iesus Hele Hote Petrus Pallaka Ngana.*

(*Mat 26:31-35; Mak 14:27-31; Ioa 13:36-38*)

<sup>31</sup> Pe Iesus hele lange Simon nenge ene e pule Petrus, “Simon o longo at, Non Poreke ngana lemene toto ke totoi ia imo. Pe i teke poia imo ke pomanga non nenge rur hotote uit nganangana nga paena. <sup>32</sup> Pe iau e hetalaulau amo lange NeHalang ke letemo manmanna ngana nem lape tu ke kerkereng. Pe nga etue nenge ohul mule letem, ola ke o hekerkereng mule pekngam mur leteria.”

<sup>33</sup> Pe Petrus hele, “Non Soke, iau etu ke e angala mana nga utar nenge lape lohot. Nenge teke te mene iong langa tuele au ngana lape te mene iau la pule. Pe nenge teke te hune iong lape te hune iau pule.”

<sup>34</sup> Pe Iesus hele lange Petrus, “E hele pengpeng lange iong, lape pareo tang ero kura pe o pallaka ke hemol ke o teke o eteia iau ero.”

<sup>35</sup> Ol pe Iesus hele lange nena hana mur, “Nga etue nenge e kulos hote imo pe a patpata mana, a amneia ke pomere?” Pe iri te hele, “Mo amneia ke ute pele alpapa taua imem ero.”

<sup>36</sup> Pe Iesus hele, “Iok heueu nei a mene lemo umtutuna mur pe amo hetanga mur. Pe mele nenge nena palinga hel ana kakop ero, mene

nena hengeron kela teolia pe olia nena kakop e nga hengeron nem uruna. <sup>37</sup> Iange tehas ia nga NeHalang nena alalaha lo ke lape lohot ke manmanna toto nge iau. Helenga nem hele ke teke, 'Hulua lape te esia i ke pomanga kemenge kina e.' "

<sup>38</sup> Pe Iesus nena hana mur te hele, "Non Soke onau at, palinga hel ana kakop nai iloi." Pe Iesus hele, "Het pam lo la!"

### *Iesus Hetalaulau Nga Hengene Nge Oliua*

*(Mat 26:36-46; Mak 14:32-42)*

<sup>39</sup> Iok laol, Iesus pe nena hana mur te lohaka nga kileng neu pe tei ke tela nga hengene nge Oliua ke pomanga tela hemulmule ngaria. <sup>40</sup> Tela ke te lohot nga kileng neu pe Iesus hele, "A hetalaulau ke NeHalang hekerkereng ia imo nga totoinga poreke ngana mur." <sup>41</sup> Ol pe Iesus hile sue nena hana mur pe i hot ke kangkanga aria pela tualou sio pe hetalaulau ol. <sup>42</sup> Iesus hetalaulau ke mai, "Euo Temek O! Nenge teke lememe, opoi ele melmelenga palaungana nei ke lohot nge iau ero! Pe o nanasia lemek ngak ero, o nanas mene iong sipom lememe ngam." <sup>43</sup> Ol pe NeHalang nena angkelo e lohot nge Iesus ke hekerkereng ia i. <sup>44</sup> Pe Iesus letena meena toto pe hetalaulau ke kerkereng toto pe hines sio porekeia i ke pomanga eina nge lele sio ke lala nga ich.

<sup>45</sup> Ke het pe lohaka pe i la mule nge nena hana mur. Iesus la pe nena hana mur te mamani lo iange leteria meena toto. <sup>46</sup> Ol pe Iesus hele lange iri, "A mamani ia utar? A lohaka pe a hetalaulau ke NeHalang hekerkereng ia imo nga totoinga poreke ngana mur."

### *Te Laua Iesus* *(Mat 26:47-56; Mak 14:43-50; Ioa 18:3-11)*

<sup>47</sup> Iesus helele kura pe hulua tei at nge i. Pe Iutas, Iesus nena none nga hana iri analoch pe nai nem, i mukaia iri. Iok, Iutas teke la ke lau

haka nge Iesus <sup>48</sup> pe Iesus hele lange i, "Iutas, nga poinga nenge olau haka nge iau nei, o tung heke Non Tuna langa hana porekreke ngana mur peria."

<sup>49</sup> Pe Iesus nena hana mur te esia hulua neu pe te hele, "Non soke! Ta potar mai ol! Mo palia iri nga kakop?" <sup>50</sup> Ol pe elle nge iri mene kakop ke teke hune non soke Kaepas nena none pe kakop mene hot mene talngana nenga tamalmal.

<sup>51</sup> Ol pe Iesus hele, "Apoi ke pomam ero!" Pe penna langa non neu talngana pe hemas mule.

<sup>52</sup> Ol pe Iesus hele lange tunginga ana hana mur aria papalauna mur pe palpal hussu mur nenge tenau ele NeHalang nena pele pe hana papalauna hel pule nenge teat ke te laua i neu ke teke, "Imo mam a mene huninga hel ana kakop mur pe lemo tukmaul mur ke at a laua iau ia? E hunun hana pe e kemkeme kai?" <sup>53</sup> Etu luluch nge imo ke kokoes mana nga NeHalang nena pele palaungana pe pomere a laua iau ero? Pe heueu nei, amo etue ol koi. Iange imo ul non poreke ngana a ume ke kerkereng toto nga etue nei."

### *Petrus Channanga Ke Hemol Ke Teke Eteia Iesus Ero*

*(Mat 26:57-58, 69-75; Mak 14:53-54, 66-72; Ioa 18:12-18, 25-27)*

<sup>54</sup> Iok laol, te laua Iesus pe te mene i langa tunginga ana hana mur aria ae huna nena pele. Pe Petrus i ke nanas ia iri. <sup>55</sup> Ol pe Petrus iteu langa pele neu koana nge hot. Pe tetun hite oan ke remenmen nga kileng unne neu. Pe Petrus lake halel oan luluch nge iri nenge te halelel neu. <sup>56</sup> Pe heie nge umume lamau esia Petrus pe nachnei hit tote i pe hele, "Non nei, kokoko nge Iesus pule koi, enau urume i!"

<sup>57</sup> Pe Petrus hele, "Hei nem, iau mam e kokoko nge non nem ia? E eteia i ma? E eteia i ero toto i!"

<sup>58</sup> Mala pol sunem pe none esia Petrus pe hele lange i, "Iong pule,



iong elle nge iri nenge te nananas ia Iesus!”

Pe Petrus hele, “Ah! Iau ero i!”

<sup>59</sup> Etue sase pol lo pe none pule esia Petrus pe hele ke kerkereng toto ke teke, “Manmanna toto ke non nei kokoko nge Iesus iange i pule nena nge Kalelea!”

<sup>60</sup> Pe Petrus tuacholia, “Non nem, e eteia ure nenge o helele ia ero i!” Petrus helele kura pe pareo tang sapele. <sup>61</sup> Ol pe Iesus nau hot la pengpeng nge Petrus pe Petrus letena metene sapele Iesus nena helenga nenge heleia lange i, “Lape pareo tang ero kura pe o pallaka ke hemol ke o teke o eteia iau ero.” <sup>62</sup> Ol pe Petrus ua hot sapele nga kileng unne neu pe tang ke teke mete.

*Te Songlele Ule Iesus Pe Tepal Ule I*  
(Mat 26:67-68; Mak 14:65)

<sup>63</sup> Iok, hana nenge tenau elele Iesus neu, te songlele ule i pe tepal ule i. <sup>64</sup> Pe te kale ele matana pe te hele lange i, “O hele, itei palia iong!” <sup>65</sup> Pe tesau hote helenga poreke ngana hel pule lange i.

*Iesus Mes Nga Hana Papalau Ngana Mur Mataria*  
(Mat 26:59-66; Mak 14:55-64; Ioa 18:19-24)

<sup>66</sup> Iok laol, uach sio pe tunginga ana hana mur aria papalauna mur pe hotonga ana hetoronga mur pe hana papalauna mur hel pule te eukirau. Pe iri nenge tenau elele Iesus te mene i kela mes nga hana nemur mataria. <sup>67</sup> Te mene i kela mes pe te onteia i, “Iong nge iong Kristus mam lom? Ae!” Pe Iesus tuacholia, “Nenge teke e hele lange imo lape letemo manmanna nga lek helenga ero toto. <sup>68</sup> Pe nenge teke e onteia imo nga onteinga e lape a tuacholia ero toto pule. <sup>69</sup> Talun heueu ke laol, Non Tuna lape are nga NeHalang nenge kikina toto hilina ele nenga pen tamalmal.”

<sup>70</sup> Pe hana nemur te ontei mule i, “Eke iong mam, iong NeHalang Tuna ma?”

Pe Iesus tuacholia, “Imo sipomo a hele ke a teke iau NeHalang Tuna.”

<sup>71</sup> Pe hana nemur te hele, “A longo la! Ita sipora ta longe helenga nei nge lohota nga i sipona hanna ke het lo. Ke ta mene mele ero ol.”

## 23

*Te Mene Iesus Lange Pilatus*  
(Mat 27:1-2, 11-14; Mak 15:1-5; Ioa 18:28-38)

<sup>1</sup> Iok laol, Iri hana papalaungana nemur te lohaka pe te mene sapele Iesus lange Pilatus. <sup>2</sup> Te mene i ke la mes nga Pilatus matana pe te hele ke te teke, “Non nei, mo hottaua i nge chanangaia hehei pe hana nenge ita ke teare ngaria poreke toto. Pe hele ele iri ke tesau umtutuna lange ne Kaesa ero. Pe pule hele ke teke i sipona i Kristus pe i naungaala ana non.”

<sup>3</sup> Ol pe Pilatus ontei sapele Iesus. “Ae, Iuta mur aria naungaala ana non ma iong mam?”

Pe Iesus hele, “Iong sipom o hele hote helenga nem.”

<sup>4</sup> Ol pe Pilatus hele lange hana papalauna nemur pe nge hulua lochloch ngana nemur ke pomai, “Iau e hottaua ute e nge non nei poia ke poreke ero.”

<sup>5</sup> Pe hana papalauna nemur te hele ke kerkereng toto ke pomai, “Non nei hetoro ngana poia hehei pe hana ke teare poreke nga kileng lochloch ngana nge Iutea! Talune nge Kalelea ke ngana koi atat nei lo!”

*Te Mene Iesus Lange Herot*

<sup>6</sup> Pilatus longe hana nemur nge te hele ke pomau pe ontei, “Non nei mai nena nge Kalelea kai?” <sup>7</sup> Ol pe Pilatus kulosia Iesus lange Herot iange eteia lo ke Iesus at nge Kalelea. Pe Herot nge nauale kileng Kalelea. Pe pule nga etue nem, Herot tu nge Ierusalem lo.

<sup>8</sup> Herot esia Iesus pe letena iech toto iange longlonge Iesus pingana nga halang nike pe kolkol mana nakuna pe heueu nei esia i ol. Pe i lemene toto nge teke nau Iesus nge popoi mirakulo. <sup>9</sup> Ke pomalam Herot onteia Iesus nga onteinga halang pe Iesus tuacholia i ero toto. <sup>10</sup> Pe tunginga ana hana mur aria papalauna mur pe hotonga ana hetoronga mur temes haka pe te hele poreke tote Iesus. <sup>11</sup> Pe Herot pe nena palinga hel ana hana mur te songlele ule i pe te heron heke hengeron e nge uruna haka toto lange i pe kulos mule i ke lange Pilatus. <sup>12</sup> Pe Herot iri nai Pilatus, nge nike tenau hel ke nek erochro iange iri nai tehun helel. Pe nga etue nenge Iesus poi ke mai, iri nai tenek hel mule nge iri.

*Pilatus Longala Ke Te Hune Iesus*  
(*Mat 27:15-26; Mak 15:6-15; Ioa 18:39-19:16*)

<sup>13</sup> Pilatus eukiraua tunginga ana hana mur aria papalauna mur pe hana papalauna hel pule pe hehei pe hana. <sup>14</sup> Pe hele lange iri ke pomai, “Imo, a mene non nei at nge iau pe a hele ke a teke, Non nei channangnanga ia hehei pe hana ke teare poreke toto. Pe heueu nei, imo lochloch ngana ames pe e ontei hote i nga matamo, pe e hottaua ute e nge non nei poia ke poreke ero toto. <sup>15</sup> Herot pule eteia ke non nei poia poinga poreke ngana e ero, ke ngana koi nenge kulos mule i at nge ita. Toinge non nei poia poinga poreke toto ngana e lape ta hune i ke mete pe nei ero koi. <sup>16</sup> Pomalam lape e hele lange lek palinga hel ana hana mur ke tenos ulu mene i pe i la mana ol.”

<sup>17</sup> Kokoes, nga ngaunga matana nem ana etue, Pilatus popoia poinga nenge hile hotote non elle nga tuele au ngana lala nge iri Ierusalem mur.

<sup>18</sup> Ol pe hehei pe hana lochloch alngaria haka ke pomai, “A hune i ke mete! Pe a tung hote Parapas at nge imem!” <sup>19</sup> (Parapas tetal teua

i nga tuele au ngana iange poi heke palinga palaungana nge Ierusalem pe hune none ke mete.)

<sup>20</sup> Pilatus hele hot mule letena lange hehei pe hana nga nenge teke hune Iesus ero. <sup>21</sup> Pe ero. Hulua nemur alngaria haka mule ke pomai, “A heon heke i! A heon heke i!”

<sup>22</sup> Ol pe Pilatus hele hemol ngana mule lange iri, “Non nei poia poinga poreke ngana e nge uruna metenga ero koi! Lape e hele lange lek palinga ana hana mur ke te nos ulu mene i pe te kulosia i ke la mana ol.”

<sup>23</sup> Pe ero. Hulua nemur te alngaria ke soke toto ke te heon heke Iesus. Ol pe aria sosolos ala ngana neu, lohote ke manmanna sapele. <sup>24</sup> Ke Pilatus hele ke teke poia utar nenge hulua nemur lemeria taua. <sup>25</sup> Mene hote Parapas nem nga tuele au, pe tung hote lange hulua nemur. Pe tunge Iesus lange iri ke te poia i nga lemeria ngana.

*Palinga Hel Ana Hana Mur Te Heon Heke Iesus*  
(*Mat 27:32-44; Mak 15:21-32; Ioa 19:17-27*)

<sup>26</sup> Ol pe te mene hote Iesus nga Pilatus na pele sapele. Tei ke tela pe te saolia Simon nenge nena nge Sirini. Ana non mule nga kileng nemur nge hot ke teu atat. Te laua i pe te poia i ke takisia Iesus ana manga toto. Te poia i pule ke nanas menmene Iesus.

<sup>27</sup> Hulua halang toto iri hul hehei hel te nanasia Iesus. Hehei nemur leteria porekeia Iesus pe te tang ke soke toto. <sup>28</sup> Ol pe Iesus hulua i ke nau lange iri pe hele lange iri, “Imo hehei nenge Ierusalem, a tangia iau ero. A tangia imo sipomo pe tutumo mur. <sup>29</sup> Iange etue nei koi atat nenge lape hehei pe hana te hele ke teke, ‘Iri hehei nenge tehoho ero ke tuturia mur ero, te iech toto ol!’ <sup>30</sup> Nga etue nem, hehei pe hana lape te hele langa hengene mur ke teke, ‘O losio aka nge imem.’ Pe pule, te hele langa sasana mur ke te teke, ‘Otal kome imem.’ <sup>31</sup> Ure nemur nenge a esia heueu nei, lohote nga etue nenge ae

itach kura. Pe etue nem lape at nga ae kalum ngana. Pe etue nem lape poreke toto.”

<sup>32</sup> Palinga hel ana hana mur te mene hote hana porekreke ngana mur nai kela te heon luluche iri nge Iesus. <sup>33</sup> Iok, tei kela te lohote nga kileng nenge ene “Kittol” pe te heon haka sapele iri. None heon nga Iesus ilina hele nenga pen tamalmal pe e nga Iesus ilina hele nenga pen hoioi

<sup>34</sup> Iesus hele, “Temek, letem ia iri, te eteia utar nenge te poia nei ero.” Iok laol, palinga hel ana hana nemur te hesalangia Iesus nena hengeron pe te saua oio paena pe ana maelepa lohote ke tenau nge itei nenge lape mene Iesus nena hengeron mur.

<sup>35</sup> Hulua halang toto temes ke te nachnau pe hana papalauna nemur te hesalang langia Iesus pe te hele ke machmai, “I, hemaui mule hulua halang lo. Iok, nenge teke i Kristus nenge NeHalang kulosia at, tanau nge i sipona hemaui mule i!”

<sup>36</sup> Iok, palinga hel ana hana nemur te hesalang ule i pe te tunge uain ehech ngana lange i. Pe te hele lange i, <sup>37</sup> “Nenge teke Iuta mur aria naungaala ana non iong, o halaua iong sipom!”

<sup>38</sup> Pe tetal heke helenga nei nga Iesus hou ngana, “IUTA MUR ARIA NAUNGAALA ANA NON KOI NEI.”

<sup>39</sup> Ol pe non elle nge iri nai nenge te heon luluch nge Iesus neu, hele inin taua Iesus ke pomai, “Nenge teke iong Kristus, o halaua iong sipom pe imem pule!”

<sup>40</sup> Pe neingana hele inin tau mule i ke teke, “Iong mam, o hele ke mam pe o mataua NeHalang ero ma? Ita ta takisia melmelenga elle mana koi.

<sup>41</sup> Pe ita nai, te poia poinga nei at nge ita ke pete tote rera poinga poreke ngana mur. Pe Iesus poia poinga poreke ngana e ero pe takis mene melmelenga nei.”

<sup>42</sup> Ol pe ana non loaka pe hele la sapele nge Iesus ke pomai, “Iesus,

lem naualanga pe nekinga nge urana toto at pe letem metene iau.” <sup>43</sup> Pe Iesus hele lange i ke teke, “E hele ke manmanna toto lange iong, heueu nei lape otu luluch nge iau nge Paratiso.”

### *Iesus Metengana*

(*Mat 27:45-56; Mak 15:33-41; Ioa 19:28-30*)

<sup>44</sup> Nga chaia matana heurunga ngana, chaia tua ero pe chantom palaungana ma hite kileng lochloch kela chaia matana palele. <sup>45</sup> Pe huunga ala palaungana nenge heon teu nga NeHalang na pele letena, chach nga lut kela het nge sio ke sachana nai. <sup>46</sup> Ol pe Iesus alangana hot ke palaungana toto ke pomai, “Temek, e tung mene iau lange iong ol.” Iesus hele ke pomai pe mete sapele.

<sup>47</sup> Palinga hel ana hana mur aria non soke esia ure nei nge lohote pe heto heke NeHalang pe hele sapele, “Manmanna toto ke non nei i non urana ngana toto!” <sup>48</sup> Pe hulua lochloch ngana nenge te emurungrungrung lamau te esia ure neu nge lohote pule. Pomalam tei ke tela mule nga reria kileng pe te palpalia mauturia iange leteria milang toto ia Iesus. <sup>49</sup> Iri nenge te etei tote Iesus pe hehei nenge te nanasia Iesus at nge Kalelea, temes ke kangkanga mana pe tenau manmana nga ure nemur nge te lohote.

### *Tealo Hite Iesus*

(*Mat 27:57-61; Mak 15:42-47; Ioa 19:38-42*)

<sup>50-51</sup> Iok, non urana ngana e ene Iosep. I, nena nge Arimatea, nga kileng nenge Iutea. Ana non, nanas tau tote NeHalang nena hotonga mur pe tu ke kulkulele mene NeHalang nena naualanga pe nekinga nge lape lohote. Pe i pule, tuteu luluch nge hana papalauna nenge te popoia Iesus ana helenga pe singiria sisisia i ke te teke te hunune i. Pe ana non letena urana ero nga helenga pe poinga poreke

ngana nenge hana nemur te poia lala nge Iesus. <sup>52</sup> Ana non i kela lohote nge Pilatus pe onteia i nga Iesus koluna. <sup>53</sup> Ol pe i ke langa kileng nenge hana te heon heke Iesus ia pe lo losio sapele Iesus koluna. Ke het pe ruchit sapele, pela tal teua nga polo heueu ngana e nge te rech teua nga um ilina. (Polo neu, te poia ke hana nenge te metemete koluria ana ia nike.) <sup>54</sup> Tealo hite Iesus nga Praete, pe i etue nenge Israel mur tetu ke te tatalo ele Sapat ana etue. Pe etue palaungana nem heroi lo.

<sup>55</sup> Pe hehei nenge te nanasia Iesus nge Kalelea nike tela luluch nge Iosep ke tenau nga Iesus ana polo pe tenau nga Iesus koluna nge tetal teua. <sup>56</sup> Ke het pe tela mule ke te mene ure nemur nenge inangaria ehech nenge lape teun hite nga Iesus koluna. Ke het pe tetutu sio mana ol. Iange iri te nanasia hotonga nenge Moses has sue ke teke te ume ero nga Sapat ana etue.

## 24

*Iesus Lohaka Mule Nga Metenga*  
(*Mat 28:1-10; Mak 16:1-8; Ioa 20:1-10*)

<sup>1</sup> Nga Sante nga uach uruna toto, hehei nemur te mene ure inangana ehech ngana nemur pe te hoala ke te teke tela tenau Iesus koluna. <sup>2</sup> Tei ke la te lohote nga kileng nenge Iesus koluna maia, pe um nenge are ele polo anna, ma kelkel pe polo anna pangpanga mana ol. <sup>3</sup> Iok laol, tei teu la pe te tango rere Iesus koluna pe te hottaua ero. <sup>4</sup> Temes ke leteria tuaninin pe hana nai nge reria hengeron sinaala toto te lohote ke temes luluch nge iri. <sup>5</sup> Ol pe hehei nemur te rura manaia iri pe te matau toto pe te tualou sio pe te puosue palpalria langa ich. Pe hana nai neu te hele lange iri ke pomai, "Pomere? A tango rere itei? Kileng nei metenga ana kileng koi pe pomere toto nenge o tango rere I nenge maulul. <sup>6</sup> Pe non nem i ero lamai pule. Ngana kou

maul haka mule lo. Letemo metene nena helenga mur nge heleia lange imo pule? Nga etue nenge tu luluch nge imo nge Kalelea, ana non hele ke teke, <sup>7</sup> 'Lape te tunge Non Tuna langa hana porekreke ngana mur peria, ke lape te heon heke i ke mete. Pe nga etue mol ngana nga hoena lape maul haka mule.' <sup>8</sup> Ol pe leteria metene sapele Iesus na helenga nemur.

<sup>9</sup> Hehei nemur tela mule pela te heleia ure lochloch ngana nei lange Iesus nena hana mur pe nge hulua lochloch ngana nenge te nananas ia Iesus. <sup>10</sup> Maria Mantalena pe Ioana pe Maria nenge Ieims tana pe hehei hel pule nenge tela luluch nge iri, te nana hote ure lochloch ngana nei lange Iesus nena hana mur. <sup>11</sup> Te nene pe Iesus nena hana mur leteria manmanna nga nananga nei ero, iange te teke hehei nemur te hele ngaria tang ke pomanga aria hauaua. <sup>12</sup> Ol pe Petrus lohaka pe song ke teke la ke nau nga polo nenge Iesus koluna mateuia. La ke tatuch sio ke teke nau pe um ponna ngana neu nganngana ero ol. Pe es mene ruchinga hit nenge te ruchit Iesus ia nge masio mana ol. Petrus esia ke mau pe letena hul rara ia ke halang pe ua ke la mule.

*Iesus Lohote Nge Nena Hana Nai*  
(*Mak 16:12-13*)

<sup>13</sup> Iok, nga etue neu pengpeng Iesus nena hana nai tei ole ke te lala nga kileng e nge ene Emaus. Pe kileng neu tu ke sase pol nge Ierusalem. <sup>14</sup> Pe iri nai tei olole pe te heleleia ure lochloch ngana nenge lohote lo. <sup>15</sup> Iok, iri nai tei ke te hele tele helelia pe Iesus lohote nge iri, pe heroi taua iri kela iri ul tei ape. <sup>16</sup> Pe nena hana nai neu te etei hilia i ero. Te esia i pe te teke non pele mana.

<sup>17</sup> Ol pe Iesus onteia iri nai, "Imo nai ai olole pe a hele tele helei ia utar?" Pe iri nai nakuria poi koukou mana pe temes. <sup>18</sup> Elle nge iri ene Kleopas. Iok, i nenge ene Kleopas lohaka pe hele, "Atong! Iong lape oi



lang at nge Ierusalem heueu mana kai, nenge oetei ero nga ure nemur nenge te lohotot lamai?”

<sup>19</sup> Pe Iesus ontei, “Iong mam o heleleia utar mur nenge te lohotot mam?”

Pe iri nai te tuacholia, “Mo heleleia laka ure nemur nenge lohot nge Iesus nenge Nasaret. Non nei i NeHalang nena hetatalonga. Iange ure lochloch ngana nenge heleia pe poia henonou hote ke i mene kerkerenga nenge NeHalang. Pe ana helenga song ke hehei pe hana lochloch te longe. <sup>20</sup> Tunginga ana hana mur aria papalauna mur pe hana nenge tenau elele imem, te poia ana helenga ke te teke mete. Pomalam te heon heke i. <sup>21</sup> Pe imem lochloch ngana letemem manmanna ke i toto koloi, nenge lape mene mule Israel mur lochloch. Pe lape ero ol. Onau ure nenge lohot nem ana etue mol ngana koi heueu nei.

<sup>22</sup> “Pe hehei hel nge imem te herura mene imem. Iange nga uach uruna te oala ke te teke tenau toto nga um ponna nenge tetal teu Iesus koluna ia. <sup>23</sup> Tela pe te rere Iesus koluna pe te hottaua ero. Iok, teat mule pe te teke tenau operia ia NeHalang nena angkelo mur nge te hele lange iri ke te teke, ‘Iesus maul haka mule lo.’ <sup>24</sup> Ol pe mele hel pule nge imem tela ke tenau toto nga um ponna neu pule. Pe te esia ke ure lochloch ngana lohot ke pete tote hehei nemur te hele ngaria. Ke iri pule te kolkol Iesus koluna.”

<sup>25</sup> Ol pe Iesus hele lange iri nai, “Imo nge lape letemo matana ngana unne ero iam, iange anali toto nge imo pule nge letemo manmanna nga ure lochloch ngana nenge hetatalonga mur te heleia. <sup>26</sup> Pomere? Imo nge a eteia ero kai? Toinge letemo matana pol, a eteia ke Kristus lape mene melmelenga palaungana tala, pe nga hoena, mene kerker-

erenga palaungana toto nge NeHalang.” <sup>27</sup> Ol pe Iesus hele hote asinga nemur nenge te heleleia i. Talune nga alalaha nenge Moses hasia kela het nga alalaha nenge hetatalonga mur tehas ia.

<sup>28</sup> Iok, tei ke te heroi langa kileng nenge Emaus pe Iesus poi ke malaka nga i ke lala nga kileng e nge tunga tau kura. <sup>29</sup> Ol pe iri nai te hele ele i ke te teke, “O iat ke otu luluch nge imem muka, iange chaia matana puluch sisio lo i.” Pomalam Iesus lake tu luluch nge iri.

<sup>30</sup> Iok laol, Iesus are sio ke ngau luluch nge iri, pe mene ngaunga pe hele urana toto lange NeHalang pe reke pe tunge lange hana nai neu. <sup>31</sup> Ol pe hana nai neu te esia Iesus nge poi ke pomau pe ngaria lohot. Pe te etei sapele ke non neu i Iesus. Te eteia ke i Iesus ol pe erue sio ke te kolkolia i sapele. <sup>32</sup> Ol pe iri nai te hele, “Tai olole nga kue nem pe ita nai letera iech toto nge ta longe i nge hele urumrume hasinga nemur, pe hemallaha hote luna mur atat nge ita.”

<sup>33</sup> Iok, ol pe te lohaka sapele ke tela mule nge Ierusalem. Tela pe te lohot nge Iesus nena hana iri analoch pe elle nge te emurungrung luluch nge hulua nemur nenge te nanasia Iesus.

<sup>34</sup> Pe te hele ke te teke, “Manmanna ke Iesus maul haka mule lo! Ke ngana laka nenge hetei hote i lange Simon!”

<sup>35</sup> Iok, Iesus nena hana nai neu te hele hote utar nenge lohot nge iri nga kue nenge lala nge Emaus, pe pule te hele ururume te etei ngaria ia Iesus nga etue nenge reke ngaunga pe tunge lange iri.

*Iesus Lohot Nge Nena Hana Mur (Mat 28:16-20; Mak 16:14-18; Ioa 20:19-23; Ume 1:6-8)*

<sup>36</sup> Te helele kura, pe Iesus lohot ke mes luluch nge iri pe hele lange iri, “Lek miliko palaungana lange imo lochloch ngana.” <sup>37</sup> Pe iri lochloch

**24:21:** Luk 19:11; Ume 1:6

**24:21:** Luk 19:11; Ume 1:6

**24:24:** Ioa 20:3-10

**24:26:** Luk 9:22

**24:26:** Luk 9:22

**24:27:** Psa 22:1-21; Isa 53

**24:27:** 22:1-21; 53

**24:34:** 1Ko 15:4-5

**24:34:**

1Ko 15:4-5

**24:37:** Mat 14:26

**24:37:** Mat 14:26

ngana nemur te rura pe te matau toto iange te esia Iesus pe te teke ma moiuk. <sup>38</sup> Ol pe Iesus hele lange iri, “A mataua utar? Pomere nenge letemo manmanna ero?” <sup>39-40</sup> Pe Iesus heteia penna pe apena lange iri pe hele, “Anau at nga perik pe apek, iau toto kai nemai. Pe a ra nga singik, moiuk pele mes hotia nganangana ke mange iau ero.” <sup>41</sup> Iesus hele ke mau pe hulua nemur leteria nachnai kura iange te iech toto. Ol pe Iesus onteia iri, “A talue ngaunga unne kau?” <sup>42</sup> Pe te mene ruo kalum ngana elle ke te laia nge i. <sup>43</sup> Iok laol, Iesus mene ruo neu pe ngau sapele nga hulua nemur mataria.

<sup>44</sup> Ke het pe hele lange iri, “Ure nenge etu luluch nge imo pe e heleleia, ngana koi lohot nei. Iange hasinga nenge Moses pe hetatalonga mur pe nga alalaha nenge Sam te tuatautaua iau. Pe ure nemur lape te lohot ke mamanna nga NeHalang lemene ngana.”

<sup>45</sup> Ol pe Iesus helete metene iri ke te eteia NeHalang nena helenga mur. <sup>46</sup> Pe hele lange iri ke pomai, “Helenga nenge tehas sue, tang ke mai koi: Kristus lape takisia melmelenga palaungana ke mete pe nga etue mol ngana lape maul haka mule. <sup>47</sup> Pe nga i sipona na kerkerenga lape te haliu hote nena helenga ke pomai, ‘A hulia letemo nga lemo poinga poreke ngana mur. Pomalam lape NeHalang letena porekeia imo pe sau lemo poinga poreke ngana mur ke te lasus toto.’ Helenga nemur lape te haliu hot tele nge Ierusalem ke het pe langa kileng lochloch ngana nga ich. <sup>48</sup> Pe imo sipomo anau urume ure nemur lo. Ke lape a haliu hote ol. <sup>49</sup> Pe iau lape e hekulo sue utar nenge temek hele ke teke tunge lange imo. Pe imo atu lakoloi. Iange Opepengpeng lape sio at nga lut ke hekerkereng tote imo, ke het pe a laol.”

### *NeHalang Mene Heke Iesus Langa*

**24:44:** Luk 9:22    **24:44:** Luk 9:22    **24:48:** Ioa 15:27; Ume 1:8

**24:49:** Ioa 14:16; 15:26; Ume 1:4    **24:49:** Ioa 14:16; 15:26; Ume 1:4

### *Lut Nga Tapa*

*(Mak 16:19-20; Ume 1:9-11)*

<sup>50</sup> Iok, ol pe Iesus mene hote nena hana mur nge Ierusalem ke tela rochroi nge Petani. Pe nga lamau, Iesus tul heke penna pe pete iri lochloch. <sup>51</sup> Iesus petpete iri kura pe hile iri pe lohaka la sapele ke langa lut nga tapa. <sup>52</sup> Pe hehei pe hana nemur te heto heke tote i nga lamau. Ke het pe tela mule nge Ierusalem. Tela mule pe iechinga palaungana toto lohot nge iri. <sup>53</sup> Ke kokoes tetu manmanna nga NeHalang nena pele palaungana ke te heto hekeke i.

**24:48:** Ioa 15:27; Ume 1:8

## Ioanes Helenga Urana Toto Ngana Nenge Ioanes Hasia

### *Helenga Lohot Ke I Non*

<sup>1</sup> Nga talun ngana toto ure lochloch ngana te lohot ero kura pe Helenga nem tu ke ulolo. Helenga nem tu luluch nge NeHalang pe i sipona i NeHalang. <sup>2</sup> I tu luluch nge NeHalang nga talun ngana toto. <sup>3</sup> Nge i mana, NeHalang ala hote ure lochloch ngana. Ke ure lochloch ngana nei lohot nga kue e nge altoto ero ol.

<sup>4</sup> Pe maulinga lochloch ngana huna nge i toro. Pe maulinga nem, tunge lemenga lange hehei pe hana lochloch. <sup>5</sup> Pe lemenga nem tualeme nga kileng au ngana. Pe kileng au ngana kikina ngana nenge poi hele lemenga nem nge ita ero.

<sup>6</sup> Iok, NeHalang kulosia none ke at. Ana non ene laka Ioanes. <sup>7</sup> Pe i at ke hele hote Lemenga nem ke hehei pe hana lochloch te longe nena helenga pe leteria manmanna. <sup>8</sup> Pe Ioanes i sipona i lemenga nem ero. I at mana ke hele hote lemenga nem. <sup>9</sup> Pe lemenga toto ngana nenge tualeme hite hulua lochloch, lape sio at nga ich pe ngana koi atat lo.

<sup>10</sup> Ana non tu nga ich lo nenge i sipona ala hote. Pe kileng nga ich tenau lange i ke nek ero. <sup>11</sup> Ana non at nga nena kileng pengpeng pe nena kileng nganangana mur lemeria ero ia i. <sup>12</sup> Pe iri nenge tenek teua i pe leteria manmanna nga Ene, i talue iri ke NeHalang tutuna mur ia iri. <sup>13</sup> Pe NeHalang tutuna mur iri nga poinga nenga leinga ero, nga nenge hehei pe hana te hohoe tuturia mur. Nem ero. Iri te lohot nga NeHalang lemene ngana. Ke iri temeria NeHalang.

<sup>14</sup> Helenga nem lohot ke i non ke tu luluch nge ita. Pe ta naue nena hemalmalinga palaungana ke ulolo. Hemalmalinga palaungana nenge Temere Tuna elle nem. Pe i muta toto nga poinga urana toto ngana. Pe nena helenga mur manmanna lochloch.

<sup>15</sup> Ke Ioanes hele urumrume ana non lala nge hehei pe hana, pe halii ke teke, “Non nem koloi nenge e heleia ke e teke, ‘I nenge nanasia iau, i palaungana toto nge iau iange tehoe iau ero kura pe ana non tu ke ulolo.’ ”

<sup>16</sup> Pe i muta toto nga poinga urana ngana mur. Ke pomalam ita lochloch ta menmene petanga mur nge halang toto nge i. <sup>17</sup> NeHalang hesue hotonga mur lange Moses ke at nge ita. Pe poinga urana ngana mur pe helenga manmanna ngana mur teat nge ita nga kue nenge Iesus Kristus. <sup>18</sup> Mele pele naue NeHalang nakuna ero toto. Pe tuna elle nem i NeHalang ia. Pe i are teu la toto nga Temene taena ene. Pe i sipona henonou hote NeHalang at nge ita.

### *Ioanes Nenge Henunun Hele Hemallaha Hote Iesus Lange Hehei Pe Hana*

*(Mat 3:1-12; Mak 1:1-8; Luk 3:1-18)*

<sup>19</sup> Iuta mur nenge Ierusalem te kulosia tunginga ana hana mur pe Liuai mur ke tela nge Ioanes pe te ontei hote i ke pomai koi, “Iong itei toto?”

<sup>20</sup> Pe Ioanes topele helenga e ero. Hele hot pengpeng mene ke teke, “Iau Kristus ero.”

<sup>21</sup> Pe hana nemur te ontei mule, “Ol pe iong non tei? Iong Elaisa?”

Pe Ioanes hele, “Ero iam, iau non nem ero.”

“Eh! Iong hetatalonga ma?”

Pe Ioanes tucholia, “Ero.”

<sup>22</sup> Pe hana nemur te hele, “Ol pe iong itei toto? O hele hote iong at nge imem pe mola ke mo heleia lange iri nenge te kulosia imem at. Pomalam o hele hot mene iong at nge imem ol.”

**1:1:** Ioa 17:5; 1Io 1:1-2; Hem 19:13    **1:3:** 1Ko 8:6; Kol 1:16-17; Hip 1:2    **1:4:** Ioa 5:26    **1:5:** Ioa 3:19    **1:6:** Mat 3:1; Luk 1:13-17, 76    **1:9:** Ioa 8:12    **1:13:** Ioa 2:11; 3:3-6; 1Pi 1:23    **1:14:** Pil 2:7    **1:17:** Exo 34:28; Rom 6:14    **1:18:** Exo 33:20; Ioa 6:46; 1Ti 6:16    **1:21:** Deu 18:15, 18; Mat 11:14    **1:23:** Isa 40:3

<sup>23</sup> Ol pe Ioanes tuacholia nga hetatalonga Isaias nena helenga mur nenge hele ke teke, “Iau laka none alngana nenge haliuliu nga ich sana lomona nenge teke, ‘A hepeng ia Non Soke nena kue ke pengpeng.’”

<sup>24</sup> Pe hel nenge iri Paresio nenge te kulosia iri at neu, <sup>25</sup> te ontei mule i, “O teke iong Kristus ero, pe iong Elaisa ero pe iong hetatalonga ero. Pe pomerei o henunune hehei pe hana?”

<sup>26</sup> Pe Ioanes tuacholia, “Iau e henune hehei pe hana nga ech mana. Pe mele la mes luluch nge imo, pe imo a eteia i ero. <sup>27</sup> Ana non koi nanasia iau ke atat. Pe iau e urana ero toto nge epoi hote apena ana ae ulina.”

<sup>28</sup> Ure nenge nei lohohot nga kileng nenge Petani nga ech Iortan ilina hele. Nga kileng unne nenge Ioanes henunune hehei pe hana ia.

### *Jesus I NeHalang Nena Tunginga*

<sup>29</sup> Iok, pomange rou Ioanes naue Iesus nge i ke la tau pengpeng ia i pe hele, “Anau la NeHalang nena Sipsip Tuna kou atat neu. I lape saua poinga poreke ngana mur nga ich nei ke te lasus toto. <sup>30</sup> Ke i sipona laka nenge e heleia lala nge imo nenge e teke, ‘None koi nananas ia iau ke atat kura. Pe ana non i palaungana toto nge iau. Lange tehoe iau ero kura pe i tu tala nge iau ke ulolo.’ <sup>31</sup> Pe iau e eteia i ero. Eat pe e henune hehei pe hana nga ech mana. Pe nga poinga nenge e poia nei, lape hehei pe hana nge Israel te naue i ke mallaha toto.”

<sup>32</sup> Ke het pe Ioanes hele hot mule ure manmanna ngana hel pule ke teke, “E naue Opepengpeng nge sio at nga tapa ke pomanga ngie chaulum, pe to haka mana nga ana non houn-gana. <sup>33</sup> Nga tele ngana toto e eteia i ero. Pe Non nenge kulosia iau at ke e henunun nga ech nei, hele at nge iau ke teke, ‘Onau pe o esia non nenge Opepengpeng sio at ke to haka nge i, ana non lalom nenge lape henunun

nga Opepengpeng.’ <sup>34</sup> Ke ure nem e naue nge lohohot ke ulolo. Pe e hele ke manmanna toto lange imo, Non nei i NeHalang tuna.”

### *Jesus Talun Ke Iua Nena Hana Mur*

<sup>35</sup> Iok, pomange rou mule Ioanes mes luluch nge nena hana mur nai. <sup>36</sup> Pe naue Iesus nge i toto pe hele, “Anau la, NeHalang nena Sipsip Tuna kou!”

<sup>37</sup> Pe hana nai neu te longe Ioanes nge hele ke mau pe te nanas sapele Iesus. <sup>38</sup> Ol pe Iesus ralele pe naue iri nge te nananas pe onteia iri, “Imo nai a nansia iau ke?”

Pe iri nai te hele, “Heteronga, o tutu langai?”

<sup>39</sup> Pe Iesus hele, “Imo nai aiat kela anau.” Iesus hele pomau pe chaia matana sisio lo.

Pomalama tei kela tenau nga Iesus tu nganngana pe tetu luluch mana nge i nga etue neu.

<sup>40</sup> Pe hana nai nenge te longe Ioanes nge heleia Iesus pe te koko nge i neu, elle nge iri ene Antreas. Pe Antreas i Simon Petrus tina ia. <sup>41</sup> Ana non la ke tango rere tele tina Simon pe hele lange i, “Mo hottaua Mesias, non nenge mene tuangaola nge heo ngana lo.” (Nga helenga Krik te hetue non nem ke “Kristus”.) <sup>42</sup> Pe mene i ke lange Iesus.

Pe Iesus nau lange i pe hele, “Tong em laka Simon nenge ne Ioanes tuna. Pe lape te hetue iong ke Sipas” (Nga helenga Krik te hetue ke “Petrus” luna laka “um”).

### *Jesus Iua Pilipus Iri Nai Nataniel*

<sup>43</sup> Iok, pomange rou mule pe Iesus teke lohaka ke lange Kalelea. La pe hottaua Pilipus pe hele lange i ke teke, “Pilipus o iat ke o nanasia iau.”

<sup>44</sup> Pe Pilipus pule nena nge Pet-saita nga Antreas iri nai Petrus reria kileng huna. <sup>45</sup> Iok, Pilipus hottaua Nataniel pe hele lange i pule ke teke, “Mo hottaua non nenge Moses has urume nga hotonga ana alalaha mur



lo. Pe pule hetatalonga mur tehas urume i nga reria alalaha mur. Ana non ene laka Iesus. Ne Iosep nenge Nasaret tuna.”

<sup>46</sup> Pe Nataniel hele, “Ah! Ngana iam o hetue kileng nenge Nasaret mam! Utar nge urana toto nge lape lohot nga kileng nem mam, eh!”

Pe Pilipus hele, “Oi at mana ke onau.”

<sup>47</sup> Iok, Iesus naue Nataniel nge i ke atat pe hele, “Kileng nenge Israel nganangana e toto koi atat nei. Pe pallakanga ana poinga unne tu nge i ero toto.”

<sup>48</sup> Pe Nataniel onteia Iesus ke teke, “Iong mam o eteia iau ke merei toto?”

Pe Iesus hele, “Pilipus la ke hele nge iong ero kura pe enau tele iong nge o arare nga ae popi ene.”

<sup>49</sup> Ol pe Nataniel hele, “Heteronga! Iong NeHalang Tuna Iong pe Israel mur aria Naungaala ana non!”

<sup>50</sup> Pe Iesus hele, “Iong o longe iau nge e teke e naue iong nge o arare nga ae popi ene. Pomalam letem manmanna pe o hele ke mam, ae? Ure hel nge papalauna nga nei, lape o naue iri nge te lohot kura.” <sup>51</sup> Pe Iesus hele pule ke teke, e hele ke manmanna toto lange imo: lape a naue tapa sana nge ulala pe a esia NeHalang nena angkelo mur nge te haka lala pe tesio atat nge Non Tuna.

## 2

### *Iesus Hulia Ech Ke Langa Uain*

<sup>1</sup> Iok, nga etue mol ngana nga hoena ngaunga matana e lohot nge Kana nga kileng nenge Kalelea, pe Iesus tana tu nga etue neu pule. (Ngaunga matana nem nga halangina heueu ngana hel nge te puotau hel.) <sup>2</sup> Pe Iesus pe nena hana mur te mene helenga ke tela nga puongatau neu pule. <sup>3</sup> Ol pe aria uain soso. Pe Iesus tana la ke hele lange Iesus ke teke, “Hana nemur aria uain soso lo i.”

<sup>4</sup> Pe Iesus hele lange tana, “Etak, pomere nenge otal teu luluche iau

langa ure nei? Iau ak etue at ero kura.”

<sup>5</sup> Ol pe Iesus tana hele lange iri nenge te umume lamau ke teke, “Aua nei hele lange imo pe a longo tau mene i.”

<sup>6</sup> Nga ngaunga matana nem, ech kina papalaungana nge iri rahtele elle tema. Pe ech kina nemur, iri papalauna nge lape ech ana ponge (lita) iri ana non kina lime (100) hemute kina elle. Pe pule, ech kina nemur te ume hote nga um pe ana ech Iuta mur te nununia ke te lemlem nga NeHalang matana. <sup>7</sup> Iok laol, Iesus hele lange hana nenge te umume neu ke teke, “A eulia ech pe a pasiling teua langa ech kina nemur.” Pe hana nemur te hemute heke tote ech kina nemur ke langa haria ilina toto. <sup>8</sup> Ke het pe Iesus hele lange iri, “Iok, a eulia unne pe ala ia nge non nenge i muka nga ngaunga matana nei.” Iok, te mene ech neu la, <sup>9</sup> pe hul ke i uain lo pe la non neu in tote. Ana non in tote pe eteia uain neu at ngana ero pe iri nenge te eulia ana ech te eteia. Ol pe non neu iua non halangina heueu ngana neu <sup>10</sup> pe hele lange i ke teke, “Hana lochloch te mene hote uain urana ngana mur ke aria lang mur tein tettele. Pe nau pe tein sakilil lo, mene hote uain nenge urana ero ke te inia nga hoena ol. Pe iong ero. Uain nenge urana toto koi nenge o tung hotote nei ol!”

<sup>11</sup> Ke merakulo tengene ana nenge Iesus poia lohot nga kileng nenge Kana nge Kalelea. Pe nga lamau Iesus henonou hote i sipona nena hemalmalinga palaungana lange nena hana mur. Pomalam leteria manmanna nge i.

<sup>12</sup> Ke het pe Iesus pe tana pe titina mur pe nena hana mur tei ke tesio lange Kapernam, pe tetu ke etue hel mule nga kileng neu.

### *Iesus Langa NeHalang Nena Pele Palaungana*

(*Mat 21:12-13; Mak 11:15-17; Luk 19:45-46*)

<sup>13</sup> Iok, etue palaungana nenga In-gatoto ana ngaunga matana heroi lo. Pomalam Iesus lohaka ke lange Ierusalem. <sup>14</sup> La pe hulua tei alala nga NeHalang nena pele palaungana nge Ierusalem. Te loloch teua pulumakau mur pe sipsip mur pe ngie mur kela te ololia iri nga NeHalang nena pele letena. Pe iri nenge te hetataua umtutuna mur teare pule nga reria haonga mur. <sup>15</sup> Ol pe Iesus mania nena nosinga nga such ke lope hote huros nemur. Pe pule hekale hul sue hana nenge te hetataua umtutuna reria hatanga mur, ke reria umtutuna te pararai ulu. <sup>16</sup> Pe hele lange iri nenge reria ngie mur ke teke, “A mene hote ngie nemur lange hot. A poia Temek nena pele ke pomanga ingala ana pele ero.” <sup>17</sup> Pe nena hana mur leteria metene NeHalang nena helenga nenge tehas sue ke ulolo, nenge hele ke teke, “NeHalang lem pele ana mute tu toto nge iau. Pe ngaulala nga letek ke pomanga oan ngingina ngana.”

<sup>18</sup> Ol pe Iuta mur aria papalauna mur te hele lange Iesus ke te teke, “O poi hote merakulo hel ke monau mukam. Pomalam lape mo eteia ke Iong lem kerkerenga palaungana nge o poia poinga nei.”

<sup>19</sup> Pe Iesus hele, “A toto sue NeHalang nena pele palaungana nei, pe nga etue iri mol mana lape e hemes heke mule.”

<sup>20</sup> Pe hana Iuta nemur te tuacholia ke te teke, “NeHalang nena pele palaungana nei te hemes heke pe te umume ia ke hesinga iri ana non kina nai pe rahtele elle. (46) Pe iong ma oteke o hemes heke mule nga etue iri mol mana mam?”

<sup>21</sup> Pe Iesus helele ia NeHalang nena pele palaungana nem ero. Iesus helele ia i sipona singina. <sup>22</sup> Ke nga etue nenge Iesus maul haka mule nga metenga, nena hana mur nenge te nananas ia i, leteria metene mule

nena helenga nei. Pomalam leteria manmanna nga NeHalang nena alalaha mur pe Iesus na helenga mur.

<sup>23</sup> Iok, Iesus tunge Ierusalem nga ngaunga matana nenga In-gatoto ana etue pe poia merakulo halang ke te lohot. Pe hulua te esia pe leteria manmanna nga Iesus ene. <sup>24</sup> Pe Iesus etei tote hulua lochloch leteria tuanin ngana mur ke ulolo. Pomalam elechin teu la sakilil nge iri ero. <sup>25</sup> Mele nakuna ero toto nge hetore Iesus nga hana leteria tuanin ngana mur. Iange i etei tote leteria ke ulolo.

### 3

#### *Iesus Hetore Nikotemus*

<sup>1</sup> Iok, non Paresio e ene Nikotemus. Pe i non soke ia pule nenge tenau elele hehei pe hana nenge Iutea.

<sup>2</sup> Ana non lange Iesus nga miliko e pe hele, “Hetorong, imem mo eteia ke iong hetorong nenge NeHalang kulosia ke at. Iange Iong o hele pe ure te lohot manmana. Nenge teke NeHalang tu luluch nge iong ero, lape nakum ero nge o poia ure papalaungana nemur.”

<sup>3</sup> Pe Iesus tuacholia non neu na helenga ke teke, “E hele ke manmanna toto. Mele pele lape teu langa NeHalang nena naualanga pe nekinga ero toto. Iri nenge teha mule ke iri heueu ngana mule. Iri toro teteu la.”

<sup>4</sup> Pe Nikotemus ontei mule, “Lape te hoho mule mele ke merei ol nga etue nenge tana hoho hote ke ulolo? Mele pele teu la henai ngana mule nga tana letena ke tana hoho mule i ero kura!”

<sup>5</sup> Pe Iesus tuacholia ke teke, “E hele ke manmanna toto lange iong, mele pele lape teu langa NeHalang nena naualanga pe nekinga ero toto. Pe mele nenge mene hohonga nenga ech pe Opepengpeng, mele nem mana lape teu la. <sup>6</sup> Hohonga nenge lohot nge tara pe temere, i singira ana ia. Pe hohonga nenge lohot nga

Opepengpeng i opere ana ia. <sup>7</sup> Ke o rura ero nga nenge e hele lange iong ke e teke, 'Imo lochloch ala ke te hoho mule imo.' <sup>8</sup> Tuttula song ke langa lemene ngana pe o longlonge. Pe o eteia tuttula nem at ngana kau? Pe o eteia la nganngana pule? Ke iri nenge te mene hohonga nenga Opepengpeng tepoi ke pomalam mana."

<sup>9</sup> Pe Nikotemus ontei mule, "Ke ure nenge nei lape lohot ke mere toto mai?"

<sup>10</sup> Pe Iesus hele, "Iong non hetoronga enge Israel, pe pomerei letem mallaha nga ure nemur ero? <sup>11</sup> E hele ke manmanna toto lange iong, imem mo helele ia ure nemur nenge mo eteia iri pe mo nenene ure nemur nenge mo eses ia iri. Pe pomerei letemo manmanna nga ure nemur ero? <sup>12</sup> E nenene ure nemur nga ich pe letemo manmanna ero. Pe nenge teke e nene ure nemur nga tapa, lape letemo manmanna ol kau? <sup>13</sup> Mele pele langa lut nga tapa ero toto. Non Tuna i toro mana. Iange i sio at nga lut nga tapa. <sup>14</sup> Pe Non Tuna nem lape te heon heke ke langa lut ke pomanga ilimo nenge Moses heon heke nga ae nga ich sana lomona. <sup>15</sup> Ke iri nenge leteria manmanna nge i lape te mene maulinga ke koko.

<sup>16</sup> "NeHalang lemene tau tote hehei pe hana nga ich nei. Pomalam tung hote tuna elle mana nem. Pe iri nenge leteria manmanna nge i lape te mene maulinga ke koko. Te mete sapele ero. <sup>17</sup> Iange NeHalang kulos sue Tuna at nga ich ke heporeke hehei pe hana ero. At ke mene mule hehei pe hana ke tela nge NeHalang. Pe kue nenge tela ia nge NeHalang, ngana laka nge Iesus i sipona lo. <sup>18</sup> Pe mele hel nenge leteria manmanna nge i lape te amnei teu langa reria poinga poreke ngana mur ero. Pe mele hel nenge leteria manmanna nge i ero, te amnei teu nga reria poinga poreke ngana mur ke het lo.

Iange iri leteria manmanna nge NeHalang Tuna elle nem ero. <sup>19</sup> Te amnei teu langa reria poinga mur ke pomai koi: Lemenge sio at nga ich nei ke ulolo, pe hehei pe hana lemeria ero ia. Lemeria tau mene kileng au ngana iange reria poinga mur poreke toto. Pomalam NeHalang lape tuacholia ke poreke toto lange iri. <sup>20</sup> Iri lochloch ngana nenge te popoi poinga poreke ngana, lemeria ero lemenge. Pe lemeria ero nge tei hot nga kileng mesehe ngana, iange lape reria poinga poreke ngana mur, tetu ke mallaha hot mana. <sup>21</sup> Pe mele hel nenge te longo taua NeHalang nena helenga manmanna ngana, tei hot langa lemenge. Pomalam lape tees mellehe mene ke reria poinga nemur nenge te popoia, te poia nga NeHalang lemene ngana."

### *Ioanes Nenge Henunun Nana Urume Ure Manmanna Ngana Nenge Naue Nge Iesus*

<sup>22</sup> Iesus hele ke mau ke het pe i pe nena hana mur nenge te nananas ia i, tehot langa ich nenge Iutea. Pe tu pol mana luluch nge iri pe henunune hehei pe hana. <sup>23</sup> Pe Ioanes pule henunune hehei pe hana nga kileng nenge Aenon. Kileng nei rochroi langa kileng nenge Salem pe ana ech halang. Pomalam hulua te atat ke kokoes ke Ioanes henunune iri. <sup>24</sup> (Nenge nei lohot tala nga etue nenge tetal teua Ioanes nga tuele au ngana.) <sup>25</sup> Ol pe hunelinga unne lohot nge Ioanes nena hana mur nenge te nanansia i, pe non Iuta e. Te hunel nga poinga nenge Iuta mur te nananasia nenge te henun susue iri ke te helemlem mulmule iri nga reria poinga poreke ngana mur. <sup>26</sup> Ol pe tela nge Ioanes pe te hele, "Heteronga, letem metene non nem nenge tu luluch nge iong nga ech ilina hele nge Iortan pe iong o haliu hotote i lala nge hehei pe hana. i kou henunun pule pe hulua te lala nge i."

<sup>27</sup> Ol pe Ioanes tuacholia ke teke, “Ure lochloch ngana nenge ta mene, teat mana nge NeHalang i toro pe nga kue e ero ol. <sup>28</sup> Imo sipomo a longe nge e heleia ke ulolo nenge e teke, ‘Iau Kristus ero koi. Iange iau, te kulosia iau ke iau muka at.’ <sup>29</sup> Non e lei pe mene hei nem ke nehei ia. Pe non nem na tula nenge longo tau-taua i, kulala pe longo ala manmana. Pe nenge teke talngana pair ia non halangina neu kannu unne, non nem letena iech toto. Pe iau e iech toto ke pomange non nem pule. <sup>30</sup> Pe i lape lohot ke i palaungana toto. Pe iau, e ele sio toto.

<sup>31</sup> “I nenge sio at nga lut i palaungana nga ure lochloch. Pe i nenge at nga ich pe nena nga ich helele ia ure nemur nga ich. Ke i nenge sio at nga tapa i palaungana nga ure lochloch. <sup>32</sup> Ana non helele ia ure nemur nenge e sesia pe longlonge pe mele pele letena manmanna nge i ero toto. <sup>33</sup> Pe iri nenge leteria manmanna nge i, te henonou hote ke NeHalang pal-laklaka ero. <sup>34</sup> Pe i nenge NeHalang kulosia ke at, hele hotote NeHalang nena helenga mur iange NeHalang tung tote Opepengpeng ke muta toto nge ana non. <sup>35</sup> Temene mutena tau tote Tuna, pomalam tal heke ure lochloch ngana nga Tuna penna. <sup>36</sup> Pe mele nenge letena manmanna nge Tuna lape mene maulinga ke koko. Pe mele nenge lemene ero ia Tuna lape teu langa maulinga ke koko nem ero. Iange NeHalang letena inin ngana lape tu manmana nge mele nem ke kokoes.”

## 4

### *Jesus Hele Luluch Nge Hei Samaria*

**E** <sup>1</sup> Iok, Paresio mur te longo nge hulua halang toto te lala nge Jesus ke henunune iri pe Ioanes ero. <sup>2</sup> Pe ure manmanna ngana, Jesus nena hana mur laka nenge te popoia ume nem,

nenge te henunune hehei pe hana. Pe Iesus i sipona ero. <sup>3</sup> Nga etue nenge Iesus eteia ke pomau, lohaka nga kileng nenge Iutea pe la mule nga kileng nenge Kalelea.

<sup>4</sup> Pe la mule ngana lape i nga kue nenge langa tuele kina nenge Samaria. <sup>5</sup> Pomalam Iesus la ke lohot nga tuele tana e nge Samaria nge ene Sikar. Ana kileng tu ke rochroi langa ich unne nenge ne Iakop tunge lange tuna Iosep. <sup>6</sup> Pe ne Iakop ana ech matana e nge sel ia, tu nga lamau pule. Pe kileng sinanga toto lo iange chaia matana heurunga pengpeng. Pe Iesus i nga kue sase ngana pe makuk toto lo. Ol pe la ke are sio nga ech matana neu.

<sup>7</sup> Pe hei Samaria e teke la ke eul ech, pe Iesus hele lange i ke teke, “Hei nem o eulia ech unne at ke ein mukam?” <sup>8</sup> (Nga etue neu Iesus nena hana mur nenge te nananas ia i, ngaria kou tela nga tuele tana ke teol aria ngaunga.)

<sup>9</sup> Pe hei Samaria neu hele lange Iesus ke teke, “Iong lem nge Iutea pe iau lek nge Samaria. Pe pomerei o onteia iau ke e eul am ech?” (Hei neu hele ke mau iange Iuta mur te teke te tu kangkanga toto nge Samaria mur.)

<sup>10</sup> Pe Iesus hele, “Toinge o eteia urelu urana ngana mur nenge NeHalang tung menmene iri, pe o eteia mele nenge onteiteia iong nga ech nei, lape o ontei ech lange i pe lape tunge ech nenge maulinga ana lange iong.”

<sup>11</sup> Pe hei neu hele, “Non Soke, lape o eul hote nga utar? Ech matana nei lange sio toto i. Eh, lape o mene ech nenga maulinga ke koko nem langai? <sup>12</sup> Eh iong palaungana toto nge lememe te ne Iakop ma? I kai nenge tunge ech matana nei at nge imem mai. Pe i pe tutuna mur pe reria sipsip mur te inin ia ech nei pule.”

<sup>13</sup> Pe Iesus hele, “Iri lochloch ngana nenge te inin ech nga lamai lape te meteune ech mule. <sup>14</sup> Pe mele nenge



inia ech nenge e tunge lange i, lape mete ana ech mule ero ol. Iange ech nem lape lohok ke i ech matana nenge pachpach hotot pe lelele nga letena ke tunge maulinga ke koko nge i.”

<sup>15</sup> Pe hei neu hele lange Iesus, “Tok, Non Soke o tunge ech nem at nge iau. Pomalam lape mutenga nenga ech het nge iau, pe pule eat lamai ke e eul ech ero ol.”

<sup>16</sup> Pe Iesus hele lange i ke teke, “Ola pe o hele nge em pe oi at mule.”

<sup>17</sup> Pe hei neu hele, “Iau ek ero i.”

Pe Iesus hele, “Helenga nenge o heleia nem manmanna, nenge o teke em ero. <sup>18</sup> Pe i manmanna ke em hana iri lime. Pe non nenge o mene i heueu nei, iong em ia ero. Ke lem helenga nem manmanna.”

<sup>19</sup> Pe hei neu hele, “Non Soke, nga enau ngake eteia ke iong hetatalonga e. <sup>20</sup> Lemem tete mur te hetalaulau pe te heto hekeke nga hengene nei. Pe imo Iuta mur a teke hetalaulaunga ana kileng nge Ierusalem mana.”

<sup>21</sup> Pe Iesus hele, “Hei nem, letem manmanna nga lek helenga nei. Etue e lape at nenge lape a hetalaulau pe a heto heke Temere nga hengene nei ero. Pe lape a heto hekeke Temere nge Ierusalem ero pule. <sup>22</sup> Pe imo Samaria mur a eteia utar nenge a hetalaulau pe a heto hekeke ero. Pe imem Iuta mur mo eteia utar nenge mo hetalaulau pe mo heto hekeke. Iange maulinga ke koko chach hot nge Iuta mur. <sup>23</sup> Pe etue e pule lape at, nenge lape hetalaulaunga ana hana mur toto te hetalaulau lange Temere nga ope pe nga ure manmanna toto ngana. Ke ana etue koloi at lo. Iange Temere tango rerere hetalaulaunga ana hana mur nenge pomau. <sup>24</sup> NeHalang i ope mana, pe nena hetalaulaunga ana hana mur lape te hetalaulau pe te heto heke i nga ope pe nga ure manmanna toto ngana.”

<sup>25</sup> Pe hei neu hele, “Iau e eteia ke Mesias kou atat kura.” (Mesias te

hetue ke Kristus). “Pe nga etue nenge at ke sau hot, lape hele urume ure lochloch ngana at nge imem ol.”

<sup>26</sup> Ol pe Iesus hele, “Pe ana non kai iau mai loi, iau nenge e hele lala nge iong nei mai.”

<sup>27</sup> Iesus hele ke mau ke het pe nena hana mur tela ke te lohok mule nge i. Pe te rura ia i nge hele lululuch nge heie. Pe e nge iri onteia Iesus nga onteinga nemur ero: “Lemem taua utar nge hei nei” nem pe “Pomerei nenge o hele luluch nge hei nei?”

<sup>28</sup> Ol pe hei neu hile sue ana ech kina pe la mule nga tuele tana neu. La pe hele lange hehei pe hana ke teke, <sup>29</sup> “Ai at ke anau nge Non nei. Non nei hele hote ure lochloch ngana nenge e popoia nge nike ke at heueu nei. Lape i Kristus ka loi?” <sup>30</sup> Iok laol, tei hot nga tuele tana neu pe tei ke ramaria lange Iesus.

<sup>31</sup> Nga etue neu Iesus nena hana mur te echia i ke te teke, “Hetoronga, o ngau polia ute mukam.”

<sup>32</sup> Pe Iesus hele lange iri ke mai, “Ak ngaunga nenge e ngaua, imo a eteia ero toto.”

<sup>33</sup> Ol pe nena hana mur nenge te nananas ia i, te mangun tele hel nge iri ke te teke, “Lape mele at ia ana ngaunga lo kai?”

<sup>34</sup> Pe Iesus hele lange iri ke teke, “Iau lape e nanas mene Non nenge kulosia iau at lemene ngana. Pe lape e heulo hote nena ume mur. Ke ak ngaunga laka nem lo. <sup>35</sup> Imo a helele ke a teke, ‘Teio henel koi tu kura. Teio henel nem het pe lulunga ana etue sapele.’ Pe e hele lange imo, anau haka pe anau langa ume mur! Ngaunga nga ume nemur te mera tah lo. Pe a lule iri nge ngingie ol? <sup>36</sup> Heueu nei lulunga ana hana mur kou te menmene ururia lo. Iange te lulu kiraua ngaunga nenga maulinga ke koko ana ke ulolo. Pe non nenge tue ngaunga nemur lape iech luluch nge lulunga ana hana nemur. <sup>37</sup> Pe helenga nei manmanna.

Nenge te helele ia ke te teke, ‘Non e tue ngaunga nga ume pe none la ke lule.’<sup>38</sup> Pomalam e kulosia imo kela a lulu nga ume nenge imo sipomo atue ero. Mele hel te poia ume palaungana lo, pe imo a lulu heke mene ume palaungana nem nganangana ol.”

#### *Hulua Nge Samaria Leteria Manmanna*

<sup>39</sup> Hulua halang nge Samaria nenge tetu nga kileng neu leteria manmanna nge Iesus. Iange te longe hei neu nena helenga nenge hele ke teke, “Non nei hele hote ure lochloch ngana nenge e popoia nge nike ke at heueu nei.”<sup>40</sup> Pomalam Samaria mur tela nge Iesus pe te echia i ke tu nge iri, pe tu luluch nge iri ke etue nai.<sup>41</sup> Pe te longlonge Iesus nena helenga mur pe hulua halang mule leteria manmanna.

<sup>42</sup> Pe te hele lange hei neu, “Nga tele ngana, imem mo longe iong toro lem helenga pe letemem manmanna nge Non nei. Pe nei ol, imem sipomem mo longe i pe mo etei mellehe mene ke non nei i non nenge at ke mene mule hehei pe hana nga reria poinga poreke ngana mur, nga kileng lochloch ngana nga ich.”

#### *Iesus Hemaulia Non Soke E Tuna*

<sup>43</sup> Iok, etue nai het pe Iesus lohaka ke lange Kalelea.<sup>44</sup> (Iesus hele hot tele ke ulolo ke teke non hetatalonga e lape pingana iuiu nga nena kileng huna ero toto.)<sup>45</sup> Iok, Iesus i kela lohot nge Kalelea pe iri nenge Kalelea te long teua i pe leteria manmanna nge i. Iange nga etue nenge tela nge Ierusalem nga ngaunga matana nenga Inगतoto, te esesia ure nemur nenge Iesus popoia iri.

<sup>46</sup> Iesus tu nge Kalelea pe la ke lohot mule nga kileng nenge Kana, nga kileng nenge hulua ech pe lohot ke uain. Pe nge Kapernam, naungaala ana none nena non soke e tutu. Pe tuna tamane ngana singina haleles toto.<sup>47</sup> Non neu longe nge te teke Iesus lohaka nga kileng nenge

Iutea, pe la ke lohot nge Kalelea ke ulolo. Pomalam, ana non la ke naue Iesus pe onteia i ke teke Iesus lange Kapernam kela hemas mule tuna nge singina haleles toto lo.

<sup>48</sup> Pe Iesus hele lange i ke teke, “Imo nemur letemo manmanna ero toto. Nenge teke a naue ure mur nge te lohot manmana, laka lape letemo manmanna.”

<sup>49</sup> Pe non neu hele, “Non Soke, osio la ke ueiuei mana iange lape tuk mete heueu.”

<sup>50</sup> Pe Iesus hele, “Ola mule ol. Tum lape tu ke maulul.”

Pe non neu letena manmanna nga Iesus nena helenga pe i kela sapele.

<sup>51</sup> Ana non i ke lala kura pe nena hana mur nenge te umume nge i, te apenia i nga kue. Pe te hele lange i ke te teke, “Tum kou maul mule lo.”

<sup>52</sup> Pe ana non ontei hote iri nga etue nenge tuna maula mule ia, pe te hele ke te teke, “Nge lona nga sinanga. Nga etue koana nenge tera haka mulmule ume ia.”

<sup>53</sup> Ol pe kol neu temene eteia ke nge lona nga etue koana nem pengpeng, Iesus hele lange i ke teke, “Tum lape tu ke maulul.” Ol pe non neu pe iri lochloch ngana nenge tetu luluch nge i nga nena pele, iri lochloch ke leteria manmanna.

<sup>54</sup> Pe nenge nei i merakulo naingana nenge Iesus poia nga etue nenge lohaka nge Iutea ke la tu nge Kalelea.

## 5

#### *Iesus Hemasia None Nga Ech Matana Nge Petesta*

<sup>1</sup> Iok, etue hel nga hoena Iesus lohaka ke lange Ierusalem iange Iuta mur te popoia ngaunga matana e.  
<sup>2</sup> Pe nge Ierusalem ech matana e tu. Ana ech matana tu ke rochroi mana nga kue matana nenge teu langa kileng neu. Pe kue matana palaungana neu te hetue ke ene Sip-sip ana Kue Matana. Pe nga helenga Hipru te hetue ech matana neu ke ene, ech matana nenge Petsaita pe

ech matana neu ana sauach iri lime. <sup>3-4</sup> Pe hulua nge haleles poia iri tema sio rara mana nga lamau. Iri nenge mataria hit pe iri nenge aperia lul pe iri nenge singiria metmete. [Nga etue hel Non Soke nena angkelo sio at ke tua maimai heke ech nga ech matana neu. Tua maimai heke ech pe mele nenge i muka sio kela nun teu nga ech neu, ana haleles nenge tutu nge i nem het sapelpele.] <sup>5</sup> Pe none nge haleles tu nge i ke hesinga iri ana non kina elle pe analoch pe rahtele mol(38), tu nga lamau pule. <sup>6</sup> Pe nga etue nenge Iesus esia non neu, Iesus eteia ke haleles neu tunge non neu ke mala toto lo. Ol pe Iesus onteia non neu, “Lemem ke o teke o urana mule?”

<sup>7</sup> Pe non haleles kina neu hele, “Non Soke, mele e nge halaua iau ero ka mai. Ech nei tua maimai haka pe e teke esio kela enun teu pe ero, mele hemuka toto ala lo.”

<sup>8</sup> Ol pe Iesus hele lange i, “O lohaka! Pe o mene lem manga pe oi.” <sup>9</sup> Nga etue neu pengpeng haleles neu het nge non neu, pe lou heke nena tako nenge mamaia pe i sapele.

Pe ure neu lohohot pengpeng nga Sapat ana etue. <sup>10</sup> Pomalam Iuta mur te hele lange non nenge urana mule neu ke te teke, “Sapat ana etue i heueu mai. Pe hotonga hele ke teke o takisia lem manga ero.”

<sup>11</sup> Pe non neu tuacholia ke teke, “Non nenge hemaulia iau hele at nge iau ke teke, ‘O lou heke lem tako nenge o mama ia pe oi.’”

<sup>12</sup> Pe hana nemur te ontei mule i, “Non tei toto nemam, nenge hele lange iong ke teke o mene heke pe oi?”

<sup>13</sup> Pe non neu eteia non nenge hemaulia i ero ol, iange Iesus kou salekleke teu nga hulua leteria kela lo.

<sup>14</sup> Pe nga hoena, Iesus sahol mule non neu nga NeHalang na pele palaungana letena. Pe hele lange i ke teke, “O naue lo, o urana mule lo. Pe

o poia poinga porekreke ngana mur ero ol, iange lape ute e nge poreke toto lape lohohot mule nge iong.” <sup>15</sup> Ol pe non neu la sapele pela hele lange Iuta mur ke teke Iesus laka nenge poia i ke urana mule nem.

### *Maulinga Ke Koko Nenge Non Tuna*

<sup>16</sup> Iesus hemas mule non neu nga Sapat ana etue pomalam Iuta mur te talun sapele ke te tunge melmelenga lange i. <sup>17</sup> Pe Iesus hele lange iri ke teke, “Temek ume ke kokoes mana, ke pomalam e umume pule.”

<sup>18</sup> Ke nga nenge nei, Iuta mur te totoi ke kerkereng ke te toto hita toto ke te teke te hune Iesus. Pe huna nga nenge neu mana ero. Nenge umume nga etue palaungana nenge Israel mur te hetalaulau ia. Huna e pule nga nenge hetetue NeHalang ke i sipona Temene, pe poia i sipona ke ana opo elle mana ke mange NeHalang.

### *Iesus Mene Kerkerenga Nenge NeHalang*

<sup>19</sup> Pe Iesus tuacholia lange iri ke teke, “E hele ke manmanna toto lange imo, NeHalang Tuna poia ute pele nge i sipona ero. I poia ure nemur nenge naue nge Temene popoia. Ke ure nemur nenge Temene popoia, Tuna popoia pule. <sup>20</sup> Pe Temene mutena tau tote Tuna, pomalam henonoua i nga ure lochloch ngana nenge popoia. Ke lape Temene henonoua Tuna nga ure hel nge papalauna toto nga nei, pe lape imo lochloch ngana letemo una ala mana ia. <sup>21</sup> Temene hemaui heke mule hana nenge te mete ke ulolo pe tunge maulinga ke koko lange iri. Pomalam mana, Tuna lape tunge maulinga ke koko lange mele hel nga lemene ngana mana. <sup>22</sup> Temene tunge kerkerenga lange Tuna ke amnei teu lala nge hehei pe hana nga reria poinga mur. Pe Temene poia ume nem ero. <sup>23</sup> Ke pomalam

lape hulua te heto heke Tuna ke pomanga te heto heke Temene. Pe mele nenge heto heke Tuna ero, heto heke Temene ero, iange i kulosia Tuna ke at.

<sup>24</sup> “E hele ke manmanna toto lange imo, mele nenge longe ure nenge e heleia pe letena manmanna nge i nenge kulosia iau at, mele nem lape mene maulinga ke koko. Mele nem lape te amnei teu lange i ke te hot-  
taua ure poreke ngana e nge i ero ol. Iange i lohaka mule nga metenga ke mene maulinga ke koko lo. <sup>25</sup> Pe pule e hele ke manmanna lange imo, etue nenge atat ana etue koi nei lo nenge lape hana nenge te mete ke ulolo te longo hilia NeHalang Tuna kannna. Pe iri nenge te longe lape te mene maulinga ke koko. <sup>26</sup> Iange Temene nena kerkerenga nge tunge maulinga ke koko. Pe i tunge kerkerenga elle mana nem lange Tuna. <sup>27</sup> Pe Tuna mene kerkerenga nenge amnei teu lala nga hehei pe hana reria poinga mur. Temene tunge kerkerenga nem lange i, iange i Non Tuna. <sup>28</sup> A rura nga helenga nei ero: Etue e lape at. Pe iri lochloch ngana nenge te mete ke tema nga polo ke ulolo lape te longe nena hal-iunga <sup>29</sup> pe lape te lohok nga reria polo mur. Pe iri nenge te nanasia poinga nge pengpeng lape te lohaka mule pe te mene maulinga ke koko. Pe iri nenge te nanasia poinga nge pengpeng ero, lape te lohaka mule pe NeHalang amnei teu langa reria poinga poreke ngana mur.

### *Jesus I NeHalang Tuna*

<sup>30</sup> “Iau e poia ute pele ke iau toro ero. E amnei teu langa hehei pe hana reria poinga mur ke pomanga Temek hele ngana ia at nge iau. Ke e amnei teu ngak nem song hot ke urana. E poia ume nei pe e heto haka ek ia ero. E teke e poia i nenge kulosia iau at ke iech.

<sup>31</sup> “Ke nenge teke e nenene iau sipok lala nge hehei pe hana, lek helenga nem ute pele ero. <sup>32</sup> Pe mele e nge altoto kou nana urumrume iau. Pe e eteia ke ure nemur nenge heleleia iri neu, manmanna.

<sup>33</sup> “Imo, a kulosia hehei pe hana lange Ioanes nenge henunun. Pe i hele urume iau pe nena helenga manmanna. <sup>34</sup> Nenge none mana hele urume iau, nem ure palaungana ero. E hele mene ke halaua imo ke a mene maulinga ke koko. <sup>35</sup> Ioanes poi ke pomalaka nga lemenga nenge sapel lala pe tualeleme. Pe a iech ele mene lemenga nenge Ioanes nga etue choro ngana mana.

<sup>36</sup> “Pe ure nenge ele haka toto nga Ioanes nena helenga mur, ngana koi ure nemur nenge e popoia nei. Ure nemur Temek tunge iri at nge iau, pe te henonou hot pengpeng ia ke Temek kulosia iau at. <sup>37</sup> Pe pule, Temek nenge kulosia iau at nei, i sipona hele urume iau. Pe imo, a naue nakuna ero pe a longe nena helenga ero. <sup>38</sup> Nena hengetoro ma teu nge imo ero iange letemo manmanna nge non nenge kulosia at ero. <sup>39</sup> Imo a sisia NeHalang nena helenga mur nenge ta has sue iri ke nek tototo, iange a teke lape a mene maulinga ke koko. Pe NeHalang nena helenga nemur, te helele ia kai iau mai loi! <sup>40</sup> Pe pomerei a at nge iau ke a mene maulinga nem ero?

<sup>41</sup> “Iau lemek ke hehei pe hana te heto heke iau ero. <sup>42</sup> Iange e etei mellehe mene imo nge mutemo taua NeHalang nga kakahomo ero toto. <sup>43</sup> Iau, Temek kulosia iau pe e mene munna ke eat nge imo pe lememo ero ia iau. Pe nenge teke mele at pe hele nga i sipona ene, lape anak teua i. <sup>44</sup> Poinga nenge a heto haka helal nge imo a iech ia ke elela. Pe lememo ero nge a nansia kue urana ngana hel nenge NeHalang i sipona heto heke imo ia. Pe



lape letemo manmanna nge iau ke merei ol? <sup>45</sup> A teke iau nge lape emes nga Temek matana pe e hele hot amo kai? I nenge lape hele hot amo laka Moses. Imo letemo kerkereng nge i ke a teke lape mene mule imo. Pe i nge lape toto hita mule amo laka. <sup>46</sup> Nenge teke letemo manmanna toto nge Moses iok, letemo manmanna nge iau pule. Iange Moses nena hassinga mur helele ia i iau lo. <sup>47</sup> Pe nenge teke letemo manmanna nga Moses nena hassinga mur ero, ol pe lape letemo manmanna nge iau ke mere?”

## 6

### *Iesus Hengaua Hulua (5,000)*

(*Mat 14:13-21; Mak 6:30-44; Luk 9:10-17*)

<sup>1</sup> Iok, Iesus hele ke het pe lotele sapele nga ech hetaliliu ngana palaungana nenge Kalelea ke langa ele. (Pe ech neu ene e pule laka Tiperias). <sup>2</sup> Pe hulua halang te nanasia i iange te esia merakulo mur nga etue nenge hemasmas ia haleles mur. <sup>3</sup> Iok laol, Iesus lohaka langa sasana ilina pe are sio luluch nge nena hana mur. <sup>4</sup> Pe ngaunga matana nenga Inगतoto heroi lo. <sup>5</sup> Pe Iesus nau rara pe esia hulua nge te atat nge i. Ol pe onteia Pilipus, “Lape ta olia hulua nemur aria ngaunga langai ke te ngau?” <sup>6</sup> Iesus eteia utar nenge lape poia lo, pe i teke olleke mene Pilipus nga onteinga nei.

<sup>7</sup> Pe Pilipus hele, “Nenge teke ta mene none uruna nga teio iri rahtele mol (8) pe ta olia nga hulua nemur aria naunga, lape teram mene pe saria una ero toto.”

<sup>8</sup> Pe Iesus nena none pule ene Antreas, nenge Simon Petrus tina. Ana non lohaka pe hele, <sup>9</sup> “Kol suna nei mene ke loi iri lime pe ruo kinkino ngana nai. Pe lape purpure hulua nemur ke merei?”

<sup>10</sup> Pe Iesus hele, “Iok, a hele lange hehei pe hana ke teare sio.” Kileng neu ana heilil halang pe hehei pe

hana teare sio nga lamau. Pe tesis mene hana mur pe te lohote ke iri ana non kina lime iri analoch iri lime (5,000). <sup>11</sup> Ke het pe Iesus mene loi nemur pe hele urana toto lange Ne-Halang pe heronge lange hulua nemur nenge teare nga lamau. Pe poia ruo nemur ke pomau pule pe hulua nemur te ngau ke saria una toto nga lemeria ngaria.

<sup>12</sup> Iok laol, hulua nemur te ngau ke saria una ol pe Iesus hele lange nena hana mur, “A takiraua ruo pe loi aluanuana mur. Pomalam lape ngaunga unne hesil ero.” <sup>13</sup> Iok, Iesus nena hana mur te takiraua loi lime nem aluana mur pe te takiraua ke ana chasang iri analoch pe nai ke te muta.

<sup>14</sup> Hulua nemur te esia Iesus nge poia merakulo neu ke pomau pe te hele, “Manmanna toto ke non nei, i hetatalonga nem nenge te teke lape sio at nga ich nei.” <sup>15</sup> Iok, Iesus eteia hulua nemur leteria tuanin ngana mur ke ulolo. Iri te teke lape te laua Iesus pe te echia i ke te teke aria naungaala ana non ia. Pomalam Iesus i toro i haka la mule nga hengen e.

### *Iesus I Haka Mana Nga Ruach Sana*

(*Mat 14:22-33; Mak 6:45-52*)

<sup>16</sup> Iok, ulei sio lo pe Iesus nena hana mur tei sio langa ech hetaliliu ngana. <sup>17</sup> Pe Iesus at ke lohote nge iri ero mana. Ol pe te lohaka nga sulang pe te mana tele nga ech ke tela nge Kapernam. <sup>18</sup> Pe kileng heingana palaungana lohote pe poia ech ke ur haka ke halang. <sup>19</sup> Teote ke te siklou nga tunangana lo, pe te naue Iesus nge i mana nga ech sana kela tautaua iri. Ol pe te matau toto. <sup>20</sup> Pe Iesus hele lange iri, “A matau ero iau pa-iam.” <sup>21</sup> Ol pe te poia i ke haka luluch nge iri, pe ueiuei mana tesio nga ech hele nga kileng nenge te lala ia neu.

### *Hulua Te Tango Rere Iesus*

<sup>22</sup> Iok, pomange rou hulua nenge tetu nga ech neu ilina hele kura, te

eteia ke Iesus tamu haka luluch nge nena hana mur nga sulang ero. Nena hana mur tela pe i tu. Pe pule te eteia ke aka elle mana ma nga lamau. <sup>23</sup> Ol pe sulang hel teat nga kileng nenge Tiperias ke tesio nga kileng nenge Iesus mene loi pe hele urana toto lange NeHalang pe tunge ke hulua te ngaua. <sup>24</sup> Pe hulua nemur tenau pe Iesus iri hul nena hana mur iri ero mai ol, te lohaka sapele nga sulang nemur pe tela nge Kapernam ke te tango rere i.

### *Iesus I Ngaunga Nenga Maulinga*

<sup>25</sup> Iok, nga etue nenge te hottaua Iesus nga ech ilina ele, te onteia i, “Hetorongā, O lotele at lamai nge ngingie?” <sup>26</sup> Pe Iesus tuacholia ke teke, “E hele ke manmanna toto lange imo. Imo a tango rerere iau iange a ngaua ngaunga nem pe samo una toto. Pe nga ure nemur nenge e hele pe te lohot manmana, a tango rere iau ia ero. <sup>27</sup> Ngaunga nenge het mule ke ueiuei, a pur sakilil ia ana tangonga ero. A tango rara tote laka ngaunga nenga maulinga ke koko, nenge Non Tuna lape tunge lange imo. Iange Temere NeHalang tal heke nena kerkerenga lange i ke ulolo.”

<sup>28</sup> Pe iri te onteia Iesus, “Ke ume utar mur nenge NeHalang lemene ke teke mo poia?”

<sup>29</sup> Pe Iesus hele, “Ume nenge NeHalang teke a poia, ngana koi nei: letemo manmanna nge non nenge i sipona kulosia at.” <sup>30</sup> Ol pe te ontei mule i, “Ke lape o hele mana pe utar lohot ke mo esia pe letemem manmanna nge long? Eh, lape o poia utar? <sup>31</sup> Lemem tete mur te ngaua ngaunga menini ngana nga ich sana lomona ke pomanga tehas sue nga NeHalang nena alalaha nge hele ke teke, ‘Ana Non tunge ngaunga nenga tapa ke te ngaua.’”

<sup>32</sup> Pe Iesus hele, “E hele ke manmanna toto lange imo. Ngaunga

nenga tapa nem Moses tunge lange imo ero. Temek laka nenge tung-tunge ngaunga manmanna ngana nem. <sup>33</sup> Ke ngaunga nenge NeHalang, ngana laka i nenge sio at nga tapa ke hesue maulinga nga ich nei.”

<sup>34</sup> Pe hulua nemur te hele, “Non Soke, talun heueu nei pe la ol, o tung-tunge emem ngaunga nem.”

<sup>35</sup> Ol pe Iesus hele ke teke, “Ngaunga nenga maulinga, ngana koi iau lo. Mele nenge at nge iau, lape meteana mule ero ol. Pe mele nenge letena manmanna nge iau lape meteana ech mule ero ol. <sup>36</sup> Pe imo e hele lange imo, a naue iau lo pe letemo manmanna ero toto. <sup>37</sup> Iri lochloch nenge Temek tunge iri at nge iau lape teat nge iau. Pe mele nenge at nge iau lape enek teua i. <sup>38</sup> Iange esio at nga tapa ke e umeia ume nenge NeHalang lemene taua ke teke e poia. Pe e umeia ume nga lemek ngak ero. <sup>39</sup> Ke i nenge kulosia iau at lemene ke teke: Iri lochloch ngana nenge NeHalang tunge iri at nge iau, e hile hote elle nge iri ero toto. Lape e hemaui heke mule iri nga etue nga rume. <sup>40</sup> Ke Temek lemene ke teke, iri nenge tenau la mana nge Tuna pe leteria manmanna nge i, lape te mene maulinga ke koko. Pe lape e hemaui heke mule iri lochloch nga etue nga rume.”

<sup>41</sup> Pe Iuta mur te longe ke mau pe te tuainaunau hel rara sapele. Iange Iesus hele ke teke, “Iau laka ngaunga nem nenge sio at nga tapa.” <sup>42</sup> Ol pe te hele, “Non nei ene Iesus pe temene laka ne Iosep. Ita ta eteia temene pe tana. Pe pomerei hele ke teke, ‘Esio at nga tapa?’”

<sup>43</sup> Pe Iesus hele, “A tuainaunau hel rara nge imo ero. <sup>44</sup> Mele at nge iau nga i sipona lemene ngana ero. Temek nenge kulosia iau at poia mele nem ke at nge iau. Pe lape e hemaui heke i nga etue nga rume. <sup>45</sup> Hetatalonga mur tehas ke,

“ ‘Iri lochloch, lape NeHalang hetore iri.’

Ke iri lochloch nenge te longe NeHalang pe te nanasia, lape teat nge iau. <sup>46</sup> Mele pele naue Temek ero. Iau toro mana e naue Temek NeHalang iange eat nge i. <sup>47</sup> Pe e hele ke manmanna toto lange imo. Mele nenge letena manmanna nge iau, mene maulinga ke koko ke ulolo. <sup>48</sup> Ngaunga nenge tunge maulinga ke koko ngana koi iau. <sup>49</sup> Lemo tete mur te ngaua ngaunga menini ngana nga ich sana lomona pe te mete. <sup>50</sup> Pe ngaunga nenge sio at nga tapa nei altoto. Mele nenge ngaua ngaunga nei lape mete ero. <sup>51</sup> Pe ngaunga nenga maulinga ke koko nenge sio at nga tapa, ngana koi iau. Pe nenge teke mele ngaua ngaunga nei, lape tu ke maulul mana ol. Ke ngaunga nem, ngana koi iau sipok mirak, nenge lape e tunge. Pe e tunge ke hulua nga ich lochloch ngana te mene maulinga.”

<sup>52</sup> Ol pe Iuta mur te hele inin hel rara nge iri pe te hele, “Non nei mai tunge mirana ke ta ngaua ke mere mai?”

<sup>53</sup> Pe Iesus hele, “E hele ke manmanna toto lange imo. Nenge teke a ngaua Non Tuna mirana ero pe ainia eina ero, lape atu ke a maulul ero toto. <sup>54</sup> Pe iri nenge te ngaua mirak pe te inia eik, te mene maulinga ke koko. Pe lape e hemaui heke mule iri nga etue nga rume. <sup>55</sup> Iange mirak i ngaunga toto pe eik i ininga toto. <sup>56</sup> Iri nenge te ngaua mirak pe te inia eik, tetu teu luluch nge iau pe etu teu luluch nge iri. <sup>57</sup> Temek nenge tu ke maulul ke kokoes kulosia iau at, pe lape etu ke kokoes ke pomange i. Ke pomalam mana mele nenge ngaua mirak, lape tu ke kokoes ke pomange iau. <sup>58</sup> Iau ngaunga nenge sio at nga tapa pe epoi ke pomanga ngaunga menini ngana nenge lemo tete mur te ngaua ero. Iri te ngaua ngaunga menini ngana nem pe te mete. Pe mele nenge ngaua mirak, lape tetu

ke te maulul mana ol.” <sup>59</sup> Iesus hetottoro nga heteronga ana pele nge Kapernam pe helele ia ure nemur.

### *Helenga Nenga Maulinga Ke Koko*

<sup>60</sup> Pe Iesus nena hana mur te longe pe te ontei, “Hengetoro nei anali toto i. Itei nenge lape longo la ke nek kura mai?”

<sup>61</sup> Pe Iesus eteia ke nena hana mur te tuainaunau hel rara lo. Ol pe hele lange iri, “Pomerei? Hengetoro nei helosio ia letemo manmanna ngana kai? <sup>62</sup> Heueu nei, nenge teke a naue Non Tuna nge lohaka la mule nga kileng nenge at ia, lape heporeke letemo manmanna ngana pule? <sup>63</sup> NeHalang Opene tunge maulinga ke koko; pe none na kerkereanga ana ume pele ero. Ke helenga nemur nenge e heleia lala nge imo nem, Opepengpeng laka nena helenga mur. Pe helenga nemur te tunge maulinga. <sup>64</sup> Pe ero. Amo hel nge imo leteria manmanna ero.” Iesus etei tele iri ke het lo. Iri nenge leteria manmanna ero pe i nenge lape tung heke i langa hana porekreke ngana mur pereia. <sup>65</sup> Ol pe Iesus hele, “Ke ngana laka nenge e hele ke e teke, ‘Mele pele at nge iau ero. Iri nenge Temek poia ke teat nge iau, iri toro mana teat nge iau.’”

<sup>66</sup> Iesus hele ke mau ke het pe nena hana mur halang nenge te nanasia i, te ua mule pe te nanasia i ero ol.

<sup>67</sup> Pe Iesus onteia nena hana mur nenge iri analoch pe nai neu, “Imo a teke ala pule, ae?”

<sup>68</sup> Pe Simon Petrus tuacholia, “Non Soke, lape mola mule nge itei ol? Helenga mur nga maulinga ke koko laka tunge Iong. <sup>69</sup> Pe letemem manmanna pe mo eteia ke Iong NeHalang nena non nenge heongana toto.”

<sup>70</sup> Ol pe Iesus tuacholia, “Iau, e henonou hot ke imo analoch pe nai. Pe elle nge imo nanas tau tote non poreke ngana nena poinga mur.”

<sup>71</sup> Iesus helele ia Iutas nenge Simon Iskariot tuna. Iutas i none nga

Jesus nena hana analoch pe nai neu. Pe nga hoena tung heke mule Jesus lange hana porekreke ngana mur.

## 7

### *Jesus Titina Mur Leteria Manmanna Nge I Ero*

<sup>1</sup> Ke het pe Jesus i rara nga kileng mur nge Kalelea. Jesus lemene ero nge lange Iutea iange Iuta mur te kulala tote i ke te hune i. <sup>2</sup> Iok, etue nenga ngaunga matana palaugana nenge Iuta mur te mahoch rara nga reria pelpele mur, heroi toto lo. <sup>3</sup> Ol pe Jesus titina mur te hele lange i, “Iong toinge o lohaka nga lamai pe ola nge Iutea ke lem hana mur nga lamau te esia ure nemur nenge o hele pe lohoch manmana. <sup>4</sup> Iange mele nenge teke hulua lochloch ngana te eteia i, poi komkome ure mur ero. Ke ure nemur nenge o popoia iri nem, o poia ke hulua lochloch ngana nga ich te naue.” <sup>5</sup> Pe Jesus titina mur leteria manmanna nge i ero pule.

<sup>6</sup> Pomalam Jesus hele lange iri, “Iau, ak etue toto ngana at ero kura pe imo etue lochloch urana nge imo. <sup>7</sup> Iange hulua lochloch ngana nga ich nei lape saria keke imo ero. Pe iau, lape saria keke iau iange e hele chach hote ure poreke ngana mur nenge te popoia. <sup>8</sup> Ke pomalam, imo ala nga ngaunga matana palaungana nem. Pe iau lape ela ero iange ak etue toto ngana at ero kura.” <sup>9</sup> Jesus hele ke mau ke het pe tu sapele nge Kalelea.

<sup>10</sup> Iok, Jesus titina mur tela nga ngaunga matana palaungana neu lo. Pe Jesus haka la pule. La pe hetei hote i lange hehei pe hana ero. La kome mana. <sup>11</sup> Pe nga ngaunga matana neu, Iuta mur te tangtango pe te ontei rerere i, “Anau ke non nei ngai mai?”

<sup>12</sup> Iok, te hele chunuchnuch ia Jesus ke halang toto nga hulua leteria. Hel te teke, “Non nem, non urana ngana iam.”

Pe hel te hele, “Ero iam, non nem pallaklaka ia hehei pe hana.” <sup>13</sup> Pe elle nge iri ana seilil ero nge haliu hote Jesus, iange te mataua Iuta mur.

### *Jesus Hetottoro Nga Ngaunga Matana Palaungana Neu*

<sup>14</sup> Iok laol, ngaunga matana neu teke hetet lo pe Jesus i haka langa NeHalang nena pele palaungana pe talun ke hetoro. <sup>15</sup> Pe Iuta mur leteria tuanin rara pe te hele, “Non nei langa hengetoro e ero toto i. Pe eteia ure lochloch ngana nemur ke merei?” <sup>16</sup> Pe Jesus hele, “Hengetoro nemur nenge e tung hotote nei, iau sipok lek ia ero. At pengpeng nge i nenge kulosia iau at. <sup>17</sup> Nenge teke mele mutena ke nanasia NeHalang lemene ngana, lape eteia ke lek hengetoro nemur teat nge NeHalang. Pe iau sipok lek ero. <sup>18</sup> Pe iri nenge te hetottoro nga iri siporia reria kerkerenga, te teke hehei pe hana te heto hekeke iri. Pe mele nenge lemene ke hehei pe hana te heto heke i nenge kulosia i ke at, heleia helenga nge manmanna pe pallaklaka ero. <sup>19</sup> Moses tunge hotonga mur lange imo. Pe amo e nge imo longo taua hotonga nemur ero. Pe pomerei toto nenge a teke a hune iau mam?” <sup>20</sup> Pe hana nemur te hele, “Iong nge lape uneinei tuteu nge iong iam. Itei nenge teke hunune iong mam e?”

<sup>21</sup> Pe Jesus hele lange iri ke teke, “E hele mana pe ute e lohoch pe imo lochloch letemo una mana ia. <sup>22</sup> Pe Moses tunge hotonga nenga us rir ngana lange imo. (Hotonga nem talun nge Moses ero. Talun nge lemo tete mur nike.) Pe imo arir us nga Sapat ana etue. <sup>23</sup> Imo a nanas tau pengpeng ia hotonga nem ke nenge teke a riria mamau sune nga Sapat ana etue, a teke ute pele ero. Pe pomerei nenge letemo inin taua iau nge e hemasia none nga etue nem pule? <sup>24</sup> A henonou pulut mene perimo langa mele na poinga ero. A

7:1: Ioa 5:18    7:2: Lev 23:34    7:5: Ume 1:14    7:15: Mat 13:54; Luk 2:47    7:16: Ioa 12:49; 14:10    7:18: Ioa 8:50    7:19: Ume 7:53; Rom 2:21-24    7:20: Ioa 8:48; 10:20    7:22: Gen 17:9-13; Lev 12:3    7:23: Ioa 5:8-10, 16



amnei teu la ke nek toto mukam. Ke het pe a heleia ke ma ke pengpeng.”

*Iesus Mai I Non Nenge Mene Tuan-gaola Nge Heo Ngana Kai?*

<sup>25</sup> Nga etue neu pengpeng hana hel nge Ierusalem te talun ke te ontei sapele, “Non nenge te teke te hunune kaloi? <sup>26</sup> Ngana paian haliuliu nga hulua leteria pe te poia helenga unne lange i ero mana pamam. Eh, lape hana nenge iri mukmuka te teke non nei i Kristus kai? <sup>27</sup> Ero nike. Ita ta eteia non nei na kileng. Pe nga etue nenge Kristus at, mele eteia at ngana ero.”

<sup>28</sup> Iesus hetottoro nga NeHalang nena pele ana sauach kura pe alngana hot, “Oe, imo a eteia iau pe a eteia eat ngak. Pe eat lamai nga iau sipok lemek ngak ero. Pe i nenge kulosia iau at tu ke manmanna pe imo a eteia i ero. <sup>29</sup> Pe iau e eteia i iange etu luluch nge i pe i kulosia iau at.”

<sup>30</sup> Iesus hele ke mau pe hana nemur te teke te laua i, pe ero. Iange ana etue toto at ero kura. <sup>31</sup> Pe hulua halang nga iri nenge temes neu, leteria manmanna nge Iesus. Pe te hele, “Tok, non nei poia ure halang ke te lohok ke ulolo, pe non nenge mene tuangaola nge heo ngana at pe lape poia ure halang toto ke te lohok ol?”

*Hana Papalauna Mur Te Teke Telaua Iesus*

<sup>32</sup> Ol pe Paresio mur te longe hulua nge te hele chunuchnuch ia ure nemur nge Iesus. Pomalam tunginga ana hana papalauna mur pe Paresio mur te kulosia NeHalang nena pele ana naungaala mur ke te laua Iesus.

<sup>33</sup> Pe Iesus hele, “Iau lape etu luluch nge imo ke etue choro mana ol pe lape ela mule nge i nenge kulosia iau at. <sup>34</sup> Pe lape a tango rere iau pe a hottaua iau ero. Pe aat nga kileng nenge etu ia ero.” <sup>35</sup> Ol pe Iuta mur te ontei hel nge iri, “Non nei mai teke la langai nenge lape ta hottaua i ero

mai? Ita rera hana mur tetu nga kileng papalauna nemur nge Krik. Pe lape non nei lange iri ke hetottore iri kai? <sup>36</sup> Na helenga nei luna merei? Nenge hele ke teke, ‘Lape a tango rere iau pe a hottaua iau ero. Pe kileng nenge etu ia, amo e at ia ero.’”

*Iesus Heleia Ech Nenge Tunge Maulinga*

<sup>37</sup> Iok, nga ngaunga matana neu ana etue nenge het ia, i etue palaungana ia. Pe Iesus mes haka pe hele ke palaungana toto, “Mele nenge meteana ech, at nge iau ke in ech. <sup>38</sup> Mele nenge letena manmanna nge iau, NeHalang nena alalaha hele ke teke, ‘Lape ech tana nenge tunge maulinga ke koko lape lelele nga letena.’” <sup>39</sup> Nga nenge nei Iesus helele ia Opepengpeng. Opepengpeng nem te tung hote ero kura. Pe nga etue nenge Iesus lohaka mule ke mene hemalmalinga palaungana ol, iri nenge leteria manmanna nge Iesus lape te mene Opepengpeng nem ol.

*Hulua Te Echachala Helia Iesus*

<sup>40</sup> Hulua te longe Iesus nena helenga mur pe hel te hele, “Manmanna toto ke non nei i Hetatalonga.”

<sup>41</sup> Pe hel te hele, “Non nei, i Kristus.”

Pe hel pule te hele, “Kristus at nga kileng nenge Kalelea ero.

<sup>42</sup> NeHalang nena alalaha hele ke teke, Kristus at nge Petlehem nga kileng nenge ne Teuit tutu ia. Pe lohok pengpeng nge ne Teuit na tete mur.”

<sup>43</sup> Nenge nei poia hulua nemur ke telas lele hel. <sup>44</sup> Ke hel te teke te laua Iesus pe mele pele sie i ero.

*Hana Papalauna Nenge Iuta Leteria Manmanna Nge Iesus Ero*

<sup>45</sup> Ol pe NeHalang nena pele ana naungaala mur tela mule pe tunginga ana hana mur aria papalauna mur pe Paresio mur te

7:27: Ioa 7:41; 9:29    7:28: Mat 11:27; Ioa 8:55  
Lev 23:36; Isa 55:1; Ioa 4:14    7:38: Isa 58:11  
7:41: Ioa 1:46    7:42: Psa 89:3-4; Mic 5:2

7:30: Ioa 7:44    7:34: Ioa 8:21; 13:36    7:37:  
7:39: Ioa 16:7; 20:22; Ume 2:4    7:40: Ioa 6:14

onteia iri, “Pomerei nenge a mene Iesus at ero mam?”

<sup>46</sup> Pe naungaala nemur te hele, “Non e hele ngana pomange non nei ero i.”

<sup>47</sup> Pe Paresio mur te hele, “Luna pomanga a teke i pallaka ia imo pule. Ae? <sup>48</sup> Pe a longe hana papalauna hel pe Paresio hel nge leteria manmanna nge i pule? Ero le. <sup>49</sup> Pe hulua pa nemur nenge te eteia hotonga mur ero, NeHalang lape hemete iri.”

<sup>50</sup> Pe non Paresio e nge ene Nikotemus la tala ke esia Iesus lo. Ana non lohaka pe hele ke teke, <sup>51</sup> “Ita rera hotonga hele ke teke talau pulut mene none ero. Ta longo teu lange i ke nek pe tanau urume ure nemur nenge popoia mukam.” <sup>52</sup> Pe hana nemur te hele, “Iong mam lem nge Kalelea pule ma? Onau teu langa NeHalang nena alalaha ke nek mukam. Pe lape o eteia ke hetatalonga pele at nge Kalelea ero.” [<sup>53</sup> Ke het pe iri lochloch tela mule nga reria kileng mur.

## 8

### *Te Takue Hei Salaunga Kina E Lange Iesus*

<sup>1</sup> Pe Iesus langa hengene nge Oliua. <sup>2</sup> Iok, nga uach uruna Iesus la mule nga NeHalang nena pele palaungana. Pe nga lamau hulua teat nge i. Ol pe Iesus are sio pe hetottore iri. <sup>3</sup> Pe hotonga ana hetoronga mur pe Paresio mur te mene teua hei salaunga kina e pe te poia hei neu ke mes nga hulua mataria. <sup>4</sup> Pe te hele lange Iesus, “Hetoronga, hei nei te hottaua i nge salaulau. <sup>5</sup> Pe hotonga nenge Moses hele ke teke hei nenge pomai ta tamal hune ana um. Iok o hele, lape mopoi ke mere?” <sup>6</sup> Iri te teke tetua laka hote i ke heleia helenga poreke ngana e. Pomalam te tamal hote onteinga neu.

Pe ero. Iesus tatuch sio ke has nga ich nga penna kukanna. <sup>7</sup> Pe hana nemur te onteitei kura. Pomalam

Iesus mes haka pe hele, “Nenge teke amo e nge imo poia poinga poreke ngana e ero toto, i muka ia imo ke tamal tele hei nem.” <sup>8</sup> Pe Iesus tatuch sio mule ke has nga ich.

<sup>9</sup> Hana nemur te longe helenga neu pe te ua ke iri ellechle. Hana tuauna ngana mur te ua tala pe kulpo mur te nanasia iri. Lala kela Iesus i toro mana tu ol pe hei neu pule mes nga munna kura. <sup>10</sup> Ol pe Iesus mes haka pe onteia hei neu, “Hei nem, hana nemur ol? Pomere, mele e nge tu ke palot am melmelenga ana helenga ero kai?”

<sup>11</sup> Pe hei neu hele, “Non Soke, mele ero oli.”

Pe Iesus hele, “Iau lape e hele hote iong ero pule. Ola pe o poia poinga poreke ngana ero ol.”]

### *Iesus I Lemenge Nenga Ich*

<sup>12</sup> Iok, nga etue nenge Iesus hele la mule nge hehei pe hana, hele ke teke, “Iau lemenge nenga ich nei. Mele nenge nanasia iau lape i nga kileng au ngana ero ol. Iange lape mene lemenge nenga maulinga.” <sup>13</sup> Ol pe Paresio mur te hele, “Nga etue nenge o hele urumrume iong, iong toro mana o teke ure nemur manmanna. Pe imem mo teke o channanga.”

<sup>14</sup> Pe Iesus hele, “Oe, iau sipok e hele urumrume iau. Pe lek helenga nemur manmanna iange iau e eteia eat ngak pe e eteia ela ngak. Pe imo a eteia eat ngak pe ela ngak ero. <sup>15</sup> Imo a amnei teu ngamo nga ure mur, a poia nga poinga nemur nga ich. Pe iau e henonou perik lange mele nga poinga poreke ngana e ero. <sup>16</sup> Pe nenge teke e amnei teu langa mele nena poinga, lek helenga mur manmanna iange iau toro e poia ero. Temek nenge kulosia iau at tu luluch nge iau pe e poia. <sup>17</sup> Imo lemo hotonga hele ke teke, ‘Nenge teke hana nai te hele hote helenga elle, helenga nem manmanna.’ <sup>18</sup> Pe iau, iau toro koi nenge e hele urumrume iau nei.

**7:46:** Mak 1:22    **7:48:** Ioa 12:42    **7:50:** Ioa 3:1-2    **7:52:** Ioa 7:41-42    **8:5:** Lev 20:10; Deu 22:22-24    **8:7:** Deu 17:7    **8:11:** Ioa 5:14    **8:12:** Isa 49:6; Ioa 1:4-9; 9:5; 12:46    **8:14:** Ioa 5:31-32; 7:28    **8:15:** Ioa 12:47    **8:16:** Ioa 5:30; 8:29    **8:17:** Deu 19:15    **8:18:** 1Ioa 5:9

Pe neingak laka Temek nenge kulosia iau at.”

<sup>19</sup> Ol pe hana nemur te ontei, “Ke Temem ngai?”

Pe Iesus hele, “Imo a eteia iau ero pe a eteia Temek ero. Nenge teke a eteia iau, lape a eteia Temek pule.”

<sup>20</sup> Iesus hetottoro nga NeHalang nena pele palaungana letena nga tunginga mur tema ngaria, pe helele ia helenga nemur. Pe mele pele laua i ero iange ana etue at ero kura.

### *Iesus Hele Urume La Mule Ngana*

<sup>21</sup> Pe pule Iesus hele lange hehei pe hana ke teke, “Iau e lala lo koi. Pe lape a tongo rere iau pe a mete hite lemo poinga poreke ngana mur. Pe lape a at nga kileng nenge e lala ia nei ero.”

<sup>22</sup> Iuta mur te longe helenga neu pe te ontei hel mule nge iri ke mai, “Pomerei nenge hele ke teke, ‘Imo lape at nga kileng nenge e lala ia nei ero mai?’ Lape i sipona hun mule i kai?”

<sup>23</sup> Pe Iesus hele, “Imo lemo nge sio pe iau lek nga lut. Imo lemo nga ich nei pe iau lek nga ich nei ero.

<sup>24</sup> Pe e hele ke e teke lape a mete hite lemo poinga poreke ngana mur. Iau laka nenge e teke iau koloi. Pe nenge teke letemo manmanna nga nei ero, manmanna toto ke lape a mete hite lemo poinga poreke ngana mur.”

<sup>25</sup> Pe hana nemur te ontei, “Ke iong itei nemam?”

Pe Iesus tuacholia, “Iau itei? Nem e heleia lange imo ke ulolo. <sup>26</sup> Pe lek helenga halang nge lape e hele hote lemo poinga poreke ngana mur. Pe i nenge kulosia iau at na poinga mur pengpeng toto. Pe ure nemur nenge e longe nge i, e heleia ke pengpeng lange hehei pe hana nga ich nei.”

<sup>27</sup> Iesus helele ia Temene pe hehei pe hana te eteia ero. <sup>28</sup> Ke pomalam Iesus hele, “Nga etue nenge a heon heke Non Tuna, lape a eteia ke iau laka nenge e teke iau koloi. Pe lape a eteia ke e poia ute pele nga lemek ngak ero. E hele ke pomanga

Temek hetoro iau ia. <sup>29</sup> Iange i nenge kulosia iau at, ngana koi tu luluch nge iau; Hile iau ke iau toro ero iange e nanas mene lemene ngana ke kokoes.” <sup>30</sup> Iesus hele ke mau pe hulua leteria manmanna nge i.

### *Apraham Nena Tete Mur*

<sup>31</sup> Ol pe Iesus hele lange Iuta mur nenge leteria manmanna nge i ke teke, “Nenge teke a rahite lek henge-toro mur ke kerkereng, lape lek hana mur toto laka imo. <sup>32</sup> Pe lape a eteia helenga manmanna ngana. Pe helenga manmanna ngana nem lape un hote ure mur nenge rahit ele imo pe poia imo ke a ume manmanna nge mele ero ol.”

<sup>33</sup> Pe iri te hele, “Apraham nena tete mur i imem. Pe mo ume nge mele ero kura i. Pe pomere nenge o hele ke o teke lape mo ume manmanna nge mele ero ol?”

<sup>34</sup> Pe Iesus tuacholia, “E hele ke manmanna lange imo. Iri lochloch nenge te popoi poinga poreke ngana, poinga poreke ngana nem chiu hit tote iri ke tepoi manmana poinga poreke ngana ke kokoes. <sup>35</sup> Hekuleileinga ana non nenge tu luluch nge none pe nehei pe tutuna mur, i tuteu toto nge iri ero. Pe non nem tuna mana lape tu teu toto nge temene pe tana. <sup>36</sup> Ke nenge teke NeHalang Tuna poia imo ke atu ke nek, lape atu ke nek toto sapele. <sup>37</sup> E eteia ke Apraham nena tete mur imo. Pe imo a teke a hune iau iange a mene lek hengetoro mur ero. <sup>38</sup> Pe e helele ia ure nemur nenge Temek henonou iau ia lala nge imo. Ke imo a poia laka ure nemur nenge Tememo NeHalang teke a poia.”

<sup>39</sup> Pe iri te tuacholia, “Imem tememem laka Apraham.”

Pe Iesus hele, “Toinge Apraham tutuna mur imo ke manmanna, lape lemo poinga mur pomanga Apraham nena poinga mur nike. Pe ero. <sup>40</sup> Helenga manmanna ngana

mur nenge e longe nge NeHalang e hele hote lange imo. Pe ero, a teke a hunune iau kura. Pe Apraham poia poinga pele nge pomai ero. <sup>41</sup> Tememo nena poinga laka nenge a popoia nem.”

Pe iri te hele, “Ouo! Iong o teke imem tememem itei? Imem tamem hei salaunga kina e ero i! Imem Tememem laka NeHalang i toro.”

<sup>42</sup> Pe Iesus hele lange iri, “Nenge teke Tememo toto NeHalang toinge lememo taua iau. Iange iau etu lulich nge i koi nenge eat nei. Pe eat nga iau sipok lemek ngak ero; i sipona kulosia iau ke eat. <sup>43</sup> Pe lek helenga mallaha nge imo ero iange lememo ero ia lek hengetoro mur. <sup>44</sup> Imo tememo laka non poreke ngana ke a nanas tau menmene nena poinga mur. I hunun hana ke te metmete nga tele ngana toto nike. Pe i nge lemene ero ia helenga manmanna ngana iange helenga manmanna ngana e tu nge i ero toto. I hetei hot pengpeng ia i nga nena pallakanga mur. Iange i pallaka hali pe pallakanga kina i toto. <sup>45</sup> Pe iau e heleia helenga nge manmanna pe letemo manmanna ia lek helenga ero. <sup>46</sup> Amo tei hottaua iau nge e poia poinga poreke ngana e lo? Iau e helele ia helenga nge manmanna. Pe pomerei letemo manmanna nge iau ero? <sup>47</sup> NeHalang tutuna mur laka iri nenge te longo taua nena helenga mur. Pe imo a longo taua nena helenga mur ero. Luna pomanga NeHalang tutuna mur imo ero.”

### *Iesus I Palaungana Toto Nge Apraham*

<sup>48</sup> Pe Iuta mur te hele inin taua i, “Iong uneinei laka tuteu nge iong iange lem nge Samaria iam.”

<sup>49</sup> Pe Iesus hele, “Iau uneinei tu teu nge iau ero. Iau e heto heke tote Temek pe imo atal sio tote iau. <sup>50</sup> Iau lemek ke hehei pe hana te heto heke iau ero. Mele e pule lemene ke teke

hehei pe hana te heto heke iau. Pe i, ana ume nenge amnei urumrume poinga mur. <sup>51</sup> Pe e hele ke manmanna toto lange imo. Mele nenge longo taua lek hengetoro mur lape mete ero.”

<sup>52</sup> Pe Iuta mur te hele, “Nenge nei mo eteia ke uneinei tu teu nge Iong! Iange Apraham pe hetatalonga mur te mete lo. Pe iong o teke, ‘Mele nenge nanasia lek hengetoro mur ke nek lape mete ero.’ <sup>53</sup> Ita rette Apraham mete ke ulolo. Pe pule hetatalonga mur te mete lo. Pe iong mam! O teke iong palaungana toto nge i ma? O teke iong itei panem mam?”

<sup>54</sup> Pe Iesus hele, “Nenge teke e heto heke iau sipok ek, lape luna ero toto. Pe Temek NeHalang nenge a heto amo Soke ia, i sipona hemalmalia iau. <sup>55</sup> Iau e eteia i pe imo a eteia i ero toto. Pe nenge teke e hele ke e eteia i ero, lape iau non nenge e pallaklaka ke mange imo. Pe iau e rahite nena helenga mur iange e eteia i. <sup>56</sup> Tememo Apraham iech toto nge lape esia iau nga ak etue. I esia pe iech ele tote.”

<sup>57</sup> Pe Iuta mur te hele lange i, “Ia iong mam o naue Apraham lo ma? Am hesinga iri ana non kina nai pe analoch ero kura iam.” (30)

<sup>58</sup> Pe Iesus hele, “E hele ke manmanna toto lange imo. Apraham tana hoe i ero kura pe iau etu tala lo.” <sup>59</sup> Iesus hele ke mau pe Iuta mur te lolochia um ke te teke te tamal hune i. Pe ero. Iesus erue sio nga mataria pe i hot nga NeHalang na pele palaungana neu ke lange hot.

## 9

### *Iesus Hemas Mule None Nge Tehoe I Pe Matana Hit*

<sup>1</sup> Iok, Iesus i olole pe naue none nge matana hit. Non neu tehoe i pe matana hit nike. <sup>2</sup> Ol pe nena hana mur te onteia i, “Heteronga, itei toto poia poinga poreke ngana nenge non nei te hoe pe matana hit mai? Isipona ma alona mur?”

8:41: Isa 63:16

8:44: 1Io 3:8

8:46: 2Ko 5:21; 1Pi 2:22

8:47: 1Io 4:6

8:48: Mak 3:21-22

8:51: Ioa 5:24

8:58: Ioa 1:1

9:2: Ezk 18:20; Luk 13:2, 4

9:3: Ioa 11:4



<sup>3</sup> Pe Iesus hele, “Non nei tehoe pe matana hit. Isipona pe alona mur te poia poinga poreke ngana e ero. Pe ure nei lohote ke hemallaha hote NeHalang nena kerkerenga nge non nei. <sup>4</sup> Heueu nei uach mana kura pe ta popoia i nenge kulosia iau at nei ana ume. Iange miliko at pe mele lape ume ero ol. <sup>5</sup> Nga etue nenge e tutu nga ich nei, iau sipok iau lemenga nenga ich.”

<sup>6</sup> Iesus hele ke mau ke het pe ulut sio nga ich pe poia melete nga melona. Ke het pe unhite nga non neu matana. <sup>7</sup> Ol pe hele lange non neu, “Ola ke onun nga ech matana nenge Siloam.” (helenga neu luna, Kulosia la.) Ke non neu la ke nun pe at mule pe nau ke nek sapele.

<sup>8</sup> Pe non neu na kileng ngana mur pe iri nenge te naue i nge long usus ure nga tele ngana te ontei, “Non nenge arare pe long usus ure nge hehei pe hana mam lom?” <sup>9</sup> Pe hel te hele, “Oe, i laka lom.”

Pe hel teke, “Ero, i mele e pule pe nakuna mange non nem iam.”

Pe non neu hele, “Iau sipok i loi.”

<sup>10</sup> Pe iri te ontei, “Pe matam urana mule ke merei?” <sup>11</sup> Pe non neu hele, “Non nenge te hetue ene ke Iesus, poia melete pe unhite nga matak. Pe hele at nge iau kela enun nge Siloam. Iok, ela ke enun pe enau mule sapele!”

<sup>12</sup> Pe iri te ontei, “Ke ana non nem ngai?” Pe non neu tuacholia, “E etei ero i.”

### *Paresio Mur Telas Lele Hel*

<sup>13</sup> Ol pe hana nemur te mene non mata hit neu lange Paresio mur. <sup>14</sup> Pe Iesus une melete nga non neu matana ke urana mule nga Sapat ana etue. <sup>15</sup> Pomalam Paresio mur te onteia non neu, “Tong mam onau mule ke merei?”

Pe non neu hele, “Iesus poia melete nga matak pe enun pe enau mule sapele.”

<sup>16</sup> Ol pe Paresio mur hel te hele, “Nakuna nenge non nei NeHalang

kulosia at ero i, ngana kai nenge nanasia hotonga mur nga etue palaungana nei ero mai.”

Pe hel te hele, “Nenge teke non nei i non nge popoi poinga poreke ngana, poi hote ure palaungana e nge pomai ero.” Pomalam telas lele hel sapele.

<sup>17</sup> Ol pe te ontei mule non neu, “O amnei lange non nenge poia matam ke urana mule nem, non tei toto ia mau?”

Pe ana non tuacholia, “Non nem i hetatalonga ia laka.” <sup>18</sup> Non neu matana hit tala mukam pe heueu nei nau mule ke nek ol. Pe Iuta mur leteria manmanna nga neu ero. Ol pe te hekulo non neu temene pe tana aria <sup>19</sup> pe te onteia iri, “Tumo nenge a teke ahoe pe matana hit ka loi? Iok, heueu nei matana urana mule ke merei?”

<sup>20</sup> Pe non neu temene pe tana te hele, “Mo eteia ke i tumem ia nge mo hoe pe matana hit. <sup>21</sup> Pe heueu nei matana charchara pe es ke nek mule. Nenge nem imem mo etei teu la ero ol. Itei toto nenge poia matana ke charchara mule? Ana non i palaungana lo. A onteia i pe hele lange imo la.” <sup>22</sup> Non neu temene pe tana te hele ke mai iange te mataua Iuta mur aria papalauna mur nge te hele ke te teke, nenge teke mele heleia Iesus nge i Non nge Hemasinga, lape tepoi ele mele nem ke langa hetoronga ana pele ero ol. <sup>23</sup> Ke ngana laka nenge temene pe tana te hele ke te teke, “Ana non i palaungana lo. A onteia i pe hele lange imo la.”

<sup>24</sup> Iok, te iua non mata hit nenge matana urana mule neu henai ngana, pe te hele, “O heto haka tote NeHalang ene pe o hele ke manmanna. Imem mo eteia ke non nenge o helele ia nem i non poreke ngana.”

<sup>25</sup> Pe non neu tuacholia, “A teke non nem i non poreke ngana, nem e eteia ero. Pe ute elle mana nge e eteia. Ngana laka nenge; iau matak hit mukam pe heueu nei e es mule ol.”

26 Ol pe hana nemur te ontei, “Iok, poia utar lange iong? Pe poia iong ke matam charchara ke merei?”

27 Pe non neu tuacholia, “E hele lange imo ke ulolo pe lememo ero nge a longe. Pe pomerei toto nenge a teke a longo mule? A teke a lohot ke nena hana mur imo pule? Ae?”

28 Ol pe te hele inin taua i ke te teke, “Non nem nena non laka iong. Imem, Moses nena non mur koi imem. 29 Pe mo eteia ke NeHalang hele lala nge Moses lo, pe non nem mo eteia at ngana ero iam.”

30 Pe non neu hele, “Apoi letek lilil iam. Non nei poia matak ke charchara mule. Pe pomere a teke a eteia at ngana ero? 31 Ita lochloch ta eteia ke NeHalang longo lala nge iri nemur nenge te heto hekeke i pe te longo tautaua i. Pe iri nemur nenge te popoi poinga poreke ngana NeHalang longo lange iri ero. 32 A longe mele nge tehoe pe matana hit pe none hemas mule i lo? 33 Nenge teke NeHalang kulosia non nei ke at ero, lape poia ute pele ero.”

34 Pe hana nemur te hele, “Iong tam hoe iong pe poinga poreke ngana tu luluch nge iong nike. Pe o teke o hetoro mule kai imem mai?” Ol pe telope hote i nga hetoronga ana pele.

#### *Iri Nenge Leteria Manmanna Ero, Tepoi Ke Mange Mata Hit Mur*

35 Iok, Iesus longe non neu nge te lope hote i nga hetoronga ana pele pe la ke hottaua i. Pe Iesus hele, “Letem manmanna nge Non Tuna?”

36 Pe non neu ontei, “Non Soke, Non Tuna mam itei toto ia? O heleia at nge iau. Pomalam lape letek manmanna nge i.”

37 Pe Iesus hele lange non neu, “Ngana iam o esesia i nemam lom. Non Tuna laka nenge hele lululuch nge iong nem.”

38 Pe non neu hele, “Non Soke, letek manmanna nge iong.” Ol pe non neu tualou sio pe heto heke Iesus.

39 Pe Iesus hele, “Eat nga ich nei ke e tatalo ele hehei pe hana nga etue palaungana nenge atat. Pe eat ke iri nemur nenge mataria hit tenau mulmule pe iri nenge te nachnau mataria hitit.”

40 Pe Paresio mur hel nge tetu rochroi nge Iesus, te longe Iesus nge hele ke mau pe te ontei, “Ke pomerei? Imem nei matamem hit pule kai?”

41 Pe Iesus hele, “Nenge teke matamo hit lape lete meena ngana nga poinga poreke ngana ero nge imo. Pe heueu nei a hele ke a teke a nachnau kura. Pomalam lete meena ngana nem tu nge imo kura.”

## 10

### *Sipsip Mur Pe Aria Naungaala*

1 Pe Iesus hele pule ke teke, “E hele ke manmanna toto lange imo. Sipsip mur tetu teu nga mapuo letena. Pe mele nenge i teu nga mapuo nem matana ero pe tamu tote mapuo ke lange teu, mele nem i non nenge kemkeme pe hunun. 2 Pe non nenge i teu nga mapuo nem matana, mele nem i non nenge nauelele sipsip mur. 3 Pe non nenge nauelele mapuo nem matana lohe piunga nge i. Pe sipsip mur te longo urume non nenge nauelele iri kanna. Pe hetetue nena sipsip mur eria pe koko hote iri ke tela nge hot. 4 Nga etue nenge koko hote nena sipsip mur, ana non i ke i mukmuka nge nena sipsip mur. Pe nena sipsip mur te nanasia i iange te longo urume kanna. 5 Pe sipsip nemur te nanas pulut mene none ero. Iri lape te ua mule non nem ana iange te longo urume kanna ero.” 6 Iesus nene nananga nei lange hehei pe hana pe te eteia luna ero toto.

7 Ol pe Iesus hele mule, “E hele ke manmanna lange imo, sipsip nemur reria piunga matana koi iau. 8 Pe iri nemur nenge teat tala nge iau, iri hana nenge te kemkeme pe iri hana nenge te hunun. Pe sipsip nemur te longo urume karia ero. 9 Iau nge

iau piunga matana koloi. Pe mele nenge iteu pengpeng nge iau, lape NeHalang mene mule i. Pe lape i teueu pe i hotot ke menmene ana ngaunga. <sup>10</sup> Kemenge kina mur teat ke te kemkeme pe te hunun pe te heporeke sipsip mur. Pe iau eat ia maulinga nge iri. Pe maulinga nem lape muta toto nge iri.

<sup>11</sup> “Iau sipok, iau non urana ngana nenge enau elele sipsip mur. Pe non urana ngana nenge nauelele sipsip mur, tung heke i sipona ke mete ke halaua nena sipsip mur. <sup>12</sup> Pe non nenge umume ke nauelele sipsip mur pe te ololia i, nena sipsip toto nemur ero. Nga etue nenge non nem naue kaone hinolo nge atat, lape ua pe sipsip nemur iri toro tetu ol. Pe kaone hinolo nem at ke hun lapue sipsip nemur pe telot parai. <sup>13</sup> Non nem poia poinga nei iange ume nenge teol mene i. Pe letena tu toto nge sipsip nemur ero.

<sup>14</sup> “Iau sipok, iau non urana ngana nenge enau elele sipsip mur. E etei tote lek sipsip mur pe iri te etei tote iau. <sup>15</sup> Pomalam mana nge Temek nge etei tote iau pe iau e etei tote i. Pe e tung heke iau ke e mete ke e halaua lek sipsip mur. <sup>16</sup> Pe lek sipsip mur hel pule tetu teu nga mapuo nei ero. Iri pule te longo urume kalik pe lape e mene iri at pule. Ke lape sipsip mur aria tuluk elle pe aria naungaala elle mana. <sup>17</sup> Temek mutena tau tote iau iange e tung heke iau ke e mete pe lape e maul haka mule. <sup>18</sup> Mele pele nakuna ero toto nge hemete tote iau. Iau sipok e tung heke iau nga lemek ngak. Nga iau sipok lek kerkerenga e tung heke iau ke e mete. Pe nga iau sipok lek kerkerenga e lohaka mule nga metenga. Nenge nei Temek i sipona heleia at nge iau.”

<sup>19</sup> Iuta mur te longe Iesus na helenga nemur pe telas hel mule. <sup>20</sup> Pe halang nge iri te hele, “Uneinei tu teu nge i pe poia i ke ana hauaua tototo lola. A longo lange i ke?”

<sup>21</sup> Pe hel te hele, “Non e nenge uneinei poia ke ana hauaua toto, heleia helenga nemur nenge pomai ero. Uneinei pele mam poia non mata hit e ke matana charchara mule loma, ae?”

### *Iuta Mur Lemeria Ero Ia Iesus*

<sup>22</sup> Iok laol, hetalaulaunga ana etue palaungana lohohot nge Ierusalem. Nga etue neu leteria metene mule nenge te tungge pele palaungana lange NeHalang ke nena ia nge nika. Pe etue neu lohohot laka nga kileng lololo ngana ana etue. <sup>23</sup> Iok, Iesus ii nga NeHalang na pele palaungana. Pe ii nga pele palaungana nem unne nenge te etue ke ene Ne Solomon Nena Sauach. <sup>24</sup> Pe Iuta mur te heliliu hite i pe te hele, “Nge ngingie ol pe o hemallaha hote iong at nge imem? O hele pengpeng mana, iong Kristus mam lom ae?”

<sup>25</sup> Pe Iesus hele, “E hele lange imo ke ulolo pe letemo manmanna ero. Ure nemur nenge e hele pe te lohohot manmana, e poia nga Temek ene. Pe ure nemur te hemallaha hote iau. <sup>26</sup> Pe imo letemo manmanna nge iau ero toto iange lek sipsip mur imo ero. <sup>27</sup> Iau e eteia lek sipsip mur pe iri te longo urume kalik pe te nanasia iau. <sup>28</sup> Pe iri lape te mete ero ol iange e tungge maulinga ke koko lange iri pe tetu nga perik. Pe mele pele mene hote iri ero toto. <sup>29</sup> Temek tungge sipsip nemur at nge iau. Pe i, i palaungana toto nga hehei pe hana lochloch. Pe mele pele mene hote iri nga Temek penna ero toto. <sup>30</sup> Imem nai Temek imem elle mana.”

<sup>31</sup> Ol pe Iuta mur te lochloch um ke te teke te tamal hun mule Iesus. <sup>32</sup> Pe Iesus hele lange iri, “Iau e henonou hote Temek nena kerkerenga lange imo, nga nenge e hele pe ure te lohohot manmana. Pe tei toto nenge poia imo ke a teke a tamal hun iau ia, e?”

<sup>33</sup> Pe Iuta mur te hele, “Mo tamal hune iong nga ure nemur ero. Mo teke mo tamal hune iong iange, iong

none mana pe o hele poreke tote NeHalang, nga nenge o teke imo nai NeHalang imo elle mana!”

<sup>34</sup> Pe Iesus hele lange iri, “NeHalang nena helenga masio nga lemo hotonga pule nenge hele ke teke, ‘Imo nehalang.’ <sup>35</sup> Nge nike hana nenge te longe NeHalang nena hotonga, NeHalang hetue iri ke iri nehalang. Pe helenga nenge masio nga NeHalang nena alalaha helenga nem manmanna. <sup>36</sup> Iau NeHalang i sipona hesilei hote iau pe kulosia iau ke esio at nga ich nei. Pe pomerei a hele ke a teke e hele poreke NeHalang nenge e hele ke e teke, ‘Iau NeHalang Tuna?’ <sup>37</sup> Nenge teke e poia Temek ana ume ero, urana nge letemo manmanna nge iau ero. <sup>38</sup> Pe nei e popoia Temek ana ume. Pe pomerei letemo manmanna nge iau ero? Pomam, letemo manmanna nga ure nemur nenge e hele pe te lohohot manmana. Pomalam lape letemo mallaha pe a eteia ke Temek tuteu luluch nge iau pe iau etu teu luluch nge Temek.” <sup>39</sup> Ol pe Iuta mur te teke te laua Iesus, pe Iesus sereha mana nga peria pe la.

<sup>40</sup> Iok, Iesus lotele nga ech nge Iortan kela mule nga kileng nenge Ioanes henunun hehei pe hana ia nge nike, kela tu lamau. <sup>41</sup> Pe hulua halang tela nge i pe te hele, “Ioanes hele pe ure mur te lohohot mana ero. Ure lochloch ngana nenge Ioanes helele ia nge non nei, lohohot ke manmanna.” <sup>42</sup> Pe hulua halang nga kileng neu leteria manmanna nge Iesus.

## 11

### *Lasarus Mete*

<sup>1</sup> Iok, none nge ene Lasarus singina haleles. Pe ana non tu nge Petani nga kileng nenge Maria iri nai tina Marta te tutu ia. <sup>2</sup> Pe Maria nei, i laka nenge nga hoena pasiling heke ure inangana ehech ngana nga Iesus apena pe unhite nga palpalna ina. Pe Lasarus nenge singina haleles neu, liliuna mur koi hehei nai nei. <sup>3</sup> Ke

Maria iri nai Marta te hekulo helenga lange Iesus, “Non Soke, non nenge mutem tau tote koi singina haleles.”

<sup>4</sup> Iok, Iesus longe ke mau pe hele, “Non nem lape mete hot ia haleles nem ero. Haleles nem lape poia hehei pe hana ke te nauue NeHalang nena kerkerenga pe te heto heke tote NeHalang ene. Pe nga kue nem mana lape te heto heke tote NeHalang Tuna ene pule.” <sup>5</sup> Iesus mutena tau tote Marta pe tina pe Lasarus. <sup>6</sup> Pe nga etue nenge longe Lasarus pingana nge singina haleles la sapele ero. Tunga kileng nenge tutuia neu ke etue nai mule.

<sup>7</sup> Ol pe Iesus hele lange nena hana mur, “Tala mule nge Iutea.” <sup>8</sup> Pe nena hana mur te hele, “Hetoronga, Iuta mur nga lamau te teke te tamal hune iong nga um. Pe etue halang la ero kura. Pe ngana ma o teke ola mulmule mam pulom?”

<sup>9</sup> Pe Iesus hele, “Chaia matana haka nga uach pe sio mule nga ulei. Pe mele nenge ii nga etue nem lape losio ero, iange nachnau nga lemenga nenga ich nei. <sup>10</sup> Pe mele nenge ii nga miliko lape losio iange kileng au.”

<sup>11</sup> Iesus hele ke mau ke het pe hele mule, “Pekngara Lasarus kou mamani lo, pe lape ela ke e hengo heke i.”

<sup>12</sup> Pe nena hana mur te hele, “Non Soke, nenge teke mamani mana lape urana mule.” <sup>13</sup> Iesus helele ia Lasarus nge mete lo, pe nena hana mur te teke ma Iesus hele ke teke mamani mana.

<sup>14</sup> Ol pe Iesus hele hot sapele, “Lasarus kou mete lo. <sup>15</sup> Pe letekia imo pe e iech nge e tunga etue neu ero. Lange lape e poia imo ke letemo manmanna. Iok, tala nge i ol.”

<sup>16</sup> Ol pe Tomas (nenge ene e pule Titimus) hele lange pekngana mur, “Iok, ita lochloch tala kela ta mete luluch nge i.”

### *Iesus Lange Petani*



<sup>17</sup> Iok, Iesus la ke lohot nge Petani pe Lasarus koluna ma nga polo ke etue henel ke ulolo. <sup>18</sup> Kileng nenge Petani rochroi mana nga kileng nenge Ierusalem. (sase ngana pomanga kilomita iri mol) <sup>19</sup> Pomalam Iuta mur halang tela ke te lohot nge Maria iri nai Marta ke tetu hite iri nga liuria nge mete. <sup>20</sup> Iok, nga etue nenge Marta longe Iesus pingana nge te teke, "Iesus koi atat lo." Ana hei hile sue tina Maria ke tunga pele pe i la ke saolia Iesus nga kue. <sup>21</sup> Saolia i pe hele, "Non Soke, toinge o tunga lamai nike, liuk lape mete ero. <sup>22</sup> Pe iau e eteia. Nenge teke o onteia NeHalang nga ute heueu nei, NeHalang lape tunge lange iong." <sup>23</sup> Pe Iesus hele, "Lium lape maul haka mule."

<sup>24</sup> Pe Marta hele, "E eteia ke i lape maul haka mule nga metenga nga etue nga rume, nga maulinga ana etue."

<sup>25</sup> Pe Iesus hele, "Maulinga haka nem ngana i iau lo. Pe iau pule iau maulinga ke koko. Iri nenge leteria manmanna nge iau pe te mete, lape te maul haka mule. <sup>26</sup> Pe iri nenge leteria manmanna nge iau (pe te tutu kura), lape te mete ero ol. Letem manmanna nga nei pule kai?"

<sup>27</sup> Pe hei neu hele, "Oe Non Soke, pe letek manmanna pule ke iong Kristus. Pe iong NeHalang Tuna nenge te teke atat nga ich nei."

### *Iesus Tang*

<sup>28</sup> Hei neu hele ke mau ke het pe la ke iu hot kome tina Maria pe hele, "Heteronga koloi, pe ontei rerere iong." <sup>29</sup> Maria longe ke mau pe lohaka ke ueiuei mana pe lange Iesus. <sup>30</sup> Pe Iesus i teu at nga kileng neu ero kura. Ngana kou tutu nga kileng unne nenge Marta saol i ia kura. <sup>31</sup> Maria kila nga pele pe Iuta mur te kila luchluch nge i ke te hemaluchluche letena. Pe Iuta nemur te naue Maria nge lohaka ke ueiuei mana pe i hot. Ol pe te nanas hote i iange te teke ma la ke tangtang

nga tina koluna ma ngana. <sup>32</sup> Pe ero. Maria langa kileng unne nenge Iesus tuia pe esia Iesus. Ol pe tualou sio toto langa Iesus apena pe hele, "Non Soke, toinge o tunga lamai nike, lape liuk mete ero."

<sup>33</sup> Iesus naue Maria nge tangtang pe Iuta nemur nenge tela luluch nge i te tang pule. Ol pe Iesus letena poreke toto ke teke tang. <sup>34</sup> Ol pe ontei, "A alo hite i langai?" Pe iri te hele, "Non Soke, oi at ke oes."

<sup>35</sup> Pe Iesus tang.

<sup>36</sup> Ol pe Iuta mur te hele, "Non nei mutena tau tote Lasarus."

<sup>37</sup> Pe Iuta mur hel te hele, "I hemas mule iri nenge mataria hit ke tenau mule. Pe pomerei Lasarus mete pe halaua i ero?"

### *Iesus Hemaui Heke Mule Lasarus Nga Metenga*

<sup>38</sup> Iesus langa polo neu pe letena meena toto kura. Polo neu pomanga rika nenge te hekom hitite hanna ana um. <sup>39</sup> Ol pe Iesus hele, "A alele um nem."

Pe Marta nenge liuna mete neu hele, "Non Soke, i mete ke etue henel lalo. Pe heueu nei inangana poreke lo."

<sup>40</sup> Pe Iesus hele, "E hele lange iong ke ulolo. Nenge teke letem manmanna lape o naue NeHalang nena kerkerenga."

<sup>41</sup> Ol pe alele sapele um nga polo hanna. Ke het pe Iesus nau haka langa lut pe hele, "Temek, e teke e hele urana toto lange Iong nge o longo at nge iau. <sup>42</sup> E eteia ke kokoes o longo atat nge iau. Pe e teke e heleia helenga nemur ke halaua hehei pe hana nenge temes nei, ke leteria manmanna nge o kulosia iau at."

<sup>43</sup> Iesus hele ke mau ke het pe alngana ke soke toto, "Lasarus, oi hot at." <sup>44</sup> Ol pe Lasarus i hot at sapele. I hot pe malenga sachanchana nenge telul hite nga penna pe apena pe nga ramana tetu kura.

Ol pe Iesus hele lange iri, “A unhote malenga nemur nge i pe a poia i kela ol.”

*Tetal Helenga Ke Te Hune Iesus*  
(*Mat 26:1-5; Mak 14:1-2; Luk 22:1-2*)

<sup>45</sup> Pe Iuta mur halang nenge tetu luluch nge Maria te naue ure neu nge Iesus poia pe leteria manmanna nge i. <sup>46</sup> Pe hel nge iri tela ke te heleia ure nenge Iesus poia lange Paresio mur. <sup>47</sup> Ol pe etue nenge hana papalauna te eukirau lohote sapele. Ke tunginga ana hana mur aria papalauna mur pe Paresio mur te eukirau pe te hele,

“Non nei hele pe ure halang te lohote manmana. Pe ita, lape tapoi ke merei? <sup>48</sup> Nenge teke ta kila mana pe ta nachnei mene i nge popoi ke mau, lape hulua lochloch ngana leteria manmanna nge i. Pe lape Rom mur teate ke te heporeke NeHalang nena pele pe te heporeke rera hehei pe hana mur pule.”

<sup>49</sup> Ol pe elle nge iri ene Kaipas. Kaipas i tunginga ana hana mur aria soke nenge palaungana toto nga hesinga neu. Ana non lohaka pe hele, “Imo a eteia ute pele ero toto! <sup>50</sup> Nenge teke anau ke nek lape a eteia. Urana toto nge mele elle mana mene hehei pe hana muria ke mete. Pomalam lape rera hehei pe hana tetu ke nek.” <sup>51</sup> Ne Kaipas sau hote helenga neu nga i sipona letena matana ngana ero. I tunginga ana hana mur aria soke nenge palaungana toto nga hesinga neu. Pe hele ngana neu hetatalo ke teke lape Iesus mete ke halaua Iuta mur lochloch. <sup>52</sup> Pe Iuta mur iri toro mana ero. Iesus mete ke halaua NeHalang nena hana mur nenge telot parai ke tetu nga kileng lochloch ngana nga ich, pe mene mule iri at ke muria elle pe poia iri ke te lohote ke iri elle mana. <sup>53</sup> Ke nga etue neu te talun sapele ke te heninia kue nemur nenge lape te hune Iesus.

<sup>54</sup> Pomalam Iesus i rara sakilil luluch nge Iuta mur nga mallaha ero ol. Ol pe Iesus ua nga lamau pe la ke tu luluch nge nena hana mur nga kileng nenge te hetue ke ene Epraim. Ana kileng tu rochroi nga ich sana lomona.

<sup>55</sup> Iok, ngaunga matana palaungana nenga Ingatoto heroi lo. Pomalam hulua halang nga kileng mur te lohaka ke tela nge Ierusalem ke te helelem tettele iri nike, (iange ngaunga matana palaungana nem mam pe lohote.) <sup>56</sup> Pe hulua nemur te tango rerere Iesus. Te mes nga NeHalang nena pele pe te ontei hel rara nge iri, “Imo letemo ma ke merei? I mai lape at nga ngaunga matana palaungana nei pule ma ero?” <sup>57</sup> Hulua nemur te hele ke pomai iange tunginga ana hana mur, aria papalauna mur pe Paresio mur te tung hote helenga kerkereng ngana lo ke te teke, nenge teke mele eteia Iesus tu ngana, hele hote pe tela ke te laua i.

## 12

*Maria Eusiling Heke Surumong Nga Iesus Apena*

(*Mat 26:6-13; Mak 14:3-9*)

<sup>1</sup> Iok, ngaunga matana nenga Ingatoto nem, ana etue iri rahtele elle (6) tu kura pe Iesus lange Petani nga kileng nenge Lasarus tu ia. Pe Lasarus i non nenge Iesus hemaul heke mule i nga metenga. <sup>2</sup> Nga lamau te poia ngaunga unne ke lange Iesus pe Lasarus kila luluch nge iri nenge te kila nga hatanga. Pe Marta ichichia aria ngaunga. <sup>3</sup> Ol pe Maria mene ure nenge inangana halang nge uruna haka toto pe la ke pasiling heke nga Iesus apena pe taunune nga palpalna ina. Pe pele neu letena muta ia ure neu inangana.

<sup>4</sup> Pe Iesus nena none ene Iutas Iskariot. Pe nga hoena lape tung heke Iesus langa hana porekreke ngana mur peria. Ana non hele, <sup>5</sup> “Toinge te laia ure nei ke te olia nga umtutuna

11:45: Ioa 7:31

11:46: Luk 16:31

11:52: Ioa 10:16

11:53: Ioa 5:18

12:1: Ioa 11:1, 43

12:2: Luk 10:40

12:3: Luk 7:37-38

nge halang toto. Pe uruna nem te tunge lange iri nenge reria ure ero.”

<sup>6</sup> Non neu hele ke mau iange i kemege kina. Pe iri nenge reria ure ero, non nem letena tu nge iri ero toto. Iange i nauelele umtutuna ana kole pe kokoeses mene hotote umtutuna pe i toro ngaungaua.

<sup>7</sup> Pe Iesus hele, “O hele lange hei nem ero. Atong tatalo ele ke ak metenga ana ia nike. <sup>8</sup> Iange iri nemur nenge reria ure ero tetu luluch nge imo ke kokoes. Pe iau lape etu luluch nge imo ke kokoes ero.”

<sup>9</sup> Ol pe Iuta mur halang toto te longe Iesus nge tu lamau pe tela sapele. Tela ke te teke tenau Iesus pe pule te teke tenau Lasarus nenge Iesus hemaui heke mule nga metenga. <sup>10</sup> Ol pe tunginga ana hana mur aria papalauna mur, tetal helenga ke te teke lape te hune Lasarus pule. <sup>11</sup> Iange Lasarus pingana song pe nem mana poia Iuta mur ke te ua aria papalauna mur aria pe leteria manmanna nge Iesus pe te nanasia i.

### *Iechinga Palaungana Lohot*

*(Mat 21:1-11; Mak 11:1-11; Luk 19:28-40)*

<sup>12</sup> Iok, pomange rou hulua nenge tela nga ngaunga matana neu te longe nge te teke Iesus kou lala nge Ierusalem lo. <sup>13</sup> Pomalam te choloua akau perperna mur pe tela ke tei ele i. Pe alngaria ke te teke, “Ta heto heke NeHalang!

NeHalang pete i nenge at nga Non Soke ene!  
NeHalang pete Israel mur aria Naungaala ana non!”

<sup>14</sup> Iok laol, Iesus hottaua tongki heueu ngana e pe are haka ia ke pomanga NeHalang nena alalaha hele ngana nenge hele ke teke,

<sup>15</sup> “Imo hehei pe hana nenge Ierusalem, a matau ero ol!  
Anau la, amo naungaala ana non kou

are haka nga tongki tuna ke atat.”

<sup>16</sup> Ure nemur te lohotos pe Iesus nena hana mur leteria mallaha ero toto nga luria. Pe nga etue nenge NeHalang hemalmalia Iesus ke het ol, leteria metene sapele ke helenga nemur nenge te tetu nga NeHalang nena alalaha, helele ia Iesus nge te poia poinga nei lala nge i.

<sup>17</sup> Iok laol, hulua nemur nenge temes pe Iesus iu hote Lasarus nga polo pe hemaui heke mule i nga metenga, te hekerkereng ia hehei pe hana leteria nga ume nemur nenge Iesus popoia. <sup>18</sup> Pe hulua tela ke tei ele i iange te longe i nge poia ure palaungana nei. <sup>19</sup> Ol pe Paresio mur te hele tele hel nge iri ke te teke, “Ita nakura ero toto nge ta poia ute pele. Anau langa hulua lochloch te nanas ngana ia i ke.”

### *Iesus Hele Tote Mete Ngana*

<sup>20</sup> Iok, Krik mur hel te koko luluch ke tela nga ngaunga matana neu pule. <sup>21</sup> Iri tela nge Pilipus pe te hele, “Non soke, mo teke monau Iesus.” Pe ne Pilipus nena nge Petsaita nga kileng nenge Kalelea. <sup>22</sup> Ol pe Pilipus heleia lange Antreas pe iri nai tela ke te heleia lange Iesus.

<sup>23</sup> Pe Iesus hele, “Etue at lo nenge lape te hemalmal heke Non Tuna. <sup>24</sup> Pe e hele ke manmanna toto lange imo. Nenge teke uit nganangana elle losio hot ke langa ich pe punich ero lape tu ke elle ke pomam mana. Pe nenge teke punich lape matana hot ke haka pe hei ke nganangana halang toto. <sup>25</sup> Mele hel nenge leteria tu mana nge iri siporia, lape te mene maulinga ke koko ero. Pe mele hel nenge leteria tumana nge iri siporia ero, nga te tungaria nga ich nei, lape te mene maulinga ke koko. <sup>26</sup> Mele nenge lemene ke teke ume nge iau nanasia iau. Pe mele nenge umume nge iau nem lape tu luluch nge iau nga etu ngak. Pe Temek lape tal heke tote mele nenge umume nge iau.

27 “Heueu nei letek meena pe lape e hele ke merei? Lape e hele lange temek ke poi ele ure meena ngana nei ke lohot nge iau ero? Nem ero, iange esio at nga ich nei ke e takisia melmelenga nem.

28 “Temek o hetei hote iong lange hehei pe hana ke iong non nge urana toto pe te heto heke tote em.”

Ol pe NeHalang hele sio at nga tapa ke teke, “E hetei hote iau lange hehei pe hana ke iau non nge urana toto pe te heto heke tote iau ke ulolo, pe lape epoi mule pule.” 29 Pe hulua nemur nenge tetu nga lamau te longe pe te teke ma kileng kurung ngana. Pe hel te teke angkelo e hele lala nge i.

30 Pe Iesus hele, “Helenga nenge a longe nem lape halaua iau ero. Helenga nem lape halau tote laka imo. 31 Pe etue nenge NeHalang nau teu langa hulua lochloch ngana nga ich reria poinga mur ngana kolo i at lo. Pe mele nenge nauele ich nei lape te lope hote i. 32 Pe Iau, nga etue nenge e mete pe e maul haka mule pe e mene kerkerenga nenge enau ele ure lochloch, lape e mene hehei pe hana lochloch ke teat nge iau.” 33 Iesus hele ngana nei hele urume i nga ana metenga.

34 Ol pe hulua nemur te hele, “Imem mo eteia nge lemeh hotonga hele ke teke, Kristus i non nenge tu ke koko. Pe pomerei nenge o hele ke o teke, lape te heon heke Non Tuna? Non Tuna mam itei toto ia?”

35 Pe Iesus hele lange iri, “Lemenge lape tu luluch nge imo ke mala pol. Pe a esapele lemo inga mur nga etue nenge lemeh tu kura. Pomalam lape kileng au ngana poi hite imo ero. Pe mele nenge ii nga kileng au ngana eteia la nganngana ero. 36 Ke nga etue nenge lemeh tu luluch nge imo ke mai, letemo manmanna nge i nike. Pomalam lape a lohot ke imo hehei pe hana nenge tetu manmana

nga lemeh.” Iesus hele ke mau ke het pe erue sio mana pe la sapele.

*Hehei Pe Hana Leteria Manmanna Ero*

37 Iesus hele pe ure halang te lohot mana pe hulua nemur leteria manmanna ero. 38 Pe poinga neu te poia ke pete tote hetatalonga Isaias nena helenga mur.

“Non Soke, itei hel leteria manmanna nga rera helenga mur?”

Pe Non Soke hetei hote nena kerkerenga lange itei hel?”

39 Leteria manmanna ero iange hetatalonga Isaias hele pule ke teke,

40 “NeHalang poia iri ke mataria hit pe poia leteria ke au ala toto.

Pomalam te naue iau ero pe leteria mallaha nge iau ero.

Pe e hemasia iri ero iange teat nge iau ero.”

41 Isaias naue hemalmalinga palaungana nenge Iesus ke ulolo, pomalam heleia Iesus ke pomam.

42 Pe hana papalauna nemur, halang nge iri leteria manmanna nge Iesus. Pe te hele hote leteria manmanna ngana ero iange te mataua Paresio mur. Pe pule te matau nge lape tepoi ele iri ke tela nga hetoronga ana pele ero ol. 43 Iange hana nemur muteria toto nge te teke hehei pe hana te heto heke totote iri. Pe leteria tu nge NeHalang ero.

44 Ol pe Iesus haliu hot ke palaungana toto ke teke, “Mele nenge letena manmanna nge iau, letena manmanna nge iau toro ero. Letena manmanna pule nge i nenge kulosia iau at nei. 45 Pe mele nenge esia iau esia i nenge kulosia iau at pule. 46 Esio at nga ich nei ke pomanga lemeh. Ke pomalam iri lochloch ngana nenge leteria manmanna nge iau lape tetu nga kileng au ngana ero ol.

47 “Mele nenge longe lek helenga pe nanasia ero, iau sipok lape e amnei teu langa nena poinga poreke ngana



nem ero. Iange iau eat nga ich nei ke e amnei teu langa hehei pe hana reria poinga poreke ngana mur ero. Eat nga ich nei ke e mene mule hehei pe hana. <sup>48</sup> Pe mele nenge hile hote iau pe nanasia lek helenga mur ero, lape te amnei teu lange i ke nek toto. Pe helenga nenge e heleia nem i sipona lape amnei teu lange mele nem nga etue nga rume. <sup>49</sup> Iange helenga nem e tamal hote nga iau sipok lemek ngak ero. Temek nenge kulosia iau at hele ke kerkereng at nge iau ke e heleia pe hele urume e hele ngak ia. <sup>50</sup> Iau e eteia ke nena helenga kerkereng ngana nem, i kue nenge langa maulinga ke koko. Ke pomalam utar nenge e heleia, e heleia ke pomanga Temek hele ngana ia at nge iau.”

### 13

#### *Iesus Lome Nena Hana Mur Aperia*

<sup>1</sup> Etue nenga ngaunga matana nenga Ingatoto heroi lo. Pe Iesus eteia ke ana etue heroi pule, nenge lape hile ich nei pe lange Temene. Pe mutena tau tote iri nemur nga ich nenge saria kikina nge i. Mutena tau tote iri kela het nga mete ngana.

<sup>2</sup> Iok, nga ulei Iesus pe nena hana mur te kila hirau nga ngaunga. Te kila hirau ero kura pe Satan roro heke Iutas Iskariot nenge Simon tuna pe tung teua lete matana ngana lange i ke tung heke Iesus langa hana porekreke ngana mur peria. <sup>3</sup> Iesus eteia ke i at nge NeHalang pe lape la mule nge NeHalang. Pe pule eteia ke Temene tunge kerkerenga lange i ke nauele ure lochloch. <sup>4</sup> Pomalam nga etue nenge te ngaungau nga hatanga, Iesus mes haka pe haka hote nena hengeron nenge hot ana pe kale loua tauninga nga luana. <sup>5</sup> Ke het pe eusiling teua ech langa kaliu pe talun ke lomo sapele nena hana mur aperia. Lomlome nena hana mur aperia pe taunune nga tauninga nenge kale loua nga luana.

<sup>6</sup> Iok, Iesus teke lake lome Simon Petrus apena pe Simon Petrus hele, “Non Soke, lape o lome apek pule kai?”

<sup>7</sup> Pe Iesus hele, “Iong, o eteia ure nenge e popoia nei ero, pe nga hoena lape o eteia ol.”

<sup>8</sup> Pe Petrus hele, “Ero! Lemek ero nge o lome apek.”

Ol pe Iesus hele, “Nenge teke elome apem ero, lape lek non iong ero ol.”

<sup>9</sup> Pe Simon Petrus hele, “Non Soke pomalam iok, o lomo mene apek ero. O lome perik pe palpaluk pule.”

<sup>10</sup> Iesus hele, “Mele nenge nun ke singina lemlem ke ulolo, nun mule ero ol. Lape lomo mene apena ol. Pe imo nemur singimo lemlem ke ulolo pe mele elle nge imo singina lemlem ero.” <sup>11</sup> Iesus eteia mele nenge milmil ana ke pomalam hele ke teke, “Mele elle nge imo singina lemlem ero.”

<sup>12</sup> Iok, Iesus lome nena hana mur aperia ke het pe heron heke mule nena hengeron nenge hot ana. Ke het pe la ke are mule nga munna nga hatanga pe onteia iri ke teke, “Ure nenge e poia lange imo nei mai a eteia luna pule kai? <sup>13</sup> Imo, nga etue nenge a hele atat nge iau, a hetue iau ke Heteronga pe Non Soke. Pe a heto ngamo nem pengpeng iange iau non nenge pomam. <sup>14</sup> Ke iau, amo Non Soke pe amo heteronga. E lome apemo pe imo a lome pekngamo mur aperia pule. <sup>15</sup> E poia lange imo ke ulolo. Pomalam a poia lange pekngamo mur pule ke pomanga epoi ngak ia lange imo. <sup>16</sup> E hele ke manmanna toto lange imo, hekuleileinga ana hana mur iri papalauna nge aria aehuna mur ero. Pe pule non nenge hesongong helenga, i palaungana nge non nenge hekule i ero. <sup>17</sup> Heueu nei a eteia ke helenga nenge e heleia nei manmanna. Pe nenge teke a poia ana ume, iechinga lape lohot nge imo.

#### *Iesus Hele Talue Ana Metenga*

**13:2:** Luk 22:3; Ioa 13:27 **13:3:** Ioa 3:35; 16:28  
20:28; Luk 22:27 **13:15:** Pil 2:5; Kol 3:13; 1Pi 2:21

**13:10:** Ioa 6:64, 70-71; 15:3 **13:14:** Mat  
**13:16:** Mat 10:24 **13:18:** Psa 41:9

<sup>18</sup> “Iau e heleia imo lochloch ero, iau e etei tote mele hel nenge e hesilei hote iri ke ulolo. Pe nei nenge poia NeHalang nena helenga nenge masio nga alalaha lo, ke lohote ke manmanna nenge hele ke teke, ‘Non nenge ngau luluch nge iau lape hul rumena mule nge iau.’

<sup>19</sup> “Ure nem, lape lohote nga hoena kura pe e hele tele lala nge imo nike. Pe nga etue nenge ure nem lohote, lape letemo manmanna ke iau non nenge tu ke koko. <sup>20</sup> E hele ke manmanna lange imo, mele nenge long teua lek hana mur nenge e kulosia iri, long teua iau pule. Pe mele nenge long teua iau, long teua i nenge kulosia iau.”

<sup>21</sup> Iesus poia helenga nei ke het pe letena meena toto. Ol pe hele, “E hele ke manmanna lange imo. Amo e nge imo lape tung heke iau langa hana porekreke ngana mur peria.”

<sup>22</sup> Pe nena hana mur ngaria lohote nga helenga neu pe leteria una toto. Ol pe tenau tele hel nge iri pe te ontei hel ke te teke, “Itei toto nenge non nei helele ia mai?” <sup>23</sup> Pe elle nge iri nenge Iesus mutena tau tote, kila rochroi toto nge Iesus. <sup>24</sup> Pomalam Simon Petrus palnakuna lange i nenge Iesus mutena tau tote pe mangun lange i ke onteia Iesus, “O onteia Iesus. I mam helele ia itei toto?”

<sup>25</sup> Pomalam non neu matu haka toto nge Iesus pe onteia i ke teke, “Non Soke o helele ia itei toto?”

<sup>26</sup> Pe Iesus tuacholia, “Iau lape e panun teua ngaunga nei nga kaliu pe e tunge lange none. Pe non nenge e tunge ngaunga nei lange i, ana non lalom.” Iok, Iesus panun teua ngaunga neu ke het pe tunge lange Simon Iskariot tuna. Ana non ene laka Iutas. <sup>27</sup> Pe nga etue nenge Iutas mene ngaunga nei, non poreke ngana roro heke i sapele.

Ol pe Iesus hele lange i ke teke, “Utar nenge o teke o popoia, o poia ke ueiuei.” <sup>28</sup> Pe helenga nenge

Iesus heleia lange Iutas, mele e nga hatanga neu eteia luna ero. <sup>29</sup> Iutas i non nenge nauuelele umtutuna ana kole. Pe pekngana nemur te teke ma Iesus hele lala nge i ke lol ngaunga. Pe pule te teke ma Iesus hele lange i ke mene umtutuna unne pe laia nge iri nenge reria ure ero. Pe ero. <sup>30</sup> Iutas mene ngaunga ele neu nge Iesus pe i hot sapelpele nga miliko neu.

### *Hotonga Heueu Ngana*

<sup>31</sup> Iok, Iutas i hot kela pe Iesus hele, “Heueu lape te heto haka tote Non Tuna. Pe lape te heto haka tote NeHalang pule iange Non Tuna hemallaha hote nena hemalmalinga. <sup>32</sup> Pomalam NeHalang i sipona lape hemalmalia i pe lape poia ke ueiuei toto.

<sup>33</sup> “Pe imo, apoi ke pomanga tutuk mur imo toto. Pe lape etu luluch nge imo ke etue choro mana pe nga hoena lape a tango rere iau. Pe helenga nenge e hele ia lange Iuta mur aria papalauna mur, heueu nei lape e hele ia lange imo pule. Ana helenga koi, ‘Imo lape a at nga kileng nenge etu ia ero.’

<sup>34</sup> “Pe e tunge hotonga heueu ngana e lange imo: Mutemo taua pekngamo mur. Iau, mutek tau tote imo pomalam imo pule mutemo taua pekngamo mur. <sup>35</sup> Nenge teke mutemo taua pekngamo mur, lape hulua te eteia ke iau lek hana mur imo.”

### *Iesus Hele Talue Petrus Pallaklaka Ngana*

(*Mat 26:31-35; Mak 14:27-31; Luk 22:31-34*)

<sup>36</sup> Ol pe Simon Petrus onteia Iesus, “Non Soke, iong mam lape o lala langai?”

Pe Iesus tuacholia, “Iong lape o nanasia iau nga lek inga nenge eii ia heueu nei ero. Pe lape o nanasia iau nga hoena kura.” <sup>37</sup> Pe Petrus ontei mule, “Non Soke, pomerei nenge e

nanasia iong heueu ero? E teke e mete ke e mene mullim.”

<sup>38</sup>Pe Iesus tuacholia, “O teke o mete ke o mene mullik ma? E hele ke manmanna toto lange iong. Nge rou nga uachuach pareo tang ero kura pe o channanga hemol ke o teke o eteia iau ero.”

## 14

### *Iesus Hemaluche Nena Hana Mur*

<sup>1</sup>Ol pe Iesus hele lange nena hana mur, “Letemo meena ero. Samo kikina nge NeHalang pe samo kikina nge iau pule. <sup>2</sup> Temek nena pele ana tokola halang. Nem manmanna iange ela ke e tatalo ele mullimo. <sup>3</sup> Ela ke e tatalo ele mullimo ke het pe lape eat tau mule imo pe e mene imo kela atu luluch nge iau. <sup>4</sup> Imo a eteia kue nenga kileng nenge e lala ia nei.”

### *Iesus I Esinga Tele Nenge Lange Temere*

<sup>5</sup>Pe Tomas hele lange Iesus, “Non Soke mo eteia kileng nenge o lala ia nem ero i. Ke lape mo eteia ana kue ke merei?”

<sup>6</sup>Pe Iesus tuacholia, “Tau sipok iau esinga tele nenge e hemallaha hote helenga manmanna toto ngana nenge NeHalang, pe iau kue nenge langa maulinga ke koko nenge NeHalang tunge. Pe iau sipok iau kue nenge song ke lange Temek. Kue e ero ol.” <sup>7</sup>Pe Iesus hele lange iri, “Nenge teke a etei tote iau lape a eteia Temek pule. Pe nga etue nei kela ol lape a eteia i iange a naue ramana nge iau ke ulolo.”

<sup>8</sup>Ol pe Pilipus hele lange Iesus, “Non Soke, imem lape mo ontei mule iong nga ute e ero ol. Pe ure nenge mutemem tau tote ngana koi nei; O henonoua imem nge Temere ke mo naue nga matamem.”

<sup>9</sup>Pe Iesus hele lange Pilipus, “Pilipus etu luluch nge imo ke mala ke ulolo, pe pomerei nenge o teke o eteia iau ero? Mele nenge naue iau lo,

naue Temek pule. Pe pomerei nenge o teke e henonoua Temek lange imo?

<sup>10</sup>Letem manmanna nga nei ero kai? Iau etu teu luluch nge Temek pe Temek tu teu luluch nge iau. Helenga nenge e heleia lala nge imo nei, iau sipok lek helenga mur ia ero. Temek nenge tu teu luluch nge iau pe e popoia ana ume koi nena helenga nemur. <sup>11</sup>Letemo manmanna nga lek helenga nenge e teke Temek tu teu luluch nge iau pe iau etu teu luluch nge Temek. Pe nenge teke letemo manmanna nga lek helenga nem ero, iok letemo manmanna nga urelu nenge e hele pe te lohote manmana. <sup>12</sup>E hele ke manmanna toto lange imo. Mele nenge letena manmanna nge iau, lape hele pe urelu te lohote manmana ke pomange iau. Pe i lape poia ure hel nge papalauna toto nga nenge e popoia, iange iau e lala nge Temek lo. <sup>13</sup>Ure lochloch ngana nenge a hetalaulau pe a onteia nga iau ek lape e poia. Pomalam lape e hemallaha hote Temek nena hemalmalinga palaungana. <sup>14</sup>Ke ure lochloch nenge a ontei iau ia, iau lape e poia la.”

### *Iesus Nena Helenga Kerkereng Ngana Nga Opepengpeng*

<sup>15</sup>Nenge teke mutemo taua iau, lape a longo taua lek helenga mur. <sup>16</sup>Pe iau lape e onteia Temek ke tunge amo halaunga e pule nenge lape tu luluch nge imo ke koko. <sup>17</sup>Ke imo amo halaunga laka Opepengpeng. Pe Opepengpeng nem lape hemallaha hote helenga manmanna toto ngana mur nge NeHalang lange hehei pe hana. Pe hehei pe hana nga ich nenge leteria manamanna nge NeHalang ero, lemeria ero ia i iange te naue i ero pe te eteia i ero pule. Pe imo a eteia i iange tu teu luluch toto nge imo. <sup>18</sup>Iau lape e hile sio mene imo ke pomanga hatuong mur ero. Lape ela pe eat tau mule imo. <sup>19</sup>Etue

**14:3:** Ioa 12:26    **14:6:** Ioa 11:25; Rom 5:1-2    **14:7:** Ioa 8:19    **14:9:** Ioa 12:45; Kol 1:15; Hip 1:3    **14:10:** Ioa 12:49    **14:11:** Ioa 10:38    **14:12:** Mak 16:19-20    **14:13:** Mat 7:7; Ioa 15:16  
**14:15:** Ioa 15:10; 1Ioa 5:3    **14:16:** Ioa 14:26; 15:26; 16:7    **14:17:** Ioa 16:13

choro mana tu ol pe hehei pe hana nga ich lape tenau mule iau ero ol. Pe imo lape anau mule iau iange lape e maul haka mule pe etu ke e maulul ke koko. Ke pomalam imo lape a mene maulinga ke koko nge iau. <sup>20</sup> Pe nga etue nenge e maul haka mule a eteia ke imem nai Temek imem elle mana pe imo pe iau ita elle mana pule. <sup>21</sup> Mele hel nenge muteria taua iau tera hite lek helenga mur pe te nanasia pe Temek mutena taua iri nenge muteria taua iau. Pe e hetei hote iau lange iri iange mutek taua iri.

<sup>22</sup> Ol pe Iutas ontei, (Iutas nenge ene Iskariot ero, Iutas e pule) “Non Soke pomerei toto nenge o hetei hote iong at nge imem mana pe o hetei hote iong lange hehei pe hana nga ich nei ero?”

<sup>23</sup> Pe Iesus tuacholia pe hele lange i ke teke, “Mele nenge mutena taua iau, longo taua lek hengetoro mur pe Temek lape mutena taua mele nem. Pomalam lape imem nai Temek moat ke motu luluch nge i. <sup>24</sup> Pe mele nenge mutena taua iau ero rahite lek hengetoro mur ero. Pe helenga nemur nenge a longlonge nem Temek nenge kulosia iau at laka nena helenga nemur.

<sup>25</sup> “E heleia ure nemur lange imo nga etue nenge etu luluch nge imo. <sup>26</sup> Pe Opepengpeng nenge halaulaua imo lape Temek hekulo sue at nge imo nga iau ek. Pe i lape hetore imo pe helete metene imo nga ure lochloch ngana nenge e heleia lange imo ke ulolo. <sup>27</sup> Ke iau e lala lo pe e teke e tunge letek urana ngana lange imo ke letemo ma ke nek pe atu ke nek. Letemo meena ero pe a matau ero iange mele nga ich nei tunge lete urana ngana nenge pomam lange imo ero.

<sup>28</sup> “Imo a longe iau nge e hele lange imo ke ulolo nenge e hele ke e teke, ‘Lape ela pe lape eat mule nge imo.’ Pe nenge teke mutemo taua iau lape

letemo iech mana nge ela nge Temek iange i palaungana toto nge iau. <sup>29</sup> E heleia ure nemur lange imo nike ke nga etue nenge te lohot, lape letemo manmanna. <sup>30</sup> Iok, lape e hele sakilil lange imo ero ol iange non nenge nauеле ich nei ngana koi atat lo. Pe iau kikik ngak palaungana toto nga i kikina ngana. <sup>31</sup> Iau e teke kileng lochloch ngana nga ich te eteia ke iau mutek tau tote Temek. Ke pomalam e poia ume lochloch ngana nenge i sipona heleia at nge iau.

“Iok a lohaka pe tai!”

## 15

### *Jesus I Uain Tana Nenge Urana Toto*

<sup>1</sup> Iesus hele, “Iau uain tana toto ngana. Pe Temek i non nenge nauелеle pe umume nga ume nenge tetue ana uain. <sup>2</sup> Pe Temek lape chato hote uain perperna mur nenge tetu teu nge iau pe tehei erochro. Pe perperna nemur nenge tehei, Temek lape ute iri ke almas mule iri ke te chorchoro. Pomalam, nga hoena lape nganangaria halang toto ol. <sup>3</sup> Pe imo, lek helenga nenge e heleia lange imo almasia imo ke ulolo. <sup>4</sup> Nenge teke atu teu luluch toto nge iau, iau etu teu luluch toto nge imo. Nenge teke uain penna e tuteu toto nga uain tana, uain penna nem lape hei. Pe uain penna e hei mana nge i ero. Ke pomalam mana nge imo, nenge teke atu teu luluch nge iau ero, lemo kerkerenga pele ero toto nge a poia ute pele ke lohot.

<sup>5</sup> “Ke iau uain tana pe imo uain perperna mur. Nenge teke mele tu teu luluch nge iau pe iau etu teu luluch nge i, mele nem lape poia ure urana ngana halang. Iange mele nenge tu teu luluch nge iau ero lape poia ute pele ero toto. <sup>6</sup> Pe iri nenge tetu teu luluch nge iau ero lape tepoi ke pomalaka nga uain perperna mur nenge tesau hote iri ke te kalum. Pe uain perperna nemur nenge pomam



lape te lochloch heke pe tesau heke iri langa oan ngingina ngana ke te ngaulala. <sup>7</sup> Nenge teke atu teu luluch nge iau pe lek helenga mur tetu teu toto nga letemo, lape Temek tunge utar nenge lememo taua pe a ontei i ia. <sup>8</sup> Pe Temek lape mene hemalminga palaungana nga etue nenge a poia ure urana ngana mur pe a hetei hote imo ke lek hana mur imo.

<sup>9</sup> “Mutek tau tote imo ke pomange Temek nge mutena tau tote iau. Pomalam, letemo tu mana nge iau. <sup>10</sup> Ke nenge teke a longo taua lek hotonga mur letemo lape tu mana nge iau. Pomange iau nge e longo taua Temek nena hotonga mur pe letek tu mana nge i. <sup>11</sup> E heleia helenga nemur lange imo ke lek iechinga tu hite letemo. Pe lape a iech toto. <sup>12</sup> Pe lek hotonga nenge e teke a nanasia ngana koi nei; Mutemo taua pekngamo mur ke pomange iau nge mutek taua imo. <sup>13</sup> Nenge teke mele tung heke i sipona ke mete ke halaua pekngana mur, mele nem mutena tau tote pekngana mur. <sup>14</sup> Ke nenge teke a poia ure nenge e heleia lange imo ke e teke a poia, iau pekngak mur imo. <sup>15</sup> Pe lape e hetue imo ke hengekuleilei ana hana mur ero ol iange hengekuleilei ana hana mur te eteia utar nenge non nenge nauele iri popoia ero. Iau e hetue imo ke pekngak mur iange utar nenge Temek hetoro iau ia e hetore lange imo ke a eteia pule. <sup>16</sup> Imo a hesilei hote iau ero, iau e hesilei hote imo. E hesilei hote imo pe etal hote imo ke a poia ume urana ngana mur pe amo ume urana ngana nemur nganangana lohot pe tu ke koko. Pomalam lape Temek tunge ure mur lange imo nenge teke a hetalaulau pe a onteia i nga iau ek. <sup>17</sup> Pe lek hotonga nenge e tunge lange imo ngana laka nenge e teke mutemo taua pekngamo mur.”

### *Hehei Pe Hana Nga Ich Te Hesisia*

**15:8:** Mat 5:16

**15:10:** Ioa 14:15; 1Io 2:5

**15:14:** Mat 12:50

**15:17:** Ioa 13:34

**15:19:** Ioa 17:14

**15:25:** Psa 35:19; 69:4

**15:26:** Ioa 14:26

### *Jesus Nena Hana Mur*

<sup>18</sup> “Pe nenge teke hehei pe hana nga ich nei te hesisia imo a eteia ke te hesis tele iau ke ulolo. <sup>19</sup> Pe te hesisia imo iange etal hote imo pe e mene hote imo nga ich nei ke ulolo. Pe nenge teke lemo nga ich nei kura lape muteria tau tote imo pe nei ero ol. Ke pomalam hehei pe hana nga ich nei te hesisia imo. <sup>20</sup> Letemo metene utar nenge e heleia lange imo ke ulolo. ‘Hengekuleilei ana none i palaungana nge ana aehuna ero.’ Ke pomalam nenge teke tepoi poreke iau lape tepoi poreke imo pule. Pe nenge teke te longo taua lek hengetoro mur lape te longo taua lemo hengetoro mur pule. <sup>21</sup> Pe iri te poia poinga nemur lange imo iange iau lek hana mur imo. Pe pule te eteia i nenge kulosia iau at nei ero. <sup>22</sup> Iau ela nge iri nga tele ngana pe e hele lange iri lo, pe nenge teke e hele lange iri ero, lape te etei teu nga poinga poreke ngana ero. Pe nei ero. E hele lange iri ke ulolo pe te longo ole, pomalam reria helenga e ero toto ol. <sup>23</sup> Pe mele nenge hesisia iau hesisia Temek pule. <sup>24</sup> Pe mele pele kikina ero toto nge hele pe ure te lohot manmana. Pe iau, e helele pe urelu te lohotot. Pe nenge teke e poia ume nem nga mataria nga tele ngana ero, lape te etei teu nga poinga poreke ngana ero. Pe nei ero. Iri te naue ure nemur nge epoi hote iri ke ulolo. Pe pomerei toto nenge te hesis apeia imem nai Temek mai? <sup>25</sup> Pe reria poinga nei lohot ke pete tote helenga hel nenge tehas sue nga reria hotonga mur ana alalaha lo nenge hele ke teke, ‘Iri te hesisia iau pe iau lek huna nga ute e nge iri ero.’

<sup>26</sup> “Pe imo amo Halaunga, ngana kou tu luluch nge Temek kura. Pe i Ope nenge hele hote helenga manmana toto ngana mur nge Temek iange lohot pengpeng nge Temek. Pe iau lape e hekule i ke at nge imo. Pe

**15:12:** Ioa 13:34

**15:13:** Ioa 10:11; 1Io 3:16

**15:19:** Ioa 17:14

**15:20:** Ioa 13:16

**15:23:** Luk 10:16

i lape at ke hemallaha hote iau lange imo pule. <sup>27</sup> Pe imo pule lape a hele hote helenga manmanna toto ngana mur ke mallaha, iange atu luluch nge iau nga etue nenge e talun ke e hetot-toro ke at heueu nei.

## 16

<sup>1</sup> “E heleia ure lochloch ngana nei lange imo ke a rahite letemo manmanna ngana mur ke kerkereng. <sup>2</sup> Iange lape te hile hote imo pe lape ala ke a hetaulau luluch nge iri nga hengetoro ana pele ero ol. Pe nga hoena etue e lape at. Pe iri nenge te teke te hunune imo, te teke ma reria poinga nem pengpeng nga NeHalang matana. <sup>3</sup> Pe te popoia imo ke pomam iange te eteia Temek ero pe te eteia iau ero pule. <sup>4</sup> E heleia ure nemur lange imo nike. Pe ana etue teke lohot ho olo, letemo metene ke e heleia ure nemur lange imo ke ulolo. E heleia ure nemur lange imo nga tele ngana ero iange etu luluch nge imo kura. <sup>5</sup> Pe heueu nei ela mulmule nge Temek lo. Temek nenge kulosia iau at nei. Pe pomerei amo e onteia iau ke pomai ero? ‘O lala langai?’ <sup>6</sup> A onteia iau ero iange letemo una nga ure nemur nenge e heleia lange imo ke ulolo.”

### *Opepengpeng Ana Ume*

<sup>7</sup> “Pe helenga nenge lape e heleia lange imo nei manmanna toto koi. Urana nge ela iange ela ngak nei lape halau tote imo. Pe nenge teke ela ero halaunga e lape at nge imo ero. Ke pomalam ela pe e kulosia halaunga nem ke at nge imo. <sup>8</sup> Pe nga etue nenge ana non at, lape hemallaha hot tote ure nemur lange hehei pe hana nga ich nei. Ngana laka; Poinga poreke ngana huuna mur pe poinga mur nenge tatu ke pengpeng nga NeHalang matana pe NeHalang nena haliunga lohot ngana nge he. <sup>9</sup> Pe lape hemallaha hot tote poinga poreke ngana hu una mur iange leteria manmanna nge iau ero. <sup>10</sup> Pe

pule lape hemallaha hot tote poinga mur nenge tatu ke pengpeng nga NeHalang matana iange lape ela nge Temek pe a naue iau ero ol. <sup>11</sup> Pe pule lape hemallaha hot tote NeHalang nena haliunga lohot ngana nge he iange non poreke ngana nenge nauele ich nei, NeHalang hekou sue nena kerkerenga ke ulolo.

<sup>12</sup> “Lek helenga halang tetu kura pe lape e heleia lange imo ero iange lape a mene ke nek ero. <sup>13</sup> Pe Ope nenge hele hotote helenga manmanna ngana mur lape at. Pe nga etue nenge at i lape hepengia imo pe poia imo ke a eteia helenga manmanna ngana mur nge NeHalang. Pe helele ia i sipona nena helenga mur ero. I lape longe helenga mur pe at ke heleia lange imo. Pe ure nemur nenge te lohotot nga hoena lape heleia lange imo pule. <sup>14</sup> Ke i lape mene lek helenga mur pe heleia lange imo. Nga poinga nei lape hemallaha hote lek kerkerenga pe hehei pe hana te heto heke iau. <sup>15</sup> Ure lochloch ngana nenge Temek nena ia iau lek ia pule. Ke ngana laka nenge e hele ke e teke lape e tunge lek helenga lange Opepengpeng pe i lape heleia lange imo.

<sup>16</sup> “Etue choro mana tu ol pe lape a naue iau ero ol. Pe musuna pol mana lape anau mule iau.”

### *Tanginga Lohot Ke Iechinga*

<sup>17</sup> Ol pe Iesus nena hana mur hel te ontei hel nge iri, “Helenga nenge heleia at nge ita nei luna merei? Nenge hele ke teke, ‘Etue choro mana tu ol pe lape a naue iau ero ol. Pe musuna pol mana lape anau mule iau.’ Pe pule hele ke teke, ‘Iange lape ela nge Temek’.” <sup>18</sup> Pe te ontei hel mule, “Helenga nenge, ‘Etue choro mana tu ol’ luna merei? Ita ta eteia utar nenge helele ia luna ero i.”

<sup>19</sup> Iesus eteia nge te teke te onteia i. Pomalam hele lange iri, “Tau e hele ke e teke, ‘Etue choro mana tu ol pe

16:2: Mat 24:9; Luk 6:22; Ioa 9:22

16:3: Ioa 15:21

16:7: Ioa 14:16

16:11: Ioa 12:31

16:12: 1Ko 3:1-2

16:16: Ioa 14:19

lape a naue iau ero ol pe musuna pol mana lape anau mule iau.’ A ontei helelia imo kai nga helenga nei mai? <sup>20</sup> E hele ke manmanna toto lange imo. Iechinga palaungana lape lohot nge hulua nga ich nei. Pe imo lape a tangtang pe letemo kolkol ulu ke ahet. Pe lemo tanginga nem lape het pe a iech mule. <sup>21</sup> Hei e nge hoe nena mamau a amneia melmelenga palaungana nga hohonga ana etue. Pe nga etue nenge hoho ke het letena metene melmelenga nem ero ol, iange iech toto ia nena mamau nge ha nga ich nei. <sup>22</sup> Pomalam mana nge imo. Heueu nei lape a tangtang pe letemo milang toto. Pe iau lape enau mule imo kura. Pe nga etue nenge enau mule imo lape a iech toto pe mele pele mene tote iechinga nem nge imo ero. <sup>23</sup> Nga etue nem lape a onteia iau nga ute ero ol. Temek lape tunge utar nemur nenge a onteia lange i nga iau ek. Helenga nenge e heleia nei manmanna koi. <sup>24</sup> Nge nike ke at heueu nei a ontei ke a mene ute e nga iau ek ero kura. Ana etue at kolo. A ontei pe NeHalang tunge la. Pe lape a iech ele tote ure nemur nenge a mene.

### *Ames Ke Kerkereng*

<sup>25</sup> “E heleia ure nemur nga helenga opene pe nga etue nenge atat nei, lape e poia helenga e nge pomam ero ol. Lape e hele ke e hemallaha hot tote Temek lange imo. <sup>26</sup> Nga etue nem lape a hetalaulau lange Temek ke halaua imo nga iau ek. Pe iau ak ume nenge e onteia i ke halaua imo ero ol. <sup>27</sup> Temek i sipona mutena tau tote imo pe mutena tau tote imo iange, mutemo tau tote iau pe letemo manmanna ke iau eat nge i. <sup>28</sup> Iau, eat nge Temek ke etu teu nga ich nei pe heueu nei lape e hile ich nei pe ela mule nge Temek.”

<sup>29</sup> Ol pe Iesus nena hana mur te hele lange i ke te teke, “Lem helenga nem mallaha nge imem ol. Pe o

hele nga helenga opene ero ol. <sup>30</sup> Pe heueu nei mo naue ke iong o eteia ure lochloch pe lape mele pele onteia iong nga onteinga e ero. Pe nem poia imem ke letemem manmanna toto nge oat nge NeHalang.”

<sup>31</sup> Pe Iesus tuacholia, “Letemo manmanna nge iau lo? <sup>32</sup> Etue nenge atat ngana kolo at lo nenge lape imo lochloch alot parai ke ala nga lemo kileng mur. Pe a hilesue iau ke iau toro etu. Pe iau toro etu ero iange Temek tu teu luluch nge iau ke koko.”

<sup>33</sup> “E heleia ure nemur lange imo ke atu teu luluch nge iau pe letemo ma ke nek. Oe, hehei pe hana nga ich nei lape tepoi poreke imo. Pe imo ames ke kerkereng iange iau e hekou sue ich nei ke ulolo.”

## 17

### *Iesus Hetalaulau Nge Isipona*

<sup>1</sup> Iesus hele lange nena hana mur ke het pe nau haka langa lut nga tapa pe hetalaulau ke teke,

“Temek, etue nei sauhot lo. O tunge hemalmalinga nem lange Tum ke o heneue hehei pe hana. Pomalam mana lape e heneue hehei pe hana ke te heto heke tote iong. <sup>2</sup> Pe o tunge kerkerenga nge iau ke e muka nge hehei pe hana lochloch. Ke pomalam, e tunge maulinga ke koko nge iri nemur nenge o poia iri ke lek hana mur ia iri. <sup>3</sup> Pe maulinga ke koko luna, ngana kai nei mai: Te eteia iong nge iong toro iong NeHalang toto ngana pe te eteia Iesus Kristus nge o kulos ia at. <sup>4</sup> Ume nenge o tunge at nge iau e poia ke het lo. Ke e hemallaha hote lem hemalmalinga nga ich nei ke ulolo. <sup>5</sup> Temek, nga etue nenge oala hote tapa pe ich ero kura, etu luluch nge iong pe o tunge hemalmalinga palaungana at nge iau. Pe heueu nei eat ke etu luluch mule nge iong pe lape o tung mule hemalmalinga nem at nge iau.”

*Jesus Hetalaulau Hana Nenge Te Nanasia I Aria*

<sup>6</sup>“Iau, e hemallaha hote em lange hana nenge o tunge iri at nge iau nga ich nei. Hana nemur iong lem hana mur ia iri pe o tunge iri at nge iau pe te longo taua lem helenga ke ulolo. <sup>7</sup> Pe heueu nei te eteia ke ure lochloch ngana nenge o tunge at nge iau teat pengpeng nge iong. <sup>8</sup> Pe e tunge hengetoro nenge o tunge at nge iau lange iri pe te mene. Pe te etei tote ke iau eat nge iong pe leteria manmanna toto nge o kulosia iau. <sup>9</sup> Pe iau e hetalaulau hehei pe hana nenga ich nei aria ero. E hetalaulau mana hana nenge o tunge iri at nge iau aria iange lem hana mur ia iri. <sup>10</sup> Pe lek hana mur lochloch iong lem hana mur ia iri. Pe iong lem hana mur lochloch iau lek hana mur ia iri. Pe iri te hemallaha hotote lek hemalminga ke ulolo. <sup>11</sup> Iau e lala nge iong heueu lola pe lape etu nga ich nei ero ol. Pe iri te tutu nga ich nei kura. Temek, iong Non nge Heongana toto. O heneue iri nga kerkerenga nenga em, nga em nenge o tunge at nge iau. Pomalam, iri lape tetu ke elle ke pomange iong pe iau nge ita elle mana. <sup>12</sup> Nga etue nenge etu luluch nge iri e nekia iri nga kerkerenga nenga em nenge o tunge at nge iau. Pe elle nge iri erue ero. Non elle mana nge iri iskeke hot ke mete ke amneia melmelenga palaungana. Pe ure nem lohohot ke pete tote lem helenga nenge masio nga alalaha.

<sup>13</sup>“Iau e lala nge iong heueu lola. Pe e heleia ure nemur nga etue nenge etu nga ich kura ke hana nemur leteria iech toto ke mange iau nge e iech toto. <sup>14</sup> E heleia lem helenga lange lem hana mur ke ulolo pe hehei pe hana nga ich nei singiria sisia iri. Iange iri reria nga ich nei ero. Ke pomange iau nge lek nga ich nei ero pule. <sup>15</sup> Iau e onteia iong ke o mene hote iri

nga ich nei ero. E onteia iong ke o nauele iri ke nek nge non poreke ngana. <sup>16</sup> Iange iri reria nga ich nei ero ke pomange iau nge lek nga ich nei ero pule. <sup>17</sup> Lem helenga lohohot ke manmanna ke ulolo pe o poia lem helenga nem ke tuteu toto nge iri. Ke o mene iri ke lem hana mur ia iri pe o helelem ia iri. <sup>18</sup> Iong o kulosia iau ke eat nga ich nei, pomalam mana iau e kulos hote iri ke te haliu hote lem helenga nga ich nei. <sup>19</sup> Pe e tung tote iau lange iong ke e halaua iri. Pomalam, nga lem helenga manmanna ngana lape te tung tote iri lange iong pule.”

*Jesus Hetalaulau Iri Nenge Leteria Manmanna Aria*

<sup>20</sup>“Pe e hetalaulau lek hana mur mana aria ero. Iri hel pule nenge te longe lek hana mur reria helenga pe leteria manmanna nge iau, e hetalaulau aria pule. <sup>21</sup> Temek, e hetalaulau aria ke iri elle mana ke pomange ita nai. Iange iong otu teu luluch nge iau pe iau etu teu luluch nge iong. Pe pule e hetalaulau ke iri tetu teu luluch nge ita nai. Pomalam hulua lochloch ngana nga ich leteria manmanna ke iong o kulosia iau. <sup>22</sup> Pe e hemalmal ia iri ke pomange iong nge o hemalmal ia iau. Pe e hemalmal ia iri ke iri elle ke pomange ita nai nge ita elle. <sup>23</sup> Iong otu teu luluch nge iau pe iau etu teu luluch nge iri ke lape te lohohot ke iri elle toto. Nga poinga nei kileng lochloch nga ich te eteia ke iong o kulosia iau pe mutem taua iri ke pomange iong nge mutem taua iau.

<sup>24</sup>“Temek, lemek ke hana nenge o tunge iri at nge iau nei tetu luluch nge iau ke te naue lek hemalminga nenge lape lohohot. Hemalminga nem o tunge at nge iau iange mutem taua tele iau nika nge etue nenge oala hote tapa pe ich ero kura.

<sup>25</sup>“Temek, iong non nge pengpeng toto pe hehei pe hana nga



ich nei te eteia iong ero. Pe iau e eteia iong pe lek hana mur nenge te nanasia iau te eteia ke iong o kulosia iau at. <sup>26</sup> Pe e hemallaha hote iong lange iri ke te eteia iong ke ulolo. Pe kokoes lape e hemallaha hottote iong lala nge iri. Pomalam lape muteria taua pekngaria mur ke pomange iong nge mutem taua iau pe pule lape etu teu luchluch nge iri.”

## 18

### *Palinga Hel Ana Hana Mur Te Laua Iesus*

(*Mat 26:47-56; Mak 14:43-50; Luk 22:47-53*)

<sup>1</sup> Iesus hetalaulau ke mau ke het pe iri ul nena hana mur te lotele langa ech nenge Kitron ilina ele. Pe nga lamau ume e nenge te tue ae oliua tu pe Iesus pe nena hana mur tei teu langa ume neu.

<sup>2</sup> Iutas i non nenge lape tung heke Iesus lange hana porekreke ngana mur. Ana non eteia kileng neu iange kokoes Iesus pe nena hana mur te eukiraurau nga lamau. <sup>3</sup> Pomalam ana non sauhot nga ume neu. Pe tunginga ana hana mur aria papalauna mur pe Paresio mur te kulosia palpal hussu mur hel ke tela luluch nge Iutas. Pe pule, palinga hel ana hana mur nenge Rom te koke iri pe te lochloch ia reria lemenga mur pe rir pe palinga hel ana ure mur.

<sup>4</sup> Pe Iesus eteia ure lochloch ngana nenge lape lohoh nge i ke ulolo. Pomalam i hot lange iri pe onteia iri, “A tango rere itei?”

<sup>5</sup> Pe iri te tuacholia ke te teke, “Mo tango rerere Iesus nenge Nasaret.”

Pe Iesus hele, “Iau i loi.” (Pe Iutas i non nenge teke tung heke Iesus lange iri. Ngana kou mes luluch nge iri pule.) <sup>6</sup> Te longe Iesus nge hele ke teke, “Iau i loi.” Pe te ruka pe te losio langa ich.

<sup>7</sup> Pe Iesus ontei mule iri, “A tango rere itei?”

Pe iri te hele, “Mo tango rerere Iesus nenge Nasaret.”

<sup>8</sup> Pe Iesus hele la mule nge iri, “E hele lange imo ke ulolo ke e teke iau koloi. Pe nenge teke a tango rerere iau, iok a hile hote lek hana nemur ke tela.” <sup>9</sup> (Iesus hele ke mau pe pete tote nena helenga nenge hele talue ke ulolo. Nenge hele ke teke, “Temek, hana nenge o tungge iri at nge iau lape enau ele iri ke nek toto.”)

<sup>10</sup> Pe Simon Petrus lachasiu hote nena palinga hel mese pe pasasal hote tunginga ana hana mur aria soke nena none talngana ele nenga pen tamalmal. (Ana non ene laka Malkas.)

<sup>11</sup> Pe Iesus hele lange Petrus, “Otal teu mule mese langa ana manga teu! Pomerei, ak melmelenga lape lohoh ke pomanga Temek letena tuanin hot ngana ia. Pe iong mam o teke lemek ero ia kai?”

### *Te Mene Iesus Lange Anas*

<sup>12</sup> Iok laol, Palinga hel ana hana mur nenge Rom (pe aria soke) pe palpal hussu mur nenge Iuta te laua Iesus pe teman pakiua penna pe te kale hite. <sup>13</sup> Pe te mene ke tela tala ia i nge Anas. Pe Anas i ne Kaipas uene. Pe i, tunginga ana hana mur aria soke ia nga hesinga neu. <sup>14</sup> Ne Kaipas i non nenge hetoro hite Iuta mur ke teke, “Urana nge non elle mana mete ke mene hulua muria.”

### *Petrus Hele Ke Teke Eteia Iesus Ero* (*Mat 26:69-70; Mak 14:66-68; Luk 22:55-57*)

<sup>15</sup> Pe Simon Petrus pe neingana e te nanasia Iesus ke tela. Pe neingana nem nanas teua Iesus langa Kaipas nena pele ana kileng koana nge hot iange non soke neu eteia i. <sup>16</sup> Pe Petrus kulkulala nge hot nga kue matana. Ol pe Petrus neingana nem at mule pe hele lange hei nenge nauuelele kue matana pe mene teua Petrus la.

<sup>17</sup> Ol pe hei neu onteia Petrus, “Non neu nena none laka iong pule, ae?”

Pe Petrus tuacholia ke teke, “Ero! iau ero i!”

<sup>18</sup> Iok, palpal hussu mur pe hekuleileinga ana hana mur temes ke te alelel oan iange kileng lololo. Pe Petrus mes luluch nge iri ke alelel oan pule.

*Tunginga Ana Hana Mur Aria Soke Onteia Iesus*  
(Mat 26:59-66; Mak 14:55-64; Luk 22:66-71)

<sup>19</sup> Pe tunginga ana hana mur aria soke onteia Iesus nge nena hana mur pe nga hetoro nganngana mur.

<sup>20</sup> Pe Iesus tuacholia ke teke, “Iau, e hetottoro nga mallaha nga hulua lochloch mataria. E hetottoro nga hengetoro ana pele pe nga NeHalang nena pele palaungana nenge Iuta mur te eukiraurau ia. Pe e heleia helenga e nga kileng e nge talkome ero. <sup>21</sup> Pe pomerei nenge o onteia iau? O onteia iri nenge te longe lek helenga iange iri te eteia utar nenge e heleia.”

<sup>22</sup> Iesus hele ke mau pe palpal hussu e tepele i nga hengene pe hele, “Pomerei nenge o heleia tunginga ana hana mur aria soke ke pomam?”

<sup>23</sup> Pe Iesus tuacholia ke teke, “Nenge teke e heleia ute e nge poreke iok, o hele hote lange hulua nemur. Pe nenge teke e heleia ure nenge manmanna, pomerei nenge o tepele iau?”

<sup>24</sup> Ol pe Anas kulosia Iesus lange Kaipas pe rur tu hite penna kura.

*Petrus Channanga Henai pe Hemol Ngana*  
(Mat 26:71-75; Mak 14:69-72; Luk 22:58-62)

<sup>25</sup> Pe Simon Petrus mes ke alelel oan pe te onteia i, “Non neu nena none laka iong pule, ae?”

Pe Petrus channanga pe hele, “Ero, iau ero i.”

<sup>26</sup> Petrus hele ke mau pe tunginga ana hana mur aria soke nena none tu lamau pule. Non neu alona laka non nenge Petrus pasasal hote talngana. Ana non lohaka pe hele lange Petrus,

“E naue iong pule nge otu luluch nge Iesus nga ae oliua ana ume nem.”

<sup>27</sup> Pe Petrus channanga mule pule. Pe nga etue neu pengpeng pareo tang sapele.

*Te Mene Iesus Lange Ne Pilatus*  
(Mat 27:1-2, 11-14; Mak 15:1-5; Luk 23:1-5)

<sup>28</sup> Nga uach uruna toto te mene hote Iesus nga ne Kaipas nena pele pe te laia i nga non soke nenge Rom nena pele. Pe Iuta mur teteu la ero iange non Rom neu, ne Pilatus, i Iuta ero. Pe nenge te teke teu la lape singiria muna nga NeHalang matana pe lape te ngaua ngaunga nenga In-gatoto ero ol. <sup>29</sup> Ol pe ne Pilatus i hot la pe ontei, “Huna nga utar toto nenge a mene non nei at nge iau?”

<sup>30</sup> Pe iri te tuacholia ke te teke, “Nenge teke non nei poia poinga poreke ngana e ero lape mo mene i at nge iong ero.”

<sup>31</sup> Pe ne Pilatus hele, “Imo sipomo a mene pe a amnei teu langa nena poinga mur. Pe a poia ke a nanasia lemo hotonga mur.”

Pe iri te hele, “Imem, heo ngana nge mo hune mele ke mete.” <sup>32</sup> Reria helenga nemur pete tote Iesus nena helenga nenge hele talue ke ulolo nenge Rom mur lape te hune i.

<sup>33</sup> Ol pe ne Pilatus i teu la mule nga pele palaungana neu pe iua Iesus pe onteia i ke teke, “Iuta mur aria soke ma iong mam ae?”

<sup>34</sup> Pe Iesus onteia i, “Helenga nem lohot nge iong sipom ma mele hel te heleia iau lange iong?”

<sup>35</sup> Pe ne Pilatus tuacholia ke teke, “Iong mam o teke iau Iuta kai ae? Lem kileng nganangana mur pe lem tunginga ana hana papalauna mur laka nenge te mene iong at nge iau. Iong mam o poia utar toto e?”

<sup>36</sup> Pe Iesus hele, “Iau, lek naualanga pe nekinga ich nei ana ero. Toinge lek naualanga pe nekinga tunga ich nei lape lek hana mur nenge te umume nge iau, tepal pe poi ele Iuta mur nge

te laua iau. Pe ero. Lek naualanga pe nekinga ich nei ana ero.”

<sup>37</sup> Ol pe ne Pilatus ontei, “Ke hehei pe hana aria naungaala ana non ma iong mam ae!?”

Pe Iesus tuacholia, “Lem helenga nem manmanna. Hehei pe hana aria naungaala ana non koi iau. Pe nga nem mana hetak hoe iau pe eat nga ich nei ke e hele hote helenga manmanna ngana. Pe iri lochloch nenge te longo lala nga helenga manmanna ngana mur te longo atat nge iau.”

<sup>38</sup> Pe ne Pilatus ontei, “Helenga manmanna ngana mam i utar ia?”

### *Ne Pilatus Hele Ke Te Heon Heke Iesus Nga Manga Toto*

*(Mat 27:15-31; Mak 15:6-20; Luk 23:13-25)*

Ol pe ne Pilatus i hot mule lange Iuta mur pe hele, “Iau, e hottaua ute e nge non nei poia ke poreke ero. <sup>39</sup> Nga sokoko lochloch nga ngaunga matana nenga Inगतoto ana etue, e tung hotote none nga tuele au ngana lange imo. Poinga nem e poia ke nanas urume lemo poinga. Lememo ke e tung hote Iuta mur aria naungaala ana non, ae?”

<sup>40</sup> Pe iri alngaria la mule, “Ero, i ero! O tung hote Parapas at nge imem!” Pe Parapas i non nenge hunun hana pe kemkeme.

## 19

<sup>1</sup> Ne Pilatus hele ke palinga hel ana hana mur te nosia Iesus. <sup>2</sup> Pe te helule rur nge matantana nenge pomanga pale pe tetal heke nga palpalna pe te heron heke hengeron kunkun ngana nge i. <sup>3</sup> Pe emule mana te songlele ia i ke te teke, “Masin! Iuta mur aria naungaala ana non! Lape omes ke kerkereng ol!” Pe te tepele nga ramana.

<sup>4</sup> Ol pe ne Pilatus i hot la mule pe hele lange Iuta mur, “A longo at! Lape e hele ke te mene hote i at nge imo ke anau nge i. Ke lape a eteia nge iau e hottaua poinga poreke ngana e

nge poia ero.” <sup>5</sup> Iok, Iesus i hot la luluch nga rur matantana ngana nenge tetal heke nga palpalna pe hengeron kunkun ngana neu. Pe ne Pilatus hele lange iri, “Anau at ana non koi!”

<sup>6</sup> Pe tunginga ana hana mur aria papalauna mur pe palpal hussu mur te naue Iesus pe alngaria ke te teke, “O heon heke i nga manga toto! O heon heke i nga manga toto!”

Pe ne Pilatus tuacholia lange iri ke teke, “Imo sipomo a mene i pe a heon heke i nga manga toto. Lange iau, e hottaua poinga poreke ngana e nge poia ero.”

<sup>7</sup> Pe Iuta mur te hele, “Imem lemem hotonga e tu. Pe mo teke non nem mete urume hotonga nem hele ngana iange i sipona hele ke teke i NeHalang Tuna.”

<sup>8</sup> Ne Pilatus longe hana nemur re-ria helenga pe matau toto. <sup>9</sup> Ol pe iteu la mule nga pele palaungana neu pe ontei mule Iesus, “Iong mam lem langai toto?”

Pe Iesus heleia helenga e ero. <sup>10</sup> Pe ne Pilatus hele, “Pomerei nenge o tuacholia iau ero? Iau lek kerkerenga nenge e hele ala am pe lek kerkerenga nenge e hele ke palinga hel ana hana mur te heon heke iong nga manga toto. O eteia nei ero kai?”

<sup>11</sup> Pe Iesus hele, “NeHalang tunge kerkerenga nem lange iong. Pe nenge teke ero mele pele nge tunge iau lange iong ero. Pe non nenge tunge iau lange iong, na poinga poreke ngana mur ele haka toto nga lem poinga poreke ngana mur.”

<sup>12</sup> Ne Pilatus longe helenga nei pe letena tuanin rara ke teke hele ala Iesus ana. Pe ero Iuta mur alngaria ke te teke, “Nenge teke o hele ala ana lape neingam ne Kaesa ero ol. Ne Kaesa nena ngarang toto laka mele nenge hele ke teke i naungaala ana non.”

<sup>13</sup> Ne Pilatus longe helenga nei pe mene hote Iesus lange hot pe la ke

are nga arenga nenge te amnei urum-rume helenga mur. Nga kileng unne nenge te hetue ke Um Arenga. Nga helenga Hipru te hetue ke Kapata. <sup>14</sup> Iok, ngaunga matana nenge Inga-toto ana etue mam pe lohot. Pe etue neu i etue nenge te tatalo elele ure mur pe lala ke sinanga luana lo. Pe ne Pilatus hele lange Iuta mur, "Anau at amo naungaala ana non koi."

<sup>15</sup> Pe iri alngaria ke te teke, "A mene hote i kela aheon heke nga manga toto."

Pe ne Pilatus onteia iri, "A teke e heon heke amo naungaala ana non nga manga toto?"

Pe tunginga ana hana mur aria papalauna mur te tuacholia ke te teke, "Imem emem naungaala ana none ero ol, ne Kaesa i toro mana."

<sup>16</sup> Pomalam ne Pilatus tunge Iesus lange iri ke te heon heke nga manga toto.

*Palinga Hel Ana Hana Mur Te Heon Heke Iesus Nga Manga Toto*  
(Mat 27:32-44; Mak 15:21-32; Luk 23:26-43)

Ol pe Palinga hel ana hana mur te mene Iesus kela. <sup>17</sup> Pe Iesus i sipona takisia ana manga toto kela nga Kittol ana kileng (nenge iri Hipru te hetue ke Kolkota.) <sup>18</sup> Nga lamau te heon heke i nga manga toto pe te heone hana nai pule nga Iesus ilina ele pe ele. Elle heon nga pen tamal-mal pe e nga pen hoihoi pe Iesus nga tunangana. <sup>19</sup> Pe ne Pilatus hele ke tehas ia helenga toto e pe tetal heke nga manga toto. Helenga toto neu hele ke pomai, "IESUS NENGE NASARET, IUTA MUR ARIA NAUNGAALA ANA NON." <sup>20</sup> Helenga toto neu tehas ia nga helenga Hipru pe helenga Latin pe helenga Krik. Pe hulua halang te sisia helenga neu iange kileng nenge te heon heke Iesus ia, tu rochroi mana nga tuele tana palaungana neu. <sup>21</sup> Ol pe tunginga ana hana mur aria papalauna mur te hele lange ne Pilatus ke te teke, "Iong ohas ia ke 'Tuta mur aria naungaala

ana non'. Pe imem mo teke ohas ia ke pomai koi, 'Non nei hele ke teke i Iuta mur aria naungaala ana non.'"

<sup>22</sup> Pe ne Pilatus hele, "Utar nenge e hele ke tehas ia tu ke pomalalom."

<sup>23</sup> Iok, palinga hel ana hana mur te hero hite Iesus nga manga toto ke het pe te mene nena hengeron mur nenge hot ana pe te heronge nge iri. Pe te mene nena hengeron nenge teu ana pule nenge ana simanga nga ilina ero.

<sup>24</sup> Pe te hele tele hel nge iri ke te teke, "Nena hengeron nei lape ta chachia ero. Ta poia hesalanginga e ke henonou hote non tei nenge lape mene ke nena ia."

Poinga nei lohot ke pete tote NeHalang nena helenga nenge masio nga alalaha ke ulolo nenge hele ke teke, "Te mene lek hengeron mur nenge hot ana pe te heronge nge iri.

Pe te poia hesalanginga e nga lek hengeron nenge teu ana ke henonou hote non tei nenge lape mene ke nena ia."

Ke palinga hel ana hana mur te poia poinga nei.

<sup>25</sup> Iok, Iesus tana pe tana tina pe Maria nenge Klopas nehei pe Maria nenge Maktala, temes rochroi nga manga toto nenge Iesus heon haka ia.

<sup>26</sup> Pe Iesus nena non nenge mutena tau tote mes pule. Ol pe Iesus naue i pe hele lange tana ke teke, "Etak o naue i ke pomanga tumia." <sup>27</sup> Pe pule Iesus hele lange nena non neu, "Pe iong o naue i ke pomanga tamia." Ke nga etue neu pengpeng Iesus nena non neu mene he Maria langa nena pele ke nauele i.

*Iesus Mete*  
(Mat 27:45-56; Mak 15:33-41; Luk 23:44-49)

<sup>28</sup> Iok, Iesus eteia ke ure lochloch ngana umeia ke het lo. Ol pe hele, "E teke ein ech." Iesus nena helenga nei lohot ke pete tote NeHalang nena helenga nenge masio nga alalaha ke ulolo.



<sup>29</sup> Kaliu e nge muta ia uain ehech ngana ma. Pe te mene ute nge makuk pe te panun teua la ke rumia uain neu. Ke het pe te kale taua nga memeta kina pe tetul heke langa Iesus hanna. <sup>30</sup> Iesus inia uain neu ke het pe hele, “Het lo.” Ol pe Iesus palpalna tuakolo sio pe ngana iuch hot sapele.

<sup>31</sup> Iok, ngaunga matana nenga In-gatoto ana etue mam pe lohot. Pe etue neu i etue nenge te tatalo elele ure mur. Pe Iuta mur aria papalauna mur lemeria ero hana nge te heon nga manga toto nga etue palaungana neu. Pomalam te onteia ne Pilatus ke te teke, “O longele imem ke mo pal hoa hana nemur aperia kina pe mo mene sue koluria mur nga manga toto.” <sup>32</sup> Ol pe palinga hel ana hana mur tela tala nge hana nai nem pe te pal hoa aperia kina ke te mete ke ueiuei. <sup>33</sup> Iok, te teke tela nge Iesus pe tenau pe mete lo. Pomalam te pal hoa apena kina ero. <sup>34</sup> Pe palinga hel ana none tua teua io nga Iesus alalina. Ol pe Iesus eina pe ech te pasiling hot. <sup>35</sup> Mele nenge naue ure nei nge lohot heleia ke teke ure nei lohot ke manmanna. Pe eteia ke teke i hele ke manmanna. Ke imo pule lape letemo manmanna. <sup>36</sup> Ure nemur te lohot ke pete tote NeHalang nena helenga nenge masio nga alalaha ke ulolo, nenge hele ke teke, “Lape te pal hoa kina e ero.” <sup>37</sup> Pe NeHalang nena helenga e pule nge masio nga alalaha lo hele ke teke, “Lape tenau lange non nenge tetue ana io.”

*Tealo Hite Iesus Koluna*  
(*Mat 27:57-61; Mak 15:42-47; Luk 23:50-56*)

<sup>38</sup> Iok, urelu lochloch ngana nemur te lohot ke ulo pe Iosep nenge nena nge Arimatea lake ontei tote Iesus koluna nge ne Pilatus ke teke alo hite. Pe ne Pilatus longala. Pomalam, Iosep lake mene sue Iesus koluna. Iosep i Iesus nena non ia pule pe talkome letena manmanna ngana

pe heleia lange mele ero toto iange mataua Iuta mur aria papalauna mur hel pule. <sup>39</sup> Pe Nikotemus i non nenge lake naue Iesus nga miliko nga etuene lo, i pule la luluch nge Iosep. Ana non mene sini ana monri nge meena toto. Sini nemur teume hote ae nai eiria nge te heluluch tele pe inangaria ehech toto. <sup>40</sup> Iri nai te mene Iesus koluna pe te ruchite nga ruchinga hit hussu ngana. Pe teun hite Iesus koluna ana sini nemur. Te poia ke te nanasia poinga nenge Iuta mur te popoia nga aria pum mur, nenge tealoo hitite iri. <sup>41</sup> Iok, metenga ana ich unne tunga kileng nenge te heon haka Iesus ia. Pe polo heueu ngana e nge mele koluna mateu ia ero kura, tunga metenga ana ich unne neu. <sup>42</sup> Pe tetal teu mene Iesus koluna nga polo neu iange polo neu tu ke rochroi mana. Pe pule etue neu i etue nenge te tatalo elele ure mur nga Israel mur aria etue palaungana nenge te hetalaulau ia.

## 20

*Iesus Maul Haka Mule*  
(*Mat 28:1-8; Mak 16:1-8; Luk 24:1-12*)

<sup>1</sup> Iok, nga Sante nga uach uruna toto kileng nonenone kura pe Maria Mantalena oala ke langa polo nenge Iesus koluna mateu ia. Oala kela pe um nenge tetal ele nga polo hanna tunga munna ero ol. <sup>2</sup> Ana hei naue ke mau pe song langa kileng nenge Simon Petrus iri nai Iesus nena non nenge mutena tau tote te tutu ia. Song la pe hele, “Te hemou hote Non Soke koluna lo pe mo eteia tetal ngaria ia ero.”

<sup>3</sup> Ol pe Petrus iri nai i nenge Iesus mutena tau tote neu, te song sapele ke tela nga polo nenge Iesus koluna mateu ia. <sup>4</sup> Te song ke te lala pe Iesus nena non nenge mutena tau tote ris tote Petrus pe song kela sauhot tala, <sup>5</sup> pe teu langa polo ero. Tatuch sio ke teke nau pe es mene

ruchinga hit hussu ngana mur nge tema. <sup>6</sup> Pe Simon Petrus at ke sauhot pe teu la pengpeng nga polo pe naue ruchinga hit hussu ngana nemur nge tema. <sup>7</sup> Pe nenge te ruch hit Iesus palpalna ia, te loua ke ma ke altoto nga ruchinga hit hussu ngana nemur. <sup>8</sup> Iok, Iesus nena non nenge sauhot tala i pule nanas teu la. Teu la pe naue ure nemur pe letena manmanna. <sup>9</sup> NeHalang nena helenga nenge masio nga alalaha ke ulolo hele ke teke, "Iesus lape maul haka mule nga metenga." Helenga nei mallaha nge iri ero kura. <sup>10</sup> Ol pe iri nai te lohaka pe tela mule nga tetu ngaria.

*Iesus Lohot Nge Maria Mantalena  
(Mat 28:9-10; Mak 16:9-11)*

<sup>11</sup> Pe Maria mes ke tangtang nga polo hanna ol. Pe tatuch sio ke teke nau teu la, <sup>12</sup> pe naue angkelo nai nge reria hengeron hussu pe teare nga Iesus koluna ma ngana. Elle are nga Iesus palpalna ma ngana pe elle are nga Iesus apena ma ngana. <sup>13</sup> Pe te onteia hei neu, "O tangtang ia utar?" Pe hei neu hele, "E tangtang ia ak Soke koluna, ngana i mele hel te hemou hote pe e eteia tetal ngaria ia i ero koi." <sup>14</sup> Ana hei hele ke mau pe ralele pe naue Iesus nge mes pe leklege i.

<sup>15</sup> Ol pe Iesus onteia i, "O tangtang ia utar? Pe o tango rerere itei?"

Pe hei neu teke ma non nenge nauelele metenga ana ich unne neu ke hele lange i ke teke, "Kole, nenge teke o hemou hote Iesus koluna, o heleia at nge iau pe mola ke mo lolo mule at."

<sup>16</sup> Pe Iesus hetue hei neu ene, "He Maria!"

Pe Maria ralele lange Iesus pe hele nga helenga Hipru ke teke, "*Raponi!*" (Helenga nei luna, "Hetoronga.")

<sup>17</sup> Ol pe Iesus hele lange i, "Ora at nge iau ero iange e haka lange Temek ero kura. Ola ke o hele lange titik mur nenge leteria manmanna nge iau ke o

teke, iau e haka lala nge Temek nenge iri pule Temeria pe i ak Soke ia nenge iri pule aria Soke."

<sup>18</sup> Iok laol, Maria Mantalena lange Iesus nena hana mur pe hele ke teke, "E naue Non Soke lo." Pe nene ure nemur nenge Iesus heleia lange i nge iri pule.

*Iesus Lohot Nge Nena Hana Mur  
Nenge Te Nananasia I*

*(Mat 28:16-20; Mak 16:14-18; Luk 24:36-49)*

<sup>19</sup> Iok, nga Sante nga ulei Iesus nena hana mur te eukirau nga pele e pe tepiu ele iri ke kerkereng toto iange te mataua Iuta mur aria papalauna mur. Pe Iesus lohot mana ke mes nga tunangaria pe hele ke teke, "E hetalaulau amo ke letemo maluch sio ke nek mule." <sup>20</sup> Iesus hele ke pomau ke het pe heteia penna mur pe alalina lange iri. Iesus nena hana mur leteria iech toto nge tenau mule i.

<sup>21</sup> Pe Iesus hele mule lange iri, "E hetalaulau amo ke letemo maluch sio ke nek mule. Temek kulosia iau ke eat pomalam mana lape e kulosia imo ke ala." <sup>22</sup> Iesus hele ke mau ke het pe ula hote eingana lange iri pe hele, "A mene Opepengpeng." <sup>23</sup> Nenge teke a sau hehei pe hana reria poinga poreke ngana ke te lasu toto, NeHalang lape poia ke pomalam pule. Pe nenge teke a sau hehei pe hana reria poinga poreke ngana mur ero, poinga poreke ngana nemur lape tetu kura."

*Iesus Hetei Hote I Lange Tomas*

<sup>24</sup> Iok, Iesus nena hana mur iri analoch pe nai pe elle nge iri ene Tomas (nenge tehau keke ke ene Titimus). Pe nga etue nenge Iesus lohot nge nena hana mur Tomas tunga etue neu ero. <sup>25</sup> Ol pe pekngana mur tela pe te hele lange i ke te teke, "Mo naue Non Soke lo!"

Pe Tomas hele lange iri, "Imo a teke a naue Iesus pe iau letek manmanna nga lemo helenga nemur ero. Nenge

teke e naue kirum munna nga penna mur pe io munna nga alalina pe e rahite iri lape letek manmanna.”

<sup>26</sup> Iok, etue iri rahtele nai mule nga hoena Iesus nena hana mur tetu teu mule nga pele letena. Nga etue neu Tomas tu luluch nge iri ol. Pe tepiu ele pele matana mur ke kerkereng toto. Pe Iesus at mana ke mes nga tunangaria pe hele, “E hetalaulau amo ke letemo maluch sio ke nek mule.”  
<sup>27</sup> Ol pe Iesus hele lange Tomas, “O talue perim kukana at nga kirum munna nenga perik pe onau. Pe otul hote perim pe opoi teua nga alalik. Letem manmanna pe letem nachnai ero ol.”

<sup>28</sup> Pe Tomas tucholia pe hele ke teke, “Iong NeHalang nenge e heto hekeke pe ak Non Soke iong!”

<sup>29</sup> Ol pe Iesus hele lange i ke teke, “Urana hatong! Iong o naue iau pe letem manmanna pe iri nenge te kolkol ia iau pe leteria manmanna lape te iech toto.”

### *Pomerei Toto Nenge Ioanes Has Hote Alallaha Nei?*

<sup>30</sup> Tehas hote alalaha nei iange nga etue nenge Iesus tu luluch nge nena hana mur, poi hote merakulo mur nge halang toto. Pe ure nemur nenge Iesus poi hote iri nem, halang tehas sue nga alalaha nei ero. <sup>31</sup> Pe nemur nenge ehas sue iri nei, nenge poia ita ke letera manmanna ke Iesus i NeHalang Tuna pe i Kristus. Ke nenge teke letera manmanna nga nem, lape ta mene maulinga ke koko nga Iesus ene.

## 21

### *Iesus Hetei Hote I Nge Nena Hana Mur Nge Kalelea*

<sup>1</sup> Iok, nga hoena Iesus hetei hot mule nge nena hana mur nga ech nge Kalelea. (ech nem ene e pule Tiperius) Pe hetei hot ngana ia i poi ke pomai: <sup>2</sup> Simon Petrus pe Tomas (nenge tehau keke ke ene Titimus) pe Nataniel (nenge nena nge Kana

nge Kalelea) pe ne Sepeti tutuna mur pe Iesus nena hana nai pule, tetu ke muria elle nga lamau. <sup>3</sup> Pe Simon Petrus hele lange iri ke teke, “Iau lape e lohok kela euas.” Pe iri te hele, “Mo koko nge iong ke itaul ta uas.” Ol pe tela ke te lohaka sapele nga sulang. Pe nga miliko neu ruo e ha nga aria hoat ero toto.

<sup>4</sup> Pe nga uach uruna kileng matale sisio pe Iesus mes nga peipei nga ech ilina pe nena hana mur te naue pe te lekleke i.

<sup>5</sup> Ol pe Iesus ontei hot lange iri ke teke, “Hana, a uasia ruo hel kau?”

Pe iri te tuachol ia ke teke, “Ero toto i!”

<sup>6</sup> Pe Iesus hele lange iri, “A hesue amo hoat lakou nga sulang ilina ele nenga pen tamalmal. Nga lamam lape aole ruo hel.” Iok, te hesue hoat nem la pe te alker nge tetak haka mule iange ruo halang toto teha nga hoat.

<sup>7</sup> Pe Iesus nena non nenge mutena tau totote hele lange Petrus, “Non Soke laka nenge hele hot atat nge ita nem!” Nga etue nenge Simon Petrus longe non neu nge hele ke teke “Non Soke laka nenge hele hot atat nge ita nem,” ueiuei mana kale loua nena hengeron nenge hot ana nga luana (iange i haka hot tele ke ulolo) pe tamu sio nga ech pe pasu sio ke langa peipei. <sup>8</sup> Pe pekngana mur teote sulang pe teole hoat luluch nga ruo ke tesio langa peipei iange malang nenge sio langa peipei sase ero. Sase ngana ana lome iri ana non kina lime mana. (100 mita) <sup>9</sup> Iok, tela ke temes nga peipei pe te naue oan ngingina ngana. Pe nga oan matana te naue ruo hel nge makmak pe ngaunga hel tema pule.

<sup>10</sup> Ol pe Iesus hele lange iri ke teke, “Ruo nenge aole iri nem, a mene hel at.”

<sup>11</sup> Iok, Simon Petrus tamu haka nga sulang pe halaua pekngana mur ke teole sue hoat ke langa peipei. Pe hoat neu muta ia ruo papalaungana

mur nge iri ana non kina rahtele nai pe analoch pe mol (153). Ruo nemur iri halang pe hoat neu chach poreke. <sup>12</sup> Ol pe Iesus hele lange iri, “Aiat ke angau ol.” Iesus nena hana mur te eteia ke i Non Soke. Pe iri te here tau helia onteinga nenge, lape elle nge iri ontei lil hote i ke teke, “Ia iong itei mam?” <sup>13</sup> Ol pe Iesus lake mene ngaunga nem pe tunge lange iri pe poia ruo ke pomalam pule. <sup>14</sup> Ke Iesus maul haka mule nga metenga ke ulolo. Pe hetei hot ngana ia i lange nena hana mur hemol ngana koi nga nenge nei.

#### *Iesus Ontei Hote Petrus*

<sup>15</sup> Iok, te ngau ke het pe Iesus onteia Simon Petrus, “Simon, iong ne Ioanes tuna. Imo lochloch ngana nei mutemo taua iau, pe iong mutem tau tote iau ma ero?”

Pe Petrus tuacholia, “Oe Non Soke. O eteia ke iau mutek tau tote Iong.”

Pe Iesus hele lange i ke teke, “O nauele lek hana mur ke nek ke pomanga o nauele sipsip mur.” <sup>16</sup> Pe Iesus ontei henai ngana, “Simon iong ne Ioanes tuna. Mutem tau tote iau ma ero?”

Pe Simon tuacholia, “Oe Non Soke, o eteia ke iau mutek tau tote Iong.”

Pe Iesus hele lange i ke teke, “Onek hite lek hana mur ke pomanga onek hite sipsip mur.” <sup>17</sup> Pe Iesus ontei hemol ngana ke teke, “Simon iong ne Ioanes tuna. Mutem tau tote iau ma ero?”

Pe Petrus letena huna iange Iesus ontei hemol ia i ke ulolo ke teke. “Mutem taua iau ma ero?” Ol pe Petrus hele, “Non Soke Iong o eteia ure lochloch ngana pe o eteia ke mutek tau tote iong!”

Pe Iesus hele lange i ke teke, “O nauele lek hana mur ke nek ke pomanga o nauele sipsip mur. <sup>18</sup> Pe e hele ke manmanna toto lange iong; Nga iong lomele ngam iong sipom o hemele iong pe oi ke ola nga lemlem ngam. Pe nga etue nenge o tuauna ol lape otul hote perim pe mele at

ke hemele iong. Pe lape mene iong langa kileng nenge lemlem ero nge ola ia.” <sup>19</sup> (Petrus mete ngana lape lohot ke mau kou nga Iesus hele ngana neu. Pe nga nem lape te heto heke tote NeHalang ene.) Iesus hele ke mau ke het pe hele, “Oi at ke o nanasia iau.”

#### *Iesus Heleia Nena Non Nenge Mutena Tautote*

<sup>20</sup> Ol pe Petrus ralele pe naue Iesus nena non nenge mutena tau totote nge nananasia iri. (I laka nenge matu haka toto nge Iesus nga etue nenge te ngaungau pe onteia i ke teke, “Non Soke itei toto nenge lape tung heke iong langa hana porekreke ngana mur peria?”) <sup>21</sup> Ke Petrus naue i pe onteia Iesus ke teke, “Non Soke, pe non neu lape te poia i ke pomerei?”

<sup>22</sup> Pe Iesus tuacholia ke teke, “Nenge teke lemek non nem lape tu ke maulul kela het nga etue nenge eat mule. Pe pomerei nenge letem una sakilil nga ure nei? O iat ke o nanasia iau!” <sup>23</sup> Ol pe Iesus nena hana mur nenge te nananas ia i, iri halang te longe pe te hele ke te teke Iesus nena non nem lape mete ero. Helenga nenge non nem lape mete ero Iesus heleia ero. Iesus hele mana ke teke, “Nenge teke lemek non nem lape tu ke maulul kela het nga etue nenge eat mule. Pe pomerei nenge letem huna sakilil nga ure nei?”

<sup>24</sup> Iesus nena non nenge mutena tau tote esia ure lochloch ngana nei pe heleia helenga nemur pe has sue iri. Pe ita ta eteia ke nena helenga nemur manmanna.

#### *Iesus Poia Ure Nge Halang Toto*

<sup>25</sup> Iesus poia ure lochloch ngana hel pule. Pe nenge teke tehas sue ure lochloch ngana nemur nga alalaha, iau e teke ich nei kino mana pe alalaha nemur lape muria ero nge tema ia.



## Hekulkulonga Mur Aria Ume

### *Apostel Mur Aria Ume*

<sup>1</sup> Oe, Teopilos mur, iau Lukas koi ehas ia alalaha nei lange imo pe e teke e hele mule lange imo. Nga lek alalaha nenge ehas tele lange imo, e has urume ure lochloch ngana nenge Iesus popoia pe hetottore nga etue nenge talune ana ume, <sup>2</sup> kela het nga etue nenge haka langa lut nga tapa. Ana non haka langa lut nga tapa ero kura pe Opepengpeng halaua i ke hele lange nena hana mur nenge hesilei hote iri. Pe i hele urume reria ume nenge lape te poia. <sup>3</sup> Iesus mete ke ulolo pe lohot mulmule nge nena hana mur ke etue iri ana non kina nai (40). Pe nga etue nemur, popoia ure halang ke te esia pe leteria manmanna ke Iesus maul haka mule nga ana metenga lo. Nena hana mur te esia i pe heleia NeHalang nena naualanga pe nekinga lange iri. <sup>4</sup> Nga etue nenge Iesus tu luluch nge iri kura pe tunge helenga kerkereng ngana nei lange iri ke teke, “Atu nge Ierusalem mukam ke a kulele tunginga nenge e hele ia lange imo lo. Tunginga nenge Temek heleia ke teke tunge lange imo. <sup>5</sup> Ioanes he-nune imo nga ech mana. Pe nge rou pongnai lape a mene henuninga nga Opepengpeng.”

### *NeHalang Mene Heke Iesus Langa Lut Nga Tapa*

<sup>6</sup> Iesus nena hana mur teare luluch nge i pe te onteia i ke te teke, “Non Soke, lape otal haka mule Israel kai? Nga etue nemai?”

<sup>7</sup> Pe Iesus hele, “Ure papalaungana nemur aria etue, Temek i sipona talue iri. Iange i nauele ure lochloch. Ke imo a eteia ure nemur te lohot ngaria ero. <sup>8</sup> Pe nga etue nenge

Opepengpeng sio at nge imo, lape a mene kerkerenga nenge a haliu hote iau lange hehei pe hana lochloch. Ke lape a haliu nge Ierusalem pe nge Iutea lochloch pe nge Samaria pe nga kileng lochloch ngana nga ich.” <sup>9</sup> Iesus helele kura pe NeHalang mene heke i ke la sapele nga lut nga tapa. Pe hana nemur temes ke tenau ala tote i kela lele teu nga ulu.

<sup>10</sup> Hana nemur mataria tu mana nga lut kura pe hana nai nge reria hengeron hussu te lohot ke temes luluch nge iri. <sup>11</sup> Pe te hele, “Imo hana nenge Kalelea, pomere nenge ames ke anau haka lamana nga tapa mam? A esia Iesus laka NeHalang mene heke i ke la nga lut nga tapa lo! Pe at mule ngana, lape pomalam mana nga haka la ngana nem.”

### *Mateas Mene Iutas Munna*

<sup>12</sup> Ure nemur te lohotot pe Iesus nena hana mur tetu nga hengene nenge Oliua. Ke het pe tei sio ke tela mule nge Ierusalem. Pe kue sase ngana nenge lange Ierusalem ana lome iri ana non kina iri lime iri analoch. (kilomita elle) <sup>13</sup> Iok laol, tei teu lange Ierusalem pe tei haka langa lut nga pele letena unne nenge te tutuia. Iri lochloch eria koi: Petrus, Ioanes, Ieims, Antreas, Pilipus, Tomas, Patolomius, Mateus, Ieims nenge Alpeus tuna, Simon nenge seilil kina, pe Iutas nenge Ieims tuna. <sup>14</sup> Iri lochloch te eukirau ke kokoes mana ke te hetalaulau. Iri ul hehei nemur pe Maria nenge Iesus tana, pe Iesus titina mur.

<sup>15</sup> Nga etue hel nga hoena iri lochloch ngana nenge leteria manmanna te eukirau. Iri nenge te lohot, iri ana non kina iri rahtele elle (120). Pe Petrus mes haka pe hele, <sup>16</sup> “Titik mur pe liliuk mur, imo a eteia poinga nenge Iutas poia nem. NeHalang nena helenga lohot ke manmanna lo. Ke Opepengpeng hele hote nga Teuit anna ke teke, Iutas lape i non

**1:1:** Luk 1:3    **1:2:** Mak 16:19; Luk 24:49-51    **1:3:** Luk 24:36-49; Ume 10:41    **1:4:** Luk 24:49; Ioa 14:16-17; Ume 2:33    **1:5:** Mat 3:11    **1:6:** Luk 24:21    **1:7:** Mak 13:32    **1:8:** Mat 28:19; Luk 24:48    **1:11:** Mat 26:64; Luk 21:27    **1:12:** Luk 24:50-53    **1:13:** Mat 10:2-4    **1:16:** Psa 41:9

nenge henonou hote hana nenge te laua Iesus. <sup>17</sup> Nga tele ngana, imem pekngamem Iutas pe i rahite ume elle mana nenge pomange imem nei.”

<sup>18</sup> (Iok Iutas poia poinga poreke ngana nem pe te olia i nga umtutuna. Pe mene umtutuna nem pela olia ich unne. Pe nga ich unne nem, ana non losio ke mete pe sana chach pe makanna pararai hot. <sup>19</sup> Hulua lochloch ngana nenge tetu nge Ierusalem, te longe pe te hetue kileng neu nga reria helenga ke ene Akaltama. Luna: Eina lele ich.)

<sup>20</sup> Pe Petrus hele mule, “Helenga nenge Teuit has sue nga alalaha nenge Sam hele ke pomai,

“‘Lape na pele nganngana ero pe mele tuia ero.’”

Pe hasinga e pule hele ke teke,

“‘Mele lape mene munna nga ana ume.’”

<sup>21</sup> Ke pomlam lape ta henonou hote mele ke mene munna ol. Pe mele nem lape ta henonou hote nga iri hana nenge te i lululuch nge ita nga etue lochloch nenge Non Soke Iesus i luluch nge ita. <sup>22</sup> Talun ngana nga etue nenge Ioanes henunun, ke la het nga etue nenge NeHalang mene heke Iesus langa lut nga tapa.”

<sup>23</sup> Iok laol, te henonou hot ke hana nai. E ene Iosep nenge te hetue ke Pasapas (pe ene e pule Iastus). Pe e ene Mateas. <sup>24</sup> Ol pe te hetalaulau lange NeHalang ke pomai, “Non Soke iong o eteia utar nenge tuteu nga hulua lochloch leteria. Ke pomalam o hemallaha hote non elle nge iri nai nei ol, nenge o henonou hote <sup>25</sup> ke mene Iutas munna. Iange Iutas hile sue ume nei lo. Pe i kou lake amnei ana nga kileng unne nenge lape laia.”

<sup>26</sup> Laol pe te mene um nai nenge hana nai neu eria maia, pe te saua ana maelpa pe Mateas ene mahot ia. Pomalam tesis luluche i lange Iesus nena hana analoch pe elle neu, ke mene Iutas munna.

## 2

### *Opepengpeng Sio At Ngana*

<sup>1</sup> Pentekos ana etue at pe iri lochloch te eukirau ke muria elle. <sup>2</sup> Pe ueiuei mana ute sio at nga tapa pe alngana pomanga tuttula palaungana. Sio at pe hemute pele letena nenge te tuia. <sup>3</sup> Ol pe te esia ute hel nge pomanga oan remen ngana nge la ke rongo heke iri elle pe elle pe tu haka mana nga houngaria. <sup>4</sup> Te muta nga Opepengpeng pe te talun ke te hele nga helenga altoto ngana mur nenge tunge lange iri.

<sup>5</sup> Pe nge Ierusalem, Iuta mur hel nenge leteria metene NeHalang ke kokoes, te tu pule. Pe iri teat nga kileng lochloch ngana nga ich. <sup>6</sup> Te longe ure neu nge lohote pe teat ke te eukirau. Teat ke te eukirau pe te rura toto iange te longe hana nemur nge te helele nga kileng elle pe elle reria helenga mur pengpeng. <sup>7</sup> Ol pe ngaria lohote pe te hele, “Hana nemur reria nge Kalelea pe chauling mur ia iri. <sup>8</sup> Pe pomere nenge ta longe iri nge te hele nga ita sipora rera helenga mur mai? <sup>9</sup> Ita lochloch ngana nei ta at nga kileng nemur nge Patia pe nge Mitia, pe nge Ilam pe nga kileng nenge Mesopotamia pe nge Iuta pe nge Kapatosia pe nga kileng nenge Pontus pe Eisia pe nge <sup>10</sup> Prikia pe nge Pampilia pe nge Ekipto. Pe nga kileng nemur nenge Lipia nenge rochroi lange Sirini. Pe ara hel nge ita teat nge Rom. <sup>11</sup> (Iri nenge teat nge Rom, hel iri Iuta pengpeng nike. Pe hel, iri Iuta ero mukam pe nga hoena te lohote ke iri Iuta.) Pe ara hel nge ita teat nge Krit pe nge Arapia. Pe ita lochloch ngana ta longe hana nemur nge te heleia ure papalaungana nemur nenge NeHalang popoia iri. Pe te heleia ure nemur nga ita sipora rera helenga mur pengpeng.” <sup>12</sup> Ngaria lohote pe leteria lilil toto pe te ontei hel mulmule nge iri ke te teke, “Ure

nenge lohotot nemai, luna mere toto mai?”

<sup>13</sup> Pe hel tetua sal haka ke te teke, “Hana nemur tein iam.”

*Petrus Hemellehe Hulua Ramaria*

<sup>14</sup> Iok, Petrus mes haka luluch nge pekngana mur nenge analoch pe elle nem pe haliu ke palaungana toto lange hulua lochloch ngana ke teke, “Tuta mur pe imo lochloch ngana nenge atu nge Ierusalem, a longo at nge iau pe e hemallaha hote ure nenge te lohotot nei luna lange imo.

<sup>15</sup> Imo a teke hana nemur tein. Pe iri tein ero iam, iange kileng uach mana kura! <sup>16</sup> E hele lange imo pengpeng, ure nenge te lohotot nei, hetatalonga Ioel hele talue nge nike lo. Hele ke teke,

<sup>17</sup> “ NeHalang hele ke pomai koi; Etue nemur nga hoena nge te lohot tala nga etue hetala ngana, iau lape e tungge Opepengpeng ke rongo heke iri lochloch.

Tutummo mur tatamanna pe tutumo mur heheina, lape te haliu hote lek helenga mur.

Pe lape lemo lolomele mur, lape tenau operia ia ure mur pe amo hana papalauna mur, lape tema operia rara.

<sup>18</sup> Pe lek hekuleileinga ana non mur, manmanna toto ke te mene Opepengpeng nem pule, ke iri pule te haliu hote lek helenga mur.

Iri nenge tatamanna pe heheina pule.

<sup>19-20</sup> Pe lape epoi hote ana lala hel nga lut nga tapa ke pomai, lape chaia tua ero ol, pe kileng au mana.

Pe teio matana lape hul ke pomanga toho.

Pe lape epoi hote ana lala hel nge sio nga ich ke pomai, lape e heremenia kileng nga toho pe e poia kileng ke oan ngaulele pe kileng pulu ala mana.

Pe ure nemur lape te lohot tala

nga NeHalang ana etue nenge palaungana toto.

<sup>21</sup> Pe iri lochloch ngana nenge te tang la nge Non Soke ke halaua iri, lape tetu ke te maulul.’ ”

<sup>22</sup> Pe Petrus hele pule, “Imo hana nenge Israel, a longo at nga lek helenga. E teke e hele urume Iesus nenge Nasaret lange imo. Imo sipomo a eteia ume papalaungana pe lala mur nenge Iesus poi hote lange imo ke a esesia lo. Nga NeHalang lemene ngana toto, poia ure nemur ke te lohot ke pomalam. Lange i teke heneue imo ke a eteia ke i sipona kulos sue Iesus at. <sup>23</sup> Pe nga NeHalang lemene ngana, tung heke Iesus langa perimo ke pomanga i sipona letena tuanin hot ngana ia nge nike, pe heleia ke teke poia. Ke imo sipomo a hune Iesus nenge a tungge i langa hana poreke ngana mur peria ke te heon heke i ke mete. <sup>24</sup> Pe NeHalang hemaul heke mule Iesus nga metenga. Hile hote i ke mete sapele ero, iange kerkerenga pele nga metenga nakuna ero nge hekou sue Iesus. <sup>25</sup> Non Soke Teuit heleia Iesus ke pomai,

“ ‘Kokoes mana e esesia Non Soke. Pe ute pele ero nge heloiloi ia iau.

Lange ana non tu ke rochroi mana nge iau.

<sup>26</sup> Ke pomalam letek urana toto pe e hele ke e iech mana.

Pe pule singik nei lape tuke angala mana nge NeHalang.

<sup>27</sup> Lange NeHalang iong, o hile sio mene iau

ke etu nga hana nenge te metेरeria kileng ero.

Pe lape o hile sio mene lem non nge pengpeng

ke ma ke punich nga ich letena ero.

<sup>28</sup> Iong, o henonoua iau nga maulinga ana kue lo.

Ke lape o poia iau ke etu luluch nge iong

pe o poia iau ke e iech toto.’ ”

<sup>29</sup> Iok Petrus hele mule, “Titik mur e teke e hele hot pengpeng lange imo

nge rette Teuit. Ana non mete ke tealohite i lo. Pe ana polo tu luluch nge ita ke at nga etue nenge heueu nei. <sup>30</sup> Pe non soke Teuit nem i hetatalonga. Pe i eteia utar nenge NeHalang heleia ke teke poia. NeHalang talue helenga kerkereng ngana nge teke hemes heke Teuit nette e ke lohote i naungaala ana none, ke pomange Non Soke Teuit i sipona. <sup>31</sup> Iok, Non Soke Teuit eteia utar nenge NeHalang teke popoia, pomalam hele urume Mesias nem mau haka mule ngana ke teke, ana non lape tu ke lasus nga hana nenge te mete reria kileng ero. Pe pule lape koluna ma ke punich nga polo letena ero. <sup>32</sup> Ke Ne Iesus nei, ngana kou NeHalang hemaule heke mule i nga metenga lo. Ke imem lochloch ngana nei, Iesus mau haka mule pe at ke lohote nge imem. Ke ngana koi nenge mo hele hotote ure nemur, iange mo esia lo. <sup>33</sup> Ke Ne Iesus nem, ngana kou mau haka mule kela are nga Temene penna tamalmal lo. Pe mene Opepengpeng nga Temene penna lo. Ke pomanga Temene hele talaia lo ke teke tungelange i. Pe nena tunginga nenge hekulo sue at nge imem, ngana koi nenge a esesia pe a longlonge heueu nei.

<sup>34</sup> “Iange Non Soke Teuit haka langa lut nga tapa ero. Pe Iesus i toro mana haka langa lut nga tapa. Pe Non Soke Teuit hele ke pomai,

“ ‘Non Soke hele lange ak Non Soke ke pomai:

“O haka at ke oare lakoi nga ilik ele nenga perik tamalmal.

Oare lamai kela het nga etue nenge,

<sup>35</sup> e mene lem ngarang mur, ke e talue iri nga apem sana ene, ke apem ana manga mur ia iri.” ’

<sup>36</sup> “Ke imo hana nenge Israel, nenge nei a etei tote ol, iange Iesus nenge a heon heke i nem, NeHalang tal heke tote i ke i soke toto ol. Ke i Mesias nenge mene mule NeHalang

nena hana mur nenge hesilei hote iri lo.”

<sup>37</sup> Iok laol, Petrus na helenga nemur tua tote hehei pe hana leteria, ol pe hehei pe hana nemur te hele lange Petrus pe pekngana mur ke mai, “Oe atong mur, pe imem lape mopoi ke pomere mai ol?”

<sup>38</sup> Pe Petrus hele lange iri ke mai koi, teke, “Imo lochloch ngana nem, imo elle pe elle, a hulua letemo nga lemo poinga poreke ngana mur, pe a mene henuninga nga Iesus Krisus ene. Pomalam lape NeHalang letena ia imo nga lemo poinga poreke ngana mur. Pe lape a mene tunginga nenga Opepengpeng pule nenge NeHalang hekulo sue at nei. <sup>39</sup> NeHalang talue helenga kerkereng ngana lo, nenge teke tungelange Opepengpeng lange imo pe nge tutumo mur pe nge hulua lochloch ngana nenge tetu nga tau. Oe, tungelange iri nenge i sipona iua iri.”

<sup>40</sup> Pe Petrus hele hote helenga e pule lange iri pe hele ke kerkereng toto lange iri ke mai, “Anau ala amo, iange lape melmelenga palaungana nenge NeHalang tungelange hana poreke ngana mur, lape mene imo pule!” <sup>41</sup> Petrus na helenga tua tote leteria pe hulua halang toto leteria manmanna nga helenga nemur. Ke pomalam te mene henuninga. Ke hehei pe hana iri ana non kina lime iri analoch iri mol (3,000) te lohote ke Iesus nena hana mur nga etue neu pengpeng.

### *Iri Nenge Leteria Manmanna Nge Iesus Tetu Ngaria*

<sup>42</sup> Iok, iri lochloch ngana nenge te hulua leteria pe te mene henuninga nem, kokoes mana tela nge Iesus nena hana mur ke te hetottore iri. Pe tetu ngaria pomai, tenau hel mule nge iri ke pomanga iri lochloch titiria mur hel. Te eukirau pe te ngau ke elle pe te eukirau ke te hetalaulau.



<sup>43</sup> Pe Iesus nena hana mur tepoi hoto lala mur pe ure papalaungana mur pe hulua te esesia pe te rura toto. Pe haria kangkanga manmana. <sup>44</sup> Ke iri lochloch ngana nenge leteria manmanna nge Iesus tetu manmana ke muria elle, pe te tung helel aria ure. <sup>45</sup> Nenge teke tetu pe mele na ure unne sune mana, te mene reria ure hel langa ingala, nem pe mele hel te olia reria ich unne pe uruna te laia nge mele nem. <sup>46</sup> Kokoes mana tela ke te eukirau nga NeHalang nena pele palaungana. Pe pule tela ke te eukirau ke te ngau nga reria pele mur. Te ngau pe te iech pe te tung helia aria ngaunga. <sup>47</sup> Pe te heto heke NeHalang ene pe te iech toto iange hehei pe hana lochloch nenge Ierusalem, leteria urana mana nge iri. Nga etue lochloch, NeHalang hesilei hotote nena hana mur. Ke nga poinga nem mana, iri nenge NeHalang mene mule iri pe leteria manmanna nge Iesus, te lohot ke iri hulua toto.

### 3

#### *None Nge Apena Lul*

<sup>1</sup> Nga ulei nga etuene e, Petrus iri nai Ioanes tei teu lala nga NeHalang nena pele palaungana. Tei teu lalamau ke te hetalaulau ke pomanga kokoes te popoia lo. <sup>2</sup> Pe NeHalang nena pele palaungana neu matana, te hetue ke ene Rerere. Pe none nge apena lul nga i kino ngana nike arare lamau. Kokoes mana te takisia i ke te laia nga pele matana neu, ke longlong umtutuna nge hehei pe hana nge tei teu lala nga NeHalang nena pele palaungana neu. <sup>3</sup> Iok, esia Petrus iri nai Ioanes nge tei teu lala, pe long umtutuna lange iri. <sup>4</sup> Ol pe Petrus iri nai Ioanes te nachnei hite i, pe Petrus hele, “Onau at nge imem!” <sup>5</sup> Iok, ana non naula nge iri nai pe teke ma lape te tunge ute lala nge i.

<sup>6</sup> Pe Petrus hele mule lange i, “Iau lek umtutuna ero toto koi, nenge lape

e tunge lange iong. Pe lek ure nenge e teke e tunge lange iong ngana koi nei; Nga Iesus Kristus nenge Nasaret ene, e hele lange iong ke omes haka pe oi!” <sup>7</sup> La Petrus rahit heke non neu nga penna tamalmal pe ueiuei mana ana non apena takaha pe mes sapele. <sup>8</sup> Non neu mes nga apena pe tamu haka pe talun ke i rara sapele. Pe i pe Petrus pe Ioanes tei teu la sapele nga NeHalang nena pele palaungana neu letena. Pe non neu ii pe tamtamu pe heto hekeke NeHalang ene. <sup>9</sup> Pe hulua lochloch ngana nga lamau te esia non neu nge ii pe te longe i nge heto hekeke NeHalang, <sup>10</sup> ol pe te rura toto pe leteria tuanin rara ke te teke, “Utar toto nenge poia non nem ke urana mule?” Iange tenau urume ke i non nenge arare ke long manmana umtutuna nga pele matana nenge Rerere.

#### *Petrus Haliu Nga NeHalang Na Pele Palaungana*

<sup>11</sup> Iok laol, hulua lochloch ngana te longe ure neu nge lohot pe te song ke tela nga sauach nenge te hetue ke Solomon na Sauach. Tela pe non neu lau hite Petrus pe Ioanes ke temes. <sup>12</sup> Pe Petrus esia hulua lochloch ngana nemur nge te rura ia non neu nge i mule pe hele, “Imo hana nenge Israel, pomere nenge a nachnei sakililia imem ke pomam? Imo a teke lemem kerkerenga palaungana pe imem toto kai, nenge mo poia non nei ke i mule mai?” <sup>13</sup> Ra tete mur aria soke NeHalang nenge Apraham pe Isak pe Iakop te heto hekeke, tunge hemalmalinga lange nena hekuleileinga, Iesus lo. I laka nenge a tunge i langa hana nenge Rom peria. Pe Pilatus hele ke teke hottaua ute nge non nem poia ke poreke ero, pomalam teke papa ala ana nga helenga pallaklaka ngana nenge a poia lange i. Pe imo a hulua patangamo lange i pe a toto ita toto lange Pilatus ke a teke, non nei mete. <sup>14</sup> Non nei, NeHalang nena non

toto. Ke na poinga pe na ume mur pengpeng mana. Pe imo lememo ero ia i ke a teke lake mete. Pe a hele lange Pilatus ke mene non nenge hunun hana munna. <sup>15</sup> Ke imo a hune non nenge tunge maulinga at nge ita laka. Pe ana non, NeHalang hemaul heke mule i lo. Imem nai mo esia ke ngana koi nenge mo heleia. <sup>16</sup> Ke imem nai letemem manmanna toto nge Iesus. Imo a esia non nenge apena lul nem, i urana mule nga kerkerenga nenga Iesus ene. Ke letemem manmanna ngana nge Iesus laka nenge poia non nem ke urana mule.

<sup>17</sup> “Pe titik mur, e eteia ke ulolo. Imo ul amo papalauna mur, a poia poinga nei lange Iesus iange a eteia ero. Ke ngana laka nenge lememo ero ia i. <sup>18</sup> Pe e hele lange imo pengpeng, NeHalang hele hote nga hetatalonga mur haria nge nike lo. Nenge hele ke teke, ‘Non Mesias nenge at ke mene mule nena hana mur, lape takisia melmelenga palaungana.’ Ke nga poinga nenge a poia nem, pete tote NeHalang hele ngana. <sup>19</sup> Pomalam apoi ke pomai koi; A hulua letemo nga lemo poinga poreke ngana mur pe a nanasia NeHalang. Pomalam lape NeHalang letena porekeia imo nga lemo poinga poreke ngana mur. <sup>20</sup> Nenge teke apoi ke pomam, lape NeHalang hekulo sue opemo ana ngaunga at nge imo. Ke lape kulosia Mesias nenge i sipona henonou hote lo, ke at mene mule nena hana mur nenge hesilei hote iri lo. Ke Mesias nem laka Iesus i sipona. <sup>21</sup> Pe i lape tunga tapa mukam ke kulele etue nenge NeHalang talue ke teke, poia ure lochloch ngana ke te lohote ke heueu ngana mule. Helenga nem, NeHalang i sipona hele hote nga nena hetatalonga mur haria nge nike. Pe hetatalonga nemur, NeHalang talue iri ke altoto ke te poia ume nem pengpeng. <sup>22</sup> Ke nge nike, Moses hele tote Ne Iesus ke mai,

“ ‘Amo Soke NeHalang lape henonou hote mele e nge imo sipomo, pe talue i ke i hetatalonga ke mange iau.

Pe teke hele ke mere lange imo, a longo taua nena helenga mur.

<sup>23</sup> Pe mele hel nenge te longo taua hetatalonga nem nena helenga ero,

lape tetu teu langa NeHalang nena hana mur ero.

Pe lape NeHalang hun sue iri ke tehet.’

<sup>24</sup> “Pe hetatalonga lochloch ngana nge nike, te hele hote utar nenge te lohote heueu nei. Talun nge hetatalonga Samuel pe ole lange pekn-gana nemur nenge te nanasia i. <sup>25</sup> Pe imo lape a mene ure nemur nenge hetatalonga mur te heleia. Pe NeHalang hele hote ure nemur nga etue nenge, i pe lemo tete mur te talue helenga tomunga hel nem. Iange i hele lange Apraham ke pomai, ‘Lape e pete hulua lochloch nga ich, pe petanga nem lape at nge iong sipomalom.’ Nge nike, NeHalang tunge helenga nem lange Apraham, pe heueu nei, petanga nem sio at nge imo ol. <sup>26</sup> Ke pomalam NeHalang henonou hote nena non pe kulosia i ke at tala nge imo ke pete imo pe halua imo elle pe elle, ke a hile lemo poinga poreke ngana mur.”

## 4

### *Hana Papalauna Leteria Inin Taua Petrus Iri Nai Ioanes*

<sup>1</sup> Iok, Petrus iri nai Ioanes te hele lala nge hehei pe hana kura pe tunginga ana hana mur pe non soke nenge nauuelele NeHalang nena pele palaungana ana naungaala mur pe Satusi mur hel teat ke te puris. <sup>2</sup> Teat pe leteria inin toto iange Petrus iri nai Ioanes te hetottore hehei pe hana nga Iesus nge maul haka mule nga metenga. Ke nem hemallaha hot tote ke, iri nenge te mete lape te maul haka mule. <sup>3</sup> Laol pe hana papalauna

nemur te laua Petrus iri nai Ioanes ke te teke te onteia iri nai pe ero. Iange kileng ulei sio lo. Pomalam tetal teua iri langa tuele au ngana. <sup>4</sup> Pe hulua lochloch ngana nenge te longe iri nai reria helenga, leteria manmanna. Ke iri nenge leteria manmanna te lohot ke iri ana non kina lime iri analoch iri lime (5,000).

<sup>5</sup> Iok, pomange rou almasinga ana hana mur pe hana nenge iri mukmuka nge Israel mur pe hotonga ana hetoronga mur, teat ke te eukirau nge Ierusalem. <sup>6</sup> Pe tunginga ana hana mur aria non soke, ene Anas. Ke Anas pe Kaepas pe Ioanes pe Aleksanta pe iri hel pule nenge te lohot nga mata nenge tunginga ana hana mur, iri lochloch tela ke te eukirau luluch nge hana nemur. <sup>7</sup> Laol pe te hemesia Petrus iri nai Ioanes nga mataria pe te onteia iri ke pomai, “A poia ure nei ke mere mai? A mene lemo kerkerenga langai nenge a poia ure nei? Pe a poia nga itei ene?”

<sup>8</sup> Pe Opepengpeng teu ke muta toto nge Petrus pe tuacholia hana nemur reria helenga ke mai, “Imo almasinga ana hana mur pe imo hana nenge imo mukmuka nge Israel mur: <sup>9</sup> A onteia imem nga halaunga nenge mo poia nge ape lul nei. Maul ke mere? <sup>10</sup> Imo lochloch pe imo Israel mur a longo ke nek. Non ape lul nei urana mule nga Iesus Kristus nenge Nasaret nena kerkerenga. Pe imo a hune ana non ke mete nga ana manga toto. Pe NeHalang hemaule heke mule i. Pe NeHalang nena helenga hele ia Iesus ke mai:

<sup>11</sup> “‘I laka, i um nenge imo hana nenge a lelele pele lememo ero ia.

Pe i, lohot ke i um palaungana nenge rahtua ele pele.’

<sup>12</sup> Maulinga at nge mele ero ol. At mana nga Iesus ene.”

<sup>13</sup> Hana papalauna nemur te esia Petrus pe Ioanes pe te rura. Iange iri nai temes ia aria seilil. Pe te eteia

iri lo, nge iri hana mana nge ramaria alchach ero. Pomalam te eteia iri nai nge tetu luluch nge Iesus. <sup>14</sup> Pe te esia non ape lul nem nge mes luluch nge iri pe te reng toto ke te hele ia helenga e ero ol. <sup>15</sup> Hana papalauna nemur te kulos hote iri nai pe te hele tele el nge iri, <sup>16</sup> “Lape ta poia iri nai ke pomere? Hehei pe hana lochloch ngana nge Ierusalem te esia iri nge tepoi hote ure palaungana nem nge hemallaha hote NeHalang na hekerkerenga. Ure nei, ta talkome ero ol i! <sup>17</sup> Teke poi, pe ta hele ke kerkereng lange iri nai ke te heto heke Iesus ene ero ol. Pomalam ure nei het la koloi pe te heloloune ero ol.”

<sup>18</sup> Te iua iri nai pe te hele ke kerkereng lange iri nai ke te hetottoro pe te haliu nga Iesus ene ero ol.

<sup>19</sup> Pe Petrus iri nai Ioanes te hele, “A mil teu la. Nga NeHalang matana, poinga tei nge urana? Mo longo taua NeHalang ma mo longo taua imo? <sup>20</sup> Imem, ute pele nge ra ele halimem ero ol iange mo longe pe moes tote lo.”

<sup>21</sup> Pe hana papalauna nemur te hottaua ute ero toto nge poreke nge iri nai nge tetal teua iri nga tuele au ngana. Pomalam, te keres taua iri pe te kulos hote iri nai ke tela. Iange hulua te esia ure nem nge lohot pe te heto heke NeHalang. <sup>22</sup> Pe non nenge te hemasia i nei ana hesinga ele haka nga ana non kina nai (40).

<sup>23</sup> Te kulos hote Petrus iri nai Ioanes ke het pe tela sapele nge pekngaria mur pe te heleia ure lochloch nenge almasinga ana hana mur pe tunginga ana hana mur aria papalauna mur te hele ia lange iri.

<sup>24</sup> Iri te longe helenga nemur pe iri lochloch leteria elle pe te hetalaulau lange NeHalang ke pomai, “Non Soke, iong sipom oala hote tapa pe ich pe ruach pe ure lochloch ngana.

<sup>25</sup> Nge nike toto, Opepengpeng hele hot nga lem hekuleileinga, lememe te ne Teuit hanna ke pomai:

“ Pomere nge hana lomonmona mur leteria inin hali?

Pomere nge tetal hel ia helenga ke te heporeke Non Soke?

<sup>26</sup> Kileng mur nga ich aria naungaala mur

tetal helenga ke tei ia polong.

Hana papalauna mur pule tetal helenga

ke te hekou sue Non Soke

pe Mesias nenge Non soke tal hote ke mene mule ita.’

<sup>27</sup> Oe Non Soke. Manmanna nge

Herot iri nai Pilatus te heua hana lomonmona mur pe Israel mur ke

teare nga tuele tana nge Ierusalem.

Tetal helenga ke te hekou sue Iesus, lem hekuleileinga nenge otal hote.

<sup>28</sup> Iri te poia poinga nem, nanas mene iong lemengam. Iange lohohot nga

lem kerkerenga nike. <sup>29</sup> Iok, Non

Soke o nau sio at nge imem, lem hekuleileinga mur ke o halaua imem.

Iange hana kai te hemataua imem mai. Ke o halaua imem ke momes

ke kerkereng toto ke mo haliu hote lem helenga. <sup>30</sup> Otul hote perim ke

mo hemasia haleles mur pe mopoi hote ure papalauna ke hemallaha

hote lem kerkerenga. Mo poia ure nemur nga Iesus ene, lem hekuleileinga

nenge iong sipom otal hote.”

<sup>31</sup> Te hetalaulau ke ulo, pe kileng nenge te hetalaulau ia nem rur. Pe

Opepengpeng hemute iri lochloch ke aria seilil ke te hele hote NeHalang na

helenga.

*Iri Nenge Leteria Manmanna Te Halau Hel Iri*

<sup>32</sup> Iri nenge leteria manmanna, leteria pe ramaria elle mana. E nge

iri teke i toro nena ute ero, iange ure lochloch te teke iri lochloch re-

ria. <sup>33</sup> NeHalang tung sue hekerkerenga palaungana lange Iesus nena

hekulkulonga mur ke te haliu hote Iesus maul haka mule ngana. Pe pete

tote iri lochloch. <sup>34</sup> Iri lochloch reria ure pe ute e nge alpapa nge iri ero.

Iange iri nenge reria ich pe reria pele, te hile hotote ke mele hel te ololia iri.

<sup>35</sup> Pe te mene ure nemur ururia pe te tunge lange hekulkulonga nemur.

Pe hekulkulonga nemur te heronge lange iri nenge reria ure mur ero.

<sup>36</sup> None nge ene Iosep, tana hoe i nge Saipras. Pe ana mata, Liuai. Pe

hekulkulonga nemur te hetue i ke ene Parnapas. (Luna, non nge hek-

erkereng ia hehei pe hana leteria pe halachlaua iri.) <sup>37</sup> Ana non pule hile

hote na ich unne ke mene uruna pe tunge lange hekulkulonga nemur.

## 5

### *Ananias Iri Nai Sapaera*

<sup>1</sup> Iok laol, none nge ene Ananias iri nai nehei Sapaera reria ich unne,

mele hel te olia pule. Pe Ananias rahite umtutuna nenge ich neu uruna ele. <sup>2</sup> Nehei pule eteia pe ngata

mana. Ol pe Ananias mene umtutuna ele mana, pe laia nge Iesus nena

hana mur iange ele kou talkome lo.

<sup>3</sup> Pe Petrus hele lange Ananias, “Pomere nenge ongata lange

Non Poreke ngana ke o pallakaia Opepengpeng, ke o rahit mule umtutuna

ele nga ich uruna nenge o mene nem? <sup>4</sup> Ich nem te olia ero kura pe

iong lem nike. Pe te olia ke het pe umtutuna nem, iong lem pengpeng.

Pe utar nenge pa heke iong ke o poia poinga nei? Iong o pallaklaka ia none

mana ero, o pallakaia NeHalang laka nem.”

<sup>5</sup> Ananias longe helenga nem, pe losio pe mete sapele. Pe iri nenge te

longe ure nem nge lohohot, mataunga palaungana laua iri. <sup>6</sup> Ol pe hana

lolomele hel tela ke te ruchite non neu koluna pe te takis hote kela tealo

hite.

<sup>7</sup> Etue mala pol lo pe Ananias nehei iteu at. Pe i eteia utar nenge lohohot

tala nga etue neu ero. <sup>8</sup> Ol pe Petrus onteia i, “O hele at nge iau mukam,

lemo ich unne nenge te olia lange imo nai, uruna kaloi?”

Pe ana hei hele, “Oe, uruna lochloch lakalom.”



<sup>9</sup> Ol pe Petrus hele mule lange i, “Pomere nenge imo nai em a ngata hel ke a totoia NeHalang opene ke pomam? Onau la, hana nenge tealo hite em iau temes nga pele matana neu pe lape te takis hote iong la pule!”

<sup>10</sup> Nga etue unne neu pengpeng, hei neu losio pe mete sapele. Pe hana lolomele tei teu at pe ana hei mete lo, pomalam te takis hote kela tealo hite i nga ene rikena. <sup>11</sup> Ol pe iri lochloch ngana nenge leteria manmanna nge Iesus, pe iri hel pule nenge te longe ure nemur nge te lohotos, iri te matau toto ol.

### *Iesus Na Hekulkulonga Mur Te Hemas Mule Hulua Halang*

<sup>12</sup> Iesus nena hekulkulonga mur tepoi hote ure papalaungana halang ke hulua lochloch te esia. Pe iri nenge leteria manmanna, te lala ke te eukiraurau nga Solomon Nena Sauach. <sup>13</sup> Pe iri nenge te tu nge hot, leteria urana mana nge iri pe teteu pulut mana pe teare luluch nge iri ero. <sup>14</sup> Pe hulua halang toto, leteria manmanna nge Iesus pe teteu kela te koko teu nge Iesus nena hana mur. <sup>15</sup> Ol pe hehei pe hana tela ke te takis hote iri nenge singiria haleles ke teat ke te emara sue iri nga hete mur nga kue ilina. Pomalam, Petrus itoto pe opene ma hite iri pe temaul. <sup>16</sup> Pe hulua lochlolch ngana nga kileng nemur nenge tetu rochroi nge Ierusalem, te longe pe iri pule te takis hote haleles kina mur pe iri nenge uneinei poia iri. Te atia iri pe Iesus nena hana mur te hemas mule iri lochloch.

### *Tetal Teua Petrus Iri Nai Ioanes Nga Tuele Au Ngana*

<sup>17</sup> Ol pe tunginga ana hana mur aria soke pe pekngana mur nenge iri Satusi, te esia ure nemur nenge Iesus nena hana mur te poia pe saria keke iri. <sup>18</sup> Pomalam te lohaka pe telaua Petrus iri nai Ioanes pe tetal teua iri langa tuele au ngana, kela tetu luluch nge hana porekreke ngana mur. <sup>19</sup> Pe nga miliko NeHalang nena angkelo

e loe tuele au ngana neu matana pe mene hote Petrus iri nai Ioanes pe hele lange iri ke mai, <sup>20</sup> “Ala ke a mes nga NeHalang nena pele palaungana letena pe a hemallaha hote helenga lange hehei pe hana ke nek nga tunga heueu ngana nei.”

<sup>21</sup> Iok laol, uach sio pe iri nai teteu la sapele nga NeHalang nena pele palaungana pe te talun ke te hetotore hehei pe hana ke pomanga NeHalang nena angkelo neu heleia lo. Pe Anas iriul pekngana mur te iua hana papalauna nenge Israel te eukirau. Pe te hekulo helenga langa tuele au ngana ke te mene Petrus iri nai Ioanes at. <sup>22</sup> Iok palpal hussu mur tela ke te lohotos nga tuele au ngana pe Iesus nena hana nai neu iri ero lo. Ol pe tela mule pe te hele lange hana papalauna nemur ke mai, <sup>23</sup> “Mola ke mo lohotos lamau pe mo esia piunga lochloch ngana nga tuele chantom ngana neu, aria chaunga tetu ke tekerkereng. Pe nualanga nemur nenge te umume lamau, temes ke te ronge piunga lochloch. Iok, mo lohe piunga e ke moi teu la, pe hana nemur iri ero.” <sup>24</sup> Nga etue nem, hana papalauna mur pe non soke nenge nauuelele palpal hussu mur nga NeHalang nena pele pe tunginga ana hana mur aria papalauna mur te longe ke mau, pe ngaria lohotos pe leteria tuanin rara ke te teke, hana pane tela ke merei?

<sup>25</sup> Ol pe none at pe hele, “A nau at, hana nenge atal teua iri langa tuele au ngana nem, ngaria kou te hetotore hehei pe hana nga NeHalang nena pele palaungana letena.” <sup>26</sup> Ol pe palpal hussu mur iriul aria soke, tela ke te mene iri pe te mene iri ke nek mana pe te poia ute hel lange iri ero, iange te mataua hulua lochloch ngana nemur nge lape telope aria um.

<sup>27</sup> Iok laol, palpal hussu nemur te mene iri ke tela te hemesia iri nga hana nenge te longlono helenga mataria. Pe Anas lohaka pe hele,

28 “Imem moheo ele tote imo nge a hetore hehei pe hana nga non nem ene. Pe ero. Imo a hetottoro pe kura, ke hehei pe hana nga kileng lochloch ngana nge Ierusalem te longe lemo helenga mur lo. Pe pule, imo a tue helenga at nge imem ke a teke mo hune non nem ke mete.”

29 Pe Petrus iri ul Iesus nena hekulkulonga mur te tuacholia hana nemur reria helenga ke mai, “Imem mo nanas tau pulut mene hana pele hel nga ich nei reria helenga ero. Mo nanas mene NeHalang na helenga mur!” 30 Imo a heon heke Iesus nga manga toto, ke nga poinga nem, a hune i ke mete. Pe ratete mur aria Soke NeHalang hemaui heke mule i nga metenga lo. 31 Pe mene heke i kela hetakile nga ilina nga penna tamal. Nga lamau Iesus lohote ke i naungaala ana non pe hemasinga ana non. Iange NeHalang teke Israel mur te hulua leteria pe te mene maulinga ke koko. 32 Imem mo esia utar nenge NeHalang poia lo. Pe imem toro ero. Imem ul Opepengpeng. I laka, NeHalang nena tunginga nenge tunge lange iri nenge te longo taua i.

33 Iri hana papalauna nemur nge Israel, te longe ke mau pe leteria inin toto nenge te teke te hune Iesus nena hana mur ke te mete. 34 Pe ero, Non Paresio e nge ene Kamaliel mes haka nga hana papalauna nemur leteria pe hele ke teke, te mene hote Iesus nena hana mur kela temes pol nge hot mukam. Ana non i hotonga ana hetoronga ke hulua lochloch ngana tepoi ke nek lala nge i. 35 Pe hele lange hana papalauna nemur ke mai, “Imo hana nenge Israel, anau ke nek toto nga utar nenge a teke a popoia lala nge hana nemur. 36 A eteia, ngalia manmana none nge ene Tiutas lohote pe teke i non palaungana pe na kerkerenga halang. Pe hana iri ana non kina iri ana non kina elle (400) leteria manmanna nge i pe te nanasia i. Pe nga etue nenge te hune

i ke mete, nena hana mur te ua parai pe tepoi hote ume pele ero. 37 Iok, nga hoena Iutas nenge na nge Kalelea lohaka. Lohaka nga etue nenga sisalanga nge hehei pe hana lohote, ke tehas susue eria. Ana non teu nga hulua leteria ke te nanasia i ke tepoi heke hunelina, iange lemeria ero ure neu nge lohote. Iok te hune i ke mete pe iri lochloch ngana nenge te nanasia i nem te ua parai pule. 38 Pe nga ure nenge lohote heueu nei, e hele lange imo pengpeng, a poia ute lange hana nemur ero toto. A hile hote iri ke tela! Iange nenge teke ure nenge te popoia nei, iri siporia tepoi heke mene, lape ure nem sisparai sio mule. 39 Pe nenge teke NeHalang i sipona poi heke, imo nakumo ero toto nge apoi ele iri. Nenge teke apoi poreke iri heueu, apoi poreke NeHalang ke ulolo!” Laol pe hana papalauna nemur te nanas mene Kamaliel nena helenga.

40 Iok, teiu teu mule Iesus na hekulkulonga nemur at pe te palia iri. Te palia iri ke het pe te hele ke kerkereng toto mule lange iri ke te hetore hehei pe hana nga Iesus ene ero ol. Ke het pe te kulos hote iri ke tela sapele.

41 Iok laol, hekulkulonga nemur te hile sue hana papalauna nemur ke tela ol pe te iech toto iange NeHalang teke nakuria nge te mene meinga palaungana toto nga Iesus ene. 42 Pe kokoes mana nga etue lochloch tela ke te haliu hotote NeHalang nena helenga urana toto ngana lala nge hehei pe hana nge reria pele mur, pe pule nga NeHalang nena pele palaungana letena. Te haliu hote helenga urana toto ngana nenge Iesus i sipona i Mesias, nenge NeHalang kulosia ke at mene mule hehei pe hana nenge NeHalang hesilei hote iri lo.

## 6

### *Te Henonou Hot Ke Hana Iri Rahtele Nai*

<sup>1</sup> Iok nga etue nemur iri nenge leteria manmanna nge Iesus te lohote ke iri halang toto. Ol pe ngunngunuga e lohaka nge Iuta mur nenge te helelia helenga Krik iri ul Iuta mur nenge iri Iuta pengpeng. Pe ngunngunuga nem, huna nga ngaunga nenge te heronge ke kokoes lange pakar mur nga etue elle pe elle. Iange hei pakar mur nenge Krik nem, te menmenea ngaunga ke nek ero. Pomalam te ngungu nge iri nemur nenge Iuta pengpeng. <sup>2</sup> Ol pe Iesus nena hana iri analoch pe nai nem te eukiraua iri lochloch nenge leteria manmanna nge Iesus pe te hele lange iri ke pomai, "Nenge teke mo hilesue ume nenge mo hetottore hehei pe hana nga NeHalang nena helenga pela mo herongo mulmule amo ngaunga, panem urana ero. <sup>3</sup> Ke pomalam, kole mur, imo sipomo a hesilei hot ke hana iri rahtele nai nge imo mule, ke tenau ele ume nem. A henonou hote mele hel nge Opepengpeng muta nge iri, pe leteria pe reria poinga mur urana mana. <sup>4</sup> Pe imem, lape motu pengpeng nga ume nenge mo hetaulaulau pe mo hetottore hehei pe hana nga NeHalang nena helenga mur."

<sup>5</sup> Iok laol, iri lochloch lemeria ke te teke tepoi ke pomanga Iesus nena hana mur te hele ngaria. Pomalam te henonou hote Stipen, non nenge letena manmanna ngana tuke kerkereng toto, pe Opepengpeng muta nge i. Pe pule Pilipus pe Prokorus pe Nikanor pe Timon pe Parmenas pe Nikolaus. Nikolaus i nena nge Antiok pe i koko teu luluch nge Iuta mur nge leteria manmanna nge NeHalang. <sup>6</sup> Iok, te mene hana nemur ke te laia iri nge Iesus nena hana mur ke tetal heke peria nge iri pe te hetaulaulau haka nge iri.

<sup>7</sup> Pe NeHalang nena helenga song ke rongge kileng lochloch ngana. Pe hehei pe hana halang nge Ierusalem te lohote ke Iesus nena hana mur ia iri. Pe tunginga ana hana mur ha-

lang, leteria manmanna nga NeHalang nena helenga pule pe te nanasia.

### *Te Laua Stipen*

<sup>8</sup> Iok, Stipen i non nenge NeHalang pete tote i, pe tunge na kerkerenga palaungana nenge poi hote ure palaungana hel nga hulua leteria ke te esesia. <sup>9</sup> Ol pe hana hel teate ke iriul Stipen tetak huluelia helenga. Pe hana nemur ria heteronga ana pele e nge te hetue ke ene, hana nenge iri siporia tenau ele iri. Pe hana nemur reria nge Sirini pe Aleksantria, pe pekngaria hel pule teate nga ich nenge Silisia pe Eisia. <sup>10</sup> Pe Opepengpeng helete matana tote Stipen ke hana nemur nakuria ero nge te hekou sue Stipen nga helenga.

<sup>11</sup> Ol pe la teol hite hana hel, nenge te pallaklaka ke te teke, "Mo longe Stipen nge hele poreke tote NeHalang iri nai Moses."

<sup>12</sup> Ke nga poinga nei te hesosolos heke tote hehei pe hana pe hana papalauna pe hotonga ana heteronga mur leteria ke telaua Stipen. Pe la te hemesia nga hana papalauna nenge te longlongo helenga mataria nga NeHalang nena pele palaungana letena. <sup>13</sup> Pe te mene teua hana hel pule kela te channanga ke te teke, "Non nei, kokoes mana, hele poreke NeHalang na pele pe Moses nena hotonga mur. <sup>14</sup> Pe pule, mo longe i nge hele ke teke, Iesus nenge Nasaret nem lape toto sue NeHalang nena pele palaungana nei, pe hetaua rera poinga mur nenge rette Moses tung sue at nge ita nge nika."

<sup>15</sup> Ol pe hana papalauna nemur te nachnei hit tote Stipen, pe te esia Stipen nge nakuna pomalaka nga NeHalang nena angkelo toto.

## 7

### *Stipen Hele Nga Hana Papalauna Nemur Mataria*

<sup>1</sup> Iok, non soke nenga tunginga ana hana mur, onteia Stipen ke teke, "Ure nemur nenge hana nei te hele hotote

atat nge imem nemai, manmanna kai?”<sup>2</sup> Pe Stipen tuacholia lange hana papalauna nemur ke mai, “Titik mur pe temek mur, a longo at nge iau mukam! Nge nike, rette Apraham tu nge Haran ero kura pe NeHalang Non Palaungana nenge nena hemalminga nenge sina ala toto, lohohot nge i nga tuele tana nge Mesopotamia.<sup>3</sup> Pe hele lange i ke teke, ‘O hile sue lem kileng pe lem hana mur pe ola ke otu nga ich nge lape e henonoua lange iong.’

<sup>4</sup> “Pomalam Apraham lohaka nga na kileng huna nge Saltea pe la ke tu nge Haran. Iok, Apraham temene mete ke het pe NeHalang kulosia i ke at nga ich nenge a tutuia nei.<sup>5</sup> NeHalang tunge ich unne lange Apraham ero toto. Pe NeHalang hele ke manmanna toto ke teke tunge ich neu lange Apraham pe na tete mur ke rea ich. NeHalang hele hote helenga kerkereng ngana nem pe Apraham hoe tutuna mur hel ero kura.<sup>6</sup> Ke NeHalang hele lange Apraham ke mai koi, ‘Iong lem tete mur lape tetu nga kileng tau ngana e nga ich nenge iri siporia reria ia ero. Pe lape tetu ke te hekuleilei menmene iri nga kileng nem. Pe hana nga kileng nem, lape tepoi poreke tote iri ke hesinga iri ana non kina iri ana non kina elle. (400)<sup>7</sup> Pe lape e poia ure meena ngana ke lohohot nge hana nenge lemtete mur te umume nge iri nem. Pe lape nga hoena lem tete mur te ua hot nga kileng neu pe teat ke te heto heke iau nga kileng nei.’<sup>8</sup> Ol pe NeHalang hele lange Apraham ke terir us. Ke nga poinga nenge terir us, poinga nem helete metene iri nga NeHalang nena helenga tomunga hel nenge heleia lange Apraham. Ke Apraham i Isak temene. Pe Isak, tana hoe i ke ana etue iri rahte mol, pe temene Apraham rir us sapele. Pe nga hoena Isak lohohot ke i Iakop temene. Pe Iakop hoe

ra tete mur ke hana analoch pe nai nem.

<sup>9</sup> “Pe Iakop tutuna nemur saria keke tiria Iosep pe te mene i lange hana lomomona ngana mur ke te olia i pe te mene sapele i ke lange Ekipto. Pe NeHalang tu luluch toto nge Iosep.<sup>10</sup> Ke nauele tote i nga ure meena ngana mur nenge lohohot nge i. Pe pule tunge letematana ngana palaungana toto lange i. Ke nem poia Parao, non soke nenge Ekipto, ke lemene tau tote i. Pomalam Parao talue Iosep ke nauele kileng nenge Ekipto, pe pule nauele ure lochloch ngana nenga Parao na pele.

<sup>11</sup> “Laol pe uringa palaungana lohohot sapele nga kileng lochloch ngana nenge Ekipto. Pe nge Kanan, rera tete nemur te uri.<sup>12</sup> Ol pe Iakop longe nge te teke ngaunga kou nge Ekipto. Pomalam kulosia tutuna mur ke tela.<sup>13</sup> Iok, tela mule henai ngana pe Iosep hemallaha hote i lange titina mur pe Parao eteia ke Iosep titina mur teat.<sup>14</sup> Ke het pe, Iosep hekulo lange temene Iakop pe hele lange i ke teke, iri lochloch te lohaka pe tela nge Ekipto. Pe iri lochloch ngana nenge tetu lamau iri ana non kina iri mol pe analoch pe lime (75).<sup>15</sup> Iok laol, Iakop sio la sapele nge Ekipto. Pe nge Ekipto i pe ra tete hana nemur te mete.<sup>16</sup> Pe te takis mule koluria kela tealohite iri nge Sekem, nga metenga ana polo nenge Apraham olia nga umtutuna lange hana nenge te lohohot nga mata nenge iri Hamor.

<sup>17</sup> “Iok, etue at rochroi lo, nenge lape NeHalang nena helenga utona nenge heleia lange Apraham lape lohohot ke manmanna. Pe Israel mur nenge tetu nge Ekipto neu iri hulua toto ol.<sup>18</sup> Iok, none nge altoto ol lohohot ke i naungaala ana non nge Ekipto. Pe i eteia Iosep ero iange Iosep mete ke mala lo.<sup>19</sup> Pe ana non pallakaia rera tete hana nemur ke poia poinga

**7:4:** Gen 11:31—12:5    **7:5:** Gen 12:7; 15:18; 17:8    **7:6:** Gen 15:13-14; Exo 12:40    **7:7:** Exo 3:12  
**7:8:** Gen 17:9-14; 21:4    **7:9:** Gen 37:11, 28; 39:2, 21-23    **7:10:** Gen 41:37-44    **7:11:** Gen 41:54;  
42:1-2    **7:13:** Gen 45:1-4, 16    **7:14:** Gen 45:9-11; 46:27    **7:15:** Gen 46:1-7; 49:33    **7:16:** Gen  
23:2-20; 33:19; Jos 24:32    **7:17:** Exo 1:7-8    **7:19:** Exo 1:11-22



poreke toto ngana lange iri. Poia iri ke tesau hote tuturia mur nenge kinkino ke te mete.

<sup>20</sup> “Pe nga etue nenge Moses tana hoe i, NeHalang lemene tau tote Moses. Pe tenau ele i nga temene na pele ke teio iri mol. <sup>21</sup> Pe nga etue nenge tesau hote i, naungaala ana non nem tuna hei ngana mene i pe nauele i ke pomanga tuna toto. Pe nauele i kela i soke. <sup>22</sup> Iok laol, Moses hele ngana pe ana ume mur lohote ke urana toto, iange mene tote hengetoro nenge Ekipto mur ke nek toto.

<sup>23</sup> “Iok nga etue nenge Moses ana hesinga iri ana non kina iri nai, (40) teke irara kela nau toto pekngana Israel mur. <sup>24</sup> Ol pe esia non Ekipto e nge poi poreke tote non Israel e. Pomalam Moses halaua non Israel neu ke hune non Ekipto neu. <sup>25</sup> Pe Moses teke ma hana nenge Israel te eteia ke, i sipona nge NeHalang talue i ke halaua iri ke mene hote iri nge Ekipto. Pe ero! Leteria mallaha ero toto! <sup>26</sup> Iok poma ngerou, Moses esia hana Israel nai nge tepal hehel. Ol pe Moses lake poi hele iri pe hele lange iri ke mai, ‘Imo nai nem! Imo elle mana iam, iange lemo nge Israel. Pe pomere apal hel mule nge imo?’

<sup>27</sup> “Pe non nenge teke palia neingana neu hepua sose Moses pe hele, ‘Itei panenge talue iong ke emem soke iong pe o nauele imem pamam?’ <sup>28</sup> O teke o hune iau ke pomanga non Ekipto nenge o hune nge lona ma?’ <sup>29</sup> Moses longe helenga neu pe ua sapelpele kela tu nga Mitian mur reria ich pe lei ke tutuna mur nai.

<sup>30</sup> “Iok, hesinga iri ana non kina nai (40) het, pe NeHalang nena angkelo e lohote nge Moses nga ich sana lomona e nge rochroi langa hengene nenge Sinai. Angkelo neu lohote nge Moses ke manga oan remenmen ngana nge ngau lalala nga ae tana sune nge mes. <sup>31</sup> Moses esia ke mau pe letena tuanin

rara ia ke halang pe teke nau ke nek toto. Iok, la rochroi toto ke teke nau ke nek pe longe Non Soke nge hele lange i ke teke, <sup>32</sup> ‘Tau NeHalang, lem tete mur aria Non Soke. Lem tete mur Apraham pe Isak pe Iakop, te heto hekeke iau.’ Moses longe ke mau ol pe loiloi pe matau toto ke naula mule ero ol.

<sup>33</sup> “Pe Non Soke NeHalang hele lange i, ‘Opoi hote ae ulina nenga apem, iange ich unne nenge o mesia nem, heo ngana toto. <sup>34</sup> E esia poinga poreke ngana nenge te poia lange lek hana mur nge Ekipto ke ulolo. Pe e longe iri nge te tangtang ke ngana koi nenge esio at ke e teke e mene mule iri nga hana nenge Ekipto peria. Pomalam, oat nge iau ol pe lape e kulosia iong ke ola mule nge Ekipto.’

<sup>35</sup> “Pe Moses nei, i sipona laka nenge Israel mur lemeria ero ia i, pe te hele lange i ke te teke, ‘Itei panenge talue iong ke emem Soke iong pe o nauele imem pamam?’ Ke ana non i sipona koloi nenge NeHalang kulosia na angkelo ke hele lala nge i nga oan sapelala ngana nei. Nenge hele lange i ke teke, la mule nge Ekipto ke mukaia Israel mur ke te ua toto nga kileng nem. <sup>36</sup> Iok, Moses mene hote Israel mur nge Ekipto. Pe nge Ekipto, NeHalang hekerkereng ia i ke poi hote merakulo mur. Pe poia hel pule nenge tei tele nga ruach nenge ene Ruach Remenmen. Pe pule nga ich sana lomona nge teii ia ke hesinga iri ana non kina nai (40).

<sup>37</sup> “Pe Moses nei, i sipona laka hele ke teke, ‘NeHalang lape kulosia hetatalonga e nge mange iau ke lape at. Pe hetatalonga nem, i mele e nge imo pengpeng.’ <sup>38</sup> Pe ana Moses laka nenge tu luluch nge rera tete mur nga ich sana lomona, pe NeHalang nena angkelo hele lala nge i, nga hengene nenge Sinai. Pe i nge mene NeHalang nena helenga urana toto ngana nenge maulinga ana pe tunge at nge

**7:20:** Exo 2:2    **7:21:** Exo 2:3-10    **7:24:** Exo 2:11-15    **7:28:** Exo 2:14    **7:29:** Exo 2:21-22; 18:3-4    **7:30:** Exo 3:1-10    **7:35:** Exo 2:14    **7:36:** Exo 7:3; 14:21; Num 14:33    **7:37:** Deu 18:15  
**7:38:** Exo 19:3

ita.

<sup>39</sup> “Pe ero! Ratete mur lemeria ero nge te longo lange i. Te hile hote i iange lemeria toto nge tela mule nge Ekipto. <sup>40</sup> Ke pomalam te hele lange Aron ke te teke, ‘O ume hote ara ae tapuna e ke imuka nge ita ol. Iange Moses nenge mene hote ita nge Ekipto koi, ta eteia la ngana ero ol!’

<sup>41</sup> Ke nga etue neu, te les hote ae tapuna e nge nakuna pomalaka nga pulumakau tuna. Pe te tunge reria tunginga mur pe te heto hekeke aria soke ae tapuna nenge iri siporia te ume hote nga peria. <sup>42</sup> Pomalam, NeHalang hul patangana lange iri pe iri te heto heke itoch mur, pe teio pe chaia nga tapa sana. Pe poinga nenge te poia nem, pete tote hetatalonga mur tehas ngaria nenge te teke:

“ ‘Imo hana nenge Israel!

Hesinga iri ana non kina nai (40) nenge atu manaia nga ich sana lomona nem,  
a hunune pulumakau pe sipsip mur,  
ke a teke lemo tunginga mur nenge at nge iau.

Pe tunginga nemur, at nge iau ero toto.  
<sup>43</sup> Amo soke Molek, nenge imo sipomo aume hote,  
laka nena pelpele ana as palaungana nenge a takis rerere nem.  
Pe itoch Repan opene laka nenge a takis rerere nem pule,  
amo soke itoch nenge a heto hekeke.

Imo, a heto hekeke ae tapuna nemur nenge imo sipomo ales hote iri.  
Ke pomalam, lape e kulos hote imo ke a ume  
ke a amnei amo nga kileng tau ngana e.

Ana kileng, lape ai ke a hile kileng Pabilon pe ala toto.’

<sup>44</sup> “Iok, nga etue nenge ratete mur tetu nga ich sana lomona, te umeia NeHalang nena pelpele ke nanas tau pengpeng ia opene nenge NeHalang henonoua lange Moses. <sup>45</sup> Iok, ita

ratete mur te mene loloune pelpele nem nge tetemeria mur, pe Iosua i muka nge iri kela te mene ich. Ich neu, hana lomomonona ngana mur te tuia mukam. Pe nga etue nenge ratete mur iriul Iosua tela, NeHalang helope hote hana lomomonona ngana nemur pe iri te mene ich nem sapele. Pe te hemes heke mule pelpele nem nga ich neu, pe tu ke mala toto ke langa Teuit ana etue. <sup>46</sup> Pe NeHalang poi ke urana toto lange Teuit. Pe Teuit hetalaulau lange NeHalang pe hele ke teke lape umeia Iakop ana soke NeHalang na pele urana toto ngana e. <sup>47</sup> Pe ero. Nga hoena toto ol, Solomon hemes heke NeHalang nena pele palaungana nem.

<sup>48</sup> “Pe NeHalang Nge I Soke Nga Lut Toto, tu teu nga pele nenge hana te umeia nga peria ero. Ke pomanga hetatalonga hele ngana nge hele ke teke,

<sup>49</sup> “ ‘Non Soke NeHalang hele ke teke, Mullik nenge eare pe enau ele kileng lochloch ngana nga ich, ngana kou tu nga lut nga tapa.

Pe ich nei apek munna nge etal hekeke ia.

Ke imo mam a teke a umeia lek pele e nge mere?

Pe lape kileng unne nenge lape e arare ia, tu langai?

<sup>50</sup> Pe iau ma nenge e ume hote ure lochloch ngana nemur mam.’ ”

<sup>51</sup> Iok, Stipen hele lange hana papalauna nemur ke mai, “Imo hana nemur, a longo ole tototo iam! Letemo pe ramamo hit toto ke pomange hana nenge lemeria ero toto NeHalang. Pe talngamo nemur, tehit toto nge te longe NeHalang nena helenga mur! Apoi ke pomalaka nge lemo tete mur toto, ke lememo ero toto nge a longlonge Opepengpeng nena helenga mur. <sup>52</sup> Nge nike, NeHalang nena hetatalonga mur te haliu ke te teke, lape NeHalang i sipona nena none nge pengpeng toto

lape at. Pe imo lemo tete mur te hun lapue hetatalonga nemur. Pe heueu nei, imo sipona a tunge NeHalang nena non nenge hetatalonga mur te helele ia nem, ke langa hana porekreke ngana mur peria, ke te hune i ke mete lo. <sup>53</sup> Imo sipomo a mene NeHalang nena hotonga mur nga NeHalang nena hekulkulonga mur peria. Pe pomere nenge a nanasia ero?”

### *Tetamal Hune Stipen*

<sup>54</sup> Iok laol, Stipen na helenga nemur poia hana papalauna nemur ke leteria inin toto, pe te hala hit ngingiria nenge lape te hun tote i ol. <sup>55</sup> Pe Opepengpeng teu ke muta toto nge Stipen, pe nau haka langa lut nga tapa, pe esia NeHalang na hemalmalinga nge tualeme ke palaungana toto, pe esia Iesus nge mes nga NeHalang ilina ele nenge tamalmal. <sup>56</sup> Ol pe Stipen hele, “A longo at, e esia kue matana nenge langa lut nga tapa pau kou tu pa neu. Pe Non Tuna pule, ngana pau kou mes nga NeHalang ilina ele nenge tamalmal.”

<sup>57</sup> Hana papalauna nemur te longe Stipen nge hele ke mau, pe te alngaria haka ke soke toto. Pe tepoi ele talngaria nga peria mur pe te song ke te latau pengpengia Stipen ke te laua i. <sup>58</sup> Ol pe teole hote i langa kileng neu ana mapuo patangana, pe te talun ke te tamal sapelpele ana um. Pe iri hana nenge tetua tettele Stipen nga helenga mur, tepoi hote reria hengeron sasase ngana mur, pela tetal sue nga kol kulpo e apena huna ke nauele iri. Ana non ene laka Sol.

<sup>59</sup> Iok, hana nemur te tamalmalia Stipen pe i hetalaulau ke mai, “Non Soke Iesus, o mene heke opek lange iong.” <sup>60</sup> Ke het pe tualou sio pe alngana haka ke soke toto ke mai, “Non Soke o tuacholia poinga poreke ngana nei lange iri ero!” Stipen hele ke mau ke het pe mete sapele.

## 8

<sup>1</sup> Pe Sol esia poinga nenge hana nemur te tamal hune Stipen ke mete, pe teke pengpeng toto nga matana.

### *Sol Heporeke NeHalang Nena Hana Mur*

Iok, nga etue nenge te hune Stipen ke mete, te talun sapele ke heporeke tote NeHalang nena hana mur lochloch nge Ierusalem. Ol pe hehei pe hana lochloch ngana nenge leteria manmanna nge Iesus, te ua parai ke tela nga kileng mur nge Iutea pe nge Samaria. Pe Iesus na hekulkulonga nemur mana tetu ol. <sup>2</sup> Pe atong hana hel nge te nanas tau totote NeHalang lemene ngana, tela ke tealo hite Stipen koluna, pe te tangia i ke halang. <sup>3</sup> Pe Sol poi poreke tote NeHalang nena hehei pe hana mur. Ana non iteu nga pele elle pe elle ke takrung hote hehei pe hana, pe la tal teua iri nga tuele au ngana.

### *Pilipus Haliu Nge Samaria*

<sup>4</sup> Iok, iri nenge te ua parai neu, te haliu hote NeHalang nena helenga mur nga kileng nemur nenge te tuia. <sup>5</sup> Iok, Pilipus langa kileng e nge Samaria pe haliu hote Iesus nge i Kristus. <sup>6</sup> Hulua halang toto te longo ke nek toto nga Pilipus nena helenga mur. Te longe i nge helele pe te esia merakulo mur nge Pilipus poi hotote iri. <sup>7</sup> Pilipus poia uneinei halang ke te alngaria haka ke soke toto, pe te iuch hot nge hulua halang ke tela. Pe iri nenge aperia ele mete pe aperia lul te urana mule. <sup>8</sup> Ol pe iechinga palaungana toto lohot nga kileng neu.

### *Simon Nenge Popoi Ure Paluna*

<sup>9</sup> Pe none nge ene Simon tu nga kileng neu. Ana non popoi ure paluna pe herura ia hehei pe hana pe heto heke tote i ke teke i non palaungana. <sup>10</sup> Pe hana papalauna pe hehei pe aina kinkino ngana mur te longo ke nek toto langa ana non

nena helenga mur, pe leteria manmanna nge i. Ol pe te hele, “NeHalang nena kerkerenga palaungana toto koi tunge non nei.”<sup>11</sup> Hehei pe hana te kerkereng toto ke te nanasia i, iange kokoes mana popoia nena ure paluna nemur pe hulua ramaria song raraia ke halang.

<sup>12</sup> Iok laol, Pilipus at pe haliu hote helenga urana toto ngana nenge Iesus Kristus pe NeHalang nena naualanga pe nekinga. Haliu hote pe hehei pe hana lochloch leteria manmanna pe te henun sapele iri. <sup>13</sup> Pe Simon neu pule, letena manmanna nga helenga nemur pe mene henuninga pule. Ol pe koko manmana nge Pilipus ol. Pe esia merakulo halang, pe ure papalauna hel pule nge Pilipus popoia pe letena tuanin rara ke halang.

<sup>14</sup> Iok, Iesus nena hana mur nenge tetu nge Ierusalem, te longo nge iri nenge Samaria te mene NeHalang nena helenga lo. Pomalam te kulosia Petrus iri nai Ioanes lange iri. <sup>15</sup> Iok, iri nai tela ke te lohot pe, te hetalaulau lange NeHalang ke hekulo sue Opepengpeng lange Samaria mur. <sup>16</sup> Iange iri te mene Opepengpeng ero kura. Te mene mene henuninga nem nga Non Soke Iesus ene. <sup>17</sup> Iok, Petrus iri nai Ioanes te hetalaulau ke het pe tetal heke peria nge iri ke te mene Opepengpeng. <sup>18</sup> Ol pe Simon esia hana nemur nge te mene Opepengpeng, nga etue nenge Petrus iri nai Ioanes tetal heke peria nge iri. Pomalam, mene umtutuna pe tunge lange Petrus iri nai Ioanes <sup>19</sup> pe hele, “Imo nai a tunge kerkerenga nem at nge iau pule. Ke nenge teke etal heke perik nge mele, mele nem mene Opepengpeng pule.”

<sup>20</sup> Pe Petrus lohaka pe hele, “Iong lape ola ke ohet luluch nga lem umtutuna nem nga oan remenmen ngana. Mele pele olia tunginga nenge at nge NeHalang nga umtutuna ero! <sup>21</sup> Pe iong, lem unne ero toto pule nge o hele teu ia at nga ume nei. Iange iong,

letem ma ke pengpeng nga NeHalang matana ero toto. <sup>22</sup> O hulua letem nga lem poinga poreke ngana nemur pe o hetalaulau lange Non Soke ke letena porekeia iong nge letem tu mana nga poinga poreke ngana nemur. <sup>23</sup> E hele ke mai lange iong iange onau lele tote NeHalang nena tunginga nei. Ke nga letem toto, o teke opoi ke mange imem. Pe poinga poreke ngana lau hit tote iong laka nga onau lele ngam nem.”

<sup>24</sup> Ol pe Simon tuacholia Petrus ke mai, “Imo nai a hetalau ak lange Non Soke ke ure e nge pomanga imo nai a heleia nem, lohot nge iau ero.”

<sup>25</sup> Iok, Petrus iri nai Ioanes te haliu hote Non Soke nena helenga pe te hele lange hehei pe hana nga ure nemur nenge Non Soke poia lange iri ke ulolo. Ke het pe iri nai tela mule nge Ierusalem. Pe nga tela mule ngaria, te haliu hote helenga urana ngana nga kileng kinkino ngana halang nge Samaria.

### *Pilipus Pe Non Itiopia E*

<sup>26</sup> Ol pe Non Soke na angkelo e hele lange Pilipus ke teke, “O lohaka pe oi ke ramam sio langa kue nenge song nge Ierusalem kela nge Kasa.” Kue nei, nga etue nei, tei ia ero ol. <sup>27</sup> Laol pe Pilipus lohaka pe i kela sapele. Pe nga kue neu, saolia non soke e nge nauuelele hei soke Kantasi nena umtutuna mur. Pe hei soke nem nauuele kileng nenge Itiopia. Pe nena non soke neu, lange Ierusalem ke heto hekeke NeHalang. <sup>28</sup> La ol, ana non teke la mulmule lo. Pe are teu nga arenga e nenge oriong mur te takrungrunge pe sis olole alalaha nenge hetatalonga Isaias hasia. <sup>29</sup> Pe Opepengpeng hele lange Pilipus ke mai, “Oi ke ola rochroi toto nga arenga neu.”

<sup>30</sup> Ol pe Pilipus song kela rochroi toto pe longe non neu nge sisia alalaha neu nenge hetatalonga Isaias. Pe Pilipus ontei sapele ke mai, “O eteia ure nenge o sisia nem luna pule laka?”



<sup>31</sup> Pe ana non hele, “Ke lape e eteia ke mere? Nenge teke mele hele urume at nge iau laka lape e eteia. Pe nei ero i.” Ol pe non neu hele lange Pilipus ke haka lange i kela are luluch nge i.

<sup>32</sup> Helenga nemur nenge non soke neu sisisia nga alalaha neu tang ke mai koi,  
“Ana non heleia helenga unne e ero toto.

Hanna hit mana pe maluch mana ke pomanga sipsip nenge te takisia kela te hunune.

Pe pule maluch mana ke manga sipsip tuna nenge te ut susue pulpunna.

<sup>33</sup> Te hemeia i pe mele mes luluch ke halaua i ero.

Tutuna mur lape iri ero ol iange te hune ke mete lo.”

<sup>34</sup> Non soke neu sisia helenga nemur ke het pe onteia Pilipus ke mai, “O hele at nge iau mukam, hetatalonga nemai heleleia itei nemai? Heleleia i sipona kai, ma mele e pule?” <sup>35</sup> Ol pe Pilipus hele hote helenga urana toto ngana nenge Iesus lange non neu. Pe talun ke hele nga helenga nemur nenge non neu i sipona sis hote nga alalaha nenge hetatalonga Isaias. <sup>36</sup> Iok, te song ole ke te lala pela te lohohot nga kileng unne nge ana ech. Pe non soke neu hele lange Pilipus ke teke, “O naula, ech i loi. O henune iau ol. Ute pele poi ele iau nge e mene henuninga ero.”

[<sup>37</sup> Pe Pilipus hele, “Nenge teke letem manmanna toto, lape e henune iong.”

Pe non neu tuacholia ke mai, “Iau, letek manmanna toto nge Iesus Kristus nge i NeHalang tuna.”]

<sup>38</sup> Iok laol, non soke neu hele lange hana nemur nenge te songongia oriong nemur ke tetak ele iri ke temes. Pe iri nai Pilipus te i sio langa ech neu kela Pilipus henune i.

<sup>39</sup> Iri nai tei hot nga ech neu pe ueiuei mana NeHalang opene mene tote Pilipus ke non neu kolkol

sapelpele. Ol pe ana non lohaka mule ke nanas mule kue neu pe iech ole ke laol. <sup>40</sup> Pe Pilipus la ke lohohot nge Astot pe talun sapele ke hele hote helenga urana ngana lange hehei pe hana nga kileng lochloch ngana nga lamau, ke ramana ole lange Kaesarea.

## 9

### *Sol Hulia Letena* (Ume 22:6-16; 26:12-18)

<sup>1</sup> Pe nga etue neu, Sol hele ke kerkereng toto ke teke lape hun lapue Non Soke nena hana mur. Ana non, lange tunginga mur aria soke <sup>2</sup> pe hele lange i ke hasia alalaha mur. Ke alalaha nemur rongo heke hana nenge te mukmuka nga Iuta mur reia heteronga ana pele mur nge Tamaskus. Pe alalaha neu tehas ia ke te teke, Sol tango rere hehei pe hana nenge tetu teu nga tuluk nenge Esinga Tele pe teke hottaua iri, kale hite peria pe laia iri kela tal teua iri nga tuele au ngana nge Ierusalem.

<sup>3</sup> Iok laol, Sol lohaka nge Ierusalem pe la sapele nge Tamaskus. Sol i kela rochroi nge Tamaskus pe ueiuei mana lemenga palaungana e tua nga tapa pe at tualeme hite i. <sup>4</sup> Ol pe Sol losio ke langa ich pe longe helenga e ke pomai, “Sol, Sol, pomere nenge opoi poreke iau ke pomam?”

<sup>5</sup> Pe Sol hele, “Non Soke, iong itei nemam?” Pe non neu hele, “Iau Iesus. Iau laka nenge opoi porekreke iau nem. <sup>6</sup> Heueu nei, o lohaka pe oiteu langa kileng neu. Pe nga lamau, lape te hele lange iong nga utar nenge lape o poia.” <sup>7</sup> Pe hana nenge tela luluch nge Sol neu, te rura toto nga ure neu nge lohohot pe reia helenga ero ke temes mana ol. Iri pule te longe none nge hele, pe te kolkolia ana non. <sup>8</sup> Iok laol, Sol lohaka ke mes pe teke nau pe ero, kolkol toto. Matana nai ape ke teau ala mana. Pomalam hana nemur tera hite i nga penna pe te apea i ke iriul tei teu lange Tamaskus.

<sup>9</sup> Pe Sol matana hit ke etue mol pe ngau pe inia ute e ero toto.

<sup>10</sup> Iok, nge Tamaskus, Non Soke nena none tu. Ana non ene laka Ananias. Pe Ananias nau openene ia Non Soke nge iua i ke teke, "Ananias!"

Pe i tuacholia ke teke, "Non Soke, utar?"

<sup>11</sup> Pe Non Soke hele lange i ke mai, "O lohaka pe ola nga kue nenge ene, 'Kue Pengpeng'. Pe ola nga Iutas na pele pe o ontei rere none nge na nge Tarsus. Ana non ene laka Sol, pe i la hetalaulau. <sup>12</sup> I, matana hit pe nau opene pule ke esia none nge ene Ananias nge iteu lange i ke tal heke penna nge i, pe hele lange i ke teke nau mule."

<sup>13</sup> Ol pe Ananias tuacholia Non Soke nena helenga ke mai, "Non Soke, iau e longe helenga halang toto nge non nei. I, poi poreke totote lem hana mur nge Ierusalem. <sup>14</sup> Pe heueu nei, tunginga ana hana mur aria papalauna mur, te longele Sol ke te teke, Sol at ke mene hehei pe hana nga kileng nei nenge te hetalaulau pe te heto hekeke iong."

<sup>15</sup> Pe Non Soke hele lange Ananias ke mai, "Ola! Non nem e henonou hote i ke lek non i lo. I lape lake haliu hote ek lange hana lomonmona ngana mur pe nge aria soksoke ngana mur pe nge Israel mur lochloch. <sup>16</sup> Ke nga iau ek mana, i lape takisia melmelenga pe ure meena ngana halang lape lohot nge i."

<sup>17</sup> Iok laol, Ananias i la pe la ke i teu sapele nga pele neu. Pe tal heke penna nge Sol pe hele lange i ke mai, "Tik Sol, Non Soke Iesus nenge lohot nge iong nga kue nenge oi atat ia nem, ngana koi nenge kulosia iau ke eat nge iong nei. Ke pomalam lape onau mule pe Opepengpeng muta nge iong." <sup>18</sup> Ananias hele ke mau ke het pe ueiuei mana ute e nge pomanga ruo kilkilana nge maele Sol matana, losio pe Sol es ke nek mule sapele. Ke het pe Sol lohaka pe mes

haka pe mene henuninga. <sup>19</sup> Iok, Sol ngau ke het pe amneia i nge kerkereng mule.

### *Sol Haliu Hote Helenga Urana Ngana Nge Tamaskus*

Iok, Sol tu luluch nge Non Soke nena hana mur nge Tamaskus ke ana etue hel pule. <sup>20</sup> Tu pe langa hetoronga ana pele mur nenge Iuta mur pe haliu hote Iesus, ke teke, "Iesus i NeHalang tuna."

<sup>21</sup> Hulua lochloch te longe i nge hele ke mau, pe te rura toto pe te hele ke te teke, "Aina! Non nenge hunune Iesus nena hana mur nge Ierusalem iam lom. At ngana nem, at ke lololoch Iesus nena hana mur pullo la. Ke lalaia iri nge tunginga ana hana mur aria papalauna mur nge Ierusalem." <sup>22</sup> Pe ero. Sol hetoro ngana song ke kerkereng toto pe palaungana toto ol. Pe halot tote helenga lange Iuta mur nenge tetu nge Tamaskus ke mai, "Iesus i Mesias nenge NeHalang kulosia ke at mene mule nena hana mur lochloch." Pe Iuta nemur te longe Sol na helenga pe na helenga ma hoa iri. Pomalam te hetakine i nga helenga unne ero toto.

<sup>23</sup> Iok, etue halang lalo pe Iuta mur te eukirau pe tetal helenga ke te teke te hune Sol. <sup>24</sup> Pe ero. Sol longo rusia utar nenge te teke te popoia ke het lo. Iok, Iuta mur temes ke tenau ala Sol ke nek toto nga kileng neu ana kue matana mur, ke te teke te hunune i. Kokoes mana temes ke tenau alala, nga sinanga pe nga miliko pule. <sup>25</sup> Pe ero. Sol nena hana mur hel te mene i nga miliko ke te haka langa kileng neu ana mapuo ona, ke te teke te halaua i ke uahot nga kileng neu. Pomalam te hele lange i ke are teu nga chasang palaungana e. Ol pe te heon ole sue i nga mapuo neu hilina ele nenge hile hot, ke sio langa ich pe ua sapele.

### *Sol Lamule Nge Ierusalem*

<sup>26</sup> Iok laol, Sol lange Ierusalem ke teke koko teu luluch nge Iesus nena hana mur. Pe Iesus nena hana mur te mataua i. Iange iri, leteria manmanna ero nga nenge te teke, Sol hulia letena pe lohote ke i Iesus nena non lo. <sup>27</sup> Ol pe Parnapas at pe nene Sol lange Iesus nena hekulkulonga mur. Pe nana urume Sol nge esia Non Soke nga kue pe Non Soke hele lange i. Pe pule Parnapas nana urume Sol nge haliu ke kerkereng toto nga Iesus ene nge Tamaskus. <sup>28</sup> Iok laol, Sol tu luluch sapelpele nge Iesus nena hekulkulonga nemur. Pe iteu pe ihot ia ana seilil nga pele lochloch ngana nge Ierusalem ke haliu hotote Non Soke ene ke soke toto.

<sup>29</sup> Ol pe Iuta mur nenge te helele helenga Krik te teke te hune i, iange hele lala nge iri pe iriul ke te hemes haka helelia helenga. <sup>30</sup> Iok, iri nenge leteria manmanna nge Iesus te longe ke mau pe te tau hote Sol lange Kaesarea pe te kulosia i ke la sapele nge Tarsus.

<sup>31</sup> Ke hulua lochloch ngana nenge te ekiraurau nga Iesus ene nge Iutea pe nge Kalelea pe nge Samaria tetu ke nek mana ol. Iange mele hel nge teat ke tepoi poreke iri ero ol. Pe Opepengpeng hekerkereng ia iri pe halaulaua iri. Pe hulua halang te koko teu nge iri ke iri halang toto ol. Pe te nanasia poinga nenge tetal sio mene iri nga Non Soke matana.

### *Petrus Lange Lita Pe Iopa*

<sup>32</sup> Petrus i ke langa kileng lochloch ngana, pe pule lake nau tote Ne-Halang nena hana mur nga kileng nenge Lita. <sup>33</sup> Pe nge Lita, none nge ene Aeneas tu. Ana non ma manmana nga hete ke hesinga iri rahtele mol, iange singina mete lochloch. <sup>34</sup> Ol pe Petrus hele lange i ke mai, "Aeneas, Iesus Kristus hemaule mule iong ke o urana mule lo. O lohaka pe olou heke lem manga ol." Petrus hele ke mau ke het, pe ueiuei mana Aeneas lohaka sapele. <sup>35</sup> Pe hulua lochloch ngana nga kileng nenge Lita

pe Saron, te esia non neu nge urana mule, pe leteria manmanna nge Non Soke.

<sup>36</sup> Pe nge Iopa, heie nge letena manmanna toto nge Iesus tu. Ana hei ene laka Tapita. Pe nga helenga Krik te hetue i ke ene Tokas. Hei neu kokoes mana halaulaua hehei pe hana nenge reria ure ero. <sup>37</sup> Pe nga etue neu pengpeng haleles mene ana hei pe mete. Iok, telome koluna pe te talue nga nena pele letena e nga lut. <sup>38</sup> Iok, kileng nenge Iopa, tuke rochroi mana langa kileng nenge Lita. Pe iri nenge leteria manmanna nge Iesus, te longe nge te teke Petrus kou tunge Lita. Pomalam, te kulosia hana nai ke tela pe te tunge helenga nei lange i. Te teke, "Kole, oat luluch nge imem ke itaul tala ke ueiuei mana."

<sup>39</sup> Iok laol, Petrus lohaka pe la luluch sapele nge iri. Petrus lake la puris pe te mene i ke tei haka langa pele letena nenga lut. Pe hei pakar mur lochloch ngana teat ke temes ite i pe te tangtang ol. Te tangtang pe te henonoua Petrus lala nga hengeron mur pe malenga mur, nenge Tokas umemeia iri nga maulel ngana.

<sup>40</sup> Ol pe Petrus kulos hot sapele iri lochloch ngana nga pele letena unne neu, pe tualou sio nga palana pe hetalaulau ol. Ke het pe, nau langa hei neu koluna pe hele ke mai, "Tapita, o lohaka!" Ol pe hei neu matana charchara, pe esia Petrus pe are haka sapele. <sup>41</sup> Iok laol, Petrus rahit heke hei neu nga penna, pe halaua i ke mes haka. Ke het pe Petrus iu lange iri nenge leteria manmanna nge Iesus, pe hei pakar mur ke teat. Teat ol pe eteia hei neu nge maulel haka mule lange iri, pe tung mule lange iri. <sup>42</sup> Iok laol, ure nenge Petrus poia neu, ana helenga song ke hulua lochloch ngana nge Iopa te longe. Pomalam, hulua halang leteria manmanna nge Non Soke. <sup>43</sup> Iok, Petrus tu nge Iopa ke etue halang toto. Pe i tu luluch nge none nge ene Simon. Pe Simon

ana ume nenge lome pulumakau pe sipsip mur uliria.

## 10

<sup>1</sup> Nge Kaesarea, none nge ene Kornelius nge tutu. I non nenge i mukmuka nga palinga hel ana hana mur nge Itali. <sup>2</sup> Ana non pe na pele ngana mur te matau tote NeHalang. Pe kokoes hetalaulau pe halau totote Iuta mur nenge reria ure ero. <sup>3</sup> Nga etuene e nga ulei, chaia matana pal-lele lo pe Kornelius nau opene ia NeHalang nena angkelo nge at nge i pe hele, "Kornelius!"

<sup>4</sup> Kornelius nachnei ia i pe matau toto pe ontei, "Non Soke, pomere mai?"

Iok, angkelo hele lange Kornelius ke pomai, "NeHalang longe lem hetalaulaunga lo pe iech toto nga lem poinga nenge o halaua iri nenge reria ure ero. Pe i letena metene kura. <sup>5</sup> Heueu, o kulosia hana hel ke tela nge Iopa pe te tango rere none nge ene Simon. Ene nei ngana laka, Petrus. Pe te hele lange i ke at. <sup>6</sup> Ana non tutu nga pele nenga none nge ene Simon pule. Pe i rahite ume nenge lomlome pulamakau ulina. Na pele mes nga ruach ilina."

<sup>7</sup> NeHalang nena angkelo hele ke het, pe Kornelius iua nena ume ana hana nai luluch nge palinga hel ana none. Palinga hel ana non nem, i non nenge nanas tau tote NeHalang nena poinga mur. <sup>8</sup> Iua hana mol nem pe hele urume ure lochloch nenge lohot. Ke het pe kulosia iri ke tela nge Iopa.

<sup>9</sup> Pomange rou, chaia matana heurunga pe hana mol nem te heroi hot lange Iopa. Pe nga etue neu pengpeng, Petrus haka nga pele ona ke hetalaulau. <sup>10</sup> Petrus mete ana pe teke ngau. Te tatatal ngaunga kura, pe Petrus nau opene ia ute nge hot nge i. <sup>11</sup> Pe esia tapa sana nge alchach pe malenga palaungana sio at. Pe ute e rahite ana oro henel ke pongponga ke sio at nga ich. <sup>12</sup> Pe huros lochloch ngana tema teu nga

malenga nem. Huros nemur nenge aperia henechnel pe nemur nenge pomanga hole pe hilimo pe ngie mur tema teu pule. <sup>13</sup> Pe helenga e lohot nge Petrus pe hele, "Petrus, o lohaka pe o hune huros nemur ke o ngaua iri."

<sup>14</sup> Petrus tuacholia helenga ke pomai, "Non Soke, heo ngana toto nge e ngaua huros nenge muna pe lemlem ero."

<sup>15</sup> Helenga hot henei ngana mule ke pomai, "Ure nenge Non Soke ume ia ke lemlem pe urana, o hetue ke muna pe poreke ero." <sup>16</sup> Ure nei hot hemol pe ueiuei mana pe malenga neu haka la mule nga lut nga tapa.

<sup>17</sup> Petrus letena tuanin rara ia nau opene ngana nem luna kura, pe hana nenge Kornelius kulos ia iri te puris pe temes nga pele matana lo. Iange iri te onteitei ia hana hel nga Simon nena pele. <sup>18</sup> Pe Kornelius na hana nemur teiu lange iri pe te onteia iri, "Simon nenge ene e pule Petrus, ngana kau tutu mau?"

<sup>19</sup> Petrus letena tuanin rara ia opene ngana kura pe Opepengpeng hele lange i, "Hana mol kou, te tango rerere iong. <sup>20</sup> Ke o lohaka pe osio la ke ola luluch nge iri. O matau ero iange iau sipok e kulos ia iri."

<sup>21</sup> Petrus sio la pe hele, "Non nenge a tango rere, ngana koi. A at ke a potar?"

<sup>22</sup> Pe hana nemur te tuacholia, "Kornelius, non nenge mukmuka na palinga hel ana hana mur, kulos ia imem ke moat. I non urana ngana ia pe matautau nena nge NeHalang. Iri lochloch nenge Iutea te hele ia i ke teke non urana ngana ia. Pe NeHalang nena angkelo e hele lange i ke teke iong oat nga nena pele ke longo langa lem helenga."

<sup>23</sup> Ol pe Petrus mene teua iri ke tema nge i.

Iok, pomange rou Petrus pe hana hel pule nge Iopa te koko luluch sapele nge iri. <sup>24</sup> Pe nga etue nain-gana te lohot nge Kaesarea. Pe



Kornelius eukiraua pekngana mur pe alona mur nga nena pele ke te kulele hana nemur nenge Kornelius kulosia iri ke tela taua Petrus. <sup>25</sup> Iok, Petrus teu ke lala nga pele letena pe Kornelius song kela tamal sue i nga Petrus apena huna pe tualou sio lange i. <sup>26</sup> Pe Petrus hele, “Omes haka, iau non mana ke mange iongi.” <sup>27</sup> Petrus hele lala nge Kornelius pe i ke teu lala nga pele. La pe saol haka nge hulua lochloch ngana nemur nga pele letena. <sup>28</sup> Pe hele lange iri ke pomai, “Imo sipomo a eteia lo ke Iuta mur reria hotongo hele ke teke iri nenge Iuta tetu ke te kangkanga nge hana lomonmona ngana mur. Pe nei ol, NeHalang henonou hot tote at nge iau ol ke teke, E hetue mele ke muna pe lemlem ero toto. <sup>29</sup> Ke ngana laka nenge o hekulo ak pe e lohaka ke ueiuei mana ke eat. Iok, e onteia iongi ol, pomere nenge o hekulo ak ke eat mai?”

<sup>30</sup> Pe Kornelius hele, “Etue iri mol kou lalo pe kileng nakuna pomai. Pe iau e hetalaulau nga lek pele letena nga ulei. Ol pe none nge nena hengeron hussu pe sina ala toto mes hot mana nga matak, <sup>31</sup> pe hele, ‘Kornelius! O hetalaulau pe NeHalang longe ke ulolo. Pe pule, esia lem poinga nenge o popoia lala nge iri nenge reria ure halang ero. <sup>32</sup> Ke pomalam o kulosia mele lange Iopa ke lataua none nge ene Simon Petrus. Ana non la tu luluch nge none pule nge ene Simon, nenge ana ume nenge nauelele huros mur singiria. Reria pele laka tu rochroi langa ruach ilina.’ <sup>33</sup> Pomalam e hekulo am sapele. Pe iongi o poia nga poinga urana ngana ke oiat. Ke heueu nei, ita lochloch tames nga NeHalang matana koi, pe mo kulala mana nge mo longo nga utar nenge NeHalang hele ke teke oat ke o hele hote.”

### *Petrus Nena Helenga*

**10:26:** Ume 14:13-15; Hem 19:10    **10:34:** Deu 10:17; Rom 2:11    **10:37:** Mat 4:12-17    **10:38:** Mat 3:16; Luk 4:17-21    **10:41:** Luk 24:42-43; Ume 1:8    **10:42:** Ume 17:31; 1Pi 4:5    **10:43:** Isa 53:5-6; Jer 31:34; Ume 2:38

<sup>34</sup> Ol pe Petrus lohaka pe hele, “Oe, nei ol e eteia ke NeHalang poia hulua lochloch nga kileng lochloch ngana ke elle mana. <sup>35</sup> NeHalang poi ke urana lange iri lochloch ngana nenge te mataua NeHalang pe te nanas tau tote i, NeHalang lape iech mana nge mene mule iri. <sup>36</sup> Imo a eteia helenga nem nenge NeHalang hesongia lange Israel mur lo. Ana helenga urana toto ngana nenge Iesus Kristus i Non Soke, pe i palaungana toto pe nauele ure lochloch. <sup>37</sup> Imo a eteia ure palaungana nem nenge lohote nge Israel. Talun laka nge Kalelea, nanasia henuninga nenge Ioanes haliu hote. <sup>38</sup> Pe imo a eteia Iesus nenge Nasaret. NeHalang hemuta ia i nga Opepeng-peng pe hekerkereng tote i. Pe ana non i rara nga kileng mur pe popoia poinga urana ngana mur. Pe hemasmas ia iri nenge Non Poreke ngana rahite ke kerkereng. NeHalang tu toto nge Iesus ke ngana laka popoia ure nemur.

<sup>39</sup> “Imem mo esia nga matamem, ure nemur nenge Iesus popoia nge Israel pe nge Ierusalem. Te hune i nga ana manga toto ke mete. <sup>40</sup> Pe nga etue mol ngana nga ana metenga nga hoena, NeHalang hemaule heke mule i ke hana hel te esia i. <sup>41</sup> Hana lochloch te esia i ero. Imem toro nenge NeHalang hesilei hote nike. Ke imem mo esia i nga ana metenga nga hoena pe mo ngau pe mo in luluch nge i. <sup>42</sup> Pe hele at nge imem ke mo haliu hote na helenga urana toto ngana lange hehei pe hana. Pe tunge ume palaungana nenge mo hele ke Iesus i sipona NeHalang nena non toto nenge lape nau teu nga hehei pe hana lochloch reria poinga mur. Iri nenge te maulul pe iri nenge te mete lo. <sup>43</sup> Hetatalonga mur lochloch te hele urume i ke te teke, Nga Iesus ene, iri lochloch nenge leteria manmanna nge i lape NeHalang saua reria poinga poreke ngana mur ke te

lasus toto.”

<sup>44</sup> Petrus helele kura pe Opepengpeng sio at pe hemuta ia iri lochloch nenge te longlonge helenga nem. <sup>45</sup> Iuta mur hel nenge leteria manmanna nge Non Soke, nenge te koko luluch nge Petrus te rura. Iange te esia hana lomonmona ngana mur nge NeHalang hekule Opepengpeng ke rongo heke iri ke pomanga hemuta heke nge imem pule. <sup>46</sup> Pe te longe iri nge te helele ia helenga nge altoto pe te heto heke Non Soke ene.

<sup>47</sup> Ol pe Petrus hele, “Itei nenge heo ele ech nenge te henune hana nemur? Iange iri te mene Opepengpeng ke pomange ita.” <sup>48</sup> Pomalam hele ke kerkereng ke te henune iri nga Iesus Kristus ene. Ol pe te hele lange Petrus ke tu luluch nge iri nga etue hel pule.

## 11

### *Petrus Lange Ierusalem Pe Hele Urume Utar Nemur Nenge NeHalang Poia Lange I*

<sup>1</sup> Iok laol, Iesus nena hekulkulunga mur pe iri lochloch ngana nenge leteria manmanna nge Iesus, te longe helenga e nge te heleia ke te teke, hehei pe hana lomonmona ngana mur, iri pule te mene NeHalang nena helenga ke ulolo. <sup>2</sup> Ke nga etue nenge Petrus la mule nge Ierusalem, iri (Iuta mur) nenge leteria manmanna nge Iesus pe te nanasia poinga nenge teririr us, te hele inin taua i ke pomai, <sup>3</sup> “O poia poinga utar panenge oteu langa hana lomonmona ngana mur reria pele pe ongau luluch nge iri pamam? Hana nem terir us erochro iam!”

<sup>4</sup> Iok laol, Petrus lohaka pe nana hote ure lochloch ngana lange iri ke nek toto. Pe hele, <sup>5</sup> “Iau etu nge Iopa pe e hetalaulau. Ol pe enau opek ke e esia ute e nge pomanga malenga palaungana, nge sio at nga lut nga tapa. Pe ana ure, te rahit ele nga ana horo mur nge iri henel pe te hesue ke

at toto nga matak. <sup>6</sup> Iok, e teke enau teu pe e esia huros mur nenge aperia henel pe nenge nakuria manga hole, pe ngie mur. <sup>7</sup> Ol pe e longe helenga e nge hele at nge iau ke teke, ‘Petrus, o lohaka ke ohun am huros ke o ngau!’

<sup>8</sup> “Pe iau e tuacholia, ‘Non Soke, heo ngana toto iam, nge e ngaua huros nenge muna pe lemlem ero.’

<sup>9</sup> “Ol pe helenga neu sio at henei ngana nga lut nga tapa pe hele mule at nge iau ke mai, ‘Ure lochloch ngana nenge NeHalang poia iri ke te lemlem, a hetue iri ke te lemlem ero, ero.’ <sup>10</sup> E longe helenga neu nge hele at nge iau ke hemol. Ke het pe tetak heke mule ure lochloch ngana nemur la mule nga tapa.

<sup>11</sup> “Pe nga etue neu pengpeng hana mol nge te kulosia iri at nge Kae-sarea, teat ke te lohot nga pele nenge e tutuia. <sup>12</sup> Pe Opepengpeng hele at nge iau ke teke, ‘O matau ero. O koko mana nge iri. Pe titik mur hana rahtele elle nei, tela luluch nge iau kela mo iteu nga non neu na pele.’

<sup>13</sup> “Pe ana non, nana at nge imem nge teke esia angkelo e nge mes nga na pele. Pe angkelo neu, hele lange i ke pomai, ‘O kulosia hana hel ke tela taua Simon ke at. Ana non ene e pule laka Petrus. I kou tutu nge Iopa. <sup>14</sup> I lape atia helenga e nge iong. Pe nga helenga nem, iong pe hulua lochloch ngana nenge tetu nga lem pele nem, lape a mene maulinga nge koko.’

<sup>15</sup> “Iok laol, e talun ke e helele pe Opepengpeng sioat nge iri ke pomanga nenge sio at nge ita nga Pentikos ana etue nem. <sup>16</sup> Ol pe letek metene Non Soke nena helenga nenge teke, ‘Ioanes henune hehei pe hana nga ech pe imo lape a mene henuninga nga Opepengpeng.’ <sup>17</sup> Ita, letera manmanna nge Non Soke Iesus pomalam NeHalang tunge tunginga nem at nge ita. Pe heueu nei, NeHalang tunge tunginga nem lange iri pule. Pe iau utar toto nenge

lape epoi ele ume nenge NeHalang i sipona poia lange iri?"

<sup>18</sup> Hana nemur te longe Petrus nena helenga mur pe leteria maluch sio mule pe leteria inin ero ol. Pe te heto heke NeHalang pe te hele, "Eh! NeHalang teke hana lomomona ngana mur pule, te hulua leteria pe te mene maulinga nge koko."

### *Hehei Pe Hana Nge Antiok Leteria Manmanna Nge Iesus*

<sup>19</sup> Iok, iri nenge leteria manmanna nge Iesus pe ua parai nga etue nenge Stipen mete, hel tela toto nge Poenesia pe nga mimio nge Saiprus pe nga kileng nge Antiok. Pe nga kileng nemur, te haliu hote NeHalang nena helenga lala nge Iuta mur mana. <sup>20</sup> Pe hana hel nge iri, reria nga mimio nge Saiprus pe nga kileng nenge Sirini. Iri nemur tela nge Antiok pe te haliu hote helenga urana toto ngana nge Non Soke Iesus lange Krik mur pule. <sup>21</sup> Pe Non Soke nena kerkerenga palaungana tu luluch nge iri, pomalam hehei pe hana halang leteria manmanna pe te nanasia Non Soke.

<sup>22</sup> Helenga nei, song kela NeHalang nena hana mur nenge Ierusalem te longe, pomalam te kulosia Parnapas ke lange Antiok. <sup>23</sup> Iok, Parnapas lake puris, pe es tote nga matana nga NeHalang halaungana ia hehei pe hana mur nga lamau. Ol pe iech toto pe hekerkereng ia hehei pe hana ke muteria tau tote Non Soke pe te nanasia i ke kokoes. <sup>24</sup> Parnapas i non urana ngana toto. I, letena manmanna ngana tu ke kerkereng toto, pe Opepengpeng tuke muta toto nge i. Ke nga etue neu, hulua halang toto mule, te koko teu luluch nge iri nenge leteria manmanna nge Non Soke.

<sup>25</sup> Ke het pe Parnapas lange Tarsus ke tango rere Sol. <sup>26</sup> Tango rere Sol kela hottaua i pe mene i ke iri nai tela mule nge Antiok. Ke Parnapas iri nai Sol tetu luluch nge NeHalang na

hana mur nge Antiok pe te hetottore iri halang toto ke hesinga elle. Ke nge Antiok, iri nenge leteria manmanna nge Iesus, te hetue iri hana nenge te lohot nga mata nenge Kristus pe eria nem talun pengpeng nge Antioch.

<sup>27</sup> Pe nga etue neu pengpeng, hetatalonga mur hel te lohaka nge Ierusalem, ke tela nge Antiok. <sup>28</sup> Elle nge iri ene laka Akapus. Ana non mes haka nga Opepengpeng na kerkerenga pe haliu hote uringa palaungana e nge lape lohot nga kileng lochloch ngana nga ich. (Uringa nei lohot ke manmanna nga etue nenge Klatius nauele kileng nem.) <sup>29</sup> Ol pe Non Soke nena hana mur te longe helenga neu pe te hele ke te teke lape te halaua pekngaria mur, nenge Iutea nga aria ngaunga uruna. <sup>30</sup> Iok, te takiraua umtutuna ke het pe te tunge lange Parnapas iri nai Sol ke te laia lange pekngaria nemur nge Ierusalem, aria almasinga ana hana.

## 12

### *Petrus Lohot Nga Tuele Au Ngana*

<sup>1</sup> Iok, nga etue nem, naungaala ana non soke ne Herot talun ke heporeke mata nenge NeHalang. <sup>2</sup> Pomalam, mene Ieims nenge tina Ioanes ke hune i nga kakop. Pe Iuta mur te esia poinga nei pe te iech mana. <sup>3</sup> Ke nga ngaunga matana nenge Inगतoto ana at, Herot hele ke te laua Petrus. <sup>4</sup> Te laua i ke het pe tetal teu sapele i langa tuele au ngana. Pe Herot hele ke palinga hel ana hana mur ana tuluk iri henel tenau ele i. Pe nga tuluk elle pe elle ana hana iri henechnel ke tenau ele Petrus. Iange Herot teke Inगतoto ana etue het pe mene hote Petrus ke ontei hote i nga hulua mataria.

<sup>5</sup> Pomalam, Petrus tumana nga tuele au ngana. Pe hehei pe hana nemur nenge leteria manmanna toto nge Iesus, te hetalaulau ke kerkereng toto lange NeHalang, ke halaua Petrus.

<sup>6</sup> Pomange rou, Herot lape mene hote Petrus kela ontei hote i nga hulua mataria. Pe nga miliko, Petrus mamani mana nga palinga hel ana hana nai tunangaria pe tekale hite Petrus penna pe apena nge iri nai nem. Pe palinga hel ana hana hel pule temes ke tenau ele i nga piunga matana. <sup>7</sup> Ol pe NeHalang na angkelo lohote, pe lemenga tualeme nga tuele au ngana letena. Pe angkelo neu, lake rahite Petrus nga ekena pe hengo heke i pe hele, “O lohaka ke ueiuei mana.” Ol pe rur kerkereng ngana nenge tekale hite nga Petrus apena pe penna neu, un hot mana.

<sup>8</sup> Ke het pe angkelo neu hele lange i, “O mele am tal pe o heron heke lem ae ulina.” Pe Petrus poia ure nemur Pe angkelo neu hele mule lange Petrus, “Iok, o heron heke lem hengeron nenge hot ana pe o nanasia iau.” <sup>9</sup> Pe Petrus nanas hot sapele angkelo neu, nga tuele au ngana. Pe angkelo neu poia ure neu ke lohote ke manmanna. Pe Petrus eteia ero toto. Teke ma nau opene mana ia ure nemur. <sup>10</sup> Iok, tei hot ke tela pe te saolia palinga ana hana mur hel pe tela mana. Te i ke la pe te saolia hel pule pe iri pule tepoi ele iri ero. Te la mana. Iok, tei la taua piunga matana nenge palaungana toto. Pe piunga matana neu, te chau hite ke kerkereng toto. Pe pule, piunga matana neu, nau hot la pengpeng nga kue tana. Tela pe piunga neu, i sipona olha. Pomalam, tei hot sapele ke tela. Tei ke sase pol nga kue tana, pe angkelo neu erue sio sapele.

<sup>11</sup> Ol pe Petrus, ramana mallaha pe letena matana ke nek toto ol, nga ure nemur nenge te lohote nge i. Ol pe hele, “Nei ol, e etei tote ke ure nemur te lohote ke manmanna toto. Nenge Non Soke hekule nena angkelo ke mene hote iau nga Herot na kerkerenga. Pe pule, ure nenge hana Iuta mur te teke te esia nge lohote nge iau, lape lohote ero ol.”

<sup>12</sup> Iok, Petrus ramana mallaha pe

letena matana ke nek toto ol, pe i sapele ke langa pele nenge he Maria, nenge Ioanes Makus tana. Pe nga pele neu, hulua halang te eukirau ke te hetalaulau. <sup>13</sup> Iok, hei malolong e nge hekuleileinga ana tu lamau pule. Pe ene laka Rota. Ana hei, longe Petrus nge ischongchong nga piunga, pe teke lake loe piunga. <sup>14</sup> Pe ero. Lange longo il mene Petrus hele ngana pe letena iech toto. Ol pe song ke la mule pe hele ke teke, “Petrus laka ischongchong nga piunga matana nem!”

<sup>15</sup> Pe iri nemur nga pele neu letena, te hele lange i, “Tong, lape am hauaua iam!” Pe ana hei helele kura ke teke ure nei lohote ke manmanna. Ol pe iri te lohaka pe te hele ke te teke, “Lape Petrus na angkelo iam.”

<sup>16</sup> Pe ero, Petrus kou ischongchong nga piunga kura. Ol pe tela ke teloe piunga pe te esia i nge mes. Te esia Petrus pe ramaria au ala toto. <sup>17</sup> Pe Petrus penna poi lange iri ke te reng, pe nana urume i nge Non Soke mene hote i nga tuele au ngana. Ke het pe hele, “A heleia ure nei lange Ieims, pe titira mur lochloch ngana nenge leteria manmanna nge NeHalang.” Petrus hele ke mau ke het pe loloun ke langa kileng unne pule.

<sup>18</sup> Pe nga uach ol, palinga hel ana hana nemur te poia chauchainga pe tangoraranga palauangana nga utar nenge lohote nge Petrus nga miliko. <sup>19</sup> Pe Herot tung hot sapele nena helenga kerkereng ngana, nenge te nanasia ke te tango rere Petrus. Tenau rere i pe tehot taua i ero toto. Pomalam, mene palinga hel ana hana nemur, pe ontei hote iri ke nek. Ontei hote iri ke het pe hele ke teke iri lochloch te mete. Ke het pe Herot lohaka nge Iutea pe la ke tu pol mana nga kileng nenge Kaesarea.

#### *Herot Mete*

<sup>20</sup> Nga Herot tu pol ngana nenge Kaesarea, letena inin tau totote hana nenge Tir pe Siton. Ol pe hana nemur



nga kileng nai neu, te eukirau ke elle ke la te esia i pe tepoi ke nek lange i. Pe nga tele ngana, tela tala nge Plastus pe te hele lange i ke halaua iri. Iange Plastus i non nenge nauele Herot na pele. Ke het pe te hele lange Herot ke poi ke urana mule lange iri, iange iri nemur nga kileng nai neu, te menmene aria ngaunga nga Herot na kileng.

<sup>21</sup> Iok laol, etue nem at nenge hana nemur te teke tela ke te esia Herot. Pe Herot heron heke hengeron mur nenge naungaala ana pe la ke are haka nga nena arenga palaungana pe tung hote nena helenga mur. <sup>22</sup> Ol pe hulua nemur te alngaria haka ke te teke, “Non pa nei tal haka tote i sipona ke i pomanga NeHalang toto i! Nakuna nenge NeHalang i sipona koi helele nei, iange non pulut ngana pele hele ngana pomai ero.” <sup>23</sup> Pe Herot hele ngana nemur, heto heke NeHalang ia ero toto. Pomalam, Non Soke nena angkelo poia i ke singina haleles pe matmata tole i pe mete sapele.

<sup>24</sup> Pe NeHalang nena helenga mur, puo ke lala ke hehei pe hana halang te longlonge. <sup>25</sup> Ke Parnapas iri nai Sol te poia aria ume nge Ierusalem ke het pe tela mule nge Antiok. Pe te mene Ioanes Makus ke la luluch nge iri.

## 13

### *Tekulos Hote Parnapas Iri Nai Sol*

<sup>1</sup> Nge Antiok, iri nenge leteria manmanna pe te heto hekeke Iesus te tutu. Pe hana hel nge iri, iri hetat-alonga. Pe hel iri hetoronganga. Hana nemur eria koi; Parnapas pe Simon (nenge singina muna) pe Lusius (nenge nena nge Sirini) pe Manaen (nenge ana lala Herot Antipas) pe Sol. <sup>2</sup> Iri nemur te hetalaulau pe te heto hekeke Non Soke pe teheo nga ngaunga pule. Pe Opepengpeng hele lange iri ke pomai, “A henonou hote Parnapas iri nai Sol. Iri lape te poia

ume palaungana nenge e iua iri nai ke te poia.” <sup>3</sup> Iok, teheo nga ngaunga pe te hetalaulau ke het pe tetal heke peria nge Parnapas iri nai Sol pe te kulosia iri ke tela sapele.

### *Parnapas Iri Nai Sol Tela Nge Saiprus*

<sup>4</sup> Iok laol, Opepengpeng poia iri nai ke tei sio lange Selusia pe te mene imot pe tela sapele nga mimio nenge Saiprus. <sup>5</sup> Tela te lohote nge Salamis pe te hele hote NeHalang nena helenga nga Iuta mur reria hetoronganga ana pele letena. Pe Ioanes Makus, kokoko nge iri ke halaulaua iri.

<sup>6</sup> Iok, tela sapelpele nga mimio nem ilina ele nge Papos. Pe nga lamau, te saolia non Iuta e nge popoi ure paluna. Ene laka Par-Iesus pe i teke i hetatalonga pe ero. I chanangnanga mana. <sup>7</sup> Pe ana non tu ke rochroi nge non soke e nenge nauele mimio nem, ene laka Serkius Paulus. Pe Serkius Paulus nem, letena matana nga ure lochoch. Pe i hekulo Parnapas iri nai Sol aria, iange teke longo nga NeHalang nena helenga. <sup>8</sup> Pe Elimas non nenge popoi ure paluna nem, ramana urana nge iri ero toto. (Nga helenga Krik, te hetue non nenge popoi ure paluna nem ke ene Elimas) Ana non teke poi ele non soke neu nge letena manmanna nge Iesus. <sup>9</sup> Ol pe Opepengpeng hemuta heke sapele Sol, nenge ene epule Paulus. Pe Sol naula pengpeng nge Elimas pe hele, <sup>10</sup> “Iong nem, Non poreke ngana tuna laka iong! Iange lememe ero toto ia ure lochloch ngana nenge te urana! Pe iong, o pallaka ngam kou kura. Ure lochloch ngana nenge te poia nga Non Soke ene, ure nemur manmanna. Pe iong, o hele ke o teke ure nemur te pallaklaka ia iri. <sup>11</sup> Ke heueu nei lape o amnei am nga Non Soke penna mukam. Lape matam hit ke o kolkol ia chaia matana mukam.” Ol pe non neu matana auala pe pal

rara sapele, ke teke tango rara mele ke apea i.

<sup>12</sup> Iok laol, non soke Serkius Paulus esia ure nei nge lohot ke mau pe letena manmanna toto sapele. Iange rura toto nga Non Soke nena hetoronga mur.

### *Tela Nge Antiok Nga Kileng Nenge Pisitia*

<sup>13</sup> Paulus iri ul pekngana mur te mene imot nge Papos pe tela nge Perka, nga kileng nenge Pampilia. Pe nga lamau Ioanes Makus hile sue iri pe la mule nge Ierusalem. <sup>14</sup> Iok, iri nemur te lohaka nge Perka pe tela nge Antiok nga kileng nenge Pisitia. Pe nga Sapat ana etue, tei teu kela teare sio nga hetoronga ana pele letena. <sup>15</sup> Iok, te sisia alalaha nemur nenge Moses pe hetatalonga mur ke het pe te hekule helenga lange Paulus iri nai Parnapas ke te teke, “Atong mur, nenge teke lemo helenga hel nge a teke a hekerkereng ia hehei pe hana leteria, ames haka pe a hele.”

<sup>16</sup> Ol pe Paulus mes haka sapele pe tul heke penna pe hele, “Imo hana nenge Israel pengpeng pe imo hana lomomona ngana mur nenge a heto heke NeHalang, a longo at nge iau. <sup>17</sup> Israel mur aria soke NeHalang, henonou hote rera tete mur nge nike. Nga etue nenge tetu nge Ekipto, poia iri ke iri hulua. Pe nga i sipona na kerkerenga nenge palaungana toto, mene hote iri nga kileng nem. <sup>18</sup> Pe nga etue nenge te ii nga ich sana lomona, nauele iri ke nek toto ke hesinga iri ana non kina nai (40). <sup>19</sup> Pe hekou sue tuele tana iri rahtele nai nga ich nenge Kanan. Pe tunge ich nemur lange nena hana mur pengpeng ke reria ia. <sup>20</sup> Ure nemur te lohotot ke hesinga iri ana non kina lime iri henel pe ana non kina nai pe analoch (450).

“Ke het pe NeHalang henonou hote hana mur hel ke iri muka ia nena

hana mur, ke la het nga etue nenge hetatalonga Samuel. <sup>21</sup> Ol pe hehei pe hana lemeria ke te teke none lohot ke iri aria naungaala ana non ia. Pomalam te onteia NeHalang pe NeHalang henonou hote Sol nenge ne Kis tuna. Sol lohot nga mata nenge Pensamin pe nauele hehei pe hana ke hesinga iri ana non kina nai. (40) <sup>22</sup> Iok, NeHalang mene tote Sol pe henonou hote Teuit ke mene Sol munna. Pe NeHalang heleia Teuit ke teke, “Teuit i lesi tuna. Pe utar nenge e hottaua nge i, i non nge urana. Ke iau lemek tau tote non nenge pomai. Iange i poia ure lochloch ngana nga iau lemek ngak.’

<sup>23</sup> “Pe nge he, lape Iesus nenge Israel mur aria hemasinga lohot nge non nei na tete mur. Ure nem lohot iange NeHalang i sipona hele talue lo ke teke poia. <sup>24</sup> Pe Iesus lohot ero kura pe Ioanes haliu ke teke hehei pe hana lochloch ngana nge Israel te hulua reria poinga mur pe te mene henuninga. <sup>25</sup> Iok, Ioanes poia ana ume ke hetet lo pe hele lange hehei pe hana, ‘Imo a teke iau itei mai? A longo ke nek. Non nenge a kulelele, ngana kou atat kura. Pe a teke i nge iau ero. Iau e urana ero toto nge e halaua i ke epoi hote nena ae ulina nenge heronronia nga apena.’

<sup>26</sup> “Titik mur, imo nenge a lohot nge Apraham pe imo hana lomomona ngana mur nenge a heto hekeke NeHalang, helenga nenga maulinga nge koko, te hekule at nge ita. <sup>27</sup> Iange hana nenge Iersalem pe aria papalauna mur ramaria mallaha nge Iesus ero. Pe pule te eteia hetatalonga mur ria helenga luna ero, nenge tesis hote ke kokoes mana nga Sapat ana etue. Ke pomalam tetal sio tote Iesus. <sup>28</sup> Pe te tango rere kue e nge te teke te hune Iesus ia. Pe ero. Ol pe te hele lange Pilatus ke te teke, lemeria toto nge Iesus mete. <sup>29</sup> Pe poinga nenge te poia nem, pete

**13:13:** Ume 15:38    **13:17:** Exo 1:7; 6:6; 12:51    **13:18:** Num 14:34; Deu 1:31-32    **13:19:** Deu 7:1; Jos 14:1    **13:20:** Jdg 2:16; 1Sa 3:20    **13:21:** 1Sa 8:5, 19; 10:20-24    **13:22:** 1Sa 13:14; 16:12; Psa 89:20    **13:23:** 2Sa 7:12-16    **13:24:** Mat 3:1-2    **13:25:** Ioa 1:20, 27    **13:28:** Mat 27:22-23  
**13:29:** Mat 27:59-60

tote NeHalang nena helenga mur lochloch nenge tehas sue ke ulolo. Ke te takis sue i nga ana manga toto pe la tetal teua nga polo. <sup>30</sup> Pe NeHalang hemaui heke mule i nga metenga. <sup>31</sup> Pe Iesus hetei hote i ke emule mana lange iri nenge tei luluch nge i nge Kalelea ke lange Ierusalem. Ke heueu nei, iri nemur te hele hotote ure nemur nenge lohotos nge iri, lala nge Israel mur. <sup>32</sup> Ke imem mo hele hote helenga urana toto ngana nem lange imo pule. Nga utar nenge NeHalang hele ke kerkereng ke teke poia lange ratete mur nge nike. <sup>33</sup> Ke pomalam heueu nei, NeHalang nena helenga nem lohotos ke manmanna ke tuturia mur ita ta naue. Nga nenge hemaui heke mule Iesus nga metenga, ure nenge lohotos nem tehas urume tele nike nga alalaha chonna naingana nenge Sam. Ke ana helenga hele ke teke,

“Tuk laka Iong;

ke heueu nei Temem koi Iau’ ”

<sup>34</sup> Manmanna toto ke NeHalang hemaui heke mule Iesus nga metenga. Pe i ma ke punich nga polo letena ero. Pomalam, NeHalang hele ke pomai,

“Imo lape a mene petanga pengpeng ngana nenge e hele talue lange Teuit ke lape e tunge.’

<sup>35</sup> Pe nga alalaha nenge Sam, chonna e pule hele ke teke,

‘Iong onau sio mene lem non nenge pengpeng toto

ke ma ke punich ero.’

<sup>36</sup> “Iok, Teuit nanas tau mene NeHalang lemene ngana nga tungana nga ich. Pe nga etue nenge mete, tealohite i nga na tete mur tema ngaria pe make punich nga polo letena. <sup>37</sup> Pe i nenge NeHalang hemaui heke mule nga metenga nem, ma ke punich mana nga polo letena ero. <sup>38</sup> Titik mur a longo ke nek, nge Iesus i toro mana, NeHalang lape ul rumena ia lemo poinga poreke ngana mur pe nau la mule nge iri ero

ol. <sup>39</sup> Pe Iesus, i sipona lape mene mule iri nenge leteria manmanna nge i. Mene mule iri nga reria poinga poreke ngana mur nenge rahit tote iri ke kerkereng. Iange Moses na hotonga e nakuna ero toto nge poia poinga nem. <sup>40</sup> Iok, a nauala amo ke nek ol iange lape ure nem nenge hetatalonga mur te heleia, lape lohotos nge imo. Hetatalonga nemur te hele ke pomai,

<sup>41</sup> “ ‘Imo nenge a tua salaklaka halali, a longo at.

Lape ramamo auala mana pe a mete.

Iange lape epoi hote ute nga atu ngamo nga ich.

Pe imo lape letemo manmanna ia ero toto.

Pe nenge te hele urume lange imo, lape letemo manmanna ero pule.’ ”

<sup>42</sup> Iok, Paulus iri nai Parnapas te lohotos nga heteronga ana pele lo, pe hehei pe hana te hele lange iri ke te teke, iri nai lape teat mule nga Sapat ana etue e pule ke te hetore iri ke nek toto nga ure nemur. <sup>43</sup> Iok, tehot lange hot lo pe Iuta mur pe hana lomonmona ngana mur nenge te nanasia Iuta mur te hetaulaulau ngaria, te nanasia Paulus iri nai Parnapas. Pomalam Paulus iri nai Parnapas te hekerkereng ia hulua nemur leteria, ke te teke kokoes mana, leteria manmanna nge NeHalang pe tenau la mana nge i nga nena tunginga urana ngana mur nge tunge lala nge iri.

<sup>44</sup> Iok laol, Sapat ana etue neu at pe nakuna nenge hulua lochloch ngana nenga kileng neu te lohaka ke la te longo nga Non Soke na helenga. <sup>45</sup> Ol pe Iuta mur, te esia hulua lochloch ngana neu pe saria keke Paulus pe te hele poreke i. <sup>46</sup> Pe Paulus iri nai Parnapas te haliu hot ke soke toto ke te teke, “Imem mo teke mo hele hot tele NeHalang na helenga lange imo. Pe imo, aulo ala pe lememo ero

nge a mene helenga nei. Ke poinga nem henonou hote imo ke nakumo ero toto nge a mene maulinga nge koko. Pe pomalam lape mo hile sue imo pe mola nge hana lomomona ngana mur. <sup>47</sup> Iange Non Soke hele ke kerkereng at nge ita ke teke,

“E poia imo ke pomanga lemenga nenge lange hana lomomona ngana mur.

Ke pomalam lape kileng lochloch ngana nga ich te mene maulinga nge koko.’ ”

<sup>48</sup> Iok laol, hana lomomona ngana mur te longe ke mau pe te iech toto, pe te heto heke Non Soke na helenga. Pe iri nenge NeHalang henonou hote ke te mene maulinga nge koko, leteria manmanna toto sapele nga helenga nemur.

<sup>49</sup> Ol pe Non Soke na helenga puo ke palaungana toto nga tuele kina neu. <sup>50</sup> Pe nge Antiok, Iuta mur teteu heke hehei pe hana papalauna leteria ke te talun ke tepoi poreke Paulus iri nai Parnapas pe telope hote iri nga reria tuele kina neu. <sup>51</sup> Iok laol, Paulus iri nai Parnapas tepasis sue kileng neu ana maruchrue nga aperia pe tei ke tela nge Ikonium. <sup>52</sup> Pe hulua nenge leteria manmanna nga NeHalang na helenga nge Antiok, te iech toto pe Opepengpeng tu ke muta toto nge iri.

## 14

### *Paulus Iri Nai Parnapas Tela Nge Ikonium*

<sup>1</sup> Pe nge Ikonium, Paulus iri nai Parnapas tei teu nga hetoronga ana pele. Pe te haliu hote NeHalang na helenga ke nek toto. Ol pe Iuta mur pe hana lomomona ngana mur halang leteria manmanna. <sup>2</sup> Pe iri Iuta mur nenge leteria manmanna ero, teteu nga hana lomomona ngana mur leteria ke tetua lele sue leteria manmanna ngana. <sup>3</sup> Ke Paulus iri nai Parnapas tetu lamau ke mala toto, pe te haliu hote Non Soke na helenga ke kerkereng toto. Pomalam, Non Soke

tunge kerkerenga nenge te popoia ure papalauna mur. Ke nga poinga nem, Non Soke hekerkereng ia iri nai. Te haliu hote Non Soke nge letena ia ita pe mene mule ita. <sup>4</sup> Pe hana nenga kileng neu telas hel. Ke hel tela nge Iuta mur pe hel tela nge Paulus iri nai Parnapas.

<sup>5</sup> Ol pe hana lomomona ngana mur pe Iuta mur te hele tele hel nge iri ke te teke tepoi poreke iri nai neu pe te tamal hune iri nga um. <sup>6</sup> Iok laol, Paulus iri nai Parnapas te eteia lo nge hana nemur te teke te poia poinga neu lala nge iri. Pomalam, te ua sapele ke tela nge Listra pe Tepi nga kileng nenge Likaonia. <sup>7</sup> Pe te hele hote NeHalang na helenga urana toto ngana nga tuele kina nem.

### *Tela Nge Listra Pe Tepi*

<sup>8</sup> Iok, nga kileng nenge Listra, none tu. Non neu apena lul nga tana hoho ngana ia nike pe i rara ero toto. <sup>9</sup> Ana non are pe longo ke nek toto nga Paulus na helenga mur. Pe Paulus esia i pe eteia ke non nem letena manmanna toto. Ol pe teke hemasia i. <sup>10</sup> Iok laol, Paulus naula pengpeng nge non neu pe hele ke kerkereng toto lange i ke teke, “Apem kerkereng pe omes haka.” Ol pe non neu tamu haka pe talun ke irara sapele.

<sup>11</sup> Pe hulua nemur, te esia ure neu nge lohote pe alngaria haka nga ria helenga nenge Likaonia ke te teke, “Ara soksoke ngana nai koi! Te hul ke iri non ke tesio at nge ita nei lo!” <sup>12</sup> Pomalam, te hetue Parnapas ke ene Seus pe Paulus te hetue ke ene Hemes. Iange i, i mukmuka nge iri ke haliu hotote NeHalang na helenga mur. <sup>13</sup> Iok laol, non nenge mene Seus hanna munna, mene pulumakau pe ae rorana mur ke laia nga kileng neu ana kue matana. Iange Seus na pele, te umeia ke rochroi mana nga kileng neu pe nge hot. Te teke te makia ure nemur ke pomanga ria tunginga nenge lange Paulus iri nai Parnapas.

**13:47:** Isa 49:6 **13:51:** Mat 10:14; Ume 18:6  
**14:11:** Ume 28:6

**14:3:** Mak 16:20; Hip 2:4 **14:5:** Ume 14:19



<sup>14</sup> Pe nga etue nenge Paulus iri nai Parnapas te longe, te tachach ia rea hengeron mur pe te song tele hulua nemur pe alngaria ke te teke, <sup>15</sup> “Imo hana nemur, pomere nenge a teke a poia poinga nei at nge imem? Imem mo pomange imo mana. Pe imem hana mana ke pomange imo pule. Moat ke mo hele hot mene helenga urana toto ngana lange imo nenge mo teke a heto heke aetapuna mur ero pe a heto heke mene NeHalang i sipona nenge ala hote tapa pe ich pe ruach pe ure lochloch ngana nenge tetu teu nga ure nemur. <sup>16</sup> Nge nike, poia hehei pe hana lochloch ke tela nga lemeria ngana mana. <sup>17</sup> Pe i sipona teke hemallaha hot tote i ke teke manmanna toto nge i koi tu. Pomalam poia poinga urana toto ngana nenge tung sue pitte at nge ita pe poia ngaunga alona mur ke te haka pe tehei nga aria etue pengpeng. Pe pule poia ita ke ara ngaunga halang pe poia letera ke iech manmana.” <sup>18</sup> Paulus iri nai Parnapas te hele hote helenga nemur ke te teke, tepoi ele hana nemur pe ero. Hana nemur leteria kerkereng toto ke te teke te poia tunginga lange iri nai kura.

<sup>19</sup> Iok, Iuta mur hel teat nge Antiok pe Ikonium. Iri, te ngai heke hehei pe hana ke tehul rumeria nge Paulus iri nai Parnapas. Pomalam, te tamalia Paulus ana um pe tehote hote lange hot. Pe iri, nga leteria te teke Paulus kou mete lo. <sup>20</sup> Pe ero. Iri nenge leteria manmanna nge Non Soke, teat ke te emurung hite Paulus. Ol pe ana non lohaka mule pe iteu langa kileng neu. Iok, poma nge rou Paulus iri nai Parnapas tela mule nga kileng nenge Tepi.

### *Tela Mule Nge Antiok Nga Kileng Nenge Siria*

<sup>21</sup> Iok, Paulus iri nai Parnapas te hele hote NeHalang nena helenga nge Tepi pe hulua leteria manmanna

pe te koko teu nge iri nenge te nanasia Iesus. Ol pe Paulus iri nai Parnapas tela mule nge Listra pe Ikonium pe Antiok. <sup>22</sup> Pe te hele ke kerkereng toto lange iri nenge leteria manmanna ke tetu ke kerkereng toto nga leteria manmanna ngana mur. Pe te hele, “Nenge teke tateu langa NeHalang nena naualanga pe nekinga, lape tai rurung teu langa kileng chatala ngana mukam.” <sup>23</sup> Pomalam iri nai te henonou hote hana papalauna hel nga kileng nemur ke te mukaia iri nenge leteria manmanna nge Non Soke. Pe iri nai te hile ngaunga pe te hetalau aria pe te talue iri langa Non Soke nena naualanga. Iange iri leteria manmanna toto nge Non Soke.

<sup>24</sup> Paulus iri nai Parnapas teteu langa tuele tana nenge Pisitia ke het pe tela nge Pampilia. <sup>25</sup> Pe nge Perka te haliu hote NeHalang nena helenga pe tesio la sapele nge Atalia. <sup>26</sup> Pe nge Atalia, te haka nga imot pe tela sapele nge Antiok nga kileng nenge te talune aria ume ia. Pe nga etue nenge te talune aria ume, hehei pe hana lamau te hetalaulau aria ke kerkereng toto ke NeHalang tunge poinga urana ngana lange iri kela het nga etue nenge te heulo hot mule aria ume neu.

<sup>27</sup> Iok, nga etue nenge te lohote mule nge Antiok, Paulus iri nai Parnapas te eukiraua hehei pe hana lochloch pe te hele hote ure lochloch ngana nenge NeHalang poia ke pengpeng nge hana lomomona ngana mur ke leteria manmanna. <sup>28</sup> Ke pomalam, iri nai tetu ke mala toto lamau luluch nge hehei pe hana nenge leteria manmanna nge NeHalang.

## 15

### *Hana Papalauna Teole Aria Nge Ierusalem*

<sup>1</sup> Iok, hana hel nge Iuta tela nge Antiok pe te talun sapele ke te hetore hana lomomona ngana mur nenge

leteria manmanna nge Iesus. Pe te hetore iri ke mai, “Imo, lape NeHalang mene mule imo ero toto iange te riria imo ero. Nenge teke lememo nge atu ke a maul, iok lape teriria imo ke pomanga hotonga nenge Moses hetoro ita ia.” <sup>2</sup> Pe Paulus iri nai Parnapas, te longe helenga nei pe ma ke nek nga iri nai leteria ero toto. Ol pe iri ul hana nemur te hele inin tau hel nga ure nei. Pomalam iri nenge Antiok te teke lape Paulus pe Parnapas pe hana hel tela nge Ierusalem ke te esia Iesus nena hana mur pe hana papalauna mur nga helenga nei.

<sup>3</sup> Iok laol, iri nenge leteria manmanna nge Iesus nge Antiok te kulosia iri ke tela sapele. Pe tei ke tela nga kileng nenge Poenisia pe Samaria pe te nana urume hana lomonmona ngana mur nge leteria manmanna nge NeHalang. Pe helenga nei poia iri nenge leteria manmanna ke te iech toto. <sup>4</sup> Iok, tela te lohote nge Ierusalem pe Iesus nena hekulkulonga mur pe hana papalauna mur pe iri lochloch ngana nenge leteria manmanna nge Iesus te iech ele iri. Pe Paulus pe Parnapas pe hana nemur te nana urume ure lochloch ngana nenge NeHalang halaua iri ke te poia.

<sup>5</sup> Iok, Parisio mur hel leteria manmanna nge Iesus. Pe iri te lohaka mule pe te hele ke te teke, “Hana nenge iri luta ero pe leteria manmanna nge Iesus, lape te riria iri. Pe lape ta hetore iri ke te nanasia hotonga nenge Moses.”

<sup>6</sup> Iok, Iesus na hekulkulonga mur pe hana papalauna nemur te emurung ke te teke te hepeng hote helenga nei. <sup>7</sup> Te poia ana helenga ke lala ol pe Petrus mes haka pe hele, “Titik mur, imo a eteia lo ke NeHalang henonou hote iau nga tuna ngamo, ke e hele hote helenga urana toto ngana lange hana lomonmona ngana mur. Ke

pomalam te longe pe leteria manmanna ia. Pe e talune ume nei ke mala toto lo. <sup>8</sup> Pe NeHalang nenge eteia hulua lochloch ramaria ume ngana, hetei hot pengpeng ia i lange hana lomonmona ngana mur ke hekulo sue Opepengpeng ke lange iri, ke pomalam mana nga nenge hekulo sue at nge ita. <sup>9</sup> NeHalang poia iri ke manga poingana ia ita. Nenge leteria manmanna nge i, lape helemlem ia operia ke operia lemlem pule. <sup>10</sup> Pe imo heueu nei, a teke a totoia NeHalang. Iange a teke a poia hana lomonmona ngana mur nenge leteria manmanna ke singiria meena toto. Pe e hele pengpeng lange imo, rera tete mur nge nike pe ita heueu nei pule, nakura ero toto nge ta takisia ure meena ngana nenge pomanga nenge a poia nem. <sup>11</sup> A longo ke nek, nenge teke letera manmanna toto nge NeHalang lape NeHalang mene mule ita ke pomange iri. Pe poinga nem lohote mana nga ara Non Soke Iesus letena poreke ngana pe lemene tau ngana ia ita.”

<sup>12</sup> Ol pe hulua lochloch ngana nenge te emurung neu te reng toktok. Pe Paulus iri nai Parnapas te lohaka pe te hele hote ure papalauna nemur nenge NeHalang hekerkereng ia iri ke te poia pe hana lomonmona mur te esia pe leteria manmanna. <sup>13</sup> Iri nai te hele ke het pe Ieims lohaka pe hele, “Titik mur, a longo at nge iau! <sup>14</sup> Simon hele hote lange imo lo, nga nenge teke NeHalang lemene taua hana lomonmona ngana mur pule. Ngana laka nenge hesilei hote hana hel nge iri ke i sipona nena hana mur. <sup>15</sup> Pe ure nenge lohote nei, lohote ke pomanga hetatalonga mur te hele ngaria ia nge nike. Nenge Non Soke hele ke teke,

<sup>16</sup> “ ‘Nga hoena lape eat mule pe Teuit na pele nei losio lo.

Pe lape e hemes heke mule.

Pe ure nemur nenge te poreke  
nga pele nei,  
lape eume heke mule iri ke nek  
pe etal mule iri nga muria mur.

<sup>17</sup> Pomalam, hana lomomona mur  
lochloch  
nenge iau lek non mur ia iri,  
lape te song ke teat mana nge iau.  
Iau, Non Soke, epoi hote ure nemur  
pe e hele ia

<sup>18</sup> ke te eteia nga halang nike lo.' ”

<sup>19</sup> Iok, Ieims lohaka pe hele mule ke  
mai, “Iau letek tuanin ke mai! E teke  
tanau pe hana lomomona ngana nemur  
te teke leteria manmanna nge  
NeHalang, ita tapoi lange iri ero.

<sup>20</sup> Pe e teke tahas mene alalaha e ke  
lange iri pe ta hele lange iri ke te  
ngaua ngaunga nenge tepoi tunginga  
ia lange aetapuna mur ero. Pe tema  
luluch nge hehei ero pe te ngaua  
huros nemur nenge te roke iri ero pe  
pule te inia toho ero. <sup>21</sup> Iange Moses  
na hotonga mur te haliu hotote nga  
NeHalang na pele mur nga kileng pe  
kileng. Pe te haliu hotote ke mala toto  
lo nga Sapat ana etue lochloch.”

### *Alalaha Nenge Lange Hana Lomomona Ngana Mur*

<sup>22</sup> Ol pe Iesus na hekulkulonga  
mur pe hana papalauna mur pe  
iri lochloch nenge te eukirau neu,  
te teke te henonou hote hana hel  
nge iri ke tela luluch nge Paulus iri  
nai Parnapas nge Antiok. Iok, te  
henonou hote Iutas (nenge ene e pule  
Parsapas) iri nai Sailas. Te henonou  
hote iri nai iange hulua nemur nenge  
leteria manmanna neu, tenau haka  
aria soksoke ngana mur nge iri. <sup>23</sup> Pe  
te hekule alalaha nei nenge hele ke  
teke;

“Imem, Iesus nena hekulku-  
longa mur pe hana papalauna mur  
koi, mohas ia alalaha nei lange imo  
hana lomomona mur nenge a tu  
nge Antiok pe Siria pe Silisia. Imem  
titimem mur laka imo iange letemo  
manmanna nge Ne Iesus.

Uach pe miliko toto lange imo  
lochloch.

<sup>24</sup> Imem mo eteia lo nge hana  
hel nge imem tela ke te poia imo  
ke ramamo au ala pe lemo arenga  
poreke toto ia reria helenga mur.  
Pe imem mo hele lange iri ke te  
poia poinga nem ero. <sup>25</sup> Pomalam  
mo eukirau pe mo henonou hote  
mele hel ke te mene helenga lange  
imo. Ke iri lape te koko luluch  
nge pekngara mur toto Paulus iri  
nai Parnapas. <sup>26</sup> Iange iri nai te  
matau singiria ero toto nga Non  
Soke Iesus Kristus nena ume mur.  
<sup>27</sup> Ke iri nenge mo kulosia at nge  
imo heueu nei, ngaria koi Iutas iri  
nai Sailas. Pe iri lape te hele lange  
imo pengpeng ke te hekerkereng ia  
helenga nemur nenge mohas sue  
iri nei.

<sup>28</sup> Imem mo nanas mene  
Opepengpeng lemene ngana  
nenge mo teke a takisia ure meena  
ngana ero ol. Pe mo teke a nanas  
tau mene koi hotonga nemur;

<sup>29</sup> A ngaua ngaunga nenge tepoi  
tuinginga ia lange aetapuna mur  
ero. A in toho ero pe a ngaua huros  
nemur nenge te roke iri ero. Pe  
pule, ama luluch nge hehei mur  
ero. Nenge teke a nanas tau tote  
hotonga nemur lape atu ngamo  
urana toto.

Urana toto nge a olonge helenga  
nei pe atu malalom.”

<sup>30</sup> Iok laol, iri nemur te lohaka  
pe tela sapele nge Antiok. Pe nge  
Antiok te eukiraua iri lochloch ngana  
nenge leteria manmanna pe te tunge  
alalaha neu lange iri ke tesisia.

<sup>31</sup> Hulua nemur te sisia pe te iech toto  
iange helenga nemur nga alalaha  
neu hekerkereng ia iri nga leteria  
manmanna ngana mur. <sup>32</sup> Pe Iutas  
iri nai Sailas, iri hetatalonga pule.  
Pomalam te tunge helenga urana  
ngana mur nenge hekerkereng tote  
hulua nemur leteria. <sup>33</sup> Pe iri nai  
tetu ke mala pol nge Antiok. Ke  
het pe iri nenge Antiok tetal heke  
petanga nenga tunga nge nek lange  
iri pe te kulos mule iri ke tela mule

nge iri nemur nenge te kulosia iri ke teat. <sup>34</sup> Pe Sailas letena haka ke teke tunge Antiok ol.] <sup>35</sup> Pe Paulus iri nai Parnapas tetu mana nge Antiok, pe iri ul hana hel pule ke te hetore hehei pe hana halang nga NeHalang na helenga, pe te hele hote helenga urana toto ngana nenge Non Soke.

### *Paulus Iri Nai Parnapas Techachel*

<sup>36</sup> Iok, etue hel nga hoena, Paulus hele lange Parnapas ke teke, “Lape ita nai tai ke tala mule nga kileng lochloch ngana nenge ta haliu hote Non Soke na helenga mur ia lo, ke tanau nga hehei pe hana tepoi ngaria.” <sup>37</sup> Iok, Parnapas teke mene Ioanes Makus ke iri ul. <sup>38</sup> Pe Paulus teke urana ero nge te mene i iange nga tele ngana reria ume het ero kura pe ua mule aria nge Pampilia. <sup>39</sup> Paulus iri nai Parnapas te hele inin tau helia ure nei ke halang. Pomalam iri nai te chach hel. Ke Parnapas mene Ioanes Makus ke iri nai te lohaka nga imot pe tela sapele nga kileng nenge Saipras. <sup>40</sup> Pe Paulus mene Sailas ke iri nai tei sapele. Pe iri lochloch ngana nenge leteria manmanna te hetalaulau aria ke te teke Non Soke tunge nena tunginga nge urana lange iri pe nauele iri ke nek. <sup>41</sup> Paulus langa kileng nenge Siria pe Silisia pe hekerkereng mule hehei pe hana mur nga leteria manmanna ngana.

## 16

### *Timoti Laluluch Nge Paulus Iri nai Sailas*

<sup>1</sup> Paulus langa kileng nenge Tebi pe Listra. Pe none nge ene Timoti tunga lamau pule. Pe ana non, iri ul tana leteria manmanna nge Iesus. Pe tana i Iuta pe temene i Krik. <sup>2</sup> Iri lochloch ngana nenge leteria manmanna nge NeHalang nga kileng nenge Ikonium pe Listra, te neue Timoti ke te teke i non urana ngana ia. <sup>3</sup> Iok, Paulus teke mene Timoti ke la luluch nge i pe Iuta mur te eteia ke Timoti temene i Krik.

Pomalam Paulus riria Timoti singina ke Iuta mur te esia i ke manga i Iuta ol. <sup>4</sup> Iok laol, tei ke tela nga kileng mur pe te hele hote hotonga nemur nenge Iesus nena hekulkulonga mur pe hana papalauna nemur tetal hote nge Ierusalem. <sup>5</sup> Pomalam NeHalang nena hana mur temes ke kerkereng toto nga leteria manmanna ngana pe nga etue lochloch, hulua halang te hulua leteria pe te koko teu nge iri.

### *Paulus Nau Opene Nge Troas*

<sup>6</sup> Iok laol, Paulus pe pekngana mur tela pe te sapele mana nga kileng mur nenge Prikia pe Kalasia. Iange Opepengpeng poi ele iri nge te hele hote NeHalang na helenga nga tuele kina nenge Eisia. <sup>7</sup> Iok, tei kela te lohot nga kileng Misia het ngana pe te teke teteu langa kileng nenge Pitinia pe Opepengpeng nenge Iesus poi ele iri iange kileng nem tu teu nga tuele kina nenge Eisia. <sup>8</sup> Pomalam te sapele mana ke tela nge Troas. <sup>9</sup> Iok, nga miliko Paulus nau opene ke esia none nge nena nge Mesatonia. Non neu mes pe hele ke kerkereng toto pe ech ia i ke teke, “O iat nge Mesatonia ke o halaua imem!” <sup>10</sup> Ke Paulus nau opene ngana neu het pe mo kik haka sapele nenge mola nge Mesatonia. Iange mo eteia ke NeHalang i sipona iua imem ke teke mola ke mo hele hote nena helenga lange iri nemur nga kileng neu.

### *Litia Mur Te Hulua Leteria*

<sup>11</sup> Iok, mo tamu haka nga imot nge Troas pe mo song tele ke mola nge Samotras pe nga etue naingana mo song ke mola nge Neapolis. <sup>12</sup> Ke het pe moi nga apemem ke moteu lange Pilipai. Kileng Pilipai, i tuele tana nge Mesatonia pe Rom mur te ume heke pe tenau ele kileng nem. Oe, ke mo tua etue hel nga lamau.

<sup>13</sup> Pe nga Sapat ana etue, moi hot nga kileng neu ke mola nga ech ilina. Iange mo teke lape Iuta mur te eukirau nga lamau ke te hetalaulau. Iok,

15:37: Ume 12:12, 25

15:38: Ume 13:13; Kol 4:10

16:1: Ume 14:6; 2Ti 1:5

16:2: Pil 2:19-22

16:4: Ume 15:23-29

16:6: Ume 18:23



mo are sio pe mo hetore hehei hel nge te eukirau nga lamau. <sup>14</sup> Pe heie nge iri ene Litia. Ana hei nena nge Ta-iatira. Pe hehei pe hana tela ke teolol malmalenga mur nge i. Malenga nemur ururia haka toto. Ana hei heto hekeke NeHalang pule. Ke Non Soke i sipona poia i ke letena mallaha nga Paulus nena helenga mur. <sup>15</sup> Ke pomalam ana hei pe iri lochloch ngana nenge tetu luluch nge i nga na pele, te mene henuninga. Ke het pe hele ke teke, “Imo nenge a teke letek man-manna toto nge Non Soke, aiat ke atu luluch nge iau nga lek pele.” Hei neu ech tote imem ke mola nga nena pele.

### *Te Laua Paulus Iri Nai Sailas Nge Pilipai*

<sup>16</sup> Nga etue e moi ke mo lala nga kileng unne nenge te hetalaulau ia, pe mo saol haka nge heie nge uneinei tuteu nge i. Hei neu, mele hel te olia i ke umume nge iri. Pe te ololia i iange hele hot tettele ure nemur nenge te lohotot. Pomalam iri nenge tenau ele i, te mene umtutuna halang toto nga ana hei na ume neu.

<sup>17</sup> Iok ana hei nanasia imem ul Paulus pe aliuliu ke teke, “NeHalang Nge I Soke Nga Lut Toto nena hana mur koi teii nei! Iri lape te hetore imo nga kue nenge NeHalang mene mule imo ia.” <sup>18</sup> Etue halang, hei neu helele ke machmau. Ol pe Paulus talngana pe letena inin pe ralele lange hei neu pe hele langa uneinei neu, “E hele lange iong, nga Iesus Kristus ene, o lohot nge hei nem ol!” Ueiuei mana pe uneinei neu ua hot sapele nge hei neu.

<sup>19</sup> Pe iri nenge tenau ele hei neu te eteia ke reria umtutuna ana kue ero ol. Pomalam te laua Paulus iri nai Sailas pe te tak runge iri kela nga ingala matana pe te hemesia iri nga hana papalauna nemur nenge tenau ele kileng neu, mataria. <sup>20</sup> Iok, te mene iri lange hana Rom mur nenge te longlongo helenga pe te hele, “Hana nai nei iri Iuta koi. Iri teat ke te heporeke arenga nge urana

nga kileng nei lo. <sup>21</sup> Iri te hetoro koukoua imem nga ure nemur nenge ita nenge Rom rera hotonga mur thehe ele tote nge ita ke ta nanasia ero.”

<sup>22</sup> Iok laol, hulua te koko teu sapele nga iri nai aria palinga. Pe hana Rom nemur nenge te longlongo helenga te hele ke palinga hel ana hana mur te haka hote Paulus iri nai Sailas reria hengeron pe tenos ule iri. <sup>23</sup> Tenos poreke ule iri ke het pe tetal teu sapele iri langa tuele au ngana. Pe hana papalauna nemur te hele lange non nenge nauelele tuele au ngana neu ke chiu hit tote iri nai ke kerk-ereng toto. Pomalam iri nai ria kue ero toto nge te ua hot. <sup>24</sup> Non neu longe ke mau ol pe mene Paulus iri nai Sailas ke la tal teua iri nga tuele au ngana neu letena nge teu toto. Ol pe ha hite iri nai aperia nga ae chonna e nge meena toto.

<sup>25</sup> Iok laol, nga miliko tunangana iri hel pule nenge tema teu nga tuele au ngana neu, te longe Paulus iri nai Sailas nge te hetalaulau pe te peupeua peunga mur nenge te heto hekeke NeHalang. <sup>26</sup> Te rura mana pe mangila palaungana rur sapele. Pe mangila neu rur ke palaungana toto nga kileng unne nenge tuele au ngana neu mesia. Pomalam piunga mur nga tuele au ngana neu te uchulu sio. Pe iri lochloch ngana nenge tetu nga tuele au ngana neu, peria pe aperia ana kalenga mur te uchulu sio pule. <sup>27</sup> Ol pe non nenge nauelele tuele au ngana neu rura haka. Pe nau pe piunga lochloch ngana nemur te uchulu sio tach lo. Ol pe mene nena kakop ke teke hun mule i, iange tekema iri lochloch ngana nenge tetu teu nga tuele au ngana kou te ua hot talo. Pe ero. <sup>28</sup> Ol pe Paulus alngana taua i ke teke, “Ei! Ohun mule iong ero! Imem lochloch ngana i motu kura.”

<sup>29</sup> Ol pe non neu iua mele nga lemenga pe song kela tamal sue i nga Paulus iri nai Sailas aperia huna

pe loiloilo ke teke mete. <sup>30</sup> Iok, mene hote iri nai lange hot pe onteia iri, “Hana nai nem, lape epoi ke pomere toto nenge e mene maulinga nge koko?”

<sup>31</sup> Pe iri nai te hele, “Letem manmanna nge Non Soke Iesus! Iong pe iri lochloch ngana nenge tetu luluch nge iong nga lem pele. Pomalam lape o mene maulinga nge koko.”

<sup>32</sup> Ke Paulus iri nai Sailas te hele hot sapele Non Soke nena helenga lange non neu pe iri lochloch ngana nenge tetu luluch nge i. <sup>33</sup> Iok laol, non neu poia Paulus iri nai Sailas ke la lome ria chanchan mur nga etue neu pengpeng. Ke het pe Paulus iri nai Sailas te henun sapele non neu pe iri lochloch ngana nenge tetu luluch nge i. <sup>34</sup> Laol pe non neu mene iri nai kela he ngaua iri nga na pele. Pe non neu pe iri lochloch ngana nenge tetu luluch nge i, te iech toto iange leteria manmanna toto nge NeHalang.

<sup>35</sup> Pe nga uach hana Rom nemur nenge te longlono helenga, te kulosia palpal husu mur ke te laia helenga nei nge non nenge nauelele tuele au ngana neu. Te hele ke te teke, “A lohe hote Paulus iri nai Sailas nga tuele au ngana ke tela ol.” <sup>36</sup> Pomalam non neu lake hele lange Paulus ke teke, “Hana papalauna nemur te hekule helenga at ke te teke imo nai Sailas lape a lohote nga tuele au ngana ol. Ke lape a i malalom, pe ai ke nek.”

<sup>37</sup> Ol pe Paulus lohaka pe hele lange palpal husu nemur ke teke, “Hana papalauna nemur te hottaua ute e nge imem nai nei mo poia ke poreke ero. Pe pule imem lememe nge Rom. Pe pomere tenos ulu hite imem nai nga hulua mataria mai? Ke het pe tetal teua imem langa tuele au ngana. Pe heueu nei te teke te kulosia imem ke moi hot ke nek mana ke mola. Poinga nei poreke toto i! Teke pomam iri siporia teat ke te mene hote imem nga lamai.”

<sup>38</sup> Iok laol, palpal husu nemur tela ke te tetetere Paulus na helenga

lange hana papalauna nemur. Hana papalauna nemur te longe ol pe te matau iange te longe Paulus na helenga nenge teke iri nai Sailas reia nge Rom pule. <sup>39</sup> Pomalam iri siporia tela kela te hele ke nek mule lange Paulus iri nai Sailas pe te mene hot sapele iri nai nga tuele au ngana. Pe te kulos hot sapele iri nai nga kileng neu. <sup>40</sup> Iok laol, iri nai te lohote nga tuele au ngana pe tela sapele nga he Litia na pele. Pe nga pele neu tesaol haka nga hulua halang nge leteria manmanna nge Non Soke. Pomalam te hekerkereng ia hulua nemur nga leteria manmanna ngana mur pe iri nai tei sapele.

## 17

### *Nge Tesalonika*

<sup>1</sup> Iok, Paulus iri nai Sailas tei teu langa kileng nenge Ampipolis pe Apolonia ke tela nga kileng nenge Tesalonika. Pe nga lamau Iuta mur ria heteronga ana pele e kou tu. <sup>2</sup> Pe Paulus kokoes lala nga heteronga ana pele nem, pomalam lake hemol nga Sapat ana etue palaungana pe te echachala hehel. <sup>3</sup> Pe Paulus hele urumrume NeHalang nena helenga lala nge iri. Nenge hele ke teke, Non nenge NeHalang kulosia at ke mene mule nena hana mur, lape takisia ana melmelenga ke mete pe maul haka mule. “Pe ne Iesus nenge e heleia lala nge imo nei, i sipona lakalom nenge NeHalang kulosia i at.” <sup>4</sup> Paulus hele ke mau pe na helenga tua tote Iuta mur hel leteria. Pomalam leteria manmanna pe te nansasia Paulus iri nai Sailas. Pe Krik mur halang nenge te heto hekeke NeHalang, pe hehei papalauna mur, iri pule leteria manmanna nga Paulus nena helenga mur.

<sup>5</sup> Ol pe Iuta mur saria keke Paulus. Pomalam tela ke te loloch heke pulut mene hana porekreke ngana mur hel, ke te eukirau pe tepoi heke hunelinga palaungana nga kileng neu. Iok, te song teu ke te tango rere Paulus iri nai Sailas nga none nge ene

Iason na pele. Te tango rere iri nai neu ke te teke te takrung hote iri kela te hemesia iri nga hulua mataria. <sup>6</sup> Pe ero. Te hottaua iri nai nga lamau ero. Pomalam te takrung hote Iason pe pekngana mur hel pule kela te hemesia iri nga hana papalauna mur mataria. Iange hana papalauna nemur tenau ele kileng neu. Pe te haliu haka ke te teke, “Hana nemur tela nga kileng lochloch pe te poia hehei pe hana ke reria arenga poreke lo pe heueu nei teat ke te lohot nge ita. <sup>7</sup> Pe Iason nauela iri nga na pele. Pe iri te nanasia hotonga nenge ne Kaesa ero. Pe tetal hote aria naungaala e pule nge ene Iesus luluch nge Kaesa.” <sup>8</sup> Hana papalauna pe hulua nemur te longe helenga neu pe leteria huna pe te hele rara mana. <sup>9</sup> Ol pe hana papalauna nemur te poia Iason pe pekngana mur ke te saua umtutuna palaungana. Ke het pe te kulosia iri ke tela ol.

#### *Tela Nga Kileng Nenge Ene Perea*

<sup>10</sup> Iok laol, kileng miliko sio pe iri nenge leteria manmanna nge Iesus te kulos sapele Paulus iri nai Sailas ke tela nge Perea. Tela nga kileng neu pe teteu langa hetoronga ana pele. <sup>11</sup> Pe hehei pe hana nenge Perea tepoi ke mange iri nenge Tesalonika ero. Iri te iech toto nge te longe Paulus na helenga pe kokoes te sisia NeHalang na helenga pule ke te eteia nge Paulus na helenga manmanna ma ero. <sup>12</sup> Pomalam Iuta mur halang leteria manmanna. Pe Krik mur halang pule, nenge tera hite ume papalauna, iri leteria manmanna pule.

<sup>13</sup> Ol pe Iuta mur nenge Tesalonika te longe Paulus nge hetottore hehei pe hana nge Perea nga NeHalang na helenga. Pomalam te lohaka pe tela ke teteu nga hehei pe hana leteria ke te lope hote Paulus iri nai Sailas nge Perea. <sup>14</sup> Pe ero. Ueiuei mana NeHalang nena hana mur te kulosia Paulus ke ramana hot langa ruach ilina. Pe hana hel tela luluch nge i. Pe Sailas

iri nai Timoti tetu nge Perea ol. <sup>15</sup> Pe hana nemur nenge tei luluch nge Paulus, iri lochloch tela kela te lohot nga kileng nenge Atens. Ke ulope tela mule nge Perea. Pe te mene Paulus nena helenga nenge lange Sailas iri nai Timoti nenge teke, iri nai te nanas mule i ke ueiuei mana.

#### *Nge Atens*

<sup>16</sup> Iok, Paulus tu nge Atens ke kulele iri nai neu. Pe tu ke mala pe singina tuakik ero iange kileng neu ana aetapuna halang mana. <sup>17</sup> Pomalam eukiraua Iuta mur pe Krik mur nenge te heto hekeke NeHalang ke hetottore iri pe te echachala helel nga hetoronga ana pele. Pe pule, kokoes lala nga ingala matana ke iri ul hehei pe hana nga lamau te echachala helel. <sup>18</sup> Ol pe hetoronga mur hel nenge te hetue iri ke Epikarin pe Stoik mur, teat ke iri ul Paulus te hele inin tau hel. Pe hel te heleia Paulus ke mai, te teke, “Non hauaua kina nei hele ia utar mai? I nge lape heleleia maopene ngana i.” Pe hana hel pule te heleia Paulus ke te teke, “Non nei heleleia hana hel nga tau toto reria aetapuna mur i.” Hana nemur te hele ke mau iange Paulus hetottoro nga Iesus nge mete pe maul haka mule.

<sup>19</sup> Pomalam te mene Paulus lange Areopakus, ke teole aria. Pe nga lamau, te ontei hote i ke nek toto. Pe te hele lange Paulus ke mai, “Mo teke mo longo teu la ke nek toto nga hetoronga heueu ngana nenge oiati ke o hetoro sue nga lamai. <sup>20</sup> Imem mo longe pe ma ke nek nga samem ero toto, ke heueu nei mo teke o hemallaha hot tote luna at nge imem ol.” <sup>21</sup> (Tepoi ke pomau iange iri nenga kileng nenge Atens pe iri hel pule nenge tela ke tetu nga kileng neu teare manmana pe te helele pe te longo manmana nga ure heueu ngana mur nenge te lohotot.)

<sup>22</sup> Iok laol, Paulus mes haka sapele nga hana papalauna nemur mataria pe hele,

“Imo hana nenge Atens. Nga enau ngak, e esia ke pomai. Imo amo nehalang halang toto. <sup>23</sup> Ei rara nga lemo kileng pe e neue ure pane mur nenge a heto hekeke iri. Pe e hottaua helenga e nga tunginga munna nenge a makmakia pe a tunge lala nge nehalang. Helenga neu tehas ia ke mai; ‘Lange nehalang nenge ta eteia ero.’ Imo a eteia nehalang nenge a heto hekeke nem ero. Pe e hele lange imo pengpeng, I toto koloi nenge e heleleia nei.

<sup>24</sup> NeHalang nenge ala hote tapa pe ich pe ure lochloch, i palaungana nga lut nga tapa pe i palaungana nga ich pule. Pe tuteu ero nga pele nenge hana peria umeia. <sup>25</sup> Isipona poi hote ita pe ure lochloch ngana nenge tetu ke te maulul heueu nei. Pomalam i nauele ita pe ure lochloch ngana. Pe ita ta nauele i nga ute e ero toto. <sup>26</sup> Nga talun ngana toto NeHalang ala hote non elle mana. Pe nga non elle nem mana ita lochoch ngana nga ich nei, rette ia. Nenge poia ita hana ke tatu ke ta purpure ich nei. Poi hote ita pe i sipona talue mura pe ara etue mur nenge tatu ia.

<sup>27</sup> Isipona poi hote ita ke ta song ke tala nge i pe ta tango rere i. Pe tu ke sase nge ita ero, ngana iam lom tu ke rochroi mana nem lo. <sup>28</sup> Pomanga mele heleia lo nenge teke, ‘Nga i sipona na hekerkerenga, tunge eingana at nge ita ke tai rara pe tatu ke ta maulul heueu nei.’ Pomanga none nge imo sipomo, has sue ke pomai, ‘Ita pule NeHalang tutuna mur ita.’

<sup>29</sup> Ke ita NeHalang tutuna mur ita ke ulolo ke pomalam, ta nanas ia hana nemur leteria tuanin ngana ero nenge te teke, NeHalang nakuna pomanga ure nemur nenge hana te ume hot mene nga peria. Nenge pomanga te umeia aetapuna mur nga um

chalemlem ngana mur pe sinaha ngana mur pe um nemur nenge ururia haka toto. <sup>30</sup> Nge nike, hehei pe hana leteria matana ngana nge NeHalang, lohok ke nek ero. Pe i letena metene poinga nenge te poia lange i nem ero. Pe heueu nei hele ke kerkereng ke teke hulua lochloch ngana nga ich nei tehul rumeria ia poinga poreke ngana mur ol. <sup>31</sup> Iange i talue etue palaungana e lo. Pe nga etue palaungana nem, NeHalang lape amnei teu la ke nek toto nga hehei pe hana lochloch ngana ria poinga mur. Pe i henonou hote nena none lo, nenge lape poia ure nem ke pengpeng toto. Pe NeHalang i sipona hemaui heke mule i nga metenga ke hemallaha hote i lange hulua lochloch!”

<sup>32</sup> Iok laol, hana nemur hel te melmel iange te longe Paulus nge hele ke teke NeHalang hemaui heke mule hana nenge te mete. Pe hel te hele, “Lape moat ke mo longo mule helenga nemur nge iong kura.” <sup>33</sup> Pomalam Paulus lohaka pe ua sapele aria. <sup>34</sup> Pe hana hel te longe Paulus nena helenga pe leteria manmanna. Elle nge iri, ene Tonisius. Ana non i non soke e nge tu teu nga Areopakus nem. Pe heie pule nge ene Tamaris. Iri nai neu pe hulua hel pule leteria manmanna.

## 18

### *Paulus Lange Korin*

<sup>1</sup> Iok laol, Paulus lohaka nge Atens pe la sapele nge Korin. <sup>2</sup> Pe nge Korin Paulus saolia non Iuta e nge ene Akuila. Non neu tana hoe i nga kileng nenge Pontus. Pe iri nai nehei Prisila te lohaka nge Itali ke teat nge Korin pe tetu ke mala ero kura. Iange Ne Klatius hele ke teke te lope hote Iuta mur lochloch nenge tetu nge Rom. Pomalam Akuila iri nai nehei te ua ke tela nge Korin. Iok laol, Paulus la kela nau tote iri nai. <sup>3</sup> Paulus lake



nau tote iri nai iange tera hite ume nenge te umume pelpele ke pomange Paulus pule. Pomalam lake tu pe ume luluch nge iri. <sup>4</sup> Pe kokoes nga Sapat ana etue, Paulus hele ke kerkereng toto lala nge Iuta mur pe Krik mur nga hetorongana ana pele. Iange teke poi taole iri ke leteria manmanna nge Iesus.

<sup>5</sup> Sailas iri nai Timoti teat nge Mesatonia pe Paulus tung teu tote i nga ume nenge hetottore Iuta mur nga helenga urana toto ngana. Pe hemallaha hot tote lange iri ke Iesus i toto nenge NeHalang kulosia at ke mene mule nena hana mur. <sup>6</sup> Pe ero. Te mene Paulus nena hetorongana mur ero pe tesau hote helenga porekreke ngana mur hel lange i. Pomalam Paulus rur sue maruchrue nga nena hengeron pe hele, “Nenge NeHalang letena inin ngana heporeke imo, atue helenga unne at nge iau ero toto. Imo sipomo a takisia pe a hemas mule imo ol. Pe eh et ngak kolo i. Ela nge hana lomonmona ngana mur ol.”

<sup>7</sup> Iok laol, Paulus i hot nga hetorongana ana pele pe la iteu nga Titus Iastus na pele. Non neu na pele mes ke rochroi mana langa hetorongana ana pele neu. Pe ana non heto hekeke NeHalang pule. <sup>8</sup> Pe non nenge ene Krispus, nau elele hetorongana ana pele neu. Ana non pe iri lochloch ngana nenga na pele leteria manmanna nge Non Soke. Pe hulua lochloch ngana hel nge Korin te longe Paulus na hetorongana mur pe leteria manmanna. Pomalam te mene henuninga.

<sup>9</sup> Pe nga miliko Paulus esia Non Soke nga nau opene ngana nge hele lange i ke teke, “O matau ero pe o hele hot manmana pe o reng ero. <sup>10</sup> Iau lape etu luluch nge iong pe mele pele nge lape poi poreke iong ero. Iange iau e hesilei hote lek hana mur ke halang lo pe leteria kerkereng ero kura.” <sup>11</sup> Paulus tu nga lamau ke hetottore hehei pe hana nga NeHalang

nena helenga mur ke ana hesinga elle pe akekena.

### *Te Mene Paulus Lange Kalio*

<sup>12</sup> Iok, nga etue nenge non soke Kalio nau elele kileng Akaia, Iuta mur te eukirau pe telaua Paulus pe te mene i kela te hemesia i nga non soke neu matana pe te hele, <sup>13</sup> “Non nei poi olole hehei pe hana ke te heto heke NeHalang ke pomanga ita rera hotonga hele ngana ero.”

<sup>14</sup> Iok, Paulus lohaka ke teke helele lo pe ne Kalio pule lohaka pe hele lange Iuta mur ke teke, “Imo Iuta nemur, a longo at nge iau. Toinge non nei i non poreke ngana nge hunun hana pe poia poinga poreke ngana hel pule, nem lape e longo ke nek toto langa lemo helenga mur. Pe nei ero koi. <sup>15</sup> Imo alau mene non nei nga nena helenga mur pe nga imo sipomo lemo hotonga mur. Pomalam, imo sipomo a hepengia. Iau lemek ero nge e hepengia helenga nemur.” <sup>16</sup> Iok laol, Kalio poia iri ke te lohot sapele nga kileng unne neu. <sup>17</sup> Ol pe hana nenge te eukirau neu telaua ne Sostinis pe te palia. Pe non neu i nau elele hetorongana ana pele, pe hana nemur te poia poinga neu lange i pe ne Kalio teke na ute pele langa neu ero ol.

### *Paulus Lamule Nge Antiok*

<sup>18</sup> Iok, Paulus tu luluch nge NeHalang nena hana mur nge Korin ke mala pol pe lohaka sapele nga imot ke lange Siria. Pe Akuila iri nai nehei Prisila tela luluch nge i. Nga kileng nenge Kenkrea, Paulus ut-sue palpalna ina iange poia helenga kerkereng ngana e lange NeHalang. <sup>19</sup> Iok, tela te lohot nge Epeses pe Paulus hile sio sapele Akuila iri nai nehei e Prisila. Pe Paulus langa hetorongana ana pele pe iri ul Iuta mur te echachala hehel. <sup>20</sup> Ol pe te hele lange i ke tu ke mala pol nge iri mukam pe ana non lemene ero. <sup>21</sup> Pe hele lange iri ke mai, “Nenge teke NeHalang

lemene, lape eat mule nga lamai.”  
Iok, Paulus tamu haka mule nga imot  
e nge Epeses pe te mana hot ke tela.

<sup>22</sup> Iok, Paulus lohote nge Kaesarea  
pe loaka sapele ke nau tote NeHalang  
nena hana mur nge Ierusalem.  
Ke het pe sio la mule nge Antiok.  
<sup>23</sup> Tu pol nge Antiok pe i ke langa  
kileng mur nga kileng nenge Kalasia  
pe Prikia. I rara nga kileng nemur ke  
hekerkereng mule iri nemur nenge  
leteria manmanna nge Iesus.

### *Apolos Hetero Nge Epeses Pe Nge Korin*

<sup>24</sup> Iok, nga etue neu non Iuta e nge  
ene Apolos at nge Epeses. Pe ana  
non na kileng huna toto nge Aleksan-  
tria nga kileng nenge Ekipto. Pe i  
etei teu la ke nek toto nga NeHalang  
nena helenga mur nenge tehas sue  
iri ke ulolo. Pe hetero ngana urana  
toto. <sup>25</sup> Apolos mene heteronga nga  
Kue Nenge NeHalang Henonoua Ke  
Teke Ta nanasia, pe singina kik nge  
hetottore hehei pe hana ke nek toto  
nge Iesus. Pe i eteia ke nek ero kura  
iange hetei mene henuninga nenge  
Ioanes. <sup>26</sup> Iok, Apolos talun ke haliu  
pe hetottoro nga heteronga ana pele.  
Pe Akuila pe nehei Prisila te longe  
i pe tepoi sapele i ke tela nga rera  
pele. Pe te hele urume pe te hetore i  
ke nek toto nga Kue Nenge NeHalang  
Henonoua Ke Teke Ta nanasia. <sup>27</sup> Iok  
Apolos lohaka ke teke lange Akaia.  
Pomalam NeHalang nena hana mur  
nge Epeses tehas ia alalaha lange  
pekngaria mur nge Akaia pe te hele  
lange iri ke te iech ele Apolos nge  
lape lange iri. Pe iri leteria man-  
manna nge Iesus iange NeHalang poi  
ke urana lange iri. Iok Apolos lange  
iri pe halaua iri ke nek toto. <sup>28</sup> Apolos  
hekou sue Iuta mur nga helenga nga  
hulua mataria ke teke Iesus i non  
nenge NeHalang kulosia at ke mene  
mule ita lochloch. Pe hemallaha hot  
tote nga NeHalang nena helenga ne-  
mur nenge tehas sue iri ke ulolo.

## 19

### *Paulus Lange Epeses*

<sup>1</sup> Iok, Apolos tu nge Korin pe Paulus  
lohaka nge Antiok pe i ke nau toto  
mulmule kileng nemur nga uraurau  
kela lohote nge Epeses. Pe nge Epeses  
Paulus tapang teu nge iri hel nenge  
leteria manmanna <sup>2</sup> pe onteia iri ke  
mai, “Imo mam letemo manmanna  
nge Iesus pe a mene Opepengpeng  
pule?”

Pe iri te hele, “Ero! Imem mo eteia  
ute nenge ene Opepengpeng ero koi.”

<sup>3</sup> Pe Paulus onteia mule iri, “Iok, he-  
nuninga tei toto nenge a mene?”

Pe iri te hele, “Imem mo mene  
henuninga nenge Ioanes nenge he-  
nunun.”

<sup>4</sup> Pe Paulus hele, “Ioanes nena he-  
nuninga nem i henuninga nenga hul-  
mulenga. Ioanes hele lange hehei pe  
hana ke leteria manmanna nge mele  
nenge nanasia i. Pe mele nenge nana-  
sia nem ngana laka Iesus i sipona lo.”

<sup>5</sup> Hana nemur te longe ke mau pe  
te mene sapele henuninga nga Non  
Soke Iesus ene. <sup>6</sup> Paulus tal heke  
penna nge iri pe Opepengpeng sio at  
nge iri. Pomalam te hele rara sapele  
nga helenga hel nge altoto. Pe te  
hele hote helenga mur nenge at nge  
NeHalang. <sup>7</sup> Hana nemur iri analoch  
pe nai.

<sup>8</sup> Iok Paulus lala nga heteronga  
ana pele ke teio iri mol. Pe het-  
ottoro pe poi olole hehei pe hana  
ke leteria manmanna nga NeHalang  
nena naualanga pe nekinga nge ita.  
<sup>9</sup> Pe hel nge iri lemeria ero toto nge  
te longo langa Paulus nena helenga  
mur. Pe leteria manmanna ero pule.  
Ol pe tesau hote helenga porekreke  
ngana mur hel nga hulua mataria  
nga tuluk nenge Esinga Tele. Poma-  
lam Paulus mene iri nenge leteria  
manmanna pe te ua ke tela nga Ne  
Tairenes nena heteronga ana pele.  
<sup>10</sup> Ke Paulus hetottoro pe popoi he-  
lenga nga pele neu ke hesinga iri nai.  
Ke pomalam Iuta mur pe Krik mur

pe hulua lochloch ngana nga kileng nenge Eisia te longe Non Soke nena helenga ke purpur.

### *Ne Sekeua Tutuna Mur*

<sup>11</sup> Iok, NeHalang hekerkereng ia Paulus ke poi hote ure papalauna mur nenge altototo. <sup>12</sup> Ol pe hehei pe hana te mene Paulus ana hines ana tangaun pe na hengeron mur ke te laia nge haleles kina mur pe iri nenge uneinei tu nge iri. Te laia pe haleles nemur te hetet pe uneinei nemur teua hot ke te lala. <sup>13</sup> Iok, Iuta mur hel nenge te i rara pe tepoi ure paluna ke te helope hotot uneinei mur tetu pule. Pe iri te totoi ke te heto mene Iesus ene nga ure paluna nem. Pe te hele ke pomai, “Nga Iesus nenge Paulus haliu hotote, e hele lange iong ke olohot!” <sup>14</sup> Hana nemur iri lime pe rahtele nai pe titiria hel. Pe temeria laka, ne Sekeua nenge i non soke nga iri nenge te umume nga NeHalang na pele.

<sup>15</sup> La ol, nga etuene e te teke te helope hote uneinei e pe uneinei nem tuacholia iri ke mai, “Iau e eteia Iesus pe e eteia Paulus. Pe imo? Imo itei hel mam?” <sup>16</sup> Ol pe non nenge uneinei tuteu nge i neu pal lapue iri ke eiria lele ele iri, pe ta chach ule reria hengeron mur. Pomalam singiria lachlach mana pe teua hot sapele nga non neu na pele ke tela sapele. <sup>17</sup> Iuta mur pe Krik mur pe hulua lochloch ngana nenge tetu nge Epeses te longe ure nei nge lohote pe te matau toto. Pe te heto heke tote Non Soke Iesus ene. <sup>18</sup> Ol pe hulua halang nenge leteria manmanna te hele hote reria poinga poreke ngana mur nga hulua mataria. <sup>19</sup> Iri halang nenge te popoi ure paluna, te loloch hote reria alalaha mur nenge ure paluna ana ke te chacharuch heke nga oan nga hulua mataria. Pe alalaha nemur nenge te chacharuch heke iri neu, te sisele iri pe ururia lohote ke halang nge halang toto. <sup>20</sup> Pomalam Non

Soke nena helenga puo ke kikina toto pe song ke langa kileng pe kileng.

### *Chauchainga Palaungana Lohote Nge Epeses*

<sup>21</sup> Iok, ure lochloch ngana nei lohote ke het pe Paulus teke lohaka ke lange Ierusalem. Pe Opepengpeng poia i ke letena tuanin ke teke la tala nga kileng nemur nge Mesatonia pe Akaia. Ke het pe lange Ierusalem ol. Pe Paulus hele pule ke teke, “Lape ela tala nge Ierusalem ke het pe ela nge Rom.” <sup>22</sup> Iok laol Paulus kulosia hana nai nenge te halaulaua i ke iri muka lange Mesatonia. Eria laka Timoti iri nai Erastus. Pe Paulus tu ke mala pol mana nge Eisia. <sup>23</sup> Nga etue neu chauchainga palaungana lohote nge Epeses nga tuluk nenge Esinga Tele. <sup>24</sup> Non e nge ene Timetrius talune chauchainga palaungana neu. Ana non pe pekngana mur hel teume hotote aria soke na pele opene mur nga ure chalemlem ngana. Pe iri, te heto hekeke aria hei soke e nge ene Atemis. Pe te teke aria soke hei neu na pele opene mur kou nenge te umume ia iri neu. Pe iri te mene um tutuna palaungana nga reria ume neu. <sup>25</sup> Iok, Timetrius iua nena hana mur ke eukiraua iri pe iua hana nenge reria ume elle ke mange iri ke teat pule. Pe lohaka pe hele, “Imo hana lochloch ngana nem, a eteia lo ke ita ta mene umtutuna palaungana toto nga ume nenge ta popoia nei. <sup>26</sup> Pe heueu nei a esia lo, pe a longe helenga nemur nenge Paulus heleleia iri. Paulus nena helenga nemur poia hulua halang nge Epeses pe nga kileng lochloch ngana nge Eisia ke leteria manmanna ero toto nga ure nemur nenge ta popoia iri nem. Paulus hele ke teke mele pele ume hote NeHalang nga penna ero toto. Pe hele ke teke ure nemur nenge hana teume hote iri nga peria mana, luna ero toto pule. <sup>27</sup> Pe iau e matau toto iange lape hehei pe hana te hele poreke ara ume nenge ta menmene

umtutuna ia nei. Iange lape ra ume losio pe ta mene umtutuna ero ol. Pe pule, hulua halang nge Eisia pe nga kileng lochloch ngana te heto hekeke hei soke Artemis. Pe e matau mana nge lape hulua ramaria mene ke te teke Artemis nena pele opene nenge ta umumeia nei i ure palaungana ia ero ol. Pe pingana nenge iuiu lape het toto sio.”<sup>28</sup> Ol pe hulua nenge te eukirau neu te longe pe leteria inin toto pe te alngaria haka ke te teke, “Artemis nenge Epeses i palaungana toto!”<sup>29</sup> Ol pe makulinga song ke rongo heke kileng neu pela te laua ne Kaius irinai Aristakus pe te songia iri ke te laia iri nga pele palaungana nenge te eukiraurau ia. (hana nai neu te halaua Paulus nga i ngana nge Mesatonian)<sup>30</sup> Ol pe Paulus teke lake mes nga hana nemur mataria ke hele ke nek lange iri pe ero. Iri nenge leteria manmanna nge NeHalang te longele i ke la ero.<sup>31</sup> Pe pule, Paulus neingana mur hel iri hana papalauna nga kileng nenge Eisia. Iri te hekule helenga hel lange Paulus ke te teke la ke hetei hote i lange hulua nemur ero.<sup>32</sup> Iok laol, hulua halang te leklike langa te eukirau ngaria nem. Iange hel te hele pe te makul ke mai, pe hel te hele pe te makul ke altoto. Ol pe leteria lilil mana ol.<sup>33</sup> Ol pe Iuta mur te hesisi hote Aleksenta ke langa muka, pe hana hel te alngaria lange i nga utar nenge lape poia. Pomalam ana non tul heke penna ke hereng ia iri pe teke hele ala pol pekngaria mur aria.<sup>34</sup> Pe ero. Hulua te eteia ke Aleksenta i Iuta, pomalam te alngaria toto haka pe te makul ke te teke, “Artemis nenge Epeses i palaungana toto!” Hana nemur te alngaria pe te makulkulia helenga neu ke mala toto.

<sup>35</sup> Ol pe non soke nenge hasas alalaha pe nauuelele kileng neu mes hot ke poia hulua nemur ke te reng pe hele, “Imo hana nenge Epeses, hulua te eteia ke kileng nei mana nge nauuele tote hei soke Artemis nena

pele. Pe pule, nauuele um heo ngana nem nenge losio at nga lut nga tapa.<sup>36</sup> Pe mele pele hele ke teke urenei ta channangaia ero. Ke pomalam a reng pe a are ke nek. Letemo matana ke nek pe a poia ure. Apoi pulut mene ure ero.<sup>37</sup> Hana nenge a mene iri at nei, te hele poreke hei soke Artemis ene ero. Pe pule te kemeia ure heo ngana ngana mur nga nena pele ero.<sup>38</sup> Nenge teke Timetrius pe na hana mur iriul mele hel te hele hel, urana nge tela nga etue nemur nenge hana papalauna te longlongo helenga mur ia. Pomalam lape te longe pe te hepengia helenga nemur.<sup>39</sup> Pe nenge teke o helele nga ute e pule, o laia nge hana nemur nenge te longo teu lala nga ure nemur nenge te lohoto nga kileng nei.<sup>40</sup> E hele ke mai iange hehei pe hana nge kileng nei teare ke nek ero ol nga poinga nenge ta poia heueu nei. Hulua lape te hele poreke ita heueu iam. Pe lape ta hele ke mere? Iange ta eukirau ngara heueu nei, luna ero toto.”<sup>41</sup> Non soke neu hele ke het pe kulos sapele hana nemur ke te rongo mule reria pele mur.

## 20

### *Paulus Lange Mesatonian Pe Nge Kris*

<sup>1</sup> Iok, chauchanga palaungana nenge lohoto neu het lo pe Paulus hekulo sapele iri nenge leteria manmanna aria ke teat nge i. Teat ke Paulus hekerkereng mule leteria manmanna ngana pe te sisa peria. Te sisa peria ke het pe Paulus i sapele ke langa kileng nenge Mesatonian.<sup>2</sup> Iok Paulus i ke langa kileng mur nge Mesatonian pe hekerkereng mulmule hehei pe hana nga nena helenga mur. Ke het pe la sapele nge Kris.<sup>3</sup> Pe nga lamau Paulus tu ke ana teio iri mol. Iok Paulus teke tamu haka nga imot ke lange Siria pe longe nge Iuta mur hel te teke te hunune i. Pomalam Paulus teke la mule ke nanas mule kue nenge Mesatonian ke lange Siria.



<sup>4</sup> Pe hana nenge tela luluch nge i eria mur koi nei, Sopata nenge ne Pirhus tuna. Pe i nena nge Perea. Pe Aristakus iri nai Sekuntus nga kileng nenge Tesalonika pe Kaius nenge nena nge Tepi, pe Timoti pe Taikikus iri nai Trompimus nenge reria kileng nge Eisia. <sup>5</sup> Hana nemur iri muka emem pe la te kulele imem nga kileng nenge Troas. <sup>6</sup> Iok ngaunga matana nenga ngaunga menini ngana lohot ke het pe mo mana hot sapele nge Pilipai. Mo mana ke mo lala pe nga etue lime ngana mo saolia iri nenge Troas. Pe nga lamau motu ke emem etue rahtele nai.

#### *Paulus Nena Inga Nenge Lange Troas Hetala Ngana*

<sup>7</sup> Iok, nga Sarere nga miliko imem lochloch mo eukirau ke mo ngau pe mo nanasia poinga nenge Iesus iriul nena hana mur nenge te rekreke ngaunga. Pe Paulus hetottore hehei pe hana kela miliko tuna iange teke uach sio pe i mulmule. <sup>8</sup> Imem lochloch motu nga pele letena e nga lut toto pe lemenga halang te eintele iri ke te remenmen. <sup>9</sup> Pe kol kulpo e nge ene Iutikas are hot langa pele matana nenge kino nenge tutula song teueu ia. Iok Paulus hele ke lala pe ana non tuanongnongo. Ol pe mamani hun toto ol pe losio hot sapele nga pele neu ana lala mol ngana nenga lut toto. Iange pele neu te hemes hoho heke iri. Iok tela ke te lolo heke i pe mete lo. <sup>10</sup> Iok Paulus sio la pe ma haka nge kol neu pe lau hite i pe hele, "Letemoia i ero, konei maul mule lo." <sup>11</sup> Ke het pe Paulus haka la mule pe reke beret pe ngaua pe hetottore iri ke la uachuach toto. Pe nga uach uruna toto ana non lohaka pe i sapele. <sup>12</sup> Pe hehei pe hana nemur te iech mule ia kon neu nge maulul pe iriul ke tela mule sapele.

#### *Paulus Lohaka Nge Troas Ke Lange Miletus*

<sup>13</sup> Iok, Paulus hele ke teke i mana nga apena ke lange Asos. Pe imem

mo mene imot pe mo mana ke imem muka kela mo kulele i nga ana kileng. <sup>14</sup> Iok, Paulus la ke saolia imem nge Asos pe mohul heke i pe mo mana ke mola nge Mitilin. <sup>15</sup> Iok, mo mana hot nge Mitilin nga etue neingana pe la mo mana teu nge Kaios. Pe nga etue mol ngana mo mana ke mola nge Samos. Ke het pe mo mana hot mule pe mo mana teu nge Miletus nga uach. <sup>16</sup> Pe Paulus hele ke teke hesilia etue unne nge Eisia ero. Pomalam mosio nge Epeses ero. Iange Paulus heusach mana ke teke la ke tu nge Ierusalem nga Pentikos ana etue.

#### *Iesus Nena Hana Papalauna Nge Epeses*

<sup>17</sup> Iok, Paulus tu nge Miletus kura pe hekulo Iesus na hana papalauna nge Epeses aria ke tela nge i. <sup>18</sup> Hana nemur teat pe Paulus hele lange iri ke mai, "Imo a etei tote iau ke nek toto, talun nga etue nenge eat ke e lohot nge imo nge Eisia. Pe a etei tote etu ngak iange kokoes etu luluch nge imo. <sup>19</sup> E umume ia ak ume mur ke pomanga Non Soke nena non toto pe e heto heke ek ia ero toto. Pe etue hel e tangtang iange ure meena ngana hel te lohotot nge iau, nenge Iuta mur te teke te hunune iau. <sup>20</sup> Helenga urana ngana mur nenge e eteia ke e halaua imo, e hele hot lochloche lange imo ke ulolo. Pe etal kome unne sune e ero toto. Pe e hetottore imo nga hulua mataria, pe pule nga lemo pele letena mur. <sup>21</sup> Pe e tunge helenga kerkereng ngana lange Iuta mur pe Krik mur ke e teke tehul rumeria nga reria poinga poreke ngana mur pe tenau la pol aria nge NeHalang pe leteria manmanna nge ara Non Soke Iesus.

<sup>22</sup> "Pe heueu nei e longo tau mene Opepengpeng ke ela nge Ierusalem pe e etei la ero, utar lape lohot nge iau nga lamau. <sup>23</sup> E eteia ke nga kileng mur nenge e lalaia, Opepengpeng hele atat nge iau nge hana lape tetal teua iau langa tuele au ngana.

Pe pule lape te poia ure meena ngana mur ke lohot nge iau. <sup>24</sup> Pe iau e matau ele singik nga ume nei ero. Nenge teke te hune iau, panem ute pele ero. Pe ure nenge palaungana toto ngana koi; nenge e teke e heulo hot tote ume nenge Non Soke Iesus tunge at nge iau. Nenge e hetottore hehei pe hana nga helenga urana toto ngana nga NeHalang nena nekinga nge nena hana mur.

<sup>25</sup> “Iok, imo nemur, ei rara ke e hetottore NeHalang nena naualanga pe nekinga nge ita lala nge imo. Pe amo e nge imo lape nau mule ramak ero ol. <sup>26</sup> Ke heueu nei e hele pengpeng lange imo, nenge teke amo e nge imo mene maulinga nge koko ero, atue helenga at nge iau ero. <sup>27</sup> Iange ure lochloch ngana nenge NeHalang lemene ke teke a eteia, ngana laka e hele hot lochloch e lange imo ke ulolo. Pe e topele unne e ero toto. <sup>28</sup> Ke a nauala amo ke nek. Pe pule a nauele hehei pe hana nenge Opepengpeng tunge lange imo ke a nauele iri. A nauele NeHalang nena hana mur ke pomanga hana nenge tenau elele reria sipsip mur, iange olia iri nga tuna Iesus eina. <sup>29</sup> Iange iau, elala lokoi pe e eteia ke hana hel lape teat pe te channanga ia NeHalang nena hana mur pe te helosio ia iri nga leteria manmanna ngana mur, pomalaka nga kaone hinolo mur nenge teteu rurung taua sipsip mur ke te hunune iri. <sup>30</sup> Pe pule mele hel nge imo lape temes haka pe te channanga ia hehei pe hana pe tepoi taole iri ke te hile helenga manmanna ngana pe te nanasia iri. <sup>31</sup> Ke a nauala amo ke nek toto nga ure nemur! Letemo metene, iau matak eina sisio pe e helete metene imo nga ure nei. Pe e popoia ume nem nga miliko pe nga sinanga ke hesinga iri mol.

<sup>32</sup> “Iok heueu nei e tunge imo langa NeHalang penna ke nauele imo. Pe NeHalang nena helenga pe

nena nekinga nenge a mene nem, nauele imo pule. Pe lape hekerkereng ia imo pe poia ure urana ngana mur ke te lohot nge imo. Ure urana ngana nemur NeHalang tung hote ke teke nena hana mur pengpeng reria ia. <sup>33</sup> Iau lemek taua amoe nge imo nena umtutuna pe nena hengeron ero toto. <sup>34</sup> Imo sipomo a eteia lo ke perik nai nei umume ke mene iau pe pekngak mur emem ngaunga pe ure mur nenge lememe taua. <sup>35</sup> Nga ume lochloch ngana nenge e umume ia iri, e teke e henonoua imo ke ta ume ke kerkereng ke mai ke ta halaua atong nemur nenge singiria haleles. Pe e hetore imo ke letemo metene Non Soke Iesus nena helenga nenge teke, ‘Nenge teke mele tunge ute lange mele, nem poia i ke iech toto nga nenge mene ute nge mele’ ”

<sup>36</sup> Iok Paulus hele lange hana nemur ke het pe tualou sio luluch nge iri pe hetalaulau lange NeHalang. <sup>37</sup> Iok hana nemur te sisa peria nge Paulus pe telau hite i pe te tangia i ke halang. <sup>38</sup> Hana nemur leteria poreke toto ia Paulus iange hele ke teke lape tenau mule ramana nga lamau ero ol. Ke het pe iri lochloch ke tetau hote Paulus langa imot.

## 21

### *Paulus Lange Jerusalem*

<sup>1</sup> Iok, mo sisa perimem luluch nge hana nemur, mo tang pe molau hit hel ke het pe mo mana hot sapele, pe mo mana pengpeng ke mola nga mimio nenge Kos. Pe nga etue naingana mo song teu nge Rotes ke het pe mola nge Patara. <sup>2</sup> Pe nge Patara mo hottaua imot e nge teke lala nge Poenisia, pomalam mo tamu haka nga imot nem pe mo song ke mola sapele. <sup>3</sup> Iok, mo song ke mo lala pela mo esia mimio nenge Saiprus. Pe monau heke ana mimio nge tu ke ile haka langa lut pe imem mo song nge sio ke mola nge Siria. Iok mo

mana teu lange Tir kela te tatach sue imot neu nganngana hel nga lamau. <sup>4</sup> Pe nga kileng neu mo saolia hana hel nge leteria manmanna nge Iesus, pomalam mola ke motu luluch nge iri ke etue iri rahtele nai. Pe Opepeng-peng poia iri ke te hele ele Paulus ke lange Ierusalem ero. <sup>5</sup> Iok, emem etue nenge motu luluchia nge iri het pe mo hile sue iri pe mo mana hot mule ke mola. Hana lochloch ngana nga kileng neu pe hehei pe tuturia mur, tetau hote imem. Te taua imem kela te mesia imem nga peipei, pe imem lochloch mo tualou sio pe mo hetalaulau lange NeHalang. <sup>6</sup> Ke het pe mo sisa perimem luluch nge iri pe mo haka mule nga imot, pe iri tei ke tela mule nga ria pele mur.

<sup>7</sup> Iok mo mana hot nge Tir pe mo song ke mola nge Tolemis. Pe nga lamau mo saolia iri hel pule nge leteria manmanna pe motu luluch nge iri ke etue elle mana. <sup>8</sup> Iok nga etue nei ngana mo lohaka nge Tolemis pe mola nga kileng nenge Kaesarea pela motu nga Pilipus na pele. Pilipus i non nenge hetottore hehei pe hana nga Helenga Urana Toto Ngana. Pe i none nga hana iri rahtele nai nenge te henonou hote iri nge Ierusalem, ke te halaua Iesus nena hana mur. <sup>9</sup> Ana non tutuna mur iri henel nge iri malolong pe te popoia ume nenge hetatalonga mur. <sup>10</sup> Iok, motu nga lamau ke etue hel lalo pe non hetatalonga e nge ene Akapus lohaka nge Iutea pe i ke at. <sup>11</sup> Ana non iat nge imem pe mene Paulus ana tal ana kalenga pe kale hite i sipona penna pe apena pe hele, "Opepengpeng hele ke teke, 'Iuta mur nge Ierusalem lape tekale mele nenge nena ure nei ke mai koi. Ke het pe te tunge i lange hana lomonmona ngana mur!'"

<sup>12</sup> Mo longe ke mau pe imem hul hana hel pule nenge teat ke mo eukirau neu, mo hele ele Paulus ke mo teke lange Ierusalem ero toto. <sup>13</sup> Ol

pe Paulus hele, "A tangtang ia utar? A poia iau ke letek kolkol sakilil. Nenge teke te laua iau pe te hune iau, letek meina nga nem ero, iange e nanas mene Iesus lemene ngana."

<sup>14</sup> Pomalam mo reng mana ol iange mo teke mopoi ele i pe ero. Pe mo hele mana ke mo teke, "Iok la, pe lape mo hetalaulau mana ke ure lochloch ngana nenge lohote nem, lohote mana nga NeHalang lemene ngana."

<sup>15</sup> Ke het pe mo takirau teua lememe ure nga lememe kole mur pe mola sapele nge Ierusalem. <sup>16</sup> Pe NeHalang nena hana mur hel nge Kaesarea, te koko nge imem pe te taua imem langa Nason na pele kela motu lamau. Pe Nason nena nge Saiprus. Ana non longe hengetoro nenga NeHalang nena helenga pe letena manmanna ke i Non Soke nena none ia tala nike.

### *Paulus La Ke Sauhot Nge Ierusalem Pe Lake Nau Tote Ieims*

<sup>17</sup> Iok mola ke mo lohote nge Ierusalem pe NeHalang nena hana mur te iech ele imem. <sup>18</sup> Pe pomange rou imem lochloch mola ke mo esia Ieims. Mola pe almasinga ana hana mur tetu pule. <sup>19</sup> Pe Paulus sise peria pe nana lange iri ke nek toto nga ure mur nenge NeHalang poia ke lohote nge hana lomonmona ngana mur, nga etue nenge Paulus la ke hetottore iri. <sup>20</sup> Hana nemur te longe pe te heto heke tote NeHalang ene. Pe te hele lange Paulus ke mai, "Paulus, timem laka iong pe urana nge mo hele lem pule. Heueu nei Iuta mur nge halang toto leteria manmanna pe iri lochloch lemeria toto ke ta nanas tau tote rera hotonga mur nenge Moses mene at. <sup>21</sup> Pe iri te longe hana hel ria helenga nge te teke iong o hele lange Iuta mur nenge tetu teu luluch nge hana lomonmona ngana mur ke tesaua hotonga mur nenge Moses. Pe pule te teke iong o hele lange iri ke te riria tuturia mur singiria ero pe te nanasia Iuta mur ria poinga ero.

<sup>22</sup> Iri lape te longe iong nge oat lo. Ke lape tapoi ke mere? <sup>23</sup> Lape o poi ke pomai koi: Hana hel nge imem nei te poia helenga kerkereng ngana hel ke te teke te poia ume nemur nenge NeHalang tunge lange iri. Pe helenga kerkereng ngana nem te takho mule ero ol. <sup>24</sup> Mo teke o mene hana nemur kela o poia iri ke te lemlen mule nga NeHalang matana. Pe o olia uruna nga nenge tepoi ke pomau. Pe o ut sue palpalria ina. Hulua lochloch ngana lape te esia poinga nei nge o poia pe te eteia ke helenga nenge te longe iri nem, manmanna ero. Lange iong o nanas tau tote reria hotonga mur nenge Moses mene iri at. <sup>25</sup> Pe hana lomomona ngana nemur nenge leteria manmanna, mohas ia alalaha e lange iri lo, ke mo teke te ngaua ngaunga nenge te tunge lange ae tapuna mur ero pe mo teke te inia toho ero pule. Pe pule mo teke te ngaua huros nenge teroke ero pe tepoi pulut rara lange hehei ero.” <sup>26</sup> Iok laol, pomange rou Paulus mene hana henel neu kela helemlem mule iri. Pe poia poinga neu lange i sipona ke helemlemia i pule. Ke het pe Paulus langa hetoronga ana pele ke hele tote ure nenge te poia neu nge ana etue lape het. Lange nga ure neu ana etue het ngana, lape te makia iri elle pe elle reria tunginga nenge lange NeHalang. (Ure nenge te poia neu ana etue iri rahtele nai.)

### *Iuta Mur Telaua Paulus Nga Hetoronga Ana Pele*

<sup>27</sup> Iok, etue rahtele nai ngana teke hetet lo pe Iuta mur hel nga kileng nenge Eisia te esia Paulus nga hetoronga ana pele letena. Ol pe tela ke teteu nga pek ngaria Iuta mur leteria pe te poia iri ke leteria inin toto. Pomalam tela sapele ke te laua Paulus. <sup>28</sup> Te laua i pe alngaria ke mai, “Imo hana nenge Israel a at ke a halaua imem. Non nei i rara nga kileng lochloch ke hetottore hehei pe hana pe hele poreke hana nenge

ita pe rera hotonga mur pe NeHalang nena pele palaungana nengara kileng nei!” <sup>29</sup> (Te hele ke mau iange te esia Tropimus nenge na nge Epeses nge iri nai Paulus te i rarara nga kileng neu pe te teke Paulus mene teua i langa NeHalang na pele palaungana letena.)

<sup>30</sup> Ol pe hulua lochloch ngana nga kileng neu te longe pe talngaria mes. Pe te song ke teat nga kileng koana mur lochoch ke te laua Paulus pe te takrung hote i nga pele neu. Te takrung hote i ke het pe tepiu hit sapele ana piunga mur. <sup>31</sup> Iok te teke te hune i, pe helenga kou song ke la lohot nge palinga hel ana hana mur nenge Rom aria soke lo. Ke helenga neu tang ke teke, “Hana lochloch ngana nenge Ierusalem kou te hele inin hel pe alngaria haua rara.” <sup>32</sup> Ueiuei mana pe non neu mene nena palinga hel ana hana mur pe te song ke tela nga kileng unne nenge hulua te emurungria. Hulua nemur te esia iri ke mau pe te palia Paulus ero ol. <sup>33</sup> Iok palinga hel ana hana mur aria soke neu lake laua Paulus pe hele ke nena hana mur te mene ke rur nai pe te kele i. Ol pe palinga hel ana hana mur aria soke neu ontei, “Non tei nemai? Pe imo mam a laua i ia potar?” <sup>34</sup> Pe hulua nemur hel alngaria ke te teke non nei poi ke mai, pe hel alngaria ia ute e nge altoto. Ol pe non soke neu etei ero ol, helenga tei nge manmanna. Pomalam hele lange palinga hel ana hana mur ke te mene teua Paulus langa palinga hel ana hana mur reria pele kerkereng ngana e. <sup>35</sup> Iok Paulus teke i haka nga pele neu ana hakanga pe palinga hel ana hana mur te takis heke sapele i iange hulua nemur te teke teora sio tote i ol. <sup>36</sup> Hulua nemur te nanasia iri pe te alngaria ke te teke, “Tala ke ta hune i!”

### *Paulus Hele Lange Hulua*

<sup>37</sup> Iok laol, palinga hel ana hana mur te teke te mene teua Paulus



lala nga reria pele neu lo pe Paulus hele lange aria soke ke mai, “E teke e heleia ute lange iong.” Pe non soke neu onteia i ke teke, “Iong mam o helele helenga Krik ma? <sup>38</sup> Non Ekipto tana e at tala nga lamai lo pe poia hunelinga palaungana ke lohot nge hana nga lamai. Pe mene ke hana iri ana non kina lime iri analoch iri henel (4,000) pe te mene reria palinga hel ana ure mur pe tei ke tela nga ich sana lomona ngana e. Pe e esia iong pe e teke ma i iam atat nem pullo.”

<sup>39</sup> Pe Paulus tuacholia lange i ke teke, “Ero! Iau Iuta koi, etak hoe iau nge Tarsus nga kileng nenge Silisia. Ke iau ek masio nga alalaha pule nga kileng palaungana nem. Pe e teke o longele iau ke e hele pol lange hana nemur mukam.”

<sup>40</sup> Iok laol, non soke neu ngata pe Paulus mes sapele nga pele neu ana hakanga pe penna poi lange hulua nemur ke te reng. Iok hulua nemur tereng ol pe Paulus hele la sapele nge iri nga Iuta mur ria helenga ke teke,

## 22

### *Paulus Hele Lange Iuta Mur Nge Ierusalem*

<sup>1</sup> “Imo Israel mur, neingak mur pe imo hana papalauna. Apoi rara tangai ero pe e hele lemo mukam.”

<sup>2</sup> Hana nemur te longe Paulus nge hele nga ria helenga pengpeng pe tereng toktok sapele. Pe Paulus hele,

<sup>3</sup> “Iau Iuta, pe hetak hohe nge Tarsus nga kileng nenge Silisia pe etu ke iau soke nga lamai nge Ierusalem. Pe ela nga hengetoro ke ne Kamaliel hetotore iau. Pe te hetore iau ke nek toto nga hotonga nemur nenge te hesio tele lange rera tete mur. Pe e tung teu tote iau langa NeHalang nena ume mur, ke pomange imo nenge ames heueu nem. <sup>4</sup> Iau nei epoi poreke totote iri nenge te nanasia Esinga Tele nenge Iesus. E laulaua hehei pe hana pe etal teua iri lala nga tuele au

ngana. <sup>5</sup> Nenge teke a teke e channanga ia imo, a onteia tunginga ana hana mur aria palau iri ul pekngana mur. Iri lape te hele ke te teke, ‘Oe aua nem hele ke manmanna.’ Tehas ia alalaha mur lange pekngara Iuta mur nge Tamaskus pe te tunge at nge iau. Pomalam ela ke e laua iri nemur nenge te nanasia Esinga Tele nenge Iesus, pe e kale hite peria mur pe e mene mule iri at nge Ierusalem. Pe hana papalauna nemur lape te poia iri ke te amneia melmelenga palaungana toto.

### *Paulus Hele Urume Letena Hul Ngana*

*(Ume 9:1-19; 26:12-18)*

<sup>6</sup> “Iok lala ke sinanga tuch ngana lo pe e song ke e lala nge Tamaskus. Ela rochroi nge Tamaskus pe lemenga palaungana e lohot nga lut nga tapa pe tuasio at tau pengpeng ia iau. Pe lemenga neu sina ala toto nenge sina ele matak ke e kolkol. <sup>7</sup> Ol pe elosio ke la ema nga ich pe e longe mele nge hele atat nge iau ke pomai, ‘Sol, Sol, pomere nenge opoi poreke iau ke pomam?’

<sup>8</sup> “Ol pe iau e hele, ‘Ia Non Soke, iong itei nemam?’

“Pe mele neu hele, ‘Iau Iesus nenge Nasaret laka opoi porekreke iau nem.’ <sup>9</sup> Pe hana nenge te koko nge iau te esia lemenga palaungana neu nge lohot. Pe iri te longe mele neu nenge hele atat nge iau ero.

<sup>10</sup> “Iok laol, iau e ontei ke mai, ‘Non Soke, lape epoi ke mere mai ol?’

“Pe Non Soke hele, ‘O lohaka pe o i teu langa kileng nenge Tamaskus. Pe nga lamau lape te hele lange iong nga ure lochloch ngana nenge NeHalang heleia ke teke o poia.’ <sup>11</sup> Iok laol, pekngak mur tera hite iau nga perik pe te apeia iau ke e lange Tamaskus iange lemenga neu poia iau ke matak hit lo.

<sup>12</sup> “Pe none nge ene Ananias kou tu. Ana non heto heke totote NeHalang pe nanas tau tote nena hotonga mur. Pe Iuta mur lochloch

nga kileng neu te teke i non nge urana ke tepoi ke nek toto lala nge i. <sup>13</sup> Ana non at ke mes sio nga ilik pe hele, ‘Sol, atong onau mule ol! Pe nga etue neu pengpeng matak urana mule pe e es sapele i.’ <sup>14</sup> Ol pe ana non hele, ‘NeHalang nenge ratete mur te heto hekeke, henonou hote iong ke teke o eteia utar nenge teke poia pe teke o esia i sipona nena non nenge pengpeng toto pe o longe helenga nge lohota nga hanna pengpeng. <sup>15</sup> Pomalam omes ke kerkereng toto nga letem manmanna ngana pe o hele hote lange hulua lochloch nga utar nenge o longe pe o esia ke ulolo. <sup>16</sup> Ke heueu nei o kulkulele ute ero ol. Omes haka pe o mene henuninga pe o tang lange Non Soke. Iange kue nem mana nge lome iong ke lem poinga poreke ngana mur te lasus toto ol.’

<sup>17</sup> “Iok laol, e la mule nge Ierusalem pe ela ke e hetalaulau nga NeHalang nena pele palaungana letena. <sup>18</sup> Ol pe enau opek ke e esia Non Soke nge hele at nge iau ke teke, ‘O lohaka pe o ua hot nga kileng nei ke ueiuei mana iange hana nemur nga kileng nei lape te longe helenga manmanna ngana nemur pe tetal teua nga leteria ero toto.’ <sup>19</sup> Pe iau e tuacholia ke mai, ‘Non Soke, iri te etei tote iau nge elala nga hetoronga ana pele ke e palpalia iri pe e menmene iri nenge leteria manmanna nge iong ke te lala nga tuele au ngana. <sup>20</sup> Iri te eteia ke iau etu nga etue nenge te hune lem non Stipen. Pe iau e ngata ke te hune Stipen pe e loloch hite hana nenge te hune i reria hengeron mur.’ <sup>21</sup> Ol pe Non Soke hele mule at nge iau ke teke, ‘Lape e kulosia iong ke ola nga tau toto nge hana lomonmona ngana mur. O lohaka pe o laol.’ ”

<sup>22</sup> Hana nemur te longo ke nek toto nga Paulus nena helenga mur. Pe nga nenge heleia ke teke lange hana lomonmona ngana mur, nem poi heke hulua nemur leteria ke alngaria tau sapele i. Pe te u taua i

nga karia nenga lut toto ke te teke, “Ta renge non nei ero! Ta hune i ke lasus toto!” <sup>23</sup> Hana nemur te ulule reria hengeron pe te uu pe tesau hekeke maruchrue. <sup>24</sup> Ol pe palinga hel ana hana mur aria soke neu hele lange nena hana mur ke te mene teu sapele Paulus langa pele neu letena. Pe pule hele ke te nosia i ke hele hote utar nenge poia ke poreke toto nenge hana nemur alngaria tau sakililia i ke pomau. <sup>25</sup> Iok, palinga hel ana hana mur te kele Paulus ke te teke te nosia i. Pe ero. Paulus hele lange hana nemur aria soke e nge mes rochroi mana nge i ke teke, “Imo mam a nanasia hotonga tei nenge a poia poinga nem at nge iau mam? Iau lek nge Rom pule i. Pe utar toto nenge e poia ke poreke, nenge a teke a nosia iau?”

<sup>26</sup> Iok laol, non soke neu longe ke mau pe lake hele lange aria aehuna ke teke, “Iong mam opotar mam? Ita tapoi pulut mene poinga nei lange non nei. Pe i nena nge Rom pule i!”

<sup>27</sup> Iok non aehuna neu i la sapele nge Paulus pe la onteia i ke mai, “Iok o hele at nge iau, iong mam lem nge Rom pule ma?”

Pe Paulus tuacholia lange i ke mai, “Oe! Iau lek nge Rom pule i!”

<sup>28</sup> Ol pe non aehuna neu hele, “E saua umtutuna palaungana lo pe tahas sue ek ke iau lek nga lamai pengpeng ol.”

Pe Paulus tuacholia, “Temek pe hetak reria nge Rom nike, pomalam iau lek nge Rom pule.” <sup>29</sup> Ol pe iri nenge te teke tela ke te ontei hotote Paulus te longe i nge hele ke mau pe te ruka mule. Pe palinga hel ana hana mur aria aehuna neu longo nge Paulus nena nge Rom pe matau toto iange nena hana mur te kele Paulus lo.

*Paulus Mes Nga Hana Papalauna Mataria*

<sup>30</sup> Iok, pomange rou non aehuna neu teke etei toto; Pomere nenge Iuta

mur te poia poinga nei lange Paulus mai? Pomalam eukiraua tunginga ana hana mur aria papalauna mur pe hana papalauna nge Iuta pe hele ke teun hote rur nga Paulus penna. Ke het pe mene Paulus ke la hemesia i nga hana papalauna nemur mataria.

## 23

### *Paulus Hele Ala Ana Nga Hana Papalauna Mur Mataria*

<sup>1</sup> Iok laol, Paulus nau la peng-peng nge hana papalauna nemur pe hele, “Hana papalauna, nga letek nge teu toto e amneia ute e nge e poia ke poreke ero toto nga NeHalang matana. Nge nike toto ke at nga etue nenge heueu nei.” <sup>2</sup> Ol pe non soke nenga tunginga ana hana mur hele lange hana nenge temes rochroi ke tepal ele Paulus hanna. Non soke neu ene laka Ananias. <sup>3</sup> Pe Paulus hele lange Ananias ke teke, “Iong, lape NeHalang tuacholia ke poreke toto lange iong. Nakum malaka nga pele e nge kankan ngaua letena pe te hepore ke hussu toto nge hot. Nakuna urana mana nge hot pe nge teu, poreke toto lo. Iong oare nga lamam ke o longlongo pe o amnei teu atat nga lek helenga mur, pe o poia ke nanas tau pengpeng ia hotonga mur te hele ngaria. Pe pomere o heit kou sue hotonga pe o hele ke hana te palia iau?”

<sup>4</sup> Ol pe iri nenge temes rochroi lange Paulus te hele lange i ke mai, “O heleia NeHalang nena non palaungana neu ke mam ke? O matau ero ma?”

<sup>5</sup> Pe Paulus hele, “Titik mur, iau e etei ero toto nge non nei rahite ume palaungana nem. Pe NeHalang nena helenga e nge tehas sue ke ulolo, hele ke teke, ‘O hele poreke mele nenge i mukmuka nge lem hana mur ero.’”

<sup>6</sup> Iok Paulus nau pe hana hel iri Satusi, pe hel iri Paresio mur. Pomalam haliu haka ke palaungana toto nga hana nemur leteria ke teke,

“Hana, iau nge iau Paresio koi pe temek pule i Paresio. Pe te laua iau pe te mene iau at lamai iange letek manmanna nge ita nge ta maul haka mule nga metenga.” <sup>7</sup> Hana nemur te longe Paulus nge hele ke mau pe te hele inin tau hel sapele nge iri. Pomalam Satusi mur te eukirau ke iri altoto pe Paresio mur pule te eukirau ke iri altoto. <sup>8</sup> (Satusi mur, te teke ita tamaul haka mule nga metenga ero ol. Pe pule te teke angkelo mur ero pe Ope mur ero pule. Pe Paresio mur leteria manmanna nga ure mol nem.)

<sup>9</sup> Iok laol, hana pane mur te u tau hel sapele. Ol pe hotonga ana het-oronga mur nenge iri Paresio, temes haka pe te hele ke kerkereng toto ke te teke, “Ta longo langa non nei hele ngana lo pe ute e nge poia ke poreke ero i! Lape angkelo e ma ope e. Ngana laka nenge hele lala nge i nga kue nenge lala nge Tamaskus nem.”

<sup>10</sup> Iok laol, palinga hel ana hana mur aria soke longo la pe hana nemur te alngaria ke palaungana toto ol. Ol pe matau toto iange teke lape hana nemur, te hora sue Paulus heueu. Pomalam hele lange nena hana mur ke la te takrung hote Paulus nga hana nemur leteria pe te laia i nga ria pele kerkereng ngana neu.

<sup>11</sup> Iok, nga miliko neu, Non Soke lake mes nga Paulus ilina pe hele, “O matau ero ol, o hele hote iau lange hana nenge Ierusalem ke het lo. Pe lemek ke o poia lange hana nenge Rom pule.”

### *Iuta Mur Tetala Helenga Ke Te Teke Te Hune Paulus*

<sup>12</sup> Iok nga uach Iuta mur hel te eukirau pe tetala helenga ke te teke te hune Paulus. Ol pe te talue helenga kerkereng ngana e lange NeHalang ke te teke te ngau ero pe tein ech ero pule. Te teke te hune Paulus ke mete mukam laka te ngau pe tein mule ech ol. <sup>13</sup> Iri nenge te tattal helenga neu

iri ana non kina nai toto (40). <sup>14</sup> Iok laol, tela nge tunginga ana hana mur aria papalauna mur pe almasinga ana hana mur pe te hele, “Imem mo talue helenga kerkereng ngana e lo ke mo ngau ero toto ke la het nga etue nenge mo hune Paulus ke mete. <sup>15</sup> Ke heueu nei mo teke iong pe hana papalauna nemur a hekulo Paulus ana ke at. Pe a channanga ia palinga hel ana hana mur aria soke nem ke a teke a ontei hot mule Paulus ke nek toto. Pe imem mo kulala mana, teke iat nge imo heueu, mohun sio sapele i nga lamai.”

<sup>16</sup> Pe Paulus na achung nenge liuna tuna longe nge iri tetal helenga ke te hune Paulus. Pomalam, la sapele nga palinga hel ana hana mur ria pele pe tatarai lunge Paulus. <sup>17</sup> Ol pe Paulus iu sapele palinga hel ana hana mur aria naungaala e pe hele lunge i ke teke, “Kol kulpo nei teke heleia helenga e lunge amo soke. O mene i ke imo nai ala.” <sup>18</sup> Iok laol, non neu mene sapele Paulus na achung lunge non soke neu pe hele, “Paulus iua iau pe hele at nge iau ke teke e mene kol kulpo nei at nge iong, iange i teke heleia ute lunge iong.”

<sup>19</sup> Iok laol, non soke neu rahite kol neu penna pe iri nai te i hot kelkel ke iri toro pe onteia i, “Kol nem, iong mam o teke o heleia utar at nge iau?”

<sup>20</sup> Pe kol neu hele sapele lunge i ke mai, “Iuta mur tetal helenga lo ke te teke nge rou, lape te onteia iong ke o mene sue Paulus lunge hana papalauna nemur. Pe iri lape te channanga ia iong ke te teke hana papalauna nemur te teke te longo ke nek toto mule nga Paulus nena helenga mur. <sup>21</sup> Pe o longo taua iri ero toto iange hana iri ana non kina nai (40) pe hel pule lape te talkome ke te hune Paulus. Iri te talue helenga kerkereng ngana e lo, ke te ngau ero pe tein ech ero kela het nga etue nenge te hune Paulus ke mete. Ke heueu nei te kulele mene iong. Nenge teke o longele ke Paulus

lunge iri heueu lape te hun sapele i ke mete.” <sup>22</sup> Ol pe non soke neu hele, “Iok ure nenge o heleia at nge iau nei, o hele hote lunge mele ero toto.” Non soke neu hele lunge kol neu ke het pe kulosia i ke la sapele.

### *Te Kulosia Paulus Lange Ne Peliks Nge Kaesarea*

<sup>23</sup> Iok laol, non soke neu iu sapele nena hana nai pe hele lunge iri ke teke, “A mene ke palinga hel ana hana iri ana non kina analoch (200) ke tela nge Kaesarea. Pe pule a mene ana non kina mol pe analoch (70) nenge te songong ia oriong. Pe nenge te hunun nga io, a mene ke iri ana non kina analoch pule. (200) Pe heueu sinanga matana henonoua sisalanga rahtele henel ngana nga miliko, (9 kilok) imo hana nemur a i sapele. <sup>24</sup> A tunge oriong mur lunge Paulus ke songia pe a mene i ke nek mana ke lunge ne Peliks palau nga kileng nem.” <sup>25</sup> Ol pe non soke neu hasia alalaha e ke te mene lunge ne Peliks palau. Pe ana alalaha tang ke pomai,

<sup>26</sup> “Ulei toto Non Soke Peliks,

Iau Klatius Lisias koi, pe ehas ia alalaha nei lunge iong ke e teke e hele urume non nei lunge iong.

<sup>27</sup> Non nenge e kulosia nei, Iuta mur te laua ke te teke te hune i pe iau e mene lek palinga hel ana hana mur ke mo mene hote i nge iri. Mo halaua i iange e longe nge te teke non nei nena nge Rom. <sup>28</sup> Pe e teke e etei teu la ke nek toto. Pomere toto nenge Iuta mur leteria inin taua i ke te teke te hune i mai? Pomalam e mene sue i ke la e hemesia i nga aria papalauna mur mataria. <sup>29</sup> Laol pe e eteia ke Iuta mur te teke Paulus nanasia reria hotonga mur ke nek ero. Pe i poia ute e ero toto nge uruna metenga. Pe pule nakuna urana ero toto nge aua nei lake mateu mana nga tuele au ngana.

<sup>30</sup> Pe e longe nge te teke te hunun i ke ngana koi nenge e kulos



sapelepele i at nge iong nei. Pe pule e hele lange Iuta mur nenge milmil ana ke iri te hele hote reria helenga lange iong ke o longo teu la pule.”

<sup>31</sup> Iok laol, palinga hel ana hana nemur te poia ure lochloch ke pomangaria soke hele ngana. Ke te mene Paulus pe te i sapele nga miliko neu ke tela nga kileng nenge Antipatris. <sup>32</sup> Te tu nga lamau ke uach sio pe palinga hel ana hana mur nenge te songia oriong mur, iri ul Paulus ke tela sapele nge Kaesarea. Pe iri nenge te i mana nga aperia, tela mule nga tetu ngaria nge Ierusalem. <sup>33</sup> Iok iri nenge te songia oriong tela ke la te lohot nge Kaesarea pe te mene sapele Paulus lange non palau nenge nauele kileng neu. Pe pule te tunge alalaha lange i. <sup>34</sup> Iok laol, non soke neu sisia alalaha neu ke het pe onteia Paulus ke teke, “Tong mam lem nga kileng tei toto?” Ol pe non soke neu etei sapele ke Paulus nena nga kileng nenge Silisia. <sup>35</sup> Pomalam lohaka pe hele mule ke teke, “Nenge teke iri nenge te milmil am te lohot, iau lape e longo teu la sapele nga ure nenge lohot nge iong nem.” Ke het pe non soke neu hele ke palinga hel ana hana mur te mene Paulus kela tenau ele i ke nek nga non soke Herot nena pele.

## 24

### *Paulus Mes Nga Ne Peliks Matana*

<sup>1</sup> Iok, etue iri lime het pe Ananias iri ul hana papalauna hel tela nge Kaesarea. Ananias i non soke nenga tunginga ana hana mur. Pe none nge ene Tertulas koko nge iri pule. Ana non etei tote hotonga mur ke la ke halaua Ananias pe pekngana mur. Iok hana nemur tela ke te lohot nge Ne Peliks pe te tatara lange i nga ure nemur nenge te teke Paulus poia ke poreke. <sup>2</sup> Pe teiu teu sapele Paulus. Pe ne Tertulas mene pekngaria mur haria pe hele lange ne Peliks, “Non Soke, iong o nauele imem ke mala toto lo pe motu ke nek pe mo iech

mana. Pe iong otal mas mule ure mur ke te lohot ke poia lemlem kileng mur ke te song ke nek pule. <sup>3</sup> Imem lemlem taua ure nemur ke te lohot nga lemlem kileng lochloch ke kokoes mo teke mo hele urana toto nge iong nga nem. <sup>4</sup> O poia ume palaungana lo ke lemlem ero nge mo hemakuk mule iong nga ume e pule. Pe e teke o longo tau mana ke oare ke nek mana pe o longo teu at nga imem nei lemlem helenga unne.

<sup>5</sup> “Imem moes tote nga matamem lo nge non nei i non poreke ngana toto. Ana non i rara nga kileng lochloch ke poi hakaka urelu huhuna lala nge Iuta mur. Pe i, imuka nge iri nemur nenge te hetue ke Nasarin mur. <sup>6</sup> Pe pule poi hesalanginga mana ia NeHalang nena pele palaungana nenge heo ngana toto ke ngana koi nenge mo laua i. [Pe imem mo teke mo heneue i nga imem sipomem lemlem hotonga mur. Lange poingan ngana nemur make pengpeng nga lemlem hotonga mur ero toto. <sup>7</sup> Pe palinga hel ana hana mur aria soke ene ne Lisias. I pe nena hana mur teat ke te helapue imem pe te takrung hote aua nem nga tuna ngamem. <sup>8</sup> Pe ne Lisias i sipona hele ke teke moat ke mo hele hote non nei poingan ngana mur lange iong.] Nenge teke o ontei hote i ke nek toto, lape o eteia ke ure lochloch ngana nenge mo heleleia nei manmanna toto.” <sup>9</sup> Ol pe Iuta mur nenge teat ke temes neu, iri lochloch te hekerkereng ia ne Tertulas na helenga ke te teke helenga neu manmanna.

### *Paulus Hele Ala Ana Nge Ne Peliks*

<sup>10</sup> Iok laol, non soke neu penna poi lange Paulus ke teke hele ol. Ol pe Paulus hele ke mai, “Non Soke, iau e eteia ke iong o nauele kileng nei ke mala toto lo. Pe heueu nei e iech mana nge e mes ke e hele ala ak nga matam. <sup>11</sup> I semel mana nge o eteia ke etue iri analoch pe nai nenge lalo, iau e lange Ierusalem ke e heto heke NeHalang. <sup>12</sup> Pe imem ul mele hel

mo hunel nga NeHalang na pele ero toto. Pe pule epoi haka ure huna lange mele ero nga hetoronga ana pele letena pe nga kileng unne nge hot. Pe iri nenge te helele ia iau nei, te esia ute e ero toto pe te hele mana nga haria. <sup>13</sup> Pe pule, nakuria ero toto nge te henonoua ute e lange iong ke poia reria helenga ke manmanna. <sup>14</sup> Pe e teke e hele hot pengpeng ia lange iong ke mai; Iau e heto heke NeHalang nenge lememe tete mur te heto hekeke. Pe e nanasia kue nenge te hetue ke Esinga Tele. Pe iri leteria manmanna nga kue nem ero. Pe letek manmanna nga hotonga nemur nenge Moses pe nga alalaha nemur nenge hetatalonga mur tehas sue iri. <sup>15</sup> Pe sak kikina toto nge NeHalang ke mange iri; nenge mo teke hana nenge te urana pe hana nenge te poreke lape te maul haka mule nga metenga. <sup>16</sup> Ke pomalam kokoes e totoi toto ke letek nge teu toto, amneia ute e nge e poia ke poreke ero nga NeHalang matana pe pule nga hehei pe hana mataria.

<sup>17</sup> “Iok, ela nga kileng tau ngana pe etu ke hesinga hel het mukam, ke het pe e lolochia umtutuna hel ke ela mule ia nge lek hana mur pengpeng nge Ierusalem. Pe pule mo makia tunginga mur ke mo tunge lange NeHalang. <sup>18</sup> Pe iau e nanasia poinga nenge te helelem mulmule iri. Pe hana nemur te esia iau nga ure nem ana etue het ngana pengpeng. Pe hulua hel nge temes ke te emurung hite iau ero. Pe pule mele pele nge poi haka rara ure huna pe alngana rara ero. <sup>19</sup> Iuta mur hel mana nga kileng nenge Eisia tetu nga etue nem. Pe nenge teke e poia ute ke poreke nga mataria, pomere nenge iri siporia teat pe te hele hot pengpeng ia lange iong ero? <sup>20</sup> Teke poi pe o onteia hana nemur nenge temes nei. Te hemesia iau nga hana papalauna mur mataria nge Ierusalem pe te hot-taua poinga poreke ngana tei toto nge

e poia? <sup>21</sup> Eh, ngana kai nenge e haliu haka nga mataria ke e teke, ‘Imo a hemesia iau heueu nei iange iau letek manmanna nge lape ta maul haka mule nga metenga.’”

<sup>22</sup> Pe ne Peliks etei teu la pule nga kue nem nenge te hetue ke ene Esinga Tele. Pomalam hele ke teke het ke pomau mukam. Pe hele lange Paulus ke mai, “Lape e hele hote ramak lange iong tangai ero. Ta kulele ne Lisias ke at mukam, laka e hele lange iong ol.” <sup>23</sup> Iok laol, ne Peliks hele lange palinga hel ana none ke nauele Paulus ke nek toto. Pe pule hele ke teke, “Nenge teke Paulus pekngana mur teat ke tenau toto i, opoi ele iri ero. O longele iri kela te esia i pe te tunge ure mur nenge ana non lemene taua iri.”

#### *Paulus Hele Nga Ne Peliks Irinae Nehei Mataria*

<sup>24</sup> Iok, etue hel nga hoena ne Peliks iri nai nehei, he Tarusila te lohot. Pe ne Peliks nehei i Iuta. Te lohot ol pe ne Peliks hekulo sapele Paulus ana. Iange i teke longo Paulus nge helele nga letera manmanna ngana nge Iesus Kristus. <sup>25</sup> Iok laol, Paulus hele nga poinga nenge tatu ke ta urana pe ta pengpeng toto. Pe nga poinga nenge ta nauele ita sipora ke nek pe tatal susue ita. Pe hele pule nga etue nenge NeHalang lape nau teu ke nek toto nga poinga urana ngana mur pe poreke ngana mur nenge ita elle pe elle ta popoia. Ne Peliks longele helenga neu pe matau toto pe hele, “Lape o hele ke het ke mam mukam! Pe ola ol. Pe lape eiu mule iong nga etuene e kura.” <sup>26</sup> Pe ne Peliks teke ma lape Paulus tunge nena umtutuna unne, pomalam kokoes mana iua Paulus ke iri nai te nanana.

<sup>27</sup> Iok, tetu ke hesinga nai het ke lalo, pe ne Posius Pestus mene sapele ne Peliks munna ke nauele kileng neu ol. Pe ne Peliks tal teua Paulus nga tuele au ngana. Teke poia poinga

nei ke Iuta mur te iech nge i pe muteria taua i.

## 25

### *Paulus Ontei Ke Teke Esia Ne Kaesa*

<sup>1</sup> Iok laol, ne Pestus mene ne Peliks munna ke nauele kileng nenge Kaesarea. Iok etue mol het pe ne Pestus lohaka nge Kaesarea ke lange Ierusalem. <sup>2</sup> Pe nge Ierusalem tunginga ana hana mur aria papalauna mur pe Iuta mur aria papalauna mur tela ke te esia ne Pestus. Pe te toto hita Paulus ana lange i ke te teke manmanna toto ke non nem poia ure meena ngana halang ke lohot pe poia hehei pe hana ke ria arenga poreke toto. <sup>3</sup> Ol pe te ech tote i ke te teke poi ke urana lange iri ke kulos mule Paulus lange Ierusalem. Iange iri te teke teolo ele Paulus ke te hun sue i nga kue. <sup>4</sup> Pe ne Pestus hele lange iri ke teke, "Paulus kou palinga hel ana hana mur tenau elele i nga tuele au ngana nge Kaesarea. Pe iau ela mulmule lokoi. <sup>5</sup> Teke poi pe a hele lange amo papalauna hel ke te koko nge iau ke mola. Pe nenge teke manmanna toto ke non nei poia ute hel ke poreke, hana nemur te hele hot pengpeng ia ure nemur sapele."

<sup>6</sup> Iok laol, ne Pestus tu luluch nge hana nemur ke ana etue iri rahtele mol ma analoch. Ke het pe lohaka ke la mule nge Kaesarea. Iok pomange rou ana non lake are nga pele nenge te longlongo helenga ia pe hele ke te mene Paulus ke la esia i. <sup>7</sup> Iok Paulus lohot la ke mes pe Iuta mur nenge teat nge Ierusalem te mes ke te heliliu hite i. Pe teulo inin rara ke te teke non nei poia ure halang ke poreke. Iri rea helenga polpolenga mana pe ute e nge hemeena ia reria helenga ero toto.

<sup>8</sup> Ol pe Paulus lohaka pe hele ala ana ke teke, "Iau e poia ute e ke poreke ero toto nga NeHalang na pele pe nge ne Kaesa. Pe pule e tamu tote Iuta mur reria hotonga e ero toto."

<sup>9</sup> Iok ne Pestus teke poia Iuta mur ke leteria sio unne, pomalam onteia Paulus ke mai, "Lemem ke o teke o haka lange Ierusalem ke la e longe am helenga mur nga lamau?"

<sup>10</sup> Pe Paulus hele, "Heueu nei e mes pengpeng nga ne Kaesa nena helenga hot ana pele pe lemek toto ke te longe lek helenga mur la koloi. Iong o eteia ke ulolo. Iau e poia ute ke poreke lange Iuta mur ero toto. <sup>11</sup> Pe nenge teke e poia ute ke poreke pe hotonga hele ke teke e mete, nem ute pele ero. Pe helenga nemur nenge Iuta mur tetue at nge iau nei manmanna ero, pomalam mele pele nakuna ero nge mene iau pe tunge iau lange iri. Pe lemek toto ke e esia ne Kaesa!"

<sup>12</sup> Ol pe ne Pestus iri ul nena hana mur nenge te longlongo helenga neu te mangun tele helia muka. Ke het pe ne Pestus hele, "O hele ke o teke o lange ne Kaesa ke longo nga lem helenga mur, nem ute pele ero. Mo hele pe mo longala ke mo teke ola!"

### *Ne Pestus Heleia Paulus Lange Akripa*

<sup>13</sup> Iok, etue hel nga hoena naungaala ana non Akripa iri nai e Penis tela nge Kaesarea ke tenau toto ne Pestus. <sup>14</sup> Te tu luluch nge ne Pestus ke etue hel lalo, pe ne Pestus nene Paulus lange naungaala ana non neu. Iok ne Pestus nana ke mai, "Ne Peliks tal teua none nga tuele au ngana ke ngana koi tu. <sup>15</sup> Pe nga etue nenge e lange Ierusalem, tunginga ana hana mur aria papalauna mur pe Iuta mur aria papalauna mur, te hele loulouia i ke halang. Pe te ech tote iau ke te teke e longele iri ke te hune i ke mete. <sup>16</sup> Pe e hele lange iri ke e teke ita nenge Rom rera poinga pomam ero, rera poinga mai koi: Ta longo tala langa mele nem nena helenga mur mukam. Ke het pe ta longo teu la ke nek nga mele nem tuachol ngana ia helenga mur. Nenge teke ta longo pe mele nem na helenga polpolenga

haka mana, ta poi sapele i ke pomanga a hele ngamo nem. <sup>17</sup> Iok laol, nga etue nenge Iuta mur teat luluch nge iau nge Kaesarea, e kulele ute ero ol. Uach sio pe ela sapele ke e are nga pele nenge te longlongo helenga ia pe e hele ke te mene teu sapele non neu at. <sup>18</sup> Ol pe iri nenge iri ul non neu aria matana i elel, temes haka pe te hele hot sapele reria helenga mur. Pe iau e teke ma lape te hele hote ure hel nge non neu poia iri ke poreke, pe ero. <sup>19</sup> E longo pe te hele helel ia iri siporia reria poinga nenge te heto hekeke aria soke pe te hetetue none nge mete lo nenge ene Iesus. Pe Paulus hele ke teke non neu kou maul haka mule nga metenga ke ulolo. <sup>20</sup> Ol pe iau letek lilil ol, lape e tuacholia hana nemur reria helenga ke merei? Ol pe e onteia Paulus ke mai, 'Lemem ke o teke tala mule nge Ierusalem ke la e longo teu la mule nga lemo helenga mur lamau?' <sup>21</sup> Pe Paulus hele ke kerkereng toto ke teke esia ne Kaesa ke isipona longo teu langa helenga nei. Pomalam e hele ke palinga hel ana hana mur tenau ele i ke nek toto ke kulele etue nenge lape e kulosia lange ne Kaesa." <sup>22</sup> Ol pe Akripa lohaka pe hele lange Pestus ke mai, "Iau e teke e longo teu langa non nem na helenga mur pule, pe iong ramam mere?" Pe Pestus hele, "Iok, pomam nge rou iong am etue nge o longo nga nena helenga mur."

#### *Te Mene Paulus Lange Ne Akripa*

<sup>23</sup> Iok laol, pomange rou Akripa iri nai he Penis te lohot pe hulua te iech pe tepoi ke nek toto lange iri. Iange tela ke teteu taua hulua nemur nenge te emurung ke te longlongo helenga. Pe palinga hel ana hana mur aria papalauna mur teteu la luluch pule nge hana papalauna mur nga kileng neu. Ke het pe ne Pestus hele sapele ke palinga hel ana hana mur te mene teua Paulus at. <sup>24</sup> Pe ne Pestus hele, "Non soke Akripa pe imo lochloch ngana nenge a lohot heueu nei, anau nga non nenge

mes nei. Hulua lochloch ngana nge Ierusalem te hele loulou ia non nei ke halang. Pe te tataraiia i at nge iau lo, pe te alngarngaria ke te teke urana nge te hune i ke lasus toto. <sup>25</sup> Mele nenge poia poinga poreke toto ngana e, nena poinga poreke ngana nem uruna metenga. Pe iau e hottaua ute nge non nei poia ke poreke ero toto. Pe pule isipona hele lo ke teke esia ne Kaesa. Ke ne Kaesa i sipona longo teu langa nena helenga mur. Ke pomalam lape e kulosia i ke la. <sup>26</sup> Pe iau lape ehas urume i lange non soke neu nga alalaha e. Ol pe lape ehas ke mere? Helenga chiu ala toto kura i. Pe ute e nge make mallaha hot nge i ero toto. Ke pomalam heueu nei e mene i ke at mes nga matamo. Pe non soke Akripa, heueu lape e tunge langa perim ke iong muka ia rera helenga mur. Pomalam lape e eteia utar nemur nenge lape ehas sue nga alalaha nenge lange ne Kaesa. <sup>27</sup> Iange e amnei la pe poreke toto nge e kulos mene non nei ke la pe ehas ururume ure nenge lohot nge i ero."

## 26

### *Paulus Hele Ke Kerkereng Toto Nga Ne Akripa Matana*

<sup>1</sup> Iok laol, ne Akripa hele lange Paulus ke teke, "Heueu nei mele pele hele lange iong ero. O hele hot tote letem pe o hele ke manmanna." Iok, Paulus penna tul haka pe talun ke hele sapele ke teke, <sup>2</sup> "Non soke Akripa, heueu nei e iech toto nge e mes nga matam pe e tuacholia Iuta mur te hele louloulou ngaria. <sup>3</sup> Iong o etei tote Iuta mur reria poinga mur pe tehun hel ngaria. Ke heueu nei lemek ke o are ke nek pe o longo ke nek toto at nga lek helenga mur.

<sup>4</sup> "Iau, Iuta mur te etei tote iau. Talun ngana nga iau kino ngak ke la iau soke. Te eteia iau nga lek kileng huna pengpeng pe nge Ierusalem pule. <sup>5</sup> Iri te eteia iau ke mala toto lo ke urana nge te hele pengpeng. Teke



lemeria te hele pengpeng ke iau Pare-sio. Pe imem Paresio mur mo nanas tau tote hotonga mur nenge Iuta mur te heto heke NeHalang ia. <sup>6</sup> Pe heueu nei, e mes nga matamo iange sak kikina nga helenga utona nenge NeHalang iri ul rera tete mur te talue nge nike. <sup>7</sup> Pe mata iri analoch pe nai nenge Israel te tung tote leteria pe te heto hekeke NeHalang nga miliko pe nga sinanga ke te mene helenga utona nem. Non soke, e hele peng-peng lange iong, Iuta mur te poia iau ke e takisia ure meena ngana nei iange letek manmanna toto nga helenga utona nei. <sup>8</sup> Iok, pomere nenge amo e nge imo nenge at heueu nei, letena manmanna ero toto nge NeHalang hemaui heke mule iri nenge te mete?

<sup>9</sup> “Iau pule ramak kerkereng toto ke e teke e heporeke tote Iesus nenge Nasaret ene, nenge e heporeke nena hana mur. <sup>10</sup> Pe i manmanna ke iau e poia poinga nem ke lohote nge Ierusalem. Tunginga ana hana mur aria papalauna mur te henonou hote iau pe te hekerkereng ia iau ke e poia ume nei. Ke etal teua NeHalang nena hana halang nga tuele au ngana. Pe nga etue nenge te hune iri, iau e ngata pule ke e teke urana toto nge te mete. <sup>11</sup> Kokoes e i ke ela nga heteronga ana pele pe e poia ure meena ngana mur ke lohote nge iri. Pe e totoi toto ke e echia iri ke te hele ke mai, ‘Imem letemem manmanna nge Iesus ero ol i.’ Iau letek inin tau totote iri, ke pomalam ela nga kileng tau ngana mur pule ke e poia ure meena ngana mur ke lohote pule.”

*Paulus Nana Urume Letena Hul Ngana*

*(Ume 9:1-19; 22:6-16)*

<sup>12</sup> “Iok, nga etuene e hana nenge te mukmuka nga hetalaulaunga ana ume aria papalauna mur te tunge helenga kerkerenga ngana at nge iau pe te kulosia iau ke e lange Tamaskus. <sup>13</sup> Iok, non soke mo i i nga kue luana pe kileng sinanga. Ol pe e esia

lemenge e nga lut nga tapa. Pe ana lemenga sina ala toto nga chaia matana pe tua leme it lochloche imem ul pekngak mur nenge tei luluch nge iau. <sup>14</sup> Ol pe imem lochloch mo losio langa ich pe e longe mele nge hele at nge iau nga helenga Hipru ke teke, ‘Sol! Sol! Pomere nenge o poi poreke iau ke pomam? O poia poinga nem at nge iau, pe lape iong nge o takis mule ana melmelenga laka.’ <sup>15</sup> Ol pe iau e hele, ‘Non Soke, Iong itei nemam?!’

“Pe Non Soke hele, ‘Iau Iesus. Iau laka nenge o teke o hunune iau nem. <sup>16</sup> O lohaka ke omes nga apem ol. Heueu nei e lohote nge iong pe e henonou hote iong ke lek non iong toto ol. Iong lape o heleia iau lange hehei pe hana nga ure nemur nenge o esia heueu nei pe nga ure nemur nenge lape e henonoua lange iong nga hoena kura. <sup>17</sup> Lape enau ele iong ke nek toto nge lem hana mur peng-peng pe nge hana lomonmona ngana mur. <sup>18</sup> Lape e kulosia iong lange iri ke o poia iri ke mataria charchara ke te ua hot nga kileng chantom ngana ke tela nga kileng mallaha ngana. Pe te hile sue non poreke ngana nena hekerkerenga ke tela nge NeHalang. Pomalam NeHalang lape sau reria poinga poreke ngana mur ke te lasus toto. Pe lape te mene muria pule luluch nge NeHalang nena hana mur nenge i sipona hesilei hote iri ke ulolo.’

*Paulus Nana Urume Ana Ume Mur*

<sup>19</sup> “Ke onau non soke Akripa, e longo tau mana pe epoi sapele ume nenge enau opekia pe te heleia at nge iau. <sup>20</sup> Ke e talune ume nem nge Tamaskus ke het pe e lange Ierusalem ke het pe e la nga kileng nemur nge Iutea ke het pe ela nge hana lomonmona ngana mur. E i i nga kileng nemur pe e hetotto ke e teke te hulua leteria nga reria poinga poreke ngana mur pe tenau la mana nge NeHalang. Pe e teke te poia ure

nemur nenge henonou hote iri ke te esia ke manmanna toto ke te hulua reria poinga pe leteria mur lo. <sup>21</sup> Ke nga nei mana Iuta mur te laua iau nga NeHalang na pele pe te teke te hune iau. <sup>22</sup> Pe ero, iange NeHalang nauala tote iau. Ke ngana koi nenge emes heueu ke e hele lala nge hulua lochloch, iri nenge teau sio menmene iri pe iri nenge pingaria iuiu. Pe ure lochlolch ngana nemur nenge e helelel ia nei, Moses pe hetatalonga mur nge nike te helelia lo ke te teke lape lohot. <sup>23</sup> Nenge te teke, Non nenge NeHalang kulosia at ke mene mule nena hana mur, lape mete pe i nge i muka toto nge ita lochloch nge maul haka mule nga metenga. Pe lape poia na lemenga ke tua leme hite Iuta mur lochloch pe hana lomomona mur pule.”

<sup>24</sup> Pe ne Pestus longe Paulus nge hele ke mau pe alngana taua i ke teke, “Paulus! Am hauaua ma? Iong osis halali ke ngana laka nenge poia ramam ke ume ke nek ero.”

<sup>25</sup> Pe Paulus hele, “Non soke, iau ramak auala ero koi. Ramak urana mana i nenge e helele nei. <sup>26</sup> Pe naungaala ana non soke Akripa eteia ure lochloch ngana nei nge lohot lo, pomalam e hele hot lochloche ure mur pe e topala hite ute e ero. Pe e eteia ke i esia ure lochloch ngana pule iange ure nemur, te lohot nga kileng koana unne nge talkome ero. <sup>27</sup> Non soke Akripa, iau e eteia ke iong letem manmanna nge hetatalonga mur.”

<sup>28</sup> Pe Akripa hele lange Paulus ke teke, “Nakum nge o poia iau ke letek mamanna nga etue choro ngana mana?”

<sup>29</sup> Pe Paulus hele, “Oe! Nga etue choro ngana mana pe nga etue sase ngana pule. Pe lape e hetalaulau lange NeHalang ke imo lochloch ngana nenge a longo atat nge iau heueu nei, lape apoi ke mange iau. Pe lemek ero nge te kele apemo pe perimo ke pomange iau!”

<sup>30</sup> Paulus hele ke mau ke het pe non soke Akripa pe ne Pestus pe he Penis pe hulua lochloch ngana nenga pele letena neu temes haka <sup>31</sup> pe te i hot sapele nga pele neu. Pe te helele ke te teke, “Non nei poia poinga e nge uruna metenga ero toto, pe pule tetal teu mene i langa tuele au ngana.”

<sup>32</sup> Ol pe Akripa hele lange Pestus ke mai, “Toinge non nei hele ke teke esia ne Kaesa ero, lape ta kulos mule i ke laol.”

## 27

### *Paulus Mana Nga Imot Ke Lange Rom*

<sup>1</sup> Iok laol, hana papalauna nenge Rom te hele ke te teke mo mene imot ke mo mana ke mola nge Itali. Pomalam te hele lange ne Iulius ke nauale Paulus pe pekngaria mur hel nga imot. Pe ne Iulius i Kaesa nena palinga hel ana non soke e. <sup>2</sup> Laol, mo mene imot e nge at nga kileng nenge Atramitum pe mo mana olole nga ruach ilina pe mosio olole nga kileng mur nga kileng nenge Eisia. Pe none nge ene Aristakus tamu haka luluch nge imem. Ana non nena nge Tesalonika nga kileng nenge Mesatonina.

<sup>3</sup> Iok pomange rou pe mo lohot nga kileng nenge Saiton. Pe ne Iulius poi ke urana lange Paulus pe hele lange i ke teke Paulus la ke esia pekngana mur nga kileng neu. Pe pekngana mur lape te tunge nena ute hel nenge lemene taua. <sup>4</sup> Iok mo lohaka nge Saiton pe mo mana rochroi mana nga mimio nenge Saiprus iange kileng eingana haka. <sup>5</sup> Mo song tele langa ruach sana nenge Silisia pe Pampilia pe la mana teu nge Mira nga kileng nenge Lisia. <sup>6</sup> Pe nga lamau non palinga hel ana non neu esia imot e nenga kileng nenge Aleksantria. Pe ana imot lape song ke lala nge Itali. Pomalam poia imem ke mo haka nga ana imot. <sup>7</sup> Iok, mo manmana ke etue halang toto iange kileng eingana tua ele mene imem. Pe mo amnei

poreke tote nga nenge mo song ke mo lala nge Nitus. Pe mo song ke mola toto ero ol iange kileng eingana neu palaungana hali. Ol pe mo mana ke mo ristote kileng ina nenge Salmon pe mo song nga mimio nenge Krit ilina hele nenge nau sio. <sup>8</sup> Iok mo song sasar mana ke mola pe la mo song teu nga kileng nenge te hetue ke ene, Omol. Ana kileng tu ke rochroi mana langa kilenge nenge Lasea.

<sup>9</sup> Motu ke mala toto nga lamau pe mo mana hot mule ero ol iange kileng eingana heke ruach ke poreke toto ol. Pe Iuta mur aria etue palaungana nenge heo ngana, ngana koi lohoh lo. Pe iri reia lukunna ana etue talun pengpeng nga aria etue palaungana neu. Ol pe Paulus lohaka pe hele sapele lange iri ke teke, <sup>10</sup> “Hana, a esia lo, ta mana hot mule ngara nenga lamai lape tala pe ta poreke toto. Imot nei lape chach hulu sio pe nganangana mur lape te erue tah. Pe ita non ngana pule lape tahet.” <sup>11</sup> Pe non nenge na imot neu iri nai imot neu ana aunga, te longo taua Paulus nena helenga mur ero. Pe palinga hel ana non neu pule ma la mana nge iri nai. <sup>12</sup> Iok, imot muria nenge te mana hitita ia neu, urana sakilil ero nge imot e maia nga lukunna ana etue neu. Pomalam hana halang te teke mo mana hot mule nga tuttula palaungana neu ke la moma ke nek nge Poenis. Poenis i kileng palaungana e nga mimio nenge Krit. Pe imot muria nenge te mana hitita ia ma ke nau sio langa ruach ele nga chaia sio ngana pe nau haka langa ruach ele pule nga chaia sio ngana.

### *Kileng Eingana Heke Ruach Ke Poreke Toto*

<sup>13</sup> Iok laol, iuiu unne song ke ramana haka at nge sio. Pe hana nemur nga imot neu te amneia pe te hele, “Eio! Toinge ta song hot koi nga iuiu ellei.” Ol pe tetak haka sapele um meena ngana nenge te tamal sue ke la ma nga ruach letena ke rahit ele imot neu. Te tak heke ke het pe mo mana sasar ole sapele nga mimio

neu. <sup>14</sup> Mala pol mana pe tuttula palaungana e lohaka sapele. Pe tuttula neu sio at nga lut pe nga chaia aka ngana. Pe ana tuttula song hot at nga mimio neu ke la tau pengpeng ia imot neu. <sup>15</sup> Ol pe tua ele sapele imot neu pe anali toto nge imem nge mo aua imot neu ke mo song seleng ele. Pomalam mo teke tuttula panem takis menmene imem ol. <sup>16</sup> Iok, mo mana ke mola nga mimio sune nenge Kauta ilina ele nenge sio ol pe mo teke mo tak heke imot neu ana aka sune nenge heonon nga ana imot hoena pe anali toto nge imem. Te purpuria kela tetak heke. <sup>17</sup> Ke het pe te matau nge lape ruach palchach ule imot. Ol pe te mene rur kerkereng ngana mur ke telio hite imot neu ke kerkereng toto ke rahit ele. Iok, te matau pule nge lape ruach ulo heke iri langa peipei nga kileng nenge Lipia. Pomalam tepoi sue tuttula ana huunga ala nga imot neu pe tuttula takis menmene imot ol. <sup>18</sup> Kileng eingana palaungana pe ana ruach poreke ngana neu het ero toto. Pomalam uach sio pe te tatach hote ure mur nenge imot takisia iri pe tesau hote iri ke te lasus. <sup>19</sup> Iok ana uach mule pe tesau hot mule imot neu ana ure hel pule. (Huunga ala mur pe io hel) <sup>20</sup> Pe mo kolkol mana chaia matana pe itoch mur ke mala toto lo iange kileng eingana palaungana neu pur nga pur ngana. Mo purpur ol pe lememe ero mana pe mo hele mana ke mo teke imem lochloch lape mo mete mana ol.

<sup>21</sup> Iok, kileng eingana pe ruach poreke ngana neu poia hana nenga imot ke leteria langa ngaunga ero, pe te ngau ero ke mala lo. Ol pe Paulus mes haka pe hele lange iri, “Hana! Helenga laka e heleia lange imo ke ulolo. Toinge a longo taua iau ke tama nge Krit, ute pele nge pomai lohoh nge ita ero toto. Toinge ita pau kou tatu ke nek pe ute pele hel nge te chach ulu pe te erue rara ero. <sup>22</sup> Pe heueu nei e hele pengpeng lange imo, letemo una sakilil ero. Pe pule samo

loiloi ero iange lape mele e nge ita mete ero. Imot nei mana lape chach ulu ke lasus pe ita lochloch ngana lape ta maulul. <sup>23</sup> E hele ke mai iange NeHalang tu nge iau pe e heto hekeke i. Pe nga miliko, nena angkelo at nge iau pe mes nga ilik, <sup>24</sup> pe hele ke teke, 'Paulus, o matau ero. Ola ke o esia ne Kaesa. Pe NeHalang nenge poi ke urana toto lala nge iong, lape nauele iri lochoch ngana nenge imo ul nga imot nem, ke lape e nge mete ero.' <sup>25</sup> Ke ngana laka nenge e hele ke e teke, a matau pe samo loiloi rara ero. Iange iau letek manmanna toto nge NeHalang nga ure lochoch ngana nemur nge lape te lohot, ke pomanga i sipona heleia at nge iau lo. <sup>26</sup> Iange imot nei, tuttula palaungana nei rahite lo pe lape ruach ulo heke ke langa peipei."

#### *Ruach Palchach Ule Imot*

<sup>27</sup> Iok, mo purpur ke emem miliko iri analoch pe rahtele henel lo (14). Pe kileng eingana palaungana nem takis rere menmene imem nga ruach sana. (Ana ruach, te hetue ke ene Mereterenien.) Pe nga miliko tuch ngana, hana nenge te songongia imot neu te hele ke te teke mo heroi lala nga kileng hal ngana lo. <sup>28</sup> Pomalam te mene rur nenge te kale teua ure meena ngana nga ana horo pe te hesue nga imot ilina ke teu langa ruach letena. Te poia ke pomau ke te teke te amnei urume kileng leme ngana. Iok, te amnei la pe leme sase ngana lohot ke luana iri ana non kina nai. (40 mita) Iok te kulala ke mala pol pe te hesio pule. Pe te amele pe lohot ke iri ana non kina elle pe analoch. (30 mita) <sup>29</sup> Ol pe te matau toto iange te teke lape ruach ulo kolkol teua imem langa um letentena. Pomalam te tamal sio ke um meena ngana iri henel nenge te kele ana rur ke tak ele imot neu pe te hetalaulau ke te teke kileng mesehe sio ke ueiuei. <sup>30</sup> Pe iri hana nenge te umume nga imot neu, te un hote imot neu ana sulang nenge takrungrunge

pe te hesue ke langa ruach ke te teke te ua. Pe te channanga ke te teke tela ke te tamal sue um meena ngana hel nga imot ramana pule ke rahit ele imot. <sup>31</sup> Ol pe Paulus hele lange palinga hel ana hana iri ul aria soke ke teke, "Nenge teke hana nei teua ara ke tela, imo lochloch ngana lape ahēt pe mele e nge lape tu ke maulul ero ol." <sup>32</sup> Ol pe palinga hel ana hana mur te chatō sapele sulang neu ana rur nenge te tom hit ele nga imot pe mana hot ke la ol.

<sup>33</sup> Iok, kileng mesehe sisio lo pe Paulus ngai heke iri ke teke te ngau. Pe hele, "Imo a ngau ero toto ke mala lo i. Etue iri analoch pe henel la ke ulolo, pe a ngaua ute e ero mana. <sup>34</sup> Pe heueu nei, lemek ke a ngau mukam. Iange ngaunga nem lape hekerkereng ia imo ke a maulul. Pe lape ure poreke ngana e lohot nge imo ero toto." <sup>35</sup> Paulus hele ke mau ke het pe mene sapele ngaunga nga iri lochloch ngana mataria pe hetalaulau pe hele urana toto lange NeHalang. Iok, reke pe ngau sapele. <sup>36</sup> Iri lochloch ngana te esia ke mau pe saria kikina sapele. Pomalam iri lochloch te mene ngaunga ke te ngau sapele. <sup>37</sup> Imem nenge motu nga imot neu imem ana non kina iri analoch pe sio ke ana non kina iri mol pe analoch pe rahtele elle (276). <sup>38</sup> Hulua lochloch te ngau ke saria una lo, ke het pe tesau hot eule ngaunga aluana mur lochloch ke langa ruach sana. Te poia poinga nei iange te teke te poia imot neu ke polpolenga haka mule.

#### *Ruach Palchach Ule Imot*

<sup>39</sup> Uach sio toto ol pe hana nenge te umume nga imot neu tenau sio langa peipei, pe te eteia kileng neu ene ero. Ol pe te naue kileng kokolou teu ngana e nga peipei pe te teke te song teu ia imot ke la tetoh heke nga lamau. <sup>40</sup> Iok laol, te chatō sapele rur mur nga um meena ngana mur nenge te tamal sue iri ke tetak ele imot neu. Pe um nemur te mana



riring ke tela ol. Pe pule teun hote rur nenge te kale hit ele imot ana aunga palaungana. Ke het pe tetak heke tuttula ana huunga ala nga imot ramana ke tuttula mene pe mo song ke mo mana sio langa kileng soso ngana. <sup>41</sup> Ol pe imot neu song pela toh haka sapele nga ora pe palpalna neu sel teu toto langa peipei pe are sapele pe ruach hekale hul rere ero ol. Pe ruach ana mee mur teat ke te palchach ulu hite hoena ke het.

<sup>42</sup> Palinga hel ana hana mur te matau nge lape hana nenge tetu nga tuele au ngana, te pasu sio pe te ua sapele. Pomalam te teke te hune iri nike. <sup>43</sup> Pe ero. Aria soke nenge nauelele iri poi ele iri iange ana non lemene ero nge Paulus mete. Ol pe hele lange iri lochloch ngana ke teke, “Imo nenge a eteia pasunga lo, a tamu hot tala pe a pasu sio lala nga peipei. <sup>44</sup> Pe imo nenge a pasu porekreke, a mene imot sachanchana mur nenge ruach palchach ule pe a mana ke a nanas sue iri.” Ke nga kue nei mana iri lochloch te pasu sio langa peipei pe te urana mana. Pe ute pele nge heporeke iri ero.

## 28

### *Mimio Nenge Malta*

<sup>1</sup> Iok, imem lochloch ngana mosio ke la momes nga peipei, pe kileng neu i mimio nenge Malta. <sup>2</sup> Pe tuele huna nemur nga lamau tepoi ke urana mana at nge imem. Tetun hite oan pe te hele at nge imem ke la mo halel iange pitte molmol pe singimem houhou. <sup>3</sup> Pe Paulus takiraua ae perperna putana e pe lake tatach heke nga oan. Ol pe ilimo e nge hunun amneia oan milang ngana pe song hot nga ae putana neu, pe ala hite Paulus penna pe heon sapele. <sup>4</sup> Pe hana nemur nga kileng neu, te esia ilimo neu nge ala hite Paulus penna pe te hele tele hel nge iri ke te teke, “Lape non nei hunun hana koi! I mai heo ngana nge mete nga ruach

poreke ngana neu nike, pe maul sach ke potar mai? Ta nauala. Lape mete kura la iange ara soke nenge ene Iastis lemene ero toto hana nenge pomam pe teke ana non lape mete ke lasus toto.” <sup>5</sup> Ol pe Paulus paltak sue ilimo neu nga penna ke losio haka langa oan matana. Ilimo neu tele Paulus penna pe Paulus amneia leisis ngana unne e ero toto. <sup>6</sup> Pe hana nemur nga kileng neu, mataria tu hit mene Paulus iange te teke tenau nge penna hakoko. Pe pule te teke ma lape Paulus matana liuliu pe losio ke mete, pe ero. Tenau alala pe ute pele lohote nge Paulus ero ke mala lo. Ol pe ramaria hul mule pe te hele ke te teke, “Eh, ero. Lape NeHalang i sipona iloi nemai loi!”

<sup>7</sup> Iok, none nge ene Puplius, na kileng tu ke rochroi mana. Pe ana non, i non soke nga mimio neu. Ne Puplius poi ke urana toto at nge imem. Poia imem ke pomanga ana lang mur imem, pe moma nga na pele ke emem etue mol. <sup>8</sup> Pe ne Puplius temene ngana kou sainin pe porochroch poia ke manga hete. Pe pule singina milanglang toto. Ol pe Paulus i teu ke teke la ke nau toto i. Iok, Paulus hele luluch nge NeHalang ke het pe tal heke penna nge non soke neu pe haleles neu het sapele. <sup>9</sup> Ure nei lohote ke het pe haleles kina mur nga mimio neu te longo sapele. Pomalam teat pe Paulus hemas mule iri. <sup>10</sup> Ol pe iri lochloch ngana nenga mimio neu tepoi ke urana toto at nge imem nga ure lochloch. Iok mo kik haka ke mo teke mo i mulmule pe hana nemur te tunge ure nge halang toto at nge imem.

### *Paulus Lohaka Nge Malta Ke Lange Rom*

<sup>11</sup> Motu ke teio iri mol het nga mimio neu pe mo tamu haka sapele nga imot e nenga kileng nenge Aleksantria. Ana imot tamal hita mana nga mimio neu nike iange mataua lukunna ana etue nem. Pe imot neu

ene laka “Kasto Irinai Polaks.” <sup>12</sup> Mo song ke la moteu nga kileng nenge Sirakus pe motu nga lamau ke emem etue iri mol. <sup>13</sup> Mo song hot mule pe mo mana ole ke la moteu nga kileng nenge Rekium. Iok, pomange rou tuttula nge sio song ke ramana haka. Pe mo song ke etue nai mule pe la mo song teu nga kileng Puteoli. <sup>14</sup> Pe nga kileng neu mo saolia hana hel nge leteria manmanna nge NeHalang. Pe te hele at nge imem ke la motu luluch nge iri ke emem etue rahteale nai (7) mukam. Ke het pe mo lohaka mule pe mola sapele nge Rom. <sup>15</sup> Pe iri nemur nge Rom nenge leteria manmanna nge NeHalang te longe pingamem ke ulolo. Ol pe iri hel te lohaka nga ingala matana nge Apius pe hel te lohaka nga kileng nenge ana Tuele Mol ke teat ke tei ele imem. Paulus esia iri pe sana kikina toto pe heto heke tote NeHalang.

### *Paulus Hetotoro Nge Rom*

<sup>16</sup> Mola mo lohok sapele nge Rom. Pe hana papalauna mur nenge Rom te hele ke te teke lape Paulus i toro tu ke altoto nga pele e. Pe palinga hel ana non elle mana la ke tu ke nauele i. <sup>17</sup> Iok, etue iri mol het lo pe Paulus iu sapele Iuta mur aria papalauna mur ke la te eukirau ke te hole aria. Iok laol, teat ke te eukirau pe Paulus hele lange iri ke pomai, “Imo Iuta mur titik mur laka imo. Iange iau, lek nge Iuta pule koi. A longo at, iau epoi poreke rera hana mur nga etue e ero toto. Pe pule, iau e hele poreke ita sipora rera poinga unne e ero toto. Rera poinga nemur nenge ratete mur te hesio tettele atat nge ita. Pe hana te laua iau nge Ierusalem pe tetal teua iau langa tuele au ngana. Pe te kulosia iau ke la e esia non soke nenge Rom. <sup>18</sup> Iok, te ontei hot tote iau pe te longo teu lala nga lek helenga mur pe te hottaua ute e nge e poia ke poreke ero toto nenge te teke uruna metenga. Pomalam te teke te heit kou sue helenga nei ke lasus pe

tepoi kulosinga ia iau pe ute pele nge iau ero ol. <sup>19</sup> Pe Iuta mur lemeria ero toto. Ke pomalam iau sipok e hele ke e teke eat nge Rom ke non soke Kaesa i sipona longo teu at nga lek helenga mur. Pe lemek ero nge e hele loulou ia lek hana mur. <sup>20</sup> Ke ngana koi nenge e iua imo at heueu nei ke e teke e hele pengpeng lange imo. Pe iau letek manmanna toto nge non nenge Israel mur leteria tu hit menmene pe tenau ala mene nge lape at ke mene mule iri. Ke ngana koi nenge te kale iau ke pomai.”

<sup>21</sup> Ol pe hana nemur te tuacholia Paulus nena helenga ke mai, “Toinge mo mene polia alalaha unne nge at nge Iutea, nem lape mo etei pol nga ure nemur nenge te lohokot nge iong. Pe nei ero toto. Motu pulut mana i. Pe pule, iri nenge tela pe te atat nga kileng neu, te hele polia ute at nge imem ero toto. <sup>22</sup> Pe urana toto nge o nana hote letem at nge imem ke mo longe pule iange hulua nga kileng lochloch te hele loulouia ita ke halang. Ita nenge letera manmanna nge NeHalang.”

<sup>23</sup> Iok laol, Paulus pe hana papalauna nemur tetal mule etue e mule nenge lape teat ke te eukirau mule. Pe nga te eukirau mule ngaria neu ol, Iuta mur iri hulua toto ol nenge teat ke te eukirau nga Paulus na pele. Pe Paulus talun ke hele lala nge iri nga uach nike ke la miliko teu. Paulus hele urumrume pe hemallaha hotote NeHalang nena naualanga pe nekinga nge nena hana mur lala nge iri. Pe pule hele ke kerkereng toto lange iri ke teke leteria manmanna nge Iesus. Pe Paulus hekerkereng ia nena helenga mur nga hotonga mur nenge Moses pe hetatalonga mur tehas sue iri. <sup>24</sup> Pe hana hel nge iri leteria manmanna nga Paulus nena helenga mur pe hel leteria manmanna ero. <sup>25</sup> Te lohaka pe tei pe te tuainaunau ole ke tela sapele. Iange Paulus hele lange

iri ke mai, “Opepengpeng hele hote helenga nge manmanna toto lange lemo tete mur, nenge hele hote nga hetatalonga Isaias hanna ke teke,

<sup>26</sup> “O lange hana nemur pe o hele ke o teke:

“Imo lape a pal talngamo pe a eteia ute pele ero toto.

Pe matamo charchara pe a esia ute pele ero toto.

<sup>27</sup> Iange iri te longe NeHalang nena helenga mur

pe lemeria ero mana ia.

Pomalam te longe pe te nanasia ero.

Pe nenge teke muteria taua NeHalang,

lape mataria lape es ke nek pe talngaria longo ke nek

pe te etei ke nek pe

lape teat mule nge iau ke e hemas mule iri.’

<sup>28</sup> “Ke ngana laka nenge lemek toto ke e teke a eteia ke nek. NeHalang lemene toto ke hemas mule hana lomonmona ngana mur. Pe iri lape te longe pe te nanasia!”

[<sup>29</sup> Paulus hele ke mau ke het pe Iuta mur te lohaka pe tei pe te tuainau ole ke tela sapele.]

<sup>30</sup> Iok, Paulus tu ke ana hesinga nai nga pele nenge i sipona mamaia pe ololia. Pe poi ke nek toto lala nge iri lochloch ngana nenge te lala nge i nga na pele. <sup>31</sup> Pe Paulus hetottore iri nga NeHalang nena naualanga pe nekinga nge ita. Pe pule hetottore Non Soke Iesus lala nge hehei pe hana. Paulus hetottoro pe ute pele nge raele hanna ero ol. Haliu hote NeHalang nena helenga nge urana toto lange hulua lochloch.

## Rom Alalaha Nenge Paulus Hasia Lange Rom Mur

<sup>1</sup> Iau Paulus, pe Iau non nenge e umume nge Iesus Kristus. Pe NeHalang iua iau ke iau hekulkulonga. Pe henonou hote iau nga ume nenge e haliu hote nena helenga urana toto ngana. <sup>2</sup> Helenga urana toto ngana nem, i NeHalang nena helenga manmanna ngana nenge tunge lange nena hetatalonga mur ke tehas sue nga nena alalaha tapuna ngana mur. <sup>3</sup> Pe helenga urana toto ngana nem heleleia Tuna nenge lohote ke i non pe lohote nga mata nenge ne Teuit. <sup>4</sup> Pe Ope nenga poinga nge pengpeng henonou hote ke ara Non Soke Iesus Kristus, i NeHalang Tuna nenge kicina ngana halang iange maul haka mule nga metenga. <sup>5</sup> Pe NeHalang letena urana ia imem pe henonou hote imem ke imem hekulkulonga ana hana mur iange huna nge Iesus. Ke NeHalang kulosia imem ke mo iua hehei pe hana nga kileng lochloch ke leteria manmanna pe te nanasia nena helenga. <sup>6</sup> Pe imo pule a longeiunga nem ke ulolo, nenge NeHalang iua imo ke a lohote ke Iesus Kristus nena hana mur imo.

<sup>7</sup> Ke alalaha nei ehas ia ke lange imo hehei pe hana lochloch nge Rom. Imo NeHalang mutena taua imo pe iua imo ke nena hana mur nge pengpeng.

E hetalaulau amo ke Temere NeHalang pe ara Non Soke Iesus Kristus leteria ia imo pe te poia letemo ke ma ke nek.

*Paulus Teke La Ke Nau Toto Hehei Pe Hana Nge Rom*

<sup>8</sup> Iok, e teke e talun tele lek helenga ke mai: Hehei pe hana nga kileng lochloch ngana nga ich te nenene imo nge letemo manmanna. Nem poia iau ke e hele urana toto lange

ak Soke NeHalang. Pe Iesus Kristus i sipona poia ure nem ke lohote ke pomam. <sup>9</sup> Iau e tung teu tote iau ke e ume nge NeHalang ke e haliu hote helenga urana toto ngana nenge Tuna, pe letek metene imo ke kokoes. E hele ke pomai pe NeHalang eteia ke helenga nei manmanna. <sup>10</sup> Nga etue lochloch e hetalaulau amo pe pule e hetalaulau ke e teke lek kue urana kela e lohote nge imo, pe nenge teke NeHalang lemene, poia ke lohote ke pomam.

<sup>11</sup> Iange iau e teke ela ke e lohote toto nge imo ke e tunge Opepengpeng nena tunginga hel lange imo ke hekerkereng ia imo. <sup>12</sup> Lek helenga luna mai koi: E teke ta hekerkereng hel nga letera manmanna ngana mur. Ke imo letemo manmanna ngana hekerkereng ia iau pe iau letek manmanna ngana hekerkereng ia imo. <sup>13</sup> Titik mur pe liliuk mur, e teke a eteia ke nek. Iau e heninin ia lek inga mur ke kokoes lo ke e teke ela nge imo, ke e heole tele hana hel nge imo ke te nanasia Kristus ke pomanga nenge e poia lange hana lomonmona ngana mur. (Pe ero, ute koi nenge poi elele iau ke atat nei kura.)

<sup>14</sup> Iange iau ak ume laka nenge e halaua hehei pe hana lochloch. Hehei pe hana nenge iri Krik pe nenge iri Krik ero. Pe nge iri nenge te etei ngaria ele haka toto pe iri nenge te etei ngaria unne sune mana. <sup>15</sup> Ke ngana laka nenge letek haka toto ke e teke e haliu hote helenga urana toto ngana lange imo nenge Rom pule.

*Helenga Urana Toto Ngana Kikina Ngana*

<sup>16</sup> Iau e palut haka tote Helenga Urana Toto Ngana iange NeHalang kikina ngana laka helenga nem. Pe I longala teua iri lochloch nenge leteria manmanna nga helenga nem mana. Iri nenge NeHalang mene tele iri, laka Iuta mur. Ke het pe lape



longala teua hana lomonmona ngana mur pule. <sup>17</sup> Pe helenga urana toto ngana nem, hele urume kue nenge NeHalang hetue ita ke ita hehei pe hana nge pengpeng. Kue elle mana. Ngana laka letera manmanna ngana. Iange NeHalang nena alalaha nenge tehas sue ke ulolo, hele ke teke, “Mele nenge letena manmanna pe NeHalang hetue i ke i non nge pengpeng, lape tu ke maulul.”

*Hehei Pe Hana Tehul Rumeria Ia NeHalang*

<sup>18</sup> NeHalang tu nga tapa pe henonou hote letena inin ngana ke teke tuachol ia poinga poreke ngana nenge hehei pe hana te popoia, pe nga nenge tehul rumeria ia poinga nenge NeHalang mutena taua. Iange poinga nemur te hepiriu ele helenga manmanna toto ngana nge iri. <sup>19</sup> NeHalang henonou hote letena inin ngana lange iri iange ure lochloch ngana nenge hemallaha hote i ke hehei pe hana te eteia I, i sipona hemallaha hote lange iri ke ulolo. <sup>20</sup> Pe ute hel nge NeHalang, hehei pe hana nakuria ero toto nge te naue nga mataria. Ure nenge pomanga; Nena kerkerenga nenge tu ke koko pe nena ure talkomkome ngana mur. Pe nga etue nenge NeHalang ala hote ich, ure nemur te lohote ke mallaha mana ke at heueu nei pe te eteia iri ke ulolo. Ke pomalam hehei pe hana tesau hote helenga nenge pomai ke te hele ala aria nga ure poreke ngana mur nenge te popoia ero: Nenge te hele ke teke, “Ah! Imem mo eteia ero i!”

<sup>21</sup> Iri te eteia ke NeHalang tu pe te heto heke i ero pe te hele urana lange i ero pule. Leteria matana ngana mete sio pe leteria au ala mana. <sup>22</sup> Iri siporia te hele ke te teke leteria matana pe ero, aria hauaua toto <sup>23</sup> iange te heto heke NeHalang nenge tu ke koko ero pe te heto haka koukoua aetapuna nenge te umeia

ke nakuna manga ure nemur nga ich. Nenge nakuria pomange hehei pe hana pe ngie mur pe huros mur pe ilimo mur.

<sup>24</sup> Ke pomalam NeHalang poia hehei pe hana nemur ke te nanasia leteria tuanin ngana poreke ngana mur, nenge poi hote meinga nga salaunga ana poinga nenge tepoi helelia nga singlaria. <sup>25</sup> Iri tesau sue NeHalang nena helenga manmanna ngana pe te hetaua nga helenga pallaklaka ngana nenge te nanasia. NeHalang ala hote ure lochloch pe hehei pe hana tehul rumeria ia i pe te heto heke pe te nanasia ure nemur nenge ala hote iri. Ta heto heke NeHalang ke koko. Manmanna!

<sup>26</sup> Ke nga poinga nem NeHalang poia meinga ana poinga mur ke lohote nge iri. Nenge hehei tema luluch mulmule nge hehei pe te nanasia leinga ana poinga ero. <sup>27</sup> Pe hana pule ke pomalam. Tema luluch nge hehei ero pe tela tau mulmule hana. Hana tepoi hel mule ia meinga ana poinga nge iri. Pe nga reria poinga poreke ngana nem, te longia tuanga-chol poreke ngana lange iri ke ulolo.

<sup>28</sup> Pe pule hehei pe hana lemeria ero nge leteria metene ure manmanna ngana mur nge NeHalang. Ke pomalam NeHalang poia leteria tuanin ngana poreke ngana mur ke heporeke tote iri, ke te poia poinga poreke ngana mur nenge urana ero toto nge te poia. <sup>29</sup> Pe te muta toto nga poinga poreke ngana mur pe te teke reria ure pule ke pomange mele hel, pe tepoi poreke mele hel pe saria kekeke ke te hunun hana, pe te palpale pe te pallaklaka, pe leteria poreke tau tote mele hel. Pe te ngunngunu <sup>30</sup> pe te hele porekreke mele hel, pe tehul rumeria ia NeHalang pe te helete ininin ia mele hel, pe nga leteria nge teu tetal heke iri pe te palut lekleke iri, pe leteria matana hote poinga poreke ngana ana kue halang pe te

**1:17:** Hab 2:4; Rom 3:21-22    **1:19:** Ume 14:15-17; 17:24-28    **1:20:** Job 12:7-9; Psa 19:1    **1:21:** Epe 4:17-18    **1:22:** Jer 10:14; 1Ko 1:20    **1:23:** Deu 4:15-19; Psa 106:20    **1:27:** Lev 18:22; 20:13; 1Ko 6:9

longo taua tetemeria mur pe tataria mur ero. <sup>31</sup> Pe leteria matana nga poinga mur nenge urana ero pe tetal hite reria helenga mur ero, pe te poia poinga urana ngana lange mele ero pe leteria ia mele ero. <sup>32</sup> Iri te eteia ke NeHalang nena hotonga hele ke teke, mele hel nenge te popoi ke mai lape te mete. Pe ero, tepur hit mene poinga nemur pe te ngai heke iri hel ke te poia poinga nemur pule.

## 2

### *NeHalang Lape Amnei Teu Nga Ita Lochloch Rera Poinga Mur*

<sup>1</sup> Ke pomalam titik mur pe liliuk mur, atue helenga lange mele hel nga poinga poreke ngana nenge te poia ero. Poinga nem poreke. Iange poinga nenge te poia nem iong lape o poia pule pe helenga nenge otue lange iri nem lape latau mule laka iong, ke heporeke iong malam. <sup>2</sup> Ita ta eteia ke NeHalang amnei teu ngana nga poinga nenge pomai, poia nga poinga nge manmanna pe pengpeng. <sup>3</sup> Pe imo, lemo poinga elle mana ke mange hana nenge a tutue iri ia helenga nem. Pe a teke lape NeHalang renga imo nga lemo poinga nem ma? <sup>4</sup> NeHalang poi ke urana toto lange imo ke poia melmelenga e ke lohot nge imo ero. Iange teke poia imo ke a hulua letemo nga lemo poinga poreke ngana mur. Pe imo letemo tu toto nga nena poinga urana ngana nei ero. Imo nge a eteia ero kai? NeHalang poi ke nek lange imo iange teke poia imo ke a hulua letemo.

<sup>5</sup> Pe imo a chuchuseng ala mana pe lememo ero nge a hulua letemo. Ke nga lemo poinga nei imo sipomo atal hoo hekeke amo melmelenga nenge lape at nge NeHalang ke ele hakaka. Pe lape lohot nge imo nga etue nenge NeHalang henonou hote letena inin ngana. Nga etue nem hulua lochloch lape te naue ke NeHalang nanasia poinga nge manmanna pe pengpeng ke amnei teu nga rera poinga poreke

ngana mur. <sup>6</sup> Ke NeHalang lape tuacholia mele elle pe elle ke purple nena poinga mur nenge popoia. <sup>7</sup> Hehei pe hana hel te nanas menene poinga nge urana. Tepoi ke pomau iange te teke NeHalang heto heke iri pe mene iri ke la tetu luluch nge i pe lape tunge maulinga ke koko lange iri. <sup>8</sup> Pe hehei pe hana hel leteria tu mana nge iri siporia pe te ume ke te halau menmene iri siporia. Te hira ele helenga manmanna ngana iange te teke te nanasia poinga poreke ngana. Pe NeHalang lape tunge aria melmelenga nenge lohot nga letena inin ngana. <sup>9</sup> Ke melmelenga palaungana lape lohot nge hehei pe hana lochloch nenge te popoi poinga poreke ngana: Iuta mur lape iri muka ia, ke het pe hana lomonmona ngana mur pule. <sup>10</sup> Pe iri lochloch ngana nenge te nanasia poinga nge urana, lape NeHalang heto heke iri pe mene iri ke la tetu luluch nge i pe hetakile iri ke tetu ke nek. Iuta mur iri mukaia ke het pe hana lomonmona ngana mur pule. <sup>11</sup> NeHalang nanasia poinga elle mana ke amnei urume rera poinga mur.

<sup>12</sup> Hana lochloch ngana lape te mete pe iri erue iange iri lochloch te popoi poinga poreke ngana. Iri nenge te eteia Moses nena hotonga pe iri te eteia ero pule. Te poia poinga poreke ngana pe NeHalang lape amnei urume reria poinga mur ke pomanga hotonga hele ngana. <sup>13</sup> Iange iri nenge te longe NeHalang nena hotonga pe te nanasia lape NeHalang hetue iri ke iri hehei pe hana nge pengpeng. Pe iri nenge te longo mene NeHalang nena hotonga pe te nanasia ero, NeHalang hetue iri ke iri hehei pe hana nge pengpeng ero. <sup>14</sup> (Hana lomonmona ngana mur te rahite hotonga nem ero pe te nanasia hotonga hele ngana. Ke nga poinga nem, reria hotonga mur laka iri siporia mule. Pe i manmanna ke te rahite

**2:1:** Mat 7:1-2; Ioa 8:7

**2:4:** Epe 1:7; 2Pi 3:15

**2:8:** 2Te 1:8

**2:14:** Ume 10:35

**2:6:** Psa 62:12; Pro 24:12; Mat 16:27; 2Ko 5:10

hotonga nem ero. <sup>15</sup> Iri te henonou hote ke nga leteria te eteia utar nenge urana pe utar nenge poreke ke pomanga hotonga hele ngana. Etue hel te etei ngaria nga ure nemur nenge urana pe poreke hele ke teke poinga nei poreke, nem pe hele ke teke poinga nei urana.) <sup>16</sup> Ure nei lape lohot nga etue nenge NeHalang poia Iesus Kristus ke amnei urume hehei pe hana reria poinga mur pe leteria tuanin ngana mur nenge talkomkome. Helenga urana toto ngana nenge e haliu hotote, heleia ke pomai.

<sup>17</sup> Pe imo, a teke imo Iuta ae? Ke letemo manmanna nga hotonga pe a palut laklaka nge atu ke rochroi toto nge NeHalang. <sup>18</sup> Pe a eteia utar nenge NeHalang mutena taua ke teke a poia pe a mene hengetoro nga hotonga lo ke a nanas mene poinga nge pengpeng. <sup>19</sup> Pe a teke a henonou iri nenge mataria hit pe a lohot ke imo lemenga nge iri nenge tetu nga kileng au ngana. <sup>20</sup> Imo a teke a mene letematana ngana pe helenga manmanna ngana nga hotonga lo, ke a teke a henonou iri nenge aria hauaua pe a hetore iri nenge te eteia ute e ero toto. <sup>21</sup> Imo a hetottore mele hel pe pomerei a hetoro mule imo ero? A hele lange iri hel ke a teke te keme ero pe imo a kemkeme. <sup>22</sup> A hele lange iri hel ke a teke a heporeke amo leinga ero pe imo sipomo a heporekreke amo leinga. Lememo ero ia aetapuna mur pe a keme mulmule tunginga nenge te lalaia nga pele nenge aetapuna mur. <sup>23</sup> A palut laka ke a teke a rahite NeHalang nena hotonga pe a hemei mule i nga nenge a nanasia nena hotonga ero. <sup>24</sup> Pe NeHalang nena alalaha nenge tehas sue ke ulolo, hele ke teke, "Hana lomonmona ngana mur te hele poreke NeHalang iange huna nge imo."

<sup>25</sup> Nenge teke a nanasia hotonga, lemo poinga nenge a ririr us, luna palaungana nenge lape halaua imo.

Pe nenge teke a nanasia hotonga ero pe te riria imo, nem nakuna pomanga te riria imo ero toto. <sup>26</sup> Hana lomonmona ngana mur te ririr us ero pe nenge teke te nanas tau tote hotonga hele ngana, nakuna pomanga iri te ririr us pule. <sup>27</sup> Imo Iuta mur ariria singimo pe lemo hotonga tehas sue nga alalaha ke ma hite imo. Pe hana lomonmona ngana mur lape te hele poreke imo. Iange iri te riria singiria ero pe te nanas ia hotonga hele ngana pe imo a nanasia ero toto.

<sup>28</sup> Nenge teke mele i Iuta ngana toto ia ero pe te riria singina, nem poia mele nem ke lohot ke i Iuta ngana toto ia ero. Iange riringa toto ngana, singira nenge hot ana ia ero. <sup>29</sup> Ke mele nenge teke i Iuta ngana toto, lohot ke i Iuta ngana toto nga riringa nenge lohot nga letena. Pe hotonga nenge tehas sue poi hote ume nem ero, NeHalang nena Opepengpeng poi hote ume nem. Ke mele nenge poi ke pomam lape NeHalang heto heke i pe hehei pe hana te heto heke i ero.

### 3

#### *NeHalang Hele Pe Poia Ure Ke Pengpeng*

<sup>1</sup> Ke utar nge urana nenge lape lohot nenge teke o lohot ke iong Iuta? Pe utar nge urana nenge lape lohot nga nenge teke te riria singim?

<sup>2</sup> Nenge nem ana ure urana ngana mur halang. Nga tele ngana toto NeHalang tunge nena helenga lange Iuta mur.

<sup>3</sup> Pe nenge teke Iuta mur hel leteria manmanna nga helenga nem ero, ure nenge NeHalang teke poia lange iri lape rahat ele mule ero ol. Ae?

<sup>4</sup> Ero toto paian! Hulua lochloch te pallaklaka pe NeHalang hele ke manmanna. Pe NeHalang nena alalaha nenge tehas sue ke ulolo hele ke teke, "NeHalang, nga etue nenge o hele, te eteia ke

iong o hele ke manmanna pe lape

o hekousue iri nga helenga nenge te hemes teu iong ia.”

<sup>5</sup> Iok, mele hel lape te hele ke po-mai: Nga etue nenge ta poia poinga poreke ngana, nem henonou hot pengpeng ia ke NeHalang i non nge pengpeng. Ke nga etue nenge NeHalang tunge melmelenga at nge ita nga rera poinga poreke ngana I poia poinga nge pengpeng ero. Ae? <sup>6</sup> Pa nem ero toto! Nenge teke NeHalang i non nge pengpeng ero, pomerei nge lape amnei teu lange hehei pe hana lochloch nga ich, nga reria poinga mur? <sup>7</sup> Mele lape hele ke teke, “Nga etue nenge e pallaklaka etal haka totote NeHalang ene, iange e pallaklaka ngak nem henonou hot pengpeng ia ke NeHalang i non nge pengpeng. Pe pomerei nenge NeHalang hetue iau ke iau non poreke ngana kura mai?” <sup>8</sup> Pomam iok, a hele ke a teke, “Ta poia poinga poreke ngana, pomalam lape ure urana ngana lape lohot.” Mele hel te hele poreke tote iau ke te teke iau koi nenge e poia helenga nei. Pe NeHalang i sipona lape nau teu lange iri nga poinga nenge te poia nem.

### *Mele E Nga Ich Nei I Non Nge Pengpeng Ero Toto*

<sup>9</sup> Ke lape ta hele ke merei ol? Ita Iuta mur mai ta urana toto nge hana lomonmona ngana mur kai? Ero toto! E hemallaha hote ke ulolo ke e teke Iuta mur pe hana lomonmona ngana mur te popoi poinga poreke ngana. <sup>10</sup> NeHalang nena alalaha nenge tehas sue ke ulolo heleia pule ke teke,

“Mele pele i non nge pengpeng ero toto.

<sup>11</sup> Mele pele i non nge letena matana ero toto.

Mele pele naula mana nge NeHalang ke halaua i ero toto.

<sup>12</sup> Iri lochloch ngana te hul rumeria ia NeHalang.

Pe iri lochloch ke te poia poinga poreke ngana.

Pe mele e nge poia poinga e pengpeng ero toto.

<sup>13</sup> Harria pomalaka nga mele nenge mete ana polo nge hanna pangpanga.

Aria hengetau hele hot menemene helenga pallaklaka ngana mur.

<sup>14</sup> Harria milang pe te hele hot menemene ure poreke ngana.

<sup>15</sup> Pe leteria inin ke ueiuei mana ke te hune hehei pe hana.

<sup>16</sup> Nga kileng lochloch ngana nenge te laia te heporeke ure mur pe te sisparai ule iri.

<sup>17</sup> Pe te eteia poinga nenge tetu ke nek luchluch nge hehei pe hana ero.

<sup>18</sup> Pe te mataua NeHalang ero pule.”

<sup>19</sup> Ita ta eteia ke ure lochloch ngana nenge hotonga heleia, heleia lange iri lochloch ngana nenge hotonga nem meena hite iri. Ke hotonga nem lape herengia hulua lochloch ke NeHalang amnei urume reria poinga poreke ngana mur. <sup>20</sup> Pomalam mele e ero toto nge lape lohot ke pengpeng nga NeHalang matana nga poinga nenge nanas taua hotonga. Hotonga henonou hot mene rera poinga poreke ngana mur.

### *Mele Nenge Letena Manmanna Lohot Ke I Non Nge Pengpeng Nga NeHalang Matana*

<sup>21</sup> Pe nei ol, NeHalang henonou ita nga kue e nge lape ta lohot ke ta pengpeng nga matana. Kue nem Moses nena hotonga heleia pe hetatalonga mur te heleia pule. Pe i lohot nga poinga nenge ta nanasia hotonga ero. Lohot nge NeHalang i sipona. <sup>22</sup> Ana kue nenge at nge I sipona, ngana laka letera manmanna ngana nge Iesus Kristus. Kue elle mana nem lange hulua lochloch (nge Iuta mur pe hana lomonmona ngana mur pule).

**3:9:** Rom 1:18-2:24; 3:23

**3:10:** Psa 14:1-3; 53:1-3

**3:13:** Psa 5:9; 140:3

**3:14:** Psa 10:7

**3:15:** Isa 59:7-8

**3:18:** Psa 36:1

**3:20:** Psa 143:2; Rom 7:7; Kal 2:16

**3:22:** Kal 2:16

**3:24:**



<sup>23</sup> Iange ita lochloch ta poia poinga poreke ngana ke elle pe ta urana ero nge ta mene NeHalang nena hemalmalinga. <sup>24</sup> Pe nga NeHalang letena urana ngana, longala teua ita ke poia ita ke ta pengpeng nga matana. Ke nem i NeHalang nena tunginga nenge at nge ita ke ta mene mene pe uruna ero. Ngana laka nenge ta mene nge Iesus Kristus, nenge mene hot mule ita nga poinga poreke ngana. <sup>25</sup> NeHalang poia Iesus ke pomanga nena kue nenge sau hehei pe hana reria poinga poreke ngana mur ke te lasus toto. Iesus mete ke eina lele pe iri nenge leteria manmanna ke Iesus eina lele iri, NeHalang sau reria poinga poreke ngana mur ke te lasus toto. Poinga nei henonou hote ke nge nike NeHalang poia poinga nge urana pe pengpeng pe tunge tuangachol lange hehei pe hana nga reria poinga poreke ngana ero. <sup>26</sup> Pe heueu nei Iesus mete ngana nem henonou hote ke NeHalang poia poinga nge pengpeng nenge amnei teu langa hehei pe hana reria poinga poreke ngana mur pe mene iri nenge leteria manmanna nge Iesus, ke la hetue iri ke te pengpeng nga matana.

<sup>27</sup> Ke pomalam ute pele nge ta palut laka ia pe ta heto heke ita ia ero. Ia pomerei? Poinga nenge ta nanasia hotonga kai nenge poi hele mai? Ero toto! Poinga nenga letera manmanna ngana laka nenge poi hele palutinga nem. <sup>28</sup> Ke NeHalang hetue ita ke nena hana mur nge pengpeng nga poinga nenge letera manmanna nge Iesus pe nga poinga nenge ta nanasia hotonga, nem ero. <sup>29</sup> Eh?! Iuta mur iri toro kai nenge aria Soke NeHalang mai? Pe hana lomonmona ngana mur ero? NeHalang, hana lomonmona ngana mur aria Soke ia pule. <sup>30</sup> Iange NeHalang elle mana. Pe Iuta mur pe hana lomonmona ngana mur leteria manmanna ngaria elle mana. Pe NeHalang lape poia iri lochloch ke tepeng-

peng nga matana nga leteria manmanna ngana elle mana nem. <sup>31</sup> Pe poinga nenge ta nanasia letera manmanna ngana heporeke hotonga ero. Poinga nenge letera manmanna poia ita ke ta rahat heke hotonga.

## 4

### *Letera Manmanna Ke Mange Apraham*

<sup>1</sup> Iok, rette Apraham i non ke mange ita pe lape ta hele teu langa ure nemur nenge te lohotos nge i ke pomerei? <sup>2</sup> Nenge teke manmanna ke Apraham ume ke poia i sipona ke i non nge pengpeng nga NeHalang matana, lape palut laka pe heto heke i ol. Pe ero. Nakuna ero toto nge tal heke i nga NeHalang matana. <sup>3</sup> Iange NeHalang nena alalaha nenge tehas sue ke ulolo, hele ke teke, "Apraham letena manmanna nge NeHalang pe NeHalang iech nga Apraham letena manmanna ngana. Ke Apraham letena manmanna ngana nem, poia i ke lohotos ke i non nge pengpeng."

<sup>4</sup> Hana nenge te umume te olia iri nga umtutuna pe umtutuna nem te mene ke pomanga tunginga mana ero. Te mene ke pomanga ururia nge te poia ume. <sup>5</sup> Pe tatu ngara nge NeHalang altoto koi. NeHalang i non nenge poia iri nenge te poreke ke te pengpeng mule nga matana. Mele nenge poia ume pele ero pe letena manmanna mana nge NeHalang, lape NeHalang poia i ke pengpeng nga matana. <sup>6</sup> Ne Teuit heleia petanga nei pule ke teke, NeHalang nau nga hehei pe hana reria poinga urana ngana ero, nenge mene iri pe poia iri ke te pengpeng nga matana.

<sup>7</sup> Ke ne Teuit hele ke teke, "Iri nenge te nanasia hotonga ero pe NeHalang sau reria poinga poreke ngana mur

ke te lasus toto, lape te iech.

<sup>8</sup> Pe mele nenge Non Soke letena metene

nena poinga poreke ngana ero, lape iech pule.”

<sup>9</sup> Ke petanga nei mai lape la mana nge iri nenge te ririr us ma lape lange iri nenge te ririr us ero pule? Oe! Iri nenge te ririr us ero lape te mene petanga nem pule. Iange ta hele hote nga NeHalang nena alalaha nenge tehas sue ke ulolo, ke ta teke, “Apraham letena manmanna nge NeHalang pe NeHalang iech nga Apraham letena manmanna ngana. Ke Apraham letena manmanna ngana nem, poia i ke lohot ke i non nge pengpeng.” <sup>10</sup> Ke Apraham mai te riria singina lo kai nenge ure nei lohot nge i mai? Ma nga hoena ol? Ero, ure nem lohot tala nge Apraham pe te riria singina nga hoena ol. <sup>11</sup> Te riria Apraham singina ero kura pe letena manmanna nge NeHalang. Pe letena manmanna ngana nem poia i ke lohot ke pengpeng nga NeHalang matana, pe te riria singina nga hoena ol. Ke pomalam Apraham lohot ke iri nenge te riria singiria ero pe leteria manmanna nge NeHalang temeria ia. Ngana laka iri lochloch ngana nenge te pengpeng pe NeHalang mene iri ke la tetu luluch nge i. <sup>12</sup> Pe lohot ke iri hel nenge te ririr us temeria ia pule. Ngana laka iri nenge te ririr us pe leteria manmanna ke pomange temere Apraham, nga etue nenge te riria singina ero kura.

### *NeHalang Rahite Nena Tomunga Hel Ana Helenga*

<sup>13</sup> Nge nike NeHalang iri nai Apraham te poia tomunga hel ana helenga ke Apraham pe nena tete mur lape te mene ich nei lochloch. Pe tomunga hel ana helenga nenge Apraham mene nem, lohot nga poinga nenge nanasia hotonga ero. Mene tomunga hel ana helenga nem iange NeHalang hetue i ke i non nge pengpeng nga letena manmanna ngana. <sup>14</sup> Iange toinge hehei pe hana te mene

NeHalang nena tomunga hel ana helenga nganangana nga poinga nenge te nanasia hotonga, lete manmanna ngana ana poinga lape luna ero. Pe NeHalang nena tomunga hel ana helenga nem nganangana ero. <sup>15</sup> Iange hotonga poi hote NeHalang letena inin ngana ke lohot. Pe nenge teke hotonga ero lape longonga ole pele ero.

<sup>16</sup> Ke hehei pe hana te mene NeHalang nena tomunga hel ana helenga nganangana iange leteria manmana. Pe ure nem lohot ke pomam ke te mene tomunga hel ana helenga nganangana nem ke pomanga tunginga nenge te mene mene. Ke Apraham nena tete mur lochloch lape te mene tomunga hel ana helenga nganangana nem. Pe iri nenge te nanasia hotonga, iri toro mana reria ia ero. Iri nenge leteria manmanna ke pomange Apraham, reria ia pule iange ita lochloch ngana rette ia. <sup>17</sup> Ke pomanga NeHalang nena alalaha nenge tehas sue ke ulolo, hele ke teke, “E talue iong ke o lohot ke hehei pe hana nga kileng lochloch reiette iong.” Ke tomunga hel ana helenga nenge NeHalang poia lange Apraham nem, lohot ke manmanna nga matana. NeHalang nenge Apraham letena manmanna nge i pe NeHalang nenge hemaul hekeke iri nenge te mete pe alahotote urelu nemur nenge iri ero ke te lohot.

<sup>18</sup> Apraham letena ke teke lape hoho ero ol. Pe letena manmanna nge NeHalang pe angala mana. Ke pomalam lohot ke hehei pe hana nga kileng lochloch reiette ia, ke pomanga NeHalang hele ngana ia lange i nike ke teke, “Lem tete mur lape te lohot ke iri halang toto ke pomanga itoch mur.” <sup>19</sup> Apraham letena metene ke i tuauna toto pe ana hesinga heroi lala nga ana non kina lime ngana lo (100) pe nehei he Sara hoho ero ol. Pe i letena manmanna ngana nge NeHalang kerk-

ereng kura. <sup>20</sup> Apraham eteia ke NeHalang rahite nena tomunga hel ana helenga nem, ke pomalam letena manmanna ngana nge NeHalang het sio ero. Letena manmanna ngana puo ke kerkereng pe heto heke NeHalang. <sup>21</sup> Apraham amnei urume ke ure nenge NeHalang heleia ke teke poia lange i lape lohote ke manmanna. <sup>22</sup> Ke pomalam Apraham letena manmanna ngana poia NeHalang ke iech pe NeHalang hetue i ke i non nge pengpeng. <sup>23</sup> Helenga nemur nenge, "NeHalang iech nga Apraham letena manmanna ngana pe hetue i ke i non nge pengpeng," latau mene Apraham i toro ero. <sup>24</sup> Helenga nei at nge ita pule. NeHalang lape longala teua ita pule iange letera manmanna nge i nenge hemaui heke ara Non Soke Iesus nga metenga. <sup>25</sup> NeHalang letena tuanin hote nike ke teke Iesus mete ke saua rera poinga poreke ngana mur. Pe hemaui heke i nga metenga pe longala teua ita ke la tatu luluch nge I.

## 5

### *Tatu Ke Letera Elle Luluch Nge NeHalang*

<sup>1</sup> Iok, NeHalang longala teua ita ke la tatu luluch nge i iange nga letera manmanna ngana. Pe ara Non Soke Iesus Kristus poia ita ke letera ma ke elle luluch nge NeHalang. <sup>2</sup> Ke tames ngara heueu nei nanas urume Kristus nena ume nenge poia ke ulolo, nenge helue NeHalang letena urana ngana ana kue ke at nge ita. Pe ta iech iange lape tateu langa NeHalang nena hemalmalinga pule. <sup>3</sup> Pe ta iech mana nga nem ero. Ta iech pule nga melmelenga nemur nenge te lohote nge ita. Iange melmelenga nemur te poia ita ke tames ke kerkereng. <sup>4</sup> Pe tames ke kerkereng ngara nem poia NeHalang ke letena here ita. Pe NeHalang letena here ngana ia ita nem, poia ita ke ta kulkulele ara maulinga

nga tapa nge i. <sup>5</sup> Pe ta kulala ngara nem poia ita ke letera nachnai ero iange NeHalang mutena tau tote ita pe hesio teua nena Opepengpeng ke tu teu luluch nge ita ke ulolo.

<sup>6</sup> Ke anau, Kristus mete ke halaua ita nenge tahul rumera ia NeHalang. Pe halaunga nem lohote nge ita nga ana etue pengpeng iange nakura ero toto ol nge ta halau mule ita. <sup>7</sup> Non tei toto nge lape mete ke halaua non e? Nakuna nge lape hana elechle mana tepoia poinga nem. Pe nenge teke non e lemene toto, i lape mete ke halaua non e nge na poinga urana pe pengpeng mana. <sup>8</sup> Pe NeHalang henonou hote mutena tau ngana ia ita ke pomai: Ita hehei pe hana porekreke ngana mur kura pe Kristus mete ke halaua ita.

<sup>9</sup> Ke nenge teke Kristus eina poia NeHalang ke longala teua ita ke la tatu luluch nge i, lape poi ke mere nga letena inin ngana ol? Manmanna toto nge Kristus poia NeHalang ke ulo heke letena inin ngana nge ita ero pule! <sup>10</sup> Iange nga tele ngana ita NeHalang nena ngarang mur koi ita. Pe Tuna mete ke hepeng mule ita ke ulolo. Ke pomalam manmanna toto nge NeHalang letena urana mule nge ita ke neingara i ol, pe lape mene mule ita nga Tuna mau haka mule ngana! <sup>11</sup> Pe nga nem mana ero, ta iech nge NeHalang nga ume nenge poia lange ara Non Soke Iesus Kristus, nenge heueu nei hetakile ita ke itaul NeHalang letera elle mule.

### *Metenga At Nge Antam Pe Maulinga At Nge Kristus*

<sup>12</sup> Poinga poreke ngana lohote nge non e nga ich pe poinga poreke ngana nem poi hote metenga. Ke pomalam metenga lohote nge hulua lochloch iange hulua lochloch te poia poinga poreke ngana. <sup>13</sup> Ke poinga poreke ngana lohote tala nga ich pe NeHalang tunge hotonga nga hoena ol. Pe

nenge teke hotonga ero lape NeHalang tal hite poinga poreke ngana pele ero. <sup>14</sup> Antam poia poinga poreke ngana iange longo ole taua NeHalang nena hotonga. Ke iri lochloch ngana nenge tetu nga etue nenge Antam ke la nga etue nenge Moses, te mete hotot ia poinga poreke ngana, pe iri nenge te poia poinga poreke ngana nenge pomanga nenge Antam poia neu ero, lape te mete pule.

Antam lohot ke heilangia non e nenge lape atat. <sup>15</sup> Pe NeHalang nena tunginga pe Antam nena poinga poreke ngana, te purpur ala hel ero. Non elle nenge ene Antam nena poinga poreke ngana poia hehei pe hana halang ke te mete. Nei manmanna. Pe NeHalang letena urana ngana palaungana toto pe nena tunginga nenge ta mene palaungana toto pule. Ana tunginga laka nenge hehei pe hana halang te mene nga non elle nenge ene Iesus Kristus letena urana ngana. <sup>16</sup> Nga etue nenge Antam poia poinga poreke ngana, NeHalang heleia ke teke poinga nem poreke toto ke tuangachol poreke ngana lape nanasia. Pe NeHalang nena tunginga i ure nenge altoto lochloch nga Antam nena poinga poreke ngana nem. Ke NeHalang tunge nena tunginga at nge ita nga ume nenge Iesus poia ke mene mule hehei pe hana lochloch nga reria poinga poreke ngana mur ke la tetu luluch nge I. <sup>17</sup> Non elle mana nenge ene Antam poia poinga poreke ngana pe nga nena poinga poreke ngana nem, metenga lohot nge hulua lochloch. Nei manmanna. Pe ure nenge palaungana toto laka NeHalang letena urana ngana pe nena tunginga nenge poia hehei pe hana ke te pengpeng mule nga NeHalang matana. Tunginga nem lohot nga ume nenge non elle nenge ene Iesus Kristus poia. Pe lape te mene maulinga pe temes ke kerkereng nga

tetu ngaria.

<sup>18</sup> Non elle nenge ene Antam poia poinga poreke ngana. Pe nem lape poia hulua lochloch ke te mene tuangachol poreke ngana nenga metenga. Pe non e pule nenge ene Iesus poia ume urana ngana e. Pe nga ume nem NeHalang hepeng mule ita ke ta pengpeng nga matana pe longala teua ita pe tunge tunginga nenga maulinga ke koko at nge ita. <sup>19</sup> Non elle nenge ene Antam longo ole taua NeHalang pe nena longonga ole nem poia hulua halang ke te poia poinga poreke ngana. Pe non elle nenge ene Iesus longo taua NeHalang. Ke pomalam poia hulua halang ke te pengpeng mule nga NeHalang matana pe NeHalang longala teua iri ke la tetu luluch nge I.

<sup>20</sup> Hotonga lohot pe henonou hote ke poinga poreke ngana puo irir toto. Pe nga etue nenge poinga poreke ngana lohot ke poreke toto, NeHalang letena urana ngana puo ke palaungana toto ol. <sup>21</sup> Poinga poreke ngana poia metenga ke song ke haia ita lochloch. Pe heueu nei NeHalang letena urana ngana song ke salala hite ita. Pe longala teua ita ke la tatu luluch nge i nga ume nenge ara Non Soke Iesus Kristus poia, pe nem lape tunge maulinga ke koko nge ita.

## 6

### *Tai Ia Rera Inga Heueu Ngana*

<sup>1</sup> Iok, lape ta poi ke pomerei ol? Lape tapoi manmana poinga poreke ngana ke NeHalang letena urana ngana pupuo ke palaungana tototo ol? <sup>2</sup> Ero toto! Tatu ngara nga poinga poreke ngana nemur mete sio ke ulolo. Ke lape tatu hit menmene ero ol! <sup>3</sup> Imo a eteia ke ita ta mene henuninga pe ta lohot ke ita elle mana luluch nge Kristus, pe ta mene henuninga nenge ta mete luluch nge i pule. <sup>4</sup> Nga etue nenge ta mene henuninga, ta mete luluch nge i pe tealohite ita la luluch nge i pule. Pe



Temere NeHalang hemaui heke mule Kristus nga nena kerkerenga nenga nena hemalmalinga. Pe ita pule ke pomalam, pe ta talun ke tai ia rera inga heueu ngana. <sup>5</sup> Iange ita ta lohot ke ita elle mana luluch nge Kristus pe ta mete luluch nge i nga etue nenge mete. Pe nga maul haka mule ngana ita lape ta maul haka luluch nge i pule. <sup>6</sup> Ita ta eteia ke rera poinga niknike ngana mur ta mete haka luluch ia nge Kristus nga manga toto ke ulolo. Ke pomalam singira metmete ngana nei nena kerkerenga ero ol nge poia ita ke ta nanas ia poinga poreke ngana. Ke ita ta nanas tau mene poinga poreke ngana mur ero ol. <sup>7</sup> Iange ta eteia ke kerkerenga nenga poinga poreke ngana rahat tote mele nenge mete ero ol.

<sup>8</sup> Ita letera manmanna ke ta mete luluch nge Kristus pe lape tatu ke ta maul luluch nge i pule. <sup>9</sup> Iange ta eteia ke Kristus maul haka mule nga metenga pe lape mete mule ero ol; metenga nena kerkerenga nenge hekou sio mule i ero. <sup>10</sup> Kristus mete ke hekou sue kerkerenga nenga metenga pe mete ke elle mana pe mete mule ero ol. Pe heueu nei tu ke maulul pe tuia nena tunga nga NeHalang ene. <sup>11</sup> Ke pomalam mana nge imo. Imo letemo metene imo sipomo pe a hele ke pomai koi: Ita ta mete luluch nge Kristus pe poinga poreke ngana nemur te rahat toto mule ita ero ol. Ta mete pe NeHalang hemaui haka mule ita luluch nge Kristus ke tatu ia rera tunga nge NeHalang mana ol.

#### *Metenga At Nge Antam Pe Maulinga At Nge Kristus*

<sup>12</sup> Ke pomalam a longala teua poinga poreke ngana langa singimo metmete ngana nemur ero pe a longele singimo ke nanas tau mene lemene ngana mur ero. <sup>13</sup> Pe a longele singimo unne ke poi ke pomanga ure nenge popoi poinga poreke ngana ero pule. Urana nge

a tunge imo sipomo lange NeHalang iange imo apoi ke pomalaka nge hehei pe hana nenge te mete pe heueu nei a maul haka mule nga metenga. Pe a tung lochloche singimo lange NeHalang ke ume hote ure urana ngana mur. <sup>14</sup> A longele poinga poreke ngana ke nauale imo ero iange atu teu nga hotonga nauala ngana ero, atu teu laka nga NeHalang letena urana ngana ol.

#### *Ita Ume Ana Hana Mur Nga Poinga Nge Pengpeng*

<sup>15</sup> Iok, ita tatu teu mana nga NeHalang letena urana ngana. Pe nenge hotonga nauala ngana, tatu teu ia ero ol. Pe lape tapoi ke pomerei ol? Lape tai nga lemere ngara ke ta popoi poinga poreke ngana kura kai? Ero toto! <sup>16</sup> Imo a eteia ke nga etue nenge a tunge imo sipomo lange mele ke pomanga ume ana hana mur pe a longo taua i, manmanna ke mele nenge a longo taua i nem nena ume ana hana mur imo sapelpele. Pe nenge teke a tunge imo langa poinga poreke ngana lape a mene urumo metenga. Pe nenge teke a tunge imo lange NeHalang ke a nanasia I lape a mene urumo laka poinga pengpeng ngana mur. <sup>17</sup> Pe e hele urana toto lange NeHalang iange nge nike poinga poreke ngana nena ume ana hana mur imo toto, pe heueu nei a tung tote letemo ke longo tau tote helenga manmanna toto ngana nenge te hetoro sue lange imo. <sup>18</sup> Imo te mene hote imo nga poinga poreke ngana ke ulolo pe heueu nei poinga nge pengpeng nena ume ana hana mur imo ol.

<sup>19</sup> Imo letemo matana ngana malaha sakilil ero ke lape e heleia helenga nenge ta helele ia ke kokoes. Nge nike a tunge singimo unne hel ke poinga poreke ngana pe salaulaunga rera ume ana hana mur ia iri. Ke pomalam heueu nei a tunge iri ke la iri ume ana hana mur nga poinga nge urana pe pengpeng. <sup>20</sup> Nga etue

nenge poinga poreke ngana takue imo, a nanasia poinga nge pengpeng ero. <sup>21</sup> Pe a poia poinga poreke ngana nemur ke heueu nei a meia imo. Pe poinga poreke ngana nemur uruna metenga. Aina! Amene ute pele nge urana ero toto nga etue nem! <sup>22</sup> Pe heueu nei NeHalang mene hote imo nga poinga poreke ngana pe a lohot ke nena ume ana hana mur imo. Pe lemo ume mur lape poia imo ke a lohot ke pomange i. Ke pomalam, nga hoena lape a mene maulinga ke koko. <sup>23</sup> Iange poinga poreke ngana uruna laka metenga, pe NeHalang nena tunginga nenge tung mene at nge ita, ngana laka maulinga ke koko nge ara Non Soke Iesus Kristus.

## 7

### *Helenga Opene Nga Leinga*

<sup>1</sup> Titik mur pe liliuk mur, Imo a eteia hotonga nenge Moses. Pe a eteia ke hotonga nauele mele nga etue nenge maulul mana, pe nenge teke mele nem mete, hotonga nena kerkerenga ero ol. <sup>2</sup> Lape e heninia ke pomai koi; heie lei pe lape tu luluch manmana nge ene lola. Pe nenge teke ene mete, hei nem nanasia hotonga nenga leinga ero ol. <sup>3</sup> Pe nenge teke hei neu lei heke mule none nga etue nenge ene maulul kura, lape hotonga hele ke teke hei nem poia poinga poreke ngana nenge heporeke aria leinga. Pe nenge teke ene mete lo, hotonga nenga leinga rahite i ero ol. Ke nenge teke lei haka mule nge none, poia poinga poreke ngana e ero nenge heporeke leinga.

<sup>4</sup> Ke pomalam titik mur pe liliuk mur, hotonga rahite imo ero ol, iange imo elle luluch nge Kristus ke a mete luluch nge I. Ke heueu nei a lohot ke Kristus nena hana mur imo. Pe Kristus maul haka mule nga metenga ke pomalam lape ta ume manmana nge NeHalang ol. <sup>5</sup> Nga etue nenge ta nanas mene singira lemene ngana mur, hotonga kik heke

letera poreke ngana ke tapoi menemene poinga poreke ngana mur. Pe ure nemur nenge ta popoia iri nem te tunge metenga at nge ita. <sup>6</sup> Pe heueu nei hotonga rahit hele ita ero ol, iange ita pomanga ta mete ke ulolo. Pe lape ta nanasia poinga heueu ngana nenge at nga Opepengpeng ke ta ume nge NeHalang, pe ta nanasia poinga nike ngana nga hotonga ero ol.

### *Tames Ke Kerkereng Ke Ta Hekou Sue Poinga Poreke Ngana*

<sup>7</sup> Iok, lape ta hele ke ta teke hotonga i poinga poreke ngana, ae? Hotonga i poinga poreke ngana ero! Hotonga hemallaha hote poinga poreke ngana at nge ita. Nenge teke e memeleia mele nena ute, iau sipok e eteia ke poinga nem poreke ero. Pe hotonga hemallaha hote at nge iau ke teke poinga nem poreke. Iange hotonga hele ke teke, "O memeleia mele nena ure ero." <sup>8</sup> Ke poinga poreke ngana nem lohot nga kue e nga NeHalang nena hotonga ke poi heke letek ke e memeleia ure tunten ngana halang. Ke nenge teke hotonga ero, poinga poreke ngana kikina ngana ero. <sup>9</sup> Nga etue nenge e eteia hotonga ero kura etu ke emaul. Pe nga etue nenge e eteia NeHalang nena hotonga ol, poinga poreke ngana kik haka nga letek pe e mete sapele. <sup>10</sup> Hotonga nem, NeHalang tunge ke hemaulia ita. Pe ero. E naue ke pomanga atia metenga nge iau. <sup>11</sup> Iange poinga poreke ngana nem hottaua kue e nga NeHalang nena hotonga ke pallaka ia iau pe hune iau. <sup>12</sup> Ke hotonga i ure nenge pengpeng pe NeHalang nena helenga kerkereng ngana i ure nenge pengpeng pe urana. <sup>13</sup> Pe nei, eh? Ngana ma ke merei? Hotonga i ure nge urana pe hotonga kai tunge metenga at nge iau mai? Luna ma ke pomam ero! Poinga poreke ngana umeia nena kue nga ure urana ngana mur ke tunge metenga at nge iau. Ke pomalam NeHalang nena hotonga

henonou hote poinga poreke ngana ke i ure nenge poreke toto.

### *Hotonga Nai Nenge Te Palhelel Nga Letera*

<sup>14</sup>Ita ta eteia ke hotonga i ure nenge at nge NeHalang pe iau epoi ke pomau ero. Epoi ke pomalaka nga iau ume ana non pe poinga poreke ngana ole tele iau ke nena non iau ol. <sup>15</sup>Pe poinga nemur nenge epoi pulut mene iri pe e eteia luria ero. Ure nenge e teke e poia ngana kou e poia ero pe epoi mene laka ure nenge lemek ero nge e poia. <sup>16</sup>Pe nenge teke e poia ure nenge lemek ero nge e poia, nem luna pomanga e teke hotonga i ure urana ngana ia. <sup>17</sup>Iange iau sipok e poia ure nemur ero, poinga poreke ngana nenge tu teu luluch nge iau laka nenge popoia ure nemur. <sup>18</sup>Iau e eteia ke ute pele nge urana tu teu nge iau ero. E helele ia nei, nga lek poinga nike ngana nenge tu teu nge iau. Iange iau e teke e poia ure nenge urana pe ngana koi nakuk ero nge e poia. <sup>19</sup>Ke ure urana ngana nenge e teke e poia, e poia ero pe epoi mene ure poreke ngana mur nenge lemek ero nge e poia. <sup>20</sup>Ke nenge teke e popoia ure nenge lemek ero nge e poia, iau sipok e poia ure nemur ero ol. Poinga poreke ngana nenge tu teu luluch nge iau laka nenge memeunun nge iau ke popoia ure nemur ol.

<sup>21</sup>Ke e hottaua hotonga e koi umume nge iau. Nga etue nenge e teke e poia ure nge urana, ute lohok ke poi ele pe e poia ure nenge poreke. <sup>22</sup>Iau nga letek, mutek tau tote NeHalang nena hotonga. <sup>23</sup>Pe e naue ke pomanga hotonga e nem umume nga letek unne pule. Pe hotonga nei, iri nai NeHalang nena hotonga nenge tutu nga letek tepal helel. Hotonga nei poia iau ke iau ume ana non nga hotonga nenga poinga poreke ngana nenge umume nga letek nei. <sup>24</sup>Iau panei etu ngak poreke toto pai! Itei nenge lape mene

hote iau nga singik nenge lape tunge metenga nge iau mai, e? <sup>25</sup>E hele urana toto lange NeHalang nge mene mule iau nga ume nenge ara Non Soke Iesus Kristus!

Ke etu ngak pomai koi; Nga letek, iau ume ana non nga hotonga nenge NeHalang. Pe nga lek poinga nike ngana, iau ume ana non nga hotonga nenga poinga poreke ngana.

## 8

### *Ta Nanasia Opepengpeng Lemene Ngana*

<sup>1</sup>Lek helenga lochloch ngana nenge het sisio nei, luna ma hot ke mai koi: Imo nenge letemo manmanna nge Iesus Kristus, NeHalang lape tuacholia lemo poinga poreke ngana mur ero ol. <sup>2</sup>Iange nga ume nenge Iesus Kristus poia, Opepengpeng nenge tunge maulinga, mene hote imo nga hotonga nenga poinga poreke ngana pe metenga. <sup>3</sup>Hotonga nenge Moses kikina ngana ero nge mene mule ita iange singira makuk mana nge nanasia. Ke pomalam ta nanas mene poinga poreke ngana mur. Pe NeHalang lemene ero ia poinga poreke ngana nenge tu teu luluch nge ita, ke pomalam kulosia i sipona Tuna ke lohok ke i non ke pomange ita hana porekreke ngana mur, ke la lohok ke I tunginga nenge mene mule ita nga rera poinga poreke ngana mur. <sup>4</sup>NeHalang poia ke pomai iange teke ta nanasia poinga nge pengpeng nenge hotonga heleia ke teke ta nanasia pe ta longo taua Opepengpeng pe ta nanas mene ita non lemere ngara nga poinga poreke ngana ero.

<sup>5</sup>Iri nenge te nanas menmene iri siporia lemeria ngaria nga poinga poreke ngana mur, leteria tu mana nga poinga poreke ngana mur. Pe iri nenge te nanas menmene Opepengpeng lemene ngana mur, leteria tu mana nga ure nemur nenge Opepengpeng lemene taua iri.

<sup>6</sup> Iange iri nenge leteria tu manmana nga reria poinga poreke ngana mur, lape te mete. Pe nenge teke leteria tu mana nga Opepengpeng pe te nanas mene lemene ngana, lape NeHalang poia iri ke tetu ke nek pe tunge maulinga lange iri. <sup>7</sup> Ke iri nenge te nanas menmene lemeria ngaria nga poinga poreke ngana mur, te lohok ke NeHalang nena ngarang mur ia iri iange te longo taua NeHalang nena hotonga ero pe nakuria ero toto nge te nanasia. <sup>8</sup> Ke iri nenge te nanas menmene lemeria ngaria nga reria poinga poreke ngana mur nakuria ero toto nge te poia NeHalang ke iech.

<sup>9</sup> Pe imo a pomange iri nemur ero. Nenge teke NeHalang Opene tu teu luluch toto nge imo lape a nanas mene lememo ngamo nga poinga poreke ngana mur ero ol. Lape a nanas mene Opepengpeng lemene ngana mur mana. Pe mele nenge Kristus Opene tu teu luluch nge i ero, Kristus nena non ia ero. <sup>10</sup> Pe nenge teke Kristus tu teu luluch nge iong, singim lape mete iange nga lem poinga poreke ngana. Pe opem lape tu ke maulul iange o lohok ke iong non nge pengpeng ke ulolo nga ume nenge Kristus poia. <sup>11</sup> Pe nenge teke i nenge hemaui heke Iesus nga metenga Opene tu teu luluch nge iong, iok, lape tunge maulinga langa singim metmete ngana nem pule. Pe lape poia ke pomai nga Opene ana ume, Opene nenge tu teu nge iong.

<sup>12</sup> Ke pomalam titik mur pe liliuk mur, ita ara ume nenge ta nanas mene NeHalang Opene hele ngana. Pe tatu ke ta nanas mene lemere ngara nga poinga poreke ngana ero. <sup>13</sup> Iange nenge teke otu ke o nanas mene lemengam nga poinga poreke ngana, lape o mete. Pe nenge teke o hemete singim lemene ngana mur nga poinga poreke ngana, lape otu ke o maulul. <sup>14</sup> Iange iri nenge te nanas mene NeHalang Opene,

NeHalang tutuna mur ia iri. <sup>15</sup> Iange Ope nenge NeHalang tunge lange imo nem, i Ope nenge poia imo ke a ume manmana ero ol pe i Ope nenge poia imo ke a matau ero. I Ope nenge poia imo ke NeHalang tutuna mur imo. Pe nga Ope nem nena kerkerenga, ita ellechle nakura nge ta hetue NeHalang ke ta teke, “Temek!” <sup>16</sup> Ke NeHalang Opene hele atat nga opere mur ke teke NeHalang tutuna mur koi ita. <sup>17</sup> Pe nenge teke NeHalang tutuna mur ita, lape ita ul Kristus ke ta mene petanga mur nge Temere NeHalang nenge talue ke teke nena hana mur reria ia. Pe utar nenge NeHalang talue ke teke Kristus nena ia, ita lape ta mene pule. Ke nenge teke ta takisia melmelenga luluch nge Kristus, lape tateu langa nena hemalmalinga pule.

#### *Nge He Lape Ta Mene Hemalmalinga*

<sup>18</sup> Iau e naue ke hemalmalinga nenge NeHalang lape tunge at nge ita nge he, i ure nenge palaungana toto nga melmelenga nenge ta takiskis ia heueu nei. <sup>19</sup> Ure lochloch ngana nenge NeHalang ala hote te heor haka mana pe te kulala iange te teke tenau ala tote NeHalang nge hemallaha hote tutuna mur. <sup>20</sup> Iange ure lochloch ngana nenge NeHalang ala hote, tetu ke pengpeng ke pomanga alahot ngana ia iri ero ol. Pe tepoi ke pomau nga lemeria ngaria ero – tepoi ke pomau nga NeHalang lemene ngana. Ke pomalam te kulele mene <sup>21</sup> NeHalang ke mene hot kel ia ure lochloch ngana nenge ala hote iri nga poinga nenge tetu ke te lapusa sio mana, ke tetu ke tepoi tetele mana ol. Pe te poi tetele ngaria nem, pomalaka nga hemalmalinga nenge NeHalang tunge lange tutuna mur.

<sup>22</sup> Ita ta eteia ke ure lochloch ngana nenge NeHalang ala hote iri, te amneia melmelenga pe te kulalala ke at heueu nei. Pe melmelenga nenge te

**8:9:** 1Ko 3:16; 12:3  
Kal 4:5-7; Hem 21:7

**8:10:** Kal 2:20  
**8:16:** 2Ko 1:22

**8:13:** Kal 6:8; Kol 3:5  
**8:20:** Gen 3:17-19

**8:15:** Mak 14:36; 2Ti 1:7

**8:15:**



amneia nem pomalaka nga melmelenga nenga hohonga. <sup>23</sup> Pe melmelenga nem lohote mana nge iri ero. Ita nenge ta mene tele NeHalang nena tunginga nenga Opepengpeng, ta amneia melmelenga nem nge tu teu nge ita pule. Pe ta kulele tote NeHalang ke poia ita ke ta lohote ke tutuna mur ita, nga nenge mene mule singira lochloch nga poinga poreke ngana. <sup>24</sup> Ita ta kulkulele mene ara maulinga nga tapa nge NeHalang. Pe nenge teke ta naue NeHalang nge tunge at nge ita lo, lape ta kulele ute pele ero ol. Iange nenge teke mele rahite ure nenge kulelele nga penna lo, lape kulkulelele utar kura? <sup>25</sup> Pe ita ta kulkulelele ara maulinga nga tapa nge NeHalang pe ta mene ero kura, ke pomalam pe tatu ke nek mana pe ta kulala.

<sup>26</sup> Pe Opepengpeng halaulaua ita nenge sara kikina nge NeHalang ero ke pomalam mana, iange ta eteia poinga nenge ta hetalaulau ero pe ta eteia utar nenge ta hetalaulau ia ero pule. Pe letera meena ngana pe rera tanginga mur tetu teu nga letera nge teu toto pe nakura ero toto nge ta hele urume. Pe Opepengpeng i sipona halaua ita ke hetalaulau ara lange NeHalang.

<sup>27</sup> NeHalang nau teu atat nga letera pe eteia letera tuanin ngana mur. Pe eteia Opepengpeng letena tuanin ngana iange Opepengpeng halaua NeHalang nena hana mur ke hetalaulau aria ke kerkereng toto lange NeHalang, pe poia nga poinga nenge NeHalang mutena taua.

<sup>28</sup> Pe ita ta eteia ke NeHalang poia ure lochloch ngana ke te ume ke urana nge iri nenge muteria taua I. Ngana laka ita lochloch nenge NeHalang iua ita ke teke ta umeia nena ume nenge teke popoia. <sup>29</sup> Iri nenge leteria manmanna, NeHalang etei tele nike pe hesilei hote iri pe tal hote iri ke altoto, ke tepoi ke mange

Tuna. Pomalam Iesus lohote ke pomanga tiria nenge palau. <sup>30</sup> Pe iri nenge NeHalang tal hote ke altoto, iri laka nenge iua ke nena hana mur ia. Pe iri nenge NeHalang iua, iri laka nenge hetue ke te pengpeng nga matana. Pe iri nenge NeHalang hetue ke te pengpeng nga matana, iri laka nenge hemalmalia iri.

### *Ute Pele Rir Hote Ita Ero Toto Nga Mutenga Nenge NeHalang*

<sup>31</sup> Ke lape ta hele ke pomerei nga ure nemur nenge NeHalang poia nei mai? Nenge teke NeHalang mes lulich nge ita, itei toto nenge lape lohote ke hekou sue ita? <sup>32</sup> NeHalang rahit ele Tuna ero, tung hote Tuna ke mete ke halaua ita lochloch. Ke nga ume nenge Tuna poia nem, lape NeHalang letena ia ita pe tunge ure lochloch ngana hel at nge ita pule ke halaua ita. <sup>33</sup> Mele pele nakuna ero toto nge poia helenga e ke tua taua NeHalang nena hana mur nenge hesilei hote iri. Iange NeHalang i sipona hetue iri ke nena hana mur nge pengpeng. <sup>34</sup> Pe itei toto nge lape hele ke teke NeHalang nena hana mur iri hana porekreke ngana mur? Mele pele ero toto iange Iesus Kristus mete pe maul haka mule nga metenga pe heueu nei are nga NeHalang ilina ele nenga pen tamalmal pe hele lala nge NeHalang ke halaulaua ita. <sup>35</sup> Pe itei toto nenge lape rir hote ita nga mutenga nenge Kristus? Nenge teke ure meena ngana lohote nge ita pe ta takisia melmelenga pe mele poi poreke ita, pe uringa lohote nge ita pe rera urelu ero pe metenga lohote nge ita. Ute pele ero toto nga ure lochloch ngana nemur nge lape rir hote ita nga mutenga nenge Kristus! <sup>36</sup> Iange manmanna nge ure nemur lape lohote nge ita ke pomanga NeHalang nena alalaha nenge tehas sue ke ulolo, hele ngana nenge hele ke teke,  
 “Kokoes hana te teke te hunune  
 imem nge iong mana;

8:23: 2Ko 5:2-4

8:27: Psa 139:1

8:28: Epe 1:11

8:29: Kol 1:18; Hip 1:6

8:31: Psa 118:6

8:33: Isa 50:8-9

8:36: Psa 44:22

Pe te popoia imem ke pomanga sipsip nenge te hunune.”

<sup>37</sup> Ure meena ngana nemur lochloch te heporeke ita nga letera manmanna ngana ero iange i nenge mutena tau tote ita, talue ita ke ta hekou sue ure lochloch ngana nemur. <sup>38</sup> Iange iau e etei tote ke ute pele ero toto nge lape rir hote ita nga nena mutenga nge ita. Metenga pe ure meena ngana mur nenge te lohotot nge ita nga ta maulul ngara. Pe angkelo mur pe ope poreke ngana mur pe ure nemur nenge tetu heueu nei pe ure nemur nenge te lohotot nge he pe kerkerenga mur, <sup>39</sup> pe ure nemur nenge tetu nga ora pe nemur nenge tetu nga ere pe ure lochloch ngana nenge tetu nga ich, ure nemur nakuria ero toto nge te rir hote ita nga NeHalang nena mutenga nge ita, nenge henonou hote nga ume nenge ara Non Soke Iesus Kristus poia.

## 9

### *NeHalang Hesilei Hote Nena Hana Mur Nge Israel*

<sup>1</sup> Iau Kristus nena non toto koi iau. Pe e hele ke manmanna pe e pallaklaka ero koi. Pe e etei ngak nga utar nenge urana pe utar nenge poreke, Opepengpeng heleia at nge iau ke teke e hele ke manmanna pe e pallaklaka ero. <sup>2</sup> Iau letek meena toto pe letek kolkol ke kokoes mana. <sup>3</sup> Iange lemek ke e teke NeHalang ulo heke letena inin ngana nge iau toro mana pe rir hote iau ke Kristus nena non iau ero ol. Pe e teke mene mule Israel mur, alok mur pengpeng. <sup>4</sup> Iri Israel mur pe NeHalang nena hana mur nenge poia iri ke te lohot ke tutuna mur ia iri pe NeHalang hemallaha hote nena hemalmalinga lange iri. Pe te takisia NeHalang ke i luluch nge iri pe te mene nena hotonga mur pe te etei tote poinga nenge te heto heke NeHalang pe NeHalang poia tomunga hel ana helenga luluch nge iri. <sup>5</sup> Pe rette Apraham pe Isak pe Iakop

reria tete mur ia iri pe Kristus lohot nge iri hana ana mata nem. Kristus i NeHalang nenge nauele ure lochloch pe ta heto hekeke i ke koko! Manmanna toto.

<sup>6</sup> Hehei pe hana halang nge Israel te lohot ke NeHalang nena hana mur ia iri ero iange leteria manmanna nge Kristus ero. Pe tomunga hel ana helenga nenge NeHalang poia lange Apraham nge nike, NeHalang poia ke lohot ke manmanna. <sup>7</sup> Pe iri nenge Apraham nena tete mur ia iri, iri lochloch te lohot ke NeHalang tutuna mur ia iri ero. Iange NeHalang hele lange Apraham ke teke, “Ne Isak nena tete mur lape te poi hote lem tete mur nenge e heleia lange iong nem.” <sup>8</sup> Nenge nei luna mai koi: Hehei pe hana nenge te lohot mana nga poinga nenga leinga nenge hehei te hohoe iri, iri nemur Apraham nena tete mur toto ia iri ero. Apraham nena tete mur toto laka iri nenge te lohot ke pomanga NeHalang nena tomunga hel ana helenga heleia. Ke iri nemur lape te lohot ke NeHalang tutuna mur ia iri toto. <sup>9</sup> Iange NeHalang nena tomunga hel ana helenga nem hele ke mai koi: “Nga hesinga nenge atat nem, teio iri rahtele henel het pe eat mule. Pe he Sara lape hoe tum tamane ngana e.”

<sup>10</sup> Pe nem mana ero. He Repeka hoe tutuna mur nai nge iri tatanmanna nge non elle mana nem. Nge rette palaungana ne Isak. <sup>11-12</sup> Aina nai neu taria hoe iri ero kura pe NeHalang hesilei hote elle nge iri ke ulolo ke poi nena ume ana non ia. Pe NeHalang hele lange he Repeka ke teke, “Tum nenge i palaungana lape ume mule nge tum nenge kino.” Ke NeHalang iua kol nem iange hesilei hote i pe hesilei hote i nga nena ume e nenge poia ero. Iange iri nai te poia ume e nge urana ma poreke ero kura. <sup>13</sup> Ke NeHalang nena alalaha nenge tehas sue ke ulolo, hele ke teke, “Iau

letek tutu nge Iakop pe e hesilei hote i pe Iso ero.”

<sup>14</sup> Ke lape ta hele ke pomerei mai? Lape ta hele ke ta teke NeHalang poia poinga nge pengpeng ero kai? Ero toto! <sup>15</sup> Iange NeHalang hele lange Moses ke teke, “Lape letek ia mele nenge letek urana ia pe epoi ke nek lange mele nenge e teke e halaua i.”

<sup>16</sup> Ke NeHalang hesilei hote ita iange letena ia ita. Pe hesilei hote ita nga rera ume urana ngana mur ero pe nga ita sipora lemerna ngara ero. <sup>17</sup> Iange NeHalang nena alalaha nenge tehas sue ke ulolo, hele lange ne Parao ke teke, “E hemes heke iong ke iong naungaala ana non nge Ekipto, iange e teke e poia iong ke o hemallaha hote lek kerkerenga. Nga poinga nem lape hulua lochloch ngana nga ich te hesongia ek.” <sup>18</sup> Ke pomalam NeHalang letena ia mele nenge teke letena urana ia pe poia mele ke longo ole nga lemene ngana.

*NeHalang Letena Inin Ngana Pe Letena Urana Ngana*

<sup>19</sup> Iok, amoe onteia iau ol, “Nenge teke pomam, iok, pomerei toto nenge NeHalang hele ke teke ta popoi poinga poreke ngana kura? Pe ara tei toto lape hul mule NeHalang lemene ngana?” <sup>20</sup> Ia kole iong itei toto nenge o teke o hepallele mulmule onteinga lala nge NeHalang malam? Tuninga nenge mele pip hote nga ich pilpile ngana, ontei mule mele nenge pip hote i ke pomai ero, “Pomerei nenge o umeia iau ke pomai?” <sup>21</sup> Nenge teke mele nem lemene ume hot ke ure nai nga ich pilpile ngana nenge pip hot tuninga nem ia. Elle nenge ma ke tatalo elele etue papalauna mur pe elle nenge te poipoi reria ume ana ia nga etue lochloch.

<sup>22</sup> Pe NeHalang poi ke pomalam pule ke teke hemallaha hote kikina ngana pe letena inin ngana. Pe ero. Maluch ole mene iri nenge

lape ulo heke letena inin ngana nge iri. Ngana laka iri nenge NeHalang tatalo ala ke teke heporeke iri. <sup>23</sup> NeHalang maluch ole iri iange teke hemallaha hote nena hemalmalinga palaungana lange iri nenge letena ia iri. Ngana laka iri nenge NeHalang tataloele tele iri nike ke teke te mene nena hemalmalinga. <sup>24</sup> Pe ita laka nenge NeHalang iua ita nem. Pe NeHalang mene hote nena hana mur nge Iuta mana ero, mene hote nena hana mur nge hana lomomona ngana mur pule. <sup>25</sup> Ke NeHalang nena alalaha nenge hetatalonga Hosea has sue ke ulolo, hele ke teke, “Hana nenge lek hana mur ia iri ero, Lape e hetue iri ke ‘lek hana mur ia iri.’”

Pe tuele kina nemur nenge mutek taua iri ero, lape e hele ia iri ke, ‘Mutek tau tote iri.’”

<sup>26</sup> Pe pule, “Nga kileng lochloch ngana nenge E hele lange iri ke e teke, ‘Imo lek hana mur imo ero.’ Hulua lape te hetue iri ke ‘NeHalang nenge tu ke maulul tutuna mur ia iri.’”

<sup>27</sup> Pe hetatalonga Isaias hele urume hana nenge Israel ke pomai: “Hehei pe hana nenge Israel iri halang toto ke pomanga peipei nenga ruach ilina, pe NeHalang lape mene mule ellechle mana nge iri ke te mene maulinga ke koko.”

<sup>28</sup> Iange Non Soke lape tom choro mene ana etue ke choro mana pe poia melmelenga ke lohot nge hehei pe hana lochloch nga ich pe lape poia ke ueiuei toto.”

<sup>29</sup> Ke pomanga hetatalonga Isaias hele ngana ia ke ulolo, nenge hele ke teke, “Nenge teke Non Soke nenge kikina toto

9:15: Exo 33:19

9:16: Epe 2:8

9:17: Exo 9:16

9:20: Isa 29:16; 45:9

9:21: Jer 18:6

9:25: Hos 2:23

9:26: Hos 1:10

9:27: Isa 10:22-23

9:29: Isa 1:9

longele matara alona hel ke tetu  
ero  
lape ita lochloch ngana tahet  
ke pomange iri nenge Sotom pe  
Komora.”

*Israel Mur Leteria Manmanna Nge  
Kristus Ero*

<sup>30-31</sup> Ke lape ta hele ke pomerei ol? Israel mur tepur kikiria toto ke te tango rere kue ke te lohote ke te pengpeng nga NeHalang matana. Pe te hottaua ero iange te teke te poia nga kue nenge te nanas tau tote hotonga mur. Pe hana lomonmona ngana mur tepur kikiria ero mana pe te lohote ke te pengpeng nga NeHalang matana iange nga leteria manmanna ngana mana. <sup>32</sup> Ia pomerei nge Israel mur te mene ero? Te mene ero iange iri leteria manmanna nge Kristus ero. Pe te teke reria ume urana ngana mur mana lape poia iri ke te pengpeng nga NeHalang matana. Ke pomalam te singsingo nga “um nenge poia hehei pe hana ke te singsing ia”. <sup>33</sup> Ke pomanga NeHalang nena alalaha nenge tehas sue ke ulolo, hele ngana nenge hele ke teke,  
“Anau, e talue um e nga kileng nenge Sion.

Um nenge lape poia hehei pe hana ke te singsingo pe te losio ia.

Pe mele nenge letena manmanna nge I lape e hile hote i ero.”

## 10

<sup>1</sup> Titik mur pe liliuk mur, ure nenge letektek ia pe e hetalaulau ia, ngana koi nenge e teke NeHalang mene mule lek hana Israel mur. <sup>2</sup> Iau e hele ke pomai iange e etei tote: Iri leteria toto ke te teke te ume nge NeHalang. Pe leteria matana ngana nga kue nenge te nanasia ke te ume nge NeHalang, pengpeng ero. <sup>3</sup> Iange NeHalang poia kue e nenge lape poia iri ke te lohote ke te pengpeng nga matana. Pe iri lemeria ero ia ke te nanasia ero. Te teke te poia iri ke te pengpeng nga iri siporia reria poinga

nenge te nanasia hotonga. <sup>4</sup> Hotonga nenge NeHalang tunge lange Moses nem, hetala ngana nge Kristus. Pe iri lochloch ngana nenge leteria manmanna nge Kristus, lape te lohote ke te pengpeng nga NeHalang matana.

<sup>5</sup> Moses hele urume hotonga nem nge lape poia mele ke pengpeng nga NeHalang matana: Nenge hele ke teke, “Mele nenge nanas taua hotonga tang ngana lape tu ke maulul.”

<sup>6</sup> Pe NeHalang nena alalaha nenge tehas sue ke ulolo, hele urume leteria manmanna ngana nge poia ita ke ta pengpeng nga NeHalang matana: Nenge hele ke teke, “O ontei mule iong nga letem ke pomai ero, ‘Itei nenge lape haka langa lut nga tapa?’ (ke mene sue Kristus at) <sup>7</sup> Pe o ontei mule iong ke pomai ero pule, ‘Itei nenge lape sio langa metenga ana kileng?’ ” (ke hemaule heke mule Kristus nga metenga) <sup>8</sup> NeHalang nena alalaha nenge tehas sue ke ulolo hele ke mai koi,

“Helenga tu rochroi nge iong nem lo; tuteu luluch nge iong nga letem pe nga halim pule.”

Pe helenga nem i helenga nenge lete manmanna ngana ana nenge mo haliu hotote. <sup>9</sup> Ke nenge teke o hele hot ke o teke, “Jesus i Non Soke,” pe letem manmanna nga letem toto ke NeHalang hemaule heke mule i nga metenga, lape NeHalang mene mule iong. <sup>10</sup> Iange letem manmanna nge teu toto pe nem poia iong ke o lohote ke o pengpeng nga NeHalang matana. Pe nga halim o hele hote letem manmanna ngana pe nem poia iong ke NeHalang mene mule iong. <sup>11</sup> Iange NeHalang nena alalaha nenge tehas sue ke ulolo, hele ke teke, “Mele nenge letena manmanna nge Kristus, lape NeHalang hile hote i ero.” <sup>12</sup> Poinga nem lape lohote ke elle mana nge Iuta mur pe hana lomonmona ngana mur pule. Ute pele nge altoto nge iri ero. Ke Non Soke elle nem, i hulua lochloch nenge leteria



mamanna nge i aria Non Soke ia, pe lape tunge ure urana ngana mur lange iri. <sup>13</sup> Ke, “iri lochloch ngana nenge leteria manmanna nge i lape NeHalang mene mule iri.”

<sup>14</sup> Pe nenge teke leteria manmanna nge NeHalang ero, pomerei nge te onteia I ke halaua iri? Pe nenge teke te longe NeHalang nena helenga ero, lape leteria manmanna nge I ke merei toto? Pe nenge teke mele haliu hote nena helenga ero, lape te longe ke mere? <sup>15</sup> Pe nenge teke te kulos hote iri ero lape te haliu hote nena helenga ke pomerei? Ke NeHalang nena alalaha nenge tehas sue ke ulolo, hele ke teke, “Urana toto! Hana nenge tei hot ia helenga urana toto ngana, ngaria koi te atat!”

<sup>16</sup> Pe hana halang nge Israel te longala teua helenga urana toto ngana nem ero. Iange hetatalonga Isaias hele ke teke, “Non Soke, mele pele letena manmanna nga lem helenga nenge mo haliu hote lange iri ero.” <sup>17</sup> Ita, letera manmanna ngara lohot iange ta longe helenga urana toto ngana. Pe ta longe helenga urana toto ngana iange mele haliu hote Kristus nena helenga. <sup>18</sup> Pe e teke e onteia imo ke pomai: Hehei pe hana nenge Israel mai, te longe helenga urana toto ngana pule ma ero? Iri te longe ke ulolo. Iange NeHalang nena alalaha nenge tehas sue ke ulolo hele ke teke,

“Te longe hana nemur reria haliunga nga ich lochloch,  
pe reria haliunga song ke langa kileng lochloch ngana nga ich.”

<sup>19</sup> Iok, lape e ontei mule imo ke pomai: Heei pe hana nenge Israel mai, te eteia helenga urana toto ngana pule ma ero? Iri te eteia ke ulolo. Iange Moses hele tala ke teke,

“Lape e mene teua iri nenge lek hana mur ia iri ero  
ke tetu luluch nge iau,

pe nga nem lape e poia imo ke samo keke iri.

Pe lape letek urana ia iri nenge te eteia ute e ero toto

pe nga nem lape e helete ininia imo.”

<sup>20</sup> Hetatalonga Isaias heleia NeHalang nena helenga ke mallaha toto ke teke,

“Heei pe hana nenge te tango rerere iau ero,

te hottaua iau.

Pe e hemallaha hote iau lange iri nenge te ontei rerere iau ero.”

<sup>21</sup> Pe nenge Israel, NeHalang hele ke teke,

“Nga etue lochloch etul hote perik ke e teke elau teua iri.

Pe ero, te longo ole taua iau pe te hele poreke iau.”

## 11

### *Israel Mur Hel Mana Leteria Manmanna Nge Non Soke*

<sup>1</sup> Iok, lape e ontei ke pomai: NeHalang mai hile hote nena hana mur ol kai? Ero toto! Iange iau lek nge Israel pule pe lekte laka ne Abraham pe e lohot nga kaleu ramana nge Pensamin. <sup>2</sup> Israel mur teha ero kura pe NeHalang hesilei hote iri ke ulolo ke nena hana mur ia iri. Ke NeHalang nena hana nemur nenge hesilei hote iri ke ulolo, lape hile hote iri ero. Imo a eteia nananga nenge hetatalonga Elaisa nenge tu nga NeHalang nena alalaha nenge tehas sue ke ulolo. Elaisa letena inin taua Israel mur pe hele ke kerkereng toto lange NeHalang ke teke, <sup>3</sup> “Non Soke, hana nemur te hune lem hetatalonga mur pe te toto sue lem tunginga ana hatanga mur. Pe iau toro mana koi etu ol pe ngaria koi te teke te hunune iau pullo.” <sup>4</sup> Pe NeHalang tuacholia Eliasa nena helenga ke pomerei? NeHalang tuacholia ke teke, “Iau e rahat ke lek hana mur iri 7,000 pe hana nemur te heto hekeke aetapuna nenge ene Paal ero.” <sup>5</sup> Ke heueu nei pule NeHalang hile hote nena hana

10:13: Jol 2:32

10:15: Isa 52:7

10:16: Isa 53:1

10:18: Psa 19:4

10:19: Deu 32:21

10:20: Isa 65:1

10:21: Isa 65:2

11:1: 1Sa 12:22; Psa 94:14; Pil 3:5

11:3: 1Ki 19:10, 14

11:4: 1Ki 19:18

mur Israel ero. I hesilei hote hehei pe hana hel ke nena hana mur ia iri nga letena urana ngana. <sup>6</sup> Ke NeHalang hesilei hote iri nga letena urana ngana mana, pe nga reria ume urana ngana mur ero. Pe nenge teke NeHalang hesilei hote iri nga reria ume urana ngana mur, lape NeHalang nena tunginga nenga letena urana ngana nem luna ero.

<sup>7</sup> Ke lape ta hele ke pomerei ol? Israel mur te purpur ke te tango rere ure pe te hottaua ero pe iri hel mana nenge NeHalang hesilei hote iri te hottaua. Pe iri lochloch ngana NeHalang hepiriu ala tote leteria ke te longe nena iunga ero. <sup>8</sup> Ke pomanga NeHalang nena alalaha nenge tehas sue ke ulolo, hele ngana nenge hele ke teke,

“NeHalang tunge aria lete mete ke leteria haka ero,  
ke te eteia ure nemur nenge te esesia ero pe  
te eteia ure nemur nenge te longlonge ero.  
Ke ure nei lohotot ke heueu nei lohotot kura.”

<sup>9</sup> Pe ne Teuit hele ke teke,  
“Iau lemek toto ke e teke aria ngaunga matana mur  
te hesingo ia iri ke te losio pe ekoukou ele iri ke te tekema te urana nga NeHalang matana.  
Pe lemek toto ke e teke NeHalang tunge tuangachol lange iri.

<sup>10</sup> Pe lemek toto ke e teke NeHalang poia iri  
ke mataria hit ke te kolkol pe poia iri ke teura ero toto nga ure meena ngana mur nenge lohotot nge iri.”

### *NeHalang Mene Mule Hana Lomonmona Ngana Mur*

<sup>11</sup> Iok, lape e ontei mule pule: Iuta mur te losio ngaria neu mau, lape te poreke sapele pe te urana mule ero ol? Pomam ero! Reria poinga poreke ngana nem halaua hana lomonmona ngana mur ke te mene maulinga ke koko, pe nem poia Israel mur ke saria

keke iri. <sup>12</sup> Iuta mur tehul rumeria ia Kristus pe nga reria poinga nem, NeHalang poi ke urana lange hehei pe hana nga ich. Iuta mur leteria manmanna nge Kristus ero, ke pomalam NeHalang poi ke urana lange hana lomonmona ngana mur. Pe nenge teke Iuta mur lochloch leteria manmanna mule nge Kristus, lape NeHalang poi ke urana toto lange hehei pe hana lochloch ngana nga ich!

### *NeHalang Tunge Maulinga Lange Hana Lomonmona Ngana Mur Pule*

<sup>13</sup> Iok, imo hana lomonmona ngana mur, lape e hele lange imo. Iau hekulkulonga nenge e ume luluch nge hana lomonmona ngana mur pe e tung teu tote iau nga ume nem. <sup>14</sup> Iange iau e teke e heneue lek hana mur ke te poi ke pomange hana lomonmona ngana mur nge NeHalang mene mule iri. <sup>15</sup> NeHalang hile hote iri mukam ke pomalam mene mule hehei pe hana nga ich ke tetu ke elle luluch nge i. Pe nga etue nenge NeHalang mene mule Israel mur, lape tepoi ke pomalaka nga te maul haka mule nga metenga. <sup>16</sup> Ke i manmanna toto nge NeHalang hesilei hote Israel mur nga poinga nei. Nenge teke ngaunga ele unne nenge tepoi tunginga ia lohot ke urana, ngaunga aluana lochloch lape te urana pule. Pe nenge teke ae ulana mur te urana, ae perperna mur lape te urana pule.

<sup>17</sup> Pe NeHalang hile hote Iuta mur hel pe mene hana lomonmona ngana mur ke te mene muria. Ke iri tepoi ke pomanga ae oliua toto ngana perperna mur nenge te chato hote iri. Pe hana lomonmona ngana mur tepoi ke pomalaka nga ae oliua uraurau ana perperna mur nenge te mene muria ke te tuatom teu mule nga ae oliua toto ngana tana. Pe Iuta mur reria tete mur iri ae ulana urana ngana nem. Ke imo hana lomonmona ngana mur, heueu nei a mene maulinga pule nga ae ulana urana

ngana nenge Iuta mur. <sup>18</sup> Ke pomalam a palut laka rara pe anau sio mene ae perperna nemur ero. Iange imo ae ulana inheke imo pe imo a inheke ae ulana ero. <sup>19</sup> Iok, lape a hele ke a teke, “Te chatoa ae perperna nemur lo pomalam e puotom tele iau ke e mene muria.” <sup>20</sup> Nem manmanna. Pe ae perperna nemur te chato hote iri iange leteria manmanna ero pe iong o mene muria iange letem manmanna nge Kristus. Pe o palut laka rara ero. Urana nge o matau. <sup>21</sup> Iange nenge teke letem manmanna ero lape NeHalang hile hote iong pule ke pomanga ae perperna nemur nenge chato hote iri neu.

<sup>22</sup> Ke o naue lo? NeHalang nena poinga urana pe i nge maluch ero la. Ke iri nenge leteria manmanna ero NeHalang maluch ole iri ero. Pe i poi ke nek lange iong nga nenge teke o nanasia mene lemene ngana. Pe nenge teke o nanasia lemene ngana ero, i lape chato hote iong pule. <sup>23</sup> Pe nenge teke Iuta mur leteria manmanna mule, NeHalang nakuna nge tuatom teu mule iri nga muria nenge chato hote iri ia ke tetu mule nga muria. <sup>24</sup> Letemo metene ke nek! Iuta mur iri ae oliua toto ngana perperna mur ia iri. Pe imo, ae oliua nenge uraurau ana perperna mur. Pe NeHalang chato hote Iuta mur pe tuatom teua imo langa ae oliua toto ngana tana ke a mene muria. Pe nenge teke Iuta mur leteria manmanna mule, semel mana nge NeHalang tuatom teu mule iri langa muria!

*NeHalang Lape Mene Mule Israel Mur Pe Hana Lomonmona Ngana Mur Pule*

<sup>25</sup> Ke titik mur pe liliuk mur, lemek ke e teke a eteia helenga manmanna ngana nenge NeHalang hemallaha hote nei ol. Pomalam lape a eteia pe a hele ke a teke, “Manmanna iam, imem mo etei lochloche NeHalang letena tuanin ngana ero i!” Ke ana helenga mai koi: Israel mur halang

lemeria ero nge leteria manmanna nge Kristus. Pe lape tepoi ke pomalam kela het nga etue nenge hana lomonmona ngana nemur nenge NeHalang amele iri, teteu kela tetu luluch nge NeHalang. <sup>26</sup> Ke nga kue nem NeHalang lape mene mule Israel mur lochloch. Ke pomanga NeHalang nena alalaha nenge tehas sue ke ulolo, hele ngana nenge hele ke teke,

“Non nenge lape mene mule hehei pe hana lape lohote nge Sion nga kileng nenge Ierusalem.

Pe lape holoa sue ne Iakop nena tete mur reria poinga poreke ngana mur ke te lasus lochloch.

<sup>27</sup> Ke nenge nei poi ke pomanga lek tomunga hel ana helenga nenge e saua reria poinga poreke ngana mur ke te lasus toto.”

<sup>28</sup> Israel nemur lemeria ero nge te longala teua helenga urana toto ngana ke tuteu nge iri, ke pomalam te lohote ke NeHalang nena ngarang mur ia iri, ke nem halaua imo hana lomonmona ngana mur. Pe NeHalang mutena taua Israel mur iange nga nena tomunga hel ana helenga nenge poia lange reria tete mur. <sup>29</sup> Iange NeHalang hul mule letena ero ol nga ure urana ngana mur nenge tunge lange iri nenge hesilei hote iri ke ulolo. <sup>30</sup> Ke pomange imo hana lomonmona ngana mur. Nge nika a longo ole taua NeHalang pe NeHalang letena ia imo pe mene mule imo iange Israel mur te longo olole. <sup>31</sup> Ke heueu nei Israel mur lemeria ero nge te longo tau pe nenge teke lemeria, te longo tau pe NeHalang letena ia iri pule ke pomange imo. <sup>32</sup> NeHalang poia hehei pe hana lochloch ngana nga ich ke tepoi manmana poinga poreke ngana iange nga reria longonga ole. Pe poia iri ke pomai iange teke letena ia iri lochloch.

*Ta Heto Heke NeHalang Ene*

<sup>33</sup> NeHalang letena tuanin ngana pe letena matana ngana elela toto pe i non urana ngana ia toto! Mele pele nakuna ero toto nge letena matana hote NeHalang letena tuanin hot ngana ia nena ume mur!

<sup>34</sup> “Itei toto eteia Non Soke letena tuanin ngana mur?”

Pe itei toto tunge lete matana ngana lange i?”

<sup>35</sup> “Pe itei toto tunge ute lange NeHalang ke lape NeHalang tuachol mule lange i?”

<sup>36</sup> Ero toto! Iange NeHalang ala hote ure lochloch pe ala hote ure lochloch ke nena ia, pe ure lochloch temeria i. Ta heto heke NeHalang ene ke koko! Manmanna toto.

## 12

### *Ta Tung Teu Tote Ita Lange NeHalang*

<sup>1</sup> Titik mur pe liliuk mur, lek helenga lochloch ngana koi tetu pe lape ta potar ol? E hele ke kerkereng toto lange imo. NeHalang letena ia ita ke palaungana toto lo. Ke pomalam e teke a tung teu tote singimo lange i ke pomanga tunginga nenge maulul pe lemlem ke a poia nena ume. Nenge nei i kue nenge a heto heke NeHalang nga letemo pe lape poia i ke iech.

<sup>2</sup> Pe a nanasia poinga nenge hehei pe hana nga ich ero, a longele NeHalang ke hetaua letemo tuanin ngana nika ngana mur nga heueu ngana. Ke NeHalang lape hulialemo poinga mur ke nanasia letemo tuanin ngana heueu ngana nemur. Ke pomalam lape a etei tote poinga nemur nenge NeHalang mutena taua iri, pe a eteia poinga nemur nenge te urana pe te pengpeng pe poia i ke iech.

### *Ta Poia Ume Nga Tunginga Nemur Nenge NeHalang Tunge At Nge Ita*

<sup>3</sup> Iau e lohot ke iau non nenge pomai nga tunginga nenge NeHalang tunge at nge iau. Ke pomalam e

hele lange imo elle pe elle ke mai: Otal heke tote iong ke o teke iong non toto ero. Otal sio mene iong pe o amnei urume iong nga letem manmanna ngana nenge NeHalang tunge lange iong. <sup>4</sup> Ita elle pe elle singira sachanchana halang. Pe singira sachanchana nemur aria ume altototo. <sup>5</sup> Ke pomalam mana nge ita. Ita halang pe singira elle mana luluch nge Kristus pe singira sachanchana nemur te tuatom tele hel luluch nge pekngaria mur.

<sup>6</sup> NeHalang letena urana ia ita ke tunge tunginga kuenkuena ngana mur at nge ita. Mele nenge mene tunginga nenge hetatatalo, poia ke purpure letena manmanna ngana. <sup>7</sup> Pe mele nenge mene tunginga nenge halaulaua hehei pe hana, poia ana ume ke manmanna ke halaua hehei pe hana. Pe mele nenge mene tunginga nenge hetottoro, poia ana ume ke manmanna ke hetoro. <sup>8</sup> Pe mele nenge mene tunginga nenge he kerkerkereng ia hehei pe hana leteria, poia ana ume nem ke lohot ke manmanna. Pe mele nenge mene tunginga nenge tungtung ure lala nge mele hel, poia nga letena toto ke hile hote ure. Pe mele nenge mene tunginga nenge i mukmuka nge hehei pe hana, nakuna taktakia ana ume nem. Pe mele nenge mene tunginga nenge letena ia hehei pe hana, iech mana pe poia ana ume nem ke lohot.

### *Mutera Tau Tote Hehei Pe Hana*

<sup>9</sup> Nga etue nenge mutemo taua hehei pe hana, mutemo taua iri ke manmanna pe a channanga mana ero. Pe a hile hote poinga poreke ngana pe a rahat mene poinga nenge urana. <sup>10</sup> A tung tote letemo lange pekngamo mur pe mutemo taua tote iri. Pe a heto heke menmene pekngamo mur. <sup>11</sup> A ume ke kerkereng toto pe lemo mele tana rara ero. A tung tote letemo lange Non Soke ke a ume

**11:34:** Isa 40:13; 1Ko 2:16

**11:35:** Job 41:11

**11:36:** 1Ko 8:6

**12:1:** Rom 6:11, 13; 1Pi 2:5

**12:3:** 1Ko 12:11; Epe 4:7; Pil 2:3

**12:4:** 1Ko 12:12, 27

**12:6:** 1Ko 12:4-11; 1Pi 4:10-11

**12:10:**

1Pi 1:22 **12:12:** 1Te 5:16-18



nge i. <sup>12</sup> A iech pe a kulele mene utar nenge letemo tu hit menmene nenge lape at. Pe nenge teke ure meena ngana lohote nge imo a takis mene pe a hetalaulau ke kokoes. <sup>13</sup> A tunge lemo urelu hel lange NeHalang nena hana mur hel pule pe a lohe lemo pele matana mur lange hana nemur nenge teat nga kileng tau ngana.

<sup>14</sup> A onteia NeHalang ke poi ke urana lange hana nemur nenge tepoi porekreke imo pe a onteia i ke he poreke iri ero. <sup>15</sup> A iech luluch nge iri nemur nenge te iechiech pe a tang luluch nge iri nemur nenge te tangtang. <sup>16</sup> Atu ke letemo elle luluch nge hulua lochloch pe atal heke imo ero, a au sio mene imo ke aume luluch nge iri nenge pingaria iuiu ero. Atal heke imo ke a teke imo toto ero.

<sup>17</sup> Nenge teke mele poia poinga poreke ngana e lange imo, a tuacholia poinga poreke ngana e lange iri ero. Ames ke kerkereng ke a poia poinga nenge urana nga hulua mataria. <sup>18</sup> A ume ke kerkereng toto ke atu ke letemo elle luluch nge hulua lochloch. <sup>19</sup> Titik mur pe liliuk mur, a tuacholia poinga poreke ngana nenge mele hel te poia lange imo ero. A hei tele lange NeHalang ke tuacholia nga letena inin ngana. Iange NeHalang nena alalaha nenge tehas sue ke ulolo, heleia Non Soke hele ngana nge hele ke teke, "Iau sipok lape e tuacholia poinga poreke ngana nenge te poia." <sup>20</sup> Pe imo, urana nenge apoi ke pomai koi,

"Nenge teke lemo ngarang mur te mete aria, a hengaua iri.

Pe nenge teke te meteune ech, a tunge ech lange iri ke tein.

Nenge teke a poia poinga nei lange iri, lape teme tote iri."

<sup>21</sup> A longala teua poinga poreke ngana ke hekou sue imo ero. A poia poinga urana ngana ke a hekou sue poinga poreke ngana.

## 13

### *Ta Longo Taua Hana Nenge Te Here Kileng*

<sup>1</sup> Urana nge imo hehei pe hana lochloch atu ke a longo tau mene hana nenge tenau ele imo, iange NeHalang i sipona tal hote poinga nem pe tunge hana nemur aria ume nenge tenau elele hehei pe hana. Pe iri te lohote pe tepoi ke pomam nga iri siporia lemeria ngaria ero. <sup>2</sup> Ke mele hel nenge te longo ole taua hana nemur, te longo ole tau ume nenge NeHalang tal hote ke ulolo. Pe mele hel nenge tepoi ke pomam, te longia aria melmelenga nenge lape lohote nge iri ke ulolo. <sup>3</sup> Iange iri nemur nenge te nanasia poinga nge pengpeng, te mataua hana nenge tenau elele iri ero. Iri nemur nenge te popoi poinga poreke ngana mana, te mataua hana nemur nenge tenau elele iri. Ke nenge teke lememo ero nge a mataua hana nenge tenau elele imo, iok, a nanas mene poinga nge pengpeng. <sup>4</sup> Iange hana nemur, NeHalang nena ume ana hana mur ia iri, nenge teume ke te halaulaua imo ke atu ke nek. Pe nenge teke a popoi poinga poreke ngana, nem lape poia imo ke a matau. Hana nemur, NeHalang talue iri ke nena ume ana hana mur ia iri pe te mene hekerkerenga nenge te tung hote NeHalang letena inin ngana lala nge mele hel nenge te popoi poinga poreke ngana. <sup>5</sup> Ke pomalam urana nge a longo taua iri. Pe a longo taua iri nga lemo mataunga nenge, a teke lape te poia NeHalang letena inin ngana ke lohote nge imo ero. Pe pule, a longo taua iri nga ure urana ngana nenge a eteia ke NeHalang poi hote ke teke ta nanasia. <sup>6</sup> Ke ngana laka nenge a sausau umtutuna pule. Iange hana nemur te umume nge NeHalang pe te poia aria ume ke lohote ke nek ke kokoes. <sup>7</sup> Ke pomalam ume nemur nenge a poia lange iri

**12:13:** Hip 13:2    **12:14:** Mat 5:44; 1Ko 4:12    **12:16:** Pro 3:7    **12:17:** 1Te 5:15    **12:19:** Deu 32:35; Mat 5:39    **12:20:** Pro 25:21-22; Mat 5:44    **13:1:** Pro 8:15; Tit 3:1    **13:3:** 1Pi 2:13-14  
**13:6:** Mat 22:21

ero kura, a poia lange iri ol. Nenge teke asau umtutuna ero kura, asau umtutuna ol. Pe nenge teke a poi ke nek lange hel nge iri ero kura, apoi ke nek lange iri ol. Pe nenge teke atal heke hel nge iri ero kura atal heke iri ol.

*Mutera Taua Pekngara Mur Iange Ara Etue Heroi Lo*

<sup>8</sup>A hanok ia umtutuna ma ute e nge mele ero toto. Mutemo taua pekngamo mur pe lemo mutenga nem, a poia ke pomanga lemo hanganok nenge a tunge lange mele elle pe elle. Mele nenge poi ke pomai, nanas tau tote hotonga hele ngana. <sup>9</sup>Iange hotonga hele ke teke, “O heporeke leinga ero,” “O hune mele ero,” “O keme ero,” “O memeleia mele nena ute e ero.” Ke hotonga nemur pe hel pule, iri lochloch te lohot nga hotonga tana elle nenge hele ke teke, “Mutem taua mele hel pule ke pomanga mutem taua iong sipom.” <sup>10</sup>Iange mele nenge mutena taua pekngana mur, poia poinga poreke ngana e lange iri ero. Ke nenge teke mutemo taua hehei pe hana, a nana-sia hotonga lochloch ke ulolo.

<sup>11</sup>Pe a poia ol iange ta tutu nga etue e lokoi. Etue nei i etue nenge ta mamamani ero ol koi, matara charchara mana pe ta nauala mana ol. Iange etue heroi lo nenge lape NeHalang mene mule ita nga rera melmelenga mur pe tala nga lut nga tapa. <sup>12</sup>Tatu nga kileng au ngana ke mala toto lo pe mam pe kileng chach sio ke etue heueu ngana e at. Pe tatu hit mene poinga nemur nenge ta popoia iri nga kileng au ngana ero ol. Ta ra heke rera palinga hel ana ure mur nenga kileng mesehe ngana ana. <sup>13</sup>Ta almasia rera inga mur pe tai ke ta pengpeng ke pomange hehei pe hana nenge teii nga kileng mesehe ngana. Pe tain ke ara hauaua ulu ero ol. Pe poinga poreke ngana mur

pe salaunga ana poinga pe poinga nenge tama lululuch nge hehei, ta hile tote iri ol. Pe tapal hel ero pe sara keke hel ero ol. <sup>14</sup>Pe lape apoi ke pomai koi: A mene ara Non Soke Iesus Kristus ke pomanga lemo hengeron nenge a heron heke nge imo. Pe singimo lemene ngana mur nga poinga poreke ngana, a hile iri ke te lasus toto ol.

## 14

*Ta Halaua Iri Nenge Leteria Manmanna Ngana Kerkereng Ero*

<sup>1</sup>Hana pe hehei hel leteria manmanna nge Kristus pe leteria manmanna ngaria kerkereng ero iange leteria nachnai nga ure hel. A long teua iri lange imo pe a hele inin taua iri nga reria poinga nenge te poia nem ero. <sup>2</sup>Mele hel nenge leteria manmanna ngana kerkereng te teke urana nge te ngaua ngaunga kuenkuena ngana mur. Pe iri nenge leteria manmanna ngana kerkereng ero, te teke urana nge te ngau mene ngaunga hel mana pe huros ero. <sup>3</sup>Pe urana ero nge mele nenge ngaungau huros ero nge ngailele mele nenge ngaungaua ngaunga kuena ngana mur. Iange mele nenge ngaungaua ngaunga kuena ngana mur, NeHalang mene mule i ke ulolo. <sup>4</sup>Ke o amnei teu langa mele nena poinga mur ero. Mele nem, Non Soke nena non ia i. Pe pomere nge o teke o nauale i. Pe nenge teke non nem losio ma mes ke kerkereng Non Soke i sipona lape amnei teu laia. Pe Non Soke nena non nenge umume nge i, lape ume ke kerkereng iange Non Soke i sipona halaulaua i.

<sup>5</sup>Mele hel te teke etue hel papalauna nga etue hel, pe mele hel te teke etue lochloch iri etue papalauna mur ia iri. Nga ure nenge pomam, imo elle pe elle amnei teu ke nek pe a nanas ia utar nenge imo elle pe

**13:8:** Mat 22:39-40; Iei 2:8    **13:9:** Exo 20:13-15, 17; Deu 5:17-19, 21    **13:10:** 1Ko 13:4-7    **13:11:** Epe 5:14; 1Te 5:6-7    **13:12:** 1Io 2:8    **13:13:** Luk 21:34; Epe 5:18    **13:14:** Epe 5:11    **14:1:** Rom 15:7    **14:2:** Gen 9:3-4    **14:3:** Kol 2:16    **14:4:** Mat 7:1; Iei 4:11-12    **14:5:** Kal 4:10-11

elle a teke urana. <sup>6</sup> Mele hel nenge te teke etue e palaungana nga etue hel, te talue etue nem ke i etue nenge te heto hekeke Non Soke ia. Pe iri nenge te ngaua ngaunga kuenkuena ngana mur, te teke urana nga Non Soke matana pe te hele urana lange i nga ngaunga nemur. Pe mele hel nenge lemeria ero nge te ngau huros, te teke urana nga Non Soke matana pe te hele urana lange Non Soke nga ngaunga hel mana nenge te ngaua. <sup>7</sup> Iange mele pele tu ke heiech ia i sipona nga lemene ngana ero pe mete nga i sipona lemene ngana ero. <sup>8</sup> Nenge teke tatu ke ta maulul, ta maulul nga Non Soke lemene ngana pe nenge teke ta mete, ta mete nga Non Soke lemene ngana pule. Ke nenge teke ta maulul ma ta mete, ta nanas mene Non Soke lemene ngana.

<sup>9</sup> Kristus mete pe maul haka mule nga metenga ke ulolo. Ke nga poinga nem, Kristus lohote ke i Non Soke nge iri lochloch. Iri nenge te mete pe iri nenge te maulul pule. <sup>10</sup> Ke pomerei nenge a henonou perimo lange pekngamo mur ke a teke te poia poinga poreke ngana. Pe pomerei nge a ngailelele iri? Ita lochloch lape tames nga NeHalang matana ke anei teu at nge ita nga rera poinga mur. <sup>11</sup> Iange NeHalang nena alalaha nenge tehas sue ke ulolo, hele ke mai, "NeHalang hele ke teke, 'Iau etu ke e maulul ke manmanna, pe manmanna toto ke hulua lochloch lape te tualou sio nga matak ke te heto heke iau; pe hulua lochloch lape te hele hot ke te teke iau NeHalang toto ngana.'"

<sup>12</sup> Ke pomalam, ita elle pe elle lape ta mes nga NeHalang matana pe ta hele hote rera poinga mur pe ta kulele ana tuangachol.

### *Ta Heporeke Pekngara Mur Nga Leteria Manmanna Ngana Ero*

<sup>13</sup> Ke pomalam ta henonou perra lange pekngara mur ero. Ure nenge urana nge ta poia ngana koi nei: Letera haka ke ta poia tira e ma liura e ke losio nga poinga poreke ngana ero. <sup>14</sup> Iau e nanas tau tote ara Non Soke Iesus pe manmanna ke e eteia ke ute pele nge poreke nge tuteu nga ngaunga pele ero. Pe mele hel nenge te teke ngaunga e poreke, ngaunga nem poreke mana nge iri nenge te teke poreke. <sup>15</sup> Ke nenge teke o heporeke tim ma lium e letena iange o ngaua ngaunga e nenge i teke poreke, poinga nem henonou hote ke iong mutem taua i ero toto. Nakuna urana ero nge o heporeke tim e nga letena manmanna ngana, iange i pule, Kristus mete ke mene mule i ke ulolo. <sup>16</sup> Ke pomalam poinga nenge a teke urana nge a poia pe mele hel te heleia ke te teke poreke, a poia ero ol. <sup>17</sup> Iange NeHalang nena nualanga pe nekinga tu nga ure nenge ta ngaungaua pe ta ininia ero. Ana ure toto ngana laka: Poinga nenge tatu ke ta pengpeng pe ta nanasia NeHalang lemene ngana mur pe poinga nenge tatu ke letera elle luluch nge NeHalang pe poinga nenge Opepengpeng poia letera ke iech manmana. <sup>18</sup> Iange mele hel nenge te nanasia poinga nemur ke te ume nge Kristus, lape te poia NeHalang ke iech pe pule hehei pe hana lape te heleia ke te teke poinga nem urana.

<sup>19</sup> Ke pomalam ta ume ke kerkereng ke tapoi hote poinga nemur nenge hetakile hehei pe hana ke nek pe hekerkereng ia mele elle pe elle. <sup>20</sup> A heporeke NeHalang nena ume nga poinga nenge aheo nga naunga ero. Iange NeHalang heo ele ngaunga e ero. Pe poinga nenge mele ngaua ngaunga e ke he poreke mele nga letena manmanna ngana, poinga nem poreke. <sup>21</sup> Iong o teke o ngaungaua huros ma o inin ia ech kerkereng ngana? Utar nenge o

teke opoia letem matana hote ke nek mukam. Nenge teke lem poinga nem heporeke mele letena manmanna ngana, urana nge o poia ero nike.

<sup>22</sup> A rahite letemo manmanna ngana mur ke tu mana nge imo pe NeHalang, nga ngaunga nemur nenge imo elle pe elle a ngaungaua. Mele nenge poia ute nenge i sipona teke urana pe amneia ke poia poinga poreke ngana e ero, urana nge o iech. <sup>23</sup> Pe mele nenge letena nachnai ia ngaunga nenge lape ngaua, poia poinga poreke ngana nga nenge teke ngau mule ngaunga nem. Iange poia nena poinga nem pe amneia nga letena ke poinga nem poreke. Pe ure nenge ta poia nga letera manmanna ngana ero, i poinga poreke ngana.

## 15

### *Ta Poia Mele Hel Ke Te Iech Pe Ita Sipora Ero*

<sup>1</sup> Ita nenge letera manmanna ngana kerkereng, ta halaua iri nenge leteria manmanna ngana kerkereng ero ke ta takisia aria melmelenga pule, pe letera tu mana nga rera iechinga mur ero. <sup>2</sup> Urana nge ta poia iri nemur ke te iech pe ta halaua iri ke ta he kerkerengia leteria manmanna ngana mur. <sup>3</sup> Iange Kristus poia ume nenge tung mule iechinga lange i sipona ero. Ke pomanga NeHalang nena alalaha nenge tehas sue ke ulolo, hele ngana nenge hele ke teke, “Helenga poreke ngana nenge hehei pe hana te poia lange iong, ana melmelenga koi lohot nge iau.” <sup>4</sup> Ure lochloch ngana nenge tehas sue nge nike ke ulolo, tehas sue ke hetore koi ita. Ke NeHalang nena alalaha nenge tehas sue ke ulolo, hetakile ita ke tatu ke nek pe hekerkereng ia ita ke ta rahite letera manmanna ngana pe tatu ke ta kulkulele mene ara maulinga nga tapa nge i.

<sup>5</sup> NeHalang i non nenge he kerkereng ia ita pe poia ita ke tatu ke

nek. Pe e hetalaulau amo ke NeHalang poia imo ke atu luluch ke elle pe letemo ma ke elle ke a nanasia Iesus Kristus nena poinga mur. <sup>6</sup> Ke pomalam ames ke elle pe a heto heke NeHalang nenge ara Non Soke Iesus Kristus Temene.

### *Helenga Urana Toto Ngana Lohot Nge Hana Lomonmona Ngana Mur*

<sup>7</sup> Iok, Kristus longala teua ita ke ulolo ke pomalam apoi ke urana lala nge imo elle pe elle ke a longala teu helia imo. Pe poinga nem lape poia hehei pe hana ke te heto heke NeHalang. <sup>8</sup> Iange Kristus lohot ke i ume ana non nenge halaulaua imem Iuta mur. Nem henonou hote ke NeHalang nena tomunga hel ana helenga nenge poia lange Iuta mur reria tete mur, lohot ke manmanna. <sup>9</sup> Pe pule poia hana lomonmona ngana mur ke te heto heke NeHalang iange i non nge letentena ia iri. Ke pomanga NeHalang nena alalaha nenge tehas sue ke ulolo, hele ngana nenge hele ke teke:

“Ke pomalam lape e heto heke em, nga etue nenge etu luluch nge hana lomonmona ngana mur. Pe lape e peua peunga mur ke e heto heke em.”

<sup>10</sup> Pe NeHalang nena alalaha e pule hele ke teke,

“Imo hana lomonmona ngana mur, a iech luluch nge NeHalang nena hana mur.”

<sup>11</sup> Pe nena alalaha e pule hele ke teke,

“Imo hana lomonmona ngana mur a heto heke Non Soke. Imo hehei pe hana lochloch, a peua peunga mur ke a heto heke i.”

<sup>12</sup> Pe hetatalonga Isaias heleia pule ke teke,

“Ne Iese palau nette e lape is toto haka, pe lape lohot ke i naungaala ana non

nenge lape nauele hana lomonmona ngana mur.



Pe aria kulkulalanga nenga maulinga tu nge i.”

<sup>13</sup> NeHalang i non nenge tunge kulkulalanga nga maulinga nga tapa nge ita. Pe e hetalaulau amo lange i ke poia imo ke letemo ma ke nek pe a iech nga letemo manmanna ngana. Pe Opepengpeng lape he kerkereng ia imo nga amo kulkulalanga nga maulinga nge NeHalang.

*Paulus Hele Urume Nena Ume*

<sup>14</sup> Iok titik mur pe liiuk mur, Iau letek manmanna ke ure urana ngana mur halang tetu teu nge imo. E eteia ke letemo matana ngana urana ke a purpur nge a hetoro helel ia imo. <sup>15</sup> Pe lek helenga hel nga alalaha nei e hele chach hot tote pe era hala halik ia ero, iange e teke e helete metene mule imo nga ure nemur. E poia ke pomam iange NeHalang letena urana toto nge iau <sup>16</sup> ke e poia Iesus Kristus ana ume lange hana lomomona ngana mur. Pe e ume nge NeHalang ke e haliu hotote nena helenga urana toto ngana. Ke pomalam hana lomomona ngana mur lape tepoi ke pomanga tunginga nenge Opepengpeng helelem ia pe NeHalang longele ke mene.

<sup>17</sup> Iau e nanas tau tote Iesus Kristus ke pomalam e iech toto nge e poia NeHalang nena ume. <sup>18</sup> Pe lemek ero toto nge e hele hote ume pele nge mele pule poia. E teke e hele ke kerkereng toto nga ume nenge Kristus poia nge iau ke e poia hana lomomona ngana mur ke te longo taua NeHalang. Pe te longo taua NeHalang nga helenga nenge e heleia pe nga ume nenge e poia. <sup>19</sup> Ngana laka nga Opepengpeng nena kerkerenga nenge he kerkereng ia iau ke epoi hotote ure papalauna nemur nenge e hele pe te lohot manmana. Ke e talun ke e haliu hote helenga urana toto ngana nenge Kristus, ke rongo heke lochloche kileng nemur nge Ierusalem pe ramak laia nga kileng

mur nge Ilirikam pule. <sup>20</sup> Iau lemek toto ke e teke e haliu hote helenga urana toto ngana nenge Kristus nga kileng nemur nenge te eteia Kristus ero kura. Iange lemek ero nge e ume haka mana nga ume nenge mele nge altoto talune ke ulolo. <sup>21</sup> Ke pomanga NeHalang nena alalaha nenge tehas sue ke ulolo, hele ngana nenge hele ke teke,

“Iri nemur nenge te longe pingana ero toto lape te naue i, pe iri nemur nenge te longe nena helenga ero toto lape te eteia ke nek.”

<sup>22</sup> Ke ume nei poi ele iau ke kokoes ke ngana laka nenge eat ke e lohot nge imo erochro.

*Paulus La Ke Nau Tote NeHalang Nena Hana Mur Nge Rom*

<sup>23</sup> E teke ela ke enau toto imo pe ero manmana ke hesinga halang la ke ulolo. Pe heueu nei e teke ela toto nge imo ol iange e heulo hote lek ume lochloch ngana nga kileng nemur nga lamai ke het lo. <sup>24</sup> Ke pomalam lape ela nga kileng nenge Sipein pe ela ke e lohot nge imo ke etu pol pe e iech luluch nge imo mukam. Pe iau e teke urana nge a halaua iau nga lek kue ke ela nga kileng nem. <sup>25</sup> Pe heueu nei e lala nge Ierusalem kura ke e laia halaunga nenge lala nge NeHalang nena hana mur nga lamau. <sup>26</sup> Iange NeHalang nena hana mur nenge Mesatonia pe Akaia tetal helenga lo pe te iech ke te teke te tunge reria halaunga nga umtutuna ke lange NeHalang nena hana mur nge Ierusalem nenge reria ure ero. <sup>27</sup> Iri siporia tetal helenga pe te iech mana nge tepoi ke pomau. Pe urana nge tepoi ke pomau, iange Iuta mur laka nenge te halaua hana lomomona ngana mur nga ure urana ngana mur nge NeHalang ke halaua iri nga operia mur. Ke pomalam hana lomomona ngana te tuacholia ke te halaua Iuta mur nga

ure nenge halau mene singiria. <sup>28</sup> Ke iau lape e tunge umtutuna nemur lange NeHalang nena hana mur ke te rahite mukam. Ke het pe ramak lange Sipein pe nga ela ngak, lape enau toto imo mukam. <sup>29</sup> Iau e eteia ke ulolo ke Kristus nena petanga mur te muta toto nge iau lo. Pe nga etue nenge ela nge imo, lape e tunge petanga nemur lange imo.

<sup>30</sup> Ke titik mur pe liliuk mur, nga letera manmanna ngana nge ara Non Soke Iesus Kristus pe nga mutenga nenge Opepengpeng tunge at nge ita, e onteia imo ke e teke a pur kikimo ke a hetalaulau ak lange NeHalang ke halaua iau. <sup>31</sup> A hetalaulau ak iange Iuta mur hel nga lamau leteria manmanna ero ke te teke te heporeke iau. Pe pule a hetalaulau ke NeHalang nena hana mur nge Ierusalem te iech nge te mene halaunga nenge e lalaia nei. <sup>32</sup> Ke pomalam nga NeHalang lemene ngana ela ke e lohote ke e iech luluch nge imo pe etu pol nge imo. <sup>33</sup> E hetalaulau ke NeHalang nenge popoia letera ke ma ke nek, tu luluch nge imo lochloch. Manmanna.

## 16

### *Paulus Hekule Nena Apalanga Mur*

<sup>1</sup> E teke e hele tote liura he Popi lange imo. Hei nem umume nga mata nenge NeHalang nga kileng nenge Kenkrea pe i hei urana ngana ia. <sup>2</sup> E teke e onteia imo ke a longala teua i ke pomanga Kristus nena hana mur pekngaria ia. Pe a halaua i nga ure nemur nenge mutena taua iri iange i halaulaua hehei pe hana halang pe halaua iau pule.

<sup>3</sup> Pe a heleia lek apalanga lange Prisila pe Akuila. Iri nai, pekngak mur ia iri iange te umume ia Iesus Kristus nena ume ke pomange iau. <sup>4</sup> E teke e hele urana toto lange iri iange te matau reria ero toto nga nenge te halaua iau nge lek ume. Pe NeHalang

nena mata mur hel nge hana lomomona ngana mur, te hele urana toto lange iri pule.

<sup>5</sup> Pe a heleia lek apalanga lange iri mata nenge te hekiraaurau nga iri nai nem reria pele.

Pe a heleia lek apalanga lange neingak Epinetus pule. Epinetus non nenge i tala toto nge hulua nena poinga mur ke nanasia Kristus nga tuele kina nenge Eisia.

<sup>6</sup> Pe a heleia lek apalanga lange he Maria pule. Hei nem ume ke kerkereng toto ke halaulaua imo.

<sup>7</sup> Pe pule a heleia lek apalanga lange Antronikus pe Iunias. Iri nai iri Iuta ke mange iau pe tetu luluch nge iau nga tuele au ngana. Pe pingaria iuiu nga ume nenge iri hekulkulonga mur pule, pe iri muka tala nge iau ke te nanasia Kristus.

<sup>8</sup> Pe a heleia lek apalanga lange Ampilitus pule. Ampilitus i neingak toto ia nenge nanas tau tote Non Soke.

<sup>9</sup> Pe a heleia lek apalanga lange Urpanus pule. Urpanus i pekngaria ia iange i umume ia Kristus nena ume ke pomange ita.

Pe a heleia lek apalanga lange Istakis pule, Istakis i neingak toto ia.

<sup>10</sup> Pe a heleia lek apalanga lange Apelis pule. Apelis, te totoia i pe henonou hote ke i nanas tau tote Kristus nga nena ume mur.

Pe a heleia lek apalanga lange Aristopulus pe alona mur lochloch.

<sup>11</sup> Pe pule a heleia lek apalanga lange Heroton. Heroton i alok ia.

Pe pule a heleia lek apalanga lange Nakisus pe alona mur nenge te nanas tau tote Non Soke.

<sup>12</sup> Pe a heleia lek apalanga lange hehei nemur pule, he Taraipina pe he Taraiposa. Iri nai te ume ke kerkereng toto nge Non Soke.

Pe pule a heleia lek apalanga lange neingak hei e pule nge ene he

Persis. Ana hei ume ke kerkereng toto nge Non Soke pule.

- <sup>13</sup> Pe a heleia lek apalanga lange Rupas pe tana pule. Rupas i non nenge pingana iuiu nga Non Soke nena ume, pe tana neknek ia iau ke pomanga tuna iau pule.
- <sup>14</sup> Pe pule a heleia lek apalanga lange Asinkiritus pe Pilikon pe Hemis pe Patropas pe Hemas pe nge NeHalang nena hana mur nenge te eukiraurau nga reria pele.
- <sup>15</sup> Pe pule a heleia lek apalanga lange Pilolokus pe Iulia pe Nerias iri nai liuna pe Olimpas pe NeHalang nena hana mur lochloch nenge te eukiraurau nga reria pele.
- <sup>16</sup> A tunge lemo apalanga lange imo elle pe elle pe a sisa perimo pe a poia ke pomanga NeHalang nena hana mur imo. Pe Kristus nena mata mur lochloch ngana te hekule reria apalanga lange imo pule.

#### *Hana Hel Te Teke Te Heporekreke Mata Nenge NeHalang*

<sup>17</sup> Iok titik mur pe liliuk mur, e teke e hele ke kerkereng toto lange imo ke a nauala toto amo nge iri nemur nenge te teke telas lele hele ia imo. Iri te teke te helosio ia imo nga letemo manmanna ngana mur. Iange iri te hetoro ngaria, te teke tepoi elele hengetoro nemur nenge a mene. Ke pomalam ahul rumemo toto ia iri! <sup>18</sup> Iange hana nemur nenge pomam te popoia ara Non Soke Kristus nena ume ero. Leteria tu mana nga iri siporia lemeria ngaria pe ure mur nenge singiria kikikia. Ke pomalam te tamal hote reria helenga mur nenge tang ke urana toto, ke te channanga ia hehei pe hana nenge leteria matana ngana mallaha ero. <sup>19</sup> Hulua lochloch ngana nenge leteria manmanna te longe imo nge a longo tau ke a nanas tau tote NeHalang nena

helenga, pe iau e iech toto nge imo nga nem pule. Pe e teke a etei tote ure nemur nenge te urana ke nek toto. Pe ure nemur nenge te poreke, e teke letemo unne la taua ero toto.

<sup>20</sup> Musuna pol mana pe NeHalang nenge popoia letera ke ma ke nek, lape hekou sue Satan ke unalou sue nga apem huna pe tunge kerkerenga lange iong.

E hetalaulau amo ke ara Non Soke Iesus Kristus letena urana ngana tu luluch nge imo.

<sup>21</sup> Timoti i non nenge ume lululuch nge iau, pe i hekule nena apalanga lange imo. Pe iri nei, iri Iuta ke pomange iau; Lusias pe Iason pe Sosipater. Iri te hekule reria apalanga lange imo pule.

<sup>22</sup> Tetias koi nenge has susue lek helenga mur nga alalaha nei. Pe i hekule nena apalanga lange imo pule nga Non Soke ene.

<sup>23</sup> Ne Kaius i non nenge longala teua iau nga nena pele. Pe mata mur nga lamai te eukiraurau nga nena pele pule. Ana non hekule nena apalanga lange imo pule.

Pe ne Irastus i non nenge nauuelele umtutuna nga tuele tana nei, pe iri nai tira Kuatus te hekule reria apalanga lange imo pule. [<sup>24</sup> E hetalaulau amo ke ara Soke Iesus Kristus letena urana toto ngana tu toto nge imo. Manmanna.]

#### *Ta Heto Heke NeHalang*

<sup>25</sup> Ta heto heke NeHalang! NeHalang i non nenge purpur toto nge he kerkerengia imo ke letemo manmanna, nga helenga urana toto ngana nenge e hetore lala nge hehei pe hana, pe nga helenga urana toto ngana nenge Iesus Kristus. Helenga urana toto ngana nenge Kristus i nananga manmanna ngana nenge tu ke talkome mana, nga hesinga tana rorol ngana nemur nenge tela ke ulolo, nga ita non ta lohota ngara

**16:13:** Mak 15:21    **16:16:** 1Ko 16:20; 1Pi 5:14    **16:17:** Mat 7:15; Tit 3:10    **16:18:** Pil 3:19; 2Pi 2:3    **16:19:** Rom 1:8; 1Ko 14:20    **16:20:** Gen 3:15    **16:21:** Ume 16:1-2; 19:22; 20:4    **16:23:** Ume 19:22; 1Ko 1:14    **16:25:** Rom 1:5; Epe 1:9; 3:5, 9; Kol 1:26

nga ich nei nike. <sup>26</sup> Pe heueu nei NeHalang nenge tu ke maulul ke koko hemallaha hote ol nga nena helenga mur nenge hetatalonga mur tehas sue iri, ke hehei pe hana nga kileng lochloch ngana leteria manmanna nge i pe te longo taua i. <sup>27</sup> NeHalang i toro mana letena matana ngana urana toto. Ke pomalam ta heto heke ene nge Iesus Kristus ke koko! Manmanna Toto.



## 1 Korin Alalaha Elle Ngana Nenge Paulus Hassia Lange Korin Mur

<sup>1</sup> Iau Paulus, pe nga NeHalang lemene ngana iua iau ke e lohot ke iau Iesus Kristus nena hekukulonga. Pe imem nai tira Sostenes <sup>2</sup> mo hekule alalaha nei ke langa NeHalang ana mata nga kileng nenge Korin. Nge imo NeHalang nena hana mur nenge Iesus Kristus hesilei hote ke I nena hana mur nge pengpeng. Luluch nge hehei pe hana lochloch nenge te heto hekeke Non Soke Iesus Kristus ene nga kileng lochloch. Iesus Kristus nenge iri pe ita ara Soke ia.

<sup>3</sup> Pe mo hetalaulau amo ke Temere NeHalang pe Non Soke Iesus Kristus, lape leteria poreke ia imo pe te hesue lete matana urana ngana pe eteinga nge imo pe te poia letemo ke ma kenek.

### *Paulus Hele Urana Lange NeHalang*

<sup>4</sup> Kokoes e hele urana lange NeHalang iange imo a mene lete porekenga nenge NeHalang nge Iesus Kristus. <sup>5</sup> Iange nga poinga nenge atu teu luluch nge Iesus Kristus, NeHalang hemuta tote imo nga ure urana ngana mur ke a urana toto nga lemo helenga mur pe nga letemo matana ngana mur. <sup>6</sup> Pe ure nem lohot lo nenge NeHalang hekerkereng tote haliunga hot nenge Kristus nga letemo. <sup>7</sup> Ke pomalam nga etue nenge letemo kulala totote ara Non Soke Iesus Kristus at mule ngana, lape a menmene tunginga mur lochloch nenge NeHalang opene tunge lala nge imo. <sup>8</sup> Iesus Kristus lape hekerkereng ia imo kela het nga etue hetala ngana toto. Ke nga etue nenge at mule ia, mele pele

lape henonou penna lange imo nga poinga poreke ngana e ero toto. <sup>9</sup> NeHalang i non nenge hele ke manmanna pe nanas pengpeng ia nena helenga. Pe urana nge sara kikina nge i iange iua ita ke tatu teu luluch nge Tuna Iesus Kristus ara Non Soke.

### *Atu Ke Letemo Elle Mana Pe A Longo Ala Hel*

<sup>10</sup> Titik mur pe liliuk mur, e hele ke kerkereng lange imo. Pe e hele nga kerkerenga nenge ara Non Soke Iesus Kristus ene, ke imo lochloch letemo elle mana. Pomalam a laslele hel ero toto. Letemo elle mana nga letemo tuanin ngana mur pe nga utar nenge a helele ia. <sup>11</sup> Titik mur pe liliuk mur, e hele ke pomai iange iri hel nga tuluk nenge he Koloe tepal hot lek nga a hele inin helel ngamo. <sup>12</sup> Ure nenge lohotot ngana koi nei: Imo nga tuluk elle pe elle a hele, “Imem moma lange Paulus,” pe tuluk e hele, “Imem moma lange Apolos,” pe tuluk e hele, “Imem moma lange Sipas,” pe tuluk e hele, “Imem moma lange Kristus.” <sup>13</sup> Nakuna pomanga a teke a rongo heke Kristus, ae?! Pe Paulus kai nenge mete nga manga toto ke hemas mule imo mai?! Pe Paulus kai nenge henune imo mai, ae?!

<sup>14</sup> E hele urana nge e henun mene Krispus iri nai Kaius. <sup>15</sup> Ke mele pele nakuna ero toto nge hele ke teke, “Imem te henune imem ke Paulus nena hana mur imem.” <sup>16</sup> (Eh, oe! Letek metene nge e henune Stepanus pe iri lochloch nenge tetu nga nena pele. Pe e eteia ero nge e henune mele e pule.) <sup>17</sup> Iange Kristus kulosia iau ke e henun ero. I kulosia iau ke e haliu hote helenga Urana Toto Ngana, pe e haliu hote nga ita non letera matana ngana ero. Ke pomalam Kristus metengana nenga mangatoto kikina ngana het sio ero.

### *Kristus I NeHalang Kikina Ngana Pe Letena Matana Ngana*

<sup>18</sup> Iange iri nenge te lala nga oan nge hengelem te teke Kristus ana manga toto ana helenga luna unne ero toto. Pe ita nenge NeHalang mene mule ita, ta teke helenga nem I NeHalang kikina ngana ia. <sup>19</sup> Iange NeHalang nena helenga nenge tehas sue ke ulolo hele ke teke,

“Lape e heporeke hana nenge te etei toto

pe lape te poreke nga reria eteinga.

Pe iri nenge leteria matana toto,

lape e hepriu ele leteria matana ngana mur.”

<sup>20</sup> Iok, non nenge letena tuanin ngana urana toto ngai? Pe non nenge etei tote hotonga mur ngai? Pe non nenge letena matana toto nga echachalanga ngai? NeHalang hepriu ala tote lete matana ngana nga ich nei ke piriu ala toto. <sup>21</sup> NeHalang letena matana ngana urana toto nge hepriu ele hehei pe hana nga ich leteria matana ngana ke nakuria ero toto nge te eteia I. Pe mene mule iri nenge leteria manmanna nge I nga helenga nenge luna ero nenge mo haliu hotote. <sup>22</sup> Iuta mur te onteitei ke te teke te nachnau hengeilang. Pe Krik mur te tango rarara lete matana ngana. <sup>23</sup> Pe imem mo haliu hote Kristus nenge mete nga manga toto. Pe Iuta mur te longe ke pomanga helenga nenge hesingo ia iri ke te losio, pe Krik mur te teke helenga nem luna unne ero. <sup>24</sup> Pe Iuta mur pe Krik mur nenge NeHalang iua iri, te longe ke manga Kristus I kerkerenga pe I lete matana ngana nenge at nge NeHalang. <sup>25</sup> Iange NeHalang letena matana ngana urana toto nga ita non letera matana ngana. Pe NeHalang kikina toto nga ita non kikira ngara.

<sup>26</sup> Iok titik mur pe liliuk mur, letemo metene mule NeHalang iu ngana ia imo ke nena hana mur imo. Amo hel mana nge imo leteria matana ngana urana toto nga hana

tenau ngaria. Pe amo hel mana nge imo te ele haka ke iri hana papalauna mur. Pe pule amo hel mana nge imo teha nge hana nenge pingaria iuiu. <sup>27</sup> Pe NeHalang hesilei hote iri nemur nenge hana nga ich te teke leteria matana ero, ke hemeia iri nenge leteria matana ngana urana toto. Pe pule hesilei hote iri nemur nenge kikiria ero ke hemeia hana nenge kikiria toto. <sup>28</sup> Pe hesilei hote iri nenge pingaria iuiu ero nenge hana nga ich tenau sio toto menmene iri. Nga poinga nei, teke heporeke hana nenge pingaria iuiu nga ich ke tehet sio toto. <sup>29</sup> Ke pomalam lape mele pele tal heke mene i sipona nga NeHalang matana ero toto. <sup>30</sup> Iange NeHalang mana poia imo ke atu luluch nge Iesus Kristus, pe talue ke letera matana ngana huna nge Kristus. Kritis hesilei hote ita ke nena hana mur toto pe mene mule ita nga rera poinga poreke ngana ke tatu ke pengpeng nga NeHalang matana. <sup>31</sup> Pomalam mana NeHalang na helenga hele ke teke, “Mele nenge teke palut nga NeHalang matana, palut leke ume nenge NeHalang poia lange i.”

## 2

### *Letemo Manmanna Ngana Huna Lohot Mana Nga NeHalang Nena Kerkerenga*

<sup>1</sup> Oe titik mur pe liliuk mur, nga etue nenge eat nge imo, e haliu hote NeHalang nena helenga mur. Pe e haliu hote nga chau papalauna ero. <sup>2</sup> Letek haka lo ke etu luluch nge imo pe letek lilil ele ure lochloch pe haliu hot mene Iesus Kristus pe mete ngana nga manga toto. <sup>3</sup> Nga etue nem kikik ero pe e matau pe e loiloi ke halang. <sup>4</sup> Pe lek helenga mur nenge e haliu hote, e poia ke e hemaluch letemo ia ero. E poia ke e hemallaha hote NeHalang Opene

kikina ngana. <sup>5</sup> Ke pomalam letemo manmanna ngana huna lohohot nga ita non letera matana ngara ero. Letemo manmanna ngana huna lohohot mana nga NeHalang nena kerkerenga.

### *NeHalang Letena Matana Ngana*

<sup>6</sup> Iau e haliu hote ita non letera matana ngana ero. E haliu hote lete matana urana ngana lange iri nenge leteria manmanna ngana mera lo. Pe lete matana urana ngana neu lohohot nge none nga ich nga etue nei ero. Pe pule lohohot nga naungaala ana hana mur nga ich reria kerkerenga ero. Iange reria kerkerenga lala nga het nganngana lo. <sup>7</sup> Pe imem, mo helele nga NeHalang letena matana ngana nenge talkome. Letena matana ngana nenge hesilei hote ita nga etue nenge hala hote ich ero kura pe hemalmalia ita nga lut nga tapa. <sup>8</sup> Pe naungaala ana none nga ich nga etue nei letena matana hote ero. Pe toinge leteria matana hote lape te heon heke hamalmalinga ana Non Soke nga manga toto ero. <sup>9</sup> Ke pomanga NeHalang na helenga hele ke teke,

“NeHalang tatalo ele ure hel

ke hana nenge muteria taua I reria ia.

Ure nemur mele esia ero toto pe longe ero toto pe letena tuanin hote ero pule.”

<sup>10</sup> Ure nemur NeHalang hemallaha hote at nge imem lo pe hemallaha hote nga ume nenga Opepengpeng.

I Opene tango rara hote ure lochloch ngana pe teu la toto nga letena tuanin ngana mur nenge talkomkome pule. <sup>11</sup> Mele pele eteia none letena tuanin ngana mur ero. Non nem opene nenge tu nge i mana eteia. Pomalam mana nge NeHalang, mele pele eteia letena tuanin ngana mur ero. Opene i toro mana eteia letena tuanin ngana mur. <sup>12</sup> Imem mo mene hana nga ich nei reria lelenga ero. Mo mene Ope nenge at pengpeng nge NeHalang ke mo etei

ilia ure nemur nenge tunge atat nge imem. <sup>13</sup> Ke pomalam nga etue nenge mo hele, mo helele ia helenga nemur nenge none hetoro imem ia ero. Helenga nemur nenge mo helele ia nem Opepengpeng hetoro imem ia, ke mo hemallaha hotote ure manmanna ngana mur nga Opepengpeng lala nge iri nemur nenge Opepengpeng ume ke kerkereng toto nge iri. <sup>14</sup> Ke mele nenge Opepengpeng tuteu nge i ero lape mene tunginga mur nge NeHalang ero iange ana hauaua toto nga ure nemur. Ana non nakuna ero nge etei teu la nga tunginga nemur iange Opepengpeng i sipona hesue iri. <sup>15</sup> Mele nenge Opepengpeng tu teu nge i, ana non purpur toto nge etei ilia ure lochloch. Pe mele pele nakuna ero toto nge annei teu langa nena poinga mur. <sup>16</sup> Pomalam mana NeHalang na helenga hele ke teke,

“Amo tei eteia Non Soke letena tuanin ngana ke lape hetore I?”  
Pe ita, Kristus letena matana ngana tu nge ita.

## 3

### *NeHalang Itoro Poia Letera Manmanna Ngana Ke Lohohot Ke Mera*

<sup>1</sup> Pe titik mur pe liliuk mur, nga etue nenge etu luluch nge imo e hele lange imo ke pomanga imo hana nenge Opepengpeng tu nge iri ero. E hele lange imo ke pomanga imo hana nemur nga ich mana. Iange letemo manmanna ngana nge Kristus poi ke manga mau kura. <sup>2</sup> E hein mene imo nga siu eina pe e tunge ngaunga kerkerereng ngana lange imo ero iange a makuk leilei mana. A makuk leilei mana ke atat, ke heueu nei amera ero kura. <sup>3</sup> Atu ngamo pomanga hana nenga ich nei kura. Imo samo kekeke pekngamo mur pe a hele inin helel, ke pomalam imo hana nenga ich kura. <sup>4</sup> Iange amo tuluk e hele, “Imem moma lange Paulus.” Pe amo

tuluk e hele, “Imem moma lange Apolos.” Nenge teke apoi ke pomam a pomanga hana nga ich kura.

<sup>5</sup> Iok, Apolos mai i non tei pe Paulus mai i non tei? Imem nai imem hekulkulonga mur mana, pe letemo manmanna ngana lohot nga ume nenge NeHalang tunge at nge imem elle pe elle ke mo umeia. <sup>6</sup> Iau pomanga non nenge tutue ngaunga tutuna nga ume pe Apolos nanasia iau ke tungtunge ech nga ngaunga tutuna nemur. Pe nem pomanga e haliu hote helenga urana toto ngana lange imo pe Apolos nanasia iau ke hekerkerengia letemo manmanna ngana. Pe NeHalang itoro poia ke pupuo ke hakaka. <sup>7</sup> Ke pomalam non nenge tue ngaunga tutuna pe non nenge tungtunge ech nga ngaunga tutuna nemur iri nai pingaria song ero. NeHalang i toro mana pingana song iange I poia ngaunga tutuna nem ke haka pe nganangana. <sup>8</sup> Iange non nenge tue ngaunga tutuna pe non nenge tungtunge ech nga ngaunga tutuna nemur, ute pele nge altoto nge iri nai ero. Pe nga hoena iri nai lape te mene ururia ke purpure ume nenge iri elle pe elle te popoia. <sup>9</sup> Iange imem nai moume luluch mana nga NeHalang ana ume. Pe imo a pomanga NeHalang ana ume pe a pomanga NeHalang nena pele pule.

### *Non Nenge Letena Matana Toto Nga Pele Hemes Ngana*

<sup>10</sup> Oe, imo a pomanga NeHalang nena pele. Ke NeHalang letena ia iau ke e poia ana ume. Pe ume nem pomalaka nga e lung heke pele huna pe e hemes heke ana isong. Pe mele e pule lape mene une lek ume nga pele nem ke hemes heke pola sana tuana mur pe pal heke ana elele mur. Ke hana nenge te lele hekeke pele nem leteria matana ke nek nga reria ume nenge te popoia nga pele

nenge e talune nem. <sup>11</sup> Iange NeHalang talue Iesus Kristus ke pele nem ana isong ia. Pe mele pele purpur ero toto nge hetaua. <sup>12</sup> Ke nga etue nenge mele hel te hemes heke pele nem, lape te umeia nga ure chalemlem ngana nenge koikoi ke pomanga lauta. Pe hel lape te umeia nga ure nenge chalemlem pe sinaha, pe hel lape te umeia nga ure nemur nenge ururia haka toto. Pe iri hel lape te ume heke pele nem nga ae makuk leilei ngana. Pe hel te umeia nga memeta kina pe hel lape te umeia nga pou. <sup>13</sup> Pe mele elle pe elle nena ume lape lohot nga mallaha nga NeHalang nena haliunga ana etue, nge ume nem urana ma poreke. Iange etue nem lape lohot ke pomanga oan ke totoia mele elle pe elle ume ngana. <sup>14</sup> Pe mele nenge hemes heke nena pele nga pele huna nem pe na pele ngaulala ero, ilape mene uruna. <sup>15</sup> Pe mele nenge hemes heke nena pele pe ngaulala sio, i lape eleis maul ngana pe lape poi ke pomanga non nenge tetak lala hote nga oan.

### *Imo NeHalang Nena Pele*

<sup>16</sup> Imo lape a eteia ero nge NeHalang hele ke teke, “Iau lek pele laka imo pe lek Opepengpeng tu teu nge imo.” <sup>17</sup> Nenge teke mele heporeke NeHalang nena pele, NeHalang lape heporeke mele nem; iange i sipona tal hote ke nena ia. Ke NeHalang na pele nem, ngana laka imo.

<sup>18</sup> A channanga mule imo ero. Nenge teke amo e nge imo teke i toto nga hana nga ich mataria ke teke letena matana toto, urana nge tal sue i ke pomanga hauaua e nga mataria. Pomalam, lape lohot ke letena matana toto ol. <sup>19</sup> Iange lete matana urana ngana nenga ich nei, pomalaka nga hauaua ana poinga nga NeHalang matana. Iange NeHalang na helenga hele ke teke, “Hana hel te teke te hesingo ia mele hel nga leteria matana ngana mur.



Ke pomalam NeHalang hekleke ele iri pe hesingo mule iri nga leteria matana ngana nemur.”<sup>20</sup> NeHalang nena helenga e pule hele ke teke, “Non Soke eteia ke hana nga ich leteria matana urana ngana nganangana ero.”<sup>21</sup> Ke pomalam a palut leke none ero ol. Ure lochloch ngana lemo ia ke te halaua imo.<sup>22</sup> Ne Paulus pe ne Apolos pe ne Petrus pe ich pe maulinga, pe metenga pe ure nemur nenge tetu heueu nei, pe ure nemur nenge lape te lohohot nga hoena; ure lochloch ngana nemur lemoia ke te halaua imo.<sup>23</sup> Imo, Kristus nena imo pe NeHalang nena Kristus.

## 4

### *Kristus Nena Hekulkulonga Mur Nenge Te Umume Nge I*

<sup>1</sup> Ke imo a naue imem ke pomanga Kristus nena hana mur nenge mo umume nge I. Pe NeHalang tunge emem ume nenge mo haliu hotote nena helenga manmanna ngana nenge talkomkome.<sup>2</sup> Pe ute e nge ta naue nge hekuleileinga ana non popoia, ngana laka nenge poia ana ume ke lohohot ke manmanna.<sup>3</sup> Nenge teke imo ma mele hel nga ich te amnei teu at nga lek poinga mur, iau e teke ute pele ero. Iau sipok e amnei teu at nga lek poinga mur nenge e popoia ero.<sup>4</sup> Iau e amnei at nge iau sipok pe e eteia ke e poia poinga poreke ngana e ero. Pe nem poia iau ke iau non nge pengpeng ero, iange NeHalang i sipona lape amnei teu at nga lek poinga mur.<sup>5</sup> Ke pomalam a amnei teu langa mele hel reria poinga ero iange ana etue atat kura. Ume nem tu ke kulele etue nenge Non Soke atia. Nga etue nem Non Soke lape hemallaha hote ure talkomkome ngana mur ke te lohohot nga mallaha. Pe lape hemallaha hote hehei pe hana leteria tuanin ngana luria. Ke het pe heto heke iri elle pe elle.

### *Korin Mur Te Heto Heke Mule Iri*

4:2: Luk 12:42    4:5: 1Ko 3:8    4:6: Rom 12:3    4:7: Rom 12:6    4:11: 2Ko 11:23-27    4:12: Mat 5:44; 2Te 3:8

<sup>6</sup> Titik mur pe liliuk nga lek helenga nemur e poia helenga opene ia imem nai Apolos ke e halaua imo. Pomalam lape a mene NeHalang nena helenga nei luna nenge hele ke teke, “A nanas mene hasinga tang ngana pe ala hali ero.” Pomalam, lape a poia none ke ele aka nge none ero.<sup>7</sup> Itei toto nenge tal heke imo ke imo papalauna nge iri hel? NeHalang laka tunge lemo urelu lochloch. Ke ure nemur a mene nge NeHalang ke pomanga tunginga pe pomerei otal haka iong ia? Iong ma opoi hote ure nemur mam?

<sup>8</sup> Eh, imo a teke ure nemur nenge mutemo tautaua mataria purpur pe NeHalang tung lochloche tunginga mur nga Opepengpeng ke te muta toto nge imo lo, ae? Imem mo lohohot ke imem naungaala ana hana mur ero kura pe imo a teke a lohohot ke imo naungaala ana hana mur lo. Teke pomam iok, imem mo teke mo lohohot ke imem naungaala ana hana mur pule ke ita ul ta nauele hehei pe hana.<sup>9</sup> Nga enau ngak, NeHalang hesalang toto ia imem hekulkulonga mur pe talue imem langa hoena toto. Pe mopoi ke malaka nge hana nenge te haliu hote iri lo ke te teke te hunune iri. Pe nakuna pomanga imem hana nenge lape te hune imem nga hehei pe hana pe angkelo mur lochloch mataria.<sup>10</sup> Imem letemem manmanna nge Kristus pe te teke emem hauaua pe kikimem ero pe te heto heke imem ero. Pe imo Kristus nena hana mur imo pe letemo matana ngana urana toto pe kikimo toto pe te heto hekeke imo.<sup>11</sup> Nge niknike ke at heueu nei emem ngaunga alpapa tautaua imem ke mo mete emem manmana, pe mo mete unune ech. Pe pule mo heron menmene hengeron chachulu ngana mur pe tepoi sochia imem ke pomanga kaone pe mola pe moat pulut mana pe motu hita nga kileng elle ero.<sup>12</sup> Pe mo ume ke kikimem toto nga perimem ke mo ngau. Hehei pe hana te hele

porekreke imem pe mo onteia NeHalang ke poi ke nek lala nge iri. Tepoi porekreke imem pe mo takis mene ana melmelenga. <sup>13</sup> Pe nga etue nenge hehei pe hana te hele poreke tote imem, mo tuacholia nga helenga nge urana lange iri. Nge nike ke at heueu nei hehei pe hana te naue imem ke pomanga alolap pe sausaunga nenga ich lochloch.

<sup>14</sup> Pe ure nemur nenge ehas sue iri nei, ehas sue ke e hemeia imo ia ero. Iange imo apoi ke pomanga tutuk mur toto, ke pomalam e teke e hetore imo. <sup>15</sup> Imo amo heteronga halang nge te hetottore imo nge Kristus, pe tememo halang ero. Tememo iau toro mana iange a lohote ke tutuk mur imo nga Iesus Kristus nena Helenga Urana Toto Ngana nenge e haliu hote lala nge imo. <sup>16</sup> Pomalam e teke a nanas tau tote lek poinga mur. <sup>17</sup> Pe e kulosia Timoti ke lange imo iange huna nga nem mana. Timoti poi ke manga tukia toto pe mutek tau tote i iange rahite Non Soke nena ume ke kerkereng. Pe i lape helete metene mule imo nga kue mur nenge e nanasia Iesus Kristus, nga nenge e hetottore lala nge iri mata mur nga kileng lochloch.

<sup>18</sup> Pe mele hel nge imo te iech pe te palut lekleke iri iange te teke ma lape eat mule nge imo ero ol. <sup>19</sup> Pe iau, nga Non Soke lemene ngana, lape eat ke enau toto mule imo ke ueiuei mana. Pe lape enau nga hana nemur reria kerkerenga nenge te palut lekleke iri ia. <sup>20</sup> Iange NeHalang nena naualanga pe nekinga i helenga mana ero, i ure nenge hehei pe hana te henonou hote NeHalang kikina ngana nga reria ume mur. <sup>21</sup> Imo mutemo taua poinga tei? A teke e mene amo put at ke e hepengia imo? Eh, a teke e atia letek urana ngana ke letek porekeia imo?

## 5

### *Alope Hote Mele Nenge Salau Hali*

<sup>1</sup> Iok, mele hel te hele at nge iau ke te teke amo hel nge imo te salaulau. Te teke none ma luluch mule nge temene nehei mokona. Pe hana nenge te eteia NeHalang ero te teke poinga nenge pomam poreke toto. <sup>2</sup> Ol pe imo mam a palut hakaka ia utar? A hile sue poinga nenge a heto hekeke imo pe letemo ia lemo poinga poreke ngana ol. Pe mele nenge poia poinga poreke ngana nem, urana nge a lope hote ke koko teu luluch mule nge imo ero ol. <sup>3</sup> Iau etu luluch nge imo ero pe opek tu luluch nge imo lo. Pe e amneia ke pomalaka nga etu luluch toto nge imo heueu nei pe e amnei urume non nem nena poinga poreke ngana nem ke ulolo. <sup>4</sup> Pe e teke a heukirau nga Non Soke Iesus ene ke a heleia poinga nenge lohote nei pe iau opek lape tu luluch nge imo pule. Pe nga Non Soke Iesus nena kerkerenga nenge tu luluch nge ita, <sup>5</sup> ta tunge non nem lange Satan ke heporeke singina. Ke pomalam lape Non Soke mene mule opene nga nena haliunga ana etue.

### *A Hile Hote Mele Nenge Popoi Poinga Poreke Ngana*

<sup>6</sup> Poinga nenge a heto hekeke imo sipomo emo, poreke. A eteia helenga nei ke ulolo nenge hele ke teke, "Is unne sune mana poia beret itach ngana ke huna haka." <sup>7</sup> Pe a saua is nem ol iange nike ngana lo, pomalam lape a pomanga beret heueu ngana nenge ana is ero. Iau e eteia ke imo apoi ke pomam iange Kristus, tepoi tunginga ia I ke ulolo ke pomanga sipsip nenge tapoi tunginga ia nga ara ngaunga matana nenga Inगतoto ana etue. <sup>8</sup> Ke pomalam ta saua beret nenge ana is nike ngana pe ta mene beret heueu ngana nenge ana is ero ke ta ngaua nga ngaunga matana nem. Iange beret nenge ana is nike ngana heilangia poinga poreke ngana. Pe beret heueu ngana nem

nenge ana is ero heilangia poinga urana ngana pe helenga manmanna toto ngana.

<sup>9</sup> Iau e hassia alalaha e lange imo ke ulolo pe e hele lange imo ke e teke a koko luluch nge hana nenge te salaulau ero. <sup>10</sup> Iri te salaulau pe saria chumchumchum pe te kemkeme pe te heto hekeke aetapuna mur. Iau e teke a ua toto aria ero iange nenge teke a ua toto aria iok, a ua hot toto nga ich nei sapele. <sup>11</sup> Lek helenga nemur luria mai koi: Hana nenge te teke leteria manmanna nge Iesus pe te popoia poinga poreke ngana mur kura, e teke a koko luluch nge iri ero. Nenge te salaulau, pe saria chumchumchum, pe te heto hekeke aetapuna, pe te hele porekreke mele hel, pe te inin ke aria hauaua, pe te kemkeme. E teke a koko luluch nge hana nenge pomai ero pe a ngau luluch nge iri ero pule.

<sup>12-13</sup> Pe iri nenge leteria manmanna nge Kristus ero, iau lek ume nge e amnei teu langa reria poinga mur ero. Iange NeHalang i sipona lape amnei teu langa reria poinga mur. Pe iri nenge leteria manmanna nge Kristus, imo amo ume nge a amnei teu langa reria poinga mur. Iange NeHalang nena helenga hele ke teke, "None nenge tu luluch nge imo pe popoi poinga poreke ngana, a hile hote i ke lasus toto."

## 6

### *A Hepengia Ure Meena Ngana Nenge Lohotot Nge Imo Kenek*

<sup>1</sup> Iok, nenge teke amoe nge imo letena inin taua neingana e, urana nge mene i lange NeHalang nena hana mur ke te amnei teu langa ure meena ngana nem. Pe pomerei nenge laia nge hana kelkel ngana mur nenge te eteia NeHalang ero ke te amnei teu la ia? <sup>2</sup> A eteia ero kai? Imo NeHalang nena hana mur nge lape a amnei teu langa hehei pe

hana nga kileng lochloch ngana nga ich reria poinga mur. Pe nenge teke nakumo nge a poia ume palaungana nem nenge lape lohot kura, pomerei nge nakumo ero nge a hepengia ure kinkino ngana nemur nenge lohotot nga tunangamo heueu nei? <sup>3</sup> Pe a eteia lokai? Ita lape ta amnei teu langa angkelo mur reria poinga mur pule. Ke pomalam nakura nge ta amnei teu langa poinga nemur nga ich pule. <sup>4</sup> Pe nenge teke poinga e lohot, lape a laia nge mele nenge rahite ume unne nga mata nenge NeHalang ero ke hepengia? <sup>5</sup> Ia pomerei, amoe nge imo letena matana nge hepengia poinga nenge lohot nge hana nai nem ero? E poia helenga nei ke e teke e hemeia imo, <sup>6</sup> iange amo e nge imo mene neingana kela hana nenge leteria manmanna nge NeHalang ero te hepengia reria hunhelinga.

<sup>7</sup> Pe e hele pengpeng lange imo; Imo a hunel mulmule nge imo iange poinga nenge a nanasia Kristus a altaua ke ulolo. Iau e teke apoi ke pomai koi: Nenge teke te poi poreke imo ma te kemeia lem ure, a chumele mene. <sup>8</sup> Pe ero. Imo titimo hel. Pe apoi poreke hehel pe a keme hehel nge imo kura.

<sup>9</sup> Pe lape e hele pengpeng lange imo ke pomai; Mele hel nenge te popoi poinga poreke ngana lape teteu langa NeHalang nena naualanga pe nekinga ero toto. Anau ala amo ke nek iange lape mele hel te channanga ia imo. Salaunga kina mur pe iri nenge te heto hekeke aetapuna mur pe nenge te heporekreke leinga pe hana nenge te salaulau ke mange hehei pe hana nenge te heporeke mulmule hana mur, <sup>10</sup> pe iri nenge te kemkeme pe nenge te teke iri toro manaia ure mur, pe nenge tein halali pe iri nenge te ngailelele mele hel pe nenge te ua tototo ia mele hel reria ure mur; iri lochloch ngana nenge te popoi ke pomai lape teteu langa NeHalang nena naualanga pe

nekinga ero toto. <sup>11</sup> Pe amo hel nge imo, nge nike a popoi ke pomam pe heueu nei ero ol. NeHalang Opene helemlem tote imo lo pe hesilei hote imo ke nena hana mur toto ia imo. Pe a lohohot ke a pengpeng toto nga matana lo. Poi ke pomam lange imo iange Non Soke Iesus Kristus mete ke hemas mule imo.

### *A Heto Heke NeHalang Nga Singimo Pule*

<sup>12</sup> Amo hel nge imo te teke, "Ure lochloch ngana, ta poia nga lemere ngara. Teheo ele ero." Pe e hele lange imo, ure hel te halaua ita ero. Ke lemek ero nge sak iuch ia ute pele nenge tak tele iau ke e nanas menmene. <sup>13</sup> Amo hel te hele pule ke te teke, "Ngaunga i sara ana ia ke sara menmene ngaunga." Pe e hele lange imo, NeHalang lape poia ure nai nem ke tehet. Ke pomalam a nauele singimo ke nek pe a hesalangia ero iange singimo i salaunga ana ure ia ero. Singimo i Non Soke nena ure ia ke a heto heke Non Soke nga singimo. <sup>14</sup> NeHalang hemaual heke mule Tuna nga metenga nga nena kerkerenga pe lape hemaual heke mule ita pule. <sup>15</sup> Imo a eteia nei ero kai? Singimo mur elle mana luluch nga Kristus singina. Pe nenge teke e mene Kristus singina unne pe e heluluch tele nga hei salaunga kina e singina, nem nakuna poreke toto. <sup>16</sup> Mele nenge ma luluch nge hei salaunga kina e singina elle mana luluch nga hei nem singina. Iange helenga nenge ma sio nga NeHalang nena alalaha hele ke teke, "Non nem pe hei nem singiria lape lohohot ke elle mana." <sup>17</sup> Pe mele nenge tal teu luluche i langa Non Soke Opene, lape lohohot ke elle mana luluch nga Non Soke Opene.

<sup>18</sup> Ke pomalam ahul rumemo ia salaunga ana poinga pe a hile tote. Iange poinga poreke ngana hel nenge hehei pe hana te popoia tu mana nga singiria nge hot. Pe iri nenge

te salaulau te heporeke tote singiria. <sup>19</sup> Imo a eteia ke singimo nemur imo sipomo lemo ia ero. Opepengpeng nenge NeHalang tunge lange imo pe tuteu nge imo ke ulolo, nena pele laka singimo nemur. Ke singimo i NeHalang nena ure ia. <sup>20</sup> NeHalang mene mule imo nga uru nge palaungana toto ke pomalam a heto heke I nga ure lochloch ngana nenge a poia nga singimo.

## 7

### *Leinga Ana Poinga*

<sup>1</sup> Iok, e teke e hele teu langa ure mur nenge a hasia ana alalaha ke at nge iau: Urana nge none ma luluch nge hei e ero. <sup>2</sup> Pe salaunga ana poinga mur te lohohot ke elela toto lo, ke pomalam urana nge hana lochloch elle pe elle mene i sipona nehei e pe hehei lochloch elle pe elle mene i sipona ene e. <sup>3</sup> Pe a lohohot ke imo elle mana nga poinga nenga leinga. Iong non nem o tung tote iong lala nge lem hei pe iong hei nem o tung tote iong lala nge em. <sup>4</sup> Iong hei nem o huele singim nge em ero iange singim i em nena ure ia, pe iong non nem o huele singim nge lem hei ero iange singim i lem hei nena ure ia. <sup>5</sup> A lei hel pe aheo ele imo nga poinga nenge ama luluch ero. Pe nenge teke a ngata hel ke ama luluch ero, iok a tunge amo etue unne nem ke a hetalaulau pe nga hoena ama luluch mule. Iange nenge teke a nauele singimo lemene ngana ke nek ero non poreke ngana lape helosio ia imo nga poinga poreke ngana. <sup>6</sup> E heleia helenga nei pe i Non Soke na hotonga ia ero koi. E hele hot mene ramak mana. <sup>7</sup> Iau lemek ke e teke hehei pe hana lochloch tepoi ke mange iau. Pe ero iange NeHalang tunge tunginga mur nge altototo lange hehei pe hana lochloch. Mele nena pomai pe mele nena pomau.

<sup>8</sup> Iok, e teke e hele ke pomai lange hehei pe hana nenge telei ero pe



pakar mur: Urana nge telei ero ke pomange iau. <sup>9</sup> Pe nenge teke te nauele singiria lemene ngana ero, urana nge telei. Iange lape salaunga ana poinga kik heke iri pe tepoi rara pulut mana lange hehei hel pe hana hel nenge te leia iri ero.

<sup>10</sup> Iok, e teke e tunge hotonga nei lange hehei pe hana nenge telei ke ulolo. (Pe hotonga nei iau lek hotonga ia ero, Non Soke nena hotonga ia.) Heie ua ene ana ero toto. <sup>11</sup> Pe nenge teke ua ene ana, tu mana ke pomam lola pe lei mule ero ol. Teke merei pe la ke tu luluch mule nge ene. Pe ene iong otak hoa amo leinga ero.

<sup>12</sup> Pe e teke e hele ke pomai lange iri lochloch ngana hel pule nenge telei: (Nei Non Soke nena helenga ia ero koi, iau sipok lek helenga.) Nenge teke NeHalang nena none nehei, letena manmanna nge Kristus ero pe hei neu lemene ke teke tu luluch nge i kura, iong NeHalang nena non nem o hile i ero. <sup>13</sup> Pe nenge teke heie ene, letena manmanna nge Kristus ero pe non neu lemene ke teke tu luluch nge i kura, iong hei nem o hile i ero. <sup>14</sup> Iange hei nenge letena manmanna lape o poia ene nenge letena manmanna ero ke lohot ke i non pengpeng. Pe non nenge letena manmanna lape o poia nehei nenge letena manmanna ero ke lohot ke i hei nge pengpeng. Pe nenge teke ero, lape tuturia mur te eteia poinga nenge te heto hekeke NeHalang ero. Pe heueu nei tuturia mur tetu ke te lemlem nga NeHalang matana kura.

<sup>15</sup> Nenge teke none ma heie nenge letena manmanna ero ua nehei ma ene ana, poia nga lemene ngana. Iong e nenge letem manmanna pe poinga nei lohot nge iong, letem meena ia ero. Otu ke opoi tetele, iange NeHalang iua ita ke ta nanasia poinga nenge tatu ke tanek. <sup>16</sup> E hele ke mai iange iong hei nem o eteia ero, lape o poia em ke letena manmanna ma ero. Pe iong non nem o eteia

ero, lape o poia lem hei ke letena manmanna ma ero.

### *Tatu Mana Nga Tatu Ngara Nenge NeHalang Tunge Nge Ita*

<sup>17</sup> Hotonga nei e helele ia lange iri mata mur lochloch pe lape e heleia lange imo pule. Imo elle pe elle NeHalang iua imo nga atu ngamo nenge i sipona tunge lange imo, pe a nanas mene atu ngamo nem ke pomalalom. <sup>18</sup> Nenge teke NeHalang iua none nge te riria singina lo, non nem mai hit mule singinga ke rorol mule ero ol. Pe nenge teke NeHalang iua none nge te riria singina ero kura, non nem la ke terir mule singina ero ol. <sup>19</sup> Iange poinga nenge ta ririr us pe nenge ta ririr us ero, i ute pele nge palaungana ero. Ure nenge palaungana toto ngana laka; poinga nenge ta nanasia NeHalang nena hotonga mur. <sup>20</sup> Ke imo elle pe elle atu ngamo nenge a nanas ia pe NeHalang iua imo, a nanas tau mene ke pomalalom. <sup>21</sup> Imo nenge aume manmana nge hana hel pe NeHalang iua imo, letemo meena ia ero. Pe nenge teke a hottaua kue nge mene hote imo nga ume nem pe atu mana ol, iok ananas mene kue nem. <sup>22</sup> Iange mele nenge ume manmana nge hana hel pe NeHalang iua i ke at luluch nge Kristus, lohot ke Kristus nena non nenge mene mule. Pomalam mana nge mele nenge ume nge hana hel ero. Nga etue nenge NeHalang iua i ke at luluch nge Kristus, mele nem lohot sapele ke Kristus nena non nenge umume nge I. <sup>23</sup> NeHalang mene mule imo nga uru nge palaungana toto. Ke pomalam a longo taua hana hel ke aume mule nge iri ero ol. <sup>24</sup> Titik mur pe liliuk mur, atu luluch mana nge NeHalang pe a nanas mene atu ngamo nenge iua imo ia ke pomalam mana.

### *Helenga Nenga Hehei Pe Hana Nenge Telei Ero*

<sup>25</sup> Iok, imo ahas at nge iau pe ara heke hehei pe hana nenge telei ero aria helenga. Non Soke nena helenga unne langa nem ero pe lape e hele hote letek tuanin ngana mur lange imo. Pe lape letemo manmanna nga lek helenga iange NeHalang letena ia iau ke ulolo. <sup>26</sup> Heueu nei ure meena ngana mur halang te lohotot. Ke pomalam urana nge imo hehei pe hana nenge alei ero atu ke pomalam mana ol. <sup>27</sup> Imo nenge alei lo alei hel lola, pe imo nenge alei ero kura alei ero ol. <sup>28</sup> Pe nenge teke o tango lem hei ke olei, o poia poinga poreke ngana e nga nem ero la. Pe nenge teke hei malolong e lei, i poia poinga poreke ngana e ero pule. Iau e teke epoi ele imo nga ure meena ngana mur nenge lohot ke kokoes manmana nge hehei pe hana nenge te lechlei.

<sup>29</sup> Titik mur ure nenge e teke e heleia ngana koi nei; Etue hetala ngana heroi toto lo. Ke pomalam nga etue unne nenge tu nei ol, imo nenge alei letemo langa poinga nenga leinga ero. Letemo tu mana ke pomanga iri nenge telei ero. <sup>30</sup> Ke pomalam mana nge iri nenge te tangtang pe iri nenge te iechech pe iri nenge te olol ure. Iri nenge te tangtang leteria poi ke mange iri nenge te tang ero pe iri nenge te iechech leteria poi ke mange iri nenge te iech ero pe iri nenge te olol ure, leteria poi ke mange iri nenge reria ure ero. <sup>31</sup> Pe iri nenge te popoia aria ume nga ure nemur nga ich nei leteria poi ke mange hana nenge muteria taua ure mur nga ich ero. Iange ta eteia ke ich nei lala nga het nganngana lo.

<sup>32</sup> Iau e teke letemo una rara nga ute hel ero. None nenge lei ero letena tu mana nga Non Soke ana ume. Pe letena una ngana nga nenge teke poia Non Soke letena ke iech. <sup>33</sup> Pe non nenge lei letena unaia ure nemur nga ich nei, iange teke poia nehei letena ke iech. <sup>34</sup> Ke pomalam ure

nai te taktele helia i. Pe hei nenge lei ero pe hei malolong nenge lei ero toto, leteria una nga poinga nenge te tung tote singiria pe operia lange Non Soke iange te teke te poia Non Soke letena ke iech. Pe hei nenge lei, letena una ia ure nemur nga ich nei iange teke poia ene ke letena iech.

<sup>35</sup> E heleia helenga nei iange e teke e halaua imo. Lemek ero nge etal heke ure meena ngana lange imo. E teke e halaua imo ke a nanasia poinga nge pengpeng pe mutemo taua Non Soke nga ure lochloch.

<sup>36</sup> Pe nenge teke none lemene ke leia hei malolong mera ngana e pe amnei nga letena nge popoia poinga nenge urana ero lange hei neu, iok, la ke iri nai telei hel mana ol. Ute pele nge poreke nga nem ero. <sup>37</sup> Pe nenge teke none nauele singina lemene ngana mur ke nek pe i sipona letena haka ke teke lei ero, poinga nem urana. <sup>38</sup> Ke pomalam none nenge leia nehei malolong ngana e poia poinga nge urana. Pe none nenge tu mana pe leia heie ero, poia poinga nenge urana toto.

<sup>39</sup> Hei nenge lei urana nge tu luluch mana nge ene ke nek. Pe nenge teke ene mete, ute pele poi ele i nge lei haka mule ero. Pe nenge teke lei haka mule, leia none nenge letena manmanna nge Non Soke. <sup>40</sup> Nga letek e teke hei nem lape mene iechinga palaungana nga nenge teke tu mana pe lei haka mule ero ol. Pe e eteia ke NeHalang Opene tunge lete matana ngana nei at nge iau.

## 8

### *Ngaunga Nenge Te Kalongia Lala Nge Aetapuna Mur*

<sup>1</sup> Iok, nga lemo alalaha a onteia iau nga ngaunga nenge te kalongia lala nge aetapuna mur. Ita lochloch ta eteia ure nei lo. Pe letera matana ngana mur poia ita ke tatal heke tote ita nge mele hel. <sup>2</sup> Iri nenge te teke te etei toto lape te eteia ute pele

ero. <sup>3</sup> Pe mele nenge mutena tau tote NeHalang lape mene lete matana ngana nge NeHalang.

<sup>4</sup> Iok, nga poinga nenge te ngaua ngaunga nenge te kalongia lala nge aetapuna mur: Ita lochloch ta eteia ke NeHalang elle mana pe itoro mana tu ke maulul pe aetapuna pele tu ke maulul nga ich nei ero toto. <sup>5</sup> Hana halang te hetue ure hel nga tapa pe nga ich ke te teke non soke pe nehalang ia iri. Pe ure nemur iri Non Soke pe iri NeHalang ero toto. <sup>6</sup> Ita ara Soke NeHalang elle mana, ngana laka Temere NeHalang itoro. Non elle mana nenge ala hote ure lochloch pe nena hana mur toto ita. Pe ara Non Soke laka Iesus Kristus i toro mana. NeHalang ala hote ure lochloch iange huna nge I mana pe ta mene maulinga ke koko nge I.

<sup>7</sup> Pe hulua halang te eteia nei ero. Iange te nanas tau tote aetapuna mur pe leteria mallaha kenek ero nga etue nenge te ngaua huros nenge te kalongia lala nge aetapuna mur. Pe te amneia ke te poia poinga poreke ngana. <sup>8</sup> Pe ngaunga nenge ta ngaua poia ita ke tala rochroi nge NeHalang ero. Pe pule ta ngaua pe poia ita ke ta urana nga NeHalang matana ero pe nenge teke ta ngaua ero poia ita ke ta poreke nga NeHalang matana ero.

<sup>9</sup> Pe a nauala ke nek iange lape lemo poinga nenge angau pulut mene ngaunga nemur, helosio ia iri nenge leteria manmanna ngana kino mana ke te losio teu mule nga poinga poreke ngana. <sup>10</sup> Nenge teke mele nenge letena manmanna ngana kino mana, naue iong nge o ngaungau nga hatanga nenge aetapuna mur, lape mele nem letena haka ke ngaua huros nenge te kalongia lange aetapuna mur pule. <sup>11-12</sup> Ke letem matana ngana nem heporeke Iesus nena none nenge letena manmanna ngana kino mana. Iange iong opoia i ke amnei teu ke nek nga utar nenge

poreke pe utar nenge urana ero ol. Pe mele nem Kristus mete ke mene mule i ke ulolo. Ke poinga nenge o poia poinga poreke ngana lange tim e ke pomam, o poia poinga poreke ngana lange Kristus ke ulolo. <sup>13</sup> Ke nenge teke e ngaua ngaunga e pe e heporeke Non Soke nena none ke losio teu mule nga poinga poreke ngana, lape e ngau mule huros ero ol. Pomalam lape e poia tik e ke losio mule ero.

## 9

### *Hekulkulonga Paulus Iech Nge Mene Uruna Ero Nga Nena Ume*

<sup>1</sup> Iau Non Soke nena hekulkulonga, pe ute pele nge poiele iau nge e umeia nena ume ero. E naue ara Non Soke Iesus nga matak ke ulolo? Pe lek ume nei laka nenge poia imo ke a lohot ke nena hana mur imo nem. <sup>2</sup> Mele hel te teke iau hekulkulonga e ero pe imo a eteia ke iau hekulkulonga e, iange lek ume nganangana lohot pe tal apena pe penna nge imo ke ulolo.

<sup>3</sup> Nenge teke hana tetue iau nga helenga lape e hele ala ak ke mai koi, <sup>4</sup> Pomerei nge imem nai Parnapas nenge moume ke mo halaua imo? NeHalang hekerkereng ia imem ke mo poia ume nei, pe pomerei nenge a nau at nge imem nga ngaunga pe ech unne ero? <sup>5</sup> Non Soke titina mur pe hekulkulonga mur pe Petrus te mene hehei nenge leteria manmanna ke te leia iri. Pe pomerei nge imem mai? Imem, toinge mo mene lememe hehei mur ke tei luluch nge imem nga ume nei iange NeHalang hekerkereng ia imem ke mange iri pule. <sup>6</sup> Eh, imo letemo ma ke merei? A teke iau pe Parnapas lape mo tango rara ume ke moume ke mo halaua imem nga motu ngamem?

<sup>7</sup> Palinga hel ana hana mur te lolol iri siporia aria ngaunga ero. Amo tei nenge tue ume e pe ngaua ngaunga e nga ume nem ero? Mele

nenge nauale kolok mur lape pip hote kolok heheina siuria eina pe inia pule. <sup>8</sup> Helenga nei lohohot nga ita non letera matana ngana mana ero. Hotonga heleia ke elle mana ke pomai. <sup>9</sup> Ke Hotonga nenge Moses hele ke teke; “Nga etue nenge kolok i hakaka nga uit nganangana ke poi hotote paena mur, atom ele hanna ero.” Pomerei nenge NeHalang poia helenga nei, letena ia kau kolok neu mau? <sup>10</sup> NeHalang letena ia ita ke ngana laka nenge poia helenga nem. Ke mele nenge tutua pe nenge lululu, nga leteria nge teu te eteia ke lape te mene ngaunga nga reria ume nenge te poia. <sup>11</sup> Ure nenge palaungana toto ngana koi nei; Imem motue ngaunga tutuna nenga Opepengpeng nga letemo ke haka. Pe singira ana ure nenge a kalongia at nge imem i ure nenge kino mana. <sup>12</sup> Mele hel te loloch urelu nge imo ke ulolo pe pomerei nge imem? Lemem kerkerenga palaungana toto nge iri pe heo ngana nge mo loloch urelu nge imo pule ma?

Pe urelu nenge toinge mo lolochia nge imo ngana koi mo mene ero. Iange mo teke hehei pe hana tera hit tote Kristus nena helenga. Ke pomalam mo chumele mene ure meena ngana pe mopoia poinga nem ero. <sup>13</sup> Imo a eteia ke iri nenge te umume nga NeHalang nena tunginga ana pele te menmene aria ngaunga nga NeHalang nena tunginga ana pele. Pe iri nenge te popoi tunginga nga tunginga ana hatanga te mene huros unne nga tunginga nem. <sup>14</sup> Ke pomalam mana Non Soke talue ke teke iri nenge te haliu hotote helenga urana toto ngana, te mene halaunga nga reria ume nem pule.

<sup>15</sup> Non Soke talue helenga ke pomam pe iau e mene halaunga unne e ero toto. Pe heueu nenge ehas ia alalaha nei, e tanghaka halaunga nge imo ero. E teke e mete tala mukam

iange lemek ero nge mele ua toto ia iechinga nenge tunge iau. E iech toto iange e mene uruk unne nge mele pele ero. <sup>16</sup> Iau e haliu hotote helenga urana toto ngana pe e heto haka iau ia ero. Iange NeHalang henonou hote iau ke e poia ume nem, pe nenge teke e poia ume nem ero lape NeHalang nau urume iau nga hoena. <sup>17</sup> Nenge teke e haliu hote helenga urana toto ngana nga iau sipok lemek ngak lape e mene uruk ia. Pe nei NeHalang i sipona henonou hote iau nga ume nei. <sup>18</sup> Pe lape e mene uruk utar nga ume nei? Uruk toto laka lom nenge; E iech mana nge e haliu hote helenga urana toto ngana lange hehei pe hana pe e long heke uruk ero. Lemek ero nge e mene ute nge hehei pe hana nga ume nenge e haliu hotote helenga urana toto ngana.

*Paulus Ume Ke Halaua Hehei Pe Hana Lochloch*

<sup>19</sup> Iau non pele nena non iau ero pe eume nge mele pele ero pule. Iau sipok e talue iau ke eume nge hulua lochloch. Iange e teke e heole hana halang ke te nanasia Kristus. <sup>20</sup> Nga etue nenge etu luluch nge Iuta mur e nanas taua reria poinga mur iange e teke e heole hana halang nge iri. Iri te nanasia hotonga nenge Moses pe iau ero. Pe e nanas mene iri iange e teke e heolole iri. <sup>21</sup> Pe nga etue nenge etu luluch nge iri nenge te nanasia hotonga nenge Moses ero, e nanasia reria poinga mur pule iange e teke e heole hana lomonmona ngana mur pule. Iau e nanasia Kristus nena hotonga pe e hile hote NeHalang nena hotonga ero. <sup>22</sup> Pe nge iri nenge leteria manmanna ngana kerkereng ero, etu luluch nge iri pe epoi ke pomange iri pule. Pe eume ke kerkereng toto ke e nanasia reria poinga mur lochloch iange e teke e heole hana halang nge iri. <sup>23</sup> E poia ure nemur nenge e helele ia nei iange e teke Iesus nena helenga urana toto



ngana song ke langa kileng lochlolch. Pomalam iau lape e mene petanga unne pule nga petanga nenge lohot nga helenga urana toto ngana nei.

### *Ta Song Ke Kerkereng Ke Ta Mene Tunginga*

<sup>24</sup>Imo a eteia ke songinga ana hana mur nenge te songsong iri halang pe elle mana nge iri lape mene tunginga. Pomalam a song ke kerkereng pule ke a mene tunginga pule.

<sup>25</sup>Iri nenge te teke te koko teu nga hesalanginga nemur tela ke te mene hengetoro kerkereng ngana. Tepoi ke pomau iange te teke te mene tunginga. Pe tunginga nenge te mene nem lape tu ke etue choro mana pe ita ta teke ta poia ke ta mene tunginga nenge tu ke koko. <sup>26</sup>Ke pomalam e song ke kerkereng pe e song ke peng-peng mana kela het nga songinga het-ala ngana. Pe pule epal ke pomanga non nenge penna chapar rara ero. <sup>27</sup>E palia mautuk pe e hekerkereng ia singik ke e haliu hote helenga urana toto ngana lange hehei pe hana pe e eulo hot tote. Ke pomalam nga hoena lape e mene lek tunginga.

## 10

### *A Heto Heke Aetapuna Mur Ero*

<sup>1</sup>Titik mur pe liliuk mur, e teke letemo la mule nga ure nenge lohot nge rera tete mur nge nike nenge te nanasia Moses. Iri tei luluch nga ulu pe ulu nem nauele iri ke nek pe te tamo tele nga ruach remenmen ngana ke tela nga ele. <sup>2</sup>Iri tepoi ke pomalaka nga te mene henuninga nga ulu pe ruach pe te lohot ke Moses nena hana mur ia iri. <sup>3</sup>Pe iri lochloch te ngaua ngaunga nenge NeHalang nena angkelo tunge lange iri. <sup>4</sup>Pe iri lochloch te inia ech nenge NeHalang nena angkelo tunge lange iri nenge lele hot nga um. Pe um nem heilang ia Kristus nge tu luluch nge iri. <sup>5</sup>Pe ero. Halang nge iri, NeHalang iech

nga reria poinga mur ero. Ke pomalam hemete iri ke koluria masio parai mana nga ich sana lomona.

<sup>6</sup>Pe ure nenge lohot nge iri nem teke heneue ita nenge ta teke ta popoi poinga poreke ngana. <sup>7</sup>A heto heke aetapuna mur ero. Pe apoi ke pomange hana hel nge iri nemur ero. Iange NeHalang nena helenga nenge tehas sue ke ulolo, hele ke teke, "Hehei pe hana teare sio ke te ngau pe tein pe te lohaka ke tehes rara."

<sup>8</sup>Ke hehei pe hana nemur hel te poia poinga nenge te salau rara pe NeHalang hemete iri. Pe nga etue elle mana iri 23,000 te mete lochloch. Ke pomalam a nanasia poinga nenge iri te poia neu ero. <sup>9</sup>Pe a ollaka hote Non Soke nga lemo poinga poreke ngana ana tuangachol ero. Iange hel nge iri te poia poinga nem pe ilimo mur tehun lapue iri. <sup>10</sup>Pe letemo inin pe a ngungunu ia NeHalang ero iange hehei pe hana nemur, hel nge iri tepoi ke pomam pe angkelo nenge hunun, hun lapue iri.

<sup>11</sup>Ure nemur te lohot nge iri ke heneue ita. Pe masio nga NeHalang nena alalaha nenge tehas sue ke ulolo ke hetore ita lochloch ngana, iange ta tutu nga etue hetala ngana mur lo.

<sup>12</sup>Ke imo nenge letemo tuanin ke a teke ames ke kerkereng nga letemo manmanna ngana lo, a nauala amo ke nek ol, ma lape a losio pule. <sup>13</sup>Nenge teke ure meena ngana lohot nge imo a eteia ke ure nem lohot tala nge hehei pe hana lo. Pe NeHalang i non nenge hele ke manmanna pe nanas pengpeng ia nena helenga. Pomalam lape poia ure meena ngana nemur ke te heporeke tote imo ero. I lape henonoua iong nga kue nenge halaua iong ke omes ke kerkereng ke o takisia ure meena ngana nem.

### *Ahul Rumemo Ia Aetapuna Mur Pe A Nanasia NeHalang*

**9:25:** Pil 3:14; 2Ti 2:4-5; 4:7-8    **9:27:** Rom 8:13; 13:14    **10:1:** Exo 13:21-22; 14:22-29    **10:3:** Exo 16:35    **10:4:** Exo 17:6; Num 20:11    **10:5:** Num 14:29-30    **10:6:** Num 11:4, 34; 1Ko 10:11  
**10:7:** Exo 32:6    **10:8:** Num 25:1-9    **10:9:** Num 21:5-6    **10:10:** Num 16:41-49

<sup>14</sup> Ke pomalam titik pe liliuk mur, ahul rumemo ia aetapuna mur. <sup>15</sup> E hele lange imo iange letemo matana lo ke imo sipomo a amnei teu ke nek toto nga lek helenga.

<sup>16</sup> Nga etue nenge ta hele urana pe tain nga eulinga nga ngaunga nenge Non Soke, ta lohote ke ita elle mana nga Kristus eina. Pe nga etue nenge ta ngaua ngaunga nenge ta reke, ta lohote ke ita elle mana nga Kristus mirana. <sup>17</sup> Ita halang toto pe ngaunga elle mana. Pe ta lohote ke ita elle mana iange ta ngaua ngaunga elle nem mana.

<sup>18</sup> Letemo metene Israel mur. Iri te hetalaulau pe te ngaungaua ngaunga nenge te popoi tunginga ia lala nge NeHalang pule. <sup>19</sup> Iau mai e helele ia utar toto mai? Ngana kai ngaunga nenge te kalongia lala nge aetapuna mur mai? Eh, e helele ia kai aetapuna mur mai? <sup>20</sup> Ure nenge e helele ia ngana koi nei; Utar nenge hana nenge te eteia NeHalang ero te popoi tunginga ia nga reria hatanga, te poia lange NeHalang ero. Te poia la laka nge uneinei mur pe iau lemek ero nge atal teu luluche imo lange uneinei mur. <sup>21</sup> Nenge teke ain nga Non Soke ana eulinga lo, ain nga aetapuna mur aria eulinga ero ol. Pe nenge teke a ngau nga hatanga nenge Non Soke lo, a ngau nga hatanga nenge aetapuna mur ero ol. <sup>22</sup> Ita ta teke ta helete inin ia Non Soke laka nga poinga nenge pomam. Ia kikirato toto ke mange i kai?

### *Ta Heto Heke NeHalang Ene Ke Kokoos*

<sup>23</sup> “Ita nakura nge ta poia ure lochloch.” Nei manmanna pe e hele lange imo, ure lochloch ngana te urana ero. “Ita nakura nge ta poia ure lochloch.” Pe ure lochloch ngana te halaua ita ero. <sup>24</sup> Ke pomalam letemia mele hel ke o halaua iri pule. Letem tu mana nge iong toro ero.

<sup>25</sup> Huros nenge te ololia nga ingala matana o mene pe o ngau pulut mene. Pe letem una ia onteinga nemur nenge pomai ero; “Huros nei at langai pe tepoi utar ana ia?” <sup>26</sup> Iange NeHalang nena helenga nenge tehas sue ke ulolo, hele ke teke, “Ich pe ure lochloch ngana nenge tetu nga ich NeHalang nena ure mur ia iri.”

<sup>27</sup> Nenge teke mele hel nenge leteria manmanna ero, te iua iong kela o ngau luluch nge iri, o ngau pulut mene utar nenge te tunge lange iong. Pe ngaunga nem at ngana pe ana ume nge merei o ontei rara ia ero. <sup>28</sup> Pe nenge teke mele hele lange imo ke teke, “Ngaunga nem te kalongia lange aetapuna mur lo.” Nga etue nenge o longe ke pomau o ngaua ngaunga nem ero ol. Iange e teke letemia mele nenge hele lala nge iong nem, ke i pule eteia ke ngaua ngaunga nem ero. <sup>29</sup> Iau e heleia a amnei teu ngamo nga ure nenge urana pe poreke ero. E helele ia kou mele neu amnei teu ngana. Iau nakuk nge e ngau pulut mana pe mele pele poi ele iau nga lemek ngak ero. <sup>30</sup> Nenge teke e hele urana lange NeHalang nga ngaunga nenge e ngaua, pomerei nenge mele pele hele poreke iau nga ngaunga nenge e heto haka NeHalang ia?

<sup>31</sup> Ke imo pule a heto heke NeHalang nga ure lochloch ngana nenge a popoia. Ngaunga nenge a ngaua pe utar nenge a inia, a heto heke NeHalang ia. <sup>32</sup> Pe atu ke nek mana, ma lape a heporeke luta mur pe hana lomonmona mur pe hehei pe hana nga mata nenge NeHalang nga leteria manmanna ngana. <sup>33</sup> Apoi ke mange iau ke a halaua hehei pe hana. Iange iau letek ia iau sipok ero. Letek ke e teke e halaua hehei pe hana ke NeHalang mene mule iri.

**10:16:** Mat 26:26-28    **10:17:** Rom 12:5    **10:18:** Lev 7:6    **10:19:** 1Ko 8:4    **10:20:** Deu 32:17; Hem 9:20    **10:21:** 2Ko 6:15-16    **10:22:** Deu 32:21    **10:23:** 1Ko 6:12    **10:24:** Rom 15:1-2  
**10:26:** Psa 24:1    **10:28:** 1Ko 8:7    **10:30:** 1Ti 4:4    **10:31:** Kol 3:17    **10:32:** Rom 14:13  
**10:33:** 1Ko 9:20-22    **11:1:** 1Ko 4:16

## 11

<sup>1</sup> A nanasia lek poinga iange iau e nanasia Kristus nena poinga.

### *Poinga Nenge Ta Hetalaulau Pe Ta Popoia*

<sup>2</sup> Iau e iech toto nge imo iange letemo metene iau pe a nanasia ure lochloch nenge e hetoro sue lange imo. <sup>3</sup> Pe e teke a eteia ke hana lochloch aria soke laka Kristus pe hehei mur aria soke laka eria mur pe Kristus ana soke laka NeHalang. <sup>4</sup> Ke nenge teke none ruchite palpalna pe hetalaulau nem pe haliu hotote NeHalang nena helenga nenge tunge lala nge i, hemeia Kristus nga poinga nem. <sup>5</sup> Pe hehei nenge te ruchite palpalna pe hetalaulau, nem pe haliu hotote NeHalang nena helenga nenge tunge lala nge iri, te hemeia eria mur nga poinga nem. Poinga nem elle mana ke pomange hehei nemur nenge telak sio lochloche palpalria ina pe te meia iri. <sup>6</sup> Nenge teke heie ruchite palpalna ero, urana nge te here palpalna pe te laksue ke lasus. Pe nenge teke meia i nge te here palpalna pe te laksue iok, urana nge ruchite palpalna. <sup>7</sup> Pe non pele ruchite palpalna ero. Iange NeHalang umeia non nem ke nakuna pomange I pe ngana sipona tu teu nge non nem. Pe hana nakuria pe ngaria toto tu nge hehei. <sup>8</sup> Iange NeHalang ume hote none nga hehei singina ero. NeHalang ume hote heie nga none singina. <sup>9</sup> Pe ume hote none ke halaua heie ero. I ume hote heie ke halaua none. <sup>10</sup> Ke pomalam urana nge heie ruchite palpalna pe haliu hote NeHalang nena helenga, poinga nem urana nga NeHalang nena angkelo mur mataria.

<sup>11</sup> Oe, nem nge hehei mur. Pe nenge ita lochloch tatu ngara luluch nge Non Soke, none tu ke i toro ero pe heie tu ke i toro ero. <sup>12</sup> Iange nge nike, hei nenge tengene ana lohot nga none singina, pe nga hoena hehei te hohoe hana mur ol. Pe ure

nemur te lohot ke pomalam nga NeHalang lemene ngana. <sup>13</sup> Imo sipomo a amnei teu langa helenga nei: Nenge teke heie ruchite palpalna ero pe hetalaulau lange NeHalang, poinga nem urana ma ero? <sup>14</sup> Nga tanau ngara, none tuahe mule i nga palpalna ina nenge hou ke halang. <sup>15</sup> Pe nenge heie palpalna ina hou ke halang, urana iange nena olenga haka ia. <sup>16</sup> Amo pele tuinaunau rara ero iange imem pe NeHalang nena mata mur lochloch mo nanas mene kue nei ke pomalam mana.

### *Ngaunga Nenge Non Soke (Mat 26:26-29; Mak 14:22-25; Luk 22:14-20)*

<sup>17</sup> Nga lek helenga mur nenge e tung hotote nei, lape e heto haka imo ia ute pele ero toto. Iange e naue ke nga lemo poinga nenge a eukirau ke a hetalaulau, ute pele nge urana lape lohot ia ero. <sup>18</sup> E teke e hele ke pomai mukam. E longe nge te teke nga etue nenge a hekirau ke a hetalaulau, alas hulu helel pe a are ke mullimo elle ero, pe iau letok manmanna unne nga helenga nem. <sup>19</sup> Pe poinga nem lohot ke henonou hot pengpeng ia itei hel toto nenge te nanasia helenga manmanna toto ngana. <sup>20</sup> Nga etue nenge a eukirau ke a ngau, a teke ma a ngaungaua ngaunga nenge Non Soke, pe i ero la. <sup>21</sup> Iange nga etue nenge a ngaungau a kulala hel ero. Amo hel te hemukmuka ngaunga pe tein ke aria hauaua lo pe hel te metmete aria kura. <sup>22</sup> Pomerei? Lemo pele ero toto loma nge a ngau pe ain? Imo a teke a at ke a hesalang ulu mene mata nenge NeHalang pe a hemeia iri nenge reria ure ero, ae? Lape e heleia imo ke pomerei? A teke e heto heke imo nga lemo poinga nem? Ero toto.

<sup>23</sup> Hengetoro nenge e mene nge Non Soke, e hetore lange imo ke ulolo: Nga miliko nenge te tung heke Non Soke Iesus langa hana poreke ngana mur peria, mene ngaunga

<sup>24</sup> pe hele urana lange NeHalang. Ke het pe reke pe hele, “Mirak koi nei. A mene pe a ngaua. A poia poinga nei pe letemo metentene iau.” <sup>25</sup> Iok, te ngau ke het pe mene eulinga pe poia ke pomalam pule, pe hele, “Eik koi nei a mene pe ain ia. Eik nenge NeHalang poi nena tomunga hel heueu ngana ia. A poia poinga nei pe letemo metentene iau.” <sup>26</sup> Nenge nei luna mai koi, nga etue lochloch nenge a ngaua ngaunga nei pe ain nga eulinga nei, a hele hote Non Soke mete ngana kela het nga etue nenge at mule.

<sup>27</sup> Pe mele nenge poi esalanginga mana ke ngaua ngaunga pe in nga eulinga nenge Non Soke, mele nem poi poreke Non Soke mirana pe eina ke ulolo. <sup>28</sup> Ke pomalam imo elle pe elle anau teu la mule nga letemo ke nek mukam. Ke het ol laka a ngaua ngaunga pe ain nga eulinga nem. <sup>29</sup> Iange mele nenge ngau pulut mene Non Soke mirana pe in pulut mana nga eulinga nem pe eteia luna ero, poi haka ana nge NeHalang ke ulolo. <sup>30</sup> Ke ngana laka nenge imo halang singimo haleles pe a makuk leilei pe amo hel te metmete. <sup>31</sup> Pe nenge teke ita sipora ta amnei teu at mule nge ita ke nek tala mukam, nem lape NeHalang amnei teu nga rera poinga mur ero ol. <sup>32</sup> Pe nenge teke Non Soke amnei teu at nga rera poinga mur, urana iange i teke hetore ita ke ta erue luluch nge hehei pe hana nga ich nei ero.

<sup>33</sup> Ke pomalam titik mur pe liliuk mur, nenge teke a eukirau ke a ngau nga ngaunga nenge Non Soke, a kulkulala hel mukam. <sup>34</sup> Pe nenge teke mele mete ana toto, ngau tala nga nena pele mukam. Iange lape a poia poinga poreke ngana pe Non Soke amnei teu langa lemo poinga nem.

Ure hel tetu kura pe nga etue nenge eat ke e lohote nge imo, lape e hepeng hote lange imo ol.

## 12

### *Opepengpeng Nena Tunginga Mur*

<sup>1</sup> Iok, titik mur pe liliuk mur imo a ontei iau ia tunginga mur nenga Opepengpeng pe lape e hele teu langa nem pule. Iau e teke a eteia ure nem kenek toto. <sup>2</sup> Nge nike letemo manmanna nge Non Soke ero kura pe te mene imo kela a heto hekeke aetapuna mur nenge ngaria tuteu nge iri ero. <sup>3</sup> Ke pomalam e teke e hemalaha hote lange imo ke pomai; Mele nenge NeHalang Opene tuteu nge i hele poreke Iesus ero. Pe pule mele nenge Opepengpeng tuteu nge i, lape hele ke teke Iesus i Non Soke.

<sup>4</sup> Opepengpeng nena tunginga mur iri altototo, pe Ope elle mana nem tung hote tunginga nemur. <sup>5</sup> Pe kue halang nge ta poia ume lange Non Soke pe Non Soke elle mana. <sup>6</sup> Pe ume kuena ngana mur halang nenge ta popoia. Pe NeHalang elle mana pe i toro mana halaulaua ita nga rera ume lochloch ngana nemur.

<sup>7</sup> Pe Opepengpeng henonoua kue urana ngana nge ita elle pe elle ke ta halaua Non Soke nena hana mur lochloch. <sup>8</sup> Ke Opepengpeng nem halaua mele hel ke te etei tote NeHalang letena tuanin ngana mur. Pe halaua hel ke te urana toto nga leteria matana ngana nenge te hetottore hehei pe hana. <sup>9</sup> Pe hel, Ope elle nem tunge leteria manmanna ngana mur. Pe iri nenge te hemasmasia haleles kina mur, Ope elle nem mana tunge tunginga nem lange iri pule. <sup>10</sup> Pe Ope nem tunge kerkerenga lange mele hel ke te popoi merakulo. Pe mele hel te mene kerkerenga nenge te lohote ke iri hetatalonga nga Ope elle nem mana. Pe mele hel leteria matana nga nenge te longo urumume NeHalang Opene pe ope altoto ngana mur, Ope elle nem tunge tunginga nem lange iri pule. Pe Ope elle nem tunge tunginga nenge mele hel leteria matana nga nenge te heleia mele hel reria helenga. Pe Ope



elle nem tunge lete matana ngana lange mele hel ke te hele urumrume helenga nemur luria. <sup>11</sup> Ke Opepeng-peng elle nem nena ume mur koi nei. Pe tunge ume nemur lange mele elle pe elle nga lemene ngana.

*Kristus Pomalaka Nga Aetana Pe Perperna Mur Ita*

<sup>12</sup> Kristus singina elle mana ke pomanga ae tana nge elle mana pe perperna mur halang. Ke ita hehei pe hana ita ae perperna mur pe tara elle mana iange tatua hot nga Kristus singina. <sup>13</sup> Hel nge ita iri Iuta pe hel iri hana lomonmona ngana mur pe hel te umume nge hana hel pe hel te ume nge hana hel ero. Pe ita lochloch ta mene henuninga nga Opepengpeng elle mana nenge NeHalang tunge ke tu teu nge ita.

<sup>14</sup> Ke ita non singira ana lala elle mana ero, singira ana lala pe lala. <sup>15</sup> Nenge teke mele apena hele ke teke, "Iau perim iau ero, pomalam etu luluch nga singim ero." Pomerei mele neu apena tu luluch nga singina kura ma ero? <sup>16</sup> Pe nenge teke talngana hele ke teke, "Iau matam iau ero, pomalam etu luluch nga singim ero." Pomerei? Mele neu talngana tu luluch nga singina kura ma ero? <sup>17</sup> Nenge teke matara rongo heke singira lochloch, lape ta longo ke merei? Pe nenge teke talngara rongo heke singira lochloch, lape tasaka ure inangana ke merei? <sup>18</sup> Nga NeHalang lemene ngana tal teua utarra nemur elle pe elle at nga singira ke rorol. <sup>19</sup> Nenge teke singira lochloch te lohote ke apera itoro mana, lape singira ero pe aperia i toro mana tu. <sup>20</sup> Ke singira unne nemur iri lochloch tetal hote singira ke elle pe rorol.

<sup>21</sup> Poinga nei lohote nge mele ero kura nenge matana hele langa penna ke teke, "Lemek ero iong." Pe palpalna hele langa apena ke teke, "Lemek ero iong." <sup>22</sup> Pe nenge teke singira unne hel nemur nenge

makuk mana iri ero, lape singira tu ke nek ero. <sup>23</sup> Singira unne nemur nenge ta meimei ita ia ta heron hite ke nek toto. Pe singira unne nemur nenge nakuria urana ero pe tetu kome taheo ele pe ta nauuele ke nek toto. <sup>24</sup> Pe singira unne nemur nenge tetu mallaha ta nauuele ke nek ke pomau ero. Pe NeHalang ume hote singira pe tal luluche ana lala mur ke elle. Pe heto hote singira unne nemur nenge te talkomkome aria ume. <sup>25</sup> Ke pomalam singira unne es keke hot ke i toro ero, iri lochloch tetu ke elle ke te halau hel pe te ume ke elle. <sup>26</sup> Ke nenge teke singira unne amneia melmelenga, ta amneia melmelenga nem nga singira lochloch. Pe nenge teke te heto heke singira unne, ta amneia iechinga nga singira lochloch.

<sup>27</sup> Ke imo NeHalang nena hana mur, Kristus singina laka imo. Pe imo elle pe elle Kristus singina unne ia. <sup>28</sup> NeHalang tal hot tele hana hel nga mata nenge i ke iri hekulukulonga ke het pe hetatalonga mur ke het pe heteronga mur. Pe tal hote hel pule nenge te hele pe urelu lohote manmana, pe nenge te hemasmas pe nenge te halaulaua hehei pe hana pe nenge te nauuele ume kuena ngana mur pe nenge te eteia helenga kuena ngana mur. <sup>29</sup> NeHalang tal hote ita lochloch ke ita hekulukulonga ero pe ita lochloch ke ita hetatalonga ero pe ita lochloch ke ita heteronga ero pe ita lochloch ke ita hana nenge ta popoi merakulo ero. <sup>30</sup> Pe tal hote ita lochloch ke ita hana nenge te hemasmas ero pe ita lochloch ke ita hana nenge te eteia helenga kuena ngana mur ero pe ita lochloch ke ita hana nenge te hele urumrume helenga luria mur ero. <sup>31</sup> Imo mutemo tau totote tunginga papalauna mur.

Pe ana kue toto nenge lape e henonou imo ia ngana koi nei: Mutemo taua pekngamo mur.

## 13

### *Mutenga I Ure Nenge Palaungana Toto*

<sup>1</sup> Nenge teke e heleia helenga kuena ngana e pe angkelo mur reria helenga pe mutek taua hehei pe hana ero, lape halik palalas ulu mana ke pomalaka nga hario alngana. <sup>2</sup> Pe nenge teke e mene tunginga nenge lete matana ngana ana pe nenge e hetatatalo pe e eteia ure talkomkome ngana mur nge NeHalang, pe nenge teke e mene tunginga nenge lete manmanna ngana ana nenge heloloune hengene mur pe mutek taua hehei pe hana ero, lape epoi ke pomanga alolap nenge te saua nga sausaunga. <sup>3</sup> Nenge teke e tung lochloche lek ure mur lange iri nenge reria ure ero pe pule e tung teu mene singik ke te makia nga oan pe mutek taua hehei pe hana ero, lape e mene ute pele nge urana ero.

<sup>4</sup> Mele nenge mutena tautaua hehei pe hana, tu ke nek manmana pe poi ke urana mana pe memeleia mele hel reria ure ero pe palut laka rara ero pe heto heke i sipona ero. <sup>5</sup> Ngana tano manmana pe na polo tana ero pe letena inin ke ueiuei ero pe letena heke poinga poreke ngana nenge te poia lange i ero. <sup>6</sup> Pe pule mele nenge mutena taua hehei pe hana, iech ele tote helenga manmanna ngana pe poinga poreke ngana iech ele ero toto. <sup>7</sup> Pe takisia ure meena ngana mur lochloch pe rahite letena manmanna ngana pe mes ke kerkereng ke takisia melmelenga mur pe kulele NeHalang ke halaua i.

<sup>8</sup> Ke mutenga hetala ngana ero toto. Pe helenga hetatalonga nenge at nge NeHalang lape het pe helenga kuena ngana mur nenge hehei pe hana te helele ia lape tehet pule pe lete matana ngana nenge hehei pe hana te menmene lape tehet pule. <sup>9</sup> Iange ita letera matana ngana unne sune

mana pe pule ta mene lochloche helenga hetatalonga ero. <sup>10</sup> Pe nga etue nenge ure manmanna toto ngana at, unne sune nenge ta menmene iri nem lape tehet lochloch. <sup>11</sup> Ana helenga laka nenge; Nga iau kino ngak e hele ngak pe e amnei teu ngak nga ure mur pe letek tuanin ngak pomange aina kinkino ngana. Pe nga etue nenge iau palaungana ol e hile hote poinga nenge aina kinkino ngana ke lasus sapele. <sup>12</sup> Heueu nei tanau piriuriu mene NeHalang ke pomanga ute hel nge hussu asa mana nga silonga pe nga hoena lape ta naue i ke mallaha toto ol. Heueu nei ta etei par manmana pe nga hoena lape ta etei lochloche ol. Lape ta etei lochloche ke pomange I nge etei lochloche ita.

<sup>13</sup> Pe ure mol nenge tetu ke kokoes ngaria koi nei; lete manmanna ngana pe kukul alanga pe mutenga. Pe ure nenge palaungana toto nge iri mol, ngana laka mutenga.

## 14

### *Tunginga Mur Nenga Opepeng-peng Nenge Palaungana Toto*

<sup>1</sup> Iok, aume ke kerkereng toto ke a mene poinga nenge mutemo taua hehei pe hana. Urana nge a mene tunginga mur nenge at nga Opepeng-peng. Pe tunginga nenge palaungana toto ngana laka nenge hetatalonga. <sup>2</sup> Pe mele nenge mene tunginga nenge helele ia helenga kuena ngana mur, hele lala nge hehei pe hana ero, hele lala nge NeHalang. Iange helenga nenge helele ia iri nem i helenga talkomkome ngana mur nenge at nga Opepengpeng pe hulua te eteia luna ero. <sup>3</sup> Pe iri nenge te hetatalo hotote NeHalang nena helenga, te halaua hehei pe hana pe te hekerkereng ia leteria manmanna ngana pe te poia leteria ke ma ke nek. <sup>4</sup> Iri nenge te helele ia helenga kuena ngana mur te hekerkereng mulmule iri siporia. Pe iri nenge

te hetatalo hotote NeHalang nena helenga te hekerkereng ia hehei pe hana lochloch, nga mata nenge NeHalang nga leteria manmanna ngana mur. <sup>5</sup> Iau mutek ke e teke toinge amene tunginga nenge a helele ia helenga kuena ngana mur. Pe mutek toto ke e teke amene tunginga nenge a hetatalo hotote NeHalang nena helenga. Nem i ure palaungana iange lape halau tote hehei pe hana. Pe nenge teke a helele ia helenga kuena ngana mur, urana nge a hele hote helenga nemur luria. Ke pomalam lape halaua hehei pe hana lochloch nga mata nenge NeHalang.

<sup>6</sup> Titik mur pe liliuk mur, nenge teke eat nge imo pe e hele ia helenga kuena ngana hel pe e hele hote luna lange imo ero, lape e halaua imo ke merei? Nenge teke e hele lange imo nga helenga nenge NeHalang tunge at nge iau pe e tunge lete matana ngana lange imo, pe e poia helenga hetatalonga pe e hetore imo nga helenga nemur luria, lape e halaua imo ke nek. <sup>7</sup> Ure nemur nenge ngaria te tuteu nge iri ero ke pomanga iu pe hario, tepoi ke pomalam pule. Nenge teke elle alngana altoto pe e alngana altoto lape ta nanasia tei ke tatul heke peunga kanna? <sup>8</sup> Pe nenge teke ngalum paena alngana ke nek ero, lape hana te lohaka ke tela nga hunelinga ma ero? <sup>9</sup> Imo pule apoi ke pomalam. Nenge teke a heleia helenga e nge altoto lange mele, mele nem lape eteia helenga nem luna ke merei? Lem helenga nem lape hesil sio mana paiam.

<sup>10</sup> I manmanna ke helenga altoto ngana mur halang tetu nga ich nei. Pe helenga lochloch ngana nem luria pule la. <sup>11</sup> Pe nenge teke mele heleia helenga e pe e eteia luna ero, nakuna pomanga i nena nga kileng e pe iau lek nga kileng e. <sup>12</sup> Ke imo apoi ke pomalam mana iange a teke amene tote tunginga nemur nga Opepengpeng. Pe urana nge a mene tunginga nenge

halau tote mata nenge NeHalang.

### *Utar Nenge Ta Poia Pe Ta Heleia Helenga Altoto Ngana*

<sup>13</sup> Ke pomalam mele nenge teke hele nga helenga altoto ngana, urana nge hetalaulau pe onteia NeHalang nga tunginga, tunginga nenge halaua i ke hemallaha hote helenga nem luna. <sup>14</sup> Iange nenge teke e hetalaulau nga helenga nenge altoto, opek hetalaulau pe letek tuanin ngana tu nga hetalaulaunga nem ero. <sup>15</sup> Ke lape epoi ke pomerei? Iau e teke e hetalaulau nga opek pe e hetalaulau nga letek tuanin ngana pule. Pe e teke e peupeu nga opek pe e peupeu nga letek tuanin ngana pule. <sup>16</sup> Ke nenge teke mele hel tetu luluch nge iong pe te esia iong nge o heto hekeke NeHalang nga opem mana, iri lape te hele ke merei? Lape te hele ke, "Oe Manmanna."? Pa nem ero iange te eteia utar nenge o helele ia ero. <sup>17</sup> I manmanna ke lem hetalaulaunga nenge opoia lange NeHalang urana, pe hetalaulaunga nem hekerkereng ia mele hel nenge tetu luluch nge iong leteria ero.

<sup>18</sup> Poinga nenge ta helele ia helenga altoto ngana i urana. Iau e popoia ke halang lo pe e hele urana toto lange NeHalang nga nem. <sup>19</sup> Pe nga etue nenge hehei pe hana nga mata nenge NeHalang te heukirau, e teke e hele nga helenga nenge te eteia ke e hetore iri. E hele ngak ia nem urana toto nga nenge ehele nga helenga altoto ngana nemur.

<sup>20</sup> Titik mur pe liliuk mur, letemo tuanin ngana poi ke mange aina kinkino ngana ero. Letemo tuanin ngana poi ke mange hehei pe hana nenge te mera lo. Pe urana nge apoi ke manga mamau mur nenge te popoia poinga poreke ngana mur ero. <sup>21</sup> NeHalang nena helenga nenge tehas sue ke ulolo hele ke teke, "Lape e poia hana lomomona ngana mur nenge reria helenga altoto ke te hele lange hana nemur,

pe hana nemur lape te longo taua iau ero toto.”

<sup>22</sup> Ke helenga altoto ngana nemur tepoi ke manga lala nenge heilangia NeHalang nena kerkerenga palaungana lange iri nenge leteria manmanna ero. Pe helenga hetatalonga halaua iri nenge leteria manmanna. <sup>23</sup> Ke nenge teke hehei pe hana nga mata nenge NeHalang te heukirau pe te helele nga helenga altoto ngana mur, pe iri nenge te eteia ero pe iri nenge leteria mamanna ero tei teu pe lape te hele ke teke, “Imo nge lape amo hauhaua iam!” <sup>24</sup> Pe nenge teke a hetatalo hotote NeHalang nena helenga nemur, nenge tunge lala nge imo pe iri nenge leteria manmanna ero tei teu, lape lemo helenga nemur tua tote leteria nga reria poinga poreke ngana mur. <sup>25</sup> Pe leteria tuanin ngana mur nenge tetal komkome lape te hele hote nga malaha. Pe lape te tualou sio pe te heto heke NeHalang pe te hele ke te teke, “Manmanna toto ke NeHalang tu luchluch nge imo!”

### *Ume Nemur Nenge Ta Hetalaulau Pe Tapoia*

<sup>26</sup> Titik mur pe liliuk mur, ure nenge e teke e helele ia ngana koi nei: Nga etue nenge a eukirau ke a hetalaulau, mele mene peunga pe mele hetottoro pe mele hele hotote NeHalang nena helenga nenge tunge lala nge i, pe mele helele ia helenga altoto ngana pe mele hele hotote luna mur. A poia ure lochloch ngana nei ke a hekerkereng ia mata nenge NeHalang. <sup>27</sup> Nga nenge a hele nga helenga nenge altoto amo mol mana te hele. Elle hele ke het pe nai ngana ke het pe mol ngana pe het sapele. Pe mele e pule nge hele urume helenga nemur luria. <sup>28</sup> Pe nenge teke mele e nge hele urumume helenga mur luria ero, iok, mele nenge teke helele nem reng mana pe hele mana lala nge NeHalang nga letena ol.

<sup>29</sup> Pe hetatalonga iri nai ma mol mana te hele pe imo lochloch a longo teu langa reria helenga tang ngana ke nek. <sup>30</sup> Pe nenge teke NeHalang nena helenga lohote nge mele nenge kilkila nga lamam, i nenge helele nem reng mukam. <sup>31</sup> A nanasia poinga nei ke imo elle pe elle a hele hote NeHalang nena helenga. Pomalam lape hehei pe hana te eteia pe hekerkereng ia iri. <sup>32</sup> Hetatalonga mur te haliu hotote NeHalang nena helenga pe te hele ke het nga iri siporia lemeria ngana mana. <sup>33</sup> Iange NeHalang i non nenge hepiriu elele ure mur ero. Pomalam lemene ke teke tatu ke nek pe letera pulu ala nga ute e ero.

Nga etue nenge hehei pe hana nga mata nenge NeHalang te eukirau ke teole haria, <sup>34</sup> hehei iri muka ia helenga e ero. Iri teare ke tereng mana ke pomanga Iuta mur reria hotonga hele ngana. <sup>35</sup> Pe nenge te teke te etei teu langa ute, tela mule nga reria pele ol laka te ontei hotote eria mur ol. Ke heo ngana toto nge heie hele nga etue nenge iri mata nenge NeHalang te hekirau iange lape hemei mule i.

<sup>36</sup> Lape NeHalang nena helenga huna nge imo pe imo nge a tung hote iam ae? Pe lape helenga nem la nge mele hel ero pe lohote mana nge imo, manmanna kai? <sup>37</sup> Mele nenge teke i hetatalonga pe mene lete matana ngana nga Opepengpeng, urana nge heleia pule ke teke ure nemur nenge ehas ia lala nge imo nei, Non Soke nena hotonga mur ia iri. <sup>38</sup> Pe nenge teke lemene ero ia, iok a longo taua i ero.

<sup>39</sup> Ke pomalam titik mur pe liliuk mur, a hetatalo hote NeHalang nena helenga nenge tunge lala nge imo ke kerkereng. Pe aheo ele imo nge a hele nga helenga altoto ngana mur ero. <sup>40</sup> A poia ure lochloch ngana ke urana pe a nanasia ke pengpeng.

## 15

### *Kristus Maul Haka Mule Ngana*



<sup>1</sup> Iok titik mur pe liliuk mur, e teke letemo metene helenga urana toto ngana nenge e haliu hote lange imo ke a mene pe letemo manmanna ngana mes ke kerkereng ia ke ulolo. <sup>2</sup> Ke nenge teke a rahite helenga urana toto ngana nenge e haliu hote lange imo ke kerkereng, lape NeHalang mene mule imo. Pe nenge teke letemo manmanna ia ero lape helenga urana toto ngana nem halaua imo ero toto.

<sup>3-4</sup> Helenga nenge e mene i helenga nenge palaungana toto pe e heleia lange imo lo. Ana helenga koi nei:

“Kristus mete ke saua rera poinga poreke ngana mur ke te lasus toto.

Tealo hite I pe ma ke etuene mol nga polo

pe nga etue mol ngana maul haka mule.

Pe nem pete tote NeHalang nena helenga nenge te hassue ke ulolo.”

<sup>5</sup> Pe hetei hote i lange Petrus, ke het pe hetei hote i lange hekulkulonga analoch pe nai nem. <sup>6</sup> Ke het hetei hote i lange nena hana mur lochloch nenge leteria manmanna nge i ke te esia i ke hele nga etue elle mana. Hana nemur aria sisalanga ele haka toto nga nenge iri ana non kina lime iri lime (500). Hana nemur hel te mete lo pe halang tetu ke te maulul kura. <sup>7</sup> Pe hetei hote i lange Ieims pule ke het pe nge hekulkulonga ana hana mur lochloch. <sup>8</sup> Pe nga hoena toto ol hetei hote i at nge iau, pe iau epoi ke pomalaka nga mele nenge te hoho lele.

<sup>9</sup> E hele ke pomai iange iau e ele sio mana nge hekulkulonga mur. Pe urana nge a hetue iau ke hekulkulonga ero iange e heporeke tote hehei pe hana nga mata nenge NeHalang.

<sup>10</sup> Pe NeHalang letena ia iau ke pomalam e lohot ke iau non nenge pomai. Pe eume ke kerkereng toto nge hekulkulonga mur, ke pomalam

letena poreke ngana nem hesil sio mana nge iau ero. Pe iau toro e poia ume nei ero iange NeHalang letena poreke ngana halaulaua iau nga ume nei. <sup>11</sup> Pe nenge teke e haliu hote helenga pe letemo manmanna pe hekulkulonga nemur pule te haliu hote helenga pe letemo manmanna, ute pele nga nem ero.

### *Tamaul Haka Ngara Nga Metenga*

<sup>12</sup> Imem mo haliu ke mo teke NeHalang hemaui heke mule Kristus nga metenga pe pomerei amo hel te teke iri nenge te mete lape te maul haka mule ero? <sup>13</sup> Iok, nenge teke pomam, pomerei nge Kristus? Lape maul haka nga metenga ero pule?

<sup>14</sup> Ke nenge teke Kristus maul haka mule ero, lemehengetoro mur lape hesil sio mana pe letemo manmanna ngana nem lape luna ero. <sup>15</sup> Pe pule nakuna nenge imem mo palaklaka mana ia helenga nenge mo teke NeHalang hemaui heke Kristus.

Iange nenge teke manmanna ke iri nenge te mete te maul haka mule nga metenga ero, iok NeHalang hemaui heke mule Kristus ero. <sup>16</sup> Ke nenge teke iri nenge te mete te maul haka mule nga metenga ero Kristus lape maul haka ero pule. <sup>17</sup> Pe nenge teke NeHalang hemaui heke mule Kristus ero, letemo manmanna ngana mur luria ero pe lemo poinga poreke ngana mur tetu kura. <sup>18</sup> Pe pule iri nenge leteria manmanna nge Kristus pe te mete, te erue mana ke te lasus.

<sup>19</sup> Pe nenge teke letera manmanna nge Kristus nga tatu ngara nei mana, pe e ero ol lape ta mene poreke tote nge hehei pe hana lochloch nga ich.

<sup>20</sup> Pe i manmanna toto ke NeHalang hemaui heke Kristus nga metenga ke helue kue nge iri nenge te mete nge lape te maul haka pule.

<sup>21</sup> Ke none helue kue nenga metenga ke lohot nge hehei pe hana

*Iesus I Mukaia Maulinga*

<sup>21</sup> Ke none helue kue nenga metenga ke lohot nge hehei pe hana

**15:3-4:** Isa 53:5-12; Mat 12:40; Ume 2:24-32

**15:5:** Mat 28:16-17; Luk 24:34

**15:7:** Ume 1:3-4

**15:8:** Ume 9:3-6

**15:9:** Epe 3:8; 1Ti 1:15

**15:10:** 2Ko 11:23

**15:21:** Rom 5:12

ke pomalam none pule helue kue nenga ta maul haka mule ngara ke lohot nge hehei pe hana. <sup>22</sup> Metenga at nge ita lochloch nge Antam. Ke pomalam ta maul haka mule ngara at nge Kristus. <sup>23</sup> Pe mele elle pe elle kulele ana etue nenge lape maul haka muleia. Kristus helue kue lo pe nga at mule ngana, iri nenge te nanasia i lape te maul haka pule. <sup>24</sup> Ol pe etue nei hetala ngana lape lohot ol: Nenge Kristus lape hekou sue hotonga papalau ngana mur pe hana nenge reria kerkerenga halang pe ope nga tapa sana reria kerkerenga mur. Hekou sue iri ke het pe tung heke naungaala ana ume langa NeHalang penna. <sup>25</sup> Iange Kristus i naungaala ana non nenge nauele kileng. Pe nauele kileng ke la het nga etue nenge hekou sue nena ngarang mur lochloch pe tal sue iri nga apena ene. <sup>26</sup> Pe Kristus nena ngarang nenge lape hekou sue nga hoena, ngana laka metenga. <sup>27</sup> NeHalang nena helenga nenge tehas sue ke ulolo hele ke pomai, "Tal sue ure lochloch ngana nga apena ene." Nei mallaha ke NeHalang tuteu luluch nga ure nemur nenge tal sue iri nga Kristus apena ene nem ero. <sup>28</sup> Iange Kristus lape nauele ure lochloch ngana nenge NeHalang tal sue nga apena ene. Ke het pe Tuna Kristus lape tal sio mule i nge NeHalang nenge tal susue ure nemur nga apena ene nem. Ke NeHalang lape nauele ure lochloch ol.

<sup>29</sup> Iok, a longo at nga nei: Iri nenge te mete lo hana hel te mene muria ke te henune iri. Pomalam iri nenge te mete nem lape te mene maulinga. Pe nenge teke manmanna ke iri nenge te mete te maul haka mule nga metenga ero, pomerei nenge hana nemur te poia poinga nei? <sup>30</sup> Anau at nge imem pule. Imem mo matau metenga ero pe mo rahite ume nei ke kerkereng. Pe nenge teke helenga nem manmanna pomerei nenge mopoi ke

mai? <sup>31</sup> Titik mur pe liliuk mur, e hele ke manmanna toto lange imo. Nga etue lochloch e kulala mana metenga. Pe e iech toto iange imo a nanansia ara Non Soke Iesus Kristus pomalam e poia helenga nei. <sup>32</sup> Iau pe hana nenge tepoi ke manga ur hinolo mur nge Epesus, mo hunel ia helenga nem pe lape halaua iau nga letek manmanna ngana ke merei, nenge teke iri nenge te mete lape te maul haka mule ero? Lape tapoi mana ke pomanga helenga nenge hele ke teke, "Ta ngau pe tain nike iange nge rou ta mete."

<sup>33</sup> A nauala amo kenek iange lape mele hel te channanga ia imo. Pe atu luluch nge hana porekreke ngana mur ero iange hana nenge pomam te he porekreke rera poinga urana ngana mur. <sup>34</sup> Letemo matana ke nek mule pe a hile lemo poinga poreke ngana mur. Pe amo hel nge imo te eteia NeHalang ero toto, ameia imo nga nei ero kai?

### *Singi Nenge Lohaka Mule Nga Metenga*

<sup>35</sup> Iok, nenge teke amo hel nge imo te ontei ke te teke, "Iri nenge te mete lape te maul haka ke pomerei? Pe lape singiria lohot ke pomerei?" <sup>36</sup> Opoi ke manga hauaua ero! Nenge teke otua sue ngaunga tutuna nenge maulul nga ich i lape mete. Pe nenge teke otua sue nenge mete ilape matana hot pe haka. <sup>37</sup> Pe ure nenge otue nem i ngaunga tutuna mana nenge pomanga kon pe raes ngananganana pe otue tana rorol ngana ero. Pe nga hoena te haka pe te lohot ke pomanga kon pe raes ol. <sup>38</sup> Pe NeHalang tunge ngaunga tutuna nemur singiria ke pomanga tal ngana ia. Pe ngaunga tutuna nemur nenge altoto NeHalang talue ke iri elle pe elle singiria altoto. <sup>39</sup> Ke ure nemur nenge singiria, iri lochloch ke nakuria elle ero. Ita non singira altoto pe huros

mur singiria altoto pe ngie mur singiria altoto pe ruo mur singiria altoto. <sup>40</sup> Ure hel tetu nga tapa pe hel tetu nga ich. Nemur nga tapa singiria ana hemalmalinga elle mana pe altoto nge iri nemur nga ich. Pe nemur nga ich singiria ana hemalmalinga elle mana pe altoto nge iri nemur nga tapa. <sup>41</sup> Chaia matana ana hemalmalinga altoto nga teio ana hemalmalinga. Pe itoch mur aria hemalmalinga altoto pe itoch elle pe elle aria hemalmalinga altoto nge pekngaria mur.

<sup>42</sup> Ke iri nenge te mete pe te maul haka mule lape tepoi ke pomalam pule. Mele mete pe tealo hite iange singina tu ke koko ero pe singina nenge maul haka mule ia lape tu ke koko. <sup>43</sup> Pe tealo hite singina iange punich ulu pe nakuna poreke pe singina nenge maul haka mule ia nakuna urana pe kerkereng. <sup>44</sup> Ke singina nenge tealo hite nem i ich ana mana pe singina nenge maul haka mule ia i tapa ana ure ia iange i ope mana.

<sup>45</sup> Ke pomalam NeHalang nena helenga nenge te hassue ke ulolo hele ke teke, "Antam nenge lohohot tala tungana pomange ita nga ich nei." Pe Antam nenge lohohot rume, at nga Opepengpeng pe i Ope nenge tunge maulinga. <sup>46</sup> (Ke anaue lo?) Singi nenge Ope ana lohohot tala ero. Singi nenge ich nei ana lohohot tala ke het pe singi nenge Ope ana. <sup>47</sup> Antam nenge lohohot tala, tepip hote i nga melele nenga ich nei pe Antam nenge lohohot rume at nga tapa. <sup>48</sup> Ke pomalam iri nenge reria nga ich tepoi ke mange i nenge at nga ich, pe iri nenge reria nga tapa tepoi ke mange i nenge at nga tapa. <sup>49</sup> Pe ita tatu ke pomange non nenge at nga ich nei ke pomalam mana lape nga hoena tatu ke pomange non nenge at nga tapa.

<sup>50</sup> Titik mur pe liliuk mur, e teke e hele ke mai koi; Singira pe eira lape te teu langa NeHalang nena

naualanga pe nekinga ero, iange singi nenge ich nei ana tu ke koko ero. <sup>51-52</sup> A longo kenek nga helenga talkomkome ngana nei: Ita lochloch ngana lape ta mete ero iange nga etue nenge ngalum paena alngana, lape tahul ke ueiuei toto ke pomanga matara palun ngana. Pe iri nenge te mete lape te maul haka pe te mete mule ero ol pe ita lochloch ke tahul ke elle. <sup>53</sup> Iange singira nenge tu ke koko ero nei lape lohohot ke i singi nenge tu ke koko. Pe singira nenge metmete nei lape lohohot ke i singi nenge mete mule ero ol. <sup>54</sup> Ke nga etue nenge ure nem lohohot ke pomam ke singira nenge tu ke koko ero nei, lohohot ke i singi nenge tu ke koko, lape NeHalang nena helenga nenge te hassue ke ulolo hot ke manmanna sapele nenge hele ke teke, "NeHalang hekou sue metenga ke het toto."

<sup>55</sup> "Metenga! Kikim ngam tu langai? Pe lem kerkerenga nenge melmelenga ana ngai?"

<sup>56</sup> Metenga mene nena kerkerenga nenge melmelenga nga poinga poreke ngana pe poinga poreke ngana nena kerkerenga lohohot nga hotonga. <sup>57</sup> Pe ta hele urana toto lange NeHalang nga ara Non Soke Iesus Kristus kikina ngana. Nge Kristus mana NeHalang hekerkereng ia ita ke ta hekousue poinga nenga metenga.

<sup>58</sup> Ke pomalam titik mur pe liliuk mur, ames ke kerkereng ke ute pele heloiloi ia imo ero. Kokoes a tung teu tote imo langa Non Soke ana ume, iange a etia ke lemo ume nenge Non Soke nem lape hesil sio mana ero.

## 16

### *Tunginga Nenge Halaua NeHalang Nena Hana Mur*

<sup>1</sup> Iok, e teke e hele teu langa um tutuna nenge lape a takiraua pe apoi tunginga ia ke a halaua NeHalang nena hana mur. Urana nge a nanasia

ke pomanga e hele ngakia lange iri mata nenge Kalasia. <sup>2</sup> Nenge e hele ke e teke; Nga Sante kokoes imo elle pe elle a mene lemo umtutuna unne hel nenge a hottau ususia pe atal lele hote unne ke ma ke tatalo alala nike. Pomalam nga etue nenge eat lape a song ke a tango rara mule lemo umtutuna nenge halaunga ana ero ol. <sup>3</sup> Pe a henonou hote hana hel ke te mene lemo halaunga ana umtutuna nem lange Ierusalem. Pomalam nga etue nenge eat lape ehas ia alalaha nenge hele urume iri pe e kulosia iri ke tela. <sup>4</sup> Pe nenge teke urana nge iau ela pule, iok iri lape tei luluch nge iau.

#### *Paulus Nena Henininga Mur*

<sup>5</sup> Pe e teke ei tele tuele kina nenge Mesatonia mukam ke het ol laka, ela e lohote ke enau toto imo ol. <sup>6</sup> Pe lape etu ke mala pol luluch nge imo mukam. Lape nga lukunna ana etue. Ke het pe imo lape a halaua iau ke ela nga kileng e pule nenge e teke ela ia. <sup>7</sup> Lemek ero nge ela ke ueiuei pe etu luluch nge imo ke etue choro mana. E teke etu luluch nge imo ke mala pol, pe nem lohote mana nga Non Soke lemene ngana. <sup>8</sup> Pe e teke etu nge Epesus ke etue nenga Pentikos het mukam. <sup>9</sup> Iange kue chach lo nenge lape e poia ume palaungana pe esei heke hana nenge te teke tepoi elele iau nga ume nei ero.

<sup>10</sup> Pe nenge teke Timoti sauhot nge imo along teua i ke tululuch nge imo pe a poia i ke nek, iange i umume ia Non Soke ana ume ke mange iau. <sup>11</sup> Pe amoe nau sio mene i ke pomanga non pulut ngana pele ero. A nekia i ke letena masio ke nek pe a halaua i nga nena inga ke at mule nge iau; iange iau pe NeHalang nena hana mur mo kulelele i.

<sup>12</sup> Pe tira Apolos, kokoes e hele ke kerkereng toto lala nge i ke la luluch nge titira mur hel pule ke la tenau toto imo. Pe i lemene ero nge lohaka heueu nei, pe nga hoena nenge teke

kileng urana lape lohaka pe lange imo ol.

#### *Helenga Hel Pule*

<sup>13</sup> Atu pe a nauala manmana pe ames ke kerkereng nga letemo manmanna ngana pe ames ia amo seilil pe a mes ke kerkereng. <sup>14</sup> Pe poinga nenge mutemo taua NeHalang pe hehei pe hana, a henonou hote nga lemo ume mur lochloch nenge a popoia.

<sup>15</sup> Titik mur pe liliuk mur, a eteia ke iri lochloch ngana nenga mata nenge Stepanus, iri tala nga tuele kina nenge Akaia nge te hulua leteria pe te ume ke te halaulaua NeHalang nena hana mur. Pe e teke e hele ke kerkereng toto lange imo ke <sup>16</sup> a nanasia hana nenge pomai reria poinga pe iri lochloch ngana nenge te halaua iri ke te poia ume nei. <sup>17</sup> Iau e iech nge Stepanus pe Potunatus pe Akaikus nge te mene mullimo pe teate ke te halaua iau nga lek ume. <sup>18</sup> Iau letek urana toto nge iri ke pomange imo nge letemo urana nge iri pule. Ke urana nge a heto heke hana nenge pomai.

#### *Helenga Hetala Ngana Mur*

<sup>19</sup> Iri mata nenga tuele kina nge Eisia te teke reria iechinga palaungana lange imo. Pe Akuila pe Prisila pe iri mata nenge te eukiraurau nga reria pele, te teke reria iechinga palaungana lange imo nga Non Soke ene. <sup>20</sup> Pe NeHalang nena hana mur lochloch nga lamai, te teke reria iechinga lange imo pule. Pe a sisa perimo nge imo elle pe elle nga poinga nenge ita NeHalang nena hana mur ta popoia.

<sup>21</sup> Iau sipok e hassia helenga nei nga perik: Lek iechinga palaungana lange imo. Iau Paulus.

<sup>22</sup> Mele nenge mutena taua Non Soke ero lape mene maulinga ero toto. *Maranata* - Ara Non Soke at.



<sup>23</sup> E hetalaulau ke Non Soke Iesus letena poreke ia imo.

<sup>24</sup> Pe mutek taua imo lochloch iange Iesus Kristus kale tele ita ke ita elle mana. (Ngana laka lom!)

## 2 Korin Alalaha Nai Ngana Nenge Paulus Hasia Lange Korin Mur

<sup>1</sup> Iau Paulus. Pe nga NeHalang lemene ngana iua iau ke e lohot ke iau Iesus Kristus nena hekukulonga. Pe imem nai tira Timoti nenge letena manmanna ngana elle mana ke mange ita, mo hekule alalaha nei ke lange NeHalang nena mata nge Korin pe nena hana mur nenge tetu nga kileng lochloch ngana nga tuele kina nenge Akaia.

<sup>2</sup> Mo hetalaulau ke Temere NeHalang pe Non Soke Iesus Kristus leteria porekeia imo pe te poia letemo ke ma ke nek.

### *Paulus Hele Urana Lange NeHalang*

<sup>3</sup> Ta heto heke NeHalang nenge ara Non Soke Iesus Kristus Temene. Pe i Temere ia nenge letena poreke ia ita pe i NeHalang nenge hemasma ia hehei pe hana nga melmelenga mur.

<sup>4</sup> I hemasia imem nga emem melmelenga mur ke pomalam mo hemasia mele hel pule nga aria melmelenga mur nga hemasinga nenge imem sipomem mo mene nge i. <sup>5</sup> Imem momes luluch nge Kristus ke mo takisia ure meena ngana pe melmelenga mur. Ke pomalam NeHalang halaua Kristus pe lape hemaluche letemem pule. <sup>6</sup> Pe imem mo takisia melmelenga nei ke halaua imo ke a mene maulinga ke koko. Pe nenge teke NeHalang hemaluche letemem nga nei, imo pule lape NeHalang hemaluche letemo pe ames ke kerkereng ke a takisia melmelenga ke mange imem. <sup>7</sup> Ke imem samem kikina nge imo iange mo eteia nge lape ames ke kerkereng ke a takisia melmelenga pe lape NeHalang hemaluche letemo pule ke mange imem.

<sup>8</sup> Ke titik mur pe liliuk mur, imem mo teke mo helete metene imo ke a eteia ure meena ngana nenge lohotot nge imem nga kileng nenge Eisia. Imem moura ero totoia melmelenga nenge lohot nge imem nei. Melmelenga nem meena kou sio tote imem ke kikimem ero nge mo takisia, pe mo naue emem metenga ke rochroi toto. <sup>9</sup> Pe mo amnei ker tote nga letemem ke mo teke emem etue nenge mo mete ia koloi. Pe ero, ure nenge lohot nei, teke henonoua imem nge NeHalang nge i non nge hemaui heke mule hehei pe hana nga metenga pe samem kikina ngana tu mana nge i nge lape halaua imem. Iange imem sipomem nakumem ero toto nge mo halau mule imem ke motu ke mo maulul. <sup>10-11</sup> Kokoes mo teke mo metmete nga ure meena ngana nemur pe NeHalang halaulaua imem. Pe letemem manmanna ke pomai; Nenge teke a hetalaulau emem ke kokoes, lape NeHalang longe lemo hetalaulaunga pe halau mulmule imem. Pe hulua lape te hele urana pe te heto heke tote i nga ure urana ngana nemur nenge tunge atat nge imem.

### *Paulus Nena Inga Nenge Lange Korin Mur Lohot Ero Mule*

<sup>12</sup> Imem mo palut laka totoia ure lochloch ngana nenge mo popoia nga ich nei. Nem mene teu luluche lememe ume nenge mo poia lala nge imo. Nga letemem mo eteia ke mo poia nga poinga nge urana pe nga poinga nge pengpeng nenge NeHalang tunge at nge imem. Pe mo nanasia mele nga ich letena matana ngana ero, NeHalang letena poreke ngana mana halaua imem ke mo poia poinga nenge pomam. <sup>13-14</sup> Nga alalaha nenge ehas ia lala nge imo ehas ia helenga nemur nenge a sisia pe a eteia luna ke nek. Imo a etei polia imem lo pe nga hoena lape a etei ke nek toto ol. Ke pomalam nga etue nenge ara Non Soke Iesus at, lape mo

palut ke motal hekeke imo pe imo a palut ke atal hekeke imem.

<sup>15</sup> Iau letek here tote imo nga nei, ke pomalam nga tele ngana, e henin tele lek inga ke e teke ela ke e lohohot tala nge imo. Nga poinga nei lape a iech nge e lohohot ke henai nge imo. <sup>16</sup> Iange e teke e lohohot tala nge imo ke het pe ela nge Mesatonia, ke het pe ela ke e lohohot mule nge imo ke a halaua iau nga lek inga nenge lange Iutea. <sup>17</sup> Iau letek tuanin ngana song hot ke pomam pe ero, eat ke enau toto mule imo ero. Ke nga nem a teke iau non nenge ehul hali helenga ae? Poinga nenge e hele ke “Oe” pe e hele mule ke “Ero,” nem lape e nanas mene lemek ngak pe iau non nenge pomam ero.

<sup>18</sup> NeHalang nena helenga tu ke manmanna ke pomalam iau pule e hele ke manmanna. Iau non nenge e hele ke teke, “Oe” pe “Ero” mule ero. <sup>19</sup> Iange NeHalang Tuna Iesus Kristus nenge Iau pe Sailas pe Timoti mo haliu hote lala nge imo, I non nenge hele ke “Oe” pe “Ero” mule ero. I hele ke “Oe” mana pe nanas mene NeHalang lemene ngana mur lochloch. <sup>20</sup> Pe ngata ke “Oe” ke poia NeHalang nena tomunga hel ana helenga mur ke te lohohot ke manmanna. Ke ngana laka nenge ta hele ke “Oe Manmanna” nge Kristus pe ta heto heke NeHalang iange Kristus hele ke “Oe” pe nanasia nena helenga. <sup>21</sup> Pe NeHalang i sipona laka nenge poia imo pe imem ke tames ke kerkereng ke hele luluch nge Kristus. Pe i sipona poia ita ke ta mene tuangaola nge heongana nge i. <sup>22</sup> Pe pule hesio teua nena Opepengpeng at nga letera ke heilangia nena hana mur imem pe helue kue nenga ure manmanna toto ngana nenge teke tunge at nge ita kura.

<sup>23</sup> NeHalang eteia letek ke iau e pallaklaka ero. I poi ele iau ke ela nge imo nge Korin ero, iange lape e hele inin taua imo pe e heporeke tote atu ngamo. <sup>24</sup> Pe mo poia imo

ke pomanga non nenge nauale nena hana mur nga ume ero. Ke pomalam mo echia imo nga letemo manmanna ngana mur ero. Imo ames ke kerkereng nga letemo manmanna mur lo pe mo teke mo ume luluch mana nge imo ke mo poia imo ke a iech.

## 2

<sup>1</sup> Ke pomalam letek tuanin hote lo ke e teke lemek ero nge ela ke enau toto imo pe e poia ure meena ngana e ke lohohot nge imo. <sup>2</sup> Iange nenge teke e poia ure meena ngana ke lohohot nge imo, itei lape poia iau ke e iech ol? Pe ngana ma imo nenge e poia ure meena ngana ke lohohot nge imo nem mam lom. <sup>3</sup> Lek alalaha nenge ehas tele lange imo huna koi nei. Imo mana a poia iau ke e iech pe lemek ero nge ela nge imo pe a poia iau ke letek meena mule. Iau letek manmanna ke nga etue nenge e iech, e eteia ke iechinga nem lohohot nge imo pule. <sup>4</sup> Nga etue nenge e hasasia alalaha nem letek meena pe letek una pe matak eina sio ke halang, pe letemo meena ia nem ero. E teke a eteia ke iau mutek tau tote imo.

### *Letemo Porekeia Mele Nenge Poia Poinga Poreke Ngana*

<sup>5</sup> Nenge teke mele poia mele ke letena meena, mele nem poia poinga nem at nge iau ero. I poia lange imo lochloch. Pe lemek ero nge a tuachol sakililia i. <sup>6</sup> Imo lochloch a ngata hel lo ke a teke a heleia i nga nena poinga nem, ke nem purpur lo. <sup>7</sup> Pe heueu nei ol, e teke a poia i ke pomai koi: Letemo poreke ia i pe a poia i ke nek iange lape letena meena sakilil. <sup>8</sup> Pe e hele ke kerkereng lange imo ke e teke a poia mele nem ke eteia ke imo mutemo taua i. <sup>9</sup> Pe alalaha nenge ehas ia lange imo nem, huna laka nenge e teke enau urume ames ngamo, ames ke kerkereng nga ure lochloch ngana nenge e hetoro sue lange imo ma ero. <sup>10</sup> Nenge teke o saua mele nena poinga poreke ngana

ke lasus toto pe letem metene ero ol, iau lape e poia lange i ke pomalam pule. Nenge teke poinga poreke ngana e lohote, iau lape epoi ke pomam pe e poia nga Kristus ene ke e halaua imo. <sup>11</sup> Ke pomalam non poreke ngana memeun nge ita ero ol, iange ta etei tote nena poinga mur lo.

### *Paulus Longe Titus Pingana Nge Troas*

<sup>12</sup> Nga etue nenge ela ke e lohote nga tuele tana nenge Troas ke e haliu hote helenga urana toto ngana nenge Kristus, e naue ke pomanga Non Soke helue kue nga ume nei nga lamau ke ulolo. <sup>13</sup> Pe iau letak meena kura iange e hottaua tira Titus ero mana. Ke pomalam e ee lange hehei pe hana nga lamau pe ramak lange Mesatonia.

<sup>14</sup> Pe e hele urana toto lange NeHalang nge i muka ia imem ke moi hotia Kristus nena ume. Pe poia ume nem inangana ehech ngana song ke kikina toto nga kileng lochloch ngana ke hehei pe hana te eteia i. <sup>15</sup> Iange imem mo pomanga sapiu eina inangana ehech ngana nenge Kristus poi tunginga ia lange NeHalang. Pe inangana song ke ronggo heke iri nenge NeHalang mene mulmule iri pe iri nenge lape te mete pe iri erue. <sup>16</sup> Ke ume nenge mo poia nei, inangana lange iri nenge lape te mete pe iri erue nem, ke pomanga ure nenge tunge metenga. Pe inangana lange iri nenge NeHalang mene mulmule iri, ke pomanga ure nenge tunge maulinga. Pe itei nakuna toto nge poia ume nenge pomai? <sup>17</sup> Hana halang te teke te mene umtutuna nga ume nenge te haliu hotote NeHalang nena helenga, pe imem ero. NeHalang i sipona kulosia imem pe mo hele ke manmanna nga matana ke pomanga Kristus nena hana mur toto.

## 3

### *Hekulkulonga Mur Iri Ume Ana Hana Mur Nga Tomunga Hel Heueu Ngana*

<sup>1</sup> Pe imo letemo ma ke merei? A teke mo tal heke mulmule imem pullo kai? Mele hel tehas ia alalaha ke te heto hekeke hana hel. Pe a teke mopoi ke mange iri ke mo tunge alalaha nenge mele hel tehas ia, ke te heto heke imem lange imo? Eh! A teke imo sipomo a hasia alalaha e ke hele urume imem? <sup>2</sup> Ero toto. Imo sipomo a pomanga alalaha nenge mohas ia nga kakahomem pe hehei pe hana te sisia pe te eteia. <sup>3</sup> Pe pule lememe ume nenge mo haliu hotote helenga urana toto ngana poia imo ke a pomanga alalaha nenge Kristus hasia. Pe hasia nga hasinga eina ero, hasia laka nga NeHalang nenge tu ke maulul Opene. Pe has heke nga um nenge tekole ero, has heke nga ita non kakahora.

<sup>4</sup> Imem letemem manmanna ke NeHalang mene mule imo nga ume nenge Kristus ke ngana koi nenge mo hele ke pomai. <sup>5</sup> Imem sipomem nakumem ero toto nge mo poia ume nei, pe emem halaunga nga ume nenge mo popoia at mana nge NeHalang i toro. <sup>6</sup> Ke i sipona poia imem ke nakumem nge imem ume ana hana mur nga tomunga hel heueu ngana. Tomunga hel heueu ngana nem poi ke manga hotonga nenge tehas ia ero, i ure nenge at nga Opepengpeng. Hotonga nenge tehas ia atia metenga pe Opepengpeng tunge maulinga.

<sup>7</sup> Hotonga nenge atia metenga tehas heke nga um pe at luluch nga NeHalang nena hemalmalinga nenge poia Moses ramana ke sinaala toto. Pe sinaele tote Israel mur mataria ke te naue ke nek ero. Pe nga hoena hemalmalinga nem het sio mule. <sup>8</sup> Pe ume nenge NeHalang nenge tunge Opepengpeng at nge ita, ana hemalmalinga palaungana toto nga

**2:11:** Luk 22:31    **2:12:** Ume 14:27; 1Ko 16:9

**3:1:** Ume 18:27; 2Ko 5:12

**3:2:** 1Ko 9:2

**2:13:** Ume 20:1

**2:16:** Luk 2:34; 2Ko 3:5-6

**3:3:** Exo 24:12; Jer 31:33; Ezk 36:26-27

**3:6:** Jer

31:31; Ioa 6:63; 1Ko 11:25

**3:7:** Exo 34:29

**3:9:** Deu 27:26; Rom 1:17



nenge hotonga ana. <sup>9</sup> Ke nenge teke ume nenge atia metenga nge ita ana hemalmalinga, ume nenge poia ita ke ta pengpeng nga NeHalang matana, ana hemalmalinga pule. Pe i palaungana toto. <sup>10</sup> I manmanna ke pomam iange tomunga hel heueu ngana nei ana hemalmalinga tualeme ke palaungana toto pe hemalmalinga nenga tomunga hel nike ngana het sio toto lo. <sup>11</sup> Ke nenge teke hotonga nike ngana nenge het sio nem at lulich nga hemalmalinga, tomunga hel heueu ngana nei ana hemalmalinga palaungana toto, iange i lape tu ke koko.

<sup>12</sup> Imem letemem manmanna toto nga ure nei ke pomalam moi hot malaha ke mo haliu hote helenga urana toto ngana. <sup>13</sup> Imem mo poi ke mange Moses ero. Moses ramana sinaala pe poi hele ana malenga iange lemene ero nge Israel mur te naue ure nem nge het sisio nge i. <sup>14</sup> Pe leteria hit mana. Ke nga etue nei te sisia tomunga hel nike ngana nenge Moses pe te eteia luna ero, iange nakuna pomanga malenga nem poi ele leteria matana ngana kura. Pe nenge teke leteria manmanna nge Kristus, lape Kristus poi sue malenga nem pe te eteia hotonga luna ke nek. <sup>15</sup> Ke nga etue nei tesis ia tomunga hel nenge Moses pe te eteia luna ero iange malenga poi ele mene leteria matana ngana. <sup>16</sup> Pe nenge teke mele hulia nena poinga mur pe nanasia Non Soke, lape Non Soke poi sue malenga nenge poi ele letena matana ngana nem. <sup>17</sup> Helenga nenge “Non Soke” nei, i heleleia Ope. Nenge teke Non Soke Opene tuteu nge mele, mele nem lape tu ke poi tetele mana ol. <sup>18</sup> Pe ita, malenga poi ele ramara ero. Ke pomalam ta henonou hote Non Soke nena hemalmalinga. Isipona hulia ita ke ta pomange i nga nena hemalmalinga nenge pupuo ke papalaungana. Pe hemalmalinga

palaungana nem, at nge Non Soke nenge i Ope.

#### 4

<sup>1</sup> NeHalang letena ia imem pe tunge ume nei at nge imem. Ke pomalam lememelelei tana ia ume nei ero. <sup>2</sup> Pe mohul rumemem ia meinga ana poinga mur nenge talkomkome pe mo pallaka ia hehei pe hana ero pe mo hetaua NeHalang nena helenga unne e ero. Mo haliu hot pengpeng ia NeHalang nena helenga. Pomalam hehei pe hana te amnei teu nga leteria nga lememelelei poinga pe te eteia ke imem hana nenge pomai nga NeHalang matana.

<sup>3</sup> Imem mo haliu hote helenga urana toto ngana lange hehei pe hana lochloch, pe iri nenge lape te erue, iri mana te mene hote helenga nei luna ero. <sup>4</sup> Iange non poreke ngana nenge nauela ich nei, hepirit ele tote iri nenge leteria manmanna ero, leteria matana ngana mur lo. Ke pomalam te naue lemenga nenga hemalmalinga nge Kristus nenge lohota nga helenga urana toto ngana nei ero. Kristus i non nenge henonou hot pengpeng ia NeHalang nakuna.

<sup>5</sup> Imem mo haliu hote imem sipomemelelei helenga ero. Mo haliu ke mo teke Iesus Kristus i Non Soke pe nena hana mur imem, pe moat ke mo halau mene imo. <sup>6</sup> Iange NeHalang hele nge nike ke teke, “Lemenga lape lohota nga kileng au ngana!” Ke NeHalang nem, i koi nenge poia nena lemenga ke tua nga letememelelei tunge lete matana ngana nge imem nga nena hemalmalinga, nenge tualeme hot nga Kristus ramana.

<sup>7</sup> Imem mo mene teua ure urana ngana nge NeHalang ke tuteu nge imem. Pe mo poi ke pomalaka nga tuninga nenge tepip hote nga melele. Ke nei henonou hot pengpeng ia ke kerkerenga palaungana nem at nge imem ero, at mana nge NeHalang.

<sup>8</sup> Kokoes ure meena ngana halang

te lohotot nge imem pe te hekou sio tote imem ero. Etue hel letemem lilil pe letemem matana ke nek mulmule nga motu ngamem. <sup>9</sup> Lemem ngarang mur tepoi porekreke imem pe NeHalang nausio mene imem ero. Tepal poreke totote imem pe momes haka mulmule. <sup>10</sup> Kokoes mo takis rerere Iesus mete ngana nga singimem, pomalam lape hehei pe hana te naue Iesus maulngana pule nge tu nga singimem. <sup>11</sup> Imem motu ke mo maulul kura pe hana te teke te hunune imem iange mo rahite Iesus nena ume. Pe singimem i ure nenge lape mete pe het sapele pe tu ke koko ero. Pe hehei pe hana lape te naue ke Iesus tu ke maulul kura nga singimem nei. <sup>12</sup> Ke imem mo angala manmana metenga nga ume nenge lape tunge maulinga ke koko lange imo.

<sup>13</sup> NeHalang nena alalaha nenge tehas sue ke ulolo, hele ke teke, "E hele, iange letek manmanna." Pe imem pule mopoi ke pomalam. Mo hele iange letemem manmanna. <sup>14</sup> Pe mo eteia ke NeHalang hemaual heke Non Soke Iesus nga metenga pe lape hemaual heke imem luluch nge Iesus. Pe lape mene imem luluch nge imo ke la tatu luluch nge i. <sup>15</sup> Ure lochloch ngana nei lohot nge imem ke halaua imo. Pe hehei pe hana lochloch ngana nenge NeHalang letena ia iri ke mene mulmule iri, lape te heto heke NeHalang nena hemalmalinga ke elela toto.

<sup>16</sup> Ke pomalam mo rahite ume nei ke kerkereng. Nga singimem nge hot mo tuauna pe mo kerkereng ero ol pe opemem nenge tuteu nge imem lohot ke heueu ngana mulmule nga etue lochloch. <sup>17</sup> Pe ure meena ngana mur nenge te lohotot nge imem nem, i ure kinkino mana pe lape tetu ke mala ero. Pe iri lape te halaua imem ke mo mene hemalmalinga nenge lape tu ke koko. Pe hemalmalinga nem i ure nenge palaungana toto nga ure

meena ngana nemur. <sup>18</sup> Ke imem letemem tu mana kou nga ure nenge mo kolkol ia kura pe letemem tunga ure nenge mo esesia nei ero. Iange ure nenge mo esesia nei tu ke etue choro mana pe ure nenge mo kolkol ia neu lape tu ke koko.

## 5

### *Ta Nanasia NeHalang Lemene Ngana Nga Singira*

<sup>1</sup> Imem mo eteia ke singimem nei pomalaka nga pelpele nenge mo tuteu mana ia nga ich nei, iange i lape lapusa sio. Ke nga etue nenge mo mete lape NeHalang tunge lememe pele e nga nena kileng. Pele nem, ita non ta umeia ero. NeHalang i sipona umeia pe ana pele lape tu ke koko. <sup>2</sup> Heueu nei mo heperir hulu mana ia singimem nenge manga pelpele nenge motu teu ia nei, pe mo teke moteu heke lememe pele toto ngana nenga tapa ol. <sup>3</sup> Iange nenge teke mo mete, opemem teu heke sapele singimem heueu ngana nem pe motu charchara nga mana ero. <sup>4</sup> Nga etue nenge motu teu nga singimem nei kura, ure meena ngana lohot pe mo heperirir ia pe mo hile ero. Mo teke moteu heke tele lememe pele nenga tapa, pomalam lape singimem pesa ngana nei kerkereng pe tu ke maulul mule. <sup>5</sup> NeHalang i sipona poia ure nei ke lohot nge imem ke pomai pe tunge Opepengpeng at nge imem ke helue kue nenga ure manmanna toto ngana nenge teke tunge atat nge imem.

<sup>6</sup> Ke pomalam mo mataua ute pele ero. Mo eteia ke nga etue nenge motu teu nga singimem nei kura, motu kangkanga nge Non Soke. <sup>7</sup> Pe motu ke mo nanas mene letemem manmanna ngana nga ure nenge mo kolkolia pe mo nanasia ure nenge mo esesia nei ero. <sup>8</sup> Ke pomalam e hele ke e teke mo mataua ute pele ero. Mo teke mo lohot nga singimem nei

pe mola nga lemlem kileng nge Non Soke. <sup>9</sup> Kokoes mo teke mo heiech ia NeHalang nga poinga nemur nenge mutena tautaua iri. Nga etue nenge motu nga lamai pe pule nga etue nenge motu luluch nge I nga lemlem kileng huna. <sup>10</sup> Iange nga hoena lape ita lochloch tames nga Kristus nena arenga tapuna ngana matana, ke amnei urume rera poinga mur nenge tatu teu nga singira nei kura pe ta popoia. Pe ita elle pe elle lape ta mene uru ke pupure rera poinga mur, rera poinga mur nenge urana ma poreke.

### *Tatu Ke Elle Mule Luluch Nge NeHalang*

<sup>11</sup> Imem mo matau ala toto emem nge Non Soke nga nem, ke pomalam mo teke mopoi heke hehei pe hana leteria ke leteria manmanna nga helenga urana toto ngana. NeHalang etei tote imem ke nek toto pe e eteia ke imo pule nga letemo toto a eteia imem ke nek toto. <sup>12</sup> Imo a teke lape motal hekeke imem pullo koi, pe i ero. Mo teke mo poia imo ke letemo urana nge imem. Pomalam lape a tuacholia iri nenge pomai rera helenga mur: Iri nenge te naue hana singiria nge hot nge nakuria urana pe te palut laka mana ia, pe hana nemur leteria nge teu pe rera poinga mur te palut laka ia ero. <sup>13</sup> Nenge teke mo hele rara pulut mana ke pomanga hauaua mur, nem NeHalang nena ia ke nau teu lala ia. Pe nenge teke mo helele nga letemem matana ngamem, nem lemo ia ke halaulaua imo ol. <sup>14</sup> Imem Kristus mutena ngana nauala tote imem iange mo eteia ke non elle mana mene ita lochloch murra ke mete. Ke pomalam ita lochloch ta mete pule. <sup>15</sup> I mene ita lochloch murra ke mete, pomalam ita nenge ta maulul kura tatu pulut mana nga lemema ngara ero. Ta heiech ia I nga tatu ngara iange I mene murra ke mete ke mene mule ita pe maul haka mule lo.

<sup>16</sup> Ke pomalam talun heueu nei ke la ol, mo nanasia poinga nenga ich nei ke mo amnei urume mele nena poinga ero. Iange nge nike mo nanasia poinga nemur nga ich ke mo heilang ia Kristus, pe heueu nei mopoi mule ero ol. <sup>17</sup> Iange mele nenge letena manmanna nge Kristus lohote ke i non pe hei heueu ngana ia mule. Poinga nike ngana het sio lo pe ure lochloch ngana te lohote ke heueu ngaria mule! <sup>18</sup> NeHalang poia ure lochloch ngana nei ke lohote ke pomai. Pomalam poia ita ke itaul talele polong nga ume nenge Kristus poia. Pe tunge ume nenge teke ta hele lange hehei pe hana ke itaul NeHalang talele polong. <sup>19</sup> Imem mo haliu ke mo teke, NeHalang lele polong luluch nge hehei pe hana lochloch nga ich ke tetu ke elle lo nga ume nenge Kristus poia. Pe letena metene muleria poinga poreke ngana mur ero ol, pe tunge emem ume nenge mo haliu hote polong ana lelelenga nem. <sup>20</sup> Ke pomalam imem mo mene Kristus hanna ke mo haliu hote nena helenga. Pe i nakuna pomanga NeHalang i sipona haliu hotot nga halimem ke iuiua hehei pe hana. Mo haliu hote Kristus nena helenga pe mo hele lange imo ke mo teke, "Imo ul NeHalang ke a lele tele polong." <sup>21</sup> Kristus i non nenge poia poinga poreke ngana e ero toto. Pe NeHalang ulo heke rera poinga poreke ngana mur lochloch lange i ke takisia. Pe nga nena kerkerenga lape poia ita ke ta lohote ke ita NeHalang nena hana mur nge pengpeng.

## 6

### *Hekulkulonga Mur Te Amneia Ure Meena Ngana*

<sup>1</sup> Imem mo ume luluch nge NeHalang pe mo hele ke kerkereng toto lange imo ke mo teke, a hesil sio mene NeHalang letena poreke ngana

nenge a mene nem ero. <sup>2</sup> Iange NeHalang hele ke teke,

“Nga etue nenge e talue,  
e longe lemo hetalaulaunga.

Nga etue nenge e mene mule imo  
nem,  
e halau tote imo.”

A longo ke nek! Etue nei i etue nenge NeHalang talue ke teke halaua hehei pe hana pe mene mule iri ana etue koi heueu nei lo.

<sup>3</sup> Imem mo nanasia poinga nenge helosio ia mele letena manmanna ngana ero, iange lemемem ero nge mele hel te hele poreke emem ume.

<sup>4</sup> Pe mopoi ke mai koi; Mo henonou hote ke imem NeHalang nena hana mur nenge mo umume nge i nga ure lochloch ngana nenge mo popoia. Pe mo mes ke kerkereng ke mo takisia ure meena ngana mur nenge tepoi porekreke imem pe nenge te tunge melmelenga atat nge imem. <sup>5</sup> Tepal ule imem pe tetal teua imem nga tuele au ngana, te molmol taua imem ke te palia imem pe te poia imem ke mo ume sakilil pe mo mamani ke nek ero pe mo ngau ero. <sup>6</sup> Mo hetei hote ke imem NeHalang nena hana mur nenge mo umume nge i nga nenge mo nanas mene poinga nge pengpeng, pe mo etei tote NeHalang nena helenga pe letemem inin ke ueiuei ero pe mo urana lange hehei pe hana. Pe Opepengpeng halaulaua imem ke popoia ume nem pe pule mutemem tau totote hehei pe hana. <sup>7</sup> Pe mo hele hote helenga nge manmanna nga NeHalang nena kerkerenga. Pe mo nanasia poinga nge pengpeng, pe mo rahite ke pomanga lemем kaleu pe io. <sup>8</sup> Mele hel te heto hekeke imem pe hel tetal sio totote imem. Hel te heleia ure urana ngana mur nge imem pe hel te hele porekreke imem. Hel te teke mo pallaklaka pe imem mo heleia helenga nge manmanna. <sup>9</sup> Hel te teke te eteia imem ero pe hua halang te eteia imem. Hel te hele ke te teke, “Te metmete lo laka!” Pe

ero, heueu nei mo ii kura. Te ele koua ure meena ngana at nge imem pe mo mete hot ia ero. <sup>10</sup> Te poia imem ke letemem meena ke halang pe mo iech manmana. Lemem ure halang ero pe mo tunge ure nenge ele haka toto nga ure nemur nga ich lange hehei pe hana ke te rahat tote. Lemem ute pele ero pe NeHalang lape tunge lemем kura.

<sup>11</sup> Imo Korin nemur, imem titimem mur pe liliumem mur laka imo. Pe mo hele hot ke mallaha toto lange imo pe mo talkome ute e nge imo ero toto. Mo tung tote letemem lange imo ke mutemem taua imo. <sup>12</sup> Ke imo amo lete tu nge imem kura pe imem emem lete tu nge imo ero ol. <sup>13</sup> E hele lange imo ke pomanga tutuk mur imo ke e teke ta poia rera poinga mur ke te palala helei. A tung tote letemo pe mutemo taua imem ke pomange imem nge mutemem taua imo.

### *A Kangkanga Toto Hana Nenge Leteria Manmanna Ero Aria*

<sup>14</sup> Imo letemo manmanna pe hana hel leteria manmanna ero, ke pomalam a kangkanga toto aria. Ita ta eteia ke ure nenge urana, tatal luluche nga ure nenge poreke ero. Pe pule lemenga pe kileng au ngana tetu ke elle ero. <sup>15</sup> Ke Kristus pe non poreke ngana te poi ke pomalam pule. Iri nai tetu ke elle ero. Iange non nenge letena manmanna pe non nenge letena manmanna ero, iri nai leteria tuanin ngana mur pe reria poinga mur song hot ke elle ero. <sup>16</sup> Eh! A teke ta heluluch tele NeHalang nena pele langa aetapuna nena pele? Ero toto, iange ita NeHalang nenge tuke maulul nena pele mur koi ita. Pe NeHalang heleia ke ulolo ke teke, “Lape etu luluch nge iri pe ei luluch nge iri. Iange iau lek hana mur ia iri pe iri aria Soke iau.”

<sup>17</sup> Pe Non Soke hele pule ke teke, “A ua hot ke a kangkanga toto hana nemur aria.

6:5: 2Ko 11:23-27  
Lev 26:12; 1Ko 3:16

6:6: 1Ti 4:12  
6:17: Isa 52:11; Hem 18:4

6:9: 2Ko 4:10

6:13: 1Ko 4:14

6:14: Epe 5:11

6:16:



Pe a rataua ure nenge muna ulu  
ero toto.  
Pomalam lape emene imo.”

<sup>18</sup> Ke Non Soke nenge kikina toto  
hele ke teke,  
“Imo Tememo iau pe iau tutuk mur  
imo.  
Imo tatamanna pe heheina  
lochloch.”

## 7

<sup>1</sup> Ke titik mur pe liliuk mur, Ne-  
Halang tunge helenga manmanna  
ngana nemur at nge ita lo. Pomalam  
ta helemlem heke tote ita pe ta hile  
tote ure nemur nenge poia singira pe  
opere ke muna ulu. Ta hile tote pe  
tatal sue ita pe tatu ke ta pengpeng  
toto ke pomange NeHalang.

### *Paulus Letena Iech Toto*

<sup>2</sup> A tung tote letemo at nge imem.  
Imem mo poia poinga poreke ngana  
e lange mele ero, pe mo heporeke  
mele letena manmanna ngana ero pe  
moua toto ia mele nena ure ero. <sup>3</sup> Pe e  
poia helenga nei ke e teke e heporeke  
letemo ia ero koi. Iange e hele lange  
imo lo ke e teke: Imem mutemem  
tau tote imo pe mo teke motu ke elle  
luluch nge imo pe mo mete luluch  
nge imo. <sup>4</sup> E amneia ke e teke e hele  
pengpeng lange imo. Iau e iech toto  
pe e heto heke tote imo. Imem mo  
takisia ure meena ngana halang pe  
letek lange imo pe iechinga song ke  
elela toto nga singik.

<sup>5</sup> Nge nike mo lohot nga tuele kina  
nenge Mesatonia pe mo are ke nek  
ero iange ure meena ngana halang  
te lohot nge imem. Mo hunel luluch  
nge hehei pe hana hel nga lamau  
pe mataunga tu nga letemem. <sup>6</sup> Pe  
NeHalang hemaluche hehei pe hana  
leteria pe hemaluche letemem ke ma  
ke nek pule nga nenge kulosia Titus  
ke at nge imem. <sup>7</sup> Pe letemem ma  
ke nek nga nem mana ero, letemem  
ma ke nek pule nga poinga nenge a  
poia lange i. Ana non nana at nge  
imem ke teke: Imo letemo ia lemo  
poinga nenge a poia pe a teke letemo

elle luluch mule nge iau pe nga nenge  
singimo ele iau. E longe nem pe e iech  
toto.

<sup>8</sup> Nenge teke alalaha nenge ehas  
ia nei heporeke letemo, iau letek  
porekeia imo ero. Nga tele ngana  
letek porekeia imo iange alalaha nem  
heporeke letemo pe letemo meena  
nga etue choro ngana mana. <sup>9</sup> Pe  
heueu nei iau e iech pe e iech ele  
imo nge e poia letemo ke meena ero.  
Nem ero. E iech iange letemo meena  
ngana nem poia imo ke a hulua lemo  
poinga mur. Ure meena ngana nem  
lohot nge imo pe NeHalang tunge lete  
matana ngana nem lange imo. Ke  
pomalam mo heporeke imo nga ute  
e ero. <sup>10</sup> Lete poreke ngana nenge  
lohot nga NeHalang lemene ngana  
poia hehei pe hana ke te hulua reria  
poinga mur ke te mene maulinga.  
Nenge teke mele hulua letena nga  
nena poinga poreke ngana, letena  
meena ia ero. Pe lete poreke ngana  
nenge lohot mana nga ich, at ia  
metenga. <sup>11</sup> Imo letemo meena pe  
letemo meena ngana nem lohot nga  
NeHalang lemene ngana. Anau nga  
ure nemur nenge NeHalang poi hote.  
NeHalang poia letemo meena ngana  
nem ke; Kik heke letemo ke a hep-  
engia helenga nem, pe poia imo ke a  
hemallaha hote ames ngamo nga ure  
nem, pe poia imo ke a naue poinga  
nem ke i ure palaungana ia pe poia  
imo ke apal nakumo ia pe poia imo  
ke letemo inin pe a matau pe poia  
imo ke a teke ela toto nge imo pe poia  
imo ke a lohot nga kue urana ngana  
nenge a tunge tuangachol lange mele  
nenge poia poinga nem. Nga ure  
lochloch ngana nemur a hemallaha  
hote imo ke letemo urana mana nike.  
<sup>12</sup> Pe mele nenge poia poinga nem  
pe non nenge mele nem poi poreke  
i, tepoi heke letek ke ehas ia alalaha  
nei ero. E hasia alalaha nei, iange  
e teke a naue ke mallaha nga NeHa-  
lang matana ke imo a tung tote imo  
ke a nanasia lememe helenga mur.

<sup>13</sup> Nenge nei mana poia letemem ke ma ke nek. Pe apoi ke pomam at nge imem mana ero. Mo iech toto pule nga lemo poinga nenge a poia lange Titus. Titus letena iech toto iange imo lochloch a poia i ke pomam.

<sup>14</sup> Imo a poia iau ke letek meena ero pe e palut laka pe e heto heke imo lange Titus ke elela. Imem mo hele hote helenga manmanna ngana lange imo pe a henonou hote ke lememe palutinga nenge mo poia lange Titus lohote ke manmanna.

<sup>15</sup> Titus letena metene mule imo nge samo loilo pe a talsio mene imo pe a longia i pe a longo taua nena helenga mur. Nenge nem poia i ke mutena tau tote imo ol. <sup>16</sup> Pe iau e iech toto pe letek manmanna nge imo nge lape a nanasia poinga nge pengpeng nga ure lochloch.

## 8

### *Tunginga Nenge Halaua NeHalang Nena Hana Mur*

<sup>1</sup> Ke titik mur pe liliuk mur, mo teke a eteia NeHalang letena poreke ngana nenge hesue lange nena mata mur nge Mesatonia. <sup>2</sup> Iri reria ure halang ero pe ure meena ngana halang te lohote ke te totoia iri. Pe iechinga palaungana lalalaua iri pe te tung peria ke halang. <sup>3</sup> E hele lange imo pengpeng, iri te tung ke halang lo pe ero iri siporia te tung ke ele haka toto nga lemeria ngaria. <sup>4</sup> Pe te onteiteia imem ke te teke mo longele iri ke teume luluch nge hana hel pule ke te tango rara umtutuna nenge halaua NeHalang nena hana mur. <sup>5</sup> Iri te tung tele iri lange Non Soke ke het pe te tunge iri at nge imem pule, pe mo teke lape tepoi ke pomau ero. Ke reria ume lape te poia ke te nanas mene NeHalang lemene ngana. <sup>6</sup> Ke pomalam mo hele ke kerkereng toto lange Titus ke halaua imo ke a heule halaunga ana ume nem iange i sipona talune. <sup>7</sup> Imo a urana nga ure lochloch, nga letemo

manmanna ngana pe nga haliunga pe nga letemo matana ngana pe nga nenge letemo hakaka ke a halaulau, pe nga mutenga ana poinga nenge mo hetoro sue lange imo. Ke pomalam aume ke kerkereng pule nga halaunga ana ume nei.

<sup>8</sup> Iau e echia imo nga helenga nei ero. E esia Mesatonia nemur reria poinga nge te tung peria pe te halaua NeHalang nena hana mur pe iau e teke enau urume lemo ume. Mutemo tau tote NeHalang nena hana mur pule ke mange iri ma ero? <sup>9</sup> Imo a eteia mutenga nenge ara Non Soke Iesus Kristus lo. I nena ure halang pe hile lochloche ure nemur pe lohote ke pomanga none nge nena ure ero, iange teke halaua ita. Ke nga poinga nenge lohote ke nena ure ero, imo lape a mene ure nge halang toto nge NeHalang.

<sup>10</sup> Iau letek tuanin ngana nga ure nei song ke mai koi: Imo a talun tele ume nei nga hesinga nenge la neu lo pe imo tala nge a tung perimo ke a halau. Pe imo lememo toto ke a poia poinga nem. <sup>11</sup> Pe umtutuna hia nenge a teke a tunge, e teke a tunge ke a heule ume nem ol. Ke pomalam lemo ume nenge a teke a poia nganangana lohote ke manmanna. <sup>12</sup> Nenge teke letemo haka ke a tung perimo ke a halau, NeHalang lape letena urana nge imo nga poinga nem. I nau mana nga lemo ure nenge a tunge. Pe ure nenge tu nge imo ero, I letena ia ero.

<sup>13</sup> Imem lememe ero nge mo tunge ure meena ngana ke la mana nge imo pe hana hel tetu ke tepoi tetele mana. Mo teke mo poia ure ke palala hehel. <sup>14</sup> Nga etue nei imo lemo ure halang ke urana nge a halaua iri nenge reria ure ero. Pe nga etue nenge iri reria ure halang, lape te halaua imo nenge lemo ure ero. Ke ure palala hehel. <sup>15</sup> Iange NeHalang nena alalaha nenge tehas sue ke ulolo, hele ke teke, "I nenge loloch ke halang

**8:1:** Rom 15:26; 2Ko 9:1-2

**8:7:** 1Ko 16:1-2

**8:9:** Mat 8:20; Pil 2:6-7

**8:12:** Mak 12:43-44

**8:15:** Exo 16:18

nena halang sakilil ero. Pe i nenge loloch ke halang ero nena unne sune toto ero.”

### *Titus Pe Hana Nai Te Lange Korin*

<sup>16</sup> E hele urana toto lange NeHalang nge poi heke Titus letena ke letena tau tote imo ke pomange imem. <sup>17</sup> Ana non ngata nga ure nenge mo onteia i ke mo teke poia. Pe nga i sipona letena tuanin ngana teke la toto ke halaua imo. <sup>18</sup> Pe lape mo kulosia tira e ke la luluch nge i. Tira nem pingana iuiu nga ume nenge haliu hotote helenga urana toto ngana nga mata mur lochloch. <sup>19</sup> Pe pule tira nei, iri mata mur te henonou hote i ke koko nge imem, ke halaua imem nga ume nenge mo hottautau umtutuna nenge tunginga ana. Pe mo poia ume nei ke hehei pe hana te heto heke Non Soke. Pe pule mo teke mo henonou hot tote letemem nenge mo teke mo halau. <sup>20</sup> Pe mo nauele tunginga palaungana nei ke nek toto iange lememe ero nge mele hele poreke imem nga poinga poreke ngana e. <sup>21</sup> Imem mo totoi toto ke mo poia poinga nenge urana nga Non Soke matana pe nga hehei pe hana nga ich nei mataria pule.

<sup>22</sup> Pe pule lape mo kulosia tira e pule ke la luluch nge iri nai. Tira nei mo totoi emule esia i lo, pe kokoes tatalo alala ke teke halaulaua hehei pe hana. Pe i teke koko nge iri nai nei ke halaua imo iange letena here imo nge a poia ume nem. <sup>23</sup> Titus, iau neingak ia nenge imem nai mo umume ke mo halaulaua imo. Pe titira mur nai nei, te mene iri mata nemur nga lamai muria. Pe lape hehei pe hana te heto heke Kristus ene nga ume nenge te poia. <sup>24</sup> Ke pomalam a heneue iri nga poinga nenge mutemo tau tote iri ke iri mata mur lochloch te naue. Pe te eteia ke imem motal heke tote imo iange imo hana nenge pomam.

## 9

### *Ta Nanasia NeHalang Nena*

### *Poinga Nenge Tungtung*

<sup>1</sup> Pe lemek ero nge e hele teu la sakilil nga tunginga nenge lange NeHalang nena hana mur ol, <sup>2</sup> iange e eteia ke imo mutemo toto nge a teke a halaua iri. Ke pomalam e palut laka toto lala nge hehei pe hana nge Mesatonia nga poinga nei pe e hele lala nge iri ke e teke, “Korin mur nga tuele kina nenge Akaia, te talune ume nenge te tango rara reria halaunga ana umtutuna nga hesinga nenge la neu lo.” Pe helenga nem poi heke iri halang leteria ke iri pule te tung peria. <sup>3</sup> Pe e kulosia titira nemur lange imo iange lemek ke e teke lememe palutinga nge imo nem nganangana lohote ke manmanna pe mo palut sio mana ero. Pe e teke a tatalo ele tunginga nemur ke pomanga e hele ngakia. <sup>4</sup> Iange nenge teke a tatalo ele ero pe mele hel nge Mesatonia te koko nge iau pe te naue ke pomam, lape emei tote iau pe imo lape a meia imo pule. <sup>5</sup> Ke pomalam e teke urana nge e toto hita lange titira nemur ke iri muka lange imo ke te tatalo ele umtutuna nemur nenge a heleleia. Ke nga etue nenge eat, umtutuna nem ma ke tatalo ala ke ulolo. Imo anau taole ia umtutuna tung ngana nenge pomam nge mele hel ero, a tunge nga letemo toto nenge a teke a halau.

<sup>6</sup> Letemo metene nei: Mele hel nenge tetua ke ngaunga alona unne sue mana lape te lulu hot ke ngaunga unne sune mana. Pe mele hel nenge te tua ke halang lape te lulu hot ke ngaunga halang toto. <sup>7</sup> Imo elle pe elle letemo matana ke nek nga umtutuna hia nenge lape a tunge. Pomalam lape letemo mule ia ero pe a aneia ke manga mele pele echia imo ke a tunge umtutuna nem ero. Iange NeHalang mutena taua laka mele nenge tunge ure pe iech mana. <sup>8</sup> Pe NeHalang lape tunge petanga nge lele hot ke manga ech lange imo pe lape lemo ute pele nge alpapa taua imo ero. Lemo ure lochloch ngana lape mataria purpur pe hel pule nenge

lape te halau ke tepoi hote ume urana ngana mur. <sup>9</sup> NeHalang nena helenga nenge tehas sue ke ulolo, hele ke teke,

“I tung penna ke halaua iri lochloch ngana nenge reria ure ero,  
pe nena poinga nenge tungtung nem lape tu ke koko.”

<sup>10</sup> NeHalang i non nenge tunge ngaunga tutuna lange non nenge umume nga ume pe tunge loi ke ngaunga ia. Pe i lape tung ke ngaunga tutuna halang lange imo ke atue ke haka ke nganangana halang toto. Nem pomanga poia imo ke lemo ure halang pe lape a tung perimo ke a halaua iri nenge reria urelu ero. <sup>11</sup> Ke NeHalang lape poia imo ke lemo urelu halang nga kue lochloch pe lape a heronge lala nge iri hel pule. Pe nenge teke mo mene lemo tunginga nem ke mo laia, hulua halang lape te hele urana toto lange NeHalang.

<sup>12</sup> Ume nenge pomai hul hot ngana nenge halau mene NeHalang nena hana mur ero. Hul hot ngana nenge te heto hakaka NeHalang ia pule. <sup>13</sup> Imo a tung perimo ke a halaua iri nemur pe iri hel pule. Pe nem henonou hot pengpeng ia letemo manmanna ngana iange a nanasia helenga urana toto ngana nenge Kristus pe a haliu hotote. Pe hulua halang lape te heto heke NeHalang nga nem. <sup>14</sup> Pe lape te hetalaulau amo ke NeHalang pete tote imo nga ure mur iange muteria tau tote imo nga NeHalang letena urana ngana nenge tunge lange imo. <sup>15</sup> Ta hele urana toto lange NeHalang nga nena tunginga palaungana nem, nge nakuna urana toto nga ta hele ngaria ia.

## 10

### *Paulus Hele Ala Ana Nga Nena Ume Nge Kristus*

9:9: Psa 112:9

9:10: Isa 55:10

9:11: 2Ko 1:11; 4:15

10:1: 1Ko 2:3

10:2: 1Ko 4:21

10:4: Epe 6:13-17

10:8: 2Ko 13:10

<sup>1</sup> Iau Paulus, pe e teke e poia nga urana ngana ke etal sue iau ke pomange Kristus pe e hele ke kerkereng toto lange imo. Iange amo hel nge imo te teke nga etue nenge etu luluch nge imo, e matautau ke e talkome manmana pe nga etue nenge etu nga tau e hele ke halik tamaha lange imo. <sup>2</sup> Pe pule te hele ke te teke motu ngamem pomange hana nenga ich nei kura. Pe nga etue nenge ela nge imo, lemek ero nge a echia iau pe a poia iau ke e hele ke halik tamaha lange imo. Iau e eteia ke lape e hele ke halik tamaha lange iri nenge te tutue iau nga helenga. <sup>3</sup> I manmanna ke imem motu nga ich nei kura pe palinga hel nenge mo poia ke mo teke mo hekou sue non poreke ngana, elle mana ke pomanga iri nenga ich nei reria ero. <sup>4</sup> Pe lemem palinga hel ana ure mur, altoto nga ich nei nena palinga hel ana ure mur. Imem lemem palinga hel ana ure mur laka, NeHalang nena kerkerenga nenge poia imem ke mohel parai sue non poreke ngana nena pakpak mur nenge tu ke sik teu toto ia. Ngana laka nga nenge pallaklaka ia ita pe rahit tote ita ke ta nananas mene lemene ngana nga poinga poreke ngana mur. <sup>5</sup> Pe NeHalang nena kerkerenga nem, poia imem ke mo hemakuke hehei pe hana leteria nga reria hunelinga. Pe poia imem ke mo hekou sue ure nemur nenge panrur helele hehei pe hana leteria matana ngana ke te eteia NeHalang ero. Pe hehei pe hana nenge reria matana luluch nge NeHalang, mo hulua leteria ke te nanasia Kristus. <sup>6</sup> Pe nga etue nenge a longo tau mule Kristus ke het lape mo talun sapele ke mo tung hote tuangachol poreke ngana lange iri nenge te longo olole kura.

<sup>7</sup> Anau teu la toto nga ure manmanna ngana pe anau mana nga ure singina nge hot ero. Nenge teke mele hele hot tote letena ke teke i Kris-



tus nena non toto, letena tuanin la mule nge i ke nek pe lape eteia ke Kristus nena hana mur imem pule ke pomange i. <sup>8</sup> Iau e palut laka sakilil ia kerkerenga nenge Non Soke tunge at nge imem pe e meia iau nga poinga nei ero. Iange tunge kerkerenga nem at nge imem ke mo heporeke imo ia ero, tunge at nge imem ke mo hekerkereng ia imo. <sup>9</sup> Pe lemek ero nge letemo tuanin ke a teke e he matautaua imo nga lek alalaha mur nenge ehas ia lala nge imo. <sup>10</sup> Mele hel te heleia iau ke te teke, "Paulus nena helenga nga nena alalaha mur, tang ke meena pe hele ke kerkereng toto. Pe nga etue nenge tu luluch nge ita, kikina ero pe nena helenga polpolenga mana." <sup>11</sup> Mele nenge poi ke mam, urana nge eteia nei ke nek. Imem motu ke kangkanga nge imo ke pomalam mohas ia alalaha ke lange imo. Pe nga etue nenge motu luluch nge imo, lape mo nanasia ure nenge mohas ia nga lemem alalaha nem pule.

<sup>12</sup> Imem lememem ero nge momes hot ke mo hepurple imem la luluch nge iri nenge tetal haka totote iri. Iri siporia te olou heke mene poinga nenge te amnei urume lala nga iri siporia reria poinga mur. Nenge nei henonou hot pengpengia ke iri te eteia ute pele ero. <sup>13</sup> Pe imem, ure hel lau lai ngana nenge tetu teu nga emem ume ero, mo palut laka rara ia ero. Mo palut laka mana nga ume nenge NeHalang tunge at nge imem ke mo poia, ke emem ume nenge mo poia lange imo, mo palut laka ia pule. <sup>14</sup> Pe nem mo palut laka sakilil ero iange NeHalang nena ume nenge tunge at nge imem hetala ngana nge imo. Ke pomalam mo laia Kristus nena helenga urana toto ngana nge imo pe mo lohohot la hali ero ol. <sup>15</sup> Ke mo palut laka nga ume nenge NeHalang tunge at nge imem kela het nga hetala ngana nenge talue, pe

mopoi ke mange hana hel ero. Imo letemo manmanna ngana pupuo lo pe nga letemem, mo teke letemo mamanna ngana nem lape poia emem ume nenge mo poia lange imo ke puo ke palaungana toto. <sup>16</sup> Ke pomalam lape mo haliu hote helenga urana toto ngana nga tuele kina hel pule nge hot. Pe lemek ero nge e tamu tote ume nei hetala ngana nenge NeHalang talue iange lape mo palut laka mana ia imem nga nena ume nenge poia ke lohohot nga kileng e ke ulolo. <sup>17</sup> Iange NeHalang nena helenga nenge tehas sue ke ulolo, hele ke teke, "Mele nenge teke palut laka, palut laka ia ume nenge Non Soke poia." <sup>18</sup> Mele hel nenge iri siporia te heto hekeke iri, NeHalang lape hile hote iri. Pe iri nenge NeHalang heto hekeke iri, iri mana lape tela nge NeHalang.

## 11

### *Paulus Pe Iri Nenge Te Pallaka Ke Iri Hekulkulonga*

<sup>1</sup> Iau mutek ke e teke a longele iau ke e poia helenga talero ngana e ke pomanga a popoia nem lo. <sup>2</sup> Iau letek ia imo ke halang ke pomange NeHalang nge letena tau tote imo. Imo apoi ke mange hei malolong ngana e nenge lei ero kura pe e teke e heleia imo lange Kristus i toro ke emo ia. <sup>3</sup> Iau e matau iange lape mele hel te heporeke letemo ke a hile lemo inga nenge a nanasia Kristus pe a saleke nga kue e nge altoto ke pomange he Eua nge ilimo nenge etei toto nga poinga nenge pallaklaka, paut leke mene i nge nike. <sup>4</sup> Iange imo a iech mana nge a longele hana nenge te pallaklaka halali ke te haliu hote helenga hel nge altoto nge Iesus, lala nge imo pe a longo taua iri ke ueiuei mana. Pe imem mo haliu hote helenga nenge pomam lange imo ero. Pe ope pe helenga urana toto ngana nenge a mene nge iri nem altoto

lochloch nga Ope pe helenga urana toto ngana nenge a mene nge imem. <sup>5</sup> Pe iau e teke imem mo ele haka toto nge hana nenge hana karia pe “amo hekulkulonga manmanna ngana nemur.” <sup>6</sup> Iri te haliu ngaria urana toto nge iau. Pe iau letek matana ngana nga helenga urana toto ngana, ele haka toto nge iri. Imem mo henonou hote ke kokoes lange imo ke ulolo nga urelu lochloch ngana nenge mo popoia.

<sup>7</sup> Iau etal sio mene iau pe etal heke imo. Pe e haliu hote NeHalang nena helenga urana toto ngana lange imo pe e long haka uruna ero. Letemo ma ke merei nga poinga nenge e poia nei, poreke kai? <sup>8</sup> Nga etue nenge eume luluch nge imo e menmene umtutuna nga NeHalang nena mata mur hel nge altoto. Nem nakuna pomanga e kemkeme nge iri ke e halaulaua imo. <sup>9</sup> Pe pule nga etue nenge etu luluch nge imo, lek ute alpapa taua iau ero pe e helete meena ia amoe ke halaua iau ero toto. NeHalang nena hana mur nga tuele kina nenge Mesatonina, teat pe te tunge ure lochloch ngana nenge mutek taua. Nga etue nemur nenge lalo e poia ure meena ngana e ke lohote nge imo ero toto, pe lape epoi ke pomalam mana nga hoena pule. <sup>10</sup> Iau, Kristus nena helenga manmanna toto ngana tuteu nge iau pe e palut laka toto ia nena ume. Pe mele pele nga kileng lochloch ngana nga tuele kina nenge Akaia lape hele ele iau ero toto. <sup>11</sup> Imo a teke lape mutek taua imo ero ke pomalam e tang haka halaunga lange imo ero, ae? NeHalang eteia ke iau mutek taua tote imo.

<sup>12</sup> Pe iau lape epoi menmene ure nenge e popoia heueu nei ke pomai koloi iange lemek ero “hekulkulonga hel nemur” nge te palut laka rara ke te heto hekeke iri. Iri te teke te lohote ke aria lala elle mana ke pomange imem, nga ure nemur nenge te palut rarara ia. <sup>13</sup> Hana nemur te channanga mana ke te teke iri hekulkulonga.

Pe iri hekulkulonga ero toto. Pe te hulua iri siporia ke nakuria mange Kristus nena hekulkulonga mur toto. <sup>14</sup> Ure nem mallaha mana iange Satan pule hulua i sipona ke nakuna manga angkelo nenge at nge NeHalang. <sup>15</sup> Ke nenge teke Satan nena hana mur nenge te umume nge i te hulua iri siporia ke nakuria mange hana nenge te umume nge NeHalang, nem ute pele nge ta ruraia ero. Pe nga hoena NeHalang lape tunge aria melmelenga nenge purpure reria ume nenge te popoia.

### *Paulus Heleia Ana Melmelenga Mur*

<sup>16</sup> Lape etua tau mule lek helenga. Letemo metene nei ke nek, iau ak hauaua ero koi. Pe nenge teke a teke ak hauaua, iok a longele iau ke e heto haka polia iau pule ke mange hauaua kina nemur. <sup>17</sup> Pe nga etue nenge e heto hekeke iau e helele ke pomanga Non Soke lemene ngana ero, e helele ke pomanga non hauaua kina e toto. <sup>18</sup> Hana halang te nana-sia poinga nenga ich nei ke te heto hekeke iri siporia, pe iau e teke epoi ke pomalam pule. <sup>19</sup> Imo nge lape letemo matana ngana elela toto lo iam, nenge ama la mana nge hauaua kina nemur mam! <sup>20</sup> Pe pule ngamo tano hit mene hana panenge te channanga ole mene imo pe te echia imo ke te teke apoi ke mai, pe te loloch ia lemo urelu mur pe tenau sio mene imo pe te tepele selle imo nga ramamo. <sup>21</sup> E hele pengpeng lange imo, iau e meia iau iange nga etue nenge motu luluch nge imo, mo poia poinga e nge pomam lange imo ero toto.

Ke nenge teke mele ana seilil nge palut laka ke heto hekeke i, iau lape ak seilil ke e heto hekeke iau pule. (E hele ngak nei pomanga none nge ana hauaua.) <sup>22</sup> Te teke iri utar pamam, iri Hipru? Iau pule iau Hipru. Pe nenge teke reria nge Israel, iau pule lek nge Israel. Pe nenge teke te lohote nga mata nenge Apraham, iau pule e

lohote nga mata nenge Apraham. <sup>23</sup> Pe nenge teke iri Kristus nena hana mur nenge te umume nge i, iau Kristus nena non nenge e umume nge i pule, pe e urana toto nge iri iange eume ke kerkereng toto. (Lape e hele ke pomanga non hauaua kina e toto ke pomai.) Kokoes tetal teua iau nga tuele au ngana pe te palpalia iau ke e mete parpar. <sup>24</sup> Pe lek hana mur pengpeng nge Iuta te nosia iau ke ak nosinga iri ana non kina elle pe analoch pe rahtele henel (39) pe tepoi he lime ia at nge iau. <sup>25</sup> Pe hana nenge Rom te luke akput palaungana pe te poia nge iau ke hemol. Pe mele hel te tamal hun paria iau nga um nga etue e. E hakaka nga imot pe ruach palchachia imot ke hemol pe emana nga ruach sana. Pe etue elle nga nenge ruach palchach hemol ia imot nem, e manmana nga ruach sana ke ak miliko e pe sinanga koana e. <sup>26</sup> Nga etue nemur nenge ei rara ke e popoia lek ume, ure nemur te poia ure meena ngana ke lohote nge iau; Nga ech nge hotot pe nge kemenge kina mur pe nge lek kileng ngana Iuta mur pe nge hana lomonmona ngana mur pe nga tuele tana papalauna mur pe nga kileng nenge ana hehei pe hana halang ero pe nga ruach sana pe nge hehei pe hana nenge te channanga ke te teke iri NeHalang nena hana mur. <sup>27</sup> Pe pule kokoes kikik ero iange eume ke kerkereng sakilil pe e mamani ke nek ero manmana pe e ururi pe e mete unune ech pe e ngau ero manmana pe singik houou manmana iange lek hengeron halang ero. <sup>28</sup> Pe ure nemur mana ero. Nga etue lochloch letek meena sakilil iange nga lek ume nenge enau ele iri mata mur. <sup>29</sup> E amneia ke letek meena nga etue nenge mele losio nga letena manmanna ngana. Pe nga etue nenge mele poi taole mele ke poia poinga poreke ngana, letek inin toto.

<sup>30</sup> Ke nenge teke e palut laklaka ke e

heto hekeke iau sipok, e palut laklaka nga ure nemur nenge te henonou hote iau ke iau non nenge kikik ero. <sup>31</sup> Ta heto heke NeHalang nenge Non Soke Iesus Temene ke koko pe I eteia ke iau e pallaklaka ero. <sup>32</sup> Nga etue nenge etu nge Tamaskus non soke nenge umume nge naungaala ana non nenge ene Aretas teke laua iau. Ke pomalam talue palpall hussu mur ke tenau ala nga tuele tana palaungana neu ke te laua iau. <sup>33</sup> Pe ero, NeHalang nena hana mur hel tetal teua iau nga chasang pe te hesio hot kome iau nga tuele tana neu ana mapuo koana ngana pe e ua sapele.

## 12

### *Paulus Nau Opene Ngana Pe Ana Melmelenga*

<sup>1</sup> Iau e palut laklaka pe e heto hekeke iau kura pe poinga nei lape poi hote ute pele nge urana ero. Pe heueu lape e hele teu langa ure nemur nenge enau opekia, pe ure talkomkome ngana nemur nenge Non Soke hemallaha hote at nge iau. <sup>2</sup> Iau e eteia Kristus nena none nge NeHalang mene heke ke langa tapa mol ngana nga lut toto. Pe ure nei lohote ke ana hesinga iri analoch pe henel kou la ke ulolo. Pe e eteia ke nek ero, ana non la luluch nga singina pule ma opene mana? Nenge nei NeHalang i toro eteia. <sup>3</sup> Etua tau mule lek helenga: E eteia ke nek ero, ana non la luluch nga singina pule ma opene mana? Nenge nei NeHalang i toro eteia. <sup>4</sup> Oe! NeHalang mene heke i lange Paratiso pe longe helenga hel nge heo ngana toto nge mele hanna tamia. <sup>5</sup> Pomalam e palut laka pe e heto heke tote none nenge pomam. Pe poinga nenge e heto heke iau sipok ke pomai poreke. Urana nge e palut laka pe e heto heke iau nge iau non nenge kikik ero. <sup>6</sup> Pe nenge teke lemek ke e palut laka, e palut laka ia ure nenge manmanna pe halik mera rara

mana ero. E palut laka pe e heto heke menmene iau ero, iange lemek ke e teke hehei pe hana tenau urume iau nga urelu nenge te naue nge e poia pe nga ure nenge te longe nge e heleia.

<sup>7</sup> Ke NeHalang henonoua iau nga ure nenge palaungana toto. Pe i eteia ke lape e palut laka pe e heto heke iau nga ure nem. Pomalam poia haleles e ke lohot nge iau. Pe singik melmele toto ia haleles nem ke pomanga Satan nena none nge kulosia at ke palulu hite iau. <sup>8</sup> Pe e hetalaulau lange Non Soke ke hemol ke e teke poia haleles nei ke het nge iau. <sup>9</sup> Pe i hele at nge iau ke teke, “Lek nekinga tu luluch nge iong ke ulolo. Pe lek kerkerenga ume ke mallaha toto nge iri nenge kikiria ero.” Ke pomalam e iech pe e palut laka pe e heto heke iau nge kikik ero, ke Kristus tunge kikina ngana at nge iau. <sup>10</sup> Iau e popoia Kristus ana ume pe e iech mana nga etue nenge kikik ero, pe hana te poi porekreke iau pe ure meena ngana halang te lohotot nge iau. Iange nga etue nemur nenge kikik ero, NeHalang nena kerkerenga lohot ke malaha toto nge iau.

<sup>11</sup> Imo a poia iau ke e helele ke pomanga none nge ana hauaua. Iau none mana ke pomange imo pe e ele haka toto nge hana nenge hana karia pe “amo hekulkulonga manmanna ngana nemur” pe pomerei a hele urume iau ke iau non nenge pomam ero?! <sup>12</sup> Nga etue nenge etu luluch nge imo etal sio mene iau pe e poia ume halang pe lek ume nemur te henonou hote ke iau hekulkulonga manmanna ngana toto. Epoi hote merakulo mur pe lala mur pe urelu nemur nenge te henonou hote NeHalang nena kerkerenga. <sup>13</sup> Iau lek poinga nenge e poia lange iri mata hel e poia ke elle mana lange imo pule. Pe ute elle mana nge e poia ke meena lange imo ngana laka nenge, a halaua iau nga umtutuna unne e ero.

Pe e teke letemo ia iau nga nem.

<sup>14</sup> Iok, heueu nei e teke ela ke e lohot hemol ngana nge imo. Pe ela nge imo ke a halaua iau nga umtutuna ero iange ela ke e loloch ure nge imo ero. Ela nge imo ke e teke a tunge imo at nge iau. Aina kinkino ngana aria ume nenge te tango rara pe te tatalo ele ure mur ke te tunge lange tetemeria mur pe tataria mur ero. Tetemeria mur pe tataria mur aria ume nenge te poia lange tuturia mur laka nem. <sup>15</sup> Ke iau e iech mana nge e hesilia lek urelu mur lange imo pe e tung tote iau lange imo pule. Iau mutek tau tote imo pe imo mutemo tau tote iau pule ma ero? <sup>16</sup> Nenge nei mallaha mana. Iau ela nge imo ke a halaua iau nga ute e ero pe amo hel nge imo te teke e channanga olole imo ke etak tettele imo. <sup>17</sup> Pe e channanga ole imo ke merei? Lape hana nenge e kulosia iri lala nge imo nem, nge te channanga olole imo kau? Ero le! <sup>18</sup> Iau e toto hita lange Titus ke e teke lange imo pe e kulosia tira e ke koko nge i. Pe Titus la ke channanga ole imo, ae? Imo a eteia ke Titus pe iau emem ume elle mana pe Opepengpeng itoro i mukmuka nge imem nga ume nem.

<sup>19</sup> Eh, imo a teke lape mohas ia alalaha nei ke mo hele alala emem kai? Titik mur pe liliuk mur, imem mo haliu hote Kristus nena helenga nga i sipona lemene ngana pe mo poia ure lochloch nga NeHalang matana. Pe mo poia ke pomam ke hekerkereng ia letemo manmanna ngana. <sup>20</sup> Iau letek ia imo ke halang iange nga etue nenge ela ke e lohot nge imo, lape enau leke nge hehei pe hana nenge lemek ero toto nge e naue iri pe imo pule lape anau leke nge iau non nenge lememo ero toto nge a naue. Iau e matau iange lape e naue poinga nemur nge te lohotot: Poinga nenge ahun helel pe samo kekeke mele hel pe letemo inin helel pe apal helel pe a



penpen hehel pe a ngunngunu hehel pe a heto hekeke imo pe alas lele hehel. <sup>21</sup> Pe letek ke e teke nga etue nenge ela mule nge imo, lape ak Soke NeHalang hemeia iau nga matamo. Pe lape e tang ia hulua nenge te poipoi poinga poreke ngana ke ulolo pe te hulua reria poinga mur ero toto. Pe heueu nei poinga poreke ngana mur pe salaunga ana poinga pe poinga nenge tema lululuch nge hehei lohotot kura.

### 13

#### *Helenga Toto Nga Ure Poreke Ngana Hetala Ngana*

<sup>1</sup> Iau lape e lohot nge imo ke hemol ngana koi nei. Pe NeHalang nena helenga nenge tehas sue ke ulolo, hele ke pomai, "Nenge teke mele i toro hele hote mele nga poinga e, nena helenga lape polpolenga mana. Pe nenge teke hana nai ma mol te heleia lape reria helenga meena ia." <sup>2</sup> Iau e hele ke kerkereng toto lange imo ke ulolo nga etue nenge e lohot henai ngana nge imo ke e teke, lape e poia ure meena ngana ke lohot nge hehei pe hana nenge te popoi poinga poreke ngana nge nike ke at heueu nei pe hel pule. Pe heueu nei etu ke kangkanga nge imo pe era heke mule pe nga etue nenge ela lape e renge mele ero. <sup>3</sup> E teke e heneue imo ke Kristus i sipona hele hotot nga halik. Pe nga etue nenge Kristus teke hetore imo ke hepengia imo, i lape poia nga kikina ngana pe maluch ole imo ero. <sup>4</sup> I kikina ero nga etue nenge te heon heke i nga manga toto. Nem manmanna. Pe heueu nei tu ke maulul nga NeHalang nena kerkerenga. Imem pule mopoi ke pomalam ke kikimem ero pe nga NeHalang nena kerkerenga motu ke mo maulul luluch nge Kristus. Pe lape mo heneue imo nga NeHalang nena kerkerenga ke mange Kristus.

<sup>5</sup> A amnei urume imo sipomo ke nek mukam; letemo manmanna ma

ero? Pomerei? A amneia ke Iesus Kristus kau tuteu nge imo mau? <sup>6</sup> Iau letek manmanna ke nga hoena lape a eteia ke iau hekulkulonga manmanna toto ngana. <sup>7</sup> Mo hetalaulau amo ke NeHalang halaua imo ke a poia poinga poreke ngana e ero. Pe mo hetalaulau ke NeHalang poia imem ke nakumem urana nga matamo ero. Nenge teke hehei pe hana te teke imem hekulkulonga manmanna toto ngana ero, ute pele ia ero. Ure nenge palaungana toto ngana laka nenge mo hetalaulau amo ke a nanasia poinga nge pengpeng. <sup>8</sup> Imem mo poia ume nenge halaua helenga manmanna toto ngana ke song, pe mo poia ume nenge poi ele ero. <sup>9</sup> Pe nakuna nenge imem kikimem ero koi pe imo kikimo ngamo halang la. Nenge teke pomam iok, mo iech mana pe mo hetalaulau amo ke a pengpeng toto ol. <sup>10</sup> Iau etu ke kangkanga pe ehas ia alalaha nei lange imo iange huna pomai koi: Nga etue nenge ela nge imo, lemek ero nge emak hite imo pe e heporeke imo nga kerkerenga nenge Non Soke tunge nge iau. Pe kerkerenga nem ana ume pomam ero, ana ume laka nenge poia imo ke ames ke kerkereng nga letemo manmanna ngana.

#### *Helenga Hetala Ngana Mur*

<sup>11</sup> Iok titik mur pe liliuk mur, e ee ia imo malalom iange lek helenga hetet lo. Pe e teke aume ke kerkereng pe a lohot ke imo hehei pe hana nge pengpeng. A nanasia lek helenga mur pe (a longo ala hel) pe letemo elle pe atu ke elle. Pe mutenga pe tunga nge nek nge NeHalang lape tu luluch nge imo.

<sup>12</sup> A sisa perimo nge imo elle pe elle pe a poia nga NeHalang ene. <sup>13</sup> Pe NeHalang nena hana mur lochloch nga lamai te hekule reria iechinga lange imo.

<sup>14</sup> E hetalaulau ke Non Soke Iesus Kristus letena ia imo pe NeHalang mutena taua imo pe Opepengpeng

tu ke sik teu toto nge imo lochloch.  
Ngana laka lom.

## **Kalasia Alalaha Nenge Paulus Hasia Lange Kalasia Mur**

<sup>1</sup> Iau Paulus koi. Pe iau, Iesus nena hekulkulonga. Pe none mana henonou hote iau ke e rahite ume nei ero. Pe pule none mana kulosia iau ero. Iesus Kristus i sipona poia iau ke e rahite ume nei. Ana Non, Temere NeHalang hemaual heke mule I nga metenga. <sup>2</sup> Pe titik mur nenge leteria manmanna nge Iesus koi tetu luluch nge iau. Imem lochloch mo hekule alalaha nei lange imo NeHalang nena hana mur nge Kalasia.

<sup>3</sup> Temere NeHalang pe Non Soke Iesus Kristus leteria poreke ia imo pe te hemaluche letemo ke ma ke elle. <sup>4</sup> Temere NeHalang letena tuanin hote nike ke teke Tuna Iesus tunge i sipona ke mene mule ita nga rera poinga poreke ngana mur. Poia poinga nem ke hekerkerenga nenga etue poreke ngana nei rahat tote ita ero ol. <sup>5</sup> Pomalam ta heto hekeke NeHalang nga etue lochloch sapele. Manmanna.

### *Helenga Urana Toto Ngana Nenge Manmanna*

<sup>6</sup> Iau e rura toto pe letek tuanin ke halang nga poinga nenge a poia nei, nenge ueiuei mana pe ahul rumemo ia NeHalang. Kristus letena ia imo ke mene mule imo ke ulolo. Pomalam NeHalang hetue imo ke tutuna mur ia imo. Pe pomere nenge ahul mule pe letemo manmanna nga “helenga urana ngana” e nge altoto? <sup>7</sup> Pe “helenga urana ngana” panem manmanna ero? Hana hel tepoi heke mene helenga nemur iange te teke te hepiriu ele letemo nga Helenga Urana Toto Ngana nenge Kristus. <sup>8</sup> Imem mo haliu hote Helenga Urana Toto Ngana lange imo. Pe nenge teke imem ma NeHalang nena angkelo e

nga tapa, mo channanga manaia helenga e nge pomam, lape NeHalang tuachol ia at nge imem ke poreke toto! <sup>9</sup> Helenga mo heleia lange imo ke ulolo pe lape e hele mule pule. Nenge teke mele haliu hote helenga e nge altoto nga Helenga Urana Toto Ngana nenge a rahite lo, mele nem lape NeHalang chacharuch heke i nga oan.

<sup>10</sup> Heueu nei e teke e poia hehei pe hana ke leteria urana nge iau ero. E teke e poia NeHalang ke letena urana pe iech. Eh, imo letemo ma ke mere? A teke iau nge e popoia hehei pe hana ke te iech mana ia? Nenge teke e poia ke pomam lape Kristus nena non iau ero toto.

### *NeHalang Iua Paulus Ke Raite Nena Ume*

<sup>11</sup> Titik mur pe liliuk mur, e teke e hele lange imo pengpeng. Helenga Urana Toto Ngana nenge e haliu hotote nei none nga ich nei olou heke mene ero. <sup>12</sup> Pe pule none mana tunge at nge iau ero pe hetoro iau ia ero pule. Iesus Kristus i sipona henonoua at nge iau.

<sup>13</sup> Iau Iuta pe etu ngak nge nike imo a eteia ke ulolo. E heparachrai ia NeHalang nena hana mur pe e hunune iri. <sup>14</sup> Oe, nga etue nem iau e lohotos ke iau non nge urana nge Iuta mur lochloch nenge imem ul ke emem opo elle. Pe e nanas tau tote hotonga mur nenge lememe tete mur te hesio tele at nge imem. <sup>15</sup> Nga NeHalang nena halaunga, henonou hote iau nga etue nenge etu nga hetak letena nike. <sup>16</sup> Pe I iech toto nge hemallaha hote Tuna at nge iau ke e haliu hote nena Helenga Urana Toto Ngana lange hehei pe hana lomomona ngana mur. Mele pele heleia ure nei at nge iau. NeHalang isipona hemallaha hote. <sup>17</sup> Pe iri nenge te rahat tele ume nei nge iau pe tetu nge Ierusalem, ela ke e esia iri ero pule. E lohaka mana pe ela sapele nga tuele kina nenge Arapia.

Ke het pe ela mule nga tuele tana nenge Tamaskus.

<sup>18</sup> Etu ke hesinga mol la ke het pe e lohaka ke ela nge Ierusalem ke enau tote Petrus. Enau tote i pe etu luluch nge i ke etue iri analoch pe lime (15).

<sup>19</sup> Pe nga lamau enau mene Ieims i toro. Ieims nenge Non Soke tina. Pe Iesus nena hekulkulonga mur hel pule, e kolkol iri. <sup>20</sup> Pe e hele ke manmanna toto lange imo nga NeHalang matana, ke ure nemur nenge e hasas ia iri nei, e pallaklaka imo ia ero. <sup>21</sup> Ke het pe e lohaka ke ela nga kileng nemur nenge Siria pe Silisia.

<sup>22</sup> Pe NeHalang nena mata mur nge Iutea nenge leteria manmanna nge Kristus, te naue ramak ero kura.

<sup>23</sup> Pe te longo mene pingak nge song ke teke, “Non pa nenge hunune ita nenge letera manmanna nem, ngana pa i haliu hot mulmule Helenga Urana Toto Ngana lo. Nga tele ngana heporeke mukam, pe nei ero ol.”

<sup>24</sup> Ke poinga nenge NeHalang poia at nge iau neu, poia hehei pe hana ke te heto haka totote NeHalang ene.

## 2

### *Iesus Nena Hekulkulonga Mur Te Iech Nge Paulus.*

<sup>1</sup> Iok, etu nge Silisia ke ak hesinga iri analoch pe henel het pe imem nai Parnapas mola mule nge Ierusalem. Pe e mene Titus pule ke koko luluch nge imem. <sup>2</sup> Ela nga lamau iange NeHalang hele at nge iau ke teke ela. Pe nga lamau, eare luluch nge hana papalauna mur iri toro pe e hele urume Helenga Urana Toto Ngana nem nenge e haliu hotote ke ulolo lala nge hana lomonmona mur. Iange lemek ero nge ak ume nemur nenge eume tettele pe nenge e umume ia nei hesil sio mana ke lasus. <sup>3</sup> Pe Titus i non lomona ngana ia iange i nena nge Krik pe iri te ririr us ero. Pe hana papalauna nemur te esia i nge koko nge iau pe te teke te riria

singina ol. Pe ero. Te ech taua i ke te riria singina ero. <sup>4</sup> E hele ia iri nemur iange hana hel te chananga ke te teke titiria mur ita, pe teteu at kome mana ke tetu luluch nge ita, pe teute olounga nga poinga nenge Iesus Kristus tunge at nge ita ke ulolo. Nga nenge Iesus i sipona mene hote ita ke tatu ke tapoi tetele. Pe hana nemur te teke te heloko teu mule ita langa hotonga nike ngana nemur nenge chiu hit tote ita. <sup>5</sup> Pe imem mo longo taua iri unne ero toto, iange mo teke Helenga Urana Toto Ngana tu ke manmanna mana nge imo pe ute heporeke letemo manmanna ngana ero.

<sup>6</sup> Pe hana papalauna nemur, iri siporia te longe lek helenga pe leteria elle mana pe te hele ia helenga unne e ero ol. (Nenge teke pingaria iuiu ma pingaria iuiu ero, iau e teke ute pele nga nem ero, iange NeHalang naue ita ke ita elle mana.) <sup>7</sup> Iri te hele ele iau ero. Tenau urume ke NeHalang kulos ia iau ke la e hele hote Helenga Urana Toto Ngana nei nge hana lomonmona ngana mur. Pomalam mana ke mange Petrus, nge la ke haliu hote lala nge Iuta mur. <sup>8</sup> NeHalang tunge kerkerenga lange Petrus ke i Iesus nena hekulkulonga nenge lala nge Iuta mur. Pe iau pule ke pomalam. NeHalang tunge kerkerenga at nge iau ke iau Iesus nena hekulkulonga nenge e lala nge hana lomonmona ngana mur. <sup>9</sup> Ieims pe Petrus pe Ioanes, iri hana papalauna nga NeHalang ana ume. Pe iri te eteia ke NeHalang tunge ume nei at nge iau. Pomalam te sisa peria nge imem nai Parnapas. Pe te hele ke te teke imem nai mola ke mo ume luluch nge hana lomonmona ngana mur pe iri tela ke teume luluch nge Iuta mur. <sup>10</sup> Pe te hele at nge imem ke te teke letemem metene iri nemur nenge reria ure halang ero. Pe nem, i ure palaungana nenge letek metene tettele nike ke e teke e popoia.



*Paulus Heleia Petrus Nge Antiok*

<sup>11</sup> Nga etue nenge Petrus at nge Antiok e heleia i nga matana pengpeng iange i poia poinga hel nge pengpeng ero. <sup>12</sup> Nga etue nenge Ieims pekngana mur te lohote nge Antiok ero kura, Petrus la ke ngau lululuch nge hana lomomona ngana mur. Iok, teat ke te puris ol pe Petrus matau sapele pe tu ke kangkanga mule nge hana lomomona ngana nemur. Petrus mataua iri iange iri Iuta. Pe pule iri tokoninga mur toto nga us rir ngana. <sup>13</sup> Pe Iuta mur hel te koko taole nge Petrus ke iri ul te poia poinga nem nenge aria henge-tau nachnai. Pomalam Parnapas nau taole nge iri pule.

<sup>14</sup> Pe enau pe te nanasia Helenga Urana Toto Ngana hele ngana ero. Pomalam e heleia Petrus nga iri lochloch ngana mataria ke e teke, “Petrus, iong lem nge Iuta. Pe heueu nei otu ke pomanga lem nge Iuta ero toto. Otu ke pomange hana lomomona ngana nemur. Pe pomerei nenge o teke o echia hana lomomona ngana nemur ke te nanasia poinga nenge Iuta mur?”

<sup>15</sup> “Ita, tatara mur te hoe ita pe ita Iuta mur nike. Pe ita hana lomomona ngana mur ero. Hana nemur, iri ‘hana porekreke ngana mur’ ia iri. <sup>16</sup> Pe ita ta eteia ke kue elle mana nge poia ita ke ta pengpeng nga NeHalang matana. Ngana koi nenge letera manmanna nge Iesus Kristus. Pe nenge ta nanas tau tote hotonga mur, kue nem poia ita ke ta pengpeng nga NeHalang matana ero toto. Ke pomalam, ita ul hana lomomona ngana mur, ita lochloch ta pengpeng nga NeHalang matana nga kue elle nem mana.

<sup>17</sup> “Pe nga poinga nenge letera manmanna pe ta nanas ia Kristus lape tames hot mallaha mana ke ita hana porekreke ngana mur, ke mange hana lomomona ngana nemur. Ia Kristus mai I muka muleia poinga poreke ngana mur kai? Ero

le! <sup>18</sup> Iange nenge teke e palchach sue ute pe e hemes heke mule, hulua te eteia nge e tamu tote hotonga pe iau non poreke ngana ke ulolo. <sup>19</sup> Iange hotonga nem rahit tote iau ero ol. Ke nga letek manmanna ngana e mete luluch nge Kristus ke ulolo. Pe NeHalang nauete etu ngak ol. <sup>20</sup> Ke iau sipok e maulul ero ol. Kristus nenge tu teu nge iau koi hemaui ia iau. Pe etu ke e maulul nga singik nei iange letek manmanna nge NeHalang Tuna. I lemene tau tote iau pe tung heke i sipona ke mene mule iau. <sup>21</sup> Pe ehul rumek ia NeHalang ero iange letena poreke ngana palaungana toto. Pe nenge teke hotonga nemur te hemas mule ita ke ta pengpeng nga NeHalang matana, Kristus mete ngana nem lape luna ero toto!”

### 3

*Kue Elle Mana Nenga Letera Manmanna Ngana*

<sup>1</sup> Imo Kalasia mur, amo hauaua toto. Iesus Kristus mete ngana nga manga toto nem, mo hemallaha hote luna lange imo ke ulolo. Pe pomere hana te channanga ia imo pe a nanas mene iri? <sup>2</sup> E teke e onteia imo nga ute elle mana: Imo mam a mene Opepengpeng ke merei? A mene kai nga hotonga nemur nenge a nanasia iri mai? Ero le! Imo a mene Opepengpeng iange a longe Helenga Urana Toto Ngana pe letemo manmanna ia. <sup>3</sup> Amo hauaua ngamo nem merei toto? Opepengpeng talune ana ume nge imo ke ulolo, ol pe a teke a heulo hote ume nem nga imo sipomo lemo kerkerenga? <sup>4</sup> Pe ure meena ngana nemur nenge te lohote nge imo nem luna palaungana toto la! Pe ngana kau lape hesil sio mana ke lasus mau? <sup>5</sup> Imo nem, NeHalang tunge Opepengpeng pe poia merakulo mur ke te lohote nga tunangamo. Pe pomerei nenge poia mai? Poia kai nga hotonga nemur nenge a nanasia iri mai? Ero nike! Poia nge

imo iange letemo manmanna nga Helenga Urana Toto Ngana nenge a longe.

<sup>6</sup> Anau lange Apraham. “Apraham letena manmanna toto nge NeHalang, pomalam NeHalang hetue i ke i non nge pengpeng.” <sup>7</sup> Iok, a eteia nei ke nek ol: Apraham tutuna mur laka iri lochloch ngana nenge leteria manmanna. <sup>8</sup> Pe NeHalang nena helenga nenge tehas sue ke ulolo, helelia ure nemur nge lape te lohot. Nenge teke, NeHalang lape hemas mule hana lomonmona ngana mur pule ke te pengpeng nga matana iange leteria manmanna. Pe NeHalang hele hot tele Helenga Urana Toto Ngana nem lange Apraham ke teke, “Nge iong mana lape E pete hulua lochloch ngana nga ich.” <sup>9</sup> Ke hulua lochloch ngana nenge leteria manmanna, NeHalang pete luluche iri nge Apraham. Iange Apraham i lete manmanna ngana ana non ia.

<sup>10</sup> Pe iri lochloch ngana nenge te teke te hemas mule iri siporia nga hotonga mur, NeHalang lape tuacholia ke poreke toto lange iri. Iange NeHalang nena helenga mur nenge tehas sue iri ke ulolo, hele ke teke, “Hotonga mur tema sio ke ulolo, pe mele hel nenge te longo tau lochloche ero NeHalang lape tuacholia ke poreke toto lange iri.” <sup>11</sup> Pe i mallaha mana ke mele nenge teke nanas tau mene hotonga mur, lape lohot ke pengpeng nga NeHalang matana ero toto. Iange “Hana nenge leteria manmanna mana lape tetu ke te pengpeng nga NeHalang matana.” <sup>12</sup> Ke Hotonga huna nga lete manmanna ngana ero. Iange Hotonga hele ke teke, “Mele nenge nanas taua Hotonga mur lape tu ke maulul.” <sup>13</sup> Ke hotonga ngingina mur koi ita, ke NeHalang lape tuacholia ke poreke at nge ita. Pe ero. Iange Kristus ol hot mule ita pe mene murra ke ulolo. Iange NeHalang

nena helenga nenge tehas sue ke ulolo, hele ke teke, “NeHalang letena inin ngana lape sio ke poreke toto nge iri nenge te heon heke iri nga manga toto.” <sup>14</sup> Ke nga poinga nenge Iesus poia nem, lape NeHalang pete hana lomonmona ngana mur ke pomanga nena helenga kerkereng ngana nenge tunge lange Apraham. Pe ita lochloch ngana nenge letera manmanna lape ta mene Opepeng-peng nenge Iesus Kristus helele ia.

### *Hotonga Mur Pe Helenga Kerkereng Ngana*

<sup>15</sup> Titik mur pe liliuk mur, lape e helelia ure nemur nenge lohotot nge ita ke kokoes, ke e hemallaha hote utar nenge e teke e heleleia: Nenge teke hana nai te talue reria helenga tomunga hel ana helenga e, mele pele heta mule ero pe tal heke mule unne la ero ol. <sup>16</sup> Pe nga nei NeHalang poia helenga kerkereng ngana nemur lange Apraham pe Apraham nette e. Ke Alalaha nem heleleia Apraham na tete mur ero. Apraham na tete mur tang ngana pomanga iri hulua. Pe nei ero. Hele mene Apraham nette pe tang ngana pomanga mele elle mana. Ke Alalaha nem helele ia laka Iesus. <sup>17</sup> Pe ure nenge e teke e helele ia, ngana koi nei: Nge nike NeHalang hele talue nena helenga tomunga hel ana helenga nem. Pe nga hoena, hesinga iri ana non kina analoch iri nai pe ana non kina pe analoch (430 ) het pe hotonga nemur te lohot ol. Pe hotonga nemur te chatoa NeHalang na helenga kerkereng ngana nem pe te saua ke lasus ero toto. <sup>18</sup> Iange nenge teke hotonga nemur nakuria nge te halaua ita ke ta mene maulinga nge koko, lape helenga kerkereng ngana nem lasus. Pe nei ero. Iange nga NeHalang nena poinga urana ngana mana, tung sue helenga kerkereng ngana nem lange Apraham.

**3:6:** Gen 15:6    **3:8:** Gen 12:3; Rom 4:3, 16    **3:10:** Deu 27:26    **3:11:** Hab 2:4; Kal 2:16    **3:12:** Lev 18:5    **3:13:** Deu 21:23; Rom 8:3    **3:16:** Gen 12:7    **3:17:** Exo 12:40    **3:18:** Rom 4:14  
**3:19:** Ume 7:38; Rom 5:20

19 Hotonga nemur talhot rume mene iri ol, pe aria ume utar? Aria ume laka nenge: Lape te hemallaha hote hehei pe hana reria poinga poreke ngana mur. Pe lape iri siporia te naue pe te amnei urume ke la het nga etue nenge helenga kerkereng ngana nem, nganangana lohote ia. Nenge Iesus i sipona lape at. Nga etue nenge NeHalang tung sue hotonga nemur, hekule angkelo mur ke te heleia lange Moses nenge tu nga NeHalang pe hana mur tunangaria. 20 Nga etue nenge NeHalang poia helenga kerkereng ngana nem lange Apraham, mele e nge tu nga iri nai tunangaria ero. Iange mele nenge tu nga tunangana umume nge hana nai. Pe nei ero, NeHalang poia nge Isipona.

21 Ke pomerei ol? Hotonga hele ke teke NeHalang na helenga kerkereng ngana nem lasus kai? Ero le! Iange nenge teke hotonga e nakuna nge tunge maulinga lape ta pengpeng nga NeHalang matana nga hotonga nem nenge ta nanasia. 22 Pe nei ero. Iange NeHalang nena helenga nenge tehas sue ke ulolo, hele ke teke, poinga poreke ngana hesum hite hulua lochloch ngana nga ich nei ke tehet. Pe nga lete manmanna ngana mana, NeHalang tung sue helenga kerkereng ngana nem. Ke pomalam iri nenge leteria manmanna nge Iesus Kristus lape te mene ure nenge NeHalang hele sue lange Apraham.

23 Nga etue nenge lete manmanna ngana nei lohote ero kura, hotonga nem chiu it tote ita. Pe tak ele mene ita ke la het nga etue nenge lete manmanna ngana nem lohote nga malaha. 24 Pe hotonga nem poi ke pomanga ara heteronga nenge nauele ita. Pe nga etue nenge Kristus at, hotonga nem hei tele ita ke tala sapele nge Kristus pe letera manmanna nge I. Ke pomalam lape NeHalang mene mule ita nge letera manmanna ngara

nem. 25 Pe heueu nei, letera manmanna ngara nem, lohote nga malaha ke ulolo. Pe hotonga nem rahite ita ero ol.

### *NeHalang Tutuna Mur*

26 Pe NeHalang tutuna mur imo lochloch iange letemo manmanna nge Iesus Kristus. 27 Pe imo lochloch nenge a mene henuninga nge Kristus, atu ke a pomange Kristus toto lo. 28 Pe a al mata rara ero ol, iange Iuta mur pe Krik mur pe iri nenge te umume nge mele hel pe iri nenge tetu ke tepoi tetele pe hehei pe hana, imo lochloch ngana nem, atu luluch nge Iesus Kristus ke imo elle mana. 29 Pe Apraham na tete mur imo iange Kristus nena hana mur imo. Pe lape a mene ure lochloch ngana nenge NeHalang heleia, nga nena helenga kerkereng ngana nenge tung sue lange Apraham.

## 4

1 Ure nenge e helele ia ngana koi nei: Mele sune lape mene lochloche temene nena ure mur. Pe lape i non palaungana pe nauele ure lochloch. Pe nga etue nenge i kino kura, ele haka nge mele nenge umume nge none ero. 2 Iange hana nenge tenau elele i pe hana papalauna mur lape tenau ele mene i ke la het nga etue nenge temene talue. 3 Nga tele ngana ita pule tapoi ke pomalam. Ita kinkino pe ta mene hengetoro nga hotonga nemur nga ich nei, nenge chiu hit tote ita. 4 Pe heueu nei ero ol. Iange nga ana etue pengpeng nenge NeHalang talue nike, kulosia tuna ke at. Hei e nga ich nei hoe I. Pe hotonga nemur tenau ele I ke I nanas tau tote. Pe ita pule tapoi ke pomalam. Ita kinkino pe ta mene hengetoro nga hotonga nemur nga ich nei, nenge chiu hit tote ita. 5 Pe at ngana nem, at ke ol hot mule iri nenge hotonga chiu hite iri. Ke pomalam lape ta lohote ke NeHalang tutuna mur ita. 6 Pe imo,

NeHalang tutuna mur imo. Ke ngana laka nenge kulosia Tuna Opene ke at tu teu nga letera pe ta heto ke ta teke, “Temek.”<sup>7</sup> Ke iong pomanga mele nenge umume nge none ero ol. Iong, NeHalang tuna iong ke ulolo, pomalam lape o mene ure lochloch ngana nenge heleia nga nena helenga kerkereng ngana nem.

*Paulus Letena Toto Ia Kalasia Mur*

<sup>8</sup> Nga tele ngana a eteia NeHalang ero pe a ume pulut mana nge aetapuna hel, nenge Nehalang toto ngana ia iri ero. <sup>9</sup> Pe heueu nei a etei tote NeHalang lo, nem pe e teke NeHalang hetue imo ke tutuna mur imo ke ulolo. Pe pomerei toto nenge ahul mule ke la a heila teu mule imo nga ure makuk leilei ngana mur pe hotonga porekreke ngana mur nga ich nei? A teke la ure nemur te chiu hit mule imo pullo? <sup>10</sup> Imo a iech elele etue papalauna mur pe teio mur pe hesinga mur pe etue e talun ngana ke langa het ngana! <sup>11</sup> Pe iau, e matau iange kikik ngak nenge e ume lulu-luchia nge imo lape hesil sio mana.

<sup>12</sup> Titik mur pe liliuk mur, e teke apoi ke mange iau. Iange ure nenge lohotos nge imo nem, iau e amneia ke ulolo. A poia ute pele nge heporeke iau ero. <sup>13</sup> Imo a eteia ke ulolo. Nga tele ngana toto singik haleles pe ela ke e haliu hote Helenga Urana Toto Ngana nge imo. <sup>14</sup> Pe ak haleles nem poi ke manga ollakanga nenge teke olleke imo. Pe imo a hira ele iau ero. Mutemo tau mene iau pe a mene iau ke pomalaka nga iau NeHalang nena angkelo e. Nem pe pomalaka nga iau Iesus Kristus i sipona, <sup>15</sup> pe a iech ele tote iau. Nga etue nem a unele ute nge iau ero toto. Pe rera iechinga nemur mai ngaria ol? Nenge teke nakumo, lape asul hote matamo mur pe a tunge iri at nge iau. <sup>16</sup> Heueu nei lape lek matana luluch nge imo ol, iange e heleia helenga nge man-manna. Ae?

<sup>17</sup> Hana ana mata nemur teume ke kikiria toto ke tepoi ole imo ke a nanasia iri. Pe te poia nga leteria poreke ngana. Pe te teke te heporeke ra kilanga urana ngana nei. Tepoi ke pomam iange te teke a heto hekeke iri. <sup>18</sup> Nenge teke hana te poia imo ke pomam, urana nge te poia ke kokoes nga leteria urana ngana. Nga etue nenge etu luluch nge imo pe nga etue nenge iau ero hatalia imo. <sup>19</sup> Auo! Tutuk mur, a poia iau ke e amneia melmelenga pullo! Melmelenga nei pomalaka nga heie nge tuna sechia i ke teke hohoho. Pe melmelenga nem lape tu nge iau ke la het nga etue nenge a nanas tau tote Kristus nena poinga mur. <sup>20</sup> Toinge ute pele ul mene iau ke la etu luluch nge imo heueu nei, ke poia ia ure nemur nenge e heleia iri nei. Iange etu pe letek tuanin rara sakilil ia imo.

*Helenga Opene Nge Heka Pe Sara*

<sup>21</sup> Iok, e teke e onteia imo nenge a teke a nanas taua hotonga mur: Imo mama longe hotonga hele ngana ero kai? <sup>22</sup> Hotonga hele ke teke, Araham tutuna mur iri nai. Tuna elle nge hei nenge umume nge iri pe tuna e pule nge nehei nenge tu ke poi tetele mana. <sup>23</sup> Pe tuna nenge hei nenge umume nge iri neu, tehoe i iange te nanasia poinga nenga leinga. Pe tuna nenge nehei nenge tu ke poi tetele mana nem, tehoe i ke nanasia helenga kerkereng ngana.

<sup>24</sup> Nananga nei luna la ke mai koi: Hehei nai nem te pomanga Helenga Tomunga Hel iri nai. Elle at nga hengen nenge Sinai pe hoe tutuna mur nenge hotonga chiu hit mene iri ke te nanas tau mene. Ke hei nenge Heka i pomanga hengen nem. <sup>25</sup> Pe hengen nenge Sinai tu nga tuele kina nenge Arapia, pe mes ke henonoua kilenge nenge Ierusalem heueu ana nei. Iange hehei pe hana nga kileng nem, hotonga chiu hit mene iri ke te mana teu toto nga ene. <sup>26</sup> Pe Ierusalem nenge tu nga lut nga tapa,

**4:10:** Rom 14:5; Kol 2:16  
21:2, 10

**4:22:** Gen 16:15; 21:2

**4:23:** Rom 9:7-9

**4:26:** Hip 12:22; Hem

**4:27:** Isa 54:1



tu ke poi tetele mana. Pe i tara toto ngana ia. <sup>27</sup> Iange hasinga nenge manga NeHalang nena alalaha hele ke teke:

“Tong hei nenge omes tamane pe ohoe tum e ero, o iech toto ol. Iong hei nenge o amneia melmelenga e nga hohonga ero, o tang hote lem iechinga.

Iange hei nenge tu mana lape tutuna mur iri halang toto nge hei nenge tu luluch nge ene.”

<sup>28</sup> Ke titik mur pe liliuk mur, imo NeHalang tutuna mur imo ke mange Isak. Nem nanas urume NeHalang nena helenga kerkereng ngana.

<sup>29</sup> Pe kol nenge tehoe i nga poinga nenga leinga, poi matana lala nge kol nenge tehoe i nga kerkerenga nenga Opepengpeng. Ke poinga nem ngana koi lohotot nge ita heueu nei. <sup>30</sup> Pe NeHalang na alalaha hele ke mere pule? Hele ke teke, “O kulosia hei nenge umume nge imo nem, iri nai tuna ke tela nga kileng unne. Iange tuna nem lape mene temene nena ure mur hele ero. Pe hei nenge tu ke poi tetele nem, tuna itoro lape mene lochloche temene nena urelu mur.” <sup>31</sup> Ke titik mur pe liliuk mur, hei nenge tu ke poi tetele mana nem, tutuna mur koi ita. Pe hei nenge umume mana nem, tutuna mur ita ero.

## 5

### *Nge Iesus Mana Lape Tatu Ke Tapoi Tetele*

<sup>1</sup> Iok, ute pele nge chiu ele ita ero ol iange Kristus i sipona mene hote ita ke ulolo. Pomalam tatu ke ta poi tetele mana ol. Ol pe ames ke kerkereng pe a longo tau pulute hana hel ero. Iange lape a heloko teu mule ita ke la aume mule nge iri pule.

<sup>2</sup> A longo ke nek! Iau Paulus koi e helele nei: Nenge teke atal teu luluche imo ke te riria singimo, ume nenge Kristus poia nem lape halaua

imo ero toto. <sup>3</sup> Pe lek helenga kerkereng ngana koi, iong non tei nenge ola ke te riria singim, urana nge o nanas tau tote hotonga lochloch ngana ol. <sup>4</sup> Amo hel te teke a nanas mene hotonga mur, iange te teke poia imo ke a pengpeng nga NeHalang matana. Nenge teke a poia poinga nem arir hote imo nge Kristus ke ulolo pe a hile NeHalang letena poreke ngana. <sup>5</sup> Pe ita, nga Opepengpeng nena kerkerenga, letera manmanna nge NeHalang pe tatu ke ta kulele mene I nge lape hetue ita ke ita hana nenge pengpeng nga matana. <sup>6</sup> Pe ita, nenge teke ta nanasia Kristus, poinga pa nenge ta ririr us pe nenge tarir us erochro ute pele ia ero. Ure nenge palaungana toto ngana laka letera manmanna ngana lo. Iange poi heke ita ke letera porekeia peknagara mur.

<sup>7</sup> Nga tele ngana a nanasia Kristus ke nek mana pe heueu nei ero ol! Itei nenge tamo ele mule imo pe poia imo ke a saleke rara? Mele nem poia imo ke a longo taua helenga manmanna ngana ero ol! <sup>8</sup> Mele nenge poia imo ke a saua letemo manmanna ngana nem, at nge Non nenge hesilei hote imo ero. <sup>9</sup> Anau ala amo ke nek. Ure nenge lohotot nem, pomalaka nga is unne sune mana nge tetal teua langa beret itach ngana, pe is nem poia beret lochloch ke puo haka sapele. <sup>10</sup> Pe iau letak manmanna toto nge Non Soke ke a tung teua imo langa ure nemur ero. Pe mele nge hetakinkine imo nem, e eteia i ero. Pe lape NeHalang tuachol ia lange i ke poreke toto. <sup>11</sup> Titik mur pe liliuk mur, hana hel te teke e hetottoro ke pomai, “Nenge teke tarir us ero ta pengpeng nga NeHalang matana ero.” Pe nem ero. Nenge teke e hetottoro ke pomam, pomere toto nge ure meena ngana mur te lohotot nge iau kura? Pe nenge teke reria helenga nem manmanna, lape lek hengetoro nenga Kristus ana manga toto, poi

ngarang mur ia iri ero ol. <sup>12</sup>Iau lemek toto ke hana nenge te hetakinkine imo nem, terir hote huria ke te lasus lochloch!

### *Maulinga Ke Koko Nga Opepeng-peng*

<sup>13</sup> Pe titik mur, NeHalang iua imo ke ulolo, ke apoi tetele mana ol. Ol pe lape apoi ke mere ol? A teke a poia singimo ke iech mana nga poinga poreke ngana mur? Apoi ke mam ero! A poia poinga nenge pomai koi: Mutemo taua pekngamo mur pe a halaua iri. <sup>14</sup>NeHalang tunge hotonga e nge palaungana toto. Pe nenge teke ta longo taua hotonga elle nem, ta longo taua hotonga lochloch ngana ke ulolo. Ana hotonga, ngana koi nei: "Mutem taua pekngam mur ke pomanga mutem taua iong sipom."

<sup>15</sup> Pe a nauala amo ke nek. Iange nenge teke a poi susun helel, lape ahun parai mule imo ke ahēt.

<sup>16</sup> Ke pomalam e hele ke e teke, a longia Opepengpeng ke halaua imo nga ai ngamo ke lape a nanasia ure poreke ngana nenge singimo lemene tautaua ero ol. <sup>17</sup>Iange Opepengpeng lemene ero toto ia poinga poreke ngana mur nenge singira lemene tautaua. Pe ita singira lemene tautaua poinga poreke ngana mur nenge Opepengpeng lemene ero toto ia. Ke hunelinga nei tu nga letera ke ulolo, pomalam tai nga lemene ngana ero ol. <sup>18</sup> Ke nenge teke o nanas tau mene Opepengpeng lemene ngana, lape hotonga nem nauale iong ero ol.

<sup>19</sup> Pe poinga poreke ngana nenge singira lemene tautaua, ngaria koi nemur. Poinga nenge: hehei pe hana tema lululuch nge hehei pe hana nenge eria pe reehei mur ia ero, pe kol e pe e mele mataria ach tau helel, pe salaunga ana poinga mur, <sup>20</sup> pe ta heto hekeke aetapuna mur, pe achunga, pe hunelinga, pe lete inin ngana, pe sara keke ngana mur pe letera inin haka manmana,

pe letera ia melehel ero, pe talas helel, <sup>21</sup> pe ta musmus, pe ta inin ke ara hauaua, pe tapeu lil helel, pe ure hel pule nenge pomau. E hele ke kerkereng lange imo ke ulolo, pe lape e hele ke kerkereng toto lange imo pule: Mele nenge nanas tau menmene poinga nemur, lape teu langa NeHalang nena naualanga pe nekinga ero toto.

<sup>22</sup> Pe Opepengpeng, ana ume nganangana mur koi nemur. Nenge: Mutera tautaua pekngara mur, pe ta iechech, pe tatu ke letera ma ke elle, pe ra melei tana ero nga etue nenge ure meena ngana lohotot, pe tanek hel ita, pe tapoi ke urana pe ta halau hel, pe ta poia poinga mur nge poia hehei pe hana ke saria kikina nge ita. <sup>23</sup> Pe tatal sue ita ke tatu ke nek manmana, pe ta hepengia tai ngara mur ke nek. Poinga mur nenge pomam hotonga pele heo ele ero. <sup>24</sup> Iri nenge te nanasia Kristus, tehul rumeria ia poinga poreke ngana mur nenge singiria lemene tautaua. <sup>25</sup> Opepengpeng tu teu nge ita pe hemaulia ita, pomalam tai ke ta nanas mene lemene ngana ol. <sup>26</sup> Tatal heke ita ero pe ta helete inin hel ero pe ta musmus pe sara keke hel ero.

## 6

### *A Halaua Pekngamo Mur Nga Ure Meena Ngana Mur*

<sup>1</sup> Iok titik mur pe liliuk mur, nenge teke a naue mele nge poia poinga poreke ngana, imo nenge Opepengpeng ume lululuch nge imo a hemas mule i ke nek. Pe imo a nauala amo ke nek pule; iange lape poinga poreke ngana nem lohōt nge imo pule. <sup>2</sup> Nenge teke a halaua pekngamo mur nga ure meena ngana mur, a nanas tau tote hotonga nenge Kristus. <sup>3</sup> Nenge teke mele letena ke teke i palaungana, pe manmanna ke i palaungana ero, mele nem channanga mule i ke ulolo. <sup>4</sup> Imo elle pe

elle anau teula mule nga lemo poinga mur ke nek toto, pe a totoia langa mele hel reria poinga ero. Pomalam lape mele nem iech toto nga i sipona nena poinga mur. <sup>5</sup> Ke imo elle pe elle a takiskisia ana melmelenga mur.

<sup>6</sup> Mele nenge te hetore i nga NeHalang nena helenga, urana nge tuacholia nga nena ure urana ngana mur lochloch lange ana hetoronga.

<sup>7</sup> A chananga mule imo ero. Iange mele pele nakuna nge channanga ia NeHalang ero toto. Ngaunga utar alona nenge otue, lape o lulu mule ngaunga nem mule. <sup>8</sup> Pe mele nenge tutua ke heiech mene singina lape lulu hote metenga. Pe mele nenge tutua ke heiech ia Opepengpeng, lape lulu hote maulinga ke koko. <sup>9</sup> Ke ra melei tana taua poinga urana ngana mur nenge ta popoia ero. Nenge teke ra melei tana ero, lape ta lulu hote maulinga ke koko nga ana etue pengpeng. <sup>10</sup> Ke nenge teke o esia neingam e nem nge poi ke merechre, o halaulaua i. Pe apoi ke urana toto lange pekngamo mur, nenge imo ul ames ke elle nga letemo manmanna ngana mur.

### *Helenga Hetala Ngana Pe Apalanga*

<sup>11</sup> A naue lo? Iau sipok e hasas ia alalaha nei nga perik. Pe ehas ngak nei e poia ke papalauna koi!

<sup>12</sup> Iri nemur nenge te heto hekeke iri pe te palut rarara, iri laka te echechia imo ke te teke te ririria singimo. Te poia poinga nei iange te mataua Iuta mur nge lape te hune iri iange leteria manmanna nga Kristus ana manga toto. <sup>13</sup> Pe hana nenge te riria iri te nanasia hotonga mur ero toto. Pe muteria toto ke te teke te riria imo pule. Pe nenge teke a longo taua iri ke a nanasia iri, hana nemur lape te palut laka rara pe te heto heke tote iri. <sup>14</sup> Pe iau, e palut laka rara nga ute pele nge pomam ero toto. E palut laka pe e heto heke tote ara Non Soke, Iesus Kristus nge mete nga ana

manga toto. Nga Iesus ana manga toto letek metene poinga nemur nga ich nei ero ol. Ke epoi ke pomanga none nenge mete ke hile ure lochloch ngana nga ich nei. <sup>15</sup> Nenge teke te riria singim pe nenge teke te riria singim ero, nem ute pele ero. Ure nenge palaungana toto ngana laka nenge NeHalang poia ita ke ita heueu ngana mule. <sup>16</sup> Iri lochloch ngana nenge te nanasia hotonga nei, leteria sio iange lape NeHalang letena porekeia iri pe mene luluche iri nge Israel mur. Israel nemur nenge NeHalang nena hana mur toto ia iri.

<sup>17</sup> Iok, nga lek helenga hetala ngana e teke, lemek ero nge none poi mule ure meena ngana e ke lohot nge iau ol. Iange chanchan munna nemur nga singik henonou hotpengpengia ke iau Iesus nena non toto.

<sup>18</sup> Titik mur pe liliuk mur, ara Non Soke Iesus Kristus letena poreke ngana lape tu luluch nge imo nga opemo mur. Manmanna.

## Epeses

### Alalaha Nenge Paulus Hassia Lange Epeses Mur

<sup>1</sup> Iau Paulus koi ehas ia alalaha nei. Nga NeHalang lemene ngana e lohot ke iau Iesus Kristus nena hekulkulonga.

Pe ehas ia alalaha nei ke lange imo NeHalang nena hana mur nge Epeses nenge te nanas tau tote Iesus Kristus.

<sup>2</sup> E hetalaulau ke Temere NeHalang pe Non Soke Iesus Kristus leteria urana ia imo pe te poia letemo ke ma ke nek.

#### *NeHalang Lape Tunge Ure Urana Ngana Mur Nga Tapa At Nge Ita*

<sup>3</sup> Ta heto heke NeHalang nenge ara Non Soke Iesus Kristus Temene. Nge Kristus mana NeHalang tung lochloche ure urana ngana mur nga Opepengpeng nenga tapa at nge ita. <sup>4</sup> NeHalang ala hote tapa pe ich ero kura pe hesilei hote ita ke nena hana mur nge pengpeng pe naue rera poinga poreke ngana e ero toto. I mutena taua ita <sup>5</sup> pomalam hesilei hote ita nge nike ke tutuna mur ita nga ume nenge Iesus Kristus poia. Pe ure nem lohot ke pomam ke nanas mene NeHalang lemene ngana nenge iech toto nge poia. <sup>6</sup> Ta heto heke NeHalang nge poi hote kue urana ngana nenge poia ita ke tatu ke nek nga nenge tung mene Tuna nenge mutena taua, at nge ita. <sup>7</sup> Iange Kristus lome ita nga eina nga metengana pe sau rera poinga poreke ngana mur ke te lasus toto. Pe nekinga nenge NeHalang poia nem i ure nenge palaungana toto <sup>8</sup> nenge hile hot lochloche letena at nge ita nga letena tuanin ngana pe letena matana ngana urana toto ngana. <sup>9</sup> NeHalang iech toto nge poia ke pomai nga nenge hemalaha hote letena tuanin ngana nenge

talkomkome at nge ita, nenge lape heulo hote nga ume nenge Kristus poia. <sup>10</sup> NeHalang teke poia letena tuanin ngana nem ke lohot nga etue nenge i sipona talue nenge lape poia ure lochloch ngana nga ich pe nga tapa ke te eukirau pe tenau haka aria soke nge Kristus.

<sup>11</sup> Ure lochloch ngana te lohot ke pomanga NeHalang letena tuanin hot ngana ia. Ke nge Kristus mana NeHalang hesilei hote ita ke nena hana mur ita nga nena ume. Pe poia ke nanasia utar nenge letena matana hote ke teke poia nga talun ngana nike. <sup>12</sup> Poia ke pomam ke imem nenge mo kulelele Kristus tala nike, mo heto heke NeHalang nena hemalmalinga nge palaungana toto. <sup>13</sup> Pe imo Epeses mur pule a longe helenga manmanna ngana nga helenga urana toto ngana nenge NeHalang lape mene mule imo pe letemo manmanna nge Kristus. Nga etue nenge letemo manmanna, NeHalang heilangaia imo ke cholo ele imo ke nena hana mur imo. Ngana laka Opepengpeng nenge hele talaia ke teke tunge lange imo. <sup>14</sup> Pe Opepengpeng nem i lala nenge heilangia ure nenge lape ta mene, nenge NeHalang heleia ke teke tunge lange nena hana mur. Ke nem hekerkereng ia letera nenge i lape mene nena hana mur ita ke ta heto heke i NeHalang nenge urana toto.

#### *Paulus Nena Hetalaulaunga*

<sup>15</sup> Ke pomalam nga etue nenge e longe imo nge letemo manmanna nge Non Soke Iesus pe mutemo taua NeHalang nena hana mur, <sup>16</sup> e hele urana lange NeHalang ke kokoes mana ia imo, pe letek metene imo ke e hetalaulau amo lala nge NeHalang. <sup>17</sup> E hetalaulau amo ke NeHalang nenge ara Non Soke Iesus ana Palau pe Temere nenge urana toto tunge lete matana ngana nenga Opepengpeng lange imo ke a etei



tote NeHalang. <sup>18</sup> Pe e hetalaulau amo pule ke NeHalang poia letemo matana ngana mur ke tualeme ke pomanga lemenga ke a eteia ure nenge iu imo ia pe a kulkulele. Ngana laka ure urana ngana mur nenge heleia ke teke tunge lange nena hana mur. <sup>19</sup> Pe e hetalaulau amo ke a eteia NeHalang nena kerkerenga kikina ngana palaungana, nenge umume nge ita nenge letera manmanna. Kerkerengnga nem pomalaka nga kikina ngana nenge palaungana toto, <sup>20</sup> nenge poia ke hemaule heke mule Kristus nga metenga pe here i nga ilina ele nenga pen tamalmal nga lut nga tapa. <sup>21</sup> Ke Kristus nena kerkerenga palaungana nem soke toto nga kerkerenga mur lochloch nga etue nei pe nga hoena pule. I soke toto nge ope mur pe naungaala mur pe hotonga mur pe hana papalauna mur. Pe Kristus ene nenge NeHalang tunge lange i, pingana iuiu toto nga hulua lochloch eria. <sup>22</sup> Pe NeHalang tunge kerkerenga lange Kristus pe talue iri lochloch ngana ke Kristus nauele iri pe hemes hote i ke nauele iri lochloch nga mata nenge NeHalang <sup>23</sup> nenge Kristus singina ia. Pe mata nem muta toto ia Kristus na kerkerenga pe Kristus tu purpure ure lochloch nga kileng lochloch ngana.

## 2

### *Ta Mene Maulinga Nge Kristus*

<sup>1</sup> Nge nike atu ke pomanga a mete lo iange a longo ole taua NeHalang pe a popoi poinga poreke ngana. <sup>2</sup> Nga etue nem atu ke a nanas menmene poinga nemur nga ich nei pe a nanas mene ope poreke ngana mur nga tapa sana aria palau. Ke heueu nei ope nem tu ke umume nge iri nemur nenge te longo olole nge NeHalang. <sup>3</sup> Nge nike ita lochloch tatu ke pomange iri, ke ta heiech mana ia singira nga poinga poreke

ngana mur. Ke urana nge ita pe hulua lochloch nenge te longo olole ta amneia melmelenga nga NeHalang letena inin ngana iange tapoi ke pomange iri.

<sup>4-5</sup> Ita tatu ke pomanga ta mete ke ulolo iange nga rera poinga poreke ngana mur, pe NeHalang mutena tau tote ita kura iange letena urana ngana palaungana toto. Ke pomalam poia poinga urana ngana toto ke mene mule ita pe tunge maulinga at nge ita nge Kristus. <sup>6</sup> Pe ita Kristus nena hana mur ita ke pomalam he maule heke mule ita luluch nge Iesus Kristus, pe hetakile ita ke ta are luluch nge i nga lut nga tapa. <sup>7</sup> Poia poinga nei ke teke hemallaha hote lange iri nenge he pule nga nena poinga urana toto ngana pe nena mutenga nenge hemallaha hote at nge ita nge Iesus Kristus. <sup>8</sup> Iange nga NeHalang nena poinga urana toto ngana, mene mule imo nenge letemo manmanna. Imo sipomo a mene mule imo ero. Poinga nem i tunginga nenge at nge NeHalang. <sup>9</sup> Lemo ume urana ngana mur poi hote ure nem ero. Ke pomalam a palut leke imo ero. <sup>10</sup> Ita, NeHalang i sipona ume hote ita pe tatu ke elle luluch nge Iesus Kristus. Pe ala hote ita ke ta poia ume urana ngana mur nenge tatalo ele tele nge nike ke teke ta poia.

### *Kristus Heluluch Tele Ita Ke Ita Elle*

<sup>11</sup> Ke pomalam letemo metene ke nek, imo tehoe imo ke imo hana lomonmona ngana mur pe Iuta mur te hetue imo ke “hana nenge te ririr us ero” pe iri te hetue iri siporia ke “hana nenge te ririr us” (nenge nem i ure nenge hana peria poia nga iri siporia singiria mana). <sup>12</sup> Letemo metene, nge nike atu ke kangkanga nge Kristus pe lemo nge Israel ero. Lemo nga kileng tau ngana pe atu teu nga tomunga hel ana helenga nenge NeHalang poia lange nena hana mur

**1:19:** Kol 1:11

**1:20:** Psa 110:1; 2Ko 13:4; Kol 2:12

**1:21:** Kol 1:16; 2:10

**1:22:** Psa 8:6

**1:23:** Rom 12:5; Epe 4:10, 15; Kol 1:18

**2:1:** Kol 1:21; 2:13

**2:2:** Kol 3:7; Tit 3:3

**2:3:** Kol 3:6

**2:4-5:** Rom 6:11-13

**2:6:** Kol 2:12

**2:9:** 1Ko 1:29-31; 2Ti 1:9

**2:10:** Tit 2:14

**2:12:** Rom

9:4; Kol 1:21

**2:13:** Kol 1:20

ero pe atu pulut mana pe a eteia NeHalang ero. <sup>13</sup> Pe heueu nei atu ke elle luluch nge Iesus Kristus. Imo nenge atu ke kangkanga nge NeHalang nge nike, Kristus eina nenga metengana mene imo ke a at rochroi toto nge i ol.

<sup>14</sup> Kristus i sipona poia imem Iuta mur pe imo hana lomomona ngana mur ke letera ma ke elle. Poia Iuta mur pe hana lomomona ngana mur ke te lohohot ke iri elle. Nge nike aria matana i helel pe tetu ke elle ero, pe Kristus heparai sue mapuo nenge tu nga tuna ngara ke ma tote iri nga i sipona singina nenge tung heke ke mete. <sup>15</sup> Pe saua Iuta mur reria hotonga luluch nga ana helenga mur ke te lasus, iange teke lele polong ke hana aria tuluk nai nem te lohohot ke iri hana heueu ngana mur pe te lohohot ke iri elle mana luluch nge i. <sup>16</sup> Pe Kristus metengana nga manga toto nem teke hemete hunelinga nenge lohohot nga tuluk nai nem pe poia iri ke te lohohot ke iri elle pe laia iri nge NeHalang. <sup>17</sup> Kristus at ke haliu hote helenga urana toto ngana nga polong lele ngana nge imo hana lomomona nenge atu ke kangkanga nge NeHalang pe nge imem Iuta mur nenge motu ke rochroi nge i. <sup>18</sup> Ke nenge teke letera manmanna nge Kristus, Opepengpeng elle nem poia ita ul hana lomomona ngana mur pe Iuta mur ke ta lala nge Temere.

<sup>19</sup> Ke pomalam imo hana lomomona ngana mur lape te hetue imo ke hana lomomona ngana mur ero ol. Heueu nei atu ke elle luluch nge NeHalang nena hana mur lochloch pe atu teu nga mata nenge i. <sup>20</sup> Pe apoi ke pomanga pele nenge te hemes heke nga ich kerkereng ngana, nenge hekulkulonga mur pe hetatalonga mur. Pe Iesus Kristus i um kerkereng ngana nenge pele nem ana isong ia. <sup>21</sup> Ke i sipona laka nenge ratua ele pele nem pe poia ke lohohot ke Non Soke nena tunginga ana pele nge heo

ngana. <sup>22</sup> Pe imo hana lomomona ngana mur pe Iuta mur, Opepengpeng umume nge imo ke imo elle luluch nge Kristus. Ke pomalam a lohohot ke imo NeHalang nena pele nenge Opene tu teu ia.

### 3

#### *Paulus Haliu Hote Helenga Urana Toto Ngana Lange Hana Lomomona Ngana Mur*

<sup>1</sup> Iau Paulus koi etutu nga tuele au ngana iange e umume nge Iesus Kristus ke e halaulaua imo hana lomomona ngana mur.

<sup>2</sup> Imo lape a longe ke ulolo ke NeHalang letena urana ia iau ke tunge ume nei at nge iau ke e halaua imo.

<sup>3</sup> Pe hemallaha hote nena helenga talkomkome ngana ke henonoua at nge iau pe ehas sue unne sune lo.

<sup>4</sup> Pe nenge teke a sisia ure nenge ehas sue, lape a eteia ke iau e etei tote helenga talkomkome ngana nemur nenge Kristus.

<sup>5</sup> NeHalang hemallaha hote helenga nei lange hana nemur nenge tetu nge nike ero. Pe heueu nei hemallaha hote lange nena hekulkulonga pe hetatalonga pengpeng ngana mur nga ume nenga Opepengpeng. <sup>6</sup> Helenga talkomkome ngana nei ngana laka nenge: Helenga urana toto ngana poia imo hana lomomona ngana mur ke imo pe imem Iuta mur, ita ul ta mene ure urana ngana mur nge NeHalang pe ta lohohot ke ita elle. Pe tatu teu pule nga ure nenge NeHalang heleia ke teke poia nge Iesus Kristus.

<sup>7</sup> Pe e lohohot ke iau ume ana non nga helenga urana toto ngana nga NeHalang nena tunginga nga nena poinga urana toto ngana. Pe i sipona hekerkereng ia iau nga ume nem.

<sup>8</sup> NeHalang nena hana mur lochloch te urana toto nge iau ke toinge e nge iri mene ume palaungana nei, nem lape urana pol. Pe ero. NeHalang

tunge tunginga nem at nge iau ke e haliu hot lange hana lomomona ngana mur nga helenga urana toto ngana nenge lape te mene ure urana ngana nenge Kristus. Ure urana ngana nemur, ta etei teu ke langa het ngana ero. <sup>9</sup> Nge nike NeHalang ala hote ure lochloch pe talkome letena tuanin ngana nga ure nenge teke popoia nga etue talun ngana nike. Pe heueu nei tunge ak ume nenge e haliu hote ure talkomkome ngana nem lange hehei pe hana lochloch. <sup>10</sup> NeHalang teke poia ke mai, ke ope nemur nenge tenau ele tapa sana nga reria kerkerenga, te esia nena mata pe tenau urume letena matana ngana mur nge ana lala pe lala. <sup>11</sup> Ure nei lohohot ke pete tote NeHalang letena tuanin hot ngana ia nga talun ngana nike, ke poia ke lohohot nge ara Non Soke Iesus Kristus. <sup>12</sup> Ita tatu ke elle luluch nge Kristus pe letera manmanna nge i. Ke pomalam tala ke tames nga NeHalang matana pe ta matau ero. <sup>13</sup> Ke pomalam e teke e hele lange imo ke letemo meena nga melmelenga nenge lohohot nge iau ero. Ak melmelenga nei lape halau tote imo ke a mene hemalmalinga.

#### *Paulus Hetalaulau Epeses Mur Aria*

<sup>14</sup> Ke nenge nem mana poia iau ke e tualou sio nga Temere matana. <sup>15</sup> I mana poia iri lochloch nga tapa pe ich ke tetu. <sup>16</sup> Pe e hetalaulau lange i nenge nena hemalmalinga palaungana ke hekerkereng ia letemo nga Opene kikina ngana, <sup>17</sup> ke letemo manmanna pe Kristus tuteu nga letemo. Pe e hatalaulau ke mutenga tu ke sik teu toto nge imo pe huna toto nge imo. <sup>18</sup> Pe e hetalaulau ke NeHalang hekerkereng ia imo pe nena hana mur lochloch ke a eteia Kristus nena mutenga ke nek. Nga pongponga ngana pe sase ngana pe ana lome nenge langa lut pe sio toto ngana. <sup>19</sup> Kristus nena

mutenga palaungana toto nga mele etei ngana. Pe e hatalaulau amo ke a eteia mutenga nem, pomalam lape NeHalang hemuta heke tote imo nga ure nemur nenge teke tunge lange imo.

<sup>20</sup> Pe nga NeHalang nena kerkerenga nenge umume nge ita, i nakuna nge poia ure mur nge halang toto ke te lohohot nge ita. Poi ngana nem lape ris tote ure nemur nenge lape ta ontei i ia pe nenge letera tuaninin ia iri. <sup>21</sup> Ita lochloch nenge tatu ke elle luluch nge Iesus Kristus pe tatu teu nga NeHalang nena mata ta hemallaha hote nena hemalmalinga palaungana nga etue lochloch ke koko. Manmanna.

## 4

### *Tatu Ke Elle Luluch Nga Kristus Singina*

<sup>1</sup> Iau etu nga tuele au ngana iange e ume nge Non Soke, pe NeHalang iua imo ke nena hana mur imo. Ke pomalam e hele ke kerkereng toto lange imo ke a nanasia atu ngamo nenge NeHalang iu imo ia. <sup>2</sup> Kokoos atal sue imo pe apoi ke nek lange iri hel pe atu ke nek mana pe a henonou hote lemo mutenga lange iri hel pule ke a long teua iri. <sup>3</sup> Imo, Opepengpeng kale tele imo ke letemo ma ke elle pe aume ke kerkereng ke a nanas mene poinga nem. <sup>4</sup> Ita ta poi ke pomanga singira elle mana pe Opepengpeng elle mana pe NeHalang iua ita ke ta kulele ute elle mana. <sup>5</sup> Pe Non Soke elle mana pe letera manmanna ngana elle mana pe ta mene henuninga elle mana nenge henonou ke ita NeHalang nena hana mur. <sup>6</sup> Pe NeHalang i toro mana nenge hehei pe hana lochloch Temeria ia, pe i nauele ure lochloch pe tu purple kileng lochloch pe tu teu luluch nge hehei pe hana lochloch.

<sup>7</sup> Pe Kristus tunge tunginga nenga nena poinga urana toto ngana nge ita elle pe elle. Pe tunge ke nanas mene i

sipona lemene ngana. <sup>8</sup> Ke pomanga NeHalang nena alalaha nenge tehas sue ke ulolo, hele ngana nenge hele ke teke,

“Nga etue nenge lohaka langa lut nga tapa,  
mene hehei pe hana nenge hekou sue iri ke te nanas olole i.  
Pe tunge tunginga mur lange hana mur.”

<sup>9</sup> Helenga nenge hele ke teke, “Lohaka langa lut nga tapa” helenga nei luna pomerei? Luna ma ke mai koi: I sio la tala nga kileng nenge sio toto nga ich. <sup>10</sup> Ke i nenge sio la nem, i sipona laka nenge lohaka la mule nga lut nem. Pe ristote tapa mur ke pomalam tu ke purpure kileng lochloch. <sup>11</sup> Pe tunge tunginga lange hana hel ke te lohok ke iri hekulkulonga pe hel iri hetatalonga pe hel iri hana nenge te haliu hote helenga urana toto ngana pe hel iri hana nenge tenau ele NeHalang nena hana mur pe hel iri hetoronga. <sup>12</sup> Ke Kristus poi ke pomai iange teke tatalo ele NeHalang nena hana mur ke te poia nena ume urana ngana mur. Pomalam lape hulua halang toto te lohok ke iri elle mana nga Kristus singina. <sup>13</sup> Pe ume nem songong ke la het nga etue nenge ta puotom tele hel ke ita elle mana pe ta etei ngara nge NeHalang Tuna lohok ke elle mana, pe letera manmanna ngara kerkereng pe tapoi ke pomange Kristus toto.

<sup>14</sup> Iange I teke tapoi ke pomange aina kikino ngana ero ol pe tapoi ke pomanga aka nenge ruach ana mee ulo rerere ero ol. Pe hana nenge te pallaklaka, reria hengetoro mur te mene ita ke pomanga tuttula ke tala ke mai pe mau ero ol. Hana nemur te totoia kue halang ke te teke te helosio ia ita nga letera manmanna ngana mur. <sup>15</sup> Ta nanas ia iri ero. Ta nanas mene helenga manmanna ngana pe mutera taua hehei pe hana. Nenge

teke tapoi ke pomai lape ta pile teu toto luluch nge Kristus pe ta poi ke pomange I nga kue lochloch. <sup>16</sup> Kristus pomanga ita palpalra ia pe singina mur koi ita pe tunge ume mur at nge ita lochloch elle pe elle. Pe nenge teke ta poia rera ume mur ke nek lape ta pupuo ke kerkereng toto pe mutera tau helhel.

### *Tatu Ke Ta Nanasia Poinga Heueu Ngana*

<sup>17</sup> E teke e hele lange imo ke pomai nga Non Soke ene: Hehei pe hana nenge tetu pulut mana pe leteria manmanna ero, imo apoi ke pomange iri ero. Iri leteria tuanin ngana mur tu manmana nga ure nemur nenge nganangana ero. <sup>18</sup> Iri ramaria kerkereng pe lemeria ero nge te longo tau ke te eteia NeHalang ero toto. Ke pomalam leteria matana ngana auala mana pe te kangkanga toto nga maulinga nenge NeHalang tunge. <sup>19</sup> Iri te amneia meinga unne nge tu teu nge iri ero ol, ke tepoi manmana poinga poreke ngana. Pe salaunga ana poinga kik heke tote iri ke te poia ke ele la toto.

<sup>20</sup> Pe imo, te hetore imo nga Kristus pe te hetore imo ke apoi ke pomam ero. <sup>21</sup> Manmanna ke imo a longe nena helenga ke ulolo pe te hetore imo nga helenga manmanna ngana nenge at nge Iesus. <sup>22</sup> Te hetore imo ke te teke a hile hote lemo poinga nike ngana mur nenge a popoia iri nge nike. Iange poinga nemur lape channanga ia imo pe poi heke letemo ke a poia poinga poreke ngana pe lape heporeke tote imo. <sup>23</sup> Pe imo te hetore imo ke a poia letemo ke heueu ngana <sup>24</sup> pe a lohok ke imo hehei pe hana heueu ngana mur. Pe mele heueu ngana nenge pomam te ume hote ke pengpeng toto pe lemlem ke pomange NeHalang.

<sup>25</sup> Ke pomalam a pallaka rara ero ol. A heleia helenga nge man-

**4:9:** Ioa 3:13    **4:11:** 1Ko 12:28    **4:13:** Kol 1:28    **4:15:** Kol 1:18; 2:19    **4:17:** Rom 1:21; 1Pi 1:14    **4:22:** Rom 8:13; Kol 3:9    **4:23:** Rom 12:2    **4:24:** Gen 1:26; Kol 3:10    **4:25:** Zec 8:16; Kol 3:8-9    **4:26:** Psa 4:4; Iei 1:19-20



manna lange hehei pe hana iange ita lochloch ta lohot ke ita elle nga Kristus singina. <sup>26</sup> Pe nenge teke letemo inin nga ute, a nauala ke nek iange lape letemo inin ngana nem poia imo ke a losio nga poinga poreke ngana. Ke pomalam a rahite letemo inin ngana nem ke sase ero. Chaia matana sio ero kura pe a poia ke het nike. <sup>27</sup> A longala teua non poreke ngana ke poia nena ume unne nge imo ero toto. <sup>28</sup> Mele hel nenge te kemkeme, te keme ero ol pe te talun ke te ume ke te mene reria urelu urana ngana hel nenge te ume hote nga iri siporia peria. Pomalam lape te tung peria pule ke te halaua iri hel pule nga umtutuna, iri nenge reria urelu ero.

<sup>29</sup> Pe a hele hote helenga poreke ngana nemur nenge lape heporeke mele hel ero. A hele mene helenga nemur nenge hekerkereng ia iri pe halaua iri nga utar nenge muteria taua. Pe mele hel nenge te longlonge iong nge o helele, lem helenga nem lape halaua iri pule. <sup>30</sup> Pe a helete ininia NeHalang nena Opepengpeng ero. Opepengpeng i NeHalang nena hengeilang nenge nena hana mur imo pe a kulele mene etue nenge lape at ke mene mule imo. <sup>31</sup> A hile hote lemo poinga nenge letemo poreke tautaua mele hel pe letemo ininin pe a hele inin tau hehel pe a keres tau hehel pe a hele porekreke mele hel. A poia poinga poreke ngana e lange mele ero. <sup>32</sup> Apoi ke urana lange pekngamo mur pe mutemo taua iri pe a saua reria poinga poreke ngana mur ke te lasus toto ke pomange NeHalang nge saua lemo poinga poreke ngana mur ke te lasus toto nga ume nenge Kristus poia.

## 5

### *Tai Ke Pomanga Ta Tutu Nga Lemenge*

<sup>1</sup> Imo NeHalang tutuna mur imo nenge mutena tau tote. Ke pomalam aume ke kerkereng pe apoi ke pomange i. <sup>2</sup> Pe mutemo tautaua hehei pe hana ke pomange Kristus nge mutena taua ita pe tung heke i sipona ke halaua ita, ke pomanga tunginga pe tunginga inangana ehech ngana nenge lange NeHalang.

<sup>3</sup> Ke pomalam a hile hot tote salaunga ana poinga pe nenge a poia poinga tunten ngana mur nenge muna hulu pe nenge a teke lemo urelu halang nge mele hel. Iange NeHalang nena hana mur nenge pengpeng, poinga nemur urana nge iri ero. <sup>4</sup> Pe pule a tamal hote helenga poreke ngana ero pe a penpen ero pe songingalele nenge poreke a heleia iri ero. Ure nemur te urana ero nge a poia. Pe a hele urana pe a heto heke NeHalang iange i mene hote imo nga poinga nemur. <sup>5</sup> E hele lange imo pengpeng: Mele nenge tal teu tote i langa poinga nenge salau hali pe popoi poinga poreke ngana pe mememelei urelu, i heto hekeke aetapuna mur pe lape teu langa NeHalang pe Kristus reria naungaala pe nekinga ero toto. <sup>6</sup> Mele hel lape te pallaklaka ia imo nga ure nemur nenge manmanna ero. Imo a longo tau ero iange ure nemur lape longia NeHalang letena inin ngana ke lohot nge iri nenge te longo ole taua i. <sup>7</sup> Ke pomalam ama lange iri ero.

<sup>8</sup> Nge nike atu teu nga kileng au ngana pe nga etue nenge a lohot ke Non Soke nena hana mur imo pe atu teu nga lemenga. Ke pomalam atu ke pomanga hehei pe hana nenge te tutu nga lemenga. <sup>9</sup> Iange NeHalang na lemenga poi hote ure urana ngana mur halang pe poi hote tunga nge pengpeng pe poi hote ure manmanna ngana. <sup>10</sup> Aume ke kerkereng ke a eteia poinga nemur nenge poia Non Soke ke iech. <sup>11</sup> Pe a nana-

**4:29:** Kol 4:6    **4:30:** Isa 63:10; Epe 1:13-14; 1Te 5:19    **4:31:** Kol 3:8    **4:32:** Mat 6:14; 18:22-35; Kol 3:12-13    **5:1:** Mat 5:48    **5:2:** Exo 29:18; Hip 10:10    **5:5:** 1Ko 6:9-10; Kol 3:5    **5:6:** Rom 1:18; Kol 2:4, 8    **5:8:** Ioa 12:36; Epe 2:13; Kol 1:13; 1Pi 2:9

sia hehei pe hana nenge tetu nga kileng au ngana reria poinga poreke ngana mur ero. Poinga nemur tepoi hote ute pele nge urana ero. Pe urana nge a hemallaha hote lange hehei pe hana ke poinga nemur te poreke. <sup>12</sup> Meinga ana poinga laka nenge tepoi komkome nem pe lape e meia iau pule nga nenge teke e heleia poinga nemur lange imo. <sup>13</sup> Pe ure lochloch ngana lape lohote ke mallaha nga lemenga tualeme ngana <sup>14</sup> iange lemenga tualeme hatalia ure lochloch ke ta naue. Ke ana helenga laka nenge te heleia ke te teke:

“Tong nenge o mamamani o memete!

O lohaka mule nga metenga ol pe Kristus tua leme hatalia iong.”

<sup>15</sup> Ke pomalam a nauala amo ke nek toto nga atu ngamo. Ai pulut rara mana ke pomanga amo hauaua ero. Letemo matana ke nek pe ai. <sup>16</sup> A umeia lemo ume urana ngana mur ol, iange etue nei i etue nenge hehei pe hana te popoi poinga poreke ngana mur. <sup>17</sup> Ke pomalam apoi ke pomanga hauaua mur ero ol, letemo matana hote utar nenge Non Soke lemene taua ke teke a poia. <sup>18</sup> A inia ech kerkereng ngana ke amo hauaua ia ero iange lape heporeke imo. A longala teua Opepeng-peng lange imo ke hemuta heke imo. <sup>19</sup> Nga etue nenge a helele, letemo metene peunga nemur nga NeHalang nena alalaha nenge Sam pe peunga mur nenge Opepeng-peng poi heke nga letemo. A peupeu pe a poi heke peunga mur nga letemo ke a heto hekeke Non Soke. <sup>20</sup> A hele urana lange Temere NeHalang ke kokoes nga ure lochloch ngana iange atu ke elle luluch nge ara Non Soke Iesus Kristus.

<sup>21</sup> A longo tau helhel. Ke nga poinga nem lape a henonou hote Kristus ke amo soke ia.

### *Hehei Mur Pe Eria Mur*

**5:13:** Ioa 3:20-21    **5:14:** Isa 26:19; Rom 13:11    **5:15:** Kol 4:5    **5:18:** Luk 21:34    **5:19:** Kol 3:16    **5:20:** Kol 3:17    **5:21:** 1Pi 5:5    **5:22:** Kol 3:18; 1Pi 3:1    **5:23:** 1Ko 11:3; Epe 1:22    **5:25:** Kol 3:19; 1Pi 3:7    **5:26:** Tit 3:5    **5:27:** 2Ko 11:2; Kol 1:22    **5:31:** Gen 2:24; Mat 19:5    **5:32:** Hem 19:7

<sup>22</sup> Imo hehei a nanasia emo mur reria helenga ke pomanga a nanasia Non Soke nena helenga. <sup>23</sup> Iange imo, emo mur tenau ele imo ke pomange Kristus nge nauele iri mata nenge NeHalang. Pe iri mata nenge NeHalang tepoi ke pomanga Kristus singina pe Kristus mene mule iri. <sup>24</sup> Ke iri mata nenge NeHalang te nanasia Kristus, pomalam imo hehei a nanasia emo mur nga ure lochloch.

<sup>25</sup> Pe imo hana mutemo taua lemo hehei mur ke pomange Kristus nge mutena taua iri mata nenge NeHalang pe tung heke i sipona ke halaua iri <sup>26</sup> pe poia iri ke NeHalang nena hana mur ia iri. Ke Kristus nena helenga poia iri mata nenge NeHalang ke te lemlem nga henuninga nenga ech. <sup>27</sup> Pe poia iri ke nakuria urana pe te sinaha toto iange i sipona teke mene iri, pe teke poinga poreke ngana e tu nge iri ero pe ure muna ulu ngana e tu nge iri ero pe utar e pule nge poreke tu nge iri ero. <sup>28</sup> Ke pomalam mana, imo hana mur mutemo taua lemo hehei mur ke pomanga mutemo tau ngamo ia singimo mur. Non e nenge mutena taua nehei poia ke pomanga mutena taua i sipona. <sup>29</sup> Mele pele lemene ero ia i sipona singina ero, nei manmanna. Ita ta nauele singira mur pe ta hengaua iri ke pomanga Kristus poi ngana ia lange iri mata mur <sup>30</sup> iange ita Kristus apena pe penna mur koi ita. <sup>31</sup> Ke pomanga NeHalang nena helenga nenge tahas sue ke ulolo, hele ngana nenge hele ke teke, “Halangina heueu ngana mur te hile tataria mur pe tetemeria mur pe te lohote ke iri elle mana nga singiria.” <sup>32</sup> Helenga talkomkome ngana nei luna palaungana toto. Iau e heleleia Kristus pe iri mata mur. <sup>33</sup> Pe helenga nem lange imo pule. Imo elle pe elle mutemo taua lemo hehei mur, ke pomanga mutemo tau

ngamo ia imo sipomo, pe imo hehei a poi ke nek lange emo mur.

## 6

### *Imo Kinkino Ngana Pe Tetememo Mur Pe Tatamo Mur*

<sup>1</sup> Iok, imo kinkino ngana urana nge a longo taua tetememo mur pe tatamo mur iange Non Soke nena non mur laka imo pule, pe poinga nem urana nge imo nge a poia. <sup>2</sup> NeHalang nena hotonga nenge i tala toto pe lohohot luluch nga helenga manmanna ngana, hele ke teke, "O renga temem pe tam." Pe helenga manmanna ngana nenge lohohot luluch ia hele ke teke, <sup>3</sup> "Nenge teke apoi ke pomam, ure lochloch ngana nenge urana lape te lohohot nge iong pe otu ke sase toto nga ich." <sup>4</sup> Pe imo tetemeria mur, a poia tutumo mur ke leteria inin ero. A hepengia iri nga poinga poreke ngana pe a hetore iri nga ure nemur nenge Non Soke lemene taua.

### *Ume Ana Hana Mur Pe Aria Aehuna Mur*

<sup>5</sup> Pe imo ume ana hana mur a matau pe apoi ke nek lange amo aehuna mur pe a longo taua tote iri. Pe apoi tote nga letemo ke pomanga a longo taua Kristus. <sup>6</sup> A heiech mene iri ero. Urana nge a longo taua iri nga letemo ke pomanga a umume nge Kristus ke a popoia utar nenge NeHalang mutena taua. <sup>7</sup> A poia lemo ume pe singimo tua kikia ke pomanga a umume nge Non Soke pe letemo nenge a teke aume manmana nge none ero <sup>8</sup> iange a eteia ke Non Soke lape tunge urumo nga ume urana ngana nenge imo elle pe elle a popoia. Pe poia lange imo hana nenge aume manmana nge mele hel pe iri nenge te poi tetele mana ke elle.

<sup>9</sup> Pe imo aehuna mur, apoi ke urana lange lemo ume ana hana mur ke pomalam pule pe a hemataua iri ero.

Letemo metene ke iri pe iong, amo Aehuna kou tu nga lut nga tapa. Pe i lape nanas mene poinga elle ke amnei teu langa hulua lochloch reria poinga mur.

### *Tames Ke Kerkereng Ke Ta Palhel*

<sup>10</sup> Lek helenga hetala ngana, ames ke kerkereng luluch nge Non Soke nga nena kerkerenga nenge lohohot nga kikina ngana. <sup>11</sup> A heron heke lemo palinga hel ana hengeron mur lochloch ke a palhel luluch nga non poreke ngana nena pallaklakanga mur. <sup>12</sup> Iange ita, ta palhel luluch nge hana mur mana ero mai. Ta palhel luluch nge ope poreke ngana mur nga tapa sana pe aria naungaala ana hana mur pe aria papalauana mur pe ope kerkereng ngana mur nenge tenau elele kileng au ngana nei ana poinga mur. <sup>13</sup> Ke a heron heke lemo palinga hel ana hengeron mur lochloch. Pomalam nga etue nenge non poreke ngana nem at lape a hekou sue lemo ngarang mur. Pe nga etue nenge palinga hel nem het, imo ames ke kerkereng kura. <sup>14</sup> A kale heke amo tal nenge helenga manmanna ngana ana nga luamo pe ames ke kerkereng. Pe a heron heke poinga nge pengpeng ke pomanga palinga hel ana hengeron nenge poi hele mautumo. <sup>15</sup> Pe nga apemo a kale hite helenga urana toto ngana nenge hetakile ita luluch nge NeHalang ke nek. <sup>16</sup> Pe a rahite letemo manmanna ngana ke pomanga lemo kaleu nenge he metmete oan nga non poreke ngana nena io mur. <sup>17</sup> A longele NeHalang ke mene mule imo pe a ure ke pomanga palinga hel ana horel nenge poi hele palpalumo. Pe a rahite NeHalang nena helenga ke pomanga palinga hel ana mese nenge Opepengpeng tunge lange imo. <sup>18</sup> A hetalaulau pe a ontei halaunga nge NeHalang nga ure nemur nenge a

**6:1:** Kol 3:20    **6:2:** Deu 5:16    **6:4:** Psa 78:4; Pro 22:6; Kol 3:21    **6:5:** Kol 3:22-23; Tit 2:9-10; 1Pi 2:18    **6:8:** 2Ko 5:10; Kol 3:24-25    **6:9:** Rom 2:11; Kol 4:1    **6:11:** Rom 13:12; 2Ko 10:4    **6:12:** 1Pi 5:8-9    **6:14:** Isa 11:5; 59:17; 1Te 5:8    **6:15:** Rom 10:15    **6:17:** Hip 4:12    **6:18:** Luk 18:1; Kol 4:2; 1Te 5:17

popoia pe a iua Opepengpeng ke hekerkereng ia imo. A tatalo ala ke kokoes nga hetalaulaunga pe a hetalaulau NeHalang nena hana mur lochloch aria ke kokoes.

<sup>19</sup> Pe a hetalaulau ak pule ke NeHalang talue helenga mur nga halik pe sak loiloi ero pe e haliu hote helenga talkomkome ngana nga helenga urana toto ngana. <sup>20</sup> Ume nem iau ak ume ia pe heueu nei etu nga tuele au ngana iange e haliu hote helenga urana toto ngana. Ke pomalam a hetalaulau ak ke e saua mataunga ke lasus pe emes ke kerkereng ke e haliu hote helenga urana toto ngana.

### *Helenga Hetala Ngana Mur*

<sup>21</sup> Tira Tikikus i ume ana non nenge ume ke kerkereng toto nga Non Soke ana ume pe iau mutek tau tote i. Pe i lape heleia ure lochloch ngana lange imo ke pomalam lape a eteia utar nenge lohotot nge iau. <sup>22</sup> E tunge alalaha nei lange i pe e kulosia i ke lange imo ke a eteia motu ngamem, pomalam lape hekerkereng ia letemo.

<sup>23</sup> Imo NeHalang nena hana mur imo pe e hetalaulau ke Temere NeHalang pe ara Non Soke Iesus Kristus te poia letemo ke ma ke nek, pe te hesue mutenga pe te hekerkereng ia letemo manmanna ngana mur. <sup>24</sup> E hetalaulau ke NeHalang poi ke urana toto lange imo nenge mutemo taua ara Non Soke Iesus Kristus nga mutenga nenge hetala ngana ero. Ngana laka lom.



## Pilipai Alalaha Nenge Lange Pilipai Mur

<sup>1</sup> Iau Paulus, pe imem nai Timoti mo umume nge Iesus Kristus. Pe mohas ia alalaha nei ke lange NeHalang nena hana mur lochloch nge Pilipai nenge leteria manmanna nge Iesus Kristus, luluch nge hana papalauna mur nenge tenau elele iri pe reria halanga mur. <sup>2</sup> Temere, NeHalang pe Non Soke Iesus Kristus leteria poreke ia imo pe te hemaluche letemo ke atu ke nek.

### *Paulus Nena Hetalaulaunga*

<sup>3</sup> E hele urana toto nge NeHalang ak soke nga etue lochloch nenge letek metentene imo. <sup>4</sup> Pe nga etue nemur nenge e hetalaulau imo lochloch amo, letek iech manmana. <sup>5</sup> E iech toto nge imo iange a halaua iau nga helenga urana toto ngana ana ume, talun nga ume talun ngana ke at heueu nei. <sup>6</sup> Ke pomalam, e eteia ke NeHalang i sipona talune ume urana ngana nei nge imo. Pe letek manmanna ke I sipona lape heloloune ume nem ke la het nga etue nenge Iesus Kristus at mule ia.

<sup>7</sup> Amo lete tu kokoes nge iau, ke pomalam, pengpeng nge iau nge e amneia ke pomai. Nga nei, a tuteu luluch nge iau nga ure urana ngana nenge NeHalang tunge at nge iau, heueu nenge etu nga tuele au ngana pe pule nga etue nenge etu ke epoi tetele pe e hekerkereng ia Iesus na helenga urana toto ngana. <sup>8</sup> NeHalang eteia ke iau e hele ke manmanna toto pe lemek taua imo ke pomange Iesus Kristus nge lemene taua imo.

<sup>9</sup> E teke e hetalaulau amo ke lemo poinga nenge mutemo taua neingamo mur lape puopuo pe puo luluch nga letemo matana ngana mur. <sup>10</sup> Pomalam, lape a eteia poinga urana ngana pe poreke ngana pe lape

ute e nge poreke tu hite imo ero pe mele hottaua poinga poreke ngana e nge imo ero ke la het nga etue nenge Kristus at mule ia. <sup>11</sup> Pe lape a muta toto nga poinga urana ngana mur nenge at pengpeng nge Iesus Kristus. Pe poinga urana ngana nemur tetal heke tote NeHalang ene.

### *Ute Pele Poi Ele Paulus Hanna Ero*

<sup>12</sup> Titik mur pe liliuk mur, a eteia ke nek. Ure meena ngana nenge lohot nge iau nei, halau mene Iesus na helenga urana toto ngana ke songia kikina ngana pe puo ke palaungana toto ol. <sup>13</sup> Pe palinga hel ana hana mur nenge tenau ele pele nei pe hulua lochloch, te eteia ke iau, te tamal teua iau nga tuele au ngana iange e umume nge Kristus. <sup>14</sup> Etu ngak nga tuele au ngana nei hekerkereng ia titik mur leteria ke te matau ero nge te hele hote Non Soke nena helenga.

<sup>15</sup> Hana hel nge iri, saria keke iau ke te teke te mene mulik ke te haliu hot pe hel te poia nga leteria urana ngana. <sup>16</sup> Iri nenge leteria urana, muteria taua iau pe te eteia nge NeHalang talue iau nga lamai ke e hekerkereng ia Iesus nena helenga urana toto ngana. <sup>17</sup> Pe iri nenge te poia nga sakeke nem, leteria metene mene iri siporia pe te teke tepoi poreke iau nga etue nenge etu nga tuele au ngana nei. <sup>18</sup> Nenge teke tepoi ke pomalam, iau e teke ute pele ero. E iech mana nga nem. Ure nenge palaungana toto, ngana koi nei: Hana pe hehei te haliu hote Kristus na helenga urana ngana. Nenge teke te hele ia nga leteria poreke ngana pe nga leteria urana ngana, iau e iech mana nga nem.

Oe, pe lape e iech toto nga hoena pule <sup>19</sup> iange e eteia ke a halaua iau nga lemo hetalaulaunga. Pe nga halaunga nenga Iesus Kristus opene, lape etu ke epoi tetele mana ol. <sup>20</sup> Pomalam e meia iau ero. E iech pe e kulele utar nge lape lohot. Pe lape eume ke kerkereng nga

etue lochloch, ke pomanga heueu nei. Nenge teke etu ke e maulul ma e mete, ume lochloch ngana nenge e popoia, e heto heke Kristus ene ia. <sup>21</sup> Nga enau ngak, nenge teke etu ke e maulul etu luluch nge Kristus pe nenge teke e mete, e mene ure urana ngana mur halang. <sup>22</sup> Pe nenge e teke etu ke e maulul kura, lape e umume ia ume urana ngana mur hel pule. Pe nei e eteia ero kura. Kue tei nenge lape e nanas ia? <sup>23</sup> Ure nai tetak tele ele iau. Nge iau, e teke urana toto nge ela ke etu luluch nge Kristus. <sup>24</sup> Pe nge imo, e teke urana nge etu ke e maulul ke etu luluch nge imo ke e halaua imo. <sup>25</sup> Iau e eteia ke lape etu luluch nge imo ke e halaua imo nga letemo manmanna ngana pe atu ke a iech manmana. <sup>26</sup> Pe lape a iech toto nge Iesus Kristus nga etue nenge ela ke etu luluch nge imo.

### *A Mes Ke Kerkereng Nga Letemo Manmanna Ngana*

<sup>27</sup> Ure nenge palaungana toto nenge e teke e heleia, ngana koi nei. Ai ke nek pe a poia ume nemur pe a henanas ia Iesus Kristus na helenga urana toto ngana. Pe e teke e esia imo nga etue nenge ela mule nge imo. Pe nenge teke ela ero, urana nge e longe nge ames ke elle mana pe a purpur kikimo nga lete manmanna ngana, nga Iesus nena helenga urana toto ngana. <sup>28</sup> Pe a mataua lemo ngarang mur ero, amo seilil ke kokoes. Pe nga poinga nei, iri te eteia ke NeHalang lape heporeke iri. Pe imo, NeHalang lape halaua imo. <sup>29</sup> Pe poia imo ke letemo manmanna nge Iesus Kristus nga i sipona lemene ngana pe a takisia ana melmelenga pule. <sup>30</sup> Nge nike etu luluch nge imo pe a eses ia melmelenga nenge lohote nge iau. Pe heueu nei, ita ul ta amneia ke elle mana ol.

## 2

### *Apoi Ke Mange Kristus Pengpeng*

<sup>1</sup> Kristus hekerkereng ia letemo lo. Pe lemene taua imo ke letemo ma ke nek lo. Pe Opepengpeng tu luluch nge imo ke a nek hel lo pe letemo mulmule ia imo. <sup>2</sup> Iok, a poia iau ke e iech ol. Nga nenge e teke a nanasia poinga nemur: Atu ke letemo elle pe anek hel nge imo, pe a rahita hel ke imo elle mana. <sup>3</sup> Pe poinga nenge a ngailele mele pe atal heke imo, poinga panem poreke toto. Pe a nanasia koi poinga nei: Aau sue imo ke aele sio toto nge pekngamo mur. <sup>4</sup> Letemo ia imo toro ero, anau lange mele hel pule.

### *Iesus Au Sue I Pe NeHalang Tal Heke I*

<sup>5</sup> A rahite letemo tuanin ngana mur ke pomange Iesus Kristus:

<sup>6</sup> I NeHalang toto

pe tal heke i ke pomange NeHalang ero.

<sup>7</sup> Iesus Kristus tal sio mene i

pe lohote ke i non pe ume ke halaulaua ita.

<sup>8</sup> Pe tal sue i pe longo tau mana ke la het nga ana metenga

nenge te heon heke i nga manga toto!

<sup>9</sup> Nga nem mana, NeHalang tal heke tote i

pe tunge ene nenge pingana iuiu nga hulua lochloch eria.

<sup>10</sup> Pomalam, hulua nemur nga tapa pe nga ich

pe nga ich letena lape te longe Iesus ene

pe te tualou sio sapele lange i.

<sup>11</sup> Pe lape hulua lochloch te haliu hote leteria manmanna ngana

ke te teke Iesus Kristus I Non Soke.

Pe hemalmalinga palaungana lange Temene NeHalang.

### *Atu Ke Nek Ke Pomanga NeHalang Lemene Ngana*

<sup>12</sup> Oe atong mur, nga etue nenge etu luluch nge imo, a longo taua iau. Pe heueu nei ol etu ke kangkanga ol, pe lemek ke a longo tau ngamo nem, tu ke kerkereng. A ume ke kerkereng luluch nga mataunga pe loiloinga ke a heulo hote lemo maulinga nge koko.

<sup>13</sup> Iange NeHalang kokoes ume nga letemo ke lememo taua I lemene ngana pe pule hekerkereng ia imo ke a longo taua. <sup>14</sup> A poia amo ume lochloch ke nek mana pe a ngunngu hel pe a hunel ero.

<sup>15</sup> Pomalam lape NeHalang esia poinga poreke ngana e nge imo ero pe atu ke pomanga tutuna mur pengpeng. Pe heueu nei atu luluch nge hana porekreke ngana mur nga ich nei kura. Pe lemek ke atu ke nek ke pomanga NeHalang lemene ngana. Pe apoi ke pomanga lemene nenge tua leme nga kileng au ngana. <sup>16</sup> Nenge a haliu hote helenga nenga maulinga nge koko. Nenge teke a poi ke pomai, nga etue nenge Kristus at mule, lape e iech toto iange NeHalang ana ume nenge e umume ia nganangana lo.

<sup>17</sup> Letemo manmanna ngana nge Non Soke pomalaka nga lemo tunginga nenge lange I. Pe toinge eik pasiling ke la luluch nga lemo tunginga nemur, lape e iech luluch nge imo. <sup>18</sup> Pe imo pule a iech luluch nge iau.

#### *Paulus Teke Kulosia Timoti*

<sup>19</sup> Pe nga Non Soke Iesus lemene ngana lape e hekule Timoti ke la mule nge imo ke ueiuei mana. Pomalam lape hekerkereng mule letek nga etue nenge at mule pe nene imo at nge iau. <sup>20</sup> Pe mele e poi ke mange Timoti ero. I letena tau tote imo ke teke lape hetakile imo ke nek toto. <sup>21</sup> Hulua leteria tu mana nga aria ume mur, pe nga Iesus Kristus ana ume, leteria ia ero. <sup>22</sup> Pe imo a eteia lo ke Timoti i non nge urana. Ana non poi ke manga tuk ia toto nenge

halaulaua iau ke mo hele hotote Helenga Urana Toto Ngana. <sup>23</sup> Lape e kulos ia i ke lange imo kura, pe enau ala mana mukam nga ure nenge lape lohote nge iau. <sup>24</sup> Pe letek manmanna nge Non Soke ke iau pule ela mule nge imo ke ueiuei mana.

#### *Paulus Teke Kulosia Ipapotitus Pule*

<sup>25</sup> Pe letek unne, e teke urana nge e kulos ia Ipapotitus pule ke lange imo. Iange i poi ke mange iau mana: Letena manmanna nge Iesus pe nanas ia iau ke imem nai mo ume ke elle pe mes ke kerkereng toto nga Non Soke ana ume. Pe imo sipomo a kulos ia i at nge iau ke halaulaua iau. <sup>26</sup> Pe heueu nei letena haka toto ke teke la ke es mule imo. Pe letena tangtang ia imo iange a longe i nge singina haleles. <sup>27</sup> Pe i manmanna toto ke haleles nem mene i ke mete par. Pe NeHalang letentena ia i pe iau pule. Pomalam nau mene lete kolkol palaungana ke meena hit mene iau ero.

<sup>28</sup> Ke heueu nei letek haka toto ol ke e kulos mule Ipapotitus lange imo. Pe lape a esia i pe a iech toto pe lape amo lete nenge tu nge iau lape het toto sapele. <sup>29</sup> A naue i pe a heroele i pe a longia i nga lete manmanna ngana nge Non Soke. A heto heke hana nemur nenge te poi ke pomam, <sup>30</sup> iange i, mete par lo nga Kristus ana ume nenge tung teu tote singina ke halau tote iau nga ume nenge imo nakumo ero nge a poia. Pe imo a halaua iau ke pomam ero.

## 3

#### *Imo Elle Pe Elle A Etei Tote Kristus Ke Nek*

<sup>1</sup> Iok titik mur pe liliuk mur, lek helenga hetet lo pe e teke a iech toto nge Non Soke nga lemo tunga luluch nge I. Lek helenga hel ehas sue ke ulolo pe lape ehas sio mule iri. Pe nem, ute pele ero. Iange e teke helenga nemur te halau tote imo ke nek.

<sup>2</sup> Anau ala amo ke nek toto nge hana nemur nenge te hesalang mana ke te teke te riria singimo. Iange nga riringa nem, te poi ke pomalaka nga kaone hinolo mur. <sup>3</sup> Pe ita, ta poi ke mange iri ero. Ita laka nenge ta mene riringa toto ngana. Iange NeHalang opene halaua ita ke ta heto heke tote I pe ta iech toto iange tatu luluch nge Iesus Kristus. Pe poinga nenge ta rir us nem, letera manmanna sakilil nga poinga nem nge halaua ita ero. <sup>4</sup> Pe nenge teke mele ramana kerkereng nge poinga nem halaua tote i, iau laka nakuk toto nge e nanasia kue nemur. <sup>5</sup> Iau etak hoe iau ke ak etue iri rahtele mol pe te riria iau. Iange iau, lek nge Israel pe etu teu nga kaleu ramana nenge Pensamin. Pe iau Hipru iange hetak pe temek iri Hipru pe e lohot ke iau paresio iange e nanas tau tote hotonga nenge Moses. <sup>6</sup> Pe e menmene kaleu pe e hun lapue NeHalang nena hana mur pe e teke e poia NeHalang ke iech, pomalam e nanas tau tote hotonga mur.

<sup>7</sup> Ure nemur nenge esis ala hote nem, nga tele ngana e teke ma lape te halaua iau. Pe nei ero ol. E saua iri ke te lasus toto pe e nanas mene Kristus. <sup>8</sup> Pe e saua ure nemur mana ero. E saua ure lochloch ke te lasus iange e teke e etei mene Non Soke Iesus Kristus. Pe e eteingak nem urana toto nga ure lochloch ngana nemur. <sup>9</sup> Pe etu teu nge I ol. Pe iau sipok e poia iau ke iau non nge pengpeng nga NeHalang matana ero nenge e nanas tau tote hotonga nenge Moses. Pa nem ero ol. Iau non nge pengpeng nga NeHalang matana iange letak manmanna nge Kristus. Ke nga letak manmanna ngana nem mana, NeHalang poia iau ke iau non nge pengpeng nga matana. <sup>10</sup> Iau lemek toto ke e teke e etei tote Kristus pe e amnei urume nena kerkerenga nenga maul haka mule ngana. Pe e

teke e amneia melmelenga ke mange i ke e mete <sup>11</sup> pe e maul haka mule ke pomange I.

### *Tanau Langa Utar Toto Nenge Lape Ta Mene*

<sup>12</sup> Pe ure nemur te lohot nge iau ero kura. E hele menmene kura. Pe lemek toto ke e teke e mene ure nemur ke pomange Iesus nge mene iau lo. <sup>13</sup> Pe titik mur, heueu nei e rahite nga perik ero kura. Pe e teke epoi ke pomai koi: Lape esau sue ure meena ngana mur nenge te poi helele iau pe e song tau mene ure nenge tu nga muka. <sup>14</sup> Pe lape e songia kikikngak toto ke la e mene iechinga nenge NeHalang iua iau ke ela nga lut nga tapa iange letak manmanna toto nge Iesus Kristus.

<sup>15</sup> Ita lochloch ngana nenge Opepengpeng hemellehe letera matana ngana mur lo, ta naue urelu song hot ngana ke mai koi. Pe nenge teke letem tuanin ngana mur te song hot ke altoto nga ute hel, nem lape NeHalang hemallaha hote lange iong. <sup>16</sup> Pe kue manmanna ngana nenge ta nananas ia ke at heueu nei, ta hile sio mule ero ol.

<sup>17</sup> Ke titik mur pe liliuk mur, a nanas ia lek poinga mur. Pe pule anau urume iri nenge te nanasia lememe poinga nenge mo poia nga matamo lo. <sup>18</sup> Iau letak kolkol pe e tang iange e hele lange imo ke kokoes lo, pe heueu nei lape etua tau mule lek helenga nemur pule: Hulua halang tetu ngaria heueu nei, poia iri siporia ke iri ngarang nge Kristus nga mete ngana nga manga toto. <sup>19</sup> Nga hoena lape tela nga oan nge imperno. Iange leteria tu mana nga ure nemur nga ich nei. Pe te nanas tau mene lemeria ngana mur pe te heto hekeke eria mur nga poinga poreke ngana mur nenge te popoia. <sup>20</sup> Pe ita ra kileng toto kou nga lut nga tapa. Nga kileng nenge ara Non Soke Iesus

**3:3:** Rom 2:29    **3:4:** Ume 22:3; 2Ko 11:18    **3:5:** Luk 1:59; Ume 23:6; 2Ko 11:22    **3:6:** Ume 8:3  
**3:7:** Mat 13:44-46    **3:9:** Rom 3:21-22    **3:10:** Rom 6:3-5; 8:17    **3:12:** 1Ti 6:12, 19    **3:14:** 1Ko 9:24  
**3:15:** 1Ko 2:6    **3:17:** 1Ko 4:16    **3:19:** Rom 16:18    **3:20:** Epe 2:6, 19    **3:21:** 1Ko 15:28, 42-53



Kristus lape at ia. Pe ta kulala tote I iange I non nge ara hemasinga. <sup>21</sup> I, nena kerkerenga palaungana toto ke hulua lochloch ngana pe ure lochloch ngana lape te longo tau mene I. Pe I lape at pe hulua singira metmete ngana mur pe poia iri ke te lohohot ke pomanga I sipona singina nenge ana hemalmalinga urana toto.

#### 4

##### *A Ngata Hel Pe A Iech*

<sup>1</sup> Titik mur pe liliuk mur, amo lete tu toto nge iau. Pomalam, e teke ela ke ees mule imo. Pe letemo manmanna ngana nge Non Soke nem, a rahite ke kerkereng toto, iange iau e iech toto nga poinga nem!

<sup>2</sup> Pe e teke e hele ke kerkereng toto lange iong Iuotia pe Sintike, ke imo nai anau urume Non Soke na poinga mur pe a kila ke nek. A hunel ero ol. <sup>3</sup> Pe e teke e onteia iong ke o halaua iri pule. Iange iong, neingak toto laka iong. Hehei nai nei pe ne Kelemen pe lek ume pekngana mur hel pule, te halaulaua iau ke mo haliu hotote helenga urana toto ngana nenge Iesus. Pe iri eria mur tehas sue iri nga alalaha ke ulolo. Alalaha nenga maulinga ke koko.

<sup>4</sup> Pomalam e hele ke e teke a iech ke kokoes nga lemo tunga luluch nge Non Soke. Pe etua tau mule pule: A iech toto! <sup>5</sup> Pe a poi ke nek lange pekngamo mur iange Non Soke atat lo. <sup>6</sup> Letemo meena rara ero. A onteia NeHalang pe a hetalaua lange I nga ure lochloch ngana pe a hele urana toto lange i. <sup>7</sup> Pomalam, NeHalang lape poia letemo ke ma ke nek toto. Pe pule, lape poia letemo tuanin ngana mur ke la mana nge Iesus Kristus. Pe poinga nenge NeHalang poia nem, mele pele purpur ero toto nge letena tuanin hote.

<sup>8</sup> Iok titik mur pe liliuk mur, lape e hetoro hit mule imo ke pomai, e teke letemo tu mana laka nga ure urana ngana mur nenge ta heto hakaka

Non Soke ia: Nga poinga lochloch ngana nenge manmanna pe nenge mallaha pe nenge pengpeng pe heo ngana pe nenge lemere taua pekngara mur pe poinga urana ngana nenge ta memeleia iri. <sup>9</sup> Ure lochloch ngana nenge e hetoro sue lange imo pe nenge a eteia nge e hele ia pe nenge a naue nge e poia, a nanas mene ke pomalam mana. Pomalam NeHalang nenge poia letera ke ma ke elle mana, lape tu luluch nge imo.

##### *Paulus Iech Toto Nga Pilipai Mur Reria Tuinga*

<sup>10</sup> Pe iau, e iech toto nge Non Soke iange letemo metene mule iau ke a halaua iau. Atong mur, letemo metene iau mala lo pe lemo kue ero nge a poia halaunga nem. <sup>11</sup> Pe nem ute pele ero. Iange nga etue nemur nenge lek ure mur ero, e iech manmana pe letek tu ke nek mana. <sup>12</sup> Etu nga etue nenge lek ure halang pe etu nga etue nenge lek ure halang ero. Pe letek matana ke nek lo nga kue nenge poia iau ke e iech manmana nga etue lochloch. <sup>13</sup> Iange Kristus i sipona hekerkereng ia iau nga ure lochloch ngana nenge te lohohot nem.

<sup>14</sup> Pe imo apoi ke nek toto at nge iau nga nenge a halaua iau nga ure meena ngana nemur. <sup>15</sup> Iange nga etue nenge e lohaka nge Mesatonia, imo sipomo a heneue iau nga poinga nenge ta tung hehel pe ta long hehel rera ure mur. Pe NeHalang nena hana mur hel te poia iau ke pomam ero. Nei imo lochloch a eteia. <sup>16</sup> Iok, ela ke etu nge Tesalonika pe emule mana a hekule ure hel pule ke halaua iau. <sup>17</sup> Pe iau letek tu sakilil nga ure nemur nenge a hekule atat nge iau nem ero. Iange e teke e esia lemo poinga urana toto ngana hel pule, nge a poia ke mahoho haka langa poinga nemur nenge a poia nem lo.

<sup>18</sup> Ke lemo tuinga nemur nenge a hekule at nge iau nem, Ipapotitus tunge iri at nge iau lo. Ke heueu nei

e rere ute pele ero ol. Ure lochloch ngana nenge lemek taua pe ure hel pule te lohot ke mataria purpur lo. Pe e mene iri pe e iech toto ke po-mange NeHalang nge mene tunginga mur nenge inangana ehech pe iech ele tote. <sup>19</sup> Pe ak Non Soke NeHalang lape tunge ure lochloch ngana nenge mutemo taua lange imo. Pe I lape tung lochloche ure urana ngana mur nge Iesus Kristus lange imo pule.

<sup>20</sup> Hemalmalinga palaungana lange Temere NeHalang nga etue lochloch sapele. Manmanna.

#### *Helenga Het Ala Ngana Mur*

<sup>21</sup> A hele ia lek apalanga lange Iesus Kristus nena hana mur lochloch. Pe lek ume pekngana mur nenge tetu luch nge iau, te hekule reria apalanga lange imo pule. <sup>22</sup> Pe NeHalang nena hana mur nenge te umume nga ne Kaesa na pele, te hekule reria apalanga lange imo pule.

<sup>23</sup> Pe Non Soke Iesus Kristus lape poi ke nek toto lala nge imo ke kokoes. Manmanna.

## Kolosi Alalaha Nenge Paulus Hasia Lange Kolosi Mur

<sup>1</sup> Iau Paulus. Nga NeHalang lemene ngana iua iau ke e lohot ke iau Iesus Kristus nena hekulkulonga. Pe imem nai tira Timoti mo hekule alalaha nei ke <sup>2</sup> lange imo NeHalang nena hana mur nga tuele tana nenge Kolosi. Imem pekngamem mur imo iange letemo manmanna nge Kristus.

E hetalaulau ke Temere NeHalang letena ia imo pe poia letemo ke ma ke nek.

### *Kolosi Mur Leteria Manmanna Nge Iesus*

<sup>3</sup> Kokoes mo hetalaulau pe mo hele urana lala nge NeHalang nenge ara Non Soke Iesus Kristus Temene. <sup>4</sup> Iange mo longe imo nge letemo manmanna nge Iesus Kristus pe mutemo taua NeHalang nena hana mur lochloch. <sup>5</sup> Apoi ke pomam iange a teke a kulkulele ure nenge NeHalang teke tunge lange imo. Ngana kou, talue ke nek nga tapa kura. Ure nem, ana helenga a longe ke ulolo, nga etue nenge a longe helenga manmanna ngana. Ngana laka helenga urana toto ngana nem <sup>6</sup> nenge lohot nge imo ke ulolo. Pe helenga urana toto ngana nem nganangana lohot pe pupuo nga kileng lochloch ngana nga ich. Ke pomanga nenge lohot nge imo nga etue nenge a longe helenga urana toto ngana pe a eteia ure manmanna ngana nga NeHalang nena poinga urana toto ngana. <sup>7</sup> Ne Ipapras hetore imo nga NeHalang nena poinga urana toto ngana nem. Non nem i Kristus nena ume ana non nge urana nge ume lululuch nge imem pe mene mulimem ke la poia Kristus nena ume nge imo. <sup>8</sup> Pe heleia

mutenga nenge Opepengpeng tunge lange imo at nge imem pule.

<sup>9</sup> Nei mana poia imem ke mo hetalaulau amo ke kokoes. Mo talun nga etue nenge mo longe imo nge apoi ke pomam, pe mo hetalaulau amo lange NeHalang ke a etei tote ure nemur nenge mutena taua iri pe hemute imo nga lete matana ngana ke letemo mallaha nga ure nemur nenge Opepengpeng poi hotote iri. <sup>10</sup> Ke pomalam lape atu ke a nanas mene Non Soke lemene ngana pe apoi menmene ure nemur nenge poia i ke iech. Pe atu ngamo lape poi hote ure urana ngana mur halang pe letemo matana ngana nge NeHalang pupuo pule. <sup>11</sup> NeHalang lape hekerkereng ia imo nga nena kerkerenga palaungana. Pomalam lape atu ke nek pe a iech mana nge a takis ia ure meena ngana mur. <sup>12</sup> Pe a hele urana lange Temere nge poia imo ke a mene ure nemur nenge tatalo ele ke nena hana mur reria ia nga nena naualanga pe nekinga tualeme ngana. <sup>13</sup> Iange NeHalang mene hote ita nga kerkerenga nenga kileng au ngana ke ulolo pe mene teua ita ke la tatu kolo nga naungala pe nekinga nge Tuna nenge mutena tau tote. <sup>14</sup> Tuna nenge ol hot mule ita nga rera poinga poreke ngana mur pe saua rera poinga poreke ngana mur ke te lasus toto.

### *Iesus Nena Ume Pe Kikina Ngana*

<sup>15</sup> Mele pele naue NeHalang nakuna ero. Pe Kristus nakuna elle toto ke mange NeHalang pe i non nenge lohot tala toto nga ure lochloch ngana nenge teala hote. <sup>16</sup> Ke nge i mana NeHalang ala hote ure lochloch ngana nga tapa pe nga ich. Ure nemur nenge ta naue iri pe nenge ta naue iri ero. Pe ope mur nga tapa sana reria kerkerenga mur pe reria naungaala mur pe reria hotonga mur pe aria papalauna mur. Ke NeHalang ala hote ure lochloch

**1:3:** Epe 1:15-16    **1:5:** Epe 1:13; 1Pi 1:4    **1:7:** Kol 4:12; Plm 23    **1:9:** Epe 1:16-17    **1:11:** Epe 1:19; 3:16    **1:12:** Epe 1:11, 18    **1:13:** Luk 22:53; Epe 2:2    **1:14:** Epe 1:7    **1:15:** Ioa 1:18; 2Ko 4:4    **1:17:** Ioa 1:1; 8:58

ngana nga Kristus penna ke Kristus nena ia. <sup>17</sup> Ke ure lochloch ngana te lohot ero kura pe Kristus tu tala lo pe i mana poia ure nemur ke tetu nga muria. <sup>18</sup> Kristus i muka ia NeHalang nena mata nenge i singina ia. Ke i talun ngana toto pe i NeHalang Tuna tengene ana nenge hemaui heke mule nga metenga. Ke pomalam lohot ke i tala toto nga ure lochloch. <sup>19</sup> Iange NeHalang iech toto nga nenge Tuna mene tote nakuna pe tu luluch toto nge i. <sup>20</sup> Ke nge Kristus mana NeHalang mene mule ure lochloch ngana lange i. Ure lochloch ngana nenga ich pe nga tapa pule. NeHalang poi hote lete makuk nga Kristus eina nga ana metenga nga manga toto.

<sup>21</sup> Nga tele ngana a kangkanga toto NeHalang ana pe nena ngarang mur toto laka imo, iange nga letemo tuanin ngana poreke ngana mur pe lemo poinga poreke ngana mur nenge a popoia. <sup>22</sup> Pe heueu nei ol NeHalang poia imo ke neingana mur imo mule. Pe poia ke pomai nga Kristus singina nenge mete pe mene imo langa NeHalang matana. Pe imo lape apoi ke pomanga hehei pe hana nenge te lemlem pe te poia poinga poreke ngana e ero pe NeHalang hottaua ute e nge poreke nge iri ero. <sup>23</sup> Ure nei lape lohot ke pomam, nenge teke a rahite letemo manmanna ngana pe ames ke kerkereng. Pe ute pele takue imo ke a hile sue kulkulalanga nenge letemo manmanna ngana kerkereng toto ia ero, nenge a longe nga helenga urana toto ngana. Helenga urana toto ngana nei te haliu hote lange hulua lochloch ngana nga ich, pe iau Paulus e halau ke e haliu hote pule.

#### *Paulus Ume Ke Halaua Mata Nenge NeHalang*

<sup>24</sup> Nga etue nei e iech mana nge e takisia melmelenga nga lek ume nenge e halaua imo iange

melmelenga nenge Kristus takisia, het ero kura. Ke pomalam e tung teu tote singik ke e hemuta heke Kristus ana melmelenga ke e halaua singina. Pe Kristus singina laka mata nenge NeHalang. <sup>25</sup> Pe NeHalang tal hote iau ke iau ume ana non nenge e halaulaua mata nenge i. Ke ume nem ngana laka nenge e haliu hot lochloche nena helenga lange imo hana lomomona ngana mur. <sup>26</sup> Helenga nei NeHalang talkome mene nga etue nei talun ngana nike pe heueu nei hemallaha hote lange nena hana mur. <sup>27</sup> NeHalang teke hemallaha hote lange nena hana mur ke te eteia helenga talkomkome ngana nenge urana toto nenge lape halaua hulua lochloch. Ke helenga talkomkome ngana nem laka Kristus nenge tu teu nge imo hana lomomona ngana mur pule. Luna pomanga imo pule lape ateu langa hemalmalinga nenge NeHalang.

<sup>28</sup> Ke pomalam mo haliu hotote Kristus lange hulua lochloch pe mo hetore iri nga lete matana ngana kuena ngana mur nenge tu nge imem. Pe mo hetore iri ke tenau ala aria ke nek nga nenge te nanasia NeHalang nena helenga mur lochloch. Iange mo teke iri lochloch te lohot ke te pengpeng nga NeHalang matana ke mange Kristus. <sup>29</sup> Pe eume ke kerkereng nga Kristus kikina ngana nenge ume ke kerkereng toto nge iau ke e poia ure nei ke lohot ke pomam.

## 2

### *Tames Ke Kerkereng Nga Letera Manmanna Ngana*

<sup>1</sup> Iau lemek ke e teke a eteia ke iau eume ke kerkereng toto ke e halaua imo pe iri nenge Laotisia pe iri lochloch ngana nenge te naue iau ero toto. <sup>2</sup> Pe eume ke kerkereng toto iange e teke saria kikina pe muteria tau hel pe te eukirau pe helenga manmanna ngana lohot

**1:18:** Ume 26:23; Epe 1:22-23; Hem 1:5 **1:19:** Kol 2:9 **1:20:** Epe 1:10 **1:21:** Rom 5:10; Epe 2:12 **1:22:** Rom 5:10; Epe 5:27 **1:25:** Epe 3:2, 7-8 **1:26:** Rom 16:25-26; Epe 3:5, 9 **1:29:** Epe 3:7, 20; Pil 4:13



ke mallaha nge iri. Pomalam lape te etei tote NeHalang nena helenga talkome ngana nenge isipona i Kristus pe leteria manmanna ia. <sup>3</sup> Iange i rahite lohenga nga NeHalang nena kole hoena mur pe letena tuanin ngana mur pe letena matana urana ngana mur pe lape hemallaha hote iri. <sup>4</sup> E heleia lange imo nike iange lape mele pallaka ia imo nga helenga e nge manmanna ero. <sup>5</sup> Iau etu luluch nge imo ero pe letek la tu luluch nge imo pe e iech iange e longe imo nge atu ke elle pe letemo manmanna ngana kerkereng toto nge Kristus.

### *Tatu Ke Elle Luluch Nge Kristus*

<sup>6</sup> Imo atal heke Iesus Kristus ke amo Soke ke ulolo ke pomalam atu ke elle luluch nge i. <sup>7</sup> Pe ames ke kerkereng nga letemo manmanna ngana nga helenga urana toto ngana nenge Kristus nenge te hetoro imo ia ke ulolo, ke pomalam atu ke kerkereng luluch nge i ke pomanga ae nenge ulana sik teu toto nga ich pe pule pomanga pele nenge huna mes ke kerkereng toto. Pe a hele urana lange NeHalang ke kokoes nga ure urana ngana mur nenge tunge lala nge imo.

<sup>8</sup> Pe anau ala amo ke nek iange mele hel lape tepoi taole imo nga hengetoro e nge nganangana ero nenge lohota mana nga ita non letera matana ngana. Ke hengetoro nem at nga ope nemur nenge tenau elele tapa sana nga reria kerkerenga, at nge Kristus ero.

<sup>9</sup> Iange NeHalang hemallaha hot tote i nge Kristus ke singina pomange ita non <sup>10</sup> pe imo a mene maulinga manmanna ngana nge Kristus ke muta toto nge imo. Pe Kristus i palaungana toto nge ope nemur nenge iri mukmuka nge pekngaria mur pe ope hel pule nenge reria kerkerenga halang. <sup>11</sup> Imo te riria singimo iange atu ke elle luluch nge Kristus pe riringa nem none poia

nga penna ero. Kristus isipona poia nga nenge mete ke mene mule imo nga lemo poinga poreke ngana mur. <sup>12</sup> Nga etue nenge a mene henuninga, nem pomanga a mete luluch nge Kristus pe tealo hit luluche imo nge i. Pe nga letemo manmanna ngana NeHalang hemaui heke imo pule nga nena kerkerenga nenge hemaui heke Kristus ia.

<sup>13</sup> Imo a mete ke ulolo, iange lemo poinga poreke ngana mur te poia imo ke a kangkanga toto nge NeHalang. Pe heueu nei NeHalang poia imo ke atu ke a maui luluch nge Kristus iange saua rera poinga poreke ngana mur ke te lasus toto ke ulolo. <sup>14</sup> Pe alalaha nenge hele hot ara, ngana laka nenge henonou hote rera poinga poreke ngana mur nga nenge ta nanasia hotonga ero. Pe NeHalang pasis hote ure lochloch ngana nga alalaha nem pe mene ke la hero hite nga manga toto. <sup>15</sup> Ke nga manga toto nem Kristus hekou sue ope nemur nenge iri mukmuka nge pekngaria mur pe ope hel pule nenge reria kerkerenga halang. Pe takrung lele iri pe hetei hote iri lange hulua lochloch. Ke la hulua lochloch ngana nemur te es ke mallaha nge ope nemur reria kerkerenga ero toto ol.

<sup>16</sup> Ke pomalam a longo taua mele hel nenge te tutue imo ia helenga nga ure nemur ero: Nga utar nenge a ngaua pe utar nenge a inia, pe nga teio heueu ngana lohota ngana, pe nga hetalaulaunga ana etue, pe nga etue papalaungana hel pule nenge te lohota. <sup>17</sup> Ure nemur iri ure opene mana nenge te heilangia ure manmanna ngana nenge atat. Ke ure manmanna ngana nem ngana laka Kristus. <sup>18</sup> A longele mele hel ke te pallaka rere imo ero, nenge te poi ole imo ke te teke atal sue imo pe a heto heke angkelo mur. Iri te teke te heporeke imo nga lemo

**2:3:** 1Ko 1:24, 30    **2:4:** Rom 16:18    **2:5:** 1Ko 5:3    **2:7:** Epe 3:17    **2:9:** Ioa 1:14, 16    **2:10:** Epe 1:21-22    **2:11:** Rom 2:29    **2:12:** Rom 6:4    **2:13:** Epe 2:1, 4-5    **2:14:** Epe 2:14-16; 1Pi 2:24  
**2:16:** Rom 14:1-13    **2:17:** Hip 8:5

tunginga nenge lape a mene. Te palut laka rara ia tenau operia ngaria mur pe nem manmanna ero iange leteria muta toto ia reria poinga poreke ngana mur. <sup>19</sup> Ita lochloch ita Kristus singina pe iri terir hote iri nge i ke ulolo, nge i nenge ita lochloch palpalra ia. Kristus nauele singina pe rahat tele tuatom ngana mur nga aepona mur. Pe singina puo ke nanasia puo ngana nenge NeHalang mutena taua.

<sup>20</sup> Imo a mete luluch nge Kristus ke ulolo. Pe ope nemur nenge iri mukmuka nge pekngaria mur nga tapa sana tenau ele imo nga reria kerkere nga ero ol. Pe pomerei nenge atu ke pomanga lemo nga ich nei kura, pe a nanasia reria hotonga nemur mai?

<sup>21</sup> “O ngaua ngaunga nei ero! Ora taua ngaunga neu ero! Pe ora taua ngaunga neu ero pule!” <sup>22</sup> Hotonga pe hengetoro nemur hana tepoi heke mene pe te helele ia ure nemur nenge ich ana mana, nenge te ngaua pe te inia ke het pe ute nge ma ero ol. Pe pomerei nenge a teke a nanasia?

<sup>23</sup> Hotonga nenge pomai, nakuna pomanga lohota nga letematana ngana nenge urana. Tepoi hote ke muteria taua NeHalang pe tetal susue iri pe tenau ele singiria mur. Pe hotonga nemur nakuria ero toto nge tepoi ele singiria lemene ngana nga reria poinga poreke ngana mur.

### 3

#### *Maulinga Heueu Ngana Nge Kristus*

<sup>1</sup> Imo NeHalang hemaui heke luluche imo nge Kristus ke pomalam letemo la mana nga urelu nemur nenge tetu nga tapa, nga kileng nenge Kristus are ia nga NeHalang ilina ele nenga pen tamalmal. <sup>2</sup> A talue letemo ke la tau menmene urelu nemur nga tapa pe letemo taua urelu nemur nga ich ero. <sup>3</sup> Iange imo a mete hot ia lemo poinga

poreke ngana mur ke ulolo pe amo maulinga heueu ngana, ngana kou tu ke talkome luluch nge Kristus ol iange imo atu teu toto lange NeHalang. <sup>4</sup> Imo amo maulinga toto ngana laka Kristus pe nga etue nenge lohota nga mallaha, imo lape a lohota nga mallaha pule pe a mene hemalmalinga nenge i.

<sup>5</sup> Ke pomalam a hile tote ich ana poinga nemur nenge mutemo tautaua. Poinga nemur nenge pomanga: Salaunga ana poinga, pe poinga poreke ngana nenge meinga ana nenge te nanasia poinga nenga leinga ero, pe poinga nenge letera is hakaka ia salaunga ana poinga, pe poinga nenge mutera taua ure poreke ngana mur, pe poinga nenge ta teke rera ure halang. Pe poinga nenge ta teke rera ure halang poi hote poinga nenge ta heto hekeke aetapuna mur. <sup>6</sup> Poinga nemur nenge pomai helete inin ia NeHalang pe letena inin ngana lape at ke lohota nge iri nemur nenge te longo olole.

<sup>7</sup> Imo, a popoia poinga nemur nge nika lo, nga etue nenge a nanas pulut mene poinga nemur nenga ich. <sup>8</sup> Pe heueu nei a hile hot tote poinga nemur ol nenge: letemo inin, pe a hele inin, pe samo kekeke, pe a penpenpen. <sup>9</sup> A pallaka ia mele hel ero ol iange a sau lemo poinga nenge nika ana ke te lasus tah lo.

<sup>10</sup> Pe a lohota ke imo heueu ngana ke ulolo. Pe NeHalang nenge ala hote imo, helemlem ia imo ke a lohota ke pomanga i pe lape tunge lete matana ngana lange imo ke a etei tote i. <sup>11</sup> Ke nga poinga nenge ta lohota ke ita heueu ngana, ute pele nge poia ita ke talas lele hel ero. Nenge teke lemo nge Krik ma lemo nge Iuta, nem ute pele ero. Pe nenge teke imo hel a ririr us pe iri hel te ririr us ero, nem ute pele ero. Pe iri nenge reria helenga altoto pe kaleu ramana mur pe iri nenge te umume nge hana hel pe iri

**2:19:** Epe 2:21; 4:16    **2:20:** Kal 4:3, 9; 1Ti 4:3    **2:22:** Mat 15:9    **3:1:** Mak 12:36; 16:19; Epe 1:20    **3:2:** Mat 6:33    **3:5:** Rom 6:6, 11; Epe 4:19; 5:3-6    **3:8:** Epe 4:25-29; 5:4    **3:9:** Epe 4:22, 25    **3:10:** Epe 4:24    **3:11:** Kal 3:28

nenge te umume nge hana hel ero; ute pele nga nem ero pule. Kristus poia ure lochloch ke lohot ke elle mana pe tu ke purpure ure lochloch.

<sup>12</sup> NeHalang mutena taua imo pe hesilei hote imo ke nena hana mur nge pengpeng. Ke pomalam a nanasia koi poinga nemur: Letemo ia mele hel pe apoi ke urana lange iri pe apoi ke nek lange iri pe atal sio mene imo pe a takis mene melmelenga nenge te poia lala nge imo. <sup>13</sup> Nenge teke mele poia poinga poreke ngana e lange imo a takis mene pe a tuachol ia ero ke pomange Non Soke nge saua lemo poinga poreke ngana mur ke te lasus toto lo. <sup>14</sup> Apoi ke pomam pe ure nenge palaungana toto ngana laka nenge mutemo taua pekngamo mur. Lange mutenga i ure nenge rahit tele imo ke atu ke elle toto.

<sup>15</sup> Kristus poia letemo ke ma ke nek luluch nge pekngamo mur pe a naue ke pomanga kue nenge halaua imo ke atal helenga nga utar nenge a teke a popoia. Lange nga ure nem mana NeHalang iua imo ke a lohot ke singimo elle. Pe a hele urana lange NeHalang nga nem. <sup>16</sup> A longala teua Kristus nena hengetoro mur ke muta toto nge imo. Pe a hetore hehei pe hana pe a hetoro urume ure lange iri nga letemo matana urana ngana mur. Pe a peua peunga nemur nga NeHalang nena alalaha nenge Sam pe peunga nenge lala nge NeHalang pe peunga nemur nenge Opepeng-peng tunge lange imo. A peupeu pe a heto hekeke NeHalang nga letemo. <sup>17</sup> Pe ure lochloch ngana nenge a helele ia pe a popoia, a heleia pe a poia nga Non Soke Iesus ene. Pe a hele urana lange Temere NeHalang nga utar nenge Iesus poia lange imo.

### *Hotonga Nenge Lange NeHalang Nena Hana Mur*

**3:12:** 1Pi 2:9    **3:13:** Epe 4:2, 32    **3:14:** Rom 13:8-10    **3:15:** 1Ko 12:27; Epe 4:4; Pil 4:7    **3:16:** Epe 5:19    **3:17:** 1Ko 10:31; Epe 5:20    **3:18:** Epe 5:22    **3:19:** Epe 5:25    **3:20:** Epe 6:1    **3:21:** Epe 6:4    **3:22:** Epe 6:5-8    **3:25:** Rom 2:11    **4:1:** Epe 6:9    **4:2:** Epe 6:18; Pil 4:6    **4:3:** Rom 15:30; Epe 6:19

<sup>18</sup> Imo hehei a longo taua emo mur iange poinga nei urana nge Non Soke nena hana mur te nanasia.

<sup>19</sup> Pe imo hana mutemo taua lemo hehei mur pe a nauele iri ke nek.

<sup>20</sup> Pe imo tuturia mur, a longo taua tetememo mur pe tatamo mur nga ure lochloch iange poinga nei poia Non Soke ke iech.

<sup>21</sup> Pe imo tetemeria mur, letemo inin taua tutumo mur ero iange lape leteria manmanna ngana losio.

<sup>22</sup> Pe imo nenge a umume nge hana hel, a longo taua amo aehuna mur nga ure lochloch. Pe poinga nenge apoi ke pomai nga mataria mana ke te iech nge imo, nem poreke. Urana nge apoi ke pomai nga letemo ke a umeia ume urana ngana nga etue lochloch iange a renge Non Soke.

<sup>23</sup> Nga lemo ume mur nenge a popoia, a tung tote letemo langa ume nemur ke pomanga a umume nge Non Soke pe letemo ke a teke aume manmana nge none ero. <sup>24</sup> Pe letemo metentene nei: Non Soke lape tunge urumo nga utar nenge talue ke teke nena hana mur reria ia iange Non Soke Kristus laka nenge a umume nge i nem. <sup>25</sup> Pe mele hel nenge te popoi poinga poreke ngana lape te mene tuangachol poreke ngana nga reria poinga nemur, iange NeHalang nanasia poinga elle mana ke amnei urume rera poinga poreke ngana mur.

## **4**

<sup>1</sup> Pe imo aehuna mur, apoi ke urana lange hana nenge te umume nge imo pe a tung pengpeng ia ururia ke purpure te ume ngaria. Letemo metene ke imo pule amo Aehuna kou tu nga lut nga tapa.

### *Ta Rahite Poinga Nenge Ta Hetalaulau Ke Kerkereng*

<sup>2</sup> A rahite poinga nenge a hetalaulau ke kerkereng pe nga etue nenge a hetalaulau letemo matana

ke nek pe a hele urana lange NeHalang. <sup>3</sup> Pe a hetalaulau emem pule ke NeHalang poi hote kue unne ke mo haliu hote nena helenga, nga helenga talkomkome ngana nenge NeHalang hemallaha hote nge Kristus. Pe iau etu nga tuele au ngana iange e popoia ume nem. <sup>4</sup> A hetalaulau ke e haliu hote ke nek pe e hemallaha hote ke nek toto. <sup>5</sup> Letemo matana ke nek pe apoi ke nek lange hehei pe hana nenge leteria manmanna ero. Pe atal teu tote imo ke a hemallaha hote Kristus nena poinga mur lange iri. <sup>6</sup> A hele luluch nge iri pe a poia lemo helenga ke muta toto nga NeHalang letena urana ngana ke tang ke urana nga talngaria. Pomalam lape a eteia kue nenge a tuacholia reria onteinga mur.

### *Helenga Hetala Ngana Mur Pe Helenga Hel Pule*

<sup>7</sup> Tira Tikikus i ume ana non nenge ume ke kerkereng toto nga Non Soke nena ume pe mutemem tau tote i. Pe i lape heleia ure lochloch ngana nenge lohotot nge iau lange imo. <sup>8</sup> Ke pomalam e kulosia i ke lange imo ke hele urume motu ngamem lange imo pe hekerkereng ia letemo. <sup>9</sup> Pe imem, mutemem tau tote Onesimus pe lape e kulosia i ke la luluch nge Tikikus. Onesimus i non nenge letena manmanna nge Kristus pe lemo kileng nganngana ia. Iri nai lape te heleia ure lochloch ngana nenge te lohot nga lamai lange imo.

<sup>10</sup> Ne Aristakus koi tu luluch nge iau nga tuele au ngana pe i hekule nena apalanga lange imo. Pe Makus nenge Parnapas nena paen, hekule nena apalanga lange imo pule. (E hele urume Makus lange imo ke ulolo: Nenge teke at nge imo, a long teua i.) <sup>11</sup> Pe Iosua nenge ene e pule Iastus, hekule nena apalanga lange imo pule. Hana Iuta mol nem mana leteria manmanna, pe teume luluch

nge iau ke mo hekerkereng ia NeHalang nena naualanga pe nekinga, pe te halaua iau ke urana mana.

<sup>12</sup> Pe Ipapras hekule nena apalanga lange imo pule. Ipapras i Iesus Kristus nena ume ana non ia pe i lemo kileng nganngana ia pule. Kokoes ana non pur kikina toto ke hetalaulau amo ke teke NeHalang poia imo ke ames ke kerkereng ke pomange NeHalang nena hana mur nenge te nanas tau tote nena poinga pe te etei tote ure nemur nenge mutena taua iri. <sup>13</sup> E teke e heleia nei lange imo. Ipapras ume ke kerkereng toto ke halaulaua imo pe halaulaua iri nenge Laotisia pe Hirapolis pule. <sup>14</sup> Pe Lukas i non nenge nauale imem nga haleles pe mutemem tau tote i. Ana non iri nai Temas te hekule reria apalanga lange imo pule. <sup>15</sup> E teke a heleia lek apalanga lange titira mur pe liliura mur nga kileng nenge Laotisia pe a heleia lek apalanga lange Nimpa pe mata nenge NeHalang nenge te hekiraurau nga nena pele.

<sup>16</sup> Nga etue nenge a sisia alalaha nei ke het, a tunge lange iri mata nenge Laotisia ke te sisia pule. Pe imo a sisia alalaha nenge Laotisia mur te tunge lange imo pule. <sup>17</sup> A hele lange Akipus ke a teke, "O ume ke kerkereng ke o heulo hote ume nenge Non Soke tunge lange iong."

<sup>18</sup> Iau Paulus pe ehas ia nei nga iau sipok perik. Lek iechinga palaungana lange imo. Letemo metene iau nge etu nga tuele au ngana. E hetalaulau ke NeHalang letena urana ngana tu toto nge imo. Ngana laka lom.

4:5: Epe 5:15-16

4:6: Epe 4:29; 1Pi 3:15

4:7: Epe 6:21

4:8: Epe 6:22

4:9: Plm 10-12

4:10: Ume 12:12; 13:13; 15:37-39; 2Ti 4:11

4:12: Kol 1:7; Plm 23-24

4:17: Plm 2

4:18: 1Ko

16:21



## 1 Tesalonika Alalaha Elle Ngana Nenge Paulus Hasia Lange Tesalonika Mur

<sup>1</sup> Iau Paulus koi ehas ia alalaha nei. Iau pe Sailas pe Timoti mo hekule ke lange imo hehei pe hana nenge atu teu nga mata nenge NeHalang nge Tesalonika. Imo mata nem Temere NeHalang pe Non Soke Iesus Kristus reria hana mur laka imo. Pe e hetalaulau amo ke iri nai leteria poreke ia imo pe te poia letemo ke ma ke nek.

*Paulus Iechia Tesalonika Mur Nge Leteria Manmanna*

<sup>2</sup> Kokoes mo hele urana lala nge NeHalang pe letemem metentene imo nga lemem hetalaulaunga mur.

<sup>3</sup> Mo hetalaulau lala nge Temere NeHalang pe letemem metene letemo manmanna ngana nge kerkereng pe a poia ana ume ke lohohot, nenge aume ke kerkereng nga poinga nenge mutemo taua hehei pe hana, pe letemo tu ke kerkereng mana nge ara Non Soke Iesus Kristus.

<sup>4</sup> Titik mur pe liliuk mur, imem mo eteia ke NeHalang mutena tau tote imo pe hesilei hote imo ke nena hana mur pengpeng, <sup>5</sup> iange helenga urana toto ngana nenge mola ia nge imo lohohot ke i helenga mana ero. Helenga nem lohohot ia kikina ngana pule pe Opepengpeng hekerkereng ia ke teke helenga nem manmanna. Pe pule nga etue nenge motu luluch nge imo, a eteia poinga nenge mo nanasia ke mo halaua imo. <sup>6</sup> Imo a nanas tau tote Non Soke nena poinga nenge imem pule mo nanasia. Pe urelu meena ngana halang te lohohot nge imo, iange Opepengpeng poia imo ke a iech mana nge a nanasia helenga manmanna toto ngana. <sup>7</sup> Pe iri lohohot ngana nenga tuele kina nge Mesatonia pe Akaia, te naue imo nge apoi ke pomam pe iri pule lape te nanasia

lemo poinga nem. <sup>8</sup> Imo a hesongia Non Soke nena helenga ke langa tuele kina nenge Mesatonia pe Akaia mana ero, iange hehei pe hana nga kileng lohohot te eteia letemo manmanna ngana nge NeHalang pule. Ke pomalam ute pele nge lape mo heleia ero <sup>9</sup> iange iri siporia te nenene lemo poinga nenge along teua imem nga etue nenge mo lange imo. Pe te nene imo nge ahul rumemo ia aetapuna mur pe aume mana nge NeHalang toto ngana nenge tu ke maulul. <sup>10</sup> Pe a kulkulele mene Tuna nenge hemaul heke mule nga metenga nge lape sio at nga tapa. Ana non laka Iesus. Iesus i non nenge lape mene hot kelia ita nga NeHalang letena inin ngana nenge lape atat.

## 2

*Paulus Heleia Ana Ume Nenge Poia Nge Tesalonika*

<sup>1</sup> Titik mur pe liliuk mur, nga etue nenge mola ke mo ume luluch nge imo, emem ume nem hesil sio mana ero. <sup>2</sup> Pe a eteia ke nga tele ngana, hana nge Pilipai te hele poreke imem pe te tungge melmelenga at nge imem. Pe ara Soke NeHalang halaua imem ke momes ke kerkereng nga ure meena ngana nemur, ke mo haliu hote nena helenga urana toto ngana lange imo. <sup>3</sup> Ke pomalam lemme helenga nenge mo tungge lange imo, mo hele haka ia nga poinga poreke ngana e nge tungga letemem ero; Nenge mo teke mopoi ole imo ke mo pallaka imo ia. Nem ero. <sup>4</sup> NeHalang eteia letemem ke ulolo pe poia imem ke mo haliu hote helenga urana toto ngana nga lemene ngana. Pe mo haliu hote ke mopoi hehei pe hana reria iechinga ana ia ero, mo teke mo e iechia NeHalang. <sup>5</sup> Imo a eteia ke imem mo topala hite imem nga poinga tunten ngana e ero, pe mo poia helenga nenge mo teke mo pallaka ia imo ke mo ua totoia lemo

urelu mur ero. NeHalang eteia ke nei manmanna.

<sup>6</sup> Imem toinge mo poia imo pe iri hel pule ke a heto heke imem, iange Kristus nena hekulkulonga mur imem. <sup>7</sup> Pe nei ero. Nga etue nenge motu luluch nge imo mopoi ke nek toto lange imo ke pomange hei nenge poi ke nek toto lala nge tutuna mur. <sup>8</sup> Imem mutemem taua imo ke pomalam mo iech mana nge mo haliu hote NeHalang nena helenga urana toto ngana lange imo. Pe nem mana ero. Mo teke mo tung teu tote imem ke mo halaua imo iange mutemem tau tote imo. <sup>9</sup> Titik mur pe liliuk mur, e eteia ke imo letemo metene imem nge mo ume ke kerkereng toto ke mo haliu hote NeHalang nena helenga urana toto ngana pe ure meena ngana mur te lohotot nge imem. Imem mo umume ke sinanga pe miliko ke pomalam mo helete meena ia mele ke tung ngaunga at nge imem ero.

<sup>10</sup> Nga etue nenge motu luluch nge imo nenge letemo manmanna mo nanas mene poinga nemur nge pengpeng pe mele heleia imem nga poinga poreke ngana e ero. Imo a eteia pe NeHalang pule eteia ke nei manmanna. <sup>11</sup> Pe a eteia ke imem mo halaua imo ke pomange none nge halaulaua tutuna mur. <sup>12</sup> Mo poia imo ke nek pe mo hekerkereng ia letemo pe mo hele ke kerkereng lange imo ke a nanasia poinga nenge NeHalang mutena taua. Iange i long teuteua imo kela atu nga nena hemalmalinga nga nena naualanga.

<sup>13</sup> Kokoes mo hele urana lala nge NeHalang pule iange nga etue nenge mo laia nena helenga nge imo, a mene ke pomanga helenga nenge at nge none mana ero. A mene ke pomanga NeHalang nena helenga toto. Ke helenga nem ume ke kerkereng toto ke halaulaua imo nenge letemo manmanna. <sup>14</sup> Titik mur pe liliuk mur, imo apoi ke mange iri mata

nenge NeHalang nga kileng nenge Iutea. Iri leteria manmanna nge Kristus pule. Pe Iuta mur te poia ure meena ngana halang ke lohotot nge iri, ke pomange imo nge lemo hana mur pengpeng te poia ure meena ngana mur ke lohotot nge imo. <sup>15</sup> Pe Iuta nemur laka nenge te hune Non Soke Iesus pe hetat-alonga mur pe te lope hote imem pule. Iri te helete ininia NeHalang, pe hulua lochloch reria ngarang mur laka iri. <sup>16</sup> Imem, mo hetottore hana lomonmona ngana mur nenge iri Iuta ero, nga kue nenge lape te mene maulinga pe hana nemur tepoi elele imem. Pe iri te tamal taua reria poinga poreke ngana mur ke ele hakaka nga reria poinga nem. Ke pomalam NeHalang letena inin ngana nenge atat nem, lape lohot nge iri ke renren.

#### *Paulus Teke La Ke Nau Toto Mule Tesalonika Mur*

<sup>17</sup> Pe titik mur pe liliuk mur, lape motu kangkanga nge imo nga etue choro ngana mana iange hana te lope hote imem. (Pe mopoi ke pomanga aina kikino ngana nenge tataria mur pe tetemeria mur te hile sue iri.) Ke heueu nei mo kolkol ia imo pe letemem tu toto nge imo kura. Ke pomalam mo tango rara toto kue e nenge lape moat ke monau mule imo. <sup>18</sup> Imem mo teke mola toto ke monau mule imo. Iau Paulus, e totoi emule mana ke e teke ela pe ero iange Non poreke ngana poi ele tote imem. <sup>19</sup> Imem mutemem tau tote imo pe mo teke mola ke monau toto mule imo iange nga etue nenge ara Non Soke Iesus at muleia, lape mo iech pe mo palut laka iange imo apoi ke pomanga iengiengka nenge te kale heke nge imem. Ke letemem tu toto laka nge imo lo. <sup>20</sup> Pe manmanna toto ke imo mana lape a poia imem ke mo iech pe mo palut laka.

### 3

#### *Paulus Kulosia Timoti Ke Lange Tesalonika*

<sup>1-2</sup> Iok, imem mo teke mola ke monau toto mule imo pe kue e nge urana ero ke pomalam mo kulosia Timoti ke lange imo lo pe imem motu mana nge Atens nei lo. Timoti i tira ia nenge imem ul mo umume nge NeHalang, ke mo haliu hotote Kristus nena helenga urana toto ngana. Mo kulosia i ke la ke halaua imo ke hekerkereng ia letemo manmanna ngana, <sup>3</sup> iange lememe ero amo hel nge imo nge leteria manmanna ngana losio mule nga ure meena ngana nenge lohotos nei. Imo a eteia lo ke ure meena ngana nge pomai lape te lohotos nge ita pe NeHalang eteia. <sup>4</sup> Imem mo heleia lange imo nga etue nenge motu luluch nge imo ke a eteia ke ulolo - nenge mo teke ita lape ta amneia ure meena ngana mur. Ke ana ure mur koi nenge te lohotos nei. <sup>5</sup> Ure nei lohotos pe iau lemek ero nge e kulkulala sakilil ol, ke pomalam e kulosia Timoti ke lange imo ke e teke e longo lange i nga letemo manmanna ngana. Iau letek mataunga iange nenge teke Non poreke ngana poia letemo manmanna ngana ke losio mule, emem ume nem lape hesil sio mana.

#### *Paulus Iech Nga Timoti Na Helenga*

<sup>6</sup> Pe ero, heueu nei Timoti sau hot mule nge imem lo, pe atia helenga urana ngana nga letemo manmanna ngana pe nga lemo poinga nenge mutemo taua hehei pe hana. Pe hele at nge imem ke teke letemo metene imem pe a iech pe a teke anau haka mulmule nge imem ke pomange imem nge mo teke monau haka mulmule nge imo. <sup>7</sup> Ke titik mur pe liliuk mur, hana tepoi porekreke imem pe ure meena ngana halang te lohotos nge imem. Pe Timoti hekerkereng tote imem pe poia imem ke

singimem urana mule nga nenge at ke heleia letemo manmanna ngana at nge imem. <sup>8</sup> Heueu nei mopoi ke pomalaka nge mele nenge maul haka mule nga manga molong iange mo longe imo nge ames ke kerkereng toto nge Non Soke. <sup>9</sup> Ke imo mana a poia imem ke mo hele urana lange ara Soke NeHalang. Pe mo hele urana lange I iange iechinga nenge lohotos nge imem nga NeHalang matana, at laka nge imo pule. <sup>10</sup> Pe mo hetaulaulau lala nge i nga sinanga pe nga miliko ke mo teke monau haka mule nge imo pe mo halaua imo ke letemo manmanna ngana kerkereng toto ol.

<sup>11</sup> Ke mo teke ara Soke Temere NeHalang pe ara Non Soke Iesus te hepengia lememe kue nenge mola nge imo. <sup>12</sup> Pe mo teke Non Soke poia poinga nenge mutemo taua hehei pe mutemo taua hehei pe hana ke puo ke palaungana toto ke pomange imem nge mutemem taua tote imo. <sup>13</sup> Pe mo teke hekerkereng ia letemo ke atu ke a pengpeng toto pe mele heleia imo nga lemo poinga poreke ngana e ero, nga ara Soke Temere NeHalang matana, nga etue nenge ara Non Soke Iesus at luluch nge nena pengpeng ngana mur.

### 4

#### *Tunga Nenge Poia NeHalang Ke Iech*

<sup>1</sup> Iok titik mur pe liliuk mur, imem mo hetore imo ke ulolo nga atu ngamo nenge poia NeHalang ke iech, ngana laka nenge a nananasia nem. Pe mo teke mo onteia imo pe mo hekerkereng tote imo nga Non Soke Iesus ene, ke a poi ke urana toto lange hehei pe hana ol. <sup>2</sup> Mo hele ke kerkereng toto lange imo iange a eteia urelu lochloch ngana nenge mo hetoro imo ia, nga Non Soke Iesus ene ke ulolo.

<sup>3</sup> NeHalang mutena ke teke atu ke a pengpeng pe a kangkanga toto nga salaunga ana poinga. <sup>4</sup> Pe mutena ke

teke imo elle pe elle a nauele singimo lemene ngana mur nga poinga nenga leinga ke nek. Ke a poia singimo ke nanasia poinga nge urana pe pengpeng. <sup>5</sup> Hana nenge te eteia NeHalang ero, te heporeke singiria nga salaunga ana poinga pe imo apoi ke pomam ero. <sup>6</sup> Pe a pallaka ia NeHalang nena none nga ure nei ero pe pule a poia poinga nei ero. Imem mo hele lange imo ke ulolo pe mo hele ke kerkereng toto ke mo teke, NeHalang lape poia ure meena ngana ke lohot nge iri nenge te popoia poinga nei. <sup>7</sup> Iange NeHalang iu ngana ia ita nem, teke tatu ke pengpeng mana pe ta salau rara ero. <sup>8</sup> Ke pomalam mele nenge lemene ero nge nanasia hengetoro nei, lemene ero ia NeHalang. Iange none nena hengetoro nei ero, NeHalang nenge tunge nena Opepengpeng lange imo nena hengetoro ia.

#### *Ta Poia Mutenga Ana Poinga Ke Kerkereng*

<sup>9</sup> Iau lape e hele teu langa mutenga ana poinga nenge a poia lala nge pekngamo mur ero. Iange NeHalang hetore imo ke ulolo ke teke mutemo tau helel. <sup>10</sup> Ke titik mur pe liliuk mur, i manmanna ke mutemo taua pekngamo nemur nenge leteria manmanna nga kileng mur nge Mesatonia, pe mo hele ke kerkereng toto lange imo ke a poia poinga nem ke lohot ke nakuna urana toto.

<sup>11</sup> Letemo metene poinga nem ke pomanga ure nenge hetakile imo ke nek, ke a umumeia lemo ume mur pe a nanasia imo sipomo lemo poinga mur nga lemo ume, ke halaua imo nga atu ngamo ke pomanga mo hele ngamem ia lange imo ke ulolo. <sup>12</sup> Nenge teke apoi ke pomam, lape a hottaua ure nenge mutemo taua pe a kulele mele ke tunge lange imo ero. Pe iri nenge te eteia NeHalang ero, te renga imo pe tetal heke imo.

#### *Non Soke At Mule Ngana*

**4:7:** Hip 12:14; 1Pi 1:15-16    **4:8:** Luk 10:16; 2Ko 1:22    **4:9:** Ioa 13:34    **4:11:** Epe 4:28    **4:14:** Rom 14:9; 1Ko 15:3-4, 12    **4:15:** 1Ko 15:51-52    **5:2:** Mat 24:42-43; 2Pi 3:10; Hem 3:3    **5:3:** Mat 24:39; Luk 21:34-35

<sup>13</sup> Titik mur pe liliuk mur, mo teke a etei ke nek nga ure nenge lape lohot nge iri nemur nenge te mete ke ulolo, pomalam lape letemo meena pe a tangia iri ero. Iri nenge te eteia NeHalang ero te popoia poinga nem. <sup>14</sup> Pe ita ta eteia ke Iesus mete pe maul haka mule pe letera manmanna ke NeHalang lape hemaul heke mule Iesus, luluch nge iri nenge te mete ke ulolo. <sup>15</sup> Helenga nei Non Soke nena helenga pe lape mo heleia lange imo. Ana helenga tang ke mai koi: Nga etue nenge Non Soke at ia, ita nenge ta maulul kura lape ita muka tala nge iri nenge te mete ero. <sup>16</sup> Iange haliunga palaungana lape lohot pe angkelo mur aria soke haliu pe NeHalang nena ngalum paena alnganngana pe Non Soke i sipona sio nga tapa ke at. Pe iri nenge leteria manmanna nge Kristus pe te mete lape temaul haka mukam. <sup>17</sup> Ke het pe ita nenge ta maulul kura nga etue nem, ta eukirau luluch nge iri ke ta saolia Non Soke nga ulu. Pe lape tatu luluch nge Non Soke ke koko. <sup>18</sup> Ke pomalam a hekerkereng helia imo elle pe elle nga helenga nemur.

## 5

#### *Tatu Ke Tatatalo Ala Nga Non Soke At Ngana*

<sup>1</sup> Pe titik mur pe liliuk mur, etue tei pe etue utar nenge Non Soke at ia, lape e hele teu langa nem ero. <sup>2</sup> Iange imo a etei tote etue nenge Non Soke at mule ia. Etue nem lape at pe herura hot mana ke pomanga non kemenge kina nenge kemkeme nga miliko. <sup>3</sup> Hehei pe hana lape te hele ke te teke, "Imem motu ke nek mana pai! Letemem ia ute pele ero!" Pe ure poreke ngana lape heporeke iri nenge pomam ke ueiuei toto, ke pomanga melmelenga nenga hohonga nenge lohot nge heie. Pe lape te eleis maul ngaria nga ure nem ero toto. <sup>4</sup> Pe titik mur pe liliuk mur, imo a tutu



nga kileng au ngana ero, ke pomalam etue nem lape herura hote imo ke pomanga kemenge kina e ero. <sup>5</sup>Iange lemo inga mur pe lemo ume mur nenge a popoia, nakuna pomalaka nga chaia matana mes manmana ke tua hatal menmene imo pe atu ke mallaha manmana nga lemenga. Ke ita, miliko pe kileng au ngana ana hehei pe hana mur ia ita ero. <sup>6</sup>Ke pomalam ta kulala pe ta nauala manmana, pe ta mamani ke mange iri nenge te mamamani ero. <sup>7</sup>Iange iri nenge te mamamani, te mamamani nga miliko pe iri nenge te inin, te inin nga miliko. <sup>8</sup>Pe ita, chaia matana tua hatal menmene ita. Ke pomalam ta nauele rera inga mur ke nek. Pe ta heron heke lete manmanna ngana pe mutenga ke poi ele ita. Pe letera manmanna ngana nenge lape ta mene maulinga ke koko, ta heronia ke pomanga ara horel nenge poi ele palpara. Nem pomanga palinga hel ana hana mur nenge te heron heke ure nemur ke poi ele iri nga etue nenge tepal hehel. <sup>9</sup>NeHalang hesilei hote ita ke teke ta amneia melmelenga nga letena inin ngana ero. Hesilei hote ita ke teke ta mene maulinga nge ara Non Soke Iesus Kristus. <sup>10</sup>Iesus mete ke hemas mule ita ke ulolo. Pe nenge teke ta mete lo, nem pe ta maulul kura, lape tala ke tatu luluch nge i nga etue nenge at mule ia. <sup>11</sup>Ke pomalam a halau hel pe a hekerkereng helia imo elle pe elle letemo ke pomanga a popoia nem lo.

### *Helenga Hetala Ngana Mur Pe Apalanga Mur*

<sup>12</sup>Iok titik mur pe liliuk mur, mo teke mo onteia imo ke apoi ke urana toto lange hana nenge teume luluch nge imo, ke te hetottore imo pe te henonoua imo nga kue nenge a nansia Non Soke. <sup>13</sup>Iri te poia ume palaungana, ke pomalam mutemo tau tote iri pe atal heke tote iri. Pe

imo elle pe elle atu ke a tano luluch nge pekngamo mur. <sup>14</sup>Titik mur pe liliuk mur, mo hele ke kerkereng lange imo ke a heleia iri nenge rera melei tana hali. Pe a hekerkereng ia iri nenge te matautau leteria pe a halaua iri nenge leteria manmanna ngana kerkereng ero pe apoi ke nek lange hulua lochloch. <sup>15</sup>Anau ala ke nek iange lape mele hel te poia poinga nenge te tuachol helelia poinga poreke ngana. Aume ke kerkereng ke apoi ke nek lange imo elle pe elle pe nge hehei pe hana lochloch.

<sup>16</sup>Atu ke a iech ke kokoes. <sup>17</sup>A hetalaulau ke kokoes, <sup>18</sup>pe a hele urana lange NeHalang nga ure lochloch ngana nenge te lohotos, iange NeHalang mutena ke teke imo nenge a nansia Iesus Kristus a poia poinga nenge pomam.

<sup>19</sup>Opepengpeng popoia ana ume nge imo ke pomanga oan nge ngau lalala pe apal mete oan nem ero. <sup>20</sup>Pe ahul rumemo ia NeHalang nena helenga nenge hetatalonga mur te hele hotote ero. <sup>21</sup>A amnei urume helenga mur lochloch pe a rahite ure urana ngana mur <sup>22</sup>pe a hile hote ure poreke ngana mur.

<sup>23</sup>Poinga nenga tunga nge nek huna toto nge NeHalang, pe mo hetalaulau lange i ke nauele singimo mur pe opemo mur pe ngamo mur, pe helemlem ia imo. Ke pomalam, nga etue nenge Non Soke Iesus Kristus at mule ia, lape te hele poreke imo nga poinga poreke ngana e ero. <sup>24</sup>NeHalang hesilei hote imo ke ulolo ke nena hana mur imo. Pe i lape helemlem ia imo ke manmanna.

<sup>25</sup>Pe titik mur pe liliuk mur, a hetalaulau emem ke NeHalang halaua imem pule. <sup>26</sup>Pe a sisa perimo nge NeHalang nena hana mur lochloch pe a poia nga NeHalang ene. <sup>27</sup>Pe e hele ke kerkereng lange imo nga Non Soke ene ke e teke a sisia alalaha nei lange iri lochloch ngana nenge leteria manmanna.

5:5: Rom 13:12 5:8: Isa 59:17; Epe 6:14, 17

5:15: Rom 12:17; 1Pi 3:9

5:16: Pil 4:4

5:18: Epe 5:20

5:19: Epe 4:30

5:14: 2Te 3:6, 11

5:23: 2Te 3:3 5:25: Kol 4:3; 2Te 3:1

<sup>28</sup> E hetalaulau amo ke ara Non Soke Iesus Kristus nena poinga urana toto ngana tu toto nge imo. Ngana laka lom.

## 2 Tesalonika Alalaha Nai Ngana Nenge Paulus Hasia Lange Tesalonika Mur

<sup>1</sup> Iau Paulus koi ehas ia alalaha nei. Iau pe Sailas pe Timoti mo hekule ke lange imo hehei pe hana nenge atu teu nga mata nenge NeHalang nge Tesalonika. Imo mata nem Temere NeHalang pe Non Soke Iesus Kristus reria hana mur laka imo.

<sup>2</sup> Pe e hetalaulau amo ke Temere NeHalang pe Non Soke Iesus Kristus leteria ia imo, pe te poia letemo ke ma ke nek.

### *Ume Nenge NeHalang Poia Nga Kristus At Mule Ngana*

<sup>3</sup> Titik mur pe liliuk mur, imo a poia imem ke mo hele urana lange NeHalang ke kokoes mana. Pe urana nge mopoi ke pomau iange imo letemo manmanna ngana pupuo, pe poinga nenge mutemo taua hehei pe hana, pupuo pule nge imo elle pe elle.

<sup>4</sup> Ke pomalam mo palute imo lange iri mata mur nenge NeHalang pe mo hele lange iri nga nenge ames ke kerkereng ke kokoes nga letemo manmanna ngana, nga etue nenge hana tepoi porekreke imo pe urelu meena ngana mur te lohotot nge imo.

<sup>5</sup> Nenge nei henonou hote ke NeHalang amnei teu ngana nga rera poinga mur pengpeng toto. Ke nga ure meena ngana nemur nenge te lohotot nge imo nem, teke poia imo ke ateu langa nena naualanga pe nekinga. <sup>6</sup> NeHalang lape poia poinga nge pengpeng, ke pomalam lape poia ure meena ngana ke lohot nge iri nenge te poia ure meena ngana ke lohotot nge imo. <sup>7</sup> I teke poia imo ke ata eingamo nga ure meena ngana nenge te lohotot nge imo pe imem pule ke pomalam. Pe lape poia nga etue nenge Non Soke Iesus at mule ia, nenge I pe nena

angkelo mur nenge kikiria toto te lohot nga tapa, pe at luluch nga oan sapellala ngana. <sup>8</sup> Pe lape poia melmelenga ke lohot nge iri nenge te eteia NeHalang ero, pe iri nenge tehul rumeria ia helenga urana toto ngana nenge ara Non Soke Iesus. <sup>9</sup> Pe melmelenga nenge lohot nge iri nem, lape tu ke koko pe lape tetu ke te kangkanga hot Non Soke ana pe tetu hot pule nga Non Soke nena hemalmalinga nenge lohot nga kikina ngana. <sup>10</sup> Ke ure nei lape lohot nga etue nenge Non Soke Iesus at mule ia pe nena hana mur nenge te pengpeng te heto heke I. Pe nena hana mur nenge leteria manmanna nge i lape te iech ele tote. Pe imo pule lape a koko teu luluch nge iri, iange letemo manmanna ia helenga nenge mo heleia lange imo.

<sup>11</sup> Imem letemem metene nei, ke ngana laka nenge mo hetalaulau amo lala nge NeHalang ke kokoes. Pe mo onteia ara Soke NeHalang ke sisala teu luluche imo ke atu teu nga tunga nenge iua imo ke teke ala ke atu ia. Pe lemo ume urana ngana mur nenge a teke a popoia nga letemo manmanna ngana, lape mo hetalaulau ke NeHalang halaua imo nga nena kerkerenga ke a poia. <sup>12</sup> Ke pomalam lape a heto heke ara Non Soke Iesus ene pe I pule lape heto haka tote imo. Ke ure nei lape lohot iange Temere NeHalang pe Non Soke Iesus Kristus lape leteria ia imo.

## 2

### *Non Poreke Ngana Lape Lohot*

<sup>1</sup> Titik mur pe liliuk mur, nga etue nenge ara Non Soke Iesus at mule ia I lape eukiraua ita lochloch. <sup>2</sup> Pe nenge teke a longe helenga e nge te heleia ke te teke, "Etue nenge Non Soke at mule ia lohot lo." A longe helenga nem pe samo loiloi rara ia ero. Iange ope e nge altoto, lape tunge helenga nem lange mele ke haliu hote. Nem

pe helenga nem lape lohot mana nge mele i sipona. Nem pe mele hel te teke mohas ia helenga nem pe mo hekule lange iri. <sup>3</sup> A longo tau pulute mele hel nenge te paut laka manmana ero, iange poinga e lape lohot mukam, ke het pe etue nem at sapele. Ke poinga nenge lape lohot nem ngana laka: Hehei pe hana tehul rumeria ia NeHalang, pe non poreke ngana nenge longo ole tautaua NeHalang nena helenga lochloch, lape lohot nga mallaha. Ana non, NeHalang talue ana etue nike nge lape hemete tote i nga oan. <sup>4</sup> Non poreke ngana nem lape la ke are teu nga NeHalang nena tunginga ana pele pe tal heke tote i ke teke i NeHalang. Pe ngailele ure lochloch ngana nenge hehei pe hana te heto NeHalang ia pe ure nemur nenge te heto hekeke iri.

<sup>5</sup> E heleia urelu nemur lange imo nga etue nenge etu luluch nge imo. Letemo metene iri kura kau? <sup>6</sup> Pe heueu nei non poreke ngana nem lohot ero iange ute rahit ele i ke kulele ana etue pengpeng nenge lape lohot ia. Pe imo a eteia ure nenge rahit ele i nem. <sup>7</sup> Pe non poreke ngana nem nena kerkerenga ume komkome lo pe mele la poi elele kura. Pe mele nem lape poi elele kerkerenga nem ke la het nga etue nenge te mene hot kelia i. <sup>8</sup> Te mene hot kelia i ke la, pe non poreke ngana nem lohot sapele nga mallaha. Pe Non Soke Iesus lape at luluch nga nena hemalmalinga pe lape hun sue non poreke ngana nem nga eingana nenge lohot nga hanna. Pe nena hemalmalinga ana lemenga lape hemete tote non poreke ngana nem ke het. <sup>9</sup> Nga etue nenge non poreke ngana nem lohot, i lape at luluch nga Satan nena kerkerenga pe pallaka ke poi hote ure nemur nenge ta naue pe ta rura pe poi hote merakulo mur pe poi hote lala mur. <sup>10</sup> Pe hekoukou ule hehei pe hana nenge lape te mete pe te lasus mana nga nena poinga

nemur nenge pallaklaka. Hehei pe hana nemur lape te mete pe te lasus iange lemeria ero toto ia helenga manmanna ngana. Nenge teke muteria taua helenga manmanna ngana lape NeHalang mene mule iri. (Pe nei ero.) <sup>11</sup> Ke pomalam NeHalang lape kulosia nena kerkerenga e lange iri ke hepriu ele tote leteria nga helenga manmanna ngana pe poia iri ke leteria manmanna nga ure pallaklaka ngana mur. <sup>12</sup> Ke iri lochloch ngana nenge leteria manmanna ia helenga manmanna ngana ero, pe te iech mana nge te popoi poinga poreke ngana, NeHalang lape tunge aria melmelenga.

### *Ames Ke Kerkereng*

<sup>13</sup> Titik mur pe liliuk mur, Non Soke mutena taua imo pe NeHalang hesilei hote imo nga talun ngana toto, ke teke mene mule imo nga Opepengpeng nena ume nenge helemlem ia imo pe poia imo ke letemo manmanna nga helenga manmanna ngana. Pe mo hele urana lange NeHalang ke emule es mana iange letemo manmanna ngana kerkereng. <sup>14</sup> Imem mo haliu hote helenga urana toto ngana lala nge imo. Pe nga emem ume nem, NeHalang iua imo ke mene mule imo. Ke pomalam hemalmalinga nenge ara Non Soke Iesus Kristus lape sio nge imo pule. <sup>15</sup> Ke pomalam titik mur pe liliuk mur, ames ke kerkereng nga helenga manmanna ngana nemur nenge mo hetore lala nge imo nga lemem haliunga, pe nenge mohas ia lala nge imo, a rahite ke kerkereng pule.

<sup>16</sup> Temere NeHalang letena ia ita pe mutena taua ita. Pe tunge kulukulalanga urana ngana at nge ita ke poia letera ke ma ke nek ke koko. Pe mo hetalaulau lange i pe nge ara Non Soke Iesus Kristus ke <sup>17</sup> hekerkereng ia imo pe halaulaua imo ke kokoes



nga ure urana ngana mur nenge a popoia pe a helele ia.

### 3

#### *A Hetalaulau Emem Pule*

<sup>1</sup> Iok titik mur pe liliuk mur, a hetalaulau emem pule ke Non Soke nena helenga song hotot ke lala pe hehei pe hana te longo taua ke mange imo. <sup>2</sup> Pe a hetalaulau emem pule ke NeHalang nauele imem ke nek nge hana porekreke ngana mur iange hana halang leteria manmanna ero. <sup>3</sup> Non Soke i non nge popoia poinga nenge pengpeng pe I lape hekerkerengia imo pe nauele imo ke nek nge non poreke ngana. <sup>4</sup> Non Soke hekerkereng ia letemem pe mo eteia ke imo a popoia ure nemur nenge mo heleia lange imo. Pe lape a poia nga hoena pule. <sup>5</sup> Pe mo hetalaulau amo nge Non Soke ke hemellehe letemo ke a eteia ke NeHalang mutena tau tote imo pe poia imo ke ames ke kerkereng ke mange Kristus.

#### *Imo Lochloch Apoia Ume*

<sup>6</sup> Titik mur pe liliuk mur, mo hele ke kerkereng lange imo nga ara Non Soke Iesus Kristus ene ke mo teke, a kangkanga toto titira nemur aria. Ngana laka titira nemur nenge te nanasia hengetoro nenge mo tunge lange imo ero pe reria melel tana hali. <sup>7</sup> Imem nga etue nenge motu luluch nge imo mo kila mana ero. Imo sipomo a eteia pe apoi ke pomange imem. <sup>8</sup> Ngaunga nenge mo mene nge mele, mo ngau mene ero, mo olia pule. Pe mo ume ke kerkereng toto nga sinanga pe nga miliko pule. Mo poi ke pomam iange lememe ero nge amoe olia ute ke tunge at nge imem. <sup>9</sup> Imem toinge mo onteia imo ke a halaua imem, pe ero lememe ero nge mo poia poinga nem. Mo ume mana ke mo teke mo heneue imo ke a nanasia poinga nei. <sup>10</sup> Nga etue nenge motu luluch nge imo, mo tunge hotonga nei lange imo,

“Mele nenge nena melel tana hali ngau ero.”

<sup>11</sup> Mo hele ke mai iange mo longe nge te teke amo hel nge imo, tei rara mana pe te poia ume e ero toto. Aria uia laka nenge tetal teu pulut mene iri langa mele hel reria ure nenge iri reria unne la ero toto ia. <sup>12</sup> Mele hel nenge pomam, mo hele ke kerkereng toto lange iri nga Non Soke Iesus Kristus ene ke mo teke: Te are ke nek pe teume ke te hottau iri siporia aria ngaunga. <sup>13</sup> Pe titik mur pe liliuk mur, imo a rahat heke poinga urana ngana ke kerkereng, lemo melel tana ia ero.

<sup>14</sup> Nenge teke mele hel te nanasia helenga nenge mohas sue nga alalaha nei ero, a nauele iri ke nek pe a kangkanga toto aria ke te meia iri. <sup>15</sup> Pe letemo metene ke nek: Apoia iri ke pomanga lemo ngarang mur ia iri ero, a poia iri ke pomanga NeHalang nena hana mur ia iri pe a hele ke kerkereng lange iri ke te hulua reria poinga mur.

#### *Helenga Hetala Ngana Mur*

<sup>16</sup> Poinga nenge tatu ke letera elle, hunu toto nge Non Soke. Pe e hetalaulau amo lange I ke poia imo ke atu ke nek ke kokoes. Non Soke tu luluch nge imo lochloch.

<sup>17</sup> Iau sipok ehas ia helenga nei nga perik: Lek iechinga palaungana lange imo. Iau Paulus. Lek alalaha nemur nenge ehas ia, ehas elele iri ke mai kolo.

<sup>18</sup> E hetalaulau amo ke ara Non Soke Iesus Kristus letena urana ngana poia letemo ke ma ke nek. Ngana laka lom.

## 1 Timoti Alalaha Elle Ngana Nenge Paulus Hasia Lange Timoti

<sup>1</sup> Iau Paulus koi ehas ia alalaha nei, pe iau Iesus Kristus nena hekulkulonga. Ara hemasinga NeHalang pe Iesus Kristus nenge ta kulelele, iri nai te henonou hote iau ke e rahite ume nei.

<sup>2</sup> Timoti, e heto tukia iong iange ita nai letera manmanna nge Kristus. Ke pomalam ehas ia alalaha nei ke lange iong.

Pe e hetalaulau ke Temere NeHalang pe ara Non Soke Iesus Kristus te tunge halaunga palaungana lange iong pe leteria porekeia iong pe te heurana ia letem ke ma ke nek.

### *Ta Hekou Sue Helenga Pallaklaka Ngana Mur*

<sup>3</sup> Nga etue nenge e lohaka ke e lala nge Mesatonian e hele ke kerkereng toto lange iong ke otu nge Epesus ke o hele ele hana nenge te hetottore hehei pe hana nga hengetoro pallaklaka ngana. <sup>4</sup> O hele lange iri ke o teke te nana pe te sisala hotote reria tete mur ero ol, te esil mene aria etue paian. Nananga sasase toto ngana nenge pomam, hepiriu ele hehei pe hana leteria nga kue nenge NeHalang teke mene mule iri ia. Mele nenge letena manmanna nge Kristus lape eteia NeHalang letena tuanin ngana mur. <sup>5</sup> E hele ke kerkereng toto lange iong ke opoi ke pomam iange e teke te amnei teu ke nek toto nga leteria ke te nanas mene poinga urana ngana mur, ke muteria taua pekngaria mur nga leteria toto. Pe muteria tau hel ngaria nenge pomam henonou hote ke iri te rahat tote leteria manmanna ngana nemkura. <sup>6</sup> Iange hana nemur hel tehul rumeria nga poinga nei pe te hele

rara mana nga helenga nemur nenge luria ero. <sup>7</sup> Te teke te hetore hehei pe hana nga hotonga nenge Moses tung sue pe te eteia ure nenge te heleleia ero pe utar nenge te haliu hotote ero.

<sup>8</sup> Ita ta eteia ke helenga nemur nga NeHalang nena hotonga te urana, nenge teke ta nanas tau tote ke pomanga tetal ngaria ia. <sup>9</sup> Ta eteia pule ke hotonga nemur tehas hote ke hana nenge te urana reria ia ero. Tehas hote ke lange hana nenge te longo olole pe nenge te nanasia hotonga mur ero pe nenge te heto hekeke aetapuna mur pe nenge te popoi poinga poreke ngana pe nenge te hune tataria mur pe tetemeria mur pe iri hel pule nenge te hunun hana. <sup>10</sup> Pe pule tehas hote ke lange hana nenge telau sisio hehei pe nenge te poia poinga poreke toto ngana nenge mange Sotom mur pe nenge tetak tototo ita non pe nenge te pallaklaka. Iri nemur reria poinga mur te tualele elele NeHalang nena henge-toro urana ngana mur. <sup>11</sup> Hengetoro nemur elle mana ke pomanga Helenga Urana Toto Ngana nenge NeHalang tunge at nge iau ke e haliu hote. Hehei pe hana te heto heke I pe te hele ke te teke I non nge urana toto nga nena ure urana ngana mur.

### *Paulus Hele Urana Lange Kristus*

<sup>12</sup> Pe e hele urana toto lange ara Non Soke, Iesus Kristus nge hekerkereng ia iau iange sana kikina nge iau pe hesilei hote iau ke e poia ume nei. <sup>13</sup> Nge nike letak manmanna nge Kristus ero pe e hele poreke tote I. Pe epoi poreke pe epal ule nena hana mur. Pe I letena porekeia iau iange letak manmanna nge I ero pe e eteia ure nenge e popoia ero. <sup>14</sup> Ara Non Soke tung lochloche letena poreke ngana at nge iau pe letena poreke ngana nem muta toto nga letemanmanna ngana pe mutenga nenge tu nge Iesus Kristus.

<sup>15</sup> Helenga nei manmanna toto ke urana nge o rahit tote ke tunge iong: Iesus Kristus sio at nga ich nei ke hemas mule hana porekreke ngana mur pe iau none nenge e poreke toto. <sup>16</sup> Pe Iesus Kristus letena ia iau ke teke heneue iri nenge te popoi poinga poreke ngana. Nenge teke leteria manmanna nge I lape te mene maulinga ke koko, iange letena poreke ngana hetala ngana ero toto. <sup>17</sup> NeHalang i naungaala ana non nenge mete erochro pe nauele hehei pe hana nga etue lochloch pe ta naue i erochro. Pe I hemalmalinga ana non nenge hehei pe hana te heto hekeke ke koko. Oe, Manmanna

*Paulus Hekerkerengia Timoti Nga Letena Manmanna Ngana*

<sup>18</sup> Kolek Timoti, e teke e hele ke kerkereng lange iong ke pomai. Nga etue nenge mo hetalau am, mo hele ia helenga hetatalonga mur nge lape te lohot nge iong. Pe e teke o rahite helenga nemur ke kerkereng ke pomanga lem kaleu. Pomalam lape o hekou sue hetoronga pallaklaka ngana nemur. <sup>19</sup> O rahite letem manmanna ngana ke kerkereng pe o amnei teu ke nek toto nga letem ke o nanas mene poinga urana ngana mur. Iange iri hel te hile sue leteria manmanna ngana lo ke pomanga alolap nenge te saua nga sausaunga. <sup>20</sup> Hana nai, e tung tele iri langa non poreke ngana penna. Ngana laka Imenus iri nai Aleksenta. Iange iri te hetottoro nga ure nemur nenge te hele poreke NeHalang. Pe nei lape hetore iri ke te poia poinga nem ero ol.

## 2

*A Hetalaulau Lange NeHalang Ke Halaua Hulua Lochloch*

<sup>1</sup> Ke pomalam, e hele ke kerkereng lange imo ke apoi ke mai tala. E teke a hetalaulau hulua aria pe a onteia NeHalang ke tunge ure mur nenge muteria taua lange iri. Pe e teke

a hetalaulau iri hel pule aria pe a hetalaulau hehei pe hana lochloch aria pe a hele urana lange NeHalang nga nena ume nenge poia lange hulua lochloch. <sup>2</sup> Pe pule e teke a hetalaulau lange NeHalang ke halaua naungaala ana hana mur pe hana papalauna mur ke ita lochloch tatu ke tanek pe ta nanasia poinga urana ngana nenge NeHalang mutena taua. <sup>3</sup> Urana nge a hetalaulau hehei pe hana aria iange ara Hemasinga NeHalang iech toto nga poinga nenge pomalam. <sup>4</sup> I lemene ke teke hehei pe hana lochloch te rahite hengetoro manmanna ngana nenge Kristus pe te mene maulinga ke koko.

<sup>5</sup> Iange ita ta eteia ke:

“NeHalang elle mana.

Pe pule non elle mana nge poia ita ke ta pengpeng nga NeHalang matana.

Ngana laka Iesus Kristus.

Iange I muka ia polong lele ngana nenge lange NeHalang.

<sup>6</sup> Nga NeHalang lemene ngana Iesus tunge i sipona ke mete.

Ke nga Iesus ana metenga nem, NeHalang mene mule hehei pe hana lochloch.”

Helenga palaungana nei, NeHalang hemallaha hote nga etue nenge i sipona hele talue lo. <sup>7</sup> Ke ngana koi nenge NeHalang henonou hote iau ke iau hekulukulonga pe e haliu hotote Helenga Urana Toto Ngana. (Pe e hele ke manmanna pe e pallaklaka ero.) Isipona henonou hote iau ke e hetore hana lomonmona ngana mur ke leteria manmanna nga helenga manmanna toto ngana.

<sup>8</sup> Ke e teke, nga etue nenge hana nga kileng lochloch te eukirau ke te heto heke NeHalang, te hetalaulau pe tetul heke peria nga leteria urana ngana pe te hile hote leteria inin ngana mur pe reria hunelinga mur.

*Hehei Reria Ume Urana Ngana Hemalmalia Iri*

<sup>9</sup> Pe pule e teke imo hehei a heronia hengeron nemur nenge ururia sio pe nakuna urana nga hulua tenau ngaria. Pe a lule palpalumo ina ero pe a hemalmalia imo nga um nenge chalemlem pe koikoi ke manga lauta pe nga relem utona ero. <sup>10</sup> Iange hehei nenge te teke te nanasia NeHalang te hemalmalia iri ke nakuria urana nga reria poinga urana ngana mur, nenge te halaulaua hehei pe hana.

<sup>11-12</sup> Pe e longele heie ke hetore hana mur pe nauele iri ero. Iau e teke hehei tereng kun pe te longo manmana nga etue nenge hana te haliu hotote NeHalang nena helenga. <sup>13</sup> Iange NeHalang pip hot tele Antam ke het pe Eua. <sup>14</sup> Pe pule Satan channangaia Antam ero. Satan channangaia Eua ke poia poinga poreke ngana. <sup>15</sup> Pe NeHalang lape hemas mule hehei mur nga te hoho ngaria. Lape hemas mule iri nenge te rahite leteria manmanna ngana nge Kristus ke kerkereng pe muteria taua iri hel pule pe te nanasia poinga nge peng-peng.

### 3

#### *Imo Mata Ana Naungaala Mur Apoi Kenek*

<sup>1</sup> Helenga nei manmanna toto koi. Nenge teke none mutena toto ke teke i mata ana naungaala, mutena tau tote ume urana toto ngana la. <sup>2</sup> Non nem urana nge heo ele tote i ke nek nga poinga poreke ngana pe poi matana rara ero. Pe urana nge nehei elle mana pe letena matana ke nek pe tuamasia nena inga mur pe hehei pe hana tepoi ke nek lange i pe long teuteua lang mur, pe etei toto nga nenge hetottoro nga NeHalang nena helenga. <sup>3</sup> Non nenge pomam urana nge i non nenge inin ero pe palpal ero pe mutena taua hulua lochloch pe mutena hali ia umtutuna ero. <sup>4</sup> Pe urana nge nauele nehei pe tutuna

mur ke nek pe hetore tutuna mur ke te longo taua i pe tepoi ke nek lange hehei pe hana. <sup>5</sup> Pe nenge teke eteia poinga nenge nauele nehei pe tutuna mur ke nek ero, lape nauele mata nenge NeHalang ke merei? <sup>6</sup> Nenge teke none hulua letena pe letena manmanna nge Kristus ke mala ero kura, urana nge mene ume nenga mata ana naungaala ero mukam. Iange lape teke i toto pe lape NeHalang heul sue i ke pomange Satan. Pe mele nenge letena manmanna toto nge Kristus ke mala lo, urana nge rahite ume nem. <sup>7</sup> Non nenge pomam, urana nge hehei pe hana nenge te tuteu nga mata nenge NeHalang ero, te heleia i ke te teke i non nge urana. Pomalam lape te hele poreke i ero pe lape losio teu nga Satan na poinga poreke ngana mur ero.

#### *Imo Halaunga Ana Hana Mur Apoi Kenek*

<sup>8</sup> Pomalam mana nge halaunga ana hana nga mata nenge NeHalang. Urana nge leteria matana ke nek nga aria ume pe reria poinga mur, pe aria hengetau nachnai ero. Pe tein sakililia uain ero pe leteria tumana nga umtutuna ero. <sup>9</sup> Urana nge te rahite helenga manmanna ngana nenge letera manmanna ia ke kerkereng pe te amnei teu ke nek toto nga leteria ke te nanas mene poinga urana ngana mur. <sup>10</sup> Ke pomalam urana nge te totoi tele iri nga nem mukam. Nenge teke te poia ume nem ke nek, lape tetu ke iri halaunga ana hana mur ol.

<sup>11</sup> Pomalam mana nge halaunga ana hehei mur pule. Urana nge leteria matana ke nek nga aria ume mur pe nga reria poinga mur, pe te hele poreke mele hel ero pe te hepengia tei ngaria mur ke nek.

<sup>12</sup> Pe non halaunga ana non nem urana nge nehei elle mana pe nauele tutuna mur pe alona mur ke nek. <sup>13</sup> Halaunga ana hana mur nenge te



umeia aria ume ke nek lape eria lohote ke urana pe te haliu hote Iesus Kristus nena helenga ke kerkereng luluch nga leteria manmanna ngana.

### *Hengetoro Manmanna Ngana Nenge NeHalang*

<sup>14</sup> Iau, musuna pol mana pe elan nge iong pe e teke urana nge ehas ia alalaha nei lange iong nike. <sup>15</sup> Iange nenge teke epoi hulul, o sisia alalaha nei pe o eteia ita hana nenge tatu teu nga mata nenge NeHalang, tatu ngara. Hana nenge tetu teu nga mata nei leteria manmanna nge Kristus. Pe NeHalang nenge tuke maulul ke koko nena hana mur ia iri. Pe hana nemur te rahite pe te hekerkereng tote hengetoro manmanna ngana mur ke pomanga pele ana isong nenge mes ke kerkereng ke rah-tua ele pele. <sup>16</sup> Ita ta eteia ke hengetoro nemur nenge NeHalang hemalalaha hote, i ure palaungana pe manmanna toto:

Kristus lohote ke i non.

Opepengpeng henonou hote ke I non nge pengpeng toto.

Angkelo mur te esia I.

Te haliu hote nena helenga ke hehei pe hana lochloch nga ich leteria manmanna nge I.

Pe NeHalang mene heke I langa lut ke hemalmalia I.

## 4

### *Hetorong Pallaklaka Ngana Mur*

<sup>1</sup> Pe Opepengpeng hele mallaha ke teke, nge he lape hel te hile leteria manmanna ngana pe te longo taua uneinei opene pe te nana-sia hana porekreke ngana nenge uneinei opene tuteu nge iri, reria hengetoro pallaklaka ngana mur. <sup>2</sup> Hengetoro nemur teat nge hana nenge te pallaka hali pe song ke kikina toto. Pe leteria urana ngana nenge te eteia utar nenge urana pe utar nenge poreke te mete ke ulolo ke pomanga moiuk nge ngaua leteria. <sup>3</sup> Hana nemur te hetoro

ke te teke hehei pe hana telei ero pe te ngaua ngaunga hel ero. Pe ngaunga nemur NeHalang ala hote ke iri nenge leteria manmanna pe te eteia helenga manmanna ngana aria nge te ngaua nga reria hetalaulaunga hoena. Reria hetalaulaunga nenge te hele urana lala nge NeHalang pe te heto hekeke I. <sup>4</sup> Ke Ure lochloch ngana nenge NeHalang ala hote te urana. Pe nenge teke ta hetalaulau pe ta hele urana lange I, ute pele nge poreke ke ta saua ero. <sup>5</sup> Iange NeHalang nena helenga pe rera hetalaulaunga helememia ngaunga nem lo.

### *Paulus Hetore Timoti*

<sup>6</sup> Nenge teke o helete metentene hehei pe hana nenge leteria manmanna nga lek helenga nemur, lape Iesus Kristus nena hekuleileinga ana non iong toto. Iange o hengaungaua iong ia helenga manmanna ngana mur nga lete manmanna pe nga hengetoro urana ngana nenge o nanasia nem. <sup>7</sup> Pe oheo ele tote iong nga aetapuna mur pe nga nananga mur nenge nganangaria ero. Kokoes o totoia iong ke oi ke kerkereng ke o nanas mene NeHalang. <sup>8</sup> Poinga nenge o poia ure hel ke hekerkereng ia singim lape halaua singim nga kue hel. Pe poinga nenge o nanasia NeHalang lape halaua iong nga kue lochloch iange tunge petanga lange iong heueu nei pe tunge maulinga ke koko lange iong nga hoena pule.

<sup>9</sup> Helenga nenge e heleia nei manmanna toto koi. Urana nge letem manmanna ia pe o rahat teua lange iong ke kerkereng. <sup>10</sup> Ita ta ume ke kerkereng pe ta puria nga kikira ngara toto iange letera here NeHalang nenge tuke maulul ke koko nge mene mule hulua lochloch. Matana toto nge hehei pe hana nenge leteria manmanna nge I.

<sup>11</sup> O hetore hehei pe hana nga ure nemur pe o hele lange iri ke te nana-sia. <sup>12</sup> Iong lomele mana kura pe

lemek ero mele hel nge te songlele ia iong. E teke o heneue iri nenge leteria manmanna nga lem helenga urana ngana mur pe nga lem poinga urana ngana mur pe nga lem poinga nenge mutem tautaua mele hel pe nga letem manmanna ngana pe nga lem poinga nenge oheo hele iong nga hehei aria poinga pe otu ke o lemlem mana. <sup>13</sup> Pe e teke o sis hotote NeHalang nena alalaha tapuna ngana lala nge hehei pe hana pe o hetottore iri pe o hekerkereng ia iri ke langa etue nenge eat ke esau hot. <sup>14</sup> Iong o mene lem tunginga e nga etue nenge hana papalauna mur nga mata nenge NeHalang tetal heke peria nge iong pe te hele talue. Opoia tunginga nem ana ume ke lohoh pe o mamani hit mene ero.

<sup>15</sup> Pe o tung teu tote iong nga ume nemur nenge e heleleia nei ke lohoh ke nek. Pomalam lape hulua tenau urume ke lem ume lohoh ke urana nga letem manmanna ngana. <sup>16</sup> Onau ala am ke nek nga otu ngam pe nga lem hengetoro mur pe o nanas mene ure nemur nenge e hetoro iong ia ke ulolo. Pomalam, NeHalang lape mene mule iong pe iri nenge te nanasia lem hengetoro mur iange iong sipom o helue lemo kue.

## 5

### *Hengetoro Nenge Ta Nekia Hulua Lochloch*

<sup>1</sup> Non nenge tuauna lo, o hele inin taua i ero, onekia i ke pomanga Temem ia. Opoi ke nek lange lolomele mur ke pomanga titim mur ia iri. <sup>2</sup> Hehei nenge te tuauna lo o nekia iri ke pomanga tatam mur ia iri pe hehei malolong mur o nekia iri ke pomanga lilium mur ia iri nga poinga nge urana.

### *Itei Lape Nauele Pakar Mur?*

<sup>3</sup> Hehei nenge eria mur te mete lo pe mele nauele iri ero, apoi ke nek lange iri pe a nauele iri. <sup>4</sup> Pe nenge teke hei nem tutuna mur pe natete

mur lo, iok urana nge te poia NeHalang ana ume ke tenau ele taria pe reette mukam ke pomanga taria pe reette tenau ala ngaria ia iri nge nike. Nenge teke tepoi ke pomai NeHalang lape iech toto. <sup>5</sup> Hei pakar nenge mele nauele i ero, talue letena manmanna ngana nge NeHalang mana. Pe hetalaulau lala nge NeHalang ke kokoes nga sinanga pe nga miliko ke NeHalang halaulaua i. <sup>6</sup> Pe hei pakar hel pomam ero. Iri te nanas mene poinga poreke ngana nenga ich ke nga NeHalang matana te mete lola. <sup>7</sup> O heleia helenga nei lange iri lochloch ke te nanasia poinga nge pengpeng, pomalam lape hulua te hele poreke iri ero. <sup>8</sup> Iri nenge te nekia reria misili mur pe aloria mur ero, leteria manmanna ngana losio ke ulolo. Pe te poreke toto nge mele hel nenge leteria manmanna nge NeHalang ero.

<sup>9</sup> Nga etue nenge ohas sue hei pakar e ene ke mene halaunga, ohas pulut mene ero. Onau teu ke nek nga ure nemur mukam. Nenge ana hesinga iri ana non kina mol lo (60). Pe lei nge non elle mana. <sup>10</sup> Pe hulua te eteia nge hei nem poia ume urana ngana mur halang. Pe nauelele tutuna mur ke nek. Pe hengaua hana nenge teat nga tau ngana. Pe ume ke pomanga hekuleileinga ana hei nge NeHalang nena hana mur. Pe halaua iri nenge ure meena ngana lohoh nge iri. Pe tung teu tote i ke poia ume urana ngana mur hel pule.

<sup>11</sup> Pe hehei pakar nenge iri malolong kura, ohas sue eria ero iange nga etue nenge tela luluch nge hana lape telei haka mule pe tehul rumeria lange Kristus. <sup>12</sup> Pe hei nem lape amneia ke poreke toto iange tak hoa ngatanga hel nenga tele ngana. <sup>13</sup> Pe pule lape reria mele tana pe tetal teua iri nga poinga nenge tei rara mana pe teteu hel hotia ngunngununga nga pele mur. Pule tetal teu pulut mene iri ke te hele nga ure nenge reria ia ero. <sup>14</sup> Ke iau e teke

hehei pakar nenge iri malolong telei mule ke te hoho pe tenau ele tuturia mur pe reria pele mur. Pomalam lape rera ngarang mur te hele poreke ita ero. <sup>15</sup> Iange hehei pakar malolong ngana hel, te saleke ke te nana-sia non poreke ngana lo.

<sup>16</sup> Nenge teke hei e nge letena manmanna alona mur hel iri pakar, urana nge hei nem nauele pakar nemur. Pomalam lape tunge ume halang langa mata nenge NeHalang ero. Iange mata nenge NeHalang tenau mana lange pakar nemur nenge mele nauele iri ero toto.

#### *Tapoi Kenek Lange Mata Ana Hana Soksoke Ngana Mur*

<sup>17</sup> Mata ana hana soksoke ngana mur nenge te poia aria ume ke nek, urana nge hehei pe hana tepoi ke nek lange iri pe te olia iri nga aria ume palaungana nenge te haliu hotote NeHalang nena helenga pe te hetottoro. <sup>18</sup> Iange NeHalang nena helenga hele ke teke, "Urana nge none mene uruna ke pete tote ume ngana." Pe helenga e pule hele ke teke, "A tom ele kolok hanna ero nga etue nenge i hakaka nga uit putana ke poi hotote nganangana mur nga kina. Iange ure nem ii pe ngaungau."

<sup>19</sup> Nenge teke mele hele hote non soke e nga NeHalang nena mata nge poia poinga poreke ngana e, o longo taua mele nem ero. Pe nenge teke hana nai ma mol te heleia i pule pe reria helenga elle mana ke mange mele nem, iok, urana nge o longo lange iri. <sup>20</sup> Ke nenge teke non soke e poia poinga poreke ngana, o hemes hote i nga muka nga NeHalang nena hana mur mataria pe o hele lange i ke o teke poinga nem poreke. Pomalam lape iri lochlolch nenge leteria manmanna te matau ke te poia poinga nem ero toto.

#### *Paulus Heleia Timoti Ke Poi Kenek*

<sup>21</sup> Nga NeHalang pe Iesus Kristus pe reria angkelo mur nenge te

henonou hote iri mataria, e teke o poia poinga nem lange hana lochloch pe o mala nge mele hel ero.

<sup>22</sup> Letem matana ke nek pe o eusach ero nga nenge teke otal heke perim nge hana hel pe o tunge kerkere nga lange iri ke tera hite Non Soke ana ume. Otal teu luluche iong langa hana hel reria poinga poreke ngana ero, otu ke o lemlem mana.

<sup>23</sup> Pe oin manmana ech ero. O inia uain unne sune pule ke hekerkereng ia sam pe halaua iong nga am haleles nenge lohotos ke kokoes mana.

<sup>24</sup> Hana hel te amnei teu lange iri ero kura pe reria poinga poreke ngana lohotos ke mallaha lo. Hel reria poinga poreke ngana mallaha ero pe lape lohotos ke mallaha nga hoena kura. <sup>25</sup> Ke pomalam mana nga poinga urana ngana mur, nge hel mallaha pe hel te talkome pe lape te lohotos ke mallaha nga hoena kura.

## 6

### *Hekuleileinga Ana Non Mur Tepoi Kenek*

<sup>1</sup> Iok, iri nenge teume manmana nge hana hel, urana nge tepoi ke nek lange hana nenge tenau ele iri. Pomalam lape te hele poreke NeHalang ero pe poinga nenge ta lohotos ke ita NeHalang nena hana mur, lape te hele poreke ero pule. <sup>2</sup> Pe nenge teke hana nenge tenau ele reria hana mur tetu teu nga mata nenge NeHalang, iok, urana nge reria hana mur te poia iri ke nek toto pe te halau tote iri nga teume ngaria. Ke poinga nem henonou hote ke muteria taua iri iange iri titiria mur hel nga leteria manmanna ngana. Pe poreke nge te longo ole taua iri pe te hele lange iri ke te teke, "Ita titira mur hel ke pomalam mo longo taua imo ero." O hetore iri nenge leteria manmanna nga ure nemur nenge e heleleia lala nge iong nei pe o teke te nana-sia.

### *Umtutuna Ana Mute*

<sup>3</sup> Mele lape hetoro ngana kuena nga ure nemur nenge e hetore lala nge iong nei. Pe ure nemur nenge e hetore lala nge iong nei i ure ngana sipona toto, nga hengetoro nenge Non Soke Iesus Kristus pe poinga nenge ta nanasia NeHalang, huna toto. <sup>4</sup> Mele nenge hetoro ngana kuena teke i toto pe i eteia ute pele ero. I poi haka hunelinga huuna nga nenge teke etei toto nga Kristus nena helenga luna mur. Poinga nem lape poi hote palhelinga pe penpeninga pe helenga poreke ngana mur pe ngununga pe riringa hel. <sup>5</sup> Pe iri, leteria tumana nga ure poreke ngana pe helenga manmanna ngana tuteu nge iri ero, lape tehun hel luluch nge hehei pe hana ke kokoes mana. Pe leteria ke teke lape reria ure halang nga poinga nenge te nanasia NeHalang.

<sup>6</sup> Poinga nenge ta nanasia NeHalang poia ita ke rera ure halang nga nenge teke ta iech nga ure nemur nenge i sipona tunge at nge ita lo. <sup>7</sup> Iange nga etue nenge tatara mur tehoe ita ke ta lohot nga ich nei, ta rahite ute e ero. Pomalam nga etue nenge ta mete lape ta rahite ute e ke tala muleia ero pule. <sup>8</sup> Ke urana nge ta iech nga ara ngaunga pe rera hengeron mur nenge NeHalang tunge iri lo. <sup>9</sup> Pe iri nenge lemeria ke reria umtutuna halang te puoloko teua iri nga totoinga mur nenge heporeke tote iri ke tetu ngaria poreke toto ol. <sup>10</sup> Iange poinga nenge mutera tau tote umtutuna, i poinga poreke ngana mur huria toto. Mele hel te hile leteria manmanna ngana pe te amneia melmelenga halang nga poinga poreke ngana mur iange muteria tau tote umtutuna.

#### *Omes Ke Kerkereng Nga Letem Manmanna Ngana*

<sup>11</sup> Timoti, NeHalang nena non iong toto pe urana nge oheo ele tote iong nga poinga poreke ngana nemur.

Letem manmanna, pe otu ke nek, pe o nanas mene poinga nge pengpeng, pe oume mana nge NeHalang, pe opoi ke urana, pe mutem taua hehei pe hana. <sup>12</sup> Opur kikim nga letem manmanna ngana pe o rahit tote maulinga ke koko nenge NeHalang hesilei hote iong ia. Maulinga ke koko nem NeHalang tunge lange iong, nga etue nenge o hele hote letem manmanna ngana nga malaha. <sup>13</sup> Timoti, e hele ke kerkereng toto lange iong nga Iesus Kristus pe NeHalang mataria. NeHalang tunge maulinga langa ure lochloch. Pe Iesus Kristus hele hote letena manmanna ngana ke mallaha nga Pontus Pilatus matana. <sup>14</sup> Ke nga iri nai mataria e hele ke kerkereng toto ke o nanas pengpeng ia NeHalang na helenga nemur. Pomalam mele ero toto nge hottaua poinga poreke ngana e nge iong, ke la het nga etue nenge ara Non Soke Iesus Kristus at muleia. <sup>15</sup> At mule ngana nem lape lohot pengpeng nga ana etue nenge NeHalang i sipona talue. NeHalang nge i Non Soke nenge soke toto nge hana soksoke ngana mur lochloch pe i Naungaala ana non nenge palaungana toto nge naungaala ana hana mur lochloch. <sup>16</sup> NeHalang i toro mana i non nenge tuke maulul ke koko pe tuteu nga lemenga nenge talkome ele tote i ke te esia ero toto. Pe mele pele nakuna ero toto nge la rochroi nga lemenga nem ke esia i. Hehei pe hana lape te heto heke tote NeHalang nga kikina ngana nenge tuke koko. Oe, Manmanna.

#### *Paulus Heleia Iri Nenge Leteria Manmanna Pe Reria Ure Halang*

<sup>17</sup> Pe hehei pe hana nga ich nenge reria umtutuna pe urelu mur halang, o hele lange iri ke o teke te palut laka rara pe leteria manmanna nga reria ure nemur ero. O teke leteria manmanna mana nge NeHalang nenge poia ita ke ta iech nga ure urana



ngana mur nenge tunge atat nge ita.  
<sup>18</sup> Pe o hele lange iri nenge reria ure halang nem ke o teke te poia poinga urana ngana halang pule ke te halaua hehei pe hana. <sup>19</sup> Nenge teke tepoi ke pomalam lape te hottaua reria kole hoena manmanna toto ngana nenge halaua iri ke te maul nge he. Pe maulinga nem i maulinga manmanna toto ngana ia.

*Paulus Nena Hengetoro Nenge Lange Timoti Hetala Ngana*

<sup>20</sup> Timoti, o nauele ume nenge NeHalang tunge lange iong ke nek pe oheo ele tote iong nga helenga tunten ngana mur nenge hana nenge te eteia NeHalang ero te heleleia. Helenga nemur te heteto “letematana ngana ana helenga” pe i manmanna ero. <sup>21</sup> Iange mele hel te nanasia helenga nemur, pe heueu nei leteria manamanna ngana losio ke ulolo. E hetalaulau amo ke NeHalang letena porekeia imo pe tululuch nge imo lochloch. Ngana laka lom.

## 2 Timoti Alalaha Neingana Nenge Paulus Hasia Lange Timoti

<sup>1</sup> Iau Paulus koi ehas ia alalaha nei. Nga NeHalang lemene, ngana iau Iesus Kritus nena hekulkulonga. Pomalam e haliu hotote NeHalang nena helenga manmanna ngana nga maulinga ke koko nenge tunge Iesus Kristus.

<sup>2</sup> Timoti, e heto tukia iong iange letem manmanna ngana elle mana ke mange iau. Ke pomalam ehas ia alalaha nei ke lange iong.

Pe e hetalaulau ke Temere NeHalang pe ara Soke Iesus Kristus leteria poreke ia iong pe te heurana ia letem ke ma ke nek.

### *Ta Meia Ita Lange NeHalang Ero*

<sup>3</sup> Kokoes mana e hetalaulau am pe e hele urana toto lange NeHalang. E hele urana toto lange NeHalang nge e heto hekeke nga letek urana ngana ke pomange lek tete mur. <sup>4</sup> Pe letek metene mule etue nenge e ua am pe matam eina sio. Ke pomalam e teke enau mule iong ke letek iech mule. <sup>5</sup> Pe letek metene mule letem manmanna ngana nenge kerkereng toto. Lete manmanna ngana nenge pomam tu tala nge lemte he Lois pe tam e Iunis nge nike. Pe e eteia ke lete manmanna nem tu toto nge iong.

### *Paulus Helete Metene Timoti*

<sup>6</sup> Ke pomalam e teke e helete metene iong nga tunginga nenge NeHalang tunge lange iong nga etue nenge etal heke perik nga houngam. E teke o poia tunginga nem ana ume ke lohot ke palaungana toto ke puo ke pomanga oan nge sapellala. <sup>7</sup> Iange Opepengpeng nenge NeHalang tunge at nge ita poia ita ke ta matau ero. NeHalang tunge Opepengpeng nem ke hekerkereng ia ita ke ta poia ana

ume nenge mutera taua hehei pe hana pe ta nauele ita ke nek.

<sup>8</sup> Ke o haliu hote ara Soke neña helenga urana toto ngana pe omeia iong ero. Iau e popoia ume nem pe heueu nei etu nga tuele au ngana. Pe onau meinga at nge iau ero. O mene kerkerenga nge NeHalang pe o tatalo ele iong ke o takisia melmelenga ke mange iau nga helenga urana toto ngana ana ume.

### *Helenga Urana Toto Ngana Nenge At Nge NeHalang*

<sup>9</sup> NeHalang mene mule ita pe iua ita ke nena hana mur ita. Pe rera poinga urana ngana e poia NeHalang ke mene mule ita ero. NeHalang ala hote ich ero kura pe letena tu-anin hot tele nike nga ume nenge Iesus Kristus lape poia. Nga kue nem mana letena porekeia ita pe mene ita ke nena hana mur ita. <sup>10</sup> Ke heueu nei ara Hemasinga Iesus Kristus lohot nga mallaha lo. Ana non hemallaha hote ke kerkerenga nenga metenga lape hekou sue ita ero ol. Ke nenge teke letera manmanna nga nena helenga urana toto ngana, lape ta mene maulinga ke koko pe ta mete ero ol. <sup>11</sup> NeHalang talue iau ke iau hekulkulonga pe iau heteronga, iange i lemene ke teke e haliu hotote helenga urana toto ngana. <sup>12</sup> Ke ngana koi nenge e takisia melmelenga nei. Pe e meia iau nge etu nga tuele au ngana ero iange e eteia non nenge letek manmanna nge i. I Iesus Kristus pe e eteia ke i lape nauele ume nenge tunge at nge iau, ke ume nem lape tu ke nek kela het nga ana non at mule ngana.

<sup>13</sup> O nanas mene helenga manmanna ngana nenge o longe nga halik. Iange helenga nem pomanga helenga toto nenge henonoua iong nga poinga urana ngana nenge o hetore hehei pe hana. O hetore iri pe letem manmanna toto nge Iesus Kristus pe imo lochloch a tung tote

letemo lange I. <sup>14</sup> Ke o nauele tote ume nenge NeHalang tunge lange iong. Pe Opepengpeng nenge NeHalang tunge ke tuteu nge ita, lape halaua iong ke nauele ume nem ke nek.

*Hana Hel Te Urana Nge Paulus Pe Hel Te Poreke*

<sup>15</sup> Iong, o eteia ke iri lochloch ngana nenga tuele tana nge Eisia tehul rumeria ia iau lo. Pe Pikelus pe Hemokenes iri pule tehul rumeria ia iau.

<sup>16</sup> Pe e hetalaulau lange Non Soke ke halaua Onesiporus pe nehei pe tutuna mur pe iri lochloch ngana nenge tetu nga nena pele. Iange i poia letok ke iech toto nga nenge etu nga tuele au ngana pe nau meinga at nge iau ero. <sup>17</sup> Ana non, nga etue nenge at nge Rom pur kikina toto ke tango rere iau kela hottaua iau. <sup>18</sup> Iong oetei tote ke Onesiporus halaua iau ke kokoes nga etue nenge etu nge Epeses. Pe lemek ke e teke Non Soke letena porekeia i nga etue palaungana nenge hesilei hotote hehei pe hana.

## 2

<sup>1</sup> Pomalam tuk, o mes ke kerkereng iange nga letem manmanna ngana o nanas tau tote Iesus Kristus nenge nekia iong pe o longele i ke hekerkereng ia iong. <sup>2</sup> Helenga nemur nenge e haliu hotote lala nge hehei pe hana, o hetore mele hel nenge letem here iri ke te mene une ke te haliu hote lange hulua hel pule. <sup>3</sup> Pe omes ke kerkereng luluch nge iau ke o takisia melmelenga nga Iesus Kristus ana ume, ke pomanga palinga hel ana hana mur nge temes ke kerkereng. <sup>4</sup> Palinga ana non nenge poia ana ume ke nek toto, teke heneue ana soke ke i non nenge mutena tau tote ana ume pe poia ume e ero ol. <sup>5</sup> Iok, mele nenge etei tote songinga ana hotonga mur, lape song ke ristote pekngana mur ke i muka toto pe mene nena tunginga. <sup>6</sup> Iong nenge

emo kina iong toto lape o mene tele ngaunga nga am ume. <sup>7</sup> Pe letem metene lek helenga mur ke nek toto. Nenge teke o nanasia lek helenga lape Non Soke hemellehe letem ke o eteia ure lochloch.

*Tanau Urume Iesus Kristus Na Poinga Mur Kenek*

<sup>8</sup> Onau urume Iesus Kristus na poinga mur ke nek! Iesus Kristus lohok nga mata nenge ne Teuit pe NeHalang hemaui heke mule nga metenga. Helenga nem i helenga urana toto ngana nenge e haliu hote lala nge hehei pe hana. <sup>9</sup> Iok, letem langa melmelenga nenge e takisia nga ume nei. Te kele iau ke manga kemenge kina e pe te tamal teua iau nga tuele au ngana. Pe NeHalang nena helenga, mele pele nakuna ero toto nge kele pe tamal teua nga tuele au ngana. <sup>10</sup> Ke pomalam e iech mana nge e takisia melmelenga mur pe e halaulaua non soke nena hana mur, nenge henonou hote iri ke iri pule te mene maulinga nge Iesus Kristus. Pe lape mene iri kela tetu luluch nge I, nga nena hemalmalinga palaungana nga tapa ke koko.

<sup>11</sup> Helenga nei manmanna toto koi: Nenge teke ta mete luluch nge Kristus, lape tatu ke ta mauiul luluch nge I.

<sup>12</sup> Nenge teke tames ke kerkereng pe ta takisia melmelenga, lape ita ul ke ta nauele hehei pe hana.

Pe nenge teke tahul rumera ia i, i lape hul rumena ia ita.

<sup>13</sup> Nenge teke letera manmanna ngana losio, I lape rahat tote ita kura iange I nena hana mur toto ita pe I nakuna ero toto nge sau sue i sipona.

*Non Toto Nenge Rahite NeHalang Ana Ume*

<sup>14</sup> Kokoes o helete metentene lem hana mur nga helenga nenge e heleia

lange iong lo. Pe o hele ke kerkerenglange iri nga NeHalang matana ke o teke te tuahel rara ia helenga mur luria ero. Iange poinga nem lape poi hote ute pele nge urana ero, i lape heporeke hehei pe hana nenge te longlono nga leteria manmanna ngana. <sup>15</sup> O rahite lem ume nem ke kerkereng pe o lohote ke iong NeHalang nena ume ana non nge urana. Pomalam lape o meia iong nga matana ero iange esia ke iong o haliu hot pengpengia nena helenga manmanna toto ngana. <sup>16</sup> O kangkanga toto nga helenga poreke ngana mur, iange helenga nemur poia hehei pe hana ke tekel toto NeHalang ana. <sup>17</sup> Reria hengetoro mur pomalaka nga chanchan poreke toto ngana nenge ngaulala nga mele singina. Pe Himenus iri nai Piletus te koko teu pule nga helenga poreke ngana nemur ana poinga. <sup>18</sup> Iri nai te hile helenga manmanna ngana pe te hele ke te teke NeHalang hemaule heke nena hana mur ke te lohaka mule lo. Ke helenga nei heporeke tote hehei pe hana hel leteria manmanna ngana. <sup>19</sup> Pe NeHalang nena helenga lape lohote ke pomanga hele tal ngana ia. Hana nenge te nanasia NeHalang tepoi ke pomanga pele ana isong kerkereng ngana nenge NeHalang hemesia ke ratua ele pele. Pe NeHalang has heke helenga e nga isong neu ke pomai, “Non Soke eteia itei hel toto nenge nena hana muria iri,” pe “Iri lochloch ngana nenge te heto hekeke Non Soke tehul rumeria ia poinga poreke ngana.”

<sup>20</sup> Nga pele palaungana e letena, kaliu ana lala pe lala tema. Hel te umeia nga ure nemur nenge ururia haka toto pe hel teles hote nga ae pe hel te umeia nga ich pilpile ngana. Nemur nenge te umeia nga ure nemur nenge ururia haka, te mene hote ke tepoi umeia nga ngaunga matana ana etue mana. Pe nemur nenge teles hote nga ae pe nenge

te umeia nga ich pilpile ngana tepoi umeia nga etue lochloch. <sup>21</sup> Ke pomalam mele nenge hul rumena ia poinga poreke ngana pe tuke lemlem, poi ke pomanga kaliu nenge teume hote nga ure chalemlem ngana mur nenge ururia haka pe tepoi umeia nga ngaunga matana ana etue. Ke NeHalang lape mene hana nemur nenge pomai ke te umeia nena ume urana ngana mur.

<sup>22</sup> Iok, Timoti nenge teke lem nenge o lohote ke iong kaliu urana ngana nenge NeHalang poi nena umeia, ohul rumem totoia poinga tunten ngana nenge lolomele mur muteria tautaua. Letem manmanna nge NeHalang pe omes ke kerkereng nga poinga nge pengpeng pe mutem taua hehei pe hana. Pe otu ke nek luluch nge hehei pe hana hel pule nenge leteria lemlem pe te hetalaulau lala nge Non Soke ke hekerkereng ia iri ke te nanasia I. <sup>23</sup> Pe otal teu luluche iong lange hana nenge te nanasia helenga tunten ngana mur ero, iange hunelinga lohote laka nga helenga porekreke ngana nemur. <sup>24</sup> Iong none nenge o umumeia Non Soke ana ume ke otal teua iong langa hunelinga ero toto. O ton mene letem inin ngana pe opoi ke nek lange hana lochloch pe o lohote ke iong heteronga nge urana. <sup>25</sup> Pe opoi ke urana lange iri nenge tepoi poreke iong, pe o hepengia iri pe lape NeHalang halaua iri ke te eteia helenga manmanna ngana pe te hulua leteria ke te nanasia I. <sup>26</sup> Iange hana nemur non poreke ngana liliu ele iri ke teha nga ana upa lo. Pe pallaklaka ia iri ke te nanas mene i pe te popoia ana ume. Pe nenge teke te eteia helenga manmanna toto ngana, lape leteria mallaha pe te ua hot mule nga non poreke ngana ana upa.

### 3

*Ure Meena Ngana Halang Lape Te Lohote Nga Etue Hetala Ngana*

**2:15:** 1Ti 4:6    **2:16:** 1Ti 4:7    **2:17:** 1Ti 1:20  
**2:22:** 1Ti 6:11    **2:23:** 1Ti 4:7    **3:1:** 1Ti 4:1

**2:19:** Num 16:5; Isa 52:11; Ioa 10:14; 1Ko 8:3



<sup>1</sup> Iok, ure nenge e teke oetei tote ngana koi nei: Nga etue hetala ngana, hana porekreke ngana mur lape te poia ure meena ngana halang ke lohotot nge hehei pe hana urana ngana mur. <sup>2</sup> Iange hana porekreke ngana nemur lape leteria tu mana nge iri siporia, pe muteria tau tote umtutuna, pe lape te heto hekeke iri siporia, pe te penpenia hana hel, pe te hele poreke NeHalang. Pe pule lape te longo taua tetemeria mur pe tataria mur ero ol. Pe poinga urana ngana nenge mele hel te poia lange iri, te hele urana ia ero. Pe leteria metene NeHalang ero pe tetu mana nga poinga porekreke ngana mur. <sup>3</sup> Pe lape muteria taua mele ero, pe tepoi ke nek lange mele pele ero pule. Pe tenau ele singiria lemene ngana mur ero, pe leteria inin ke kokoes. Pe temil toto ke te heporeke hehei pe hana tetu ngaria, pe lape tepoi poreke hana halang, pe lemeria ero totoia poinga urana ngana mur. <sup>4</sup> Leteria tuanin ke nek ero, pe te nanas pulut mene leteria tuanin ngana nenge poreke, pe lape te tung heke mule pekngaria mur langa reria ngarang mur peria. Pe pule te teke iri hehei pe hana papalauna lo ke te heiech ia singiria nga poinga poreke ngana pe muteria taua NeHalang ero. <sup>5</sup> Iri te koko luluch nge NeHalang nena hana mur ke te hetalaulau pe te teke leteria manmanna. Pe nga leteria, tehul rumeria ia NeHalang nena kerkerenga nenge hululia hehei pe hana. Ke pomalam o kangkanga toto hana nenge pomai aria.

O kangkanga toto aria iange <sup>6</sup> hel nge iri teteu nga NeHalang nena hana mur hel reria pele pe te pal-lakaia hehei nenge leteria matana ke nek ero ke leteria manmanna nge iri. Ngana laka hehei nenge te nanas mene singiria lemene ngana mur pe te muta toto nga poinga poreke ngana. Pe reria poinga poreke ngana nem kik heke tote iri ke teare ke nek

ero. <sup>7</sup> Hehei nemur te teke te eteieia ure heueu ngana hel pe te etei tote helenga manmanna toto ngana ero. <sup>8</sup> Pe hana nemur tepoi ke pomange Ianes pe Iampres nge singiria sesia Moses pe singiria sesia helenga manmanna toto ngana pule. Leteria tumana nga poinga porekreke ngana mur pe NeHalang hul rumena totoia iri iange leteria manmanna nga helenga manmanna ngana ero. <sup>9</sup> Pe reria poinga nenge te teueu nga hehei pe hana leteria lape tuke sase ero, iange reria poinga mallaha nga hulua mataria pe lemeria ero ia iri ke pomange Ianes pe Iampres.

### *Timoti Nanasia Paulus Nena Poinga Mur*

<sup>10</sup> Pe Timoti iong, o etei tote etu ngak pe lek hengetoro mur pe letek tuanin ngana mur. Pe o eteia ke iau letek manmanna toto nge Kristus pe emes ke kerkereng nga ure poreke ngana mur nenge te lohotot nge iau. Pe letek inin taua hehei pe hana ke ueiuei ero iange mutek tau tote iri. <sup>11</sup> Iong o eteia ke hana te poia ure meena ngana halang ke lohot nge iau ke e takisia melmelenga nga kileng nenge Antiok pe nge Ikonium pe nge Listra. Pe Non Soke halau tote iau nga melmelenga nemur. <sup>12</sup> Melmelenga nenge lohot nge iau nei nau taua helenga manmanna ngana nei: Iri lochloch nenge te hemeile teua iri nge Iesus Kristus pe te nanasia NeHalang nena poinga mur, hana porekreke ngana mur lape te poia ure poreke ngana halang ke lohot nge iri. <sup>13</sup> Pe hana porekreke ngana mur lape te pal-laka ia mele hel ke emule mana, pe mele hel lape te channanga mulmule mele hel pule. Pomalam reria poinga poreke ngana mur la ke poreke toto ol. <sup>14</sup> Timoti iong o eteia, helenga nenge poia iong ke letem manmanna, i helenga manmanna ngana ia iange sam kikina nge iri nenge te hetoro iong ia. Pomalam o rahite

ke kerkereng pe o mene une kela. <sup>15</sup> Pe letem metene nei pule: Nga iong kino ngam nike tam hetore iong ke o eteia Non Soke na Helenga nenge tema sio nga alalaha mur. Pe Helenga nem tunge letematana ngana lange iong ke o mene maulinga ke koko nga letem manmanna ngana nge Iesus Kristus. <sup>16</sup> Nge nike NeHalang Opene halau tote hana nemur nenge tehas sue nena Helenga. Ke pomalam Helenga nem urana pe tunge letematana ngana nga helenga manmanna toto ngana at nge ita. Pe henonoua ita nga rera poinga poreke ngana mur, pe hepengia tai ngara mur, pe hetore ita nga poinga nge pengpeng. <sup>17</sup> NeHalang tatalo ele nena helenga nem ke hekerkereng ia nena hana mur ke te poia ume urana ngana halang. Pe helenga nem halaua iri ke temes ke kerkereng nga ume nemur nenge I lemene taua ke te poia.

#### 4

##### *Paulus Hekerkerengia Timoti Ke Poia Ana Ume*

<sup>1</sup> Nga hoena Iesus Kristus lape at mule pe i non palau nenge lape nauele hehei pe hana lochloch. Pe i lape amnei teu lange iri nenge te maulul pe nenge te mete. Ke nga NeHalang pe Iesus Kristus mataria e hele ke kerkerereng toto lange iong ke pomai: <sup>2</sup> Kokoes o haliu hote NeHalang nena helenga lala nge hehei pe hana ke te hulua leteria nga rera poinga poreke ngana mur pe te nanasia poinga nge pengpeng. O tunge hengetoro urana ngana lange iri ke te nanasia pe letem inin taua iri ero. <sup>3</sup> Iange etue nem lape at pe hehei pe hana lape te longo langa helenga manmanna ngana ero ol. Pe lape te nanas mene lemeria ngana ke te tango rara hetoronga hel pule. Pe hetoronga nemur lape te heiechia iri nga helenga pallaklaka ngana mur nenge muteria tautaua. <sup>4</sup> Ke iri lape

talngaria hit nge te longe helenga manmanna toto ngana pe te longo la mana nga nananga poreke ngana mur ol. <sup>5</sup> Pe iong, o nanasia poinga nem ero! Kokoes letem tuanin ke nek pe omes ke kerkereng ke o takisia melmelenga mur nenge te lohottot nge iong. Pe o haliu hote Helenga Urana Toto Ngana lange hehei pe hana pe o heulo hote ume nem ke pomanga NeHalang nena ume ana non.

<sup>6</sup> Iange iau, ak etue nenge e meteia heroi lo. Pe epoi ke pomanga uain nenge tunginga ana nenge te pasiling hot lochloche lange NeHalang. <sup>7</sup> Iau e umeia ure lochloch ngana nenge NeHalang tal hote iau ke e poia. E haliu hote helenga urana toto ngana lange hehei pe hana ke kerkereng toto. Nem pomanga iau non nenge songia songinga nge urana. Pe e rahite NeHalang nena helenga pe letem manmanna ngana ke kerkereng. Pe e heulo hote songinga nem ke langa hetala ngana lo. <sup>8</sup> Ke heueu Non Soke tatalo ele lek tunginga e lo. Iange iau e nanasia poinga nge pengpeng pe e eteia ke I lape hetue iau ke iau non nge pengpeng. Non Soke i hesileinga ana non nge pengpeng. Pomalam lape tunge tunginga nem at nge iau nga etue nenge at muleia ke hesilei hotote hehei pe hana. Pe lape tunge at nge iau toro ero. Non Soke lape tunge tunginga nem lange iri lochloch ngana nenge muteria toto nge te kulala ke te naue i nga at mule ngana.

##### *Paulus Teke Timoti Lange I Ke Ueiuiei*

<sup>9</sup> Oiat nge iau ke ueiuiei mana, <sup>10</sup> iange Temas mutena taua poinga nemur nga ich pe ua ak ke lange Tesalonika lo. Pe Keresen pau kou la ke ume nge Kalasia pe Titus la ke ume nga tuele kina nenge Talmatia. <sup>11</sup> Pe Lukas i toro mana koi tululuch nge iau ol. Ke pomalam o hele nge Makus

ke at luluch nge iong. Iange i lape halau tote iau nga lek ume nei. <sup>12</sup> Eh oe, Tikikus pule ngana pau kou ekulosia ke lange Epesus. <sup>13</sup> Nga etue nenge oiat, o mene lek hengeron sase ngana pe lek alalaha ana lulinga mur nge e hilesue nge Troas nga ne Kapus nena pele. Letem metene lek alalaha mur nenge teume hote nga huros singina pe o mene pule.

<sup>14</sup> Iok, ute e nge e teke e heleia lange iong ngana koi nei; ne Aleksanta nenge umume nga ure meena ngana mur poia poinga poreke ngana halang at nge iau. Pe poinga nenge poia at nge iau nem lape Non Soke tuachol mule lange i. <sup>15</sup> Ana non mes ke kerkereng toto ke teke sisparai ia helenga urana ngana nenge e haliu hotote. Ke iong pule onau ala am nge i ke nek.

<sup>16</sup> Nga tele ngana toto helenga palaungana mene iau pe emes ke e hele ala ak pe hana lochloch te ua ak. Mele pele halaua iau nga helenga ero pe reria poinga nem, e hetalaulau ke e teke NeHalang tunge tuangachol poreke ngana lange iri ero. <sup>17</sup> Nga etue nem Non Soke at ke mes luluch nge iau pe hekerkereng ia iau ke e haliu hote nena helenga lange hana lomonmona ngana mur nga lamau ke te longe. Pe i sipona halaua iau nga helenga palaungana nem ke ure poreke ngana lohot nge iau ero. Nem pomanga huros inolo palaungana e nge teke sapia iau ke e mete. Pe ero, Non Soke at pe ua totoia iau. <sup>18</sup> Ke e eteia ke Non Soke lape poi ele iau nga ure poreke ngana mur pe mene iau la ke nek nga nena naualanga pe nekinga nga tapa. Ta heto heke Non Soke nga nena hemalmalinga palaungana ke koko. Oe, Manamanna.

### *Helenga Hetala Ngana Mur*

<sup>19</sup> Iok, o tunge lek apalanga lange Prisila, pe Akuila, pe Onesiporus, pe nehei, pe tutuna mur, pe iri lochloch ngana nenge tetu nga nena pele.

<sup>20</sup> Erastus pau kou tunge Korin kura pe e hilesue Tropimus nge Miletus iange singina haleles. <sup>21</sup> Lemek ke e teke oat ke ueiuei iange lape pitte pe tuttula ana etue lohot ke poi ele iong. Epulus pe Patens pe Linus pe Klaotia pe NeHalang nena hana mur nga lamai, te hekule reria apalanga lange iong.

<sup>22</sup> E hetalaulau ke Non Soke tululuch nge iong nga opem ke hekerkereng ia iong pe NeHalang nena halaua tululuch nge imo pe heurana ia letemo ke ma ke nek. Ngana laka lom.

## **Titus Alalaha Nenge Paulus Hasia Lange Titus**

### *Paulus Hetero Hite Titus*

<sup>1</sup> Titus, iau Paulus koi ehas ia alalaha nei pe ehas ia ke lange iong. Iau e umume nge NeHalang pe Iesus Kristus tal hote iau ke nena hekulkulonga ana non. Pe kulosia iau ke e hekerkereng ia NeHalang nena hana mur leteria manmanna ngana. Ngana laka NeHalang nena hana mur nenge hesilei hote iri lo. Pe e hetore iri nga helenga manmanna ngana nenge halaua iri ke te nanasia NeHalang nena poinga mur. <sup>2</sup> Nge nike toto NeHalang ala hote ure lochloch ero kura pe hele ke teke lape tunge maulinga ke koko at nge ita. Pe NeHalang pallaklaka erochro. Ke pomalam e hekerkereng ia hehei pe hana leteria nga helenga manmanna ngana nem, ke te kulala tote maulinga ke koko nenge NeHalang lape tunge at nge ita. <sup>3</sup> NeHalang i non nenge mene mule ita pe poia iau ke e haliu hote nena helenga nga mallaha, nga ana etue pengpeng nenge i sipona talue.

<sup>4</sup> Titus ita nai letera manmanna nge Iesus Kristus ke pomalam e hetue iong ke tuk iong. Pe e hetalaulau am ke Temere NeHalang pe ara hemasinga Iesus Kristus leteria porekeia iong pe te heurana ia letem ke ma ke nek.

### *Titus Ana Ume Nenge Poia Nge Krit*

<sup>5</sup> Iok, e hile sio mene iong nge Krit iange e teke otu ke opoi heule lem ume mukam. Lem ume nenge otal hote almasinga ana hana hel ke iri muka nge iri mata mur pe o poia ke pomanga e hele ngak nenge e teke: <sup>6</sup> O hemes hote almasinga ana hana mur nenge hehei pe hana te naue ke iri hana urana ngana mur pe telei ke

hehei ellechle mana. Pe tuturia mur leteria manmanna nge Kristus pe te longo tautau pe te hele poreke iri nga poinga poreke ngana e ero. <sup>7</sup> Ke non nenge pomalam urana nge lohote ke i mata ana naungaala. Iange non nenge nauele mata nenge NeHalang rahite NeHalang ana ume laka. Pomalam te hemasia rera inga mur ke nek ke hehei pe hana te esia poinga poreke ngana e ero toto nge iri. Pe rera polotana ero, pe leteria inin ke ueiuei ero, pe tein rara ero, pe tepal hel rara ero. Pe heo ngana toto nge te channanga ia mele hel pe te lololoch ure ke rera ia. <sup>8</sup> Hana nenge pomam urana nge leteria tuanin ke nek, pe muteria taua poinga urana ngana mur, pe tenau ele lang mur nenge teat nga kileng tau ngana. Pe tetu ke pengpeng, pe te nanasia NeHalang nena poinga mur, pe tenau ele singiria lemene ngana mur ke nek. <sup>9</sup> Urana nge tera hite helenga manmanna ngana nei ke kerkereng ke pomanga mo hetero ngamem ia. Ke pomalam lape te hekerkereng ia hehei pe hana leteria nga hengetoro manmanna ngana. Pe pule lape te hekou sue hengetoro nemur nenge manmanna ero.

### *Poinga Nenge Lohote Nge Iri Mata Mur Nge Krit*

<sup>10</sup> Urana nge o henonou hote almasinga ana hana mur nenge pomam. Iange hana halang nga letera te nanasia NeHalang nena helenga ero ol. Te hele ngaria ngana ngana erochro pe te pallaklaka hali. Pe Iuta mur hel kou te muka toto ia poinga nem. Te channanga ke te hele ke te teke, "Mele hel nenge terir us ero lape NeHalang nena hana mur ia iri ero!" <sup>11</sup> Hana nenge pomam te tangtango kue nenge te lololoch ure. Ke pomalam a hele salia iri ke tehet nga rera poinga nem. Iange te heporeke hana hel pe rera hehei mur pe tuturia mur pe aloria mur ke teare poreke. <sup>12</sup> Nge



nike, reria hetatalonga ana none nge Krit hele ke teke, “Krit mur iri hana nenge te pallaka hali pe reria melei tana hali pe tengau hali pe iri huos inolo poreke ngana mur.”<sup>13</sup> Hetatalonga nena helenga nei manmanna. Ke pomalam o hele ke kerkereng toto lange iri ke te rahit mule leteria manmanna ngana mur ke kerkereng,<sup>14</sup> pe tepal talngaria langa Iuta mur reria nananga nenge tepoi heke menmene ero. Pe pule tepal talngaria langa hana nenge tehul rumeria ia helenga manmanna ngana reria hotonga mur ero.<sup>15</sup> Hehei pe hana nenge leteria lemlem te teke ure lochloch ngana nenge NeHalang umeia te urana. Pe iri nenge leteria mutaia poinga poreke ngana pe leteria manmanna ero te teke ute pele nge urana nga mataria ero. Leteria matana ngana poreke lochloch pe te amnei urume utar nenge urana pe utar nenge poreke ero toto.<sup>16</sup> Iri te teke te eteia NeHalang pe reria poinga mur henonou hot pengpengia ke tehul rumeria toto ia NeHalang, iange hana nenge te longo olole lape te poia ute pele ke lohohot ke urana ero.

## 2

### *Tuluk Mur Nga Mata Mur Nge Krit*

<sup>1</sup> Pe Titus iong, o hele ke kerkereng lange hehei pe hana ke te nanasia poinga urana ngana nenge lohohot nga hengetoro manmanna ngana. <sup>2</sup> O hetore hana nenge te tuauna lo ke o teke; leteria matana ke nek pe tera hite leteria manmanna ngana ke kerkereng, pe tein rara ero, pe tenau ele singiria lemene ngana mur ke nek, pe muteria taua hehei pe hana, pe temes ke kerkereng ke kokoes nga poinga urana ngana mur.

<sup>3</sup> Pe o hetore hehei nenge te tuauna pule ke o teke te nanasia poinga nge pengpeng, pe te hele poreke rara ero, pe tepur sakililia uain in ngana ero.

Urana nge te hetore pule nga poinga mur nge pengpeng. <sup>4</sup> Pomalam lape te hetore hehei malolong ke muteria taua eria mur pe tuturia mur. <sup>5</sup> Pe leteria matana ke nek pe te tuamasia reria inga mur ke te lemlem mana. Pe te hetore iri pule ke tenau ele reria pele mur pe aloria mur ke nek pe te longo tau mene eria mur. Pomalam lape mele pele hele poreke NeHalang nena hengetoro mur ero.

<sup>6</sup> Iok, o hetore hana lolomele ke pomalam pule ke leteria matana ke nek pe te hemasia reria inga mur. <sup>7</sup> Pe o henonou hote lem poinga urana ngana mur nga ure lochloch ngana nenge o popoia. Pomalam lape hana te naue pe te nanasia poinga urana ngana nenge pomam. Nga lem ume nenge o hetottoro, letem matana ke nek pe o hele hot pengpengia poinga manmanna ngana. <sup>8</sup> O heleia helenga nge manmanna pe pengpeng mana. Pomalam lape lem ngarang mur te meia iri pe tetue ita nga helenga poreke ngana e ero.

<sup>9</sup> Pe o hetore hekuleileinga ana hana mur ke te longo tau mene aria ae huna mur pe te poia iri ke te iech nga ure lochloch ngana nenge te popoia. Pe te echachau mule helenga e lange iri ero toto. <sup>10</sup> Pe pule te keme nge aria aehuna mur ero. Pomalam aria ae huna mur te eteia ke iri hana urana ngana. Pe reria poinga urana ngana nem rahit heke tote ara Hemasinga NeHalang nena hengetoro mur ke hulua leteria manmanna ia.

### *NeHalang Hemas Mule Hulua Lochloch*

<sup>11</sup> Urana nge ita lochloch ta nanasia poinga nemur nenge e heleleia iri nei. Iange NeHalang nena poinga urana toto ngana nenge letena porekeia hehei pe hana lochloch pe hemas mule iri, lohohot nga mallaha lo. <sup>12</sup> Pe NeHalang na poinga urana ngana nem teke hetore ita heueu

nei ke tahul rumera ia i ero ol, pe ta kangkanga toto nga poinga mur nenge poia ita ke ta kel toto ana. Pe hetore ita ke letera tuanin ke nek pe ta hemasia rera inga mur ke nek pe ta nanas mene nena poinga mur. O kangkanga toto nga helenga poreke ngana mur, iange helenga nemur poia hehei pe hana ke tekkel toto NeHalang ana. <sup>13</sup> Ara Palau Iesus Kristus i NeHalang pe tatu ke pomalam mana ke ta kulele etue nenge at muleia ke mene mule ita. I lape lohot nga mallaha nga etue nem luluch nga lemenga pe hemalmalinga nenge NeHalang. <sup>14</sup> Iesus Kristus tunge i sipona ke mete ke hemas mule ita nga rera poinga poreke ngana mur. Pe helemlem heke ita ke nena hana mur toto ita pe ta nanas mene poinga urana ngana mur.

<sup>15</sup> Titus, ure nemur o hetoro sue lange hehei pe hana pe o hele ke kerkereng pe o hekerkereng ia iri ke te nanasia. Pomalam lape lem helenga mahoa iri lochloch.

### 3

#### *Poinga Urana Ngana Nenge Ta Nanasia*

<sup>1</sup> Pe o helete metene hehei pe hana ke te longo taua hana nemur nenge te mene kerkerenga nenge tenau ele hehei pe hana. Pe te angala mana ke te poia poinga urana ngana mur. <sup>2</sup> Pe o hele lange iri ke tetu ke nek pe teare luluch nge hehei pe hana ke nek pe tepoi ke nek lange hulua lochloch pe te hele poreke mele hel ero.

<sup>3</sup> E hele ke mai iange nge nike ita letera matana ke nek ero pe ta longo taua NeHalang nena helenga ero toto. Iange non poreke ngana channanga ia ita ke ta nanas mene poinga poreke ngana nemur nenge singira lemene tautaua. Pe poinga poreke ngana nemur tetu ke te kerkereng toto nge ita pe ta ngunngunu ia mele hel nga reria ure mur. Pe

hehei pe hana te hesis tote ita pe ita pule ta hesisis ia iri. <sup>4</sup> Pe ara hemasinga NeHalang mene mule ita nga etue nenge i sipona talue nike. Nenge hemallaha hote ke i non nge urana pe i nekinga ana non. <sup>5</sup> Pe NeHalang mene mule ita nga rera poinga pengpeng ngana mur nenge ta popoia ero. Mene mule ita iange letena ia ita. Ke NeHalang mene mule ita nga henuninga pe ta lohot ke ita heueu ngana mule nga Opepengpeng. <sup>6</sup> Pe NeHalang tung lochloche kerkerenga nenga Opepengpeng at nge ita iange nga ume nenge ara hemasinga Iesus Kristus poia. <sup>7</sup> Ke ita ta lohot ke ta pengpeng nga NeHalang matana nga nena poinga urana toto ngana mana. Ol pe ta kulala tote maulinga ke koko nenge NeHalang heleia ke teke tunge at nge ita pe tala ke tatu luluch nge I.

#### *Poinga Urana Ngana Nenge NeHalang Nena Hana Mur*

<sup>8</sup> Helenga nenge e heleleia iri nei manmanna toto koi. Pe e teke o hetore ke kerkereng lange hehei pe hana ke te eteia ke nek. Pomalam iri nenge leteria manmanna nge NeHalang tetal teu tote iri ke te poia ume urana ngana mur. Pe ume urana ngana nenge pomam lape halaua hulua lochloch. <sup>9</sup> Pe otal teu luluche iong langa ure nemur ero; helenga nemur nenge luria ero pe nananga nga sisala nga nenge tete mur pe hunelinga pe echachalanga nga Moses nena hotonga mur. Iange ure nemur lape tepoi hote ute pele nge urana ke halaua mele pele ero. <sup>10</sup> Pe o hele ele mele nenge te teke kelas lele NeHalang nena hana mur. O hele ele i ke elle, nem pe henai pe nenge teke longo lange iong ero ohul rumem ia i. <sup>11</sup> Iong o eteia ke mele nenge pomam hile kue nge pengpeng lo pe lape nena poinga poreke ngana mur te heporeke tote i.

**2:14:** Exo 19:5; Deu 7:6; Ezk 37:23; Kal 1:4; 1Pi 2:9    **2:15:** 1Ti 4:12    **3:1:** Rom 13:1-7; 1Pi 2:13-14  
**3:3:** 1Ko 6:9-11; Epe 2:1-2; 5:8    **3:5:** 2Ti 1:9; Hip 10:22    **3:6:** Ume 2:17-18    **3:9:** 2Ti 2:14, 16  
**3:10:** Mat 18:15-17

*Paulus Na Helenga Lisala Ngana*

<sup>12</sup> Nga letek e teke e kulosia Atemas ma Tikikus ke lange iong ke mene mullim. Pe nenge teke la ke lohot nge iong lo, iok oiat ke o saolia iau nge Nikopolis. Iange e teke ela ke etu nga lamau nga lukunna ana etue. <sup>13</sup> Iok, non nenge etei tote hotonga, nenge ene Senas iri nai Apolos lape te mana nga imot nga malang sase ngana. Pe e teke o halaua iri ke nek toto nga ure nemur nenge muteria taua ke te mene. <sup>14</sup> Ita rera hana mur nge Krit te mene hengetoro lo pe e teke te poia ana ume ke lohot ke te halaua hehei pe hana lochloch nga reria poinga urana ngana mur. Iange lape tetu mana pe te nanasia NeHalang nena poinga mur ero.

<sup>15</sup> Iok Titus, iri lochloch ngana nenge te tululuch nge iau nga lamai te hekule reria apalanga lange iong. Pe o tunge lememe apalanga lange iri lochloch ngana nenge leteria man-manna ngana elle mana ke pomange imem.

E hatalaulau ke NeHalang na ha-launga palaungana tululuch nge imo lochloch. Ngana laka lom.

## Pilemon Alalaha Nenge Paulus Hasia Lange Pilemon

<sup>1</sup> Iau Paulus koi ehas ia alalaha nei. Pe te tamal teua iau nga tuele au ngana iange e umume nge Iesus Kristus. Imem nai tira Timoti mo hekule alalaha nei ke lange Pilemon iong.

Pilemon, imem pekngamem iong iange o umume nge Iesus pule. <sup>2</sup> Pe pule alalaha nei lange iri mata nenge te eukiraurau nga lem pele pe lange liura Apia pe Akipus. Akipus i non nenge ume luluch nge ita pe puria kikina ngana toto ke manga palinga hel ana none.

<sup>3</sup> E hetalaulau ke Temere NeHalang pe Non Soke Iesus Kristus leteria porekeia imo pe te hemaluche letemo ke atu ke nek.

### *Paulus Iech Nga Pilemon Na Poinga Urana Ngana*

<sup>4</sup> Pilemon, iau letek metentene iong nga etue nenge e hetalaulau. Pe e heto heke ak Soke NeHalang ke kokoes, <sup>5</sup> iange e longge pingam nge letem manmanna nge Non Soke Iesus pe mutem tau totote NeHalang nena hana mur. <sup>6</sup> Letem manmanna ngana poia iong ke o tung ke kokoes. Pe e hetalaulau am ke lem poinga nenge o tungtung nem puo ke palaungana. Ke pomalam lape oetei tote ure urana ngana mur lochloch nenge ta menmene nge Kristus. <sup>7</sup> Neingak, iong o helemlem heke tote NeHalang nena hana mur leteria nga lem poinga nenge mutem tautaua iri. Pe lem poinga nem pule, poia iau ke e iech toto pe letek ma ke nek.

### *Paulus Onteia Pilemon Ke Mene Mule Onesimus*

<sup>8</sup> Heueu nei e teke e hele lange iong ke o poia poinga urana ngana e. Kristus i sipona hekerkereng ia iau ke e onteia iong ke o poia poinga urana

ngana nem. <sup>9</sup> E poi ke pomai pe singik poreke mule lange iong iange ita nai ta etei hel ita ke nek toto, pomalam e teke e hele ke nek mana lange iong. Iau Paulus pe e tuauna ol, pe pule heueu nei etu nga tuele au ngana iange e umume nge Iesus Kristus. <sup>10</sup> E teke e hele lange iong ke o mene mule Onesimus. Onesimus poi ke manga tukia toto, iange i at nge iau nga etue nenge etu nga tuele au ngana pe e halaua i ke letena manmanna toto nge Kristus. Ke pomalam e hetue i ke tukia. <sup>11</sup> Nge nike Onesimus halaua iong nga ume urana ngana pele ero, pe heueu nei ol lape halaua ita nai ke nek toto.

<sup>12</sup> Iau e tung tote letek lange i pe heueu lape e kulosia i la mule nge iong. <sup>13</sup> Pe nenge teke e rahite i ke tu luluch nge iau, e iech toto nga nem pule. Lange iau etu nga tuele au ngana pe i lape mene mullim ke halaua iau ke e haliu hote Helenga Urana Toto Ngana. <sup>14</sup> Pe lemek ero nge e poia poinga nei, e teke e ontei tele iong mukam. Lemek ero nge e echia iong ke o poia poinga urana ngana e at nge iau. Urana nge o poia nga iong sipom lemengam. Ke pomalam eun ele i ero.

<sup>15</sup> Pe Onesimus kangkanga am ke mala pol lo pe lape NeHalang teke poia ke pomam ke o mene mule i ke tu toto luluch nge iong ke kokoes ol. <sup>16</sup> O mene mule i pe o nausio mene i ke pomanga lem tula nenge ume manmana nge iong ero. O naue i ke pomanga lem non ia pe o naue i ke pomanga tim ia. Iau mutek tau tote i ke pomalam e tung tote letek lange i. Pe iong lape mutem taua i iange lem non ia pe lape mutem tau tote i iange letena manmanna nge Non Soke ke ulolo.

<sup>17</sup> Iau neingak iong toto nenge ita nai ta umume nge Non Soke pe opoi ke urana atat nge iau. Ke pomalam o mene mule Onesimus pe opoi ke urana lange i pule. <sup>18</sup> Pe nenge teke



poia hanganok nge iong lo, ohas sue ek ke iau sipok e tuacholia. Pe nenge teke poia poinga poreke ngana e nge iong, nem pule ma haka nge iau ol. <sup>19</sup> Iau Paulus koi pe ehas ia helenga nemur nga perik. Iau sipok lape e tuacholia hanganok nem. Pe iong, lem hanganok tu nge iau nga nenge e hemasia otu ngam, pe lemek ero nge e hele teu langa nem. <sup>20</sup> Atong tik, ita nai ta umume nge ara Soke Kristus. Pe nenge opoi ke urana lange Onesimus, lape e iech toto.

<sup>21</sup> Iau ehas ia alalaha nei lange iong iange e eteia ke lape o poia ume nenge e heleia lange iong, pe lape o poia ke puo ke palaungana. <sup>22</sup> Pule e teke o tatalo ele lem pele ana tokola e ke ela pe etuia. Iange eteia ke NeHalang lape longe lemo hetalaulaunga mur pe lape poia iau ke ela mule nge imo.

### *Hengekulo Mur*

<sup>23</sup> None nge ene Ipapras hekule nena sinanga palaungana lange iong. Imem nai motu nga tuele au ngana nei iange i pule haliu hotote Iesus Kristus nena helenga mur. <sup>24</sup> Pe pule iri nenge te ume lululuch nge iau te hele ke te teke otu ke nek. Eria mur koi nei: Makus pe Aristakus pe Temas pe Lukas. <sup>25</sup> Ara Non Soke Iesus Kristus, lape pete tote imo nga opemo mur. Ngana laka lom.

## Hipru Alalaha Nenge Te Hasia Lange Hipru Mur

### *NeHalang Tuna I Palaungana Toto Nge Hekulkulonga Mur*

<sup>1</sup> Nge nike, NeHalang hele lala nge rera tete mur nga hetatalonga mur haria. Iri te helele nga etue halang, pe te hele ngaria altototo nga etue nemur. <sup>2</sup> Pe heueu, nga etue hetala ngana nemur, NeHalang hele at at nge ita nge Tuna i sipona. Pe Tuna nem, NeHalang i sipona henonou hote ke nauele nena ure mur lochloch. Ke nge I mana, NeHalang ala hote tapa pe ich pe ure lochloch. <sup>3</sup> Pe Tuna nem nge tualeme hote Temene nena poinga mur pengpeng. Pe na helenga kikina ngana, rahite ure lochloch ngana nga tapa pe ich pe poia iri ke te umume. Pe mete ke eina lele ke lome ita nga rera poinga poreke ngana mur. Ke het pe la ke are sapele nga kilanga palaungana, nga NeHalang ilina ele nenga pen tamalmal nga lut nga tapa. <sup>4</sup> Pe temene tal heke i ke i palaungana toto nge angkelo mur iange ene nenge Temene tunge lange i, palaungana toto nga angkelo mur eria.

<sup>5</sup> NeHalang heleia helenga nei lange tuna ke pomai,  
“Tuk toto laka Iong.

Heueu nei O hetue iau ke Temem Iau.”

Pe pule, NeHalang heleia tuna ke teke,

“I temene iau.

Pe iau tuk, laka i.”

Pe helenga nemur, NeHalang tamal hote lange angkelo e ero toto. <sup>6</sup> Pe pule nga etue nenge NeHalang kulosia Tuna tengene ana ke sio at nga ich, hele ke mai,

“Lape NeHalang nena angkelo mur lochloch ngana

te heto heke i.”

<sup>7</sup> NeHalang hele ia nena angkelo mur ke pomai,

“Te poi ke pomanga kileng heingana nge lohote pe het mulmule.

Pe pule tepoi ke pomanga oan nge sapellala haka pe mete sio mule.”

<sup>8</sup> Pe I Tuna pomange angkelo mur ero. Iange NeHalang hele lange Tuna Iesus ke pomai,

“Iong NeHalang, ke o rahite ume palaungana

nenge o nauele hehei pe hana.

Pe ume nem hetala ngana ero.

O nauele hehei pe hana ke nek toto.

<sup>9</sup> Iange iong lememe taua poinga nge pengpeng

pe lememe ero ia poinga nge poreke.

Ke nga poinga nem mana, Am Soke NeHalang henonou hote iong

pe tunge iechinga palaungana lange iong.

Pe poia iong ke iong palaungana toto nge pekngam mur.”

<sup>10</sup> Pe pule, hele ke pomai,

“Non Soke, nga talun ngana toto,  
O hetakila heke ich nei nga munna

nenge iong sipom o ume hot tele nike pe pule perim ume hote tapa.

<sup>11-12</sup> Pe ure nemur lape te poi ke pomanga

hengeron nike ngana mur nenge te menini toto lo.

Lape olou heke iri ke tema

pe o hetaua iri nga heueu ngana mur.

Pe iong toro mana opoi ke pomanga ure nemur ero,

iange otu ke kokoes mana.”

<sup>13</sup> Pe pule NeHalang hele lange angkelo e ke mai ero:

“O at ke oare lakoi nga hilik hele nenga pen tamalmal,

ke la het nga etue nenge e hekou sue lem ngarang mur

ke apem ana manga haka muria iri.”

14 Iok laol, angkelo mur iri utar? Iri ope mur nenge te ummume nge NeHalang. Pe NeHalang kulosia iri ke te halaulaua iri nenge te mene maulinga ke koko.

## 2

### *Maulinga Nenge Palaungana Toto*

1 Pomalam, letera tuanin ke nek toto nga helenga nemur nenge ta longe ke ulolo. Pe ta rahite ke kerkereng iange lape ta saleke nga kue e nge altoto pe ta nanasia kue nenge pengpeng ero ol. <sup>2</sup> Helenga nenge NeHalang nena angkelo mur te heleia, lohote ke manmanna. Pe iri nenge te nanas tau pengpengia helenga nemur ero, te amneia aria melmelenga. <sup>3</sup> Pe ita lape tapoi ke pomere? Nenge teke ta hira ele Non Soke nena maulinga palaungana nem, lape ta ua hot nga ana melmelenga palaungana ke mere? Non Soke i sipona haliu hot tele. Ke het pe iri nenge te longe, te hekerkereng ia at nge ita ke te teke helenga nei manmanna. <sup>4</sup> NeHalang pule hekerkereng ia nena helenga nga nenge poi hote merakulo mur pe ure papalauna hel pule ke hehei pe hana te neue pe te eteia ke helenga nem manmanna toto. Pe nga I sipona lemene ngana, heronge tunginga mur nenga Opepengpeng lala nge hehei pe hana.

### *Iesus I Kue Nenga Maulinga Ke Koko*

<sup>5</sup> Nga tatu ngara nge he, NeHalang talue angkelo mur ke te nauele ita ero. Ta tungara nem, ngana koi nenge ta heleleia nei. <sup>6</sup> Pe NeHalang nena helenga e hele ke teke, “NeHalang, hana mur mai, iri utar toto nenge letem tu mana nge iri? Pe pomere nenge letem metene iri ke o nauele iri?” <sup>7</sup> Hana nemur, iong sipom o poia iri ke te ele sio mana nge angkelo mur.

O hemalmalia iri pe otal heke iri

<sup>8</sup> ke tenau ele ure lochloch.”

NeHalang poia hana mur ke tenau ele ure lochloch. Pe heueu nei ta kolkol iri nge tenau ele ure lochloch.

<sup>9</sup> Pe ita, ta naue Iesus nge NeHalang talue i ke ele sio mana nge angkelo mur. Pe ta esia i nge te hemalmalia pe hulua te heto heke i. Iange nga NeHalang letena poreke ngana, Iesus takisia melmelenga ke mete. Pe i mene ita lochloch ngana murra nga metenga.

<sup>10</sup> Urana toto nge NeHalang kulosue tuna ke takisia melmelenga. Iange nga kue nem, Iesus poia seilil nenge I muka toto nga kue nenga maulinga ke koko. NeHalang iech mana nge mene mule tutuna mur ita nga kue nem iange poi hote ure lochloch ngana pe ure lochloch ngana huna mana nge i. Pomalam, NeHalang tutuna mur ita ke lape tala nga hemalmalinga palaungana nem pule.

<sup>11</sup> Iesus helemlemia hana mur nga reria poinga poreke ngana mur. Pe Iesus pe iri lochloch ngana nenge Iesus helemlemia iri nem, temeria elle mana. Ke pomalam Iesus iech toto nge hetue iri ke titina mur ia iri.

<sup>12</sup> Pe hele ke teke,

“NeHalang, Lape e haliu hote iong lange titik mur.

Pe nga etue nenge imem lochloch mo eukirau, lape e heto heke tote em.”

<sup>13</sup> Pe pule Iesus hele,

“Lape e talue letem manmanna ngana nge NeHalang.”

Pe pule hele ke teke,

“NeHalang tunge tutuna mur at nge iau.

Pe imem lochloch koloi.”

<sup>14</sup> Ita, NeHalang tutuna mur ita. Pe ita non ke singira pe eira. Pe Iesus pule lohote ke i non ke mange ita. Pomalam, takisia ana melmelenga ke mete, pe hekou sue non nenge rahite kerkerenga nenga metenga.

1:14: Psa 34:7; 91:11    2:2: Kal 3:19    2:3: Hip 10:29; 12:25    2:4: Mak 16:20; 1Ko 12:4, 11  
2:6: Psa 8:4-6    2:9: Pil 2:8-9    2:11: Mat 25:40    2:12: Psa 22:22    2:13: Isa 8:17-18    2:14:  
1Io 3:8; Hem 12:10

15 Pomalam, Iesus mene mule iri nenge tetu teu nga mataunga nenga metenga. 16 Ke i manmanna toto nge halaunga nem, lange angkelo mur ero. Halaunga nem la pengpeng nge Apraham na tete mur. 17 Iesus lohote ke i non ke mange ita pe nga poinga nem, i nakuna nge letena poreke toto ia hehei pe hana. Pomalam, lohote ke I Tunginga Ana Non Soke nenge olia reria poinga poreke ngana mur nga ana metenga. 18 Ke i nakuna toto nge halaua ita nga etue nenge poinga poreke ngana mur te takue ita. Iange i sipona amnei tote melmelenga palaungana lo nga etue nenge poinga poreke ngana lohote nge i.

### 3

#### *Iesus I Palaungana Toto Nge Moses.*

1 Ke pomalam titik mur, imo nenge a longe NeHalang nena iunga pe a nanasia i, letemo tu ke kerkereng toto nge Iesus. Iange Iesus, NeHalang kulosia at ke i ara tunginga Ana Non Soke. Pe i, halaulaua ita ke ta lala nge NeHalang. Pe Iesus nem, ta hele hote i nga letera manmanna ngana lo. 2 Pe i poia ana ume ke lohote ke pengpeng toto lange Non nenge henonou hote i. Pe Moses pule poia ana ume ke pengpeng toto nge nauele NeHalang na hana mur Israel. 3 Pe Iesus ene haka toto nge Moses iange non nenge lele pele e, i palaungana nga pele nem. 4 Pele pele mes haka mana ero. Mele e hemes heke. Pe NeHalang ume hote ure lochloch ngana. 5 Moses ume ke pengpeng toto nga NeHalang na pele letena ke pomanga I NeHalang nena hekuleileinga. Pe na ume nem nau tautaua helenga hel nge lape lohote nge he kura. 6 Pe Iesus i NeHalang tuna nge nauele temena na pele ke pengpeng toto. Pe ita, NeHalang nena pele koi ita. Pomalam ta rahite letera manmanna ngana pe sara kikina ngana nge Non Soke.

#### *Iri Nenge Leteria Manmanna Ero, Tenau Ala Aria Kenek*

7 Iange Opepengpeng hele ke teke, “Nenge teke a longe nena helenga heueu nei,

8 letemo kerkereng hite poinga poreke ngana ero, ke pomanga etue nenge a longo ole taua NeHalang nga totoinga nenge lohote nga ich sana lomona.

9 Nga lamau, lemo tete mur te ollaka hote iau ke halang.

Pe iau e tu luluch pe e halaulaua iri ke hesinga iri ana non kina nai (40).

Pe leteria manmanna nge iau ero toto.

10 Pomalam letek inin taua iri nenge etue nem pe e hele,

‘Hana nei, leteria tu nge iau ero pe te eteia lek poinga mur ero toto.’

11 Ke nga letek inin ngana nem, e talue lek helenga kerkereng ngana nenge e teke,

‘Iri nemur lape teate ke te tua reria tunga nge nek nge iau ero.’”

12 Ke titik mur a esia lo? Amo e nge imo poi ke mange hana nemur ero toto. Ma lape letemo muta nga poinga poreke ngana mur pe a ua nge NeHalang nenge maulul, pe letemo manmanna nge I ero ol. 13 Pe imo, heueu nei a hekerkereng helia letemo nike, iange lape poinga poreke ngana mur, te channanga ia imo pe te sik teu ke kerkereng toto nga letemo. 14 Nga tele ngana, letera manmanna ke kerkereng. Pe nenge teke ta rahite letera manmanna ngana nem ke la het nga ta mete ngara, lape Kristus i pekngara ia ke kokoes ol. 15 Pomalam, NeHalang nena helenga nenge tehas sue ke ulolo, hele ke teke,

“Heueu nei, a longe NeHalang na helenga

pe letemo kerkereng hite poinga poreke ngana ero ol.

lange nge nike a longo ole taua  
NeHalang pe a ua ana.”

<sup>16</sup> Iri nenge te longe NeHalang na helenga pe tehul rumeria pe te ua ke tela, iri laka nenge Moses mene hote iri nge Ekipto nem. <sup>17</sup> Pe NeHalang letena inin tautaua itei hel toto ke hesinga iri ana non kina nai (40)? Iri laka nenge te poia poinga poreke ngana, pe te mete lolo ke koluria tema sio mana nga ich sana lomona. <sup>18</sup> Pe NeHalang heleia iri nenge te longo olole pe hele ke kerkereng ke teke, “Iri nemur lape teat ke tetu ia reria tunga nge nek nge iau ero.”

<sup>19</sup> Ta esia lo ke iri nemur teteu langa tunga nge nek nem ero ol, iange leteria manmanna nge NeHalang ero toto.

## 4

### *Tateu Nga Tutunga Nge Nek Nge NeHalang Ol*

<sup>1</sup> Iok, ta eteia lo, NeHalang na helenga kerkerenga ngana teke tateu langa nena tunga nge nek. Ke heueu nei, ta matau pe tapoi ke nek toto. Iange lape amo e nge imo teu langa tutunga palaungana nem ero. <sup>2</sup> Iri nenge nike, teteu la ero iange leteria manmanna nga helenga urana toto ngana nenge te longe ero. Pe helenga urana toto ngana nem, ngana koi nenge ta longlonge heueu nei. <sup>3</sup> Ke ita nenge letera manmanna, tala nge NeHalang ke tatu luluch nge i nga kileng nem. NeHalang i sipona heleia lo ke teke, “Ke nga letek inin ngana nem, e talue lek helenga kerkereng ngana nenge e teke,

“ ‘Iri nemur lape teat ke te tuia reria tunga nge nek nge iau ero.’ ”

Pe NeHalang hele hote tutunga nei nga etue nenge alahote tapa pe ich pule. <sup>4</sup> Ke nga nena alalaha nenge tehas sue ke ulolo, hele ia etue rahtele nai ngana nem ke mai,

“NeHalang umume pe nga etue rahtele nai ngana, tutu mana ol.”

<sup>5</sup> Pe nga na helenga nenge ta heleia nem lo, hele ke teke, “Iri nemur lape teat ke te tuia reria tunga nge nek nge iau ero.” <sup>6-7</sup> Iri nenge te longo tele helenga urana toto ngana, teteu langa tunga nge nek nem ero iange leteria manmanna nge NeHalang ero. NeHalang heleia nga hesinga nemur nenge la ke ulolo. Pe nga hoena toto ol, NeTeuit has sue helenga nei ke teke,

“Heueu nei, a longe NeHalang na helenga  
pe letemo kerkereng hite poinga poreke ngana ero ol.”

Pe nem ta eteia ke NeHalang talue ana etue nenge “Heueu Nei”. Ke mele hel lape teteu la ke la tetu teu nga tunga nge nek nem.

<sup>8-9</sup> Iange nenge teke Iosua mene teua hehei pe hana langa tutunga nem nike, NeHalang lape heleia tutunga pele nge pomai ero ol. Pe ero. Iosua mene teua iri nga tutunga nem ero. Ke pomalam, tutunga e tu kura. Ke NeHalang nena hana mur teteu la ia. Pe tutunga nem pomanga tutunga nenge NeHalang poia nga etue rahtele nai ngana. <sup>10</sup> Ke mele nenge teu langa tunga nge nek nge NeHalang, tutu sio mana nga ana ume nenge popoia. Iange NeHalang pule poi ke pomalam, ume ke het pe tutu sio mana pule. <sup>11</sup> Ke pomalam ita lochloch tapur ke kikina toto ke tateu langa tunga nge nek nem. Pe ara e nge ita nanasia longonga ole nenge te poia nge nike ero ol.

<sup>12</sup> NeHalang nena helenga tu ke maulul pe kikina toto. Pe i matana toto nga kakop e nge matana kaliuala. Pe lik teu ke la toto nga ngara pe opere tetu ngaria. Pe pule lik ke teu langa kira puotom ngana mur pe nga kira letena nge teu toto. Ke helenga nem langa letera nge teu toto.



Pomanga letera tuanin ngana mur pe utar nemur nenge lemere tautaua iri. Langa letera nem pe henonou hote utar nenge urana pe utar nenge poreke. <sup>13</sup> Pe nga ure lochloch ngana nenge NeHalang ume hote, ute pele nge talkome nga matana ero. Ure lochloch ngana tetu ke mallaha mana nga matana. Pomalam, ita lochloch lape ta hele hote ure lochloch ngana lange I, nge pomere toto nenge ta poia ure nemur.

### *Tunginga Ana Non Soke Nenge Halau Tote Ita*

<sup>14</sup> Pe ita ara tunginga ana non soke toto laka Iesus. Pe i NeHalang tuna toto nenge langa lut nga tapa lo ke halaua ita. Pomalam ta rahite letera manmanna ngana nenge tutu nge ita nei ke kerkereng. <sup>15</sup> Pe ita ara tunginga ana non soke, amneia ure meena ngana mur lochloch nenge lohot nge ita ke ulolo, pe losio nga poinga poreke ngana e ero toto. Pe i nakuna nge etei urume ta makuk ngara. <sup>16</sup> Pomalam ta mataua NeHalang ero pe tala ke tames nga matana, nga nena arenga nenge nauele ita lochloch. Iange i non nge lete porekenga. Pe i lape halaua ita ke nek toto nga etue nenge ure meena ngana mur te lohot nge ita.

## 5

<sup>1</sup> Iok, NeHalang henonou hote tunginga ana hana mur aria soksoke ngana mur nga iri siporia reria hana mur leteria. Pe iri aria ume laka nenge tetu nga tuna ngana mana, ke te halaulaua reria hana mur lala nge NeHalang. Pe pule te poia tunginga mur lala nge NeHalang ke te helelem mule reria hana mur nga poinga poreke ngana mur. <sup>2</sup> Iri siporia te amneia poinga poreke ngana mur pe ure meena ngana halang lo, pomalam lape te halau tote iri nenge te losio nga poinga poreke ngana mur. <sup>3</sup> Pe iri non mana,

pomalam te poia tunginga mur lange NeHalang ke helelem ia iri pe reria hana mur pule.

<sup>4</sup> Mele pele tal heke i sipona ke i tunginga ana non ia ero. NeHalang i sipona poia ume nem ke pomanga poia lange ne Aron nge nike. <sup>5</sup> Pe Iesus Kristus pomalam pule. I sipona tal heke ume nem lange i ero, nenge lohot ke i tunginga ana non soke. Iange NeHalang hele ke teke, "Iau tuk laka iong pe heueu o hetue iau ke Temem iau ol."

<sup>6</sup> Pe NeHalang hele nga alalaha e pule ke teke, "Iong lape o lohot ke iong tunginga ana none ke koko, ke pomange Melkisetek."

<sup>7</sup> Iok, nga etue nemur nenge Iesus tu nga ich kura, hetalaulau lange NeHalang pe tang ke palaungana pe matana eina sio. Iange eteia ke NeHalang i toro mana lape hemaule heke mule i nga metenga. Pe NeHalang longe nena hetalaulaunga mur iange Iesus tal sio mene i, pe tung tote i lange NeHalang. <sup>8</sup> Iesus I NeHalang tuna toto, pe takisia ana melmelenga mur. Pe melmelenga nem, hetore i ke longo tau mene NeHalang. <sup>9</sup> Ol pe i lohot ke i non nge pengpeng toto, pe maulinga ke koko huna toto nge i. Pe iri nemur nenge te longo taua i, lape te mene maulinga ke koko. <sup>10</sup> Pe NeHalang tal hote i ke i tunginga ana non soke ke koko ke pomange Melkisetek.

### *Tapoi Ke Mange Aina Kinkino Ngana Ero Ol*

<sup>11</sup> Nga nei, ure halang toto nge lape ta heleia. Pe anali toto nge e hetore imo iange a etei ngamo nga ure mur hulul mana. <sup>12</sup> Imo, toinge ngana kou a lohot ke imo heteronga lo. Pe ero. Ke nakuna nenge mele lape at ke hetoro mule imo nga NeHalang nena hengetoro mur nenge a mene nga talun ngana toto. Toinge a eteia NeHalang nena helenga ke pomanga

ngaunga kerkereng ngana nenge a ngaua. Pe ero! A siu manmana kura! <sup>13</sup>Iange mele nenge siu manmana, i mamau kura. Pe eteia ute pele nge urana pe poreke ero. <sup>14</sup>Iok, iri nenge iri papalauna lo te ngaua ngaunga kerkereng ngana. Pe iri te teke te amnei urume ngaunga lemene ngana mur. Pe nga poinga nem, te hetoro mule iri ke te eteia kue nenge urana pe kue nenge poreke.

## 6

### *Non Nenge Hasia Alalaha Nei, Hele Hote Letena*

<sup>1</sup> Pomalam, hengetoro nemur nenge a mene nga tele ngana nenge Kristus, tetu mukam. Pe tala pengpengnga hengetoro mur nenge ta mene ke pomanga ita papalauna ngara. Iange toinge a etei ngamo ia iri kou ulolo. Pe nei ol, tala manmana nga ure papalauna ol. Ke hengetoro nemur tatu hit menmene iri ero; Nenge hulmulenga nga poinga poreke ngana, pe letera manmanna ngana nge NeHalang <sup>2</sup> pe hengetoro mur nga henuninga, pe nga nenge tetal heke peria, pe ta maul haka mule ngara nga metenga, pe pule, hengetoro nenge NeHalang amnei teu atat nge ita elle pe elle nenge hetala ngana ero. <sup>3</sup> Nga NeHalang lemene ngana mana lape ta mene hengetoro nemur ke pomanga ita papalauna ngara.

<sup>4</sup> Iok, iri nenge te hile sue leteria manmanna ngana mur lo, lape teat mule ke mere ke tehul mule leteria nga reria poinga poreke ngana mur? Iri tetu teu tala nga NeHalang nena lemene pe te mene NeHalang nena tunginga. Pe te amnei urume ume ngana, pe iri ul pekngaria mur ke te mene Opepengpeng. <sup>5</sup> Iri te amnei urume NeHalang nena helenga pe te teke urana toto. Pe pule te amnei urume kerkerenga nenga etue nenge NeHalang talun ke nauele ure lochoch. <sup>6</sup> Iri nenge te urana mukam

pe te losio mule, lape anali toto nge tehul mule leteria ol. Nenge teke te poi ke pomam, te teke te henanas mule poinga nenge te hero taua NeHalang Tuna langa manga toto pe te hemeia i nga hulua mataria.

<sup>7</sup> NeHalang na petanga tunga ume nenge pitte mol taua pe ana ngaunga haka ke urana. Iange ume nem halaua mele hel nenge te umeia. <sup>8</sup> Pe ume nenge uraurau au hit mene, ume nem poreke pe poia ute pele nge urana ero. Pomalam, lape NeHalang lemene ero ia pe tonoi teua ana oan ke lasus.

<sup>9</sup> Titik mur, imem mo hele mana ke mai. Pe nge imo, letememo kerkereng toto nga ure urana ngana mur nge lape te lohote nge imo - ure urana ngana nemur la tau pengpeng ia maulinga ke koko. <sup>10</sup> NeHalang i non nge pengpeng toto. Pe eteia nge lememo tautaua nena hana mur pe a halaulaua iri ke kokoes. Pe amo ume nemur, NeHalang letena lilil ele ero toto. <sup>11</sup> Pe imem lememe toto ke a rahite amo ume nem ke kerkereng ke la het nga etue nei hetala ngana. Pomalam, ure nemur nenge lememo tau totote lape te lohote ke manmanna. <sup>12</sup> Pe mo teke lemo melei tana ero. A nanas tau mene poinga nenge iri nenge leteria manmanna te popoia. Iri leteria manmanna pe tetu ke nek. Pomalam te mene ure nenge NeHalang hele ke kerkereng ke teke tunge lange iri.

### *NeHalang Na Helenga Utona Toto Ngana*

<sup>13</sup> Nge nike NeHalang poia helenga kerkereng ngana e lange Apraham. Pe NeHalang hekerkereng ia helenga nem nga i sipona ene iange mele e nge palaungana nge i ero ol. Poia helenga kerkereng ngana nem, pe <sup>14</sup> hele ke teke, "Iau lape e pete iong pe e poia lem tete mur ke te lohote ke iri halang toto." <sup>15</sup> Iok laol, Apraham tu ke nek mana pe kulala mana ke

**6:6:** Mat 10:22; Hip 10:26-27; 1Io 5:16

**6:8:** Gen 3:17-18; Mat 13:7, 22

**6:10:** Hip 10:32-34

**6:13:** Gen 22:16-17

la ure nenge NeHalang heleia neu, lohoh ke manmanna.

<sup>16</sup> Nenge teke hana nai te hunel, pe elle nge iri nai nem teke hekerkereng ia nena helenga, hekerkereng ia nga none nge pingana iuiu ene. Pomalam lape hunelinga nem het sio mule.

<sup>17</sup> Ke pomalam, NeHalang poia helenga manmanna ngana nem pe teke hemallaha hot tote ke helenga nem i manmanna toto pe lape hul mule letena ero toto. I teke hemallaha hot tote lange iri nemur nenge lape te mene helenga manmanna ngana nem. Ol pe hekerkereng tote nga i sipona ene. <sup>18</sup> Pe ita, sara kikina ol! Lange NeHalang i non nge pallaklaka ero! Poia helenga manmanna ngana nem pe hekerkereng tote nga i sipona ene. Ke ita nenge ta teke ta song ke tala nge i ke ta mene maulinga ke koko, sara kikina pe ta nauala mana ol. <sup>19</sup> Pe sara kikina ngana nem, poi ke pomanga um meena ngana nenge te kele nga aka pe te hesue ke la are nga leme letena. Pe kilenge eingana pe ruach teke ulo ule aka nem, pe ero. Lange um meena ngana nem rahat ele aka nem ke kerkereng. Pomalam mana, sara kikina ngana nem teu langa huunga nenge ma tote kileng nenge heo ngana toto nenge NeHalang tu ia. Pe i lape rahat ele letera manmanna ngana ke kerkereng toto. <sup>20</sup> Iange Iesus i muka teu langa kileng nem lo ke halaua ita. Pe lohoh ke i Tunginga ana Non Soke ia ke ulolo ke pomange Melkisetek pe nga etue lochoch sapele.

## 7

### *Melkisetek*

<sup>1</sup> Melkisetek i naungaala ana non nga kileng nenge Salem. Pe i, NeHalang Nenge I Soke Nga Lut Toto nena tunginga ana non ia. Pe Apraham iri ul hana papalauna hel te palhel. Iok, hekou sue iri ke het pe i ke la pe Melkisetek saolia i nga kue. Pe Melkisetek pete Apraham. <sup>2</sup> Ol pe Apraham lohaka pe takiraua urelu

mur nenge lolochia nga hunelinga ke huna iri analoch. Pe huna elle, tunge lange Melkisetek. Melkisetek ene luna pomai, “naungaala ana non nga poinga nge pengpeng”. Pe pule, te hetue ene ke “naungaala ana non nga kileng nenge Salem.” Pe luna, “nekinga ana naungaala ana non.” <sup>3</sup> Melkisetek tana pe temene pe na tete mur, eria ma hot nga alalaha unne e ero. Pe pule tana hoho ngana ia pe mete ngana pule ta eteia ero. I pomalaka nga NeHalang tuna nge i tunginga ana non nga etue lochoch.

<sup>4</sup> Ke a esia lo, non nei i non palaungana ia, pe rette palaungana Apraham tung ke ure huna elle nge iri analoch lange i, nga ure nemur nenge mene nga te palhel ngaria. <sup>5</sup> Moses na hotonga hele ke teke, Liuai na tete mur nenge iri tunginga ana hana mur, te loloch ke ure huna elle nge iri analoch nge reria hana Israel mur. Tunginga ana hana nemur iri Apraham na tete mur pule, pe ta teke ma lape iri te mene ure nemur ero. Pe ero. Iri tela mulmule kura ke te loloch mulmule ure nemur nge mataria alona mur. <sup>6</sup> Pe Melkisetek, lohoh nga mata nenge Liuai ero. Pe i mene ure huna elle nge iri analoch nge Apraham. Pe ana non pete Apraham, non nenge rahite NeHalang nena helenga manmanna ngana mur. <sup>7</sup> Pe manmanna toto nge mele nenge i palaungana toto pete mele nenge ele sio mana nge i. <sup>8</sup> Ke tunginga ana hana mur nenge te lohoh nga mata nenge Liuai, te lolochia ure huna elle nge iri analoch. Pe iri hana mana, pomalam te metmete. Pe Melkisetek lolochia ure nemur pule, pe te hele ke te teke i kou tu ke maulul kura. <sup>9</sup> Iok, mele lape hele ke teke, Liuai lohoh nga mata nenge Apraham. Ke Liuai laka nenge tunge ure huna elle nge iri analoch nem lange Melkisetek. <sup>10</sup> Pe i manmanna ke te hoe Liuai ero kura, nga etue nenge Melkisetek saolia Apraham nga kue. Pe Liuai tu ke

maulul nga nette Apraham letena lo, nga etue nenge Apraham tungtunge ure nemur lala nge Melkisetek.

*Iesus I Tunginga Ana Non Ke Pomange Melkisetek*

<sup>11</sup> Iok, NeHalang tunge hotonga lochloch lange Israel mur, nge tunginga ana hana mur nenge te lohot nga mata nenge Liuai. Iange hotonga nem kikina ngana tu nge iri. Pe toinge te ume ke nek ke te halaua hehei pe hana, NeHalang lape kulos mule mele ke at ero ol. Pe nei ero. Pomalam NeHalang kulos sue tunginga ana none nge altoto lochloch nge Aron. Iange i pomange Melkisetek pengpeng. <sup>12</sup> Ke pomalam lape te hetaua hotonga mur lochloch iange tunginga ana non heueu ngana e at lo. <sup>13</sup> Ana Non, tu teu nga mata nge altoto pe mata nem rahite ume nenge tunginga ana hana mur ero kura. <sup>14</sup> Iange ita ta eteia lo ke, ara Non Soke lohot nga mata nenge Iuta mur. Pe Moses hele hote helenga unne e ero nga mata nem nge rahite ume nenge tunginga ana hana mur. <sup>15</sup> Iok, ta esia ke mallaha toto ol. Tunginga ana none pule lohot ke mange Melkisetek toto. <sup>16</sup> Liuai mur te lohot ke iri tunginga ana hana mur iange hotonga hele ke teke iri mata nem mana lape te rahite ume nem. Pe Iesus ero, iange kerkerenga palaungana nenga maulinga ke koko, poia I ke mene ume nem. <sup>17</sup> Iange NeHalang nena helenga nenge tehas sue ke ulolo, hele ke teke,

“Iong tunginga ana non ke pomange Melkisetek,  
pe lape o rahite ume nem nga etue lochloch sapele.”

<sup>18</sup> Oe, NeHalang hetaua hotonga nike ngana mur lo, iange hotonga nemur te halaua ita ero ol. <sup>19</sup> Hotonga nemur te poia ute pele ke lohot ke pengpeng ero. Pe kue e nge urana toto nga hotonga nemur, lohot. Pe sara kikina nga kue nem ol. Iange

NeHalang tunge at nge ita ke tala rochroi nge i. <sup>20</sup> Pe pule, NeHalang poia kue nem pe hekerkereng tote nga nena helenga nenge kerkereng toto. Nga etue nenge Liuai mur te lohot ke iri tunginga ana hana mur, NeHalang poia helenga kerkereng ngana e nge iri ero. <sup>21</sup> Pe nga etue nenge Iesus lohot ke I tunginga ana non, NeHalang hekerkereng tote na helenga pe hele ke teke,

“Non Soke hele ke kerkereng toto  
pe lape hul mule nena helenga ero toto.  
Iong tunginga ana non pe lape o rahite ume nem  
nga etue lochloch sapele.”

<sup>22</sup> Ke nga helenga kerkereng ngana nei, ta eteia ke helenga tomunga hel heueu ngana nem, kikina ngana tu nge Iesus. Iange i sipona poia ana ume ke lohot ke manmanna. Pe i urana toto nga nenge nike ana.

<sup>23</sup> Pe pule, nge nike hana halang te rahite ume nei iange hel te metmete pe hel te mene lolounune reria ume. <sup>24</sup> Pe Iesus pomam ero. Iesus rahite ume neu pe tu sapele nga etue lochloch pe mele pele nge hetaua i ero ol. <sup>25</sup> Ke pomalam, Iesus nakuna nge mene mule hehei pe hana ke tela mule nge NeHalang nga etue lochloch. Iange I pule tu ke kokoes mana nga iri ul NeHalang tunangaria ke onteiteia NeHalang ke letena ia reria poinga poreke ngana mur ero ol.

<sup>26</sup> Pe Tunginga ana Non Soke nei lape halaua ita ke nek toto. Iange i sipona nanas tau tote poinga nemur nenge NeHalang lemene taua. Pe i losio nga poinga poreke ngana e ero pe tu ke pengpeng toto nga NeHalang matana. Pe pule tu ke altoto nge iri nenge te popoia poinga poreke ngana mur. Ke NeHalang hemalmalia i pe mene heke i ke langa lut nga tapa. <sup>27</sup> Tunginga ana hana mur nenge nike te ume ke pomai: Iri te poia tunginga mur nga etue lochloch. Pe



tepoi tele tunginga nenge helemlem ia iri siporia mukam, ke het pe te poia nenge te helemlem ia hehei pe hana nga reria poinga poreke ngana mur. Pe Iesus poi ke pomam ero. Iesus poia nena tunginga ke elle mana, nenge tung heke i sipona lange NeHalang ke mete ke halaua ita. Pe tunginga elle nem purpur tote ita lochloch rera poinga poreke ngana mur. <sup>28</sup> Moses nena hotonga hesilei hotote tunginga ana hana mur nenge te pengpeng ero toto. Pe NeHalang nena helenga kerkereng ngana nem, lohoh rume mana nga hotonga nem. Pe na helenga kerkereng ngana nem hesilei hote Tuna nenge lohoh ke pengpeng toto nga etue lochloch sapele.

## 8

### *Ara Tunginga Ana Non Soke Nga Hotonga Heueu Ngana*

<sup>1</sup> Iok, lek helenga mur nenge e heleleia iri nem luna mai koi: Ita ara Tunginga ana Non Soke tu, pe ngana kou are nga pen tamalmal nga NeHalang nena arenga seina ngana nga lut nga tapa. <sup>2</sup> Pe Iesus poia ana ume nenge I Tunginga ana Non Soke nga NeHalang nena pele nga lut nga tapa. Pe pele nem none mana hemesia ero. Non Soke i sipona hemes heke pele nem.

<sup>3</sup> Pe tunginga ana hana mur aria papalauna mur lochloch, aria ume nenge te menmene tunginga mur pe te tung heke iri lala nge NeHalang. Pe Iesus i tunginga ana non soke pule, pomalam poia nena tunginga pule.

<sup>4</sup> Nenge teke Iesus tunga ich kura, lape rahite ume nem ero. Iange hana nenge te rahite ume nem tetu lo. Pe te tungtunge tunginga mur lala nge NeHalang, ke pomanga hotonga hele ngana. <sup>5</sup> Pe te popoia aria ume nemur nga pele nenge te heto hekeke NeHalang ia. Pe pele nem, NeHalang na pele toto ngana ia ero. NeHalang na pele toto kou tu nga lut nga tapa. Pe nenge nem i opene mana. Iange nga

etue nenge Moses teke hemes heke NeHalang nena pele, NeHalang hele lange i ke teke,

“O hemesia pele nem,  
pe o poia ke nek toto.

Pe o nanas tau pengpeng ia opene nenge e henonoua lange iong nga hengene.”

<sup>6</sup> Pe ero ol, iange Iesus rahite ume nem lo. Pe ume nenge Iesus rahite nei, i ele haka toto nga nenge hana hel te rahite. Iange Iesus tu nga tunangana mana nge ita pe NeHalang, ke hekerkereng ia helenga tomunga hel heueu ngana nem. Pe ure nemur nenge helenga tomunga hel heueu ngana nem teke poia nge ita, palaungana toto nga nenge nike ana.

<sup>7</sup> Pe toinge nike ana nem ume hot ke urana nike, lape heueu ngana e lohoh ero ol. <sup>8</sup> Pe NeHalang esia poinga poreke ngana mur halang pomalam hele ke teke,

“Nga etue nemur nenge te atat nem,  
lape etal hote lek tomunga hel heueu ngana ana helenga lange Israel mur pe lange Iuta mur.

<sup>9</sup> Pe nei ol, lape altoto nga nenge e poia lange reria tete mur nge nike.

Nga helenga tomunga hel nike ngana nem,

e rahite iri nga perik pe e mene hote iri nga ich nenge Ekipto.

Pe iri leteria manmanna, nga helenga palaungana

nenge mo tom helia nge nike ero.

Te poia poinga nem pe enau lange iri ero ol.

<sup>10</sup> Pe helenga tomunga hel heueu ngana

nenge e teke e poia lange Israel mur nga etue nei pomai;

Lape e talue lek hotonga mur nga leteria

pe ehas sue nga kakaoria pule.

Iange Iau lek hana mur iri,  
pe iri aria Non Soke Iau.

<sup>11</sup> Pomalam lape te hetore titiria mur



pe reria helenga pekngana mur  
ero ol,  
nenge te teke te hetore iri  
ke te eteia NeHalang pule.  
Hengetoro nem lape lohot ero ol,  
iange talun nge hana nenge pin-  
garia iuiu ero  
ke lange hana papalauna nenge pin-  
garia iuiu,  
iri lochloch te eteia Iau lo.  
<sup>12</sup> Ke lape e saua reria poinga poreke  
ngana mur  
ke te lasus toto.  
Pe lape letek metene mule  
reria poinga poreke ngana mur  
ero ol.”

<sup>13</sup> Iok, NeHalang hetue helenga to-  
munga hel nem ke “Heueu Ngana” Pe  
i poia nenga tele ngana nem ke nike  
ngana lo. Pe ure nike ngana nenge  
ana ume ero, lape erue sio mana.

## 9

<sup>1</sup> Pe helenga tomunga hel nenge  
nike nem, te talue ana hotonga mur  
nga poinga nenge te heto hakaka Ne-  
Halang ia. Pe pele nenge te heto  
hekeke NeHalang ia, te ume ia nga  
ich nei. <sup>2</sup> Pe nga pele nem letena  
tetal tote ke ana tokola iri nai. Pe  
nga tokola nenge hot ana, te talue  
lemenge kina e pe hatanga e pe  
ngaunga nenge te poi tunginga ia  
lange NeHalang. Tokola nenge hot  
ana nem, te hetue ke Kileng unne  
nenge Heo Ngana. <sup>3</sup> Pe huunga  
palaungana e te heon ele ke heon sio,  
ke poi ele kileng unne nenge te hetue  
ke Kileng Nenge Heo Ngana Toto. <sup>4</sup> Pe  
nga lamam te talue hatanga e nge  
chalemlem toto. Pe nga hatanga nem  
ona te makmakia ure nenge inan-  
gana ehech. Pe hohou palaungana  
e mateu nga lamam pule. Hohou  
nem, singina chalemlem toto. Pe  
nga letena, te talue ngaunga menini  
ngana nenge heo ngana. Pe ngaunga  
nem mateu nga ngaunga ana mate-  
unga e nge singina chalemlem. Pe  
tetal teu luluche nga ne Aron na kula

pe um sachana nai nenge NeHalang  
has heke nena hotonga mur ia. Pe  
Aron na kula neu, nga tele ngana,  
matana hot pe tuatutu lo. <sup>5</sup> Pe te  
ume hote NeHalang nena angkelo  
nai, ke te mes haka nga hohou neu  
ona ke saharia poi ele hohou neu  
matana. Pe angkelo opene nai nem,  
te henonoua NeHalang nena hekerk-  
erenga palaungana nge tu teu nga  
Kole nem letena. Pe nga hohou nem  
matana, NeHalang letena ia hehei pe  
hana, nga reria poinga poreke ngana  
mur. Pe heueu nei lape ta hele teu la  
sakilil nga ure nemur ero.

<sup>6</sup> Ke ure nemur te poia iri ke poma-  
lam. Pe nga etue lochloch tunginga  
ana hana mur teteu lala nga pele ana  
tokola nenge hot ke te popoia aria  
ume. <sup>7</sup> Pe nga etue elle mana nga  
hesinga lochloch, tunginga ana hana  
mur aria soke, i toro mana teu lala  
nga pele nem letena nenge heo ngana  
toto. Teu lala pe menmene huros  
mur eiria ke poi tunginga ia lala  
nge NeHalang. Ke nga poinga nem,  
helemlem mule i sipona na poinga  
poreke ngana mur pe hehei pe hana  
pule. Reria poinga poreke ngana ne-  
mur, te poia pe te eteia ero. <sup>8</sup> Pe  
nga poinga nem, Opepengpeng teke  
henonoua ita ke pomai koi: Nenge  
teke pele nem mes kura, ita rera kue  
nenge tateu lala nga kileng nenge  
heo ngana toto nem, hit ala kura.  
<sup>9</sup> Iange pele nenge te hemes heke  
nem, opene laka ure nemur nenge te  
lohotot heueu nei. Pe tunginga mur  
pe huros mur eiria te purpur ero nge  
helemlemia iri nemur nenge te heto  
hekeke NeHalang. <sup>10</sup> Ke hotonga ne-  
mur, singira nge hot ana mana pe te  
heleia ure mur nenge ta ngaungaua  
pe ta inin ia pe ta lomlome singira.  
Ke lape tetu ke la het nga etue nenge  
NeHalang hetaua iri, nga kue heueu  
ngana e nge altoto lochloch.

*Jesus Poia Tunginga Nga Isipona  
Eina*

<sup>11</sup> Iesus Kristus at pe I tunginga ana Non Soke, nga ure urana ngana mur nenge tetu heueu nei. Pe I sipona poia ana ume nga pele nenge urana toto. Pe pele nem pomanga pele nenge te umeia nge nike ero. Iange pele nem, te umeia nga ure nemur nga ich ero pe none nga ich nei hemesia ero. <sup>12</sup> Pe Iesus Kristus teu langa pele nem nga NeHalang munna nge heo ngana toto. Teu la pe poia tunginga nem nga huros mur eiria ero. Poia nga i sipona eina peng-peng. Pe poia tunginga nem ke elle mana nga nenge mete pe maul haka mule. Pe ita lochloch ngana nei, ta mene maulinga ke koko nga tunginga nem mana. <sup>13</sup> Nge nike, hehei pe hana te poia poinga poreke ngana, pe tunginga ana hana mur te mene meme eina, pe pulumakau tamane ngana eina, pe pulumakau hei ngana ana apou, ke te poi tunginga ia lange NeHalang. Ke het pe tesau lolele nge iri nemur nenge te poia poinga poreke ngana. Ke nga poinga nem, te teke te poia iri ke te lemlem mule nga NeHalang matana. <sup>14</sup> Pe Iesus eina, i ure nenge palaungana toto nga huros nemur eiria. Iange poinga poreke ngana e tu nge Iesus ero toto. Pe Ope nenge hekerkereng ia i ke koko, poia i ke tung mule i lange NeHalang ke pomanga tunginga. Pe eina helemlem tote letera nga rera poinga pulut ngana mur ke ta heto hekeke NeHalang nge tu ke koko.

<sup>15</sup> Pomalam, helenga tomunga hel heueu ngana e lohoh nge ita ol. Pe Kristus I sipona tu nga ita ul NeHalang tunangara ke hekerkereng ia tomunga hel ana helenga nem. Pe iri nenge NeHalang iua iri lo, lape te mene reria ure urana ngana mur nenge NeHalang hele ke teke tunge lange iri. Pe ure urana ngana nemur lape tetu ke koko. Nga tele ngana tatu mana nga tomunga hel ana helenga nike ngana nem pe rera poinga poreke ngana te rahat tote

ita. Pe nei ero ol iange Iesus mete lo ke mene mule ita nga rera poinga poreke ngana nemur ol.

<sup>16</sup> Non e, heronge nena ure mur lange na achung mur nga maulul ngana nike. Pe non nem na helenga ume hot ero mukam, iange maulul kura. Pe nenge teke non nem mete ol, te esia ke mallaha ol. Nenge non nem na achung mur te rongoh heke ure nemur.

<sup>17</sup> Nenge teke non nem maulul kura, na helenga nem ume hot ero pe nga etue nenge mete ol, kue chach sapele nge te mene nena urelu mur. <sup>18</sup> Ke tomunga ana helenga nike ngana nem, ana ume pomau mana. Nenge teke ure nemur eiria lele ero, kue hit kura. <sup>19</sup> Ke ngana laka nenge Moses haliu hote NeHalang na hotonga mur lange hehei pe hana ke het pe mene pulumakau tutuna mur eiria, pe meme eiria, pe poi luluche nga ech. Ke het pe mene ae siki penna nenge te kale hite ana sipsip pulpunna nenge remenmen pe poi teua langa ure nemur tohoria. Ke het sau lolele nga alalaha nenge tehas sio hotonga ia pe nge hehei pe hana pule. <sup>20</sup> Pe hele, "Huros eina nenge lele hite tomunga hel ana helenga nenge ta ngata helia, ngana koi nei. Nenge NeHalang heleia lange imo ke teke a nanasia." <sup>21</sup> Pe pule, Moses mene huros eina neu pe sau lolele nga pele nenge hemesia ke te heto hekeke NeHalang. Pe pule nga ure nemur nenge te popoi aria ume ia nga pele neu letena. <sup>22</sup> Iok, NeHalang nena hotonga hele ke teke: Ure tana huna hel, a helemlem ia nga huros mur eiria. Pe nenge teke ute eina lele ero, lape NeHalang saua rera poinga poreke ngana mur ero pule.

### *Iesus I Tunginga Nenge Mene Mule Ita*

<sup>23</sup> Pe poinga nei, te poia nga ure nenga ich ana mana. Pe i opene mana nga ure toto ngana mur nenga tapa. Pe nga ure toto ngana nemur,

tunginga e nge urana toto nga huros nemur lape helemlem ia iri. <sup>24</sup> Ita ta eteia lo, Kristus teu langa lut nga tapa pe lohohot pengpeng nge NeHalang ke halau tote ita. Teu langa NeHalang na pele nenge ich ana ero. Iange pele nem, i opene mana nga NeHalang nena pele toto ngana. <sup>25</sup> Tunginga aria soksoke ngana mur te mene huros mur eiria pe teteu langa Kileng nenge Heo Ngana Toto nga hesinga lochloch ke te poia reria tunginga mur. Pe Kristus poi ke pomam ero. I langa lut nga tapa pe tunge i sipona lange NeHalang ke elle mana pe emule mana ero. <sup>26</sup> Nenge teke Iesus poia poinga nem ke emule mana, toinge takisia ana melmelenga ke emule mana nga ich nei talun ngana nike. Pe nei ero, iange kileng nei hetala toto ngana heroi lo. Ke pomalam sio at nga ich nei ke elle mana pe poi tunginga ia i sipona lange NeHalang ke eina lele ita nga rera poinga poreke ngana mur lochloch. <sup>27</sup> Pe ita hana pule ta mete ke elle mana pe la tames nga NeHalang matana ke amnei teu atat nge ita elle pe elle nga rera poinga mur. <sup>28</sup> Ke Kristus poi tunginga ia I lange NeHalang ke elle mana, ke eina lome hulua halang nga rera poinga poreke ngana mur. Pe I lape at henai ngana mule nga hoena kura. Pe at mule ngana nem, at ke poi tunginga ia I nga poinga poreke ngana mur ero ol. I at ke mene pengpeng ia iri nemur nenge te kulala tote I ke tela nga maulinga ke koko.

## 10

### *Iesus Poi Tunginga Ia I Ke Elle Mana*

<sup>1</sup> Hotonga nenge Israel mur, i opene mana nga ure urana ngana mur nenge te atat nga hoena kura. I ure toto ngana ero. Pomalam, tunginga nemur nenge te poi mulmule nga hesinga lochloch, nakuria ero nge helemlem ia iri nenge te teke

tela rochroi nge NeHalang. <sup>2</sup> Toinge tunginga nemur te helemlem ia leteria ke te urana nga NeHalang matana nike, lape te poi mule tunginga pele ero ol. <sup>3</sup> Pe nei ero. Iange tunginga nemur, te poia ke helete metentene hehei pe hana nga rera poinga poreke ngana mur nga hesinga lochloch. <sup>4</sup> Iange pulumakau pe meme mur eiria nem, urana ero toto nge lomo hote hehei pe hana rera poinga poreke ngana mur. <sup>5</sup> Ke pomalam, nga etue nenge Kristus at nga ich nei, hele lange NeHalang ke teke,

“Tong lemem taua tunginga e ero toto. Pe o poia Iau ke E lohohot ke Iau non ke singik lo.

<sup>6</sup> Tunginga nemur nenge temak lochloche pe nenge te poia ke helemlem mulmule hehei pe hana nga rera poinga poreke ngana mur, O iech ele ero toto.

<sup>7</sup> Ke pomalam E hele ke E teke, ‘NeHalang, Iau koloi E at lo. E at ke E nanas tau mene lemem ngam

ke pomanga tehas sio ngaria ia nga alalaha ke ulolo.’”

<sup>8</sup> Nga tele ngana Kristus hele ke teke, “Tong lemem taua tunginga e ero toto. Pe tunginga nemur nenge temak lochloche pe nenge helemlem ia iri nga rera poinga poreke ngana mur, o iech ele ero toto.” (Pe hotonga hele ke teke te poia tunginga nemur.)

<sup>9</sup> Ke het pe hele mule ke teke, “NeHalang, Iau koloi E at lo. E at ke E nanas tau mene lemem ngam.” Pomalam NeHalang hile hote tunginga nemur nenga tele ngana ana pe hetaua iri nga tunginga nenge Iesus. <sup>10</sup> Ke Iesus Kristus nanas tau mene NeHalang lemene ngana, pe hile hot mene singina lange NeHalang ke elle mana. Pe nga poinga nem mana, eina lele ita lochloch nga rera poinga poreke ngana mur.

<sup>11</sup> Pe Iuta mur, aria tunginga ana hana mur te popoia aria ume nga etue lochloch. Pe kokoes mana te popoia reria tunginga nemur. Pe tunginga nemur nakuria ero toto nge te lomo hote poinga poreke ngana mur. <sup>12</sup> Pe Iesus poia nena tunginga ke elle mana, pe lomo hote ita nga rera poinga poreke ngana mur lochloch pe hetala ngana ero. Ke het pe la ke are nga NeHalang ilina ele nenga pen tamalmal. <sup>13</sup> Pe nga lamau, are ke kulele mene etue nenge NeHalang hekou sue nena ngarang mur ke apena hekou hitite iri. <sup>14</sup> Ke Iesus nena tunginga elle mana nenge poia nem, hepengpeng tote iri lochloch ngana nenge eina lele iri nga reria poinga poreke ngana mur pe tetu ke nek ke koko.

<sup>15</sup> Pe Opepengpeng pule heleia ure nemur at nge ita ke teke,

<sup>16</sup> “Helenga tomunga hel nenge imem ul ke mo ngata hel ia, tang ke mai koi.

Nga etue nemur nenge te atat nem, lape E tal teua lek hotonga mur nga kakaoria pe Ehas sue iri nga leteria pule”

<sup>17</sup> Pe pule hele ke teke,

“Pe lape letek metene mule reria poinga poreke ngana mur ero ol.”

<sup>18</sup> Ke poinga poreke ngana mur, NeHalang letena metene mule iri ero ol. Pe nenge teke pomam tunginga nemur nenge te makmak ia iri nem aria ume ero ol.

### *Tala Rochroi Toto Nge NeHalang Ol*

<sup>19</sup> Iok titik mur, Iesus mete ke eina lele rera poinga poreke ngana mur ke het lo. Ke pomalam ta matau ero ol. Ta lohaka pe tateu lange NeHalang nga na pele letena nenge heo ngana toto. <sup>20</sup> Iange Iesus elue rera kue matana heueu ngana e lo, nenge ta i teu ia nga huunga palaungana nem

ke tala nge NeHalang. Pe kue heueu ngana nem, ngana laka nenge tung heke I sipona ke mete pe maul haka mule ke mene mule ita lochloch. <sup>21</sup> Ke heueu nei, ita ara Tunginga ana Non Soke e umume nga NeHalang na pele ol. <sup>22</sup> Pe poia tunginga nga I sipona eina. Pe eina nem lele hite ita pe lomo hote rera poinga poreke ngana mur lochloch ke het lo. Pe singira nei lemlem toto ke pomanga te lome ita nga ech e nge lemlem toto. Ke pomalam letera nachnai ero pe tai ia letera manmanna ngana, ke tala rochroi toto nge NeHalang. <sup>23</sup> Pe ta rahite sara kikina ngana nenge taii ia nei ke kerkereng pe ta ruka mule ero. Iange ure lochloch ngana nenge NeHalang hele ke teke poia, manmanna toto ke lape poia. <sup>24</sup> Pe ita elle pe elle mutera tautaua pekngara mur, pe ta ech ia iri ke te nanasia poinga nge urana. <sup>25</sup> Poinga nenge ta eukirauro, ta rahite ke kerkereng iange hana hel te hile hote poinga nem lo. Pe ita, ta poi ke mange iri ero iange Non Soke ana etue koi heroi lo.

### *Tatal Sue NeHalang Tuna Ero*

<sup>26</sup> A longo ke nek, helenga manmanna toto ngana ta mene ke het lo. Pe nenge teke tala mulmule ke ta popoi poinga poreke ngana mur kura, lape tunginga e ero ol nge lomo hote rera poinga poreke ngana mur. <sup>27</sup> Nenge teke tunginga nei ero, lape mataunga palaungana mene ita. Iange NeHalang lape nau teu at nge ita elle pe elle. Ke het pe iri nenge te heto ngarang ia NeHalang, lape oan ngau lala hite iri. <sup>28</sup> Nenge teke hana nai ma mol te hottaua none nge longo taua hotonga nenge Moses ero, lape leteria poreke ia i ero pe te hune i ke mete sapele. <sup>29</sup> Pe pomere toto nge mele nenge heit kou hule Iesus nga apena? NeHalang tuna eina lome i lo. Pe i poi sus mule ia NeHalang Tuna eina ke manga ute pele mana.

**10:13:** Psa 110:1 **10:16:** Jer 31:33; Hip 8:10  
Mat 27:51 **10:22:** Lev 8:30; Ezk 36:25; Epe 5:26  
Isa 26:11 **10:28:** Deu 17:6; 19:15 **10:29:** Mat 12:30-32;

**10:17:** Jer 31:34 **10:19:** Hip 4:16 **10:20:**  
**10:25:** Hip 3:13 **10:26:** Hip 6:4-8 **10:27:**



Ol pe pomere nge i ol? Pe Opepeng-peng letena ia i ke halang lo. Iok, hele poreke mule Opepengpeng. Ol pe utar lape lohote nge i ol? <sup>30</sup> Ita ta eteia lo, nge NeHalang hele ke pomai, “Nem, Iau lek ke e tuachol ia.” Pe NeHalang hele ke mai pule, “Non Soke lape nau teu la ke nek toto nge nena hana mur elle pe elle.” <sup>31</sup> NeHalang tu ke kokoes pe ta matau toto nga nenge teke hotaua ita nga rera poinga poreke ngana mur.

### *A Mes Ke Kerkereng Nga Letemo Manmanna Ngana*

<sup>32</sup> Iok, letemo metene ure nenge lohote nge imo nge nike, nga nenge a longe helenga urana toto ngana pe letemo manmanna ia. Nga etue nemur, a amneia melmelenga halang pe a rahite letemo manmanna ngana ke kerkereng toto. <sup>33</sup> Nga etue hel, te song lele hule imo pe te poi poreke imo. Pe nga etue hel, a teke a koko teu luluch nge iri nemur, nenge hana hel te poia iri ke pomam pule. <sup>34</sup> Pe imo a koko teu luluch nge iri nemur nenge tetu nga tuele au ngana, pe a iech mana nga etue nenge te ua toto ia lemo ure mur, iange a eteia ke lape a mene ute e nge urana toto kura, nge lape tu ke mala. <sup>35</sup> Ke pomalam letemo meena ero pe a mes ke kerkereng mana iange lape a mene urumo palaungana nga hoena kura. <sup>36</sup> Atu ke nek mana pe ames ke kerkereng pe a nanas mene NeHalang lemene ngana. Pomalam lape a mene ure urana ngana mur nenge NeHalang heleia lo ke teke tunge lange imo. <sup>37</sup> Iange NeHalang na helenga mur nenge tehas sue ke ulolo, hele ke teke,

“Etue sase ero ol pe i nenge atat nem lape at sapele pe poi hulul ero.

<sup>38</sup> Pe lek hana mur nenge te pengpeng mana, lape leteria manmanna pe tetu ke te maulul.

Pe nenge teke elle nge iri ruka ke la mule,

lape e iech nge i ero ol.”

<sup>39</sup> Iok, iri nenge te ruka mule nem, NeHalang heporeke hule iri ke te het toto. Pe ita tatu teu luluch nge iri ero. Iange ita letera manmanna pe lape ta mene sapele maulinga ke koko.

## 11

### *Letera Manmanna Ngana*

<sup>1</sup> Letera manmanna ngana ume ngana pomai: Ta teke taes tote ure urana ngana mur nenge lape lohote nge he kura. Ke letera manmanna pe ta kulala mana ol. <sup>2</sup> Pe ratete mur nge nike, NeHalang iech toto nge iri, iange leteria manmanna ngana pomai mana.

<sup>3</sup> Nga letera manmanna ngana, ta eteia ke NeHalang ala hote tapa pe ich. Pe i ume hote ure nemur nga ute e nge ta naue ero, hele mana pe ure nemur te lohote. Ure nenge ta esia nga matara heueu nei, ta teke ma NeHalang ume hote nga ute e nge ta esia nga matara, pe i ero.

<sup>4</sup> Pe nga Apel letena manmanna ngana, poia nena tunginga nge urana toto lange NeHalang. Pe Kaen ero. Pe NeHalang mene Apel nena tunginga mur iange Apel letena manmanna nge I. Ke pomalam NeHalang hetue Apel ke non nge pengpeng toto. Pe Apel mete ke ulolo pe nga letena manmanna ngana, hele atat nge ita kura.

<sup>5</sup> Pe nga Enok letena manmanna ngana, metenga mene i ero. Pe mele hottaua i ero ol iange NeHalang mene toto mene i ke lalo. NeHalang na helenga nemur nenge tehas sue ke ulolo, hele ke teke: Enok letena manmanna toto pe poia NeHalang ke iech toto nga nena poinga mur. Pomalam NeHalang ua toto ia i ke la. <sup>6</sup> Nenge teke letem manmanna nge NeHalang ero, lape o poia NeHalang ke iech ke mere? Iange mele nenge teke at nge



NeHalang, letena manmanna tala ke NeHalang I non nge tu ke kokoes. Pe pule letena manmanna ke NeHalang I non nge poi ke nek toto lala nge iri nenge muteria toto ke te lala nge I.

<sup>7</sup> Iok, nga Noah letena manmanna ngana, longo taua NeHalang na helenga nga ure nemur nenge kolkolia iri pe lape lohot nga hoena kura. Pomalam longo taua NeHalang ke ume ia imot palaungana e pe i pe nehei pe tutuna mur tetu ke te maulul. Ke nga poinga nenge longo tau mene NeHalang, teke heneue hehei pe hana nenge te poreke nga NeHalang matana. Ke nga Noah letena manmanna toto ngana nem, NeHalang hetue i ke non nge pengpeng.

<sup>8</sup> Iok, nga Apraham letena manmanna ngana, longe NeHalang na iunga pe hilesue na kileng pe nanas pulut mene ke langa kileng e nenge NeHalang teke tunge lange i. <sup>9</sup> Ana non lohot nga kileng nem nenge NeHalang hele ke kerkereng ke teke tunge lange i. Rahite letena manmanna ngana pe lele na pelpele mur nga kileng neu pe tu ke pomanga none nge at nga kileng tau ngana. Pe Isak pe Iakop pule. Iange NeHalang heleia helenga elle mana lange iri. <sup>10</sup> Apraham poi ke pomam iange kulala mana nge teke esia kileng nenge mes haka nga huna nenge NeHalang i sipona letena tuanin hote pe lung heke.

<sup>11</sup> Pe pule nga Apraham letena manmanna ngana, lohot ke i Isak temene. Iange i tuauna toto lo pe nehei Sara pule mes tamane mana. Apraham letena manmanna nge NeHalang nge rahite na helenga nem pe pallaklaka ia ero. <sup>12</sup> Ke non elle mana nei, tuauna ke teke metmete lo. Ol pe na tete mur te lohot ke iri hulua toto mule ke pomanga itoch mur nga tapa sana pe iri halang toto ke pomanga

peipei nga ruach ilina.

<sup>13</sup> Ke hana nemur, leteria manmanna nga NeHalang na helenga pe te mete pe te mene ure nemur ero. Pe ure nemur, iri te naue ke sase toto lalo pe te esia ure nemur nge lape te lohot pe te iech ele tote. Te hele pengpeng lange hehei pe hana ke te teke, “Imem lemeng kileng unne nga ich nei ero toto.” <sup>14</sup> Pe nenge teke ta longe mele hel nge te hele ke mau, ta etei mellehe mene ke iri te kulele kileng e nge lape te hetue ke iri siporia reria kileng. <sup>15</sup> Pe nenge teke leteria tu hit menmene reria kileng nenge te hile sue, lape tela mule lo. <sup>16</sup> Pe nei ero. Iri te teke tela toto nga kileng e nge urana, nge tu nga lut nga tapa. Pomalam alngaria hot lange NeHalang ke te teke aria Non Soke I. Pe NeHalang iech toto nge te hetue I ke pomau iange I sipona ume hote kileng e ke tu lo. Pe iri nemur nenge leteria manmanna nge I lape tela ke tetu ia.

<sup>17-18</sup> Pe NeHalang hele lange Apraham lo ke teke, “Nge tum Isak mana lape e poia lem tete mur, ke te lohot ke iri halang toto.” Iok, nga etue nenge NeHalang ollaka hote Apraham letena manmanna ngana, Apraham teke hun mule tuna Isak ke poi tunginga mule ia lange NeHalang. Ke poinga nem, Apraham poia nga letena manmanna ngana, <sup>19</sup> iange Apraham eteia lo ke teke: Nenge teke hune tuna Isak ke mete, lape NeHalang I sipona hemaui heke mule. Ke nga poinga nem, Apraham mene mule tuna nga metenga lo.

<sup>20</sup> Iok, nga Isak letena manmanna ngana, pete Iakop iri nai Iso pe ure nemur nenge lape NeHalang poia lange iri nge he kura.

<sup>21</sup> Iok, nga Iakop letena manmanna ngana, pete Iosep tutuna mur nga etue nenge teke metmete lo. Pe rahit

**11:7:** Gen 6:13–7:1    **11:8:** Gen 12:1-5    **11:9:** Gen 35:12    **11:11:** Gen 18:11-14; 21:2; Rom 4:19

**11:12:** Gen 15:5; 22:17    **11:13:** Gen 23:4; 1Ch 29:15; Psa 39:12; 1Pi 2:11    **11:17-18:** Gen 21:12;

22:1-14    **11:19:** Rom 4:17    **11:20:** Gen 27:27-29, 39-40    **11:21:** Gen 47:31–48:20    **11:22:** Gen

50:24-25; Exo 13:19

ala tuana nga nena kula pe heto heke NeHalang.

<sup>22</sup> Pe nga Iosep letena manmanna ngana, hele hote Israel mur te lohaka ngaria nge Ekipto, nga etue nenge teke metmete lo. Pe pule hele urume koluna nge lape te poia ke mere.

<sup>23</sup> Iok, nga Moses tana pe temene leteria manmanna ngana, te talkome i ke teio iri mol nga etue nenge te hoe i. Iange iri te esia Moses nge nakuna urana toto. Pomalam te longo taua non soke nenge Ekipto na helenga ero pe te talkome Moses. Te poia poinga neu pe te matau ero pule.

<sup>24</sup> Pe nga Moses letena manmanna ngana, i soke toto lo pe lemene ero nge te hetue i ke tana ne Parao tuna heingana. <sup>25</sup> Pe lemene ero nge singina iech mana ia poinga poreke ngana mur. Iange iechinga nenga poinga poreke ngana nem tu ke mala ero. Pe i teke urana nge la ke tu luluch nge NeHalang nena hana mur, ke amneia melmelenga pule. <sup>26</sup> Pe Moses eteia ke kue nenge ta nana-sia Kristus, ana melmelenga halang, pe uruna lohote nge he kura. Pe i teke melmelenga nem, i ure palaungana toto nga umtutuna pe ure urana ngana mur nge Ekipto.

<sup>27</sup> Iok, Moses letena manmanna toto nge NeHalang. Pomalam lohaka pe ua nga kileng nenge Ekipto. Pe naungaala ana non nenge Ekipto letena inin taua Moses pe Moses mataua i ero. Ita ta kolkolia NeHalang nga matara. Pe Moses letena kerkereng toto pe poia poinga neu ke manga esia NeHalang nga matana lo. <sup>28</sup> Pe nga Moses letena manmanna ngana, hune sipsip ke Israel mur te ngaua, nga etue palaungana nenga Ingatoto. Pe hele lange iri ke te hepore sipsip eina nga reria pele matana nga piunga mur. Pomalam NeHalang nena angkelo nenge hunun, sio at pe hune aina kinkino ngana tatamanna tengene ana mur nge Israel ero.

<sup>29</sup> Iok, Israel mur leteria manmanna toto nge NeHalang, pomalam te i tele nga Ruach Remenmen ngana ke pomanga teii nga kileng hal ngana. Pe Ekipto mur te teke te nanas pe Ruach nem salala hite iri ke te mete.

<sup>30</sup> Pe pule Israel mur leteria manmanna toto nge NeHalang, pe te rahite leteria manmanna ngana nem ke pomanga reria kaleu. Pe tei ke te heliliu hitite kileng nenge Ieriko ke etue iri rahtele nai. Ol pe kileng neu ana mapuo nenge te lung heke nga um, toto marang sio ke het.

<sup>31</sup> Pe hei e nge ene Rahap, I salaunga kina ia. Hei nem letena manmanna toto nge NeHalang. Pomalam halaua hana Israel nai nenge te ute kileng nenge Ieriko ana olounga. Ke letena manmanna ngana nem, halaua i ke mete nga etue nem ero. Iri mana nenge lemeria ero nge te nanasia NeHalang, te mete lochloch.

<sup>32</sup> Ke lape ta nana lala kura kai? Nananga halang tu kura, pe lape e nana sakilil langa hana nemur ero ol. Nge Kition pe Parak pe Samson pe Septa pe Teuit pe Samuel pe Hetatalonga mur. <sup>33</sup> Iri, nga leteria manmanna ngana mur, te hunel luluch nge kileng nemur nga tau, pe te hekou susue iri. Pe tenau ele reria kileng mur, nga poinga nge peng-peng mana, pe te mene ure nemur nenge NeHalang heleia, ke teke tunge lange iri. Tera elele huros papalauna nenge te hunun haria. <sup>34</sup> Pe te hemetmete oan papalauna, pe te elelele io ana. Nga tele ngana, kikiria ero mukam. Pe nei ol, kikiria ngana halang, pe te lohote ke iri huneling hel ana non mur, nge reria kerkerenga palaungana toto. Kileng nga tau ana paling hel ana hana mur teat pe hana nemur, te hekou sue iri pe te lope parai ia iri. <sup>35</sup> Pe hehei hel, nga leteria manmanna ngana, aloria

mur te maul haka mule nga metenga. Pe iri nenge te amneia melmelenga palaungana, te chumele mene ol. Iange hana hel te laua iri ke te teke te helosio ia leteria manmanna ngana mur. Pe iri lemeria ero nge te saua leteria manmanna ngana. Pomalam te takis mene melmelenga nem ke te mete, pe te maul haka mule ngaria lape tetu ngaria urana toto ol nga nenga tele ngana.

<sup>36</sup> Pe hana nemur hel te hele poreke iri pe tenos hule iri. Pe hel te laua iri pe te kale hite peria pe tesau teua iri langa tuele au ngana. <sup>37</sup> Pe hel te tamal hune iri, pe hel te chatoa iri nga luaria, pe hel te hune iri nga kakop. Hel te heron menmene meme mur uliria, nem pe sipsip uliria pe te poi poreke tote iri. Pomalam tetu pulut mana pe reria ute e ero ol. <sup>38</sup> Tei rara mana nga ich sana lomona pe nga sasana mur. Pe tetu manmana nga rika mur pe nga polo mur. Iri te urana toto nga NeHalang matana pe hehei pe hana nga ich nei te purpure iri ero toto.

<sup>39</sup> Pe hana nemur leteria manmanna nge NeHalang. Pe NeHalang heto heke tote iri pe tatalo ele ita lochloch rera ure e nge urana toto. Pe ure urana ngana nenge NeHalang heleia ke teke tunge nem, elle nge iri mene ero kura. <sup>40</sup> Iange nga NeHalang letena, teke iri nemur iri muka nge ita ero. NeHalang lemene ke teke poia iri pe ita ke ta pengpeng toto nga etue elle mana.

## 12

### *NeHalang Hetore Tutuna Mur Ita*

<sup>1</sup> Iok laol, hehei pe hana nemur nenge nike nem, leteria manmanna toto nge NeHalang. Pe ngaria koloi teat ke te eukirau ke te teke tenau ita nge ta song. Pomalam ta lohaka ol pe ta song. Pe ta sausue ure nemur nenge te meena pe ra poinga poreke ngana mur nenge tak elele ita. Pe ta rahite letera manmanna

ngana pe ta song ke ta ristoto hel, ke la het nga songinga nei hetala ngana. <sup>2</sup> Pe matara tu mana nge Iesus iange letera manmanna ngana huna mana nge i. Pe nga hoena, lape ta esia letera manmanna ngana nem nganngana nge lohot. Iange Iesus amneia melmelenga palaungana pe sau sio mule ero. Pe pule meia I ero nge te heon heke I nga manga toto ke mete. Iange naula pe esia iechinga palaungana nge kulele I lo. Ke heueu nei are nga NeHalang nena arenga palaungana ilina ele nenga pen tamalmal.

<sup>3</sup> Iok, anau lange Iesus nga kue nenge i ia neu. I amneia ure meena ngana mur halang nge hana porekreke ngana mur te poia lange I. Pomalam imo lemo melel tana pe aole sio ero. <sup>4</sup> Iange imo a palhel luluch nga poinga poreke ngana nga kikimo ngamo ero kura. E teke apal hel ke a makuk toto. <sup>5</sup> Imo letemo lilil ele NeHalang na helenga nenge hele ke teke tutuna mur imo:

“Tutuk mur, nenge teke Non Soke poia ute ke lohot nge imo ke teke hepeng ia imo, poinga nem urana, pe letemo meena ia ero.

<sup>6</sup> Iange Non Soke teke hetore iri nemur nenge lemene taua iri. Ke I teke lape nosia tutuna mur ke hetore iri.”

<sup>7</sup> NeHalang teke hetore tutuna mur ita, pe nenge teke nos ia ita, tatal chusinga ia ero. Ta tatakis mene ure meena ngana mur nenge lohottot nge ita. Pe hana lochloch ngana te hetottore tuturia mur ke pomau pule. <sup>8</sup> Pe nenge teke te nosia imo ero, nakuna nenge tetememo mur ero. Iange hulua lochloch te mene hengetoro pe tetemeria mur te nosnos ia iri. <sup>9</sup> Pe ita lochloch tetemera mur iri non. Pe iri te hetottore ita pe ita tatal sue ita pe ta longo taua taua iri. Pomalam mana tatal sue ita pe ta longo taua temere NeHalang.

Iange I nauele opere mur lochloch ke ta mene maulinga ke koko. <sup>10</sup> Pe tetemere mur nga ich nei, te teke te hepeng ia ita nga rera poinga mur nga etue choro ngana mana. Pe NeHalang hepeng ia ita ke ta lohot ke ta pengpeng toto ke pomange I. <sup>11</sup> Nga etue nenge Temere NeHalang nosia ita, ta amneia melmelenga pe ta iech ero. Pe iri nemur nenge te mene hengetoro nge tetemeria mur, henge-toro nem nganangana, lape lohot ke urana toto nge iri nga hoena. Nenge poia iri ke tetu ke nek pe te pengpeng toto.

*Anau Ala Amo Ke Nek Nga Poinga Poreke Ngana Mur*

<sup>12</sup> Iok, a hekerkereng mule perimo metmete ngana nemur pe apemo makuk leilei ngana nemur. <sup>13</sup> Pe ai ke a nanas mene kue nge pengpeng mana ke ala. Pomalam lape pekngamo nemur te esia imo pe te lohaka ke te urana pule.

<sup>14</sup> Pe nenge teke ai ke nek ero, lape a esia NeHalang nakuna ero toto. Pomalam a totoi toto ke atu ke nek luluch nge hehei pe hana, pe ai ke a pengpeng toto. <sup>15</sup> NeHalang letena ia ita ke mene mule ita lo. Pe ta nauala hel nge ita ke nek, iange lape poinga poreke ngana e, matana hot nge mele pe haka ke au hite ita lochloch. <sup>16</sup> Pe a nauala ke nek pule iange lape mele hel te iskeke hot ke te tangtango hehei pe hehei te tangtango hana. Pe poinga nem, iri te tango rere iechinga nenga etue choro ngana ana mana. Pe leteria metene tetu ngaria nga hoena ero ke mange Iso. Iso ha tala ke i lape mene temene nena ure mur. Pe ero iange letena tu mana nga ngaunga nenge ngaua, pe iech ele nga etue choro ngana mana. Pe hile hot mene nena petanga nge temene pe temene na ure mur nenge i lape mene iri. <sup>17</sup> Ol pe nga hoena, teke la ke mene petanga nem pe temene na ure mur.

Pe ero ol. Ana non tang toto ke teke mene pe ero toto, iange kue e ero ol nge hul mule poinga nenge poia neu.

<sup>18</sup> Iok, imo aat nge NeHalang ke pomange lemo tete mur ero. Iri tela nga hengene nge Sinai pe te esia oan sapellala ngana pe kileng chantom ngana nenge au toto, pe te amneia tuttula palaungana pe <sup>19</sup> te longe ngalum paena nge alnganngana pe te longe NeHalang nge helele. Te longe ke mau pe te hele lange Moses ke te teke, lemeria ero toto nge te longo mule helenga e. <sup>20</sup> Pe te matau toto iange te longe NeHalang nge hele ke teke, “Nenge teke none ma huros e i haka nga hengene nei, a tamal hune ke mete.” <sup>21</sup> Pe Moses esia ure nemur pe matau toto pe hele, “Tau pule e matau toto pe e loiloi.”

<sup>22</sup> Pe imo a poi ke mange lemo tete mur ero. Imo aat nga hengene nenge Saion, nga NeHalang nenge maulul nena kileng pengpeng. Kileng Ierusalem nenge tu nga lut nga tapa. Pe angkelo mur nga kileng nem, iri halang nge halang toto. Iri te eukirau pe te iech ke elela. <sup>23</sup> Imo aat ke a lohot pe NeHalang tutuna mur nenge iri tala, te eukirau ke te iechech. Pe iri tehas sue eria mur nga lut nga tapa ke ulolo. Pe imo aat ke a lohot nge NeHalang lo. Pe NeHalang I non nenge amnei teueu nga ita elle pe elle rera poinga mur. Imo aat nge hana nge NeHalang poia iri ke te pengpeng toto operia mur. <sup>24</sup> Imo aat ke a lohot nge Iesus lo. Pe NeHalang poia helenga tomunga hel heueu ngana e, nge nena hana mur. Pe Iesus tu nga tunangana nge NeHalang pe hana mur nga ich. Pe I sipona poia helenga tomunga hel heueu ngana nem ana ume ke lohot ke manmanna. Pe imo aat pengpeng nga Iesus eina nenge lome ita ke ta lemmem toto. Pe Iesus eina nem helengana urana toto nga nenge Apel eina.

**12:11:** Iei 3:17-18    **12:12:** Isa 35:3    **12:13:** Pro 4:26    **12:16:** Gen 25:29-34    **12:17:** Gen 27:30-40    **12:18:** Exo 19:16-20; Deu 4:11-12    **12:19:** Exo 20:18-21; Deu 5:22-27    **12:20:** Exo 19:12-13    **12:21:** Deu 9:19    **12:24:** Gen 4:10; Hip 8:6    **12:25:** Hip 2:1-3; 10:26-29



<sup>25</sup> Iok, heueu nei a longo ke nek toto nga NeHalang na helenga pe a longo ole ero. Iange iri nemur lemehria ero nge te longo taua na helenga nenge tung hote nga ich, pe te ua nga ure meena ngana ero. Pe nenge ita, NeHalang tu nga tapa pe hele atat nge ita heueu nei. Pe nenge teke lemehria ero nge ta longo lange I, ta talkome nga matana ero toto. <sup>26</sup> Nge nike NeHalang hele nga hengene nge Sinai pe ich rur. Pe heueu nei hele ke kerkereng toto ke teke,

“Lape E poi mule kileng ke rur elle mule. Pe nei ol lape E herure ich pe tapa pule.” <sup>27</sup> Helenga nenge NeHalang teke poia kileng ke rur “elle mule,” nem ta etei mellehe mene ke ure lochloch ngana nenge I sipona ume hote iri, lape te het lochoch. Pe I ume hote ure urana ngana mur hel ke tetu. Pe ure nemur te rur ero.

<sup>28</sup> Ke pomalam ta iech pe ta hele urana toto lange NeHalang iange mene teua ita nga nena naualanga pe nekinga. Pe nena naualanga pe nekinga nem, ute nge herure ero toto. Pe ta heto heke I ke pomai: Ta matau ala rera pe ta helete ininia I ero toto ol. <sup>29</sup> Iange ara Soke NeHalang, pomalaka nga oan sapellala ngana nenge milang toto pe ngau ulu hite ure ke het. Pe mele nenge teke longo taua NeHalang ero, alaka ana ke nek toto nge i.

## 13

### *Poinga Nenge Ta Poia NeHalang Ke Iech*

<sup>1</sup> Iok, nga lek helenga hetala ngana, e teke e hele lange imo nga poinga hel nenge poia NeHalang ke iech. Atu pe lememo taua pekngamo mur ke pomanga titimo mur pengpeng. <sup>2</sup> Pe mele hel nenge teat nga kileng tau ngana, a mene teua iri langa lemo pele. Mele hel te poia poinga nei lo pe te mene teua angkelo mur. Pe iri siporia te eteia ero. <sup>3</sup> Pe letemo

metene iri nenge tetu nga tuele au ngana pule. Pe a halaua iri ke pomanga atu teu luluch nge iri nga tuele au ngana. Pe nenge teke mele hel te poi poreke pekngamo mur, ala ke a halaua iri pe a takisia aria melmelenga pule.

<sup>4</sup> Iri nenge telei hel, tenau ele aria leinga ke nek pe tetu ke tenek hel mana ke pomanga reria helenga nenge tetom tele helia nga telei hel ngaria. Pe a poia amo leinga ke lemlem nga NeHalang matana. Iange NeHalang lape nau teu lange imo ke nek toto, nga nenge teke none la ke ma luluch nge heie nenge nehei ia ero pe heie la ke ma luluch nge none nge ene ia ero.

<sup>5</sup> A memelei ia poinga nenge a teke lemo umtutuna halang ero. Lemo ure nemur nenge tu nge imo nem lo, het lo la. Iange NeHalang I sipona hele ke teke,  
“Lape E ua amo ero toto.

Pe lape E nau sio mene imo ero pule.”

<sup>6</sup> Ke pomalam ta hele nga letera manmanna ngana ke ta teke,  
“Non Soke i toro mana halaulaua iau. Pomalam e matau ero ol. Pe mele pele nakuna ero toto nge poia ute pele at nge iau.”

<sup>7</sup> Pe pule letemo metene amo soksoke ngana mur. Iange iri te hele hot tele NeHalang nena helenga lange imo. Pe letemo metene leteria manmanna ngana nenge te nanasia Iesus nga tetu ngaria, ke la het nga etue nenge te mete ia. I urana toto nge a nanasia poinga nenge hana nemur te poia nem. <sup>8</sup> Iange Iesus Kristus tu ke pomai mana nge nike toto, ke at heueu nei pe nga etue lochloch ngana nemur nga hoena pule.

<sup>9</sup> Ke pomalam a longo tau pulute hana hel reria helenga ero. Iange lape te channanga ole mene imo, pe la te hile sio mene imo pe a poi koukou rara mana ol. Ita letera metene NeHalang letena poreke



ngana nge ita ke nek. Pomalam lape hekerkereng ia ita ke tames ke kerkereng. Pe a nanasia hotonga kinkino ngana nemur nga ngaunga ero. Iri nenge te nanasia hotonga nemur, hotonga nem halaua iri ero toto. <sup>10</sup> Ita ara hatanga e tu. Pe tunginga ana hana mur nenge Israel nem, te ngaua ngaunga e nga ara hatanga nem ero toto.

<sup>11</sup> Tunginga ana hana mur aria soke e menmene sipsip pe pulumakau eiria ke te lalaia nga NeHalang na pele letena nenge heo ngana toto. Pe nga lamau te poi tunginga ia lange NeHalang ke te teke te helemlem ia poinga poreke ngana mur. Pe huros nemur singiria temak heke iri nga oan, nga pele neu ana aeteme nge hot. <sup>12</sup> Pe poinga nem te poia lange Iesus pule. Ke te mene hote Iesus nga kileng nenge Ierusalem ke lange hot pe te hune i ke mete. Pe eina lele ke lome ita lochloch nga rera poinga poreke ngana mur. Ke tatu ke ta lemlem toto nga NeHalang matana. <sup>13</sup> Ke pomalam, ita pule ta nanas hote Iesus lange hot. Nga kileng unne nenge tenau sio mene I pe takisia ana melmelenga ke la mete sio mana. Ke ita, tahot la ke ta amneia ure meena ngana nemur pule. <sup>14</sup> Iange ra kileng e nga ich nei ero nge lape tatu ia ke kokoes mana ol. Pe ra kileng nem, ta tango rerere pe ngana kou atat kura.

<sup>15</sup> Ke pomalam ta heto heke tote NeHalang nga Iesus ene. Pe poinga nem ta rahite ke pomanga rera tungina nenge lala nge NeHalang. Pe kokoes mana harra heto hekeke NeHalang ene. <sup>16</sup> Pe letemo metene ke apoi ke urana lange nei ngamo mur. Nenge teke mele na ute ero, a halaua i ke a tung nena. Pe a rahite poinga nei ke kerkereng. Iange poinga nei, pomanga lemo tunginga nenge lange NeHalang. Pe NeHalang iech toto ia.

<sup>17</sup> Pe ute pule, a longo taua mele hel

nenge iri mukmuka nge imo. Utar nenge te hele ke te teke a poia, atal sio mene imo pe a longo tau mana ke a poia. Iri, te kila pe teta eingaria ke nek ero, pe kokoes te ume ke kerkereng toto ke tenau ele opemo mur. Iange iri lape te henin hote aria ume nem lange NeHalang kura. Pe nenge teke a longo taua iri ke nek, lape te iech mana nge te poia aria ume nem. Pe imo lape a iech pule.

<sup>18</sup> Pe e teke e hele lange imo ke a hetalau emem lange NeHalang pule. Imem mo teke moi ke mo nanas mene poinga nge pengpeng ke kokoes. Pomalam, nga letemem nge teu, mo amneia ute pele nge poreke ero. <sup>19</sup> Pe e teke a hetalaulau ak ke kerkereng toto lange NeHalang ke ela mule nge imo ke ueiuei mana.

<sup>20-21</sup> Iok, e hetalaulau amo mukam: NeHalang nenge poia letemo ke ma ke nek, tung lochloche ure urana ngana mur lange imo ke a poia i sipona lemene ngana. I sipona hemaui mule Non Soke Iesus nga metenga. Pe henonou hote I ke I Non Soke pe nauele mule NeHalang nena hana mur lochloch. Ke pomanga non nenge nauelele nena sipsip mur. NeHalang hemaui mule Iesus iange eina hekerkereng ia helenga tomunga hel heueu ngana nem. Pe helenga tomunga hel nem, lape tu ke koko mana ol. Pe pule, e hetalaulau ara ke e teke NeHalang ume teu nge ita ke poia lemene ngana nga letera. Ure nem lohot mana nga kerkerenga nenge Iesus Kristus! Pomalam ta heto heke tote ene nga etue lochloch sapele. Manmanna!

### *Helenga Hetala Ngana Mur*

<sup>22</sup> Iok titik mur, lek helenga hetet lo pe e teke asis pe a longo ke nek toto, nga helenga nenge hekerkereng mule imo ke a nanas mene kue nenge pengpeng. Pe alalaha nenge ehas ia nei choro mana.

<sup>23</sup> Pe pule e teke e hele tote tira Timoti lange imo. Timoti kou te lohe hote i nga tuele au ngana lo. Pe nenge teke at ke ueiuei, lape imem nai ape mola mule ke monau mule imo.

<sup>24</sup> Pe a heleia lememe iechinga palaungana lange amo papalauna mur, pe nge NeHalang nena hana mur lochloch. Pe titira nemur nge Itali te hekule reria iechinga palaungana lange imo pule.

<sup>25</sup> Lape NeHalang nauele imo ke nek, pe poi ke nek toto lange imo ke kokoes.

## Ieims Alalaha Nenge Ieims Hasia

### *Ieims Hekule Na Iechinga Palaungana*

<sup>1</sup> Iau Ieims koi nenge ehas ia alalaha nei. NeHalang pe Non Soke Iesus Kristus reia non iau. Pe ehas ia alalaha nei ke lange mata analoch pe nai nenge Israel nenge te ua parai ke tetu nga kileng lochloch ngana nga ich. Pe lek iechinga palaungana lange imo lochloch.

### *Lete Manmanna Ngana Pe Lete Matana Ngana*

<sup>2</sup> Iok titik mur, nenge teke ure meena ngana halang te lohote nge imo, letemo meena ia ero. A iech mana. <sup>3</sup> Iange ure nemur nenge te lohote nge imo nem te teke te helosio ia letemo manmanna ngana. Pe lape here imo ke nek ke a nanasia poinga nge urana. <sup>4</sup> Pe poinga urana ngana nem, lape puo ke kerkereng toto nga letemo pe a henonoua lange hehei pe hana nga amo ume mur nenge a popoia nga etue lochloch. Pomalam lape a pengpeng toto nga NeHalang matana pe lape ute pele nge imo ero ol. Pe ure lochloch ngana nenge letemo tautaua iri lape mataria purpur ke elle. <sup>5</sup> Pe nenge teke amo hel te etei teu ke nek nga ure nemur ero, a onteia NeHalang. Pe i lape halaua imo nga a etei ngamo nem. Iange i nge lemene toto ke halau tote ita ke ta etei teu nga ure mur nenge ta etei ia ero. <sup>6</sup> Pe nenge teke a onteia NeHalang, letemo manmanna pe letemo nachnai ero. Iange mele nenge letena nachnai, letena manmanna ngana sio hel haka ke pomanga ruach ana mee. <sup>7</sup> Pe mele nenge poi ke pomam eteia ke lape Non Soke tunge ute pele lange i ero

toto. <sup>8</sup> Iange i non nenge letena nachnai nga ure lochloch.

### *Iri Nenge Reria Ure Halang Ero Pe Iri Nenge Reria Ure Halang*

<sup>9</sup> Pe tira e nenge nena ute e ero, iech toto iange NeHalang tal haka tote i ke het lo. <sup>10</sup> Pe iri nenge reria ure halang toto te iech pule iange NeHalang tal sio tote iri ke het lo. Lape te mete sio mana ke pomanga heilil rorana nenge ulala hot <sup>11</sup> pe chaia milang ngana makia ke mous pe kalum ke mete. Pe nakuna urana ngana nem ero ol, iange losio hot pe lasus sapele. Ke iri nemur nenge reria ure halang lape te poi ke pomalam mana nga etue nemur nenge tetu ke tenau elele iri siporia aria ume mur.

### *Ollakanga Poreke Ngana Mur Teat Nge NeHalang Ero*

<sup>12</sup> Iok, mele nenge ure poreke ngana teke takue i pe mes ke kerkereng pe losio ero, iech toto iange lape mene maulinga ke koko ke pomanga uruna. Maulinga ke koko nem, NeHalang i sipona hele ke teke tunge lange iri nemur nenge muteria tau tote i. <sup>13</sup> Iok, nenge teke ure poreke ngana takue mele ke poia poinga poreke ngana e, heo ngana toto nge mele nem hele ke teke, "NeHalang koi nenge poia ure poreke ngana nei ke lohote nge iau." Nem ero. Iange ure poreke ngana e takue NeHalang ero toto. Pe NeHalang helosio ia mele e nga poinga poreke ngana ero. <sup>14</sup> Ollakanga poreke ngana nemur te lohote iange ita sipora letera tu hit mene ure nemur nga ich nei pe lemere tau tote ure nemur. Pe lemere tau toto ngara nem takue ita <sup>15</sup> ke ta losio nga poinga poreke ngana mur. Iok, poinga poreke ngana nemur te puo ke kerkereng toto nga letera pe te tunge metenga at nge ita.

<sup>16</sup> Atong mur! Iau titik mur imo pe anau ala amo ke nek toto koi nga ure nemur. <sup>17</sup> Iange poinga urana ngana

**1:1:** Mat 13:55; Ume 15:13; Kal 1:19; 1Pi 1:1

**1:2:** Rom 5:3-5

**1:3:** 1Pi 1:7

**1:5:** Pro 2:3-6

**1:10:** Isa 40:6-7

mur pe tunginga urana ngana mur mana sio at nge NeHalang i sipona. I nge poi hote lemenga mur lochloch nga tapa sana. Pe iri, tua leme ngaria hul rarara, pe NeHalang ero. <sup>18</sup> Nga i sipona lemene ngana, hemaulia ita nga nena helenga nenge manmanna. Pomalam ita ta lohote ke i sipona tutuna mur nenge tengene ana. Pe letena ia ita ke palaungana toto nga ure lochloch nenge ala hote iri.

### *Ta Longotau Pe Ta Poia Ume*

<sup>19</sup> Titik mur letemo lilil ele nei ero toto. E teke urana toto nge a longo ke nek toto pe a hele ke nek mana pe letemo inin ke ueiuei ero. <sup>20</sup> Iange lape letemo inin ngana poia lemo arenga ke poreke. Pe NeHalang lemene ke teke a are ke nek pe a pengpeng nga NeHalang matana. <sup>21</sup> Ke pomalam a hile hote lemo poinga poreke ngana mur nenge a popoia ke te lasus toto. Pe atal sue imo pe a mene NeHalang nena hengetoro nenge tue nga letemo lo. Pe hengeroro nem lape haka pe hemaulia imo.

<sup>22</sup> Nenge teke a longe NeHalang nena helenga mur pe a nanasia ero, nenge nem a channanga mule imo ke het lo. <sup>23</sup> Mele hel nenge te longe NeHalang nena helenga mur pe te nanasia iri ero, tepoi ke pomalaka nge non nenge nau mulmule i sipona opene nga silonga. <sup>24</sup> Esia opene ke het pe laol. Pe ueiuei mana letena lilil ele mule nakuna nenge esia nga silonga lo. <sup>25</sup> Pe imo anau teu la ke nek toto nga NeHalang nena hotonga mur nenge pengpeng toto pe nenge hemas mule ita ke ta nanasia lemene ngana. Anau teu ke nek pe letemo lilil ele ero toto. Pe a poia ana ume ke pomanga hele ngana. Nenge teke mele nem poi ke mai, lape NeHalang pete tote i nga ume nemur nenge popoia.

<sup>26</sup> Pe nenge teke mele pele lohaka pe hele ke teke i NeHalang nena non toto pe nauele ana hengetau ke nek ero, mele nem channanga mule i ke

het lo. Pe na helenga pa nenge teke i NeHalang nena non toto nem, channanga mana. <sup>27</sup> Temere NeHalang iech toto nge nena hana mur nenge te poia poinga mur nenge urana pe pengpeng mana. Pe poinga nenge pomam nakuna pomai koi: Te halaulaua aina nemur nenge tataria mur pe tetemeria mur te mete lo. Te halaulaua hehei pakarkar una mur pe tenau ele iri ke nek toto nga aria melmelenga mur. Pe pule tetu nga ich nei pe tepuo loko teu pulut teu mene iri langa poinga poreke ngana e ero.

## 2

### *Mutemo Taua Hulua Lochloch.*

<sup>1</sup> Iok titik mur pe liliuk mur, letemo mamanna nge Non Soke Iesus Kristus lo. I toro mana nge palaungana toto pe ta heto heke i. Pomalam atal heke mele hel ke iri papalauna nge mele hel ero. A poia iri lochloch ke elle mana. <sup>2</sup> Hana nai lape teat nge imo ke aole halimo. Nenge na ure halang heronia heroninga urana ngana pe nena si heon nga talngana. Pe nenge na ure halang ero heronia ure muchmuch ngana mur. <sup>3</sup> Imo lape apoi ke urana lange non nenge heron ke nek toto nem pe a hele lange i ke a teke, "Kole, oi at ke o kila lakoi nga arenga nenge urana." Pe lape a hele lange non nenge na hengeron muchmuch nem ke a teke, "Pe iong o mes la ke mau kou, nem pe oat ke o kila sio nga maruchrue nga apek huna." <sup>4</sup> Nga poinga nei, atal heke tote mele hel pe atal sio tote mele hel. Ke nga letemo poreke hulu ngana a teke mele hel mana te urana toto.

<sup>5</sup> Titik mur pe liliuk mur a longo ke nek! NeHalang hesilei hote atong nemur nenge reria ure halang ero nga ich nei ke het lo. Hesilei hote iri ke leteria manmanna toto nge NeHalang pe tetu teu nga NeHalang nena naualanga pe nekinga. Iange iri mu-teria tau tote i. <sup>6</sup> Pe imo apoi ke

nek lange atong mur ero. Imo apoi poreke iri. Pe itei toto nenge heporeke imo? Iri nenge ria ure halang laka nenge te hemes teua imo nga haliunga. <sup>7</sup> Pe imo, Iesus nena hana mur toto imo pe iri nenge reria ure halang nem te hele poreke tote Iesus ene nge pengpeng pe urana toto.

<sup>8</sup> Nga NeHalang nena helenga nenge tehas sue ke ulolo, hotonga palaungana e hele ke teke, “Mutemo taua pekngamo mur ke pomanga lememo tau mule imo sipomo.” Urana toto nge a nanasia hotonga nei hele ngana. <sup>9</sup> Pe nenge teke a urana mana nge mele hel pe apoi poreke hel, nem a poia poinga poreke ngana pe a longo hole taua NeHalang nena hotonga ke het lo. <sup>10</sup> Mele nenge longo hole taua hotonga chonna unne, longo hole taua hotonga mur lochloch ke het lo. <sup>11</sup> Iange NeHalang hele ke teke, “O salau lange none nehei ero.” Pe pule, “O hune mele ero.” Iok, nenge teke o salau lange none nehei ero pe o hune mele, nem o longo hole taua NeHalang nena hotonga lochloch ke het lo. <sup>12</sup> Letemo metene ke nek! Nga ure lochloch ngana nenge a heleleia pe a popoia, a nanasia poinga nenge NeHalang poia lange imo lo. Nenge letena ia imo pe mene mule imo nga lemo poinga poreke ngana mur. <sup>13</sup> Iange mele nenge letena ia hehei pe hana ero, NeHalang lape letena ia i ero pule nga etue nenge ta mes nga NeHalang matana ke nau teu at nge ita elle pe elle. Pe mele nenge letena ia mele hel ke kokoes lape sana loiloi nga etue nem ero.

### *A Henonou Hote Letemo Manmanna Ngana Nga Ume Mur Nenge A Popoia.*

<sup>14</sup> Titik mur, nenge teke none hele ke teke letena manmanna toto pe

poia ume urana ngana e nge halaua mele ero, non nem letena manmanna ngana nem luna ero toto. Pe pule, letena manmanna ngana nem lape halaua i ero toto. <sup>15</sup> Iok, tira e ma liura e nena hengeron ero pe ana ngaunga ero. <sup>16</sup> Pe amo e nge imo lohaka pe hele lange i ke teke, “Non Palaungana pete iong pe otu ke nek pe o uri ero.” O hele lange i ke mau ia? O tungtung ana ngaunga pe na hengeron mur pule? Lem helenga nem luna ero toto. <sup>17</sup> Ke a naue lo? Imo letemo manmanna nge NeHalang. Pe letemo manmanna ngana nem luna ero toto pe lape mete sio mana ke lasus. Iange a henonou hote letemo manmanna ngana nem nga ume urana ngana e ero nenge a halaua mele.

<sup>18</sup> Iok, mele lape lohaka pe hele ke teke, “Ia potar? None letena manmanna mana pe none pule poi menmene ume urana ngana mur. Pa nem, ute pele ero.” Iok, iau lape e tuachol ia mele nem na helenga ke pomai koi, “Nenge teke none nem letena manmanna mana pe poia ume urana ngana e ero, lape henonou letena manmanna ngana at nge iau ke mere? Iau lape e henonou hote letek manmanna ngana lange iong nga lek ume mur nenge lape e poia ke e halaua mele hel.” <sup>19</sup> Iong letem manmanna ke o teke NeHalang elle mana. Nem urana! Pe uneinei mur pule leteria manmanna ngana elle mana ke pomange iong. Pomalam te matau pe te loiloi toto.

<sup>20</sup> Iong nge lape am hauaua iam! Nenge teke o poia letem manmanna ngana nem ana ume unne ero, letem manmanna ngana nem lape mete sio ke lasus mana. <sup>21</sup> O naula nge rette Apraham. Non neu, NeHalang tal heke tote i ke i non nge pengpeng nga matana iange teke hune tuna Isak ke poi nena tunginga ia lange NeHalang. <sup>22</sup> A naue lo? Apraham

**2:8:** Mat 19:19; Kal 5:14    **2:9:** Deu 1:17    **2:10:** Lev 19:37; Num 20:7-12, 24; Mat 5:19    **2:11:** Exo 20:13-14; Rom 13:9    **2:12:** Kal 6:2; Iei 1:25; 1Pi 2:16    **2:13:** Mat 5:7; 18:32-35    **2:15:** 1Io 3:17    **2:18:** Kal 5:6    **2:21:** Gen 22:9-12    **2:22:** Hip 11:17-18    **2:23:** Gen 15:6; 2Ch 20:7; Isa 41:8



letena manmanna pe henonou hote letena manmanna ngana nga poinga nenge poia nem. <sup>23</sup> Ke poinga nenge Apraham poia nem, lohot ke pete tote NeHalang nena helenga mur nenge tehas sue ke ulolo, nenge hele ke teke, “Apraham letena manmanna toto nge NeHalang, pe letena manmanna ngana nem poia i ke pengpeng toto nga NeHalang matana.” Pomalam te hetue Apraham ke NeHalang neingana toto. <sup>24</sup> Ke imo anau, nenge teke letemo manmanna pe a henonou hote nga lemo ume mur, lape a pengpeng nga NeHalang matana. Pe nenge teke letemo manmanna pe a poia ume pele ero, lape letemo manmanna ngana nem halau imo ero toto.

<sup>25</sup> Iok he Rahap poi ke pomalam pule. Hei nem, salaunga kina mukam. Pe ana hei, talkome teua hana nenge te utut kileng ana olounga pe halaua iri ke te nanasia kue e nge altoto ke te ua. Pe nga poinga urana ngana nem, NeHalang tal haka tote i ke i pengpeng toto nga matana. <sup>26</sup> Ke pomalam mele nenge letena manmanna pe poi hote ume urana ngana e ero, letena manmanna ngana nem mete lo. Nenge teke opera tu teu nga singira ero, ta mete lo. Ke nenge teke letera manmanna mana pe ta poia ana ume e ero toto, letera manmanna ngana nem mete lo.

### 3

#### *Tanau Ele Ara Hengetau Ke Nek.*

<sup>1</sup> Titik mur, imo lochloch ngana a lohot ke imo heteronga ero. Iange a eteia, imem heteronga nemur, lape NeHalang nau teu at nge imem ke nek toto. <sup>2</sup> Ita ta losio ke kokoes nga poinga poreke ngana mur. Pe nenge teke mele heleia helenga poreke ngana e ero toto, mele nem i non nge pengpeng toto. Pe i lape nauele singina lochloch ke nek toto.

<sup>3</sup> Anau langa kie nenge ta paue. Ta takue pe nanasia lemere ngana. <sup>4</sup> Iok, anau langa imot mur pule. Imot nemur te papalauna toto pe tuttula palaungana takiskisia iri. Pe ute e nge kino mana tu nga imot palaungana nem hoena nga ruach letena. Pe non nenge songongia imot neu aua ure sune neu pe imot palleu song ke langa non neu lemene ngana. <sup>5</sup> Ke ure sune nem ume ke elle mana ke pomanga ara hengetau. Ara hengetau i ute e nge kino mana pe tu teu nge ita. Pe pomere toto nge teke i toto pe heleia ure papalauna?

Iok, letemo langa oan nge ngau ulu hite lomo letena. Oan nem talun ke kino mana mukam, pe intele nga ae ina mur pe ngau lala ke palaungana toto sapele. <sup>6</sup> Pe ita ara hengetau pomalaka nga oan. Tu teu nga singira ke pomanga poinga poreke ngana mur nenge tetu nga ich nei. Pe i nge heporeke tote tatu ngara pe singira lochloch. Iange Non Poreke Ngana i sipona poi heke ae nem.

<sup>7</sup> Hana halang tenau ele ure nemur nenge talngaria hihiong pe ngie mur pe marehit pe ruo mur. Te hengau ngaua iri pe te hetottore iri ke tetu ke nek. <sup>8</sup> Pe mele e nge nauele ana hengetau ke nek ero toto. Ara hengetau nei malaka nga non achunga tana e nge kila ita erochro. I rara mana iange achach. <sup>9</sup> Pe ita ta heto hekeke ara Non Soke pe Temere NeHalang nga ara hengetau mur. Iok, tahul mule pe ta hele poreke mele nenge NeHalang i sipona ala hote i ke nakuna mange i toto. <sup>10</sup> Pe nga ara hengetau elle nem, ta heto heke NeHalang pe penpeninga hot mulmule ia. Titik mur, a poi ke pomai ero toto. <sup>11</sup> Imai ech lololo ngana pe ruach mesmes ngana, te pachot ngaria elle mana kai? <sup>12</sup> Pe pero pe changal mai taria elle mana pule kai? Pe ae keng nganangana lape rora hot kai nga haiia tana mai? Ero iam! Ech lololo ngana pe mesmes ngana

pachot ngaria elle mana ero. Nenge lololo, pachot ngana altoto nga nenge mesmés.

### *Eteinga Toto Ngana.*

<sup>13</sup> Amo tei letena mallaha pe etei ngana poi ke nek toto? Teke poi pe mele nem henonou hote i ke talsio tote i pe tu ke nek mana pe poia ume urana ngana mur. Pomalam lape ta etei tote ke mele nem etei toto nga eteinga toto ngana nem. <sup>14</sup> Pe nenge teke iong mele nenge sam chumchum pe o ngunngunu halali, o palut rara ero. <sup>15</sup> Iange o etei ngam nem at nge NeHalang ero. O etei ngam nem at mana nga ich nei. Pe pule Opepengpeng tunge lange iong ero. Non poreke ngana tunge lange iong. <sup>16</sup> Ke nga nenge teke sam chumchum pe o ngunngunu hali, lape ramam mallaha ke nek ero pe poinga poreke ngana halang lape te lohot. <sup>17</sup> Pe iri nenge te mene eteinga toto ngana nge at nge NeHalang, reria poinga pomai: Te nanasia poinga nge pengpeng, pe te urana lange pekn-garia mur, pe tetu ke tenek ia iri, pe leteria poreke ia iri. Pe ramaria urana nge te longo langa pekngaria mur leteria tuanin ngana mur, pe reria poinga urana ngana mur nganangaria lohot, pe reria ume mur pe helenga mur te lohot ke manmanna, pe te poia lange hulua lochloch ke elle mana. <sup>18</sup> Iri nenge tenau ele hehei pe hana ke teare ke nek, aria ume ngana ngana mur laka lohot ke poinga urana ngana mur.

## 4

### *A Tunge Imo Sipomo Lange NeHalang*

<sup>1</sup> Imo, lememo tau menmene poinga poreke ngana mur, pe lememo ngamo nemur te palhel rara nga letemo. Pomalam, palinga hel pe hunelinga mur te lohotot nge imo. <sup>2</sup> Lememo taua ure halang pe a mene iri ero. Ke pomalam a ngunngunu

ia mele hel pe a hune iri. Pe ure nenge lememo taua iri nem, a mene ero kura. Pomalam, a hele inin pe a palhel pe a mene ero iange a onteia NeHalang ero. <sup>3</sup> Pe nenge teke a onteia NeHalang nga ure nemur, lape a mene iri ero pule. Iange nga letemo nge teu a teke a mene ure nemur ke imo toro mana lemo nenge halau mene imo pe mele ero ol.

<sup>4</sup> Imo nge a poreke toto iam! NeHalang na ngarang mur laka mele hel nenge te poi ke machmam. Mele hel nenge muteria tau tote ure nemur nga ich nei, muteria taua NeHalang ero toto. Ke mele hel nenge te teke tema la mana nga ure nemur nga ich nei, NeHalang na ngarang toto laka iri. <sup>5</sup> NeHalang nena helenga nenge tehas sue ke ulolo, luna palaungana toto, pe hele ke teke, “Ope nenge NeHalang hesio tele ke tu teu nge ita, teke i toro mana nena ita.” <sup>6</sup> Pe NeHalang letena porekeia ita ke halang. Pe nena helenga nenge tehas sue ke ulolo, hele ke teke, “NeHalang lemene ero toto ia iri nenge tetal hekeke iri. Pe I letena poreke toto ia iri nenge tetal sio totote iri pe hekerkereng ia iri.”

<sup>7</sup> Iok, a tung tote imo lange NeHalang ol pe ames ke kerkereng toto pe anau ala amo nge non poreke ngana. Pomalam lape non poreke ngana nem ua hatal sapele imo. <sup>8</sup> Ala rochroi toto nge NeHalang. Pomalam, lape NeHalang tu rochroi toto nge imo. Imo nenge a popoi poinga poreke ngana, a lomo hote poinga poreke ngana nemur nga letemo pe a helemlem mule letemo ke ma ke nek. Pe imo nenge letemo nachnai a poia letemo ke elle mana nge NeHalang ol. <sup>9</sup> Letemo poreke ia lemo poinga poreke ngana mur pe a tang hot tote iri! A hulua lemo melmelinga mur ke langa lemo tanginga mur. Pe a iech ngamo nem mur ero ol pe nakumo hunun mana. <sup>10</sup> Atal sio tote imo nga

Non Soke matana, pe I lape inheke mule imo pe tal heke tote imo langa lut.

*O Henonou Perim Lange Mele Ero*

<sup>11</sup> Titik mur, a hele poreke pe a henonou perimo lange neingamo mur ero. Mele nenge henonou penna lange neingana pe hele poreke i, hele poreke hotonga ke het lo pe pule, hesilechlei hotonga. Pe mele nenge hesilechlei hotonga, nanasia hotonga mur ero toto. <sup>12</sup> Non elle mana nge tung hote hotonga mur. Pe I toro mana i non nenge hesilechlei. Pe i toro mana i non nenge nauelele ure mur pe sisparachraia ure mur. Pe iong itei nenge o teke o henonou perim lange neingam ke pomam?

*Imo Nenge A Teke Imo Toto, Anau Ala Amo Ke Nek*

<sup>13</sup> Iok a longo, imo nenge a lohaka pe a hele ke a teke, "Heueu ma nge rou, lape ta lohaka ke tala nga kileng tau ngana hel pe tatu ke hesinga elle. Pe ta umumeia ara ume nemur nenge ta menmene umtutuna." <sup>14</sup> Iong o hele pulut mana. O eteia utar nenge lape lohok nge rou pule? Iong opoi ke pomanga mo. Iange mo sio pe tu ke etue choro mana pe het mule lo. <sup>15</sup> Iong, toinge o hele ke o teke, "Ita lape ta poi ke mai pe mai nga Non Soke lemene ngana." <sup>16</sup> Heueu panei o heto heke tote iong ke het lo. Pe palutinga pa nenge pomam poreke toto. <sup>17</sup> Pe mele nenge eteia ure urana ngana mur pe popoia ero, mele nem poia poinga poreke ngana nga NeHalang matana ke het lo.

## 5

*Imo Nenge Lemo Ure Halang Anau Ala Amo Ke Nek*

<sup>1</sup> Imo nenge lemo ure halang, a longo ke nek toto! Letemo hoa imo pe a tangtang iange ure meena ngana halang lape te lohok nge imo.

<sup>2</sup> Lemo kole hoena nemur nenge a teke lape halaua imo, te lapusa hulu lo. Pe pule kankan te ngau ule lemo hengeron mur ke het lo. <sup>3</sup> Pe lemo ure chalemlem ngana mur nenge koikoi pe hussu, singiria karkare ulu ke het lo. Pe ure karkare ngana nemur henonou hot pengpengia ke imo a poreke toto pule. Pe i lape ngau lala hite singimo ke pomanga oan. A takiraurau lemo kole hoena nga halang nike ke at heueu nei. <sup>4</sup> Pe a olia hana nenge te lamlamo amo ero. Pe hana nemur te tatara amo nge NeHalang ke het lo. Pe Non Soke Nenge Palaungana Toto longe hana nemur reria tanginga ke het lo. <sup>5</sup> Imo atu nga ich nei, lemo ure halang pe atu ke a iech mana. Pe a helum hote imo ke pomanga kie nenge lum toto pe tesie heke pe te hune ke mete. <sup>6</sup> Pe apoi poreke pe a hune atong mele hel nenge reria huna ero lange imo.

*Tatu Kenek Mana Pe Tanau Ala Mana*

<sup>7</sup> Titik mur, tatu ke nek mana pe ta nau ala mana nga Non Soke at mule ngana. Anau lange non nenge tue ana ume pe kulkulele mene ana ngaunga nge haka nga ich. Pe pule tu ke nek mana pe kulele mene pitte hesio ngana nga ana etue. <sup>8</sup> Pe imo pule a poi ke pomalam. A kulkulala mana pe ames ke kerkereng, iange Non Soke ana etue nenge lape at muleia, at rochroi lo. <sup>9</sup> Titik mur, a ngunngunu hel nge imo ero, pomalam lape NeHalang henonou hote lemo poinga poreke ngana mur ero pule. Ana non koi at ke mes nga pele matana lo!

<sup>10</sup> Titik mur, a nanasia poinga nenge hetatalonga mur. Teat pe te helele nga Non Soke ene, pe ure meena ngana halang lohok nge iri. Pe atong mur te chum ele pe te takis mene ure meena ngana nemur. <sup>11</sup> Pe ita ta eteia ke iri nenge te poi ke pomam, te iech toto. Imo a longe

nananga nenge ne Iop lo? I takisia ana melmelenga pe tu ke nek mana. Pe nga hoena, Non Soke hemas mule i. Ke ure nem, Non Soke teke hetoro ita ia. Non Soke letena poreke toto ia ita pe poia ita ke nek toto.

<sup>12</sup> Titik mur, ure palaungana e pule pomai. A heto pulut mene NeHalang ene ke hekerkereng ia lemo helenga mur ero. Pe a hetue ute pele nga ich nei ero pule. Nenge teke a hele ke oe, a hele ke manmanna toto mana. Pe nenge teke a hele ke ero, a hele ke ero ke manmanna. Pe nenge teke a heto pulut mene NeHalang ene, lape NeHalang tuachol ia ke poreke lange imo.

#### *Ta Hetalaulau Nga Letera Manmanna Ngana*

<sup>13</sup> Nenge teke ure meena ngana lohot nge amo e nge imo, mele nem hetalaulau lange NeHalang. Pe nenge teke iechinga lohot nge amo e nge imo, mele nem pule peupeu pe heto hekekeke NeHalang. <sup>14</sup> Pe nenge teke amo e nge imo singina aleles, hekulo hetalaulaunga ana hana mur aria ke teat nge i. Iange iri lape te hetalaulau hite i pe te pasiling heke ure inangana ehech ngana lange i nga Non Soke ene. <sup>15</sup> Pe nenge teke o hetalaulau lange NeHalang pe letem manmanna toto, lape poia haleles ke het nge mele nem. Iange Non Soke i sipona hemas mule i. Pe nenge teke mele nem poia poinga poreke ngana hel, NeHalang lape letena ia nena poinga poreke ngana mur ero ol. <sup>16</sup> Ke pomalam a hele hote lemo poinga poreke ngana mur lange pekngamo mur pe a hetalaulau ke NeHalang hemas mule imo. Iange iri nenge te pengpeng toto nga NeHalang matana, te hetalaulau ngaria lape lohot ke kerkereng pe palaungana toto.

<sup>17</sup> Elaisa i non mana ke mange ita. Pe i hetalaulau ke pitte mol ero. Pe pitte mol sio ero ke hesinga iri mol pe hakekena. <sup>18</sup> Iok, ana non hetalaulau

mule ke pitte mol ol. Pe la pitte sio at nga lut nga tapa ke lome ich pe urelu te haka mule.

#### *Ta Halaua Mele Ke At Mule Nge NeHalang*

<sup>19</sup> Titik mur nenge teke amo e nge imo ua hot nga NeHalang na helenga manmanna ngana pe mele mene teu mule i, <sup>20</sup> letemo metene nei: Mele nenge mene mule neingana e nga poinga poreke ngana mur, halaua neingana nem opene nga metenga lo. Pe pule, lape NeHalang mene poinga poreke ngana mur halang pe saua iri ke te lasus toto.

## 1 Petrus Alalaha Elle Ngana Nenge Petrus Hasia

<sup>1</sup> Iau Petrus koi ehas ia alalaha nei. Iau Iesus Kristus nena hekulkulonga.

E hasia alalaha nei ke lange NeHalang nena hana mur nenge hesilei hote iri pe tetu lilis rara mana nga kileng hel nga ich. Ana kileng koi nemur: Nge Pontus pe nge Kalasia pe nge Kapatosia pe nge Eisia pe nge Pitinia. <sup>2</sup> Temere NeHalang letena tuanin hot tele nike ke hesilei hote nena hana mur imo pe poia imo ke a pengpeng nga ume nenga Opepengpeng. NeHalang teke a longo taua i pe a lohot ke a lemlem nga Iesus Kristus eina nenga mete ngana.

E teke NeHalang henonou hot tote letena urana ngana lange imo pe poia imo ke atu ke nek toto.

### *Kulkulalanga Manmanna Ngana*

<sup>3-4</sup> Ta hele urana pe ta heto heke NeHalang nenge ara Non Soke Iesus Kristus Temene. NeHalang letena ia ita ke palaungana toto pe tunge maulinga heueu ngana nge ita nga nenge hemaule heke mule Iesus Kristus nga metenga. Ke heueu ta kulkulele petanga nga ure urana ngana mur nenge NeHalang talue nga tapa ke teke nena hana mur reria ia. Ke petanga nemur, imo lape lemo ia, pe ute pele nge lape heporeke ero pe te erue ero pe lape te poreke ero pule. <sup>5</sup> Imo letemo manmanna nge NeHalang pe nena kerkerenga lape nauele imo ke la het nga etue hetala ngana. Pe lape mene mule imo ke pomanga letena tuanin hot ngana ia lo. <sup>6</sup> Imo a amneia ure meena ngana halang nge te lohotot nge imo, pe nga etue nem lape a iech toto. <sup>7</sup> Ure meena ngana nemur te henonou hote ke letemo manmanna ngana kerkereng toto

nge Kristus ke kokoes pe ele haka toto nga um chalemlem ngana nenge uruna ele haka toto. Um nem te holoa sue nga oan milang ngana ke chalemlem pe i lape poreke mule pe tu ke koko ero. Pe letemo manmanna ngana nem lape poia imo ke a mene hemalmalinga pe te heto heke imo nga etue nenge Iesus Kristus lohot nga mallaha. <sup>8</sup> Imo a esia i ero pe mutemo taua i pe heueu nei pule a esia i ero pe letemo manmanna nge i pe iechinga lalalaua imo ke elela. Iechinga nem palaungana toto nga iechinga mur lochloch pe nakura ero toto nge ta hele urume nga harra. <sup>9</sup> Imo a iech toto iange a menmene ure nenge letemo manmanna ia – ngana laka nenge NeHalang mene mule imo pe tunge maulinga langa opemo mur.

<sup>10</sup> Nge nike hetatalonga mur te haliu hote NeHalang letena urana toto ngana nga maulinga nenge lohotot nge imo heueu nei. Pe te ume ke kerkereng pe tenau teu la ke nek toto nga maulinga nei ana kue nenge NeHalang lape tunge lange imo. <sup>11</sup> Pe Kristus Opene tu teu luluch nge hetatalonga nemur pe hele lala nge iri nga kue nenge Kristus lape takisia ana melmelenga pe nga hemalmalinga palaungana nenge lape mene. Ke iri tenau teu laia pe te tango rara ke nek toto ke te eteia itei toto nenge i Kristus pe ure nem lape lohot nga etue tei toto. <sup>12</sup> Pe NeHalang hemalaha hote lange iri ke teke reria ume nem lape halaua iri siporia ero, reria ume nem lape halaua laka imo. Ke heueu nei Opepengpeng sio at nga tapa ke hemute hana hel pule ke te haliu hote helenga urana toto ngana lange imo. Pe angkelo mur te teke te etei teu la ke nek toto nga helenga nem pule.

### *NeHalang Iua Ita Ke Teke Tatu Ke Ta Lemlem*

**1:2:** Rom 8:29; 2Te 2:13    **1:3-4:** Kol 1:12    **1:5:** Ioa 10:28; 17:11    **1:6:** Iei 1:2; 1Pi 5:10    **1:7:** Pro 17:3; Zec 13:9; Mal 3:3; Iei 1:3    **1:8:** Ioa 20:29; 2Ko 5:7    **1:10:** Mat 13:16-17    **1:11:** Psa 22; Isa 53; Luk 24:26-27



<sup>13</sup> Ke pomalam, a nauele singimo mur ke nek pe a tatalo ele letemo matana ngana mur ke a poia ume. Pe a talue letemo ke la mana nga petanga nenge lape te tunge lange imo nga etue nenge Kristus lohote nga mallaha pe a kulkulele mene. <sup>14</sup> Atu ke pomanga NeHalang tutuna mur nenge te longo tautau pe a nanasia lemo poinga nenge nike ana ero. Nge nike letemo matana ero pe a poia poinga poreke ngana nga lememo ngamo. <sup>15</sup> Pe heueu nei atu ke a lemlem nga ure lochloch ngana nenge a popoia, ke pomange NeHalang nenge iua imo nge tu ke peng-peng. <sup>16</sup> NeHalang nena helenga nenge tehas sue ke ulolo, hele ke teke, "A lemlem iange Iau e lemlem."

<sup>17</sup> Imo a heto tememo ia NeHalang nga etue nenge a hetalaulau. Pe NeHalang mutena tau mene mele hel ero. I nanasia poinga elle mana ke amnei teu langa hehei pe hana reria poinga mur lochloch. Ke pomalam, a tutu ke pomanga kileng nei lemo kileng toto ia ero koi, pe letemo metentene NeHalang pe a heto hekeke i. <sup>18</sup> Imo a eteia ke nge nike a nanas mene poinga nemur nenge lemo tete mur te hesue lange imo pe atu ngamo poreke toto. Pe NeHalang mene mule imo nga poinga porekreke ngana nemur. Pe mene mule imo nga ich ana ure ero (nenge pomanga um chalemlem ngana nemur nenge ururia haka toto) iange ure nemur lape te poreke. <sup>19</sup> NeHalang mene mule imo laka nga ure nenge uruna haka toto. Ngana laka nga Kristus eina nenge lemlem toto ke pomanga sipsip nenge ana haleles unne ero pe hana tehun sio mene. <sup>20</sup> NeHalang ala hote tapa pe ich ero kura pe hesilei hot tele Kristus. Pe nga etue hetala ngana nemur Kristus lohote nga mallaha ke halaua imo. <sup>21</sup> Ke letemo manmanna ngamo

nge NeHalang nem, huna koi nge Kristus nge NeHalang hemaule heke mule i nga metenga pe hemalmalia i. Ke pomalam letemo manmanna ngana pe a kulkulala ngamo tu mana nge NeHalang.

<sup>22</sup> Imo a longo taua helenga manmanna ngana ke ulolo pe nga poinga nem a helemlem ia opemo mur ke mutemo tautaua titimo mur. Ol pe letemo tau tote iri nga letemo toto. <sup>23</sup> Iange NeHalang nena helenga nem, poia imo ke pomanga te hoho mule imo ke a lohote ke imo heueu ngana mule. Pe maulinga heueu ngana nei at nga ure nenge metmete ero, at nga ure nenge tu ke maulul mana nenge tu ke koko. <sup>24</sup> Iange NeHalang nena helenga nenge tehas sue ke ulolo, hele ke teke,

"Hehei pe hana lochloch tepoi ke pomalaka nga heilil. Pe reria hemalmalinga mur tepoi ke pomalaka nga heilil uraurau ana rorana mur. Heilil mur lape te mete pe roraria mur lape te tualolo sio, <sup>25</sup> pe Non Soke nena helenga lape tu ke koko." Helenga nei i helenga urana toto ngana nenge te haliu hote lange imo.

## 2

<sup>1</sup> Ke pomalam a hile poinga poreke ngana mur lochloch nenge amo hengetau nachnai pe a memeleia mele hel reia urelu pe a hele porekreke mele hel pe a penpen ia iri. <sup>2</sup> Apoi ke pomange mamau mur. Iri muteria tau tote siu eina nenge tunge maulinga lange iri. Ke pomalam mana, imo mutemo tau tote NeHalang nena helenga. Iange helenga nem lape he kerkereng ia opemo pe letemo manmanna ngana puo ke palaungana pe lape a mene maulinga. <sup>3</sup> Iange NeHalang nena helenga nenge tehas sue ke ulolo, hele ke teke, "Imo a totoia pe a amnei

**1:14:** Rom 12:2; Epe 2:3; 4:17-18

**1:16:** Lev 11:44-45; Mat 5:48

**1:17:** Rom 2:11; Hem 2:23

**1:19:** Ume 20:28; Hip 9:12-14

**1:20:** Epe 1:4; 2Ti 1:9-10

**1:21:** Ioa 14:6; Rom 5:1-2

**1:22:** Ioa

13:34; Rom 12:10

**1:24:** Isa 40:6-8

**2:1:** Epe 4:22; Iei 1:21

**2:3:** Psa 34:8

urume ke Non Soke i non nge urana toto.”

*Iesus I Um Nenge Maulul*

<sup>4</sup> Ai at nge Non Soke ol. Non Soke i um maulul ngana nenge urana toto nenge NeHalang hesilei hote pe hehei pe hana te teke poreke ke lemeria ero ia. <sup>5</sup> Imo pule apoi ke pomanga um mur nenge te maulul nenge NeHalang hemes nena tunginga ana pele ia, pe a lohote ke imo tunginga ana hana pengpeng ngana mur nenge a popoi tunginga lala nge I. Pe NeHalang Opene tu luluch nge imo pe longala ke mene lemo tunginga mur nga ume nenge Iesus Kristus poia. <sup>6</sup> Iange NeHalang nena helenga nenge tehas sue ke ulolo, hele ke teke,

“A naue lo? E hemes sue um e nga kileng nenge Sion.

Um nem urana toto  
pe i um kerkereng ngana ia  
nenge ratua ele pele,

Pe mele nenge letena manmanna nge  
i  
lape meia i ero.”

<sup>7</sup> Ke um nei lohote ke um urana toto ngana nge imo nenge letemo manmanna. Pe iri nenge leteria manmanna ero,

“Um nenge pele ana lelenga mur te  
hesis ia,  
lohote ke i um kerkereng ngana  
nenge ratua ele pele.”

<sup>8</sup> Pe NeHalang nena helenga e pule hele ke teke,

“I um nenge lape poia hehei pe hana  
ke te singsingo  
pe i um nenge lape poia iri ke te  
losio.”

Te singsingo iange te longo ole taua helenga urana toto ngana. Pe NeHalang letena tuanin hote iri nike ke lape te poi ke pomam.

<sup>9</sup> Pe imo hana ana mata nem, NeHalang hesilei hote imo ke nena hana mur ia imo. Pe a lohote ke imo tunginga ana hana mur nenge a umume nge i nge i naungaala ana

non, pe a lohote ke imo hana nge pengpeng pe isipona nena hana mur imo. NeHalang poia imo ke pomai iange teke a haliu hote ure urana ngana mur lohloch, nga nenge mene hote imo nga kileng au ngana ke ateu langa nena lemene nenge urana toto. <sup>10</sup> Nge nike, NeHalang nena hana mur imo ero pe heueu nei nena hana mur imo ol. Nge nike NeHalang letena ia imo ero toto pe heueu nei letena toto ia imo.

<sup>11</sup> Titik mur pe liliuk mur, imo hana lomomona ngana mur mana nga ich nei. Pe e hele ke kerkereng toto lange imo ke a kangkanga toto nga poinga poreke ngana nemur nenge singimo lemene tautaua, iange lape ure nemur tepoi ele lemo kue nenge a lohote ke a urana nga opemo. <sup>12</sup> Hehei pe hana nenge leteria manmanna ero, ngaria la tetu luluch nge imo pe e hele ke kerkereng toto lange imo ke atu ke nek toto luluch nge iri. Ke nenge teke te hele poreke imo kura lape te naue ure urana ngana mur nge a popoia pe te heto heke NeHalang nga etue nenge Kristus at mule ia.

*A Longo Taua Hehei Pe Hana Nenge Tenau Elele Imo*

<sup>13</sup> Apoi ke pomai nga Non Soke ene: A longo taua iri nemur nenge tenau elele imo nga ich nei. A longo taua naungaala ana non iange i nena kerkerenga ele haka toto. <sup>14</sup> Pe pule a longo taua hana nemur nenge naungaala nem kulosia iri ke te tunge melmelenga ke te hepengia hehei pe hana nenge te popoi poinga poreke ngana. Pe te poia helenga urana ngana ke te hekerkereng ia iri nenge te popoi poinga nge urana. <sup>15</sup> Iange nga NeHalang lemene ngana, teke a poia ure urana ngana mur ke hereng ia hehei pe hana nenge leteria manmanna ero, nga reria helenga pallaklaka ngana mur nenge tetue lala nge imo. <sup>16</sup> Atu ke apoi tetele mana ol.

**2:5:** Epe 2:21-22; Hem 1:6    **2:6:** Isa 28:16; Epe 2:20    **2:7:** Psa 118:22    **2:8:** Isa 8:14    **2:9:** Deu 7:6; 14:2; Isa 9:2; Ume 26:18; Epe 5:8    **2:10:** Hos 2:23    **2:11:** Kal 5:17, 24    **2:12:** Mat 5:16  
**2:13:** Tit 3:1    **2:15:** 1Pi 3:16

Pe apoi singimo ia apoi tetele ngamo nem nga poinga poreke ngana e ero. Atu ke pengpeng ke pomanga NeHalang nena ume ana hana mur. <sup>17</sup> Apoi ke nek lange hehei pe hana lochloch. Mutemo taua titimo mur pe liliumo mur. Atal haka tote NeHalang. Pe a longo taua naungaala ana non.

### *Ta Nanasia Kristus Ke Ta Takisia Melmelenga*

<sup>18</sup> Imo nenge aume manmana nge hana hel, a tung tote imo lange amo aehuna mur pe apoi ke nek toto lange iri. Pe apoi ke pomam lange aehuna nemur nenge te neknek pe te urana lala nge imo pe pule nge nemur nenge tepoi porekreke imo. <sup>19</sup> Iange mele nenge tepoi poreke pe letena metene NeHalang ke takisia melmelenga, NeHalang lape poi ke urana lange i. <sup>20</sup> Nenge teke a poia poinga poreke ngana e pe te palia imo, lape a mene ute pele nge urana nga nem ero. Pe nenge teke a poia poinga nge urana pe te tunge melmelenga lange imo, NeHalang lape poi ke urana lange imo. <sup>21</sup> Pe melmelenga mur te lohotos nge imo iange NeHalang hesilei hote imo ke a nanasia Kristus apena munna nga ana melmelenga nenge takisia.

<sup>22</sup> “Kristus poia poinga poreke ngana e ero,  
pe channanga ia helenga e ero.”

<sup>23</sup> Hehei pe hana te hele poreke i pe hele ala ana ero, pe takisia melmelenga pe tamal hote helenga pele nge teke tuacholia ero. Tung mene ure nem lange NeHalang iange NeHalang amnei teu ngana nga ure mur pengpeng toto. <sup>24</sup> Kristus takisia rera poinga poreke ngana mur nga singina ke laia nga manga toto. Ke pomalam ta hile rera poinga poreke ngana mur pe ta talun ke ta nanas mene poinga nge pengpeng, iange ta mene maulinga nga nena chanchan munna mur. <sup>25</sup> Imo apoi ke pomanga

sipsip nenge saleke ke nanasia kue e nge altoto pe heueu nei, NeHalang mene mule imo ke a nanasia naualanga ana non nenge nauuelele opemo mur.

## 3

### *Hehei Pe Eria Mur*

<sup>1</sup> Ke pomalam mana, imo hehei nenge alei a longo taua emo mur. Pe amo hel, eria mur leteria manmanna nga NeHalang nena helenga ero. Pe lemo helenga pele lape hulua iri ero, lemo poinga mur mana lape hulua iri ke leteria manmanna.

<sup>2</sup> Nga nenge teke te naue imo nge atal heke totote iri pe a nanas tau tote NeHalang nena poinga.

<sup>3</sup> Ke pomalam a lule palpalumo ina pe a nene nananga chalemlem ngana pe a heronia hengeron urana ngana mur ke a hemalmal heke imo ero.

<sup>4</sup> Nakumo urana ngana nenge lape tu ke koko, lohotos at laka nga ngamo nenge tu teu nge imo – nge maluch pe tu ke nek manmana pe nakuna urana toto nga NeHalang matana.

<sup>5</sup> Iange nge nika hehei nenge leteria manmanna nge NeHalang te nanasia poinga nei, ke te hemalmalia ngaria mur nga rera poinga nenge tetu ke nek mana pe te longo tautaua eria mur.

<sup>6</sup> Ke he Sara poi ke pomam. I longo taua Apraham pe hetue i ke ana naualanga. Pe nenge teke imo hehei mur a poia poinga nge pengpeng pe a mataua ute pele ero lape he Sara tutuna mur laka imo.

<sup>7</sup> Ke pomalam mana, imo hana nenge a lei, atu luluch nge lemo hehei mur pe letemo ia iri iange iri kikiria ero. Pe a tal heke tote iri pe a poia iri ke nek iange lape imo ul ke a mene NeHalang nena tunginga nenga maulinga. Pomalam ute pele lape poi ele lemo hetalaulaunga ero.

### *Ta Takisia Melmelenga Nga Rera Poinga Urana Ngana*

**2:17:** Rom 12:10    **2:18:** Epe 6:5    **2:20:** 1Pi 3:14, 17    **2:21:** Mat 16:24; Ioa 13:15    **2:22:** Isa 53:9  
**2:23:** Isa 53:7; 1Pi 3:9    **2:24:** Isa 53:5-6; Rom 6:11    **2:25:** Ezk 34:5-6; Mat 9:36; Ioa 10:14; Hip 13:20-21    **3:1:** Epe 5:22    **3:3:** 1Ti 2:9    **3:6:** Gen 18:12    **3:7:** Epe 5:25

<sup>8</sup> Iok laol, e teke imo lochloch ngana atal sue imo pe letemo elle pe letemo ia pekngamo mur ke a amneia melmelenga luluch nge iri pe mutemo tau helel pe anak helel nge imo. <sup>9</sup> Nenge teke mele hel tepoi poreke imo, a tuacholia nga poinga poreke ngana e ero. A tuacholia nga nenge a onteia NeHalang ke poi ke urana lange iri. Iange NeHalang iua imo ke nena hana mur imo pe lape poi ke urana lange imo. <sup>10</sup> Iange NeHalang nena helenga nenge tehas sue ke ulolo, hele ke teke,

“Mele nenge mutena ke teke

tu ke iech manmana

pe teke nena kilanga lohote ke urana toto,

ana hengetau pal haka sio ia

helenga poreke ngana e ero.

Pe hile tote poinga nenge pallak-laka

nga nena helenga mur.

<sup>11</sup> Pe hul rumena ia poinga poreke ngana

pe poia poinga nge urana;

pe tango rara tote tunga nge nek pe nanas tau tote.

<sup>12</sup> Iange Non Soke nauelele laka

iri nenge te popoia poinga nge pengpeng

pe longo lala nga reria hetalaulaunga mur.

Pe Non Soke letena inin tautaua

iri nenge te popoi poinga poreke ngana.”

<sup>13</sup> Nenge teke mutemo toto ke a teke a poia poinga nge urana, itei lape poi poreke imo? <sup>14</sup> Pe nenge teke a amneia melmelenga nga poinga urana ngana nenge a poia, NeHalang lape poi ke urana lange imo. “A mataua mele ero pe letemo meena ero.” <sup>15</sup> Pe a heto heke Kristus pe a talue i ke i Non Soke nga letemo. Pe kokoes a tatalo ala ke a tuachol ia iri nenge te onteitei ia imo nga ure nenge a kulkul elele, pe a tuacholia reria onteinga nga poinga nge urana. <sup>16</sup> A kangkanga toto nga poinga poreke ngana, pomalam lape a hemeia iri nenge te hele porekreke

imo nga lemo poinga urana ngana mur nenge at nge Kristus. <sup>17</sup> Nenge teke NeHalang lemene, ta takisia melmelenga nga rera poinga urana ngana mur, pe nem urana nga nenge ta takisia melmelenga nga rera poinga poreke ngana mur. <sup>18</sup> Iange Kristus poia poinga poreke ngana e ero pe I mete ke elle mana pe ero ol. Mete ke saua ita lochloch rera poinga poreke ngana mur pe mene ita ke tala nge NeHalang. Kristus i non toto pe te hune i ke singina mete ke manmanna. Pe NeHalang Opene hemaul heke mule i ke tu ke maulul. <sup>19</sup> Ke NeHalang Opene nem poia i ke la haliu hot lange ope nemur nenge tetu nga tuele au ngana <sup>20</sup> iange ope nemur te longo ole taua NeHalang nge nike nga etue nenge Noa. Pe NeHalang kulele menmene iri nga etue nenge Noa umumeia nena imot. Pe hehei pe hana iri rahtele mol mana teteu nga imot nem ke te eleis maul ngaria nga ech. <sup>21</sup> Pe ech nem heilangia henuninga nenge hemaulia imo, pe i henuninga nenge lomo sue much nga singimo ero. I helenga kerkereng ngana nenge hehei pe hana te poia lange NeHalang nga hulua mataria ke te teke te nanasia Iesus Kristus iange NeHalang hemaul heke mule i nga metenga ke ulolo. <sup>22</sup> Pe Iesus Kristus lohaka langa tapa ke are nga NeHalang ilina ele nenga pen tamalmal lo. Ke heueu nei nauele lochloche angkelo mur pe angkelo nemur nenge pingaria iuiu nga reria kerkerenga mur.

## 4

### *Ta Hulua Rera Poinga Mur Pe Tatu Mana Nge NeHalang*

<sup>1</sup> Kristus amneia melmelenga nga singina ke halaua ita, ke pomalam a tatalo ala pe ames ke kerkereng ke a takisia melmelenga pule ke pomange i. Iange i nenge takisia melmelenga nga singina nem, lemene ero toto



poinga poreke ngana ol. <sup>2</sup> Imo a tutu ia singimo nga ich kura pe nga etue unne nenge tu nei ol, ames ke kerkereng ke a nanas mene NeHalang lemene ngana. Pe poinga poreke ngana nemur nenge hehei pe hana muteria tautaua, a nanasia ero. <sup>3</sup> Iange nge nike a nanas mene poinga nenge hana nenge te eteia NeHalang ero te popoia ke mala toto. Ngana laka poinga nemur nenge: A salaulau, a nanas mene singimo lemene ngana mur, a inin ke amo hauaua, a inin ech kerkereng ngana pe a popoi poinga poreke ngana pe a heto hekeke ae tapuna mur. <sup>4</sup> Pe iri nenge te eteia NeHalang ero nem, te hele poreke imo iange te ruraia imo nge a koko teu luluch nge iri ero pe a poia poinga poreke ngana nemur ero ol. <sup>5</sup> Pe iri siporia lape te hele ala toroi aria lange i nenge tatalo ala ke amnei teu langa iri nenge te maulul pe iri nenge te mete reria poinga mur. <sup>6</sup> Iri nenge te mete te longe helenga urana toto ngana ke ulolo pe lape te amnei teu lange iri nga reria poinga mur nenge tetu ke te maulul pe te popoia. Ke het pe operia mur tela ke tetu luluch sapele nge NeHalang.

*Ta Poia Ume Nga Tunginga Nenge NeHalang Tunge At Nge Ita Kenek*

<sup>7</sup> Ure lochloch te hetala ngaria heroi lo. Ke pomalam a rahit ele letemo tuanin ngana ke song ke mallaha ol pe ute pele poi ele a hetaulau ngamo ero. <sup>8</sup> Ure nenge palaungana toto, ngana laka nenge mutemo tau tote pekngamo mur iange nenge teke mutemo taua pekngamo mur, letemo metene reria poinga poreke ngana mur ero ol. <sup>9</sup> A long teua hehei pe hana nga lemo pele pe a poi helenga loulou ia ero. <sup>10</sup> NeHalang tunge tunginga kuenkuena ngana mur lange imo elle pe elle ke a halaulaua hehei pe hana, ke pomalam a nauele tunginga nemur ke nek. <sup>11</sup> Ke nenge teke mele

mene tunginga nenge haliunga ana, iok, o haliu hotote NeHalang nena helenga mur. Pe mele nenge mene tunginga nenge ume ke halaulaua hehei pe hana, o popoia ume nem nga NeHalang kikina ngana nenge tunge lala nge iong. Nenge teke a poi ke pomai lape hehei pe hana te heto heke NeHalang nga ure lochloch ngana nenge Iesus Kristus poia, pe te heto heke ene nga kikina ngana ke koko. Manmanna.

*Ita Kristus Nena Hana Mur Ta Takisia Melmelenga Ke Pomange I*

<sup>12</sup> Titik mur pe liliuk mur, a ruraia melmelenga poreke ngana nenge lohotot ke ollaka hotote imo nem ero. <sup>13</sup> A iech mana iange a takisia melmelenga nem ke pomange Kristus nge takisia melmelenga. Pe lape a iech toto ol nga etue nenge at muleia kikina ngana pe ene nenge palaungana toto song hot nga mallaha. <sup>14</sup> Imo a nanasia Kristus pe a rahite ene. Pe nenge teke hehei pe hana te hele poreke imo a iech mana, iange NeHalang Opene nenge kikina toto pe ene nenge palaungana toto, tu luluch nge imo. <sup>15</sup> Hana hel te takisia melmelenga iange te poia poinga nemur: Te hunun hana pe te kemkeme pe te heporeke hehei pe hana tetu ngaria. Nenge teke o takisia melmelenga nga poinga nenge pomachmau, o meia iong mule iange iong sipom o poia. <sup>16</sup> Pe nenge teke letem manmanna nge Kristus pe te poia melmelenga ke lohot nge iong o meia iong nga nem ero. O heto heke NeHalang nga nem iange te hetue imo ke 'Kristus nena hehei pe hana mur'. <sup>17</sup> Iange etue nenge NeHalang amnei teu lala nga hehei pe hana reria poinga mur lohot lo pe lape talune ume nem nge nena hana mur ita. Ol pe pomere nge hehei pe hana nenge lemeria ero nge te longo taua NeHalang nena helenga urana toto ngana? <sup>18</sup> Iange NeHa-



lang nena helenga nenge tehas sue ke ulolo, hele ke teke,

“NeHalang mene mule nena hana mur

pe poia iri ke te pengpeng nga matana.

Pe nenge teke iri te takisia ure meena ngana mur nga kue nem

lape pomere nge iri nenge tehul rumeria ia NeHalang

pe iri nenge te popoi poinga poreke ngana?

Iri lape te poi ke pomere toto?”

<sup>19</sup> Ke pomalam iri nenge te amneia melmelenga nga NeHalang lemene ngana, urana nge te tung tote iri lange NeHalang iange i ala hote iri. Pe i lape nanasia nena helenga ke halaua iri ke pomanga hele ngana ia.

## 5

### *Almasinga Ana Hana Mur Aria Ume*

<sup>1-2</sup> Imo lape a mene hemalmalinga palaungana nenge Kristus nenge NeHalang lape hemallaha hote, pe iau lape e mene pule pe iau almasinga ana non pe e naue Kristus nge takisia ana melmelenga mur. Ke pomalam e teke e hekerkereng ia almasinga ana hana mur nenge tetu luluch nge imo. E hele ke kerkereng toto lange iri ke pomai koi:

A nauele NeHalang nena hana mur ke nek ke pomange hana nenge tenau elele sipsip mur. A poia ume nem nga lememo ngamo ke pomanga NeHalang lemene ngana pe a poia ke pomanga mele ech imo ia ero. Pe a poia nga mutemo ngamo nga ututuna ero, a poia nga lememo ngamo toto nenge a teke aume mana.

<sup>3</sup> NeHalang talue nena hana mur ke teke a nauele iri, pe a mene lemo put pe a keres ke a teke te nanas tau mene lemo ngamo ero. Imo muka ia poinga urana ngana ke a henonou hote lange iri ke te nanasia. <sup>4</sup> Pe nga etue nenge Naulanga

Ana Non Nenge Soke Toto puris, lape tunge maulinga ke koko ana iengien-gka lange imo. Pe iengien-gka nem nakuna urana toto ngana lape het sio mule ero ol.

<sup>5</sup> Pe imo lolomele mur a longo taua amo almasinga ana hana mur, pe imo lochloch ke atal sue imo lala nge imo elle pe elle. Lange NeHalang nena helenga nenge tehas sue ke ulolo, hele ke teke,

“Hana nenge tetal hekeke iri,

NeHalang nena ngarang mur ia iri.

Pe hana nenge tetal susue iri,

NeHalang poi ke urana toto lange iri.”

<sup>6</sup> Atal sue imo nga NeHalang matana iange i kikina ngana halang nge lape halaua imo, pe lape heto heke imo nga etue nenge isipona talue ke teke poia. <sup>7</sup> A tunge letemo meena ngana mur lochloch lange i iange i poi ke nek lala nge imo.

<sup>8</sup> A tatalo ala pe anau ala amo ke nek iange lemo ngarang Satan, poi ke pomanga huros inolo e nenge ene laion ke alngana onrungrung pe i rarara ke tangtango mele hel ke teke hunune iri. <sup>9</sup> Pe imo ase i heke i ero, ames ke kerkereng nga letemo manmanna ngana iange a eteia ke titimo mur nenge leteria manmanna nga kileng lochloch ngana nga ich, te amneia melmelenga nenge pomam pule.

<sup>10</sup> Pe NeHalang nenge poi ke urana toto atat nge ita, iua imo nga ume nenge Kristus poia ke atu luluch nge i nga nena lemenga palaungana nenge tu ke koko. Pe imo lape a takisia melmelenga nga etue choro ngana mana, ke het pe NeHalang isipona lape almas heke mule imo pe hekerkereng ia letemo manmanna ngana pe poia imo ke ames ke kerkereng pe poia imo ke atu ke kerkereng nge Kristus. <sup>11</sup> I toro mana kikina ngana tu ke koko. Manmanna.

**5:1-2:** Ioa 21:15-17; Ume 20:28    **5:3:** 2Ko 1:24; Pil 3:17; Tit 2:7    **5:5:** Pro 3:34; Epe 5:21; Iei 4:6  
**5:6:** Mat 23:12; Luk 14:11; Iei 4:10    **5:7:** Mat 6:25-30    **5:8:** 1Te 5:6    **5:9:** Epe 6:11-13; Iei 4:7  
**5:12:** Ume 12:2, 25; 13:13; 15:22, 37-40

*Helenga Hetala Ngana Mur*

<sup>12</sup> Iau e naue ke tira Sailas nanas tau tote Non Soke. Pe i halaua iau ke hasia lek helenga chonna nei, nenge e hele pe e hekerkereng ia imo nge NeHalang nge i non nge poi ke urana toto at nge ita. Ke pomalam ames ke kerkereng nga nei. <sup>13</sup> NeHalang hesilei hote nena hana mur nge Papiilon (Rom) pule ke tetu teu nga NeHalang nena mata ke mange imo. Pe iri te hekule reria apalanga lange imo pule. Pe Makus nenge poi ke manga tuk ia toto hekule nena apalanga lange imo pule. <sup>14</sup> A sisa perimo luluch nge pekngamo mur pe a poia nga NeHalang ene. E hetalaulau amo ke imo lochloch ngana nenge a nana-sia Kristus atu ke nek. Ngana laka lom.

## 2 Petrus Alalaha Nai Ngana Nenge Petrus Hasia

<sup>1</sup> Iau Simon Petrus koi ehas ia alalaha nei. Iau Iesus Kristus nena hekulkulonga nenge e umume nge i. Pe ehas ia alalaha nei ke lange imo nenge NeHalang pe ara Hemasinga Iesus Kristus te heurana ia imo pe te hepengpeng tote imo ke letemo manmanna ngana urana toto ke pomange imem.

<sup>2</sup> E hatalaulau amo ke a etei tote NeHalang pe ara Non Soke Iesus pe nga kue nei NeHalang letena urana ngana pe nena nekinga lape puo ke elela toto nge imo.

### *Iunga Nenge Tatu Ke Pomanga NeHalang Iu Ngana Ia Ita*

<sup>3</sup> Nga Iesus nena kerkerenga palaungana, NeHalang tunge ure lochloch ngana nenge mutera taua ke halaua ita ke tatu ke pomanga NeHalang nena hana mur ita. Pe ta mene ure nemur iange ta eteia NeHalang pe NeHalang iua ita ke la tatu luluch nge i nga nena iechinga palaungana nga nena lemenga. <sup>4</sup> Pe nga nena iechinga pe lemenga nem, NeHalang hele ke teke tunge tunginga urana ngana mur nge papalauna toto at nge ita. Pe tunginga nemur poia ita ke nakura nge ta ua hot nga poinga poreke ngana mur nga ich pe tatu ke ta pengpeng toto ke pomange NeHalang.

<sup>5</sup> Ke pomalam aume ke kerkereng ke letemo manmanna ngana lohot ke urana toto ol. Pe a poia nga kue nei: A talue poinga urana ngana ke la luluch langa letemo manmanna ngana, pe letemo matana ngana la luluch nga lemo poinga urana ngana. <sup>6</sup> Pe poinga nenge a nauele singimo lemene ngana mur, a talue ke la luluch nga letemo matana ngana, pe poinga nenge ames ke kerkereng ke a takisia melmelenga, la luluch

nga poinga nenge a nauele singimo lemene ngana mur. Pe poinga nenge a nanas mene NeHalang lemene ngana, a talue ke la luluch nga poinga nenge ames ke kerkereng ke a takisia melmelenga. <sup>7</sup> Pe poinga nenge apoi ke nek lala nge NeHalang nena hana mur, a talue ke la luluch nga poinga nenge a nanas mene NeHalang lemene ngana, pe poinga nenge mutemo taua hehei pe hana, la luluch nga poinga nenge apoi ke nek lala nge NeHalang nena hana mur. <sup>8</sup> Nenge teke poinga nemur tetu teu nge imo pe tepuo ke kerkereng, lape a etei ngamo nga ara Non Soke Iesus Kristus het sio ero. <sup>9</sup> Pe nenge teke poinga nemur tetu teu nge imo ero, apoi ke pomalaka nge mele nenge matana hit pe es mene ure nenge rochroi mana pe letena metene NeHalang nge helemlem ia i nga nena poinga poreke ngana mur nenge nike ana ero ol.

<sup>10</sup> Ke pomalam titik mur pe lil-iuk mur, aume ke kerkereng toto ol ke NeHalang nena iunga pe hesilei hot ngana ia imo nem lohot ke manmanna. Iange nenge teke apoi ke pomai lape letemo manmanna ngana losio ero toto. <sup>11</sup> Pe lape te hero ele imo pe te mene imo ke ateu langa naualanga pe nekinga ana kileng nenge tu ke koko, nenge ara Hemasinga pe ara Non Soke Iesus Kristus nauele.

### *Helenga Hetatalonga*

<sup>12</sup> Ure nemur te hetore lange imo ke a eteia iri pe a rahite helenga manmanna ngana ke kerkereng nga letemo ke ulolo pe iau e helete metene mulmule imo. <sup>13</sup> Iau e teke urana nge e helete metentene imo nga etue nenge etu ke e maulul kura, <sup>14</sup> iange e eteia ke lape e i hot nga singik nenge ich nei ana ke pomanga ara Non Soke Iesus Kristus hemallaha hot ngana ia at nge iau. <sup>15</sup> Ke pomalam eume ke kerkereng toto ke e teke letemo metene ure

nemur ke kokoes nga etue nenge e mete ke ela lo.

<sup>16</sup> Imem mo nenene ara Non Soke Iesus Kristus at ngana pe nena kerkerenga lala nge imo pe nananga nem mele olou heke mene ero. Iange imem monau tote nga matamem nge lohok ke i non palaungana nga NeHalang nena lemenga. <sup>17</sup> Temere NeHalang hemalmalia i nga nena lemenga pe tal heke tote ke i non palaungana. Pe nga etue nem, NeHalang nenge tualeme toto, nena helenga lohok ke teke, "Tuk toto koi nei, nenge mutek tau tote pe e iech toto nge I!" <sup>18</sup> Ke imem sipomem mo longe helenga nei nge sio at nga tapa, nga etue nenge motu luluch nge i nga hengene nenge NeHalang.

<sup>19</sup> Nenge nei poia imem ke mo eteia ke helenga nenge hetatalonga mur te haliu hotote manmanna. Ke imo, urana nge a longe pe a nanasia ke nek ke pomanga a nanas tau ngamo ia lemenga nenge tualeme nga kileng au ngana. Pe a nanas mene ke la Kileng rir hatalia imo pe Itoch uachuach ana lohaka ke mes nga letemo. <sup>20</sup> Pe e teke a eteia nei ke nek: Helenga hetatalonga mur nenga NeHalang nena alalaha, mele pele nakuna ero toto nge hele urume luria nga i sipona letena matana ngana. <sup>21</sup> Iange helenga hetatalonga lohok nga hetatalonga mur leteria matana ngana mana ero. Iri te haliu hotote NeHalang nena helenga nenge Opepengpeng tunge lala nge iri.

## 2

### *Hetatalonga Pallaklaka Ngana Mur*

<sup>1</sup> Nge nike hetatalonga pallaklaka ngana mur te lohok ke tetu luluch nge hehei pe hana nge Israel, pe heueu nei heteronga pallaklaka ngana mur lape te lohok ke tetu luluch nge imo. Pe lape te hetero koukoua hehei pe hana ke leteria manmanna nge Kristus ero ol. Heteronga pallaklaka

ngana nemur, Kristus mete ke ol mule iri nga poinga poreke ngana kikina ngana, pe iri lemeria ero ia I. Ke iri siporia lape te heporeke mule iri ke ueiuei toto nga reria poinga nem. <sup>2</sup> Hana halang lape te nanasia heteronga pallaklaka ngana nemur reria poinga poreke ngana mur. Ke nem mana lape poia iri nenge leteria manmanna ero ke te hele poreke kue manmanna ngana. <sup>3</sup> Iange heteronga pallaklaka ngana nemur, muteria ke te teke reria umtutuna halang pe lape te tuachong hot laka nge imo, nga reria nananga pa nenge te olou heke mene pe te heleia ke haria urana mana ia. Pe NeHalang amnei teu lange iri nge nike ke ulolo pe tatalo ala mana ke teke heporeke iri ol.

<sup>4</sup> Iange nge nike nga etue nenge angkelo mur te poia poinga poreke ngana, NeHalang renge iri ero. Te kale iri pe tesau sue iri ke tela nga oan nga kileng au ngana pe tema ke te kulele etue nenge NeHalang lape amnei teu lange iri nga reria poinga mur. <sup>5</sup> Pe pule nga etue nenge Noa, hehei pe hana nga ich te longo ole taua NeHalang pe NeHalang renge iri ero pe poia ech ke hot ke taua kileng. Pe I halaua Noa pe iri hel pule nge iri rahtele nai ke te maulul. Noa i non nenge haliu hotote poinga nenge tatu ke pengpeng nga NeHalang matana. <sup>6</sup> Pe pule NeHalang heporeke tuele tana nenge Sotom pe Komora nga nenge hengau lulue nga oan ke het sio toto. NeHalang poia ke pomau ke teke heneue hehei pe hana nenge te longo ole tautaua i. <sup>7</sup> Pe I halaua Lot ke tu ke maulul iange Lot nanasia poinga nge pengpeng. Pe Lot letena meena toto nga salaunga ana poinga poreke ngana nenge hana nenge te longo ole taua NeHalang te popoia. <sup>8</sup> (Lot i non nge urana pe letena meena toto iange kokoes tu luluch nge hehei pe hana nenge te longo ole tautaua NeHalang pe longlonge reria

helenga poreke ngana pe esesia iri nge te popoia poinga poreke ngana.)  
<sup>9</sup> Ke nenge nem manmanna, Non Soke eteia kue nenge mene hote nena hana nemur nenge te longo tautaua i pe eteia kue nenge tunge tuangachol lange hehei pe hana porekreke ngana mur ke la het nga etue nenge NeHalang amnei teu lange hehei pe hana nga reria poinga mur. <sup>10</sup> Ke tuangachol nem lape lohot laka nge iri nenge te popoia poinga poreke ngana nenge singiria lemene tautaua pe te ngailelele NeHalang nena helenga.

Hetoronga pallaklaka ngana nemur palpalria kerkereng, pe te longo ole toto, pe te matau ala aria ero nga nenge te hele porekreke ope palalauna mur nenge tetu nga tapa. <sup>11</sup> Pe angkelo mur te kerkereng toto pe reria kerkerenga palaungana toto nge iri, pe angkelo nemur te matau ala aria nge te hele poreke iri nga NeHalang matana. <sup>12</sup> Hana nemur te hele poreke ure nenge te eteia ero iange tepoi ke pomalaka nga huros inolo ngana mur nenge hana te hunune iri. Ke nga reria poinga nem, lape te hune iri ke pomanga huros inolo ngana nemur. <sup>13</sup> Hana nemur te poia hehei pe hana halang ke te amneia melmelenga pe iri lape te mene tuangachol ke te amneia melmelenga nem pule. Iri te teke te heiech menmene singiria lemene ngana mur, ke te teke urana nge te poi menmene ngaunga matana, pe te inin ech kerkereng ngana nga sinanga. Pe iri te muna ulu toto pe te channanga ala manmana pe lape te poia imo ke a meia imo nga etue nenge te ngau luluch nge imo. <sup>14</sup> Mataria tu manmana nge hehei iange leteria tu mana nga nenge te teke te naue poinga poreke ngana ke kokoes mana. Pe tepoi taole hehei pe hana nenge leteria manmanna ngana mera ero ke teteu tah nga poinga poreke ngana, pe te

etei tote poinga nenge te memeleia mele hel reria urelu. Ke pomalam NeHalang lape tung tote aria melmelenga! <sup>15</sup> Ke hetoronga pallaklaka ngana nemur te lekleke ulu iange te hile kue nge pengpeng ke ulolo. Iri te nanas taua laka ne Peor tuna Palam nena poinga, nenge menmene umtutuna nga nena poinga poreke ngana. <sup>16</sup> Pe tongki nenge hele erochro, heleia hetatalonga nem ke pomanga ita non ke hepengia i nga nena poinga poreke ngana.

#### *Hetoronga Pallaklaka Ngana Mur Aria Melmelenga*

<sup>17</sup> Ke hana nemur tepoi ke pomalaka nga ech matana nenge pach hot ero ol, pe tepoi ke pomalaka nga ulu nenge kileng eingana takis rere menmene. Pe NeHalang tatalo ele kileng au ngana nenge au toto ke reria ia nenge lape tela ke tetu ia. <sup>18</sup> Iri te palut laka rara ia reria helenga nemur nenge luria ero toto pe tepoi taole hehei pe hana hel ke teteu nga salaunga ana poinga. (Ngana laka iri nenge leteria manmanna ngana nge Kristus heueu ngana kura pe te talun heueu mana ke te hile hote helenga pallaklaka ngana mur.) <sup>19</sup> Pe hetoronga pallaklaka ngana nemur te hele lange hehei pe hana ke te teke, "Ute pele nge hechau ele imo ero ol, ai nga lememo ngamo." Te hele ke pomau pe iri siporia tepoi menmene poinga poreke ngana ke mau kolou. Iange mele nenge poipoi poinga poreke ngana, poinga nem hechau ele mene ke poi menmene lo la. <sup>20</sup> Nga tele ngana hehei pe hana lochloch te poia poinga poreke ngana pe poinga poreke ngana nem heporeke iri. Pe te hile hote poinga poreke ngana mur nga ich nei iange te eteia ara Hemasinga pe ara Non Soke Iesus Kristus. Pe nenge teke tepoi mule poinga poreke ngana pe poinga nem hechau ele mule iri, lape poinga poreke ngana nem heporeke

**2:10:** Iut 7-8, 16    **2:11:** Iut 9    **2:12:** Iut 10  
**2:17:** Iut 12-13    **2:20:** Mat 12:45

**2:15:** Num 22:7; Iut 11; Hem 2:14    **2:16:** Num  
**2:21:** Luk 12:47-48



tote iri ol. <sup>21</sup> Iri toinge te eteia kue nenga poinga nge pengpeng ero nike. Nem urana nga nenge te eteia ke ulo pe tehul rumeria mule ia NeHalang nena helenga tapuna ngana nenge te hesue lange iri. <sup>22</sup> Pe ure nenge lohote nge iri nem, henonou hote helenga manmanna ngana nai nga alalaha nenga Arenga Nge Urana (Provep) nenge hele ke teke, “Kaone la mule ke ram heke mutmuta ngana” pe “Kie nenge te lomo sue singina lo, la mule ke mateu nga saka.”

### 3

#### *Non Soke Lape At Mule*

<sup>1</sup> Titik mur pe liliuk mur, nenge nei lek alalaha nai ngana ol koi nenge ehas ia lange imo. Ehas ke iri nai ke e teke epoi heke letemo ke tuanin ke nek pe letemo metene mule ure nemur. <sup>2</sup> Letemo metene NeHalang nena hetatalonga mur reria helenga nenge te hele ia nge nike. Pe pule letemo metene ara Non Soke pe ara Hemasinga nena helenga nenge hekulkulonga mur te hele ia lange imo.

<sup>3</sup> Ure nenge palaungana toto ngana koi nei: Nga etue nemur nenge lala nga etue hetala ngana, hana nenge te nanas tau menmene singiria lemene ngana poreke ngana mur lape te lohote. Pe lape te melmel lilia imo <sup>4</sup> pe te hele ke te teke, “Amo Soke hele ke teke at mule nga ich nei. Ke i kalou? Imem lememe tete mur kou te mete tatah lo, pe ute i lohote ero mana kura mai. Ure lochloch ngana tetu ke nakuria elle mana nga NeHalang alahote ngana ia tapa pe ich nike!” <sup>5</sup> Pe ero. Iri te hele ke pomam iange lemeria ero ia ure nemur nenge lohote ke manmanna nge nike: Ngana laka nenge NeHalang ala hote tapa pe ich. Ke NeHalang hele mana pe ich lohote nga ech ke are nga ech tunangana. <sup>6</sup> Pe nga NeHalang nena helenga, ech

nem kon haka ke taua kileng pe heporeke tote ich nenga tele ngana ana. <sup>7</sup> Pe tapa pe ich nenge tetu heueu nei, NeHalang nena helenga nem rahit ele iri ke te kulele etue nenge amnei teu langa hehei pe hana reria poinga mur pe heporeke iri nga nenge hengau lulue iri nga oan. Nga etue nem hehei pe hana nenge te longo olole lape tehet.

<sup>8</sup> Pe titik mur pe liliuk mur, letemo lilil ele ure elle nei ero: Nga Non Soke letena tuanin ngana, etue elle pomalaka nga hesinga iri ana non kina lime iri analoch (1,000). Pe hesinga iri ana non kina lime iri analoch, (1,000) pomalaka nga etue elle. <sup>9</sup> Ure nenge Non Soke teke poia ke lohote ke nanasia nena tomunga hel ana helenga, i lape poi hulul ia ero. Pe mele hel lape leteria tuanin ke te teke Non Soke poi hulul mana pai. Pe i kulelele imo kura la, iange letena toto ia imo pe lemene ero nge mele mete pe erue ke lasus mana. I lemene toto ke teke hehei pe hana lochloch te hulua iri nga reria poinga poreke ngana mur pe tela mule nge i. <sup>10</sup> Pe etue nenge Non Soke at mule ia, lape at ke pomalaka nga non nenge kemkeme pe mele pele eteia ero. Nga etue nem tapa sana lape hau hot ke palaungana toto pe erue sio mana ke la. Pe ure lochloch ngana nenge tetu nga lut, oan lape ngaulele iri pe ich pe ure lochloch ngana nenge tetu nga ich, oan lape ngaulele iri pule.

<sup>11</sup> Ke ure lochloch ngana lape te poreke pe tehet ke pomai pe imo hehei pe hana nemam, a teke imo utar? Urana nge a hepeng ia leminga mur pe a nanas mene NeHalang. <sup>12</sup> Apoi ke pomam pe a kulkul elele NeHalang ana etue, pe a heueiuei mene etue nem ke at ke ueiuei. Etue nem lape at pe oan ngaulele tapa sana pe milang ngana poia ure lochloch ngana nenge tetu nga lut ke te lele ke pomanga ech pe

**2:22:** Pro 26:11    **3:2:** Iut 17    **3:3:** 1Ti 4:1; Iut 18    **3:4:** Mat 24:48    **3:5:** Gen 1:6-9    **3:6:** Gen 7:11; 2Pi 2:5    **3:8:** Psa 90:4    **3:9:** Hab 2:3; 1Ti 2:4    **3:10:** Mat 24:29, 35; Luk 12:39; 1Te 5:2  
**3:13:** Isa 65:17; 66:22; Hem 21:1, 27

te chacharuch ke tehet. <sup>13</sup> Pe ita ta rahite NeHalang nena tomunga hel ana helenga. Ke pomalam ta kulkulele mene tapa pe ich heueu ngana, nenge NeHalang nena hana nemur nenge te pengpeng reria kileng ia.

<sup>14</sup> Ke titik mur pe liliuk mur, nga etue nenge a kulkul elele ure nei, aume ke kerkereng ke Non Soke hot-taua lemo poinga poreke ngana e ero, pe heleia imo nga poinga poreke ngana e ero pule. Atu ke nek pe letemo elle luluch nge I. <sup>15</sup> Letemo metene ke nek, Non Soke kulala kura iange lemene ke teke hehei pe hana te hulua reria poinga mur pe mene mule iri lochloch. Nga alalaha nenge NeHalang tunge lete matana urana ngana lange tira Paulus ke hasia lange imo, hele ke pomalam pule.

<sup>16</sup> Ke Paulus hasia nena alalaha mur pe heleleia koi ure nemur. Pe ute hel nga Paulus nena alalaha nemur, anali nge ta eteia luria mur. Ke pomalam hana nenge te mene henge-toro nga NeHalang nena helenga ero, pe leteria manmanna ngana la peng-peng ero, te hele chach hote helenga nemur luria ke mallaha hot ero. Pe te poia ke pomalam nga NeHalang nena alalaha hel pule. Pe iri siporia te heporeke tote iri nga reria poinga nem.

<sup>17</sup> Pe imo titik mur pe liliuk mur, a eteia ure nemur ke ulolo. Pomalam anau ala amo ke nek, ma lape a losio nga letemo manmanna ngana nenge ames ia heueu nei. Pe a nanasia hana nenge te longo ole tautaua NeHalang reria hengetoro pallaklaka ngana mur ero. <sup>18</sup> Ita ara Hemasinga laka ara Non Soke Iesus Kristus pe apuo ke kerkereng ke kokoes, nga nena poinga urana toto ngana pe nga letemo matana ngana nge I. Lape hehei pe hana te heto hekeke ene nenge palaungana toto heueu pe koko! Manmanna.

# 1 Ioanes Alalaha Elle Ngana Nenge Ioanes Hasia

## *Helenga Nenga Maulinga*

<sup>1</sup> Helenga nenge tunge maulinga, tuke maulul tala nike nga talun ngana toto. Ke imem mo helele ia laka I nenge I helenga nem. Imem mo longe pe mo esia I nga matamem. Pe mo esia I ke manmanna pe mora haka nga singina pule. <sup>2</sup> Pe Helenga nenga maulinga nei, lohot nga mallaha ke mo esia ke ngana koi nenge mo heleia lala nge imo nei. Pe maulinga ke koko nei tu luluch nge Temene pe lohot ke mallaha nge ita. <sup>3</sup> Imem mo hele lange imo nge I nenge mo esia pe mo longe ke imo pule pekngamo imem, iange imem pekngamem Temere pe Tuna Iesus Kristus. <sup>4</sup> Imem mohas sue ure nemur pe lape ta iech toto ia.

## *NeHalang I Lemenge Ke Ita Pule Tai Nga Lemenge*

<sup>5</sup> Imem mo longe helenga manmanna ngana e nge Kristus heleia pe heueu mo haliu hote lange imo. Ana helenga koi nei: NeHalang I lemenga nenge tualeme manmana pe kileng au hite I ero toto. <sup>6</sup> Pe nenge ta teke pekngara NeHalang pe nga tatu ngara taii nga chantom kura, nem ta channanga mana pe ta nanas ia Helenga Manmanna Toto Ngana ero. <sup>7</sup> NeHalang tunga lemenga ke pomalam ita pule tai nga lemenga. Ke nga poinga nei lape ita lochloch ita elle mana. Pe Tuna eina lape helelem ia ita nga poinga poreke ngana mur lochloch.

<sup>8</sup> Pe nenge ta hele ke ta teke poinga poreke ngana e tu teu nge ita ero, nem ta channanga mule ita pe poinga manmanna ngana tu teu nge ita ero. <sup>9</sup> Pe nenge teke ta hele hote rera

poinga poreke ngana mur, NeHalang lape saua rera poinga poreke ngana mur ke te lasus toto iange I non nge pengpeng toto. Saua rera poinga poreke ngana mur pe helelemia ita nga ure poreke ngana mur. <sup>10</sup> Pe nenge ta hele ke ta teke ta poia poinga poreke ngana e ero, nem ta teke NeHalang i non nenge pallaka hali. Pe lape nena helenga mur tetu teu nge ita ero.

## 2

### *Ara Halaunga Laka Kristus*

<sup>1</sup> Tutuk mur, ehas ia alalaha nei lange imo ke a poia poinga poreke ngana e ero. Pe nenge teke ta poia poinga poreke ngana mur, ara halaunga ana none lape hele ala ara nge Temene. Ngana laka Non nge Pengpeng toto nenge ene Iesus Kristus. <sup>2</sup> Iange mete ke I sipona I tunginga nenge helelem mule ita pe hulua lochloch ngana nga ich nga rera poinga poreke ngana mur.

### *Iri Nenge Te Etei Tote NeHalang Te Nanasia Nena Poinga*

<sup>3</sup> Nenge teke ta longo taua NeHalang nena hotonga mur, nem henonou hote ke mallaha nge ta eteia I ke ulolo. <sup>4</sup> Pe nenge teke mele hele ke teke eteia NeHalang pe nanasia nena hotonga mur ero, mele nem channanga ke het lo iange poinga manmanna ngana tu teu nge i ero. <sup>5</sup> Pe mele nenge longo taua NeHalang nena helenga mur, mutena tau tote NeHalang. Nga kue nei ta eteia ke NeHalang nena non mur toto ita: <sup>6</sup> Nenge teke mele hele ke teke NeHalang nena non i toto iok, nanas tau tote poinga nenge Kristus.

### *Hotonga Heueu Ngana*

<sup>7</sup> Pekngak mur, ehas ia hotonga heueu ngana e lange imo ero koi. Helenga nei, i helenga nike ngana ia nenge a longlonge nge nike ke ulolo. <sup>8</sup> Pe heueu nei hotonga nei nakuna

heueu ngana kura. Iange helenga nei nganangana, ta naue nge lohot ke manmanna nge Iesus pe nge imo pule. Iange kileng au ngana het sisio pe lemenga toto ngana at lo.

<sup>9</sup> Mele nenge hele ke teke tuteu nga lemenga lo pe mutena taua tina ero, mele nem tu teu nga kileng au ngana kura. <sup>10</sup> Mele nenge mutena taua tina, tu teu nga lemenga pe lape losio mule nga poinga poreke ngana hel ero ol. <sup>11</sup> Pe mele nenge mutena taua tina ero tu teu nga kileng au ngana pe i rara manmana nga kileng au ngana kura. Pe eteia langa ngana ero iange kolkol nga au.

<sup>12</sup> Tutuk mur, imo nenge kinkino ehas lala nge imo iange nga Kristus ene, NeHalang saua lemo poinga poreke ngana mur ke te lasus toto ke ulolo.

<sup>13</sup> Pe ehas lange imo tetemeria mur pule iange imo a eteia I nenge tu tala nge nike nga ure lochloch te talun ngaria.

Pe ehas lange imo lolomele mur pule iange a hekou sue non poreke ngana ke ulolo.

Ehas lange imo kinkino ngana iange a eteia Temere ke ulolo.

<sup>14</sup> Ehas lange tetemeria mur imo iange a eteia I nenge tu tala nike nga ure lochloch te talun ngaria.

Ehas lange imo lolomele mur iange a kerkereng pe NeHalang nena helenga tu teu toto nge imo pe a hekou sue non poreke ngana ke ulolo.

<sup>15</sup> Ich nei pe ure mur nenga ich nei, mutemo taua ero. Mele nenge letena tu hit mene ich nei mutena taua Temere ero. <sup>16</sup> Poinga lochloch ngana nenga ich nei ngana laka: singira lemene ngana nga poinga

poreke ngana mur nga ich, pe nenge lemene taua ure lochloch nenge tae-sia nga matara. Pe nenge ta heto heke totote ita nga rera ure mur nga ich nei. Poinga nemur te lohot mana nga ich nei pe elle nge iri at nge Temere ero toto. <sup>17</sup> Ich nei pe ana poinga poreke ngana mur lape tehet. Pe mele nenge nanasia NeHalang lemene ngana lape tuke kokoes mana.

### *A Nauala Amo Nge Kristus Nena Ngarang Mur*

<sup>18</sup> Tutuk mur, ta tutu nga etue hetala ngana mur lokoi. Pe lape a longe Kristus nena ngarang nge lape at. Pe heueu nei, iri halang teat ke ulolo. Ke pomalam a eteia ke etue hetala ngana mur koloi. <sup>19</sup> Pe Kristus nena ngarang nemur ita pekn-gara mur ia iri mukam iange tetu luluch nge ita. Pe iri tetu teu toto nge ita ero iange te ua hot tala ara nike. Toinge tetu teu toto nge ita ke manmanna lape tetu luluch nge ita kura. Pe iri te ua hot ara lo ke nga poinga nem ta eteia nge iri lochloch tetu teu toto nge ita ero. <sup>20</sup> Pe imo a mene Tuangaola nga Opepengpeng pe a eteia helenga manmanna ngana ke ulolo. <sup>21</sup> Pomere? A teke ehas lange imo iange a eteia helenga manmanna ngana ero? Pa nem ero! Imo a eteia ke ulolo ke ngana koi nenge ehas lange imo. Iange helenga manmanna ngana nem pallaklaka ia ute e ero toto. <sup>22</sup> Pe itei toto nenge pallaka hali? Mele nenge pallaka hali laka nenge hele ke teke Iesus I Kristus ero. Ke mele nem i Kristus nena ngarang ia iange hul rumena ia NeHalang iri nai Tuna. <sup>23</sup> Iange mele nenge hul rumena ia NeHalang Tuna, hul rumena ia NeHalang pule. Pe mele nenge hele ke teke letena manmanna nge NeHalang Tuna nge I Kristus, mele nem tu teu toto nge NeHalang pule.

<sup>24</sup> Hengetoro nemur nenge a longo tele pe letemo manmanna nge Iesus,

a rahite ke kerkereng. Nenge teke apoi ke pomam ke kokoes lape atu teu toto nge NeHalang pe Tuna ke kokoes pule. <sup>25</sup> Pe lape tunge maulinga ke koko at nge ita ke pomanga helenga kerkereng ngana nenge Tuna heleia ke ulolo.

<sup>26</sup> Pe ehas ia alalaha nei lange imo iange e teke e helete metene imo nge iri nemur nenge te teke te hekoukou ele imo ke a nanasia poinga poreke ngana. <sup>27</sup> Pe Tuangaola nenga Opepengpeng nenge Iesus tunge lange imo, i amo heteronga ia pe ngana la tu teu nge imo ke ulolo. Pe a mene hengetoro nge mele ero ol, iange I hetore imo nga ure lochloch. Pe ure nemur nenge hetoro imo ia, manmanna pe pallaklaka ia ero. Pe a rahite nena hengetoro mur ke kerkereng, pomalam lape atu luluch nge Kristus ke koko.

<sup>28</sup> Oe tutuk mur, a talue letemo ke ma ke elle luluch nge Kristus ke kokoes. Pomalam lape tames nga matana nga etue nenge at muleia pe sara loiloero pe ta meia ita ero.

<sup>29</sup> Imo a eteia ke Kristus I non nge pengpeng. Pe mele hel nenge te popoia poinga nge pengpeng NeHalang tutuna mur ia iri.

### 3

#### *NeHalang Tutuna Mur Ita*

<sup>1</sup> A naue lo! Temere mutena tau tote ita, pomalam heto tutuna mur ia ita. Pe manmanna toto ke NeHalang tutuna mur ita! Pe hehei pe hana nga ich nei te eteia NeHalang ero, pomalam te eteia ita ero pule. <sup>2</sup> Pekngak mur, heueu nei NeHalang tutuna mur ita ke ulolo. Pe tatu ngara nge he, mallaha hot ke nek nge ita ero kura. Pe ita ta eteia ke nga etue nenge Iesus at mule, lape tapoi ke pomange I. Iange nga etue nem lape tanau tote I nga matara. <sup>3</sup> Pe imo nenge letemo manmanna nge Kristus pe a kulala

tote I, a helemlem tote imo ke pomange I nge lemlem toto.

<sup>4</sup> Iri lochloch nenge te popoi poinga poreke ngana te nanasia NeHalang nena hotonga ero. Iange poinga poreke ngana hira ele tote NeHalang pe nena hotonga mur. <sup>5</sup> Imo a eteia ke Kristus at ngana nem, at ke sauera rera poinga poreke ngana mur ke te lasus toto. Iange poinga poreke ngana e tu teu nge I ero toto. <sup>6</sup> Pe mele nenge tu teu toto nge I ke kokoes lape tu teu mule nga poinga poreke ngana e ero ol. Pe mele nenge popoi poinga poreke ngana ke kokoes, naue Kristus ero kura pe eteia I ero pule.

<sup>7</sup> Tutuk mur, a longo taua mele nenge teke poi taole imo langa poinga poreke ngana ero. Mele nenge poia poinga nge pengpeng, mele nem i non nge pengpeng. Pomalam mana nge Kristus nge I non nge pengpeng. <sup>8</sup> Pe mele nenge popoi poinga poreke ngana, non poreke ngana nena non ia. Iange non poreke ngana popoi poinga poreke ngana nga kileng nei talun ngana nika. Pe NeHalang Tuna at ngana nem, at ke heparai sue non poreke ngana nena ume mur. <sup>9</sup> Pe iri nenge NeHalang tutuna mur ia iri, te poia poinga poreke ngana ero iange te nanas tau tote tetu ngaria heueu ngana nenge NeHalang tunge lange iri. Pe te poia poinga poreke ngana e ero ol iange NeHalang tutuna mur iri ke ulolo. <sup>10</sup> Nga kue nei ta etei mellehe itei hel toto nenge NeHalang tutuna mur ia iri, pe pule ta etei mellehe itei hel toto nenge non poreke ngana tutuna mur ia iri. Iange iri nenge te poia poinga e nge pengpeng ero pe muteria taua titiria mur ero, iri nem NeHalang tutuna mur ia iri ero.

#### *Mutera Taua Pekngara Mur*

<sup>11</sup> Helenga nei a longlonge nge nika ke ulolo nenge hele ke teke, "Mutera taua pekngara mur." <sup>12</sup> Pe tapoi ke mange Kaen ero. Iange Kaen, non



poreke ngana nena non ia, pomalam hun mule tina. Pe pomere nenge hune tina? Hune tina iange tina i non nge pengpeng pe i na poinga poreke.

<sup>13</sup> Titik mur, nenge teke hana nga ich nei muteria taua imo ero, ngamo lohote ero. <sup>14</sup> Nenge teke mutera taua titira mur, ta eteia ke tai hot nga metenga ana kue pe ta mene maulinga ke ulolo. Pe mele nenge mutena taua pekngana mur ero, mele nem tutu nga metenga ana kue kura. <sup>15</sup> Mele nenge mutena taua tina e ero, mele nem hunun hana. Pe iri nenge te hunun hana, ta eteia ke maulinga ke koko tuteu nge iri ero.

<sup>16</sup> Ita ta eteia ke mutenga luna toto mai koi: Iesus Kristus hile hote I sipona ke mete ke halaua ita. Ke pomalam ita pule ta hile hote ita sipora ke ta halaua pekngara mur. <sup>17</sup> Nenge teke rera ure halang pe ta naue pekngara e nge nena ure ero ta halaua i. Pe nenge teke ta halaua i ero mutera taua NeHalang ero. <sup>18</sup> Tutuk mur, mutera taua pekngara mur pe ta poia ana ume ke lohote ke manmanna ke ta halaua iri. Ta hele mene nga harra ero.

#### *Sara Loiloi Nga NeHalang Matana Ero*

<sup>19</sup> Pomalam lape ta eteia ke ta rahit tote helenga manmanna ngana. Pe pule, nga etue nenge tames nga NeHalang matana sara loiloi ero. <sup>20</sup> Pe nenge teke letera nge teu helete metene ita nga poinga poreke ngana mur, lape sara loiloi ia ero nga NeHalang matana. Iange I palaungana toto nga sara loiloi ngara nem pe I eteia ure lochloch.

<sup>21</sup> Pekngak mur, nenge teke letera nge teu poia ita ke sara loiloi ero, tames nga NeHalang matana pe ta matau ero. <sup>22</sup> Pe ure lochloch ngana nenge ta hetalaulau pe ta onteia nge I, lape tunge atat nge ita iange ta longo taua nena hotonga mur pe ta poia I ke iech nga rera poinga urana

ngana mur. <sup>23</sup> Iange NeHalang nena hotonga hele ke teke: “Letera manmanna nge Tuna Iesus Kristus pe mutera taua pekngara mur.” <sup>24</sup> Iri nenge te rahite NeHalang nena hotonga mur tetu teu toto nge NeHalang pe NeHalang tu teu toto nge iri. Pe ita ta eteia ke mere toto nge NeHalang tu teu toto nge ita? Ta eteia nga Opepengpeng nenge tunge at nge ita.

## 4

### *Ope Nenge Urana Pe Ope Nenge Poreke*

<sup>1</sup> Titik mur pe liliuk mur, hana nenge te pallaklaka ke iri hetatalonga, tei hot ke te ronge ich lochloch ngana ke ulolo. Pe letemo manmanna nga reria helenga ero nga nenge te teke, Opepengpeng tungtunge helenga mur lala nge iri. Pe urana nge a olleke tele ope nemur. Lape teat nge NeHalang ma ero? <sup>2</sup> Iri nemur nenge te hele ke te teke Iesus Kristus lohote ke I non, ta eteia ke NeHalang Opene tu nge iri pe teat nge NeHalang. <sup>3</sup> Pe iri nenge ope e nge altoto tu teu nge iri, te hele urume Iesus ke pomau ero. Pe ope nem Kristus nena ngarang ia. I laka nenge a longe pingana nenge te teke atat. Pe heueu nei ngana koi at ke tunga ich ke ulolo.

<sup>4</sup> Tutuk mur, imo NeHalang tutuna mur ia imo pe a hekou sue hana nenge te channangnanga ke te teke iri hetatalonga mur ke ulolo. Iange NeHalang Opene nenge tu teu nge imo nem na kerkerenga palaungana toto nge non poreke ngana nenge tu teu nge iri nenga ich nei. <sup>5</sup> Ke iri nenge te pallaklaka ke iri hetatalonga nem, te hele menmene ure nemur nga ich iange reria nga ich, pe hehei pe hana nga ich te longo lala nge iri. <sup>6</sup> Pe imem, NeHalang tutuna mur imem. Ke mele nenge eteia NeHalang longo atat nge imem. Pe mele

3:13: Ioa 5:18-19

3:14: Ioa 5:24

3:15: Hem 21:8

3:16: Ioa 13:1; Kal 1:4

3:17: Deu 15:7

3:18: Iei 2:15-16

3:21: Hip 4:16

3:23: Ioa 6:29; 13:34

3:24: 1Io 4:13

4:1: Mat 7:15;

1Te 5:21; 1Io 2:18; 2Io 7

4:2: 1Ko 12:3

4:3: 1Io 2:18

4:4: Mat 12:29;

4:5: Ioa 8:47; 15:19

nenge NeHalang tuna ia ero longo at nge imem ero. Ke pomalam ta etei mellehe Ope urana ngana nenge manmanna pe ope poreke ngana nenge pallaklaka.

### *NeHalang Mutena Tau Tote Ita*

<sup>7</sup> Pekngak mur, mutera taua pekngara mur iange mutenga huna nge NeHalang. Mele hel nenge muteria tautaua pekngaria mur te eteia NeHalang pe NeHalang tutuna mur ia iri. <sup>8</sup> Mutenga huna nge NeHalang ke mele nenge mutena taua pekngana mur ero eteia NeHalang ero. <sup>9</sup> Pe NeHalang hemallaha hote poinga nenge mutena taua ita. Ngana laka nenge kulosia Tuna elle nem ke sio at nga ich ke ta mene maulinga nge I. <sup>10</sup> Ita mutera tau tele NeHalang ero. Mutenga toto pomai koi: NeHalang mutena tau tele ita pe kulosia Tuna at ke mete pe helemlem mule ita nga rera poinga poreke ngana mur. <sup>11</sup> Pekngak mur, NeHalang mutena tau tote ita ke pomai ke ulolo. Ke pomalam urana nge ita pule mutera taua pekngara mur. <sup>12</sup> Mele pele esia NeHalang nakuna ero toto. Pe nenge teke mutera tau helel, NeHalang tu luluch toto nge ita ke mutera taua I ke pomange I nge mutena tautaua ita.

<sup>13</sup> Pe ta eteia ke tatu luluch nge NeHalang pe I tu luluch nge ita, iange tunge Opene at nge ita. <sup>14</sup> Temere kulosia Tuna ke mene mule hehei pe hana nga rera poinga poreke ngana mur. Pe imem mo heleia iange mo naue ke ulolo. <sup>15</sup> Pe mele nenge haliu hot ke teke Iesus I NeHalang Tuna, lape NeHalang tu luluch nge i pe i tu luluch nge NeHalang. <sup>16</sup> Pe ita letera manmanna iange ta eteia ke NeHalang mutena tau tote ita.

NeHalang I Mutenga ana Non. Mele nenge mutena taua pekngana mur tu luluch nge NeHalang pe NeHalang tu luluch nge i. <sup>17</sup> Ke nga poinga nei mutera taua I ke pomange I nge mutena tautaua ita.

Ke pomalam lape sara loiloi ero nga etue nenge NeHalang amnei teueu nga rera poinga mur. Iange tatu nga ich nei pe ta poi ke mange I. <sup>18</sup> Nenge teke poinga nenge mutera taua pekngara mur tu ke kerkereng toto nge mele, poinga nem helope hote mataunga pe mataunga nem tu teu nge mele nem ero ol. Mataunga luna toto ma ke mai koi: Nenge teke mele eteia nge lape mene melmelenga palaungana, nenge nem lape poia mele nem ke matau. Pe mele nenge matau, ta eteia ke poinga nenge mutena taua pekngana mur tu ke kerkereng nge i ero kura.

<sup>19</sup> NeHalang mutena tau tele ita. Pomalam ita mutera taua pekngara mur. <sup>20</sup> Nenge teke mele hele, "Tau mutek taua NeHalang" pe mutena taua tina ero, mele nem channanga ke ulolo. Iange i esia tina nga matana pe mutena taua ero. Pe kolkolia NeHalang pe lape mutena taua NeHalang ke merei? <sup>21</sup> Hotonga nenge NeHalang tunge at nge ita ma ke mai koi; "Mutemo taua NeHalang pe mutemo taua pekngamo mur pule!"

## 5

### *Letera Manmanna Nge NeHalang Tuna*

<sup>1</sup> Iri nenge leteria manmanna nge Iesus nge I Kristus, NeHalang tutuna mur ia iri. Pe iri nemur nenge muteria taua temere, lape muteria taua tutuna mur pule. <sup>2</sup> Ke nenge teke mutera taua NeHalang pe ta longo taua nena hotonga mur, ta eteia ke mutera taua tutuna mur pule. <sup>3</sup> Pe nenge teke mutera taua NeHalang, urana nge ta longo taua nena hotonga mur. Pe nena hotonga mur te meena nge ita ero. <sup>4</sup> Pe iri nemur nenge NeHalang tutuna mur ia iri te hekou susue poinga poreke ngana mur nga ich nei ke ulolo. Pe letera manmanna ngana, i ure nenge hekou susue poinga poreke ngana nemur.

<sup>5</sup> Ke itei toto nenge hekou sue poinga poreke ngana nga ich nei? Ngana laka i nenge letena manmanna nge Iesus nge I NeHalang Tuna.

### *Helenga Mallaha Ngana Nenge Heleleia Iesus Kristus*

<sup>6</sup> Iesus Kristus at nga kue nenge ech pe toho. Pe I at nga ech mana ero. At nga ure nai nem. Pe Opepeng-peng hele urume Iesus Kristus ke pomai, iange Opepengpeng I sipona I helenga manmanna ngana. <sup>7</sup> Ke ure mol nei te hele urume tote I. <sup>8</sup> Opepengpeng pe ech pe toho. Ure mol nei te hele ke te teke Iesus I NeHalang Tuna. <sup>9</sup> Kokoes ta longe hana mur reria helenga pe letera manmanna ia. Pe NeHalang na helenga i ure nenge palaungana toto iange i sipona heleia. Pe I hele urume Iesus lo nge I Tuna ia toto. <sup>10</sup> Ke mele nenge letena manmanna nge NeHalang Tuna, letena manmanna nga NeHalang nena helenga ke ulolo nenge hele urumrume Tuna. Pe mele nenge letena manmanna nga NeHalang na helenga nem ero, teke NeHalang I non nge pallaklaka. Iange NeHalang i sipona heleia. <sup>11</sup> Pe ana helenga lohote ke pomai koi: NeHalang tunge maulinga ke koko at nge ita. Pe maulinga nem at nge Tuna. <sup>12</sup> Ke mele nenge letena manmanna nge NeHalang Tuna mene maulinga nei ke ulolo. Pe mele nenge letena manmanna nge NeHalang Tuna ero mene maulinga nei ero toto.

### *Maulinga Ke Koko Tunge Iesus*

<sup>13</sup> E hasia ure nemur lange imo nenge letemo manmanna nge NeHalang Tuna. Ke pomalam lape a eteia ke nek toto nge a mene maulinga ke koko ke ulolo. <sup>14</sup> Pe nenge teke ta hetalaulau lange NeHalang letera nachnai ero. Iange ta eteia ke lape NeHalang longo at nge ita, nenge teke ta onteia I nga ure nemur nenge nanasia I lemene ngana. <sup>15</sup> Pe nenge

teke ta eteia ke kokoes NeHalang longlonge rera onteinga mur, ta eteia ke lape ta mene ure nemur nenge ta ontei I ia.

<sup>16</sup> Nenge teke mele naue tina nge poia poinga poreke ngana nenge uruna metenga ero, hetalaulau ana lange NeHalang. Pomalam lape tunge maulinga lange tina nem. Pe iri nenge te poia poinga poreke ngana nenge uruna metenga, hetalaulaunga nei halaua iri ero toto. Ke iri nenge te poia poinga poreke ngana nenge uruna metenga, e hele teu laia ero. <sup>17</sup> Poinga poreke ngana mur lochloch te poreke nga NeHalang matana. Pe poinga poreke ngana hel, hehei pe hana te mete hotia ero.

<sup>18</sup> Ita ta eteia ke iri nenge NeHalang tutuna mur te popoi poinga poreke ngana ero. Iange NeHalang Tuna nauele iri ke nek pe non poreke ngana heporeke iri ero. <sup>19</sup> Iange non poreke ngana nauele ich nei lochloch. Pe ita ta eteia ke NeHalang tutuna mur ita ke ulolo. <sup>20</sup> Pe pule ta eteia ke NeHalang Tuna at ke tunge letera matana ngana ke ta eteia NeHalang nge I manmanna. Pe ita tatu teu luluch nge NeHalang nge I manmanna iange letera manmanna nge Tuna Iesus Kristus. Iesus I NeHalang ke manmanna pe I maulinga ke koko.

<sup>21</sup> Ke tutuk mur, aheo ele tote imo nga aetapuna mur.

## 2 Ioanes Alalaha Nai Ngana Nenge Ioanes Hasia

### *Ta Rahite NeHalang Nena Helenga Ke Kerkereng*

<sup>1</sup>Iau nenge iau mukmuka nga mata nenge NeHalang koi ehas ia alalaha nei.

Oe hei nem, ehas lange iong pe tututum mur nenge NeHalang henonou hote ke nena ia. Iau mutek tau tote imo ke manmanna. Pe iau toro mana ero. Iri nenge te eteia Helenga Manmanna Toto Ngana muteria taua imo pule. <sup>2</sup>Pe imem mutemem taua imo iange Helenga Manmanna Toto Ngana tu teu nge ita, pe lape tu luluch nge ita nga etue lochloch.

<sup>3</sup>Nenge teke ta rahite helenga manmanna toto ngana nem ke kerkereng pe mutera taua pekngara mur, Temere NeHalang pe Tuna Iesus Kristus lape te tunge halaunga palaungana at nge ita pe leteria ia ita pe te hemaluche letera ke ma ke nek.

### *Mutera Taua Pekngara Mur*

<sup>4</sup>Iau e iech toto iange e longe tutum mur hel, te nanasia Helenga Manmanna Toto Ngana ke ulolo ke pomanga Temere hele ngana. <sup>5</sup>Pe hei nem, heueu e teke e hele lange iong ke mutera taua pekngara mur. Helenga nenge ehas ia nei i hotonga heueu ngana ia ero. I hotonga nika ngana nenge ta longo tettele ke ulolo.

<sup>6</sup>Pe mutera taua NeHalang ke pomai koi: Ta nanasia nena hotonga mur. Na helenga nenge ta longe nge nika hele ke teke, ta nanasia poinga nenge mutera tautaua pekngara mur.

### *Ta Rahite Kristus Nena Helenga Ke Kerkereng*

<sup>7</sup>Hana nenge te pallaka hali iri halang tetu nga ich nei ke ulolo. Iesus Kristus lohote ke I non. Pe hana nemur te hetoro ke te teke Iesus Kristus

lohote ke I non ero. Ke hana nemur nenge pomai, te pallaka hali pe Kristus nena ngarang mur ia iri. <sup>8</sup>Pe imo lape a mene urumo lochloch iange aume ke kerkereng toto ke ulolo. Pe ames ke kerkereng pe anau ala amo ke nek iange lape a mene urumo nem ero.

<sup>9</sup>Iri nenge te rahite Kristus na helenga ke kerkereng ero pe te tamu tele langa helenga e, NeHalang tu luluch nge iri ero. Pe iri nenge te rahite Kristus nena helenga ke kerkereng, Temere NeHalang pe Tuna tetu luluch nge iri. <sup>10</sup>Nenge teke mele lange imo pe hetoro ngana altoto nga Kristus nena hengetoro mur, a apala hote i ero. Nem pe a mene teua i langa lemo pele ero. <sup>11</sup>Pe mele nenge apala hote i halau teu nga nena ume poreke ngana ke ulolo.

### *Helenga Hetala Ngana Mur*

<sup>12</sup>Iok, lek helenga halang tetu kura nge e teke e heleia lange imo. Pe lemek ero nge ehas ia nga hasinga eina nga alalaha. E teke ela ke e lohote nge imo pe e heleia lange imo. Pomalam lape ita lochloch ta iech toto ke elle.

<sup>13</sup>Iok, tim e pule nga iri mata nenge NeHalang henonou hote nga lamai, i pe tutuna mur te hekule reria apalanga lange iong pule.

## 3 Ioanes Alalaha Mol Ngana Nenge Ioanes Hasia

### *Ta Halaua Hana Nenge Te Rahite NeHalang Ana Ume*

<sup>1</sup> Iau nenge iau mukmuka nga mata nenge NeHalang koi ehas ia alalaha nei.

Neingak Kaius, ehas ia alalaha nei ke lange iong iange mutek tau tote iong.

<sup>2</sup> Neingak, e hetalaulau am ke lem kilanga urana pe ure lochloch ngana nenge o popoia lape te urana pe otu ke nek ke pomanga opem nge tu ke urana mana. <sup>3</sup> Iau e iech toto iange titira mur hel teat pe te heleia iong at nge iau. Te hele ke te teke letem manmanna nga Helenga Manmanna Toto Ngana pe o nanasia ke kokoes. <sup>4</sup> E longe tutuk mur imo nge a nanasia Helenga Manmanna Toto Ngana pe e iech toto ia. Ute pele nge poia iau ke e iech ke pomam ero ol.

### *Kaius Poia Ume Urana Ngana*

<sup>5</sup> Neingak, iong o nanas tau tote poinga nenga Helenga Manmanna Toto Ngana ke o halau totote titira mur pe mele hel pule nenge o eteia iri ero. <sup>6</sup> Hel nge iri te heleia lem poinga nenge o neknek ia iri lange NeHalang nena hana mur. Urana nge o halaua iri nga ngaunga pe ute hel pule ke tei pe te poia NeHalang ana ume. Poinga nenge pomai NeHalang iech toto ia. <sup>7</sup> Iri tei ke te poia Kristus ana ume pe hehei pe hana nenge leteria manmanna nge NeHalang ero, te halaua iri nga umtutuna unne ero. <sup>8</sup> Ke pomalam urana nge ta halaua hana nenge pomam. Nga poinga nem ta halaua teu pule nga ume nenge te popoia, nenge teii ke te haliu hotote Helenga Manmanna Toto Ngana.

### *Ne Tiotrepes Poia Poinga Poreke Ngana*

<sup>9</sup> Pe ehas ia alalaha e ke lange NeHalang nena hana mur nga lem kileng ke ulolo. Pe ne Tiotrepes nge teke i mukmuka nge imo, longo taua iau ero nga ure mur nenge e helele ia. <sup>10</sup> Ke pomalam, lape ela nge imo pe e hele hote ure nemur nenge ana non popoia, nga nenge hele porekreke ita pe ngunngunngunu ia ita. Pe nga nem mana ero. Ana non lemene ero ia titira nemur nenge te haliu hotote Helenga Manmanna Toto ngana pule. Pe hele ele hehei pe hana ke te long teua titira nemur ero. Pe nenge teke te long teua iri, lape ne Tiotrepes lope hote iri pe tetu teu nga mata nenge NeHalang ero ol.

### *Ne Timetrius Poia Poinga Urana Ngana*

<sup>11</sup> Neingak, o nanasia poinga poreke ngana nenge pomai ero. O nanas mene poinga nge urana. Iri nenge te popoia poinga nge urana NeHalang tutuna mur ia iri. Pe iri nenge te popoi poinga poreke ngana te eteia NeHalang ero toto. <sup>12</sup> Hehei pe hana lochloch te teke Timetrius i non nge urana. Pe na hengetoro manmanna ngana mur te hemallaha hote i pule. Oe, pe ita pule ta teke i non nge urana. Ionng o eteia ke rera helenga nei manmanna.

### *Helenga Hetala Ngana Mur*

<sup>13</sup> Iok, lek helenga halang tetu kura nge e teke e heleia lange imo. Pe lemek ero nge ehas ia nga hasinga pe hasinga eina. <sup>14</sup> Iange etue rochroi lo nge lape enau mule iong pe ita nai ta hele.

<sup>15</sup> Letem ma ke nek! Pekngam mur nga lamai te hekule reria apalanga lange iong. Pe iong, o tunge lek apalanga lange pekngara mur nga lamam pule.



## Iut Alalaha Nenge Iut Hasia

### *Iut Apala Lange Hehei Pe Hana*

<sup>1</sup> Iau Iut pe e umume nge Iesus Kristus pe tik laka Ieims.

Pe ehas ia alalaha nei lange imo hehei pe hana nenge NeHalang iua imo. Atong mur, imo, Temere NeHalang mutena tau tote imo pe Iesus Kristus nek hit tote imo. <sup>2</sup> E heta-laulau amo ke poinga nenge letera porekrekeia pekngara mur pe poinga nenge tatu ke nek pe poinga nenge mutera tautaua pekngara mur tetu teu ke tehon toto nge imo.

### *Hana Nenge Te Hepiriu Elele Helenga Urana Toto Ngana*

<sup>3</sup> Titik mur pe liliuk mur, nga tele ngana letek haka ke e teke e has lala nge imo nga ume nenge NeHalang poia lange Tuna Iesus Kristus ke mene mule ita lochloch. Pe ero. Heueu nei e amneia ke e teke ehas lange imo ke ueiuei mana ke ames ke kerkereng nga letemo man-manna ngana mur. Poinga nem NeHalang hesue lange nena hana mur ke munna elle mana nike pe lape ana hetanga ero ol. <sup>4</sup> Iange hana nenge te longo taua NeHalang ero, teteu kome mana ke teat luluch nge ita lo. Hana nemur tehetaua NeHalang nena mutenga ana helenga nge ita pe te hulua ke langa salaunga ana poinga lo. Pe iri lemeria ero ia Iesus Kristus nenge I Aehuna pe ara Non Soke ia. NeHalang nena helenga nge nike heleleia hana nemur nge pomam ke teke NeHalang lape heparai sue iri.

### *NeHalang Heneue Hana Nenge Te Longo Taua I Ero*

<sup>5</sup> Letemo la mule nga nei. Nge nike Non Soke mene hote Israel mur nge Ekipto pe nga hoena poia iri nenge leteria manmanna nge I ero

ke te mete. Imo a eteia lo pe e teke e helete metene mule imo. <sup>6</sup> Iok, letemo la mule nga nei pule. NeHalang tunge angkelo mur aria ume. Pe angkelo nemur te losio mule nga aria ume mur nenge NeHalang tunge lange iri; pomalam tetu nga tapa ero ol. Iange Non Soke kale iri nga ngautou tana palaungana nenge tu ke koko pe tetu nga kileng nenge au toto nge sio. Pe lape tetu ke te kulele etue palaungana nenge lape NeHalang amnei teu nga reria poinga mur. <sup>7</sup> Iok, letemo la mule nga tuele tana palaungana nenge Sotom pe Komora pe kileng nemur nenge tetu rochroi nga tuele tana nai neu. Iri te amneia melmelenga palaungana nga oan nenge tuke koko, iange te nanasia poinga nenge angkelo nemur pe te popoia poinga poreke ngana hel pule pe te salau ngaria elela toto. Pe melmelenga nenge lohote nge iri nem teke helete metene ita ke ta nanasia poinga nenge pomam ero.

### *NeHalang Letena Inin Taua Iri Nenge Te Popoi Poinga Poreke Ngana*

<sup>8</sup> Pe hana nemur tenau operia ia poinga poreke ngana nemur pe te teke tepoi taole imo ke a nananasia. Iange iri te puoloko teu pulut mene singiria mur langa poinga poreke ngana nemur. Pomalam lemeria ero nge NeHalang I Non Soke pe te hele poreke nena angkelo mur nga tapa. <sup>9</sup> Pe NeHalang nena angkelo solaki ngana nenge ene Mikael iri nai Satan te hele helia Moses koluna nge itei toto lape mene. Pe nga etue nem, angkelo Mikael hele poreke Non Poreke ngana ero. Hele mana ke teke, "Non Soke hele ke teke o reng!" <sup>10</sup> Pe hana nemur tesau chapupu hot pulut mene reria helenga poreke ngana mur nga ure nemur nenge te eteia lurua ero. Te poia poinga nei ke pomanga kaone inolo mur nenge leteria matana ero pe te nanas mene lemeria ngaria. Ke NeHalang lape

**1:1:** Mat 13:55    **1:4:** Kal 2:4; 2Pi 2:1    **1:5:** Exo 12:51; Num 14:29-30    **1:6:** 2Pi 2:4    **1:7:** Gen 19:1-25; 2Pi 2:6, 10    **1:9:** Dan 10:13, 21; 12:1; Zec 3:2; 2Pi 2:11; Hem 12:7    **1:10:** 2Pi 2:12    **1:11:** Gen 4:7-8; Num 16:1-35; 2Pi 2:15; 1Io 3:12

heporeke tote iri nga reria poinga nei. <sup>11</sup> Pe iri tenau ala aria ke nek nge NeHalang nga nei, iange te nanas tote poinga nenge Kaen! Pe leteria tumana nga umtutuna ke mange Palam. Pe te longo taua NeHalang ero ke mange Kora. Pe lape NeHalang heparai sue iri ke mange non nem.

<sup>12</sup> Pe imo, NeHalang nena hana mur pe mutemo tautaua pekngamo mur. Pe nga etue nenge a eukirau ke a ngaungau nga amo ngaunga matana, hana nemur teat ke te ngau luluch nge imo. Pe te meia iri ero pe te heporeke amo ngaunga matana nem nga reria poinga poreke ngana mur. Iange iri leteria lange mele hel ero ol, leteria tumana nge iri. Pe iri tepoi ke malaka nga muchmua nenge ma hot pe pitte sio ero pe tuttula takisia kela. Pe tepoi ke manga ae nenge rora pe hei erochro pe te mete ke henai ke manga ae nenge mete pe teris heke ulanlana mur ke mete toto sapele. <sup>13</sup> Pe pule tepoi ke malaka nga ruach ana mee papalauna nenge ulo hekeke namnamo mur nga peipei. Pe namnamo nemur te heilangia reria poinga poreke ngana mur. Pe pule tepoi ke pomanga itoch mur nenge te nanasia reria kue nga tapa sana ero pe tei rara pulut mana. Ke pomalam NeHalang tatalo ele reria kileng au ngana nenge munaala toto. Pe iri lape tela ke tetu nga kileng neu ke kōko.

<sup>14</sup> Iok, Antam tutuna mur pe nena tete mur aria lala rahtele nai ngana nge Enok. Pe Enok hele hetatalonga ia hana porekreke ngana nemur nge nike ke teke, “Iok a nuala, Non Soke pau kou atat. Pe at luluch nge nena angkelo mur nge iri hulua toto pe nakura nge tasis ele iri ero. <sup>15</sup> Non Soke nem lape at ke hele hot peng-pengia hulua lochloch reria poinga mur. Pe hana porekreke ngana nemur nenge te longo taua NeHalang ero pe te hele porekreke I pe nenge te popoi poinga poreke ngana, lape

NeHalang tung tote aria melmelenga lange iri.” <sup>16</sup> Hana porekreke ngana nemur te tuainaunau rara ia NeHalang pe te ngunngunu rara ia mele hel. Pe iri te nanas mene lemeria ngaria mur pe te puoloko teu tote iri nga poinga poreke ngana mur. Pe te heto hekeke iri siporia pe tepoi taolole mele hel ke te nanasia iri nga reria poinga poreke ngana nemur.

*Iut Tunge Helenga Kerkereng Ngana Lange NeHalang Nena Hana Mur*

<sup>17</sup> Titik mur pe liliuk mur, letemo metene helenga nenge ara Non Soke Iesus Kristus nena hekulkulonga mur te heleia lange imo lo. <sup>18</sup> Iri te hele lange imo ke te teke, “Nga etue nei hetala ngana, hana nenge te ngailelele NeHalang lape te lohot. Pe lape tehul rumeria lange NeHalang pe te nanas mene lemeria ngaria mur.” <sup>19</sup> Hana nemur lape te heparaia NeHalang nena hana mur ke tetu ke muria elle ero ol. Iange iri, NeHalang Opene tuteu nge iri ero. Iri te nanas mene lemeria ngaria mur mana.

<sup>20</sup> Pe atong mur imo, a halau hel pe a hekerkereng helia letemo manmanna ngana nenge NeHalang tunge lange imo. Pe a hetalaulau ke Opepengpeng halaua imo nga nena kerkerenga. <sup>21</sup> Pe kokoes atu pe a eteia ke NeHalang mutena taua imo pe a kulala tote ara Non Soke Iesus Kristus nge letena toto ia imo pe tunge maulinga ke koko lange imo.

<sup>22</sup> Pe letemo ia iri nenge leteria manmanna ngana losio lo. <sup>23</sup> Hana hel te losisio nga oan lo pomalam a achroua iri ke a mene mule iri ke ueiuei. Pe apoi ke nek lange hel pe a nauala amo nge iri ke nek. Iange iri te puoloko teu tote iri langa poinga porekreke ngana mur ke operia muna ulu ke pomanga reria hengeron mur nge te muna ulu. Pe aheo ele tote imo nga poinga poreke ngana pe ure muna hulu ngana nemur.

*Iut Hetalaulau*

<sup>24</sup> E hetalaulau ke ara Hemasinga NeHalang lape nauele imo ke a losio nga poinga poreke ngana e ero. Pe I lape mene imo kela atu nga nena kileng nenge urana toto. Pe lape a iech toto iange poinga poreke ngana e tuteu nge imo ero. <sup>25</sup> Pe e hetalaulau ke ara Soke Iesus Kristus poia hehei pe hana ke te heto heke NeHalang nga nena helenga kerk-ereng ngana pe nga kikina ngana nge palaungana toto. Pe te heto heke tote i pe tetal heke tote ke i Non Soke toto nenge nauele ure lochloch, nga talun ngana toto pe heueu nei pe nga etue lochloch! Oe, Manmanna!

## Hemallaha Ngana Ioanes Nau Opene Ngana

<sup>1</sup> Alalaha nei heleia ure nemur nenge Iesus Kristus hemallaha hote iri. NeHalang tunge lange I ke hemallaha hote ure nemur nenge musuna pol mana pe te lohot. Pe hemallaha hote lange nena hekuleileinga ana hana mur lochloch nenge te umume nge I. Ke pomalam Iesus kulosia nena angkelo pe nena angkelo henonoua lange Ioanes. <sup>2</sup> Pe Ioanes hele hote ure lochloch ngana nenge nau opene ia. Ngana laka: NeHalang nena helenga pe helenga manmanna toto ngana mur nenge Iesus Kristus hemallaha hote iri. <sup>3</sup> Helenga nemur nga alalaha nei i helenga hetatalonga ia. Pe mele nenge sisisia lape iech toto, pe mele hel nenge te longe pe te rahit tote nga leteria, lape te iech toto pule. Iange ure nemur aria etue nenge te lohot ia heroi toto lo.

### *Ioanes Has Lange NeHalang Na Hana Mur Nge Eisia*

<sup>4-5</sup> Iau Ioanes, pe ehas lange imo NeHalang nena hana mur nenge amo tuluk mur iri rahtele nai nga tuele kina nenge Eisia.

NeHalang tu nge nike toto pe tu heueu nei pe nga hoena lape at mule. Pe Ope kikina ngana mur nge iri rahtele nai te mesmes nga nena kilanga seina ngana matana. Pe Iesus Kristus I non nenge hemallaha hot tote helenga manmanna ngana mur nge NeHalang. Pe I non nenge maul haka mule tala nga metenga pe nauela naungaala ana hana mur lochloch nga ich. E hetalaulau amo ke NeHalang iri ul nena Ope nemur pe Iesus Kristus te pete imo pe te hemaluche letemo ke atu ke nek.

I mutena tau tote ita. Pomalam eina lele rera poinga poreke ngana mur ke te lasus toto. <sup>6</sup> Nga poinga nei

poia ita ke ta lohot ke ita mata nenge tunginga ana hana mur, pe ita ul ke ta popoi tunginga lala nge Temene pe ana Non Soke. Pe lape te heto heke tote I iange kikina ngana palaungana nge nauela ure lochloch ke koko. Oe, Manmanna Toto!

<sup>7</sup> Iok anau, I lape sio at luluch nga ulu, pe lape hulua lochloch ngana te nauela I.

Pe iri nenge tetue I nga io lape te nauela I pule.

Pe hehei pe hana lochloch nga ich lape te tangia I.

Ke ure nem lape lohot ke pomam toto.

Oe Manmanna Toto!

<sup>8</sup> Non Soke NeHalang nenge Kikina Toto hele ke pomai, "Iau Talun ngana Toto pe Iau Hetala ngana Toto. Etu nge nike toto pe etu heueu nei pe nga hoena lape eat mule."

### *Ioanes Esia Kristus*

<sup>9</sup> Iau Ioanes, pe imo timo pe neingamo iau pe ita lochloch tatu teu nga naualanga pe nekinga nenge NeHalang. Pe tames ke kerkereng pe ta takisia ara melmelenga luluch nge Iesus. Iau etu nga tuele au ngana nga mimio nenge Patmos iange e haliu hotote NeHalang nena helenga pe helenga manmanna toto ngana nenge Iesus hemallaha hote. <sup>10</sup> Nga Non Soke ana etue palaungana nenge ta heto hekeke I ia, Opepengpeng hemute iau pe e longe haliunga nga rumek. Haliunga neu palaungana toto ke pomanga ngalum paena nge te iua. <sup>11</sup> Mele neu haliu ke teke, "Ure nemur nenge o esia nei ohas sue iri nga alalaha pe o hekule lange NeHalang na hana nemur nenge aria tuluk mur iri rahtele nai. Iri tetu nga kileng nemur: Nge Epesus pe Simirna pe Perkamum pe Tiatira pe Sartis pe Pilatalsia pe nge Laotisia."

<sup>12</sup> Iok, e teke e ralele ke enau mele nenge hele atat nge iau pe e nauela lemenga ana hemesinga haka chalelem ngana mur nge iri rahtele

nai. <sup>13</sup> Pe mele nge nakuna mange Non Tuna tuteu nga lemenga ana hemesinga haka nemur tunangaria. Ana non heronia hengeron nenge sase sio ke langa apena pe panreke panrekinga chalemlem ngana ke matele nga mautuna. <sup>14</sup> Pe palpalna ina tuahau toto pe matana mur te pomalaka nga oan sapel ngana. <sup>15</sup> Pe apena mur te insachsach ke pomanga chaia matana ana sialle. Pe hele ngana palkolong pulut ke pomanga nale hau ngana. <sup>16</sup> Pe am hit ke itoch iri rahteale nai nga penna tamalmal. Pe hunelinga ana mese sase ngana e nge matana kaliuala, sere hot nga hanna. Pe ramana sinaha ke pomanga chaia matana nenge sinaala toto.

<sup>17</sup> E naue I ke pomau pe e losio nga apena huna ke pomanga e mete lo. Ol pe tal heke penna tamalmal nge iau pe hele, "O matau ero! Iau Talun ngana toto pe Iau Hetala ngana toto. <sup>18</sup> Iau non nenge tu ke maulul ke koko pe e mete ke ulolo. Pe onau at, heueu nei etu ke e maulul pe lape etu ke koko ol. Pe e rahite lohenga nga metenga pe nga metenga ana kileng. Pe lek kerkerenga nenge e hemaual heke mule iri nenge te mete ke te mene maulinga.

<sup>19</sup> "Iok ol, ohas sue ure nemur nenge o esia iri ke ulolo. Hel koloi nenge te lohotot nei. Pe hel lape te lohot nga hoena kura. <sup>20</sup> Pe itoch rahteale nai nenge o esia nge e rahite nga perik tamalmal pe lemenga kina chalemlem ngana rahteale nai nem luria koi. Itoch rahteale nai nem luria laka; angkelo mur nenge tenau ele NeHalang na hana nemur nenge aria tuluk iri rahteale nai. Pe lemenga kina rahteale nai nem luria laka; NeHalang na hana mur nenge aria tuluk iri rahteale nai."

## 2

### *Helenga Lange NeHalang Na Hana*

**1:14:** Ezk 43:2; Dan 7:9; 10:6; Hem 2:18; 19:12 **1:16:** Hip 4:12; Hem 2:12; 19:15 **1:17:** Isa 44:6; 48:12; Hem 2:8; 22:13 **2:1:** Hem 1:16 **2:2:** 1Io 4:1 **2:5:** Hem 3:3 **2:7:** Gen 2:9; Hem 22:2, 19

### *Mur Nenge Epesus*

<sup>1</sup> "Pe ohas lange angkelo nenge nauale NeHalang na hana mur nga kileng nenge Epesus ke mai koi:

I nenge rahit ke itoch rahteale nai nga penna tamalmal pe ii nga lemenga kina chalemlem ngana rahteale nai nem tunangaria, nena helenga mur koi nei: <sup>2</sup> Iau e eteia ure lochloch ngana nenge a popoia. Pe aume ke kerkereng pe ames ke kerkereng nga etue nenge a takisia amo melmelenga. Pe e eteia ke lememo ero hana poreke ngana mur. Hana nemur te hele ke te teke iri hekulkulonga ana hana mur. Pe a amnei teu lange iri pe a eteia ke te pallaklaka. <sup>3</sup> Pe melmelenga nenge a takisia nem a takisia nga iau ek. Pe ames ke kerkereng mana nga etue nenge a takisia pe asau sio mule ero.

<sup>4</sup> Pe poinga e pule nge e teke e heleia ngana koi nei: Nga etue nenge a talun ke letemo manmanna nge Iau, mutemo tau tote iau pe mutemo tau tote pekngamo mur, pe heueu nei ero ol. <sup>5</sup> Letemo tuanin la mule nga utar nenge helosio ia imo pe ala mule nga lemo poinga urana ngana mur nenge nike ana. Pe nenge teke ahul mule letemo ero, lape ela nge imo pe e mene tote lemo lemenga kina nem nga munna. <sup>6</sup> Pe ure urana ngana elle nge a poia ngana koi nenge: Lememo ero ia hengetoro nenge Nikolaus nena hana mur pe iau lemek ero ia pule.

<sup>7</sup> "Apal talngamo pe a longo ke nek nga helenga nenge Opepengpeng heleia lange NeHalang na hana mur! Ke Opepengpeng nena helenga koi, 'Mele nenge mes ke kerkereng nga letena manmanna ngana, lape e poia i ke ngau nga ae nenge maulinga kina ia. Ana ae tunge Paratiso nga NeHalang ana ume.'"



*Helenga Lange NeHalang Nena Hana Mur Nge Simirna*

<sup>8</sup> “Pe ohas lange angkelo nenge nauele NeHalang na hana mur nga kileng nenge Simirna ke mai koi:

I nenge i Tala toto pe i nga Rume toto pe mete pe maul haka mule, nena helenga mur koi nei: <sup>9</sup> Iau, e eteia melmelenga mur nenge te lohotot nge imo. Imo atu ke pomanga lemo ute e ero pe nga enau ngak lemo ure halang toto. Pe e eteia ke hana hel te saua helenga poreke ngana hel lange imo. Hana nemur te teke iri NeHalang nena hana mur toto, pe ero. Iri, non poreke ngana nena tula mur ia iri. <sup>10</sup> Ke a naue lo? Melmelenga nemur lape te lohot nge imo. Non poreke ngana lape tualaka hote imo nga kue nenge; lape poia nena hana mur ke te laua amo hel pe tetal teua iri nga tuele au ngana. Pe lape te takis ia melmelenga nem ke etue iri analoch, pe imo a matau ero. Ames ke kerkereng nga letemo manmanna ngana kela het nga etue nenge o mete ia. Pomalam lape e tunge maulinga ana iengien-gka lange iong.

<sup>11</sup> “Apal talngamo pe a longo ke nek nga helenga nenge Opepengpeng heleia lange NeHalang na hana mur! Ke Opepengpeng nena helenga koi: Mele nenge hekou susue poinga poreke ngana lape metenga nei ngana heporeke i ero.”

*Helenga Lange Iri Nenga Mata Nenge Perkamum*

<sup>12</sup> “Pe ohas lange angkelo nenge nauele NeHalang na hana mur nga kileng nenge Perkamum ke mai koi: I nenge nena palinga hel ana mese sase pe matana kaliuala, nena helenga mur koi nei:

<sup>13</sup> Iau e eteia kileng nenge atu ia nem. Kileng nem i kileng nenge non poreke ngana nauele tote. Pe

imo letemo manmanna ngamo nge iau losio ero pe a rahite ek ke kerkereng. Nge nike ne Antipas haliu hote lek helenga nga kileng nem pe tu luluch nge imo. Ne Antipas i lek non toto ia pe te hune i iange non poreke ngana tu toto nga kileng nem.

<sup>14</sup> Pe poinga hel nge e teke e heleia lange imo ngana koi nei: Mele hel nge imo nga kileng nem te rahit tote ne Palam nena hengetoro mur. Ne Palam i non nenge hetoro koukoua ne Palak ke pallaklaka ia hehei pe hana nenge Israel. Pe poia iri ke te losio nga poinga tungen ngana mur. Pe pule poia iri ke te ngaua ngaunga nenge tepoi tunginga ia lala nga aetapuna mur. <sup>15</sup> Pe lemo hana mur hel te nanasia ne Nikolaus nena hengetoro mur. <sup>16</sup> Ke heueu nei ahul mule lemo poinga mur ol. Pe nenge teke ero, lape ela nge imo ke ueiuei mana luluch nga palinga hel ana mese sase ngana nenge sere hot nga halik, pe imem ul ke mo hunel.

<sup>17</sup> “Apal talngamo pe a longo ke nek nga helenga nenge Opepengpeng heleia lange NeHalang na hana mur! Ke Opepengpeng nena helenga koi nei: Mele nenge hekou susue poinga poreke ngana lape e tunge ngaunga e nge talkome lange i. Pe ngaunga nem ene laka, ‘mana’. Pe lape ehas heke mele ene nge heueu ngana nga um hussu ngana e pe e tunge lange i pule. Pe mele pele eteia i tei toto nenge ene ma haka nga um nem ero. Mele nenge mene um nem, i toro mana eteia.”

*Helenga Lange NeHalang Nena Hana Mur Nge Tiatira*

<sup>18</sup> “Pe ohas lange angkelo nenge nauele NeHalang na hana mur nga kileng nenge Tiatira ke mai koi: NeHalang tuna nenge matana mur te sapel ke pomanga oan remen ngana, pe apena nai ape te chalemlem toto

ke pomanga chaia matana ana sialle, nena helenga mur koi nei.

<sup>19</sup> Iau e etei tote lemo ume urana ngana mur nenge a popoia. E eteia ke letemo manmanna nge iau pe mutemo tau tote hehei pe hana pe a halaulaua iri hel pule. Pe e eteia ke imo ames ke kerkereng toto ke kokoes nga etue nenge melmelenga mur te lohotot nge imo. Pe e eteia ke lemo ume nenge a popoia nge nike, heueu nei lohot ke kikina toto ol. <sup>20</sup> Pe helenga e pule nge e teke e heleia ngana koi nei: Poi ngana merei nenge a lope hote he Isapel ero? Hei nem teke i hetatalonga. Pomalam hetoro koukoua lek hana mur nenge te umume nge iau ke te nanasia poinga nenge te salaulau. Pe pule poia iri ke te ngaua ngaunga nenge tepoi tunginga ia lala nge aetapuna mur. <sup>21</sup> Pe iau nga lemek ngak toto, e teke hei nem hul mule letena nga nena poinga nenge salau halali. Pomalam, e poia i ke tupol mukam. Pe ero. Hei nem lemene ero nge hulua letena nga nena poinga nemur. <sup>22</sup> Iok anau, Iau lape e poia haleles palaungana ke lohot nge i ke tuana mana hete ol. Pe iri nenge te salau lululuch nge hei nem pe te hulua reria poinga mur ero, lape e tunge melmelenga palaungana lange iri pule. <sup>23</sup> Pe lape e hune hei nem tutuna mur ke te mete. Pomalam NeHalang nena mata nemur lape leteria manmanna pe te eteia ke iau e eteia hehei pe hana leteria tuanin ngana mur. Pe lape e tunge tuanga-chol lange mele elle pe elle ke purpure nena poinga nenge popoia. <sup>24</sup> Pe amo hel nge Tiatira te nanasia he Isapel nena hengetoro mur ero. Pe pule ure nenge mele hel te naue ke non poreke ngana nena poinga tapuna ngana mur ia, imo a eteia ero. Imo nemur, e tung mule ure meena ngana e lange imo ero

ol. <sup>25</sup> Imo letemo manmanna nge Iau ke ulolo. Pe a rahite letemo manmanna ngana nem ke kerkereng kela het nga eat mule ngak.

<sup>26</sup> Mele nenge mes ke kerkereng nga letena manmanna ngana pe nanasia lemek ngak kela het nga etue nei hetala ngana, lape e hekerkereng ia i ke nauele hehei pe hana lochloch.

<sup>27</sup> “Kerkerenga nenge e tunge lange i nem, elle mana ke pomanga nenge Temek tunge at nge iau.

I lape mene nena kula nge lekina toto ke nauele iri pe maluch hole iri ero.

Pe lape palia iri ke te chach ulu ke sachanchana hulu ke pomanga tuninga nenge te pipia nga melete.

<sup>28</sup> Pe lape e hemalmalia i ke nakuna tua ke pomanga itoch uachuach ana.’”

<sup>29</sup> “Apal talngamo pe a longo ke nek nga helenga nenge Opepengpeng heleia lange NeHalang na hana mur.”

### 3

#### *Helenga Lange NeHalang Nena Hana Mur Nge Sartis*

<sup>1</sup> “Pe ohas lange angkelo nenge nauele NeHalang nena hana nga kileng nenge Sartis ke mai koi:

I nenge NeHalang opene mur iri rahtele nai tetu teu nge I, pe rahit ke itoch iri rahtele nai nem, nena helenga mur koi nei: Iau e eteia lemo poinga mur lochloch nenge a popoia. Hana pe hehei te hele ia imo ke te teke a maul. Pe ero. Imo a mete ke ulolo. <sup>2</sup> A lohaka ol! Pe a hekerkereng mule poinga urana ngana iange e naue lemo poinga e nge urana nga Ak Soke NeHalang matana ero toto. <sup>3</sup> Pomalam, letemo la mule nga hengetoro mur nenge te tunge lange imo nge nike

nenge a longe pe letemo manmanna ia. Ahul mule letemo pe a nanas mule lemo poinga urana ngana nemur. Pe nenge teke ero, lape eat kome nge imo ke pomanga none nge kemkeme. Pe imo a eteia eat ngak ero.

<sup>4</sup> Pe iong o nauele NeHalang nena hana mur nga kileng nenge Sartis. Pe hel nge iri tetu ke te lemlem iange teheo ele tote iri nga poinga poreke ngana. Iri nemur iau lek tula mur ia iri. Ke pomalam lape te heronia reria hengeron hussu ngana pe tei luluch nge Iau, iange te nanas tau tote NeHalang lemene ngana mur. <sup>5</sup> Ke mele nenge hekou susue poinga poreke ngana lape e iech toto nge i pe e heron heke hengeron hussu ngana nge pomau nge i pule. Pe lape e pasis hote ene nga maulinga ke koko ana alalaha ero. Pe lape e hele tote i nga Temek pe nena angkelo mur mataria.

<sup>6</sup> “Apal talngamo pe a longo ke nek nga helenga nenge Opepengpeng heleia lange NeHalang na hana mur.”

#### *Helenga Lange NeHalang Na Hana Mur Nenge Pilatalsia*

<sup>7</sup> “Pe ohas lange angkelo nenge nauele NeHalang na hana mur nga kileng nenge Pilatalsia ke mai koi:

Helenga nemur at nge I nenge heo ngana pe manmanna toto. Ana non rahite lohenga pule ke mange ne Teuit. Utar nenge lohe, mele piu ele ero ol pe utar nenge piu ele, mele lohe ero ol. <sup>8</sup> Ana non hele ke teke: Iau e eteia lemo poinga mur lochloch nenge a popoia. Ke e naue lo? E lohe piunga e nga matamo pe mele pele ratoto nge piu ele ero. Pe e eteia ke kikimo ngamo palaungana ero pe a nanas tau tote lek helenga mur pe letemo manmanna nge iau. <sup>9</sup> A longo ke nek. Hana nemur nenge tetu teu nga tuluk

nenge non poreke ngana, te teke iri NeHalang nena hana mur toto pe ero. Iri te channanga mana. Iau lape e poia iri ke te tualou sio nga apemo huna. Pomalam lape te eteia ke iau mutek tau tote imo. <sup>10</sup> Imo a nanas tau tote lek hotonga ke kokoes pe ames ke kerkereng toto ke a takisia amo melmelenga mur. Ke pomalam, melmelenga nenge lape lohote ke tualaka hote hehei pe hana lochloch nga ich nei, lape lohote nge imo ero. Iange iau lape enau ele imo ke nek.

<sup>11</sup> Musuna pol mana pe lape eat mule pe ames ke kerkereng toto nga letemo manmanna ngana nem, ma lape mele mene mulim ke mene am iengiengka nenge maulinga ana. <sup>12</sup> Pe mele nenge mes ke kerkereng toto lape e hemes heke i ke Ak Soke NeHalang nena tunginga ana pele ana isong ia. Pe mele nem lape lohote mule nga pele nem ero ol. Pe lape etal heke Ak Soke NeHalang ene nge i pe etal heke Ak Soke NeHalang nena kileng ene nge i pe lape etal heke iau ek heueu ngana lange i pule. Pe Ak Soke NeHalang nena kileng nem, ngana laka kileng Ierusalem heueu ngana nenge sio atat nga lut nga tapa nge Ak Soke NeHalang.

<sup>13</sup> “Apal talngamo pe a longo ke nek nga helenga nenge Opepengpeng heleia lange NeHalang na hana mur.”

#### *Helenga Lange Iri Nenga Mata Nenge Laotisia*

<sup>14</sup> “Pe ohas lange angkelo nenge nauele NeHalang na hana mur nga kileng nenge Laotisia ke mai koi:

I nenge i Manmanna Toto pe NeHalang ala hote ure lochloch iange ure huna nge i mana, pe hemallaha hote helenga manmanna ngana mur nge NeHalang, nena helenga mur koi nei: <sup>15</sup> Ana non hele ke teke: Iau e eteia poinga mur

lochloch ngana nenge a popoia. A tung tote letemo at nge iau ero pe a hile hot tote iau ero pule. <sup>16</sup> Letemo nenge a tunge at nge Iau unne sune mana. Ke pomalam lape e muta hote imo ke a lasus. <sup>17</sup> Pe imo a hele ke a teke, 'Oe imem lememe ure halang toto lo pe ute e nge alpapa taua imem ero.' Iong o hele ke pomam pe onau teu langa otu ngam ke nek ero. Iange nga enau ngak lem ute pele ero pe matam hit pe singim nganangana ero toto. <sup>18</sup> O hele ke pomam lo, iok oi at ke o olia um sinaha ngana e nge iau. Pe um nem te holoa sue ke chalemlem nga oan ngingina nenge milanglang toto. Pe pule o olia hengeron hussu ngana e ke o heron hite nga singim iange o meia iong nge singim lachlach manmana. Pe pule onau rara matam ana siu eina pe opip teua nga matam ke onau ke mallaha mule. Ke pomalam lape letem manmanna ngana kerkereng toto nge iau.

<sup>19</sup> Iau mutek tau totote hehei pe hana pe e hele salia iri pe e hepengia iri ke kokoes. Ke pomalam a lohaka pe ahul mule letemo nga lemo poinga poreke ngana mur. <sup>20</sup> A longe Iau ma ero? Iau koi emes nga pele matana ke e helonglongo talngamo. Pe mele nenge longe iau, lohe piunga pe eteu kela engau luluch nge i.

<sup>21</sup> Mele nenge hekou susue non poreke ngana nena kerkerenga mur lape e mene i ke are luluch nge iau nga ilik nga lek kilanga seina ngana. Ke mange iau nge e hekou sue non poreke ngana nena kerkerenga mur pe ela ke eare luluch nge Temek nga nena kilanga seina ngana rikena.

<sup>22</sup> "Apal talngamo pe a longo ke nek nga helenga nenge Opepengpeng heleia lange NeHalang na hana mur."

## 4

### *Ioanes Nau Openeia NeHalang Nge Are Nga Nena Kilanga Seina Ngana Nga Lut Nga Tapa*

<sup>1</sup> Iok, e naue ure nemur nge te lohot ke het, enau la mule pe e esia piunga nenga lut nga tapa nge te lohe ke ulolo. Pe haliunga nenge e longo tele nge hutu ke manga ngalum paena alngana, hele mule at nge iau ke teke, "O lohaka at nge iau lakoi. Pe e henonoua iong nga ure nemur nenge lape musuna pol mana pe te lohot." <sup>2</sup> Ueiuei mana pe Opepengpeng roro heke iau pe e naue kilanga seina ngana nga lut nga tapa pe mele are haka ia. <sup>3</sup> Pe I nenge are nga kilanga seina ngana neu ramana makelkele pe sinaha hote um nenge ene um iaspa pe nenge ene um kanelian singiria. Pe oro palcholo ke heliliu hite kilanga seina ngana neu. Pe oro neu sinaha hote um nenge ene um emerel singina. <sup>4</sup> Pe kilanga seina ngana halatau ngana mur nge iri ana non kina elle pe henel te heliliu hite kilanga seina ngana neu. Pe almasinga ana hana mur nge iri ana non kina elle pe henel (24) teare haka ia iri. Pe te heronia hengeron hussu ngana mur pe te kale heke iengiengka chalemlem ngana mur nga palpalria. <sup>5</sup> Pe kileng chalem ngana pe kileng kurung ngana pe onrung ngana te lohot nga kilanga seina ngana nenge are nga tunangana. Pe lemenga iri rahtele nai te sapelpel nga kilanga seina ngana neu matana. Pe lemenga nemur, ngana laka ope kikina ngana mur nge iri rahtele nai nenge te umume nge NeHalang. <sup>6</sup> Pe ute e pule nge tunga kilanga seina ngana neu matana nakuna pomalaka nga ruach melona nge achouchou pe sinaha ke pomanga silonga.

Pe ure maulul ngana henel temes liliu ele kilanga seina ngana neu ke tom. Pe mataria tunga singiria

lochloch (nga ramaria pe nga rumeria pule).

<sup>7</sup> Ure maulul ngana nemur, elle nakuna pomanga laion pe neingana nakuna pomanga kolok. Pe mol ngaria ramana pomanga ita non ramara pe henel ngaria nakuna manga ngie pisou nge lelehe. <sup>8</sup> Pe ure maulul ngana henel neu, elle pe elle sahana iri rahtele elle. Pe mataria tunga singiria lochloch (nga saharia ene mur pule). Pe tepeu ke kokoes mana nga sinanga pe nga miliko pe tetah eingaria ero nga nenge te peupeu ke pomai,

“Non Soke NeHalang nenge Kikina  
Toto

I non nge Heo Ngana nge Heo Ngana  
nge Heo Ngana toto.

Pe I tu nge nike toto pe tu heueu nei  
pe nga hoena lape at mule.”

<sup>9</sup> Ke I nenge are nga kilanga seina ngana nem tuke koko. Pe ure maulul ngana henel neu, tetua tau mulmule aria peunga neu pe te hele urana pe tetal hekeke pe te heto hekeke I. <sup>10</sup> Pe almasinga ana hana mur nenge iri ana non kina elle pe henel neu te tualou sio nga I nenge are nga kilanga seina ngana matana pe te heto heke I iange I tuke koko. Pe te haka hote iengiengka mur nga palpalria pe tetal sue nga kilanga seina ngana neu matana pe te hele,

<sup>11</sup> “NeHalang, Iong emem Non Soke.

Pe Iong O purpur toto  
nge hehei pe hana tetal heke tote Iong  
pe te heto heke tote Iong nga  
kikim ngam.

Iange nga lemam ngam oala hote ure  
lochloch  
pe o tunge maulinga nge iri ke te  
lohot.”

## 5

### *Sipsip Tuna Mene Alallaha Nenge Telul Hite*

<sup>1</sup> Ute e pule nge enau opek ia, e esia I nenge are nga kilanga seina ngana neu nge rahite alalaha e nge telul

hite. Pe ana non rahite alalaha neu nga penna tamalal. Pe alalaha neu ana hasinga tu kaliu ala, nga sana pe nga patangana pule. Pe te sima ele ke ana simanga iri rahtele nai. <sup>2</sup> Pe e naue angkelo solaki ngana e. Pe angkelo neu haliu hot ke soke toto ke teke, “Itei nge purpur toto nenge lape tualupa hote simanga nemur pe ulele alalaha neu?” <sup>3</sup> Pe mele e nga lut nga tapa pe nga ich nei pe nga ich letena nakuna ero toto nge ulele alalaha neu pe sisia. <sup>4</sup> Pe iau letek milang toto pe e tang iange mele nge purpur ero toto nge ulele alalaha neu pe sisia. <sup>5</sup> Ol pe almasinga ana hana nemur, elle nge iri hele at nge iau ke teke, “O tang ero! Onau langa Non hamam ngana nenge atat neu; ana non lohot nga kaleu ramana nenge Iuta (nga mata nenge non soke Teuit na tete mur). Pe I non seilil ngana nenge mele pele hekou sue ero toto. Ke pomalam I lape tualupa hote simanga rahtele nai neu pe ulele alalaha nenge telul hite nem.”

<sup>6</sup> Ol pe e naue Sipsip Tuna lomele ngana e nge mes nga kilanga seina ngana neu matana pengpeng. Sipsip Tuna neu nakuna pomanga te hune I ke ulolo. I mes nga tunangana pe ure maulul ngana henel neu pe almasinga ana hana nemur temes liliu ala hite I. Pe Sipsip Tuna neu ana sangkar iri rahtele nai pe matana pule iri rahtele nai. Pe ure nemur te heilangia Ope kikina ngana mur rahtele nai nenge NeHalang kulosia iri ke tela nga kileng lochloch ngana nga ich. <sup>7</sup> Sisip tuna nem la ke mene alalaha nga non nenge are nga kilanga seina ngana neu penna tamalal. <sup>8</sup> Iok laol, nga etue nenge mene alalaha neu ure maulul ngana henel neu pe almasinga ana hana iri ana non kina elle pe henel (24) neu, te tualou sio nga Sipsip Tuna matana pe te heto heke I. Pe almasinga ana hana nemur te mene aria milollo mur pe kaliu chalemlem ngana mur



nge te muta ia sapiu eina. Pe ure nemur te heilang ia NeHalang nena hana mur reria hetalaulaunga mur.  
<sup>9</sup> Pe ure maulul ngana henel neu pe almasinga ana hana nemur te peua aria peunga heueu ngana ke pomai, “Iong non toto nge o tualupa hote alalaha nem ana simanga mur iange te hune iong ke ulolo.

Pe nga o mete ngam nem, o ol hot mule hehei pe hana nga eim ke te mene maulinga ke koko nge NeHalang.

Hehei pe hana nga tuele kina palauna mur pe nga kaleu ramana mur pe nga helenga kuena ngana mur pe hehei pe hana lochloch ngana nga ich.

<sup>10</sup> Pe o poia iri ke te lohot ke iri mata nenge tunginga ana hana mur, ke tepoi tunginga lala nge ara Soke NeHalang.

Pe lape tenau ele hehei pe hana nga kileng lochloch ngana nga ich.”

<sup>11</sup> Iok, enau mule pe e longe angkelo mur nge te helele. Pe angkelo nemur ta sisele iri pe iri hulua sakilil. Pe temes ke te heliliu hite kilanga seina ngana neu pe ure maulul ngana nemur pe almasinga ana hana nemur ke tom. <sup>12</sup> Pe tepeu ke palaungana toto ke pomai:

“Sipsip Tuna nei I Non toto pe te hune I ke mete ke ulolo. Ke pomalam ta heto heke i nga kikina ngana pe nga letena matana ngana pe nga nena kole are ngana.

Tatal haka tote I pe ta hele urana toto lange I pe ta iech nge I.”

<sup>13</sup> Ol pe e longe hehei pe hana pe ure lochloch ngana nenge NeHalang ala hote iri nenge tetu nga lut nga tapa pe nga ich pe nga ich letena pe nga ruach letena pe nga kileng lochloch, e longe iri nge te peupeu ke pomai koi,

“Non nenge are nga kilanga seina ngana pe Sipsip Tuna iri nai te purpur alahel toto nga kikiria ngaria.

Ke pomalam hehei pe hana tetal haka tote iri pe te hele urana pe te heto heke tote iri nai ke koko.”

<sup>14</sup> Pe ure maulul ngana henel neu te tuacholia, “Oe Manmanna Toto!” Pe almasinga ana hana nemur te tualou sio pe te heto heke NeHalang iri nai Sipsip Tuna.

## 6

### *Sipsip Tuna Tualupa Hote Alallaha Ana Simanga Mur Nge Iri Rahteale Nai*

<sup>1</sup> Nga etue nenge e naue Sipsip Tuna nge tualupa hote simanga elle ngana, e longe ure maulul ngana henel neu elle nge hele. Pe hele ngana pomanga kileng kurung ngana. Pe hele ke teke, “O iat!” <sup>2</sup> Iok, e teke enau pe e esia oriong hussu ngana e. Pe mele nenge are haka nga oriong neu rahite nena raling pe te kale heke iengiengka nga palpalna. Pe heto heke I pe song hotia ana seilil kela hekou sue nena ngarang mur.

<sup>3</sup> Iok, Sipsip Tuna tualupa hote simanga naingana pe e longe ure maulul ngana nemur neingaria nge hele ke teke, “O iat!” <sup>4</sup> Pe enau pe e esia oriong remenmen ngana e nge song hot. Pe mele nenge songia oriong neu NeHalang tunge kerkerenga e lange i pe tunge palinga hel ana mese palaungana e lange i pule. Pe kerkerenga neu i kerkerenga nenge tua het hote kilanga urana ngana nga ich pe poia hehei pe hana ke te hunel mulmule nge iri. <sup>5</sup> Iok, Sipsip Tuna tualupa hote simanga mol ngana pe e longe ure maulul ngana nemur mol ngaria nge hele ke teke, “O iat!” Pe enau la pe e esia oriong muna ngana e. Pe mele nenge kila haka nga oriong neu rahite monri nga penna. Monri nenge te amnei urumrume ure meena ngana mur ia.

<sup>6</sup> Ol pe e longe helenga e nge lohot nga ure maulul ngana henel neu tunangaria. Pomalaka nga mele nge helele ke teke, “Ngaunga hetet lo, pomalam ngaunga uruna lape ele haka toto. Ke ngaunga pululu ngana nenge ene uit meena ngana unne sune (lita elle), uruna lape lohot ke pomanga mele uruna nenge mene nga etue elle. Pe ngaunga pululu ngana nenge ene pali nenge meena pol (lita iri mol), uruna lape lohot ke pomanga mele uruna nenge mene nga etue elle. Pe ae nenge ene ae oliua, ae nem eina pe uain ururia lape ele haka ero.”

<sup>7</sup> Iok, Sipsip Tuna tualupa hote simanga henel ngana pe e longe ure maulul ngana nemur henel ngaria nge hele ke teke, “O iat!” <sup>8</sup> Pe e teke enau la pe e esia oriong popopo ngana e. Pe mele nenge songia oriong neu ene laka Metenga. Pe Metenga Ana Kileng i hoena pe nana-sia i ke renren toto. Pe NeHalang tunge kerkerenga lange iri nai ke te poia hunelinga ke lohotot pe te poia uringa ana etue ke lohotot. Pe te poia haleles ke lohotot pe te poia ur-inolo mur ke te lohotot. Ke ure nemur lape te hune hehei pe hana halang nga ich. Pe tehun lochloche iri ero. Lape tehun lapo mene iri nenga ich ana talinga toto henel ngana ke te het.

<sup>9</sup> Iok, Sipsip Tuna tualupa hote simanga lime ngana pe esia hehei pe hana nenge te mete, operia mur nge te eukirau nga NeHalang nena hatanga apena huna. Hehei pe hana nemur te hune iri iange te nanas tau tote NeHalang nena helenga pe te haliu hote helenga manmanna toto ngana. <sup>10</sup> Pe hehei pe hana operia nemur alangaria hot ke palaungana toto ke te teke, “Non Soke NeHalang, Iong non Kikina ngana toto pe iong non nge heo ngana pe non manmanna ngana toto. O kulala ero ol. O amnei teu lange hehei pe hana

nga ich pe o tuachol ia eimem nge iri iange te hunsio mene imem.” <sup>11</sup> Ol pe NeHalang heronge hengeron husu ngana nge iri elle pe elle pe hele lange iri ke teke leteria meena ia ure neu ero pe te kulala pol mana. Te kulala pol kela het nga etue nenge reria ngarang mur tehun taua pekngaria mur pe titiria mur hel pule. Iange NeHalang hesilei hote iri lo ke te mete pule ke pomange iri nge tehun tele iri ke ulolo.

<sup>12</sup> Iok, nga etue nenge Sipsip Tuna tualupa hote simanga rahtele elle ngana, enau pe e esia mangila palaungana nge lohot ke rur leke kileng. Pe chaia matana tua ero pe kileng auala mana ke pomanga miliko lo. Pe teio matana hul ke remenmen ke pomanga toho. <sup>13</sup> Pe itoch mur te machereng hot nga tapa sana pe te losio langa ich ke pomanga tuttula palaungana nge rur sue popi nganangana itachtach ngana mur ke te tualolo sio. <sup>14</sup> Pe tapa sana pule erue sio mana ke pomanga tako nenge telou heke pe te mene ke tela ia. Pe hengene mur pe mimio mur te hile muria mur pe te loloun rara. <sup>15</sup> Pe naungaala ana hana mur nga ich, pe hana papalauna nenge te nanasia iri, pe palinga hel ana hana mur aria ae huna mur, pe kole hoena ana hana mur, pe hana solaki ngana mur, pe iri nenge te umume nge hana hel, pe iri nenge tetu pulut mana, hana nemur iri lochloch lape te talkome nga rika mur pe nga um papalauna koaria nga hengene mur. <sup>16-17</sup> Pe alngaria langa um papalaungana mur pe hengene mur ke te teke, “A losio haka nge imem ke mo mete ol. Iange non nenge are nga kilanga seina ngana pe Sipsip Tuna, leteria inin ngana ana etue palaungana, ngana koiloi lohot nge imem lo. Pe itei toto nenge lape mes ele ure nem?”

**6:8:** Jer 15:1-3; Ezk 5:12, 17; 14:21    **6:11:** Hem 7:9, 13; 19:14    **6:12:** Mat 24:29; Ume 2:20; Hem 8:12; 11:13; 16:18    **6:13:** Isa 34:4    **6:14:** Hem 16:20    **6:15:** Isa 2:10, 19, 21    **6:16-17:** Jol 2:11; Mal 3:2; Luk 23:30

## 7

*NeHalang Nena Sach Nenge Nauele Nena Hana Mur*

<sup>1</sup> Iok, ure lochloch ngana nei te lohot ke het pe e naue angkelo henel nge temes nga ich ana haro mur nge iri henel ke tehoo ele tuttula matana mur. Tehoo ele ke tuttula tue ruach pe tua nga ich hunu pe tua teu nga ae mur ero ol. <sup>2</sup> Ol pe e naue angkelo e nge nanas haka at nga tapa. Ana non lohaka atat nga kileng hilina ele nenga chaia haka ngana pe at luluha nga NeHalang nenge tuke koko nena sach. Pe alngana hot ke kerkereng toto lange angkelo henel nenge te mene kerkerenga nenge lape te heporeke ich pe ruach ke teke, <sup>3</sup> “A heporeke tangaia ich pe ruach pe ae mur ero. A kulkulala pol pe motal heke ara Soke NeHalang nena sach nga nena hana mur nenge te umume nge I ramaria mukam.” <sup>4</sup> Pe iri nenge tetal haka sach nge iri neu te lohot nga mata analoch pe nai (12) nenge Israel. Pe angkelo e hele at nge iau ke teke,

“Hana nemur, iri ana non kina lime iri analoch iri ana non kina lime pe ana non kina lime iri analoch iri ana non kina nai pe ana non kina lime iri analoch iri henel (144,000).

<sup>5</sup> Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Iuta tetal haka sach nge iri.

Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Rupen.

Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Ket.

<sup>6</sup> Pe hana iri ana non kina lime iri analoch iri analoch pe ana non

kina lime iri analoch iri nai (12,000)

te lohot nga mata nenge Asa.

Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Naptali.

Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Manase.

<sup>7</sup> Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Simion.

Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Liuai.

Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Isaka.

<sup>8</sup> Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Sepulun.

Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Iosep.

Pe hana iri ana non kina lime iri analoch iri analoch pe ana non kina lime iri analoch iri nai (12,000)

te lohot nga mata nenge Pen-samin.”

*Hulua Nge Palpal Lelemo Temes Nga Lut Nga Tapa*

<sup>9</sup> Ol pe enau pe e esia hulua nge mele pele nakuna nge sisele iri ero. Hulua nemur te lohot nga tuele kina papalauna mur pe nga kaleu ramana mur pe nga helenga kuena ngana mur pe hehei pe hana lochloch ngana nga ich. Pe te heronia hengeron

hussu ngana mur pe te rahite akau perperna mur pe temes nga kilanga seina ngana pe Sipsip Tuna mataria.

<sup>10</sup> Pe te makul ke palaungana toto ke te teke,

“Ara Soke NeHalang  
nenge are nga nena kilanga  
seina ngana  
iri nai Sipsip Tuna  
te mene mule ita ke ulolo.”

<sup>11</sup> Pe angkelo mur lochloch nenge temes ke te heliliu hite kilanga seina ngana neu pe ure maulul ngana henel neu pe almasinga ana hana nemur, iri lochloch ke te tualou sio nga kilanga seina ngana matana pe te heto hekeke NeHalang <sup>12</sup> ke te teke,

“Manmanna!  
Ta hele urana lange ara Soke NeHalang

pe tatal haka tote I nga letena matana urana ngana mur

pe nga kikina ngana.

Pe ta iech ele tote I pe ta heto heke I ke koko.

Oe, Manmanna Toto!”

<sup>13</sup> Ol pe almasinga ana hana nemur elle nge iri onteia iau ke teke, “Kole, onau ke itei hel nenge te heronia hengeron hussu ngana nemur mau? Pe iri mam teat langai mau?”

<sup>14</sup> Pe e tuacholia ke e teke, “Kole, iong lape o eteia pe iau e eteia ero i.”

Ol pe hele at nge iau ke teke, “Iri nemur, ngana laka iri nenge te ratoto ke te takisia aria melmelenga nenge poreke toto, nenge reria ngarang mur te poia lala nge iri. Pe te lome reria hengeron mur ke hussu toto nga Sipsip Tuna eina. <sup>15</sup> Ke pomalam, “Lape temes ke kokoes mana

nga NeHalang nena kilanga seina ngana matana,  
pe tepoi tunginga lala nge NeHalang,  
nga nena tunginga ana pele nga sinanga

pe nga miliko ke kokoes mana pule.

Pe i nenge are nga kilanga seina ngana nem,

lape lau teua iri pe nek hite iri.

<sup>16</sup> Pe lape te metearia ero  
pe te meteune ech mule ero ol.  
Pe chaia milang ngana lape hemilangia iri ero pule.

<sup>17</sup> Iange Sipsip Tuna nenge mes nga tunangana  
nga kilanga seina ngana nem matana  
lape nek hit tote iri ol.

Pe lape mene iri ke tela nga ech nenge tunge maulinga pach haka ngana.

Pe NeHalang lape taun lele mataria eina  
nga mataria ke het toto sapele.”

## 8

### *Sipsip Tuna Tualupa Hote Simanga Rahtele Nai Ngana*

<sup>1</sup> Iok, nga etue nenge Sipsip Tuna tualupa hote simanga rahtele nai ngana, kileng nga lut nga tapa lelelo ke mala pol unne mana.

<sup>2</sup> Ol pe e naue angkelo rahtele nai nge temes nga NeHalang matana nge te rahite reria ngalum paena mur.

<sup>3</sup> Pe angkelo e pule mene sapiu eina kina chalemlem ngana pe at ke mes nga tunginga ana hatanga. Pe te tunge sapiu eina nge halang toto lange i ke poi tunginga ia nga tunginga ana hatanga chalemlem ngana nenge mes nga NeHalang nena kilanga seina ngana matana. Pe makia ure neu ke pulu ngana haka lange NeHalang, luluch nga nena hana mur lochloch reria hetalaulaunga mur. <sup>4</sup> Ke angkelo neu mes nga NeHalang matana. Pe sapiu eina pulu haka kela luluch nga NeHalang nena hana mur reria hetalaulaunga nga NeHalang matana. <sup>5</sup> Ke het pe angkelo neu mene oan unne nga tunginga ana hatanga, pe tal teua langa sapiu eina kina pe ulo sue ke langa ich. Ol pe kileng chalem pe kileng kurung pe ute hel alngaria onrungrung pe mangila rur.

*Angkelo Henel Teiua Reria Ngalum Paena Mur*

<sup>6</sup> Ol pe angkelo rahtele nai neu te tatalo ala sapele ke teiua reria ngalum paena mur <sup>7</sup> pe elle iu sapele nena. Iua pe pitte matana mur nge pomanga um chatottonna pe toho nge teusil nga oan te tualolo sio langa ich. Pe te hengau lulu heke ae mur pe heilil mur lochloch nga ich ana talinga toto elle mana. Pe ich ana talinga toto iri nai pule te heporeke ero.

<sup>8</sup> Iok, angkelo nei ngana iua nena ngalum paena pe tesau hote ute nge nakuna pomanga hengene palaungana nge oan ngaulala hite. Pe tesau puluch teua langa ruach pe ruach ana talinga toto elle hul ke pomanga toho. Pe ruach ana talinga toto nai, tetu ol. <sup>9</sup> Pe nga ruach ana talinga toto nenge poreke neu, urelu lochloch ngana nenge te maulul, te mete lochloch. Pe imot mur pe sulang mur pe aka kinkino ngana mur lochloch te ngaulala pule.

<sup>10</sup> Iok, angkelo mol ngana iua nena ngalum paena pe itoch palaungana e nge matana tuaere ke manga miri-ole nenge hole hot, machereng hot nga tapa sana ke tuaulu sio nga ich. Tuaulu sio kela pe tamu teu nga ech tana mur pe nga ech pach haka ngana mur ana talinga toto elle mana nga ich. Pe ech tatana mur pe ech pach haka ngana mur ana talinga toto nai pule, tetu ol. <sup>11</sup> Pe itoch nem ene laka itoch Matasike. Pe i itoch ehech ngana ia, iange heporeke lochloche ech urana ngana mur nenge tamu teu ia. Pe hehei pe hana halang te mete iange te inia ech nenge ehech toto ke pomanga miri heina.

<sup>12</sup> Iok, angkelo henel ngana iua nena ngalum paena pe ute heporeke chaia pe teio pe itoch mur mataria ke tetua ke nek ero ol. Ke pomalam, chaia tua ero nga sinanga koana

unne pe teio pe itoch mur pule tetua ero nga miliko koana unne.

<sup>13</sup> Iok, enau la pe e esia ngie pisou nge lelehe nga tapa sana. Pe ngie neu alngana hot ke soke toto ke teke, “Musuna pol mana pe lape angkelo mol nenge tetu nei kura teiua reria ngalum paena mur. Opooi! Lape melmelenga palaungana lohot nge hehei pe hana lochloch nga ich!”

## 9

*Angkelo Lime Ngana Iua Nena Ngalum Paena*

<sup>1</sup> Iok laol, angkelo lime ngana iua nena ngalum paena pe e naue itoch nenge machereng hot nga tapa sana ke langa ich. Pe lohenga nenga polo palaungana nenge hetala ngana ero te tunge lange i ke ulolo. <sup>2</sup> Pe nga etue nenge lohe polo palaungana neu hanna, oan pais haka. Pe oan pulu ngana neu i toto hot ke pomanga manai tana e nge te tonioia. Pe pulu ngana lau ele chaia matana pe tapa sana ke kileng au. <sup>3</sup> Pe sis mur te lohot nga oan pais ngana neu pe te lehe sio ke tela nga ich. Pe te mene kerkerenga nenge tehun ke pomanga ei mur. <sup>4</sup> Pe mele hele lange iri ke teke, “A heporeke heilil pe ae ina mur nga ich ero. A heporeke laka hehei pe hana nenge NeHalang nena sach ma haka nga ramaria ero. <sup>5</sup> A tunge melmelenga palaungana lange hehei pe hana nemur ke teio iri lime pe a hune iri ke te mete ero.” Pe melmelenga nenge te amneia nem lape leisis toto ke pomanga ei hun ngana nenge leisis toto. <sup>6</sup> Pe nga etue nem hehei pe hana nemur te tuarir sakilil pe te teke te mete mana ol pe ero. Metenga e lohot nge iri ero toto.

<sup>7</sup> Pe sis nemur nakuria pomanga oriong mur nenge te tatalo ele iri ke tela nga hunelinga. Pe te kale

**8:7:** Exo 9:23-26; Ezk 38:22; Jol 2:30    **8:11:** Jer 9:15    **8:12:** Ezk 32:7; Hem 6:12-13    **8:13:** Hem 9:12; 11:14    **9:1:** Hem 20:1    **9:2:** Gen 19:28; Exo 10:12-15; Jol 2:2, 10    **9:4:** Hem 7:3    **9:6:** Job 3:21; Jer 8:3    **9:7:** Jol 2:4    **9:8:** Jol 1:6



heke ute hel nge pomanga iengien-gka chalemlem ngana nga palpalria pe ramaria pomanga ita non ramara. <sup>8</sup> Pe palpalria ina sasase ke pomanga hehei palpalria ina pe ngingiria pomanga kaone inolo mur ngingiria. <sup>9</sup> Pe te helau heke ute hel nge pomanga pampa hatat ngana ke poi hele singiria. Ure nemur hatat toto ke pomanga pampa nenge poi hele hana mauturia. Pe saharia alngaria kores ke pomanga raling pe kaleu nge hulua te palia nga aperia pe te song ke ueiuei toto ke tela nga hunelinga. <sup>10</sup> Pe hoeria te leis ke pomanga ei mur hoeria. Reria kerkere nga tunga hoeria nenge te leisia hehei pe hana pe leisis ngana tuke teio iri lime. <sup>11</sup> Sis nemur aria naungaala laka angkelo nenge nauelele polo nenge hetala ngana ero. Pe te hetue ene nga helenga Hipru ke Apaton pe nga helenga Krik te hetue ene ke Apolion. (Ene nemur luria mai koi - Non Soanna ngana nenge heporekreke ure mur.)

<sup>12</sup> Ke melmelenga nenge poreke toto, elle la het nem lo, pe nai koi te atat kura.

*Angkelo Rahtele Elle Ngana Iua Nena Ngalum Paena*

<sup>13</sup> Iok, angkelo rahtele elle ngana iua nena ngalum paena. Ol pe e longe helenga nge lohohot nga sangkar henel nenge temes nga hatanga chalemlem ngana ana haro mur. Pe hatanga neu mes nga NeHalang matana. <sup>14</sup> Helenga neu hele lange angkelo rahtele elle ngana nenge iua ngalum paena neu ke pomai, "Angkelo henel kou te kale hite iri ke tetu nga ech tana palaungana nenge Iupratis. Ola ke oun hote rur nge iri ol." <sup>15</sup> Ke pomalam angkelo neu la ke un hote rur nge angkelo henel neu. Angkelo henel neu, NeHalang tatalo ele iri ke teke lape tehun sue hehei pe hana halang nga etue nei pengpeng. Nga sinanga koana nei, pe nga etue unne nei, pe nga teio nei, pe nga

hesinga nei. Tehun sue hehei pe hana lochloch nga ich ero. Tehun sue aria tuluk elle mana pe aria tuluk nai tetu. <sup>16</sup> Pe palinga hel ana hana mur nenge teare haka nga oriong mur, e longe nge te sisele iri pe iri hulua toto (200 milion).

<sup>17</sup> Pe enau opekia iri nenge teare haka nga oriong mur ke pomai: Iri te heronia ure hel nge pomanga pampa hatat ngana ke poi ele mauturia. Ure nemur singiria remenmen ke pomanga era pe popopo ke pomanga tapaera pe koikoi ke pomanga hou. Pe oriong nemur palpalria pomalaka nga kaone inolo mur palpalria. Pe um nenge remenmen ke pomanga oan pe milang toto pe inangana siusiu toto lohohot nga haria. Pe lohohot luluch nga pulu ngana pe oan remen ngana. <sup>18</sup> Ke ure mol nenge te lohohot nga oriong nemur haria, ngaria laka; oan remen ngana, pe pais ngana, pe um nenge remenmen ke pomanga oan pe milang toto pe inangana siusiu toto. Pe ure mol nem te poreke toto, ke pomalam te hemete lochloche hehei pe hana nga ich ana talinga toto elle ke te mete lochloch. Pe ana talinga toto nai tetu ol. <sup>19</sup> Oriong nemur kikiria ngaria tunga haria pe nga hoeria pule. Pomalam te hunune hehei pe hana nga hoeria. Iange hoeria mur te hunun ke pomanga ilimo mur nenge te hunun.

<sup>20</sup> Pe hehei pe hana nenge ure poreke ngana nemur te hemete iri ero, kokoes te leles aetapuna pe te hulua leteria nga reria poinga nemur ero toto. Te heto hekeke uneinei mur pe aetapuna mur nenge teume hote iri nga um chalemlem ngana mur. Pe aetapuna nemur te longo erochro, pe tenau erochro, pe te irara erochro. <sup>21</sup> Pe pule te hulua leteria nga reria poinga poreke ngana nemur ero. Nenge te hunun hana, pe te achach, pe te salaulau, pe te kemkeme.

## 10

### *Angkelo Pe Alalaha Sune*

<sup>1</sup> Iok, enau pe e esia angkelo solaki ngana e nge sio atat nga lut nga tapa. Angkelo neu heronia ulu ke pomanga nena hengeron pe oro hetaliliu hite palpalna. Pe ramana sinaha ke pomanga chaia matana pe apena nai ape te sapellala ke pomanga oan. <sup>2</sup> Pe rahite alalaha sune nge ulala nga penna. Ana non hemes sue apena tamalmal nga ruach sana pe apena hoihoi nga ich. <sup>3</sup> Pe alngana palkolong pulut ke manga kaone inolo palaungana e chau ngana. Angkelo neu alngana pe kileng kurung ngana nge iri rahteale nai te lohot pe te hele ke te papa ele i. <sup>4</sup> Pe e teke ehas sue kileng kurung ngana nemur luria pe ero, iange e longe mele nga lut nga tapa nge hele ke teke, “Ohas sue kileng kurung ngana iri rahteale nai nem, reria helenga luna ero. O reng hite pe o heleia lange mele ero.”

<sup>5</sup> Ol pe angkelo nenge e naue nge hemes sue apena hele nga ruach pe hele nga ich neu, tul heke penna tamalmal langa lut nga tapa. <sup>6</sup> Pe poia helenga nenge kerkereng pe manmanna toto nga NeHalang ene. NeHalang i non nenge tuke maulul ke koko pe I non nenge ala hote tapa pe ure lochloch ngana nenge tetu nga tapa. Pe ala hote ich pe ure lochloch ngana nenge tetu nga ich. Pe ala hote ruach pe ure lochloch ngana nenge tetu teu nga ruach. Pe angkelo neu hele ke manmanna ke teke, “Utar nenge NeHalang letena tuanin hote ke teke poia, lape poia ke lohot pe milole ia ero. <sup>7</sup> Ke nga etue nenge angkelo rahteale nai ngana iua nena ngalum paena, NeHalang lape hemallaha hot sapele letena tuanin ngana mur. Pe letena tuanin ngana nemur lape te lohot ke manmanna ke pomanga hele nganaia lange nena hetatalonga mur.”

<sup>8</sup> Pe mele nga lut nga tapa nenge hele atat nge iau neu, hele mule at nge iau ke teke, “Ola ke o mene alalaha nenge ma ke ulala nga angkelo nenge hemes sue apena hele nga ruach pe apena hele nga ich nem penna.”

<sup>9</sup> Ke pomalam, ela nge angkelo neu pe e long hote alalaha sune neu nge i. Pe tunge at nge iau pe hele ke teke, “O mene pe o ngaua. O ngaua pe lemene urana pe monmona nga halim ke pomanga misou eina. Pe i lape pelpule sam.” <sup>10</sup> Ol pe e mene alalaha sune neu nga angkelo neu penna pe e ngau sapele. E ngaua pe lemene urana pe monmona nga halik ke pomanga misou eina. E ngaua ke het pe pelpule sak ke inin hulu toto. <sup>11</sup> Pe te hele at nge iau ke te teke, “O hetatalo sio mule lange hehei pe hana nga kileng pe kileng, pe nga mata pe mata, pe nga helenga kuena ngana mur, pe nge naungaala ana hana mur nga ich nga NeHalang letena tuanin ngana mur.”

## 11

### *NeHalang Kulosia Nena Hetatalonga Nai*

<sup>1</sup> Ol pe NeHalang tunge kula nenge te amelele ure mur aria lome ia at nge iau, pe hele at nge iau ke te teke, “O lohaka pe ola ke o amele lek tunginga ana pele ana lome, pe tunginga ana hatanga ana lome, pe o sisele hehei pe hana lochloch nenge te heto hekeke Iau nga lamau. <sup>2</sup> Pe aeteme unne nenge mapuo mes ele nge hot, o amele ana lome ero. Iange kileng unne nem e tunge lange hana lomomona ngana mur. Pe iri lape te heporeke lek Tuele Tana Nenge Heo Ngana nem ke teio iri ana non kina nai pe nai (42). <sup>3</sup> Pe lape e tunge kerkerenga lange lek hetatalonga nai ke te haliu hote lek helenga. Iri nai lape te pore haso pe te haliu hote lek helenga ke etue iri ana non kina lime iri analoch pe ana non kina analoch

**10:4:** Dan 12:4, 9  
**10:5:** Deu 32:40; Dan 12:7  
Ezk 40:3; Zec 2:1-2  
**11:2:** Luk 21:24; Hem 13:5

**10:7:** Amo 3:7  
**10:9:** Ezk 2:8-3:3  
**11:1:**  
**11:4:** Zec 4:3, 11-14

pe ana non kina mol (1, 260).”<sup>4</sup> Hana nai nem, iri ae tana nai nem nenge te hetue ke ae oliua pe pule, iri lemenga ana hemesinga haka nai nem nenge temes nga Non Soke nenge nauele ich nei matana.<sup>5</sup> Pe nenge teke mele mil iri nai aria ke teke hune iri, oan lape sapel hot nga haria ke ngaulele mele nem. Pe reria ngarang mur nenge te teke te hunune iri nai, lape oan ngaulele iri ke pomalam pule.<sup>6</sup> Pe iri nai reria kerkerenga nenge te rahele tapa sana ke pitte mol sio ero, nga etue nenge te haliu hotote NeHalang nena helenga mur. Pe iri nai reria kerkerenga nenge te poia ech ke lohote ke pomanga toho pe te heporeke ich nga urelu poreke ngana mur. Pe te poia ure nemur ke te lohote ke emule mana nga lemeria ngaria.

<sup>7</sup> Pe nga etue nenge iri nai te heulo hote reria helenga mur, hun-non palaungana nenge lohote nga polo palaungana nenge hetala ngana ero, ngira taua iri pe hekou sue iri pe hune iri ke te mete.<sup>8</sup> Pe koluria masio mana nga kue tana nga tuele tana palaungana nenge te heon heke aria Soke ia. Tuele tana nem te hakeke ke ene nai; Sotom pe Ekipto.<sup>9</sup> Pe hulua nga tuele kina papalauna mur, pe nga kaleu ramana mur, pe nga helenga kuena ngana mur, pe hehei pe hana lochloch ngana nga ich, te esesia hana nai neu koluria ke etue iri mol pe sinanga koana unne e nga etue e pule pe lemeria ero nge te alo hite iri.<sup>10</sup> Iange hana nai neu te tunge melmelenga palaungana lange hehei pe hana lochloch nga ich. Ke pomalam hehei pe hana lochloch nga ich lape te iech toto ia iri nai nge te mete. Pe reria iechinga lohote ngana nga nenge te peupeu pe te hesongong choiong.

<sup>11</sup> Iok, etue iri mol pe sinanga koana unne neu het pe NeHalang iu teu mule eingana lange iri nai ke te

maul haka mule. Pe hehei pe hana nenge te naue iri nai, operia ua toto.<sup>12</sup> Ol pe iri nai te longe mele nge hele ke soke toto nga lut nga tapa. Pe hele lange iri nai ke teke, “Imo nai a lohaka at lakoi!” Ol pe iri nai reria ngarang mur tenau pe te esia iri nai nge te lohaka luluch nga muchmua ke tela nga lut nga tapa.

<sup>13</sup> Nga etue neu pengpeng mangila palaungana rur pe tuele tana neu ana talinga toto analoch ngana, ana pele mur tehutu sio. Pe hulua nge iri ana non kina lime iri analoch iri rahtele nai te mete lochloch (7,000). Pe iri lochloch ngana nenge te maulul te loiloi ele tote iri pe te heto heke NeHalang nenge are nga lut nga tapa nga kikina ngana.

<sup>14</sup> Melmelenga nenge poreke toto naingana la het nem lo, pe mol ngaria koi atat kura.

### *Angkelo Rahtele Nai Ngana Iua Nena Ngalum Paena*

<sup>15</sup> Iok laol, angkelo rahtele nai ngana iua nena ngalum paena pe e longe hulua nga tapa nge te makul ke soke toto ke te teke,

“Ara Soke NeHalang pe Kristus te lohote  
ke iri naungaala ana hana mur  
ke tenau ele ich lochloch.

Pe lape tenau ele ke koko ol.”

<sup>16</sup> Pe almasinga ana hana iri ana non kina elle pe henel (24) nenge teare nga reria kilanga seinana ngana mur nga NeHalang matana, te tualou sio pe te tatuch sio langa ich, pe te heto heke NeHalang<sup>17</sup> ke te teke,

“Mo hele urana nge iong Non Soke  
NeHalang,

nge long non nge Kikim Toto  
pe iong o tu nge nike toto  
pe otu heueu nei pule.

Pe o talun ke o nauele kileng lochloch  
ke ulolo  
nga lem kerkerenga.

**11:5:** 2Sa 22:9; Psa 97:3    **11:6:** Exo 7:17-20; 1Sa 4:8; 1Ki 17:1    **11:7:** Dan 7:21; Hem 12:17; 13:7; 17:8    **11:8:** Luk 13:34    **11:11:** Ezk 37:5, 10    **11:12:** 2Ki 2:11    **11:13:** Hem 6:12; 16:18  
**11:14:** Hem 9:12    **11:15:** Exo 15:18; Psa 10:16; Dan 2:44; 7:14    **11:18:** Psa 110:5; 115:13; Rom 2:5; Hem 20:11-13

18 Pe hana lomomona ngana mur leteria inin pe long pule letem inin ngana lohote.

Pe lem haliunga ana etue lohote nenge lape o amnei teu lange iri nenge te mete ke ulolo.

Pe lape o tunge ure urana ngana mur lange lem hetatalonga mur nenge te rahite lem ume, pe lem hana mur, pe iri nenge te heto hekeke em pule.

Pe pule nge iri nenge pingaria iuiu pe iri nenge pingaria iuiu ero.

Pe etue nei, long am etue nenge lape o heporeke

iri nenge te hunune hehei pe hana mur nga ich.”

19 Ol pe te lohe NeHalang nena tunginga ana pele nenga lut nga tapa. Pe NeHalang nena tomungahel ana hohou, ma ke mallaha mana nga pele neu letena. Pe kileng chalem ngana, pe kileng kurung ngana, pe onrung ngana, pe mangila te lohote. Pe pitte eina nge rol ke pomanga sesser telot sio.

## 12

### *Heie Pe Ilimo Palaungana Nenge I Uneinei Ia*

<sup>1</sup> Iok, hengeilang e nge nakuna al-toto lochloch herura hot nga lut nga tapa. Ana hengeilang lohote ke pomai koi: Hei e heronia chaia matana ke pomanga nena hengeron pe mes haka nga teio. Pe iengiengka nenge are haka nga palpalna ana itoch iri analoch pe nai. <sup>2</sup> Ana hei sana pe melmelenga nenga hohonga poia i ke alngana haka iange lala nga hoho ngana mam lom.

<sup>3</sup> Iok, ute e pule lohote nga lut nga tapa. Ngana laka ilimo palaungana e nge singina remenmen. Ilimo neu palpalna iri rahtele nai pe ana sangkar iri analoch. Pe iengiengka iri rahtele nai te rongge palpalna nemur. <sup>4</sup> Pe hoena pelsis hote itoch

ana tuluk mol ngana nga tapa sana ke sio langa ich. Pe mes nga hei neu matana ke teke tone hei neu tuna nga etue nenge hoho hote. <sup>5</sup> Iok, hei neu hoe tuna tamane ngana e nenge lape rahite nena kula lekina ngana pe nauele hulua lochloch nga ich. Ke hei neu hoe tuna neu pe angkelo e chalem heke ke laia nge NeHalang nga nena kilanga seina ngana. <sup>6</sup> Pe hei neu ua ke langa ich sana lomona nenge NeHalang tatalo ele i ia. Pe lape tenau ele i nga kileng nem ke etue iri ana non kina lime iri analoch pe ana non kina analoch pe ana non kina mol (1,260).

<sup>7</sup> Ol pe hunelinga lohote nga lut nga tapa. NeHalang nena angkelo palaungana nenge ene Mikael pe pekngana mur, iriul ilimo palaungana neu pe nena tula mur ke te hunel. <sup>8</sup> Pe angkelo Mikael pe pekngana mur te hekou sue ilimo neu pe nena tula mur pe te lope hote iri nga lut nga tapa. <sup>9</sup> Pe tesau sue ilimo palaungana neu luluch nge nena tula mur ke tela nga ich. Pe ilimo palaungana neu i uneinei pe i ur halangana toto nenge te hetue ke non soanna ngana. Pe ene e pule laka Satan. I pallaka ia hulua nga ich ke te nanasia poinga poreke ngana.

<sup>10</sup> Ol pe e longge mele nge haliu ke soke toto nga lut nga tapa ke teke, “Heueu ta mene maulinga ke koko nge ara Soke NeHalang.

Kikina ngana pe nena naualanga pe nekinga lohote nga mallaha ke ulolo.

Pe Kristus nenge i sipona tal hote, Talune ana ume ke nauele hehei pe hana nga kikina ngana.

Pe non soanna ngana nem laka tesul hote i nga lut nga tapa lo, iange i hele porekreke titira mur.

Hele porekreke iri nga NeHalang matana ke kokoes nga sinanga pe nga miliko.

11:19: Hip 9:4; Hem 8:5; 15:5; 16:21 12:2: Mic 4:10 12:3: Dan 7:7 12:4: Dan 8:10 12:5: Psa 2:9; Isa 7:14; 66:7; Hem 19:15 12:7: Iut 9 12:9: Gen 3:1, 14; Luk 10:18; 22:31; Hem 20:2 12:10: Job 1:9-11; Zec 3:1

11 Pe titira mur te hekou sue i nga Sipsip Tuna eina, pe nga nena helenga manmanna ngana nenge te haliu hottote. Iri te hile hot tote singiria pe te matau metenga ero.

12 Ke pomalam imo nenge atu nga lut nga tapa a iech toto. Pe imo lochloch nenge atu nga ich pe nga ruach letena lape a amneia melmelenga palaungana iange non soanna ngana nem laka tesul hote ke sio lange imo lo! Pe non soanna ngana nem letena inin toto iange eteia ke ana etue choro mana ol.”

13 Pe ilimo neu eteia nge tesul sue i langa ich lo, pomalam tango rere hei nenge hoe tuna tamane ngana nem. 14 Pe NeHalang tunge ngie pisou palaungana sahana nai lange hei neu ke leheia. Pe lehe kela tu ke kangkanga ilimo neu ana nga ich sana lomona nenge te tatalo ele i ia. Pe lape tenau ele i nga kileng nem ke hesinga mol pe teio iri rahtele elle. 15 Pomalam ilimo palaungana neu muta hote ech nge pomanga ech tana ke nanasia hei neu ke teke hole hote i. 16 Pe ero, iange ich halaua hei neu. Ich hanna pangpanga ke pomanga polo e pe halaua hei neu ke tone ech tana nenge ilimo palaungana neu muta hote. 17 Ol pe ilimo neu letena inin taua hei neu. Pomalam lange hei neu tutuna mur hel pule ke iriul te hunel. Ngana laka iri nenge te nanasia NeHalang nena hotonga mur pe te nanas tau tote helenga manmanna toto ngana nenge Iesus hemallaha hote. 18 Pe ilimo palaungana neu mes nga ruach ilina nga peipei.

## 13

### *Ur-Inolo Nenge Lohaka Nga Ruach Letena*

12:12: Isa 44:23; 49:13    12:14: Dan 7:25; 12:7    12:17: Hem 11:7    13:1: Hem 12:3; 17:3, 7-12    13:2: Dan 7:4-6    13:3: Hem 17:8    13:5: Dan 7:8, 25; 11:36; Hem 11:2    13:7: Hem 11:7  
13:8: Psa 69:28; Hem 17:8; 20:12, 15; 21:27

1 Ke het pe e naue ur-inolo e nge lohaka nga ruach letena. Pe ur-inolo neu palpalna iri rahtele nai pe ana sangkar iri analoch. Pe iengiengka iri analoch te rongu heke ana sangkar nemur. Pe hesisinga ana helenga mur nenge latautaua NeHalang, tetu nga palpalna rahtele nai neu. 2 Pe ur-inolo nenge e naue neu, nakuna pomalaka nga naumiliko inolo palaungana e nenge singina lihoho ngana teu sisil. Pe apena huhuna mur te purpure ure nenge ene pea apena huhuna mur. Pe hanna hote laion hanna. Pe ilimo palaungana neu tunge kikina ngana pe kilanga seina ngana pe kerkerenga nenge nauele kileng, lange ur-inolo neu. 3 Pe ur-inolo neu palpalna e nakuna pomanga tetua hune ana io ke mete, pe ana io munna meu mule pe maul haka mule. Pe hehei pe hana lochloch ngana nga ich te memeleia ur-inolo neu nena kerkerenga pe te nanasia i. 4 Pe te heto heke ilimo palaungana neu iange tunge kerkerenga lange ur-inolo neu. Pe pule te heto heke ur-inolo neu pe te hele, “Itei toto nenge lape lohot ke pomanga ur-inolo nei? Pe itei toto nge ana seilil ke iri nai te hunel?” 5 NeHalang i sipona heheleia ur-inolo neu ke hele ke heto hekeke ene pe hele porekreke NeHalang. Pe lape poia ana ume ke teio iri ana non kina nai pe nai (42) iange mene kerkerenga ke ulolo. 6 Pe talun ke hele poreke NeHalang pe he porekreke NeHalang ene. Pe he sisisia kileng nenge NeHalang tuia pe iri lochloch ngana nenge tetu nga lut nga tapa. 7 Pe pule NeHalang tunge kerkerenga lange ur-inolo neu ke iriul NeHalang nena hana mur tehun el el pe hekou susue iri. Pe NeHalang tunge kerkerenga lange i ke nauele tuele kina papalauna mur, pe kaleu ramana mur, pe nga helenga kuena ngana mur, pe hehei



pe hana lochloch ngana nga ich. <sup>8</sup> Pe hehei pe hana lochloch nenge te tunga ich, lape te heto heke ur-inolo neu ene. Pe iri nenge eria masio nga maulinga ke koko ana alalaha lo, lape te heto heke ur-inolo neu ene ero. Iange NeHalang ala hote tapa pe ich ero kura pe has sue eria mur ke ulolo nga Sipsip Tuna nenge te hune, nena alalaha. Pe alalaha nem maulinga ke koko ana alalaha ia.

<sup>9</sup> Apal talngamo pe a longo ke nek. <sup>10</sup> Nenge teke NeHalang lemene ke te laua nena hana mur hel ke tema teu nga tuele au ngana, lape te laua iri pe te laia iri ke manmanna. Pe nenge teke NeHalang lemene ke te hune nena hana mur hel nga io, lape te hune iri nga io ke manmanna. Ke pomalam iok, NeHalang nena hana mur temes ke kerkereng nga leteria manmanna ngana.

#### *Ur-Inolo Nenge Lohaka Nga Ich Letena*

<sup>11</sup> Ol pe e naue ur-inolo e pule nge lohaka nga ich letena. Ur-inolo neu ana sangkar iri nai ke pomanga sipsip mur pe hele ngana pomanga ilimo palaungana nenge i uneinei ia. <sup>12</sup> Pe ur-inolo nenge lohohot rume nei, tu luluch nga nenge lohohot tala pe mene kerkerenga ke pomanga nenge lohohot tala. Pe echia hehei pe hana lochloch ngana nga ich ke te heto heke ur-inolo nenge lohohot tala. Nenge palpalna e nakuna manga tetua hune ana io pe ana io munna meu mule lo. <sup>13</sup> Ur-inolo nenge lohaka nga ich letena neu poia ure halang ke te lohohot manmana. Pe ure e nge poi hote, ngana laka nenge long sue oan nga tapa ke sio at nga ich ke hehei pe hana lochloch te naue. <sup>14</sup> Pe iu sue oan nenge neu nga kerkerenga nenge NeHalang tunge lange i, ke halaua ur-inolo nenge lohohot tala. Pe nga poinga nem, pallaka ia hehei pe hana lochloch ngana nenge tetu nga ich pe hele lange iri ke teles hote ur-inolo

nenge lohohot tala ramana nga aetapuna ke te heto heke i. Ngana laka ur-inolo nenge tetua hune palpalna elle ana io pe ana io munna meu mule lo. <sup>15</sup> Pe ur-inolo nenge lohaka nga ich letena neu, NeHalang tunge kerkerenga lange i ke iu teua eingana langa nenge lohohot tala nena lelenga nenge teles hote nga aetapuna ke hele. Hele pe hemete hehei pe hana nenge te heto heke i ero ke te mete. <sup>16</sup> Pe ur-inolo neingana nenge lohaka nga ich letena neu, echia hehei pe hana lochloch ke tetal haka sach nge iri. Iri nenge reria ure halang, pe nenge reria ure halang ero, pe iri nenge te umume nge hana hel, pe nenge teume nge hana hel ero, pe iri nenge pingaria iuiu, pe nenge pingaria iuiu ero. Hehei pe hana nemur, ur-inolo neu echia iri ke tetal haka sach nga peria tamalmal, nem pe nga ramaria. <sup>17</sup> Pe tehas ia ur-inolo nem ene nga sach nenge tetal heke nge iri nem. Ke pomalam iri nenge ur-inolo nem ene mahaka nge iri, iri mana lape te olia pe teia reria lulu. Pe iri nenge ur-inolo ene mahaka nge iri ero te olia pe teia reria lulu e ero.

<sup>18</sup> Ure nei sangsang letematana ngana. Mele nenge letena matana lape sisala luluche ur-inolo nem ene huhuna mur ke nek pe letena matana ia. Iange ene huuna nemur i none ene ia. Ke ur-inolo nem ene huuna mur koi nenge 666. (Ana non kina lime iri rahtele elle pe ana non kina mol pe rahtele elle.)

## 14

### *Sipsip Tuna Pe Nena Hana Mur Nge Iri 144,000*

<sup>1</sup> Ol pe e teke enau pe e esia Sipsip Tuna nge mes nga Hengene Nge Sion. Pe hana nenge tehas heke Temene ene nga ramaria temes luluch nge I. Hana nemur iri ana non kina lime iri analoch iri ana non kina lime, pe ana non kina lime iri analoch iri ana non kina nai pe ana non kina lime

iri analoch iri henel (144,000). <sup>2</sup> Pe e longe mele nge hele nga lut nga tapa. Pe hele ngana palkolong pulut ke pomanga nale hau ngana pe kileng kurung ngana. Pe pule e longe mele hel nge te taktakue aria milollo. <sup>3</sup> Pe te peua aria peunga heueu ngana nga kilanga seina ngana matana, pe nga ure maumul ngana henel neu pe almasinga ana hana nemur mataria. Mele eteia peunga neu ero pe iri nenge NeHalang ol hot mule iri ke ulolo te eteia. Ngana laka NeHalang nena tula mur nenge iri ana non kina lime iri analoch iri ana non kina lime, pe ana non kina lime iri analoch iri ana non kina nai, pe ana non kina lime iri analoch iri henel nem (144,000). <sup>4</sup> Hana nemur tetu ke te pengpeng toto pe te salau rara lange hehei ero. Pe te nanasia Sipsip Tuna ke tela nga kileng lochloch ngana nenge lala ia. Iri NeHalang mene mule iri ke ulolo nga hehei pe hana nga ich leteria. Pe tepoi ke pomanga ngaunga nenge tetak lohe hote nga ume ke tunginga ana. Ke NeHalang pe Sipsip Tuna te mene tele iri ke reria hana mur ia iri. <sup>5</sup> Pe kokoes te hele ke manmanna pe te pallaklaka erochro. Pe pule te poia poinga sususun ngana e ero toto.

### *Angkelo Mol Reria Haliunga*

<sup>6</sup> Ol pe e esia angkelo e pule nge lelehe nga tapa sana. Pe angkelo neu mene helenga urana toto ngana nenge tuke koko. Pe teke haliu hote lange hehei pe hana lochloch ngana nga ich. Nga tuele kina papalauna mur, pe nga kaleu ramana mur, pe nga helenga kuena ngana mur. <sup>7</sup> Pe haliu ke soke toto ke teke, “Imo apoi ke nek lange NeHalang pe a heto heke I, iange ana etue nenge amnei teu nga hulua lochloch nga ich reria poinga mur ngana koi lohote lo. A heto heke tote I. Iange I ala hote tapa pe ich pe ruach pe ech mur lochloch.”

<sup>8</sup> Iok, angkelo neingana nanas pe haliu ke teke, “Tuangachol nenge NeHalang tunge heporeke pe sisparai ia tuele tana palaugana nenge Papilon ke ulolo! Iange i heinia tuele kina mur lochloch ke aria hauaua hulu nga nena poinga nenge salaulau ana olenga tele ana ech kerkereng ngana nenge palleke.”

<sup>9</sup> Iok, angkelo mol ngana lohote pe haliu ke soke toto ke teke, “Mele hel nenge te heto heke ur-inolo pe nena lelenga nenge teles hote pe tehas heke ana has nga peria pe nga ramaria, <sup>10</sup> iri lape te inia uain nenge NeHalang letena inin ngana ana. Uain nem kerkereng toto pe ngana kou te tatalo ele, pe teling teua nga NeHalang letena inin ngana ana eulinga ke ulolo. Ke iri lape te amneia melmelenga nga oan pe nga um nenge remenmen ke pomanga oan pe milang toto pe inangana siusiu toto. Pe te amneia melmelenga nem nga NeHalang nena angkelo mur nenge te pengpeng toto mataria pe nga Sipsip Tuna matana. <sup>11</sup> Pe oan nem pulu ngana tuke kokoes mana. Ke iri nenge te heto hekeke ur-inolo pe na lelenga nenge teles hote pe iri nenge tehas heke ana has nge iri, lape te amneia melmelenga ke kokoes mana nga sinanga pe nga miliko pe tetah eingaria ia ero.” <sup>12</sup> Ke pomalam, urana nge NeHalang nena hana mur temes ke kerkereng toto. Iri nenge te rahat tote nena hotonga mur pe iri nenge leteria manmanna nge Iesus.

<sup>13</sup> Ol pe e longe mele nge hele nga lut nga tapa ke teke, “Ohas sue helenga nei ‘Talun heueu nei ke laol mele hel nenge leteria manmanna nge Non Soke pe te mete lape te iech toto.’”

Pe Opepengpeng hele ke teke, “Oe, manmanna! Lape teat luluch nga reria poinga urana ngana mur nga

**14:3:** Isa 42:10; Hem 5:9; 7:4    **14:8:** Isa 21:9; Jer 51:7-8; Hem 17:2; 18:2-3    **14:9:** Hem 13:12-17

**14:10:** Gen 19:24; Psa 75:8; Isa 51:17, 22; Jer 25:15-16; Ezk 38:22; Hem 16:19; 20:10    **14:11:** Isa

34:10    **14:12:** Hem 13:10

tapa pe te amneia melmelenga e ero ol.”

### *Lulunga Nenga Ich*

<sup>14</sup> Iok, enau pe e esia ulu hussu ngana pe e naue mele nge nakuna mange Non Tuna nge are haka nga ulu neu. Ana non ure iengiengka chalemlem ngana nga palpalna pe rahite nena eke nge matana toto. <sup>15</sup> Pe angkelo e i hot nga tunginga ana pele pe hele ke soke toto lange I nenge are haka nga ulu neu ke teke, “Lulunga ana etue at lo! O mene am eke pe o talun ke o lulu ol, iange ngaunga nemur nga ich te mera tah ke ulolo.” <sup>16</sup> Pomalam I nenge are haka nga ulu neu, tele ana eke ke lululu hote ngaunga nga ich.

<sup>17</sup> Iok, angkelo e pule i hot nga tunginga ana pele nga lut nga tapa. I pule mene ana eke e nge matana toto. <sup>18</sup> Pe angkelo e pule nenge nauele oan, i nga tunginga ana hatanga ke at pe alngana ke soke toto lange i nenge mene ana eke nenge matana toto, ke teke, “Out hoa uain tahena mur nga ich pe o takiraua iri iange nganangana mur temera lochloch ke ulolo.” <sup>19</sup> Pomalam angkelo neu hetele ana eke ke ut hoa uain tahena mur pe takiraua nganangana mur. Pe sau teua iri nga topro palaungana nenge te kolue nga ae lekina ngana. Topro neu te umeia ke uain nganangana mur aria ia, nenge tetua ule iri ke eiria lohot. Pe topro neu heilangia NeHalang letena inin ngana. <sup>20</sup> Ke uain nganangana nemur te tuaule iri nga topro neu letena. Pe topro neu manga tuele tana palaungana rumena nenge hot. Pe toho lele hot nga topro neu letena nenge te tuaule uain nganangana mur ia. Pe lele hot ke sase toto ke ana lome iri ana non kina lime iri mol (300 kilomita) pe kon haka ke ana lome elle pe tulio. (lome elle pe hakekena)

## 15

### *Angkelo Rahtele Nai Pe Melmelenga Rahtele Nai*

<sup>1</sup> Iok, e naue hengeilang e nge nakuna altoto lochloch lohot nga lut nga tapa. Hengeilang nenge e naue neu ngana laka: Angkelo iri rahtele nai nge teat luluch nga melmelenga mur nge iri rahtele nai. Melmelenga nemur melmelenga leleis ngana mur iange lape te lohot ke het pe NeHalang letena inin ngana het sapele.

<sup>2</sup> Pe e naue ute e nge nakuna pomanga ruach melona nge achouchou pe sinaha ke pomanga silonga nge teusil nga oan. Pe e naue NeHalang nena tula mur nenge te hekou susue ur-inolo pe na lelenga nenge teles hote nga aetapuna pe ene huuna mur. Hana nemur e naue iri nge te rahite aria milollo mur nenge NeHalang tunge lange iri pe temes nga ruach melona neu ilina. <sup>3</sup> Pe tepeu hote Moses iri nai Sipsip Tuna aria peunga. Moses i NeHalang nena tula nenge umume nge I. Pe hana nemur te peupeu ke pomai koi,

“Non Soke NeHalang, Iong non nge Kikim Toto,  
pe lem ume mur te lohot ke altoto lochloch.

Iong naungaala ana non pe O nauele kileng lochloch.

Pe lem poinga mur urana pe pengpeng toto.

<sup>4</sup> Non Soke, hulua lochloch te mataua Iong

pe te heto heke tote em

iange Iong non nge Heo Ngana Toto.

Pe hulua nga tuele kina mur lochloch, lape teat ke te heto hekeke Iong.

Iange lem poinga mur te pengpeng toto

pe hulua te esia ke mallaha ke ulolo.”

<sup>5</sup> Iok, hana nemur tepeu ke het pe e naue NeHalang nena pelpele nenge tepoi tunginga ana pele ia. E naue

nge mes nga lut nga tapa pe ulala ke ulolo. <sup>6</sup> Pe angkelo rahteale nai nenge teat luluch nga melmelenga rahteale nai nem tei hot nga tunginga ana pele neu. Pe te heronia hengeron urana ngana mur nge lemlem pe chalemlem. Pe te panreke kalolo chalemlem ngana mur. <sup>7</sup> Ol pe ure maulul ngana henel neu elle nge iri mene kaliu chalemlem ngana mur nge iri rahteale nai pe tunge lange angkelo rahteale nai neu. Pe kaliu rahteale nai nemur te muta ia NeHalang nenge tuke koko, letena inin ngana mur. <sup>8</sup> Pe NeHalang nena hemalmalinga palaungana pe kikina ngana toto, te muta nga tunginga pele neu letena. Pe ara pele teu la pulut nga pele neu letena ero toto kela het nga etue nenge angkelo rahteale nai neu te heulo hote reria ume ke tehet, nga ure poreke ngana rahteale nai neu.

## 16

### *NeHalang Letena Inin Ngana Ana Kaliu Iri Rahteale Nai*

<sup>1</sup> Ol pe e longe mele nge haliu ke soke toto nga tunginga ana pele neu. Pe hele lange angkelo rahteale nai neu ke teke, “A mene NeHalang letena inin ngana ana kaliu rahteale nai nem pe a eusiling hote ke sio langa ich.”

<sup>2</sup> Iok, angkelo elle ngana eusiling hote NeHalang letena inin ngana nga nena kaliu ke pasiling sue ke langa ich. Pomalam sikilla lohohot nge hehei pe hana nenge tehas heke ur-inolo ana has nge iri pe te heto hekeke nena lelenga.

<sup>3</sup> Pe angkelo nai ngana pasiling sue nena kaliu nga ruach pe ruach hul ke pomanga toho. Pe ure lochloch ngana nenge te maulul pe tetu nga ruach letena te melu lochloch.

<sup>4</sup> Iok, angkelo mol ngana eusiling hote nena kaliu nga ech matana pachpach hot ngana mur pe nga ech tatana mur pe ech nemur tehul ke pomanga toho. <sup>5</sup> Ol pe e longe angkelo

nenge nauele ech mur nge hele ke teke,

“NeHalang, Iong otu nge nike toto pe otu heueu nei  
pe Iong non nge Heo Ngana toto.

Pe urana toto nge o tunge tuangachol lange hana porekreke ngana nemur.

<sup>6</sup> O tunge tuangachol lange iri ke te inia toho  
iange iri te hune lem hana mur  
pe lem hetatalonga mur  
ke eiria lele iri nga ich!”

<sup>7</sup> Pe e longe helenga e nge lohohot nga tunginga ana hatanga ke teke,

“Oe Non Soke NeHalang, Iong non nge Kikim Toto!

Pe o amnei teu ngam nga ure mur,  
manmanna pe pengpeng toto!”

<sup>8</sup> Iok, angkelo henel ngana eusiling heke nena kaliu nga chaia matana. Pomalam chaia matana mene nena kerkerenga nenge mak tote hehei pe hana ke pomanga oan. <sup>9</sup> Pe chaia milang ngana mak tote iri pe te hele poreke NeHalang ene. NeHalang I non nge kikina toto pe nauele melmelenga nemur. Pe hehei pe hana te hulialeteria nga reria poinga poreke ngana mur ero pe te heto heke I ero toto.

<sup>10</sup> Iok, angkelo lime ngana eusiling heke nena kaliu langa ur-hinolo nena kilanga seina ngana, pe miliko sio sapele nga kileng nemur nenge ur-inolo nauele iri. Pe hehei pe hana tetua sereia melmelenga nenge lohohot nge iri ke elela. <sup>11</sup> Reria chanchan mur te tahala pe te leisis toto pe te hele poreke NeHalang nenge tunga lut nga tapa. Pe te hulialeteria nga reria poinga poreke ngana mur ero toto.

<sup>12</sup> Iok, angkelo rahteale elle ngana eusiling hote nena kaliu langa ech tana palaungana nenge Iupratis, pe ech neu soso pe tal naungaala ana hana nemur, nga chaia haka ngana



reria kue ia. <sup>13</sup> Ol pe e naue ur-lomona opene poreke ngana iri mol nge nakuria pomanga chauchar. Elle lohot nga ilimo palaungana nenge uneinei ia hanna, pe e lohot nga ur-inolo neu hanna, pe e lohot nga hetat-alonga pallaklaka ngana hanna. <sup>14</sup> Iri mol uneinei nena lelenga mur ia iri pe tepoi hote ure halang ke te lohot manmana. Pe te eukiraua naungaala ana hana mur nga kileng lochloch nga ich pe tepa heke iri ke te palhel luluch nge Non Soke pe nena hana mur nga NeHalang nenge Kikina toto ana etue palaungana.

<sup>15</sup> (Non Soke hele, “A longo ke nek! Iau lape eat ke pomanga none nenge achach! Pe mele nenge tatalo ele i ke kokoes lape iech toto pe meia i ero!”)

<sup>16</sup> Ol pe ur-inolo opene mol neu te eukiraua naungaala ana hana mur nga kileng nenge te hetue nga helenga Hipru ke Amaketon. (Hunelinga ana hasa)

<sup>17</sup> Iok, angkelo rahteale nai ngana eusiling hote nena kaliu nga tapa sana. Pe haliunga e nge soke toto lohot nga kilanga seina ngana nga tunginga ana pele ke teke, “Ure lochloch ngana het pam lo!” <sup>18</sup> Ol pe kileng chalem ngana inlemlem, pe kileng kurungrung, pe ute hel alngaria onrungrung, pe mangila palaungana rurur. Nga talun ngana toto hehei pe hana te lohot ke tetu nga ich pe mangila e nge pomai lohot ero. Pe nenge nei palaungana toto. <sup>19</sup> Pomalam, tuele tana palaungana nenge Papilon ana ich chach ke sachana mol. Pe tuele tatana mur nga kileng lochloch ngana nga ich te kurung sio lochloch. Pe NeHalang letena metene tuele tana palaungana nenge Papilon nena poinga poreke ngana mur. Ke pomalam tunge uain nenge muta nga letena inin ngana ana eulinga lange i ke inia. <sup>20</sup> Pe mimio mur pe hengene mur te

erue, pe mele nau mule iri ero ol. <sup>21</sup> Pe um chatottonna papalauna te machereng hot nga tapa sana pe telot sio ke pomanga pitte ke tema hunune hehei pe hana. Pe um chatottonna nemur te meena ngaria iri ana non kina nai pe analoch (50 kg). Pe hehei pe hana te hele poreke NeHalang nga melmelenga nenge te amneia nga pitte nenge matana rol ke pomanga um chatottonna. Lange te amneia melmelenga nem ke poreke toto.

## 17

### *Salaunga Ana Heie Pe Ur-Inolo*

<sup>1</sup> Iok, angkelo iri ratele nai te eusiling ke kaliu iri rahteale nai. Pe elle nge iri at nge iau pe hele at nge iau ke teke, “Oi at ke e henonoua iong nga melmelenga nenge lape lohot nge hei salaunga kina nenge are rochroi nga ech tatana mur. <sup>2</sup> Hei neu, naungaala ana hana mur nga ich te tomtomia i. Pe heinia hehei pe hana nga ich ke aria hauaua hulu nga nena poinga poreke ngana nenge salaulau ana ech kerkereng ngana nenge palleke.”

<sup>3</sup> Ol pe Opepengpeng roro heke iau pe angkelo neu mene iau ke mola nga ich sana lomona. Pe nga lamau e naue heie nge are haka nga ur-inolo remenmen ngana e ona. Pe ur-inolo neu palpalna mur iri rahteale nai pe ana sangkar iri analoch. Pe NeHalang ana hesisinga ana helenga mur te rongo heke singina lochloch. <sup>4</sup> Pe hei neu heronia hengeron nenge kunkun pe nenge remenmen. Pe alheke tote i nga um nenge singina insachsach, pe koikoi ke pomanga lauta, pe nga silo sachanchana nenge te insachsach, pe nga relem utona nenge kunkun pe insachsach. Pe rahite eulinga e nge insachsach pe koikoi ke pomanga lauta nga penna. Pe eulinga neu muta ia olenga tele pe poinga porekreke ngana mur nga nena poinga nenge salaulau. <sup>5</sup> Pe

16:14: Hem 19:19

16:15: Mat 24:43-44; Hem 3:3

16:16: Zec 12:11

16:18: Hem 4:5; 8:5

16:19: Hem 14:10

16:20: Hem 6:14

16:21: Exo 9:23-24; Hem 11:19

17:1: Jer 51:12-13

17:2: Isa 23:17; Jer 51:7; Hem 14:8

17:3: Hem 13:1

17:4: Jer 51:7; Hem 18:16



hasinga tapuna ngana e ma haka nga ana hei ramana pe luna pomai koi:

“TUELE TANA PALAÜNGANA  
NENGE PAPILON, HEHEI  
SALAULAUNGA KINA MUR, PE  
POINGA POREKE NGANA MUR NGA  
ICH KIRIA.”

<sup>6</sup> Pe hehei pe hana nga kileng neu tehun lapue NeHalang nena hana mur nenge te nanas tau tote Iesus nena poinga mur. Pe e naue hei neu nge in ke ana hauaua iange inia NeHalang nena hana mur nenge te hune iri tohoria.

E naue ke pomau pe ngak lohot. <sup>7</sup> Ol pe angkelo neu onteia iau, “Ngam lohot ia utar? Ngam lohot ia kau ur-inolo nenge palpalna iri rahtele nai pe ana sangkar iri analoch pe hei nenge are haka nga ona mau? Iok, lape e hemallaha hote luna lange iong ol. <sup>8</sup> Ur-inolo nenge o naue nem, maulul nge nike pe heueu nei tu ero ol pe nga hoena lape lohaka mule nga polo palaungana nenge hetala ngana ero pe at mule. Pe at mule ngana nem lisala ngana lalom, iange Kristus lape hekou sue i ke het heulo sapele. Nge nike toto NeHalang ala hote tapa pe ich ero kura pe has sue hehei pe hana hel eria nga maulinga ke koko ana alalaha. Pe iri nenge eria masio nga alalaha nem ero lape te naue ur-inolo nei pe lape te rura toto. Iange i maulul nge nike pe heueu nei tu ero ol pe nga hoena lape lohot mule.

<sup>9</sup> “Ure nei sangsang lete matana ngana. Ur-inolo palpalna iri rahtele nai nem luria laka: Sasana iri rahtele nai nenge hei neu mes hakaka ia. Pe luria e pule lataua naungaala ana hana mur nge iri rahtele nai. <sup>10</sup> Naungaala ana hana nemur lime te mete ke ulolo, pe elle i naungaala ana non heueu nei, pe elle nge iri lape atat kura. Pe nga etue nenge at lape nauele kileng ke musuna pol mana. <sup>11</sup> Pe naungaala ana hana rahtele nai neu pekngaria laka ur-inolo nenge maulul nge nike pe heueu nei tu ero ol pe lala nga het heulo ngana lo.

<sup>12</sup> “Pe sangkar iri analoch nenge o naue nem te heilangia naungaala ana hana mur nge iri analoch nge te mene kerkerenga ero kura. Pe iri lape te mene kerkerenga ke te lohot ke iri naungaala ana hana mur. Pe lape teume luluch nge ur-inolo neu ke tenau ele kileng mur nga sinanga koana unne sune elle mana. <sup>13</sup> Pe iri leteria matana ngana elle mana. Ke pomalam lape te tunge kikiria ngaria pe reria kerkerenga nenge tenau ele kileng lange ur-inolo neu. <sup>14</sup> Pe lape te hunel luluch nge Sipsip Tuna. Pe Sipsip Tuna pe nena tula mur nenge hesilei hote iri pe iua iri pe leteria manmanna nge I, lape te hekou sue hana nemur. Iange Sipsip Tuna i Non Soke nenge soke toto nge hana soksoke ngana mur pe I Naungaala ana non nenge palaungana toto nge naungaala ana hana mur.”

<sup>15</sup> Ol pe angkelo neu hele at nge iau ke teke, “Pe ech nemur nenge o esia nge hei salaunga kina nem are rochroi nge iri, te heilangia laka tuele kina papalauna mur, pe hehei pe hana lochloch nga mata pe mata, pe helenga kuena ngana mur. <sup>16</sup> Pe ur-inolo pe sangkar analoch nenge o esia iri nem lape lemeria ero ia hei nem. Pe lape te poia hei neu ke tungana poreke nga nenge te mene nena urelu mur pe singina lachlach mana pe tesau heke i langa pel sapel ngana. <sup>17</sup> NeHalang i sipona tung teua lete matana ngana nga hana nemur leteria, ke pomalam te tunge reria kerkerenga nenge tenau ele kileng lange ur-inolo neu. Pe lape ur-inolo neu nauele iri kela het nga etue nenge NeHalang letena tuanin ngana mur pe nena helenga mur te lohot ke manmanna. <sup>18</sup> Pe hei nenge o esia nem heilangia tuele tana palaungana nenge nauele naungaala ana hana mur lochloch nga ich.”

## 18

### *NeHalang Heporeke Tuele Tana*

**17:6:** Hem 18:24; 19:2

**17:7:** Hem 13:1

**17:8:** Dan 12:1; Hem 11:7; 13:7

**17:12:** Dan 7:7, 24

**17:16:** Hem 18:8

*Nenge Papilon*

<sup>1</sup> Iok, ure nemur te lohote ke het pe e naue angkelo e nge sio atat nga lut nga tapa. Angkelo neu kikina ngana palaungana toto pe nena hemalma-linga tualeme hatalia ich lochloch.

<sup>2</sup> Pe haliu hot ke soke toto ke pomai, “Tuangachol nenge NeHalang tunge heporeke pe sisparai ia tuele tana palaungana nenge Papilon ke ulolo!

Pe kileng nem tal uneinei mur reria kileng ia ol.

Pe ur-lomona mur nenge te poreke pe ngie nemur nenge muna ulu pe nenge te poreke toto tetu ia pule.

<sup>3</sup> Pe NeHalang heporeke iange nga nena poinga nenge salau halali. Pe nena poinga nem ana olenga tele, palleke ana ech kerkereng ngana.

Pe ech kerkereng ngana nem tunge ke tuele kina mur lochloch te inia ke ulolo.

Pe naungaala ana hana mur lochloch nga ich te tomtom ia i.

Pe i meia i ero toto nga nena poinga poreke ngana mur, nenge ollaka hotote hana nenge teii ia reria lulu leteria.

Pe heole iri nga reria lulu uruna ke pomalam poia iri ke reria ure halang toto.”

<sup>4</sup> Ol pe e longe mele nge hele nga lut nga tapa ke teke,

“Lek hana mur a ua hot nga kileng nem!

Atal teu luluche imo langa poinga poreke ngana nga tuele tana nem ero.

Pomalam, melmelenga nenge lohote nge iri

lape lohote nge imo ero.

<sup>5</sup> Iange reria poinga poreke ngana mur

te muta haka toto kela nga lut nga tapa ke ulolo.

Pe NeHalang letena lilil ele

poinga poreke ngana nemur ero.

<sup>6</sup> Utar nenge i sipona tung hote lo, a tung mule lange i ke purpur tote nenge tunge lange imo.

Pe poinga mur nenge poia lo, a tuachol ia lange i ke henai.

A palleke ana ech kerkereng ngana nga i sipona ana eulinga pe a poia ke ehech toto ke inia ke pomanga nenge palleke ke a inia pe amo hauaua ia.

<sup>7</sup> Isipona tal heke tote i ke teke i hei palaungana lo pe heto chonchonchone i.

Ke pomalam a tunge melmelenga ke milang toto

lange i ke tangia nga nena poinga poreke ngana nem.

Ana hei helele nga letena ke teke, ‘Tau hei palau pe eare nga lek kilinga seina ngana pe etu pakar ero.

Ke pomalam ute pele nge hetang ia iau ero!’

<sup>8</sup> Ke nga nem, melmelenga nemur lape te lohote nge i nga etue elle mana:

uringa pe tanginga pe metenga.

Pe lape oan ngaulala hite i.

Iange Non Soke NeHalang kikina ngana palaungana toto

pe Isipona lape tunge tuangachol nemur lange hei neu.

<sup>9</sup> “Pe naungaala ana hana mur lochloch nga ich te naue oan pulu ngana nenge ngaulala hite hei nem.

Pe lape leteria kolkol toto pe te tangia i iange te tomtomia i pe te mene ure mur halang nge i, nga nena poinga poreke ngana mur. <sup>10</sup> Pe temes mana nga tau iange te matau tote tuangachol nenge lohote nge i pe te hele ke te teke,

“ ‘Opoi! Tuele tana palaungana nei lakis tau kai!

Ochou! Tuele tana palaungana nenge Papilon suneu!

Lem poinga poreke ngana ana tuangachol lohote nge iong lo.

**18:2:** Isa 13:21; 34:11-14; Jer 50:39; Hem 14:8 **18:4:** Isa 48:20; Jer 50:8; 51:6, 45; 2Ko 6:17 **18:5:** Gen 18:20-21; Jer 51:9 **18:6:** Psa 137:8; Jer 50:15, 29; 2Te 1:6 **18:7:** Isa 47:7-9 **18:8:** Hem 17:16 **18:9:** Ezk 26:17; 27:30-35

Pe nga sinanga koana unne sune elle mana, ohet sio pe iong ero sapele!’ ”

11 “Pe lulu ana hana mur nenge hei neu olol ure nge iri, lape leteria kolkol toto pe te tangia i, iange lape mele olia reria lulu mur ero ol.

12 Lulu ana hana nemur, reria lulu mur nenge te iia laka: Um insachsach ngana nenge koikoi ke manga lauta, pe um chalemlem ngana nenge hussu ke manga hake, pe silo sachanchana nenge te insachsach, pe relem utona nenge kunkun pe insachsach. Pe melo nenge tuahau toto, pe nenge kunkun, pe nenge pululu toto ke pomanga ao makanna, pe nenge remenmen ke pomanga haia rorana. Pe ae kuena ngana mur nenge inangaria ehech pe ure kuena ngana mur nenge teume hote nga palngen na senger. Pe ure nemur nenge teume hote nga ae mur nenge ururia haka toto, pe nemur nenge teume hote iri nga ure nenge nakuna insachsach ke manga koiongkoiong, pe nemur nenge teume hote nga raling, pe um nenge chalemlem ke pomanga matau. 13 Pe ure inangana ehech ngana mur nenge pomanga intu, pe sapiu eina, pe loitana. Pe surumong, pe sapiu eina chochotana pulu ngana nenge inangana ehech, pe ech kerkereng ngana nenge te palleke, pe sampal eina. Pe more nganangana, pe nganangana pululu ngana, pe roli ana kolok mur, pe sipsip mur, pe oriong mur. Pe arenga mur nenge oriong mur te takrungrunge, pe hana nenge teume sio manmana nge hana hel pe ururia ero, pe hehei pe hana nenge tetak totote iri nga hunelinga.

14 “Pe lulu ana hana nemur te hele, ‘Urelu urana ngana nemur nenge mutem tautaua, iri ero tah lo. Pe pule lem kole hoena mur pe lem ure mur nenge o heto hakaka iong ia, te erue tah ke ulolo pe lape oes mule nakuria ero ol.’ 15 Hana nemur te menmene

umtutuna nge halang toto nga tuele tana neu nga reria ure mur. Pe iri lape temes mana nga tau iange te mataua tuangachol nenge lohot nge i. Pe lape leteria kolkol toto ia tuele tana neu pe te tang 16 pe te hele ke te teke,

“ ‘Opoi! Tuele tana palaungana nei lakis tau kai!

I heronia hengeron urana ngana mur nenge kunkun pe nenge remenmen.

Pe alheke tote i nga nananga chalemlem ngana mur

pe nga um nemur nenge ururia haka toto

pe nga relem utona nenge kunkun pe insachsach!

17 Pe nga sinanga koana unne sune elle mana

nena kole hoena ana paspasinga mur te erue sio!

“Pe imot ana aunga mur, pe iri nenge te umume nga imot mur, pe iri nenge tela teatat nga imot, pe imot tokoninga mur, temes nga tau toto.

18 Pe nga etue nenge Papilon ngaulala ke pulu haka, te naue pe alngaria haka pe te hele, ‘Tuele tana tei toto nge pomanga tuele tana palaungana nei!’ 19 Pe leteria kolkol toto ia tuele tana neu pe te tang ia. Pe te ngaua aso nga ramaria pe te hele,

“ ‘Opoi! Tuele tana palaungana nei lakis tau kai!

Imot tokoninga mur nenge reria imot mur te songong

tekila haka mana ia umtutuna nga hei neu nena kole hoena mur!

Pe nga sinanga koana unne sune elle mana

nena ure nemur te erue lochloch!

20 Imo nenge a tuteu nga lut nga tapa a iech toto

nga tuangachol palaungana nenge lohot nga tuele tana palaungana nei!

Pe imo NeHalang nena tula mur pe hekulkulonga mur

pe hetatalonga mur a iech pule!

lange NeHalang heporeke tote kileng nei  
nga nena poinga soanna ngana mur nenge poia lala nge imo! ”

<sup>21</sup> Ol pe angkelo solaki ngana e, mene heke chatunga ana um e nge palaungana toto pe sau puluch teua nga ruach pe hele,

“Tuele tana palaungana nenge Papi- lon lape tesau sio leteinin ana ia ke pomanga um nei, pe lape tenau mule i ero ol.

<sup>22</sup> Hario alngana pe iu alngana pe ngalum paena alngana, mele pele lape longe langa lem hingil ero ol.

Pe hana nenge te rahite ume kuena ngana mur lape tetu mule nga lem hingil ero ol.

Pe chatunga ana um palaungana nenge more nganangana ana ia, mele pele lape longe kores ngana langa lem hingil ero ol.

<sup>23</sup> Pe lemenge tualeme ngana, lape te naue nge sinaha nga lem hingil ero ol.

Pe mele hel nenge te teke te lechlei, mele pele lape longe iri nge te helele nga lem hingil ero ol.

Lulu ana hana mur nga ich, o ololia reria lulu nge nike ke te lohote ke iri kole ana hana mur lo.

Pe o pallaka ia tuele kina mur lochloch nga lem achunga paluna mur ke te nanasia poinga poreke ngana.

<sup>24</sup> Pe NeHalang nena hana mur pe nena hetatalonga mur pe iri lochloch ngana nenge te hune iri nga ich, eiria kou lele hite kileng nenge Papi- lon.”

## 19

### *Mangakul Nga Tapa*

<sup>1</sup> Iok, ure nemur te lohote ke het pe e longe makulinga palaungana nge

hira nga tapa. Hulua nga lut nga tapa te makul ke te teke,

“Pupulu Masin NeHalang!

Ta heto heke tote ara Soke NeHalang ene pe ta heto heke I nga kikina ngana pule, iange I tunge maulinga ke koko at nge ita.

<sup>2</sup> Pe amnei teu ngana nga ure mur, manmanna pe pengpeng toto.

Pe amnei teu lange hei salaulaunga kina nem, pe tunge tuangachol poreke ngana lange i ke ulolo.

Iange hei nem poia hulua nga ich ke te nanasia nena poinga poreke ngana mur.

Pe pule hei nem hemetmete NeHalang nena hana mur.

Pomalam NeHalang amnei teu lange i pe tunge tuangachol poreke ngana lange i.”

<sup>3</sup> Pe makulinga hira mule, “Pupulu Masin NeHalang! Urana Toto!

Oan nenge ngaulala hite hei neu, pulu haka ke koko.”

<sup>4</sup> NeHalang are nga nena kilanga seinana ngana. Pe almasinga ana hana mur nenge iri ana non kina elle pe henel (24) pe ure maulul ngana henel neu, te tualou sio pe te heto heke I pe te hele ke pomai,

“Manmanna Toto! Ta heto heke NeHalang ene!”

<sup>5</sup> Ol pe helenga e lohote nga kilanga seinana ngana neu ke teke,

“Imo nenge a umume nge NeHalang pe imo lochloch ngana nenge atal hekeke I

pe imo lochloch ngana nenge pingamo iuiu pe nenge pingamo iuiu ero

a heto heke ara Soke NeHalang!”

<sup>6</sup> Ol pe e longe makulinga nge hira ke pomanga nale hau ngana pe kileng kurung ngana. Hulua te makul ke:

“Ta heto heke NeHalang ene!

Ara Soke NeHalang Kikina Toto pe I Naungaala ana non ia.

<sup>7</sup> Pomalam ta iech  
pe ta heto heke tote I!  
Iange Sipsip Tuna ana etue at lo  
nenge lape lei.

Pe nehei tatalo ele i ke ulolo.

<sup>8</sup> NeHalang tunge hengeron pululu  
ngana nge hussu pe lemlem pe  
chalemlem toto lange hei neu  
ke heronia.”

(Hengeron pululu ngana neu heilangia  
NeHalang nena tula mur reria  
poinga urana ngana mur.)

<sup>9</sup> Ol pe angkelo hele at nge iau ke  
teke, “Ohas sue helenga nemur: Iri  
nenge NeHalang iua iri ke teat nga  
ngaunga matana nenga Sipsip Tuna  
ana leinga, lape te iech toto.” Pe  
hele pule ke teke, “Helenga nemur,  
NeHalang nena helenga manmanna  
toto ngana mur ia iri.”

<sup>10</sup> Nga etue neu pengpeng e tualou  
sio nga angkelo neu apena huna, ke e  
teke e heto heke i pe ero. Iange i hele  
ele iau ke teke, “Opoi ke pomam ero!  
Iau NeHalang nena tula iau nenge e  
umume nge I. Ke e pomange iong pe  
titim mur nenge a rahat tote helenga  
manmanna toto ngana nenge Iesus  
hemallaha hote. Pe helenga man-  
manna toto ngana nemur kik haka  
tote hetatalonga mur leteria. Ke po-  
malam o heto heke mene NeHalang  
itoro!”

### *NeHalang Tuna Hekou Sue Ur- Inolo Mur*

<sup>11</sup> Ol pe e naue tapa nge ulala ke  
pangpanga pe e esia oriong hussu  
ngana e. Pe mele nenge are haka nga  
oriong neu ene laka Lete Manmanna  
pe Poinga Nge Pengpeng Huria. Ana  
non nena poinga pengpeng nge poi  
heke hunelinga pe tuachol ia poinga  
poreke ngana mur. <sup>12</sup> Pe matana  
sapellala ke pomanga oan remen  
ngana pe te kale heke iengiengka  
mur nga palpalna. Pe tehas heke  
mele ene nga ramana. Pe mele ene  
neu hulua te eteia ero, I toro mana  
eteia. <sup>13</sup> Pe heronia hengeron sase

ngana nenge te panun teua nga toho  
pe te hetue ke ene “NeHalang nena  
Helenga.” <sup>14</sup> Pe palinga hel ana hana  
mur nga tapa teare haka nga oriong  
hussu ngana mur pe te nanasia I.  
Pe hana nemur te heronia hengeron  
pululu ngana mur nge lemlem pe  
hussu. <sup>15</sup> Pe palinga hel ana mese  
sase ngana e nge matana toto sere  
hot nga hanna. Mese nenge lape  
hekou sue tuele kina nemur, nenge  
nena ngarang mur ia iri. Pe lape  
mene nena kula lekina ngana ke  
nauele tuele kina nemur. Pe lape  
heporeke hehei pe hana ke pomanga  
uain nganangana mur nenge tetua  
ule nga topro nenge tekolue nga ae  
lekinga ngana. Pe uain ana topro  
nem heilangia NeHalang nenge Kik-  
ina toto letena inin ngana. <sup>16</sup> Pe tehas  
ia helenga nei nga nena hengeron  
sase ngana nga haena tamalmal:

“NAUNGAALA ANA NON NENGE  
PALAUNGANA TOTO NGE  
NAUNGAALA ANA HANA MUR. PE  
NON SOKE NENGE SOKE TOTO NGE  
HANA SOKSOKE NGANA MUR.”

<sup>17</sup> Ol pe e naue angkelo e nge mes  
haka nga chaia matana. Pe angkelo  
neu alngana ke soke toto lange ngie  
mur nenge te lelehe nga tapa sana  
ke pomai, “Imo lochloch a at ke a  
eukirau nga ngaunga matana nenge  
NeHalang. <sup>18</sup> A at ke a ngaua hana ne-  
mur koluria. Ngana laka: Naungaala  
ana hana mur, pe palinga hel ana  
hana mur aria papalauna mur, pe  
hana kerkereng ngana mur, pe ori-  
ong mur, pe hana nenge te songongia  
iri, pe hana lochloch. Iri nenge te  
umume nge hana hel kura, pe iri  
nenge teume ero ol, pe iri nenge pin-  
garia iuiu, pe nenge pingaria iuiu  
ero!”

<sup>19</sup> Ol pe e naue ur-inolo pe naun-  
gaala ana hana mur lochloch nga  
ich pe reria palinghel ana hana mur,  
nge te eukirau ke te teke te hunel  
luluch nge Non Soke nenge are haka



nga oriong pe nena palinga hel ana hana mur. <sup>20</sup> Pe Non Soke pe nena hana mur te hekou sue ur-inolo neu iri nai neingana nenge lohaka nga ich letena pe mene munna ke popoia urelu ke te lohot manmana pe pal-laka halali. Pe nga etue nenge poia urelu nemur ke te lohotot, channanga ia hehei pe hana nenge tehas heke ur-inolo ana has nge iri ke te heto heke ur-inolo na lelenga nenge teles hote. Pe iri nai, Non Soke pe nena hana mur tesau sio maulul ia iri langa oan nga polo palaungana, nga um remen ngana nenge milang toto pe inangana siusiu toto ke pomanga luchluch. <sup>21</sup> Pe Non nenge are haka nga oriong hussu ngana neu, hun lochloche palinga hel ana hana nemur nenge tetu kura ke te mete lochloch. Ana non hune iri nga palinga hel ana mese nenge sere hot nga hanna. Pe ngie mur lochloch te ngaua aria pum ke saria una toto.

## 20

### *Hesinga Iri Ana Non Kina Lime Iri Analoch (1000)*

<sup>1</sup> Iok, ure nemur te lohot ke het pe e naue angkelo e nge sio at nga lut nga tapa. Pe angkelo neu rahite lohenga nenga polo palaungana nenge hetala ngana ero pe ngautou tana palaungana. <sup>2</sup> At pe hekou sue ilimo palaungana neu pe kale hite pe lape tuke pomalam mana ke ana hesinga iri ana non kina lime iri analoch (1000). Ilimo palaungana neu i uneinei pe i ur-halangana toto ia nenge te hetue ke non soanna ngana pe ene e pule Satan. <sup>3</sup> Angkelo neu kale hite ke het pe sau teua langa polo palaungana nenge hetala ngana ero pe piu hite ana piunga pe hahite ke kerkereng toto. Pe ilimo palaungana neu lape channanga mule hehei pe hana ero ol kela het nga hesinga iri ana non kina lime iri analoch het ngana (1000). Ke het pe te lohe hot mule i pe lape tuke ana etue choro mana.

<sup>4</sup> Ol pe e naue kilanga seina ngana mur. Pe iri nenge teare haka nga kilanga seina ngana nemur te mene kerkerenga nenge tenau ele hehei pe hana. Pe e naue hana nenge te chatoa karia operia mur pule. Ngana laka iri nenge te haliu hotote NeHalang nena helenga mur pe helenga manmanna toto ngana nenge Iesus hemallaha hote. Pe iri te heto heke ur-inolo ero pe te heto heke na lelenga nenge teles hote ero pe te palheke ana has nga peria pe nga ramaria ero pule. Iri te maul haka mule pe iriul Kristus ke tenau ele hehei pe hana ke hesinga iri ana non kina lime iri analoch (1000). <sup>5</sup> Iri nemur te maul haka mule ngaria lohot tala nga iri hel te maul haka mule ngaria. (Ke hehei pe hana hel nenge te mete ke ulolo lape te maul haka mule nga etue nei ero. Iri lape te kulala ke hesinga iri ana non kina lime iri analoch het mukam.) <sup>6</sup> Pe iri nemur nenge te maul haka mule tala lape te iech toto iange iri, NeHalang nena hana mur ia iri. Pe kerkerenga nenga metenga nei ngana hekou sue iri ero. Pe lape te lohot ke NeHalang pe Kristus reria tunginga ana hana mur. Pe lape iriul Kristus ke tenau ele hehei pe hana ke hesinga iri ana non kina lime iri analoch (1000).

### *Te Hekou Sue Satan.*

<sup>7</sup> Iok, hesinga iri ana non kina lime iri analoch neu het pe lape te lohe hot mule Satan nga tuele au ngana nenge tuteu ia. <sup>8</sup> Pe lape langa kileng ana haro henel nenga ich ke pallaka ia hehei pe hana. Ngana laka tuele kina nemur nenge Kom pe Makom. Pe lape eukiraua iri ke tepoi haka hunelinga luluch nge NeHalang. Hana nemur iri hulua toto ke pomanga peipei nenga ruach ilina. <sup>9</sup> Pe tei ke tela nga kileng lochloch ngana nga ich pe te heliliu hite NeHalang nena hana mur tetu ngaria luluch nga tuele tana palaungana nenge NeHalang mutena tau tote. Pe

ero, oan sio at nga tapa ke ngaualala hite iri. <sup>10</sup> Pe non poreke ngana nenge channanga ia iri nem lape tesau sue i ke langa oan nga polo palaungana. Nga um remen ngana nenge milang toto pe inangana siusiu toto ke pomanga luchluch. Pe ur-inolo pe neingana, tesau sio tele iri langa polo neu lo. Pe lape te amneia melmelenga nga sinanga pe nga miliko ke koko.

### *NeHalang Nena Haliunga Palaungana Lohot*

<sup>11</sup> Ol pe e naue none nge are haka nga kilanga seinana ngana nenge tua-hau toto. Pe tapa pe ich te erue sio mana nga matana pe muria ero ol. <sup>12</sup> Pe e naue iri lochloch nenge te mete lo. Iri nenge pingaria iuiu pe nenge pingaria iuiu ero, temes nga kilanga seinana ngana neu matana. Pe te ulele alalaha mur nenge tehas sue reria poinga mur ia. Pe te ulele alalaha e pule nenge maulinga ana. Pe NeHalang amnei teu lange iri lochloch nga reria poinga mur nenge tehas sue nga alalaha nemur. <sup>13</sup> Hehei pe hana nenge te mete nga ruach te lohot nga ruach pe tela ke temes nga NeHalang matana. Pe iri nenge te mete pe operia mur tetu nga metenga ana kileng, tela pule ke NeHalang amnei teu lange iri elle pe elle nga reria poinga mur. <sup>14</sup> Pe NeHalang lemene ero toto ia Metenga pe Metenga Ana Kileng ol. Ke pomalam tesau sue iri ke tela nga oan nga polo palaungana. Polo palaungana neu i metenga nei ngana ia. <sup>15</sup> Pe hehei pe hana nenge eria masio nga maulinga ke koko ana alalaha ero, lape tesau sue iri pule ke tela nga oan nga polo palaungana neu.

## 21

### *Tapa Heueu Ngana Pe Ich Heueu Ngana*

**20:12:** Dan 7:9-10; Mat 25:31-46; Ume 17:31; 2Ko 5:10; Hem 13:8      **20:13:** Rom 2:6; 1Pi 1:17; Hem 2:23; 22:12      **21:1:** Isa 65:17; 2Pi 3:13      **21:2:** Isa 52:1; 61:10; Hip 11:16; 12:22; Hem 3:12      **21:3:** Lev 26:11-12; Ezk 37:27; Zec 2:10; 2Ko 6:16      **21:4:** Isa 35:10; 65:19; Hem 7:17      **21:5:** 2Ko 5:17  
**21:6:** Isa 55:1; Jer 2:13; Ioa 7:37; Hem 1:8, 17; 22:17      **21:7:** 2Sa 7:14; 1Ch 17:13; Psa 89:26-27  
**21:8:** Mat 25:41; Hem 20:15; 22:15

<sup>1</sup> Iok, e naue ure nemur nge te lohot ke het pe e esia tapa heueu ngana pe ich heueu ngana. Iange tapa pe ich nenga tele ngana, ngana kou te erue sio ke ulolo. Pe ruach pule tu ero ol. <sup>2</sup> Pe e naue NeHalang nena kileng Ierusalem heueu ngana nge Heo Ngana Toto nge sio atat nga tapa nge NeHalang. Pe kileng neu poi ke malaka nge hei malolong e nge lei heueu ngana pe hemalmalia i ke nek toto pe lataua ene. <sup>3</sup> Pe e longe mele nge hele ke soke toto nga kilanga seinana ngana neu ke teke, "Anau! NeHalang na kileng sio at ke tu luluch nge hehei pe hana. Pe NeHalang i sipona lape tu luluch nge iri ke aria Soke ia. Pe iri te lohot ke NeHalang nena hana mur ia iri. <sup>4</sup> Pe NeHalang lape taun lele mataria eina nga mataria. Pe metenga pe lete kolkol pe tanginga pe melmelenga lape te lohot nge iri ero ol. Iange ure nemur nenge nike ana tehet lochloch ke ulolo."

<sup>5</sup> Pe I nenge are nga kilanga seinana ngana neu hele, "A esia lo! E poia ure lochloch ngana ke iri heueu ngana mule." Pe hele at nge iau pule ke teke, "O has sue helenga nemur iange i helenga manmanna ngana ia, pe lape hehei pe hana leteria manmanna ia."

<sup>6</sup> Pe hele at nge iau ke teke, "E poia ke het lo! Iau Talun ngana Toto pe Iau Hetala ngana Toto. Iau sipok e poia ure lochloch ngana ke te talun, pe nga lemek ngak mana e poia ke te het mule. Pe mele nenge meteana ech lape e poia i kela in nga ech nenge tunge maulinga pach haka ngana. Pe ech nem uruna ero. <sup>7</sup> Ke mele nenge hekou susue poinga poreke ngana lape e tunge ure urana ngana nemur lange i. Iau NeHalang pe i ana Soke Iau pe tuk laka i. <sup>8</sup> Pe hana nenge aria seilil ero nga leteria manmanna ngana, pe nenge te hile sue leteria manmanna ngana, pe nenge te popoi

poinga poreke ngana, pe nenge te hunun hehei pe hana, pe nenge te achach, pe nenge te salaulau, pe hana nenge te heto hekeke aetapuna mur, pe nenge te pallaka hali, hana nemur lape tesau sue iri langa oan nga polo palaungana. Nga um remen ngana nenge milang toto pe inangana siusiu toto ke pomanga luchluch. Nenge nei i metenga neingana ia.”

### *Kileng Ierusalem Heueu Ngana*

<sup>9</sup> Iok, angkelo mur iri rahtele nai. Pe elle nge iri rahit ke kaliu rahtele nai nenge te mutaia melmelenga hetala ngana mur. Ana non at pe hele at nge iau ke teke, “Oiat ke e henonou iong ia hei malolong e nenge Sipsip Tuna lape leia.” <sup>10</sup> Ol pe Opepengpeng roro heke iau pe angkelo mene heke iau langa hengen nenge ona langa lut toto pe henonoua iau nga Tuele tana nenge Heo Ngana toto. Tuele tana nga kileng nenge Ierusalem. Pe ana kileng sio atat nga tapa nge NeHalang. <sup>11</sup> Pe NeHalang nena hemalmalinga poia ke tualeme pe chalemlem pe makelkele ke pomanga oro pe insachsach ke pomanga silonga. <sup>12</sup> Pe ana mapuo haka langa lut toto pe mes ke liuliu tom pe matana iri analoch pe nai. Pe angkelo iri analoch pe nai tenau ele matana elle pe elle. Pe kaleu ramana analoch pe nai nenge Israel, eria ma haka nga mapuo matana analoch pe nai neu. <sup>13</sup> Mapuo matana mol, tetu nga ele nenge nau langa chaia haka ngana pe mol, tetu nga ele nenge nau haka langa lut. Pe mol tetu nga ele nenge nau lange sio, pe mol tetu nga ele nenge nau langa chaia sio ngana. <sup>14</sup> Pe kileng neu ana mapuo te lung heke nga um papalauna mur nge ana lala iri analoch pe nai. Pe Sipsip Tuna nena hekulkulonga analoch pe nai nem, eria rongo heke um nemur.

<sup>15</sup> Pe angkelo nenge hele atat nge iau neu rahite kula nenge te amelele

ure mur aria lome ia nge singina chalemlem. I lape amele tuele tana neu sase ngana pe pongponga ngana pe lape poia ke pomau pule nga mapuo pe nga piunga mur. <sup>16</sup> Pe tuele tana neu alalina mur iri henel pe aria lala elle mana. Pe sase ngana pe pongponga ngana aria lome te purpur hel toto. Ke angkelo amele tuele tana neu sase ngana nga nena kula pe ana lome iri ana non kina lime iri analoch iri nai pe ana non kina analoch (2,200). Pe pongponga ngana pe ona haka ngana aria lome te purpur alahel pule. <sup>17</sup> Pe amele mapuo ke pomanga hehei pe hana team alala urelu. Pe mapuo ona haka ngana ana lome lohote ke iri ana non kina mol pe lime (65). <sup>18</sup> NeHalang umeia mapuo neu nga um nenge singina chalemlem pe makelkele ke pomanga oro. Pe umeia tuele tana neu nga um nenge chalemlem pe koikoi ke pomanga lauta pe sinaha ke pomanga silonga. <sup>19</sup> Pe talue um makelkele ngana mur nenge ururia haka nga tuele tana neu ana mapuo apena huhuna mur. Ke um nenge tal tele, ngana laka um nenge ene um iaspa. Pe nei ngana laka um popopo ngana nenge ene um sapaia. Pe mol ngana laka um nge ene um aket pe henel ngana laka um rangrang ngana nenge ene um emerel. <sup>20</sup> Pe lime ngana laka um nenge remenmen pe hussu nenge ene um satonikis. Pe rahtele elle ngana laka um remenmen ngana nenge ene um kanelian. Pe rahtele nai ngana laka um koikoi ngana nenge ene um kisolae. Pe rahtele mol ngana laka um nenge rangrang pe pomanga popopo nenge ene um peril. Pe rahtele henel ngana laka um nenge achngana koikoi nenge ene um topas. Pe analoch ngana laka um nenge ene um kisopes. Pe analoch pe elle ngana laka um nenge ene um iasin. Pe analoch pe nai ngana laka um nenge kunkun pe achngana popopo

**21:10:** Ezk 40:2

**21:11:** Isa 60:1-2, 19

**21:12:** Ezk 48:30-35

**21:15:** Ezk 40:3; Hem 11:1

**21:18:** Isa 54:11-12

nenge ene um emetis. <sup>21</sup> Pe mapuo matana analoch pe nai neu ana piunga mur NeHalang umeia nga ure nenge nakuna pomanga relem utona nenge kunkun pe chalemlem. Ke ure neu elle pe elle iri piunga nga mapuo matana analoch pe nai neu. Pe kue mur nga tuele tana neu te umeia nga um nenge chalemlem pe koikoi ke pomanga lauta pe sinaha ke pomanga silonga.

<sup>22</sup> Pe e naue tunginga ana pele e nga tuele tana neu ero toto. Iange tunginga ana pele nenga tuele tana neu, ngana laka Non Soke NeHalang nenge Kikina Toto iri nai Sipsip Tuna. <sup>23</sup> Pe chaia pe teio te tualeme nga tuele tana neu ero, iange NeHalang i sipona tunge lemenga palaungana langa kileng neu. Pe Sipsip Tuna i lemenga nenge tuteu nga tuele tana neu. <sup>24</sup> Hehei pe hana lochloch lape tei manmana nga lemenga nga tuele tana neu. Pe naungaala ana hana mur nga ich lape te takis teua reria kole hoena mur nga tuele tana neu ke te tunge lange Non Soke. <sup>25-26</sup> Pe hulua nga kileng pe kileng lape te takis teua reria kole hoena putantana mur nga tuele tana neu pule. Pe kokoes tuele tana neu ana mapuo matana mur tetu ke te pangpanga manmana, iange tuele tana neu tualeme ke pomanga sinanga ke koko pe miliko e ero ol. <sup>27</sup> Pe ure nemur nenge te poreke nga NeHalang matana pe hana nenge te popoi poinga poreke ngana pe te pallaklaka lape teteu langa tuele tana neu ero toto. Pe hehei pe hana nenge eria masio nga maulinga ke koko ana alalaha nenge Sipsip Tuna nena ia, iri mana lape teteu langa tuele tana neu.

## 22

### *Ech Pe Ae Nenge Te Tunge Maulinga*

**21:23:** Isa 60:19-20; Hem 22:5    **21:24:** Isa 60:3, 5    **21:25-26:** Isa 60:11    **21:27:** Isa 52:1; Ezk 44:9; 1Ko 6:9-10    **22:1:** Ezk 47:1    **22:2:** Gen 2:9; Ezk 47:12; Jol 3:18; Zec 14:8    **22:4:** Mat 5:8; Hem 3:12    **22:5:** Dan 7:18, 27; Hem 5:10; 20:6; 21:23, 25    **22:6:** Hem 1:1    **22:7:** Hem 1:3  
**22:8:** Hem 19:10

<sup>1</sup> Iok, angkelo neu henonoua iau nga tuele tana heueu ngana neu ke het pe henonoua iau nga ech nenge tunge maulinga nge chalemlem ke pomanga silonga. Ana ech pach haka nga NeHalang iri nai Sipsip Tuna reria kilanga seina ngana ene. <sup>2</sup> Pe lele nga tuele tana neu ana kue tana tunangana pengpeng. Pe ae nenga maulinga mes kaliu ala nga ech neu ilina ele pe ele. Ae nem hei tele mana nga teio lochloch. Ke tehei ke etueria iri analoch pe nai nga hesinga elle. Ana ae mur iria he maululia hehei pe hana nga ich nga haleles mur. <sup>3</sup> Pe poinga tunten ngana mur nenge NeHalang hisis totote iri lape te lohot nga kileng neu ero ol. NeHalang pe Sipsip Tuna reria kilanga seina ngana mur lape teare nga kileng neu pe nena hana mur nenge te umume nge i te heto hekeke I. <sup>4</sup> Pe iri lape tenau haka nga ramana pe lape leteria tu hit mene NeHalang itoro ol. <sup>5</sup> Pe kileng lape tal etuene ero ol. Ke pomalam hulua lape te naue kileng tualeme ngana pele ero ol iange Non Soke NeHalang i sipona lape tunge lemenga lange iri. Pe iri lape tenau ele kileng mur ke koko ke pomanga naungaala ana hana mur.

<sup>6</sup> Pe angkelo neu hele at nge iau ke teke, “Helenga nemur i manmanna pe hehei pe hana lape leteria manmanna ia. Pe Non Soke NeHalang opene roro heke nena hetatalonga mur. Pe kulosia nena angkelo ke lange nena non nenge umume nge I ke henonoua i nga ure nemur nenge musuna pol mana pe te lohot.”

### *Jesus At Mule Ngana Heroi Toto Lo*

<sup>7</sup> Iesus hele, “A longo ke nek! Musuna pol mana pe lape eat mule! Pe alalaha nei helele ia urelu nemur nenge lape te lohot heueu pe nga hoena pule. Pe iri nenge te nanasia



helenga manmanna ngana nenge NeHalang hemallaha hote nga alalaha nei lape te iech toto.”

<sup>8</sup> Iau Ioanes, pe e longe pe e naue ure nemur lochloch. E longe iri pe e naue iri ke het pe e tualou sio nga angkelo nenge henonoua iau nga ure nemur apena huna ke e teke e heto heke i. <sup>9</sup> Pe ero iange i hele ele iau ke teke, “Opoi ke pomam ero! Iau NeHalang nena tula iau nenge e umume nge I. Ke iau e pomange iong pe titim mur nenge iri hetatalonga pe iri lochloch ngana nenge te nanas tau tote helenga manmanna ngana nenga alalaha nei. Ke pomalam o heto heke mene NeHalang itoro!”

<sup>10</sup> Pe hele at nge iau pule ke teke, “Pe o reng hite helenga manmanna toto ngana nenge manga alalaha nei ero. Iange aria etue nenge te lohot ia heroi toto lo. <sup>11</sup> Pe mele nenge popoi poinga poreke ngana, hetaun taua nena poinga poreke ngana mur ke lala. Pe mele nenge letena muna ulu nga poinga poreke ngana, hetaun taua letena muna ngana nemur ke lala. Pe mele nenge popoi poinga nge pengpeng, nanasia poinga nge pengpeng. Pe mele nenge tuke pengpeng, tuke pengpeng ke kokoes.”

<sup>12</sup> Pe Iesus hele, “A longo ke nek! Musuna pol mana pe lape eat mule! Eat pe e mene luluche hehei pe hana ururia. Pe lape e tunge lange mele elle pe elle ke purpure reria poinga mur nenge te popoia. <sup>13</sup> Iau Talun ngana Toto pe Iau Hetala ngana Toto. Iau sipok e poia ure lochloch ngana ke te talun, pe nga lemek ngak mana e poia ke tehet mule. Iau Tala toto pe Iau nga Rume toto.

<sup>14</sup> “Pe hehei pe hana nenge te nanas tau tote NeHalang nena helenga mur lape te iech toto. Iange lape NeHalang penge iri ke tei teu nga piunga nenga tuele tana neu ke te ngaua ae nenge tunge maulinga nganangana.

<sup>15</sup> Pe kaone mur, pe hana nenge te popoi ure paluna mur, pe nenge te salaulau, pe nenge te hunun hana, pe nenge te heto hekeke aetapuna mur, pe iri nenge te pallaklaka, pe te nanasia nga reria poinga mur, iri lochloch lape tetu mana nge hot.

<sup>16</sup> “Iau Iesus pe e hekule lek angkelo ke haliu hote ure nemur lange imo NeHalang nena hana mur. Pe e lohot nga mata nenge ne Teuit pe nakuk sinaha ke pomanga itoch uachuach ana nenge tualeme toto.”

<sup>17</sup> Pe Opepengpeng pe Sipsip Tuna nehei te hele lange Iesus ke te teke, “O i at ol!” Pe imo nenge a longe helenga nei mur, imo pule a hele lange Iesus ke a teke, “O i at ol!” Pe imo nenge letemo meteana ech toto, ai at ol. Pe iri nenge lemeria taua ech nenge tunge maulinga pe uruna ero, teat luluch pule.

### *Ioanes Tunge Helenga Kerkereng Ngana*

<sup>18</sup> Iau Ioanes, pe e teke e hele toto lange imo hana lochloch nenge a longe helenga manmanna ngana nenge tunga alalaha nei. Nenge teke mele tal hoo heke helenga hel nge al-toto ke langa helenga nemur lape NeHalang tal hoo heke ana melmelenga poreke ngana nemur nenge alalaha nei heleia ke ulolo. <sup>19</sup> Pe nenge teke mele hile hote helenga hel nga helenga manmanna ngana nenge tunga alalaha nei, lape NeHalang penge i ke teu langa tuele tana nenge heo ngana ero. Pe pule i lape mene ngaunga nga maulinga ana ae ero nenge alalaha nei heleia ke ulolo.

<sup>20</sup> Pe I nenge hemallaha hote ure lochloch ngana nemur hele ke pomai koi, “Oe! Musuna pol mana pe eat mule!

Oe, Non Soke Iesus O i at!”

<sup>21</sup> Mutenga nenge Non Soke Iesus lape tu luluch nge imo NeHalang nena hana mur lochloch. Manmanna Toto.